


Verikariano Vou  
Na Baki



The New Testament in the Baki language of Epi, Vanuatu

**Verikariano Vou Na Baki**  
**The New Testament in the Baki language of Epi, Vanuatu**  
**Le Nouveau Testament en Baki langue de l'île d'Épi au Vanuatu**  
**— Niutestamen long Baki lanwis, blong Epi Aelan, Vanuatu**

copyright © 2016 Wycliffe Bible Translators, Inc.

Language: Baki

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2022-03-11

---

PDF generated using Haiola and XeLaTeX on 21 Feb 2024 from source files dated 31 Aug 2023  
f1528695-aae7-544e-aadd-9084a3830ae4

## Contents

Mataiu . . . . .	1
Mak . . . . .	58
Luka . . . . .	94
Jone . . . . .	158
Imāuano Nalo . . . . .	205
Romo . . . . .	265
1 Korin . . . . .	294
2 Korin . . . . .	320
Kalesia . . . . .	338
Eveso . . . . .	348
Vilipae . . . . .	356
Kolosia . . . . .	364
1 Tesalonaika . . . . .	371
2 Tesalonaika . . . . .	377
1 Timoti . . . . .	380
2 Timoti . . . . .	388
Taitas . . . . .	394
Vailimon . . . . .	398
Abe Kulo Ju . . . . .	400
Yemesi . . . . .	422
1 Pitere . . . . .	429
2 Pitere . . . . .	438
1 Jone . . . . .	443
2 Jone . . . . .	449
3 Jone . . . . .	450
Jut . . . . .	452
Navisiṗeiano . . . . .	455

**Yesu Kristo Kiano Ioluano  
Vou  
Napano  
MATAIU  
Bivitauiaio  
Verialiano Moti**

*Tukunu bulati na niosi nei*

Niosi nei Yesu Kristo Kiano Ioluano Vou napano Mataiu jirio, naio berial ioluano vou ber Yesu naio be toro napano Atua berkario ban kiano tomu nalo nua, ber mia rimeiri rilarur kiano tomu nalo. A ea Yesu, verikariano nalo napano Atua mila ban kiano tomu nalo nei ea Naverikariano, moruo nalo amoluo.

Yesu moluo ea kulo Israel kialo yati, naio be nalo tai jo bijalo, mia ioluano vou nei maka ve nalo nei ga kanalo, be tomu nalo na yetemerba kanalo.

Mataiu midu vattitig torogio nalo na niosi nei ju jibe nei. Beamu, naio berii napano Yesu kiano moluioano, mia jokia ban berii tukunu na napano Jone baruei ea naio, bija napano Siriaro milavon naio. A iorou, naio berii napano Yesu jikar kiano iñauano ea tanobuku nei Kalele, ana jo berii ioluano vou ban tomu nalo, a jo berlogloglo, a jo milarur tomu nalo kialo mieano. Mia iorou bereio, naio berii napano Yesu jaluvo den Kalele miel ba Yerusalemo, a naio berii vite nalo napano Yesu mila ea sude maaro na kiano iñauano. Mia maariano, naio berii napano Yesu mīaro, a naio meul bereio.

Mataiu berii napano Yesu be Naveriloglogiano novo tai napano mije moroano ka verial nioti na Atua kiano Tuboiano, a berii bajago napano Atua binimeiri be Parinio Tubo ka kiano tomu nalo. Vite nalo telabo napano Yesu berloglog ka tomu nalo, Mataiu jankiano ea yati jimo.

Yesu berloglog kiano tomu nalo mave ea suku. Ea kiano verloglogiano nene, naio berial bajago napano tomu nalo monoka alaio, ka amei napano Atua ve Parinio Tubo kalo. A naio berial kialo iñauano, a kialo moroano nalo, a vite nalo napano mia avokar ea juluvati na kialo meuliano ea yetemerba vou na napano mia Atua rive Parinio Tubo kanio kiano Verloglogiano nalo nei ajua mirano jimo [5] ban bokar mirano aluo [7]

Yesu berloglog kiano tomu duelimo ba juo [12], a jian moroano banlo ka ava averial kiano Ioluano vou van tomu dolu nalo. Verloglogiano nalo nei ajua mirano duelimo [10]

Jamerjiano nalo napano Yesu ber ka verii tomu nalo napano Atua be Parinio Tubo kalo, a Yetemeriba vou na napano mia ava atuai. Jamerjiano nalo nene ajua mirano duelimo ba tolu [13]

Yesu berloglog kiano tomu nalo ka bajago napano toro monoka rila ka taksisor naio. Verloglogiano nalo nei ajua mirano duelimo ba arolu [18]

Yesu berloglog kiano tomu nalo, ber vite nalo napano mia rimaluvo ea bogu na maaro, bija yetemeriba vou napano Atua rive Parinio Tubo kanio, mia rimaluvo. Verloglogiano nalo nei ajua mirano duelimo valuo ba veri [24] a mirano duelimo valuo ba jimo [25]

*Torogio nalo na niosi nei*

Yesu korobinio nalo a Yesu kiano moluioano 1:1—2:23

Jone Baruei kiano iñauano 3:1-12

Jone baruei ea Yesu, a Siriaro milavon naio 3:13—4:11

Yesu mila kiano iñauano ea tanobuku nei Kalele 4:12—18:35

Yesu jaluvo den Kalele ban yako Yerusalemo 19:1—20:34

Yesu kiano sude maaro napano mila kiano iñauano yako Yerusalemo bija vio nalo vaataro kean Yerusalemo 21:1—27:66

Yesu meul bereio a kiano tomu nalo amial naio 28:1-20

*Yesu korobinio nalo  
Luka 3:23-38*

<sup>1</sup> Yesu Kristo naio miyotuba ea bajulukuti na tormoruo juo na tortoru na kulo Ju nalo korobilo, nina be Epraamo naio beamu, bija Teviti naio iorou kanio. Yesu korobinio nalo nonovio, sialo ajibe nei:

<sup>2</sup> Epraamo naio kenerinio napano Aisak. Aisak naio kenerinio napano Yakovo. Yakovo naio kenerinio napano Yuta, naliko kuruano dolu nalo.

<sup>3</sup> Yuta naio kenerinio juo Beresi naljuo kuruano Jera, naljuo abe savoro, napano kenielo Teñar.

Beresi naio kenerinio napano Esrono. Esrono naio kenerinio napano Remo.

<sup>4</sup> Remo naio kenerinio napano Aminatapo. Aminatapo naio kenerinio napano Nesono.

Nesono naio kenerinio napano Solomon.

<sup>5</sup> Solomon naio kenerinio napano Boasa, ana Boasa nene napano kenieno napano Reavo.

Boasa naio kenerinio napano Ovete, ana Ovete nene na kenieno Ruta. Ovete nene kenerinio na Jese.

<sup>6</sup> Jese naio kenerinio napano Teviti, ana Teviti nene napano be parinio tubo na vio Israel.

Teviti naio kenerinio napano Solomon, ana Solomon nene na kenieno tira na Uraia koano jukamu.

<sup>7</sup> Solomon naio kenerinio napano Reopoom.

Reopoom naio kenerinio napano Apia. Apia naio kenerinio napano Asa.

<sup>8</sup> Asa naio kenerinio napano Jeosevata. Jeosevata naio kenerinio napano Joramoo.

Joramoo naio kenerinio napano Usaia.

<sup>9</sup> Usaia naio kenerinio napano Jotamo.

Jotamo naio kenerinio napano Easa.

Easa naio kenerinio napano Esekaia.

<sup>10</sup> Esekaia naio kenerinio napano Manasa.

Manasa naio kenerinio napano Amon.

Amon naio kenerinio napano Josaiia.

<sup>11</sup> Josaiia naio kenerinio napano Jekonaia naliko kuruano nalo. Naruei ea kialo bogo nei, kulo buruvenuto dolu napano Bapilon nalo abano aburu bulag kulo Israel nalo ka ava aiñau kurano ga tibe na yako Bapilon.

<sup>12</sup> Ka bogo napano amiñau kurano ga yako Bapilon kia ga vo, Jekonaia naio kenerinio napano Sieltiel.

Sieltiel naio kenerinio napano Serupapele.

<sup>13</sup> Serupapele naio kenerinio napano Aivyuti.

Aivyuti naio kenerinio napano Eliakim.

Eliakim naio kenerinio napano Aso.

<sup>14</sup> Aso naio kenerinio napano Setoko.

Setoko naio kenerinio napano Akimi.

Akimi naio kenerinio napano Eliuti.

<sup>15</sup> Eliuti naio kenerinio napano Eliesa.

Eliesa naio kenerinio napano Matano.

Matano naio kenerinio napano Yakovo.

<sup>16</sup> Yakovo naio kenerinio napano Yoseve, napano koano Mere. Mere nei, naio be Yesu kenieno, nañia aberii naio ka be Naverikariano.

<sup>17</sup> Naruei jikar ea Epraamo binimej bokar Teviti, be taara duelimo ba veri [14]. A jikario ea Teviti binimej bokar bogo napano kulo Bapilon aburu bulag kulo Israel nalo ka ava aiñau kurano ealo, be bunu taara duelimo ba veri [14]. A mia jikario ea bogo na nalo ajua vio Bapilon binimej bokar bogo napano Kristo kiano yotubaiano, be bereio taara duelimo ba veri [14].

*Abar Yesu*

*Luka 2:1-7*

<sup>18</sup> Ninei be tukunu napano abar Yesu Kristo eaio, mñarabo nene ninei: kenieno

tira napano Mere, na beamu aberkakario ka mia naio soro ka toro tai, siano Yoseve. Ana bogo na maka asoro vo, mia Mere mijoglubar ka be mñabono, napano mñabono nei binimej ea Niununo Lu. <sup>19</sup> Ana Yoseve napano aberkar ka mia naio rivuru Mere nei ve koano, naio be toro novo tai, a naio maka toñia river Mere naio mila vite na bova tenia. Mia naio mial ka mia nalo ve juo monoka ala korov kialo verikariano nei, mia naio jidomii ka mia rimaukano ea bajago novo tai napano melumu ga, bior naio maka sidom rila Mere rimou ñele rivior vite nei. <sup>20</sup> Mia bogo napano naio jidomii ka mia rila tibena, Atua kiano nailiano tai miyotuba kano ea monovovvano tai bogiano, naruei nailiano nei berii kano, berinavo "Yoseve, jau Teviti kiano bajulukuti, jau kojog re rivova ka mia kovuru tira na Mere ka ve koamo, bior tete na joa mabono, binimej ea Niununo Lu. <sup>21</sup> Mia Mere naio rivar tete suñano tai, mia monoka jau kesisia siano ka Yesu Naioruriano, bior mia naio rilakon nonovio kiano tomu nalo kialo kariano nalo."

<sup>22</sup> Naruei vite nalo nei miyotuba jibe na ka rila iliano tai rimej rive riano tavukia na Atua naio berial nua ea niono Naverialiano Aisea, <sup>23</sup> napano naio berenio, berinavo

*"Mia merevono tai na maka rijikia suñano vo, mia naio ve mñabono,*

*mia naio rivarlar kenerinio suñano tai,*

*mia nalo asisia siano aver*

*'Emanuela.'" Ais 7:14*

Sio nei "Emanuela," berenio "Atua to kiteaku."

<sup>24</sup> Naruei Yoseve naio jevijo bereio, ana naio mila jibe ka napano Atua kiano nailiano berkanio, ana joro ka Mere, buru be koano. <sup>25</sup> Mia maka nalo atubiju vo bano-o bokar bogo napano Mere naio barlar kenerinio nene karina. Ana bogo napano Mere bar kiritete nene, ana mo Yoseve jisja tete nene ka Yesu.

## 2

*Tomu nalo nañia amijikia batitig bajago na mñarivitano nalo abinimej ka aial Yesu*

<sup>1</sup> Yesu kiano yotubaiano ea komeli tai na siano Betleem, ea tanobuku na vio Yutea, ka bogo na Erot naio be parinio tubo ka kulo Israel nalo. Mia maka vesiou ga ka bogo nene, ana tomu tai nañia amijikia batitig bajago na mñarivitano nalo, abinimej ea vio Yerusalemo. Nalo nei ajumolu ea kialo buruvenuto ea vio nañia mñerenio mijivi eaio abinimej. <sup>2</sup> Naruei nalo abika

den tomu nalo, aberenio “?Tete na miyotuba voniganei, na aber mia naio ve kulo Israel kialo parinio tubo, naio jo be? Kumemi numial kiano m̄arivitano nene ruei, miyotuba ea vio napano m̄erenio mijivi eaio, ana kumemi nubinimei ka nuvilivu ka siano.”

<sup>3</sup> Bogo na iliano nei binimei bokar Parinio tubo Erot naliko kulo Yerusalemo nalo tealo, amijogio, mia nalo maka asaaro kanio. <sup>4</sup> Naruei Parinio tubo Erot naio bio tomu na tortoru na kulo lu nalo naliko naverloglogiano na tuboiano nalo abinimei amial naio, ana naio bika denlo, berinavo “?Mia Naverikariano nar̄ia aju aberiio vurua na, mia naio rimei riyotuba to be?”

<sup>5</sup> Nalo nei aberdoṣe, aberinavo “Mia Naverikariano naio riyotuba ea tanobuku na vio Yutea, ea komeli na vio Betleem. <sup>6</sup> Nina bior beamu naverialiano tai naio bivitauiakar iliano nalo nei, berenio

*‘Atua naio ber jibe nei, berinavo*

*“Kamii na vio Betleem, maka kuvijikia kuver kulo dolu na tortoru nalo na ga ea vio Yutea, nalo ga abe tomoruo loa kamii,*

*ana kamii kumitutano, makanio,*

*bior mia navurim̄araboiano na toru tai riyotuba ea kamii rimemedu, naio rivitikar vatitig kiaku kulo Israel nalo.”*” Maika 5:2

<sup>7</sup> Karina Parinio Tubo Erot naio bio bena ga tomu napano amijikia bajago na m̄arivitano nalo, abokar vioriano tai naliko naio ga, ka naio jidom rijogio vatitig denlo ka m̄arivitano nene naio miyotuba memedu ka bogo vaio. <sup>8</sup> Bisi na naio ber kalo, berinavo “Monoka kamii kuva kuvisirag tete nene, ver kuvilealio, ana mo mia kumei kuverialio va kiniou bereio, ka mia kiniou bunu nava nolotu ka siano,” bisi na naio miilalo aba Betleem. Mia kanano iliano nei be sibiano ga, naio jidom rieleal tete domudomu nei ka mia naio riva ruebinio ga.

<sup>9-10</sup> Ana tomu nalo nei amiaḡago ka Parinio Tubo Erot kiano iliano nalo bisi, ana nalo aban ea kialo m̄arabo, ana amial bereio m̄arivitano nei nua amialio naio jo merera ea vio na m̄erenio mijivi eaio. Mia bogo na nalo amial bereio m̄arivitano nene, nalo amijog bo toru laka, ana m̄arivitano nei naio buru m̄arabo kalo abano-o aboru ea vio na kiritete nei naio mon eaio. <sup>11</sup> Naruei nalo aba joomo ea yimo, amial kiritete bija kenieno Mere. Naruei nalo aminie kamu kean naio, amilivu ka siano. Karina nalo abetavo ea kialo basaro nalo, ana abar kanano

jidomiano nalo banio, niogo tai, bija bonotanunu na siano vrakenses, bija pomat, na puruveru nene bavin laka, siano mer.

<sup>12</sup> Naruei bogiano, ana Atua mil banlo ea monovovuano tai, berburelo ka mia avan re bunu aial Erot. Naruei nalo ajumolu, ajel ea m̄arabo dolu aban bereio ea kialo vio.

*Amidu Yesu sesa nene, aburo aba Ijivi*

<sup>13</sup> Bogo na tomu nalo nei ajuvan vio nei ruei abano, ana Atua kiano nailiano tai miyotuba ka Yoseve ea monovovuano tai, naio berkanio, berinavo “Yoseve, jau kotumolu, kodu kiritete domudomu naljuo keniene, kuva kuvitu bilig ea vio Ijivi, bior Tubo Erot naio jor̄ia jidomii kakar ka mia riila kiano tomu na mira nalo asirag kiritete domudomu na ka mia auebinio. Kamii monoka kuva kuvitua vio na rivano-o ver kiniou never kamii kumei, ana mo kumei bereio.” <sup>14</sup> Ana Yoseve jumolu, midu kiritete domudomu naljuo keniene, ka bogiano nene ga ajumolu amiel ka avan ea vio Ijivi. <sup>15</sup> Nalo ajua vio na jiuo kija, bano-o bokar bogo na Parinio Tubo Erot naio m̄arabo.

Tena maluvo jel jibe nei ka mia rimemedu ka Atua kiano iliano tai na naio beriiio ban Naverialiano Osea nanua ruei, berinavo

*“Keneriku joa vio Ijivi,*

*mia kiniou nobio naio ka rimei bereio.”*  
*Osea 11:1*

*Tomu na mira amue tam̄aria tete nalo*

<sup>16</sup> Mo bogo na Parinio Tubo Erot naio mijikia ka tomu napano amijikia batitigio m̄arivitano amiyotel ea naio, maka bunu amei eaio, naio tiniennimi toru, ana naio ber ka kiano tomu na mira nalo, ka ava asirag kiritete suñano nalo napano ajua vio Betleem bija komeli nalo napano aju jouro ea tanobuku nei, nalo nonovio na kialo yuka maka rivokar yuka ve juo vo, ka mia nalo auebinvinlo am̄arm̄aro. A naio buluku bogo nei memedu jibe nei, bior iliano napano naio mijogio den tomu nalo nei nua, aberial memedu ban naio ka bogo napano m̄arivitano nene naio miyotuba garuei be moti eaio.

<sup>17</sup> Ea m̄arabo nei, vaio napano Naverialiano Jeremaia ber nua bini-mei miyotuba be riano, na naio berinavo

<sup>18</sup> *“Jooa na tegiano tai amijogio ea vio Rama,*  
*tegiano na tinie jaleleiano.*

*Rejel naio jor̄ia jegi kumabinio nalo, naio milikue ka aiolipilipi naio,*  
*bior kumabinio nalo am̄arm̄aro liki.”*  
*Jeremaia 31:15*

*Yoseve midu Yesu sesa ajuvan vio Ijivi, abinimej bereio ea vio Nasarete*

<sup>19</sup> Mia bogo na Parinio Tubo Erot naio m̄aro, Yoseve nalo aju kia ga Ijivi vo, naruei naio monovovu, mial bereio Atua kiano nailiano tai, napano naio binimej berkanio, <sup>20</sup> berinavo "Yoseve, jau kotumolu, kodu tete na vija keniene, kamiu kuvan bereio ea kenemiu venuo napano Israel, bior Parinio Tubo Erot nanua m̄a jidom ruei kiritete na, naio m̄aro ruei." <sup>21</sup> Naruei Yoseve naio jumolu, midu tete bija keniene, ana nalo aban bereio ea kialo venuo napano Israel.

<sup>22</sup> Mia bogo napano Yoseve mijogial ka Akaleasi jo jeleig karam̄ano Erot, ka naio be parinio tubo ea vio Yutea, Yoseve naio merou ka rivan bereio ea vio Yutea. Ana Atua mil bereio ban Yoseve ea monovovuano tai, berbure naio ka mia naio rivan re bunu ea vio Yutea bereio, naruei Yoseve naio ban ea vio dolu, vio nene siano Kalele. <sup>23</sup> Ana nalo aba ajua komeli tai napano ea tanobuku na, siano Nasarete.

Vite na maluvo jibe na ka rila naverialiano nalo kanalo iliano nalo ave riano, napano m̄a aberii Verikariano nei nanua ruei, aberinavo

"Mia averenio naio be toro re Nasarete tai."

### 3

*Jone Baruei joa vio yauo, naio jo m̄a mioliolu ka naviligiano*

*Mak 1:1-8; Luka 3:1-18; Jone 1:19-28*

<sup>1</sup> Yesu naio miluo binimej toru, nina ea vio Nasarete kia ga vo, mia ka bogo na, Jone Baruei miyotuba binimej ea vio yauo na Yutea, naio mioliolu berinavo <sup>2</sup> "Kamiu monoka kuvilig kamiu bior Atua kanano navenatuboiano jo binimej." <sup>3</sup> Mia ninei be toro napano Naverialiano Aisea naio jo m̄a berial nua ruei, berinavo

*"Toro tai bio jouo ea vio yauo, berinavo 'Kamiu kuvila Atua kiano m̄arabo rimemedu, ka mia naio riyotuba ea kenemiu meuliano nalo.' "*  
*Ais 40:3*

<sup>4</sup> Jone Baruei nene naio javukia Naverialiano Elaija re nua, jibe ka napano naio maka m̄ano kulum̄arauo novo nalo, mia m̄ano kulukoti amim̄aukanio ea vijinio kamele ga a naio mior m̄ano kulukoti ka niati kulubue marauo tai ga. Sano sinaniano na yeturu nene naio be surubu nalo ga bija vite sesei napano sukabak nalo amim̄aukanio. <sup>5</sup> Mia tomu na vio Yerusalemo bija komeli dolu nalo na vio

Yutea, bija komeli nalo napano m̄a aju vaataro ka m̄arauai na vio Yortano, abinimej ka naio. <sup>6</sup> Ana aber bulag kialo kariano nalo banio, naruei naio baruei ealo ea m̄arauai na vio Yortano.

<sup>7</sup> Be bogo tai, Jone mial ka napano be tiniobi na terati juo na nalotuano na kulo Ju nalo kialo, nina be Varisis bija Satusis nalo, abinimej ka naio rivaruei ealo, mia naio mil jikili banlo, naio berinavo " ? Kamiu kumitavukia maro nalo ga napano amerou ka sebi tai naruei nalo aburo, mia kamiu kuberiam̄a mia kumijikia kuvuro ka sebi napano mia Atua riila rimej, napano kamiu maka kuvilig vatitigio kamiu rivu vo? <sup>8</sup> A ver kamiu kube riano ka kubilig tiniemiu bior kenemiu kariano nalo, mia kuvila titai medave ea kenemiu meuliano nalo ka mia ajikia ka kube riano. <sup>9</sup> Mia maka rivu kam̄a kuvarvar ka kamiu, tibe kanio nam̄a kumilaio, kuberinavo 'Kito robo ruei, robe Epraamo kiano bajulukuti nalo.' Mia kiniou neber ka kamiu, neber vite na maka ve titenia, bior Atua naio mijikia rivar puruveru nalo nei riviliglo amei ave Epraamo kiano bajulukuti nalo, ka adu jelemiu. <sup>10</sup> Neber ka kamiu, yekesi tai jua burupati iesi ruei, ju rorea ka mia ate bulag buruiesi nalo napano maka avar m̄arati nalo na bo, mia ate bulaglo avukulo avan ea sebi sisenlo. <sup>11</sup> Kiniou nojukamu nebinimej, nojom̄a nabaruei ea kamiu ka uei ga, ka rila rimeravo ka kamiu kuvilig kamiu ruei, mia be toro dolu tai napano jo binimej iorou ka kiniou. Naio jo loa kiniou, a kiniou maka navare ka neive kar kiano kulubue, p̄elina nala kiano im̄auano dolu tai. Mia naio naruei mia rivaruei ea kamiu ka Niununo Lu vija kiano sebi ka sisen kon bulag iorosoro nalo den kenemiu meuliano nalo. <sup>12</sup> Naio midukar titai jibe ka m̄artea joa jum̄ano, ka mia naio rilakon vatitig kanano uiti nalo. Mia naio rivar uiti napano be nioti uiti na bo, ava joomo ea kunuano, mia nalo na abe vinikiti ga, mia naio risebilo ka sebi tai napano maka rijikia rim̄aro bogo tai leleio."

*Jone naio baruei ea Yesu*

*Mak 1:9-11; Luka 3:21-22*

<sup>13</sup> Mia Yesu naio juvan vio Kalele, binimej ea m̄arauai Yortano, ka Jone naio rivaruei eaio. <sup>14</sup> Mia Jone naio jidom riverbure be deio, ana naio ber " ? Jur̄iabe ana jau kobinimej ka navaruei easo? Kejiio, memedu ga ka jau kavaruai ea kiniou."

<sup>15</sup> Mia Yesu naio berdope, berinavo "Peli ga koig, mia tibena re. Jau kala ninei beamu vo, bior bo laka ka mia kito ve juo

monoka rotumã ratakî vite nalo napano Atua jidom ka kito roimãukanio.”

Naruei Jone mijamo ka Yesu binimeî, ana naio baruei eaio.

<sup>16</sup> Mia bogo napano Jone baruei eaio bisi, ana Yesu nene jaluvo den uei, ana vaarakurano naio mial vio mave betavo ka naio, ana naio mial Atua kiano Niununo Lu batove javukia vaama tai, binimeî bujo jua Yesu. <sup>17</sup> Naruei Atua mil batove, naio ber “Nina be keneriku napano kiniou nejidom mēlea naio. Kiaku jidomiano joa naio, kiniou najaaro toru mēle ka naio.”

#### 4

*Simãaro nalo kanalo parinio tubo, naio mila von Yesu*

*Mak 1:12-13; Luka 4:1-13*

<sup>1</sup> Iorou ka bogo napano Jone Baruei naio baruei ea Yesu bisi, ana Niununo Lu buru Yesu ban ea vio yauo tai ka simãaro nalo kanalo parinio tubo rila von naio. <sup>2</sup> Naruei Yesu naio mondulu ka bogoti duelimo va veri [40] a bogiano duelimo va veri [40], ka bolkouo, mia iorou ka bogoti nalo nei ana jijer taneaio. <sup>3</sup> Ana mo Simãaro, toro narãa milavonvon tomu nalo, naio ber ka Yesu, berinavo “Verenio jau kobe Atua kenerinio riano, ana mo kover ka puruveru nalo na aju na, ka amei ave joko, ka kesen tai.”

<sup>4</sup> Ana Yesu naio berdoŕeio, berinavo “Makanio, bior Niosi Lu naio berenio ruei, berinavo

*‘Maka toro rijikia rimeul ea ga sinaniano, mia toro mijikia rimeul ea iliano nonovio napano Atua naio berenio.’ ”*  
*Tiut 8:3*

<sup>5</sup> Mia Simãaro naio milavon Yesu kiano jidomiano bereio, naio jiloglog Yerusalemo, naio buru kiano jidomiano bavîn mave ea Atua Kunuano Lu. <sup>6</sup> Naruei Simãaro ber ka Yesu, berinavo “Verenio jau kobe Atua kenerinio, ana mo jau koviako kavatove ea borotano. Mia jau kovu ga na, bior Iliano Lu naio berii Atua, berinavo *‘Mia naio mijikia riila kiano nailiano nalo, ka amei atu avitkariso.*

*Mia nalo adukarso ga ka jumãlo mave, ka mia kavan re jaamo ea puruveru.’ ”*  
*Iouano 91:11,12*

<sup>7</sup> Ana Yesu berdoŕe Simãaro, berinavo “Makanio, bior Niosi Lu ber bunu ruei, berinavo

*‘Maka rivu ka kalavon kanamo Tubo Atua, jau katadua re naio ka rila kiamo vite tai.’ ”*  
*Tiut 6:16*

<sup>8</sup> Naruei Simãaro naio milavon Yesu bereio, ka jidom rivuru Yesu kiano jidomiano rivavin ea burusuku na toru laka

tai, ka mia naio rijikia siloglog buruvenuo nonovio na vio yetemeriba nei ka Yesu, rivija vite maraiu nene nalo. <sup>9</sup> Naruei Simãaro milavon Yesu bereio va rolu nene, berinavo “Saba nalo na komial na mia kiniou najamo kalo vanso, verenio jau keinietano, jau kolotu ka kiniou.”

<sup>10</sup> Mia Yesu naio mil ban Simãaro, berdoŕe kiano iliano, berinavo “Jau kovuro den kiniou, Simãaro. Niosi Lu naio berenio ruei, berinavo

*‘Mia jau kolotu ka ga Tubo kiamo Atua, naio ga takurano, mia naio ga kala kanano imãauano.’ ”*

<sup>11</sup> Naruei Simãaro buro den Yesu, ana nailiano nalo abinimeî, aju naliko amiy-olupilupî naio.

*Yesu jikar kiano imãauano ea tanobuku na Kalele*

*Mak 1:14-15; Luka 4:14-15*

<sup>12</sup> Mia ka bogo nei, parinio tubo Erot kiano tomu na mira nalo tai aba abokar Jone Baruei, ana aburu naio ban ea yimo na tetavokoiano. Mia ka legiano nene ga Yesu naio mijogial lilianiano nei, naruei naio jumolu den vio na, ana ban bereio ea tanobuku na vio Kalele. <sup>13</sup> Mia naio maka riva toa vio Nasarete, mia naio mijaka batove ea mãarkomeli na vio Kapeneam, napano naio jo vaataro ka ueiyabo na toru na vio Kalele. Vio nalo nei napano jikar Kalele batove boru koyou ea tei, beamu borotano nei naio be Sebulano kiano bajulukuti nalo bija Naptali kiano bajulukuti nalo kialo nua. <sup>14</sup> Tenei miyotuba jel jibe nei ka mia rila iliano nalo napano Naverialiano Aisea berialio nanua ruei, rimeî rive riano tibe ka napano naio berenio, berinavo

<sup>15</sup> *“Kamiiu tomu nalo na Sebulano bija Naptali kialo vio nalo, napano kamiiu kumitu iviso ka mãarauei na vio Yortano bija tei na toru, kamiiu na vio Kalele, vio na tomu na maka ajikia Atua, kamiiu kuvijog iliano nei:”*

<sup>16</sup> *Tomu nalo napano mãa aju nunu ga, mia nalo aial burumãara yulu tai.*

*Nalo na aju nunu damãariga, ka mia mãa amãarãaro ga, mia burumãara yulu tai naio rimer-eralilo.”*  
*Ais 9:1,2*

<sup>17</sup> Mia jikar ea bogo nei, ana Yesu naio jonã mioliolu, naio berinavo “Kamiiu monoka kuvilig kenemiu jidomiano nalo ka kenemiu kariano nalo, bior nave-natuboiano na vio mave naio binimeî vaataro ruei.”



*Yesu bio kiano naiagagoano veri  
Mak 1:16-20; Luka 5:1-11*

<sup>18</sup> Yesu naio jomña mieliel kiki jakii baramudou na ueiyabo napano toru na vio Kalele, ana naio mial tomu juo, Saimon Pitere naio kuruano Adru. Naljua ajumña ajuvan suņede, bior naljuo amijikia bajago naña aburu niado. <sup>19</sup> Mia naio ber kalo, berinavo “Kamjuo kuvitakisor kiniou, mia kiniou nala kamiu kuve navagadeano na tomu nalo.” <sup>20</sup> Mia vaarakurano, naljuo ajuvan kialo suņede nalo ajubo, ana nalo ajakisor Yesu.

<sup>21</sup> Karina Yesu naio miel ban lie kija ga bereio, ana naio mial tomjuo dolu bereio, Yemesi naio kuruano Jone, nalo abe Sepeti kenerinio nalo. Nalo ajua kialo buluku uako naliko karamālo, nalo ajumña amila batitig kialo suņede. Naruei Yesu biolo ka atakisorio, <sup>22</sup> mia vaarakurano ga, nalo ajumolu soņeli, ajuvan karamālo jobo ea kialo uako, ana nalo ajakisor Yesu abano.

*Yesu naio mioliolu, berloglog tomu nalo, a naio mieliel ka mieiano nalo  
Luka 6:17-19*

<sup>23</sup> Naruei Yesu naio jomña mieliel ea vio nalo napano Kalele, naio jomña berloglog kulo Ju nalo ea kialo yimo na lotuano nalo. Naio jomña berial ioluano novo nei na Atua kiano navenatuboiano, mia naio mieliel ka tomu napano naña amie, naio milarur tomu naña mieiano dedade nalo milalo, abo bereio. <sup>24</sup> Naruei ajukunu ka Yesu siano barbano barko reraio bunu burumñara tanobuku na vio Kalele tivelinio batove, napano ajisia ka Siria. Naruei tomu nalo na vio na bunu abarvar kialo namieiano nalo abinimei amial Yesu. Nalo nene tealo amie, tealo amijog niabele mijalele, tealo niadu jualo, tealo ajumña amibulu marmñaro, mia nalo tealo napano niabele nalo amarmñaro, mia Yesu naio milarurlo abo bereio. <sup>25</sup> Mia tiniobi toru na tomu nalo ajakisor Yesu ka bogo na. Nalo nei amolmoluo ea vio Kalele, ea vio napano ajisia ka Komeli Duelimo, mia ea vio Yerusalemo a ea vio dolu nalo na vio Yutea, a ea vio nalo napano jua mrauei na vio Yortano tivelinio bano. Nalo na vio nalo nei naruei nalo ajakisor Yesu ea bogo na.

## 5

*Yesu berloglog tomu nalo  
Luka 6:20-23*

<sup>1</sup> Mia be bogoti tai, ana Yesu naio mial tiniobi toru abinimei aju naliko, naruei naio bavin ea suku tai. Jibe ka kialo naverloglogiano tai, naio jotano, ana na

kiano tomu nalo abinimei ajutano jeliviv eao, <sup>2</sup> ana na naio berlogloglo.

<sup>3</sup> Mia Yesu kanano iliverloglogiano nalo na tortoru tai ajibe nei. Naio berinavo “Nalo napano abitilubar ka maka aleal Atua ea kialo meuliano nalo vo, mia ilivuiano rimei toalo, bior mia Atua naio rive Parinio Tubo ka tomu nalo na ajibe na.

<sup>4</sup> Nalo napano amijog bova ka jaleleano nalo, ana ajumña ajegi, mia ilivuiano rimei toalo, bior mia nalo avokar lupilupiano, ka mia nalo ajog rivu bereio.

<sup>5</sup> Nalo napano tinielo melumu bo, mia ilivuiano rimei toalo, bior napano Atua berkario ruei ka mia rije tonovo na yetemeriba nei vanlo.

<sup>6</sup> Nalo napano ajidom mñlea bajago napano memedu javukia napano mña Atua naio jidomio, mia ilivuiano rimei toalo, ana na mia nalo aial bajago na memedu nalo nei amei avujo lou vatitig ea kialo meuliano nalo.

<sup>7</sup> Nalo ga napano ajumña tinielmiia tomu dolu nalo, mia ilivuiano rimei toalo, ka mia Atua naio mijikia tinienriialo ve toru.

<sup>8</sup> Nalo ga napano kialo iviso meravo bo, ilivuiano rimei toalo, ka mia aial Atua.

<sup>9</sup> Nalo ga napano abe tomu naña amila tumñaro, mia ilivuiano rimei toalo, ka mia Atua naio riviolo ave kenerinio nalo.

<sup>10</sup> Nalo ga napano amonea Atua, napano mia mña tomu dolu nalo amila baravo kalo bior kialo moneano nene, mia ilivuiano rimei toalo, bior mia Atua rivurlo ava jouro ea kiano navenatuboiano.

<sup>11</sup> “Kamiu napano verenio tomu nalo amila lelan kamiu ajumña amijil kamiu, a ajumña amila sibi ea kamiu, napano ajumña aber niegeniege kamiu, nina bior kube kanaku tomu nalo, mia ilivuiano rimei toa kamiu bunu. <sup>12</sup> Kamiu kuvisidom bijovijon re, kuvisaaro ga, bior amila kiki kamiu ea bajago na ga amila ka naverialiano nalo re nua. Mia kamiu kuvar kenemiu burumñara ijaiano ea vio mave.”

*Vaatei bija yulu  
Mak 9:50; Luka 14:34-35*

<sup>13</sup> Ana Yesu ber bunu, berinavo “Kamiu kube vaatei na tomu nalo na yetemeriba nei, napano kenemiu bajago novo naio bakar vio yetemeriba nei maka riva rivova

laka. Ana verenio vaatei nei rijeja re bunu rivu, maka bunu rijikia rila kanano in̄auno, a maka bunu titai rijikia rila rivu, mia naio bo ka ga avukuio rivano.

<sup>14</sup> “Kamiu kumitavukia yulu na yetemeriba nei. Mia verenio m̄arkomeli tai toa suku levlevi mave, mia bogiano tomu nalo napano aju koalabo amijikia aial yulu na m̄arkomeli nene, tomu nalo napano ajauii maka ajikia aduvan kanalo m̄arkomeli nei. <sup>15</sup> Mia bogo napano verenio rejelan yulu, kito maka rejikia reivekoio ka baja bereio, mia kito rejelan ka reive takilele mave ka vio reraio amerera. <sup>16</sup> Ana ea bajago nene ga, kamiu monoka kuvijamo ka kenemiu yulu nalo na kenemiu meuliano amerera rivokar tomu nalo, ka ajikia aial vatitig in̄auno novo nalo napano m̄a kamiu kumim̄aukanio. A bogo napano nalo aial kenemiu in̄auno novo nalo, mia avamenea Karamemiu napano joa vio mave rivorio.”

*Yesu naio berii Mosis kiano tuboiano nalo*

<sup>17</sup> Ana Yesu berii bunu, berinavo “Mia maka rivu ka kamiu kuvitun̄a kuver kinioi nebinime i ka nala lelan Mosis kiano tuboiano nalo vija naverialiano nalo kialo iliano nalo, p̄eli ga, maka lele tibena. Kinioi nebinime i ka mia natakii masosoua nonovio, ka nevisi vatitig nioti nene nalo. <sup>18</sup> Kamiu kuvisidomiikar vatitig iliano nei, mia tuboiano nalo nei maka ajikia ava kovio bogo tai-o-a ka vio mave vija borotano ave juo avakovio. Tuboiano nei be ilisesa nene nalo telabo, mia maka lele kiri m̄ariliano na tai tertelisu nalo nei rijikia rivakovio, riva rivokar bogo na kiano in̄auno nalo amalmaluvo nonovio. <sup>19</sup> Tenene na, verenio toro tai rilakorov kiri tuboiano nalo nei tertelisu nei tai, mia naio ton̄a riverloglog toro dolu ka mia nalo atavukia naio, mia toro nene naio toa vio tai napano jotano maaro ea Atua kiano navenatuboiano. Mia verenio toro na naio bakar batitig tuboiano nalo nei, a naio joñ̄a berloglog tomu dolu nalo ka mia ala tavukia naio, mia naio ve toro na toru tai ea Atua kiano navenatuboiano. <sup>20</sup> Kamiu kumitun̄a kumisidomii kuberenio naverloglogiano na tuboiano nalo a Varisis nalo abe tomu na memedu nalo laka ruei, a kamiu monoka kuvila bajago nalo na memedu lie vo tuvululo, ver p̄eli, mia kamiu kuvijikia re kuva jouro ea Atua kiano navenatuboiano.”

*Yesu berii natiniemimiano  
Luka 12:57-59*

5:14 Jon 8:12, 9:5    5:15 Mak 4:21; Luk 8:16, 11:33  
Mak 9:47    5:29-30 Mat 18:8; Mak 9:43

<sup>21</sup> Ana Yesu berii bunu, berinavo “Kamiu kumijog ruei ka napano aberloglog kiado tormoruo nalo re nua beamu, aber ‘Kouebini re toro,’ mia bunu ‘Toro na riuebin toro rim̄aro, mia memedu ka avuru naio riva komeli ka mia ail vanio.’ <sup>22</sup> Mia kinioi nei, neber ka kamiu: verenio toro na tinienjer kuruano, mia memedu ka avuru naio riva komeli labo, toro napano mil bova toru ka kuruano, naio berenio ‘!Jau kobo ka ga iakurano!’ memedu ka avuru naio ea kiado tomu na tortoru nalo kialo vioriano. Mia verenio toro tai napano naio mil m̄ele ban kuruano, naio berenio ‘Pariparimo miavovu’ mia memedu ka mia avuku naio rivan ea sebi ea vio na jogvaiano. <sup>23</sup> Ka tena, verenio bogo tai jau komei ea Atua kiano vio na sida ka mia kodu kanamo ijaiano van naio, mia tiniem rimaio ka napano kanamo vite tai joa jau kamjuo kuruamo, <sup>24</sup> jau monoka kodu batitig kanamo ijaiano tobo ea vio na sida nei beamu vo, ana monoka kavan bereio kala merevuiano kam ve juo beamu vo, avona iorou kanio ana mo jau komijikia komei bereio ka kodu kanamo ijaiano rivan Atua.

<sup>25</sup> “Verenio jau bogo tai kovilvil ea toro tai ka titai, karina naio jidom rivurso kava komeli kario, mia bo ka jau kavan soḡeli keial naio ka keil vatitig vija naio tukamu, ka bogo napano maka avuruso kava komeli vo. Verenio makanio, p̄eli mia naio ruduso kotoa toro na toru juñ̄ano ka naio tibureso, a mia naio naruei ruduso kotoa toro nan̄a bokakar toro juñ̄ano, ka toro nene naio ruduso kotoa yimo na tetavokoiano. <sup>26</sup> Kinioi neber kaso, verenio tibena mia jau maka kejikia kataluvo den yimo na tetavokoiano rivan rivokar bogo na mia jau kovulu nonovio kanamo mauo beamu, avona bisi ana jau komijikia kataluvo.”

*Yesu berii siakaiano*

<sup>27</sup> Ana Yesu berii bunu, berinavo “A kamiu kumijog bunu ruei ka napano aberloglogio ruei, aber ‘Mia kala re siakaiano.’ <sup>28</sup> Mia kinioi neber ka kamiu, verenio toro na biti va ea tira tai ka naio jidom rivurio, mia naio mila siakaiano ban tira nene ruei ea kiano iviso. <sup>29-30</sup> Verenio miramo tivelinio rilaso kala kariano, bo ka jau ketelario, kovuku rivano. A verenio juñ̄ano tinene rilaso kala kariano, bo ka jau ketelario, kovuku rivano. Bo kanio jau kalavenio niabemo togio tibena, ver p̄eli, mia mokotenamo reraio rivakovio ea vio na jogvaiano.”

5:16 1Pit 2:12    5:18 Luk 16:17    5:29-30 Mat 18:9;

*Yesu berii titigiano**Mataiu 19:9; Mak 10:11-12; Luka 16:18*

<sup>31</sup> Ana Yesu berii bunu, berinavo “Bereio, aber bunu nua, aberinavo ‘Toro napano jitiglar koano, mia naio monoka rudu mēsi na silubariano tai vanio, napano naio berii meravo ka naio jitiglar naio ruei, tira na maka bunu ve koano.’  
<sup>32</sup> Mia kiniou neber ka kamiu, ver toro na ver jitiglar koano, ka iakurano ga maka tira nei naio rive kodovo van koano neibano jukamu, mia ver tira neibano naio rila siakaiano, mia koano moruo naio be burupati nene. Mia toro na ver soro ka tira na jibe nei mia naio mila siakaiano.”

*Yesu berii jumabe ka toro na mila verikariano ea Atua*

<sup>33</sup> Ana Yesu berii bunu, berinavo “Kamiu kumijog bunu ruei ka nalo aberii ka kiado tormoru nalo nua bogobe, aberver jau kover Atua siano ka mia rila kanamo verikariano to sikili, mia maka jau kalakorov bereio kanamo iliano nene. A vaio napano jau koberkar ban Atua, monoka jau kalaio.

<sup>34</sup> “Mia kiniou neber ka kamiu, neber jau maka kejikia kover titai siano leleio ka rila kanamo verikariano to sikili. Maka kejikia kover ‘Riano mave’ ver ŗelina jau kojorŕa kamila bulag tolu na vio mave napano be vio na Atua kiano. <sup>35</sup> A maka kejikia kover ‘Riano, vio yetemeriba novo na,’ ver ŗeli, mia jau kala bulag tolu na vio yetemeriba na jotano ka Atua kiano moroano. Maka kejikia koverenio ‘Riano, komeli lu yako Yerusalemo niako vo’ ver ŗeli, jau kojorŕa komila bulag tolu na vio na kanado Parinio Tubo Lu kanano. <sup>36</sup> A maka kejikia koverenio ‘Riano, paripariku nei’ kano rila kanamo verikariano to sikili, ver ŗelina jau kojorŕa komila bulag Atua kiano tolu napano naio ga takurano mijikia rila viju parido tai ve takurano rimeŕi riuvu ŗelina rimeŕi ribobogio. <sup>37</sup> Ea kenemiu verikariano nalo, monoka kamiu kuver ga ‘Nao,’ ŗelina kamiu kuver ga ‘Makanio,’ nina ga barei na. Iliano dolu nalo napano ŕa kumitumŕa kuberenio, nalo abinimeŕi den Simaro.”

*Yesu berii ka ala meran re vite na bova bereio*

*Luka 6:29-30*

<sup>38</sup> Ana Yesu berii bunu, berinavo “Mia kamiu kumijog naverloglogiano nalo aberii nua ruei, aberinavo ‘Verenio toro tai rila lelan toro dolu mirano tinene, monoka ala lelan mirano bunu. Mia verenio toro tai tukular toro dolu mŕarjuvono

tai, monoka atukular mŕarjuvono bunu.’  
<sup>39</sup> Mia kiniou nei naruei neber ka kamiu, Mia koviolua re toro napano mila bova banso. Verenio toro rijuba yaba miramo tivelinio, monoka jau kovilig yaba miramo tivelinio rivan kean naio, ka naio rijuba bunu. <sup>40</sup> A verenio toro tai rivurso ea komeli ka tutuaso ka mŕamo kulusoto, mo mia jau kajamo ka vanio vija mŕamo kulukoti bunu. <sup>41</sup> A verenio toro na toru tai ritutuaso ka kavar kiano basaro keiel ka aura ve takurano, tibe ka napano naio mijikia berenio, monoka kasaaro ga ka kavario keiel ka aura ve takurano bereio vo. <sup>42</sup> Verenio toro tai rivika vite tai denso, mia monoka jau kodu vite nene vanio, a verenio toro tai sidom rudu kija vite na be kanamo, mia monoka kajamo ka vanio mia koverbureio re.”

*Yesu berii ka tumabe mia rosidom kiado uolu nalo*

*Luka 6:27-28,32-36*

<sup>43</sup> Ana Yesu berii bunu, berinavo “Mia kamiu kumijog naverloglogiano nalo aberii nua ruei, aberinavo ‘Monoka jau kosidom nalo napano aju vaataro kaso, mia jau kovijuku die kanamo uolu nalo.’  
<sup>44</sup> Mia kiniou nei naruei, neber ka kamiu, neber monoka kamiu kuvisidom kenemiu uolu nalo, a kubolkouo ka nalo napano amila lelan kamiu, <sup>45</sup> ka mia kamiu kuvitakii vatitigio bajago na Karamemiu na ea vio mave, napano naio jidom nalo beberare ga. Tenene na naio mila kanano inio merera a kanano yuo bovo ea tomu nonovio, toro napano bo, a toro napano bova. <sup>46</sup> Verenio kamiu kuvitumŕa tiniemiu riia tomu nalo na ga tiniel miia kamiu, Atua maka rijikia rijev ijaiano van kamiu riviorio. Tomu nalo namŕa abarbijiŕi takis, napano kulo dolu nalo aberinavo nalo abe kulo va, mia nalo abare ka ala tibe na. <sup>47</sup> Verenio kamiu kuvitumŕa kuan jumemiu kamliko ga kenemiu tomu nalo, nina maka tovulu bajago na kulo va nalo. Tomu nalo napano maka amonea Atua, ajuŕmŕa ajidom bunu kanalo mŕaravato nalo. <sup>48</sup> Mia kenemiu meuliano nalo monoka tibe ka na Karamemiu napano joa vio mave kiano bajago, napano memedu, a bo laka ban tomu nonovio.”

**6***Yesu berii bajago na ijaiano nalo*

<sup>1</sup> Ana Yesu naio mil banlo, berinavo “Vite nalo napano kiado nalotvano naio berenio bo ka alaio, kamiu kuvila re tavukia napano kamiu kumilaio ka mia tomu ve telabo ajikia avitulubarario ka napano kamiu

kumila tonovo. Verenio kamiu kuvituña kuvila tibe na, mia Karamemiu napano joa vio mave, naio maka rijikia rije ijaiano van kamiu rivior vite na.

<sup>2</sup> "Tibe na, ea bogo nalo napano jau kesian ijaiano van taliñasa nalo, jau keil vevavin re kanio, tavukia nailikuleiano nalo. Nalo ajunña aber bulag kanalo inñauano novo nalo joomo ea yimo na volkouano, a tavio bunu ea vio medave, ka rila ana tomu nalo avamenealo kanio. Mia kiniou neber ka kamiu, vameneano na kulo dolu na, nina ga be kialo ijaiano, mia maka bunu ajikia avokar vite dolu bereio. <sup>3</sup> Mia ver bogo na jau kodu ijaiano tai van taliñasa nalo, monoka jau kala ea bajago na tai napano mia jau ga ve takurano kejikia kanamo inñauano novo na, a napano kanamo jidomiano rivarvar re naio kanio. <sup>4</sup> Ver jau kalavan kiamo inñauano vu tibe na, mia Karañamo napano mijikia mial vite nalo napano kulo dolu maka ajikia aialio, naio mia sian ijaiano vanso riviorio."

*Yesu berii ilivolkouano*

*Luka 11:2-4*

<sup>5</sup> Ana na Yesu berii bunu, berinavo "Verenio bogo napano kamiu kubolkouo, mia maka rivu ka jau kala takii bajago napano nailikuleiano nalo kialo. Nalo ajidom nñelea ka atumolu ka abolkouo joomo ea yimo na volkouano, a tavio ea vio medave nalo, ka tomu nalo amijikia aialo. Vameneano na kulo dolu na, nina ga be mauo, mia maka bunu ajikia avokar vite dolu bereio. <sup>6</sup> Mia ver bogo napano jau kobolkouo, mia bo ka jau kala ka mia jau ga ve takurano kava joomo ea kunuamo yesobi, ea vio na tomu nalo ajikia re ka aialso, mia jau ketetavoko kiamo mñaratavo, ana mo jau kobolkouo van Karañamo napano naio jo, mia maka toro tai rijikia rial naio. Ana mia Karañamo nene naio ga mijikia rial vite nonovio nalo napano tomu nalo maka ajikia aialio, mia naio rijeiv mauo nene vanso riviorio.

<sup>7</sup> "Mia ver bogo napano kamiu kubolkouo, maka rivu ka kamiu kuver iliano ve telabo tibe ka tomu dolu nalo na maka amonea Karañado riano vo. Nalo ajidomii aber mia avokar vaio napano ajunña abolkouo kanio, bior nalo aju aber iliano telabo telabo ea kanalo volkouano nalo, mia be deio ga. <sup>8</sup> Mia kamiu kuvila re takii kialo bajago, bior Karamemiu, naio mijikia ruei vite nalo na kumisidomio, bogo napano kamiu maka kuvika vite nalo nei denio vo.

<sup>9</sup> "Bior vite na, memedu ka mia kamiu kubolkouo tibe ka volkouano nei, napano naio berenio, berinavo

'Karamememi napano jau kojoa vio mave, memedu ga ka tomu nalo atu avatove ka siamo lu.

<sup>10</sup> Kumemi nubolkouo ka kanamo nave-natuboiano rimei tumolu tu sikili ea vio yetemeriba nei,

ka mia tomu nalo alaio tavukia ga napano jau kojidomio, tibe ka napano nalo na vio mave ajunña amilaio.

<sup>11</sup> Aiou, jau kesian van kumemi sememi sinaniano, banei a ea legiano nonovio.

<sup>12</sup> A jau koviekokoa kumemi rivior kene-memi kariano nalo, tibe ka kumemi numituña nubiekokoa tomu dolu nalo napano amila vite jorokor ban kumemi.

<sup>13</sup> A jau kajamo ka re vite va nalo na ajukujuku kumemi nñele, a kovuru bulag kumemi den siñaro napano jidom rila lelan kumemi.'

<sup>14</sup> "Bior ver kamiu kuviekokoa tomu nalo na abijuku jorokor ban kamiu, mia Karamemiu na joa vio mave naio riviekokoa kenemiu vijukuano torokoriano nalo bunu. <sup>15</sup> Mia ver kamiu kuvisaaro re ka kuviekokoa nalo napano abijuku jorokor ban kamiu, mia Karamemiu naio maka rijikia riviekokoa kamiu ka kenemiu torokoriano nalo bunu."

*Yesu berii monduluanu*

<sup>16</sup> Ana Yesu berii bunu, berinavo "A bereio, ver bogo napano kamiu kumituvan semiu sinaniano, kuvel ga ka tiniemiu rimaio ka Atua a kuvolkouo vanio, maka kamiu kuvijikia kuvila tibe ka maka kuvisekon miremiu, ðelina kamiu kuvila miremiu tibe ka jijer tanea kamiu, ka tomu nalo avitilubar tena kamiu kumituña kumilaio. Nina be inñauano na bova ga na nailikuleiano nalo kialo. Ana verenio nalo ala tibe na, a tomu tai tiniel riialo, nina be kialo vluuiano napano amijikia ajevio rivior kanalo monduluanu, mia Atua maka rijikia sian titai vanlo bereio.

<sup>17</sup> "Mia jau, bogo napano ver kotuvan samo sinaniano to tibe na, bo ka jau koyovovua vatitig miramo, tavukia naña jau kojoña komilaio julaka ga, <sup>18</sup> ka mia tomu nalo ajikia re vaio napano jau komilaio. Karañamo ga napano jo, maka tomu nalo aialio, mia naio ga rivitilubarior bior naio rial vite nalo napano tomu dolu nalo maka ajikia aialio, ana na mia naio rijeiv mauo nene vanso kanio."

*Yesu berii puruveru*

*Luka 12:33-34*

<sup>19</sup> Ana Yesu berii bunu, berinavo "Maka rivu ka kamiu kuvituña kuvila bijii kenemiu saba novo nalo ea vio yetemeriba nei ka mia kuve tomu na sanibaiano. Bior vio yetemeriba nei be vio na sivinia nalo, a tauo bunu napano mijikia rila bulag kenemiu saba novo nalo, a toro na vinauano bunu napano mijikia rime i rivar bulag saba nalo napano kamiu kumiñauka bijon kanio. <sup>20</sup> Mia kamiu monoka kuvila bijii kenemiu saba novo nalo tu mave, ea vio napano sivinia a tauo a tomu na vinauano nalo ajikia re ka amei ala bulag kenemiu saba novo nalo napano kubar batitigloaju.

<sup>21</sup> "Bo ka kamiu ve kenemiu saba novo nalo vetelabo atua vio mave, bior mia kenemiu iviso rivujo tulaka ea jidomiano nalo na vio napano ga kenemiu saba novo nalo ajaui."

*Yesu berii lie ka tomu nalo monoka ave viti re*

*Luka 11:34-36*

<sup>22</sup> Ana Yesu berii bunu, berinavo "Toro mirano be vio tai napano yulu binime i joomo ea mokotenano. Verver miramo rimeravo rivu, mia komijikia kovitilubar vatitig toro dolu, ka koja naio. Verver kala tibe na, kiamo iviso bujolou ka yulu. <sup>23</sup> Mia verver miramo rimeravo re rivu, mia maka kojikia kovitilubar vatitig toro dolu, mia koto kovitii kiamo saba nalo ga, ana koto kove viti kalo. Verver kala tibe na, kiamo iviso bujolou ka melijokouo, a ver melijokouo ritoa vio napano memedu ka yulu toaio, nina jau koja melijokouo na bobogio mia kiri bobogio laka."

*Maka toro tai rijikia sel tano ka tubo ve juo*

*Luka 16:13*

<sup>24</sup> Mo Yesu berii bunu, berinavo "Verenio toro ve takurano, naio maka rijikia rinñau buron ea tubo ve juo ve vaarakurano. Verenio tibe na, mia naio tinien tii tinene, mia naio rilikue ka tinene, ðelina mia naio rudu niono tinene, mia tuvan tinene. Kamiu maka kuvijikia kuvila ka kuve Atua kiano tomu nalo a kamiu kuve tomu na puruveru bunu ka bogo nene ga."

*Tuñabe ka toro napano jidom laka ka kiano meuliano*

*Luka 12:22-31*

<sup>25</sup> Ana Yesu berii bunu, berinavo "Ka tenene, kiniou neber ka kamiu, maka rivu ka tiniemiu rivujo ñele ka kenemiu inñauano na kuvitkar kamiu nalo, ka mia kuvivika, kuver ? Mia releal sado sinaniano vija ñado uei tuñabe, a mia releal ñado kuluniabedo na mia reyaio toko mokotenado tuñabe? Mia jidomiano nalo na binu kiri torokor laka, bior kenemiu

meuliano nalo, naio bo loa sinaniano, mia mokotenemiu nalo, abo loa kuluniabelo.

<sup>26</sup> Kamiu kuvial von menu nalo napano ña aju amier janea vio. Mia nalo maka ala tiniavio, a nalo maka avarbijii sinaniano rime i vonuo, a nalo maka avar batitig sinaniano tu joomo ea yimo. Mia Karamemiu na vio mave naio baganlo, mia kamu ea mirano, naio mial kamiu kumitu mave loa menu nalo, mia naio monoka rivitkar kamiu rivu lie vo loalo. <sup>27</sup> ?Kamiu kuberianña toro tai mijikia rila kiano meuliano na bulati rime i ve tebievi kija bereio, bior jonña jidom ñelea kiano meuliano? Peli ga, maka tibe na, ana bo ka kamiu kuvisidom ñelea re kenemiu meuliano.

<sup>28</sup> "?A bior vaio ana kamiu kumituña kumisidom bereverei ea kuluniabemiu? Kuvisidomii von burunieginiegi nalo napano aju amiluo janea vio ga. Nalo maka aimñau a maka atul ñalo kuluniabelo nalo. <sup>29</sup> Mia kiniou neber ka kamiu, Parinio Tubo Solomon re nua, napano naio be toro na sanibaiano tai, jumano bujo ka saba nonovio, mia ñano kuluniabene maka tavukia burunieginiegi nalo nei ñalo. <sup>30</sup> Burunieginiegi nalo na abe tena bogoti takurano ga, mia beni ana mia aisebilo ea sebi, mia Atua naio jo miyovovua batitiglo bo laka. ?Ana na kamiu kuberianña naio maka rijikia rivar kenemiu kuluniabemiu van kamiu? !Aa, maka lele garuei kuviekouo ea Atua sikili leleio!

<sup>31</sup> "Bior vite nalo na, mia maka rivu ka kenemiu iviso nalo avujo ka jidomiano nalo na, ka kuvika kuver '?Jumabe, mia resen venia, romunu venia, a releal kiado kuluniabedo nalo tuñabe?' <sup>32</sup> Nao, bogo nonovio ga tomu na maka amonea Atua nalo ajumña ajidomii ñele vite nalo na jibe na julaka, mia kamiu, Karamemiu napano jo mave, naio mijikia ruei ka monoka kamiu kumisidom ka kuvar vite nalo na. <sup>33</sup> Vite na be moti ka mia kuvisidomii ve toru laka ea kenemiu meuliano, naio be Atua kiano navenatuboiano, vija kiano namemeduano nene nalo. Verenio tibe na, mia naio rivar bunu vite dolu nalo na rivan kamiu."

<sup>34</sup> "Tibe na maka rivu ka bane i, kamiu kuvituña kuvisidomii ñelea rivior tena legiano na beni. Beni ga, ana mo kamiu kumijikia kuvisidomii tena vio beni, bior legiano na bane i, naio be kiano jaleleano nalo telabo ruei."

## 7

*Yesu berii tibure niegeniegeiano toro*

*dolu**Luka 6:37-38,41-42*

<sup>1</sup> Naruei Yesu mil kia ga vo banlo, berinavo "Mia monoka kamiu kuvitibure niegeniege mēlea re toro dolu. Tibe na, mia Atua naio tibure re kamiu sikili, <sup>2</sup> bior jidomiano napano joa kamiu ka bogo napano mā kamiu kumitibure toro dolu, mia jidomiano na ga jibe na joa Atua ea bogo napano mia naio tibure kamiu. Mia kamiu kuvar tibureiano rive verare ga ka tibureiano napano kamiu kumisiano. <sup>3</sup> Maka rivu ka jau kotoña koververii soro napano telisu ga joa kuruamo mirano, mia jau maka keial kar ka be burumāra bulapati iesi tai napano joa miramo. <sup>4</sup> ?Jumābe ana na jau kober komijikia keil van kuruamo na, koberinavo 'Peli nelelar soro na telisu na monea miramo beamu?' <sup>5</sup> !Jibe na, jau maka kotoña kovitilubar kiamo kariano, ana na jau kotoña kojiibure kulo dolu nalo kialo kariano nalo! Mia jau kobe toro na ilikuleiano ga. Jau kodular bulapati iesi na den miramo beamu vo, karina mo jau kovitii batitig rivu ea niati soro na telisu na ea toro dolu mirano.

<sup>6</sup> "Maka rivu ka kuvila von ka kuverial Atua kiano Iliano Lu van tomu nalo napano maka asaara ka ajevio. Nina jibe ka napano kamiu kumituña kubagan kuli deden ka sinaniano novo nalo, naruei bogo napano ajenio bisi, ana mia avilig pariparilo mia nalo aser kamiu bereio. Jibe ga na bunu verenio kamiu kuvisian ijaiano novo nalo van kiribue nalo, mia nalo avie dodomlo ea bulukinia."

*Yesu berii vikadeniano na vite den Atua*  
*Luka 11:9-13*

<sup>7-8</sup> Mia Yesu berinavo "Toro na ver joña bika vite, julaka mia naio mijikia rijeivio, mia verenio toro na joña jirag vite, julaka mia naio mijikia rialeio, mia ver toro na naio joña minia mārataravo, julaka mia mārataravo nene mijikia rivetavo ka naio. Tibe na, mia kamiu komijikia kuvar vite nalo naña kumitu kubika den Atua, mia kamiu komijikia kuvileal vaio naña kamiu kumituña kumisirag denio, mia mārataravo naña kumituña kuminia, mia Atua rivetavo ka van kamiu. <sup>9</sup> Verenio kenerimo tai siserio, rivika kiri joko napano jo, mia jau maka kejikia kesian puruveru van naio, <sup>10</sup> pēlana ver naio rivika batitig ga niado na jo rueli, maka kejikia kodu maro tai van naio ka senio. <sup>11</sup> Riano ka kamiu kube kulo va ga nalo, mia maka kamiu tai rijikia rila tibe na, kamiu kumituña kumisaaro damāriga ka kuvisian vite novo nalo van kenerimiu

nalo. Jibe na ga, ver bogo napano kamiu kubika vite tai den Karamemiu na vio mave, mia naio jaaro ga ka sian vite novo nene nalo rivan kamiu kenerinio vevinio nalo rivavin ve toru laka vo.

<sup>12</sup> "Bo ka kamiu kuvila rivu van tomu dolu nalo damāriga ea vite na bo nalo, tibe ka ga na kamiu kumisidom tomu dolu nalo monoka ala rivu van kamiu. Iliano nei naruei naio be burupati na iliano nalo na jau tuboiano napano Mosis jirio, bija bunu vaio napano naverialiano re nua nalo aberiio."

*Marabo juo ga**Luka 13:24*

<sup>13-14</sup> Ana na Yesu berii bunu, berinavo "Be burumāra bulumorouo tai napano betavo laka jo, mia mārabo nene jagati toru laka be vodobi bo. Mia tomu telabo ajunā ajakii mārabo nene, mia mārabo nei naio ban ea vio na avokar vironiano. Mia kamiu monoka kuvisel ea bulumorouo dolu napano naio kiritavaso. Marabo nene naio jikili, mia maka tomu nalo ve telabo napano ajeliaio, mia mārabo nei naio be mārabo na meuliano."

*Buruiesi bija mārati nene**Luka 6:43-44*

<sup>15</sup> Ana na Yesu berii bunu, berinavo "Bo ka kamiu kuvitkar vatitig ka tomu nalo nañaaju aber nalo abe naverialiano, mia nalo ajunā aberloglog vite na be sibiano ga. Bogo napano ajidom averloglog kamiu, abinimeij ajiibe ka kenemiu bilbilu novo kamliko, napano ea kuluniabelo amonāvo novo ga, jibe ka nunu nalo, mia ea kialo iviso nalo ajavukia kuli deden nalo ga, napano mā jijerlo ka vite novio. <sup>16</sup> Mia kamiu kuvitilubarbarlo ea mārati na kialo meuliano nalo. Soro napano be niononoti, bija teli nalo napano abe niononoti, maka atunā avar sinaniano novo pēli mārati napano jesei bo. <sup>17</sup> Buruiesi napano jo miluo bo, naio monoka rivar mārati na bo, mia buruiesi napano maka riluo rivu, naio monoka rivar mārati na bova ga. <sup>18</sup> Buruiesi napano jo miluo bo, maka rijikia rivar mārati na bova, a buruiesi napano maka riluo rivu, maka rijikia rivar mārati novo nalo. <sup>19</sup> Jibe na naruei, ana buruiesi va nalo nei napano maka avar mārati novo nalo, mia monoka ate bulaglo ga ana mo avukulo van ea sebi. <sup>20</sup> Jibe na naruei, mārati napano miyotuba ea toro kiano meuliano, mila meravo ka toro na naio be toro na jumābe, mia kamiu komijikia kuvitilubar naverialiano va nalo na ea mārati va nalo napano amiyotuba ea kialo meuliano nalo."

*“Kiniou maka nejikia kamiu leleio”*

*Luka 13:25-27*

<sup>21</sup> Ana Yesu mil berinavo “Tiniobi toru ajunã abio kiniou, aber ‘!Kiaku Tubo, kiaku Tubo o!’ mia nalo aviniu re napano mia amijikia ava jouro ea Atua kiano navenatuboiano ea vio mave. Toro napano mijikia riva jouro, naio be toro ga napano jomã mila vite nalo napano Karamãku naio jidomio. <sup>22</sup> Mia ka bogo napano mia Atua tibure tomu nalo, mia tomu ve miroano avio kiniou, tibe ka kiniou nebe kialo Tubo. Mia averinavo ‘?Tubo, jumãabe ka kumemi? Kumemi numiãauka vite telabo na bo ea siamo, a kumemi nuber bulavulag kiamo iliano, a kumemi numijil bulag simãro nalo, a numila vresesiano nalo telabo bunu. ?Mia jau maka bunu kosidomial kenememi iãauano novo nalo nene a?’ <sup>23</sup> Mia kiniou neverial kalo rimemedu ga ea miralo, neverinavo ‘Kiniou maka leleio nejikia kamiu bogo tai, napano kamiu kube kiaku. Kamiu tomu na kariano ga. !Kamiu kuvitaluvo den kiniou vonganei!’ ”

*Yimo juo*

*Luka 6:47-49*

<sup>24</sup> Ana Yesu naio mil berinavo “Tibe na, nalo napano atakii vatitigio tibe ka napano kiniou neberloglog kamiu rui, mia nalo atavukia toro tai na be masou, napano miãauka kunuano, napano mebija kiano marteate nene batove bokar tabapilio na jikili. <sup>25</sup> Iorou kanio, ana yuo bovo toru binimei, mia ueimia buru vio toru, mia jegi miuvuvu biloulo, midon yimo nei, mia yimo nene maka rijour, bior toro na yimo nei naio milakar kunuano jo mave ea tabapilio. <sup>26</sup> Mia nalo napano maka atakii vatitigio rivu tibe ka namã kiniou neberloglog kamiu rui, nalo ajavukia toro tai napano kiano jidomiano kirivova, telikiti napano naio miãauka kunuano, naio bitiri bulag marteate nene nalo mave ea bayono ga. <sup>27</sup> Iorou kanio, mia yuo bovo batove, ueimia buru vio toru, mia jegi miuvuvu biloulo midon yimo nei, mia yimo nei mijour. Mia bogo na naio mijour, toro nei kiano iãauano binimei bova kitkitio garuei.”

*Amilo manenea ka Yesu kiano iliano*

<sup>28</sup> Iorou ka napano Yesu mila nonovio kiano iliano bisi, mia tomu naloaju amiilo manenea kanio, <sup>29</sup> bior abitii kiano iliano maka tavukia kialo tomu na verloglogiano na tuboiano nalo kialo, mia kiano iliano tomi laka, a jo julul kialo jidomiano nalo, a naio ber bulavulag iliano nalo javukia na moroano joa naio.

## 8

*Yesu mila toro na bar burumieni tai meravo bo bereio*

*Mak 1:40-45; Luka 15:12-16*

<sup>1</sup> Mia Yesu naio jumolu den suku, napano naio jomã berloglog tomu nalo eaio, naio batove, ana tomu telabo ajakisor naio. <sup>2</sup> Naruei toro tai napano naio bar burumieni binimei vaataro keanio, naio minie kamu kanio, ana balea, berinavo ‘!Tubo! Kiniou namoneaso ka jau komijikia kalarur kiniou bereio, ana ver jau kajaaro, nejidom nevika denso ka jau kala tibe na van kiniou.’ ”

<sup>3</sup> Ana Yesu maka rimerou ka tokol toro nei rivior kiano mieiano, mia naio jian jumãno, jokolio, ana naio berinavo “Kiniou nejidom jibe na. Neberinavo, mo, niabemo rivu.” Mia vaarakurano ga niabene meravo, mia burumieni nei naio bisi denio. <sup>4</sup> Ana na Yesu berkanio, berinavo “Jau komijog, jau kava koverii re tenei van tomu nalo vo, mia vonganei jau kava koverloglog niabemo ka toro lu, ka naio ria veve niabemo. Karina, jau kava kolotu van Atua, keisebi sida namã Mosis naio berenio monoka toro rilaiio bior vite na jibe na, mo iorou kanio nina, mia toro lu naio mijikia riverialio river burumieni nei naio bisi.”

*Yesu mila toro tai na niabene togio m̃aro bo bereio*

*Luka 7:1-10*

<sup>5</sup> Mia bogo na Yesu naio ba jouro ea bulukomeli na Kapeneam, boru na mira tai na vio Romo binimei mialio, naio jegi banio, <sup>6</sup> naio berinavo “Tubo, kiaku namãauano tai naio mijour mon kea ea m̃ano jogu ea kunuaku. Niabene togio m̃aro, a naio mijog bova toru laka.”

<sup>7</sup> Ana Yesu naio berkanio, berinavo “Mo, kito ve juo ravano. Mia kiniou nala naio rijog rivu bereio.”

<sup>8</sup> Mia boru na toro na mira nei naio berdopeio, berinavo “Tubo, kiniou maka neve verare ka jau komei joomo ea kunuaku, jibe kanio kiniou maka neve toro ju, mia ver jau kover iliano tai ga, mia kiniou nemijikia ka mia kiaku toro nene naio mijikia rijog rivu bereio. <sup>9</sup> Mia kiniou nemijikia ka monoka tibe na, bior kiniou nemijikia ka kiamo iliano amije moroano toru. Naio jibe kanio tomu na mira nalo napanoaju yetano ka kiniou, napano mia monoka ajogkar kiaku iliano. Ver never ka tai ‘Kavano’ mia monoka rivano, pelina never ‘Komei’ monoka rime, pelina never ‘Kala tibe na,’ mia monoka naio rilaiio. Mia kiniou bunu monoka nala tena kiaku

boru na toru naio berii ka kiniou. Jibe na naruei, ana kiniou nomoneaso ka ver kover ga titai, mia monoka tibe na.”

<sup>10</sup> Mia bogo na Yesu mijogial iliano nei, mila naio miilo toru a naio jaaro toru laka kanio. Naruei naio ber ka tiniobi nalo napano aju naliko, berinavo “Riano ga kiniou neber ka kamiu memedu, kiniou maka leleio neleal toro tai na vio Israel naio riviekar kiniou sikili tibe ka toro nei. <sup>11</sup> Mia kiniou neber ka kamiu neber, maka kulo Ju nalo ga ajikia amei jouro ea jokulolu na toru ea legiano na maaro. Makanio, mia tomu dolu nalo bunu ve telabo tibe ka toro nei, ea vio dolu nalo ea yetemeriba nei, napano mia amei ka atutano vio takurano ka asinan naliko Epraamo, Aisak, a Yakovo. Mia nalo na atu rivu bogo nonovio tibe na jouro ea Atua kiano navenatuboiano ea vio mave. <sup>12</sup> Mia kulo Ju nalo napano Atua biolo jukamu ka ava jouro, voniganei maka bunu amonmonea kiniou, ana mia Atua rivuku bulaglo ava atu tavio ea melijokouo, ea vio napano tomu ajumia ajegi ajer m̄arjuvulo eaio.”

<sup>13</sup> Naruei Yesu ber ka boru na mira nei, naio berinavo “Mo, bo ga, jau komijikia kava vonuo. Mia rimaluvo kaso tibe ka na jau komoneaio.” Mia memedu ka bogo nene garuei, toro na iñauano nei niabene binime i bo bereio.

*Yesu mieliel ka Pitere koano kenieno  
Mak 1:29-34; Luka 4:38-41*

<sup>14</sup> Ana Yesu naio jo kia ga Kapeneam, ana naio ban ea Pitere kunuano, mia naio mial Pitere koano kenieno mieyulu, naio jo mon ea m̄nalo jogu. <sup>15</sup> Naruei Yesu mijiou jokol tira nene jumano, ana kiano mieyuluano nei jaluvo denio, ana naio mijog bo jumolu, naruei naio jian sinianio ban Yesu.

<sup>16</sup> Ea niogoravo na legiano nei, tomu nalo aburu tomu telabo abinime i ea Yesu, napano siñaro nalo ajualo. Naruei naio mijil bulag siñaro nalo nei ea ga kiano iliano, ana naio mila tomu na mieiano nalo bunu amijog bo bereio. <sup>17</sup> Vite nalo nei amaluvo jibe nei ka mia rila Naverialiano Aisea kiano iliano rime i rimaluvo, tibe ka napano naio berenio, berinavo

*“Naio bar bulag kiado mieiano nalo, a naio bar kiado niabe jaleleano nalo bunu.” Ais 53:4*

*Tomu juo ajidom atakisor Yesu  
Luka 9:57-62*

<sup>18</sup> Ea bogoti dolu bereio, ana Yesu jo naliko tomu telabo napano aju jeliviv ea naio, ana naio jidom taluvo denlo, naruei naio ber ka kiano naiagagoano nalo, berinavo “Kito m̄na, ravan ea ueiyabo tivelinio.”

<sup>19</sup> Mo nalo abarvio ka mia avano, ana naverloglogiano na tuboiano tai binime i ea naio, berkar ban Yesu, berinavo “Naverloglogiano, mia kiniou natakisorso navan ea vio vabe na jau kavan eaio.”

<sup>20</sup> Ana na Yesu naio berdoḡe banio, berinavo “Kuli deden nalo abe m̄alo ḡili na amon eaio, a menu nalo abe m̄alo niuku. Mia kiniou, Kulorinio Kenerinio, kiniou maka ve kiaku vio tai, ka nava nomonmel eaio. Mia verenio jau kajaaro ka meuliano na jibe nei mia jau komijikia komei.”

<sup>21</sup> Ea bogo nene ga, Yesu kiano naiagagoano dolu bereio berkanio, berinavo “Tubo, jau kajamo ka kiniou nava nevitar kiaku tormoruo beamu vo, mia verenio bogo tai naio riñaro ana mia kiniou neme i bereio natakisorso.”

<sup>22</sup> Ana Yesu naio berkanio, berinavo “Komei katakisor kiniou ga. Kotuvan tomu napano niunulo añaro ruei ka ativin kialo tomu nalo napano añarn̄aro.”

*Yesu berbure burum̄ara jegi  
Mak 4:35-41; Luka 8:22-25*

<sup>23</sup> Mia Yesu naliko kiano naiaga-goano nalo abinime i aboru ea ueiyabo nei bisi, ana nalo abavin ea uako tai ea vio na. <sup>24</sup> Nalo aju abano, mia burum̄ara jegi tai binime i miuvuvu mila ueiyabo nei bieveluo m̄ele, mila uako nei jikar ka jidom rimadudu. Mia Yesu naio joa uako, mia naio mon ea selailugu monmelio, <sup>25</sup> mia nalo aba amila bonio, nalo aberinavo “! Tubo, keialio! Vaataro ka ramadudu naruei, jau monoka kalarur kito.”

<sup>26</sup> Naruei Yesu naio mil banlo, naio berinavo “! Mm! ? Kamiu kumerou ka venia? Kamiu maka kuvitu sikili ea kiaku moroano leleio.” Karina naio jumolu ju, ana naio mil berbure jegi ber riuvuvu re, naio mil berbure tei, ber rivatove. Ana vio binime i melumu bo.

<sup>27</sup> Bogo napano naiagagoano nalo amial ka vio jubabinio bo jibe na, nalo amiilo toru, nalo aberenio “! Tomu nalo! Toro nei maka garuei, mil ga jibe nei, mia jegi naio tei naljuo amiduio. !Toro na naio maka tibe ka toro na!”

*Yesu mijil bulag siñaro nalo den tomu juo  
Mak 5:1-20; Luka 8:26-39*

<sup>28</sup> Mo bogo napano Yesu naio boru ea yaba ueiyabo tivelinio, ana naio ban ea kulo Katara nalo kialo vio. Ea vio na, tomu juo amiyotuba ea buluvae nalo na tomu na m̄ariano nalo, ana naljuo amileal Yesu. Tomu juo nei niadu ban ealo, mia nalo abe deden m̄ele, ana mila tomu nalo amerou m̄ele ka m̄na asel ea m̄arabo



na. <sup>29</sup> Mia bogo napano nalo amial Yesu, naljuo amiaga jouo, aberinavo “?Jau Atua Kenerinio, kiamo vaio joa kumemi? ?Jau kobinimei ka koje vironiano van kumemi napano maka ve kenememi bogo nene vo, a?”

<sup>30</sup> Ana ea vio na taara na kiribue nalo ajunã amiuoiuo ea borotano, <sup>31</sup> ana niadu nalo nei ajegi, abika jikili den Yesu, aberinavo “A verenio jau kekil bulag kumemi, nuberibo kaso jau keila kumemi nuva joomo ea kiribue nalo na.”

<sup>32</sup> Naruei Yesu naio ber kalo, berinavo “Kuvano.” Naruei nalo ajaluvo den tomu juo nei, ana aba joomo ea kiribue nalo neibano. Mia vaarakurano ga, kiribue nalo nei ajikiti, aban ea yabalili tai, ana na ajibirbil abavatove ea ueiyabo nei, abava kovio eaio.

<sup>33</sup> Naruei tomu nalo nanã abitakar kiribue nalo nene aburo, aban ea kialo komeli, ana na nalo aberial vite nalo napano maluvo, a aberii bunu vaio napano bokar tomu juo nei napano beamu niadu jualo. <sup>34</sup> Naruei vaarakurano ga, tomu nalo na komeli neme abinimei ka aial Yesu, mia bogo na amialio, nalo amil jikili ban naio ka naio taluvo den kialo vio.

## 9

*Yesu mijikia biekokoa kariano  
Mak 2:1-12; Luka 5:17-26*

<sup>1</sup> Ana Yesu naio ban bereio naliko kiano naiagagoano nalo, abavin ea uako nei bereio, nalo abarkor ueiyabo na toru nei bereio, naruei nalo abinimei ea kiano komeli nei Kapeneam. <sup>2</sup> Mia tomu tai apier toro na mieiano tai binimei ea naio napano niabene togio m̃aro, naio mon ea m̃ano jogu. Ana bogo napano Yesu mialio ka nalo amonea jikili ka mia Atua rilarur toro na mieiano nei, naio ber ka naio, berinavo “Keneriku, jau komerou re. Kiniou nebiekokoa kiamo vijuku vovaiano ruei.”

<sup>3</sup> Ana ka bogo nene tomu tai na verloglogiano na tuboiano nalo bunuaju, mia amijog Yesu kiano iliano nalo nei. Sopeli ga nalo aberii naio banlo, aberinavo “Toro na mil mila bulag tolu na Atua siano. Naio jo mil jibe na jibe ka naio be Atua ruei.”

<sup>4</sup> Mia Yesu bitilubar kialo jidomiano nalo, naruei naio berinavo “?Ka vaio ana kenemiu jidomiano bujo ka sidom vovaiano jibe na? <sup>5</sup> Ver kiniou never tibe na ka toro na, never ‘Kiniou nebiekokoa kiamo vijuku vovaiano nalo,’ p̃eli na never kanio, never ‘Jau kotumolu keiel,’ mia iliano juo nei, tinene jikili ka averenio, a tinene naio monmaio ka averenio. Nina iliano na

napano naio berinavo ‘Jau kotumolu, jau keiel,’ naio jikili laka, bior tomu nalo amijikia avitilubar ka toro nene jumolu p̃elina maka tumolu. <sup>6</sup> Mia kiniou neiñauka titai napano mia kamiu kuvisidomii kuver Atua naio ga takurano mijikia rilalo, bior kiniou nejidom nala rimeravo van kamiu ka Kulorinio Kenerinio naio bare ka riviekokoa kariano ea yetemeriba nei.” Naruei Yesu mil ber ka toro na mieiano nene, naio berinavo “Jau kotumolu, jau kojuku m̃amo jogu, jau keiel kava vonuo.” <sup>7</sup> Ana toro nei naio jumolu jibe na, ana naio ba vonuo.

<sup>8</sup> Telikiti na tiniobi nalo nei amialio vite nei nalo amerou, a nalo abamenea Atua, bior naio mijamo ka moroano ban toro tai ka naio mijikia rila tibe na.

*Yesu bio Mataiu binimei jakisor naio  
Mak 2:13-17; Luka 5:27-32*

<sup>9</sup> Mia Yesu naio juvan vio na, naio miel kija ga ba lie bano. Naio jo miel bano, ana naio mial kiniou nojorã nojotano ea kanaku vio na iñauano. Mia kanaku iñauano ea bogo na, nojorã nabarbijii puruveru na takis. Naruei Yesu bio kiniou, naio berinavo “Mataiu, jau komei katakisor kiniou.” Mia kiniou nojumolu sopeli, najakisor Yesu.

<sup>10</sup> Karina Yesu binimei jinan ea kunuaku, ana ea bogo na noburu tomu telabo na abarbijii takis, bija kulo va dolu nalo telabo bunu abinimei, ka amijikia atutano asinan burukuti naliko Yesu naliko kiano naiagagoano nalo. <sup>11</sup> Ana na Varisis nalo tai amial ka napano Yesu jo vio takurano naliko tomu nalo nei, ana abika den kiano naiagagoano nalo, aberinavo “?Ka venia ana kenemiu naverloglogiano naio jorã jinan burukuti vio takurano jibe na naliko tom na bova na?”

<sup>12</sup> Mia Yesu naio mijog kialo iliano nei, ana na naio berdope banlo, berinavo “Tomu na niabelo jikili bo, nalo maka asidom toro na kulekuleiano, mia tomu na abar mieiano, nalo ajidom naio. <sup>13</sup> Bo ka kamiu kuvisidomii nioti na iliano tai napano joa Iliano Lu, napano Atua naio berenio, berinavo ‘Kiniou maka nesidom kenemiu sida nalo mia kiniou nejidom tinievuiano toa kenemiu meuliano nalo.’

Kiniou maka nemei ka novio nalo napano ajidomii aber nalo abe tomu na amemedu ruei, p̃eli ga, mia kiniou nebinimei ka novio tomu na bova nalo ka atakisor kiniou.”

*Vikadeniano tai tivelinio ka monduluanano  
Mak 2:18-22; Luka 5:33-35*

<sup>14</sup> Iorou ka vite na, naiagagoano nalo na Jone Baruei kiano abinimei ea Yesu, nalo abika denio, aberinavo "Kumemi numisidom jau koverial vite na ka kumemi. ? Kumemi numondulu damariga ka nubolkouo, mia Varisis nalo bunu amila jibe na, mia bior vaio ana kiamo naiagagoano nalo maka alaio?"

<sup>15</sup> Ana Yesu naio berdoŕe banlo, berii naio naliko naiagagoano nalo, jibe kanio napano nalo ajaaro toru laka bogo napano naio jo naliko, mia monoka nalo ajog rivova iorou ka bogo napano mia naio taluvo denlo, ana naio berinavo "?Bogo napano toro napano naio joro jo kia ga vo ea jokoluolu naliko kiano bilbilu nalo, kamiu kuberiarña amijikia ateg rivior naio? Peli ga. Mia bogo tai, verenio toro nei kiano uolu tai amei avurular naio den kiano bilbilu nalo, ka bogo na naruei mia nalo amijikia amondulu ka sinaniano bior nalo amijog bova toru."

*Vite vou a vite moruo*

<sup>16</sup> Bajago na monduluano, naio be bajago moruo tai na nalotuano na kulo Ju nalo kialo, mia Yesu naio jidom rila rimeravo vanlo ka bajago moruo na jibe na, maka ajikia aviran rivija vite vou nalo napano naio jorña jiloglog kalo, ana naio jii jamerijiano tai tivelinio banlo, naio berinavo "Jau maka kejikia kodu niati kulumarauo napano be terivou, ka jau kotuluko ka kulumarauo moruo tai ka toko vio na buruŕe. Bior niati kulumarauo vou nei, naio mijikia rila korov kulumarauo moruo na togio, ana na mia bulujeleigio rimei ve toru lie vo. <sup>17</sup> Ana na jau maka kejikia koison marjurnelmelu vou napano naio jorña jarabujo kia ga vo ea kulukuti nani napano be terimoruo napano amison marjurnelmelu ea va telabo ruei. Verenio jau kala tibe na, mia marjurnelmelu nene riyukuio, rila kulukuti nani nene rivuruŕeio, naruei ana marjurnelmelu nene riou bulagio, ana kulunani nene rimei rivova bunu. Mia marjurnelmelu vou, jau monokanio koisonio rivan ea kulukuti nani napano be terivou, jikili bo, ana na jau komijikia kodu vatitig mamo marjurnelmelu toaio."

*Yesu mieliel ka tiramoruo tai bija tira sesa tai*

*Mak 5:21-43; Luka 8:40-56*

<sup>18</sup> Bogo napano Yesu naio jorña mil jibe na ban Jone kiano naiagagoano nalo, toro na toru tai na nalotuano na kulo Ju nalo kialo naio binimei vaataro keanio, naio minie tano ka Yesu, jegi banio, berinavo "Aue koig keneriku vevinio naio mario vonganei ga, mia kiniou nebikaso ka nejidom komei, kodu juriamo toaio, ka mia naio

rimeul bereio." <sup>19</sup> Naruei Yesu jumolu jakisor toro nei, naio naliko kiano naiagagoano nalo abano.

<sup>20-21</sup> Mo bogo napano Yesu naio jo miel ban jibe na, naruei tira tai naio jo napano mieiano na jada joa naio mila ka legiano nonovio ga, bokar yuka duelimo ba juo [12] ruei. Naruei naio mial Yesu jo binimei, naio jo ber ea kiano iviso, naio berinavo "Ver kiniou notokol ga kiano kulukoti, mia kiaku mieiano taluvo den kiniou." Naruei tira nei binimei iorou ka Yesu taakano, ana naio jokol juluvati na kiano kulukoti.

<sup>22</sup> Soŕeli ga Yesu bariŕiligio, mial tira nei, ana naio berkanio, berinavo "Nena, jau komerou re. Kiamo viekouroiano ea kiniou burumeuliaso bereio." Naruei memedu ka bogo na, mieiano nei naio jaluvo den tira nene.

<sup>23</sup> Telikiti napano Yesu naio boru ea toro na toru nei kunuano, naio mial tomu naloaju tiniel miia tira sesa nei, ajurña ajegio, amiou ka iou na mariano nalo. <sup>24</sup> Naruei naio mil banlo, berinavo "Kamiu kuvatavio kuviel dedade bereio. Tira sesa na naio maka riñaro na, mia naio monmelio ga." Mia nalo na amiyotel ea naio, abital ea ga.

<sup>25</sup> Naruei nalo amiila bulag tomu nei abatavio, ana Yesu naio ba joomo ea yimo. Naio ba bokar tira sesa nei juriano, ana naio jumolu, meul vatitigio bereio. <sup>26</sup> Naruei lilianiano na tenei buro janea vio ninio, bokar vio reraio jeliviv ea vio nei.

*Yesu milarur merebono juo*

<sup>27</sup> Mia Yesu naio jaluvo den toro na toru neibano kunuano, mia bogo napano naio jo miel bano, mia merebono juo ajakisorio, nalo ajurña abio naio, aberinavo "Jau tormoruo Teviti kiano bajulukuti, jau kobe Naverikariano, aui koig, tiniem riiia kumemi juo liki!"

<sup>28</sup> Ana Yesu ba joomo ea yimo tai, naruei merebono juo nei abinimei ea naio. Naruei Yesu naio bika denlo, berinavo "?Kamjuo kumonea ka mia nemijikia nalarur kamiu tibe na?"

Ana tomjuo nei aberdoŕe, aberinavo "Nao Tubo, kumemi numoneaio."

<sup>29</sup> Ana Yesu mije juriano monea tomjuo nei miralo, ana naio berinavo "Mia rimei tibe ka na kamjuo kumoneaio." <sup>30</sup> Ana na tomjuo nei miralo binimei bo bereio ea aura nene. Naruei Yesu herburelo jikili, naio berinavo "Mia kamiu kuverial re tenei van tomu dolu nalo." <sup>31</sup> Mia abe juo abatavio, ana aberial lilianiano nei ka vaio napano Yesu milaio banbano-o bokar nonovio vio reraio nei binio.

*Yesu mijil bulag niadu den buru tai*

<sup>32</sup> Telikiti na naljuo nei abatavio, mia tomu dolu nalo aburu toro tai binimej ban Yesu. Toro nene niadu ban ea naio, mila na naio be buru maka rijikia ril. <sup>33</sup> Mia Yesu jan ka niadu nei jaluvu den naio, ana toro nei naio mijikia mil bo naruei, mia tiniobi nalo nei amiilo toru kanio, aberenio aberinavo "Uerei, maka leleio reial titai tibe nei kija ea kito kulo Israel-o, mia banei ga."

<sup>34</sup> Mia Varisis nalo aju aberenio, aberinavo "Tete na naio jom̃a jan ka niadu nalo jibe na ea ga moroano napano siñaro nalo kialo parinio tubo ga mijamo ka ban naio."

#### *Yesu tinien miia tomu nalo*

<sup>35</sup> Ana Yesu naio jo miel jeliviv ea komeli nalo a naio jom̃a berloglog tomu nalo ea kialo yimo na volkouano nalo. Naio jom̃a berial lilianiano vou na Atua kiano navenatuboiano, mia naio milarur tomu na mieiano nalo a tomu na niabele nalo bova bunu. <sup>36</sup> Mia bogo napano naio jom̃a miel jeliviv jibe na, naio jo mial tiniobi nalo, naio mialo jibe ka kialo jidomiano nalo bujo laka a nalo abokar jaleleano telabo laka ea kialo meuliano nalo, naruei naio tinien miialo toru laka, bior ajavukia nunu nalo na maka ve kialo toro na vitikariano tai, maka ajikia bunu ka mia atum̃abe naruei. <sup>37</sup> Naruei naio ber ka kiano naiagagoano nalo, berinavo "Riano ga, m̃arimeuano toru meruo jua tinjavio, mia maka tomu ve telabo na aju ka m̃a abarvario binimej vonuo. <sup>38</sup> Kamiu monoka kuvalea sikili ea tubo na tinjavio nei, ka mia riila bulag tomu tabunu avan ka avar kiano sinaniano nalo rimej."

## 10

#### *Yesu kiano naiagagoano nalo*

*Mak 3:13-19; Luka 6:12-16*

<sup>1</sup> Naruei Yesu bio kiano naiagagoano duelimo ba juo [12] ka amei aialio. Nalo abinimej, ana naio mil batitig banlo, bisi na mije moroano banlo ka mia amijikia atitig bulag niununo va den tomu nalo, a ka amijikia aieliel ka tomu nalo napano m̃a amie ka mieiano dedade nalo bunu.

<sup>2</sup> Atevi nalo sialo nalo nei:

nana jukamu, Saimon, napano abio ka Pitere, napano naio be kialo toro na toru,

a Adu, napano Pitere kuruano;

Yemesi naio kuruano Jone, napano Sepeti kenerinio nalo;

<sup>3</sup> Vilip;

Bartolomio;

Tomas;

kiniou Mataiu, napano nebe toro na var bijii takis;

Yemesi napano Alveas kenerinio;

Tateas;

<sup>4</sup> Saimon, napano naio mila poletik m̃ele laka ka jidom rijil bulagio kulo Romo nalo;

a Jutas na vio Kariot, napano mia iorou kanio ana naio jiveluku ka Yesu ban kulo va nalo.

#### *Yesu miila bulag kiano atevi nalo*

*Mak 6:7-13; Luka 9:1-6*

<sup>5</sup> Mia Yesu naio mil batitig ban nalo due-limo ba juo [12] nei, karina naio miila bulag abano. Ilivatitigiano napano naio berii kalo, nainei, naio berinavo "Mia kamiu kuvan ea re nalo napano maka ave kulo Ju nalo, a kamiu kuvan ea re m̃arkomeli nalo na vio Sameria vo. <sup>6</sup> Kamiu kuvan rivior ga nunu nalo na vio Israel napano amilaluv m̃arabo. <sup>7</sup> Mia ver bogo napano kamiu kuvan ka nalo na, mia kamiu monokanio kuviololu, kuverinavo '!Vonganei be bogo na mia Atua kiano navenatuboiano naio jo binimej ea kito!' <sup>8</sup> Mia monokanio kamiu kuvieliel ka nameiano nalo, a kamiu kuvurumeulia tomu nalo napano am̃arñaro ameul bereio. Kamiu kuvilarur nalo napano burumieni milalo, niabelo ameravo bereio, a kamiu monokanio kuvititig bulag niadu nalo ea tomu nalo. Iñauano nalo na, mia kamiu kuviñiau kanio ea moroano tai napano kamiu kumijev kurano ka ga, ana mo mia kamiu monokanio kuvisian kurano ka ga bereio van tomu nalo. <sup>9</sup> Mia kamiu kuvar re kenemiu puruveru tai vija kamiu ea kenemiu siveu nalo, <sup>10</sup> kamiu kuvar re kenemiu basaro tai napano m̃a kumison kenemiu kuluniabemiu dolu nalo vija kulubue na jaumiu dolu bunu ban eaio, a kuvar re kenemiu iesi na abanio vija kamiu kuvano. Tomu nalo napano m̃a amila iñauano novo jibe ka kamiu, mia tomu nalo napano nalo nei amim̃iau kanalo, monokanio mia nalo avitigar vatitiglo."

<sup>11</sup> Ana Yesu berii bunu, berinavo "Bogo napano verenio kamiu kuva kuvoru ea m̃arkomeli tai, mia monokanio kamiu kuvisirag toro tai napano naio jaaro ka rivurukar kamiu ka kuvitua kunuano, ana mo kuvitu vija naio rivano-o rivokar bogo napano mia kamiu kuvituvan m̃arkomeli nene bereio. <sup>12</sup> Avena verenio bogo na kamiu kuvan kuvitu vija m̃aratavo na toro nei kiano, monokanio kamiu kuvan jumemiu kamliko, kuver kalo, kuver 'Tum̃aro to vija kamiu.' <sup>13</sup> Avena verenio m̃aratavo nei avijuku rivu ka kamiu,

mia kenemiu tuñaro napano kamiu kuber kanio mia naio to vijalo, mia ver avijuku rivu re van kamiu, mia tuñaro nei rimej bereio vija kamiu. <sup>14</sup> Mia ver tomu tai ailkue ka avurukar kamiu ea kunualo, mia ver ailkue ka aiagato ka kamiu, mia kamiu kuvituvan m̄aratavo nene ŷelina m̄arkomeli nene to. Mia bogo na kamiu kuvituvan vio nene, ana mo kuvijuba kon yeji ea jaamiu, tibe ka kenemiu iliano na jikili tai banlo ka mia avokar vironiano tai napano memedu ga ka kialo bajago va nalo. <sup>15</sup> Riano kiniou neber batitig ban kamiu, mia sikili lie vo van nalo na ea bogo na tibureiano, tovulu bogo napano Atua naio jibure kulo Sotomo bija kulo Komora nalo nanua beamu.”

*Mia tomu nalo ajil Yesu kiano naia-gagoano nalo*

*Mak 13:9-13; Luka 21:12-17*

<sup>16</sup> Mia Yesu naio berii kalo, berinavo “Kamiu kuvisidomii vatitig rivu. Kiniou nemiila bulag kamiu ka kuvano, mia kamiu kuvano jumemiu yauo ga tibe na, napano kuvitibe ka nunu nalo napano aju iviso ka kuli deden nalo. Tibe na, monokanio kamiu kuve masou rivu, a monokanio kamiu kumelumu vatitig rivu. <sup>17</sup> Bo ka mia kamiu kuvitikar vatitig kamiu rivu, bior mia tomu nalo avuru kamiu kuvan ea komeli a ea kialo yimo na volkouano ka ail van kamiu, ana na mia atibure kamiu a mia avitiv kamiu. <sup>18</sup> Mia avuru kamiu kuva kuvitumolu kuvitu kamu ea tomu na tortoru nalo na buruvenuo miralo, kar ga kamiu kube kiaku naiagagoano nalo, mia ka bogo nene mia kamiu kumijikia kuverial kenemiu moneano na ea kiniou kamu ea nalo na miralo, a kamu ka nalo na maka amonea Atua miralo. <sup>19</sup> Mia ka bogo na nalo amei avuru kamiu, bo ka mia niukniuku rivie re kamiu m̄ele, kuver “?Mia neil tuñabe, a never venia vanlo?” bior mia Niununo Lu naio sian iliano van kamiu ka mia kuverialio, rimemedu ka bogo na iliano. <sup>20</sup> Ana bogo napano kamiu kuvil, mia ve re kenemiu iliano, mia ve Karamemiu kiano Niununo na naio mil ea kamiu.

<sup>21</sup> “Ea bogokouo na, mia toro mijikia rijamo ka kulo va dolu nalo amei avurular kuruano kar garuei, ŷelina kenerinio kar garuei, ka mia auebinvinlo am̄arñaro, nina bior ka napano nalo amonmonea kiniou. Mia kiritete nalo bunu amijikia atumolu, ka averial karam̄alo kenielo nalo napano amonmonea kiniou, ka mia

am̄arñaro tibe na bunu. <sup>22</sup> Naruei mia tomu nalo tiniel tii re kamiu, mia atupe kenemiu iliano ka kamiu napano siaku jua kamiu, mia ver toro napano riviekouo dan̄ariga rivano-o rivokar bogokouo nei ribisi, mia Atua rilarur naio. <sup>23</sup> Bogo na ver tomu nalo ala baravo ka kamiu ea komeli tai, mia kamiu kuvuro kuvan ea nana lie kanio, mia verenio nalo ala baravo ka kamiu ea vio na, monokanio kamiu kuvuro bereio. Riano kiniou neber ka kamiu, mia kenemiu iñauano riviniu re vo ea m̄arkomeli nalo nonovio na vio Israel nei vo, mia kiniou Kulorinio Kenerinio, nemei bereio.”

<sup>24</sup> Mia Yesu berenio “Naiagagoano, naio maka rijikia to loa kiano naverloglogiano, mia toro na iñauano, naio maka rijikia to loa kiano tubo. Tibe na, mia kamiu monokanio kuvisidomii re kuver mia sikili re van kito bogo tai, <sup>25</sup> bior bajago na jikili napano mia ala ka naverloglogiano, mia ala ka naiagagoano bunu, a vite kouo napano m̄a tubo rivokario, mia kiano toro monokanio rivokario bunu. Jibe ka tomu nalo abio niegeniege kiniou, napano kiniou nabe tobu ka kiaku m̄aratavo, aberinavo kiniou nebe Belsabel, napano nina be sio na tubo na siñaro nalo kialo, mia amijikia avio niegeniege kamiu rivova lie vo, kamiu napano kube kiaku m̄aratavo nalo.”

*Yesu kiano naiagagoano nalo maka ajikia amerou ka tomu*

*Luka 12:2-7*

<sup>26</sup> Ana Yesu berinavo “Bior mia ail rivova ka kamiu tibe ka ga na amil bova ka kiniou, mia kamiu kumerou re kalo. Vite va nonovio na tomu nalo ajuñia amila luklukuao, ŷelina aberavano, mia ammalaluvo amei medave navo, ka tomu nonovio amijikia ajikiaio. <sup>27</sup> A kamiu bunu, vite novo nalo napano nojoñia neber ka kamiu ea burumelijo, kamiu monoka kuverialio bereio ea mi-amioano, a vite nalo nañia kiniou nojoñia nomijuvaluva kanio ea burutiliniemiu ga, monokanio kamiu kuñadu ka bereio ea tomu nalo miralo, ka tomu nalo aviniu amijikia ajogio.

<sup>28</sup> “Kamiu kumerou re ka nalo na amijikia auetam̄aria mokotenemiu, bior napano nalo maka ajikia auetam̄aria niunumiu, mia monokanio kamiu kumerou ka ga Atua, napano naio mijikia rila lelan mokotenemiu vija niunumiu ea vio na jogvaiano. <sup>29</sup> Kuvialio, menu nalo napano

sialo kirijako, nalo miroano laka, aju janea vio, mia aṗilivili kanio puruveru telisu ga ka juo, mia ver nalo tai rijoru ea borotano, Karamemiu naio rijikiao. <sup>30</sup> A vijumiu nalo na pariparimiu nalo, nalo miroano laka bunu, mia Atua bulukuio nonovio abeve terakurano, naio mijikialo. <sup>31</sup> Naruei, kamiu maka kuvijikia kumerou mēle, bior naio mial kamiu kubo loa kirijako nalo nei, mia naio rivitkar vatitig kamiu ka vite nonovio nalo ea kenemiu meuliano nalo.”

*Toro napano berial ka naio be Yesu kiano*

*Luka 12:8-9*

<sup>32</sup> Ana Yesu berinavo “Toro napano riverial ea tomu nalo miralo, riverinavo naio be kiaku toro tai, toro na, mia kiniou bunu neverial ea Teta na joa vio mave mirano never toro na naio be kiaku. <sup>33</sup> Mia toro napano naio riverial naio ea tomu nalo miralo riverinavo naio maka ve kanaku, mia kiniou bunu neverial naio kamu ea Teta na joa vio mave neverinavo naio maka ve kanaku.”

*Yesu be burupati ka tuṗeiano*

*Luka 12:51-53*

<sup>34</sup> Ana Yesu berinavo “Kamiu kuvisidomii re kuver kiniou nebinimeī ka nala burumāra tumāro ve toru toa vio yetemeriba nei. Makanio, mia kiniou maka nemei ka nodu tumāro toaio, mia kiniou nebinimeī bija iobogu na mira tai, napano mia tomu nalo ala baravo a ala mira rivior kiniou. <sup>35</sup> Mia kiniou nebinimeī ka nala mēaku nalo atuṗe karamālo nalo, a merevono nalo atuṗe kenielo nalo, a tira mēaku nalo napano ajoro vonga, mia atuṗe kenielo simemi nalo. <sup>36</sup> Mia nalo naṃa tiniel mimi toru julaka ka kiaku naiagagoano nalo, nina maka ve kulo dolu nalo, mia nalo na abe kialo māratavo ga nalo.”

*Yesu jo jukamu garuei ea kiano naiagagoano nalo kialo meuliano*

*Luka 14:26-27*

<sup>37</sup> Ana na Yesu naio berinavo “Verenio toro tai na naio jidom kenieno toru laka, ṗelina karamāno, ṗelina kenerinio, tuvulu napano naio jidom kiniou, toro na naio maka rijikia rimeī rive kiaku naiagagoano. <sup>38</sup> Mo verenio toro tai rudu re kiano mākolokolo, ka takisor kiniou, tibe ka napano naio maka rijamo ka naio ka rijog rivova kar kiniou, toro na maka rijikia rimeī rive kanaku naiagagoano. <sup>39</sup> Verenio toro tai toṃa sidom mēlea kiano meuliano, toro na mia rilaluvu kiano meuliano. Mia

verenio kiaku naiagagoano tai rilaluvu kiano meuliano bior naio be kiaku, mia naio mijikia rivokar meuliano napano maka rijikia ribisi.”

*Nalo napano avitkar vatitig naiagagoano nalo, mia ajev kialo mauo nene*

*Mak 9:41*

<sup>40</sup> Ana na Yesu berenio, berinavo “Verenio toro tai rivuru kamiu kuva joomo ea kunuano, nina jibe ka ga napano naio buru kiniou ga naba joomo ea kunuano. A verenio toro tai rivuru kiniou nava joomo ea kunuano, nina jibe ka ga napano buru naio napano miila kiniou nebinimeī, naio ba joomo ea kunuano. <sup>41</sup> A verenio toro tai rivuru naverialiano tai ṗelina toro na memedu tai tibe na rivan ea kunuano, bior naio mijikia ka toro nei naio be toro lu tai na Atua kiano iṃauano, mia naio rivokar mauo na ga napano mia Atua rivar van kiano tomu na tortoru nalo nei. <sup>42</sup> Kiniou neber vatitig ban kamiu, ka verenio toro tai rije baja na uei menini ga van kanaku naiagagoano tai, napano naio maka sidomii river naiagagoano na naio be toro na toru tai, ṗelina naio be toro kurano ga, mia toro nene rijeṗ kiano mauo tai rivior vite novo napano naio milaio ban kanaku toro neibano.”

## 11

<sup>1</sup> Naruei bogo na Yesu mil batitig ban kiano naiagagoano nalo duelimo ba juo [12] nei bisi, ana naio jumolu den vio nei, naruei naio ban ka riverlogloglo a rioliolu vanlo ea komeli nalo na vio Kalele.

*Jone Baruei kiano naiagagoano nalo abinimeī*

*Luka 7:18-23*

<sup>2</sup> Kanio bogo nei, Jone Baruei joa yimo na tetavokoiano, a naio mijog lilianiano na iṃauano nalo napano Kristo joṃa miṃau kalo, naruei naio miila kiano naiagagoano tealō, <sup>3</sup> abano abika den Yesu, aberinavo “? Juṃabe? ?Jau kobe toro na ajuṃa aberio na nanua ruei aberinavo mia toro na toru tai naio rimeī ka rivurimārabō ka kito, ṗelina jau maka kove toro nene kiana navo, ana monoka kumemi nuviturorea toro dolu bereio vo ka mia naio rimeī?”

<sup>4</sup> Naruei Yesu berdoṗe banlo, berinavo “Kamiu kuvan bereio, kuvial Jone, ana kamiu kuverial vanio vite nalo napano kamiu kumial napano kiniou nomimāukalo ea vio nei, a vite nalo na kumijog aberii ban kamiu ea kiniou, jibe ka vite nalo napano Naverialiano Aisea berio na nanua ruei, napano naio berinavo:

<sup>5</sup> *'Merebono nalo, ajirarag bereio ruei,  
a nalo napano abe jaba milalo a abe javu-  
luku milalo, vonganei amiel bereio  
ruei,*

*a nalo napano burumieni milalo, von-  
ganei niabele binime meravo bo  
nonovio bereio ruei,*

*a nalo napano abe bulubau nalo, vonganei  
amijog vite bereio ruei,*

*a nalo napano amarmaro, vonganei  
nalo amemeul bereio ruei,*

*a nalo napano abe taliñasa, vonganei kin-  
iou nojorña neberial Liliantano Vou  
banlo ruei.'* Ais 35:5,6

<sup>6</sup> "A kamiu kuva kuver ka Jone bunu,  
kuver Toro napano maka leleio kiano  
jidomiano riveve juo ea kiniou bogo tai,  
mia ilivuiano rimeí van naio.' "

*Yesu jukunu ka Jone Baruei  
Luka 7:24-30*

<sup>7</sup> Bogo napano Jone Baruei kanano na-  
iagagoano nalo ajumolu ka avan bereio,  
Yesu berii Jone nene ban tomu nalo, beri-  
navo "Bogo napano kamiu kubatavio ea  
vio yauo na beamu, kamiu kuban ka kuvial  
venia? !Maka ve tinieku ka kamiu kuban  
ka kuvial javiniu nalo napano jegi jorña  
buku biliviliglo janea vio julaka ga! <sup>8</sup> A  
kiniou maka ve tinieku bunu ka kamiu  
kuban ka kuvial toro na toru tai napano  
naio miya kuluniabele maraiu, bior tomu  
na jibe na nalo maka ajikia atua vio na  
miagiago jibe ka vio yauo kurano ga na,  
mia nalo bogo nonovio ajua yimo novo na  
tubo na toru kunuano. <sup>9</sup> ?Makanio, mia  
kiniou neber ðeli kamiu kuban ka kuvial  
naverialiano tai, a? Mo nina bo ga, mia  
kiniou neber ka kamiu, neberinavo toro  
napano kamiu kumitumolu ka kuva kuvial  
naio, naio toru lie, juvulu naverialiano re  
nua nalo, <sup>10</sup> bior Atua naio berii Jone nene  
ea kiano Iliano Lu ruei, naio berinavo

*'Kiniou nemiila kanaku naverialiano  
jukamu kaso, ka naio rila vatitig  
kanamo mñarabo.'* Malakai 3:1

<sup>11</sup> "Riano, kiniou neber ka kamiu,  
neberinavo ea vio yetemeriba nei, Jone  
Baruei naio jo mave loa tomu dolu nalo  
abiniu. Mia nalo aviniu napano mia  
amei joomo ea navenatuboiano na Atua  
kiano, riva rivokar toro na maariano kalo  
nana jotano laka garuei, nalo na naruei  
aviniu atu mave loa Jone, ka mia nalo  
avar ilivuiano na Atua kiano tuvulu Jone.

<sup>12</sup> Jikario ea bogo napano Jone Baruei jikar  
ka mña mioliolu, binimeí bokar banei, tomu  
nalo ajunña amilidie navenatuboiano na  
Atua kiano, a uolu kouo na mira nalo  
bunu ajumolu mña amila vio ka atuvulio.  
<sup>13</sup> Be bogo binimeí bokario bogo na Jone,

naverialiano nalo a Mosis kiano tuboiano  
napano naio jirilo, aberial vite telabo na-  
pano mia amijikia ayotuba iorou. <sup>14</sup> A  
verenio kamiu kumisaaro ka kumonea vite  
nalo nei napano mia ayotuba iorou, mia  
kamiu kumijikia kuvitilubar ka kuver Jone  
Baruei naio be Elaija na nanua aberkario  
nua ruei ka mia naio rimeí bereio. <sup>15</sup> A  
verenio be tiliniemiu, bo ka kuviagago  
vatitig ka kiaku iliano nei."

*Yesu mil kilkil ban taara nalo na ea  
kiano bogo*

*Luka 7:31-35*

<sup>16-19</sup> Ana na Yesu mil lie vo, berinavo "?

Mia kiniou nemijikia never iliano vaio ka  
mia rivokar bajago na tomu na vonganei?  
Ea mñarabo nonovio napano Atua milaio ka  
rila von ka mia rivu ka kamiu, mia kamiu  
maka lele kuvisidomio, kamiu kumitu  
bereio mña kumil niegeniege naio biorio.  
Bior bogo napano Jone naio jo, naio jorña  
mondulu ka sinaniano ka tomña rivolkouo,  
a naio jo bel bunu ka mñarjunñelñel,  
ana tomu nalo amialio jibe na, ana nalo  
amiila naio, aber "Tete na niadu jua naio.'  
Mia bogo napano Kulorinio Kenerinio naio  
binimeí jo, naio jinan batitigio a naio  
munu batitigio, ana nalo amil ea naio,  
aber 'Kuvialio vo, toro na naio be toro  
na jinan mñele, a miokovo ka sinaniano  
julaka, a naio be toro na munu mñelea  
mñarjunñelñelu, a naio be toro tai napano  
kiano bilbilu nalo abe tomu na abarbiji  
takis a tomu na bova ga nalo.'

"Ka tenene, kiniou nemial kamiu tomu  
na vio banei, napano kamiu kuvitibe ka  
kiritete nalo napano ver ajunña ajerjere  
ea vio medave na komeli, mia nalo atu  
aviovio van kialo bilbilu sesa nalo, aver  
'!Oi, kamiu kubova ga! Verenio kumemi  
numitu numue bulaiu, mia kamiu maka  
kuvisidom kuvolu vija kumemi, a verenio  
numiou ka iou na mñariano, mia kamiu  
maka kuvisidom kuviteg vija kumemi.'

"Mia vite nonovio napano amalmaluvo  
ea Atua kiano masouano, beamu tomu  
telabo amilikue keanio, mia iorou ana mia  
naio rila rimeravo ka masouano nei keano,  
naio memedu ga a be riano laka."

*Yesu berkakar vatitigio bo ban nalo  
napano maka amonea naio*

*Luka 10:13-15*

<sup>20</sup> Naruei Yesu mil berkakar ban tomu  
nalo na ea komeli nalo napano naio  
miñauka burutomoluo telabo kalo, bior  
nalo amial kiano vite nalo nei, mia nalo  
maka leleio aviliglo. <sup>21</sup> Naio berenio "!  
Kulo Koresin nalo, naliko kulo Betsaeta  
nalo, kamiu kumila lelan kamiu toru laka!

Verenio kulo Taia naliko kulo Saiton nanua aial burutomoluo nalo nei napano kamiu kumialio nei ruei, mia nalo aviliglo nua ruei. Nalo maka ave kulo Ju, mia aya kulu-niabelo na be m̄adati a mia nalo avisivisii buluñaroro ea pariparilo ruei, ka tomu nalo avitilubarío ka nalo amijog bova riano bior kialo kariano nalo. <sup>22</sup> Kiniou neber ka kamiu memedu, ea bogo na tibureiano, mia kenemiu vironiano tovulu nana ve kialo.

<sup>23</sup> "1A kamiu kulo Kapeneam, napano m̄na kumituñra kubarvar ka kamiu, a kumisidom kuvitu mave laka, mia kamiu kuvitakar kamiu! Mia Atua naio rivuku kamiu kuvatove laka ea bulukusebi. A verenio kulo Sotomo nalo aial burutomoluo nalo napano kamiu kumialio nei, mia p̄eli aviliglo ka mia buruñara sebi na vio mave maka rijikia sisen kialo vio rivakovio. Mia kamiu kumial burutomoluo nalo nei ruei, mia kamiu maka kuvilig kamiu leleio vo. <sup>24</sup> Tenene na kiniou neber ka kamiu, ka bogo na tibureiano, mia Atua tinien riialo tovulu kamiu."

*Yesu ber siva ban karam̄ano  
Luka 10:21-22*

<sup>25</sup> Mia ka bogo nei, Yesu bolkouo, ber "1Teta o, Tubo na vio mave, a Tubo na yetemeriba! Neber siva banso, bior jau koberloglog vite nalo napano ea kiniou, ban nalo napano kialo jidomiano jibe ka kiritete nalo ga, mia nalo napano ajidom ka abe masou laka, bija nalo napano ajidom aber amijikia vite, mia jau komilavan vite nalo nei kalo. <sup>26</sup> Riano, Teta, ninei javukia ga nana jau kojidomio."

<sup>27</sup> Karina Yesu ber bunu, berinavo "Karam̄aku juvan vite nonovio jua jum̄aku ruei. Mia Karam̄aku, naio ga takurano mijikia batitig kiniou, mia kiniou nei napano nebe kenerinio, kiniou ga takurano napano nemijikia batitig naio. Kiniou kumemliko nalo napano nebijaualo ka nesiloglog Karam̄aku kalo ka avarkar tinielo ea naio, kumemi nene naruei numijikia batitig naio napano be karamememi."

*"Kamiu kumei ea kiniou ka kuvijilimebi"*

<sup>28</sup> Ana Yesu berii bunu, berinavo "Kamiu nonovio napano tiniemiu maro m̄ele bior kamiu kumituñra kubar de kenemiu bagaro nalo na teremi ea kenemiu meuliano, bo ka kamiu kumei, kamiu kumei ea kiniou, ka mia kiniou nemijikia nejev jilimebiano van kamiu. <sup>29</sup> Kamiu kuvudu kiaku iliano nalo tibe ka vuu tai na kenemiu meuliano, a kamiu kuvudu kanaku bajago nalo, bior kiniou nebe toro

na momavo ga, kanaku jidomiano batove. Tibe na, mia kamiu kuvileal ka kenemiu jidomiano nalo ajilimebi, <sup>30</sup> bior kanaku verloglogiano nalo, nalo amonñai ga a amelala ga, a vite nalo napano mia kiniou navar van kamiu ka mia kuvario, mia ve temi laka re ka kamiu."

## 12

*Yesu naio be tubo na Legiano Lu  
Mak 2:23-28; Luka 6:1-5*

<sup>1</sup> Naruei ka bogoti dolu bereio napano be Legiano Lu, Yesu naliko kiano na-iagagoano nalo amiel abano, mia kialo m̄arabo jel iviso bure tiniavio na m̄arauti. Nalo ajuñra amiel jibe na, naruei kiano na-iagagoano nalo jjerlo, ana amikiti kokorov m̄arati uiti nalo tealo ka asenio. <sup>2</sup> Nalo ajuñra amila jibe na, naruei Varisis nalo tai ajua vio na,aju amial Yesu nalo, naruei nalo amil ban Yesu, aberinavo "1Ei, jau keialio! Kiamo naiagagoano nalo ajuñra abar sinaniano ea tiniavio jibe na, ajuñra amila im̄auano ea Legiano Lu, ana verenio amila jibe na, nalo ajuñra amila korov kiado tuboiano."

<sup>3</sup> Ana Yesu berdoḡelo, naio berinavo "2 Jibe na kovio, p̄elina maka kamiu kuvuluku kovio ea Iliano Lu bogo tai, ea vite nalo napano Parinio Tubo Teviti re nua milaio, a? Naio naliko kiano tomu nalo jjerlo toru, <sup>4</sup> naruei naio ba joomo ea Atua kiano Tobobo Lu, naio midu joko lu na tuboiano berenio kulo lu nalo ga amijikia asenio, mia Teviti nalo bunu ajenio. <sup>5</sup> ?Jibe na kovio, p̄elina kamiu maka kuvuluku bunu ea Tuboiano na Mosis kiano, napano ea Legiano Lu nalo, kulo lu nalo monokanio ava joomo ea yimo lu na Atua kiano, ka nalo ala kialo im̄auano eaio? Jibe na, nalo ajuñra amila korov tuboiano na berbure ber toro maka rijikia rim̄au ka Legiano Lu, mia Atua naio maka sidomialio tena river nina be tena bova tai. <sup>6</sup> Kiniou neber ka kamiu, neberinavo be navenatuboiano vou tai jo vonganei, napano naio jo mave laka jovulu tuboiano na Atua Kunuano Lu, <sup>7</sup> mia naio jibe ka napano ea Iliano Lu, napano Atua naio berenio, berinavo

*'Kiniou maka nesidomii kenemiu sida nalo,  
mia kiniou nejidomii ga bajago na  
tineiaiano.'* Osea 6:6

? Pelina kamiu maka kuvijikia nioti na iliano na navo? A verenio kamiu kumijikia ruei, mia kamiu kuvitu re kuvitibure searo ea kanaku naiagagoano nalo nei napano maka ala titai na bova. <sup>8</sup> Kulorinio Kenerinio, naio naruei naio be tubo na Legiano Lu."

*Yesu milarur toro tai jumano*

*Mak 3:1-6; Luka 6:6-11*

<sup>9</sup> Naruei Yesu naio juvan vio na, naio miel bano, ana na naio ba joomo ea kialo yimo na volkouano tai. <sup>10</sup> Ea vio na, toro tai naio jo na, naio be jume kirikokouo, a tomu tai bunu aju ajidom aleal torokoriano tai ea Yesu verenio naio rila vite rimemedu re. Naruei tomu nalo nei abika Yesu, aberinavo “? Jumabe, kiado tuboiano berbure inauano ka ala batitig mokotenano toro ka Legiano Lu, pelina naio maka riverbureio? !Jau kover von vite na!”

<sup>11</sup> Naruei Yesu berdoŕe, berinavo “? A verenio toro tai kiano nunu tai, mia nunu nene ga rijoru ea ŕili tai ea Legiano Lu, kuberiana mia toro nei maka rijikia riva rivuru lario bereio? !Nao, mia kito nonovio monokanio rala tibe na van kiado temeul nalo! <sup>12</sup> A verenio memedu jibe na ea kiado tuboiano ka kito rajai nunu ea Legiano Lu, jibe na kito romijikia rala inauano ka rajai toro ea Legiano Lu bunu, bior toro naio bo loa nunu.”

<sup>13</sup> Naruei Yesu ber ka toro na be jume kirikokouo, berinavo “Kovitirii jumano rimemedu.” Naruei naio mila jibe ka napano Yesu naio berenio, ana na naio jumano binime be bereio, javukia jumano tinene. <sup>14</sup> Ana na Varisis nalo napano aju ea bogo nei amijoku, naruei nalo abatavio, ka averii tumabe naruei ka mia amijikia auebin Yesu rimaro.

*Yesu naio be toro na inauano na Atua kanano*

<sup>15</sup> Mia Yesu naio mijikia ka Varisis nalo ajidom aue naio, naruei naio juvan vio nei, naio naliko tomu telabo napano ajakisorio. Naruei naio jo milarur tomu nalo na amie, <sup>16</sup> mia naio mil jikili banlo, naio berburelo ka ava averii re naio van kulo dolu nalo. <sup>17</sup> Naio mila jibe na ka mia Atua kiano iliano tai mijikia rime rive riano, napano Naverialiano Aisea berialio nua, a iliano nei naio ber jibe nei, berinavo

<sup>18</sup> “*Nina be toro napano miŕau kanaku, napano kiniou nebijaualar naio.*

*Kiniou nejidom melea naio bo laka, a kanaku jidomiano jaaro toru kano.*

*Mia kiniou nodu Niunuku toa naio, ka mia naio riverial bajago nalo napano memedu van tomu nonovio nalo na yetemeriba nei.*

<sup>19</sup> *Mia naio maka rivukuju van toro, naio maka vijago mele, mia naio maka rijikia rivuku iliano ve telabo ea vio medave.*

<sup>20</sup> *Mia naio maka rijikia telar javiniu napano burukorovio jaklele ruei jo,*

*a naio maka rijikia rijukon bin yulu na volvolkouo ka rimaro.*

*Mia naio rimau tibe na rivanvano-o rivokar napano bajago na memedu naio tumolu sikili tu tovulu bajago na bova.*

<sup>21</sup> *A mia tomu nalo nonovio na yetemeriba nei, mia nalo avarkar tinielo ea naio sikili ka mia naio rilarurlo.” Ais 42:1-4*

*Aberenio Yesu miŕau ea moroano na Siŕaro kiano*

*Mak 3:20-30; Luka 11:14-23, 12:10*

<sup>22</sup> Naruei tomu nalo aburu toro tai napano niadu ban ea naio, naio binime ea Yesu. Niadu nene mila naio mirano bono, a naio be buru bunu, mia Yesu naio mila batitig mirano a tinajono abinime abo bereio. <sup>23</sup> Naruei nalo napano amial vite nalo nei amiilo toru, amemebiju kano, ana na aberinavo “!Uere! ?Tete na naio be Teviti kenerinio namŕa roju rorea naio be kovio, pelina makanio?”

<sup>24</sup> Mia bogo na Varisis nalo amijog tomu nalo kialo iliano nei, mia nalo amijoku toru, nalo aberenio “Toro na jitig bulag niadu nalo ea ga moroano napano siŕaro nalo kialo tubo napano siano Belsabel, mijamo ka ban naio.”

<sup>25</sup> Mia Yesu naio mijikia kialo jidomiano, ana naio ber kalo, berinavo “A verenio tubo tai, kiano tomu nalo avuruburelo, napano togio nene ail die togio nene, mia tubo nene kiano inauano nalo monoka mia atibirbili; a verenio komeli tai, pelina maratavo tai, tomu nene nalo avuruburelo, ka togio ajidom ajil bulag togio nene, mia tomu nalo nei maka ajikia atu rivu bogo tai. <sup>26</sup> ?A jibe na bunu, verenio Setano kanano tava nalo tealu atu ajil bulag nalo togio dolu, nina berial ka nalo aburuburelo ruei, ana na mia navenatuboiano na Setano kanano naio sikili tu tumabe? <sup>27</sup> ! Mia kamiu kumitumŕa kuberenio kuber jibe na naruei, kuberenio kiniou nojomŕa nemijil bulag niadu dolu nalo ea moroano na burumŕara siŕaro napano Belsabel, mia maka rijikia tibe na leleio garuei! ?Mia verenio tibe ka napano kamiu kuberenio, jumabe naruei ana kamiu tealu bunu ajumŕa amijil bulag niadu? ?Kei mijamo ka moroano na jibe na banlo, peli Setano bunu koviobo? Bo ka verenio kenemiu naagagoano napano ajumŕa amijil bulag niadu, ajog kenemiu iliano na. <sup>28</sup> Ana makanio, kamiu kuber maka rimemedu ga. Kiniou nojomŕa nejitig bulag niadu ea moroano na Atua kiano Niununo ga, mia tenei berial ber Navenatuboiano na Atua kiano ju iviso bure kamiu ruei.



<sup>29</sup> “!Kuvijio! Verenio toro tai sidom riva joomo ea toro kouo tai kunuano ka mia naio rivina ka kanano saba nalo, mia naio monokanio rivar teli riorkar toro nene sikili beamu vo, avona bisi, ana na mo naio mijikia riva joomo ka rivina ka nonovio saba nalo na kanano. Mia kiniou nojorña nomila jibe na naruei ka toro kouo napano Setano.

<sup>30</sup> “Toro napano maka takisor kiniou, naio jo herbure kiniou, a toro napano maka riñau vija kiniou ka nuvuru kiku tomu nalo amei vio takurano, naio jorña mijil dedade ealo abeve terakurano. <sup>31-32</sup> Jibe na naruei, kiniou neber ka kamiu, kariano nalo bija ilivovaiano nalo, a iliano napano mila bulag Kulorinio Kenerinio, mia Atua naio mijikia riviekokoa toro riviorio, mia toro napano naio ril rivova ka Niununo Lu, riverenio kiano inñauano nalo be Setano ga miñaukanio, toro na jibe na, Atua naio maka rijikia riviekokoa naio bogo tai, ea bogo nei a ea bogo dolu napano mia rimej.”

*Buruiesi bija m̄arati nene nalo*

*Luka 6:43-45*

<sup>33</sup> A Yesu naio ber bunu, berinavo “Kito romijikia rovitilubar buruiesi nalo ea salo m̄arati napano abarlo. Buruiesi napano miluo bo, bar m̄arati na bo, mia buruiesi napano miluo bova, naio bar m̄arati napano bova. <sup>34</sup> Mia ea meuliano na toro kiano jibe na bunu, napano kiano iviso jibe kanio burupati tai, a iliano nalo napano amolmoluo ea kiano meuliano ajibe ka m̄arati nalo napano amolmoluo ea burupati nei. ?Mia kiniou nemial kenemiu burupati nalo amenunu rui, mia tunñabe ana m̄arati na bo tai mijikia rimoluo ea kenemiu iliano nalo? !Kamiu kube bajulukuti na maro nalo ga! <sup>35</sup> Toro napano bo, naio barbiji vite na bo nalo jua kiano iviso, naruei bogo nonovio kiano jidomiano na bo naio jo, napano naio mijikia sian bulagio, mia toro na bova, naio jo barbiji vite nalo na bova jua kiano iviso, naruei naio maka rijikia sian bulag jidomiano na bo bogo tai.

<sup>36</sup> “Mia kiniou nejidom kamiu kuvijikia ka ea bogo na tibureiano, mia tomu nalo nonovio monokanio ala kialo veriiano ea kialo ilivovaiano nonovio veve terakurano napano ajurña aberenio ea kialo meuliano nalo, <sup>37</sup> bior mia Atua naio tibure kanamo meuliano rivior kanamo iliano nalo. Nina bior kanamo iliano nalo amijikia alaso komeul, p̄elina mia alaso kovokar vironiano.”

*Tomu na tortoru tai ajidom aial vremesiano*

*Mak 8:11-12; Luka 11:29-32*

<sup>38</sup> Ana tomu na verloglogiano na tuboiano, naliko Varis nalo tai aber ka Yesu, aberinavo “Ei, jau napano abioso ka Naverloglogiano, kumemi numisidom ka jau kala vremesiano tai van kumemi ka mia nuvial kanamo moroano.”

<sup>39</sup> Mia Yesu naio berdope banlo, berinavo “Tomu nalo napano ajidom aial ga vremesiano nalo, abe kulo va nalo, nalo amila kodovo ban Atua jibe ka nalo napano m̄a amila siakaiano. Makanio, mia kamiu kuvial re vremesiano tai, mia vremesiano na Naverialiano Jona ga nanua, nina ga mia kamiu kuvialio. <sup>40</sup> Jona nene naio jo joomo ea buruñara keniene kelijumdumu na toru tai mabono ka legiano tolu a bogiano tolu, naruei mia tibe na bunu ea Kulorinio Kenerinio, napano mia naio toa bulurñabono borotano ka legiano ve tolu a bogiano ve tolu. <sup>41</sup> Naruei nalo na vio Nineva re nua, amijog Jona kanamo iliano, mia nalo abiliglo, a mia nalo na atumolu atu ea legiano na tibureiano, ka mia averilubarbar kenemiu torokoriano nalo, bior be toro tai napano naio loa ka Jona naio jo bija kamiu vonganei, mia kamiu maka kuvilig kamiu leleio vo.

<sup>42</sup> “Nanua bunu be tira na toru tai napano naio be parinio tubo napano juvan kiano buruvenu koalabo laka, naio batove binimei ka rijog tormoru Parinio Tubo Solomon kiano ilimasosouano nalo. Naruei mia tira na toru nei bunu, mia naio tumolu tu ea legiano na tibureiano, naio riverlubarbar kenemiu torokoriano nalo, bior toro tai napano naio be masou loa ka Solomon naio jo bija kamiu vonganei, mia kamiu maka kuvisidom naio leleio.”

*Niununo va mijikia binimei bereio*

*Luka 11:24-26*

<sup>43</sup> Karina Yesu ber bunu, berinavo “Bogo tai, napano ver ajitiglar niadu ea toro, niadu nene naio mijikia riva yeturu, sirago ka buluvio na mia naio rijilmebi eao. Mia ver naio maka rijikia rialealio, <sup>44</sup> mia naio river ‘Ee, bo ka mia kiniou niadu ka bereio kunuaku moruo na beamu vo.’ Naruei, bogo napano naio rimej bereio mia naio rial yimo nei beteauo, a mila kon a meravo bo, a amila batitig saba nene nalo mededu rui ju. <sup>45</sup> Naruei naio mijikia riva rivuru bereio niadu dolu nalo ve aluo napano abova laka loa naio, amei vija naio, ka mia amijikia ava joomo bereio atua toro nei. Mia toro nei nua kiano

meuliano bova, mia iorou kanio kiano meuliano rivoa lie vo. A mia tibe na ga bunu ea meuliano na tomu na bova nalo ea bogo nei."

*Yesu, kenieno a kuruano nalo*  
*Mak 3:31-35; Luka 8:19-21*

<sup>46</sup> Bogo na Yesu jorña mil kia ga vo bija tomu nalo nei, kenieno naliko kuruano nalo abinimei aboru ea vio nei, nalo ajikili aju tavio, ajidom ail vanio. <sup>47</sup> Mia nalo nei tai berial ka Yesu, berinavo "Oi, koniomo naliko kuruamo nalo ajikili aju tavio, amilavio ka ail vanso kija beamu vo."

<sup>48</sup> Mia Yesu naio miolu berdoĝelo, berinavo "A konioku be kei, a kuruaku nalo abe kei?" <sup>49</sup> Ana naio jiloglog kiano naiagagoano nalo, naio berinavo "Kumial nalo na aju na? Konioku a kuruaku nalo, nalo nei aju nei! <sup>50</sup> Bior ver toro napano rila tavukia napano Teta na vio mave naio jidomio, toro na jibe na naio be kuruaku, Ĥeli kuvivinioku, Ĥeli konioku."

### 13

*Jamerijano na kurukuti uiti napano ajibürbil ea borotano kinkin veri*

*Mak 4:1-9; Luka 8:4-8*

<sup>1</sup> Ka legiano nene, Yesu jaluvo den vonuo, ba jotano koyou ea baramudou na ueiyabo na toru ka to riverloglog tomu nalo. <sup>2</sup> Mia tiniobi toru abinimei ka naio ka bogo na, mila ana naio bavin ea uako tai, jotano eaio, mia tiniobi toru nei nalo aju bin baramudou aju, <sup>3</sup> ana naio jo berloglog vite telabo kalo ea jamerijano nalo.

Ana naio berii kalo, berenio "Kuvijio toro tai napano ban ka rivisivisii kurukuti ea kiano tiniavio. <sup>4</sup> Telikiti napano naio jorña bisivisii kurukuti nalo nei, tealo ajibiribil ea m̄arabo, ana iorou kanio, menu nalo abinimei amikiti bulagio nonovio. <sup>5</sup> A kurukuti tealo ajibiribil ea vio na be tabaĝilio yetano kanio, mia maka sano tano nene rimerorolu. Mia abitovtov soĝeli, bior salo tano menivivini ga. <sup>6</sup> Ana bogo napano m̄erenio mijivi nieja jikili nieje salo toti nalo, vaarakurano ga amekekeu, bior maka ve salo bati ka avatove batitigio vo. <sup>7</sup> Mia kurukuti tealo ajibiribil ea vio napano beamu maka atekono vatitig teli va nalo eaio, mia iorou kanio, ana teli va nei naio miluo bereio toru, ana m̄ueko miralo-o ana na nalo am̄arn̄aro. <sup>8</sup> Mia kurukuti dolu nalo bereio ajibiribil ea tano na bo tai, naruei nalo amiluo, ajakou abar m̄arati nalo, napano tealo abar duelimo toromomou

[100], tealo abar duelimo va ari [60], a tealo abar duelimo va rolu [30]."

<sup>9</sup> Ana na Yesu ber kalo, berinavo "Toro napano be tiliniene monokanio naio riia-gago vatitig ka iliano nei."

*?Kar vaio ana Yesu jorña mil jel ea jamerijano?*

*Mak 4:10-12; Luka 8:9-10*

<sup>10</sup> Mia iorou kanio, ana na Yesu kiano naiagagoano nalo abinimei abika den naio, aberinavo "Bior vaio ana jau kojorña koberloglog tomu nalo jel ea jamerijano jibe na?"

<sup>11</sup> Naruei Yesu berdoĝe banlo, berinavo "Atua mila jibe na ka mia kamiu kuvijikia kuvileal m̄ajig na navenatuboiano na kiano, mia naio maka jian jikiaiano nei van kulo dolu nalo nei. <sup>12</sup> Kiniou neber jibe nei ka kamiu, ka toro napano verenio be kiano saba ruei, mia naio rijeve tabunu bere vo ka mia ve miroano, mia toro napano maka ve kanano saba tai, mia naio rila deven vite vaio na telisu napano be kiano ruei. <sup>13</sup> Tenene na kiniou nojorña neberlogloglo ea jamerijano, bior aju amial vite, mia maka lele avitulubarrio, a ajurña amia-gago, mia maka lele ajoglubarbario. <sup>14</sup> Tomu nalo na jibe nei naruei, nalo nam̄a Atua berilo nanua ruei, ea ilirianiano napano Naverialiano Aisea naio berialio, berinavo

*'Mia kamiu kuvijogio rivano-o, mia kamiu maka leleio kuvijikia kuvijoglubarbario bogo tai.*

*Mia kamiu kuvialio rivano-o, mia maka leleio kuvijikia kuvitulubarbario bogo tai,*

<sup>15</sup> *bior kamiu kumitibe ka tomu nalo napano kialo jidomiano nalo am̄arn̄aro, jibe ka napano ajinioko tilinielo nalo, a ajetavoko miralo nalo ruei.*

*Verenio nalo ala re tibe na, Ĥeli mia miralo rivitii dulu vite, Ĥelina tilinielo rijoglubarbar vite, a Ĥeli kialo jidomiano rijoglubarbar vite, ana tibe na ana amijikia aviliglo amei ka kiniou ka mia kiniou noim̄au ka vatitiglo.'*  
*Ais 6:9,10*

<sup>16</sup> "Kiniou neber ka kamiu, kanaku naiagagoano nalo, ilivuiano joa kamiu, bior miremiu nalo aju amial vite nalo napano kamiu kumialio, a tiliniemi nalo amijog vite nalo napano kiniou nojorña neberloglogio ka kamiu. <sup>17</sup> Naverialiano nalo telabo bija Atua kiano tomu nalo nanua, nalo ajidom toru ka aial vite nalo napano kamiu kumialio vonganei, mia maka lele aialio, mia nalo amila vio toru ka ajog

venia na kamiu kumijogio vonganei, mia nalo maka ajog vite nalo nei tai leleio.”

*Yesu ber bisivisii nioti na jamerijiano na kurukuti uiti*

*Mak 4:13-20; Luka 8:11-15*

<sup>18</sup> Mia Yesu mil banlo, berinavo “Mo, kamiu kuviagago vatitig ka kuvijog nioti na jamerijiano na toro napano ban ka rivisivisii kurukuti ea kiano tiniavio.

<sup>19</sup> “Vite na jukamu, be kurukuti na jibiribil ea m̄arabo, nina javukia napano tomu nalo na amijog Ioluano Vou na navenatuboiano nei, mia nalo maka ajoglubario. Kurukuti novo nalo na ajibiribil ea kialo jidomiano nalo, mia toro va nei Simiario naio binimeĩ ana naio bar bulag Ioluano Vou nei bereio den kialo iviso.

<sup>20</sup> “Kurukuti dolu tealo nalo, ajibiribil ea vio na be tabaḗlio yetano napano tano nene meniviniĩ ga, nina javukia napano tomu nalo na amijog Ioluano Vou nei, mia nalo ajaaro soḗeli ga kanio, <sup>21</sup> mia jibe ka maka ve salo pati tai. Amijikia atu ka bogo ve bulati ga, mia verenio bogo na jikili rimeĩ, ḗelina tomu nalo ajilo kar amonea Atua kiano iliano, mia vaarakurano ga nalo ajoro bereio.

<sup>22</sup> “Dolu bunu, nina be kurukuti na jibiribil ea vio na teli va juaio, mia nina jibe ka napano tomu nalo amijog Ioluano Vou nei, mia nalo ajidom r̄lelea kialo meuliano, a tinieljii saba nalo na yetemeriba nei toru laka. Bajago nalo na jibe nei jibe ka teli va, ana nalo abivibin Ioluano Vou nei ka mia naio rivar re m̄arati ea kialo meuliano nalo.

<sup>23</sup> “Mia na maariano nene, naio be kurukuti na jibiribil ea borotano na bo, nineĩ javukia napano tomu nalo na amijog Ioluano Vou nei, mia nalo amijoglubarbario, naruei ajakou abar m̄arati na Ioluano Vou nei ea kialo meuliano nalo, napano mia tai atakou avar m̄arati rivokar duelimo va rolu [30], mia tealo atakou avar m̄arati ve duelimo va ari [60], mia tealo atakou avar ve telabo, tibe ka m̄arati ve duelimo toromomou [100].”

*Jamerijiano na soro va na miluo bija bija kurukuti uiti*

<sup>24</sup> Naruei Yesu berii jamerijiano dolu banlo, berinavo “Bajago napano Atua buru tomu nalo abinimeĩ jouro ea kiano navenatuboiano nene jibe nei. Toro na toru tai napano naio ba bisivisii kurukuti uiti na bo ea kanano tiniavio, <sup>25</sup> mia bogo napano tomu nalo anomomel bogiano, ana kiano uolu tai binimeĩ, bisivisii kurukuti soro na bova ea tiniavio nei bunu, karina naio buro ban bereio. <sup>26</sup> Naruei kurukuti vite juo nei amiluo bija vaarakurano, abe verare ga, mia bogo na ga uiti nalo ajikar

ka ajakou, mia tomu nalo na toro na toru nei kiano nalo abitulubar ka soro na bova bunu miluo bija bija uiti nalo. <sup>27</sup> Ana na nalo abinimeĩ amial naio, abika denio, aberinavo “?Boru, juḗabe? Kurukuti nalo napano romebijalo ea kanamo tiniavio, nalo abe kurukuti na bo ga. ?Mia soro va nei naio binimeĩ juḗabe?”

<sup>28</sup> “Ana na naio berii kalo, berinavo ‘Makanio, nina kiaku uolu tai napano naio mila vite na jibe nei.’

“Naruei kiano tomu nalo abalea naio bereio, aberinavo “?Mo, ana mia tuḗabe, jau kojidom nuva nuvuru bulag soro va nalo nene?”

<sup>29</sup> “Mia naio berburelo, berinavo ‘Makanio, atubo beamu vo. ?Verenio kamiu kuva kuvuru bulag soro va na, ḗeli mia kamiu kumijikia kuvuru bulag belea uiti bunu, ve juo vaarakurano kovioho?

<sup>30</sup> Mia nalo amijikia ave juo ailuo bija vio takurano riva rivokar bogo napano avarbijii uiti m̄arati rimeĩ joomo. Ka bogo na, mia kiniou nemijikia never ka tomu nalo avan ka ate uiti nalo, mia ate bulag soro va nalo nene beamu, aiorkakarlo ve bagaro ka mia avukulo rivan ea sebi. Iorou kanio, ana mo amijikia ava ate uiti nalo ka avario rimeĩ vonuo.’”

*Jamerijiano na kurukuti m̄arabako*

*Mak 4:30-32; Luka 13:18-19*

<sup>31</sup> Naruei Yesu naio berial jamerijiano dolu tai bereio banlo, berinavo “Navenatuboiano na vio mave naio javukia kurukuti m̄arabako napano naio mijoro balea buruiesi. <sup>32</sup> Mia kurukuti nene naio kiritavaso leleio ga, mia bogo napano naio pitov mia naio binimeĩ be buruiesi na burutomoruo tai, juvulu buruiesi dolu nalo, naruei menu nalo amue ḗlalo niuku nalo ea sano jaati nene nalo.”

*Jamerijiano na isi*

*Luka 13:20-21*

<sup>33</sup> Mia Yesu berial jamerijiano dolu bereio kalo, berinavo “Navenatuboiano napano Atua kiano, naio javukia tira tai napano miḗauka isi na telisu ga bija burum̄ara baju na yevi, mia isi na telisu neibano naio miyuku joko nalo nei biniau tortoru.”

*Yesu mil ea ga jamerijiano nalo banlo*

*Mak 4:33-34*

<sup>34</sup> Ea Yesu kanano iliano nalo nei, naio ber bulag vite nalo jibe na ban tomu nalo, mia va telabo napano naio mil ea jamerijiano banlo. <sup>35</sup> Jibe na, ana mila naverialiano nanua kanano iliano be riano, napano Atua ber “Mia kiniou neverial kanaku iliano nalo ea ga jamerijiano,

*mia kiniou neverial saba nalo napano aju-  
luku koalabo laka nua ruei aju nunu  
kia ga vo,  
jihar ka bogo na nejii yetemeriba, bin-  
imej bokar banei.” Iouano  
78:2*

*Yesu berial nioti na jamerijiano na soro  
va*

<sup>36</sup> Karina Yesu juvan tiniobi, ana naio ba joomo ea yimo, naruei kiano naia-gagoano nalo abinimej kean naio, abika denio, aberinavo “? Aiou koig, kumemi numisidom kovisi nioti na jamerijiano na soro va na miluo ea tiniavio na uiti nei?”

<sup>37</sup> Ana Yesu naio berdoḡelo, berinavo “Toro na toru napano bisivisii kurukuti na bo, naio be Kulorinio Kenerinio. <sup>38</sup> Mia kanano tiniavio nene, naio be yetemeriba nei. A kurukuti na bo nalo nei, nalo abe tomu nalo napano aju jouro ea nave-natuboiano na Atua kanano. Mia soro va nalo nei nalo abe Siḡaro kanano tomu nalo. <sup>39</sup> A uolu napano bisivisii kurukuti soro va nei, nina naio be Siḡaro ga. A bogo na avarbijii ḡarati uiti, nina naio be bogo na tagaḡiano. A tomu nalo na iḡauano nei napano avan ka ate bijii ḡarati uiti nalo nei, nina naio be nailiano nalo. <sup>40</sup> A iḡauano na ayobijii soro va karina aise-bilo, nina bajago napano mia rimej ea bogo na maaro, <sup>41</sup> napano mia Kulorinio Kenerinio, naio riila kiano nailiano nalo ka avan ka avar bulag vite nalo napano amila toro mijoru ea kariano, vija tomu nalo na amila bijuku vovaiano nalo, ka mia nalo ajikia atu re bunu naliko tomu nalo na kiano navenatuboiano. <sup>42</sup> Mia nailiano nalo avukulo avan ea sebi na toru, ea vio napano tomu nalo ajuḡḡa ajegi eaio, a ajuḡḡa ajer ḡarjuvulo nalo eaio. <sup>43</sup> Mia iorou kanio, ana tomu na memedu nalo atu jouro ea Karaḡalo kiano navenatuboiano, mia nalo nei amerera atavukia ḡerenio. A toro napano be tiliniene, bo ka naio riagago vatitig ka iliano nei.”

*Jamerijiano na buruḡara puruveru  
novo tai napano ḡa aburu veru ea*

<sup>44</sup> Mia Yesu naio berinavo “Bajago na ver toro napano jidom riva jouro ea nave-natuboiano na Atua kiano, jibe ka jameri-jiano nei: toro tai ba mial borotano tai, mia naio miilo ka buruḡara puruveru novo tai napano jovorvoru ga eaio. Naruei naio jivin vanio lie ka puruveru nei bereio, mia naio ba ḡiliḡili bulag ka nonovio kanano saba nalo binu, ka mia naio mijikia rivul-ular borotano nei, bior naio mijog bo toru laka ka tonovo napano naio milealio.”

*Jamerijiano na basabebe*

<sup>45</sup> Mia Yesu berii bunu, berinavo “Mia bereio, bajago na toro napano jidom riva jouro ea navenatuboiano na Atua kiano, javukia bunu: toro tai, napano naio jomḡa bulu basabebe novo nalo den tomu nalo. <sup>46</sup> Mia bogo tai ana naio mileal tai napano bo, ana naio berinavo ‘Riano ga na, kiniou tinieku jii vite nei toru laka. !Verenio kiniou nemijikia nodu ve kiaku garuei! Mia monoka kiniou nava noḡiliḡili bulag ka kanaku saba dolu nalo nonovio, ka mia kiniou nemijikia nemei novulu vite novo nei.’ ”

*Jamerijiano na levlevi*

<sup>47</sup> Ana Yesu naio ber bereio, berinavo “Mia bereio, bajago na Atua kiano ka rivuru tomu nalo ava jouro ea kiano nave-natuboiano, naio javukia bunu, napano bogo na tomu nalo ajuvarvan levlevi ea ueiyabo, ana amijikia avuru ko niado kinkin nalo ve telabo eaio. <sup>48</sup> Ana bogo napano levlevi bujo vatitig bo, mia tomu nalo aburio bauro, naruei nalo ajaburuburu, abarbarevure niado nene nalo. Ana niado nalo na bo, amisonlo aban ea kanalo basaro nalo, mia niado na bova nalo, nalo abuku lo abano. <sup>49</sup> Mia nina rimej tibe na ea bogo na maaro, mia nailiano nalo ava alaburevure tomu nalo, avuru bulag tomu na bova nalo, <sup>50</sup> avukulo avan ea sebi na toru, na tomu nalo ajuḡḡa ajegi eaio, ajuḡḡa ajer ḡarjuvulo nalo eaio.”

*Jamerijiano na terimoruo a terivou*

<sup>51</sup> Naruei Yesu bika den kiano naia-gagoano nalo, ber “?Kamii kumijoglubar-bar iliano nalo nei?”

Ana nalo aberdoḡe, aberinavo “Nao, kumemi numijikia kovio.”

<sup>52</sup> Ana naio ber kalo, berinavo “Saba nalo nei jibe ka toro tai napano beamu, naio be naverloglogiano na tuboiano nalo na Atua kiano Iliano Lu, mia iorou kanio, ana naio binimej be kanaku naia-gagoano tai ea navenatuboiano na Atua kanano. Naio javukia toro na toru tai napano kiano saba novo na iḡauano nalo telabo ea kunuano. Ana bogo nonovio, naio mijikia rivar bulag kiano vite na be terimoruo na bo kia ga vo, a naio mijikia rivar bulag bunu kiano tena be terivou, ka mia naio rila kiano iḡauano nalo ealo.”

*Kulo Nasarete amilidie ka Yesu  
Mak 6:1-6; Luka 4:16-30*

<sup>53</sup> Bogo napano Yesu berial jamerijiano nalo nei bisi, ana naio juvan vio nei, <sup>54</sup> binimej bereio ea kiano vio. Naruei naio jomḡa berloglog tomu nalo na vio nei, joomo ea kanalo yimo na volkouano, mia nalo amiilo toru ka kiano iliano nalo. Ana nalo ajuḡḡa aberverii kalo, aberinavo “!

Tomnei! ?Tete na, naio bokar m̄asosouano nei juṁabe, a naio jom̄a mila vresesiano nalo na juṁabe? <sup>55</sup> Romijikia tete nei ruei. Naio karam̄ano napano be toro naṁa miṁauka yimo ga napano Yoseve, a napano kenieno, tira napano Mere. A kuruano nalo, nina Yemesi, a Yoseve, a Saimon, a Jutas, nalo na abe kurualo ea naio. <sup>56</sup> A kuvivinieno nalo, nalo nei ga aju kitoliko ga. ?Mia tete na naio jaluvo den kito, ba bar tenalo na be? <sup>57</sup> Naruei nalo tiniel jer naio, maka asidom naio leleio.

Mia Yesu naio ber kalo, berinavo “Toro napano be naverialiano, tomu dolu nalo amijikia ajovonio, mia tomu na kanano vio, naliko kanano m̄aratavo nalo, nalo na ga maka ajikia atovon naio.” <sup>58</sup> Naruei ea vio na, Yesu naio maka rila vresesiano ve telabo, bior nalo maka amonea naio.

## 14

*Parinio Tubo Erot Antapas berii Yesu  
Mak 6:14-16; Luka 9:7-9*

<sup>1</sup> Ka bogo nei, aber Yesu ba bokar Parinio Tubo Erot, na naio be parinio tubo na tanobuku na vio Kalele. <sup>2</sup> Ana Parinio Tubo Erot naio mijog iliano nalo nei, ana naio ber ka kiano tomu na tortoru nalo, berinavo “? Toro napano ajum̄a aberiio na, naio be Jone Baruei ga kovio, napano naio meul bereio den na m̄ariano bo? Tenene na naio mije moroano ka miṁauka vresesiano nalo na.”

*?Jone Baruei kiano m̄ariano juṁabe?  
Mak 6:17-29*

<sup>3-4</sup> Parinio Tubo Erot naio mil jibe na, bior naio naruei muetaṁaria Jone Baruei m̄ario ruei, ana naio jo merou m̄ele kanio. A tukunu na m̄ariano na Jone Baruei kiano jibe nei: Parinio Tubo Erot nei kuruano Vilip, napano naljuo karam̄alo takurano mia keniele juo. Ana beamu, Vilip nene, naio joro ka tira tai siano Niarotias. Mia iorou kanio, ana Parinio Tubo Erot naio ba burular tira nene. Tenene na, Jone jom̄a mil ban Parinio Tubo Erot kanio, berinavo “Tena jau komila na maka rimemedu ka, napano jau koburular tira na, bior naio be kuruamo koano.” Mia Niarotias maka saaro leleio ka Jone kanano iliano, naruei naio mil ban Parinio Tubo Erot, ana Parinio Tubo Erot mila kanano tomu tai aba abokar Jone, amiorkario, ana amidu joa nalakoiano. <sup>5</sup> Mia Parinio Tubo Erot milavio ka ruebin Jone, mia naio merou kija kanio kulo Israel nalo, bior nalo amonea Jone aberinavo naio be kialo naverialiano tai.

<sup>6</sup> Naruei Niarotias nei, naio be kenerinio vevinio tai, mia bogo napano nalo amila jokoluolu ka atekar bogo napano abar Parinio Tubo Erot eaio, ana niatira nene naio bolu kamu ka nalo na ajua jokoluolu nei miralo. Naruei Parinio Tubo Erot naio jaaro toru ka merevono nei kanano voluano, <sup>7</sup> naruei naio berkakario jikili banio, berenio vaio napano ver naio rivika denio, mia naio rudu vanio.

<sup>8</sup> Naruei Niarotias naio mil bija kenerinio vevinio, bisi ana kenerinio vevinio nei naio ber ka Parinio Tubo Erot, berinavo “Vonganei, kiniou nejidom kodu van kin-iou Jone Baruei pariparinio, toa baju tai, rimeia ea vio nei.”

<sup>9</sup> Mia iliano nei mila Parinio Tubo Erot mijog bova bior kiano verikariano na yokovoano nei, mia naio berenio ka ala bo ka tibe ka ga na merevono nei naio berenio, bior naio mila ilikakariano jikili jibe na ea kanano bilbilu nalo miralo ruei.

<sup>10</sup> Ana nalo aban ea yimo na lakoiano, ajektorov Jone burujono, <sup>11</sup> ana amidu parinio joa baju tai, ana amidu binimeia ban merevono nene, ana merevono nene na midu ba ban kenieno. <sup>12</sup> Iorou kanio ana Jone kiano naiagagoano nalo abinimeia amidular mokotenano aba ajivinio, ana nalo aba aberial ka Yesu.

Mo tukunu na Jone Baruei kiano m̄ariano biniu ea vio nei.

*Yesu bagan suṁanalo menu jimo  
Mak 6:30-44; Luka 9:10-17; Jone 6:1-14*

<sup>13</sup> Naruei bogo napano Yesu mijogial ka Parinio Tubo Erot naio jo berii naio, berinavo naio be Jone Baruei naio meul bereio den na m̄ariano, ana Yesu jumolu den vio na, ana naio bavin ea uako tai, ka naio rivan ea vio yauo tai napano be tuṁaro napano maka tomu nalo atuaio. Mia bogo napano tiniobi nalo amijikia ka naio ban jibe na, amolmoluo ea kialo m̄arkomeli nalo, ajakisorio, ajel uro. <sup>14</sup> Mia bogo napano Yesu bauro, mia naio mial ka tiniobi na tomu nalo aju ruei, mia naio tinien mialo toru, ana naio mila kialo tomu na mieiano nalo abo bereio.

<sup>15</sup> Mia bogo napano m̄erenio batove, ana Yesu kiano naiagagoano nalo abinimeia kean naio, aberinavo “Tubo, vio nei maka rivu, a vaataro ka vio rimelijo bunu. Bo ka jau keiila tiniobi nalo na avanvan bereio ea komeli nalo, ka avulu salo sinianio tai.”

<sup>16</sup> Ana Yesu berdoṁe ber kalo, berinavo “Makanio, nalo amijikia atu tibe na rivu ga na. Bo ka kamiu kuvar sinianio tai vanlo.”

<sup>17</sup> Ana nalo aber kanio, aberinavo "I Uerei p̄eli ga, kumemi nubokar joko sesa jumo ga, bija momaio bana juo ga!"

<sup>18</sup> Ana Yesu berinavo "Kuvar rimej van kinioi," <sup>19</sup> ana naio ber ka tiniobi nei, berinavo "Kamiu kuvituno ea soro beamu vo." Naruei naio bar joko sesa jumo bija momaio bana juo nei, naio jirarago bavin ea vio tiniabene, ana naio ber siva ban Atua ka sinaniano nei, karina naio burekokorovio joko sesa nei, naio jian ban kiano naiagagoano nalo ka nalo avar van tiniobi nalo nei. <sup>20</sup> Mia nalo ajinan bano, mabolo jouo bo, mia niati na sinaniano nalo napano maka asenio, nalo abe verare ka aisonlo rivan ea basaro solokobaro nalo napano tortoru ve duelimo ba juo [12]. <sup>21</sup> Mia tomu nalo napano ajinan, sum̄analo ga abokar kovio ea menu jumo [5,000], mia maka avuluku tire nalo vija kiritete nalo.

*Yesu miel mave ea niunuku tei  
Mak 6:45-52; Jone 6:15-21*

<sup>22</sup> Karina Yesu ber ka kiano naiagagoano nalo, berenio "Kinioi nejidom ka kamiu kuvidu kiado uako, kamiu beamu kuva tivelinio ea ueiyabo na toru nei, mia kinioi noto nei beamu vo ka mia neiila tiniobi nalo nei avanvan bereio ea kialo m̄arkomeli dedade nalo." <sup>23</sup> Ana bogo napano naio miila dedade ea tiniobi nalo nei abanvan bisi, ana naio bavin ea suku tai, naio takurano, ka rivolkouo. Bogo napano vio melijo ruei, mia Yesu jo naio ga takurano, <sup>24</sup> mia ka bogo nei, uako neibano naio jo koalabo ruei, iviso ea tinia ueiyabo. Naruei niatuva toru laka, a nalo aju ajupē jegi, mila ana nalo amidu tei mia amidu tei. <sup>25</sup> Mia vaataro ka vio rivuruburevare ka viorijeni, ana Yesu binimej ka rialo, naio jo miel manono mave ea tei.

<sup>26</sup> Mia bogo na kiano naiagagoano nalo amial naio jo miel binimej jibe na, mia nalo amerou, ana aber "I Uerei! ? Titai yako, p̄eli sim̄aro tai koviobo, p̄eli venia jibe na?"

Mia nalo amiaga jouo, bior nalo amerou m̄ele, <sup>27</sup> mia vaarakurano Yesu naio mil banlo, berinavo "I Ei, kamiu kumerou re bunu, mia be kinioi ga nei!"

<sup>28</sup> Ana Pitere berdopē, berinavo "Tubo, a verenio be jau riano, mia kajamo ka kinioi bunu neiel mave ea tei neviedu keanso."

<sup>29</sup> Ana Yesu berinavo "Jau, bo ga, komei."

Ana Pitere batove den uako, naio jikar miel mave ea tei, naio ban vaataro ka Yesu, <sup>30</sup> mia bogo napano naio tinien maio bereio ka jegi napano jikili nei, naio merou. Mia bogo na naio merou jibe na, ana naio jikar ka madudu, naruei naio

bio ban Yesu, berinavo "I Tubo, jau kajai kinioi!"

<sup>31</sup> Vaarakurano ga Yesu mijiou bokar Pitere jum̄ano, ana naio berkanio, berinavo "? Jum̄abe ana niukniuku bieso? ! Maka leleio koviekar kinioi sikili leleio kija vo!"

<sup>32</sup> Mia bogo napano nalo abe juo abavin ea uako bereio, vaarakurano jegi juba bin, <sup>33</sup> mia nalo napano ajua uako amiaia Yesu, aberenio "Riano ga, jau kobe Atua kenerinio riano."

*Tomu na mieiano nalo ajokol Yesu kiano ikinio kulum̄arau*

*Mak 6:53-56*

<sup>34</sup> Ana Yesu nalo aban ea kialo uako abarkorovio ueiyabo labo nei, aba tivelinio, naruei nalo abauro ea vio tai, siano Kenasarete. <sup>35</sup> Mia bogo napano tomu na vio nei amijikia naio, ana nalo amiila toru janea vio nonovio jeliviv ea vio nei. Ana nalo aburu tomu na mieiano nalo abinimej ea naio, <sup>36</sup> naruei nalo abalea naio ka rijamo ana nalo napano amie atokol ga kiano ikit kulum̄arau. A nalo na atokolio tibe na, mia kialo mieiano nalo ribisi, ana mia nalo avu bereio.

## 15

*Yesu kiano naiagagoano nalo amiakurano ea bajago moruo na kulo Ju nalo kialo  
Mak 7:1-13*

<sup>1</sup> Ana bogo nene, Varisis nalo tai naliko naverloglogiano na tuboiano nalo tai ajuvan vio Yerusalemo, abinimej ka aial Yesu. <sup>2</sup> Nalo abika denio, aberinavo "? Ka vaio ana kanamo naiagagoano nalo ajum̄a amiakurano ea bajago moruo na kiado nalotuno, na kiado navurim̄araboiano nalo na beamu ajum̄a aberloglog ka kito, aberinavo bogo nonovio ver toro sidom sinan, monokanio naio takii vatitig m̄arabo na memedu nene, ka sekon jum̄ano beamu vo, karina mo naio mijikia sinan?"

<sup>3</sup> Ana Yesu berdopē banlo, berinavo "? Ana kamiu bunu, bior vaio ana kamiu kumisikili ka kumitakii kenemiu bajago moruo nalo nei, mia ea kenemiu bajago moruo kamiu kumitum̄a kumilakokrov Atua kanano tuboiano? <sup>4</sup> Mia Atua nene, naio ber 'Jau komonmonea karam̄amo a koniomo,' mia naio ber bunu, berinavo 'Ver toro tai naio ril rivova ka karam̄ano a kenieno, kamiu kuvuebin naio rim̄aro.'

<sup>5</sup> Mia vonganei, verenio toro tai berkar ber kiano saba nalo abe lu, mia naio rivar van Atua bogo tai, naio ber jibe na mia iorou kanio, ana naio maka rijikia rivitkar kiano tormoruo juo nei, p̄eli rijailo ka saba nalo nene, <sup>6</sup> ana kamiu kumitu kuber

jibe na naio bo ga na, nina maka ve vite tenia. Mia ea bajago na, kamiu kumitumia kumila Atua kiano tuboiano binimej be iakurano, bior kamiu kumisidom kuvokar ga kenemiu bajago moruo nalo. <sup>7</sup> !Mia kamiu kumilasibi ga na, kamiu kumitumia kumil kurano ga! Naverialiano Aisea naio berii kamiu nua ruei, napano naio berial iliano na Atua naio berenio, napano ber

<sup>8</sup> *Tomu nalo na amonmonea kiniou ka kialo iliano nalo ga,*  
*mia kialo jidomiano nalo aju koalabo den kiniou kia ga vo.*

<sup>9</sup> *Mia nalo aju amilotu ban kiniou kurano ga,*  
*bior bogo napano aberloglog toro, nalo aber iliano na, naio be Atua nene kanano,*  
*mia iliano na be nalo kulorinio ga kialo.' "* Ais 29:13

*Vite nalo napano mila toro miagiago ea Atua mirano*

*Mak 7:14-23*

<sup>10</sup> Naruei Yesu naio bio tomu nalo ka amei vio takurano ea naio, ana naio mil banlo, berinavo "Bo ka kamiu kuviagago vatitigio, monoka kamiu kuvijoglubar kanaku iliano. <sup>11</sup> Maka sinaniano napano ba joomo ea toro niono, naio mijikia rila toro riagiago ea Atua mirano, mia iliano nalo napano ma moluo ea toro niono, naina naruei napano mila toro miagiago."

<sup>12</sup> Ana karina, kiano naiagagoano nalo abinimej, aber kanio, aberinavo "Ai koig, jau komijikia ka Varis nalo tinjel mimi toru ka iliano nalo napano jau kojoma koberenio?"

<sup>13-14</sup> Ana Yesu berdope ber kalo, berinavo "Kamiu kuvisidomial re nalo na. Venia napano nalo ajuma amilaio, naio maka ve Atua kiano imauano na, mia Teta napano joa vio mave mia naio rivuru bulag nonovio vite nalo napano naio maka rimebijalo. ?Tomu nalo na abe merebono ga, mia ajidom avurimarabo ka toro dolu napano be merebono, mia nalo ave juo aiel tumabe? !Mia nalo ave juo amijikia ajoru ea bulukupli tai na!"

<sup>15</sup> Naruei Pitere bika den Yesu, ber "Koig, jau kobijuku bo komijikia koverial nioti na jamerijiano neibano jau koberiio jukamu ban kumemi."

<sup>16</sup> Mia Yesu berenio "Jumabe, peli parimiu merorol bunu kia ga vo? <sup>17</sup> Pelina kamiu kumijikia kija ruei, bior vaio napano ba joomo ea toro niono, jelea mabono ba tavio den mokotenano bereio, <sup>18</sup> mia vaio napano moluo ea toro niono, naio moluo ea kiano iviso jukamu, naruei naio

mijikia mila toro miagiago. <sup>19</sup> Mia nina bior kiano jidomiano va nalo amoluo ea tiniene toro, jibe ka amila bin toro, amila siakaiano, a meaku naljuo niatira amila siakiano, a vinauano, a ilisibiano, a ilivo-vaiano. <sup>20</sup> Mia nina be bajago nalo napano amijikia amila toro miagiago kamu ea Atua mirano. Mia bajago napano ajinan, maka asekon jumalo tukamu, naio maka rijikia rila toro riagiago tibe na."

*Yesu jitiglar niadu tai ea merevono tai Mak 7:24-30*

<sup>21</sup> Naruei Yesu juvan vio nei, ana naio batove ea bulukomeli juo na vio Taia bija Saiton. <sup>22</sup> Ana tira valauo tai na vio Kenano, naio joa tanobuku na vio nei ruei, ana naio binimej mial Yesu, naio bio banio, berinavo "Tubo, jau kobe Naverikariano napano komiyotuba ea Teviti kiano bapulukuti. Kiniou neber bo kaso tiniem riia kiniou. Keneriku vivinio, niadu tai ban ea naio, a mila lelan naio jikili laka." <sup>23</sup> Naruei Yesu mijog tira nei kiano iliano, mia maka riolu riveripe titai leleio van tira nei.

Iorou kanio, ana kiano naiagagoano nalo abinimej, aber kanio aberinavo "Tubo, tira nei, naio joma bio lili kito toru laka. Bo ka jau keila naio rivabilig."

<sup>24</sup> Ana Yesu maka riverdope, mia naio mil ban tira nei, berinavo "Atua miila kiniou nebinimej ka navan ea kulo Israel nalo ga, nalo napano ajavukia nunu nalo napano amilaluvu marabo."

<sup>25</sup> Mia tira neibano naio binimej, minie kamu kean Yesu jaano, ana naio berinavo "Tubo, neber bo kaso nejidom jau kajai kiniou."

<sup>26</sup> Mo Yesu naio berdope, ber "Maka rivu ka navar bulag kiritete nalo salo sinaniano, novuku van kuli nalo." Naio mil jibe na bior naio mijikia ka bogo na, kulo Ju dolu nalo aberiamia nalo ga abe Atua kenerinio nalo, bior ajuma aberii searo ea tomu nalo napano maka ave kulo Ju, abiolo aber abe kuli ga liki.

<sup>27</sup> Mia tira neibano naio mil, berinavo "Jau kober riano, Tubo, mia kuli nalo amijikia asen ga iororoti sinaniano napano jibiribili jel tano ka boru na kuli nalo nei kiano barobaro na sinaniano."

<sup>28</sup> Ana Yesu berdope vatitig ban naio naruei, berinavo "Tira, jau kobiekouo ea kiniou koju jikili laka. Mia vonganei jau keialio rimej vanso tibe ka napano jau komoneaio." Mia memedu ka bogo nene, ana tira neibano kenerinio vivinio neibano binimej bo bereio.

*Yesu milarur tomu na mieiano telabo  
Mak 7:31-37*

<sup>29</sup> Karina, Yesu jumolu den vio na bereio, naio ban bereio ea tanobuku na vio Kalele. Naio joña miel barlaka, ban vaataro ka ueiyabo na tanobuku nei, naruei naio bavín ea suku tai, naio jotano. <sup>30</sup> Naio jotano jibe na, naruei tiniobi na tomu nalo abinimei ka naio, bija javuluku nalo, a nalo napano abe jañaba kirikokouro, a merebono nalo, a buru nalo, a tomu na mieiano dedade nalo bunu. Aburulo abinimei, ajuvanlo aju vaataro ka Yesu, naruei Yesu naio milarurlo abo bereio. <sup>31</sup> Ana tomu nalo amiilo toru ka bogo napano nalo amial buru nalo amil, jañaba kirikokouro nalo abo, javuluku nalo amiel, a merebono nalo ajirarago, naruei nalo amialio, ana amiaia kulo Israel nalo kialo Atua toru laka biorio.

*Yesu bagan suñanaló menu veri  
[4,000], bija tire nalo a kiritete nalo bunu  
Mak 8:1-10*

<sup>32</sup> Ana Yesu bio kiano naiagagoano nalo ka amei aialio, karina naio berinavo "Kin-iou tinieku miia tiniobi na toru nei, bior nalo aju kitoliko bogoti tolu ruei, mia vonganei salo sinaniano nalo binuvinio. Mia kinioi maka nejikia neiilalo avanvan vonuo ver maka sinaniano, bior ver kinioi nala tibe nei, ðeli mia tomu tai miralo ribobogio ea ñarabo rivior vitu."

<sup>33</sup> Naruei Yesu kiano naiagagoano nalo aber kano, aberinavo "?Mia ravar salo sinaniano ea vio be? Bior vio nei be vio yauo kurano ga, a tiniobi toru laka."

<sup>34</sup> Ana Yesu bika denlo, berinavo "?Kamii kubar joko vio?"

Ana nalo aberinavo "Joko aluo [7] ga, bija momaio tealo."

<sup>35</sup> Naruei Yesu ber ka tiniobi na toru nei, berinavo "Kamii kuvitutano beamu vo." <sup>36</sup> Ana naio bar joko aluo [7] neibano, bija momaio nalo nei, ana naio ber siva kano ban Atua, karina naio burekokorovlo, ana bario ban kiano naiagagoano nalo. Ana kiano naiagagoano nalo kija abario abiovio ka janea tiniobi nalo nei. <sup>37</sup> Naruei nalo ajenio bano-o mia mabolo jouo bo. Mia iorou kano, ana nalo amison niati sinaniano nalo napano aju, ban ea basaro sarobobotu nalo aluo, abujovujo vatitigó bo. <sup>38</sup> Mia tomu nalo napano ajinan, suñano nalo ga abokar menu veri [4,000], mia maka avuluku tire nalo vija kiritete nalo.

<sup>39</sup> Karina Yesu miila dedade ea tiniobi nalo nei abanvan bereio vonuo, mia naio ban bereio ea kialo uako, ana naio juvan

vio nei, naio binimei jo bogo bulati ga ea tanobuku na buruñara komeli na vio Makatano.

## 16

*Tomu na tortoru tai ajidom aial vremeniano*

*Mak 8:11-13; Luka 12:54-56*

<sup>1</sup> Bogo tai, ana Varisis nalo naliko Satusis nalo abinimei amial Yesu, ajidom ka alavan naio, ana nalo aberinavo "Kumemi numisidom jau kalavon vremeniano na toru tai van kumemi, napano mia jau koiñaukanio ea moroano na vio mave."

<sup>2</sup> Ana Yesu naio berdoþe banlo, berinavo "Bogo napano ñerenio jo batove, mia verenio kamii kumial vio bilvili ea vio na ñerenio jo batove eaio, ana kamii kumijikia kuverenio 'Mia nieta beni,' <sup>3</sup> a bogo napano ñerenio bavín, mia verenio kamii kumial vio bilvili ana kumial melijo bobogio, ana kumijikia kuverenio 'Mia yuo rivovo banei.' ?Mia kamii kumijikia kubitii vremeniano na ea tiniabene ruei, ka mia kuverenio mia bogo tuñabe, mia juñabe ana kamii maka kuvijikia kuvitilubar kiaku vremeniano nalo ea buruñara bogo toru nei nojo bija kamii nei?"

<sup>4</sup> Mia Yesu berii bunu banlo, berinavo "Tomu nalo na ajidom aial ga vremeniano nalo, abe kulo va nalo, nalo naña amila kodovo ban Atua, abilig taakalo ban naio, jibe ka nalo napano amila siakaiano aburo den koualo nalo. Makanio, mia kamii maka kuvijikia kuvial vremeniano tai, mia kamii kuvial ga napano mia riyotuba ka kinioi tavukia vremeniano na Naverialiano Jona re nua, napano Atua mila naio meul bereio." Ana naio jumolu denlo juvanlo ajubo.

*"Kuvitkar isi na Varisis a Satusis nalo kialo"*

*Mak 8:14-21*

<sup>5</sup> Mia bogo na Yesu naliko kiano naiagagoano nalo ajumolu abano, ana abarkorov ueiyabo na toru nei aba tivelinio, ana kiano naiagagoano nalo tinie bobogia ka avarkar salo joko tai. Mia bogo na aboru tivelinio, <sup>6</sup> ana Yesu jian iliano tai banlo, ana naio berinavo "Kamii kuvitkar vatitigó kamii rivu ka isi na Varisis naliko Satusis nalo kialo."

<sup>7</sup> Ana nalo amijog iliano nei, mia nalo ajunña aberio ka nalo bereio, aberinavo "?Naio mil jibe na bior maka ravarkar joko tai rimei ea vio nei koviobo?"

<sup>8-9</sup> Mia Yesu mijikia kanalo jidom-iano nalo nene, ana naio ber "?Bior vaio



ana kamiu kumiturnā kumisidomii mēlea mabomiu nalo, ka mia kito resen venia? ?Junābe ana maka kuvijoglubar vite nei vo? !Kenemiu moneano kiritavaso! ? Peli kamiu tiniemiu bobogia bunu joko jumo nanua na, nabar ban tiniobi menu jumo [5,000], bija basaro solokobaro nalo na kumisonlo abujovujo? <sup>10</sup> ?Peli kamiu tiniemiu bobogia bunu joko aluo nanua na, nabar ban tiniobi menu veri [4,000] nalo, a basaro sarobobotu vio napano kamiu kumisonlo abujovujo iorou kanio? <sup>11</sup> ?Junābe maka kuvijoglubar ka kiniou maka neil van kamiu ka joko? Mia neber ka kamiu bereio, kuvitakar vatitig isi na Varisis naliko Satusis nalo kanalo.”

<sup>12</sup> Mia vonganei nalo amijikia ka naio maka riverii isi na joko miyuku, mia naio jo ber avitakar batitig Varisis naliko Satusis nalo kanalo ilisibiano nalo napano mia averlogloglo kanio, napano mijikia rila toro parinio turobi ve toru, mijikia riva rila searo ea nono togio na kiano meuliano, tavukia napano isi mila ka joko.

*Pitere berial ber Yesu naio be Naverikariano memedu*

*Mak 8:27-30; Luka 9:18-21*

<sup>13</sup> Naruei Yesu nalo abatove ea tanobuku na bulukomeli na toru nei Sisiria Vilipai, mia ka bogo na naio bika den kiano naiagagoano nalo, berinavo “?Kamiu kumijog ka tomu nalo ajumā aberverii aber Kulorinio Kenerinio naio be kei?”

<sup>14</sup> Ana nalo aberinavo “Tomu tealoo aber jau kobe Jone Baruei bereio, a tealoo aber jau kobe Elaija, a tealoo aber jau kobe Jeremaia, ŗelina naverialiano dolu tai re nua nua.”

<sup>15</sup> Naruei naio bika denlo, berinavo “? Ana kamiu, kamiu na kuber kiniou nebe kei?”

<sup>16</sup> Ana Saimon Pitere naio berdoŗe, berinavo “Jau kobe Naverikariano, jau kobe Atua na meul kenerinio.”

<sup>17</sup> Ana Yesu berdoŗe banio, berinavo “Saimon, Jone kenerinio, mia ilivuiano rimej vanto. Vite na jau koberialio, maka kulorinio riverial kaso, mia Teta napano joa vio mave, naio berial banso. <sup>18</sup> Mo jau na siamo dolu nene napano Pitere naio ber jibe nei ber ‘Veru,’ a be riano laka, ka kiniou nemialso jibe ka veru tai napano jo, a mia kiniou nevitirilar kanaku taara na lotuano nalo ea tabaŗilio tibe na naruei, mia moroano na mĀariano maka rijikia tovulu taara na. <sup>19</sup> Mia kiniou nodu ki nalo na vetavoiانو a na tetavokoiano na navenatuboiano na Atua kanano vanto,

ka mia verenio vite napano jau koverbure ea yetemeriba nei, mia Atua na vio mave bunu riverbure kamiu ve juo, mia verenio vite napano jau kajamo kanio ea yetemeriba nei, mia Atua na vio mave naio bunu rijamo kanio kamiu ve juo.”

<sup>20</sup> Ana na Yesu ber jikili ban kiano naiagagoano nalo, berinavo “Mia kamiu kuverial re van tomu nalo ka kiniou nebe Naverikariano.”

*Yesu berial kiano mĀariano*

*Mak 8:31-33; Luka 9:22*

<sup>21</sup> Mia jikar ea bogo na, Yesu milavon ka riverial rimeravo van kiano naiagagoano nalo, ka mia naio monoka rivavin ea vio Yerusalemo, ana ea vio na, mia tubo nalo na vio Israel, a nalo napano abe parinio kulo lu nalo, a naliko naverlogloglo na tuboiano nalo, nalo nei naruei nalo aviniu ala lelan searo ea naio. Mia Yesu berial banlo bunu ber mia nalo nei auetamĀaria naio riĀario, mia bogoti ve tolu [3] nene, ana mia Atua naio rivurular naio tumolu rimeul bereio.

<sup>22</sup> Naruei Pitere biolar Yesu denlo, ana naio jikar mil jikili banio, berbureio, berinavo “Yesu, monoka mia Atua naio riverbure tena. Vite nalo na maka rijikia rimaluvo kaso tibe na.”

<sup>23</sup> Mia Yesu barŗilig naio, ana mil jikili ban Pitere, berinavo “!Setano, kotu koalabo den kiniou! Jau kojomĀa komilavon kiniou ea kanamo jidomiano napano be toro ga kiano, mia maka ve Atua kanano jidomiano leleio.”

*Yesu kiano naiagagoano nalo monoka asidom ve iakurano ga ea kialo tiniĀitiano nalo*

*Mak 8:34-9:1; Luka 9:22-27*

<sup>24</sup> Naruei Yesu ber ka kiano naiagagoano nalo, naio berinavo “Toro napano ver jidom rimej tu iorou ka kiniou, monoka naio sidom ve iakurano ga ea kiano tinieiaiano nalo, mia monokanio naio rudu kanano maĀolkolo, ana mo naio takisur kiniou. <sup>25</sup> Toro napano jidom rilarur kiano meuliano, mia naio rilaluvuio, mia toro napano rilaluvu kiano meuliano rivior kiniou, mia naio mijikia rivokar meuliano na be riano. <sup>26</sup> Naruei verenio toro tai napano na rivokar saba nalo nonovio na vio yetemeriba nei riviniu, mia naio milaluvu mĀarabo na meuliano, naio nei maka rijikia rivokar telerinio nabo tai leleio, mia iorou kanio, mia kiano saba novo nalo nei maka rijikia rivulu meran kanano meuliano bereio. <sup>27</sup> Mia vaataro ka Kulorinio Kenerinio rimej bereio naliko

kanano nailiano nalo, mia naio rimei vija karamano kanano miamoiano, naruei mia naio rivulu tomu nalo rive verare ka kialo iniauano nalo. <sup>28</sup> Riano ga kiniou neber ka kamiu, be tomu tai nalo ajumolu ajua vio na, napano mia nalo maka ajikia anaro vo, rivano-o mia rivokar bogo napano mia aial Kulorinio Kenerinio naio rimaluvo rimei vija kiano navenatuboiano, ka mia rimei rive tubo ka tomu nonovio."

## 17

*Yesu niabene binimei be dolu*

*Mak 9:2-10; Luka 9:28-36*

<sup>1</sup> Mia iorou ka bogoti ari [6] barlaka, ana Yesu buru Pitere, a Yemesi, a kuruano Jone, ana nalo veri abavin ea burusuku tai. <sup>2</sup> Bogo napano naloaju jibe na, ana naigagoano tolu nei amial Yesu niabene binimei be dolu, a mirano binimei merera toru jibe ka mnerenio, a mano kulumarauo nalo abinimei amiuvu novo mia amiuvu nonovio garuei. <sup>3</sup> Naruei nalo tolu nei amial Mosis naio Elaija amaluvo bunu, ana naljuoaju amil naliko Yesu. <sup>4</sup> Ana Pitere ber ka Yesu, berinavo "Tubo, bo ka kito rotua ga vio nei. Mia ver kajamo kanio, ana mo noimauka tobobo ve tolu ea vio nei, tai ve kanamo, tai ve Mosis kanano, a tai ve Elaija kanano."

<sup>5</sup> Bogo napano Pitere naio jo mil kia ga vo, ana melijo tai napano merera binimei jovukolo, naruei nalo amijog iliano tai maluvo ea melijo nene, na berinavo "Nina be keneriku napano kiniou nejidom mlea na. Kiaku jidomiano joaio na, mia kiniou najaaro mlea kanio na. Mia monoka kamiu kumonmonea vatitig naio."

<sup>6</sup> Ana kiano naigagoano nalo amijog iliano nei, naruei nalo amerou mia amerou, ana nalo amijoru ea tano ana amiduvan miralo.

<sup>7</sup> Mia Yesu naio binimei ealo, ana naio mijubaluba taakalo abe tolu, ana naio ber kalo, berinavo "Kamiu kuvitumolu, kamiu kumerou re." <sup>8</sup> Naruei bogo napano nalo abar bulag pariparilo ajirarag bavin bereio, mia maka bunu aial tomu juo nei, mia Yesu ga takurano ju.

<sup>9</sup> Tilikiti napano nalo ajunan burusuku nei,aju abatove bereio, ana Yesu berii kalo berburelo, berinavo "Vite napano Atua mila kamiu kumialio, mia kamiu kuverial re ka tomu tai rivano-o rivokar bogo napano Kulorinio Kenerinio rimeul bereio ea nariano, ana ea bogo na naruei, ana mia kamiu kumijikia kuverial ka tomu nalo."

*Nalo aberii Elaija*

*Mak 9:11-13*

<sup>10</sup> Karina naigagoano tolu nei abika den Yesu, aberinavo "Jumabe ana naverloglogiano na tuboiano nalo ajumna aber jibe nei, aberinavo 'Monoka mia Elaija naio rimei bereio tukamu vo, avona bisi ana mia Naverikariano nei naio mia riyotuba?'"

<sup>11</sup> Ana Yesu berdope banlo, berinavo "Tena ajumna aberverii na jibe nei, tena be riano ga na, bior Naverialiano Malakaia naio berenio jibe na ea kanano niosi ruei. Elaija monoka mia naio rimei tukamu, ka mia naio rila batitig vite nalo nonovio atu batitig ka mia Naverikariano nene naio mijikia rimei, <sup>12</sup> mia kiniou neber ka kamiu, neberinavo Elaija nene naio binimei ruei, mia tomu nalo maka avitilubar naio, a nalo maka asidomial naio. Mia ea ga bajago nene, mia ala lelan Kulorinio Kenerinio bunu tibe na."

<sup>13</sup> Ka bogo nei, kiano naigagoano tolu nei miralo madulu ana nalo amijikia ka Elaija napano Yesu naio jomna beriio, naio be Jone Baruei ga.

*Yesu jitiglar niadu ea tete meaku tai*

*Mak 9:14-29; Luka 9:37-42*

<sup>14</sup> Mia Yesu naliko nalo tolu nei aban bereio, naruei nalo amiabure tiniobi nalo napano ajua bogo na, naruei toro tai binimei minie tano ea Yesu jaano, ana naio berinavo <sup>15</sup> "Koig, jau kobijuku bo, kiniou nejidom jau tiniem riia keneriku meaku, nejidom kajai naio, bior mieiano tai joa naio. Mieiano nene mila naio jomna miabulumararo va telabo, a mila lelan mlea naio-o mia, mila naio jomna mijorutate ban ea sebi a ban ea uei nalo bunu. <sup>16</sup> Mia kiniou noburu naio binimei ban kanamo naigagoano nalo ruei, aminaukanio bano-o, mia maka ajikia ainauka naio rivu."

<sup>17</sup> Ana Yesu naio mil ban kiano naigagoano nalo, berinavo "Jumabe jibe na? Kamiu maka kuvitu sikili ea Atua leleio, bogo nonovio ga ma kumiovovu. Mia kiniou monoka noto vija kamiu rivano-o mia rivokar nagi? Mia kiniou tinieku maro ruei ka kamiu. Mo, bo ga, kamiu kuvuru meaku nene rimei van kiniou." <sup>18</sup> Ana nalo aburu meaku nene binimei, ana Yesu janka niadu napano joa naio, berinavo "Komoluo den naio vongane ga!", ana vaarakurano ga meaku nei naio binimei bo bereio.

<sup>19</sup> Ana iorou ka bogo nene, bogo napano Yesu jo naio takurano, ana kiano naigagoano nalo abinimei kean naio, abika

denio aberinavo “?Jum̃abe ana kumemi maka nuvijikia nuvititiglar niadu napano joa m̃eaku na?”

<sup>20</sup> Ana Yesu ber kalo, berinavo “Nina bior kamiu maka kuviekouo ea kiniou sikili rivare vo. Riano, kiniou neber ka kamiu, verenio kamiu kuviekouo ea kiniou ve kiritavaso leleio ga tavukia kurukuti burubako, mia verenio kenemiu viekouoiano na rive riano rivu, ana mia kamiu kumijikia kuver ka burum̃ara burusuku na, kuver ‘Kataluvo den vio na,’ mia naio taluvo. Mia maka titai ka mio kamiu kuvijikia re ka kamiu kuvilaio. <sup>21</sup> Mia ka natitiglariano na niadu nalo tibe nei, m̃arabo nene jibe nei: toro naio monoka rivolkouo, a naio rimodulu ka sano sinaniano. Ea bajago na ga, mia naio mijikia titiglar niadu ninio nalo na.”

*Yesu berial bereio kiano m̃ariano*

*Mak 9:30-32; Luka 9:43-45*

<sup>22</sup> Bogo tai ana Yesu naliko kiano na-iagagoano nalo abinimei vio takurano ea vio Kalele, ana naio ber kalo, berinavo “Vaataro ka mia adu Kulorinio Kenerinio toa tomu nalo jum̃alo, <sup>23</sup> ka mia aue-tam̃aria naio riñaro, ana mia iorou kanio, bogoti ve tolu nene, ana mia Atua rila naio rimeul bereio.” Ana kiano naiagagoano nalo amijog iliano nei, nalo amijog bova toru laka.

*Puruveru na takis na Atua kunuano lu na vio Yerusalemo*

<sup>24</sup> Tilikiti napano Yesu naliko kanano na-iagagoano nalo abinimei aboru Kapeneam, tomu nalo nam̃a abarbiji takis na Atua Kunuano Lu, nalo abinimei kean Pitere, abika denio, aberinavo “?Jum̃abe, kanamo naverloglogiano na naio jom̃a bulu takis na bunu, p̃elina makanio?”

<sup>25</sup> Naruei Pitere berdope, berinavo “Nao, naio buluio.”

Naruei Pitere ban bereio ea yimo napano Yesu joaio, mia Pitere maka river iliano tai vo, ana Yesu naio mil jukamu banio, bika berinavo “Saimon, jau kosidomii von parinio tubo na yetemeriba nalo. ?Kulo be nalo napano m̃a ajum̃a abulu takis banlo? ?Nalo napano abe m̃aratavo, p̃elina kulo dolu nalo?”

<sup>26</sup> Naruei Pitere berinavo “Tomu dolu nalo ga monoka avuluio.”

Ana Yesu berenio “Nao, jibe na naruei, a nina berenio m̃aratavo nalo na parinio tubo nalo, maka ajikia avuluio. A kiniou naruei, nebe m̃aratavo na Parinio Tubo na Yimo Lu napano memedu, mia kiniou maka nejikia novulu takis na ajum̃a abika denso na. <sup>27</sup> Mia bo ka kito juo rala bulag

re tomu nalo na ajum̃a abarbiji takis, mia kito juo bunu rovuluio bo ka ga. Mo, jau kavatove ea ueiyabo, ana kosuvan tapig, mia niado nana mia kovuruio tukamu, mia keial puruveru tai ea niono, na bare ka kiado takis kito juo, mia kodu kava kovulu kanio.”

## 18

*“?Toro kei napano naio jo mave loa tomu dolu nalo?”*

*Mak 9:33-37; Luka 9:46-48*

<sup>1</sup> Ana memedu ka bogo nene, naiagagoano dolu nalo abinimei memedu ka Yesu, abika denio, aberinavo “Kumemi numisidom nuvijikia: ?Toro kei na mia naio jo mave loa tomu dolu nalo jouro ea Atua kiano navenatuboiano?”

<sup>2</sup> Ana na Yesu bio kiritete tai ka rimei kean naio, naruei naio mila naio jumolu ju iviso kalo, ana naio ber <sup>3</sup> “Riano, kiniou neber ka kamiu memedu, verenio kamiu kuvilig re kamiu, ka kenemiu bajago nalo amei atavukia bajago na kiritete nei kiano, mia kamiu maka lele kuvijikia kumei jouro ea navenatuboiano na Atua kanano bogo tai. <sup>4</sup> Mia verenio toro na rila kanano jidomiano totano tavukia kiritete na telisu nei, mia naio mijikia rimei to mave loa, tovulu tomu dolu nalo nam̃aaju jouro ea Atua kiano navenatuboiano. <sup>5</sup> Toro na kiano jidomiano rivatove ka kiniou, mia naio saaro ka rive merevu van kiritete nalo na tertelisu na tai jibe na, nina jibe ka ga napano naio jom̃a jaaro ka kiniou.”

*Tiboliboiano nalo*

*Mak 9:42-48; Luka 17:1-2*

<sup>6</sup> Mia Yesu berii bunu, berinavo “Mia verenio toro tai rila kiritete nei tai ka mia naio tuvan kiniou, riviekouo ea re bunu kiniou, mia toro nene naio rivokar vironiano na jikili laka tai. Verenio aiorikar puruveru na toru tai ea burujono, ana avukuio rivatove rimadudu ea bulu nio-govu, nina naio be vironiano tai na monmaio ga, mia toro na naio rivokar rivan lie vo tovulu ninei. <sup>7</sup> !Banal! Yetemeriba nei naio bova novonio ruei, naio bujo ka saba nalo na ajum̃a amila lili tomu nalo ka mia m̃a nalo alaluvu kialo viekouoiano ea kiniou. Mia tiboliboiano nalo na mia atu iviso ka kamiu bogo novonio, mia rivova laka van tomu nalo na abar tibol boiano va nalo na jibe na amei van kulo dolu nalo.

<sup>8-9</sup> “A verenio jum̃amo, p̃elina jaamo, p̃elina miramo, p̃elina vite dolu venia bunu ea kiamo meuliano, verenio vite nalo nene tai rilaso koviekouo ea re bunu kiniou, bo ka jau ketelar vite nene denso,

ana kovukuio rivano. A verenio jau ketelar bajago na kariano den kiamo meuliano tibe na, mia jau komijikia kava jouro ea meuliano, a verenio jau kava jouro ea meuliano napano jumamo, pelina jaamo, pelina miramo, pelina vite dolu venia bunu ea kiamo meuliano, verenio vite nalo nene tai rivakovio denso ruei, nina bo ga na. Mia bova laka ka verenio taniabemo momou vija kiamo bajago va momou atu rivu ga easo, mia karina avukuso kavan ea sebi na maka rijikia rivatove bogo tai ea vio na jogvaiano.”

*Jamerijiano na nunu napano milaluvu m̄arabo*

*Luka 15:3-7*

<sup>10</sup> Ana Yesu berii bunu, berinavo “Kamii monokanio kuvitikar batitig kamii rivu ka mia kamii kuviakurano re ea kanaku kiritete nalo nei tai bogo tai. A ver makanio, ana mia kamii kuvitikar kamii, bior tete nalo nei abe kanaku, ana nalo abe kanalo nailiano nalo napano ajua vio mave, napano ajunia abitikar batitiglo, a nailiano nalo nene, naloaju bogo nonovio ea Teta na joa vio mave mirano. <sup>11</sup> Naruei Kulorinio Kenerinio, kiano im̄auano jibe na ga: naio binime i ka rilarur nalo na amilaluvu m̄arabo.

<sup>12</sup> “Kamii kuviagago batitig ka tukunuano nei: Be toro tai napano be kiano nunu toromomou [100], mia nalo tai mila pariparinio ba koalabo, ana naio milaluvu m̄arabo. ?Mia toro nei naio rila tumabe naruei? Monokanio naio tuvan kiano nunu duelimo va koveri ba koveri [99] nalo nei, atu asinan ea vio na soro bo eaio, ana mia naio monokanio riva rila von ka sirag napano milaluvu m̄arabo a ba kovio tai. <sup>13</sup> Riano ga kiniou neber ka kamii, bogo napano naio mileal bereio nunu nene, mia naio mijikia saaro m̄ele kanio, tovalu napano naio jaaro ka kanano nunu dolu nalo napano telaboaju bo ga, maka avarlaka m̄ele ka mia ava kovio tai.

<sup>14</sup> “Mia karamemiu na vio mave, naio bunu jibe na, naio maka sidom ka kiritete nalo nei tai rilaluvu m̄arabo riva kovio.”

*Ver kuruamo tai rila leleanso*

*Luka 17:3*

<sup>15</sup> Ana Yesu berii bunu, berinavo “Avena kuruamo rila vite rimemedu re vanso, monoka jau kava keial naio, kam ve juo ga kuvitu, ana jau koverial kiano vijuku vovaiano nene ka naio. Avena naio saaro ka rijog kanamo iliano nalo, nina jibe ka kanamo iliano nalo amila merevuiano ban kamjuo bereio ruei. <sup>16</sup> Mia ver naio maka sidom ka riagago ka kanamo iliano

nalo, monokanio jau kava kovuru bereio tomu dolu tai amei vijaso, ka aijaso ka kanamo iliano, tavukia napano Niosi Lu berenio, berinavo ‘Iliano nonovio monoka ve ilitusoliano na tomu ve juo pelina ve tolu, ka mia iliano nei tu sikili tu.’ <sup>17</sup> Mia ver kuruamo neibano naio to riilkue ka riagago vatitig rivu kaso, mia monokanio jau koverial kanano siniabu van taara na namoneano nalo, ka nalo tealo amijikia amei aial naio. Mia ver naio jikili kia ga vo, ka naio riagago vatitig re ka nalo bunu, mia kamii kuvial naio tibe ka valaou ga tai, pelina naio tibe ka tomu nalo napano ajunia abarbijii takis, maka tomu nalo ala bilbilu nalikolo leleio.”

*Volkouano napano tomu m̄arati juolar ga abirakarlu eaio*

<sup>18</sup> Ana Yesu berii bunu, berinavo “Riano, kiniou neberii ka kamii, mia verenio vite napano kamii kuverbure ea yetemeriba nei, mia Atua na mave naio riverbureio bunu vija kamii, mia verenio vite na kamii kuvijamo ka ea yetemeriba nei, mia Atua na mave naio rijamo kanio bunu kamliko. <sup>19</sup> A bereio, kiniou neber bunu ka kamii, neber verenio tomu ve juo ea kamii, naljuo ala ilivirakariano tai ea yetemeriba nei ka titai, ana verenio nalo abolkouo riviorio, mia Karamaku na mave mia naio rila tenene vanlo. <sup>20</sup> Bior ver tomu ve juo pelina ve tolu avior vio takurano ea siaku, mia kiniou bunu noto iviso kalo.”

*Jamerijiano na bajago na viekokoano*

*Luka 17:3-4*

<sup>21</sup> Naruei Pitere binime i mial Yesu, ana bika denio, berinavo “?Tubo, verenio kuruaku rila rivova van kiniou bogo nonovio, mia kiniou neviekokoa naio ve va vio? ? Monokanio riva rivokar ve va aluo, pelina jumabe?”

<sup>22</sup> Mia Yesu berdope banio, berinavo “Makanio, mia jau koviekokoa re naio rivokar ve va aluo ga, mia monokanio jau koviekokoa naio rivokar duelimo va aluo va aluo bereio [70 va 7]. <sup>23</sup> Bajago na viekokoano jouro ea Atua kiano nave-natuboiano, naio monokanio tibe ga na. Kamii kuviagago ka tukunuano tai napano berii bajago na viekokoano napano berenio, berinavo: Parinio tubo tai, na naio jidom rivitii veve jabue nalo napano kiano tomu na im̄auano nalo amila jua naio. <sup>24</sup> Mia naio mila jibe na bano-o, na aburu kiano toro na im̄auano tai binime i ea naio, napano toro nei mila jabue na veru taamaka [1,000,000] vio ea kiano toro na toru nei. <sup>25</sup> Bogo napano abika veru

den toro nei, ana naio berenio maka rijikia rivulu meran bereio jabue nene. Ana na toro na toru nei, naio ber ka kiano tomu nalo, berinavo 'Mo, bo kanio kamiu kuvilalar naio, a kuṽilivili lario, ka naio ve toro na toru dolu kanano, naio riva riñau kurano ga ea naio. A aṽilivililar ka koano bunu, naliko kenerinio nalo, vija kialo saba nonovio, mo kuvar puruveru nene rimei ka avulu bulag ka kiano jabue nene togio.'

<sup>26</sup> "Naruei na toro nei naio mijoru kamu ea kiano parinio tubo nei jaano, ana naio jegi jouo banio, berinavo 'Jau kobe parinio tubo, koig, mia kiniou nabaleaso ka nejidom kodu bogo ve telisu bereio van kiniou beamu vo, ka mia nala von ka navulu nonovio jabue nei denso.'<sup>27</sup> Naruei parinio tubo nei tiniennia toro nei, ana naio biekokoa nonovio kanano jabue nei, ka mia naio rivulu kean re bunu, ana naio juvan toro nene bano.

<sup>28</sup> "Mia bogo napano toro nene naio bano, ana naio mial kiano bilbilu tai, napano bilbilu nene naio kiano jabue tai telisu ga jua naio. Mia naio ba bokar toro dolu nei, ana naio mikiti burujono, naio berkanio, berinavo 'Monokanio jau kovulu bulag kanamo jabue na jua kiniou vonganei.'<sup>29</sup> Naruei kiano bilbilu nei naio mijoru ea jaano, naio mila mirano melumu kanio, jegi banio, berinavo 'Koig, mia kiniou nabaleaso ka nejidom kodu bogo ve telisu bereio van kiniou beamu vo, ka mia nemijikia ka novulu nonovio jabue nei denso.'<sup>30</sup> Mia toro nei naio maka sidom riviekokoa kiano bilbilu neibano, naruei naio ba mila aburu naio ban ea nalakoiano, ka naio to rivano-o mia naio rivulu bulag nonovio jabue nei, karina naio mijikia taluvo bereio.

<sup>31</sup> "Mia bogo na parinio tubo nei kiano tomu teal amial bajago nei, nalo amijog bova toru kanio, ana na nalo aban ea kialo parinio tubo nei, aberial saba nalo nonovio ban naio. <sup>32</sup> Ana parinio tubo nene, naio bio kiano toro neibano ka naio rimei bereio ea naio, ana naio mil jikili banio, berkanio, berinavo '!Aa, jau kobe toro va kitkiti tai! Kiniou nebiekokoa nonovio kanamo buruñara jabue nanua ruei, bior kejegī toru ban kiniou kanio, ana mila kiniou tiniēku miiaso kanio. <sup>33</sup> ? Mia juñabe ana maka kejikia tiniem riia bunu kiamo bilbilu dolu, tibe ka napano kiniou tiniēku miiaso jukamu ruei?' <sup>34</sup> Ana parinio tubo nene naio tinien mimi lie vo, ana naio berinavo monokanio avuku naio riva toa nalakoiano, a monokanio nalo atu avar vironiano vanio-o, rivokar bogo na

naio rivulu bulag nonovio kanano jabue nene."

<sup>35</sup> Ana Yesu naio berinavo "A verenio kamiu kuviekokoa re kuruemiu nalo tulaka ve riano, ea iviso na tiniemiu momou nalo, mia karamñaku na mave naio tinien ser kamiu tibe na, mia naio sian vironiano tibe ga na van kamiu."

## 19

*Yesu berii juñabe ana toro mila titig koano*

*Mak 10:1-12*

<sup>1</sup> Bogo na Yesu berenio iliano nalo nei bisi, ana naio juvan vio Kalele naio bavin tivelinio ea tanobuku na vio Yutea, ea ñarauei na Yortano tivelinio bano. <sup>2</sup> Ana tiniobi toru ajakisorio ka bogo na, mia ea vio na naio mila batitig tomu na mieiano nalo telabo abo bereio.

<sup>3</sup> Mia Varisis nalo tai bunu ajua vio na, nalo abinimei amial Yesu ka ajidom ala von naio bereio, ana abika vikadeniano tai denio, aberinavo "?Kiado tuboiano berii vaio tivelinio ka bajago na toro mijikia titiglar koano? ? Memedu ga ka toro mijikia rila tibe na kar vite ninio ga, pēlina mijikia rila kar ga ka vite na tortoru ga tai?"

<sup>4</sup> Ana Yesu berdoṽelo, berinavo "Peli kamiu maka kuvijikia Atua kiano Iliano Lu na naio berenio, berinavo

"Tikariano, Atua naio jii vite nonovio, a naio jii bunu kulorinio juo, napano tinene be suñano a tinene be tira.'

<sup>5</sup> Tena kamiu kumijikia ruei, bija bunu iliano dolu na napano berinavo

'Tibe na, toro tai rivuro den karamñano naio kenieno, riva rivijurkar koano, mia naljuo ave takurano.' *Jen 2:24*

<sup>6</sup> Nina mila ana maka bunu ave juo, mia nalo abinimei abe takurano ga. Naruei vite napano Atua naio birokario, maka rivu ka kulorinio rilakorovio bereio."

<sup>7</sup> Ana Varisis nalo nei amijog iliano nei, ana nalo abika den Yesu bereio, aberinavo "?Bo ga, ana juñabe na Mosis naio berial tuboiano na jamoiano ka mia toro mijikia rudu mēsi na silubariano tai rije van koano, ka mia naio mijikia titiglar naio rivano?"

<sup>8</sup> Ana Yesu berdoṽelo, berinavo "Ee, ana mia beamu ka bogo na tiiano na yetemeriba naio maka tibe na, mia bior kamiu pariparimiu nalo binimei kirisikili laka, tenene na mila ana Mosis mijamo kanio jikar ea korobimiu nalo binimei, ka kamiu kumijikia kuvila titiglar kouemiu nalo tibe na. <sup>9</sup> Mia vonganei, kiniou neberii ka kamiu, ka verenio toro tai, koano naio rila siakaiano, mia toro nene mijikia rila titig

koano nene. Mia verenio tira nene naio maka rila siakaiano, mia kiano suñano nene naio titigliario, ana naio riva rivuru tira dolu, ver tibe na, Atua naio mial jibe ka toro nene naio mila siakaiano bija tira dolu nene ruei, naio milakiki tira nei napano be koano jukamu."

<sup>10</sup> Ana Yesu kiano naiagagoano nalo aber ka naio, aberinavo "Ver bajago na soriano jikili laka jibe na, bo laka ka kito rala re bunu soriano ka kito."

<sup>11-12</sup> Mia Yesu ber kalo, naio berinavo "Nao, be riano ka napano be tomu tealo napano mia asoro re bogo tai, jibe ka napano tealo amiyotuba mia niabele nalo abova, ðelina tealo napano amila bulag niabele nalo, jibe ka napano ajivivi nalo, naruei nalo maka ajikia asoro. Mia tomu tealo maka asoro bior ka napano nalo ajuvan soriano ga ka aminiau jikili ka Atua kiano navenatuboiano. Mia Iliano Lu naio berinavo bo kano suñano a tira, ave juo asoro, a bo ka nalo ve juo atu rivu vija naljuo rivokar jukuti na kialo meuliano nalo ve juo. Mia jau napano jau kajaaro ka iliano nei, a napano jau komial ka napano Atua naio mila jibe na banso ruei, mia bo ka kovokar sikili iliano na ea kiamo meuliano."

*Yesu milivu ka kiritete nalo*

*Mak 10:13-16; Luka 18:15-17*

<sup>13</sup> Naruei nalo tai aburu kenerilo nalo abinimei ea Yesu, ka naio rudu juñano toalo, a ka rivolkouo kalo. Mia kiano naiagagoano nalo amialio, ana nalo amil jikili ban tomu nalo nei, aberburelo, <sup>14</sup> ana Yesu berii kalo, berinavo "Kamiu kuverbure re kiritete nalo nei, kamiu kuvituvanlo amei ea kiniou, bior kiritete nalo na nalo ajavukia nalo napano aju jouro ea navenatuboiano na Atua kiano."

<sup>15</sup> Ana naio midu juñano joa kiritete nalo nei, iorou kanio, ana naio miel bano.

*Toro ñeaku tai napano naio be sanibaiano*

*Mak 10:17-22; Luka 18:18-23*

<sup>16</sup> Ka bogoti dolu tai, ñeaku tai binimei mial Yesu, ana naio bika denio, berinavo "Naverloglogiano, mia monokanio kiniou nala inauano novo na vabe, ka napano mia rila kiniou nemijikia nejev meuliano na jo jobo jo?"

<sup>17</sup> Ana Yesu berkanio, berinavo "? Juñabe ana kobika den kiniou jibe na, ka never inauano na bo tai vanso? Atua ga takurano naio bo, a verenio jau komononea kiano tuboiano nalo, ana mia jau komijikia kejev meuliano na bo nene."

<sup>18</sup> Ana na ñeaku nei naio bika denio bereio, berinavo "?Ana jau kojomña koberii tuboiano nalo na vabe na?"

Naruei Yesu berii kanio, berinavo "Tuboiano nalo nene nei naruei, napano aberinavo: jau kouebin re toro, jau kesiaka re siakaiano, jau kovina re, <sup>19</sup> jau kala sibi re, jau kotovon karañamo naio koniomo, mia kosidom tomu nalo napano aju vaataro kaso, jau kovitkar vatitiglo, tibe kanio napano jau kobitkarso."

<sup>20</sup> Ana ñeaku nei naio ber ka Yesu, berinavo "Tuboiano nalo napano jau kojomña koberenio na, kiniou nojomña nobokario nonovio ruei. ?Mia vite venia bereio napano naio jo kiano vo, napano kiniou maka nalaio vo?"

<sup>21</sup> Ana na Yesu berdoþe banio, berinavo "Verenio jau kosidom ka komei komemedu rivu batitigio, rivare ka meuliano na jo jobo jo, mia jau kala tibe nei: jau kavano, kovilivili bulagio ka kanamo saba nalo nonovio riviniu, ana mo jau kavaru puruveru nene, kava kovioa ka talimñasa nalo. Verenio jau kala tibe na, mia ve kanamo togogo novo ve toru ea vio mave. Mo, jau, kava kalaiio, karina jau komei katakisor kiniou."

<sup>22</sup> Mia bogo napano ñeaku nei naio mijog iliano nei, mia kiano iviso mijog bova toru, kiano jidomiano temi, bior naio kiano saba toru laka. Ana naio jaluvo den Yesu.

*Toro na be sanibaiano, kirisikili kija ka naio riva jouro ea navenatuboiano na Atua kanano*

*Mak 10:23-31; Luka 18:24-30*

<sup>23</sup> Naruei Yesu ber ka kiano naiagagoano nalo, berinavo "Riano, kiniou neber ka kamiu, verenio toro tai na kiano saba toru, mia naio sidom riva jouro ea navenatuboiano na Atua kiano, mia vite nene naio kirisikili kija na. <sup>24</sup> Nao, kiniou neber ka kamiu, verenio kamele tai naio riovo dulu ea bulu mirano nitil, nina kirisikili kija, mia verenio toro tai napano kiano saba toru, naio jidom ka riva jouro ea navenatuboiano na Atua kiano, nina kirisikili laka lie vo."

<sup>25</sup> Mo bogo napano naiagagoano nalo amijog iliano nei, nalo amiilo toru kanio, ana nalo aberinavo "?Tomnei, verenio tibe na, ana mia kei naio mijikia rijev meuliano nei?"

<sup>26</sup> Mia Yesu jirarag bitikarlo, ana naio berinavo "Nao, riano ka kulorinio maka rijikia rila kulorinio rijev meuliano nei, mia Atua ga naio mijikia rila vite nalo nonovio."

<sup>27</sup> Naruei Pitere berdoþe, berinavo "?Mia juñabe ka kumemi? Kumemi numituvan kenememi saba nalo nonovio ruei, ana kumemi nubinimei ka nuvitakisorso. ?Mia

kumemi nuvijev kija vite nalo na abo tai, p̄elina makanio?"

<sup>28</sup> Ana Yesu ber kalo, berinavo "Riano ga kiniou neber ka kamiu, bogo napano verenio Kulorinio Kenerinio totano ea kiano burum̄ara jobaro lu ea yetemeriba vou nene napano mia rimeī, kamiu napano kamiu kumitum̄a kumitakisor kin-iou vonganei, mia kamiu kuvitutano ea burum̄ara jobaro duelimo vaarakurano ba juo [12] ka kuve boru ka bajulukuti duelimo vaarakurano ba juo [12] na Israel, tibe ka kialo parinio tubo nalo. <sup>29</sup> Mia toro na verenio tuvan kunuano, p̄eli kuruano p̄elina kuvivinieno, p̄elina karam̄ano p̄elina kenieno, p̄elina kenerinio, p̄elina kiano borotano, mia verenio naio tuvan vite nalo nei rivior kiniou ga, mia naio mijikia rivar meran bereio ea yetemeriba nei, vite nalo napano juvanlo ruei, riva rivokar ve va duelimo toromomou, mia mave ka mia naio rijev meuliano na jo jobo juo.

<sup>30</sup> "Mia tomu nalo telabo na aju mave, mia nalo atu tano, a tomu nalo na ajutano, mia nalo atu mave."

## 20

### *Jamerijiano na tomu na iñauano nalo*

<sup>1</sup> Ana Yesu naio jo mil dolu ka ga bano, ana naio berinavo "Vite na kiniou neber vonganei, naio jibe ka bajago na Atua jom̄a mila ban tomu nalo na aju jouro ea kiano navenatuboiano. Mia kiniou never vite nei van kamiu ea jamerijiano tai, napano jibe ka: Toro na toru tai, napano naio be boru ka jiotilikrevi na toru tai. Mia kavijo tai, viomijeni mermeravo vonga, ana naio ban ea m̄arkomeli tai ka naio rivuru tomu tai ka ava aim̄au ea kanano jiotilikrevi ka legiano nei. <sup>2</sup> Naio mial tai, ana naio berkar banlo ka puruveru tai na naio bare ka iñauano na legiano vodolu tai, ana naio miila bulaglo ka ava aim̄au ea kiano jiotilikrevi nei. <sup>3</sup> Mia ka m̄erenio kover, ana naio ban bereio ea m̄arkomeli nei, ana naio mial tomu nalo dolu bereio, aju kurano ga, maka ve kialo iñauano, <sup>4</sup> naruei naio ber kalo, berinavo 'Bo ka kamiu bunu kumei kuvim̄au kija ea kanaku jiotilikrevi, mia kiniou novulu kamiu rimemedu ga.'

<sup>5</sup> "Naruei nalo nei aba amin̄au, ana iorou ka bereio, napano leri, a ea m̄erenio tolu kijev bunu, toro na toru nei naio ba buru tom tai ka aim̄au kanano tibe na. <sup>6</sup> Mia bogo tai bereio, ka m̄erenio jumo kijev ruei, ana naio ban bereio ea m̄arkomeli nei, ana naio mial tomu tai aju

kurano ga ea vio nei kia ga vo, naruei naio ber kalo, berinavo "Ka venia ana kamiu kumitu kumilakule legiano momou nei ea vio na, maka kuvim̄au tai?"

<sup>7</sup> "Naruei nalo nei aberdoṗe, aberinavo 'Ana maka toro tai rimeī rivio kumemi ka nuva nuvim̄au kanano tai.'

"Naruei toro na toru nei naio ber kalo, berinavo 'Mo bo ga, ver tibe na kiniou novuru kamiu bunu. Kamiu, kumei kuvim̄au kanaku.'

<sup>8</sup> "Mia kijev laka, ana toro na toru nei naio ber ka kiano boru na iñauano, berinavo 'Mo bo ga, jau kovio tomu na iñauano nalo na amei, ana mo jau kovululo. Mia jau kala tibe nei: ketikar ea nalo na ajikar amin̄au iorou, rivano-o rivokar nalo na abinimeī ajikar amin̄au jukamu kavijo.' <sup>9</sup> Mia bogo na nalo na ajikar amin̄auka m̄erenio jumo abinimeī, ana toro na naio bululo bare ka legiano takurano momou na iñauano. <sup>10</sup> Mia bogo na nalo napano amin̄au jukamu abinimeī ka avar kialo puruveru, aberiam̄a mia nalo avar rivavin tovulu nalo napano amin̄au ka bogo bulati ga, mia boru nei bar kialo vuluano banlo beverage ga.

<sup>11</sup> "Mia bogo na nalo amial kialo puruveru jibe ga na, mia nalo aju abar lele kuluniolo, aju amil muf̄i die toro na toru nei. <sup>12</sup> Ana nalo amiila nalo tai ba bika denio, berinavo 'Nalo napano abinimeī vonganei, amin̄au ka aura takurano ga, mia kumemi numim̄auka legiano momou ea burutiniano nei. Mia kumemi numialio kobululo be verare ga ka kobulu kumemi. ?Vite na jum̄abe na?'

<sup>13</sup> "Mia toro na toru nei naio berdoṗe banio, naio ber 'Koig, kiniou maka nala lelanso. Kito juo robirokar jukamu ruei, roberenio mia jau koiñau legiano momou ve takurano nei, mia kiniou novuluso rimemedu kanio. <sup>14</sup> Mo verenio tibe na, ana bo ka kodu puruveru na be kanamo ana kava vonuo ga. Nina be kiaku jidomiano tai jibe na naruei, ka puruveru na nemijev banso, kiniou nejidom nejev van nalo na abinimeī maaro bunu tibe na. <sup>15</sup> ?Jau koberiam̄a mia kiniou maka nejikia nala tibe ka napano kiniou nejidom ka kanaku puruveru? ?Jum̄abe ana jau komijoku ka tomu nalo na kiniou tinieku miialo?' Ana jamerijiano nene maaro ea vio na."

<sup>16</sup> Ka Yesu rila nonovio kiano iliano nalo nei, naio berinavo "Ana tomu nalo napano nalo iorou, mia nalo atu kamu, a nalo napano aju kamu, mia nalo iorou."

*Yesu berial kiano m̃ariano varolu naruei*

*Mak 10:32-34; Luka 18:31-34*

<sup>17</sup> Ana Yesu naio jo bavin ea vio Yerusalemo naruei, ana bogo napano nalo aju amiel ea m̃arabo ka abano, ana naio bio kiano naiagagoano duelimo ba juo [12] nalo abinimei ea naio, naruei naio mil banlo, berinavo <sup>18</sup> "Kamiu kuviagago vatitigio. Vonganei, kito roju rabavin ea vio Yerusalemo, ka mia vesiou re ga, ana adu Kulorinio Kenerinio toa parinio kulo lu nalo juṃfalo, a tomu na verloglogiano na tuboiano, ka mia atibure naio ka mia aver naio monoka riṃaro. <sup>19</sup> Karina mia adu naio toa kulo Romo nalo juṃfalo, ka mia ayotel va ea naio, avitiv naio, mia atukukakar naio ea m̃akolkolo ka mia naio riṃaro. Mia bogo napano naio riṃaro ribisi, bogoti ve tolu nene, ana mia Atua rila naio rimeul bereio."

*Yemesi naio Jone keniele bika titai den Yesu*

*Mak 10:35-40*

<sup>20</sup> Naruei Sepeti koano, naio buru kenerilo abe juo Yemesi naio Jone, abinimei ea Yesu. Naio minie yetano kamu ka Yesu jaano, naio bika denio, berinavo "Kiniou nejidom kajamo ka titai van kiniou."

<sup>21</sup> Mia Yesu berdoṃe ban naio, bika denio "?Jau kojidom kovika vaio?"

Mia tira nei naio berinavo "Kiniou nejidom verenio bogo na mia jau kovitirilar kanamo navenatuboiano, mia kenerimemi juo nei amijikia atutano vijaso ea kanamo vio lu na jo mave laka, ka mia tinene totano tivelinio vameruo, a tinene totano tivelinio mal."

<sup>22</sup> Mia Yesu berdoṃe banlo, berinavo "Kamiu maka kuvijikia tena mia kuvitum̃a kuvikanio na. ?Jur̃abe, kamjuo kuber kubare ga ka romunu bitiran ea baja na jaleleano na mia kiniou monokanio nomunu eaio?"

Ana naljuo nei aberinavo "Ee, kumemi juo nubare."

<sup>23</sup> Mia Yesu naio berii ka tomu juo nei, berinavo "Mm, be riano ka kamjuo bunu kumunu ea kanaku baja na jaleleiano nene, mia tena kamjuo kubikanio na, ka mia kamiu kuvitutano rivija kiniou ea juṃṃaku ve juo, nina maka ve kanaku ka mia nesian van kamjuo. Vio nalo na jibe na, abe nalo na ga karaṃaku mila batitig ruii ajurorealo, kanio napano naio berkar ruii banlo berii mia nalo atutano eaio."

*Kulorinio Kenerinio binimei ka riṃau tomu nalo kanal*

*Mak 10:41-45*

<sup>24</sup> Bogo napano naiagagoano duelimo [10] dolu nene amijog vite na, mia nalo tiniel jer kurualo juo [2] nei. <sup>25</sup> Naruei Yesu biolo ka amei ea naio ka naio ril vanlo, naruei naio berinavo "Kito romijikia ruii bajago na tomu nalo napano maka amonea Atua. Kito romial tubo nalo bija tomu na tortoru na yetemeriba nei, nalo ajidom avututua kulo dolu nalo ka atutano kalo tulaka ga. <sup>26-27</sup> Mia kamiu kiaku naiagagoano nalo, kenemiu bajago tibe na re. Verenio kamiu tai sidom ka naio rimei ve toro na toru ṃelina naio rive kenemiu navuriṃaraboiano, mia m̃arabo nene jibe nei: monokanio toro nene naio rimei tibe ka toro na riṃau kenemiu tai. <sup>28</sup> Kulorinio Kenerinio naio mila jibe naruei, ka naio maka rimei ka mia tomu nalo ala iṃauano na ka mia aija naio, mia naio binimei ka rila iṃauano na ka mia naio rijailo, a kanio rijamo ka kiano meuliano ka rivulu bulag tomu nalo ve telabo."

*Yesu milarur merebono juo*

*Mak 10:46-52; Luka 18:35-43*

<sup>29</sup> Ka bogo nene Yesu naliko kiano naiagagoano nalo aju Jeriko, mia bogo napano nalo ajaluvo den komeli na, mia tomu nalo telabo laka ajakigsorlo. <sup>30</sup> Naruei merebono juo, napano nalo ajutano ea ikiṃarabo. Mia bogo napano naljuo amijog ka tomu nalo aju amiolu juva aberinavo Yesu jo miel ea m̃arabo binimei, ana na naljuo abio jouo, aberinavo "!Tubo o, jau Teviti kiano bajulukuti, kumemi juo numisidomso tiniem rii kumemi!"

<sup>31</sup> Naruei tomu nalo amil jikili banlo, aberinavo "Kuvuetuba re, tomjuo."

Mia tomjuo nei abio dolu ka ga, nalo abio jouo mave aberinavo "!Tubo, jau Teviti kiano bajulukuti, tiniemriia kumemi juo!"

<sup>32</sup> Ana na Yesu naio jikil ju m̃arabo, ana naio bio tomjuo nei, naio ber kalo, berinavo "?Tomjuo, kamiu kumisidom ka kiniou nala tuṃabe ka kamjuo?"

<sup>33</sup> Ana naljuo nei aber kanio, aberinavo "Tubo, jau kobijuku bo, kumemi juo numisidom ka mirememi rivu, ka mia nuvijikia ka nuvisirarago."

<sup>34</sup> Ana na Yesu tinien miialo, ana naio jokol tomu juo nei miralo, vaarakurano nalo amial vite nalo ea bogo nei, ana nalo ajumolu ajakisor Yesu abano.

## 21

*Yesu binimei boru Yerusalemo*

*Mak 11:1-11; Luka 19:28-40; Jone 12:12-*

19



<sup>1</sup> Vonganei, Yesu nalo aju abinimei vaatara ka Yerusalemo naruei, mia beamu kanio nalo amaluvo ea m̄arkomeli tai, siano Petevas, napano naio joa suku na aberii Suku Na Buruolivi. Naruei Yesu mila kiano naiagagoano naljuo nei, berinavo <sup>2</sup> “Kamii kuvan ea m̄arkomeli yako, mia verenio bogo na kamii kuva jouro eaio, mia kamii kuvial togki tai amiadikario ju, naio ju bija kirikiti. Ana kamii kuvijubar lario, ana kuvurulo amei van kiniou ea vio nei. <sup>3</sup> Avena verenio toro tai ril van kamii kanio, mia kamii kumijikia kuverii kanio, kuverenio ‘Kiado tubo naio jidom temeul juo nei ka ala kiano in̄auano tai’ ana bogo napano kamii kuver iliano nei, mia ve vaarakurano ga naio mijikia tuvan temeul juo nene van kamii.”

<sup>4</sup> Tena miyotuba jibe na ka rila iliano na naverialiano naio beriio nua ruei rime rive riano, napano naio berenio, berinavo <sup>5</sup> “Kamii kuvio ka kulo Saion nalo, kuverinavo ‘Kuvialio, vonganei kene-miu parinio tubo naio jo binimei ea kamii.

*Naio be toro tai napano kiano jidomiano melumu batove ga, mila naio midu togki ga, togki tai napano telisu ga, napano naio be tete kia ga vo.’ ” Sek 9:9*

<sup>6</sup> Naruei kiano naiagagoano juo nei abano, amila jibe ka napano Yesu berenio.

<sup>7</sup> Ana bogo napano naljuo aburu togki nei bija kirikiti abinimei, naruei nalo abisi kanalo kulukoti ea togki juo nei taakalo, mia Yesu naio ba jotano mave ea na telisu nene. <sup>8</sup> Mia tomu nalo telabo abisi kanalo kulukoti nalo ea m̄arabo labo, a nalo tealo aje kokorov m̄am̄ali abar abinimei abue ka Yesu kiano togki mijikia riel ealo. Tibe na, jibe ka nalo amila ka nalo avatove ka Yesu, tibe kanio naio be parinio tubo na toru tai.

<sup>9</sup> Ana nalo aju amiel ka ava jouro ea vio Yerusalemo, ana tiniobi toru aju kamu ka Yesu bija nalo na ajakisor naio, nalo aju abiovio jouo jibe nei, aberinavo Aiou bo mia bo laka

*“!Kito ravamenea naio napano be Teviti kiano bajulukuti nei!*

*Atua Soṗi, jau keilivu ka ninei napano naio binimei ea siamo.*

*Kamii napano ea mave laka, kamii bunu kuvilivu ka naio.” Iouano 118:26*

<sup>10</sup> Mia bogo na Yesu naio ba jouro ea vio Yerusalemo, ana tomu nalo tinielo mudulo, amila iliano telabo, nalo aju abivika denlo aberinavo “?Toro na naio be kei?”

<sup>11</sup> Mia nalo napano abinimei bija Yesu aberdoṗelo jibe nei, aberinavo “Nina naio be naverialiano napano naio maluvo ea

m̄arkomeli na Nasarete ea vio Kalele, na naio siano Yesu.”

*Yesu mijil bulag tomu nalo na ajuṁña aṗilivili ka saba nalo ea Atua kunuano lu Mak 11:15-19; Luka 19:45-48; Jone 2:13-22*

<sup>12</sup> Ana na Yesu bavin ea Atua kunuano Lu, ana bogo nene naio mial ka be tomu telabo napano ajuo m̄arsuṗiki na yimo nene. Nalo na ajuṁña amila in̄auano na avuru veru, nina ea tivelinio ea ijaiano a sida nalo na ea Yimo Lu nei, mia nalo ajuṁña amijukubin tomu nalo toru. Mia bogo na Yesu mial vite nei, naruei naio maka saaro ka leleio. Naruei naio ba mijil bulaglo, a naio javu bulag kialo barobaro nalo napano ajuṁña abar bereverei ka puruveru eaio, a naio buku bulag kanalo iesi nalo naṁña aṗilivili ka sibo. <sup>13</sup> Naruei naio berii kalo, berinavo “Atua naio berenio ea kiano iliano Lu, naio berinavo ‘Mia averenio Kunuaku Lu naio ve yimo na volkouano,’ mia kamii kubilig lario ruei binimei be buluvae na tomu na vinuano nalo.”

<sup>14</sup> Naruei bogo na Yesu naio joa kia ga Atua Kunuano Lu nei vo, ana tomu na miralo bono a tomu na jaalo be kiri kokouro a javuluku milalo nalo abinimei ea Yesu, naruei naio milalo abo bereio.

<sup>15</sup> Mia tomu na tortoru na kulo lu nalo kialo, naliko naveriloglogiano na tuboiano nalo, amial Yesu kiano in̄auano novo nalo nei, a amijog bunu kiritete nalo ajuṁña abiovio kia ga vo, aberinavo “!Bo mia bo! !Kito ravamenea naio napano be Teviti kiano bajulukuti taniel,” naruei tomu nalo na tortoru nei tiniel mimi toru. <sup>16</sup> Nalo tiniel mimi jibe na, ana aber ka Yesu, aberinavo “?Ei juṁnabe, jau komijog iliano naṁña ajuṁña aberenio na?”

Naruei Yesu naio berdoṗe banlo, berinavo “Ee, kiniou nomijogio kiana. Ana kiniou nemialio jibe ka maka leleio kamii kuvuluku iliano Lu na Atua kiano napano naio berenio, berinavo

*‘Atua o, mia jau komijikia kala kiritete nalo, vija nalo na amidomudomu kia ga vo, avameneaso rivu.’ ” Iouano 8:2*

<sup>17</sup> Naruei Yesu juvan nalo na, ana naio ban ea m̄arkomeli na telisu na Betani, naio ba monmelio ea vio na.

*Buruiesi tai napano makanio takou Mak 11:12-14,20-24*

<sup>18</sup> Mia Yesu monmelio ea vio na, mia viomijeni kavijo, ana naio jidom ka rivan bereio Yerusalemo, mia naio jo miel ban jibe na, mia naio mijog jijerio. <sup>19</sup> Ana

naio mial buruviki tai ju ikin̄arabo, m̄ati telabo, mia maka m̄arati tai tuaio. Bior maka ve m̄arati tai tibe na, ana Yesu mil ban buruiesi nei, naio berinavo "Jau katakou re bunu bereio." Mia bogo napano naio mil jibe na, vaarakurano ga buruviki nei naio mekekeu menoko nonovio.

<sup>20</sup> Ana kiano naiagagoano nalo amial buruviki nei naio menoko jibe nei, ana nalo amagmagodu toru, ana nalo abika den Yesu, aberinavo "?Vaio mila buruviki na menoko soḡeli jibe na?"

<sup>21</sup> Naruei Yesu berdoḡe berii kalo, berinavo "Riano ga kinioi neberii ka kamii, verenio kamii kuvitu sikili ea kinioi, ka mia kenemiu jidomiano riveve juo re, mia kamii bunu kumijikia kuvila tibe na, mia kamii kumijikia kuvila bunu nana mave lie vo ka ninei. Verenio kamii kuver ka buruḡara suku na, ka naio tumolu tabujo rivan ea tei, mia naio rila tibe na. <sup>22</sup> Mia verenio kamii kuvitu sikili ea Atua, ka mia kamii kumonea riano, mia kamii kumijikia kuvijev vaio napano verenio kamii kubolkouo, kuvikano."

*Navuriḡaraboiano nalo na Israel ajidom averbure Yesu*

*Mak 11:27-33; Luka 20:1-8*

<sup>23</sup> Mia bogo na Yesu ban bereio jouro ea burusio na Atua Kunuano Lu, naio ba ju berloglog tomu nalo bereio. Mia parinio tomu na tortoru na kulo lu nalo bija navuriḡaraboiano na Israel abinimei ea naio abika denio, aberinavo "?Jau kojor̄a komila saba nalo na ea kei siano? ?A kei naio mijamo ka banso ka jau kala tibe na?"

<sup>24</sup> Ana Yesu berdoḡe berii kalo, berinavo "Mo kinioi bunu nejidom nevika vikadeniano tai bunu den kamii. Ver kamii kuverdoḡe kanaku vikadeniano, ana mo mia kinioi neverialio ka kamii ka kei napano naio mijamo ka kinioi ka nala saba nalo nei. <sup>25</sup> Mo kanaku vikadeniano jibe nei: ?Varueiano na Jone naio mila ban tomu nalo nanua, naio be tena Atua jian ban Jone ka naio mijikia rila, ḡelina tomu nalo ga aber kano?"

Yesu kiano vikadeniano mila nalo abilvili ealo kano, mia aberenio "?Mia kito rover tuḡabe ka naio? !Rovitikario! Verenio kito rover varueiano na Atua naio berii ka Jone, monokanio mia toro nei naio rivika kito river juḡabe ana maka romonea Jone. <sup>26</sup> Mia maka rejikia rover varueiano na tomu nalo ga aberii ka Jone, ver tibe na ḡeli mia tomu nalo na mia nalo ala titai ka kito kovio na, bior nalo amonea Jone ruei ka aberenio naio be Atua kiano Naverialiano riano tai."

<sup>27</sup> Kialo jidomiano nalo jibe nei mila na nalo amiolu aber ka Yesu jibe nei ga, aber "Kumemi maka nuvijikiao."

Naruei Yesu berenio "Mo bo ga, mia kinioi bunu maka nejikia neverial ka kamii ka kei naio mijamo ka ban kinioi ka nala saba nalo nei."

*Jamerijiano na toro tai naliko kenerinio suḡano juo*

<sup>28</sup> Ana Yesu berii bunu kalo, berinavo "Kamii kuvisidomii von tukunuano nei. Toro tai kenerinio suḡano juo, naio berii ka motoru nene berenio 'Keneriku, banei mia jau kava koiḡau ea kiado jiotilikrevi.'

<sup>29</sup> "Ana tete nene naio berdoḡe berenio 'Eau. Kinioi maka nosidomio.' Mia iorou kanio, kiano jidomiano biligio, ana naio ba miḡau jibe ka napano karaḡano berkanio.

<sup>30</sup> "Mia karaḡalo nene naio jo jidomii berinavo mia kenerinio nei mia naio rivan re, naruei naio ba mial kenerinio maratoru nene, naio berenio iliano nei ban naio, naruei kiritete nei berdoḡe kirinovo ban naio berinavo 'Bo ga, teta.' "

<sup>31</sup> Ana Yesu bika denlo, berinavo "?Naljuo nei, na vabe nene naio mila jibe ka na karaḡalo jidomio?"

Nalo aberdoḡe aberinavo "Motoru."

Ana Yesu berii kalo, berinavo "Tenene na. A riano kinioi neber ka kamii, tomu na bova nalo jibe ka tomu na abarbiji takis, bija tire nalo na m̄arabo nalo, nalo narueiaju abinimei jouro ea Atua kiano nave-natubioano,aju abiligio ruei, mia kamii kumitu iorou maaro kalo ga ruei. <sup>32</sup> Bogo na Jone Naruei naio binimei nei, berloglog kamii ka bajago na m̄arabo na memedu, mia tomu na bova nalo nei amonea naio. Mia kamii bunu, kamii kumial vite nalo nei, mia maka leleio kuvilig kamii ve riano, ka kumonea naio leleio."

*Jamerijiano na jiotilikrevi tai*

*Mak 12:1-12; Luka 20:9-19*

<sup>33</sup> Mia Yesu mil kia ga vo, naio berenio berinavo "Kamii kuviagago rivu ka jamerijiano dolu tai, napano berii toro na toru tai, bija kanano jiotilikrevi tai. Toro nei mila batitig kiano vio nei, mila siokoa tai jeriko nonovio jeliviv, a naio miḡauka kanano vio tai ka rivie bulag vati m̄arkrevi, a naio miḡauka bunu kanano burutuli yimoliu tai ka avieii avavin atu mave ka asirarag kuku ka jiotilikrevi nei.

"Mia bogo tai, ana toro na toru nei naio jidom riel kiki kija rivan ea buru-venuo dolu, ana naio juvan kanano jiotilikrevi ban kulo dolu nalo tealo, ka mia amei aiḡau eaio, ka mia avulu van naio.

<sup>34</sup> Naruei toro na toru nei naio ba jo laka o-o, karina naio mial ka vonganei bogo na m̄arati krevi meruo naruei. Ana naio miila kiano tomu tealo ka avan bereio ea nalo napano ajua jiotilikrevi na kanano nei, ka avar puruveru na krevi nalo nei togio napano tomu dolu nei monokanio avulu vanio kanio. <sup>35</sup> Mia bogo na kanano tomu nalo nei abinimei, tomu dolu nalo neibano amuelo, napano mia nalo tai abitivio, dolu nene ajukubin naio m̄aro, a dolu bereio ajubabinio ka puruveru m̄aro.

<sup>36</sup> “Mia toro na toru nei naio miila kiano tomu dolu nalo bereio nalo telabo kija, mia nalo nei amila bere ga bajago nei kalo bereio. <sup>37</sup> Naruei toro na toru nei naio jo jidomii m̄lea kialo bajago nañia ajun̄ia amilaio, ana naio berenio, berinavo ‘Monoka kiniou neiila keneriku garuei rimemedu ka naio rivano, monoka mia nalo avatove ka naio,’ ana naio miila kenerinio bano.

<sup>38</sup> “Mia bogo napano nalo amial naio, naloaju aberverii kalo aberinavo ‘Nina naio be toro na toru kenerinio na kito rava roue bin naio riñaro, ka mia romijikia rodu jiotilikrevi na, mia rudu tibe ka karañano kiano jajun̄ano ve kanado.’ <sup>39</sup> Naruei nalo abano aba kakario kirisikili ana aburio ba tavio ka jiotilikrevi nei ana nalo amuebinio m̄aro.”

<sup>40</sup> Naruei Yesu bika berinavo “? Bogo napano toro na toru na jiotilikrevi nei naio rimei bereio, mia naio rila tum̄abe ka nalo na ajun̄ia am̄ñau ea kanano jiotilikrevi nei?”

<sup>41</sup> Nalo aberdoḡe banio, aberinavo “Kulo va nalo na, mia toro na toru nei naio ruebinvinlo, am̄ñaro sel ea bajago na jogdedeiano tai. Iorou kanio, ana mia naio rudu kiano jiotilikrevi toa kulo dolu nalo juñalo, ka mia amijikia avulu van naio rimemedu ka bogo nene.”

<sup>42</sup> Naruei ana Yesu berii kalo berinavo “Ea iliano Lu tai napano Atua kiano, be iliano tai jibe nei napano naio berenio ‘Puruveru na, tomu na amila yimo aberenio naio bova abukuio ban ruel, mia vonganei puruveru nene naio binime i be puruveru na bo tai ka bokar sudu na yimo ka rudukar yimo sikili rivu.

*Tena Atua na jo mave laka naio milai, mia kumemi numialio bo laka.’ Iouano 118:22*

“?Mia kaniou iliano nei kamiu kubuluku bogo tai rueli ḡelina makanio vo?”

<sup>43</sup> “Mia kiniou neberii ka kamiu, mia Atua rudular kiano navenatuboiano den kamiu, ana mia naio rudu van kulo dolu

nalo na kialo meuliano nalo amijikia avar m̄arati novo nalo rivare ka mia amijikia atu jouro eaio. <sup>44</sup> Mia verenio toro tai rijoru ea puruveru nei, mia puruveru nene tivniegeniege niabene, rivurboḡeio, ḡelina verenio puruveru nei rijoru mave ea toro tai, mia puruveru nene tuba kitkiti toro nene mia riñakitkiti vatitigio.”

<sup>45</sup> Mia bogo napano kulo lu nalo nei naliko Varisis nalo amijog Yesu kiano jamerijiano nalo nei, mia nalo amijikia ka naio jo beriilo ga. <sup>46</sup> Mia bogo napano nalo ajidom ka avokar naio, mia nalo amerou ka tomu nalo, bior tomu nalo amonea naio rueli ka naio be Atua kiano Naverialiano tai.

## 22

### *Jamerijiano na jokoluolu na soriano Luka 14:15-24*

<sup>1</sup> Naruei, Yesu mil ka jamerijiano banlo bereio, naio berinavo <sup>2</sup> “Atua kiano bajago na jom̄a bio tomu nalo ka amei jouro ea kiano navenatuboiano, naio jibe nei: Parinio tubo tai napano naio mila batitig sinaniano na toru tai ka rila jokoluolu na soriano ka kenerinio. <sup>3</sup> Naio miila toru ka tomu nalo telabo rueli ka atu rorea ka mia nalo amei ea jokoluolu nene, mia bogo napano naio miila kiano atevi nalo ka avuru tomu nalo nene amei, mia tomu nalo nei maka bunu asidom ka amei. <sup>4</sup> Naruei parinio tubo nei ber ka kiano atevi dolu nalo, berinavo ‘Kamiu kija kuvan bereio, kamiu kuverii kanaku iliano nei vanlo, kuverenio romue buluku rueli bija temeul dolu nalo napano amijabojabo bo, mia saba nonovio na sinaniano nei biniu ju batitig bo rueli. Kuver kalo monokanio nalo amei aiasol kito ea jokoluolu nei.’

<sup>5</sup> “Ana nalo abano aberii kalo jibe nei, mia nalo nei amiakurano ea ga parinio tubo nei kanano iliano,aju amila ga kialo jidomiano nalo. Tai bavenei ea kanano tiniavio, mia dolu jo bitikar kiano yimo na vilviliano, <sup>6</sup> a nalo tealo abakakar parinio tubo nei kiano atevi nalo, amila lelanlo, amuebinvinlo am̄ñaro. <sup>7</sup> Naruei parinio tubo nei naio tinien mimi toru, ana naio miila kiano tomu nalo na mira nalo abano, amuebinvin kulo va nalo napano amisebi kunualo a kialo komeli bunu.

<sup>8</sup> “Naruei parinio tubo nei naio berii ka kiano atevi nalo, berinavo ‘Sinaniano nei ju batitig bo rueli, mia nalo na kiniou nobiolo rueli ka amei avijurukario, nalo maka bunu avu ka amei, mia kito rotuvanlo. <sup>9</sup> Kiniou nejidom kamiu kuvitakii m̄arabo sesa dolu nalo mia toro kei napano verenio kamiu kuvilealio, mia kamiu kuvikalo ka

nalo amei ea jokoluolu nei.' <sup>10</sup> Naruei kiano atevi nalo nei abano, nalo amila jibe ka napano naio berii kalo, ana aburu tomu nalo abinime, bekurano ka tomu nalo na abo p̄elina nalo na abova, nalo amei tibe ga na, ka nalo aison vatitig vio na jokoluolu nei rivujo.

<sup>11</sup> "Mia bogo napano nalo aju jouro ea vio nei rui, mia parinio tubo nei naio binime ka rivanjũm̄ano nalikolo, mia ka bogo na naio mial toro tai napano naio maka riya kulum̄arauo na bo tai napano beberare ka jokoluolu nei, mia naio miya kulum̄arauo p̄ilip̄ili ga. <sup>12</sup> Naruei parinio tubo nei naio bika den toro nei, naio berinavo "Koig, juñabe ana jau kobinime joomo nei, ana maka keya m̄amo kulum̄arauo na bo na jokoluolu nei tai? Mia naio niono buru maka bunu rijikia river titai. <sup>13</sup> Naruei parinio tubo nei naio ber ka kiano atevi nalo, berinavo 'Kamii kuviorak juñano ve juo a nalo ve juo, ana kuvuku naio riva tavio, ea vio na melijokouo, ea vio na mia naio to teg tulaka a naio ser m̄arjuvono eaio.' "

<sup>14</sup> Ana na Yesu berenio, berinavo "Atua bio tomu nonovio, mia maka ve telabo napano naio bijauialo ka nalo ave kiano."

*Vite na be Atua kanano a vite na be Sisa kanano*

*Mak 12:13-17; Luka 20:20-26*

<sup>15</sup> Naruei Varisis nalo abano ka alavon ka aleal vikadeniano nalo na jirkikili tai ka alavon Yesu eaio, ka napano mia naio rijikia re ka riverdoḡelo eaio. <sup>16</sup> Bogo na aberio-o bisi, ana amila kialo naiaḡagoano tai, naliko kulo dolu nalo na taara na Erot kiano, abinime ea Yesu. Ana nalo nei amijubolbolili ka ilisibiano novo nalo, aberinavo "Yesu, kumemi numijikia ka jau kobe naverloglogiano, jau kobe toro na memedu tai. Kiamo iliano nalo abiniu abe riano, a jau kojo koberloglog tomu nalo ka bajago nalo na Atua naio jidomio. Mia jau maka kejikia kovitii ga tomu tai, mia jau kobitii tomu nalo abiniu abe verare ga. <sup>17</sup>? Tenene na, kumemi numisidom jau kover von ka kumemi, ka ea kiado tuboiano, naio berii juñabe? ?Memedu ka kito kulo Ju nalo rovlulu takis van Sisa, napano parinio tubo na vio Romo, p̄elina maka rimemedu ka tibe na?"

<sup>18</sup> Mia Yesu naio mijikia ka nalo ajidom ala kiki naio ga, ana naio berenio "Kenemiu iliano nalo kirinovo mia kirinovo, mia kenemiu iviso nalo kirivova jooono rui. ? Kamii kumitu kumila von kinioi jibe na ka venia? <sup>19</sup> Mo bo ga, kamii kuvudu puruveru na takis tai rime van kinioi."

Naruei nalo amidu tai binime ban naio, <sup>20</sup> ana na Yesu bika denlo, berinavo "Kei mirano nei joa puruveru nei? ?A sio nei be kei siano?"

Ana nalo aberenio, aberinavo "Sisa mirano na a siano na bunu."

<sup>21</sup> Naruei naio berii kalo, berenio "Mo, vite napano be Sisa kanano, kuvar van Sisa. Mia vite napano be Atua kiano, kuvar van Atua."

<sup>22</sup> Bogo na nalo amijog iliano nei, nalo amiilo toru kanio, ana nalo ajuvan Yesu ajaluvo den naio abano.

*Tomu nalo na añaro, mia ameul bereio Mak 12:18-27; Luka 20:27-40*

<sup>23</sup> Ea bogoti nene ga, kulo Satusis nalo tai abinime ea Yesu, nalo ajidom avika naio ea tivelinio na vite napano nalo amonea jikili ea naio, napano nalo amonea aberinavo tomu nalo na añarñaro maka bunu ajikia ameul bereio ea bogo na tagaḡiano. Ka tenene, nalo abika Yesu jibe nei, aberinavo <sup>24</sup> "Yesu, jau kobe naverloglogiano, kumemi numisidom nuvika denso, ka juñabe ka iliano tai napano tormoruo Mosis naio berenio jukamu nua rui. Naio berinavo 'Verenio toro tai rin̄aro den koano, maka ve kenerilo tai vo, mo kuruano monokanio soro ka taanou nene. Ea bajago na, mia naljuo ve kenerilo ka mia rivokar toro na m̄aro rui siano.' <sup>25</sup> Naruei ea kenememi m̄aratavo tai, tomu aluo napano abe kurualo. Motoru nene naio joro, karina naio m̄aro den koano napano maka ve kenerilo tai, ana kuruano maratoru naio buru tira nene. <sup>26</sup> Naruei, kuruano na toru naio bunu m̄aro den tira neibano, a nana lieie kaniao jibe na bunu, bano-o bokar kurualo aluo, nene abiniu amila bajago takurano ga. <sup>27</sup> Mia iorou kalo abiniu añarñaro tira nei bunu m̄aro. <sup>28</sup> Naruei kumemi numisidom jau koverial van kumemi vite nei: ea tagaḡiano, bogo napano aberii tomu nalo ameul bereio, mia tira nei ve kei koano, bior naio joro rui ka kurualo aluo nei abiniu?"

<sup>29</sup> Naruei Yesu berenio "Peli ga, kenemiu jidomiano jokoro, bior kamii maka kuvijikia vaio napano Atua kiano Iliano Lu naio berenio, a kamii maka kuvijikia vaio napano kiano moroano na toru naio mijikia rilao. <sup>30</sup> Bogo napano tomu nalo ameul bereio, mia atibe ka nailiano nalo na mave ga, mia bajago na soriano naio maka bunu. <sup>31-32</sup> Ana ea tivelinio na meuliano bereio nei, be Atua kanano Iliano Lu tai naio jo napano naio mijikia rijai kito ea vio nei, p̄eli kamii maka kuvulukuio vo? Iliano na naio berenio jibe nei berinavo

'Kiniou nebe Epraamo a Aisak a Yakovo kialo Atua.' ?Ana iliano na naio berenio venia? Nalo tolu nei añiario ea yetemeriba nei bogo be nua ruei, ana yuka telabo barlaka ana Atua berii vonga iliano nei, ka naio be kialo Atua. Jibe na, ana kanano iliano nei naio jiloglog ka nalo tolu nei añiario ea yetemeriba, mia nalo aju ameul ea naio kia ga vo. Atua maka sidom ka kanano tomu nalo ave tomu na añiario ga, mia naio jidom ka naio rive Atua na tomu nalo na ameul."

<sup>33</sup> Ana bogo napano tiniobi nalo amijog Yesu kiano iliano nei, nalo amiilo toru ka vite nalo nei napano naio jomña berlogloglo kanio.

*Tubeoano juo na tortoru*

*Mak 12:28-34; Luka 10:25-28*

<sup>34</sup> Telikiti napano Varisis nalo amijog ka Yesu mila Satusis nalo maka bunu ajikia aver titai, ana nalo abior telisu beamu vo karina abinimei ea Yesu, nalo bunu ajidom ala vonio. <sup>35</sup> Naruei nalo tai napano naio be masou ka Tubeoano, naio bika vikadeniano tai den Yesu, berinavo <sup>36</sup> "? Naverloglogiano, kiniou nejidom ka jau koverial von, ka ea iliano nonovio napano ajua kiado Tubeoano, na vabe nene napano naio toru, jo mave jovulu dolu nalo?"

<sup>37</sup> Ana Yesu ber ka toro nei berinavo "Iliano Lu berenio jibe nei, berinavo 'Atua Soři napano be kanamo Atua, jau monokanio kosidom naio ka tiniemo momou, ka kiamo meuliano momou, ka kiamo jidomiano momou.' <sup>38</sup> Nina naruei napano naio be tubeoano na be moti, a toru laka bunu. <sup>39</sup> A tinene kanio, napano naio toru bunu jibe ka napano jukamu nene, na naio berenio, berinavo 'Mia jau monokanio kosidom tomu nalo napano aju vaatara kaso, kala rivu vanlo, rivare ka napano jau kojidomiiso.' <sup>40</sup> Tubeoano juo nei, nalo abe burupati na tubeoano dolu nalo nonovio napano Mosis kiano, bija Naverialiano nalo kialo iliano bunu, napano ajua kiado Niosi Lu nei."

*Naverikariano naio be tormoru Teviti kiano Atua*

*Mak 12:28-34; Luka 10:25-28*

<sup>41</sup> Naruei ka bogo nei mia Varisis nalo aju vio takurano naliko Yesu, ana naio bunu bika vikadeniano tai denlo, berinavo <sup>42</sup> "?Ea kenemiu jidomiano nalo aberenio mia Naverikariano rimaluvo ea kei kiano bajulukuti?"

Mia nalo aberii kanio, aberinavo "Naio ve tormoru parinio tubo Teviti kiano bajulukuti tai."

<sup>43-44</sup> Naruei Yesu bika bereio denlo, berinavo "?Ee, kamiu kuber riano ga na, ana jumñabe ana Niununo Lu joa Teviti, naruei Teviti mil, berenio

'Atua Soři nalo berkanio kiaku Tubo, naio berinavo

"Jau koto tano tivelinio vameruo ka kiniou, rivano-o mia kiniou nala kiamo uolu nalo amei atibe kanio yebe sesa na kobijankon jaamo eaio.'" Iouano 110:1

"Ea vio na naruei, kito romialio ka napano Teviti naio jo bio naveri-kariano nene berinavo naverikariano-naio be kiano Tubo ruei. <sup>45</sup> ?Mia bior Teviti naio berii jibe na, jumñabe ana kamiu kumituña kuber Naverikariano nei naio miyotuba ea Teviti, ana naio be kiano bajulukuti tai ga?"

<sup>46</sup> Naruei maka toro tai rijikia river iliano tai van Yesu. Mia jikario ea bogo na, mia maka bunu toro tai rijikia rila von Yesu ea navikadeniano nalo.

## 23

*Yesu mil jikili ban navurimāraboiano na nalotvano*

*Mak 12:38-39; Luka 11:43,46, 20:45-46*

<sup>1</sup> Mia ka bogo na, ana Yesu mil ban tiniobi, naliko bunu kiano naiagagoano nalo, naio berinavo <sup>2</sup> "Be riano ka vonganei, naverloglogiano na tubeoano a Varisis nalo, nalo amidu Mosis jeleigio kaña aberial nioti na tubeoano na Atua kanano. <sup>3</sup> Mo verenio tibe na, ana tenene na kamiu monokanio kamiu kumonmonealo, kamiu kuvila tibe ka napano nalo aberenio. Mia kamiu kuvitakii re kialo bajago, bior nalo maka atuña ala tenalo namña aju aberio ka tomu dolu nalo. <sup>4</sup> Nalo aju aburonkar bereio tubeoano sesa nalo telabo na nalo ga amilaio, amila jikili laka, mia nalo ajutua tomu nalo ka aiagago kalo. A nalo aju amila imāuano na jibe na ka nalo ajumña amison vite nalo na kiri teremi nalo laka ban tomu nalo, mia maka leleio asaaro ka aija tomu nalo ka avar bitiran vite nalo nene.

<sup>5</sup> "Nalo abarvar kalo mēle ka kialo imāuano nalo, napano nalo amila jibe na ka mia avuru ga tomu dolu nalo miralo. Kamiu kuvial kialo bulusiveu nalo na amison Atua kiano Vivitauiano Lu juaio, ka mia mña amiorario jua merinalo a mokojuñalo nalo. Nalo ajidom ka kanalo monokanio ve tortoru loa tomu dolu nalo kanalo. Mia kamiu kuvial bunu ka abili iki mñalo kulukoti na volkouano nalo terebievi laka. A abavavin mēle ka vite nalo nei, a ajidom ga ka tomu nalo avamenealo

riviorio. <sup>6</sup> Ana ea bogo na jokoluolu a joomo ea yimo na volkouano bunu, nalo ajidom ka mia bogo nonovio nalo atutano ea tomu na tortoru nalo jelelo, <sup>7</sup> a verenio nalo aiel ea vioruru, mia nalo ajidom tomu nalo avatove kalo, a avio batitiglo averinavo '! Nao, kiaku naverloglogiano novo, kavijo bo o!'

<sup>8</sup> "Mia kamiu, kenemiu naver loglogiano takurano ga naruei, a kamiu kumitibe ka n̄aratavo takurano ga, mia verenio tibe na, kamiu kuvijamo ka re tomu nalo ka mia n̄a avio kamiu tai ka 'Naverloglogiano.' <sup>9</sup> Ana mia kamiu kuvio re toro na yetemeriba nei tai ka teta, bior kamiu be karamemiu takurano ga, napano naio jo mave. <sup>10</sup> A mia kamiu kuvijamo ka re tomu nalo avio kamiu tai aver kube navurim̄araboiano na kialo bior kamiu kenemiu navurim̄araboiano takurano ga, naio napano be Naverikariano. <sup>11</sup> Mia toro napano naio be kenemiu toro na toru laka, mia monokanio naio rimei ve kenemiu toro na im̄auano ga. <sup>12</sup> Mia toro na naio ga bitiril̄ar naio ka naio to mave, mia Atua rila naio to yetano. Mia verenio toro napano naio ga rila naio to yetano, mia Atua rivitiril̄ar naio to mave."

*Yesu berial vijuku torokoriano na navurim̄araboiano na lotuano*

*Mak 12:40; Luka 11:39-42,44,52, 20:47*

<sup>13</sup> Ana Yesu mil dolu ka ga banlo, berinavo "!"Kamii Varisis nalo kamliko naverloglogiano na tuboiano, o-o! Kamii kumila lelan kamiu toru laka, mia ve kirivova laka van kamiu, kanio kenemiu iliano nalo kirinovo, mia tiniemiu nalo abova, ajoron ruei. Tomu nalo ajidom amei jouro ea Atua kiano navenatuboiano, mia kamiu kumitu kumitavoko morouo kalo ea miralo, ka mia nalo ajikia re ka amei jouro, mia mave kanio, kamiu bunu maka kuvitu kumei jouro. Kamiu kubova ruei. Kamii kumitum̄a kuburu kenemiu volkouano nalo terebievi laka, mia be sibiano ga, bior ka bogo nene ga mia kamiu kumitum̄a kumijubolibo lili taanou nalo nei, kam̄a kubina ka kialo saba nalo. Bior tena, mia kenemiu tibureiano sikili lie vo.

<sup>14-15</sup> "!"Kamii Varisis nalo kamliko naverloglogiano na tuboiano, o-o! Kamii kumim̄au bova ga. Kamiu kumisaaro ka kuviel ea uako, ka kuvan ea buruvenuo dolu nalo ka kuvuru tomu nalo atakisor kamiu, mia bogo napano kamiu kubokar tai binimei, mia maka vesiou, mia naio bokar nonovio kenemiu bajago va nalo ba bova laka, bova jovulu kamiu bereio.

<sup>16</sup> "!"Kamii navurim̄araboiano nalo, kamiu miremiu bono ga. Mia kumila lelan kamiu laka, mia rivova laka van kamiu. Ea bogo napano tomu nalo aber titai ka rila kialo verikariano tu sikili, mia ver averenio 'Kiniou neber riano, Atua kunuano Lu yako jo,' a karina, ala korov verikariano nei bereio, ana kuberenio 'Nina maka ve titenia.' Mia verenio averinavo 'Kiniou neber riano, niogo nalo na ajua Atua kunuano Lu joomo, nalo naaju,' mia kamiu kuber iliano na naio jikili laka, maka ajikia ala korovio bereio. <sup>17</sup> Aire tomu nalo, kamiu miremiu bono, a pariparimiu nalo amiovovu. ? Venia napano naio be lu laka: niogo nalo, p̄elina Atua kunuano Lu napano naio mila niogo nalo abe lu? <sup>18</sup> Mia verenio toro tai riverenio 'Neber riano, boda naio yako jo,' kamiu kuber iliano nei be kurano ga. Mia verenio naio riverenio 'Kiniou neberii riano, sida na naio joa boda,' mia kamiu kuber iliano nei jikili laka, toro tai maka rijikia rilakorovio. <sup>19</sup> !Jibe kanio napano neberio ruei, kamiu kube merebono riano! ? Venia naio be lu laka: sida napano joa boda p̄elina boda na mila sida nei be lu? <sup>20</sup> Monokanio kamiu na kuvitilubar vite nalo nei, bior verenio toro tai naio jo jiloglog boda ka rila kiano iliano nei tu sikili, mia naio jo jiloglog bunu bija sida napano joa boda nene. <sup>21</sup> A toro napano ver jom̄a jiloglog ban ea Atua kunuano Lu, naio jo jiloglog bunu bija nana naio be kanano yimo nene, <sup>22</sup> ana toro na jom̄a jiloglog mave, naio jom̄a jiloglog bunu bija jobaro lu na Parinio tubo lu na toru kanano, tenene naio jom̄a jiloglog Atua garuei memedu.

<sup>23</sup> "!"Kamii naverloglogiano na tuboiano kamliko bunu Varisis nalo, o-o! Kamii kumila lelan kamiu toru laka, mia rivova laka rivan kamiu. Kiniou nemijikia napano kamiu kumitum̄a kubitii bo julaka, ka verenio mia kuvar semiu sinaniano ve duelimo, mia ve takurano monokanio rivan ea Atua Kunuano, tibe ka napano tuboiano naio jom̄a berenio, a kamiu kumitum̄a kumila jibe na ka kenemiu saba nonovio nalo, rivano-o rivokar bunu m̄am̄esi na kiritavarvasu nalo a vite nalo bunu napano javukia m̄arsili nalo. Mia vite tomormouo nalo napano tuboiano naio berenio, kamiu maka kuvisidomial leleio, tibe ka napano naio berenio berinavo kamiu kumemedu rivu, a kamiu monokanio tiniemiu riia kulo dolu nalo, monokanio kamiu kuvokar kenemiu verikariano. Verenio kamiu kuvisidom kuvokar sikili vite nalo na kiritavarvasu,

naio bo ga, mia vite nalo na tomormoruo nei naruei bo ka kamiu kuviturna kuvilaio garuei, ana makanio.

<sup>24</sup> “! Aire tomu nalo, kamiu navurim̄araboiano nalo, kamiu miremiu bono ga! Kamiu kumiturna kumila jibe na kanio napano bogo na ana kamiu kumunu saba, mia kamiu tiniemi maio jikili ka mia kuvilaluvu re ka kuviovolar nionono tai napano mijoru batove ea kenemiu baja nalo, mia kamiu maka kuvial kar ka kumdidio mo belia kamel napano joaio.

<sup>25</sup> “!Kamiu naverloglogiano na tuboiano bija Varisis nalo bunu! Kamiu kumila lelan kamiu toru laka, mia rivova laka rivan kamiu. Kamiu kumiturna kumitakii vatitig tuboiano nalo napano kiritavarvasu nalo tivelinio ka sekoniano na kenemiu baju a baja nalo, naruei kamiu kuberiana kenemiu vite nalo nonovio ameravo bo ruei. Mia kenemiu baju nalo nei abujo ka sinaniano na vinauano napano kamiu kubario ea bajago na yebekavoano. <sup>26</sup> Kamiu Varisis nalo, kamiu miremiu bono riano. Verenio kamiu kuvisidomii ka kenemiu baju a baja nalo ameravo rivu bogo nonovio, mia kamiu kuvisonlo re bunu ka sinaniano nalo napano kenemiu kariano juao.

<sup>27</sup> “!Kamiu naverloglogiano na tuboiano bija Varisis nalo, o! Kamiu kumila lelan kamiu toru laka, mia rivova lie vo van kamiu. Kamiu kumitavukia m̄artanbo napano amioiovua miuvu meravo kirinovo bo jel tavio, mia vajoomo nene naio bujo ka buriu na tomu nalo napano aṅarṅaro, bija mokotenalo napano ajorono. <sup>28</sup> Jibe na, bogo na tomu nalo aial tavio na kamiu, mia nalo amijikia averenio kamiu kumemedu bo, mia makanio, vajoomo na kamiu bujo ka juboluboiano a kariano nalo.

<sup>29</sup> “!Kamiu naverloglogiano na tuboiano nalo bija Varisis nalo! Kamiu na bogo nonovio kumil ka kuluniomiu ga. Mia rivova lie vo van kamiu kenemiu jidomiano nalo beve juo. Kamiu kumiturna kubitikar vatitig m̄artanbo na naverialiano nalo re nua, a kamiu, kumioiovua bo bunu puruveru na sidomkariano na tomu memedu nalo, ana jum̄abe: ?Kamiu kuberiana kumemedu kamliko nalo na a?

<sup>30</sup> Mia kamiu kumitu kuberinavo verenio kamiu kumeul nua ruei ea bogo na korobimiu nalo, mia kamiu maka kuvijikia kuvijurukar nalo na ka bogo napano nalo amuebinvin Atua kiano naverialiano nalo re nua. <sup>31</sup> Mia ea kenemiu ilisibiano nei, kamiu kumiturna kumil lelan kamiu bereio ga, bior iliano napano berial ka

kamiu kube bajulukuti memedu na korobimiu nalo na amuebinvin naverialiano nalo. <sup>32</sup> Mo bo ga, kamiu kuvirṅau bo ka rivano-o, kamiu kuvila von ka kuvila nonovio irṅauano na korobimiu nalo nei ajikario nanua bogobe ruei.”

*Vironiano na navurim̄araboiano nalo na lotuano*

*Luka 11:47-51*

<sup>33</sup> Naruei Yesu mil jikili kia ga banlo, naio berinavo “Kamiu kumitibe ka maro nalo garuei memedu. ?Kamiu kuberiana mia kumijikia kuvuro ka kenemiu vironiano na ea vio na jogvaiano? !Maka leleio! <sup>34</sup> Verenio mia kiniou neila naverialiano nalo aviedu, vija tomu napano abe masou bo ka Atua kiano iliano nalo, a vija bunu naverloglogiano na tuboiano nalo, verenio aviedu ea kamiu, mia kamiu kuvuebinvin tealo aṅaro ea m̄akolkolo, a tealo mia kamiu kuvitivlo ea kenemiu yimo na volkouano nalo, a mia kuvijili bulaglo ea kenemiu m̄arkomeli nalo.

<sup>35</sup> Mia kamiu kuvila tibe na kalo damariga rivano-o, mia kamiu naruei kuvokar vironiano na m̄ariano na tomu na memedu nalo nei aviniu napano korobimiu nalo nanua amuebinvinlo. Tenei jikar ea Epel, na naio maka rila titai napano tokor leleio, binimej bokar Sakaraia, na Parakaia kenerinio, naio napano korobimiu nalo amuebin naio jo vaataro ka boda, joomo ea Atua Kunuano Lu. <sup>36</sup> Riano kiniou neberii ka kamiu, mia vironiano na m̄ariano na tomu nalo nei, mia rivokar kamiu, napano kumeul kia ga vo vonganei.”

*Yesu tinien miia Yerusalemo*

*Luka 13:34-35*

<sup>37</sup> Ana Yesu jegi bior Yerusalemo, ana naio berinavo “! Yerusalemo-o, Yerusalemo-o! ?Bior vaio ana kojorna komuebinvin naverialiano nalo, a kojuba binvin nalo napano Atua milalo abiedu easo? Va telabo kiniou nejidom nodu jum̄aku selvivko kiamo tomu nalo, tibe ka tu sabarou buru kirikiti nalo abinimej ajuluku ea sibiano, mia kiamo tomu nalo maka asaaro ka kiniou. <sup>38</sup> Jau, komial na, Atua jo juvanso naruei, mia jau komei kove vio yauo kurano ga naruei. <sup>39</sup> Tenene na neber ka jau, mia kiamo tomu nalo aial re bunu kiniou bereio, rivano-o rivokar bogo napano mia nalo averenio bereio tenei, averinavo

‘Atua Soṽi,

jau keilivu ka ninei

napano naio jo binimej ea siamo.”

## 24

*Yesu berial ka mia aue bulag Atua kunuano lu*

*Mak 13:1-2; Luka 21:5-6*

<sup>1</sup> Ana Yesu batavio den Atua Kunuano Lu, mia bogo na naio miel bano, kiano na-iagagoano nalo abinimei ana nalo ajiloglog yimo tomormoruo nalo napano aju jouro ea burusio na Atua Kunuano Lu, mia abo laka, ana aberii ka Yesu ka naio siraragdi rialo. <sup>2</sup> Mia Yesu naio berii kalo, berinavo “? Kamii kumial yimo nalo na? Riano kiniou neber ka kamii, yimo nalo na, mia ve re bunu puruveru nene tai totano vatitig ea jeleigio, bior mia tomu tai amei aue bulagio nonovlo.”

*Jaleleano na mia monokanio rimei*

*Mak 13:3-13; Luka 21:7-19*

<sup>3</sup> Telikiti na nalo amiel jibe ga na, nalo abinimei ea Suku Na Buruolivi, naruei Yesu naio jotano ea vio na. Mia bogo na maka bunu tomu dolo nalo tai atu naliko, ana kiano naiagagoano nalo abinimei ea naio, abika denio, aberinavo “? Mia aue bulag Yimo Lu nene nagi, a kijokijo na vabe na kanamo liluano, napano mia jau komei bereio ea bogo na maaro?”

<sup>4</sup> Naruei Yesu berdope banlo, naio berinavo “Bo ka mia kamii kuvitigar vatitig kamii rivu, ka mia ve re toro tai rimei ka rijubolbolili kamii, <sup>5</sup> bior mia tomu ve telabo napano mia adu siaku, naruei mia nalo amei averinavo ‘Kiniou nebe Naverikariano nene,’ naruei nalo avuru tomu ve telabo aiel vovu. <sup>6</sup> Ana ea bogo na bunu, mia kamii kuvijog nadiuano na mira napano ju vaataro, a liliani-ano na mira nalo na aju koalabo, mia kamii kumemebiju mele re. Vite nalo na monokanio nalo amalmaluvo tukamu beamu vo, mia nina maka legiano na maaro nene navo. <sup>7</sup> Ana parinio tubo nalo ala mira ka parinio tubo dolo nalo, a venuo dolo nalo atumolu ka venuo dolo nalo. Mia ve bogo na vitu na toru, mia niii rikulkulu ea vio yetemeriba reraio. <sup>8</sup> Mia vite nalo nei, maka ve bogo na maaro nene navo, mia tibe ka tira napano naio be mabono, naio jikar ka mijog be moti garuei ka taakano mijalele ka mia naio rivar kenerinio, mia burunara jogvaiano naio maka navo.

<sup>9</sup> “Mia ka bogo nene, kamii na napano siaku joa kamii, mia avokakar kamii, a adu vironiano va nalo van kamii, rivano-o mia auebinvin kamii kumarniario. Ana mia tomu na buruvenuo dolo nalo nonovio asidom lele re kamii, mia ail die kamii. <sup>10</sup> Vite nalo na, mia rila tomu nalo ve

telabo atu sikili re bunu ea kiniou, a nalo na amonmonea kiniou jukamu, mia nalo asidom re bunu nalo na amonea kiniou jikili kia ga ea bogo nene, mia nalo ativeluku kalo van kialo uolu nalo nei jumalo. <sup>11</sup> Mia naverialiano nalo na tuboluboiano ve telabo atumolu, mia avuru tomu ve telabo aiel tokoro. <sup>12</sup> Mia vijuku vovaiano nonovio riluo ve toru lie vo rila ana tomu ve telabo kialo iviso rimei rimenini, asidom re bunu Atua. <sup>13</sup> Mia verenio toro na tu sikili dariariga ea kiniou riva rivokar bogokouo nei ribisi, mia Atua rilarur naio. <sup>14</sup> Mia ioluano vou na navenatuboiano nei, mia aioliolu van taara kinkin nalo kanio ea vio yetemeriba reraio, jibe ka kijokijo tai napano berial ka legiano na iorou maaro jo binimei.”

*Jaleleano toru ea vio Yerusalemo*

*Mak 13:14-23; Luka 21:20-24*

<sup>15</sup> Naruei Yesu berii bunu iliano dolo tai, napano bo ka verenio toro na rivu-lukuio, bo ka naio rila von ka rijikia vatitig nioti nene. Iliano nene berii jibe nei, berinavo “Mia kamii kumijikia kuvial avitirilar tavoru tai napano kirivova mia kirivova laka, tumolu tu rila niegeniege vio Lu na Atua Kunuano Lu. Vite na Nave-rialiano Taniel naio berialio nanua ruei, <sup>16</sup> ana verenio bogo na kamii kuvial vite nene, kamii napano kumitua vio Yutea, monokanio kamii kuvuro kuva kuvitu-luku ea suku nalo. <sup>17</sup> Ka bogo na, verenio toro tai to rijilmebi tavio ea kunuano, mia naio maka bunu rijikia riva joomo ka rivar kanano saba tai bereio, <sup>18</sup> pelina verenio toro tai toa kanano tiniavio, mia naio maka bunu rijikia riva vonuo bereio ka rivar kanano kuluniabeno. <sup>19</sup> Ana ka bogo nene kia ga vo, mia rivova laka van tire nalo na mabolo, a nalo na ajunã amije yu ban kenerilo tete mudomudomu nalo. <sup>20</sup> Verenio tibe na, monokanio kamii kubolkouo ka kamii, ka kenemiu bogo na jaleleano nei, ka mia rimei re rivokar kamii ea bogo na niavo, pelina ea legiano tava tai, <sup>21</sup> bior bogo na jikili nei, naio sikili lie todovulu bunu bogo tealo na jikili, jikar ea bogo napano Atua jii vio yetemeriba binimei bokar banei, ka mia ve re bunu jaleleano na burutomoruo tai tibe nei bogo tai bereio. <sup>22</sup> Mia Atua naio jidomii ruei ka mia naio tekorov ve bulati ga bogo na jikili nei, kanio tomu nalo napano naio bijauialo ka ave kanano, napano ajua bogo na. Ana verenio naio tekorov re ve bulati tibe na, mia maka toro tai rijikia rimeul to.

<sup>23</sup> “A ka bogo nene, verenio toro tai rivar ka kamii, riverinavo ‘Kamii kuvialio,



nina naio be Naverikariano na,' ĉelina naio riverinavo 'Nina naio be Naverikariano naio yako,' mia kamiu kumonmonea re kiano iliano nalo na, <sup>24</sup> bior naverikariano na tiboliboiano nalo ve telabo atumormolu, vija naverialiano na ti boliboiano ve telabo mia nalo nene ala kijokijo na tortoru, vija tokokouro nalo na iloiano. Mia nalo ala tibe na, ka avuru tomu nalo aiavovu, rivano-o rivokar napano mia alavon ka avuru bunu tomu nalo napano Atua bijauialo ka ave kanano, mia vite nei maka ajikia alao. <sup>25</sup> Mia kamiu kuvitkar kamiu, bior kiniou neberial vite nalo nei ban kamiu jukamu ruei, ka bogo na tenene nalo maka amalmaluvo vo.

<sup>26</sup> "Naruei ka tenene, verenio tomu nalo averii ka kamiu, averinavo 'Kamiu kuvialio, Naverikariano naio joa vio yauo yako ruei,' mia kamiu kuvan re ea vio nene, a verenio averii ka kamiu averinavo 'Kamiu kumial na, naio jo joomo ea yimo yako ga,' mia kamiu kumonealo re. <sup>27</sup> Ana ea bogo napano Kulorinio Kenerinio naio rimej bereio, mia naio rimej rimeravo ka tomu nalo nonovio, tavukia vio bijano, naio merera rudul batitig vio tiniabene reraio tikar is van ea ues. <sup>28</sup> Ea bogo nene, mia tavukia bunu napano verenio tena m̄aro tai toa vio tai, mia bebekumorio nalo napano ajum̄a ajen temeul nalo nam̄a am̄araro, mia nalo amei kanio, monokanio aje buronlo ve telabo."

*Mia Kulorinio Kenerinio rimej bereio*

*Mak 13:24-27; Luka 21:25-28*

<sup>29</sup> Naruei Yesu naio berinavo

*"Mia bogo na jaleleano nei naio ribisi, vaarakurano ga m̄erenio naio rimej ribobogio, mia siberio rimerera re bunu.*

*Marivitano nalo na tiniabene mia nalo atibirbil, mia tenalo na jikirkili nalo na tiniabene, mia Atua rikulkulo kalo."* Ais 13:10, 34:4

<sup>30</sup> "Mia ka bogo nene mia kijokijo na Kulorinio Kenerinio riyotuba ea tiniabene, a mia m̄atatoke nalo na yetemeriba nei mia nalo ateg ve toru aviovio mia aial Kulorinio Kenerinio riyotuba ea melijo nalo vija kiano burum̄ara moroano a vija kiano burum̄ara miamoiano. <sup>31</sup> Mia karina, simeduo na toru riolu, ana mia naio riila kiano nailiano nalo ava aseliviv ea vio yetemeriba reraio a vio mave bunu, ka avuru kiano tomu nalo napano naio bijauialo ruei, amei vio takurano ea naio."

*Maka toro tai rijikia bogo na legiano na maaro nene*

*Mak 13:28-32; Luka 21:29-33*

<sup>32</sup> Ana Yesu naio berinavo "Kamiu kuvialio von buruiesi napano aber buruviki. Naio mijikia riverloglog kamiu ka vite tai napano kamiu monokanio kuvitii vatitigio. Bogo napano kamiu kuvial ka jaati nalo amei amemeiao, amelumu, tikar ka mia rivarboveio, kamiu kumijikia ka kuverenio bogo binimej vaataro ka bogo na m̄erenio rivitunu ve toru. <sup>33</sup> Ka tenene, bogo na kamiu kuvial kijokijo nalo na ea vio yetemeriba, tavukia na kiniou neberenio ka kamiu ruei, mia kamiu kuvijikia ka Kulorinio Kenerinio naio jumolu jikili jua m̄aravato ruei, vaataro ka naio rimaluvo naruei. <sup>34</sup> Riano kiniou neberii ka kamiu, mia vite nalo na mia ayotuba tukamu vo, mia iorou, ana taara na tomu nalo napano m̄a amei ka bogo na, mia mijikia ava kovio den vio yetemeriba nei. <sup>35</sup> Mia tiniabene a yetemeriba ave juo bunu ava kovio, mia kanaku m̄ariliano nalo maka ajikia ava kovio bogo tai leleio. <sup>36</sup> Mia maka toro tai rijikia legiano nene ĉelina aura nene napano mia Kulorinio Kenerinio naio rimej eaio. Nailiano nalo na vio mave, naliko Atua Kenerinio, maka ajikiaio, mia Karam̄aku ga takurano naio mijikiaio."

*Monokanio kamiu kuvitu derevijo*

*Mak 13:33-37; Luka 17:26-30,34-36*

<sup>37</sup> Ana Yesu naio berinavo "Rivano-o rivokar bogo na Kulorinio Kenerinio rimej bereio, mia tomu nalo atu batitig re, tibe ka bogo na tormoruo Noa kiano nanua. <sup>38</sup> Ea kiano bogo nene naruei, bogo na ueimia na toru nei naio maka rimej vo, ana tomu nalo ajum̄a ajinan, a ajum̄a amunu tenalo nam̄a amunmunio, ajum̄a amila soriano jibe na ga, binimej bokar bogo napano Noa naio ba joomo ea kiano uako na toru napano naio m̄iaukanio. <sup>39</sup> Mia tomu nalo naaju dam̄ariga jibe na, maka asidomial titai, naruei amial ga burum̄ara ueimia nei binimej buru bulaglo. Mia kiniou neber ka kamiu, mia bogo na Kulorinio Kenerinio naio riyotuba rimej bereio, mia tomu nalo ave virare ga ka nalo nei nua beamu ea Noa kiano bogo. <sup>40</sup> Mia verenio tomu ve juo atu am̄au ea tiniavio, mia nailiano nalo amei avurular tinene, mia tinene atuvanio tobo, <sup>41</sup> mia verenio tira ve juo atum̄a ala sinaniano, mia avurular tinene, mia tinene atuvanio tobo.

<sup>42</sup> "Tenene na mia kamiu monokanio kuvitkar vatitigio, bior kamiu maka kuvijikia ea legiano na vabe napano mia kenemiu Tubo naio rimej bere eaio. <sup>43</sup> Mia monokanio kamiu kuvitilubar vite nei, ka

verenio toro na toru tai, verenio naio mijikia memedu ka bogo na mia toro na vinauano tai rimeia ea kunuano, ka mia naio rivina ka kiano saba nalo, mia naio to derevijo rivu damariga, ka mia toro na vinauano naio rimeia. <sup>44</sup> Tenene na, mia monokanio kamiu kuvitu derevijo rivu damariga, kanio mia Kulorinio Kenerinio naio riyotuba ea bogo tai napano mia kamiu kuvisidomial re ka mia naio rimeia eao.”

*Jamerijiano na toro na imauano napano kiano boru naio binimeia bereio*

*Luka 12:41-48*

<sup>45</sup> Naruei Yesu naio berinavo “?Verenio toro na imauano tai, napano naio be masou bo ka kiano imauano, a naio bokar vatitigio, mia naio rimau tumabe? Naio rimau tibe nei, napano verenio kiano toro na toru tuvan vio nei ka naio riel riva koalabo, ana toro na toru nei rudu naio to ka rivitikar vatitig rivu tomu na imauano dolu nalo, ana mia toro nei naio rivokar vatitig imauano nalo nei. <sup>46</sup> Mia bogo napano toro na toru nei naio rimeia bereio, mia naio rijikia rialeal kiano boru na imauano nei naio jo bokar vatitig imauano nalo nei bo. Ana mia boru na imauano nei naio rijikia rijog rivu ve toru, <sup>47</sup> bior mia toro na toru nei naio tuvan kiano saba nalo nonovio tua toro na imauano nei jumano. Ierinio, mia Atua rila tibe ga na bunu.

<sup>48</sup> “Mia verenio boru na imauano nei naio rivoa, mia bogo na toro na toru nei naio tuvan vio, ana naio riva koalabo, mia boru na imauano nei naio rijikia river ‘?Ee, toro na toru nei naio jo kirisiou laka, peli mia naio rimeia re bunu kovioho, pelina jumabe?’ <sup>49</sup> Ana mia naio tumolu rila lelan tomu dolu na imauano nalo, mia naio rijikia riva rimunu uei naliko tomu na pariparilo nalo mia amiaovovu, mia nalo atu asen searo ea toro na toru neibano kanano puruveru nalo. <sup>50</sup> Mia toro na toru neibano naio rimeia bereio ea legiano tai napano toro na imauano nei riilo kanio garuei, a ea bogo tai napano toro nei risidomial re ka mia naio rimeia eao. <sup>51</sup> Naruei toro na toru nei naio rudu vironiano ve toru van boru nei, mia naio riila naio riva to vija tomu na tibolboiano dolu nalo ea vio napano tomu nalo ajurna ajegi, ajerkakar marijuvolo nalo eao.”

## 25

*Jamerijiano na merevono duelimo*

<sup>1</sup> Ana Yesu berenio, berinavo “Ka bogo napano mia Kulorinio Kenerinio

naio rimeia bereio, mia Atua kiano nave-natuboiano naio tibe ka jamerijiano nei naio berenio. Jamerijiano nei berii jokolu-olu na soriano tai, napano jakii kanalo bajago, nalo na tivelinio ka suriano aburu naio ban ea niatira kunuano ka avuru naio rimeia rivijaio. Naruei kuviviniene due-limo [10] nei nalo aju bo ga ea kunuano, ka aiomon vite nonovio tu rivu vatitigio. Ana vaataro ka melijo tarako rimeia naruei kuviviniene nalo abar kanalo yulu nalo amielko marabo kalo, ka aviniu amei bereio. <sup>2-4</sup> Kuviviniene nalo neibano, jumo nene abe masou bo, abe kialo jidomiano napano nalo abarkar kialo bauei na kanalo sunsunu ka mia aison bereio kanalo yulu nalo, mia nalo jumo nene nalo abe taboso ga, maka kialo jidomiano rivu tibe na ka avarkar kanalo bauei na sunsunu tai ka verenio sunsunu tabo, ana mia amijikia aison bereio. <sup>5</sup> Ana nalo aju rorea toro na soriano jiuu jibe na bano-o, mia maka naio rila sofelii, ana merevono nalo nei miralo temi toru ana nalo amonmelio.

<sup>6</sup> “Mia kanio bogiano viovare sebisaro, toro tai bio, berinavo ‘Toro na soriano, naio jo binimeia naruei. Kamiu kumei kuviviuo naio.’ <sup>7</sup> Ana na merevono du-elimo nei nalo ajevijo, ana amimaukanio kialo yulu nalo ka avilvil rivu bereio. Amilakon julu na kanalo yulu nalo, a abitii batitig kialo sunsunu nalo. <sup>8</sup> Naruei nalo na abe taboso abitulbar ka kialo yulu nalo, vaataro ka mia amarraro, naruei nalo abika den kuluelo jimo nene, aberinavo ‘Aiou banalo, kamiu kubo, kuviyon kija kenemiu sunsunu rivan kumemi, ver peli mia kenemiu yulu nalo amarraro kovioho.’

<sup>9</sup> “Mia nalo na abe masou, aberinavo ‘Vedeio ga, sunsunu maka rivare ka kumemi a kamiu bunu. Bo ka kamiu kuvan ea yimo na vilviliano ka kuvulu kenemiu tai.’

<sup>10</sup> “Naruei nalo napano abe taboso aba ka avulu kanalo sunsunu, ana bogo napano nalo aju koalabo kia ga vo, mia toro na soriano naio boru. Naio ba jouro ea kiano vonuo, naliko merevono jimo na aju rorea naio, naliko abijurukar ea sinaniano na soriano. Naruei bogo napano tomu nalo aba aju jouro ruei, ana nalo ajetavoko maratavo bo batitigio.

<sup>11</sup> “Karina iorou kanio, ana merevono nalo na abe taboso abinimeia bereio, abio aberinavo ‘!Kumanememi, kumanememi, jau kobijuku bo kajamo ka kumemi nu-viedu joomo!’

<sup>12</sup> “Mia toro na soriano naio riverinavo ‘!Ierinio, kiniou neberii ka kamiu, kiniou

maka nejikia bunu kamiu kube kei! ”

<sup>13</sup> Mia Yesu berii jamerijiano nei bisi, ana naio berinavo “Mo, kamiu monokanio kuvitigar batitig rivu, bior kamiu maka kuvijikia legiano na vite nei a aura nene.”

*Jamerijiano na tomu tolu na abitigar puruveru*

*Luka 18:11-27*

<sup>14</sup> Ana na Yesu mil berinavo “Mo, mia bogo na Kulorinio Kenerinio rimej bereio, mia tibe ka bunu napano jamerijiano nei berenio, napano toro na toru tai na naio miomon ka mia naio riel riva koalabo ea buruveno dolu. Ana toro na toru nei naio bio kanano atevi na iñauano nalo ka amei aialio, naruei naio mil banlo, naio bar kanano saba nalo jua jumalo ka avitigar vatitigio, ka aiñau rivijaio. <sup>15</sup> Naio bitii vatitig kialo jikiaiano, naruei ea nalo tai jumano naio midu siveu na puruveru jimo, ea dolu jumano naio midu siveu na puruveru juo a ea dolu jumano naio midu siveu na puruveru takurano ga, karina naio juvanlo, ana na naio ba jo koalabo kirisiu kija. <sup>16</sup> Naruei toro na bar siveu na puruveru jimo, vaarakurano ga naio ba mila iñauano telabo ka puruveru nalo nei, bano-naio bokar bereio siveu na puruveru jimo dolu bereio. <sup>17</sup> Mia ea bajago nene kia ga, toro napano mijev siveu na puruveru juo, naio bokar bereio siveu na puruveru juo dolu bereio. <sup>18</sup> Mia toro napano naio mijev siveu na puruveru takurano ga, naio ba mikil pili ea borotano, ana naio jivin puruveru napano be kiano tubo kanano.

<sup>19</sup> “Naruei bogo jiou barlaka ruei bano, karina toro na toru na tomu tolu nei kialo naio binimej bereio. Naruei naio jidom rial kanano puruveru nalo napano naio bario ban tomu tolu nei. <sup>20</sup> Naruei toro na bokar siveu na puruveru jimo jukamu, naio binimej jumolu jikili jukamu ea toro na toru nei mirano, naio bar bereio siveu na puruveru jimo dolu bereio. Naruei naio berenio ‘Tubo, Beamu jau kabarsiveu na puruveru jimo ban kiniou, siveu jimo nene ninei. Mia nana kiniou nemimiau nabokario tenene ninei, be siveu na puruveru jimo bereio, napano kiniou namiladu kanio be kanamo.’

<sup>21</sup> “Naruei toro na toru nei naio berkanio, berinavo ‘A siva toru. Jau kobe kanaku atevi na iñauano novo, jau kobokar vatitig bo laka kanaku iñauano telisu na nemije monea jumano, mo mia kiniou nevitiri larso ka mia jau kovitigar kanaku iñauano dolu nalo na tortoru. Maraiu novo, jau komei kovijurukar

kiniou kiteaku ea kanaku jokoluolu na tiniesaariano nei.’

<sup>22</sup> “Karina toro napano barsiveu na puruveru juo beamu, naio binimej jumolu jikili jukamu ea toro na toru nei mirano, ana naio berenio ‘Tubo, beamu jau kabarsiveu na puruveru juo ban kiniou. Siveu juo nene ninei, mia nana kiniou nemimiau nabokario bereio tenene ninei, be siveu na puruveru juo, napano kiniou namiladu kanio be kanamo.’ <sup>23</sup> Ana toro na toru nei berkanio, berinavo ‘A siva toru. Jau kobe kanaku atevi na iñauano novo, jau kobokar vatitig bo laka kanaku iñauano na telisu napano nemije monea jumano, mo mia kiniou nevitiri larso ka mia jau kovitigar kanaku iñauano dolu nalo na tortoru. Jau komei, kovijurukar kiniou ea kanaku jokoluolu na tiniesaariano nei.’

<sup>24</sup> “Karina, toro napano mijev siveu na puruveru takurano ga naio binimej, jumolu jikili jukamu ea toro na toru nei mirano na berkovio ga, berenio berinavo ‘Koig, kiniou nejidomii ka jau kobijuku mēte. Jau komijikia kokilkili ea tinavio na maka jau komebijo eaio, a jau komijikia kabarsiveu ea buruiesi ea buruiesi napano maka jau komebijaio. <sup>25</sup> Bior tena, kiniou nemerou, ana nabano nomidu van kanamo puruveru, nejivin joa borotano. Kealio, ninei be kanamo puruveru na jo bo ga jo.’

<sup>26</sup> “Mia toro na toru nei naio berenio ‘Aa jau, toro va tai, jau komiovo toru. Jau komil searo ea kiniou ruei, ka kober kiniou nebe toro pīlipīli tai jibe na jibe na, naruei verenio jau komial ka kiniou nebe toro kouo tai jibe na bior vaio ana jau komidu kanaku puruveru jo kurano ga jibe na. <sup>27</sup> Verenio jau kava kodu toa yimo na puruveru mia kiniou nemijikia navar bulagio vija kirikiti nene, ka bogo na kiniou nebinimej bereio jibe nei.’ <sup>28</sup> Ana na toro na toru naio ber ka kiano navitikariano nalo, naio berinavo ‘Mo, kamiu kuva kuvidu denio puruveru na ea jumano, kamiu kuvidu van toro napano naio bokar siveu na puruveru duelimo ruei. <sup>29</sup> Kiniou neber jibe nei ka kamiu, neber toro napano verenio be kiano saba ruei, mia naio mijikia rivokar tabunu bereio vo ka mia ve miroano, mia toro napano maka ve kanano saba tai, mia naio rila deven vite na telisu napano be kiano. <sup>30</sup> Mia taboso nei, kamiu kuvuku naio riva tavio ea vio na melijokouo, ea vio na tomu nalo ajumia ajegi a ajumia ajer m̄arijuvulo eaio.’ ”

*Legiano na tibureiano*

<sup>31</sup> Mia Yesu naio mil berinavo “Bogo napano mia Kulorinio Kenerinio naio rimej

naliko kiano nailiano nalo, ea kiano mermerano ka rive Parinio Tubo, naruei mia naio rimei ka mia totano ea kiano jobaro lu. <sup>32</sup> Naruei mia nailiano nalo avan ka avuru m̄tatoko nalo nonovio na yetemeriba nei amei, ka mia atumulu atu kamu ea mirano, mo ka bogo na mia naio tiburevure tomu nalo, ana avan ea taara ve juo, tavukia toro tai napano naio jo bitikar kiano temeul nalo jiburevure kanano nunu nalo ka nani nalo. <sup>33</sup> Mia parinio tubo nei naio tiburevure nunu nalo ka ava atua juṁano meruo, mia nani nalo ava atua juṁano mal. <sup>34</sup> Ana mia naio river ka nalo na ea juṁano meruo, riverenio 'Kamui kumei naruei, kube tomu nalo napano karam̄aku milivu ka kamui. Kamui kumei kuvidu jelemiu jouro ea kiano navenatuboiano, napano naio mila batitigio jororea kamui ruei, ka bogo napano naio jii yetemeriba nei eaio. <sup>35</sup> Kamui kumei, bior ka bogo napano m̄a jijer kiniou, ana kamui kumije sinaniano ban kiniou, a bogo napano m̄a midoujer kiniou, kumijev uei ban kiniou. A bogo napano nebe valauo, mia kamui kuburu kiniou naba joomo ea kunuemi, <sup>36</sup> a bogo napano kiniou niabeku yauo, kamui kubar kulun̄arauo ban kiniou. Bogo na kiniou nemie, kamui kubinimei kumiadu ka kiniou, a bogo napano kiniou nojoa yimo na tetavokoiano, kamui kubinimei kumitukunu bija kiniou.'

<sup>37-39</sup> "Mia tomu nalo na memedu nei napano ajua juṁano meruo, mia nalo avika denio, averenio '? Tubo, juṁabe? Jau kojor̄na koberenio kumemi numitun̄a numiijaso ea kiamo bogokouo nalo na jibe na, mia kumemi maka bunu tiniememi rimaio ka kumemi numila jibe na banso leleio. ?Kumemi numila vite nalo na nagi?'

<sup>40</sup> "Ana na Parinio tubo nei mia naio river kalo riverinavo 'Riano kiniou neber ka kamui, bogo nar̄a kamui kumila jibe nei ban toro na kiaku m̄aratavo nalo nei tai, bekurano ka ver naio be toro na juṁabe, mia jibe ka kamui kumila ban kiniou ga na.'

<sup>41</sup> "Mia iorou kanio, mia naio ril bunu van nalo na ea juṁano mal, mia naio river kalo, riverinavo 'Kamui kuvuro den kiniou, Atua miobaṁe ka kamui ruei. Kamui kuvan ea sebi na maka rijikia rin̄aro bogo tai, napano naio jororea kia Setano ruei naliko kanano nailiano nalo ka avan eaio. <sup>42</sup> Kanio bogo napano jijer kiniou, mia kamui maka kuvar sinaniano van kiniou, a bogo napano midoujer kiniou, mia maka kuvijev uei van kiniou, <sup>43</sup> a bogo napano kiniou nebe valauo, mia kamui

maka kuvuru kiniou neviedu joomo ea kunuemi a bogo napano niabeku yauo, mia kamui maka kuvar kulun̄arauo van kiniou, a bogo napano kiniou nemie, ṁeli na nojoa yimo na tetavokoiano, mia kamui maka kumei kuviadu ka kiniou.'

<sup>44</sup> "Ana mia nalo averdoṁe Parinio Tubo nei, averinavo '?Tubo! Ana kumemi numi-also nagi napano jau jijerso, ṁeli napano midoujerse, ṁeli napano kobe valauo, ṁeli na niabemo yauo, ṁeli napano komie, ṁeli napano kojoo yimo na tetavokoiano? ?Ana bogo juṁabe napano jau kojibe na, ana maka kumemi nuviedu nuvijaiso?'

<sup>45</sup> "Mia naio ril vanlo, riverinavo 'Riano kiniou neberii ka kamui, bogo napano maka kamui kuvidisomial ka kamui kuvila tibe na van kiaku toro tai napano naio be toro na juṁabe, nina jibe ka kamui maka kuvisidom ka kuvila van kiniou.'

<sup>46</sup> Naruei Yesu mila nonovio kiano iliano, ana naio berinavo "Nalo na mia avan ka ajev vironiano tai napano maka rijikia ribisi bogo tai. Mia tomu na memedu nene nalo ava ajev meuliano napano maka rijikia ribisi bogo tai."

## 26

*Ajidom auebin Yesu rin̄aro*

*Mak 14:1-2; Luka 22:1-2; Jone 11:45-53*

<sup>1</sup> Ana telikiti napano Yesu berloglog kiano tomu nalo ka iliano nalo nei avona bisi, ana naio berii kalo, naio berinavo <sup>2</sup> "Kamui kumijikia ruei ka veua ana Jokoluulu na Sidomkariano Na Ioruriano tikario. Mia ea bogo na jokoluulu nene, mia nalo adu Kulorinio Kenerinio toa tomu nalo juṁalo ka mia atukukakario ea m̄akolkolo ka mia naio rin̄aro."

<sup>3</sup> Naruei kanio bogo nene, tomu na tortoru na kulo lu nalo, naliko navurim̄araboiano na kulo Israel naloaju abior ea parinio toro lu kunuano, napano siano Kaivas. <sup>4</sup> Nalo amil kavulio ka mia avokar Yesu bona ga ka mia tomu nalo ajikia re, mia nalo adu vironiano na m̄ariano vanio. <sup>5</sup> Mia nalo aberenio, aberinavo "Kito maka rejikia rala ea bogo na jokoluulu, bior mia tomu nalo tiniel ser kito ve toru, mia uetubaiano ve toru, bior nalo telabo napano tiniel jii tete neibano ruei."

*Mere miyon bonotanunu ea Yesu parinio*

*Mak 14:3-9; Jone 12:1-8*

<sup>6</sup> Mia iorou kanio, Yesu naio joa m̄arkomeli na Betani, naio joa toro tai kunuano napano abio ka Saimon Burumieni, kunuano bior mieiano na burumieni jua naio nua. <sup>7</sup> Mia ka bogo tai

napano Yesu jo jinano ea yimo nei kia ga vo, mia tira tai binimeia ea naio, tira nene midu bauei tai napano amirñaukanio ea puruveru novo tai, napano bujo ka bonotanunu napano puruveru nene buru-tomoruo laka. Ana tira nei miyon nonovio bonotanunu nei ea Yesu parinio.

<sup>8</sup> Mia bogo napano Yesu kiano naia-gagoano nalo amial vite nei, mia nalo tiniel mimi, ana nalo aberinavo “?Ka venia ana naio mila kule bonotanunu na jibe na? <sup>9</sup> Verenio naio rivilvili kanio ga, mia naio mijikia rivokar puruveru ve toru eaio, ka mia naio rivar van talinñasa nalo.”

<sup>10</sup> Mia Yesu mijikia ka ajurña amil jibe na, ana naio ber kalo, berinavo “?Junñabe ana kamiu kumila lelan tira nei jibe na? <sup>11</sup> Talinñasa nalo na, mia nalo atu dañariga iviso ka kamiu, ka mia kamiu kumijikia kuvijailo, mia kiniou, kiniou noto re kitoliko tulaka. <sup>12</sup> Vite napano tira nei naio milaio, napano naio miyon bonotanunu nei ea niabeku, nina jibe ka naio mila batitig kiniou reora kanaku tiviniano. <sup>13</sup> Riano kiniou neber ka kamiu, ea vio yetemeriba nonovio na averial kanaku ioluano nei eaio, mia monokanio mia atukunu bunu ka vite napano tira nei naio milaio, ka mia asidomkario dañariga bereio kiano burunñara tinetiiano, napano naio tinien miia kiniou toru riano.”

*Jutas berkar ka mia tiveluku ka Yesu*

*Mak 14:10-11; Luka 22:3-6*

<sup>14</sup> Karina kiano naia-gagoano duelimo ba juo [12] nei tai, napano siano Jutas na vio Kariot, naio ban ea tomu na tortoru na kulo lu nalo, <sup>15</sup> ana naio berinavo “? Verenio kiniou netiveluku ka Yesu riviedu ea jumemiu, mia kamiu kuvar venia van kiniou?” Ana nalo abulu ka puruveru silva duelimo va rolu [30] banio, <sup>16</sup> ana mo jikario ea bogo na, Jutas jonña jirag ñarabo ka mia naio tiveluku ka Yesu vanlo eaio.

*Naia-gagoano nalo amiomon sinaniano na jokoluolu nene*

*Mak 14:12-16; Luka 22:7-13*

<sup>17</sup> Ana binimeia bokar bogoti napano be moti ka jokoluolu nei, napano abio ka bunu Jokoluolu Na Asen Beskit Na Mioboba, ana kiano naia-gagoano nalo abinimeia kean Yesu, ana abika aberinavo “?Jau kojidom kumemi nuva nuvula vatitig vite nalo nene ea vio na vabe, ka mia kito rala Sinaniano na Sidomkariano Na Ioruriano eaio?”

<sup>18</sup> Ana Yesu naio berdoñe banlo, berinavo “Kamiu kuva Yerusalemo, kamiu kuvial toro na, kuverii kanio, kuverinavo ‘Kenememi naverloglogiano naio berii kiano bogo binimeia vaataro na ruei.

Mia naio jidom naio naliko kumemi kiano naia-gagoano nalo, numei nuvula sinaniano nei ea kunuamo.’”

<sup>19</sup> Ana Yesu kiano naia-gagoano nalo aba amila javukia napano naio berii kalo, ana nalo amila batitig vite nalo na jokoluolu nene.

*Yesu berial ka mia Jutas tiveluku ka naio*

*Mak 14:17-21; Luka 22:14,21-23; Jone 13:21-30*

<sup>20</sup> Naruei iorou kanio ana Yesu nalo abinimeia ea vonuo nene, ana bogiano binimeia, naruei Yesu binimeia naliko kiano naia-gagoano nalo ajutano, ana naloaju amijev sinaniano nene, <sup>21</sup> ana Yesu berenio, berinavo “Riano kiniou neberii ka kamiu, be kamiu tai napano mia naio tiveluku ka kiniou.”

<sup>22</sup> Telikiti na kiano naia-gagoano nalo amijog naio mil berii jibe nei, mia nalo amijog bova toru, ana nalo abiniu abivika denio, aberinavo “?Tubo, be kiniou kovio, a?”

<sup>23</sup> Mia Yesu berdoñelo, berinavo “Toro napano kumemi ve juo nuvititi ka joko ea baju ve takurano naio naruei be toro nene. <sup>24</sup> Mia Kulorinio Kenerinio naio monokanio rinñaro tibe ka na Vivitaiano Lu berenio, mia toro na naio ritiveluku ka naio, mia rivova laka van naio, bo laka ka ver naio rimoluo re.”

<sup>25</sup> Mia Jutas, toro napano karina naio jiveluku ka Yesu, bika berinavo “?Naverloglogiano, be kei? ?Kiniou bo, a?”

Ana Yesu berdoñe naio, berenio berinavo “Tenene ga naruei na jau koberenio na.”

*Sinaniano na maaro*

*Mak 14:22-26; Luka 22:15-20; 1 Korin 11:23-25*

<sup>26</sup> Telikiti napano naloaju ajinan kia ga vo, ana na Yesu midu joko tai, ber siva ban Atua kanio, karina naio bure kokorovio ana naio bar jian ban kiano naia-gagoano nalo, naio berenio berinavo “Kamiu kuvijevio, kamiu kuvisenio. Nina be mokotenaku.” <sup>27</sup> Karina naio mijev baja na ñarjunñelmñelu, ana naio mil berenio siva ban Atua kanio, karina naio jian banlo, ana naio berinavo “Kamiu kuviniu kumunu bitiranio ga ea baja nei, <sup>28</sup> bior ninei be kanaku burukija, napano mia rila Atua kiano verikariano tu sikili, napano mia naio rioukar viekokoano na vijuku vo-vaiano na tomu ve telabo kialo. <sup>29</sup> Kiniou neberkar ban kamiu, mia kiniou nomunu re bunu ñarjunñelmñelu na bereio, rivano-o mia nomunu ñarjunñelmñelu vou na kitoliko, ea Teta kiano navenatubioano.”

<sup>30</sup> Karina nalo amijev iou tai maariano ea Iouano Nalo bisi, ana nalo abatavio, abano maariano ea Suku na Buruolivi.

*Yesu berial ka mia Pitere rivar bon-bonua naio*

*Mak 14:27-31; Luka 22:31-34; Jone 13:36-38*

<sup>31</sup> Naruei Yesu berii kalo, berinavo "Ka bogiano nei, mia kenemiu moneano ea kiniou ajoru, kar vite nalo napano mia amei avokar kiniou. Mia tavukia ga na Atua berenio ea kiano Vivitauiano Lu, napano naio berenio, berinavo

*'Mia kiniou nouebin toro na bitikar nunu naio rinao, ana mia kanano nunu nalo avuro dedade atan ea vio nonovio.'* Sek 13:7

<sup>32</sup> "Mia bogo napano nemeul bereio den naruariano, mia kiniou notukamu nava Kalele, ana mia kamiu bunu monokanio kumei iorou."

<sup>33</sup> Naruei Pitere berial kanio, berinavo "Yesu peli mia nalo dolu na aviniu kialo moneano ajoru kaso, ana avuro, mia kiniou maka nejikia notuvanso bogo tai."

<sup>34</sup> Mia Yesu berdope, berkanio berinavo "Riano kiniou neber kaso, mia ka bogiano nei ga, bogo na tormano tokokoreko re vo, mia jau kavarbonbonua kiniou ve varolu, koverenio maka kejikia kiniou."

<sup>35</sup> Ana Pitere naio berial meravo ban Yesu, ea miralo abiniu, berinavo "Verenio nalo asidom auebin kiniou bunu kito ve juo, nina bo ga na, mia kiniou maka nejikia navar bonbonuas, ka never kiniou maka nove kanamo." Mia kiano naiagagoano dolu nalo bunu aberii jibe na.

*Yesu ba bolkouo yako Ketsemani*

*Mak 14:32-42; Luka 22:39-46*

<sup>36</sup> Karina Yesu naliko kiano naiagagoano nalo aban ea vio tai, siano Ketsemani. Naruei naio ber kalo, berinavo "Kamiu kuvitua vio nei beamu vo, mia kiniou nava lie kija bereio, ka nava novolkouo ve telisu yako."

<sup>37</sup> Naruei naio buru Pitere naliko Sepeti kenerinio juo, Yemesi naio Jone, nalo tolu naliko aban lie kija telisu bereio, mia ka bogo nei Yesu mijog kiano iviso binimei temi laka, naio mijog bova toru laka.

<sup>38</sup> Ana naio mil ban nalo tolu nei, berinavo "Vonganei, nemijog niunuku burukorov toru, mila vaataro ka naruaro kario. Aiou bo ka kamiu kuvitevijo vija kiniou ve telisu beamu ea vio nei vo."

<sup>39</sup> Ana Yesu miel ba lie kija telisu bereio, ana naio mijoru minie, dabuko mirano ka rivolkouo. Ana naio bio, berinavo "Teta o-o, verenio jau komijikia kala vite nei, aiou kiniou nejidom ka jau kejelar

baja na jogvaiano nei den kiniou ka mia kiniou nomunu ea re. Mia kala re tibe ka na kanaku jidomiano, mia kala ea ga kanamo."

<sup>40</sup> Karina, naio binimei bereio kean naia-gagoano tolu nei, naio mialo ajurua amonmelio ruei. Karina ajevijo, ana Yesu berii ka Pitere, ber "?Juruaabe ana kamiu maka kuvijikia kuvitevijo rivija kiniou ka aura ve takurano ga nei?" <sup>41</sup> Kamiu monokanio kuvitikar vatitig rivu, a kamiu monokanio kumolkouo bogo nonovio, ka mia nati-boliboiano nalo ala re kamiu kuvijoru ea kariano. Riano ga, kenemiu jidomiano jikili bo, mia niabemiu melukluku toru laka."

<sup>42</sup> Karina valuo nene, naio ban bereio ea vio nabano, naio bolkouo bereio, berinavo "Teta o-o, verenio jau maka kejikia kodular baja na jogvaiano na kiaku nei, mia kiniou monokanio nomunu eaio, bior monokanio tibe kano ga na jau kojidomio." <sup>43</sup> Karina, naio binimei bereio, mial nalo tolu nei ajurua amonmelio bereio, bior nalo miralo jouo ajevijo dedeio.

<sup>44</sup> Naruei naio juvan nalo tolu nei aju ga, ana naio ban bereio ea vio napano naio bolkouo ber bereio iliano takurano ga, mila varolu ka ninei. <sup>45</sup> Naruei naio binimei bereio kean nalo tolu nei, ana berenio "?Ei, kamiu kumijilimebi, kamiu kumonmel kia ga vo? !Kamiu kuvitikario! Vaataro ka bogo na Kulorinio Kenerinio naio rivan ea tomu na bova nalo juñalo naruei. <sup>46</sup> Kito, kuvitumolu, ravano. Kamiu kumial na, toro na jiveluku ka kiniou nana ju binimei vaataro ga naruei."

*Nalo abokakar Yesu jikili*

*Mak 14:43-50; Luka 22:47-53; Jone 18:3-*

*12*

<sup>47</sup> Ana bogo na Yesu naio joma ber iliano nene kia ga vo, Jutas neibano naio be naiagagoano duelimo ba juo [12] tai, naio binimei, naliko tomu telabo na mira nalo abar iobogu na mira bija kialo nia nalo. A tomu na tortoru nalo na kulo lu nalo naliko navurimaraboiano nalo na kulo Israel, nalo naruei amiilalo abinimei.

<sup>48</sup> Mia beamu ka nalo amaluvo, toro na tiveluku Jutas naio berial kijokijo tai banlo, naio berinavo "Toro na verenio kiniou nevivio naio tukamu, naio naruei kamiu kuvokakar naio sikili," <sup>49</sup> mia bogo napano nalo amiyotuba, Jutas miel memedu ka Yesu, biviuo naio ana naio berkanio, berinavo "Ibogiano bo-o, Naverloglogiano! Tuñaro to vijaso."

<sup>50</sup> Ana Yesu berkanio, berinavo "Koig, iruaano napano kobinimei kanio, mia jau kalaiio ga." Naruei nalo abinime,

abokakar Yesu jikili. <sup>51</sup> Mia bogo napano abokar naio jibe na, ana Pitere burular kiano iobogu, ðiligio je titire ea Parinio toro Lu kiano toro tai ana jelar tilinieno tivelinio. <sup>52</sup> Naruei Yesu mil banio, berinavo "Kodu vatitig kanamo iobogu rivan ea sivi nene bereio. Toro na jo midu iobogu na mira, mia naio riñaro ea iobogu na mira. <sup>53</sup> ? Kamiu kuberianña maka nejikia nevio van Teta ka naio rijai kiniou? Verenio nevio van naio, mia ve vaarakurano ga, naio riila kiano taara na nailiano nalo ve telabo ka mia amei avitkar kiniou. <sup>54</sup> Mia verenio kiniou nala tibe na, mia iliano nalo nanua jua Vivitauiano Lu, mia maka ajikia amei ve riano, tibe kanio napano aberkario nua ruei."

<sup>55</sup> Mia Yesu mil ban tomu nalo nei, naio berinavo "Ka vaio ana kamiu kubar kenemiu iobogu nalo bija kenemiu nia nalo? Kubokar bena kiniou jibe na? ? Peli kamiu kuberianña kiniou nebe toro kouo na vinauano, ðeli na napano ña mue toro? ? Mia legiano nonovio kiniou nojoña noberloglog tomu nalo ea Atua Kunuano Lu, mia jurñabe ana maka kamiu kumei kuvokar kiniou ea bogo na? <sup>56</sup> Mia vite nalo nei bo ga na, bior vite nalo na kamiu kumitu kumilaio, jibe ka ga napano naverialiano nalo aberialio nanua ruei ea Vivitauiano Lu, ana kialo iliano nalo nene, aju abinimei abe riano naruei."

Ana ea ga aura nei, naiagagoano nalo ajuvan Yesu, nalo aburo ka naio.

*Aburu Yesu ban ea komeli labo na kulo Ju nalo kialo*

*Mak 14:53-65; Luka 22:54-55,63-71; Jone 18:13-14,19-24*

<sup>57</sup> Mia nalo napano abokar Yesu, aburu binimei ka ala naio tumolu tukamu kean Kaivas, Parinio toro lu, napano naverloglogiano na tuboiano nalo naliko navurimaraboiano na kulo Ju nalo kialo abinimei vio takurano ea kiano komeli nene ruei. <sup>58</sup> Mia Pitere bunu jakisor Yesu ka bogo nene, mia naio maka rivan vaataro ka naio, mia bogo na abinimei jouro ea burusio na komeli labo nei, Pitere naio ba jotano naliko Kaivas kiano tomu na irñauano nalo, ka mia rijog von ka mia ala turñabe ka Yesu.

<sup>59</sup> Naruei tomu na tortoru na kulo lu nalo, bija tomu na tortoru dolu nalo na aju joomo ea vioriano nei, nalo ajirag tomu nalo tai ka mia ajubolbo ka Yesu, ka mia aver vite nalo tai ka napano aial ka amijikia auebin Yesu riviorio. <sup>60</sup> Naruei nalo amil, ana tomu telabo ajumolu, amijubolbo bano-o, mia vioriano nei makarial vite tai ea kialo iliano nalo rivare ka

mia ala tibe na ka Yesu. Kialo iliano nalo beve dolu ga jibe na bano-o bisi ana tomu juo ajumolu, <sup>61</sup> aber iliano takurano ga aberinavo "Toro na naio berenio mijikia rue bulag Atua kunuano Lu, karina naio rivan vavin bereio ka bogoti ve tolu ga."

<sup>62</sup> Naruei Parinio toro lu nei naio jumolu, mil ban Yesu, berinavo "Jurñabe, jau koverdoðelo, ðeli na makanio? ? Jurñabe ka iliano nalo narña aju aber bulagio na?"

<sup>63</sup> Mia Yesu maka ril, naio ju buru ga. Naruei Parinio toro lu nei berkanio bereio berinavo "Kiniou neber kaso, jau monokanio kover Atua Meul siano kover riano ka jau kobe Naverikariano, napano Atua kenerinio, ðeli na jau maka kove naio? ? Jau monokanio koverialio vatitig van kumemi vonganei!"

<sup>64</sup> Naruei Yesu mil banio, berinavo "Vite nene naruei, jau kojorña koberenio kiana. Mia kiniou neber ka kamiu, iorou kanio vesiou re, kamiu kuvial Kulorinio Kenerinio napano mia naio totano tivelinio vameruo ea Atua na moroano, a mia kuvial naio riyotuba ea melijo nalo ea yetemeriba."

<sup>65</sup> Mia Parinio toro lu nei, naio tinien mimi ñele, ana mijede ñano kulukoti, ana naio berinavo "Barei naruei! Toro na naio ber niegeniege Atua siano lu ruei. ? Kamiu kumijogio? ? Jurñabe ana roju rejirag bereio toro tai ka mia river bereio titai ka naio? <sup>66</sup> ? Vioriano jidomii jurñabe? ? Mia roviron turñabe?"

Nalo amil aberenio, aberinavo "Bo kanio auebin toro na naio riñaro."

<sup>67</sup> Naruei nalo abule mirano, a ajuku naio, mia tealo amijuba bilivilig naio, <sup>68</sup> ana nalo amiyotel ea naio, abika denio aberinavo "Ei, Naverikariano, jau koverial vonio, kenia mijubaso vonga na?"

*Pitere barbonbonua Yesu*

*Mak 14:66-72; Luka 22:56-62; Jone 18:15-18,25-27*

<sup>69</sup> Ana ka bogo nene Pitere naio jotano jouro ea burusio nei, ana niatira tai napano jonña bitikar yimo naio binimei, berinavo "Uerei, jau bunu kamliko Yesu na vio Kalele neibano!"

<sup>70</sup> Mia kamu ea miralo abiniu, Pitere barbonbonua tenei, naio berinavo "Kiniou maka nejikia tena jau kojorña koberenio na." <sup>71</sup> Naruei naio buro den niatira nene, batavio jua morouo na toru na burusio na komeli nei.

Ana ea vio na, niatira dolu mialio, ana naio berii ka tomu nalo na aju vaataro, berinavo "Tete na, naio naruei naliko Yesu re Nasarete."

<sup>72</sup> Ana Pitere naio barbonbonua tena bereio, naio mila kiano iliano jikili, mia naio berinavo "Peli ga, kiniou maka leleio nejikia toro na."

<sup>73</sup> Ana maka vesiou, ana tomu nalo naaju vaataro ea morouo nene abinimeia Pitere, aberii kanio aberinavo "Ninei beriano, jau kobe nalo tai, bior jooa na kojima kabar ka kiamo iliano, jibe ka kulo Kalele nalo."

<sup>74</sup> Mia Pitere naio mila iliano jikili lie vo, ana naio berinavo "Maka leleio! Riano ka tiniabene! Kiniou neberenio ruei, maka nejikia tete na!"

Ana memedu ka bogo nene, tormano tai jokokoreko, <sup>75</sup> ana mila Pitere tinien maio ka Yesu kiano iliano, napano naio berkanio berinavo "Riano kiniou neber kaso, mia ka bogiano nei ga, bogo na tormano tokokoreko re vo mia jau kavarbonbonua kiniou ve varolu, koverenio maka kejikia kiniou." Naruei Pitere batavio, naio jegi mia jegi ka tinie na jogaivano toru.

## 27

*Abur Yesu ban ea parinio tubo na Romo napano jomña bitikar Israel*

*Mak 15:1; Luka 23:1-2; Jone 18:28-32*

<sup>1</sup> Naruei kavijo, binimeia bogo na mñerenio bavin, tomu na tortoru na parinio kulo lu nalo naliko navurimñaraboiano na kulo Israel nalo, ajutano bereio ka alavon ka avirakar mñarabo tai rivu, ka mia rila ana Yesu monokanio rimñaro. <sup>2</sup> Mia bogo napano amil bisi, ana amiorkar Yesu jumano, ana aburu naio ba ban Pailat, napano naio be Parinio tubo na vio Romo napano naio bitikar Israel ka bogo na, ana nalo amidu Yesu joa Pailat nene jumano, ka mia naio tibureio.

*Jutas ga milabin naio bereio Imñauano 1:18-19*

<sup>3</sup> Mia Jutas, napano naio jiveluku ka Yesu karina, naio bitilubar ka ajibure Yesu ruei ka monokanio mia naio rimñaro, ana naio mijog bova toru ka vite na milalo. Ana naio bilig kiano jidomiano bereio ruei, ana naio bar bereio silva duelimo va rolu [30] nei, ba ban tomu na tortoru nalo nanua abar banio jukamu. <sup>4</sup> Naruei naio ber kalo, berinavo "Kiniou nabijuku bova bior nejiveluku ka toro na maka rila titai leleio tokoro, mia kanaku iliano ga mila ka mia ala bin naio rimñaro."

Ana nalo nei aberii kanio ga, aberinavo "Ai koig, jumabe ana jau kobinimeia kejegi bereio ban kumemi? Kumemi nubisi denso ruei."

<sup>5</sup> Naruei Jutas ðilig mñlea ga puruveru nalo nei joomo ea Atua kunuano Lu, ana naio batavio, ba jelan burujono ka teli, ka naio rimñaro.

<sup>6</sup> Mia tomu na tortoru na kulo lu nalo nei aba abar puruveru nalo nene, naruei nalo aberenio "Puruveru nei, burukija na toru miou kario ruei, ana ea kiado tuboiano, maka rejikia rodu puruveru na jibe na toa basaro na Atua kunuano Lu." <sup>7</sup> Ana nalo aberiio, karina nalo abar puruveru nene, aba abulu ka niatano tai, napano beamu, siano "Borotano Na Tanoðili," naruei nalo ajuvan niatano nei be pakeltavo na valauo nalo mñalo. <sup>8</sup> Tenene na, binimeia bokar baneia, tomu nalo ajumña abio niatano nene, aberenio "Borotano na Burukija."

<sup>9</sup> Vite na jibe na, ana mila Naveri-aliano Jeremaia kiano iliano tai re nua naio binimeia beriano, napano berenio "Abar puruveru silva veru duelimo va rolu [30], bare ka napano kulo Israel aberenio naio bare ka avulular ka toro,

<sup>10</sup> ana nalo aba abulular borotano nei den toro namña minñauka tanoðili, jibe ka na Atua berii ka kiniou ka noimñau kanio." *Sek 11:12-13*

*Yesu jumolu jukamu ea Pailat mirano Mak 15:2-5; Luka 23:3-5; Jone 18:33-38*

<sup>11</sup> Ana nalo aburu Yesu binimeia jumolu jukamu ea Parinio Tubo Pailat, ana na bika den Yesu berinavo "Jau kobe Parinio tubo ka kulo Israel nalo ðeli na makanio?"

Ana Yesu mil berdoðeio, berinavo "Tenene na, jau kojomña koberenio na."

<sup>12</sup> Mia bogo napano tomu na tortoru na kulo lu nalo naliko navurimñaraboiano nalo aberii lualua vite nalo telabo kar Yesu, mia Yesu maka bunu riverdoðe titai. <sup>13</sup> Mia Yesu naio juburu ga jibe na, naruei mila Pailat bika bereio, berinavo "Jumabe, jau maka kosidomial ka ajumña aberenio vite telabo na bova karso?"

<sup>14</sup> Mia ea tivelinio na vite nalo na ajumña aberenio nei, mia Yesu maka leleio riveriðe titai vanlo, naruei Parinio tubo nei miilo toru kanio.

*Pailat mijamo ka Yesu naio monoka rimñaro*

*Mak 15:6-15; Luka 23:13-25; Jone 18:39-19:16*

<sup>15</sup> Ka bogo nene, mia naloaju kia ga vo ea Jokoluolu na Sidomkariano Na Ioruriano, mia ka yuka nonovio ea jokoluolu nei, Parinio tubo na Romo nei naio jomña mila vite tai ka kulo Israel nalo. Naio jibe ka napano verenio nalo tealoo ajua tetavokoiano, ana nalo amijikia aver nalo



tai kalo, ka mia parinio tubo nei naio rijamo ka naio riva tavio. <sup>16</sup> Mia ka bogo nei, toro na poletik tai joa tetavokoiano, napano mia tomu nalo amijikia batitig naio, siano Yesu Barabas.

<sup>17</sup> Naruei bogo na tomu nalo abior vio takurano kulo telabo ea vio nei, Pailat bika denlo, berinavo “?Kamui kumisidom kiniou najamo ka kei taluvo riviedu bereio ea kamui? ?Yesu Barabas, ĩeli na Yesu na aju abio naio ka Naverikariano?” <sup>18</sup> Pailat bika jibe nei, bior naio mijikia ruei ka tomu nalo na tortoru na kulo Ju nalo, nalo ga aburu Yesu binime banio bior iñauano na jokuano ga, bior kialo tomu nalo ajaaro toru ka Yesu.

<sup>19</sup> Ana ea bogo na bunu napano naio jotano ea vio na tibureiano ka rila iliano nei, mia kouano miila toru binime banio berinavo “Jau kala re titai ka toro na. Naio maka rila titai, mia ka bogiano kiniou nomonbovuii naio, mia vonganei kiniou nomijog bova toru kario.”

<sup>20</sup> Tenene na, Pailat jidom tuvan Yesu, mia tomu nalo na tortoru na kulo lu nalo naliko navurimāraoboiano na kulo Ju nalo, amila bulag tomu nalo kialo jidomiano nalo, ajikili laka kalo, aberinavo monoka averii ka Pailat naio tuvan Barabas, mia naio rila Yesu riva riñaro.

<sup>21</sup> Naruei Parinio tubo nei naio bika denlo bereio, berenio berinavo “?Kamui kumisidom kiniou najamo ka tomu juo nei, na vabe nene naio taluvo rivano?”

Ana nalo abio jouo, aberenio aberinavo “Barabas.”

<sup>22</sup> Naruei Pailat bika denlo, berinavo “? Mo, bo ga, ana mia kiniou nala tuñabe ka Yesu napano ajuñia abio naio ka Naverikariano?”

Mia nalo abiniu amiaga jouo, aberenio “!Kotukukar naio toa mākolkolo!”

<sup>23</sup> Ana naio berinavo “?Kar vaio? ?Venia bova napano naio milaio?”

Mia nalo amiaga kilkil, aberinavo “Kotukukario, kotukukario toa mākol kolo.”

<sup>24</sup> Telikiti na Pailat mial ka maka rijikia riverburelo, bior uetubaiano jumolu mēle ruei, ana naio midu baju na uei tai, naruei kamu ka tiniobi nei, naio jekon juñano, ana naio berenio “Mia burukija na toro nei toa re kiniou. Kiano māriano naio be kenemiu iñauano ga.”

<sup>25</sup> Naruei tomu nalo amil aberdoĥe, aberenio “Bo ga na, jibe na garuei ana kumemi numisidom, napano kiano māriano be kenememi iñauano, a napano kiano burukija naio toa kumemi vija kenerimemi nalo.”

<sup>26</sup> Ana Pailat naio mijamo ka Barabas banlo, jibe ka na nalo ajidomio, ana naio midu Yesu joa kiano kulo na mira nalo juñalo ka avitivio, a ka avuruio rivan ka atukukario toa mākolkolo.

*Kulo na mira nalo amiyotel ea Yesu*

*Mak 15:16-20; Jone 19:2-3*

<sup>27</sup> Naruei Pailat kiano kulo na mira nalo aburu Yesu abatavio ea vio medave na kanano komeli nene, mia nalo abio bunu kulo na mira taara dolu nalo ka amei aial Yesu. <sup>28</sup> Naruei nalo amiya bulag kanano kuluniabene, ana amiya kulukoti tai ea naio napano niabene be vabolo jibe kanio nañia parinio tubo nalo amiyaio, <sup>29</sup> naruei nalo abar tilikou abili vatitig bisi, ana amive joa parinio, jibe ka parinio tubo kanano batubatu tai, ana nalo amidu bunu iesi tai joa juñano meruo ka naio rivokario. Naruei nalo aju aminie ka sudu jaalo kanio, ana nalo aju amiyotel eao, aberinavo “!Kumemi nubameneaso, jau Parinio tubo novo na Kulo Israel kialo!”

<sup>30</sup> Ana nalo aju abule titia naio, a amidu burusubavio nene, amue ka Yesu parinio. <sup>31</sup> Mia bogo napano amiyotel ea naio bisi, ana nalo amiyalar kulukoti vabolo nei denio, ana amiya mñano kuluniabene ea naio bereio, ana nalo aburu naio, abatavio ka atukukakario ea mākolkolo.

*Ajukukar Yesu ea mākolkolo*

*Mak 15:21-32; Luka 23:26-43; Jone 19:17-27*

<sup>32</sup> Ana bogo na kulo na mira nalo aburu mārabo ka Yesu aba tavio, ana nalo amileal toro na vio Saireni tai, siano Saimon, naruei nalo ajutua naio ka naio kija rudu Yesu kiano mākolkolo rivano.

<sup>33</sup> Mia nalo aba abokar suku tai, napano siano Kolkota, napano nioti nene berenio vio na jibe kanio bordada. <sup>34</sup> Bogo napano nalo amijivi ea vodobi na suku nene, nalo ajidom adu mārjuñelñelu tai van Yesu ka rimunuio, mia mārjuñelñelu nei vati titai napano mijeja juao, ka mia rila Yesu niabene je ka mia rijog re rijalele mēle, mia bogo napano Yesu miomo vonio, mia maka sidom rimunuio.

<sup>35</sup> Nalo aburu Yesu bano, ana ajukukakar naio ea mākolkolo. Karina, nalo amila jibe ka na amiere mñabujo ka aleal ka mia kei rivar Yesu mñano kuluniabene tai a kei rivar dolu nene, <sup>36</sup> ana nalo ajutano ea vio nene ka aviti kuku ka naio. <sup>37</sup> Ana nalo ajiri verialiano tai, ajukukario jo mave ka parinio, naio berial vite na mila amuebin naio biorio, napano naio berenio “Nina be Yesu, Parinio tubo na kulo Ju nalo.”

<sup>38</sup> Mia nalo amidu tomu juo na vinuano

ajukukakarło bunu ea m̄akolkolo jibe ka Yesu, amidu tinene jo tivelinio vameruo, a tinene jo tivelinio varñali.

<sup>39</sup> Naruei tomu nalo napano m̄a amiel abarlaka ea vio na, aṗiligv̄ilig pariparilo, aberii niegeniege Yesu liki, nalo aberinavo <sup>40</sup> "¡A! Jau m̄a na, nanua m̄a kober komijikia kala bulag Atua Kunuano Lu, ka mia bogoti ve tolu ana koivon kar vavin bereio, mia jum̄abe naruei? ¡Ee, mia bo ka jau kalarur kanamo meuliano vonio! ¡A verenio jau kobe Atua kenerinio riano, kataluvo den m̄akolkolo na, ana katabulu!"

<sup>41</sup> Ea bajago nene ga bunu, tomu na tortoru na kulo lu nalo naliko naverloglogiano na tuboiano nalo naliko navurim̄araboiano nalo aju abital eaio, <sup>42</sup> nalo aju aberinavo "¡Peli naio milarur tomu dolu nalo telabo rui, mia vonganei, naio maka rivare ka rilarur naio! ?Naio be kito kulo Ju nalo kiado Parinio Tubo na, ṗeli na makanio? Bo ka naio tabulu den m̄akolkolo vonganei, ka mia kito romonea naio. <sup>43</sup> Toro na naio berenio naio biekoou ea Atua, naio berenio naio be Atua Kenerinio. ¡Mo, kito reial vonio, verenio Atua jaaro kanio, mia naio rilarur naio vonganei!"

<sup>44</sup> Mia tomu juo na vinauano napano ajukukakarło ea m̄akolkolo jibe ka Yesu, naljuo bunu amil bova ka Yesu, abironkar nalo nei ka kialo ilivovaiano nalo nalikolo.

*Yesu m̄aro*

*Mak 15:33-41; Luka 23:44-49; Jone 19:28-30*

<sup>45</sup> Ana ea legiano viovare, ana melijokouo binimeĩ miununuko vio reraio, mia jo jibe na bano-o bokar m̄erenio tolu niogoravo, <sup>46</sup> mia vaataro ka bogo na, Yesu miaga jouo ea kiano iliano memedu, naio berinavo "¿Eli, Eli, lam̄a sabatani?" napano berenio "¿Kiaku Atua, kiaku Atua, ka vaio ana kojuvan lelan kiniou nojo jibe nei?"

<sup>47</sup> Mia tomu nalo nei tai ajua vio na, nalo aju abitii vite nalo na malmaluvo, nalo amijog belia Yesu miaga jibe nei, nalo aberenio "Toro na naio jo bio tormoruo Elaija, ka rimeĩ rijai naio." <sup>48</sup> Mia soṗeli ga, nalo tai jikiti binimeĩ, midu burujumu tai, miyon marjurn̄elm̄el̄u na mijeja ban eaio, julu kario ka iesi tai, ana jianio ban Yesu ka rimunuio. <sup>49</sup> Mia kulo dolu nalo aberenio "¡Ei, jau koto vo! Reial vonio, ṗeli mia tormoruo Elaija rimeĩ rilarur naio bo, ṗeli na mia rimeĩ re."

<sup>50</sup> Karina Yesu miaga jouo bereio, naio buru maaria kanano jegi, ana juvan niununo bano, ana mo naio m̄arodobi liki.

<sup>51</sup> Monloglog ea bogo nene ga, jagidago na ea Atua Kunuano Lu, napano joko vio lu na be vio lu laka, naio buruṗe tivelinio juo, jikario mave batove boru yetano. Mia m̄ii mukulkulu ka borotano, ana puruveru nalo na tortoru aburubovelo, <sup>52</sup> mia ea pakeltavo, martanbo telabo na tomu nalo na memedu nua ajuvavo, mia tomu nene nalo amemeul bereio. <sup>53</sup> Ana amolmoluo den salo m̄artanbo, mia iorou ka bogo na Yesu bunu meul bereio ea nam̄ariano, nalo nei amiel aban ea bulukomeli lu na Yerusalemo, naruei tomu telabo amialo.

<sup>54</sup> Naruei kulo na mira nalo, naliko kialo toro na toru, napano aju abititar Yesu, bogo na amijog m̄ii mukulkulu, nalo amial vite nalo na amalmaluvo, nalo amerou toru, amemebiju, ana nalo aberenio "¡Aue, tomu nalo, toro nei be Atua Kenerinio riano ga!"

<sup>55</sup> A tire nalo telabo ea vio na, nalo ajikili aju koalabo, aju abitivitii Yesu. Nalo na, nanua ajaluvo Kalele rui, ajun̄a ajakisor Yesu bano-o, a nalo ajun̄a amiija naio. <sup>56</sup> Ana iviso ka tire nalo nei, tolu nene tai be Mere tira re Maktala, a Mere napano Yemesi naio Yoseve kenielo, a tira napano Sepeti kouano.

*Yoseve jivin Yesu*

*Mak 15:42-47; Luka 23:50-56; Jone 19:38-42*

<sup>57</sup> Naruei toro tai na vio Arimatea naio jo, napano naio be Yesu kanano naia-gagoano, a naio be toro na sanibaiano, siano Yoseve. Naruei bogo napano vaataro ka m̄erenio rivatove, <sup>58</sup> naio ba jikili jukamu ka Pailat mirano, ana naio bika Yesu mokotenano. Naruei Pailat berii ka kiano kulo na mira nalo ka adu Yesu mokotenano rivan naio. <sup>59</sup> Ana Yoseve naio midu Yesu mokotenano, mijuvulukoio ka kulum̄arauo tai na miuvu bo, <sup>60</sup> ana naio midu ba joa m̄ano buluvae vou, napano aje batitigio vonga. Ana amilivlivi ka puruveru na toru nene binimeĩ, ajubonkokar buluvae nei m̄aratavo nene, ana Yoseve nalo aban bereio. <sup>61</sup> Ana Mere juo nei, tinene tena vio Maktala, naliko naljuo dolu nene, abinimeĩ ajua vio nei, ajutano memedu ka m̄aratavo na buluvae nei napano Yesu mokotenano jo joomo eaio.

*Kulo na mira nalo ajukuku ka buluvae*

<sup>62</sup> Vite nalo na amalmaluvo ea legiano na ka rila vite nonovio atu batitigio ea Legiano Lu. Mia bogoti dolu nene, napano

naio be Legiano Lu nei naruei, tomu na tortoru na kulo lu nalo naliko Varisis nalo aba ajumolu aju kamu ea Pailat mirano, <sup>63</sup> nalo aberinavo "O Pailat, kumemi numisidom numeral titai kaso beamu vo, napano kumemi numitua numisidomii kia ga toro na sibiano nei, ka bogo napano naio meul kia ga vo, ana naio jonia berkar berenio 'Torou ka legiano ve tolu, mia kiniou nemeul bereio.' <sup>64</sup> Tenene na, kumemi numisidom nuvika denso, ka jau keiila kanamo kulo na mira nalo tai avan ka atukuku ka buluvae na riva ribisi ea legiano tolu nene. Tibe nã na mia kiano naiagagoano nalo amei avinalar ka mokotenano, ana mia nalo ala sibi, averial ka tomu nalo averenio 'Naio meul bereio ea nãriano.' Verenio tibe na, mia kiano sibiano na iorou nene mia naio rivova laka, tovulu nana jukamu."

<sup>65</sup> Naruei Pailat berii kalo berinavo "Mo, bo ga, kamiu kuvuru kiaku na mira nalo tai avano, ka ala vite nonovio tibe ka na kamiu kumisidom, ka kuvitakar vio na."

<sup>66</sup> Ana nalo aba amila vatitigio puruveru nei a abijuru ka bijuru tai, ka verenio toro tai rikulkulu ka veru nei, mia bijuru nene rivurikorovio, ka mia amijikia avitilubario. Ana abar bunu kulo na mira nalo ajukuku ka vio nene.

## 28

### *Buluvae beteau jo*

*Mak 16:1-10; Luka 24:1-12; Jone 20:1-10*

<sup>1</sup> Legiano Lu barlaka, ana legiano napano binime iorou, napano be legiano moti na sude, bogo napano mērenio mijivi, ana Mere na vio Maktala, naljuo Mere dolu, abe juo aba ka aial buluvae nene.

<sup>2</sup> Naljuo aba aboru ea vio nei, soĝeli ga mii mukulkulu toru, bior Atua kiano nailiano tai molou den vio mave binime ea yetemeriba, melivlivilar ka puruveru nei, ana naio ba jotano mave eaio. <sup>3</sup> Mirano merera o-o mia, kiano kuluniabene meravo a miuvu mia miuvu kirinovo, <sup>4</sup> mia bogo na kulo na mira nalo amialio, nalo amerou kilkil bano-o mia mã amãraro yulu kano garuei aju.

<sup>5</sup> Naruei nailiano nei naio mil ban tira juo nei, naio berinavo "Kamjuo kumerou re. Kiniou nemijikia ka kamjuo kubinime nei kar ga Yesu napano ajukar naio ea mãakolkolo, <sup>6</sup> mia naio maka bunu toa vio nei, naio meul jumolu bereio ruei, jibe kano napano naio berkarjo jukamu. Kamjuo kumei kuvial vio napano nanua mokotenano mon eaio. <sup>7</sup> Naruei kuve juo

kuvan soĝeli, kuverialio ka kiano naiagagoano nalo ka naio meul bereio den nãriano. Mia vonganei, naio tukamu rivatove Kalele, mia kamiu kuviniu kuvatove bunu kuvial naio ea vio na. Ninei naruei be kanaku iliano ban kamjuo."

<sup>8</sup> Naruei naljuo ajuvan buluvae, amila soĝeli aba. Naljuo abano jibe ka napano amerou kia ga vo, mia ajaaro toru bunu. Naruei abe juo ajikiti aban ka averial lilianniano nei ka kiano naiagagoano nalo, <sup>9</sup> mia naljuo aju aba kia ga jibe na, ana abitavo bija Yesu. Amiilo binvinlo garuei, ana naio mil banlo berinavo "Kavijo bo." Naruei naljuo aba aminie yetano ka Yesu jaano, ana abe juo abokar jaano, ana amilotu kanio. <sup>10</sup> Naruei Yesu berii ka naljuo nei, berinavo "Kamjuo kumerou re. Kuve juo kuvan bereio kuverialio ka kuruaku nalo ka mia nalo ava Kalele, naruei ea vio na mia nalo amijikia aial kiniou."

### *Kulo na mira nalo aba aberialio vite nalo nei*

<sup>11</sup> Bogo napano tira juo nei aban bereio ea naiagagoano nalo, naruei kulo na mira nalo teal aban bereio Yerusalemo, aberial vite nalo na amalmaluvo ka tomu na tortoru na kulo lu nalo. <sup>12</sup> Naruei kulo lu nalo nei aba vio takurano naliko navurinãraboiano nalo, aberii vite nei bano-o, bisi na abironikar ka abar veru toru ban kulo na mira nalo nei, <sup>13</sup> ana nalo amil jikili banlo, aberinavo "Kamiu monokanio kuva kuverialio ga ka tomu nalo, kuverinavo 'Kiano naiagagoano nalo ga abinime bogiano, bogo napano kumemi numitua numonmelio, naruei nalo abinalar ka mokotenano, amidu abano.'" <sup>14</sup> Aber kalo bunu, aberinavo "Verenio iliano na tenei riva rivoru ea Pailat, mia kumemi nuva nuvila vatitigio vija naio, mia kamiu kuvijog re bunu iliano tai."

<sup>15</sup> Naruei kulo na mira nalo nei ajaaro ka veru nei, ana abario naruei, ana nalo aba amila ilisibiano janea vio jibe ka na aberii kalo, mila ana Kulo Israel nalo ajunã aberver iliano nei binime bokar banei.

### *Yesu binime ea kiano naiagagoano nalo*

*Mak 16:14-18; Luka 24:36-49; Jone 20:19-23*

<sup>16</sup> Naruei naiagagoano duelimo ba tai [11] abatove Kalele, ea burusuku na Yesu berii kalo, <sup>17</sup> mia bogo na nalo amial naio nalo amilotu ka naio, mia nalo teal ajidom dede ga ka be Yesu ũeli na maka ve naio. <sup>18</sup> Naruei Yesu binime

vaataro kalo, ana naio berii kalo, berinavo "Atua mijamo ka vite nonovio jua jumñaku, napano mave a na vio yetemeriba nei bunu, ka mia kiniou neje tuboiano kalo. <sup>19</sup> Tenene na, kiniou nemiila bulag kamiu naruei, ka kamiu monoka kuvan ea mñatatoko nalo ea vio yetemeriba reraio, monoka kamiu kuvurulo amei ave kiaku naiagagoano nalo, napano kuvaruei ealo ea Teta, Kenerinio a Niununo Lu sialo, <sup>20</sup> a napano kamiu kuverlogloglo ka mia ajogkar iliano nalo napano kiniou neber ka kamiu ruei. Mia monokanio kamiu tiniemiu rimaio ka tulaka ka na mia kiniou noto kitoliko danñariga, rivano-o rivokar juluvati na yetemeriba. Mm."

## Yesu Kristo Kiano Ioluanu Vou Napano MAK Bivitauiiao Verialiano Moti

*Tukunu bulati na niosi nei*

Niosi nei Yesu Kristo Kiano Ioluanu Vou napano Mak Jirio Iliano nei naio berinavo ioluanu vou nei, napano be Yesu Kristo kiano Ioluanu Vou, Atua kenerinio. Mak jiloglog napano Yesu be toro na in̄auano, a moroano joa kiano iliano. Kito romjikia roial kiano moroano ea bajago nei napano naio jo berloglogii tomu nalo, a napano mijie moroano ka rijilbulag siñaro, a ka ridu bulag tomu nalo kialo kariano. Yesu berial ka naio be Kulorinio Kenerinio napano binime i ka sian kiano meuliano ka ridu bulag tomu nalo kialo kariano, ka rila lo ajev ioruriano. Mak berii Yesu kiano vremesiano nalo liei jovulu napano naio berii kiano iliano nalo.

Ea niosi nei, beamu Mak berii Jone Baruei a kiano in̄auano, bija napano Jone baruei ea Yesu. Iorou naio berii napano Siñaro mila von Yesu. A iorou ka iliano bulati nei, naio judu ka berii Yesu kiano in̄auano napano naio jo mila tomu nalo napano amie amijog bo bereio, bija napano naio jo berloglog tomu nalo. Bogo na Yesu jo mila kiano in̄auano nalo, bogo nonovio kiano tomu nalo aju amijikia naio liei. Mirano maariano nalo na niosi nei aberii Yesu kiano meuliano ea kiano sude maaro ea yetemerba nei, a vite burtumoruo napano naio berenio, nina kiano m̄ariano, bija napano naio meul bereio.

Ea mirano duelimo ba ari [16] tomu miroano amonea aber Mak bivitauiiao tukunu maaro ea togio arolu [8] ga mia torogio iorou kano, toro dolu tai bivitauiiao.

*Tukunu nalo na ajua niosi nei*

Jone Baruei kiano in̄auano 1:1-13

Yesu kiano in̄auano yako Kalele 1:14—9:50

Yesu jaluvo den Kalele ban yako Yerusalemo 10:1-52

Yesu kiano sude maariano napano mila kiano in̄auano yako Yerusalemo a ea vio nalo jelviv kean Yerusalemo 11:1—15:47

Yesu meul bereio 16:1-8

Yesu miyotuba kean kiano tomu nalo bija naio havin ea Tiniabene 16:9-20

*Jone Baruei naio joa vio yauo, naio berial Atua kiano iliano*

<sup>1</sup> Niosi nei, naio be Ioluanu Vou na Yesu Kristo kiano, Atua kenerinio. <sup>2</sup> Tukunuano na ioluanu vou nei naio jikario bija Jone Baruei, jibe napano Atua kiano Iliano Lu berii nuanua ruei, ea iliano tai napano naverialiano Aisea berialio, napano Atua naio berenio, berinavo

*“Naio be toro tai na ridu kiaku iliano, napano kiniou nemiila naio biedu jukamu kaso, ka rila vatitigio kiamo m̄arabo nalo ameravo rivu. Mal 3:1*

<sup>3</sup> *Mia naio joña bio ea vio yauo, berinavo “Kamii kuvila vatitigio m̄arabo nalo na Tubo Atua kiano, nalo amemedu rivu, ka naio mijikia rieliel ealo, naio ri-maluvo ea kenemiu meuliano nalo!” Ais 40:3*

<sup>4</sup> Jibena naruei, Jone Baruei naio miyotuba ea vio yauo ea tanobuku na Yutea, ana naio jo mioliolu ka Atua kiano iliano ban tomu nalo. Naio berial banlo berinavo “Kamii monokanio kuvilig kamii rivior kenemiu kariano nalo, a kumei, ana mia navaruei ea kamii ka uei, naruei mia Atua riviekokoa kamii riviorio.” <sup>5</sup> Mia tomu telabo laka yako Yerusalemo a ea komeli dolu nalo na ea tanobuku na vio Yutea, nalo aban ka aiagago ka Jone, naruei nalo ajuña aber bulag kialo vovaiano nalo ban Jone ana naio baruei ealo ea marauei na Yortano.

<sup>6</sup> Mia bogo napano Jone Baruei joa vio yauo jibe na, naio mila javukia tormoruo naverialiano re nua nei, Elaija, jibe napano naio maka to riya kulumarauo novo nalo leleio, m̄ano kulukoti abie bija vijinio temeul na toru tai ga kamel, mia miorikar m̄ano kulukoti nene bija niati kulubue marauo ga. Mia sano sinaniano ea vio yauo nene, be surubu nalo ga bija vite sese nalo nei napano jago deden miñaukanio. <sup>7</sup> Ana Jone berkar ban tomu nalo, berinavo “Mia toro tai, napano kiano moroano loa kiniou, naio mia takisor kiniou rime. Toro nene loa ka kiniou, mia kiniou maka navare ka nomon korkor neialar kiano kulubue, p̄elina nala in̄auano dolu tai na jibena van naio. <sup>8</sup> Kiniou nabaruei ea kamii ea uei ga, mia naio rivaruei ea kamii ea Niunuru Lu.”

*Jone naio baruei ea Yesu*

*Mataiu 3:13-17; Luka 3:21-22*

<sup>9</sup> Mia maka vesiou, Yesu juvan komeli nei Nasarete, ea tanobuku na Kalele, binime ea vio na ea marauei nei Yortano, ana Jone baruei ea naio ka uei nene.

<sup>10</sup> Bogo napano Jone baruei ea Yesu bisi, Yesu binime mave, jaluvo den uei, mia vaarakurano ga tiniabene betavo, ana naio

mial ka Niununo Lu jo batove jibe ka vaama tai napano binimey etano, bujo joa naio. <sup>11</sup> Ana amijog Atua na tiniabene nei mil batove, berinavo

“Jau kobe keneriku novokario ga takurano na, a tinieku jiiso toru.

Kiaku jidomiano joaso, kiniou najaaro toru kaso.”

*Siñaro mila von Yesu*

<sup>12</sup> Ana ea bogo nene bunu, Niununo Lu buru Yesu naio takurano ban lie ea vio yauo, <sup>13</sup> ana Yesu joa vio na ba bokar bogoti duelimo va veri [40] napano bogo nonovio Siñaro jomña mila von naio laka. Yesu naio jo bija tededen nalo ea vio nene, mia Atua kiano nailiano nalo abitkar naio.

*Yesu naio jikar kiano imāuano yako Kalele*

*Mataiu 4:12-17; Luka 4:14-15*

<sup>14</sup> Mia iorou, abinimeī abokar Jone Baruei, ana abuku naio ban ea yimo na lakoiāno. Mia Yesu mijog liliāniano nei, karina jaluvo den vio nei, naio ba batove bereio ea tanobuku na vio Kalele, ana jikar ea bogo na, naio jo mioliolu ka Atua kiano Ioluano vou. <sup>15</sup> Bogo na naio mioliolu, jo berinavo “Vonganei, Atua mila ka kenemiu bogo memedu ka kuvilig kamiū naruei. Atua kiano navenatuboiāno jo binimeī ea kamiū naruei, mia vonganei monokanio kuvilig kamiū a kumonea Ioluano Vou nei.”

*Yesu bio tom veri na aburu niado*

<sup>16</sup> Iorou kanio, ana na Yesu jomña mieliel ea baramudou na burumāra ueiyabo na Kalele, mial tomjuo, namña aburuvurua niado, be Saimon bija kuruano Andru, napano naljuo aju aburu kialo levlevi. <sup>17</sup> Ana naio ber kalo abe juo, berinavo “Kamiū kumei kuvitakisor kiniou. Mia kiniou nala kamiū kuve tomu nalo na avuru tomu nalo ameī ave kanaku tomu nalo.”

<sup>18</sup> Mia vaarakurano ga, naljuo ajuvan kialo levlevi, ajakisor Yesu. <sup>19</sup> Karina Yesu miel ba lie kija, ana mial Sepeti kenerinio abe juo, be Yemesi naio kuruano Jone. Nalo aju ajutano joomo ea kialo uako ana nalo abe juo amila batitig kialo levlevi. <sup>20</sup> Mia bogo napano Yesu mial naljuo nei, naio bio naljuo, ka atakisor naio bunu, mia ajuvan karamālo Sepeti joa uako bija kialo tomu nalo na imāuano, ana naljuo ajakisor Yesu.

*Yesu mijil lar niununo va tai*

*Luka 4:31-37*

<sup>21</sup> Ana Yesu nalo amiēl abe abokar mārkomeli na Kapeneam, a ea Legiano Lu, nalo aba joomo ea yimo na volkouano, ana

Yesu jo berloglog tomu nalo ka Atua kiano Iliano Lu. <sup>22</sup> Mia nalo napano amiagago nalo amiilo laka, bior nalo amijog Yesu kiano verloglogiano maka tibe ka kialo naverloglogiano dolu nalo, bior napano Yesu kiano temi vatitig bo, ana Atua kiano moroano joaio. <sup>23</sup> Ana ka bogo na, toro tai napano niununo va joaio, naio jo naliko, <sup>24</sup> ana mila toro neibano miaga va souo, naio mil ban Yesu berinavo “? Yesu re Nasarete, kiamo venia jua kumemi? Peli na jau kobinimeī ka kala lelan kumemi, a! Kiniou namijikiaso ruei, ka jau kobe kirinovo, kobe Atua kiano Tolu tai.”

<sup>25</sup> Mia Yesu mil kirisikili ban niununo va neibano, joko vio ka naio, berinavo “E! Jau keil re! Jau kataluvo den toro na vonganei ga!” <sup>26</sup> Mia niununo va neibano naio mila kema neibano naio miaburusalsal, ana naio miaga souo vaarakurano bereio, naruei naio moluo den naio ana buro bano.

<sup>27</sup> Mia tomu nalo na vio na amiilo laka, nalo ajumña aberverii Yesu, aberinavo “?E jumñabe nei? ?Verloglogiano vou tai bereio nei, p̄eli venia na? Toro na, kiano moroano kirisikili laka na, naio mil ga ban niununo va nalo, nalo amijogkar naio.” <sup>28</sup> Kar vite nalo na naruei nalo ajaaro, ana nalo ajumña aber vatitig Yesu siano novo ban ea vio nonovio ea tanobuku na vio Kalele.

*Yesu milarur Saimon Pitere koano kenienio bija tomu telabo dolu nalo bunu*

*Mataiu 8:14-15; Luka 4:38-39*

<sup>29</sup> Mia Yesu naliko tomu nalo nei, Yemesi bija Jone a Saimon bija Andru, nalo abatavio ea yimo na volkouano mia nalo aban ea Saimon naio Andru kunualo, ninei ea mārkomeli na Kapeneam kia ga vo. <sup>30</sup> Naruei ea mārataravo nene, Saimon kenieno simeni, naio mie mña niabene bituvitunu na naio jomña mon ea ga mñano jogu, mia nalo aberial ka Yesu. <sup>31</sup> Ana Yesu naio binimeī bokar tiramoruo neibano jumñano, naio burular naio jumolu, jotano ea mñano jogu, ana niabene minini bereio, mia naio jumolu ju, ba borosebi salo. <sup>32</sup> Ea kijev na legiano nene, bogo napano Legiano Lu bisi, bogo na m̄erenio batove ruei, mia tomu nalo abarvar tomu nalo na amie bija nalo na siñaro nalo abujo ealo abinimeī ea Yesu. <sup>33</sup> Mia tomu nalo miroano laka, jibe ka napano vaataro ka tomu nalo na mārkomeli neibano abinimeī amivinkakarlo vatitig ea mārataravo na yimo neibano, vio telisu. <sup>34</sup> Mia Yesu naio milarur tomu nalo miroano na amie ka mieiano ninio nalo, naio mijil bulag siñaro miroano den tomu nalo, naio joko

vio ka siñaro nalo neibano ka nalo aver re titai leleio, ka napano nalo amijikia ruei ka naio be Naverikariano riano.

*Yesu mioliolu reraio ea tanobuku na vio Kalele*

*Luka 4:42-44*

<sup>35</sup> Mia ea vio niogoravo, bogo na tu naio maka tokokoreko vo, ana Yesu naio jumolu jaluvo den yimo, mia naio ban ea vio tai napano vio melumu bo laka, mia naio rivolkouo rivan karamāno. <sup>36</sup> Ana iorou, tomu nalo abinimei ka naio ea yimo bereio, mia Saimon nalo maka bunu aial naio, mia nalo aban ka asiravo naio. <sup>37</sup> Nalo ajiravo naio bano-o, nalo amilealio ea vio nei, mia nalo aber ka naio, aberinavo “Tomu dolu nalo miroano abinimei kaso, mia nalo aju ajiragso.”

<sup>38</sup> Ana Yesu berdoŕe banlo, berinavo “Riano, kiniou nemijikia na. Mia makanio, kito monokanio ravan lie ea m̄arkomeli dolu nalo napano aju kia vo, ka mia kiniou nemijikia noioliolu ka ioluano vou nei ea vio dolu nalo bunu. Ka tena naruei, kiniou najaluvo yako nebinimei ea vio nei biorio.”

<sup>39</sup> Mia Yesu naio ba mieliel ea vio nonovio na Kalele, na naio jo mioliolu ea yimo na volkouano na kulo Ju nalo kialo, a jo mijil bulag siñaro telabo den tomu nalo.

*Yesu milarur toro tai na menko burumieni jua niabene, binimei bo bereio*

*Mataiu 8:1-4; Luka 5:12-16*

<sup>40</sup> Mia toro tai napano bokar menko burumieni naio binimei ea Yesu, naio minie tano keanio, naio bika kirisikili denio, berinavo “Neber bo, ver jau kojamo ka ga, kiniou nomonea ka jau komijikia kolarur kiniou, nomeravo bereio.”

<sup>41</sup> Mia Yesu tinien miia naio laka, ana naio maka river mirou ka tokolio ka kiano mieiano, mia naio midu jumāno joa naio, ana berkanio “Kiniou nemijamo; voniganei niabemo monoka rimeravo.”

<sup>42</sup> Mia vaarakurano ga menko burumieni neibano naio jaluvo den toro nei niabene, naruei naio meravo bereio. <sup>43-44</sup> Mia Yesu jutua naio, berinavo “Jau komijog, jau kava koververii re tenei van tomu nalo vo, a voniganei ga jau kova kosel ea toro lu ka naio mijikia rivitii veve niabemo. Karina jau komijikia kava kala lotuano van Atua vija koisebi bunu ga sida ka meravoiano nei napano m̄a Mosis naio berenio, napano toro monoka rilao bior vite na jibena. Karina iorou ka nina, toro lu naio mijikia riverialio ka menko burumieni nei naio biniu ruei.” Ana Yesu miila toro neibano bano.

<sup>45</sup> Ana bogo na toro neibano naio bano, mia naio ba jo berii tenalo neibano ka tomu nonovio, mila na iliano neibano ban ea vio nonovio, bano-o napano mila Yesu naio maka bunu rijikia ka riel ka riva joomo ea m̄arkomeli nalo, ka ver naio rivano, tomu ve miroano laka amei ka naio. Naio jojo tavio ga ka vonuo, mia tomu nalo amalmaluvo ea kialo vio nonovio kiavo, nalo abinimei eaio.

## 2

*Yesu naio mijikia riviekokoa kariano*

<sup>1</sup> Ana bogoti nalo tealoo abarlaka ruei, ana na Yesu naio ban bereio ea m̄arkomeli napano Kapeneam, a maka ve kirisio, mia tomu nalo amijogial ka naio binimei bereio ruei. <sup>2</sup> Ana nalo miroano abinimei ea Yesu, mia joomo ea yimo neibano naio bujomagmago kalo, a tavio ea m̄aratavo bunu, vio telisu ga. Mia bogo napano aju vio takurano jibe na, ana na Yesu mioliolu ka Atua kiano iliano lu banlo. <sup>3</sup> Mia ea bogo nene, tomu nalo aŕier nalo tai napano naio mie binimei, napano niabene nonovio m̄aro. Mia nalo veri aŕier ea ga m̄ano jogu, napano naio jo monmoneaio. <sup>4</sup> Mia bogo napano abinimei abokar vio neibano, amial ka vio nene teliki laka, mia nalo maka ajikia adu kialo bilbilu nei rivan vaatara ka Yesu.

Naruei nalo aŕier abavin ea yimo mave, ana nalo amuedulu vodobi loglog vio napano Yesu naio jo memedu kanio yetano, ana ajuvarvan toro nei batove bija m̄ano jogu batove ea buluvio, batove joomo ea yimo. <sup>5</sup> Mia bogo na Yesu mial vite nei, naio mijikia ka tomu nalo nei amonea naio kirisikili laka, ka mia naio rijai toro neibano mie nei, mia Yesu ber ka kema neibano mie nei berinavo “Keneriku, kiniou nebiekokoa kiamo kariano nalo.”

<sup>6</sup> Ea bogo nene tomu nalo tai tena naverloglogiano na tuboiano, nalo bunu ga aju, mia nalo amijog Yesu kiano iliano. Ana kialo jidomiano jo miriñau bova ka vite nei, <sup>7</sup> nalo aju amil niege naio, aberinavo “Jum̄abe ana toro nei naio mil mila bulag Atua siano lu jibe na? Atua naio takurano ga naio mijikia riviekokoa kariano, maka bunu toro dolu tai bereio, ana kema nei naio jo mil jibe ka naio jo jidomii ka beriañā naio be Atua naruei.”

<sup>8</sup> Mia vaarakurano ga Yesu naio mijoglubar ea naio mijikia ka tomu nalo neibano aju ajidomii va jibe na ka naio, mia naio ber kalo berinavo “?Ka vaio ana kenemiu iviso bujo ka jidomiano va nalo na jibe na? <sup>9</sup> A ver kiniou never tibe nei ka namieiano nei neverinavo ‘Kiniou

nebiekokoa kiamo kariano' ħelina kiniou never kanio, neverinavo 'Jau kotumolu, kojuku nřamo jogu ana keiel,' ana ea iliano juo nei, tai naio jikili ka averenio, ana tai naio monmaio ga ka averenio. Ana naina berinavo 'Kotumolu keiel,' naio jikili bior ka kamiu kuvijikia kuvitilubar kiaku iliano nei naio be riano ħelina naio maka rive riano, ka toro nei naio tumolu ħelina makanio. <sup>10</sup> Mia vonganei, kiniou noimřauka titai napano mia kamiu kuvisidomii kuver Atua ga takurano naio mijikia riřaukanio, ka mia kamiu kuvijikia kuvitilubar ka kiniou Kulorinio Kenerinio, kiaku moroano bare ka noviekokoa bunu kariano na yetemeriba nei. Kamiu kuviagago vatitigio."

<sup>11</sup> Ana na Yesu mil ban namieiano nei, berinavo "Kiniou neber kaso, jau kotumolu, kojuku nřamo jogu, keiel kava vonuo."

<sup>12</sup> Mia kirisofeli ga ea tiniobi miralo napano aju amialio, toro neibano naio jumolu ana na naio mijuku nřano jogu, ana miel ba tavio ba vonuo.

Bogo na tiniobi neibano amial tenei, mia nalo amiilo toru, abamenea Atua, aberinavo "Koig, kito maka lele reial titai tibena ea kiado meuliano, mia banei ga."

*Mataiu, napano abio bunu ka Livai, Yesu bijauia lario ka rimeit takisor naio*

*Mataiu 9:9-13; Luka 5:27-32*

<sup>13</sup> Mia Yesu batove tivelinio bereio ea burumřara ueiyabo neibano, mia tiniobi nalo abinimeit vio takurano aju jeliviv eao, naio berlogloglo. <sup>14</sup> Karina, naio mieliel ba lie, mia naio mial toro tai jotano joa kiano vajoomo na imřauano ea yimo na abarivar bijii veru na takis. Toro nene, be Livai, Alveas kenerinio. Ana Yesu bio naio berinavo "Komei kotakisor kiniou," mia soħeli ga Livai naio jumolu ana jakisor Yesu. <sup>15</sup> Karina, Yesu ba jinano ea Livai neibano kunuano, mia ea bogo na, tilikiti na tomu dolu nalo na abarvar bijii takis, bija tilikiti na veribinio dolu nalo, nalo bunu abinimeit ajutano burukuti bija Yesu naliko kiano naiagagoano nalo, bior napano bogo nei, tomu ninio ga aju jakisor Yesu. <sup>16</sup> Mia tomu na verloglogiano na tuboiano tealo, napano nalo abe Varisis, nalo amial ka Yesu naio jořna jotano burukuti bija tomu nalo na jibena, ana nalo abika den naiagagoano nalo aberinavo "?Kar vaio ana kenemiu naverloglogiano naio ba jořna jinano burukuti jibena bija tomu veribinio nalo na?"

<sup>17</sup> Mia Yesu naio mijog iliano nei, mia naio berdoħe berenio banlo, berinavo "Nalo napano mokotenalo kirisikili bo, nalo maka asidom ka ava aial toro narřa

mieliel ka namieiano nalo, mia namieiano nalo ajidom mřelea naio. Kiniou maka nemei ka novio tomu nalo na aber nalo amemedu ruei ea Atua mirano ka nalo atakisor kiniou, mia kiniou nebinimeit ka tomu nalo na abova ajibe ka tomu nalo nei naruei."

*Vikadeniano tai ea tivelinio na veliano na sinaniano*

*Mataiu 9:14-17*

<sup>18</sup> Naruei ea bogo nei, Jone Baruei kiano naiagagoano nalo bija Varisis nalo ajuřna abokar bajago na veliano na sinaneano ka nalo abolkouo ban Atua. Ana tomu nalo abinimeit ea Yesu, mia abika veve denio, aberinavo "?A juřabe? Jone Baruei kiano naiagagoano nalo abel ka sinaneano kařna abolkouo, a Varisis nalo kialo naiagagoano bunu ga amila jibe na, ana juřabe na jau kiamo naiagagoano maka atuřna alaio?"

<sup>19</sup> Ana Yesu berdoħe banlo, beriit naio naliko kiano naiagagoano nalo jibe kanio napano nalo ajaaro toru laka bogo napano naio jo naliko, mia nalo ajog rivova iorou ka bogo napano mia naio taluvo denlo, ana berinavo "?Bogo napano toro na naio joro jo kia ga vo ea jokoluolu naliko kiano bilbilu nalo, kamiu kuberiarřa amijikia atavan sinaniano na jokoluolu? Maka leleio. <sup>20</sup> Mia bogo tai navo, ver bogo tai toro nei kiano uolu tai ameit avurular naio den kiano bilbilu nalo, ea bogo na naruei mia kiano bilbilu nalo amijikia aveli ka sinaniano, bior napano nalo tiniel miia naio laka."

*Vite moruo a vite vou*

<sup>21</sup> Bajago na veliano na sinaneano, naio be bajago moruo tai na kulo Ju nalo kialo lotuano, mia Yesu naio jidom rila rimeravo vanlo ka bajago moruo na jibe na, nalo maka ajikia aveverare rivija vite vou nalo napano naio jořna berlogloglo kalo. Ana naio ber jamerijiano tai tivelinio kalo, naio berinavo "Kito maka rejikia rodu niati kulumřarauo napano be terivou, ka rotuluko ka kulumřarauo moruo tai ka toko bulukuti vio na buruħe eao. Bior napano niati kulumřarauo vou nei naio mijikia rila korov kulumřarauo moruo na togio, ana mia bulujeleigio mijikia rimeit ve toru lievo.

<sup>22</sup> "Ana mřarjuřmelřelu vou napano naio jořna jarabujo kia ga vo, maka rojikia roisonio rivan ea kulukuti nani napano be terimoruo, napano amison mřarjuřmelřelu ban ea vatelabo ruei. Verenio jau kala tibe na, mia mřarjuřmelřelu nene riyukuio, rila kulukuti nani nei saburu, mia mřamo mřarjuřmelřelu riou bulugio ana bauei nene rimeit rivova bunu. Mia



m̄narjūm̄l̄m̄lu vou, jau monokanio koi-sonio rivan ea kulukuti nani napano be terivou bunu, jikili bo, naruei na jau komijikia kodu batitigio to vesiuo.”

*Yesu be tubo ka Legiano Lu  
Mataiu 12:1-8; Luka 6:1-5*

<sup>23</sup> Ana ka legiano tai bereio, napano naio be Legiano Lu, Yesu naliko kiano naiagagoano nalo amiel abano, mia kialo m̄narabo ba jel bure tiniavio na subavio. Nalo amiel jibe na, naruei naiagagoano nalo jijerlo ana amikiti kokorov subavio nei m̄arati tealo ana ajenio. <sup>24</sup> Nalo ajum̄ia amila jibe na, naruei Varisis tealo ajua vio na, napanoaju abitii Yesu nalo, naruei nalo aber ka Yesu, aberinavo “Ai, kal kija! Kiamo naiagagoano naloaju amila jum̄iabe na, mia nalo maka ajikia ala im̄auano na ea Legiano Lu, ver tibe na nalo ajum̄ia amila korov kiado tuboiano na.”

<sup>25</sup> Ana Yesu berdoḗe banlo, berinavo “?Peli kamiu maka kuvuluku Iliano Lu bogo tai bo, napano berii vite nalo napano Parinio Tubo Teviti na nanua naio jom̄a milao? Naio naliko kiano tomu nalo, nalo jijerlo m̄lele, <sup>26</sup> ana naio ba joomo ea Atua kiano vio lu, ana naio midu joko lu napano tuboiano ber kulo lu ga amijikia asenio, mia Teviti nalo nei ajenio. Ana Abieta, napano naio be parinio toro lu ka bogo na, naio mijamo ka banlo ga. <sup>27</sup> Kiniu neber ka kamiu, neber kiado tuboiano nalo maka ka atutua niegeniege kito bereio. Jibe na, Legiano Lu naio maka ve tena rila bulag kiado meuliano bereio, mia naio be tena ka rijai kito. <sup>28</sup> Mia kiniu nebe Kulorinio Kenerinio, a naio be tubo ka vite nonovio, naio naruei be tubo ka Legiano Lu bunu. Mia naio ga mijikia river venia napano ramijikia rala ea Legiano Lu, ḗeli venia na maka rimemedu ka kito ralaio.”

### 3

*Yesu milarur jumevuluku ea Legiano Lu  
Mataiu 12:9-14; Luka 6:6-11*

<sup>1</sup> Ana ea Bogoti Lu tai bereio, Yesu naio ban bereio ea yimo na volkouano, mo na ka bogo nene, jumevuluku tai naio jo joomo bunu napano naio jum̄iano buluku. <sup>2</sup> Mia Varisis tealo napano tiniel jer Yesu ruei, naloaju vaataro ka ga Yesu ea bogo neibano, nalo ajum̄ia miralo jua ga Yesu ka ajidom aleal bajago va nalo eaio Yesu.

Naruei nalo ajidom ka aial von ka ver Yesu rilarur kema neibano ea Bogoti Lu nei ḗeli mia rila re. <sup>3</sup> Mia Yesu naio mil ban kema neibano, berinavo “Jau kotumolu, komei mave nei beamu vo.” <sup>4</sup> Ana Yesu bika den tomu nalo naaju, berinavo “?

Kiado tuboiano naio berinavo kito romijikia rola venia ea Bogoti Lu? ?Naio bo ka kito reim̄auka tena bo, ḗeli na bo ka kito reim̄auka tena bova? ?Peli na naio berinavo bo ka kito ralarur tomu nalo, ḗeli na bo ka kito rouebinvino?”

Mia tomu nalo neibano maka leleio aver iliano tai bereio. <sup>5</sup> Naruei Yesu jirarag jeliviv ealo, napano naio mial miralo nalo kirisikili ga, mia naio mijog bova toru biorio a naio tinien jerlo. Naruei naio mil ban kema neibano bereio, berinavo “Kala von ka kovitirii jum̄iamo beamu vo,” mia ea bogo na ga toro na mila jibe na, jum̄iano binimeio bo bereio.

<sup>6</sup> Mia Varisis nalo nei abava tavio, aban memedu ga abiviuo vio takurano bija Parinio Tubo Erot kiano tomu nalo, ka nalo alavon ka aleal m̄narabo ka amijikia auebin Yesu rim̄aro tum̄abe.

*Tomu telabo abinimeio kar Yesu*

<sup>7</sup> Ana Yesu naliko kiano naiagagoano nalo ajaluvo denlo abatove bereio ea burum̄ara ueiyabo, mia tomu nalo miroano ajakisorlo abatove. Tomu nalo neibano, tealo abinimeio ea vio dolu nalo tealo ea vio nei Kalele, <sup>8</sup> ana nalo tealo abinimeio rove yako ea vio Yutea bija kiano m̄arkomeli nei Yerusalemio, mia tealo abinimeio ea tanobuku na vio Itumea, a tealo abinimeio ea vio nalo napano marauei na Yortano tivelinio bano, ana tealo abinimeio ivin ea tei napano toru laka ea komeli nalo na ea komeli juo nei, Taia bija Saiton. Nalo nonovio nei abiniu nalo amijog ruei iliano na vite nalo napano mia Yesu naio jom̄a milao, naruei nalo ajidom ka amei kanio. <sup>9</sup> Ana bogo napano nalo miroanoaju tivelinio ea ueiyabo napano ana Yesu ber ka kiano naiagagoano ka nalo averiko tauako sesa tai to, ka tomu nalo miroano laka, mia naio merou ka mia tomu nalo amei m̄a aivinkakar naio laka. <sup>10</sup> Nina bior naio milarur tomu nalo miroano napano amie amijog bo bereio ruei, naruei tomu dolu nalo na amie kia ga vo nalo ajum̄ia amila von ka aivinlo tibe na ka mia nalo bunu amijikia atokol Yesu. <sup>11</sup> Mia ka bogo nene aver niununo va nalo tai napano ajua tomu nalo tealo, bogo na amial Yesu, mia nalo monokanio avatove ka naio, nalo ajorua jaano, abio toru, aberinavo “Jau kobe Atua Kenerinio.”

<sup>12</sup> Ana Yesu mil kirisikili ban niununo va nalo neibano berburelo, berinavo mia nalo atu re aververii ka tomu nalo aver naio be kei.

*Yesu bitiri bulag kiano atevi duelimo ba juo [12]*

*Mataiu 10:1-4; Luka 6:12-16*

<sup>13</sup> Naruei iorou kanio ana na Yesu naio bavin mave ea suku nalo, ana naio bio tomu nalo tai abinimei eaio. <sup>14</sup> Bogo na nalo abinimei, naio bitiri bulag nalo duelimo ba juo [12], naio ber nalo ave atevi nalo, napano kialo in̄auano naio jibe nei, mia nalo aiel vija naio tulaka ka mia naio rilalo avar ioluanou vou avan ea vio nalo, <sup>15</sup> a mia moroano na ajil bulag siñaro nalo tualo.

<sup>16</sup> Naruei Yesu kiano atevi duelimo ba juo [12] sialo ajibe nei:

Saimon, napano Yesu midu sio vou joa berinavo Pitere.

<sup>17</sup> A Yemesi, napano Sepeti kenerinio. A Jone napano Yemesi kuruano napano Yesu midu sio vou ban naljuo nei, berinavo Boanejes, napano ber nalo abe juo atibe ka tubaal memedu, bior naljuo na niolo jaburu julaka ga.

<sup>18</sup> A Andru, a Vilip, a Bartolomio, a Mataiu, a Tomas, a Yemesi, napano Alveas kenerinio, a Tatesa, a Saimon, napano naio mila poletik die kulo Romo nalo.

<sup>19</sup> A Jutas na Kariot, napano iorou kanio, ana naio jiveluku ka Yesu ban kiano uolu nalo.

*Yesu kiano m̄aratavo ajidom aberiañia naio miavovu*

*Mataiu 12:24-32; Luka 11:14-23, 12:10*

<sup>20</sup> Ana iorou, Yesu naio binimei bereio vonuo, mia tiniobi toru abinimei ka naio bereio, ana Yesu bija kiano naiagagoano nalo amiañau kalo bano-o nalo maka bunu averio ajilimebi kija ka asinan. <sup>21</sup> Naruei Yesu kiano torogio nalo amijog ka napano Yesu naio jo miñau r̄iele jibena, a nalo amijog bunu ka tomu nalo ajum̄a amil dieio, aberinavo “Peli kema nei, naio milaluvu parinio r̄uei kovio!”

Mia Yesu kenieno bija kuruano nalo aban ka ajidom ka alavon ka avurular naio den tomu nalo nei.

*Tomu nalo na tortoru bunu aberii Yesu naio jo miñau bija Siñaro kiano moroano*

<sup>22</sup> Naruei ea bogo nene, tomu nalo na naverloglogiano na tuboiano, nalo ajaluvo den vio Yerusalemo abatove ea vio neibano, mia nalo ajum̄a amilidie Yesu ban tomu nalo ajum̄a aberial, aberinavo

“Siñaro nalo kialo Tubo Belsabel, naio ba joa toro na r̄uei,” a nalo aju bunu ga aber “Toro na naio jom̄a jitig bulag siñaro ea moroano na ga napano Belsabel juvan ban naio.”

<sup>23</sup> Naruei Yesu biolo abinimei eaio, ana na naio mil banlo ea jamerijiano, berinavo “? Jun̄abe na kamiu kuberiañia Siñaro bereio naio mijikia titiglar siñaro. Maka rijikia tibe na! <sup>24</sup> A verenio tubo tai napano kiano tomu nalo avuruburelo, napano togio atuñia aildie nalo togio, mia tubo neibano naio kiano in̄auano nalo maka rijikia atu sikili leleio. <sup>25</sup> Ana verenio ea m̄aratavo tai na nalo ajum̄a aburuburelo napano nalo togio ajum̄a ajitig nalo togio, mia nalo maka leleio ajikia atu rivu bogo tai. <sup>26</sup> A jibe na bunu ga, averenio niadu nalo na Siñaro kiano togio nalo atumolu alavon ka ajil bulag togio dolu nene, nina jibe ka moroano na Siñaro kiano maka bunu rijikia tumolu tu, kiano moroano bakovio r̄uei. Mia maka leleio, Siñaro p̄irinio kirisikili dolu ga kiana vo.

<sup>27</sup> “!Kuvijio! Verenio toro tai sidonii ka riva joomo ea toro kouo tai kunuano ka mia naio rivina ka kanano saba nalo, mia naio monoka rivar teli riorkar toro kouo nei sikili beamu vo, avona bisi ana mo naio mijikia riva joomo ka rivina ka nonovio saba nalo na be toro kouo nei kanano. Mia kiniou nojorñia nomila jibe na naruei ka toro kouo neibano Siñaro.

<sup>28</sup> “Mia kiniou neber riano ka kamiu, tomu nalo kialo kariano bija iliano va nalo nan̄ia ajum̄a aberenio, Atua mijikia riviekokoalo riviorio, <sup>29</sup> mia toro na mil bova lelan Niununo Lu naio berenio kiano in̄auano tealoo Siñaro ga naio miñaukanio, toro na jibe na naio mia maka lele rijikia rivokar viekokoano bogo tai, kiano kariano naio mia toa naio rivano-o, mia maka rijikia ribisi.”

<sup>30</sup> Naruei Yesu naio berii vatitig iliano jikili nei banlo, bior nalo naruei ajum̄a aberii r̄uei ka niununo napano joa naio, be niununo va.

*Yesu kenieno bija kuruano nalo abinimei ka avurular naio*

*Mataiu 12:46-50; Luka 8:19-21*

<sup>31</sup> Mia Yesu kenieno bija kuruano nalo abinimei amiyotuba kean naio ea bogo nei, mia nalo abinimei ajikili aju tavio ga, na amiila toru ban ka naio rimoluo rime r̄ialo. <sup>32</sup> Ana ea bogo na, tiniobi toru ajutano vaataro ka Yesu, mia iliano binimei bokario, ana nalo aberinavo “Ai, koniomo bija kuruamo bija kuviviniemo nalo aju tavio, ajidom ka ail kijaso beamu vo.”

<sup>33</sup> Ana na Yesu berdoŝe berinavo “?A kenioku nalo be kei? A nalo na abe kuruaku nalo abe kei?” <sup>34</sup> Naruei naio jiraravo bitikar tomu nalo napano ajunŝa ajutano vaataro ka naio, ana berinavo “!Kamii kuvial, nalo nei abe konioku bija kuruaku nalo, nalo nei naruei. <sup>35</sup> Bior toro napano mila jibe ka napano Atua jidomio, toro na jibe na naio be kuruaku, a be kuvivinieku, ŝeli na abe konioku ruei.”

#### 4

*Jamerijiano na toro napano bisivisii kurukuti subavio*

*Mataiu 13:1-9; Luka 8:4-8*

<sup>1</sup> Ana ea bogo dolu bereio, Yesu naio jo berloglog tomu nalo ea tivelinio na ueiyabo na Kalele. Mia tomu telabo laka napano abinimej ea naio ka bogo na, mila na naio baviv ea uako sesa tai napano joa ueiyabo nei, ana naio ba jotano mave eaio, mia tomu naloaju reraio ea baramudou uro. <sup>2</sup> Mia Yesu jo berloglog ka vite telabo ea jamerijiano nalo, <sup>3</sup> mia naio ber kalo berinavo “Kamii kuvilavon ka kuviagago vatitigio. Toro tai, ban ka rivivisii kurukuti subavio ea kiano tiniavio. <sup>4</sup> Naio jo bisivisii jibe nei bano, mia kurukuti tealo ajibirbili vaataro laka ka ikiŝarabo tivelinio. Ana iorou, menu nalo abinimej amikiti bulaglo bereio.

<sup>5</sup> “Mia kurukuti tealo ajibirbili ea vio na be tabaver yetano, mia ea vio na maka tano rimerorolu napano rivu mave, mila na nalo amiluo soŝeli. <sup>6</sup> Mia bogo na mŝerenio mijivi ana naio junulo ana soŝeli ga amekekeu ka bati nalo maka avatove vatitigio.

<sup>7</sup> “Mia nalo tealo ajibirbili ea vio tai na beamu maka ate bulag vatitig teli va nalo na beve niononoti ealo, mia iorou teli neibano miluo toru bereio, ana naio misoveko kialo tivoviano nalo bano-o aŝarararo, mia maka ave mŝarati nalo.

<sup>8</sup> “Mia kurukuti dolu tealo bereio, ajibirbili ea borotano novo tai, mia nalo amiluo bo, bano-o ajarako abar mŝarati nalo. Tealo abar mŝarati abokar duelimo va rolu [30], nalo tealo abokar duelimo va ari [60], mia nalo tealo abokar toromomou takurano [100].”

<sup>9</sup> Mia Yesu naio berkalo berinavo “Kamii kubiniu kube burutiliniemi, bo ka kamii monokanio kuvijogkar kiaku iliano nalo.”

*?Ka vaio na Yesu jo mil jelia jamerijiano nalo?*

<sup>10</sup> Ana iorou kanio tiniobi nalo abanvan bereio, ana na Yesu jo naio takurano ga, naruei tomu nalo napanoaju bija naio bija

kiano naiagagoano nalo, abinimej abika den naio aberinavo “Vaio naruei naio be nioti na jamerijiano na? Mia ka vaio ana jau kojomia komil jibe na, a koberloglog tomu nalo jamerijiano nalo?”

<sup>11-12</sup> Ana Yesu berdoŝe banlo, berinavo “Kiniou nojomia neberloglog ka jamerijiano nalo na bior abe veribinio laka. Nalo ajibe ka, ajunŝa amila iliano tai na naverialiano Aisea nua binimej maluvo, napano naio berenio

*‘Nalo ajunŝa abitii, abitio bano, aaju amijogii, amijogio bano, mia maka lele aver avitulubar a maka lele mia ajog lubar vite.*

*!Ver makanio, ŝeli nalo avilig kialo jidomiano nalo ruei, a ŝeli Atua biekokoa kialo kariano ruei!’ Ais 6:9,10*

“Jibe na naruei kiniou neber nalo pariparilo kirisikili laka, naloaju koalabo laka keano vo. Mia kamii naruei bo lie vo ban kamii. Iiluklukuano nalo na Atua kiano navenatubiano, mia kiniou neverial rimeravo ga rivan kamii.

<sup>13</sup> “? Ana junabe, kamii maka kuvijoglubar nioti na kurukuti subavio neibano? A ver kamii maka kuvijikia kuvisidomii lubarbar nioti nene, mia turabe naruei na mia kamii kuvijoglubar jamerijiano dolu nalo na mia kiniou neverio ka tomu nalo?”

*Yesu ber bulag nioti na jamerijiano na toro napano bisivisii kurukuti subavio*

<sup>14</sup> Ana Yesu berinavo “Mo, mia kinio never bisivisii nioti na jamerijiano neibano van kamii. Nioti nene naio jibe nei: Borotano ninio nalo na, nalo ajibe ka tomu nalo kialo iviso ninio nalo. Mia toro nei nana jo bisivisii kurukuti ea borotano nalo na, naio jibe ka toro napano jomia berial Atua kiano iliano ban tomu nalo.

<sup>15</sup> “Borotano na kirisikili na jel ikiŝarabo tivelinio, naio jibe ka toro na napano naio mijog Atua kiano iliano, ana iliano nene maka lele riva joomo vatitig ea kiano iviso na jikili leleio. Mia menu nalo neibano, ajibe ka Siŝaro, napano naio binimej vaarakurano ga, naio midular bereio iliano nei ea toro napano kiano iviso.

<sup>16</sup> “A borotano na puruveru toru yetano tabaŝilio, naio jibe ka toro na napano naio mijog Atua kiano iliano, mia kirisoŝeli ga naio tiniene jaoro kanio, miduo. <sup>17</sup> Ana iliano nene naio maka totano vatitig joomo ea kiano iviso. Mia naio miluo jibe ka titai napano maka ve sano bati novo, napano mijikia riluo bogo ve bulati ga. A verenio bogokouo rimej ŝelina tomu nalo asidom

ka ajil lo rivior ka amonea Atua kiano iliano, a mia soĤeli ga nalo atuvan bereio.

<sup>18</sup> “Mia borotano na napano teli na bova juaio, naio jibe ka tomu nalo napano bogo na amijog Atua kiano iliano, <sup>19</sup> mia karina, nalo ajuṁa ajidomii ṁlelea ga kialo meuliano nalo, a jidomii ka avar vite ve telabo rimei rive sibiano ga rivanlo, a nalo ajuṁa ajidomii ṁlelea vite novno nalo na yetemeriba nei. Bajago nalo na abinimei jibe ka teli va, ana na amikitiko ioluanou vou nei ka rivar re ṁarati ea tomu nalo tibe na ea kialo meuliano.

<sup>20</sup> “Ana borotano na bo na, jibe ka tomu nalo napano bogo na nalo amijog Atua kiano iliano, amijoglubario ana tiniel jaaro kanio a amiduio ea kialo iviso ana iorou kanio abar ṁarati na ioluanou vou neibano ea kialo meuliano nalo, napano na tealo abar ṁarati duelimo va rolu [30], a tealo abar ṁarati duelimo va ari [60], a nalo tealo abar bokar toromomou takurano [100].

“Ninei naruei jamerijiano na kurukuti uiti, naio bisi ea vio na.”

*Jamerijiano na yulu*  
*Luka 8:16-18*

<sup>21</sup> Mia Yesu ber bereio banlo, berinavo “Kito tomu nalo, ver kito rotilan yulu tai, mia kito rodu van re to yetano ka basaro tai. Maka leleio, kito monokanio rotilan to mave ga ka rimererali vio vatitigio. <sup>22</sup> A bo ga, Atua kiano navenatuboiano naio jibe ka yulu na, napano vonganei naio jo malmaluvo terteliki ea kito ka rimermerali vite nonovio nalo, a mia vite nonovio napano ajuluku ju, a bija ililukluano nonovio mia monoka amei medave. <sup>23</sup> Mia kamiu nonovio kube burutiliniemi, bo ka kamiu kuvijoglubar kiaku iliano nei.”

*Monokanio aiagago vatitig ka Yesu kiano iliano nalo*

<sup>24</sup> Mia Yesu ber kalo bereio, berinavo “Kamiu monoka kuviagago vatitig ka kiaku iliano nalo, a kuvila von ka kuvisidomii vatitiglo. Toro na jo mijog ga mia maka to takii, mia naio maka bunu rijikia rijoglubar vatitigio bereio. A toro na mijogkar kiaku iliano nalo, mia naio mijikia rijoglubarbar vatitig kiaku verloglogiano ve telabo iorou. <sup>25</sup> Toro napano kiano saba nalo miroano ruei, mia naio rivar lie ve miroano laka, mia toro na maka kiano saba, mia naio rilaluvu vaio napano kiri teliki na be kiano.”

*Jamerijiano na kurukuti napano jo miluo*

<sup>26</sup> Yesu ber bereio, berinavo “Atua kiano navenatuboiano naio jibe kurukuti napano toro bisivisiio ea kiano borotano.

<sup>27</sup> Bogo na naio bukuio bisi, mia naio maka bunu river rila titai ka kurukuti nene bereio. Toro neibano monmelio, jumolu, monmelio, jumolu, bogiano bija legiano, mia kurukuti nene naio ga takurano bitovi moluo, ana jo miluo. Jomṁa miluo jibe na banbano-o mia toro neibano maka lele rijikia ka kurukuti neibano jomṁa miluo jumabe. <sup>28</sup> Toro nei maka rijikia, naio maka rila titai, mia vite nei miyuku jumṁano nalo aba laka, ana maka vesiou bar niati, bano-o bar nioti.

<sup>29</sup> “Naruei bogo na nioti meruo bo, kema neibano jikario ka miṁau bereio naruei, midu kiano iobogu ba je bulag ṁarati.

“Mia Atua kiano navenatuboiano jomṁa miluo tertelisu jibe ka jeliviv ea vio yetano nei vonganei, a ea bogoti tai, mia real ṁarati na toru naio rimei mave.”

*Jamerijiano na kurukubako*

*Mataiu 13:31-32; Luka 13:18-19*

<sup>30</sup> Ana Yesu ber bereio, berinavo “Bajago na Atua kiano navenatuboiano, naio be dolu laka, naio kirisikili ka mia neleal jamerijiano tai bereio ka never naio jumabe. <sup>31</sup> Peli naio jibe ka kurukubako, napano naio teliki ka kurukuti dolu nalo tealo namṁa remebijaio ea kiado tiniavio nalo, naio teliki mia teliki. <sup>32</sup> Mia bogo na naio miluo binimei toru, burupati toru loa ka sinaniano dolu nalo napano ea kiado tiniavio. Mia jaati nalo tortoru, napano menu nalo aba ajuao ka vamelu nene bunu ga bo.”

*Yesu berloglog tomu nalo ka jamerijiano*

<sup>33</sup> A Yesu jo berloglog tomu nalo ka ioluanou vou ea jamerijiano na miroano jibe na, jibe napano bare ka nalo ajoglubario. <sup>34</sup> A iliano nalo nonovio napano naio berloglog kalo, mia be jamerijiano ju joomo eao, ana bogo na aju jibe naio ga bija kiano naiaagaoano nalo, ea bogo na naruei naio jo ber bisivisi vatitig jamerijiano nalo na kalo.

*Burumṁara jegi napano Yesu mil kovio kano*

*Mataiu 8:23-27; Luka 8:22-25*

<sup>35</sup> Mia Yesu joa kea uako napano naio ba joa ka verloglog tomu nalo, mia bogo na ṁerenio jo batove, naio ber ka kiano naiaagaoano nalo, berinavo “Ei, kito ravarkorov rava tivelinio ea ueiyabo neibano yako.” <sup>36</sup> Mia naiaagaoano nalo ajuvan tomu nalo neibano aju, ana abavin ea uako

na Yesu ju joomo eaio ruei, ana aburu naio abano. Mia uako dolu nalo bunu ga aban bijalo. <sup>37</sup> Uako nalo neibano aburo abano-o, mia burum̄ara jegi tai jumolu, mila na burum̄ara tei nalo ajum̄a abievelveluo a abava joomo ea uako bano-o bujo ka tei vare ga rimadudu. <sup>38</sup> Mia Yesu jo milugu ea selailugu tai ea uako iorou, naio jo monmelio ga. Naruei nalo aba abio bonio, ana nalo aber kanio aberinavo “!Naverloglogiano! ?Jum̄abe na jau maka kosidomial kito ka vaataro ka mia ramadudu naruei?”

<sup>39</sup> Ana Yesu jumolu, mia mil kirisikili ban jegi, naio mil ban burum̄ara tei bija bievelveluo tortoru nalo nei, berinavo “Kamiu kumelumu.” Ana vaarakurano ga jegi m̄aro, vio melumu nonovio. <sup>40</sup> Ana Yesu ber kalo berinavo “?Ka vaio ana kamiu kumerou jibe na? Peli kamiu maka kuvarkar tiniemiu ea kiniou kovio?”

<sup>41</sup> Naruei nalo amerou m̄elei, ana ajum̄a aberver kalo bereio aberinavo “?Toro kenia nei? Naio mil jibe na ga, mia jegi bija tei, abe juo amijogkar naio! Ou!”

## 5

*Yesu mijil bulag niadu telabo den toro Kerasa tai*

*Mataiu 8:28-34; Luka 8:26-39*

<sup>1</sup> Naruei Yesu nalo amaluvo aboru ea burum̄ara ueiyabo nei tivelinio, naina mededu ka vio na Kerasa, mia nalo tealo ajisia ka Katara p̄eli na Kerkasa. <sup>2</sup> Naruei nalo abouro ea vio nene, ana ea vio nene be buluvae nalo na tomu na am̄arn̄aro nalo ajaiao, mia be toro tai napano niununo va telabo ajaiao, napano naio jo joa m̄artanbo nei, jibe ka kiano vio.

Naruei bogo na Yesu jabulu den uako nei, mia vaarakurano ga toro neibano moluo ea m̄artanbo nei, jikiti binimej ka rial Yesu. <sup>3</sup> Toro nene be deden laka, mia tomu nalo amila von ka aiorikario banbano-o mia amila de ga. <sup>4</sup> Va telabo ruei amiorkar jaano bija jum̄ano ka m̄arimieni, mia naio jo burukokorovio ga, mia va telabo amiorkar ea iesi, mia jo mila kokorovio ga, banbano-o napano maka bunu ve toro tai na be kiano moroano bare ka rila toro nei rimej melumu. <sup>5</sup> Ana ea legiano nonovio a bogiano nonovio naio jon̄a jelviv ea m̄artanbo nalo a bunu mave ea suku dedade nalo, a naio jon̄a miaga m̄ererere, a naio jo jukujuku niabeno ka puruveru nalo.

<sup>6</sup> Ana toro nei naruei napano bogo na naio jo koalabo kia ga vo ka vio na Yesu nalo abouro eaio, mia naio mial Yesu, ana jikiti batove keanio, a batove ka naio, minie tano kamu kanio. <sup>7-8</sup> Ana Yesu

berenio, berinavo “Niununo va, kotuvan kema na, kotaluvo den naio vonganeil!”

Mia niununo va nei miaga toru laka ban Yesu naruei, ana berinavo “Mia jau, Yesu, Atua kenerinio napano meul, jau kiamo vaio joa kiniou? Kiniou nebikaso ea Atua siano, ka mia kosian re vironiano rivan kiniou!”

<sup>9</sup> Mia Yesu bika denio, berinavo “?Na siamo, kei?”

Naruei niununo va nei berdopeio, berinavo “Kiniou siaku, burutiniobi na mira, bior kumemi miroano laka nei.” <sup>10</sup> Mia niununo va nei naio jo bivika kirisikili den Yesu bereio, ka Yesu rijil bulaglo re ea kialo tanobuku nei.

<sup>11</sup> Mia ea burusuku neibano tivelinio, be burum̄ara taara na kiribue nalo miroano, naloaju amiuo ea borotano, abokar kovio menu juo [2,000], <sup>12</sup> ana siñaro nalo neibano ajegi, nalo abika kirisikili den Yesu aberinavo “Nuber bo banso, jau koila kumemi nuvan ea kiribue nalo na, jau kajamo ka kumemi nuva nuvitu joomo ealo.”

<sup>13</sup> Mia Yesu naio mijamo kalo, berinavo “Bo ga, kamiu kuvano.” Naruei nalo ajaluvo den toro neibano, ana abaaju joomo ea kiribue nalo neibano. Ana sopeji ga kiribue nalo neibano ajikiti, abatove ea bavio tai burukorovio, ana nalo ajibirbili abavatove ea ueiyabo na toru ana nalo amunu tei banbano-o abiniu amadudu.

<sup>14</sup> Naruei tomu nalo na abitikar kiribue aburo, aban bereio vonuo, aban aberial vite nei, a aberveriio ea vio dedade nonovio bunu, mila na tomu telabo abinimej ajidom aialio. <sup>15</sup> Mia bogo na aba amial ka Yesu naio jo, naio bija toro neibano nua niununo va nalo ajaiao, napano vonganej, naio miya vatitig kulun̄arauo ruei, naio jon̄a jotano marga, a maka bunu rive deden leleio. Nalo amialio ka naio binimej bo ruei jibe na, mia amerou. <sup>16</sup> Mia nalo napano m̄aaju beamu, napano amial vite nonovio nalo, ajukunu ka nalo na abinimej vonga, aber vaio na Yesu mila ka toro nei, a jum̄abe na kiribue nalo neibano aba amadudu ea tei. <sup>17</sup> Mia nalo amialio bova ga, mia nalo ajum̄a ajikili ka Yesu, ajidom ka mia naio tubilig den kialo vio.

<sup>18</sup> Mia Yesu nalo abatove ea kialo uako bereio, mia bogo napano Yesu jo bavin mave ea uako, toro neibano na, naio binimej bika kirisikili den Yesu, berinavo “Aiou, Tubo, kiniou nojidom ka ver jau kajamo ka kiniou nemej vijaso.”

<sup>19</sup> Mia Yesu naio maka rijamo kanio, mia naio ber ka ga berinavo “Makanio, bior bo laka ka jau kova vonuo bereio, a kava kotukunu rivan kiamo m̄aratavo

vija kiamo bilbilu nalo, jau kover kalo ka jurñabe na Atua tinien miiaso toru laka, ana naio mila bo mia bo laka banso jibe na.”

<sup>20</sup> Naruei toro nei naio ban bereio, ana naio jo jeliviv ea vio nalo na kiano tanobuku nei, napano ajisia ka Komeli Duelimo, napano tomu nalo na maka ave Ju ajuao, a naio berial iñauano novo nalo napano Yesu jorña mila ka naio. Mia nalo na amijog kanano tukunano nei, nalo amiilo toru ka naio.

*Jairas kenerinio tira sesa, naljuo tira na jokol Yesu miano kulumñarauo*

*Mataiu 9:18-26; Luka 8:40-56*

<sup>21</sup> Mia Yesu nalo ajel ea uako, abarkorov bereio ueiyabo nei aba tivelinio ruei, ana bogo na Yesu biako yetano jo bauro ga, tiniobi toru na tomu nalo abinimej ajelivivi eaio bereio. <sup>22</sup> Ana toro na toru tai na kialo yimo na volkouano ea vio na, siano Jairas, naio binimej mial Yesu, binimej vaatara kano, minie keanio. <sup>23</sup> Ana naio jegi ban Yesu, bika berinavo “Keneriku tira sesa mie mia mie, vonganej ðeli naio mñaro ruei. Mia kiniou nebika denso ka jau komei, kodu jurñamo toaio, ka naio mijikia rijog rivu bereio, ka naio rimeul kia to.” <sup>24</sup> Ana Yesu naio jumolu, ban naljuo kema neibano abano, ana tomu telabo na tiniobi neibano, nalo bunu ga aban bijalo, napano ajurña aba amivininkakarlo janea vio jeliviv ea ga Yesu.

<sup>25</sup> A nalo tai napano aju aban bija Yesu jibena, naio be tira tai, napano mieiano na jada mila naio bogoti nonovio ga, bokar yuka duelimo ba juo [12] ruei. <sup>26</sup> A tira neibano, naio bulu nakulekuleano nalo banbano-o kiano veru biniu, mia nalo amimauka naio bano-o, mia mijog bova ga, kiano mieiano nei jo ba bova lie damñariga. <sup>27-28</sup> Naio jorña mijog vatelabo ruei napano tomu nalo ajurña ajukunu ka Yesu ruei, mia be kiano jidomiano tai, berinavo “A ver kiniou notokol ga mñano kulumñarauo, mia kiaku mieiano ribisi vatitigio.” Mia naio binimej juluku ga iviso ea tomu nalo neibano, ana jo binimej binimej iorou vaatara ka Yesu taakano ana naio jian jurñano jibe na, jokol Yesu mñano juluvati kulukoti ga.

<sup>29</sup> Mia naio jokol Yesu mñano kulumñarauo jibe na, ana monloglog ka bogo nene ga, jada nei mijelkorovio, mia naio mijoglubar ea niabeno ka kiano mieiano jaluvo denio ruei. <sup>30</sup> Mia Yesu bunu ga mijogii ea naio, naio mijogii ka kiano moroano jaluvo den naio, ana soðeli ga barðilig naio iviso ka tomu nalo, ana naio bika berinavo “?Mia kei naio jokol vonga kiaku kulumñarauo?”

<sup>31</sup> Mia naiagagoano nalo aber ka naio aberinavo “?Jau kobika koberinavo kei naio jokolso vonga na, ana jurñabe, jau maka keial ka tomu nalo na miroano nei na aju ga amivinkakarlo jeliviv easo?”

<sup>32</sup> Ana Yesu naio jo jiraravo jeliviv kia ga vo mila von ka rial kei jokol naio. <sup>33</sup> Mia tira neibano, naio mijikia ruei ka naina, ana naio merou laka, ana jo memebiju, mia naio binimej ea Yesu, mijorua Yesu jaano, ana naio berial vite nonovio. <sup>34</sup> Mia Yesu berkanio, berinavo “Nena, kiamo viekouoiano ea kiniou milaso komijog bo bereio ruei, kiamo mieiano na maka bunu. Atua kiano turñaro to vijaso, jau kava vonuo bereio ga.”

<sup>35</sup> Mia bogo na Yesu jo mil kiaga vo ban tira nei, mia iliano tai binimej den Jairas kunuano, aber ka toro na toru nei, aberenio “Kenerimo tira sesa mñaro ruei. Bo ka jau kovuru re bunu naverloglogiano na toru na rimej, kala bulag re naio.”

<sup>36</sup> Mia Yesu bunu ga mijogio, ana naio ber ka Jairas, berinavo “Kiamo iviso rivova re, jau komonea kar ga Atua sikili.”

<sup>37</sup> Naruei Yesu berbure tom nonovio ka mia atakisor re bunu naio avan ea vio neibano, ana naio buru ga tom tolu nei, nina Pitere, bija Yemesi, bija kuruano Jone, abano.

<sup>38</sup> Mia bogo na abinimej vaatara ka toro na toru nei kunuano, amial ka tomu nalo ajurña tiniel miia tira sesa neibano ruei, aju ajegi, a amila buruñara utebaiano. <sup>39</sup> Mia Yesu ba joomo, ber ka tomu nalo nene berinavo “?Ka vaio ana kamiu kumitumña kumila utebaiano toru, a kumitumña kumiteg jibe na? Tira sesa na naio maka rinñaro, naio jo monmelio ga.” <sup>40</sup> Mia nalo abital niege naio ga.

Mia Yesu miila bulag tomu nalo abava tavio, ana naio buru tira sesa nei karamñoano bija kenieno ga, bija kiano naiagagoano nalo tolu neibano, nalo aba joomo ea vio na tira sesa nei mokotenano mon eaio. <sup>41</sup> Ana Yesu ba bokar jurñano, mia naio mil banio jelea kialo iliano, berinavo “Talita kum” napano naio berenio “Keneriku tira sesa, jau kotumolu von beamu vo.”

<sup>42</sup> Mia ea bogo nene ga, tira sesa nei, napano kiano yuka duelimo ba juo [12], jumolu, ana jo mieliel. Mia nalo na amialio vite nei, amiilo bano-o, jidomiano bulati ga. <sup>43</sup> Mia Yesu ber kalo berenio mia adu sinaniano ve telisu vanio, a naio ber bunu banlo ber mia tomu dolu nalo monokanio ajog re tenei.

## 6

*Kulo Nasarete maka asidom Yesu  
Mataiu 13:53-58; Luka 4:16-30*

<sup>1</sup> Mia Yesu jaluvo ea vio nei, ana binimej bereio ea kiano vio, naio naliko kiano naiagagoano nalo. <sup>2</sup> Mia ea Legiano Lu, naio bija tomu nalo na kiano vio aba joomo ea kialo yimo na volkouano, ana naio jo berlogloglo. Mia bogo napano amijogio, nalo amiilo laka ka kiano iliano nalo. Ana nalo aberenio "Tomnei! ?Kema na naio bar tenalo na be? ?Naio bokar masouano na jumabe? ?A naio jonña mila vremesiano nalo na jumabe? <sup>3</sup> Kito romijikia kema na naruei. Naio be toro na miñauka yimo nalo ga na, tira na Mere kenerinio na. Mia nalo nei Yemesi, a Joses, a Jutas, a Saimon, nalo na abe kuruano nalo. A kuviviniene nalo, nalo nei napano aju kitoliko ga."

Naruei nalo tiniel jer naio, maka asidom naio.

<sup>4</sup> Mia Yesu ber kalo, berinavo "Toro napano be naverialiano, tomu dolu nalo amijikia atovon naio, mia tomu na kanano vio, naliko kanano m̄aratavo nalo, nalo na ga maka ajikia atovon naio."

<sup>5</sup> Naruei ea kiano vio memedu nei, Yesu maka rijikia rila vremesiano, mia midu jum̄ano jua tom juo p̄eli tolu ga na amie, milarurlo bereio. <sup>6</sup> Mia Yesu miilo laka ka tomu nalo na kiano vio na, bior napano maka asidom amonea naio leleio. Ana naio juvan kiano vio na, ana ba jeliviv ea m̄arkomeli dolu nalo napano naio jo berlogloglo tomu nalo.

*Yesu miila bulag kiano atevi nalo abeve juo*

*Mataiu 10:5-15; Luka 9:1-6*

<sup>7</sup> Mia Yesu bio kiano duelimo ba juo [12] nei, ana mil batitig banlo, naio jian moroano banlo ka nalo amijikia atuvulu niununo va nalo, mia iorou naio miila bulaglo abeve juo abano. <sup>8</sup> Ilivatitigiano nalo na naio beriio beamu ruei nua ka avano, ajibe nei, napano naio berinavo "Ea tivelinio na kenemiu m̄arabo, mia kamiu kuvar re titai vija kamiu, mia kenemiu nasitoga ga na kubanio, kumijikia kuvario. Mia kamiu kuvar re semiu sinaniano tai kuvano, p̄elina kenemiu basaro, p̄elina kenemiu veru. <sup>9</sup> Kamiu kumijikia kuvar kenemiu kulubue kuviya ea jaamiu, a mia maka kuvijikia kuvar kenemiu kulum̄arauo dolu nalo bereio, mia kamiu kuvar ga kenemiu kulum̄arauo ve takurano ga napano kuviya bogo na kuviel kuvano."

<sup>10</sup> Ana Yesu ber bunu, berinavo "Bogo napano ver avuru kamiu kuva joomo

ea kunualo nalo tai, mia kamiu monoka tiniemiu saaro ka kuvitu kamlikolo, m̄aratavo nalo na vonuo nene, rivano-o rivokar bogo napano mia kuvitaluvo den m̄arkomeli na bereio. <sup>11</sup> Ana ver ea m̄arkomeli tai, tomu tai maka asidom avuru kamiu kuvan ea kunualo nalo, p̄elina maka asidom aiagago ka kamiu, mia kuvituvan ga kialo vio na to, mia bogo na kamiu kuvitaluvo den vio na, kamiu monoka kuvijubakon yeve na vio na den jaamiu nalo, jibe ka kijokijo tai p̄elina kenemiu iliano tai na kirisikili banlo, ka mia nalo avokar vironiano tai na memedu ga ka kialo bajago na bova nene."

<sup>12</sup> Mia atevi nalo aban abeve juo jibe na naruei, mia aba amioliolu ban tomu nalo ka monoka aviliglo, <sup>13</sup> a amijil bulag sim̄aro telabo den tomu nalo, ana nalo amionion bonotanunu na m̄arolivi teliki ea tomu na amie telabo parilo, jibe kijokijo tai na Atua kiano ilivuiano, ana amijog bo bereio.

*Tubo Erot Antipas berii Yesu  
Mataiu 14:1-2; Luka 3:19-20, 9:7-9*

<sup>14</sup> Naruei ea bogo nei, Parinio tubo Erot naio bunu mijog kija vaio na Yesu jonña milaio, bior ka Yesu siano, ajum̄a aberverii janea vio nonovio, mia tomu nonovio amijikia batitigio ruei. Ana tomu tealu ajum̄a aberii Yesu, aberinavo "Nina be Jone Baruei bere na, napano vonganei meul bereio ea m̄ariano. Tenei naruei napano mila naio be kiano moroano ka rila kijokijo nalo na."

<sup>15</sup> Ana nalo dolu nalo aberii Yesu, aberinavo "Nina tormoru Elaija re nua na," ana tealu aberenio "Nina be naverialiano tai na, jibe kiado naverialiano moruo nalo tai re nuana laka."

<sup>16</sup> Mia bogo na Parinio tubo Erot mijog vaio na Yesu jonña milaio, berinavo "Toro na p̄eli Jone Baruei bere ga na! Kiniu nejelar pariparinio ruei, mia vonganei naio meul bereio ea m̄ariano bo?"

*?Jone Baruei m̄aro jumabe?*

<sup>17-18</sup> Parinio tubo Erot mil jibe na bior naio naruei muetam̄aria Jone Baruei m̄aro ruei, ana jo merou m̄elea kanio. Mia tukunuano na m̄ariano na Jone Baruei kiano naio jibe nei. Parinio tubo Erot kuruano nei, be Vilip, napano naljuo nei, karam̄alo takurano mia keniele naljuo. Vilip naio joro ka tira tai siano Erotias, mia iorou kanio ana Parinio tubo Erot naio ba burular tira nene. Tenena Jone jonña mil ban Parinio tubo Erot kanio, berinavo "Tena jau komila na maka rimemedu,

ka na jau koburu tira na, bior naio be kuruamo koano.”

Mia Erotias maka leleio saaro ka Jone kanano iliano, naio tinienjer Jone, mila na Parinio tubo Erot miila kiano tomu nalo tealo abano abokar Jone amiorkario aburu ban ea yimo na lakoiano. <sup>19</sup> Mia Erotias jo jidom ka auebin Jone riñaro, mia naio maka rijikia rilalo, <sup>20</sup> bior Erot merou ka ruebinio. Naio merou jibe na bior naio mijikia ka Jone be toro na memedu tai, a be toro lu bunu, ana naio bokar vatitigio ga jo. Bogo telabo naio bio Jone binimej ka ave juo atukunu, mia naio jidom Jone kanano iliano nalo, mia bogo nonovio iliano nalo nei aju ajulu naio bunu, a mila na naio kiano jidomiano beve juo naruei.

<sup>21</sup> Mia maka vesiou, Erotias mial ka be kiano bogo. Nina, ea bogo napano nalo aminñauka jokoluulu ka asidomkar bogo na Erot moluo eaio. Ana Erot naio mila jokoluulu tai ka kiano tomu nalo na tortoru bija kiano navuriñaraboiano na kiano iñauano nalo bija tomu nalo na tortoru na tanobuku na vio Kalele. <sup>22-23</sup> Ea jokoluulu nei naruei, Erotias kenerinio tira naio binimej bolu ea ga miralo, ana Erot nalo tinielo jaaro laka ka kiano voluano, naruei Erot naio mila verikariano tai kirisikili ban naio berinavo “Vaio na jau kovika den kiniou, mijikia rivano-o rivokar togio na kiaku vite nalo nonovio, ana mia kiniou nemijikia notuvan ga rivanso.”

<sup>24</sup> Mia tira neibano naio ba tavio, ana bika den kenieno, Erotias, berinavo “? Nena, mia kiniou nevika vaio denio?”

Naruei kenieno ber banio, berinavo “Mia jau kover ka ga koverinavo naio monokanio rudu Jone Baruei parinio rivan kito juo.”

<sup>25</sup> Naruei kenerinio tira nei naio mila soḡeli bere ga ba joomo, ba bika soḡeli ga den Erot, berinavo “Kinioi nojidom ka jau kodu Jone Baruei parinio ea baju tai ana kodu rimej ea vio nei vonganei.”

<sup>26</sup> Naruei iliano nei mila tubo Erot mijog kirivova, mia naio maka bunu rijikia rila korov kiano verikariano na kirisikili nei napano naio mila ea kiano bilbilu nalo miralo ruei, <sup>27</sup> mia ea bogo nene ga naio miila kiano toro tai na mira, ba ber ka mia adu Jone parinio rime. Naruei nalo aban ea yimo na lakoiano ana aje korov Jone burujono, <sup>28</sup> ana amidu Jone parinio neibano ea baju tai, amidu abinimej ban tira neibano, ana tira neibano naio midu ba ban kenieno.

<sup>29</sup> Mia iorou, bogo na amijog vite nei, Jone kiano naiagagoano nalo abinimej amidu mokotenano, aba amidu batove jua

mñartanbo. Naruei tukunu na berii Jone Baruei, naio maaro ea vio na, mia bogo na Erot mijog veriiano na Yesu, mila naio merou laka, ber ðeli Jone Baruei nene napano naio muebinio, meul bereio.

*Atevi nalo aba amioliolu, karina abinimej bereio*

*Mataiu 14:13-21; Luka 9:10-17; Jone 6:1-13*

<sup>30</sup> Naruei atevi nalo napano Yesu miila bulaglo abano ka aioliolu, mia abinimej bereio naruei. Mia nalo aju aberialio ban Yesu vaio nalo napano amila ka tomu nalo, bija juñabe ajunña aberlogloglo.

<sup>31</sup> Mia tomu miroano napano aju abinimej ealo, karina nalo abano, ana tealo bere abinimej, karina aban bereio, mia jibe na ga bano, mia Yesu nalo maka ajikia ajilimebi leleio, maka leleio bogo vare ka ajikia adu salo sinaniano ve teliki. Naruei Yesu ber kalo berinavo “Bo ga, mia kito ravano. Kito rala von ka rotu ðilig den vio nei ve telisu vo beamu, kito rava resiravo vio tai na be tuñaro vatitigio, napano kamiu kumijikia kuvjilimebi vatitig eaio.”

<sup>32</sup> Jibe na aba amidu uako tai, ana ajel eaio ka ava asirarag ka vio tai ea ueiyabo tivelinio, napano maka tomu nalo atua vio nene.

*Yesu bagan tomu telabo juvulu menu jimo [5,000]*

<sup>33</sup> Mia tomu miroano na abitilubar ka Yesu nalo ajaluvo jibe na, ana nalo bunu ga ajaluvo den kialo mñarkomeli nalo, ajikiti, ajel uro, ana aba abokar beamu vio napano amial ka uako nei naio jonña ban eaio, beamu ka Yesu nalo. <sup>34</sup> Mia Yesu bauro, a bogo na naio mial ka tomu telabo aju ruei, mia naio tinien miialo laka, bior naio mialo jibe ka nunu nalo napano amilaluvu mñarabo, napano maka toro tai ka rivitikarlo, ana naio jonña berlogloglo ka iliano novo nalo telabo.

<sup>35</sup> Mia bogo na mñerenio batove, kiano atevi nalo abinimej eaio, aberinavo “Ai Tubo! Vio nei naio bova ga, a vaataro ka vio ribobogio naruei bunu. <sup>36</sup> Bo kanio jau keiila tiniobi nalo na avanvan bereio ea kialo vonuo nalo ðelina avanvan ea mñarkomeli nalo na aju dedade ea vio nalo nei, ka avulu salo sinaniano tai.”

<sup>37</sup> Mia Yesu ber kaniu, berinavo “E, makanio, bo kanio kamiu ga kuvar sinaniano tai rivanlo.”

Mia aberiañña Yesu maka river vatitigio, naruei nalo aberinavo “E! Bo ga na ðeli jau kojidom ka kumemi nuvar kiado puruveru na toru na, kumemi nuvario nuvulu ka joko rivare ka tomu menu telabo nei ka asenio?”



<sup>38</sup> Naruei Yesu ber kalo berinavo "Mia kamiu kuva kuvial von ver joko vio na ju bija kamiu vonganei."

Mia nalo aba amialio, ana abinimej bereio, aberinavo "Kumemi nubar joko jimo na tereteliki ga ju, bija niado momaio juo."

<sup>39</sup> Mia Yesu ber ka tomu nalo, berinavo "Kamiu kuvitutano ea soro na beamu," <sup>40</sup> ana ajutano ea taara nalo, napano tealo abokar duelimo va limo [50], a tealo abokar toromomou takurano [100]. <sup>41</sup> Ana naio bar joko jimo nei bija momaio juo nei, jirarago bavin ea tiniabene, ber siva ban Atua biorio, ana burekokorov joko nalo nei, jian ban kiano atevi nalo, ka avario asian van tiniobi nalo nei, mia naio janka bunu ga niado tereteliki juo neibano jibe na.

<sup>42</sup> Mia nalo ajinan bano-o, mia mabolo jouo vatitigio, <sup>43</sup> mia ioroti sinaniano bija niado nalo napano ajen ana nina bevaaju, nalo amisionio ban ea basaro nalo bokario duelimo ba juo [12]. <sup>44</sup> Mia tomu nalo napano ajinan, napano surñano nalo ga, nalo abokar jibe kovio menu jimo [5,000].

*Yesu miel mave ea niunuku tei*

*Mataiu 14:22-23; Jone 6:16-21*

<sup>45</sup> Karina Yesu berii ka kiano atevi nalo, berenio "Kiniou nojidom ka kamiu kuvidu kiado uako, kuvan beamu tivelinio ea ueiyabo nei, ea m̃arkomeli na Betsaeta, mia kiniou noto nei beamu vo ka mia naiila tiniobi nalo nei avanvan bereio."

<sup>46</sup> Ana bogo na miila bulag tiniobi nalo nei abano beve terakurano bisi, naio bavin ea suku ka rivolkouo. <sup>47</sup> Ana bogo na vio binimej viobobogio ruei, uako jo koalabo tavio ea tinia tei ruei, mia Yesu jo naio takurano ga uro. <sup>48</sup> Ana Yesu mial ka nalo ajumña amila bijon ka rña abeluo ka uako neibano, bior aju abiniua jegi ga, mila nalo aburo melmelumun laka ga. Mia vaataro ka viorijeni mermeravo, naio binimej ealo, jonña miel mave ea niunuku tei. Nina naio jidom rivan vaataro ga kalo, ka riva rivoru tivelinio tukamu kalo, <sup>49</sup> mia bogo na nalo aju abitii naio jo miel mave ea niunuku tei binimej vaataro kalo jibena, abio souo, aberinavo "E! ?Vaio na binimej jibe na? ? Peli simaro tai, p̃elina venia na jibe na?"

<sup>50</sup> Nalo abiniua ajumña abitikar naio jibena, mia amerou laka. Mia kirisopeli Yesu mil banlo "E, kamiu kumerou re bunu, kiniou ga na." <sup>51</sup> Mia Yesu bavin ea uako bijalo, ana ea bogo na memedu ga, jegi neibano m̃aro, ana nalo na ajua uako amiilo toru laka garuei. <sup>52</sup> Nalo amiilo jibe na bior kialo jidomiano nalo kirisikili laka kia ga vo, maka atu avitilubar vite nalo napano Yesu mijikia rila ea kiano moroano,

jibeka vaio napano naio miñauka bija joko jimo tereteliki neibano.

*Namieiano nalo ajokol ga Yesu kiano juluvati kuluñarauo*

*Mataiu 14:34-36*

<sup>53</sup> Ana Yesu nalo abarkorov ueiyabo neibano aban ea kialo uako tivelinio, naruei aba aboru ea vio tai, siano Kenasarete. Mia bogo na abuku veru ba uro, <sup>54</sup> mia abavatove ea uako, ana soḡeli ga tomu nalo na vio na abitilubar Yesu. <sup>55</sup> Naruei nalo ajikiti ajeliviv ea kialo m̃arkomeli nalo, aju abarvar kialo namieiano nalo ea m̃alo jogu nalo, abinimej ea vio nalo vabe napano amijog ka Yesu jonña ban eaio.

<sup>56</sup> Ana ea vio nonovio na Yesu naio jonña ban eaio, ea m̃aratavo nalo, ea m̃arkomeli nalo, p̃elina ea m̃arabo nalo, nalo ajumña abar kialo namieiano nalo, aju abarlo ju vatitig ea vio medave, ana aju abika denio ka rijamo ka namieiano nalo nei atokol ga juluvati na kiano kuluñarauo. Mia nalo na mia atokolio tibena, kialo mieiano nalo ribisi, a nalo amei rivu bereio.

## 7

*Yesu kiano atevi nalo maka atakii bajago moruo na kulo Ju nalo kialo*

*Mataiu 15:1-9*

<sup>1</sup> Mia ea bogo nei, Varisis tealo abinimej vio takurano ea Yesu, bija bunu naverloglogiano na tuboiano, napano nalo ajaluvo ea vio Yerusalemo abinimej. <sup>2</sup> Mia nalo aju amial ka bogo napano Yesu kiano atevi nalo ajumña ajinan, amila napano ea Varisis nalo kialo vitiiano, jum̃alo nalo abova. Nina bior napano maka atakii vatitig kiri m̃arabo sesa nalo telabo ka asekon jum̃alo, napano Varisis nalo aber tomu nalo monoka alaio, karina amijikia asinan. <sup>3</sup> Nina bior ea bogo na, Varisis nalo bija kulo Ju dolu nalo ajikili laka ka ala tibena naruei, ka nalo monoka atakii vatitig rivu kialo bajago moruo na kialo lotuano re beamu. <sup>4</sup> Ajumña amila jibena ka ver nalo amiel aban ea komeli p̃eli na vio vabe, mia bogo na abinimej vonuo bereio, mia monoka nalo atakii tuboiano na ka asekonlo ameravo rivu p̃eli na ave lu vatitigio rivu bereio. Iorou ka nina, amijikia atikar ka asinan naruei, bior ver nalo ala re, maka ajikia atokol sinaniano leleio. Mia be tuboiano sesa telabo bereio jibe na napano monoka atakio, napano tealo, aber monoka asekon baja tibe na tibe na, a tealo, aber monoka asekon p̃ili marauo tibe na tibe na, a tealo, aber monoka asekon baju na amirñaukanio ea burujievi na be bras tibe na tibe na, rivan tibe na. <sup>5</sup> Vite na naruei mila Varisis nalo

abika den Yesu, aberinavo “?Ka vaio ana kanamo atevi nalo maka atu atakii bajago moruo nalo na kiado lotuano nanua, napano kiado navurim̄araboiano nalo na ajum̄a aberloglogio ka kito. Kanamo nalo na, ajum̄a ajinan bija niاميةo nalo na jum̄alo, bior napano maka asekon batitig jum̄alo nalo.”

<sup>6</sup> Ana Yesu berdoŋe banlo, berinavo “Riano ga na, naverialiano Aisea re nua naio berii memedu ga kamiu tomu nalo na sibiano na, napano naio berial iliano nei napano Atua naio berenio, napano ber

*‘Tomu nalo na abamenea kiniou ka kialo iliano nalo ga,  
mia kialo jidomiano nalo aju koalabo den kiniou kia ga vo.*

<sup>7</sup> *Mia nalo aju amilotu ka kiniou kurano ga,  
bior bogo napano aberloglog tomu nalo, nalo aju aber nina Atua kanano iliano na,  
mia makanio, iliano nei be tomu nalo kialo ga.’” Ais 29:13*

<sup>8</sup> Ana Yesu ber kalo berinavo “Kamii kumitum̄a kumituvan Atua kiano tuboiano, ana kumitum̄a kubokar bajago moruo na kulorinio ga kiano kirisikili laka. <sup>9</sup> Maka leleio rimemedu ka mia kamiu kuvitum̄a kuvila tibe na, bior napano kamiu kumitum̄a kumisikili ka kuvitakii bajago moruo nalo na toro ga kanano, mia vonganei kamiu kumila banbano-o mia bajago nei naio jo midu jeleig vio ŋelina naio jo bukular Atua kanano tuboiano. <sup>10</sup> Mosis kiano tuboiano naio berenio ruei, berinavo

‘Jau komonmonea karam̄amo naio koniomo,’

a naio ber bunu, berinavo

‘Toro na mil bova ka karam̄amo naio kenieno, mia kamiu kuvuebinio rim̄aro.’

<sup>11</sup> “Tuboiano nei berenio ka kito monoka rovitakar vatitig kiado tormoruo juo nei, mia kamiu kumitu kumila dolu nei. Vereenio toro tai verko kario kiano vite tealo ka river abe Atua kiano, ana ver tormoruo juo jum̄alo bulati, amei avikano, mia kamiu kuver van naio ka monoka rila vaio van naljuo? <sup>12</sup> Mia kamiu kuvitutua naio, kuverinavo ‘Maka lele, maka kojikia kosian van naljuo nei, bior kanado bajago moruo ber vaio na kuberkoio ban Atua, monoka kosian ga van kiano tomu lu nalo, jau maka kojikia kotuvan van toro dolu.’

<sup>13</sup> Kamiu kuberenio jibena, mia vaio na jibena? Kamiu kumitu jikili ea bajago moruo nalo, kamiu kumitu kumituvanvan batove, mia jo mila Atua kiano tuboiano binimej be vite kurano tai. Mia maka nina ga, mia kamiu kumitu kumila vite telabo na jibena.”

*Vite nalo nam̄a mijikia rila toro riagiago ea Atua mirano*

*Mataiu 15:10-20*

<sup>14</sup> Naruei Yesu bio tomu nalo ka amei vio takurano bereio ea naio, ana naio mil banlo, berinavo “Kamii nonovio kuvia-gago vatitig ka kiniou, kamiu monokanio kuvijoglubar kanaku iliano nei. <sup>15-16</sup> Maka leleio ve vite tai nam̄a jo tavio ea toro, mia river riva joomo ea naio mijikia rila naio riagiago ea Atua mirano. Mia vite nalo nam̄a aju joomo ea naio, napano m̄a amoluo ea naio, vite nalo na naruei amila naio miagiago ea Atua mirano.”

<sup>17</sup> Ana Yesu jaluvo den tomu nalo nei, ana ba vonuo bereio, ana karina, kiano naiagagoano nalo abinimej, abika denio jamerijano napano naio jom̄a berii kalo. <sup>18</sup> Ana Yesu berinavo “?Jum̄abe, ŋeli kamiu bunu parimiu bono kia ga vo javukia nalo na? Bior vaio napano kamiu maka kuvitilubar vite na? Vite vaio na jo tavio, jibe sinaniano nalo, verinavo riva joomo ea toro, nalo maka ajikia ala toro rivova ea Atua mirano. <sup>19</sup> Nina bior napano vite nalo nei maka ava avokar kiano jidomiano, mia abatove ea mabono ga, karina abarlaka amoluo den niabene bereio.” Mia Yesu ber jibe na naruei, ana karina, tomu nalo abitilubarivo von naruei ea kiano iliano nei, Yesu mila meravo ka maka ve sinaniano tai napano toro monoka rivel kanio ka rila naio rimeravo rivu ea Atua mirano, mia sinaniano nonovio ga nalo abo ga ka asenio.

<sup>20</sup> A Yesu berenio bunu “Mia vite nalo napano ajua toro ruei, ana aju amal-maluvo ea kiano meuliano, vite nalo na naruei amijikia ala toro riagiago. <sup>21</sup> Nina bior joomo ea toro, be bajago va nalo napano aju amoluo ea naio, jibe jidomiano va, siakiano, vinauano, amue tariaro ea toro, siakaiano, <sup>22</sup> tinieiano, bajago na bova, sibiano, lakoroviano na tuboiano, jokuano, tii ilisibiano nalo, ilivarvariano, bija vovuiano. <sup>23</sup> Bajago va nalo nei naruei, nalo amoluo den toro kiano iviso, mia nalo nei naruei vite nalo nam̄a amijikia ala toro riagiago kamu ea Atua mirano.”

*Yesu mijil lar niadu den niatira tai*

*Mataiu 15:21-28*

<sup>24</sup> Ana Yesu jaluvo den vio na, naio batove ea tanobuku na komeli nei Taea. Mia naio ban ea yimo tai, naio jidom rila ka mia tomu nalo ajikia re ka naio joa vio na, mia naio maka rijikia toluku tibena. <sup>25-26</sup> Naruei tira tai joa vio na napano maka ve Ju, bior napano kiano torogio nalo abe Kris ga, mia abinimej ajua tanobuku na

Vonisia vaataro ka Siria. Tira nene, kenerinio kiri tira sesa, niununo va tai joaio, mia bogu na tira neibano mijog ka Yesu joa vio na, naio binime minie tano ka Yesu jaano, jegi banio, ka naio rijil lar siñaro nene den kenerinio niatira sesa nei. <sup>27</sup> Mia Yesu berdoŕe naio, berinavo "Mia memedu ka kiritete nalo monoka asinan beamu! Maka rimemedu ka navar bulag kiritete nalo salo sinaniano nalo denlo, novuku rivan kuli nalo." Naio berenio jibe na bior ka bogu na, kulo Ju nalo, napano aberiamia nalo ga abe Atua kenerinio nalo, nalo ajumia abio niegeniege tomu nalo napano maka ave kulo Ju, aberinavo "Kamii kuli nalo ga."

<sup>28</sup> Mia tira neibano berdoŕe naio, berinavo "Jau kober be riano Tubo, mia kuli naloaju aban vaataro ka vio na kiritete nalo salo sinaniano, ka mia amijikia asen yororoti sinaniano nalo namia ajibirbil yetano ea borotano."

<sup>29</sup> Naruei Yesu berkanio, berinavo "Jau kojian verdoŕeiano novo tai ka kiaku iliano nei. Naruei bior kanamo iliano novo na, kiniou nebitilubar ka jau tiniemo barkar vatitig kiniou, ana bo, neber kaso ka jau komijikia kava vonuo ga, siñaro nene jaluvo den kenerimo niatira nene ruei."

<sup>30</sup> Naruei tira nei naio ban bere vonuo, ana binime mial kiritete neibano kenerinio naio jo melumu ga, naio jo mon vatitig ea mñano jogu.

#### *Yesu miñauka batitigio bulubau tai*

<sup>31</sup> Mo, karina Yesu juvan tanobuku nei Taea, ana naio ba jel ea mñarkomeli dolu na Saiton, ana binime bereio ea ueiyabo na Kalele, nina tivelinio na tanobuku napano abio ka Komeli Duelimo. <sup>32</sup> Ana nalo na vio na aburu toro tai binime banio, ka naio rudu jumiano toaio, bior toro nene naio tiliniene bono, naio mil dede laka ga. <sup>33</sup> Naruei Yesu buru toro nei jaluvo den tiniobi nalo nei napanoaju, naruei naljuo aba laka kija. Naruei Yesu miyuku mñarjukumano ban ea bulukuti buru tiliniene, karina naio midu titinio, mia ea kema neibano buruminano. <sup>34</sup> Karina Yesu jirarago mave ea tiniabene, naio burukar kiano jegi toru, ana ber ka kema neibano jel kialo, berinavo "Evata," napano iliano na berenio "Jau kovetavo." <sup>35</sup> Naruei vaarakurano ga, kema neibano, buru tiliniene betavo, bija buruminano miñau vatitigio, mila na kema neibano naio mijog vite bo a mil vatitig meravo ga.

<sup>36</sup> Naruei Yesu jadu kalo, ka mia avan re atukunu ka tenei tanea vio van tomu dolu nalo, mia bogu na naio jo berii jibe

na ka tomu nalo, mia nalo aba aberverii lie vo ea vio reraio ga. <sup>37</sup> Nalo aberii mñelea jibe na, bior amiilo mia amiilo ka vite nalo nonovio napano mña nalo amialio ka Yesu mijikia miñaukanio. Nalo ajumia aberverii aberinavo "Yesu nei mila nalo namia tilinielo bono nalo amijog vite, a naio miñauka tomu na maka ajikia ail, nalo amil. Kaleliki, kema na miñauka vite nalo nonovio bo mia bo laka, mm."

## 8

*Yesu bagan tomu nalo juvulu menu veri [4,000]*

*Mataiu 15:32-39*

<sup>1</sup> Ana bogu tai, tiniobi toru tai na tomu telabo nalo abinime ea Yesu bereio. Mia naloaju bija naio bano-o, ana nalo jjerlo, ana nalo maka bunu salo sinaniano. Ana Yesu bio kiano naiagagoano nalo abinime ea naio, ana naio ber kalo, berinavo <sup>2</sup> "Kiniou tinioku jii tiniobi nalo nei toru, bioraju bija kito bogoti tolu ruei, mia salo sinaniano biniru ruei. <sup>3</sup> A ver kiniou neilla bulaglo avan ea kunualo napano maka ve salo sinaniano jibenei, ŕeli tealo siserlo ve toru ea mñarabo togio ana miralo ribobogio, bior nalo tealo, kialo komeliaju koalabo laka."

<sup>4</sup> Ana Yesu kiano atevi nalo aber ka naio, aberinavo "Ana mia kito ravagan tomu nalo nei ea vio iauo nei tumabe?"

<sup>5</sup> Ana Yesu bika denlo, berinavo "Ana kamii be semiu joku vio?" Ana nalo aber "Aluo ga."

<sup>6</sup> Naruei Yesu mil ban tiniobi toru nei, berinavo "Kamii kuvitutano ea vio nei beamu vo." Ana naio bar joku aluo nei, naio ber siva ban Atua kanio, karina naio burekokorovio, ana bario janea kiano naiagagoano nalo ka avar van tomu nalo, ana nalo aba ajankanio ealo. <sup>7</sup> A nalo abar niado momaio juo na tertelisu ea bogu nene, ana Yesu ber siva kalo bunu, ana berinavo "Kuva kuvitan kalo bunu van tomu nalo." <sup>8</sup> Ana nalo ajenio banbano-o, napano mabolo jouo vatitig, ana amison basaro aluo bereio abujo magmago vatitig bija ioroti sinaniano nalo na ju. <sup>9</sup> Ana nalo na ajinan ea bogu nei, nalo abokar ŕeli menu veri [4,000].

Naruei Yesu miila bulag tiniobi nei aban bereio ea kialo komeli, <sup>10</sup> ana naio ban ea kialo uako na, bija kiano atevi nalo, a nalo ajuvan vio na, aba abokar tanobuku na vio Dalmanuta.

*Tomu na tortoru tai ajidom aial kijokio*

<sup>11</sup> Ana ea bogu tai na, Varisis nalo tai abinime ajidom avilvil ea Yesu, a

ajidom ala vonvon naio, ana nalo aberinavo "Kumemi numisidom jau koverloglog kijokijo tai na toru ka nuvalio, napano jau kalaio vija sikiliano na tiniabene."

<sup>12</sup> Mia Yesu naio buru kiano jegi, jibe napano naio tinien maro kalo ruei, ana berdoŕe banlo, berinavo "Ka vaio kamiu na tena banei, kumitu kumisidom kuvial kijokijo tai tibena? Kiniou neber be riano ban kamiu, maka leleio, mia kenemiu bajulukuti na banei mia maka ajikia aial kijokijo tai." <sup>13</sup> Ana Yesu jaluvo denlo juvanlo ajubo, ana naio ban ea uako bereio, naio barkorov bereio ueiyabo ba tivelinio.

*Navurim̄araboiano nalo na lotuano amila bajago va aju amiluo lie*

*Mataiu 16:5-12*

<sup>14</sup> Ana bogo na nalo ajaluvo aba abokar tivelinio na ueiyabo na toru nei, nalo ajidomii von bereio napano tinielo bobogia ka avar salo joko tai rimei, mia salo joko takurano ga jo bijalo ea uako. <sup>15</sup> Ana Yesu ber iliano tai banlo, berinavo "Kamiu monoka kuvitikar vatitig kamiu, ka Varisis nalo bija Erot kialo is." Yesu berenio jibe na ber ka bajago va nalo na kialo navurim̄araboiano nalo, mia atevi nalo maka asidomiilubarario.

<sup>16</sup> Nalo amijog ga, ana aju aberii ealo, aberinavo "Peli naio mil jibe nei bior napano kito maka ravar joko tai rimei."

<sup>17</sup> Ana Yesu mijikia kialo jidomiano na, ana berinavo "Kamiu kumitu kuberii napano m̄aka ve sado joko ka vaio? Juñabe, kamiu maka kuvijoglubar ŕeli maka kuvitilubar vite nalo navo? Peli tiniemiu nalo jikili laka ga! <sup>18</sup> Kamiu, miremiu nalo ju, mia kamiu maka kuvitu kuvitilubar vite, a burutiliniemiu nalo ju, mia kamiu maka kuvijoglubar vite. Peli kamiu maka bunu kuvitu kuvisidomii bereio vite nalo napano kiniou nomilaio ban tomu nalo? <sup>19</sup> Bogo na kiniou nemila burevure joko jimo nua na ruei ea tomu nalo menu jimo [5,000] na, nalo ajenio banbano-o mia kamiu kumison iororoti sinaniano nalo aban ea basaro vio?"

Nalo aberdoŕe ban naio, aberinavo "Kumemi numison duelimo ba juo."

<sup>20</sup> Ana naio bika bereio, berinavo "Ana bogo na nalo menu veri [4,000] na ajen ga joko aluo na, iorou kamiu kumison basaro vio bereio?"

Ana nalo aberdoŕe, aberinavo "Kumemi numison aluo."

<sup>21</sup> Ana naio ber kalo, berinavo "Boga, ana juñabe vonganei? Kamiu kumijikia kija vite nalo nei naruei, ŕeli na makan vo?"

*Yesu milarur merebono tai na vio Betsaeta*

<sup>22</sup> Naruei Yesu nalo abinimei abokar komeli nei, Betsaeta. Ana nalo na vio na, aburu merebono tai binimei ea Yesu, ajegi ban Yesu ka naio tokol vatitig toro nene. <sup>23</sup> Ana Yesu bokar merebono napano juñano, ana naio burio bano, ana naljuo aban bilig ea komeli tivelinio abano. Naruei Yesu midu titinio jau toro napano mirano, a naio midu juñano joa mirano be juo, ana bika den naio, berinavo "Juñabe, jau kojo komial vite, ŕelina makan vo?"

<sup>24</sup> Ana toro napano naio jirarago, mial vio, mia naio ber berinavo "Nao-o, kiniou nemial tomu nalo, a nemial nalo jibe bulapati buruiesi ga nalo napano aju amiel." <sup>25</sup> Ana Yesu midu juñano joa naio bereio ea bogo valuo nene, ana toro nei, mirano binimei bo nonovio garuei, ana naio jirarago bereio, mial vite nalo meravo mia meravo bo. <sup>26</sup> Ana Yesu berkanio, berinavo "Mia kavan re bunu keial nalo na ajua komeli, kavan memedu ea kunuamo."

*Pitere berial ka Yesu be Naverikariano memedu*

*Mataiu 16:13-20; Luka 9:18-21*

<sup>27</sup> Mia Yesu bija kiano atevi nalo ajidom avatove ea m̄arkomeli na tertelisu vaataro ka komeli na toru nei Sisiria Vilipai, a bogo napano nalo aju amiel ea m̄arabo ka avatove ea vio na, naio bika denlo berinavo "Kamiu kumitu kumijog tomu nalo aju aberverii kiniou ka kiniou kiniou kei?"

<sup>28</sup> Nalo aberdoŕe banio, aberinavo "Tealo aberinavo jau Jone Baruei bereio, a tealo aber Elaija, a tealo aber jau naverialiano na nuana laka."

<sup>29</sup> Ana naio bika bereio den nalo, berinavo "A juñabe ka kamiu, kamiu kumitu kuberii kiniou kiniou kei?"

Naruei Pitere berdoŕeio, berinavo "Jau kobe kenememi Naverikariano memedu na."

<sup>30</sup> Ana Yesu ber memedu banlo, berinavo "Bo, mia kamiu kuva kuverialio re vite nei van tomu nalo."

*Yesu berial kiano m̄ariano*

*Mataiu 16:21-28; Luka 9:22-27*

<sup>31</sup> Ana ea bogo na, Yesu jikar ka milavon ka riverloglog kiano atevi nalo ka Kullorinio Kenerinio, mia monoka nalo ala vite ve telabo napano mia naio rijog rivova kanio, a mia navurim̄araboiano nalo na kulo Israel bija kialo parinio kulo lu nalo, bija tomu na verloglogiano na tuboiano nalo, mia nalo avukular naio. A Yesu ber bunu mia auebin naio, mia bogoti ve

tolu nene, mia naio tumolu bereio, naio tovolu m̄ariano. <sup>32</sup> Iliano nalo nei, Yesu berialio meravo vatitig kalo, a bogo na Pitere mijogio, bio Yesu, burular naio, mil jikili banio, jidom verbure naio, ber mia tibe na re. <sup>33</sup> A soḡeli ga Yesu naio bilig taakano ka Pitere, naio bitii ban ea kiano atevi nalo dolu na aju, ana naio mil koko vio jikili ban Pitere, ber kaio, berinavo “Siḡaro, kava bilig den kiniou! Kiamo jidomiano na be toro kiano ga, maka Atua kiano jidomiano leleio.”

*Yesu kiano naiagagoano monokanio sidomii ve iakurano ga ka kiano sidomiano nalo*

<sup>34</sup> Ana Yesu bio tiniobi nalo bija kiano naiagagoano nalo, ka amei ea naio, ana ber kalo, berinavo “Toro na jidom takisor kiniou, naio monoka sidomii iakurano ea kiano sidomiano nalo, monoka rudu kiano m̄akolkolo, ana takisor kiniou. <sup>35</sup> Toro na jidom rilarur kiano meuliano, mia rilaluvuo. Mia ver toro tas milaluvu kiano meuliano bior kiniou, ḡeli na bior kiaku Ioluanou Vou, mia naio rije ioruriano.

<sup>36</sup> “Verver toro tai rije vite nonovio na yetemeriba nei, mia iorou naio rilaluvu m̄arabo na meuliano, naio maka rije tena bo tai leleio. <sup>37</sup> Mia kiano vite novo nalo nei napano bario, maka ajikia avulu kean bere kiano meuliano bogo tai. <sup>38</sup> Tomu nalo miroano ea taara na vonganei nalo amila kariano, nalo maka leleio ave riano ea Atua, nalo abova laka, a nalo amimou ka tomu dolu nalo bior kiniou bija kiaku iliano. Ana iorou mia Kulorinio Kenerinio rimej bereio, naio vija kiano nailiano lu nalo, vija karam̄ano kiano mermerano, a bogo na amei, ver toro mimou ka naio vonganei, mia naio bunu rimou ka toro nene.”

## 9

<sup>1</sup> A Yesu ber bunu banlo, berinavo “Riano ga neber ka kamiu, tomu nalo tai na aju ajikili ajua vio nei, napano mia nalo maka ajikia am̄arn̄aro, rivanvano-o rivokar bogo na nalo aleal Atua kiano Navena-tuboiano rimej riyotuba vija kiano burum̄ara sikiliano.”

*Yesu niabene binimej be dolu Mataiu 17:1-13; Luka 9:28-36*

<sup>2</sup> Iorou ka bogo nei, bogoti ari barlaka ruei, ana Yesu buru Pitere, a Yemesi, a Jone, nalo abano mave ea burusuku tai na bavin laka, napano nalo veri ga. Ana bogo na nalo aju jibena, naiagagoano tolu nei amial Yesu niabene jo binimej be dolu, <sup>3</sup> a nalo amial kiano kulum̄arauo nalo

amieg, a nalo amiuvu bo mia amiuvu nonovio garuei, jovulu vite dolu nalo tealo na yetemeriba neibano na amiuvu. <sup>4</sup> Ana nalo amial bunu naverialiano Elaija bija tormoruo Mosis, naljuo amiyotuba, naljuo aju ajukunu bija Yesu.

<sup>5</sup> Ana Pitere ber ka Yesu, berinavo “Tubo, bo ka kito rotua vio nei. Bo ka kumemi nuviḡauka yimo tobobo ve tolu ea vio nei, kiamo ve takurano, Mosis kiano ve takurano, a Elaija kiano ve takurano.” <sup>6</sup> Pitere mil vovu jibe na ka nalo amemebiju laka, a nalo amerou, nalo maka bunu ajikia mia aver venia.

<sup>7</sup> Ana vaarakurano ga, melijo tai binimej jovukolo, ana nalo amijog iliano tai binimej eaio, berinavo

Ninei be keneriku na, napano kiniou no-jidom naio laka.

Kamiu monoka kuvijogkar vatitig naio.

<sup>8</sup> Naiagagoano nalo amijog iliano na, ana ajiraravo jeliviv ealo, ana maka bunu aial naljuo nabano, mia amial Yesu naio ga takurano jo bijalo. <sup>9</sup> Ana nalo ajaluvo den burusuku neibano, nalo aju abatove bereio, ana Yesu mil jikili banlo, herburlo berinavo “Tena Atua mila kumialio, mia kamiu kuvan kuver re ka tomu nalo vonganei, riva riva rivokar bogo na Kulorinio Kenerinio naio rimeul bereio ea nam̄ariano, naruei ea bogo na mia kuverialio ka tomu nalo.” <sup>10</sup> Ana nalo amijogkar Yesu kiano iliano nei, mia nalo abokar iliano nei be kialo ga, kar na nalo aju abivika denlo aber venia naruei be nioti na kiano iliano nei napano naio jo berii rimeul bereio ea nam̄ariano.

*Nalo aberiaḡa Elaija juo nene mia naio rimej navo, mia Yesu ber Jone Baruei ruei*

<sup>11</sup> Ana naiagagoano tolu nei nalo abika den Yesu, aber “Jun̄iabe ka tomu na verloglogiano na tuboiano nalo aju aber Elaija mia rimej bereio beamu, iorou Naverikariano nei mia riyotuba?”

<sup>12</sup> Ana Yesu berdoḡe banlo, berinavo “Nina nalo aberio be riano ga, Elaija monoka rimej beamu ka rila saba nalo rimemedu ka Naverikariano naio rijikia rimej. Mia iliano lu nalo aju aber todolu tai bunu na nalo maka atu asidomii, nina jo berii Kulorinio Kenerinio, berinavo mia naio monoka riviviuo bogokouo ve telabo, a mia tomu nalo asidomii va lelan naio laka. <sup>13</sup> A kiniou neber ka kamiu, neber Elaija nei naio binimej vonga garuei, a tomu nalo maka asidom naio. Jibe Iliano Lu naio berenio, nalo amila bova ka naio ruei.”

*Yesu mijil bulagio siŋaro ea mēaku tai Mataiu 17:14-22; Luka 9:37-43*

<sup>14</sup> Naruei Yesu bija nalo tolu nei aju aban ea naiagagoano dolu nalo, ana amial napano tiniobi miroalo aju jeliviv ealo, a nalo amial ka naverloglogiano nalo na tuboiano bunu aju jeliviv ealo. <sup>15</sup> Ana bogo na tiniobi nalo nei amial Yesu jo binimei bereio, nalo amiilo ka naio, a nalo ajaaro toru ka amialio, ana nalo ajikiti abinimei eaio, nalo aban juŋialo bija naio. <sup>16</sup> Ana Yesu bika den naiagagoano nalo berinavo “Ee, kamiu kumitu kumitukunu ka vaio bija nalo na?”

<sup>17</sup> Ana nalo tai ber ka Yesu, berinavo “Naverloglogiano, kiniou naruei noburu keneriku suŋano mēaku binimei easo ka jau keial naio, ka siŋaro tai na buru joa naio. <sup>18</sup> Ana bogo na jo miŋaukanio, buku naio batove ea borotano, titinio miou kirivova jibe tililevlevi, naio jer mārjuvono, a niabene nalo aŋmāriulu. Ana kiniou noburu naio binimei, ana jau maka koto, ana nebika kiamo naiagagoano nalo ka abolkouo ka ajil lar siŋaro nene, ana nalo amila vonvonio, amila banbano-o, nalo abijukudeio.”

<sup>19</sup> Ana Yesu berdoŋe, mil banlo, naio berinavo “Kamiu na, juŋabe jibe na? Kamiu maka kuvitu sikili ea Atua leleio. Kiniou monoka noto vija kamiu vano-o vokar nagi? Kiniou tinieku maro ka kamiu ruei. Mo, bo ga, kuvuru mēaku nene rimeio ea kiniou.”

<sup>20</sup> Ana nalo aburu binimei, ana bogo napano siŋaro nene mial Yesu, mila mēaku neibano niabene mārŋariulu, mila mijoru ea borotano, naio jo bilivilig janea vio jibe na, a mila titinio miou bova jibe jo beŋeili. <sup>21</sup> Ana Yesu bika suŋano mēaku nei karamāno, berinavo “A siŋaro nei jikar mila naio jibe na nagi ruei?”

Ana karaŋano berdoŋeio, berinavo “O, tenei nua ruei, bogo na naio be tete kia ga vo. <sup>22</sup> Binimei bokar banei bogo telabo ruei, tena joŋa mila naio jo mijoru batove ea sebi ŋeli ea bulukue. Tena jidom rue-bulag naio laka, a ver jau komijikia kala titai ka naio, kumemi nubika denso, aua jau tiniem riia kumemi, jau koija kumemi rivior kenerimemi nei.”

<sup>23</sup> Ana Yesu ber ka naio berinavo “Kiniou nomijog ka kober jibe na, ver kiniou ne-jikia neiŋaukaio. Ana kiniou neber kaso, verver jau komonmonea ga, jau komijikia koiŋauka vite nonovio.”

<sup>24</sup> Naruei suŋano mēaku nei karamāno bio soŋeli ban Yesu, jeji banio, berinavo “Nojo nomonea teliki, a maka nomonea

vare vo. Aua jau koija kiniou ka kiaku moneano rimeio ve toru lie.”

<sup>25</sup> Ana bogo na Yesu mial ka tiniobi abinimeio miroano aju ajelivivi ealo, ana naio mil ban niununo va nei napano joa suŋano mēaku nei, berinavo “Jau niununo va na tiliniene bono, a na be buru, neber memedu banso, neber jau kataluvo den naio vonganei, a mia kavan lele re bunu joomo eaio bereio bogo tai.”

<sup>26</sup> Ana niununo va nene miaga va laka, a mila suŋano mēaku nei niabene aŋmāriulu banbano ba bova laka, ana naio jaluvo denio, buro bano. Vonganei suŋano mēaku nei niabene melukluku laka jo, jibe ka naio m̄aro ga, a tomu nalo na aju abitii aber jibe nei naruei, aberinavo “O, suŋano mēaku nei naio m̄aro ruei na.”

<sup>27</sup> Mia Yesu bokar juŋano, ana buru suŋano mēaku nene jumolu, ana jumolu ju vatitig jo. <sup>28</sup> Mia iorou, Yesu ban bere ea komeli bereio, ana ka bogo na, napano naio jo naio takurano ga, kiano naiagagoano nalo abinimeio abika, aberinavo “Juŋabe kumemi maka nuvijikia nuvijililar siŋaro na joa suŋano mēaku na?”

<sup>29</sup> Ana Yesu ber kalo, berinavo “Siŋaro ninio nalo na jibe na, nalo ajikili laka, volkouano ga mijikia rijil bulaglo.”

*Yesu berial bereio kiano m̄ariano Mataiu 17:22-23; Luka 9:43-45*

<sup>30</sup> Mia Yesu nalo ajuvan vio nei, ana nalo abanvano amalmaluvo ga ea tanobuku nalo na Kalele, mia ea bogo na, Yesu maka sidom ka tomu nalo ajikia venia na naio jo milaio, ŋeli ea vio vabe na nalo aju aban eaio. <sup>31</sup> Nina, bior ka naio jo berloglog kiano naiagagoano nalo ea bogo na, ana naio jo ber kalo, berinavo “Vaataro ka mia adu Kulorinio Kenerinio van ea tomu nalo juŋalo napano mia auebin naio riŋaro, mia iorou, ea bogoti ve tolu, mia Atua rila naio rimeul bereio.”

<sup>32</sup> A kiano naiagagoano nalo maka ajoglubarbar vo venia napano Yesu naio jo berenio banlo, a nalo amerou ka avika vatitig denio bereio.

*Toro kei naio jo mave ka toro dolu Mataiu 18:1-5; Luka 9:46-48*

<sup>33</sup> Ana iorou, bogo tai abinimeio abokar bereio Kapeneam, abinimeio joomo ea yimo tai, ana Yesu bika den kiano naiagagoano nalo, berinavo “Kamiu kumitu kubivivika iliano ea kamiu ea m̄arabo bior vaio?”

<sup>34</sup> Mia maka averdoŋeio van naio, bior ka bogo na nalo aju amiel abinimeio ea m̄arabo, nalo aju amil banlo, aber kei kalo

na jo loa mave, ħeli kei naio bo loa tealo. <sup>35</sup> Ana Yesu jotano, bio nalo duelimo ba juo [12] nei ka amei vaataro ka naio, ana naio ber kalo, berinavo "Verver kamiu tai na jidom naio to ve moti, a naio jidom ka siano to mave, bo ga, ana mia naio monoka rila naio rimej ve na maariano, to totano maariano laka garuei, naio monoka rimej tibe toro na inĥauano na nalo dolu beamu."

<sup>36</sup> Ana Yesu bio kiritete tai napano jo binimej ea naio, naio miduio jikili ju iviso kalo, ana naio bokar tete nei ana ber kalo, berinavo <sup>37</sup> "Toro na kiano jidomiano batove ka kiniou, ana naio tinien jaaro ka rila vatitig kiritete tai na jibe nei, nina, jibeka ga na naio jo jaaro ka kiniou. A toro na jaaro ka kiniou jibe na, maka saaro ka kiniou ga, mia naio jaaro ka nina naio miila kiniou nebinimej."

*"Toro na maka to verbure kito, naio jo miija kito"*

*Mataiu 18:6-9; Luka 9:49-50, 17:1-2*

<sup>38</sup> Ana naiagagoano nei Jone ber ka Yesu, berinavo "Naverloglogiano, kumemi numial toro tai, napano naio jo mijil bulag siĥaro nalo, naio jo mijil bulaglo ea siamo. A toro nene maka nuvijikiao, naio maka ve kito tai, mia kito rotuko vio ka naio."

<sup>39</sup> Ana Yesu ber kalo, berinavo "Makanio, kamiu kuverbure re naio. Verver toro tai jibe naio be riano, ana naio mila inĥauano nalo na bo tortoru laka ea siaku, mia toro na maka rijikia ril vova ea siaku bereio bogo tai. <sup>40</sup> Toro na maka to toko vio ka kito, naio jo miija kito na. <sup>41</sup> Neber be riano ban kamiu, ka ver toro tai mijikia ka kamiu kumitu kubar Kristo siano ea kamiu, ana naio midu baja na uei tai ban kamiu ka kumunio, toro na mia maka rijikia rilaluvu kiano jidomiano tai na bo mia naio ruduio iorou."

*Tubotuboiano nalo*

<sup>42</sup> A Yesu ber bunu, berinavo "A verver toro tai rila ka tete tai naio maka bunu sikili ea kiniou, mia toro na ridu mauo tai na jikili lie vo, todovulu nina mia ver aiorikar puruveru tai na toru ea burujono ana avuku naio rivan ea niogovu.

<sup>43-46</sup> "Verver juĥamo tai ħeli na jaamo tai milaso maka bunu koto sikili ea kiniou, bo ka ketelario rivan ga. Verver kete bajago na kariano ea kiamo meuliano tibe na, mia komijikia kava joomo ea meuliano, a ver kava joomo ea meuliano a juĥamo tivelinio ħeli jaamo aba kovio ruei, nina bo ga na. Mia bova laka ver juĥamo ve juo vija jaamo ve juo nalo atu rivu ga, mia iorou avukuso ea sebi na maka rijikia

riĥaro bogo tai. <sup>47</sup> Peli ver miramo, ħeli venia bereio ea kiamo meuliano milaso maka bunu koto kesikili ea kiniou, bo ka jau kojja lario ga. Tibe na, mia jau kava joomo ea Atua kiano navenatubioano napano vite teliki nei bakovio denso ruei, a nina bo ga na. A bova laka ver miramo ve juo ħeli kiamo bajago bova nalo ju bo ga easo, mia iorou tenalo teliki nei ga buru kiamo meuliano ban ea sebi ea vio na jogvaiano, <sup>48</sup> napano sebi nene maka rijikia riĥaro bogo tai, sorel nalo aju ajen mokotenamo bogo nonovio ga.

<sup>49</sup> "Jibe na tei mijikia rila sinaniano maka jikia soono, mia Atua ridu sebi toa tomu nalo ka sisen bulag soro nalo na joo kialo meuliano. <sup>50</sup> Mia romial bunu tei mila sado sinaniano jesei bunu, a ver kiano sikiliano riva kovio, naio maka bunu rijikia rila kiano inĥauano. Vonganej kamiu monoka kuvijamo ka Atua kiano tei riĥau ea kamiu bogo nonovio, ka kenemiu meuliano soono re, a ka kenemiu bajago naio sese, mia kamiu kuvitu vija tuĥaro bogo nonovio."

## 10

*Yesu berij juĥabe toro jitiglar koano  
Mataiu 19:1-12; Luka 16:18*

<sup>1</sup> Ana iorou, Yesu juvan vio Kalele, naruei naio bavin tivelinio ka tanobuku na Yutea, ea ĥarauei na vio Yortano tivelinio bano. Ana tiniobi nalo aju abinimej ea naio bereio ea vio na, a javukia napano naio jonĥa mila julaka, naio berlogloglo ka vite telabo. <sup>2</sup> Mia Varisis tai aju bunu ea bogo nei, mia nalo abinimej ea Yesu, a ajidom alavon naio bereio, naruei nalo abika vikadeniano tai denio. Nalo aberinavo "Tuboiano na kanado naio ber vaio ka tivelinio na bajago nei napano toro naio jitiglar koano? Juĥabe, jau be tiniemo ka napano toro mijikia rila tibena, ħeli na maka rimemedu?"

<sup>3</sup> Ana Yesu bika ber banlo, berinavo "Mia tormoruo Mosis naio berial venia ea kiano tuboiano ruei?"

<sup>4</sup> Mia Varisis nalo nei aberenio, aberinavo "Mosis naio berial ea tuboiano tai napano mijamo ka toro mijikia sian ĥesai tai van koano, naruei naio mijikia riilalar naio rivano."

<sup>5</sup> Mia Yesu naio berdoĥe banlo, berinavo "Nao, mia Mosis naio bivitauia iliano na bior napano ga pariparimiu nalo abinimej jikili laka, tenene na naruei mila naio mijamo jibe na kar kamiu kumijikia kuvilalar kouemiu nalo. <sup>6</sup> Mia jikario ea

tiano naio maka tibena, bior napano Atua kanano iliano lu naio berinavo

'Ea burupati Atua jii tomu nalo, napano suṁṁano bija tira.'

<sup>7</sup> "A iliano dolu bunu berinavo

'Tibena, mia toro tuvan karamṁano a kenieno,

naruei riva to rivijurukar vija koano,

<sup>8</sup> naruei naljuo abinimei abe takurano ga.'

"Nina naio mila ka naljuo maka bunu ave juo, mia naljuo abinimei abe takurano ga. <sup>9</sup> Mia venia na Atua miasolio binimei be takurano, maka rimemedu ka toro silubar bereio."

<sup>10</sup> Ana bogo napano nalo aba joomo ea yimo bereio, Yesu kanano naiagagoano nalo abika naio bereio tivelinio na iliano nalo nei. <sup>11</sup> Ana Yesu ber memedu banlo, berinavo "Verenio toro tai titiglar koano, karina naio riva rivuru tira dolu tai, Atua mial jibe toro nei naio jo mila siakaiano ruei, naio mila lelan bunu tira nei napano naio be koano jukamu. <sup>12</sup> Mia verenio tira tai rivuro den kanano suṁṁano, riva soro ka toro dolu tai bereio, naio bunu Atua mial ka naio mila siakaiano ruei."

*Yesu milivu ka kiritete nalo*

*Mataiu 19:13-15; Luka 18:15-17*

<sup>13</sup> Naruei tealo aburu kenerilo nalo abinimei ea Yesu ka naio tokol lo, ana naiagagoano nalo amialio, naruei amil jikili ban tomu nalo nei aberburelo. <sup>14</sup> Mia bogo napano Yesu mialio, maka saoro leleio ka napano kanano naiagagoano nalo amila jibena, ana naio ber kalo, berinavo "Kamii kuverbure re kiritete nalo na, kamii kuvijamo kalo amei ea kiniou ga, bior napano kiritete nalo ajibe ka ga tomu nalo napano aju jouro ea Atua kiano navenatuboiano. <sup>15</sup> Kiniou neber riano ka kamii, ka toro napano naio jidom riva jouro ea Atua kiano navenatuboiano, naio monoka rijikia ka naio javukia kiritete teliki tai ga, naio maka rijikia rila vite tai ka rila ka naio rudu Atua kiano navenatuboiano nei ea kiano meuliano."

<sup>16</sup> Ana Yesu bokar kiritete nalo nene, jikario naruei ka naio midu juṁṁano joa pariparilo ka naio rilivu kalo.

*Meaku tai napano be sanibaiano*

*Mataiu 19:16; Luka 18:18-23*

<sup>17</sup> Naruei bogo napano Yesu jo batavio ka riel rivano, toro tai jikiti binimei minie tano ka Yesu, naio bika denio, berinavo "Naverloglogiano novo, kiniou monoka nala iṁṁauano vaio ka rila ka mia kiniou novokar meuliano nei napano maka rijikia ribisi?"

<sup>18</sup> Ana Yesu ber ka naio berinavo "Bior vaio ana jau kobio kiniou jibe na kober kiniou nebe naverloglogiano novo? Maka ve toro tai napano be kirinovo to, mia Atua naio ga takurano naio be kirinovo. <sup>19</sup> A jau komijikia bunu kanano tuboiano nalo, napano kito monoka romonea nalo, napano aber jibene aberinavo: Jau kouebin re toro, jau kola re siakaiano, jau kovina re, jau kala sibi re, jau kojukujuku re toro, jau kavamenea karamṁano naio koniomo."

<sup>20</sup> Ana mṁeaku nene berkanio, berinavo "Naverloglogiano, tuboiano nalo na napano jau koberenio, bogo napano kiniou nebe tete kia ga vo, kiniou nojorṁa nobokar nonovlo, binimei bokar banei."

<sup>21</sup> Ana Yesu bitikar naio bano-o, tinien jii naio toru bior kanano iliano nei, ana naio berkanio, berinavo "Vite takurano ga jo keano vo, napano jau maka kalaio vo. Jau kava koṁilivili bulag ka kanamo vite nonovio nalo, ana jau kavar veru na vite nalo nene, jau kava kotiburevure van talinṁasa nalo. Ver jau kala tibena, mia jau ve kanamo vite novonovo nalo ve miroano ea tiniabene. Mo, jau kava kalaio, karina komei katakisor kiniou."

<sup>22</sup> Mia bogo na mṁeaku nei mijog iliano nei, naio miilo va kanio, ana kanano iviso mijog bova toru, bior napano naio be kiano vite miroano. Ana naio jaluvo den Yesu.

*Toro napano be sanibaiano, jikili ka naio rivan ea Atua kanano navenatuboiano*  
*Mataiu 19:23-30; Luka 18:24-30*

<sup>23</sup> Naruei Yesu jirarag jeliviv ea naiagagoano nalo, ber kalo, berinavo "Kiniou neber batitig ban kamii, neber ver toro tai napano be kiano vite miroano, mia naio jidom riva jouro ea Atua kanano navenatuboiano, nina naio jikili mia jikili na."

<sup>24</sup> Mia naiagagoano nalo amiilo toru laka ka Yesu kiano iliano nei, ana naio ber bereio kalo, berinavo "Riano keneriku nalo, ka ava jouro ea Atua kanano navenatuboiano, jikili mia jikili na. <sup>25</sup> Kiniou neber ka kamii, ka kamele tai riovídulu ea bulumirano nitil tai, naio jikili laka, mia ka toro tai napano be kanano vite miroano ka naio rijikia riva jouro ea Atua kanano navenatuboiano, nina naio kirisikili lie vo."

<sup>26</sup> Ana bogo na naiagagoano nalo amijog iliano nalo nei, mia nalo amiilo toru laka kanio, ana aberinavo "Tomnei! Mia karina, aber mia kei naio mijikia rivokar meuliano?"



<sup>27</sup> Mia Yesu jirarag bitikarlo, berinavo "Toro maka rijikia rilarur toro, mia Atua naio mijikia rila vite nonovio."

<sup>28</sup> Naruei Pitere naio jidom ril naruei, berinavo "? Mia juñabe ka kumemi? Kumemi numituvan kenememi vite nonovio ruei, ana kumemi nubinimei numitakisorso."

<sup>29</sup> Ana Yesu ber kalo, berinavo "Kiniou neber riano ban kamiu, ka toro kei napano naio tuvan kunuano, ðeli kuruano bija kuviviniene, ðeli kenieno bija karamiano, ðeli kenerinio, ðeli kiano borotano, rivior kiniou a rivior kanaku ioluano vou nei, <sup>30</sup> mia naio rivej bereio venia naio juvan riva rivokar toromomou ve takurano [100]. Ea yetemeriba nei, mia naio rivokar bereio yimo nalo, kuruano nalo, kuviviniene nalo, kenieno nalo, kenerinio nalo, borotano nalo, mia vija vite nalo nei mia naio rivokar bogokouo nalo ve telabo, napano tomu nalo ajerni ka naio bunu. A mave ka vite dolu nalo nei, ea bogo napano jo binimei, mia naio rivokar bunu meuliano nei napano maka rijikia ribisi. <sup>31</sup> Mia tomu telabo napano ña aju mave vonganei, iorou nalo atu yetano, a nalo napano ña aju yetano vonganei, iorou mia nalo atu mave."

*Yesu berial kanano ñariano varolu nene*

*Mataiu 20:17-19; Luka 18:31-34*

<sup>32</sup> Ana Yesu nalo aju amieli ea ñarabo, aju abavin Yerusalemo naruei. Ana Yesu naio jo miel jukamu ka kanano naiagagoano nalo, mia aju amiilo laka napano naio jo buruñarabo kalo aba Yerusalemo, bior nalo amijikia ka tomu nalo na vio na ajerni laka ka Yesu. A nalo dolu nañia aju abinimei iorou kalo, nalo bunu aju amermerou kija naruei. Mia Yesu naio bio kanano duelimo ba juo [12] amei vaataro ka naio, ana naio berial bere kalo juñabe mia ala kiki naio yako Yerusalemo.

<sup>33</sup> Naio ber bisivisii banlo, naio berinavo "Kamiu kuviniagago vatitig. Vonganei kito roju rabavin Yerusalemo naruei, napano rivesiou re, mia adu Kulorinio Kenerinio toa tomu na tortoru na kulo lu nalo juñalo nalo vija naverloglogiano na tuboiano, naruei mia nalo na atibure naio ka mia naio monoka riñaro. A mia adu naio toa kulo Romo nalo juñalo, <sup>34</sup> naruei nalo na mia ayotel va ea naio, avule mirano, mia avitiv naio, rivan mia auebinio riñaro. Mia ka bogoti ve tolu nene, mia naio rimeul bereio."

*Yemesi naio Jone naljuo abika titai den Yesu*

*Mataiu 20:20-23*

<sup>35</sup> Ana nalo aban lie telisu bereio, ana Sepeti kenerinio juo nei Yemesi naio Jone, naljuo abinimei vaataro ka Yesu, ana abika denio, aberinavo "Naverloglogiano, kumemi juo numisidom ver venia na mia kumemi ve juo nuvika denso vonganei, mia jau kotuvan van kumemi juo ga."

<sup>36</sup> Ana Yesu berdoþe ban naljuo, berinavo "? A kamjuo kumisidom kuvika ka mia kiniou nela vaio ka kam ve juo?"

<sup>37</sup> Ana nalo abe juo aberdoþeio, aberinavo "Kumemi juo numisidom ka kajamo ana ver bogo napano jau komei tibe parinio tubo ea yetemeriba nei, mia kumemi juo numijikia nuvitutano ea ki-amo vio lu vaataro kaso, tai toa juñamo meruo, a tai ea mali."

<sup>38</sup> Ana Yesu ber ka naljuo, berinavo "Kamjuo maka kuvijikia tena kamiu kumitu kubikano? Juñabe, kamjuo na kumisidom ka kamjuo kubare ka romunu vio takurano ea baja na jogvaiano na mia kiniou monoka nomunu eaio? Peli kamjuo kuber kamjuo kumijikia kuvidu varueiano napano abaruei ea kiniou kanio?"

<sup>39</sup> Ana naljuo aber ka naio, aber "Ee, kumemi juo nubare."

Ana Yesu ber ka naljuo, berinavo "Ee, be riano ka mia kamjuo kumunu ea kiaku baja na jogvaiano, a be riano bunu ka mia avaruei ea kamiu ka uei napano abaruei ea kiniou kanio, <sup>40</sup> a vite na kamiu kubika na, ka kam ve juo kuvitutano vija kiniou, ea tivelinio ve juo na kiniou, tena maka ve kiaku ka mia nejikia notuvan van kamjuo. Vio nalo na jibe na, nalo ga na Karamiaku mila vatitigio kalo, a napano naio berkar ruei ka mia nalo atutano ealo."

*Kulorinio Kenerinio binimei ka riñau tomu nalo kialo*

*Mataiu 20:24-28*

<sup>41</sup> Mia naiagagoano duelimo dolu amijog tenei napano kurualo juo nei Yemesi naio Jone abikano, ana nalo tiniel jerlo abe juo. <sup>42</sup> Ana Yesu bio nalo abinimei ka naio ril vanlo, ana naio ber kalo, berinavo "Kito romijikia ruei tomu nalo kialo bajago napano maka amonea Atua. Kito romial ka tubo nalo bija tomu nalo na tortoru ea vio yetemeriba nei, nalo aju ajututua tomu nalo dolu ka atu yetano ka nalo bogo nonovio. <sup>43-44</sup> A kiaku naiagagoano nalo kenemiu bajago monoka tibena re. Verver kamiu tai sidom ka rimei rive toro na toru tai ðeli naio rimei rive kenemiu toro na vurinñaraboiano tai, kiano ñarabo

jibe nei. Toro na monoka rimei tibe toro tai ga na rimāu kenemiu. <sup>45</sup> Kulorinio Kenerinio mila jibena ruei, na naio maka rimei ka tomu nalo aija naio, mia naio binime ka rijai tomu nalo a ka rijamo ka kiano meuliano ka rivulu bulag tomu ve miroano.”

*Yesu milarur merebono tai  
Luka 18:35-43*

<sup>46</sup> Ana Yesu bija kiano naiagagoano nalo abinime aju Jeriko, ana iorou, bogo na nalo ajunā abanvan ea komeli nei, tomu miroano ajakisorlo. Nalo aju amiel abano, ana merebono tai naio jonā jotano ea ikimārabō tivelinio ea vio nei. Toro nene, karamāno siano Timeas, ana nalo abio kenerinio nene ka Batimeas. Batimeas nene, naio jonā jotano ea mārabo bogo nonovio ga, naio jo bio ban tomu nalo ka nalo aje veru ve teliki van naio ka rimeul eaio.

<sup>47</sup> A bogo na mijog ka Yesu na vio Nasarete nei naio jo miel ea mārabo binime, naio jo bio, berinavo “Oi Yesu, jau Teviti kiano bajulukuti! Kiniou nojidom tiniem riia kiniou beamu.”

<sup>48</sup> Ana tomu nalo dolu amil tiniemimi ban naio, aberinavo “!Ei, jau koyotuba re!”

A naio jo bio mave lie, berinavo “Oi Tubo, jau Teviti kiano bajulukuti! Neber bo kaso tiniem riia kiniou!”

<sup>49</sup> Ana Yesu binime jikili joa vio nei, ber ka tomu nalo ber avio toro napano na rimei vaataro ka naio, ana nalo aba aber ka merebono napano, aber “?Ei, komijikia vaio?”

Ana toro neibano ber “Venia?”

Nalo aber “Yesu nei naio berenio jau komei vaataro ka naio beamu vo. Bo ga, jau kotumolu kito ravano.”

<sup>50</sup> Ana toro napano naio miyalar māno kulukoti, naio jumolu soḡeli ga, ana binime ea Yesu. <sup>51</sup> Mia Yesu bika den naio berinavo “?Ana jau kojidom mia nala vaio kaso?”

Mia toro nei berdoḡe, berinavo “Tubo, aua, kiniou nojidom ka kala miraku nalo rimei rivu, ka kiniou nejikia nesirarago.”

<sup>52</sup> Mia Yesu ber kanio, berinavo “Bo, jau komijikia kavan bere ea kiamo vonuo, kiamo viekouoiano naio mila na jau kobinime bo ruei.” Mia toro nei naio mial vatitig vite ea aura nene ga, mia naio jo mieliel ea mārabo, naio jo jakisor Yesu bano.

## 11

*Yesu binimei bokar vio nei Yerusalemo  
Mataiu 21:1-11; Luka 19:28-40; Jone  
12:12-19*

<sup>1</sup> Vonganei, Yesu nalo abini mei vaataro ka Yerusalemo naruei, ana beamu kanio, nalo amiyotuba ea komeli juo nalo na terteliki nei, Betevas bija Betani, napano nalo aju tivelinio ea suku nei napano ajisia ka Suku na Buruolivi. Ana Yesu miila kiano naiagagoano juo, berinavo <sup>2</sup> “Kamjuo kuvan ea komeli yako na, mia memedu ka bogo na kam ve juo kuva jouro eaio, mia kuvial kirikiti togki tai, napano amiadikario ju, napano toro maka lele totania kija taakano vo. Mia kam ve juo kuvijubarlar sano teli, ana kuvuruio rimei bereio van kiniou ea vio nei. <sup>3</sup> A verver toro tai ril rivan kamiu kanio, rivika riverinavo ‘? Kamiu kumila jibe na ka venia,’ mia kamiu kuver ka naio, kuverinavo ‘Tubo nalo jidom temeul nei, a mia naio riila rimei bereio ea vio nei vesiou re.’”

<sup>4</sup> Ana naiagagoano juo nei abano, ana aba amial kirikiti togki nene, napano amiadikario, naio jumolu ju ju tavio ka māratabo na yimo tai tivelinio ka mārabo. Ana naljuo ajidom ka ajubarlar sano teli, <sup>5</sup> mia nalo napano ajua vio na, abika aberinavo “?Oi, kamiu kumitu kumila venia na, na kumitu kumijubar bulag teli nene na?”

<sup>6</sup> Mia naljuo aber kalo iliano nalo na Yesu ber kalo ruei, napano mia nalo amijikia averii ka tomu nalo, ana tomu nalo amijamo ka naljuo amijikia avuru togki riva rivu ga. <sup>7</sup> Ana naljuo aburu togki nene binime, ana nalo abisi mālo kulukoti nalo ea taakano, ana Yesu bavin jotano mave eaio. <sup>8</sup> Ana tomu nalo miroano amiya bulag mālo kulukoti nalo abisi ea mārabo, a nalo tealo aba aje mārāli nalo, abar abulan ea mārabo ka togki naio rijikia riel eaio. Jibe na, nalo amila ka avatove ka Yesu jibe ka naio be tubo tai na toru laka.

<sup>9</sup> Ana nalo amiel ka abano ka ava jouro Yerusalemo, a tiniobi nalo napano aban jukamu ka Yesu, bija nalo napano iorou ka naio, nalo aju amiaga laka jibe nei, nalo aberinavo

!Bo mia bo laka! Roiovu ka naio!

!Atua Soḡi jau keilivu ka naio nei napano binime ea siamo!

<sup>10</sup> !Kito rajaaro toru ka Navenatubioiano na kiado tormoruo Teviti nei napano joa binime!

Kamiu nalo na tiniabene mave kuviovu bunu ka naio!

<sup>11</sup> Ana Yesu ba jouro yako Yerusalemo, a naio ba bokar Atua Kunuano Lu. Ana naio ba joomo, ba bitii vio nalo nene, a vite nalo nonovio napano amila eaio. Ana mērenio jo batove ruei, mia naio buru kiano naiagagoano duelimo ba juo [12], ana nalo ajaluvo ea komeli na toru nei bereio, nalo aba amon Betani.

*Bulabati iesi na maka rivar m̄arati vo Mataiu 21:18-19*

<sup>12</sup> Ana kavijova, nalo ajaluvo Betani bereio, nalo amiel abinimei bereio Yerusalemo, ana Yesu naio mijog vitu. <sup>13</sup> Ana naio bitii buruviki tai jo, ana naio miel ba vaataro kanio ka rivar m̄arati tealo. Mia bogo na naio binimei mialio, naio mial ka buruviki nene, m̄ati telabo, a maka ve m̄arati, bior maka ve bogo nene vo. <sup>14</sup> Ana Yesu naio mil ban buruviki nene, berinavo "Jau, mia jau maka leleio kejikia kavar m̄arati bereio ka tomu nalo ajikia asenio." A kiano naiagagoano nalo amijog bunu ka naio ber iliano nei.

*Yesu naio mijil dedade ea nalo nam̄a aju aṗilvili ka saba ea Atua Kunuano Lu*

*Mataiu 21:12-17; Luka 19:45-48; Jone 2:13-22*

<sup>15</sup> Ana Yesu nalo aba abokar Yerusalemo bereio, ana nalo aban bereio joomo ea Atua Kunuano Lu. A Yesu bitii bereio ka tomu nalo miroano ka nalo aju tivelinio ka yimo, nalo aju amir̄auka ir̄auano nalo na ka ajev veru eaio, a tomu miroano aju abulu saba nalo na aju aṗilvili kanio. Ana naio maka leleio saaro kanio, naio ba mijil bulaglo, bilig dea ka barobaro nalo napano nalo ajum̄a amijebukua veru nalo na vio Romo binimei ea veru na kulo Ju nalo kialo, napano nalo ajum̄a ajuvanio ea Yimo Lu. A ba bunu buku bulag kialo iesi na totaniano na nalo aju aṗilvili ka sibo na sida. <sup>16</sup> A naio berbure bunu nalo nam̄a aju ajidom avar kialo saba nalo na ir̄auano ka aiel avarkorov yati na Yimo Lu nei.

<sup>17</sup> Ana naio berlogloglo, berinavo "ʔ Jun̄abe, kamiu maka kuvijikia ka Atua berial ea kiano Iliano Lu, ber

*'Mia nalo aver kiaku Yimo Lu naio be yimo na volkouano na taara nonovio na tomu nalo na yetemeriba reraio'?*  
*Ais 56:7*

*'A mia kamiu kumitu kubilig Yimo Lu nei ruei ka rimeibe buluvae tai na vinauano.'*  
*Jeremaia 7:11*

<sup>18</sup> Ana maka vesiou tomu nalo na tortoru na kulo lu bija naverloglogiano nalo na tuboiano, amijog venia na Yesu naio mila ruei ea Atua Kunuano Lu, mia nalo tiniel mimi laka, nalo ajidom ala titai kanio. Mia nalo amerou laka ka Yesu, nalo maka bunu ala, bior nalo abitulubar ka tomu nalo ajidom laka ka naio, nalo aju amiilo ka kiano verloglogiano novo nalo. <sup>19</sup> Mia ka bogo na m̄erenio jo batove ruei, Yesu nalo ajaluvo Yerusalemo bereio.

*Bulabati iesi na maka rivar m̄arati naio riṁaro nonovio*

*Mataiu 21:20-22*

<sup>20</sup> Mia kavijo, nalo aju amiel abano Yerusalemo bereio, ana amial bereio buruviki napano beamu na, ana nalo amial ka vonganei m̄ati nalo mekekeu biniau ruei. <sup>21</sup> Ana Pitere naio jidomii bereio Yesu kiano iliano, ana naio ber ka naio, berinavo "Tubo, jau keial vo! Buruviki nei napano jau komil banio niovo, vonganei naio binimei mekekeu nonovio ruei!"

<sup>22</sup> Ana Yesu berdoṗeio, ber kalo, berinavo "Kamiu monoka kuvitu sikili vija Atua. <sup>23</sup> Kiniou neber be riano ban kamiu, ver toro kei na maka kiano jidomiano veve juo, a monea kirisikili, ana venia na naio berenio, mia monoka tibe na ga. Verver naio ril van burusuku na toru nei, river kanio riverinavo 'Jau kavatove koviako ea tei,' nina, mia monoka tibe na ga. <sup>24</sup> Nina naruei kiniou neber ka kamiu, ka venia na kamiu kumitu kubika ea kenemiu volkouano, verver jau komonea sikili ka tena be kiamo ruei, bo, mia monoka tibe na ga naruei. <sup>25-26</sup> A ea bogo nonovio na kamiu kuvisidomii ka kubolkouo, kamiu monoka tiniemiu maio ka bunu, ka ver titai joaso bija toro dolu, monoka koviekokoa beamu, karina jau komijikia kotumolu koverialio ea kiamo volkouano nene van Atua. Verver jau kala tibena, mia Karam̄ado na tiniabene, naio bunu mia sidomii ka riviekokoaso ka kiamo vovaiano nalo."

*Navurim̄araboiano nalo na Israel nalo ajidom averbure Yesu*

*Mataiu 11:23-27; Luka 20:1-8*

<sup>27</sup> Ana Yesu nalo amiel abinimei abokar bereio Yerusalemo, ana nalo aba jouro ea burusio na Atua Kunuano Lu bereio. Ana bogo napano nalo aju amiel jouro, tomu nalo na tortoru na kulo lu nalo, bija tomu na verloglogiano na tuboiano, bija tomu na vurim̄araboiano na kulo Ju kialo, nalo abinimei ea naio. <sup>28</sup> Nalo abika naio, aberinavo "ʔJau kojo komila jibena ea vio nei ea kei siano? Peli kei bereio na berii kaso ka jau kala tibena?"

<sup>29</sup> Ana Yesu naio ber kalo, berinavo "Bo ga, a kiniou bunu nojidom nevika vikadeniano tai van kamiu beamu. Verver kamiu kuverdoṗe kiaku vikadeniano nei rivu, mia kiniou neverial van kamiu jun̄abe ana kiniou nemijikia nemila jibe nei. <sup>30</sup> Bo ga, kiaku vikadeniano naio jibe nei naruei, berinavo 'Baruei nei na Jone naio mila von nua bogobe ka tomu nalo, naio be titai na Atua ber ka Jone ka naio rilaiio, ṗeli tomu nalo ga nalo aber ka naio? Kamiu

kuvilavon ka kuverdoŝe kiaku vikadeniano nei.”

<sup>31</sup> Mia Yesu kiano vikadeniano nei naio mila nalo abilvili ealo bereio, nina naloaju aberinavo “?Mia kito rover tumabe ka naio? !Rovitakar batitig kito nei! Verver kito rover varueiano nene Atua naio ber ka Jone, mia toro na monoka rivika den kito river ka venia na kito maka romonea Jone. <sup>32</sup> Ana kito maka rejikia rover bereio Jone kiano varueiano nene naio miyotuba ea tomu nalo kialo jidomiano ga, ka ver maka mia tomu nalo tiniel ser kito!”

Tomu nalo na tortoru nei nalo amerou ka aver iliano nei, ka nalo amijikia ka tomu naloaju amonea Jone jikil ruei ka naio be Atua kiano naverialiano tai na be riano. <sup>33</sup> Ana kialo jidomiano nalo jibe nei mila nalo aberdoŝe Yesu jibe nei ga, nalo aber ga “Kumemi maka nuvijikiaio.”

Ana Yesu ber ka nalo neibano, berinavo “Jurabe, mia kiniou bunu, kiniou maka nejikia nover ka kamiu kei naruei naio ber ka kiniou ka nala iŝauano nalo nei.”

## 12

*Jamerijiano na tomu va nalo naŝa abitikar jiotilikrevi tai*

*Mataiu 21:33-46; Luka 20:9-19*

<sup>1</sup> Mia bogo na Yesu naio jo berlogloglo, naio jo berii jamerijiano banlo bogo nonovio. Jamerijiano tai naio ber jibe nei, naio berii toro na toru tai, bija kiano jiotilikrevi tai. Toro nene naio miŝauka vatitig ka kiano vio nene, naio mila burusio tai jikili jeriko tivelinio nalo binui, ana naio mila vio tai ka rivie bulag vati markrevi, a naio mila bunu kanano burutili vio tai ka avoio avavin atu mave eaio ka asiraragkuku ka jiotilikrevi nei. Mia bogo tai, toro na toru nei naio jidom riel kiki kija rivan ea buruvenuo dolu nalo, ana naio juvan kanano jiotilikrevi nei ban kulo dolu nalo tealo, ka nalo amei aiŝau eaio, nalo avuluo van naio.

<sup>2</sup> Naruei toro na toru nei naio ba jo laka-o, karina naio mial ka vonganei be bogo na ŝariesi nalo ameruo naruei. Ana naio miila kiano toro tai ban bereio, ka rivar veru na ŝarati krevi nene togio ve kiano, nina monoka avario van naio. <sup>3</sup> Ana bogo napano naio ba miyotuba kean nalo nei, nalo amue niegeniege naio bova laka, ana nalo amijil deven naio ban bereio naruei naio maka rivar titai leleio. <sup>4</sup> Mia tubo nei naio miila kiano toro dolu bano, mia nalo nei amueio, bar ja ea parinio, nalo amila bova toru banio bano-o nalo amijil lar naio ban bereio.

<sup>5</sup> Karina naio miila bereio tai, nalo amuebinio ŝaro, a iorou kano naio miila kiano

tomu nalo miroano nalo abano, a naloaju ajukulo a amuelo bunu nalo aŝararo ga. <sup>6</sup> Naruei toro na toru nei naio mial ka toro ga takurano naio jo naruei, nina be kenerinio memedu na naio tinien jii ŝeala naio, ana naio jidomii banbano na berenio “Vonganei, monoka neiila keneriku ga naio rivano, mia nalo monoka avamenea naio.”

<sup>7</sup> “Ana bogo na kulo va nalo nei amial toro na toru nei kenerinio binimej, naloaju aberverii kalo, aberinavo ‘Nina be toro na toru kenerinio na. Toro na naruei, napano verver toro na toru rivakovio, mia naio naruei rudu tanobuku nei tibe kanano jajuŝiano. Bo ka rouebin bunu naio riŝaro, ka mia kito ga rojikia rovokar tanobuku nene ve kiado.’ <sup>8</sup> Tibe na naruei, nalo aba abokakar naio kirisikili, nalo amuebinio, ana nalo abukuio batavio ea jiotilikrevi nene.”

<sup>9</sup> Naruei Yesu naio bika denlo, berinavo “? Bogo na toro na toru na jiotilikrevi nene mia naio rimej bereio, mia naio rila tumabe ka nalo naaju amiaŝau ea kanano jiotilikrevi? Tomu nalo bova nei, mia naio rimej ruebinvin nalo aŝararo ea bajago tai na jikili, a mia naio rudu kiano jiotilikrevi rivan kulo dolu na bo.”

<sup>10</sup> Naruei Yesu ber kalo, berinavo “Iliano tai ea Atua kiano Iliano Lu napano naio ber jibe nei, berinavo

*Veru na, tomu nalo na amiŝauka yimo aberinavo naio bova, ana nalo abuku ban ruei,*

*mia vonganei veru nene binimej be veru tai napano bo ka toa ŝudu na yimo, ka naio rivokar yimo sikili.*

<sup>11</sup> *Tena, Atua ga naio mila, a kumemi numial jibe ka bo mia bo.” Iouano 118:22,23*

“? Ana jurabe naruei, iliano na kamiu kumijikia ruei, a ŝeli kamiu maka kuvuluio kija bogo tai?”

<sup>12</sup> Mia bogo na Yesu berii jamerijiano nei bisi, mia nalo na tortoru abutilubar ka naio ber iliano na jibe na ka kialo bajago, ana nalo tiniel mimi, mila naloaju ajidom alavon ka avokar naio sikili to, karina nalo amial tomu miroano laka, ana nalo ameruo kalo, ana nalo ajuvan naio jo, naloaju koalabo den naio ga.

*Vite na be Atua kanano, a vite na be Sisa kanano*

*Mataiu 22:15-22; Luka 20:20-26*

<sup>13</sup> Mia tomu nalo na tortoru aba abitii tenei, mia nalo amiila Varisis tealo bija Erot kiano burukuti tealo abinimej, ka alavon ka avika vikadeniano tealo na jikirkili ka alavon Yesu kano, napano mia naio maka rijikia ka riverdoŝeio. <sup>14</sup> Mia

nalo abinimei ea Yesu, amila sibilili naio ka iliano novo nalo, nalo aberii “Naverloglogiano, kumemi numijikia ka jau kobe riano garuei. A jau, jau maka koto komerou ka toro, ka toro na jo loa nalo dolu ꝑeli toro na toru ꝑeli na jumabe, a jau kojo koberial memedu Atua kiano m̄arabo ka tomu nalo abiniu. Mia kumemi numisidom nuvika denso tibenei, kiado tuboiano naio ber jumabe? <sup>14</sup> Naio berii memedu ka kito kulo Ju rovulu takis van Parinio Tubo Sisa nei na Romo, ꝑeli naio ber maka rimemedu? <sup>15</sup> Bo ka rovulu takis nalo ꝑeli na makanio?”

Ana Yesu naio mijikia ka aju abivika sibilisibi ga, nalo ajidom ala bulag naio ga, ana naio berkalo, berinavo “?Ee, kamiu kumitu kumisidom kuvilavon kiniou tibe na ka vaio? Bo, kuvidu veru tai rime i ka nevitii.”

<sup>16</sup> Ana nalo amidu tai binimei banio, ana naio bika denlo, berinavo “?Mirano toro kei nei joa veru na teliki nei? ?A sio na abivitaui joaio, naio be toro kei siano?”

Nalo aberenio “Parinio Tubo Sisa mirano na, a siano bunu.”

<sup>17</sup> Ana naio ber kalo berinavo “Bo ga, vite na be Sisa kiano, kamiu monoka kuvar van Sisa, a vite na be Atua kiano, kamiu monoka kuvar van Atua.”

Mia bogo na amijog verdoꝑeiano nene, nalo amiilo va laka.

*Tomu nalo na aṁarṁaro mia nalo ameul bereio*

*Mataiu 22:23-33; Luka 20:27-40*

<sup>18</sup> Mia iorou kanio, ana Satusis tealo abinimei ea Yesu, napano nalo ajidom avika den naio tivelinio na vite tai napano nalo amonea kirisikili eaio, napano tomu nalo na aṁarṁaro, nalo maka bunu ajikia ameul bereio ea bogoti na maaro. Nina naruei nalo abika den Yesu, nalo aberinavo <sup>19</sup> “Naverloglogiano, kumemi numisidom nuvika denso, ka jumabe ka iliano tai na tormoruo Mosis naio bivitaui be kiado beamu nua. Naio berinavo ver toro tai, kuruano naio m̄aro den koano tira, na nalo maka ve kenerilo tai vo, mia toro na monoka rivuru taanou nene ve koano. Ana verver tira nei rivar tete, nalo amijikia asisia naio takii karaṁano na m̄aro ruei, ka siano rimeul to. <sup>20</sup> Mia ea bogo tai, tomu aluo na abe kurualo. Nana beamu laka kalo naio buru koano tai, a mia naio m̄aro den koano napano naljuo maka avar kiritete tai vo. <sup>21</sup> Karina kurualo juo nene naio buru tira neibano, karina naio bunu m̄aro denio, na maka ve kenerinio, a iorou kurualo tolu nene naio bunu mila jibe na, <sup>22</sup> banbano-o bokar kurualo aluo

nene, nalo nonovio amila jibe na ga, nalo aṁarṁaro den tira nene. A iorou ka koano suṁano nalo nei napano abiniu aṁarṁaro ruei jibe na, tira nene naio bunu m̄aro. <sup>23</sup> Mia jau kover von tenei? Ea legiano na maaro, bogo na mia atu aver ka mia tomu nalo amemeul bereio, mia tira neibano ve kei koano, ka napano naio joro ka tomu aluo napano abe kurualo ruei?”

<sup>24</sup> Mia Yesu naio berinavo “Makanio, kenemiu jidomiano na naio ba kirivova laka. ?A ꝑeli kamiu maka kuvijikia venia mila kenemiu jidomiano bova jibe na, a? Nina ka maka kuvijikia venia na Atua kiano iliano lu berenio, a kamiu maka kuvijikia venia bunu kiano moroano na toru rijikia rilai. <sup>25</sup> Bogo na tomu nalo amemeul bereio, mia nalo atibe ka nailiano nalo na tiniabene ga, ana mia nalo maka bunu ala tenei soriano. <sup>26</sup> A ea tivelinio na ameul bereio nei, kiano iliano jo ruei ea niosi na Mosis bivitaui, napano naio berii iesi na teliki napano sebi jijenio, na Atua mil ban Mosis, berinavo

*‘Epraamo, Aisak, a Yakovo, kiniou nebe kialo Atua.’*

“?Vede kamiu maka kuvuluku iliano nei kija bogo tai, <sup>27</sup> ana mia kiniou never bisivisii van kamiu ka rivuririi kenemiu jidomiano nalo. Nalo tolu nei aṁarṁaro ea yetemeriba nei bogo be nua ruei, mia yuka telabo barlaka ruei karina Atua naio ber vonga iliano nei, ber naio be kialo Atua. Tibena, kanano iliano nei berenio nalo tolu nei aṁarṁaro ea yetemeriba nei, mia nalo aju ameul ea naio kiano vo. Atua naio maka sidom ka kiano tomu nalo ave tomu nalo na aṁarṁaro ga, mia naio jidom ka rive Atua ka tomu nalo napano amemeul.”

*Tubeiano juo na tortoru*

*Mataiu 22:34-40; Luka 10:25-28*

<sup>28</sup> Naruei naverloglogiano na tubeiano nalo tai binimei jikili ju bunu ka bogo nei, mia naio jom̄a mije tiliniene ka napano Satusis nalo ajum̄a ajidom ka alavon Yesu, mia Yesu naio jom̄a juvululo ea kiano verdoꝑeiano novo nalo. Naruei naverloglogiano nei naio be tiniene ka naio kija, mia naio bika den Yesu, berinavo “?Ea kiado tubeiano nalo, nana vabe nene naio bo lie loa laka juvulu nalo dolu nalo?”

<sup>29</sup> Naruei Yesu berkanio, berinavo “Iliano Lu naio ber jibenei, berinavo ‘Tomu nalo na Israel, kamiu kumije tilin-iemiu.

Atua Soꝑi, kiado Atua, naio takurano be Atua Soꝑi.

<sup>30</sup> Atua Soꝑi napano be kiamo Atua, jau monoka tiniemo tii naio

ka kiamo iviso momou,  
ka kiamo meuliano momou,  
ka kiamo jidomiano momou, a  
ka kiamo moroano momou.'

<sup>31</sup> "Nina naruei naio be moti, a juo nene,  
naio ber jibe nei, berinavo

'Jau tiniemo tii nalo napano aju  
vaataro kaso, jau kovijuku rivu kalo,  
tavukia napano kojomā tiniemo ji-  
iso.'

"Mia maka bunu ve tuboiano dolu tai  
bereio napano naio loa laka ka juo nei."

<sup>32</sup> Naruei naverloglogiano na tuboiano  
nei naio berdoŕe, berinavo "Riano ga  
naverloglogiano, jau kober memedu ga.  
Jau kober be riano, ka Toro na Toru naio  
takurano ga, maka ve dolu tai.

<sup>33</sup> "Mia jau kober be riano bunu, ka  
kiniou monoka tinieku tii naio vija tinieku  
momou, a vija kiaku jikiaino momou,  
a vija kiaku moroano momou, a kiniou  
monoka tinieku tii nalo napano mā aju  
vaataro ka kiniou, tavukia napano tinieku  
jii kiniou kiniou takurano. Be riano na, ea  
Atua kiano vitiiiano, ver kito rala tibe na,  
nina naio jo mave laka, naio bo laka ka  
sida nalo napano mā kito roju romilaio ea  
Kunuano Lu."

<sup>34</sup> Mia Yesu mijog kiano verdoŕeiano  
naio bo, naio be masou, naruei naio  
berkanio, berinavo "Kiniou neber kaso,  
neberinavo, jau koje vaataro ruei, ka  
mia jau kava jouro ea Atua kiano nave-  
natuboiano navo."

Ana mia iorou ka bogo na, maka bunu  
toro tai rila vonvon Yesu ea vikadeniano  
bereio.

*Naverikariano naio be tormoruo Teviti  
kiano Atua*

*Mataiu 22:41-46; Luka 20:41-44*

<sup>35</sup> Ana iorou, Yesu jomā berloglog tomu  
nalo joomo ea Atua Kunuano Lu, karina  
naio kija bika vikadeniano tai denlo. Naio  
bika, berenio "?Kiniou nomijikia ka naver-  
loglogiano na tuboiano ajumā aberloglog  
kamiu, mia kiniou nojidom novika ka bior  
vaio ana ajumā aberenio Naverikariano  
naio monoka riyotuba ea tormoruo Teviti  
nei kiano yati, napano naio be Parinio  
Tubo beamu. <sup>36</sup> Kiniou nebika nina, bior  
napano beamu, Niununo Lu naio binime  
ea Teviti, mila na naio mil berinavo  
'Atua Sopi naio ber ka kanaku Tubo, beri-  
navo

"Jau kototano tivelinio vameruo na kin-  
iou, jau kotororea rivano-o mia kin-  
iou novuru kanamo uolu nalo amei  
ave mādayebe tai tena kovijankon  
jaamo eaio.'" *Iouano 110:1*

<sup>37</sup> "Ea vio na kito romialio ka napano  
Teviti naio jomā bio Naverikariano nei  
naio be kiano Tubo ruei. Naruei bior  
Teviti naio ber jibena, jumābe ana ajumā  
aberinavo mia Naverikariano nene mia  
naio riyotuba ea Teviti, be kiano yati ga?"

Mia burumāra tiniobi napano aju ka  
bogo na, ajidom mēlea verloglogiano na  
jibe ka Yesu kanano, nalo amije tilinielo  
toru laka eaio.

*Yesu naio mil jikili ban navurimāra bioano  
na lotuano nalo*

*Mataiu 23:1-36; Luka 20:45-47*

<sup>38</sup> Mia bogo napano Yesu jomā  
berlogloglo, naio jo jokol bunu bajago na  
mārouano na kialo navuri-māra bioano.  
Naio berinavo "Kamiu kuvitkar kamiu  
ka naverloglogiano na tuboiano nalo.  
Nalo abarvar kalo mēlea ka kialo burutili  
kulumārauo nalo na, mia verenio amiel  
ea vio na vioruru, nalo ajidom ka tomu  
nalo monoka avatove kalo, a avio batitiglo  
aver 'Naverloglogiano, kavijo bol' <sup>39</sup> A  
ea bogo na jokoluolu a joomo ea yimo na  
volkouano bunu nalo ajidom damāriga  
nalo atutano ea vio na tomu na tortoru  
jelelo ga. ? Kamiu kubutilubarlo ruei,  
a? <sup>40</sup> A ajumā aburii kialo volkouano  
terebievi laka, mia ajumā amila sibi  
ga, bior bogo nene kia ga, nalo ajumā  
amijukujuku taanou nalo ka amijikia  
avina ka kialo saba nalo. Naruei bior kialo  
bajago nalo na, mia kialo mauo nene mia  
naio sikili lie vo."

*Taanou tai jian veru sesa tai ban Atua  
Luka 21:1-4*

<sup>41</sup> Naruei iorou kanio, Yesu mijian naio  
ba jotano vaataro ka vio namā abuku  
ijaiano na Yimo Lu nei, mia naio bilig  
pariparinio bitivitii tomu nalo namā aju-  
van kialo ijaiano. Naruei naio mial tomu  
telabo napano abe sanibaiano, nalo abar  
kialo burumāra ijaiano nalo abinime, aju-  
vanio. <sup>42</sup> Mia karina naio mial bunu ka  
napano tiramoruo tai naio binime, naio  
be taanou ga tai, a naio be talirāsa laka.  
Naruei naio bar veru sesa subaier juo  
binime naio jian ban Atua.

<sup>43</sup> Naruei Yesu bio kiano naiaga-goano  
nalo ka amei ea naio, naruei naio mil  
banlo, naio berinavo "Kamiu kumial  
tiramoruo na, napano naio juvan veru sesa  
juo na? Kiniou neber be riano ka kamiu,  
ka naio jian loa, naio jovulu ijaiano dolu  
nalo nonovio napano na sanibaiano nalo  
ajuvanio. <sup>44</sup> Nalo na, be kialo burumāra  
puruveru nalo, mia amije bena ga torogio  
nene, mia taanou nei, kiriveru teliki na

naio bokar jo ka mia rijai kiano meuliano, naio jian nonovio ban Atua.”

## 13

*Yesu berial ka mia aue bulag Atua kunuano lu*

*Mataiu 24:1-2; Luka 21:5-6*

<sup>1</sup> Mia Yesu naio jaluvo den Atua Kunuano Lu, mia bogo napano naio joña miel bano, naiagagoano nalo tai naio jiloglog buruñara yimo nalo na Yimo Lu nei, ana berinavo “Naverloglogiano, jau keialio! Yimo nalo na bija salo puruveru nene nalo romial lo amieg kirinovo laka, a!”

<sup>2</sup> Ana Yesu berkanio, berinavo “? Jau komial yimo nalo na tortoru na? Mia iorou kanio mia ve re salo puruveru nene nalo atu batitig ea jeleigio, bior mia tomu tai, mia amei auebulag lelan nonovio yimo nalo na aviniu.”

*Jaleleano mia monoka rimei*

*Mataiu 24:3-14; Luka 21:7-19*

<sup>3</sup> Ajumña amiel jibe na, abinimei ea Suku na Buruolivi Nalo, nina naio jo jirarago ban ea Yimo Lu, ana Yesu naio jotano ea vio na. Ka bogo napano maka ve kulo dolu nalo atu, a naiagagoano ver abinimei ea naio, nina be Pitere, Yemesi, Jone a Andru. Naruei nalo abika denio, aberinavo <sup>4</sup> “? Mia auebulag Yimo Lu na nagi, a venia naruei mia naio rila vite nalo nei monoka amalmaluvo?”

<sup>5</sup> Ana Yesu mil banlo naruei, naio berdope, berinavo “Bo ka kamiu kuvitkar vatitig kamiu rivu, ka mia ve re toro tai rimei rila sibilili kamiu, <sup>6</sup> bior mia tomu ve telabo napano mia adu siaku, ana mia amei averinavo ‘Kiniou nobe Naverikariano nene,’ naruei mia avuru tomu ve telabo aiel vovu. <sup>7</sup> Ana ver ea bogo na, mia kamiu kuvijog uetubaiano na mira naio jo binimei vaataro, ðeli na kamiu kuvijog lilianiano na buruñara mira nalo napano ñaaju koalabo, mia kamiu kumemebiju ñelea re. Vite nalo nei monoka amalmaluvo beamu vo, mia nina maka ve legiano na maaro nene navo.

<sup>8</sup> A mia parinio tubo nalo, mia ala mira ka parinio tubo dolu nalo, mia buruvenuo nalo mia atumolu ka buruvenuo dolu. Mia vio reraio ea yetemeriba nei, mia ñii rikulkulu ve toru, a mia ve buruñara bogo na vitu bunu, mia vite nalo na, maka ve Legiano na Maaro nene navo. Vite nalo na naio jibe ka ga napano tira napano ñabono, naio mijog dovorovo ka taakano mijalele garuei be moti ka rudu kenerinio,

mia buruñara jaleleano nei naio maka navo.

<sup>9</sup> “A kamiu monoka kuvitkar vatitig kamiu rivu, bior ka napano tomu nalo mia avuru kamiu ea komeli nalo ðeli ea kialo yimo na volkouano ka mia ail van kamiu, naruei mia atibure kamiu ðeli mia avitiv kamiu. Mia monoka avuru kamiu kuva kuvitu kamu ea mirano tomu na tortoru na buruvenuo nalo rivior ga kamiu kube kiaku naiagagoano, ana ea bogo na kamiu kumijikia kuverial kene-miu moneano ea kiniou kamu ka miralo.

<sup>10</sup> Ana Ioluano Vou, mia aioliolu kanio van taara nalo na tomu nalo na yetemeriba nei beamu vo, karina mia vite nalo nei amijikia amalmaluvo. <sup>11</sup> Ver nalo amei avokakar kamiu, ka avuru kamiu kuvan ka atibure kamiu, mia kamiu kuvisidomii bijovijon re laka, verenio “? Mia kiniou never vaio vanlo?” Mia kamiu kuverial ga iliano vaio napano mia Niununo Lu naio sian rivan kamiu, rimonloglog bogo napano mia kamiu monoka kuvil, bior ka napano mia ve re kamiu napano kuvil, mia naio rive Niununo Lu napano mia naio ril moluo ea kamiu.

<sup>12</sup> “Ea bogokouo na, mia toro mijikia rijamo ka tom na bova dolu nalo nei amei avuru bulag kuruano rimemedu ðeli na kenerinio memedu, ka auebinvilo añañaño, nina kar ga napano amonea kiniou. A mia kiritete nalo amijikia atumolu bunu ka averial kenelea nalo a karamalo nalo napano amonea kiniou, ka añañaño bunu tibe na. <sup>13</sup> Mia tomu nalo aserñi ñelea ka kamiu napano siaku joa kamiu, mia kamiu kei napano naio tumolu tu sikili riva rivokar juluvati na bogokouo nei, mia Atua rilarrurio.”

*Jaleleano toru yako Yerusalemo*

*Mataiu 24:15-28; Luka 21:20-24*

<sup>14</sup> Ana Yesu naio ber iliano dolu tai bunu, napano naio bo ka ver toro napano naio rivuluku, rilavon ka rijikia vatitig nioti nene. Iliano nei naio ber jibe nei, berinavo “Mia kamiu kuvial ka napano mia avitirilar tavoru tai napano kirivova mia kirivova laka, naio tumolu toa vio lu tai napano maka rimemedu ka toaio. A bogo na kamiu kuvial vite nei, kamiu napano kumitu Yutea, bo ka kamiu kuvuro bilig, kamiu kuva kuvitoluku ea burusuku nalo. <sup>15</sup> Ea bogo na, ver toro tai to rijilmebi tavio ea kunuano, naio monoka riva joomo re bereio ka rivar kanano saba tai, <sup>16</sup> ðeli ver toro tai toa kanano tiniavio, mia naio monoka rivan re bunu ea kunuano ka rivar kanano kulunãrauo, mia naio monoka

rivuro soĝeli tibe na ga rivano. <sup>17</sup> Ka bogo na, mia rivova laka bunu rivan nena nalo napano abe m̄abolo, vija nalo nar̄a amije yu ban kenerilo solbouo nalo. <sup>18</sup> Ver tibe na, bo ka kamiu kubolkouo rivior kamiu, ka bogo na kenemiu vuroiano nei ka mia naio rivokar re kamiu ea bogo na buruṁara niavo. <sup>19</sup> Nina bior ka napano bogo na, mia sikili mia sikili, sikili lie tovulu bogokouo dolu nalo, napano jikar ea bogo na Atua naio jii yetemeriba nei binimej bokar banej, a mia ve re bunu buruṁara bogokouo na toru tai tibe nei bereio bogo tai. <sup>20</sup> Mia Atua jidomii ruei ka mia naio tekor bogokouo nei ve bulati ga, bior kanano tomu nalo napano naio bijauia bulaglo ka ave kanano ajua bogo nei. Ver naio tekoro re ve bulati tibe na, mia ve re toro tai rijikia rimeul to.

<sup>21</sup> “Mia ver tomu nalo averver ka kamiu ka bogo nei, averinavo ‘Kamiu kumial toro yako, nina be Naverikariano na,’ ĵeli na ver averii toro dolu, averinavo ‘Naio be Naverikariano na niako laka,’ mia kamiu kumonea re kialo iliano nalo na. <sup>22</sup> Naverikariano telabo napano maka ave riano amijikia atumormolu, vija bunu naverialiano na sibusibiano, mia nalo na amijikia ala jamerijiano nalo, vija vite nalo na memebijuano. Mia nalo ala tibe na, ana mia avuru tomu nalo ave vovu, riva rivokar napano mia alavon ka avuru bunu Atua kiano tomu nalo napano bijauia bulaglo ka ave kiano, mia vite nei mia maka ajikia alaio ga. <sup>23</sup> Mia kamiu kumijikia kuvitkar vatitigio, bior napano kiniou neberial vite nalo nei ka kamiu vonganei ruei, napano maka amalmaluvo vo.”

*Mia Kulorinio Kenerinio rimej bereio  
Mak 13:24-27; Luka 21:25-28*

<sup>24</sup> Ana Yesu berinavo “Naruei ea bogo na, iorou ka napano jaleleano nalo nei ribisi, mia m̄erenio rimej ribobogio, a mia siberio rimermera re bunu. <sup>25</sup> Marvitano nalo ea bul niogovu mia atibirbili, a moroano na vio yauo, mia Atua rikulkulu kalo. <sup>26</sup> Naruei ea bogo na, mia aial Kulorinio Kenerinio rimaluvo ea melijo vija kiano buruṁara moroano a vija kiano buruṁara mermerano. <sup>27</sup> Avona bisi, mia naio riila kiano nailiano nalo aseliviv ea vio reraio yetemeriba a tiniabene, a mia avuru kiano tomu nalo napano naio bijauia bulaglo ruei, nalo amei vio takurano ea naio.”

*Maka toro tai napano rijikia bogoti na  
maaro nei*

*Mataiu 24:32-36; Luka 21:29-33*

<sup>28</sup> Ana Yesu berenio, berinavo “Kamiu kuvisidomii von buruiesi nei, napano aber buruviki. Naio be kiano titai ka verloglog ka kamiu, napano kamiu monoka kuvitii vatitig eaio. Bogo na kamiu kumial ka sudoti vou nalo aju amiluo, aju abinimej amemeaio, ana kumijikia ka bogo na inio ve toru jo binimej vaataro. <sup>29</sup> Tibe na, bogo na kuvial jamerijiano nalo na ea yetemeriba, nalo aju amalmaluvo jibe ka napano kiniou neber ka kamiu ruei, mia kamiu kumijikia ka Kulorinio Kenerinio jikili jua m̄aratavo ruei, vaataro ka riyotuba naruei.

<sup>30</sup> “Riano, kiniou neber ka kamiu, mia tenalo na mia amaluvo beamu, ana iorou, tarati na tomu nalo napano ameulial bogo na amijikia am̄arniario ea yetemeriba nei. <sup>31</sup> Ana mia buluniogovu vija yetemeriba nei, naljuo avakovio bunu, mia kiaku iliano nalo maka ajikia avakovio bogo tai. <sup>32</sup> Mia maka toro tai napano mijikia bogoti na ĵeli aura nene napano mia Kulorinio Kenerinio rimej bere eaio. Nailiano nalo na tiniabene, bija Atua kenerinio, nalo maka ajikia, mia Karam̄aku, naio takurano ga mijikia.”

*Kamiu monoka kuviturorea rivu  
Mataiu 24:42-44*

<sup>33</sup> Naruei Yesu berenio, berinavo “Tibe na, kamiu monoka kuvitu kuvitkar vatitigio rivu, bior kamiu maka kumijikia ka legiano na vabe naruei mia kenemiu Tubo rimej bere eaio. <sup>34</sup> Vite na naio jibe ka napano toro na toru tai juvan kiano vonuo ka riva rudu kiano buruṁara iliano tai. Beamu ka naio taluvo ea kanano vio, mia naio juvan kiano saba nonovio jua kiano tomu na in̄auano nalo juṁalo, ka avitkar kiano in̄auano nalo, a mia ril vatitig van nalo napano abe nakukuano ea kiano morouo, ka monoka avitkar rivu.

<sup>35</sup> “Vonganei, jibe na bunu ban kamiu, naruei mia kamiu bunu monoka kuvitu kumisirarag kuku rivu, bior kito maka rejikia ka mia toro na toru na vonuo mia naio rimej nagj. Vede naio rimej ka niogoravo, vede ka bogiano, vede ka bogo na tu riolu, vede kavijo va, <sup>36</sup> mia maka rivu ka ver naio rimaluvo kean kamiu, ana rial napano kamiu kumitu kumonmelio ga. <sup>37</sup> Naruei iliano nei napano kiniou naber ka kamiu, naio memedu ga ka tomu nalo aviniu monoka ajogio, napano berio kamiu kuvitkar rivu, kamiu kuvitkar kamiu rivu.”



## 14

*Navuriñaraboiano nalo na kulo Israel kialo ajumã ajidom auebin Yesu kiana vo Mataiu 26:1-5; Luka 22:1-2; Jone 11:45-53*

<sup>1</sup> Naruei, bogo binimeï vaataro ka yuka nonovio nalo ajumã amila kialo jokoluolu juo na tortoru. Bogoti juo ju kia vo, ka mia aimãauka jokoluolu na sidomkariano na ioruriano tukamu, ana kario na aimãauka ka jokoluolu na asen beskit na jikili.

Mia ea bogo nene, tomu na tortoru nalo na kulo lu kialo bija naverloglogiano nalo na tuboiano, ajumã ajidom kea auebin Yesu. Aju kea amilavan ka asirag m̃arabo tai ka mia avokarvan ga naio. <sup>2</sup> Mia nalo ajumã aberii banlo bereio, aberinavo “Vite na, kito maka rojikia roimãauka ea tomu nalo miralo napano abinimeï ea jokoluolu nei, ver ðeli mia nalo tiniel ser tanea kito kanio, mia ala buruñara uetubaiano na, bior napano nalo telabo ajumã ajidom kema nei laka ruei.”

*Mere miyon m̃aatei ea Yesu Mataiu 26:6-13; Jone 12:1-8*

<sup>3</sup> Mia ka bogo nene, Yesu joa m̃arkomeli na Betani, naio ba jo miadu ka toro nei napano ajisia ka Saimon Burumieni, napano nanua beamu naio bokar burumieni ea ni-abene. Mia Yesu jo jinano ea vio na, tira tai binimeï eaio napano naio midu bauei tai na amimãauka ea puruveru na kirinovo tai, mia bauei neibano naio bujo ka m̃aatei na kirinovo tai napano amimãaukanio ea uei na baiesi na buruiesi tai, napano puruveru nene toru laka garuei. Mia tira neibano naio mijukonlar tiniu na bauei neibano, ana miyon nonovio m̃aatei nene ea Yesu parinio. <sup>4</sup> Mia nalo tealoo napano ajua vio neibano amial tenei, mia nalo tiniel jer tira neibano, aju amil murñii kanio ban berelo, aberinavo “?Ka venia na tira na miyon bulag kule m̃aatei na bo nei jibe na? <sup>5</sup> A ver naio rivulvulu kanio ga, mia naio rivar buruñara puruveru tai, ana naio mijikia rivar puruveru nene ka rijai talimãasa nalo. Mila bulagio ga na!” Ana ajumã amil niegeniege tira neibano jibe na.

<sup>6</sup> Mia Yesu ber kalo berinavo “?E, kamiu kumila jibe na ban tira na ka vaio? Kamiu kuvil niegeniege re naio tibe na, naio mila tonovo tai ban kiniou, milivu ka kiniou laka. <sup>7</sup> Talimãasa nalo narña kumitu kuberiilo na, mia nalo bogo nonovio atu burukuti vija kamiu, ana kamiu kuvijikia kuvijailo bogo nonovio ea bogo ve telabo napano kamiu kumisidom. Ana kiniou, mia noto re bogo nonovio rivija kamiu na. <sup>8</sup> Tena, tira nei m̃imãaukanio, napano naio miyon m̃aatei na ea kiniou, naio mila nonovio

saba nalo na bo bo laka ga, napano naio mijikia rimãaukanio, ka rijikia rila vatitig mokotenaku ka mia navan ea m̃ariano. <sup>9</sup> Kiniou neber be riano ban kamiu, ea vio nonovio ea vio yetemeriba veraio napano mia averial kiaku ioluano voo nabo eaio, mia nalo atukunu bunu ka vaio na tira nei naio m̃imãaukanio, ka nalo asidomial bereio bogo nonovio tena tira nei kiano tinietiano ban kiniou, napano naio tinien miia riano kiniou.”

*Jutas jiveluku ka Yesu*

*Mataiu 26:14-30; Luka 22:3-20; Jone 13:21-30*

<sup>10</sup> Naruei Jutas na Kariot, napano naio bunu be Yesu kiano naiagagoano duelimo ba juo [12] tai, naio jo jidomii ruei ka mia tiveluku ka Yesu, ana naio ba mial tomu nalo na tortoru na tomu lu nalo. <sup>11</sup> Mia bogo na nalo amijog ka mia naio rimãaukanio m̃arabo ka nalo ajikia avokar lukua Yesu, nalo ajaaro laka, aberkar ban naio aberinavo “Naio bo laka na, a ver jau kajai kumemi tibe na, mia kumemi nuvisian ijaiano tai ve telisu rivanso riviorio.”

Naruei jikar ea bogo nene, Jutas naio jo jiravo buluvio tai na mia naio riven Yesu rivan ea kulo lu nalo nei jumalo.

*Yesu miila Pitere naio Jone ka ava ala batitig sano sinaniano na maariano*

<sup>12</sup> Naruei ea legiano napano be moti na jokoluolu ka asen taba na, be Taste, a ea legiano nene ajumã amila sida ka nunu solbouo nalo ka sidomkariano na ioruriano. Naruei ea bogoti nei naiagagoano nalo abika den Yesu, aberinavo “?Jau kojidom ka mia kumemi nuva nuvila batitig sado sinaniano na jokoluolu nei ea vio vabe?”

<sup>13</sup> Mia naio ber kalo abe juo, berinavo “Kuve juo kuva jouro Yerusalemo, mia kamiu kuvial toro tai napano midu buruñara bauei tai, naio rimeï riviviuo vija kamiu. Mia kuve juo kuvitakisor naio kuvano, <sup>14</sup> ana mia naio rivuru kamiu kuvan ea yimo tai. Naruei bogo na kamiu kuve juo kuva joomo ea yimo nene, mo na kamiu kuvil van boru na yimo nene, kamiu kuverii tibe nei, kuverinavo “Kiado naverloglogiano naio bikanio, berenio vajoomo vabe na valauo nalo kialo, ka naio naliko kumemi kanano naiagagoano nalo, kumemi numijikia nuvisen sinaniano na sidomkariano na ioruriano eaio?”

<sup>15</sup> “Kuve juo kuvil tibe na vanio, ana mia naio siloglog buruñara vajoomo na yimo tai napano ea kotkoti na jo mave ka kamiu, napano vite nonovio jua ruei, ana mia

kamiu kuve juo kuviomon vite nonovio na sinaniano nei ea vio nene.”

<sup>16</sup> Mia Yesu ber jibe nei ka naiagagoano juo neibano bisi, ana nalo abe juo abano, nalo amiel aba abokar vio Yerusalemo. Mia ea bogo nene amial ka saba nalo nonovio amalmaluvo jibe ka ga napano Yesu berii kalo abe juo jukamu. Jibe na naruei, ana na naljuo amila batitig sinaniano na maariano na jokoluolu na Yesu kiano, karina abe juo aban bereio.

*Yesu berial ka mia Jutas tiveluku ka naio rivan kiano uolu nalo jum̃alo*

<sup>17</sup> Naruei ea bogiano, Yesu naliko kiano duelimo ba juo abinimei Yerusalemo, naruei nalo aban ea yimo neibano. <sup>18</sup> Naruei bogo napano nalo ajur̃ña ajinan, Yesu mil banlo, berinavo “Kiniou neber be riano ban kamiu, ka mia kamiu tai ga mia naio riŵilŵili bena ga ka kiniou, kamiu ga tai napano mia kumemi ve juo nuvisinan burukuti vonganei.”

<sup>19</sup> Naruei naiagagoano nalo amijog ka naio ber jibe na, mia nalo tinielo miia naio toru laka, ana na nalo ajur̃ña abivika veve terakurano denio, aberinavo “?Koig, maka ve kiniou, a?”

<sup>20</sup> Ana na Yesu berdoŵeio, berinavo “Nana mia naio rila tibe nei ka kiniou, naio be tai ga ea kiaku duelimo ba juo [12] nei ga, naio napano mia kumemi ve juo nuvititi ka sememi joko ea baju ve takurano ga. <sup>21</sup> Mia Kulorinio Kenerinio monokanio riŵar̃o tibe ka na vivitauiano lu nalo aberii nua ruei, mia toro napano naio ŵilŵili bena ga ka naio, mia rivova laka van naio, bo laka verenio naio rimoluo re.”

*Sinaniano maariano*

<sup>22</sup> Ana bogo napano nalo ajur̃ña ajinan jibe na, Yesu midu joko tai, ber siva ban Atua kanio, ana burekokorovio bar banlo, ana ber kalo, berinavo “Kamiu kuvijeio kuvisenio, ninei naio be mokotenaku.”

<sup>23</sup> Mia iorou kanio nina, Yesu midu baja na m̃arjuŵel̃m̃elu tai, ana naio ber siva ban Atua kanio, ana jian ban kiano naiagagoano nalo, mia nalo abeve terakurano abiniu amunu tertelisu eao. <sup>24</sup> Ana naio ber kalo, berinavo “Ninei naio be kiaku burukija, ka rila Atua kiano virakariano tumolu tu sikili bogo nonovio, bior mia kiaku burukija nei naio riou ka sovoko tomu ve miroano kialo meuliano nalo. <sup>25</sup> Kiniou neberkar be riano ban kamiu, ka mia kiniou nomunu re m̃arjuŵel̃m̃elu na bereio rivano-o rivokar bogo na ga mia kiniou nomunu m̃arjuŵel̃m̃elu vou ea Atua kiano navenatuboiano.”

<sup>26</sup> Mia bogo napano Yesu naio mila jibe na bisi, ana na nalo amiou ka iou tai napano joa niosi na Iouano nalo, avona bisi ana nalo abava tavio, aban ea Suku na Buruolivi Nalo.

*Yesu berial ka mia Pitere rivarbonbonua naio*

*Mataiu 26:31-35; Luka 22:31-34; Jone 13:36-38*

<sup>27</sup> Naruei bogo na ajua burusuku nene, Yesu ber kalo berinavo “Banei bogiano na, kenemiu moneano ea kiniou mia rijoru, bior iliano lu naio ber ruei, berinavo

*‘Mia kiniou nouebin toro na bitikar nunu, ka mia kiano nunu nalo mia avuro ave dedade tanea vio.’ Sek 13:7*

<sup>28</sup> “Ea iliano nei, Iliano Lu jo berii venia napano mia rimaluvo ea kiniou, mia bogo na kiniou nemeul bereio ea m̃ariano, mia kiniou notu-kamu nava Kalele, ana mia kamiu monokanio kumei iorou, kumei ea vio nene bunu ga.”

<sup>29</sup> Naruei bogo na Pitere naio mijog ka Yesu ber jibe na ana naio mil ban Yesu, berial, ber “Peli kumemi tealoo nonovio mia kialo moneano easo rijoru, mia nalo avuro denso, mia kiniou maka nejikia notuvanso bogo tai.”

<sup>30</sup> Mia Yesu berkanio, berinavo “Bo Pitere, ka na jau kober jibe na, mia kiniou neber be riano ga banso neber ka mia bogiano na ga, mia tu tokokoreko ve valuo ga, ana mia jau kavarbonbonua kiniou rive varolu ruei.”

<sup>31</sup> Mia Pitere naio mil joko vio ka iliano na, naio berkar iliano na kirisikili lie, berinavo “A ver nalo ajidom ka auebin kiniou vijaso, bo laka lie vo, mia kiniou, maka nejikia nalabonuaso ka never kiniou maka nove kiamo.”

Ana bogo nene, naiagagoano dolu nalo bunu aber iliano nene bunu ga.

*Yesu ba bolkouo yako Ketsemani*

*Mataiu 26:36-46; Luka 22:39-46*

<sup>32</sup> Mia iorou, Yesu nalo abarŵiliglo ajel tivelinio ea suku neibano, abatove abokar bolu na telisu tai, aban ea vio tai siano Ketsemani. Ana naio ber kalo, berinavo “Kamiu kuvitu nei vo, mia kiniou nava nobolkouo ve telisu kija tukamu.”

<sup>33</sup> Mia naio buru Pitere naljuo Yemesi naio Jone, nalo aban bija naio, ana nalo aban lie kija telisu ga, ana ea bogo na Yesu kiano iviso binimei temi laka, ana naio mijog naio bova laka. <sup>34</sup> Naruei Yesu mil banlo abe tolu, berinavo “Vonganei namijog jibe ka niunuku burukorovio ruei, mila na kiniou vaataro ka nar̃ar̃o kanio. Neber bo ban kamiu, kamiu kuvilavon ka

kuvitevijo kuvitu vija kiniou ea vio nei kija ga vo.”

<sup>35</sup> Ana Yesu naio miel ba lie kija ga, ana naio mijoru minie ana bolkouo ban karamāno, berinavo “Teta o, Teta o! Verver jau komijikia kajamo ga ka aura na jogvaiano nei naio rimei ea re bunu kiniou. <sup>36</sup> Jau komijikia komila vite nonovio, mia kiniou nobika denso ka jau kodular baja na jogvaiano den kiniou, ka mia kiniou nomunu eaio re. Mia jau kala re tibe ka na kiniou nejidom, mia be kiamo ga.”

<sup>37</sup> Kario naio binime bereio ea kiano naiagagoano tolu neibano ana naio mial amonmelio rui, mia bogo na nalo ajevijo ana Yesu ber ka Pitere, berinavo “? Saimon juñabe na jau koje komonmelio jibe na? ?Kamiu maka kuvijikia kuvitevijo kuvitu vija kiniou ka aura ve takurano ga? <sup>38</sup> Kamiu monokanio kuvitkar vatitigio, ka mia kamiu monokanio kubolkouo bogo novio, ka mia lavonvoniano nalo ala re kamiu kuvijoro ea kariano. Ee, kenemiu jidomiano nalo kirisikili vatitig, mia mokotenemiu nalo niabelo mave.”

<sup>39</sup> Mia iorou kanio ana naio bano bereio ea vio napano, ana naio bolkouo bereio jaki kiano ilibolkouoiano napano jukamu. <sup>40</sup> Naruei naio binime bereio mial ka nalo tolu nei ajunā amonmelio bereio, bior miralo jouo tomi laka, a bogo na naio mil banlo, maka bunu ajikia averdoŕe titai bereio rivanio.

<sup>41</sup> Mia naio ba bolkouo bereio, nainei be varolu nene, karina naio binime bereio, mia naio mil banlo berinavo “E, kamiu kumituñā kumijilimebi kia ga vo, kamiu kumonmelio kia ga vo. Bo ga, bare naruei! Na vonganei vaataro ka bogo na Kulorinio Kenerinio naio rivan ea tomu va nalo juñalo naruei. <sup>42</sup> Ei, kamiu kuvitumolu, kito ravano. Toro na vīlṽili bena ka kiniou, naio yako jo binime vaataro.”

*Nalo abokar kilkil ea Yesu*

*Mataiu 26:47-56; Luka 22:47-53; Jone 18:3-12*

<sup>43</sup> Naruei monloglog bogo na Yesu naio jo ber kea iliano nalo nei kia navo, Jutas neibano be nalo duelimo ba juo [12] tai, naio binime naliko tomu nalo miroano, napano nalo abar iobogu na mira nalo bija kialo nia nalo. Nalo na naruei, tomu nalo na tortoru na kulo lu nalo, bija naverloglogiano nalo na tuboiano, bija navurimaraboiano nalo na kulo Ju nalo, nalo amilalo abinime. <sup>44</sup> Nua na maka amei vo tibe na, toro na jiveluku neibano Jutas, naio jii jamerijiano tai ruei kalo, napano naio berinavo “A ver toro na navan juñaku vija naio tukamu, toro

nene naruei napano kito rojidomio, ana kenemiu tomu nalo na be pīrilo monoka avokario avuru naio avano.”

<sup>45</sup> Mia ka bogo na nalo abinime naruei, Jutas naio miel ban memedu ka Yesu, naio berkanio, berinavo “Bogiano bo, Naverloglogiano.” Ana naio ban juñano bijaio. <sup>46</sup> Ana kialo tomu nalo abinime abokario kirisikili, nalo ajidom ka avuru naio rivano. <sup>47</sup> Nalo abakar naio jibe na naruei, ana naiagagoano nalo na ajua vio na nalo tai midular kiano iobogu na mira, jidom ka te toro tai na Parinio Kulo Lu kialo, naruei naio jeluvuio ana jelar ga burutiliniene tivelinio.

<sup>48</sup> Na Yesu mil ban tomu nalo neibano, berinavo “?Juñabe ana kamiu kubar kenemiu iobogu a kenemiu nia nalo? Bior venia ana kamiu kumisidom ka kumei kuvokar kiniou tibe na? Peli na kamiu kumituñā kumisidomii kuber kiniou nebe toro tai na be pīriku ka nevina bija nouebin toro? <sup>49</sup> Julaka ea bogoti nonovio, kiniou nojōñā neberloglog kamiu ea Atua kunuano lu ruei, ana ka venia ana kamiu maka kumei kuvokar kiniou ea bogo nalo nene? Mia bo ga na, bior vite nalo napano vivitauiano lu berenio nua bogobe ruei, monoka amei tibe na ga.” <sup>50</sup> Mia ea bogo nei, naiagagoano nalo ajuvan Yesu ana nalo aburo dedade denio.

<sup>51</sup> Mia bogo nene, mēaku tai naio jōñā jakisorilo, ana aburu Yesu bano ana mēaku neibano naio jukulou ga. Mia nalo tealo abitulubarbar naio, mia nalo ajidom ka avokar naio bunu ga, <sup>52</sup> naruei nalo abuluvu naio, nalo abokar ga kiano tukulou ana nalo aburu lario denio, naio buro jibe na ga napano be blamoma ga jo.

*Aburu Yesu ea komeli na toru, na tomu nalo na tortoru na kulo Ju nalo kialo*

*Mataiu 26:57-68; Luka 22:54-71; Jone 18:13-24*

<sup>53</sup> Naruei nalo aburu Yesu binime jikili jukamu ka Parinio Toro Lu, nina be Kaivas, ana tomu na tortoru nalo na kulo lu nalo, bija naverloglogiano nalo na tuboiano, bija navurimaraboiano nalo na kulo Ju nalo, nalo abinime vio takurano ea vio neibano bunu. <sup>54</sup> Mia Pitere bunu jōñā jakisosor Yesu ea bogo nene, mia naio maka riva vaataro kanio, mia bogo na nalo abinime jouro ea burusio na komeli neibano, Pitere naio ba jotano bija tomu nalo na amimāu Kaivas kiano, napano nalo ajunā ajutano vaataro ka sebi, bior vio menini.

<sup>55</sup> Naruei tomu nalo na tortoru napano aju joomo ea vioriano neibano, nalo ajirag von tomu tealo ka aver vite nalo tai napano Yesu jōñā mila pēli narūa naio

jo berenio, ka nalo amijikia auebin naio riviorio, ana nalo maka aleal tai. <sup>56</sup> Nalo amileal tealo napano aburulo abinimej aberial iliano miroano, mia iliano nalo na abiniu ajunã amila sibi ga, mia nalo ajunã aber saba nalo na abeve dolu, naruei kialo ilisibiano nalo nei ajunã ajibirbili ga. <sup>57</sup> Mia karina tomu tealo na sibiano nalo neibano nalo amileal iliano tai, ana ajikili aberinavo <sup>58</sup> "Kumemi numijog ka kema na, naio jomã mil barvar mēlea ka naio jibe na naruei, berii Yimo Lu neibano korobido nalo aminãukanio bija junãalo nalo, berinavo naio ga mia rue bulagio bereio, ka mia naio ga rimãauka vatitig Yimo Lu vou tai bereio, ka bogoti ve tolu [3] ga, napano mia toro junãano rimãauka re." <sup>59</sup> Nalo aber iliano nalo na bano-o, mia karina kialo iliano nalo amierier janea vio ga, maka bunu atu sikili.

<sup>60</sup> Naruei parinio toro lu nei jumolu jikili jua miralo, mil ban Yesu, bika denio berinavo "? Mia jau koverdopeio vanlo, ðeli makanio? Junãabe ka iliano nalo nei napanoaju aber bulagio?" <sup>61</sup> Mia Yesu naio jo ga jibe na, maka riverdope vanio bereio. Naruei Parinio Toro Lu nei ber bereio ban Yesu, berinavo "? Junãabe, jau kobe Naverikariano nei napano naio be Atua Lu kenerinio, ðeli na makanio?"

<sup>62</sup> Naruei Yesu berdope banio, berinavo "Ee, Naverikariano na be kinioi na. Mia kinioi najidom never bunu vanso, never iorou, mia rivesiou re, mia kamiu kuvial kinioi Kulorinio Kenerinio napano nojo nojotano ea tivelinio vameruo ea Atua na moroano. Mia kamiu kuvial ka mia noyotuba ea melijo nemei bereio ea vio yetemeriba nei."

<sup>63</sup> Ana Parinio Toro Lu neibano tinien mimi laka, naio mijede kiano kulukoti, berinavo "Bisi ea vio na! ?Bior venia ana kito rojunã rejiravo toro dolu bereio ka river saba nalo tealo rivanio?" <sup>64</sup> ?Kamiu kumijogio na? Toro na naio jo mila bulag tolu na Atua siano lu ruei! Mia vioriano naio jidom junãabe, mia kito rotibure naio tunãabe?"

Ana nalo ajibure Yesu, aberinavo memedu ga ka nalo monoka auebinio. <sup>65</sup> Mia nalo tealo ajunã abuvule eaio, napano abiviko mirano, ana ajukuio, naruei nalo amiyotel eaio, abika denio, aber "Ei, jau kover von, kei mijubaso vonganej?" Naruei Parinio Toro Lu kiano tomu nalo nei abinimej ka avuru Yesu ajaluvo den vio neibano, mia nalo neibano bunu napano ajunã ajuku naio bija amijuba naio napano mia naloaju aburu naio abano.

### *Pitere barbonbonua Yesu*

*Mataiu 26:69-75; Luka 22:56-62; Jone 18:15-18,25-27*

<sup>66</sup> Naruei ea bogo nei, Pitere naio jo jouro ea burusio nei kia ga vo, ana tira tai na jo bitikar Parinio Toro Lu kunuano naio binimej ea vio neibano. <sup>67</sup> Mia bogo na naio mileal ka Pitere jo juva sebi, ana naio mial mijikia Pitere, mia naio berkanio, berinavo "Ei, jau bunu kojo kajakisoro toro na Nasarete na!"

<sup>68</sup> Mia vonganej, Pitere naio mila bona tenej, berinavo "Ei, kinioi maka leleio nojoglubarbar vaio na jau kojomã koberenio." Naruei naio jaluvo den vio neibano, ba vaataro ka burunãara maratavo na toru na yimo neibano.

<sup>69</sup> Mia ea vio nei, tira neibano mialio bereio, a naio berealio ka tomu nalo napanoaju na, berinavo "Toro na, naio be nalo tai na abe kiano."

<sup>70</sup> Ana Pitere naio mila bona iliano nei bereio. Ana maka vesiou, ana tomu nalo na ajua vio na aber ka Pitere, aberinavo "Maka, jau kobe nalo tai na, bior jau kobe toro tai na vio Kalele memedu na!"

<sup>71</sup> Mia Pitere mil kirisikili lie ea iliano nalo na kirisikili, berinavo "Riano mave, kinioi neber ruei, kinioi maka lele nejikia kema na kamiu kumitunãa kuberenio na."

<sup>72</sup> Naruei memedu ka bogo na Pitere naio berenio jibe na, tu naio jokokoreko valuo nene, mila na Pitere naio tinien maio ka bereio iliano na Yesu berenio berinavo "Riano ga kinioi neber kaso, mia bogiano na ga, bogo na tu naio tokokoreko rive valuo nene vo, mia jau kalabonua kinioi rive varolu ruei."

Mia Pitere mijog tinieno bova mia bova, ana batavio, mia naio jegi mia jegi.

## 15

*Aburu Yesu ban ea Parinio Tubo na Romo napano jomã bitikar Israel, nina Pailat*

*Mataiu 27:1-2,11-14; Luka 23:1-5; Jone 18:28-32*

<sup>1</sup> Naruei ka Vraire kavijova, tomu na tortoru na kulo Israel nalo ajutano bereio ea kialo burunãara komeli. Nalo nei, tomu na tortoru na kulo lu nalo kialo, bija navurimãaraboiano nalo a kialo naverloglogiano nalo na tuboiano. Nalo amil bano-o, nalo abokar jidomiano tai, ana iorou amiorkar Yesu junãano, aburu naio aban ea Parinio Tubo Pailat, ana ajuvan Yesu jua junãano ka tibureio. <sup>2</sup> Ana Parinio Tubo Pailat naio bika den Yesu berinavo "? Jau kobe Parinio tubo ka kulo Israel nalo ðeli na makanio?"

Ana Yesu berdoŝe, berinavo “Tenene na naruei, jibe na kojorŝa koberenio kia na.”

<sup>3</sup> Mia tomu na tortoru na kulo lu nalo aberii bulavulag vite nalo telabo kar Yesu, aberinavo naio jo mila vite telabo na bova. <sup>4</sup> Naruei Pailat bika bereio, berinavo “Jumŝabe? Nalo nei aberenio vite telabo na bova biorso ruei, mia jau be kiamo verdoŝeiano kanio, ŝeli makanio?” <sup>5</sup> Mia ea tivelinio na venia nalo na ajuŝa aberenio, mia Yesu maka bunu sian verdoŝeiano tai bereio vanlo, naruei Pailat miŝlo toru kanio biorio.

*Pailat mijamo ka Yesu ka naio monokanio rimŝaro*

*Mataiu 27:15-26; Luka 23:13-25; Jone 18:39-19:16*

<sup>6</sup> Ea bogo na, mia nalo aju kia ga vo ea Jokoluolu na Sidomkariano na Ioruriano, a ka yuka nonovio ea jokoluolu nei, Parinio Tubo na Romo naio joŝa mila vite tai ka kulo Israel nalo. Naio mila jibe ka napano verenio nalo tealo ajua lakoiano, tomu nalo amijikia avika nalo tai napano ajidom, ka mia Pailat rijamo ka naio riva tavio ga. <sup>7</sup> Ana ea bogo na, toro na poletik tai joa lakoiano, napano tomu nalo amijikia batitig naio, napano siano be Barabas. Naio be toro tai na kirisiou napano ajumolu ka ala mira keano kulo Romo, naio muebinvin tealo aŝarnŝaro, naruei ajetavokio ea lakoiano biorio.

<sup>8</sup> Jibe na, ana tiniobi nalo abinimei telabo vio takurano ea Pailat mirano, nalo abika den naio ka rila rivanlo tavukia naŝa naio joŝa mila, ka naio monoka rijamo ka nalo tai kalo napano joa lakoiano naio riva tavio bereio.

<sup>9</sup> Naruei Pailat berdoŝe, berinavo “Moo, ŝeli kamiu kumisidom ka kiniou najamo ka kema nei rivatavio bereio, nina be kamiu kulo Ju kenemiu Parinio Tubo?”

<sup>10</sup> Pailat bika jibe nei, bior naio mijikia ruei ka tomu na tortoru nalo na kulo lu nalo na Ju nalo ga aburu Yesu binimee ban naio, jibe ka iŝauano na jokuano ga, bior amial ka tomu dolu nalo ajaaro laka kanio.

<sup>11</sup> Jibe na, Pailat jidom tuvan Yesu rivano, mia tomu na tortoru na kulo lu nalo amila bulag tomu nalo kialo jidomiano binimee bitunu riŝlea, ana aber monoka asikil ka Pailat ka naio tuvan re Yesu rivano, mia naio tuvan ga Barabas rivano.

<sup>12</sup> Mia Pailat naio mijog venia napano ajuŝa aber ka naio, naruei naio bika denlo bereio, berinavo “Mo bo ga, a ver tibe na, mia kiniou nala tumŝabe ka toro nei naŝa kamiu kubio Parinio Tubo na kulo Ju nalo kialo?”

<sup>13</sup> Mia nalo abiniu amiaga mave bereio, aberinavo “! Kuvitukukakar naio ea ŝakolkolo!”

<sup>14</sup> Naruei Pailat bika denlo, berinavo “? Mia bior vaio, naio mila vaio na kirivova?” Mia nalo amiaga jouo lie vo, aberinavo “Kuvitukukakario, kuvituku-kakar naio mave ea ŝakolkolo!”

<sup>15</sup> Mia Pailat maka bunu rijikia naruei mia naio rila tumŝabe, mia jidom ka naio monoka river titai ka mia tomu nalo nei amijikia ajog rivu rivorio, naruei naio berinavo Yesu naio tobo, mia naio tuvan Barabas bere rivanlo. Ana naio midu Yesu joa kiano na mira nalo jumŝalo ka nalo avitivio, ana ka avurio riva atukukakario ea ŝakolkolo.

*Namira nalo amiyotel ea Yesu*

*Mataiu 27:27-31; Jone 19:2-3*

<sup>16</sup> Naruei Pailat kiano na mira nalo aburu Yesu aba joomo ea burusio na kanano komeli, mia nalo abio kialo taara dolu nalo telabo abinimee ka aialo.

<sup>17</sup> Naruei nalo amiya bulag kanano kulumŝarauo, ana amiya kulukoti tai ea naio napano be vabolo, jibe ka naŝa parinio tubo nalo amiyaio, a nalo abar nionoti tilikibi abili, amiveio ea parinio, jibe ka parinio tubo tai kanano batubatu. <sup>18</sup> Mia bogo napano abar tenalo na bisi, amiyotel eaio, aberinavo “Parinio Tubo na kulo Ju kialo, o! Kumemi nubatove kaso, kumemi numiaiaso!” <sup>19</sup> Ana nalo amidu jaati subavio, amue pariparinio, a abuvule niege-niege naio, aminie ka naio jibe ka abame-neαιο. <sup>20</sup> Mia bogo naŝa amiyotel ea naio jibe na bisi, nalo amiyalar kulukoti vabolo nei denio, ana amiya mŝano kulumŝarauo eaio bereio, ana nalo aburu naio, abatavio ka atukukakar naio ea ŝakolkolo.

*Ajukukakar Yesu mave ea ŝakolkolo*

*Mataiu 27:32-44; Luka 23:26-43; Jone 19:17-27*

<sup>21</sup> Ana bogo na na mira nalo aburu Yesu aju abano, nalo amileal toro tai napano naio ba yeturu jo miel binimee. Toro nei, nina be Saimon nanua beamu naio be toro na Saireni, a napano naio be karamŝano tomu juo nei Aleksada bija Rovus. Naruei nalo amial naio, ana ajutua ka naio kija rudu Yesu kiano ŝakolkolo rivano. <sup>22</sup> Mia nalo aburu mŝarabo ka Yesu aba abokar suku tai, siano Kolkota, napano nioti nene berenio vio na jibe kanio bordada na burriu na toro. <sup>23</sup> Naruei bogo napano nalo amijivi ea suku nene, nalo ajidom adu mŝarjumŝelŝelu van Yesu ka rimunio. Mia mŝarjumŝelŝelu nei, nalo amiyon buron vite tai mijea ban bijaio ka rila Yesu niabene rije, ka naio rijog rijalele riŝlea



ea m̄akolkolo, ana amijuvuliko ka kulum̄arauo neibano, ana nalo amidu abano mon ea m̄ano buluvae napano. Ana amelivlivi ka puruveru na toru nene binimeī, ajubonkokar m̄aratavo nene, ana aban bereio.

<sup>47</sup> Ana Mere juo nei, tinene tena vio Maktala, naliko dolu nene napano be Joses kenieno, naljuo bunu abinimeī amial vio nei napano Yesu mokotenano joaio.

## 16

*Buluvae be teau jo*

*Mataiu 28:1-8; Luka 24:1-12; Jone 20:1-10*

<sup>1</sup> Mia bogo napano Legiano Lu naio barlaka ruei bisi, nina ka bogo napano m̄erenio jikar batove vonga kijeve ka Sarere, mia Mere na vio Maktala, bija Mere napano Yemesi kenieno, bija Salome bunu, nalo tolu nei aba abulu bonotanunu nalo tealo ka romijikia aion ea Yesu niabene.

<sup>2</sup> Naruei ka Sade kavijo, bogo na m̄erenio jikar ka mijivio kia ga vo, nalo tolu amiel ka avan ea buluvae nene. <sup>3</sup> Aju amiel abano, nalo ajur̄ia abivika denlo, aberinavo “?Mia bogo na rovoru yako, mia kei mijikia rimelivlivilar ka burum̄ara puruveru napano ajubonkokar buluvae nei van kito, ka romijikia aion ea Yesu joomo?”

<sup>4</sup> Mia bogo napano nalo abinimeī vaataro ka vio nei, nalo amial ka burum̄ara puruveru nei, napano toro tai melivlivilario ruei. <sup>5</sup> Naruei nalo aba joomo ea buluvae nene, amiilo ka m̄eaku tai, naio jotano tivelinio vameruo, napano naio miya kulum̄arauo nalo na amiuuruvu laka, mia bogo na nalo amial naio amiilo bova laka.

<sup>6</sup> Naruei naio mil banlo, berinavo “!Ei, kamiū kumerou re! Kiniou nemijikia ruei ka napano kamiū kubinimeī ea vio nei bior Yesu na vio Nasarete, napano ajukar naio ea m̄akolkolo. Mia naio jumolu meul bereio ruei, naio maka bunu toa vio nei. Kamiū kumei von kuvialio! Ninei naruei vio nanua amidu batitig mokotenano mon eaio! <sup>7</sup> Mia kamiū kuvan soḡeli, kuva kuverial ka Pitere vija naiagagoano dolu nalo, ka mia Yesu rivatove tukamu kalo yako Kalele, mia nalo bunu monokanio atakisior naio, mia nalo amijikia aialio ea vio na, tavukia na nanua berkar kalo nua ruei.”

<sup>8</sup> Naruei tire nalo nei amila soḡeli, ajaluvo den buluvae, aburo abano, bior nalo amiilo toru laka ka vite nalo neibano bano-o m̄a amemebiju garuei. Ana amerou m̄lea bunu, mila ana maka ava

averial ka tomu dolu nalo leleio, mio nalo aban memedu ka naiagagoano nalo ga.

*Yesu naio miyotuba ka Mere re Maktala Mataiu 28:9-10; Jone 20:11-18*

<sup>9</sup> Ana Yesu naio meul bereio jibe nei ea kavijo vio buru vurevure ka Sade nei ruei, napano naio be legiano moti na bogoti aluo. Naruei naio jo malmaluvo keanlo napano ajakisior naio, mia nana miyotuba kean beamu be Mere re Maktala, nina napano naio mijil bulag sim̄aro nalo aluo eaio nua ruei.

<sup>10</sup> Ana iorou ka na Mere naio mial Yesu, naio ba miyotuba kean nalo nanua m̄a ajakisior naio, napano aju amijog bova a ajum̄a ajegi kia ga vo, ana naio berial kalo ka napano Yesu naio meul bereio ruei. <sup>11</sup> Naio ber batitig kalo ka naio mial Yesu ruei ka mirano, mia nalo maka amonea naio.

*Yesu miyotuba kean kiano naiagagoano juo*

<sup>12</sup> Ana iorou ka bereio, ea bogo tai napano naiagagoano juo aju ajaluvo den Yerusalemo, naljuo aju amiel abano, ana Yesu naio maluvo kean naljuo. Naruei naljuo amial jibe ka napano Yesu niabene be dolu, naio maka tibe ka nua.

<sup>13</sup> Mia bogo napano amial naio bisi, abe juo abarḡiliglo, aban bere, abano aberial vite nei ban nalo dolu, mia bogo tai bereio, nalo dolu nei maka amonea vite nei.

*Yesu naio miyotuba ka kiano naiagagoano nalo*

<sup>14</sup> Ana iorou ka bereio, Yesu naio miyotuba kean naiagagoano duelimo ba tai, ea bogo tai napano nalo ajutano aju ajinan. Ana naio mil kija banlo, bior ka napano maka avar tinielo ea naio, a bior ka napano kanalo iviso nalo jikili laka, mila na maka atu amonmonea kialo iliano nalo ka amial naio meul bereio ruei.

<sup>15</sup> Ana Yesu naio ber kalo, berinavo “Vonganei, kamiū monoka kuvano, kuvitan ka kamiū ea vio nonovio na yetemeriba nei, a kamiū monoka kuviololu ka kanaku Ioluano Vou van tom nonovio. <sup>16</sup> Ver toro tai rijogio, mia naio rimoneaio, mia karina avaruei ea naio, toro nene mia naio rijeve ioruriano. Ana naio napano ver maka rimoneaio, mia Atua naio riverkar m̄ariano vanio.

<sup>17</sup> “Mia nalo napano m̄a amoneaio, mia vremesiano nalo toalo, tibe ka napano mia ajil bulag sim̄aro nalo ea moroano na siaku, a mia ajev iliano dolu nalo, <sup>18</sup> mia ver bogo tai avokar maro tai, mia nalo avu ga, a ver bogo tai amunu vite tai napano monoka am̄aro kario, mia vite nene naio

maka rijikia rila titai kalo, a mia adu  
 juñialo toa namieiano nalo, naruei mia  
 nalo amei avu bereio.”

*Yesu naio bavin bereio tiniabene*

*Luka 24:50-53; Ināuano 1:9-11*

<sup>19</sup> Ana iorou ka napano kiado Tubo Yesu  
 ber iliano nalo nei banlo bisi, Atua burular  
 naio ban bereio mave tiniabene, midu  
 naio jotano tivelinio vameruo na naio.

<sup>20</sup> Naruei naiagagoano nalo abanvan tavieruo  
 naruei, aba amioliolu ea vio nonovio, a  
 nalo amial ka napano Tubo naio jo mīmāu  
 bijalo, naio jo mila lo amila vremesiano  
 telabo ka rila tomu nalo avitilubar ka  
 kanalo iliano nalo nei abe riano.

A tukunu nei naio bisi ea vio na.



**Yesu Kristo Kiano Ioluano  
Vou  
Napano  
LUKA  
Bivitauiaio  
Verialiano Moti**

*Tukunu bulati na niosi nei*

Niosi nei, Yesu Kristo Kiano Ioluano Vou napano Luka Jirio, naio berii Yesu ber naio be toro napano Atua berkar ruei ban taara nalo na Israel nua, ka mia rime i rilarurlo, a ka rilarur tomu nalo na yetemberba. Luka jiri ea kiano niosi nei ber Yesu nei, Atua sofi kiano niununo naruei bio naio ka riverial ioluano vou van talimasa nalo. Naruei bior vite nei, ioluano vou nei napano jirio, bujo ka tukunuano nalo napano aberial ka Atua tinien miia tomu nalo napano ajua jaleleano.

Vite dolu telabo napano romialio ea niosi nei, nina tukunuano nalo na tomu nalo napano amijog bo ajaaro. Tukunuano nalo telabo jibe na ajua mirano takurano [1] napano berial ka mia Yesu rime i, a ea mirano juo [2] napano berial ka Yesu moluo. Mia bereio ea mirano maariano, tomu nalo ajaaro napano Yesu meul bereio, a bavin ea Tiniabene. Toro napano jiri niosi nei, naio jiri niosi dolu tai bereio napano siano Atevi Nalo Kialo Imauano Nalo.

Ea niosi juo nene nei, naio berial tukunuano nalo napano amiyotuba iorou ka bogo nei napano Yesu bavin ea Tiniabene.

Tukunuano nalo nei aberial ka tomu nalo napano amonea Kristo abinime i mirouano, a aba aberial kialo moneano nei ea vio dolu nalo. Niosi nei Yesu Kristo Kiano Ioluano Vou napano Luka Jirio abe torogio arolo [8]. Ea torogio juo nene, bija torogio ari nene be tukunuano nalo napano ajua niosi nei ga, nalo maka atua niosi tolu nalo na Yesu Kristo kanano Ioluano Vou napano Mataiu, Mak bija Jone nalo tolu ajirio. Nine tukunuano napano berii agelo nalo napano amiuo, a tukunuano napano berii tomu nalo ka avitkar nunu napano abinime i ka aial Yesu ea bogo nei napano naio moluo, a tukunuano napano berii Yesu ea bogo na napano naio ban ea Atua kunuano ea bogo na naio be tete meaku kiaga, a jamerijiano na toro novo na Samaria, a jamerijiano na kirtete napano ba kovio. Vite burtumoruo tealoo nalo napano Luka berii van telabo ea niosi nei jibena. Naio berii bolkouano, a Niununo Lu, a tire nalo kialo vio ka aimau Yesu kanano, a berii napano Atua mijikia

viekokoa toro, mijikia ridular kiano kariano.

*Torogio nalo na niosi nei*

Ilano moti 1:1-4

Jone Baruei, bija Yesu naljuo amoluo, a naljuo amiluo bavini 1:5—2:52

Jone Baruei kiano imauano 3:1-20

Jone Baruei baruei ea Yesu, a Sirnaro milavono naio 3:21—4:13

Yesu mila kiano imauano ea tanobuku na Kalele 4:14—9:50

Yesu jaluvo den Kalele ba Yerusalemo 9:51—19:27

Yesu kanano sude maariano napano mila kanano imauano yako Yerusalemo bija nalo na vaataro kean Yerusalemo 19:28—23:56

Yesu meul bereio bija kiano tomu nalo amial naio 24:1-53

*Iliano na be moti*

<sup>1</sup> Kinioi Luka nebivitauia tukunuano nei banso, toro na toru Tiouvilas. Jibe ka napano jau komijikia ruei, tomu telabo abivitauia ruei tukunuano na vite nalo nei nanua amalmaluvo ka kito yuka tealoo bar laka ruei. <sup>2</sup> Vite nene nalo, kito maka reialio rimemedu ka mirado, mia tomu nalo napano jikar ea burupati nene, nalo aju amialio, a ka napano nalo ajibe ka tomu na be moti na Lilianiano Vou nabo, nalo naruei aberial sosolio batitig binime i ban kito. <sup>3</sup> Naruei jikar nanua ruei, kinioi nojomia nebitii batitig mesi dolu nalo namia abivitauiaio, a nojomia nabar iliano na vite nene nalo, naruei namial jibe bo ka ver nalavon ka navar torogio dolu nalo na tukunuano nei, novivitauia sosolio amei tibe ka niosi novo tai napano jakii memedu kiri m̄arabo sesa nalo na tukunuano novo nei. <sup>4</sup> Naio naruei nobivitauiaio ruei jo, mia kinioi najaaro ka notuvan riviedu ve kiamo, ka mia jau komijikia kovulukio, komijikia kovitulbar ka vite nalo namia kojomia komijogio ruei amemedu ga a aberiano, ajavukia namia kanaku niosi nei berialio.

*Nailiano mijuelar ban Sakaraia ka mia naio rivar Jone Baruei*

<sup>5</sup> Tukunuano nene naio jikar jibe nei: Ea bogo namia Parinio Tubo Erot naio jo mije tuboiano ea tanobuku na vio Yutea, toro lu tai, naio be m̄aratavo na Abija, a naio buru tira tai napano naio bunu miyotuba ea yati na kulo lu nalo, nina ea m̄aratavo na tormoruo Erono, Mosis kuruano re nua laka. Toro nene siano Sakaraia, a koano, siano Lesveti. <sup>6</sup> Mia naljuo nei, kialo meuliano kiri memedu laka ea Atua kiano vitiiano, ka namia amonmonea kiano tuboiano, a nalo ajumia amila bajago nalo

na memedu kaña amila bogo nonovio ga, maka aturña ala belea tai. <sup>7</sup> Mia vite takurano ga, naljuo maka ve kenerilo tai, bior tira nei Lesveti naio jumolumu ga, mia vonganei naljuo abinimei abe kulo moruo nalo laka ruei.

<sup>8</sup> Mia ka bogo tai, naio be bogo na Sakaraia kiano taara nalo monoka ava ala sida ea Atua Kunuano Lu, tavukia naña taara nalo amila terakurano ea sude nalo. <sup>9</sup> Mia danariga, bogo naña amilala jibe na, nalo monoka ala tibe ka naña amiere mabujo, ka mia aleal nalo na vabe kalo naruei napano mia naio mijikia rila burumñara inñauano nei ka mia rña riva joomo ea Vio Lu na Yimo Lu nei, ka risebi sida ea boda na jo. Mia ka bogo na amilaiio jibe na, mia Sakaraia siano mijoru loglogio, ka mia naio naruei riva rilaii burumñara inñauano nene. <sup>10</sup> Naruei monloglog bogo naña amisebi sida nene, ana naio ba joomo ka rilaiio, a burutiniobi toru na tomu nalo aju tavio ajumña abolkouo.

<sup>11</sup> Ana bogo na Sakaraia naio ba joomo, mia millobin naio ka mial Atua kiano nailiano tai napano naio miyotuba kanio, jikili ju tivelinio vameruo na boda nene. <sup>12</sup> Mia bogo na Sakaraia mial nailiano nei, naio maka bunu rijikia ka mia tumabe naruei, a merou toru bunu. <sup>13</sup> Mia nailiano nei naio mil banio, berinavo "Sakaraia, jau komerou mñele re. Kiniou nebinimei ka neverial ga vanso ka Atua mijog kenemiu volkouano kube juo ruei, a mia koamo tira na Lesveti, mia naio rivar kenerimo solbouo sunñano tai, mia bogo na naio riyotuba, mia jau monoka kesisia naio ka Jone. <sup>14</sup> Mia bogo na naio riyotuba doverovo, mia kuve juo tiniemiu saaro ve toru laka, tiniemiu sese, mia kamui ve juo re ga, mia kulo dolu nalo bunu mia asaaro ve toru laka. <sup>15</sup> Kiritete nene, mia naio rimeí rive Atua kanano toro na toru tai, a mia naio tibe ka toro lu tai, mia naio rivel ka mñarjurnelmeílu vija uei na bitunu. Tikario ea bogo napano joa kia ga kenieno mabono, mia Niununo Lu to rivujolou ea naio ruei. <sup>16</sup> Mia naio rive toro tai napano mia naio rivilig kulo Israel nalo ve telabo amei bereio ea Atua Sofí, kialo Tubo. <sup>17</sup> Mia aial ka napano niununo a moroano nanua joa Naverialiano Elaija mia to rivare ka ga naio bereio, bior mia naio tukamu rimeí, ka riverial ka mia Naverikariano naio rimeí iorou ka naio vesiou re. Mia naio rivilig teta nalo kialo iviso nalo ka mia asidomial vatitig bereio kenerilo nalo, a mia rivilig tomu nalo naña amila kokorov tuboiano ka mia atakii bereio bajago napano be masou a

memedu. Ea mñarabo nalo na naruei, mia naio rila vatitig rivu taara na tomu nalo tai ka mia ave Atua kiano, ka atu rorea naio ka mia riyotuba kalo."

<sup>18</sup> Mia Sakaraia naio mijog iliano nei, ana naio berkanio nailiano nei, berinavo "Ai, abe kover re tibe na. Maka rijikia tibe na, bior kumemi juo nei mñerenio batove ruei nei."

<sup>19</sup> Ana na nailiano nei mil ban bereio, berinavo "Makanio, mia tibe ga na. Kiniou nebe nailiano Kapriel nei, naña bogo nonovio najikili nojua Atua mirano ka mña nabar kanano iliano, naruei naio miila kiniou nebinimei easo ka neverial lilianiano novo nei vanso. <sup>20</sup> Mo bogo na kiniou neberialio kaso, mia jau maka komoneaio, naruei kiniou never kaso ka mia kove buru, a mia jau koto tibe na rivano-o rivokar bogo na keial vite nalo nene ayotuba kaso, nina ea bogo nene rimemedu."

<sup>21</sup> Mia bogo na nailiano jomña mil kia ga jibe na ban Sakaraia, mia tomu nalo ajikili aju tavio kia ga vo, aju rorea bano deio, ana nalo aju ajidomii aberinavo "Ka venia ana naio ba joomo, bijuku kiki jibe na?" <sup>22</sup> Ana iorou kanio, ana naio batavio bereio, mia nalo amial ka naio maka bunu rijikia ril vanlo, naruei nalo abitulubar ka naio jo joomo naio mial titai napano mila naio jibe na. Naruei naio jomña mil ka ga jumñano banlo, maka bunu ril be buru ga jo. <sup>23</sup> Mia naio jidel dolu ka ga mña jo mila kiano inñauano ea Yimo Lu na Atua Kunuano, bano-o kiano bogo nene bisi, ana naio ban bereio vonuo.

<sup>24</sup> Naruei nalo aju jibe na bano-o, mia maka vesiou, ana koano pígi, mia bogo na naio mial ka naio be mñabono jibe na, mia naio ba jo vonuo ga bano-o bokar siberio jumo. <sup>25</sup> Ana ea bogo na, naio jo ber jibe nei, berinavo "¡Atua bijuku bo tanea ban kiniou nei! Beamu tomu nalo ajumña abiti sa ea kiniou bior maka navar tete, mia vonganei, Atua naio mial kiniou, tinien miia kiniou, naruei naio midular imouiano na kanaku jumolumu nene ruei."

*Nailiano binimei mijuelar ban Mere ka mia naio rivar Yesu*

<sup>26-27</sup> Naruei Lesveti naio be mñabono siberio ari ruei, ana na Atua miila kiano nailiano nei, Kapriel, ka riva riverial kiano iliano tai rivan niatira tai, siano Mere, napano naio be niatira tai na komeli na vio Nasarete ea tanobuku na vio Kalele. Ea bogo na, aberkar Mere nene ruei ka mia riva soro ka toro tai, siano Yoseve, napano naio miyotuba ea yati na Parinio Tubo Teviti re nua, mia Mere naio maka riva to rivija naio vo.

<sup>28</sup> Ana na nailiano nei Kapriel naio binime, miyotuba ka Mere, naio berinavo “Mere-o, abe Atua naio jo jaaro toru laka ka jau, naio milivu kaso, a naio jo bijaso riano.”

<sup>29</sup> Mia bogo na Mere mijog iliano nei, naio jidom bijovijonio toru laka, ana ber mia riviti von, ka nailiano nei mil kirinovo laka ban naio jibe nei, ber nioti nene venia.

<sup>30</sup> Karina nailiano nei mil bereio banio, berinavo “Mere, jau komerou re. Atua tinieno jaaro kaso ga, mia rila buruñara ilivuiano tai rimei ea kiamo meuliano.

<sup>31</sup> Vonganei, mia jau kove mabomo, vano-o mia kodu kenerimo sumano tai, a ver naio riyotuba kario, ana monoka jau kesisia ka Yesu. <sup>32</sup> Iliano Lu re nua berii kenerimo nene rui, na naio berinavo

‘Naio mia rive toro na toru, a mia siano rive

“Atua Na Loa Laka Kenerinio,”

a Atua Tubo rila naio rimei ve parinio tubo tai, napano ridu jeleig korobinio re nua nene, napano parinio tubo Teviti,

<sup>33</sup> naruei mia naio rije tuboiano ka nalo napano na amiyotuba ea Yakovo kanano m̄aratavo,

nina be kulo Ju nalo na aju vonganei, a ka mia nalo na amei iorou, a kanano navenatuboiano mia naio maka rijikia ribisi bogo tai.’”

<sup>34</sup> Naruei Mere naio miilo toru laka ka iliano na ber mia naio rudu tete, ana bika den nailiano nei, berinavo “? Ana mia vite nene riyotuba sel tumabe liki nei, bior kiniou maka nuvitu biju kumemi juo kanaku sumano vo?”

<sup>35</sup> Ana na nailiano berdoŕe, berinavo “Mia Niununo Lu rivatove easo, a mia moroano na Atua Na Loa Laka kiano rimei sovokoso, ana na mia jau koŕigi. Ana bior mia jau kotibe na, mia nalo averinavo kiritete lu napano mia jau koduio be ‘Atua kenerinio.’

<sup>36</sup> “Ea kanamo vitiiano, jau komial tena kirisikili laka ka mia tibe na, ana bo ka jau kosidomii von koniomo tiramoruo Lesveti yako. Aju amial aber mia naio rivar kulu re tete ga, mia naber kaso, naio be tiramoruo rui, mia vonganei, naio kiano siberio ari rui. <sup>37</sup> Jau monoka tiniemo rimaio, ka jibe ka napano Atua ber ka tiramoruo Sera re nua laka, ea tivelinio ka naio, maka ve titai leleio napano mia naio rijikia re ka rilaiio.”

<sup>38</sup> Ana na Mere naio berdoŕe, berinavo “Terinio ga. Kiniou nobe niatira na Atua kanano im̄auano ga, mo kiniou nomijamo ga ka mia naio rila vite nalo na ayotuba ka

kiniou tibe ka ga napano naio jidomio, tibe kanio na jau koberial ban kiniou na.” Ana na nailiano nene juvan naio ban bereio.

#### *Mere ba miadu ka Lesveti*

<sup>39</sup> Ana na Mere jon̄a jidomii nailiano nei kanano iliano nalo nei, karina naio jidom toru ka riva rial kenieno nene napano Lesveti, mia maka vesiou ga, ana naio jumolu den kiano vio, mila soŕeli ban ea m̄arkomeli napano Lesveti naio koano Sakaraia ajuai, nina ea tanobuku na suku nalo na vio Yutea.

<sup>40</sup> Mia Mere neibano bokar naljuo nei kunualo nene, naio ba bio Lesveti. <sup>41</sup> Mia bogo napano Lesveti naio mijog lubar Mere joono ka mil banio, naio mijog ka kenerinio napano joa naio, bijobijo toru. Naruei Niununo Lu binime ea Lesveti, naio binime bujolou eao, <sup>42</sup> naio miaga manenea, berinavo “Aiou Mere, Atua rilivu kaso ve toru laka, loa tira dolu nalo aviniu, a mia kanano buruñara ilivuiano toa bunu kanamo m̄arati napano mia kovario! <sup>43</sup> Kiniou maka nove tira na memedu leleio ka mia kanaku Tubo Kenieno rimei riadu ka kiniou tibe nei, mia namial kirinovo laka ban kiniou. <sup>44</sup> Mia kanaku solbouo naio bitilubarso, naio jaaro toru laka, bior monloglog bogo napano numijog joomo be moti garuei, naio bijobijo toru laka ea kiniou. <sup>45</sup> Kito juo rajaaro mia rajaaro, bior robiekar batitig Atua Soŕi kanano iliano, a mia rimei rive riano van kito juo tavukia ga napano naio berkar ban kito rui.”

#### *Mere miaia Atua ka iouano tai*

<sup>46</sup> Ana ka bogo na, Mere kanano iouano tai jibe nei, berinavo

“Kanku iviso miaia Atua toru,

<sup>47</sup> niunuku jaaro toru laka ea Tubo kiaku ioruriano,

<sup>48-49</sup> naio mial kiniou nojotano,

tira na kiano im̄auano tai,

naio be Atua na Moroano,

jidomial kiniou,

mila tonovo ban kiniou.

Taara nalo napano amei iorou, averii kin-  
iou, averinavo

“Tira nei, Atua milivu toru.’

Nomidular siano lu,

<sup>50</sup> tinien mia nalo nam̄a ajutano kanio,

taara re nua, na iorou.

<sup>51</sup> Moroano na jum̄ano mila vite miroano,

naio jiburevure nalo nam̄a tinielo jikili,

mila dedade ealo abeve terakurano.

<sup>52</sup> Mila bulag parinio tubo den jelelo,

bitiri bulag nalo nam̄a jidomiano batove  
ga.

<sup>53</sup> Nalo nam̄a jijerlo, naio bagan batitiglo,

nalo nam̄a abe sanibaiano,

naio mijil bulaglo, juñalo yauo ga.

<sup>54-55</sup> Naio mila naña berkario nua ban korobido nalo,

binimej miija kito, kanano kulo Israel nalo. Maka rivotoviton ea Epraamo, tinienriia kiano bajulukuti nañariga-o tobo to."

<sup>56</sup> Naina naruei Mere kiano iouano maaro ea vio na, mia naio jo bija Lesveti bano-o bokar siberio tolu, karina ban ea kanano vonuo bereio.

### *Jone Baruei naio moluo*

<sup>57</sup> Naruei binimej monloglog bogo na mia Lesveti rudu kenerinio, mia naio barlar be suñano. <sup>58</sup> Mia bogo napano Lesveti kiano ñaratavo bija tomu na vaataro nalo amijogial vite nei, nalo ajaaro toru laka bija naio ka Atua kanano burumãara tinieiano nei banio, ka beamu naio be jumolumu ga, mia vonganei naio barlar kenerinio motoru. <sup>59</sup> Mia bogo na kiritete nei naio bokar bogoti aluo, ana abinimej ka ala pakuveu ka naio. Ka bogo na, ajidom ka adu siano bunu, avio ka Sakaraia, tibe ka karamãano siano, <sup>60</sup> mia kiritete kenieno berbure, berinavo "Makanio, naio siano Jone." <sup>61</sup> Naruei nalo amil banio, aberinavo "?Venia na? !Maka lele garuei kanamo ñaratavo tai napano adu sio na jibe na toa naio!"

<sup>62</sup> Naruei amil ka ga juñalo ban kiritete nei karamãano, ka avika denio ka naio jidom ka adu sio na vabe toa kenerinio nene. <sup>63</sup> Ana na Sakaraia mil ka juñano banlo, ber adu ñesi tai rimej vanio, naruei naio bivitauia, berinavo "Siano, Jone."

Vite na naruei mila nalo na vio na amiilo toru laka kanio, <sup>64</sup> mia monloglog bogo na bunu, Sakaraia minano mijuo, naruei naio mijikia mil bereio, ana na miaia Atua.

<sup>65</sup> Mia tomu nonovio nalo na tanobuku na, amijogial vite nei, amiilo va kanio, mia tukunuano nene mererako janea ñarkomeli dolu nalo na tanobuku na suku nalo na vio Yutea. <sup>66</sup> Ana na nalo naña amijogio, ajidom bijovijon toru laka kanio, bior abitulubar ka Atua juñano jo bijaio, naruei nalo ajuña abivika denlo, aberinavo "?Kiritete lu nei mia naio tuñabe?"

### *Sakaraia berial iliano na Atua jian banio*

<sup>67</sup> Naruei Niununo Lu binimej bujomagmago ea Sakaraia, kiritete telisu nei karamãano, ana naio berial jibe nei, ber

<sup>68</sup> "Kito raiaia kanado Atua siano, Tubo re Israel,

batove kean kito, bulular kito,

<sup>69</sup> bitirilar kiano siyovo, miyotuba ea bajulukuti na kiano toro na iñauano Teviti,

ka mia rilarrur kito.

<sup>70</sup> Nina kiano verikariano nanua, naverialiano nalo aberialio, aber

<sup>71</sup> Naio mia rivuru bulag kito den kiado uolu nalo juñalo,

<sup>72</sup> tiniene ribobogia re kanano virakariano bija korobido nalo,

tinien miialo kia ga vo.

<sup>73</sup> Nina verikariano jikili nene bija korobido Epraamo,

<sup>74-75</sup> nanua Atua berkar ber rilarrur kito ka kiado uolu nalo juñalo,

ka romerou re bunu, rove lu,

romemedu kamu ea mirano, roimãau kanano ka legiano nonovio ea kiado meuliano.

<sup>76</sup> Keneriku, mia avioso ka Atua Loa Laka kiano Naverialiano,

mia kotukamu ka kala vatitig Tubo kiano ñarabo.

<sup>77-78</sup> Mia koverial ka mia Atua tinien riia kiano tomu nalo,

tinien tiilo, ana mia riviekokoa kialo kariano nalo,

a rilarrurlo.

Mia Atua riila kiano kiriyulu telisu na kavijo ve moti rimererali kito,

<sup>79</sup> rimej rimererali kito napano ña rojua melijokouo,

napano niununu nañariano miununuko kito rui,

a mia rimej rimererali ñarabo na tuñiaro ka rotuña reiel eaio."

### *Jone Baruei miluo*

<sup>80</sup> Mia bogo na yuka nalo aju abarlaka bano, Jone nene naio miluo bavin ririo bo, a kiano jidomiano meruo batitigio, a naio biekouo ea Atua kiano iñauano bo. A naio ba joa vio yauo, ka riva rivokar bogo na mia naio monoka riyotuba ea kulo Israel nalo miralo.

## 2

### *Yesu moluo*

#### *Mataiu 1:18-25*

<sup>1</sup> Ana ka bogo na, parinio tubo na kulo Romo kialo, naio siano Sisa Okastat. Naruei naio berial ka mia monoka avuluku tomu nalo na venuo nalo naña ajutano ka kiano vitikariano. <sup>2</sup> Iñauano na abuluku tomu nalo nei, naio be moti na amila jibe na, a ka bogo na amilaio, mia

toro tai na Sisa kanano naio joña bitikar burunfara tanobuku nei na vio Siria, a toro na toru nene, siano Kuarenias. <sup>3</sup> Ana ka ala iñauano nei, aberenio tomu nonovio monoka avanvan bereio ea kialo vio nalo, ka mia amijikia avivitauia vatitig sialo, a avuluku vatitiglo.

<sup>4</sup> Vite na naruei mila ana Yoseve naio jumolu den komeli na vio Nasarete, naña naio jojoaio, nina ea tanobuku na vio

Kalele, ana naio bavin ea komeli na vio Betleem, ea vio na tormoruo Parinio Tubo Teviti naio moluo eaio nua, nina ea tanobutua na vio Yutea, bior Yoseve naio miyotuba ea yati na tormoruo Teviti nene.

<sup>5</sup> Mo Yoseve burukar koano Mere jakisorio, napano ka bogo na, vaataro ka rivarlar kenerinio. <sup>6</sup> Naruei abe juo abano, mia bogo na nalo aju kia ga Betleem vo, mia Mere mijog ea naio ka kiano bogo na mia naio to joomo binime nonovio naruei. <sup>7</sup> Ana na Mere midu kenerinio motoru, naio be suriano, a naio bivikakari batitigio ka niakulmarauo, mia maka kanano vio nabo tai, bior abe juo amilavon ka ava atua yimo na valauo, mia naio bujo rui, naruei Mere mila kenerinio mon joomo ea vio na abagan temeul nalo eaio.

*Nailiano nalo amiyotuba ka navitikariano na nunu nalo*

<sup>8</sup> Naruei ka bogiano nene, be tomu tai naña abitikar nunu aju bija kialo temeul nalo, ea soro tavio ka Betleem nene ga. <sup>9</sup> Naruei Atua kanano nailiano tai batove keanlo, a Atua kiano mermerano midulii rera vio nene jibe ka buruñara yulu tai, mila nalo nei amerou toru laka. <sup>10</sup> Naruei nailiano nei mil banlo, berenio berinavo "Kamui kumerou re. Kiniou nomidu iliano nabo tai ka naver ka kamui, ka mia naio mijikia rila tomu nonovio ajog rivu ve toru laka. <sup>11</sup> Ka bogiano nei ga, ea komeli na Parinio tubo Teviti re nua kanano, nina ea vio Betleem, kiritete solbouo tai naio moluo vonga, ka mia naio rive kenemiu ioruriano. Naina naruei be kenemiu Tubo, naio be Naverikariano naña Atua berkario nua rui ka mia riilaio rimei.

<sup>12</sup> "A naina naruei be kijokijo na vite nene: Mia kamui kuvileal kiritete telisu nene, napano amila kokouro ea naio. Mia kuvial ka napano abivikario ka niakulmarauo nalo ga, ka mia adu naio ka rimon ea vio na temeul nalo salo sinani-ano."

<sup>13</sup> Naruei nalo amiilo ka soĝeli ga, buruñara taara na nailiano dolu nalo na vio mave abinime amiasolo bija nailiano neibano. Naruei nailiano nalo nei amiaia Atua, a amiou aber

<sup>14</sup> "Mave niogovu, nalo ajumña amiaia Atua toru, a ea yetemeriba nei, tunaro joa tomu na Atua jaaro kalo."

*Tomu na abitikar nunu nalo aba Betleem*

<sup>15</sup> Nailiano nalo aberial iliano nei rui, bisi na ajaluvo den tomu na abitikar nunu nalo nei bereio, karina abavin mave niogovu. Naruei nalo nei ajumña aberverii vite nei banlo bereio, aberinavo "Ai, abe

ravano. Bo ka rava Betleem ka reial vite nei miyotuba vonganei, napano Atua berial ka kito."

<sup>16</sup> Ana nalo amila soĝeli, aba amileal Mere naio Yoseve, a amijaka aba amiadu ka kiritete sesa napano monea niano vio naña abavagan temeul eaio. <sup>17</sup> Mia bogo na amial vite nalo nei, ana aber bulavulag nonovio iliano nalo napano nailiano berial kalo rui, tivelino na kiritete sesa nei. <sup>18</sup> Telikiti na kulo dolu nalo amijog tukunuano nei, tinielo bujo ka buruñara vameneano tai. <sup>19</sup> Mia Mere, mijekar vatitig nonovio vite nalo nei jua kiano iviso, maka tiniene ribobogia, naio jomña jo jidomiio julaka ga.

<sup>20</sup> Mia tomu nalo nei aban bereio ea kialo nunu nalo, a ajumña abamenea Atua siano, a nalo ajumña amiaia naio toru laka ka vite kirinovo nalo napano amijogio a amialio, napano kirimemedu ga ka nailiano nei kiano iliano napano berial banlo.

*Amidu Yesu siano banio*

<sup>21</sup> Telikiti napano kiritete bokar kiano sude takurano, naio be bogo na mia ala pakuveu ea naio. Amila jibe na, kario ajisia ka Yesu, napano sio nei be sio nanua nailiano berial kalo jukamu rui, avona bisi ana Mere naio be ĩigi kanio.

*Amidu dovorovo Yesu ban ea Atua Kunuano Lu*

<sup>22-24</sup> Telikiti na Yesu miyotuba sude ari barlaka rui vo, bisi na be bogo na monoka avuru sida na lakoniano ea Atua Kunuano Lu, nina bior burukija na tira na bar tete. Naruei aba aburu sida nene, jakii tuboiano na Mosis kiano berenio, berinavo "Talmasa nalo amijikia aue ga vaama ve juo, ĩeli na kirisibo ve juo."

Ana ka bogo nene, amidu dovorovo Yesu ban ea Atua Kunuano Lu, amiokoio ban Atua. Vite na jakii Mosis kiano tuboiano, na naio berenio "Tete suriano nalo nonovio na amoluo jukamu, nalo abe lu, abe Atua kanano."

*Tormoruo Simion mial Yesu ea Atua Kunuano Lu*

<sup>25</sup> Mia be toro tai joa Atua Kunuano Lu ka bogo na, siano be Simion. Naio be tena vio Yerusalemo ga tai, naio be namemedu tai, a naio be toro tai naña biekoio ea bajago na volkouano. Naio jororea jidom rñelea ka rial Atua kanano Natinieiano, nina Naverikariano, rimei ea kulo Israel nalo ea bogokouo nei ajaiao.

Mia Simion nei naio be toro tai naña Niununo Lu jojoa mña naio nañariga, <sup>26</sup> mia Niununo Lu berial ka naio rui ka mia naio rivakovio re vo rivano-o mia mirano rialio

Atua kiano Naverikariano. <sup>27</sup> Ana Niununo Lu buru naio binimeí ea Atua Kunuano Lu, monloglog bogo na amidu kiritete sesa Yesu binimeí, ka ala bajago na tuboiano nene.

<sup>28</sup> Ana Simion midu kiritete nene, ana naio miaia Atua a ber siva banio, berinavo

<sup>29</sup> “Tubo toru o, vonganei nemial vite na jau koberkar ka kiniou, naio miyotuba rui. Mila tunāro binimeí ea tinieku,

ana vonganei jau komijikia kajamo ka kiniou kanamo naimāuano, nataluvo den yetemeriba nei nevedu.

<sup>30</sup> Ea miraku ga namial kanamo Ioruriano, <sup>31</sup> napano komiila binimeí ea tomu kinkin nalo na yetemeriba nei miralo,

<sup>32</sup> javukia yulu tai napano jiloglogso ka kulo dolu nalo, a ka mia aiaia kumemi kanamo kulo Ju nalo, bior kenememi mermerano nei, Yesu.”

<sup>33</sup> Ana Yoseve naio Mere, abe juo amiilo toru laka ka Simion kanano iliano nalo namā berii Yesu, <sup>34</sup> ana Simion mil bereio, milivu kalo, naruei naio mil ban Yesu kenieno, berinavo

“Atua mila kiritete nei binimeí ban kito na vio Israel ka rila kito ve telabo rojoru,

a kanio rila kito ve telabo rotumolu bereio. Atua mila naio binimeí jibe ka kijokijo tai, mia tomu ve telabo ail rivova ka naio,

<sup>35</sup> ana tibena mia naio rila kialo jidomiano nalo napano mā ajuluku nei amal-maluvo ea vio medave.

Mia tivelinio ka jau, mia jogvaiano tulu tiniemo tavukia iobogu na mira, mia kanamo iviso rivuruḡeio kar tenalo na napano mia ayotuba ka kenerimo nei.”

*Tiramoruo Ana mial Yesu ea Atua Kunuano Lu*

<sup>36-37</sup> Mia tiramoruo tai bunu jo ka bogo nene, siano Ana, napano naio be naverialiano tai. A Ana nene, karañano siano Vanuele, napano naio miyotuba ea yati na tormoruo Aisere re nua. Naio joro nua rui, ka bogo na naio be niatira kia ga vo, mia naio jo bija koano ka yuka aluo ga, ana koano m̄aro denio. Naruei naio be taanou jibe na ga, bano-o kiano yuka bokario duelimo va arolu ba veri [84].

Naio be tira tai napano monmon ka ga mā jojoa mā Atua Kunuano Lu, napano naio joñā bijurukar bogo na lotuano na kavijo bano-o bokario na kijeivi, a dañariga naio monduka mā jo bolokouo.

<sup>38</sup> Ka bogo na naruei, naio binimeí vaataro kalo, ana naio bolokouo, ber siva toru ban Atua bior kiritete nei, a iorou ka nina, naio ba tavio ba joñā berii Yesu ban tomu nalo namā aju ajirarag rorea ka Atua rimeí rilarur Yerusalemo, mia Ana ber bisivisii banlo ka kanalo Naverikariano naio binimeí rui.

*Yoseve nalo aban bereio Nasarete*

<sup>39</sup> Telikiti napano Yoseve naio Mere amila nonovio vite nalo nei binii javukia namā Atua kanano tuboiano berenio, mo Yesu abatove bereio ea kanalo komeli na Nasarete, nina ea tanobuku na vio Kalele.

<sup>40</sup> Mia kiritete nene miluo binimeí toru, a kiano jidomiano binimeí be masou laka, a amial ka napano Atua miija naio ka naio rila vite nonovio rivu ea kiano meuliano.

*Yesu be m̄eaku kia ga, naio berloglog tomu nalo ea Yimo Lu*

<sup>41</sup> Ana ka yuka nonovio, kulo Ju nalo ajuñā amila kanalo jokoluolu tai, napano naio be Sidomkariano na Ioruriano. A dañariga, nalo namā aju janea vio dolu, tiniel jii toru ka avavin Yerusalemo ka ala jokoluolu nene, a Yesu kanano tormoruo juo bunu amila jibe na. <sup>42</sup> Ana ka yuka tai, bogo napano Yesu kanano yuka bokar duelimo ba juo [12] kia ga vo, aban bereio aburu Yesu bijalo. <sup>43</sup> Mia amila vite nalo na jokoluolu nei bano-o binii, ana tomu nalo amieliel bere abanvan ea kanalo vio nalo. Mia Yesu naio maka rivano, naio jobo kia Yerusalemo, mia kanano tormoruo juo, maka ajikiaio. <sup>44</sup> Naljuo ajidomii aberianā naio jo kovio bija lo bure buruñara taara na m̄aratavo bija kanalo bilbilu nalo, mia nalo amiel ba bokar legiano momou takurano. Mia bogiano ana ajirag Yesu bano-o, <sup>45</sup> mia maka aialio to vijalo, naruei nalo amial ka monoka atakii bere jaalo ava Yerusalemo alavon ka alealio. <sup>46</sup> Amiel bogoti takurano momou, abinimeí aboru bereio Yerusalemo, nalo ajiragio bano-o, ana ea bogoti dolu nene, be bogoti tolu na kialo ieliano, ana amileal vonga naio, amial naio joñā jotano ea Atua Kunuano Lu. Naio jotano bija naverloglogiano nalo na vio na, naio joñā mije tiliniene ka kialo iliano nalo, a joñā bivika vikadeniano denlo. <sup>47</sup> A nalo namā aju vaataro ka Yesu ea bogo na, amiilo toru ka kiano buruñara masouano a jikiaiano na, a kanio verdoḡeiano nalo namā naio jian ban nalo namā ajuñā abika vite denio. <sup>48</sup> Ana telikiti napano kanano tormoruo juo nalo amial ka napano naio joñā mila jibe na, amiilo toru kanio, ana kenieno mil banio, berinavo “!Ai, keneriku! ?Bior vaio ana kojidom ka kala lelan kumemi

ve toru tibe na? Kealio, kumemi juo numisiragso-o mia, maka lele nuvillealso, komila kumemi numijog kirivova-o mia.”

<sup>49</sup> Ana ka bogo na Yesu midu verdoŕeiano tai banlo, napano ber jibe nei, berinavo “? Bior vaio ana kubano kumitunŕa kumisirag kiniou janea vio dolu nalo jibe na? Jumabe, kamjuo maka kumisidomii ka kiniou monoka notomŕa nala Teta kanano inŕauano joomo ea kunuano?”  
<sup>50</sup> Mia verdoŕeiano na ber kalo, maka ajikia ajog lubar nioti nene. <sup>51</sup> Naruei Yesu jumolu den vio nei, ana naio ban bijalo, abatove bereio ea kanalo vio Nasarete.

Ana Yesu jobo bijalo ea vio na, naio jo mijogkarlo bo danŕariga. A kenieno Mere naio jomŕa jidomikar vite nalo nei joomo ea kanano iviso bogo nonovio. <sup>52</sup> Mia yuka nalo aju abinimei abarlaka bano, mia Yesu jo miluo binimei toru nonovio, a kiano masouano bija kiano moroano jo binimei toru lie vo, mia Atua jo milivu kanio toru laka, mila ana tomu nalo amial naio bo laka, ajaaro toru kanio.

### 3

*Jone Baruei naio joa vio yauo, jomŕa mioliolu ka naviligiano*

<sup>1-2</sup> Yuka tealo bar laka ruei vo bisi, ana Jone Baruei, Sakaraia kenerinio, naio miyotuba ea vio yauo. Nina ea bogo na burumŕara parinio tubo Taiperias Sisa na vio Romo naio be tubo bokar kiano yuka duelimo ba jimo ruei, ana ka telikiti na naio bitiri bulag kanano tomu na tortoru nalo tai ruei, jibe Pontas Pailat, naio mije tuboiano ea vio Yutea, a Erot, naio mije tuboiano ea vio Kalele, a kuruano Vilip, naio mije tuboiano ea tano na vio Ituraia bija Trakonaetis, a Lesanias, naio mije tuboiano ea tanobuku na vio Abilini. Ana ka bogo na bunu, parinio kulo lu juo napano mŕa aju Yerusalemo, be Anas naljuo Kaivas.

Mia Jone joa vio yauo, ana Atua jian iliano ban naio, <sup>3</sup> naio ba jeliviv ea tanobuku nalo na Yortano, naio jomŕa mioliolu berinavo tomu nalo monoka aviliglo, a avaruei, tibe na ana mia Atua riviekokoa kanalo kariano nalo. <sup>4</sup> Naio mila javukia ga na nanua mŕa Naverialiano Aisea naio ber nua ruei ea kiano niosi, napano mŕa berenio

*“Niono tai naio jo bio ea vio yauo, berinavo: Kuvila vatitig Atua kanano mŕarabo nalo, ka naio mijikia rimei ea kene-miu meuliano nalo.*

<sup>5</sup> *Mia monoka kuvitiviniko boŕaŕili nalo,*

*a monoka kuvikili bulag yasuku nalo avatove rivu,*

*a vio nalo na jorokoro monoka nalo amemedu rivu,*

*a vio nalo namŕa jukujukuduo monoka nalo aierivin rivu;*

<sup>6</sup> *tibe na, ana mia taara nonovio na tomu nalo aial kialo Ioruriano napano Atua riila riel ea mŕarabo nei riyotuba kalo.”* Ais 40:3-5

*Tomu nalo abinimei ka Jone*

<sup>7</sup> Inŕauano na be Jone kanano, naio jo ka mŕa rioliolu tibe na naruei, mia telikiti na tiniobi toru aba tavio ea vio yauo ka naio rivaruei ealo, naio mil jikili banlo, naio ber jibe nei berinavo “Kamii na kumitibe ka maro nalo ga napano amerou ka sebi tai ana aburo, mia kuberiaŕmŕa kumijikia kuvuro ka buruta kenieno sebi na mia Atua rionio rimei? Makanio, bior maka kuvilig kamii vatitigio vo. <sup>8</sup> Mia ver kube riano ka napano kumerou ka vironiano nei, kenemiu meuliano monoka avar mŕarati nabo napano rivare ka kenemiu viligiano nene. Mia kuvitkar, kuve re mŕarou bereio, tibe ka namŕa kumila ruei, namŕa kumitunŕa kuberinavo ‘Ee, kito roju bo ruei, bior kito naruei robe Epraamo kiano yati nalo memedu kia nei.’ Mia nina maka titenia, bior ver Atua sidom, naio mijikia rivar puruveru nalo na ga rimaukalo ave Epraamo kanano yati ve telabo, ka mia adu jelemiu. <sup>9</sup> Kiniou neber ka kamii, ka mŕaryekesi jo ruei ka te bulag buruiesi nalo na maka avar mŕarati nabo, ka avukulo avan ea burutinia sebi.”

<sup>10</sup> Telikiti na tiniobi neibano amijogio amerou mia amerou, ana abika aberinavo “Mo aver tibe na, ana mia kumemi nuvila tunŕabe naruei?”

<sup>11</sup> Ana Jone berdoŕelo, berinavo “Toro na mŕano kulukoti juo, mia monoka naio rijamo ka tinene van toro na maka ve mŕano tai; a toro na be sano sinaniano miroano, mia naio monoka riviovio ka tealo van toro na maka ve sano taio.”

<sup>12</sup> A tomu na takis, namŕa abe tomu na jukujukuanu memedu, telabo bunu abinimei ka Jone rivaruei ealo, mia nalo bunu abitilubar kialo vovaiano nalo, naruei abika bunu aberinavo “?Naverilogiano, tunŕabe ka kumemi, mia monoka nuvila tunŕabe?”

<sup>13</sup> Ana naio ber kalo, berinavo “Mia kuvar den tomu nalo rive verare ka ga nana mia monoka avuluio, mia to loa re, tibe ka namŕa kumilala mugaruei.”

<sup>14</sup> Mia tomu na mira tealo bunu abika jibe na ka Jone, aberinavo “?Mia kumemi, nuvila tumabe?”

Naruei naio ber kalo, berinavo “Kamui kubar kenemiu tenalo na mira ana tomu naloaju amerou laka ka kamui, mila na bogo napano kamui kumisidom vite tai, kuber ga, ana nalo monoka ajamo bior napano amerou. Mia bajago na, mia monoka kuvila re bereio. A kamui kumitumia tiniemiu mimi damariga ka kuber tom na tortoru nalo ajumia abulu kamui telisu ga, p̄eli bare ga kovio vo, mia kamui monoka kuvisaaro ga kanio.”

*Jone berenio mia Naverikariano rimei*

<sup>15</sup> Mia ea bogo na, kulo Ju ajidomii aber kialo Naverikariano vaatara ka maluvo, ana nalo amijog Jone kiano ilinovoiano nalo nei, ana nalo ajaaro kanio, naruei vikadeniano joa kialo jidomiano, ajumia abivika, aberinavo “? Aa, p̄eli toro na naruei, p̄eli naio be kiado Naverikariano kovio?”

<sup>16</sup> Mia Jone naio jom̄ia ber lubarbario banlo, naio berinavo “Makanio, kiniou nebinimej jukamu, nojor̄ia nabaruei ea kamui ka uei ga, mia be toro dolu tai napano naio jo binimej iorou ka kiniou. Toro nene, naio loa lie vo ka kiniou, mia kiniou maka navare ka neialar kanano kulubue na jaano, p̄eli nala kanano im̄iauoanadolu tai. Mia naio naruei, mia rivaruei ea kamui ka Niununo Lu, rivija kanano sebi, ka risebi kon niamiamo nono den kenemiu meuliano nalo. <sup>17</sup> Naio jibe ka napano naio midukar burupia m̄artea tai, ka mia rikurkar ka uiti nalo, ri p̄ilig kon m̄arati nalo. Tibe na, ka mia naio rivar m̄arati uiti nabo nene ava vonuo, mia naio rivuku vinikiti nene rivan ea sebi tai napano mia maka rijikia rim̄aro bogo tai.”

<sup>18</sup> Nina naruei, Jone Baruei naio jom̄ia mioliolu ka ioluano vou nabo ban tomu nalo jibe na naruei, a naio jom̄ia ber iliano dolu nabo telabo ka tunukakarlo, a ka rilabonlo. <sup>19</sup> Mia be toro tai naio tiniene maka saaro ka Jone nene leleio, nina be Parinio tubo Erot, bior ka napano Jone naio jom̄ia mil banio ka napano naio burular tira nei Erotias, napano kuruano koano, mia mil banio bunu ka vite dolu telabo napano jom̄ia milaio. <sup>20</sup> Mia loa ka kanano vovaiano dolu nalo, Erot tinien jer Jone banbano-o deio, ana jumolu buku naio ban ea yimo na lakoiano.

*Jone baruei ea Yesu*

*Mataiu 3:13-17; Mak 1:9-11*

<sup>21</sup> Mia bogo na Jone maka rivan ea yimo na lakoiano vo, naio jom̄ia baruei

ea tomu nalo banbano-o, mia bogo tai ana Yesu bunu binimej ea vio nene, ana na Jone baruei ea naio bunu. Naruei telikiti na Yesu jaluvo den uei, naio jom̄ia bolkouo, ana vio mave betavo, <sup>22</sup> naruei Atua kanano Niununo midu niabene, naio batove binimej jibe ka vaama tai, binimej bujo jua naio. Ana na Atua mil jel mave batove berkanio, berinavo “Jau kobe keneriku na, nam̄ia nejidomso toru laka. Tinieku joaso, tinieku jaaro toru kaso.”

*Yesu korobinio nalo*

*Mataiu 1:1-17*

<sup>23</sup> Mia iorou ka na Jone baruei ea Yesu, ana na naio jikar kiano im̄iauoan naruei, ana ka bogo na, naio kiano yuka bokar duelimo va rolu. Mia yati na Yesu miyotuba eaio, nina tivelinio ka sum̄iano, jikar ea Yoseve, napano amial jibe ka naio be Yesu karam̄ano, naio jo ban jibe na:

Yoseve, naio be Eli kenerinio

<sup>24</sup> Eli naio be Matata kenerinio

Matata naio be Livai kenerinio

Livai naio be Melki kenerinio

Melki naio be Janae kenerinio

Janae naio be Yoseve kenerinio

<sup>25</sup> Yoseve naio be Matateas kenerinio

Matateas, naio be Amos kenerinio

Amos, naio be Neam kenerinio

Neam, naio be Esli kenerinio

Esli, naio be Nagae kenerinio

<sup>26</sup> Nagae, naio be Mat kenerinio

Mat, naio be Matateas kenerinio

Matateas, naio be Semein kenerinio

Semein, naio be Yosek kenerinio

Yosek, naio be Jota kenerinio

<sup>27</sup> Jota, naio be Joanan kenerinio

Joanan, naio be Resa kenerinio

Resa, naio be Serupapele kenerinio

Serupapele, naio be Sieltiel kenerinio

Sieltiel, naio be Neri kenerinio

<sup>28</sup> Neri, naio be Melki kenerinio

Melki, naio be Adi kenerinio

Adi, naio be Kosam kenerinio

Kosam, naio be Elm̄atam kenerinio

Elm̄atam, naio be Ere kenerinio

<sup>29</sup> Ere, naio be Yosua kenerinio

Yosua, naio be Eliesa kenerinio

Eliesa, naio be Jorim kenerinio

Jorim, naio be Matat kenerinio

Matat, naio be Livai kenerinio

<sup>30</sup> Livai, naio be Simion kenerinio

Simion, naio be Yuta kenerinio

Yuta, naio be Yoseve kenerinio

Yoseve, naio be Jonam kenerinio

Jonam, naio be Eliakim kenerinio

<sup>31</sup> Eliakim, naio be Melea kenerinio

Melea, naio be Mena kenerinio

Mena, naio be Matata kenerinio

Matata, naio be Netan kenerinio



Netan, naio be Teviti kenerinio  
<sup>32</sup> Teviti, naio be Jese kenerinio  
 Jese, naio be Ovete kenerinio  
 Ovete, naio be Boasa kenerinio  
 Boasa, naio be Sala kenerinio  
 Sala, naio be Nesono kenerinio  
<sup>33</sup> Nesono, naio be Aminatapo kenerinio  
 Aminatapo, naio be Atmin kenerinio  
 Atmin, naio be Ani kenerinio  
 Ani, naio be Esrono kenerinio  
 Esrono, naio be Peres kenerinio  
 Peres, naio be Yuta kenerinio  
<sup>34</sup> Yuta, naio be Yakovo kenerinio  
 Yakovo, naio be Aisak kenerinio  
 Aisak, naio be Epraamo kenerinio  
 Epraamo, naio be Tera kenerinio  
 Tera, naio be Nao kenerinio  
<sup>35</sup> Nao, naio be Seruk kenerinio  
 Seruk, naio be Reu kenerinio  
 Reu, naio be Pelek kenerinio  
 Pelek, naio be Epa kenerinio  
 Epa, naio be Sela kenerinio  
<sup>36</sup> Sela, naio be Kaenan kenerinio  
 Kaenan, naio be Avaksati, kenerinio  
 Avaksati, naio be Sem kenerinio  
 Sem, naio be Noa kenerinio  
 Noa, naio be Lamek kenerinio  
<sup>37</sup> Lamek, naio be Metusela kenerinio  
 Metusela, naio be Inok kenerinio  
 Inok, naio be Jarete kenerinio  
 Jarete, naio be Malalel kenerinio  
 Malalel, naio be Kaenan kenerinio  
<sup>38</sup> Kaenan, naio be Enos kenerinio  
 Enos, naio be Sete kenerinio  
 Sete, naio be Atam kenerinio  
 ana Atam, naio be Atua kenerinio.

## 4

*Siñaro nalo kanalo parinio tubo, napano Setano, milavon Yesu*

*Mataiū 4:1-11; Mak 1:12-13*

<sup>1</sup> Naruei telikiti na Yesu naio binime'i bereio ea tanobuku na marauei na Yortano ea vio na Jone baruei ea naio, naio binime'i bujo vatitig ka Niununo Lu. Ana na Niununo buru Yesu ban ea vio yauo bereio, <sup>2</sup> mo naio joa vio na bano-o bokar bogoti duelimo va veri [40], napano mia siñaro nalo kanalo parinio tubo nei joñia milalilio. A ka bogoti nalo na, naio maka nã to sinano, banbano-o na mijog ka jijer naio.

<sup>3</sup> Ana Setano nene binime'i, berinavo "Ver jau kobe Atua kenerinio riano, jau kover von ka puruveru na ka rimei rive joko, ka kosenio." <sup>4</sup> Ana Yesu berdoŕe, berinavo "Maka leleio, bior Iliano Lu naio ber rui, berinavo 'Maka toro rijikia rila toro rimeul ea siniano ga.'"

<sup>5</sup> Ana na Setano jidom rilavon Yesu bereio, naruei naio buru kanano jidomiano bavin ea buruñara burusuku tai. Ana vaarakurano ga naio jiloglog buruvenuo nalo na yetemeriba nei kanio, <sup>6</sup> ana naio berkanio, berinavo "Navitikariano na vio nalo na, bija kialo mermerano nonovio nalo na, ajua juñaku rui. Kiniou nabar siano kario, ka namijikia najamo ka van kei napano tinieku ka naio. <sup>7</sup> Mo, ver jau kojorua jaaku ga, kobolkouo ka kiniou ga, mia kiniou najamo ka vite nalo na riviniu tua juñamo." <sup>8</sup> Mia Yesu berdoŕe, naio berenio berinavo "Iliano Lu naio berenio ber

'Jau kobolkouo ka Atua ga, jau monoka kala kanano iñauano naio ve takurano ga, bior naio ga be kanamo Tubo.'"

<sup>9</sup> Naruei Setano naio jidom rila-von Yesu bereio, naio buru kiano jidomiano ba Yerusalem, midu naio jo levlevi ea vio tai, mave ea Atua kunuano, ana berkanio, berinavo "Ver jau kobe Atua Kenerinio, koviako yetano. Ver jau kalaio, mia rivu ga na, <sup>10</sup> bior Iliano Lu berii Atua, berinavo

*'Naio mia rila kiano nailiano nalo, ka mia amei atu avitiikarso, atukuku kaso.*

<sup>11</sup> *Mia aisopkarso mave ga ka juñalo ka mia kavan re jaamo ea puruveru.'"*  
*Iouano 91:11,12*

<sup>12</sup> Mia Yesu berdoŕe naio bereio, berinavo "Maka leleio, bior Iliano Lu ber bunu ber

'!Jau kolavon re Tubo kiamo Atua ka naio rila kanamo vite tai!'"

<sup>13</sup> Mia telikiti na Setano mila jubol-uboiano nalo nei bisi, ana buro denio, ba jo rorea ka rileal bogo dolu tai napano naio jidom ber mia mijikia tovulu Yesu eaio.

*Yesu jikar kiano iñauano yako Kalele*

*Mataiū 4:1-11; Mak 1:12-13*

<sup>14</sup> Karina, Yesu miel ea moroano na Niununo Lu, binime'i boru Kalele, mia tomu nalo ajunã aberii naio banbano-o ba bokar vio nonovio ea tanobuku nei. <sup>15</sup> Ana naio joñia ban ea kanalo yimo nalo na volkouano, naio joñia berlogloglo, naruei nalo ajaaro toru kanio, ajunã amidular siano bavin.

*Nalo na vio Nasarete amijilar Yesu*

<sup>16-17</sup> Bogo tai Yesu binime'i boru ea kiano vio Nasarete, vio napano naio miluo binime'i toru eaio, ana ka Legiano Lu, javukia nanã naio joñia mila bogo nonovio, naio ban bijalo ea kanalo yimo na volkouano. Ana aber naio rivuluku bulag Atua kanano Iliano Lu vanlo, ana na amidu niosi nanã Aisea naio bivitauia binime'i banio. Ana naio jumolu betavo ea niosi nene, mileal

vio na naio jidom rivuluku bulag vanlo, ana naio bulukuio, napano naio ber jibe nei, berinavo

<sup>18</sup> *“Niununo na Atua kanano naio joa kiniou ruei, bior Atua naio jiloglog kiniou ka kiniou naruei noioliolu ka Ioluano vou nabo rivan talimasa nalo.*

*Naio miila kiniou nebinimej ka neverial van nalo na ajua lakoiano, ka vonganei, amijikia avanvan tavio bereio ga tibe na,*

*a ka kiniou neverial ka merebono nalo, ka vonganei, miralo mijikia rimej rivu bereio.*

*A naio miila kiniou, ka tomu nalo namia ajutano, napano kulo dolu nalo ajumia amila kikilo julaka, mia kiniou novuru bulaglo, amei atua vio tai nabo bereio.*

<sup>19</sup> *Tenene na, kiniou nemijikia nala rimeravo, ka vonganei, Atua mila kanano bogo vou nabo tai miyotuba ka tomu nalo nene naruei.” Ais 61:1,2*

<sup>20</sup> Telikiti na Yesu buluku nina bisj, ana na mijukukarko niosi nene, jian ber ban tikon, ana naio ba jotano mave ea jeleigio vio namia amioliolu eaio, ka naio ril van tomu nalo. Naruei nalo abiniu napano aju joomo aju abiti kilkil ea Yesu ka ajog ka venia napano mia naio river kalo. <sup>21</sup> Mia bogo napano naio jikar kiano iliano, naio ber jibe nei, berinavo “Kiniou neber ka kamju, ka Atua kiano Iliano Lu na kumijogio vonganei, iliano nalo nei kanano abinimej be riano bo vonganei ga, ea miremiu.”

<sup>22</sup> Mia telikiti na tomu nalo amijog Yesu kiano iliano nalo nei, amijog jibe ka naio mil bo mia bo, melokloko a madigdig, mia nalo abameneao toru, ajumia aberverenio jibe nei, aberinavo “!Ana kema na, naio be Yoseve kenerinio ga na! ?Mia naio jomja bar tanea iliano novo nalo na ea vio be?”

<sup>23</sup> Ana na Yesu berdopele, berinavo “Peli kumisidom kuver kanado iliano moruo tai ka kiniou, napano ber ‘Nakulekuleano, jau kala vatitigso beamu vo, karina jau komijikia kajai tomu dolu.’ Nina bior kamju kumijog ruei ka bogo napano nojo yako Kape-neam, nojorja namieliel ka tomu telabo, tenene na kumitu kumisidomii kuber bior vaio ana maka nemei nala tena van kamju ea kanado vio nei bunu. <sup>24</sup> Be riano never ka kamju, ka ver naverialiano tai, mia tomu na kanano vio memedu, maka ajikia asaaro kanio, maka ajikia avatove kanio. <sup>25-26</sup> Nina be riano ga. Nejidom ka kamju kuvisidomii von tormoruo Elaija re nua. Ka bogo na, yuo maka rivo bano-o bokar yuka tolu togio, a burumjara vituiano tai

jovuko rera vio Israel. ?Ana Atua miila Elaija ba miija kei ka bogo na? Kam kuvialio, naio maka riila naio rivan ka riija taanou re Israel tai namia aju amijog bova, mia naio miila ba miija taanou na bulukomeli na vio Serevati, nina ea tanobuku dolu na vio Saiton. <sup>27</sup> A kuvisidomii von tormoruo Elisa kiano bogo bunu. ?Ka bogo na, tomu miroano na abar burumieni, mia Atua milarur kei? Naio maka rilarur nalo na Israel tai na bokar mieiano nei, mia naio milarur toro re Siria nei, Nomano. Be riano, kito tomu nalo namia roju rober kito robe Atua kiano tomu nalo memedu, mia nalo namia Atua miilalo abinimej ka ala inauano van kito, mia kito romielikue kalo ga.”

<sup>28</sup> Ana na nalo napano aju joomo ea yimo na volkouano nei amijog iliano nei, kialo jidomiano bilig ba be dolu, vonganei nalo tiniel jer Yesu toru. <sup>29</sup> Naruei nalo ajerni ka Yesu, ana aburio bano, aburu ba tavio ka kanalo komeli, ana aburu naio ba abavin ea burumjara yabalili tai napano kanalo komeli joaio ka ajidom avuku Yesu rivatove ea vio na naruei. <sup>30</sup> Mia Yesu jaluvo den jumalo bea ga, ana naio miel jel burelo ga bano, naio juvanlo ajubo.

*Yesu ban ea vio Kapeneam, naio milalar niadu tai*

*Mak 1:21-28*

<sup>31</sup> Ana na Yesu miel batove bokar komeli dolu tai na vio Kalele, nina be Kapeneam, mia ka Legiano Lu berlogloglo ea kanalo yimo na volkouano. <sup>32</sup> Mia nalo namia amije tilinielo amiilo toru laka, bior amijog Yesu kanano iliano temi bo, a Atua kanano moroano joaio. <sup>33</sup> Ana ka bogo na, toro tai jo joomo naliko, napano niununo na sirjaro va tai joa mila bulag naio, mia toro nene miaga merere kirivova tai vo, naio mil ban Yesu, berinavo <sup>34</sup> “?Ei, Yesu re Nasarete, kiamo vaio joa kumemi? !Peli jau kobinimej ka kalakiki kumemi, a! Bior nemijikiaso ruei, ka kobe Toru Lu nabo tai na Atua kanano.” <sup>35</sup> Ana Yesu mil jikili ban niadu va nene, berbureio, berinavo “!Ee, abe keil re bunu! Jau kataluvo den toro na vonganei ga.” Ana niununo va nei buku toro nei mijoro iviso burelo, ana na naio jaluvo denio, buro bano, mia toro nei mijog bo bereio jo.

<sup>36</sup> Naruei tomu na vio nei amiilo toru laka, mia nalo ajumia aberverij Yesu, aber “Ei, iliano na jumabe tenia na? Nina be buruvayukouo tenia, kiano moroano buru tomoruo loa laka. Naio mil ga ban niununo va nalo, mia aburovoro jibe na ga.” <sup>37</sup> Ana bior tena mia nalo ajaaro,

ajumña aherial vatitig Yesu siano ba janea vio bokar vio nonovio na tanobuku nei.

*Yesu milarur Saimon Pitere kenieno simemi, naliko kulo dolu telabo bunu*

*Mataiu 8:14-17; Mak 1:29-34*

<sup>38</sup> Ana Yesu jumolu den yimo na volkouano nei, mia naio ban ea Saimon kunuano, nina ea komeli na Kapeneam kia ga vo. Naruei ea vonuo nei, Saimon kenieno simemi naio jo mon ea miano jogu, mie yulu, niabene bituvitunu, mia aherial ka Yesu, abika den naio aber jumabe ka tiramoruo nei. <sup>39</sup> Naruei Yesu binimej jikili ju tivelinio ka tira neibano, ana mo naio mil berbure mieiano nei, ana niabene binimej menini nonovio bereio, naio mijog bo bereio, ana jumolu, ba milaii salo sinaniano. <sup>40</sup> Mia bogo namña mierenio batove, jibe ka na Legiano Lu na bisi, ana nalo namña nalo tealo amie ajumña, abarvarlo abinimej ban Yesu, ana naio mije jumano monealo, mieliel kalo.

<sup>41</sup> A telabo kalo, simaro nalo abava tavio denlo, napano ajumña amiaga, aberinavo "I Ei, jau naruei jau kobe Atua kenerinio a!" Mia Yesu berbure simaro nalo nei ka mia aver re bunu titai leleio, bior amijikia ruei ka naio be Naverikariano riano.

*Yesu mioliolu janea tanobuku na Yutea Mak 1:35-39*

<sup>42</sup> Mia kavijova kia ga vo, ana Yesu jumolu ana naio takurano batavio den yimo, ban ea vio tai napano be tumaro bo. Kar iorou, ana tomu nalo abinimej kanio, ajirag naio bano-o mia amileal naio joa vio nei naruei, ana ajidom naio to naliko, amila vio ka averbure naio ka tuvanal re, <sup>43</sup> mia naio ber kalo, berinavo "Makanio, monoka kiniou nava noioliolu ka Ioluano vou nabo na navenatuboiano na Atua kanano nei van komeli dolu nalo na aju keano vo, bior amiila kiniou nebinimej ka vite nei naruei." <sup>44</sup> Ana naio jaluvo denlo, ba mioliolu janea yimo na volkouano nalo ea komeli nonovio na tanobuku nei Yutea.

## 5

*Nalo napano Yesu biolo be moti, aba ajakisorio*

*Mataiu 4:18-22; Mak 1:16-20*

<sup>1</sup> Bogo tai, ana Yesu joa yaba ueiyabo na toru nei, namña tomu tealo ajumña abio ka Ueiyabo na Kenasarete, a tealo abio ka Ueiyabo na Kalele. Ana ka bogo na, tomu nalo miroano laka ajumolu aju jelviviko Yesu, jibe ka vio telisu ga, bior ajidom ajog naio rioliolu ka Atua kiano iliano rivanlo. <sup>2</sup> Mia Yesu mial ka uako sesa juo aju ga vaataro kalo yako, napano aburulo

abavauro ajua baramudou ea bayono, a naio mial ka napano tomu nene nalo ajudobi ea tei, ajumña ajekon kanalo supeđe. <sup>3</sup> Mia Yesu miel bano-o biako ea uako sesa nei tinene, napano be Saimon kanano, ana naio berkanio ber naio riyuku lario rivajou lie kija ga. Naruei Yesu jotano ea uako sesa nei, ana naio jomña berloglog nalo napano mña aju bijilo uro.

<sup>4</sup> Mia bogo na naio mil banlo-o avona bisi, ana naio ber ka Saimon, berinavo "Kito, kiniou nejidom ravajou lie kija koyou von ka rovuku supeđe beamu vo."

<sup>5</sup> Ana Saimon berdođe, berinavo "E abe toro na toru, kumemi numisidel ka tena ruei o-o viomijeni nei, maka nuvokar niado tai leleio. Mia bior jau naruei kober ka kiniou jibe na, bo, kiniou najaaro ka rava lie kija bere vo."

<sup>6</sup> Ana nalo aba amila jakiio napano Yesu berenio, mia amiilo ka burumara taara na niado napano bujo ea kialo supeđe, mila kanalo supeđe jikar ka burubođeio, <sup>7</sup> naruei abio nalo dolu nalo na ajua uako sesa dolu, ajuvanjumalo kalo ka amei aijalo. Ana nalo nei abinimej, ana aburu bitiran supeđe ka niado nalo nei binimej joomo ea buluku uako, bano-o uako juo nei abujovujo vatitigio, vaataro ka mña amadudu.

<sup>8</sup> Mia Saimon Pitere mial tenei, naio bitilubar ka Yesu ga mila tenei ea kiano burumara moroano lu nei, ana minie tano ea Yesu jaano, berinavo "Tubo, kiniou nobe toro na bova ga tai. Bo laka ka kovuro den kiniou, jau kotu re vaataro ka kiniou."

<sup>9</sup> Mia maka naio ga ve takurano, mia nalo dolu napano aju naliko ka aura nei, nalo abiniu abameneao toru laka ka burumara tiniobi na niado na abokarlo, <sup>10</sup> bija bunu Sepeti kenerinio juo nei, Yemesi naio Jone, napano naljuo amiasol Saimon amimiau vio takurano, naljuo amiilo toru kanio.

Ana na Yesu mil ba Saimon, naio berinavo "Ei, jau komerou re ka vite na tibe na. Bior tikar banei, mia jau kovuru bere re niado, mia jau kotoña kovuru tomu nalo amei atakisior kiniou." <sup>11</sup> Ana nalo abinimej bereio, aburu kialo uako nalo nene abauru bereio, mia maka bunu ala titai, mia ajuvan kialo saba nalo binu ju bo ga jibe na, ana ajakisior Yesu abano.

*Yesu mieliel ka toro na bar burumienitai*

*Mataiu 8:1-4; Mak 1:44-45*

<sup>12</sup> Ana iorou kanio, ea bogo tai, ana Yesu joa komeli na vio na tai, ana toro tai mialio, binimej ka naio, napano toro nene, mieiano na burumieni mila tanea niabene-e mia mila bulagio laka. Naruei naio

binimej mijoru ea Yesu jaano, jegi banio, bika jikili denio berinavo "¡Tubo! Kiniou nomoneaso jikili ka jau komijikia kalarur kiniou bereio, mia ver jau komijamo, kiniou nejidom nevikaso ka jau kalakon kiniou ga."

<sup>13</sup> Mia Yesu maka rienien ka tokol kiano menko nene, mia midu juṁṁano joaio, naio berinavo "Nao, kiniou nejidom komeravo." Mia vaarakurano ga niabene meravo, burumieni nei māpṁapvo denio.

<sup>14</sup> Ana na Yesu berkanio, berinavo "Komi-jog, jau kava koverii re tenei ka toro tai vo, mia vonganei ja gau kejaka kava kesel ea toro lu ka naio riia veveso mia mijikia riverial niabemo meravo ruei. Karina monoka kava kolotu van Atua a keisebi sida na kanamo lakoniano, tavukia naṁa Mosis naio ber monoka alaio."

<sup>15</sup> Yesu naio ber toro nei naio riva riverii re vite nei, ana deio ga, maka vesiou ana ajuṁṁa aberverii Yesu banbano-o, ba bokar vio reraio biniu, mila ana tiniobi na toru aju abinimej ka ajog kiano iliano nalo, a ajidom ka rilalarur kialo mieiano nalo. <sup>16</sup> Mia ka bogo nalo nene, Yesu joṁṁa miel batavio ea tomu nalo bunu, naio joṁṁa janea vio yauo, bolkouo ban Atua.

*Yesu mijikia biekokoa kariano  
Mataiu 9:1-8; Mak 2:1-12*

<sup>17</sup> Mia ka bogo tai, ana Yesu joṁṁa berlogloglo, mia Varisis tai naliko naverloglogiano na tuboiano ajuṁṁa ajutano ea vio nei, napano nalo abe nalo na komeli dolu nalo na tanobuku na Kalele bija Yutea, a tealo ajuvan vio Yerusalemo abinimej. Ana ka bogo na, Atua kiano moroano jo binimej toru novonio ea Yesu, mila ana naio mijikia milarur tomu na mieiano nalo. <sup>18</sup> Ana tom tai aṁṁer toro na mieiano tai binimej, napano niabene biniu ṁṁaro, mia nalo aṁṁer binimej, naio mon ea ga ṁṁano jogu. Ajidom adu naio riva joomo rimon vaataro ka Yesu, <sup>19</sup> mia amial tiniobi toru jo joomo ruei, mia vio nene telisu laka, maka ajikia adu kialo bilbilu rivano. Naruei amidu naio abavin ea yimo, ana amijag bulag vodobi mave memedu ka vio na Yesu jotano loglogio, ana ajuvarvan toro nei bija ṁṁano jogu batove ea buluvio nene ba jotano iviso ka tomu nalo, kamu kean Yesu mirano memedu.

<sup>20</sup> Mia bogo na Yesu mial vite nei, mijikia ka nalo aju abiekouo kilkilii ea naio ka mia naio rijai toro na mieiano nei, ana nao berkanio berinavo "Koig, kiniou nebiekokoaso ka kiamo vovaiiano nalo."

<sup>21</sup> Mia bogo napano Varisis nalo bija naverloglogiano na tuboiano nalo amijog iliano nei, aju ajidomii kirivova-o mia,

naruei nalo ajuṁṁa abivika denlo, aberinavo "ʔKei tenia ṁṁa jo mil niegeniege tolu na Atua siano jibe na? Atua ga takurano naio mijikia riviekokoa kariano, maka toro dolu bereio, mia tete na naio joṁṁa mil jibe na ka jo jidom ber naio naruei, naio be Atua ruei kovio."

<sup>22</sup> Mia Yesu mijoglubar ea naio ka ajuṁṁa ajidomii kirivova jibe na ka naio, ana ber kalo, berinavo "ʔKar venia ana tiniemiu nalo bujo ka jidomiano na kirivova jibe na? <sup>23</sup> Ver never ka toro na mieiano nei, neverinavo 'Kiniou nebiekokoaso ka kanamo kariano,' ṁṁeli kiniou never kanio neverinavo 'Jau kotumolu, keiel,' ana ea iliano juo nei, tinene jikili ka averenio, a tinene naio monmaio ga. Nana berenio 'Jau kotumolu, keiel' naio jikili lie, bior mia kamii kumijikia kuvitilubar ka kanaku iliano nei naio be riano ṁṁeli na makanio, ka napano toro nei naio jumolu ṁṁeli maka tumolu. <sup>24</sup> Mia vonganei, kiniou noimṁau ka titai na mia kamii kuverianṁa Atua ga takurano mijikia rilao, kanio mia kamii kuvitilubar ka kiniou Kulorinio Kenerinio nemijev moroano. A kiniou neber ka kamii, neberinavo moroano nene naruei naio bare ka kiniou nemijikia neviekokoa kariano bunu ea yetemeriba nei. Kamii kuviagago vatitigio."

Ana Yesu ber ka namieiano nei, naio berinavo "Kiniou neber kaso, ka jau kotumolu, kojukular ṁṁamo jogu, jau keiel kava vonuo."

<sup>25</sup> Mo soṁṁeli ga, ea mirano tomu nalo na aju amialio, toro nei naio jumolu jibe na, midu ṁṁano jogu miel batavio, ana ba vonuo napano naio miaia Atua ga naio jo bano.

<sup>26</sup> Mia bogo na tiniobi nei amial vite nei, abamenea naio toru riano, kuluniabelo ṁṁeli burevure biorio, a nalo ajuṁṁa amiaia Atua, ajuṁṁa aberinavo "¡Uerei tom nei, riano ga, banei romial titai napano dolu laka!"

*Yesu bio Mataiu bunu, napano abio ka  
Livae, binimej jakisorio  
Mataiu 9:9-13; Mak 2:13-17*

<sup>27</sup> Iorou kanio, ana Yesu miel kiki kija ga bano, naruei naio mial toro tai joṁṁa jotano ea kiano vio na totanian na imauiano, joomo ea vio na ṁṁa barbiji veru na takis eaio. Toro nene siano tai Livai. Ana Yesu bio naio, berinavo "Jau komei katakisor kiniou." <sup>28</sup> Mia soṁṁeli ga Livai jumolu, juvan kiano imṁauano, juvan kiano saba novonio ju bo ga jibe na, naruei jakisor Yesu.

<sup>29</sup> Karina, Livai nene miṁṁauka Yesu sano buruṁṁara sinaniano tai ea kunuano, mia ka bogo na, tomu telabo dolu nalo

naña abarbiji takis bija tomu dolu nalo na jibe na, nalo bunu abinimei ajutano vio takurano naliko Yesu a kiano naia-gagoano nalo ea sinaniano nene. <sup>30</sup> Mia Varisis tealo, naliko kialo naverloglogiano na tuboiano tealo, amil niege naiagagoano nalo, aberinavo “? Bior vaio ana kumituña kumisinan burukuti kamliko tomu na bova a tom na pariparilo kiri merorol na?”

<sup>31</sup> Mia Yesu naruei naio berdoĝelo, berinavo “Tomu na niabele jikili bo, maka ña tiniel tii ka ña avan ea toro naña mirñauka mieiano, mia tomu naña amijogjog mieiano, nalo naruei ajidom naio toru. <sup>32</sup> Kiniou maka nemei ka novio nalo na ajumña aber amemedu ruei kamu ea Atua mirano ka atakisor kiniou, mia kiniou nebinimei bior tomu na bova jibe ka nalo na naruei, ka aviliglo rivior kialo vovaiano nalo.”

*Navikadeniano tai tivelinio ka atuvan sinaniano*

*Mataiu 9:14-17; Mak 2:18-22*

<sup>33</sup> Naruei nalo abika vikadeniano tai den Yesu, nalo aberinavo “Jone Baruei kanano naiagagoano nalo ajumña abokar jikili bajago naña vatelabo, ajumña ajuvan sinaniano kaña abolkouo ban Atua, a Varisis nalo bunu ajumña amilala jibe na. ?Mia bior vaio ana kanamo naiagagoano nalo maka atumña alalaio?”

<sup>34</sup> Ana Yesu berdoĝelo, berii naio bija kiano naiagagoano nalo, jibe ka napano amijog bo laka ka bogo na naio jo naliko, ana mia ajog rivova iorou ka bogo na ver naio taluvo denlo. Naio berinavo “? Bogo na toro na soriano naio jo kean ea jokoluulu naliko kiano bilbilu nalo, kuberianña mia amijikia atuvan sinaniano na jokoluulu nei to, asenio re? Peli ga. <sup>35</sup> Mia ve bogo tai rimei napano mia avurular toro na soriano nei denlo, mia ka bogo na naruei mia nalo amijikia atuvan sinaniano bior amijog bova toru kanio.”

*Vite moruo a vite vou*

<sup>36</sup> Bajago naña ajuvan sinaniano na, naio be bajago moruo tai na kulo Ju nalo kanalo lotuano, mia Yesu jidom rila rimeravo vanlo ka bajago moruo nalo na jibe na, maka ajikia atusol vite vou nalo naña naio jonña berloglog kalo. Ana naio beri jamerijiano tai kalo. Naio berinavo “Jau maka kejikia kavar niati kulumñarauo tai na be terivou, kejedepelario niati nene tai, ana jau kotuluko ka kulumñarauo na be terimoruo ka toko vio na buruĝe be bulukuti eaio. Ver tibe na, jau komijedelar kule ga niakulumñarauo vou nene kurano ga, a niati nene, mia

keial ve kirivova-o mia. <sup>37</sup> A jau maka kejikia koison mñarjunelñelu vou napano jonña jarabujo kia ga vo rivan ea kulukuti nani napano be terimoruo naña amison mñarjunelñelu vatelabo ban ea ruei. Ver jau kala tibe na, mia mñarjunelñelu vou nei riyukuio, mia rila kulukuti nei saburu, ana mia mñarjunelñelu nene riiou kule ga na, mia bati nene bunu rimei rivova. <sup>38</sup> Mia mñarjunelñelu vou, monoka jau koison rivan ea kulukuti nani na be terivou bunu, na jikili bo, naruei komijikia kodu vatitigio mñamo mñarjunelñelu to rivu eaio. <sup>39</sup> A bunu, bogo naña tomu nalo ajumña amunu mñarjunelñelu na amirñauka jiou kija ruei, mia asaaro re bunu ka amunu mñarjunelñelu vou napano amirñauka vonganei ga, mia monoka averenio mñarjunelñelu moruo nei naio jesei kiano vo.”

## 6

*Yesu be tubo ka Legiano Lu*

*Mataiu 12:1-8; Mak 2:23-28*

<sup>1</sup> Naruei ka legiano tai bereio, napano naio be Legiano Lu, Yesu naliko kiano naiagagoano nalo ajumña amiel abano, mia kanalo mñarabo naio ba jel bure tiniavio na kon. Amiel jibe na naruei, mia naiagagoano nalo jijerlo naruei ana nalo ajavo bulag mñarati tealo abal kon avona bisi ajenio. <sup>2</sup> Ajumña amila jibe na, mia Varisis nalo tai ajua vio na ka bogo nene, napanoaju amial Yesu nalo, naruei nalo aberinavo “!Ai, bior vaio kumitu kumila irñauano na ea Legiano Lu jibe na? Jibe na, kamiu kumitu kumilakorov kanado tuboiano ga na.”

<sup>3</sup> Ana na Yesu berdoĝelo, naio berinavo “?Ii, ĝeli jibe na kovio, ana kamiu maka kuvuluku ea Iliano Lu bogo tai vo, ka vite nalo naña Parinio tubo Teviti re nua jonña milaio? !Kamiu kumijikia ruei tena! Naio naliko kiano tomu nalo jijerlo toru laka, <sup>4</sup> naruei naio ba joomo ea Atua kiano Yimo Lu, mia midu joko lu naña tuboiano berenio kulo lu ga nalo amijikia asenio, mia Teviti nalo ajenio.”

<sup>5</sup> Ana Yesu ber kalo, naio berinavo “Kiniou Kulorinio Kenerinio, kiniou naruei nebe Tubo ka Legiano Lu, mia nemijikia neverenio venia na memedu ka mia alaio ea Legiano Lu, ĝeli na venia na maka rimemedu ka mia alaio re ea Legiano Lu.”

*Yesu mieliel ka jumevuluku tai ea Legiano Lu*

*Mataiu 12:9-14; Mak 3:1-6*

<sup>6</sup> Ana ea Legiano Lu dolu bereio, Yesu ba ba joomo bereio ea yimo na volkouano, mia naio berlogloglo. Mia ka bogo

na be toro tai bunu jo joomo napano juñano tivelinio vameruo be jumevuluku. <sup>7</sup>Naruei naverloglogiano na tuboiano nalo bija Varisis nalo, napano tiniel jer Yesu ruei,aju vaataro ka naio ka bogo nei. Nalo ajuña abitikuku vatitig bo ka naio ka alavon ka aleal bajago na bova tai eaio, jibe na naruei ajidom aial ka mia rieliel ka jumevuluku ea kialo Legiano Lu nei ðeli na mia rila re.

<sup>8</sup> Mia Yesu mijikia batitig bo ruei venia napano jo joomo ea kialo jidomiano nalo, naruei naio mil ban kema neibano, naio berinavo "Jau kotumolu, komei, kotu mave ea vio nei beamu vo," naruei toro neibano jumolu bano. <sup>9</sup> Ana na Yesu bika den nalo neibano aju nei, naio berinavo "?Kiado tuboiano ber kito romijikia rala venia ka Legiano Lu nalo? ?Naio berenio bo ka kito rala tena bo ðeli na bo ka rala tena bova? ?Naio ber bo kanio kito ralarur kulorinio, ðeli na bo kanio rouebin toro rimaro?" <sup>10</sup> Ana Yesu barðilig, naio bitiilo abiniu jeliviv, avona bisi ana na naio ber ka toro neibano bereio, berinavo "Jau kovitirii juñamo vonio." Mia monloglog bogo neibano ga toro nei naio mila jibe na, mia juñano binimej bo vatitigio bereio.

<sup>11</sup> Mia Varisis nalo tinielo kiri mimi, bano-o ña tinielo bitunu mia bitunu vatitigio laka, naruei nalo abava tavio aber vonvon ka mia ala tuñabe ka Yesu.

*Yesu bitiri bulagio kiano naiagagoano duelimo ba juo*

*Mataiu 10:1-4; Mak 3:13-19*

<sup>12</sup> Ana iorou ka bogo dolu bereio, Yesu jaluvo denlo ban ea burusuku na toru tai ka torña rivolkouo van Atua, naruei naio jo mila jibe na ea vio nene bano mia viomijeni konio garuei. <sup>13</sup> Ana kavijo nene naio binimej bere, bio kiano naiagagoano nalo abinimej vio takurano ea naio, mia ea nalo nei naio berial nalo duelimo ba juo, napano bitiri bulagio, berenio nalo nene naruei nalo abe atevi.

<sup>14</sup> Mia duelimo ba juo neibano, sialo nalo ajibe nei:

Saimon napano Yesu midu sio dolu ban ber Pitere,  
a Andru, na naio kuruano,  
a Yemesi,  
a kuruano Jone,  
a Vilip,  
a Bartolomio  
<sup>15</sup> a Mataiu,  
a Tomas,  
a Yemesi, napano Alveas kenerinio,  
a Saimon, nanua ña mila poletik, jidom ka rijil bulag kulo Romo,  
a Jutas, na Yemesi kenerinio,

<sup>16</sup> a Jutas re Kariot, napano karina naio jiveluku ka Yesu.

*Yesu joña mioliolu a mieliel ka namieiano nalo*

*Mataiu 5:1-12*

<sup>17</sup> Mia Yesu buru atevi nalo neibano abatove bereio, ana amileal vio vodobi tai, ana aba ajuaiio. Ana ka bogo na, vio bujo ka Yesu kiano naiagagoano nalo miroano dolu nalo bunu, naliko buruñara tiniobi nalo na komeli dolu na vio Yutea, a kulo Yerusalemo bunu bija bunu tomu na vio Taia a tom na vio Saiton napano ajumormolu den kialo vio rove yako ea tei na toru abinimej. <sup>18</sup> Nalo nei abinimej ka ajidom ajog Yesu kiano iliano nalo, a bunu ajidom ka naio rieliel ka kialo namieiano nalo. Naruei Yesu milailo jibe na bano-o, ba bokar bunu tomu narña niadu jualo ña mila lelanlo vururu. <sup>19</sup> Tomu nalo miroano laka, mia abiniu ga ajidom atokol Yesu, ka avokar kija buruñara moroano narña amial joña miyotuba ea naio, napano ña jo mila batitig tomu nalo miroano ruei.

*Yesu kiano verloglogiano nalo*

<sup>20</sup> Ana na Yesu joña bitii kiano naiagagoano nalo nene, karina naio berlogloglo, naio berinavo:

"Kamiiu narña kubitilubar ka ña kube talimasa, ilivuiano toa kamiiu, bior kamiiu naruei, Atua naio be Parinio Tubo ka kamiiu, mia naio vitikar kamiiu."

<sup>21</sup> "Kamiiu narña jijer kamiiu vonganei, ilivuiano toa kamiiu, mia kamiiu kuvijog ka kamiiu kubinimej kuvujo vatitig ka vite novo nalo.

Kamiiu narña kamiiu kumituña kumiteg vonganei, ilivuiano toa kamiiu, mia kamiiu kumijikia kuvisaaro."

<sup>22</sup> "Kamiiu narña tomu nalo maka asaaro ka kamiiu, a napano ña maka asidom kamiiu, a napano ña amil niege-niege lelan kamiiu, a napano ña abuku bulag siemiu nalo aberinavo kamiiu tomu na kirivova ga,

nina bior kamiiu kube kiniau Kulinio Kenerinio kanaku tomu nalo, ilivuiano toa kamiiu bunu."

<sup>23</sup> "Ka bogo nalo na jibe na, kamiiu kuvissidom bijovijon re, mia kuvitatabujo vija saariano, bior ajuña amila lelan kamiiu ea ga bajago na nanua ña korobilo nalo amilaio ban naverialiano nalo re nua. Mia naio bo ga, mia kamiiu kuvijev buruñara ijaiano nene ea vio mave."

<sup>24</sup> "Mia kamiiu tomu na sanibaiano mia rivova ve toru laka van kamiiu, bior

kamiu kubar kenemiu jogvuiano a kenemiu saariano na kenemiu meuliano nabo na ruei ea yetemeriba nei.”

25 “Mia kamiu naŋa mabomiu bujo batitig ruei jo, mia ve kirivova laka rivan kamiu, bior mia siser tanea kamiu ve toru laka.

A kamiu napano kumituŋa kubital banei kia ga vo, mia rivova laka rivan kamiu, bior mia kamiu kuvijog rivova ve toru laka mia kuviteg ve toru.”

26 “Mia kamiu monoka kuvitikar vatitig bogo napano tomu nalo aju ami-  
aia siemiu. Verver tibe na, maka rivu ka kamiu bunu kuvisidomii ku-  
ver kubo, bior napano naverialiano sibusibiano re nua,

kiado tormoruo nalo, ajunŋa amiaia sialo, mia Atua bitiilo abova ga, naruei naio mije vironiano banlo.”

*Yesu berii tiniitianu na uolu nalo  
Mataiu 5:38-48, 7:1-5*

27 Ana na Yesu berenio, berinavo “Kamiu naŋa kumijoglubarbar kanaku iliano, kin-  
iou neber ka kamiu, neber: Monoka kito rosidom kanado uolu nalo, a monoka rovijuku rivu ka nalo naŋa maka asidomii kito, 28 a monoka reilivu ka nalo naŋa amio-  
lua kito, a monoka robolkouo kalo naŋa ajunŋa amila kiki kito. 29 Verenio toro tai rujuba kulbibimo tivelinio, monoka jau kovilig kulbibimo tivelinio vanio ka rijikia rijuba bunu, mia verenio toro tai sikili ka rivar nŋamo koti, mia kasaaro ga ka kajamo ka nŋamo soto bunu van naio rivario. 30 Mia ver toro tai rivika kiamo titai, monoka jau kajamo ka rivanio, a ver toro tai rudular kanamo titai, mia jau kovika re bunu ka rudu merano bere rivanso. 31 Bajago na vabe naŋa jau kojidom ka tomu nalo ala vanso, bajago nene naruei monoka jau kala rivanlo.

32 “Mia ver kito rotunŋa tiniedo riia ga nalo na ga nŋa ajidom kito, nina maka ve titenia, bior tomu na kariano nalo tiniel jii tomu nalo naŋa aju ajidomlo mugaruei. 33 Peli na ver rotunŋa rovijuku rivu ka ga nalo naŋa abijuku bo mugaruei ka kito, naio bunu maka rive titenia, bior tomu na kariano nalo, nalo bunu ajunŋa amila jibe na mugaruei. 34 Peli na ver rotunŋa rajamo ka veru van nalo na ga amijikia avar meran bereio, naio bunu maka ve titenia, bior tomu na kariano nalo, nalo bunu ajunŋa amilala jibe na mugaruei.

35 “Mia kiniou neber ka kamiu, neberinavo: Monoka tiniemotii kanamo uolu, a

mia kovijuku rivu kanio, a mia kajamo ka kanamo veru tibe na ga, napano kosidom bijovijon re ka na naio bario, ka mia naio mijikia rivar kean bogo tai, ŋeli na mia naio rivar kean lele re bunu. Mia ver jau kotonŋa kalala tibe na, kojoniŋa kabar bajago na karanŋado, Toro na Loa laka, mia naio sian kanamo ijaiano tai na mia ve toru lie vo, bior naio be toro tai napano kiano iviso bo ga ka nalo na maka atu aver siva vanio, ŋeli na nalo na ajunŋa ajidomial nalo ga bereio. 36 Ver tibe na, jau monoka tiniem riia tomu nalo tavukia naŋa karanŋado tinien miialo.”

*Yesu berii tibureiano na toro dolu  
Mataiu 7:1-5*

37 Mia Yesu mil kia ga banlo vo, naio berinavo “Mia kamiu monoka kuvitu re nŋa kuvitibure mŋelea toro dolu ŋeli na kuvijev vironiano vanio. Aver tibe na, mia Atua tibure laka re kamiu tibena, mia naio rije re vironiano van kamiu. Ver kuviekokoa toro dolu, mia Atua riviekokoa kamiu, 38 mia ver kuvisian titai van toro dolu, mia Atua sian vite rimei van kamiu. Mia Atua sian vite van kamiu ve toru loa nana kamiu kumisiano, mia naio sian ve miroano lie vo, tavukia naŋa ajosonu ea bake, ajan kakario, amielio bano-o mia josonu batitigio bo, vite nene nalo bujo magmago ana na jibirbili. Riano, mia avar van kamiu rive verare ka ga nana nŋa kamiu kumituŋa kumisian ban tomu dolu nalo.”

*Kamiu monoka kuvitii vatitig kenemiu meuliano*

39 Mia Yesu jonŋa mil banlo kia ga vo, naio ber jamerijiano tai banlo, berinavo “?Junŋabe, ver toro tai ve merebono to, naio mijikia rivuru nŋarabo ka merebono dolu ka nalo ve juo ava aiel nunu? Peli ga, mia ave juo atibirbil avatove ea bulukuŋili tai na! 40 Naiagagoano, naio maka to loa nana berloglog naio, mia ver naio rila kakar vatitig vite novonio na naverloglogiano berloglogio kanio, mia naio mijikia rimei rive verare ka kiano naverloglogiano. 41 Maka rivu ka kotonŋa koververii niamiamo na telisu na joa kuruamo mirano, mia jau maka keial kar burunŋara burupati iesi na joko miramo jo. 42 ?Junŋabe jau koberianŋa komijikia keil van kuruamo na, kover ‘Koig, mia nelelar niamiamo na joa miramo ana jao van vo? Ver tibe na jau kojoniŋa kobitoviton ia kia ga ka kiamo vovaiano, a jau kojoniŋa kejubure toro dolu kiano vovaiano ga. Jau komijikia ruei ka jau kobova ga, ana jau kojidom kala van tomu nalo ka aver jau kobo ruei.

Jau monoka kodular beamu buruñara bulapati iesi na den miramo beamu vo, karina mo jau komijikia kovitii vatitig niamiamo na monea toro dolu mirano.”

*Buruiesi bija m̄arati nene  
Mataiu 7:16-20, 12:33-35*

<sup>43</sup> Ana Yesu ber bunu, berinavo “Buruiesi na bo maka rijikia rivar m̄arati na bova, a buruiesi na bova maka rijikia rivar m̄arati na bo. <sup>44</sup> Nao, jibe na naruei, napano kito rojuñña robitilubar buruiesi nalo ka ajum̄abe ea salo m̄arati. Marati nalo na bo a narña jesei bo, kito maka rotuñña ravarlo ea soro na be niononoti, makanio. <sup>45</sup> Toro na tiniene bo, naio jorña miobijii vite nalo na bo jua kiano iviso, naruei bogo nonovio be kiano jidomiano na bo napano jo ka mijikia jian bulagio. Ana toro na bova naio jo miobijii vite nalo na bova jua kiano iviso, naruei naio jian bulag jidomiano na bova ga. Vite venia napano bujo toru ea toro kiano iviso ðeli na kiano jidomiano, vite na naruei mia naio toñña rimalmaluvo bogo nonovio ea niono.”

*Yimo juo  
Mataiu 7:24-27*

<sup>46</sup> Ana Yesu ber kalo, berinavo “? Bior vaio ana kumituñña kubio kiniou kuber ‘Tubo o, Tubo o,’ karina maka kuvituñña kumonmonea venia narña kiniou nojorña neber ka kamiu ka m̄a kuvilaio? <sup>47</sup> Toro na ver binimei ka kiniou, mijog kiaku iliano, naio monoka rimonmoneaio a naio monoka rilaiio. Toro narña rila tibe na, naio javukia tukunu tai napano berii, ber jibe nei: <sup>48</sup> Toro tai jo miñauka kunuano, mia toro nene be masou laka, jorña mikil ðili nene nalo bululuo batove yetano laka ka rivokar vio na borotano jikili eaio, karina mebija m̄artea nene nalo ea bulukuðili nalo neibano. Mia bogo na bogu va, buruñara ueimia mieraro, mia maka rijikia rila yimo rikulkulu leleio, bior toro nene miñaukano, miñauka jikili bo. <sup>49</sup> Mia toro narña mijog kanaku iliano nalo mia maka toñña rimonmoneaio, naio jibe ka toro dolu tai. Toro nene naio bunu miñauka kunuano tai, mia naio be vovu, miñauka jumolu ju vorvoru mave ea ga borotano, mia m̄artea nene maka rivatove rivare leleio. Mia bogo na bogu va, buruñara ueimia binimei, mila yimo nene mijoru, burukokorovio nonovio, bova laka.”

## 7

*Toro na toru na mira tai na Romo naio monea Yesu jikili  
Mataiu 8:5-13*

<sup>1</sup> Naruei bogo na Yesu ber bulag nonovio kiano verloglogiano nalo nene ban tomu nalo bisi, ana naio ba jouro ea bulukomeli na vio Kapeneam. <sup>2</sup> Mo ea vio na, be natukamuano na mira na kulo Romo naio jo, mia naio be kiano toro novo na iñauano tai mie toru laka, vaataro ga ka riñiaro. <sup>3</sup> Ana bogo napano naio mijog ka napano tomu nalo ajum̄ña aberii ka mia Yesu rimee ea kialo vio naruei, ana bio navurim̄araboiano na kulo Ju nalo, miilalo aban ka Yesu, ka avikanio rimee rieliel ka namieiano neibano.

<sup>4</sup> Naruei nalo nei abinimee ea Yesu, aberii toro namieiano nei banio, a abika jikili banio jibe nei, aberinavo “Natukamuano na, memedu ka jau komei keijaio. <sup>5</sup> Be riano ka naio maka ve kito tai, naio be toro re Romo ga, mia naio be toro tai narña jidomii melea taara na kiado tomu nalo, a naio bunu miija kumemi toru ruei ea vio nei, napano naio miñauka kenememi yimo na volkouano. Naruei numial bo laka ka ver kajaaro ka komei keial kanano toro na mie toru neibano.”

<sup>6</sup> Ana Yesu mijamo kanio, naruei ban bijalo. Aju amiel abano, ana bogo napano aju koalabo kija kia ga vo ka natukamuano na mira nei kunuano, mia nalo amial ka tomu tealu ajum̄ña amiel abinimee. Nalo nei natukamuano nene kiano bilbilu nalo tealu bereio, napano naio miilalo abinimee ea Yesu, ka aver kiano iliano tai kanio. Naruei abinimee aber ka Yesu, aberinavo “Toro Romo nei miila kumemi nubinimee easo bereio, naio ber jibe nei, ber naio jo mila lelanso toru laka. Naio berenio berinavo naio mial naio jibe ka napano naio maka ve toro na bare ka mia jau komei joomo ea kunuano. <sup>7</sup> A jidomiano nei bunu mila naio mial ka maka rivu bunu ka riyotuba kaso, bior naio maka ve Ju tibe kaso, mia naio ber ga, ver jau kover ga iliano tai, mia kanano toro neibano rijog rivu bereio ga na. <sup>8</sup> Naio mijikia ka monoka tibe na, bior naio mijikia ka kanamo iliano mije moroano. Naio berenio berinavo vite na naio jibe ka tomu na mira nalo napano ajutano yetano ka naio, napano monoka ajogkar kanano iliano nalo. Ver naio river ka tai riverinavo ‘Jau kavano,’ naio monoka rivano, ðeli na riverinavo ‘Jau komei,’ naio monoka rimee, ðeli na riverinavo ‘Jau kala tibe na,’ mia naio monoka rilaiio. A naio berinavo naio bunu monoka riñiauka vaio napano



kanano natukamuano na toru river kanio. Jibe na naruei, naio monea ka ver jau kover titai ga, mia monoka tibe na."

<sup>9</sup> Telikiti na Yesu mijog iliano nei, naio miilo toru ka natukamuano nei kiano jidomiano, a bunu naio jaaro toru kanio, naruei mil ban tiniobi nalo napano mña aju naliko ka bogo nei, berenio berinavo "Kin-iou neber ka kamiu, ka kinioiu maka neleal leleio toro Ju tai napano naio tumolu tu sikili ea kinioiu tibe ka toro nei."

<sup>10</sup> Mo iorou kanio, nalo nene aban bereio ea natukamuano nei kunuano, mia amiilo ka napano amial toro na mie neibano naio binime i bo nonovio bereio ruei jo.

*Yesu burumeulia taanou tai kenerinio m̄eaku sur̄n̄ano den m̄ariano bereio*

<sup>11</sup> Ana iorou kanio, maka vesiou, ana Yesu miel ba bokar m̄arkomeli dolu tai, siano Naeni, a jibe ka titiliu, kiano naia-gagoano nalo naliko kulo dolu nalo telabo ajum̄na ajakisorio. <sup>12</sup> Ana tilikiti napano Yesu nalo nei aju abinime i vaataro ka morouo labo na komeli nei, amial ka tomu nalo amidu buronlo amielvei abinime i, nalo aju aṗier tasiṗn̄aro tai ka ava ativinio. Naio napano m̄naro ruei, naio be m̄eaku sur̄n̄ano tai, napano kenieno be taanou. Taanou nene, naio maka rivar kenerinio dolu tai bereio, naio bar takurano ga neibano m̄naro ruei. <sup>13</sup> Mia Yesu nalo aju amial nalo napano mña aju amiel abinime i, mia bogo na kiado Tubo mial taanou nei, naio tinien miiaio toru laka-o mia. Naruei naio ban vaataro kanio, berkanio, berinavo "Ai, jau koteg re bunu." <sup>14</sup> Ana Yesu binime i vaataro ka tasiṗn̄aro nei, midu jum̄ano joaio, a nalo napano ajum̄na aṗier ba ajumomou ga aju jibe na, maka bunu aiel. Ana naio mil banio, berinavo "Koig, kinioiu neber kaso, jau kotumolu bereio."

<sup>15</sup> Naruei m̄eaku nei naio jumolu jibe na, jo mil banlo, ana amidular naio bereio, ana Yesu jukamu kanio ba ban kenieno bereio. <sup>16</sup> Mia bogo na tomu nalo amial vite nei, burevure burelo toru laka, mia aju abamenea Atua, aberenio aberinavo "I Uerei, burum̄nara naverialiano na Atua kanano tai jumolu ju iviso ka kito vonganei naruei!" A tealo aber bunu, aberinavo "I Riano ga na! Atua miyotuba ka kiano tomu nalo naruei." <sup>17</sup> Mia tukunuano na tenei, ajum̄na aber lilianio banbano-o bokar tanobuku na vio Yutea, bija vio dolu nalo napano mña aju ga vaataro kanio.

*Jone Baruei miila kiano naiagagoano nalo abinime i ea Yesu*

*Mataiu 11:2-19*

<sup>18</sup> Ana ea bogo na, Jone Baruei naio joa yimo na tetavokoiano ruei, ana kiano naiagagoano nalo abinime i ajukunu banio

ka vite nalo napano mña Yesu jom̄na milaio. <sup>19</sup> Naruei Jone mil ban kanano tom juo, naio miilalo aban ea kiado Tubo, ka ava avika vattitig denio, ka naio be Naverikari-ano na, nam̄na aju rorea ka mia rime i, ṗeli na maka ve naio.

<sup>20</sup> Ana amiel ka amei aial Yesu, mia bogo napano amileal naio, abika jibe nei naruei denio, aberinavo "Kenememi toro na toru nei Jone, jidom rijikia jum̄nabe? ? Jau kobe toro na nanua mña aberenio ruei aber ka mia toro na toru tai rime i ve kiado navurim̄araboiano, ṗeli na jau maka kove naio vo, mia monoka kumemi nuvi-turorea kiano vo ka mia toro nene naio rime i?" <sup>21</sup> Mia memedu ka bogo napano abinime i ka avika vikadeniano nei, Yesu jom̄na mieliel ka tomu na mieiano nalo, a jom̄na mijil bulag niadu nalo denlo, a jo mila merebono nalo miralo abinime i abo bereio, ana Jone kiano naiagagoano nalo amial vite nalo nei. <sup>22</sup> Naruei Yesu berdoṗe vikadeniano nei, naio berinavo "Kamiu kuvan bereio kuvoro ea Jone, ana mo kuverial vanio vite venia napano kumialio ṗeli kumijogio ea vio nei. Ajibe ka vite nalo nam̄na Naverialiano Aisea berial nua ruei, napano berinavo:

'Merebono nalo, vonganei amial vattitig vite bo bereio ruei,

a javuluku nalo, vonganei nalo amiel bo bereio ruei,

a tomu nalo napano burumieni milalo, vonganei niabelo binime i meravo bo ruei,

a nalo na abe bulubau, vonganei tilinielo bo bereio ruei,

a tomu nalo na an̄arn̄aro, vonganei amemeul bereio ruei,

a talm̄asa nalo, vonganei neberial Ioluanou Vou banlo ruei.'

<sup>23</sup> Mia kamiu kuva kuverial ka Jone bunu, kuverinavo "Toro napano ver maka leleio kiano jidomiano riveve juo ea kinioiu bogo tai, ilivuiano toa naio."

*Yesu berii Jone Baruei*

<sup>24</sup> Ana bogo napano Jone Baruei kiano naiagagoano nalo ajuvan ka avan bereio, Yesu berii Jone nei ban tomu nalo napano aju naliko, naio berinavo "? Bogo nam̄na kamiu kubatavio ea vio yauo na beamu, kamiu kuban ka kuvial venia? ! Maka tinieku ka kamiu kuban ka kuvial buruburi nam̄na jegi jom̄na miuvuio ṗiligiviligio! <sup>25</sup> A maka tinieku bunu ka kamiu kuban ka kuvial toro na toru tai napano mña miya kulum̄naraou na kirinovo a napano joa meuliano nabo, bior tomu nalo na jibe na maka ajikia atua vio na kiriniagiago jibe ka vio yauo na, mia nalo dar̄nariga ajujua yimo nabo na be tubo

na tortoru nalo kunualo. <sup>26</sup> ?Makanio, mia kiniou tinioku ka kamiu kubatavio ka kuviai naverialiano tai, inau? Nina bo na, mia kiniou neber ka kamiu, Jone namia kamiu kubatavio ka ma kumialio, naio loa laka, naio jovulu naverialiano nalo re nua, <sup>27</sup> bior Atua berii naio ea kiano Iliano Lu ruei, naio berinavo

*'Kiniou nemiila kiaku atevi na binimej jukamu kaso, ka rila vatitig kiamo m̄arabo.'* *Malakai 3:1*

<sup>28</sup> "Riano neber ka kamiu, ka ea yetemeriba nei, Jone Baruei naio loa laka ka kulo dolu nalo abiniu. Mia nalo nonovio napano mia amei jouro ea Atua kanano navenatuboiano, riva rivokar toro na maariano kalo nana jotano laka garuei, nalo na abiniu nalo loa laka ka Jone, napano mia avar Atua kiano ilivuiiano nalo ve toru loa tovalu naio."

<sup>29</sup> Mia bogo na aban amijog Jone Baruei jo mioliolu, berial m̄arabo na Atua ka ajikia aviliglo, mia tomu na bova telabo, ba bokar tomu na takis bunu, amial ka m̄arabo nene be riano, ana abiliglo ana Jone baruei ealo. <sup>30</sup> Mia kulo dolu nalo, jibe ka Varisis bija naverloglogiano na tuboiano nalo, abilig taakalo ka m̄arabo na Atua naio mila ka ajikia aviliglo ka naio, ana Jone Baruei naio maka rivaruei ealo.

*Yesu naio mil jikili ban tomu nalo ea kiano bogo*

<sup>31</sup> Mia Yesu berii kulo m̄arou nalo nei ka bogo na, naio berinavo "Mia kiniou never iliano na vabe na mia mijikia rivokar tomu re banei kialo bajago, ka river nalo tomu re ajuṁabe? <sup>32-34</sup> Vite nonovio na Atua mila ka rilavonio rivu van kamiu, mia kamiu maka kuvisidomio ga, mia kumil niegeniege naio ga biorio. Bior bogo napano Jone naio binimej, naio joṁa monodulu ka ma bolkouo, a naio bel ka m̄arjuṁelṁelu, mia tomu nalo amial jibe na, nalo ajuṁa amilia naio aberinavo "Tete na siṁaro juaio."

"Mia bogo na kiniou Kulorinio Kenerinio nebinimej nojo, nejinan batitig bo a nomunu batitig bo, naruei amilia kiniou, aberinavo 'IKeal, tete na naio be toro namia jinano mele, a naio be toro namia munu melea m̄arjuṁelṁelu, a napano kanano bilbilu nalo, nalo abe tomu namia abarbiji takis a tomu na abova!'"

"Bior vite na naruei, kiniou nemial kamiu tomu na vio banei napano kamiu kumitibe ka kiritete nalo, napano ver ajuṁa amijejea ea vio yauo na komeli, mia nalo aviovio aiagiaga van kialo bilbilu sesa nalo, averinavo 'Oi, kamiu kubova na! Ver kumemi numiturna numue bulaiu,

mia kamiu maka kuvisidom kuvolu rivija kumemi, p̄eli na ver kumemi numiturna numiou ka iou na m̄ariano, mia kamiu maka kuvisidom kuvitig vija kumemi!'"

<sup>35</sup> "Nina naruei, tomu nalo maka asidom Atua kanano m̄arabo nalo, mia kirim̄arati novo napano maluvo ea toro kiano meuliano na jo jakii Atua kiano m̄arabo, rila rimeravo ka m̄arabo na naruei naio be m̄arabo na masouano napano be riano."

*Tira tai ber aua riano bior kiano bajago va nalo*

<sup>36</sup> Mia Varisis nalo tai kalo, siano Saimon, naio berinavo naio jidom riṁauka Yesu sano sinaniano tai, ana Yesu ban ea kiano vonuo, a naio ba jotano ka asinan.

<sup>37</sup> Ana ea komeli na, be tira tai napano jo naio mila bajago miroano na kirivova laka, naruei naio mijog ka napano Yesu ba jo jinano ea Varisis nei Saimon kunuano. Naruei tira nene bitilubar kiano kariano, mijog kirivova toru laka, naruei naio mijog ka monokanio riva rial Yesu, ana naio midu kanano bauei na bonotanunu nabo tai, naio midu binimej ea yimo nei. <sup>38</sup> Mia Yesu mijoru mon ka merikono ka sinano, naruei tira nei binimej jumolu ju iorou ka naio ea jaano, napano jogumirano miou jibirbili bavatove ea Yesu jaano. Jogumirano nei joṁa jekon Yesu jaano jibe na, naruei naio bar burutili vijinio ma na, naio joṁa miolkono ka Yesu jaano, a naio mije kulbibinio tivelinio mon mave ea Yesu suvajaano, avona bisi ana na miyon bonotanunu nei eao.

<sup>39</sup> Naruei Varisis neibano miog Yesu binimej ea kunuano, naio joṁa bitii vite nei, naruei naio joṁa tiniene bova kano kija. Naio joṁa jidomii jibe nei, berinavo "Verenio Yesu na naio be naverialiano riano tai, p̄eli mia rijikia batitig ruei ka tira na naio be tira na kariano mugaruei jibe na, mia naio rijikia re rijamo ka naio tokol jaano lu na. Mia naio mijamo ka ga naio ka rila tibe na, kiniou maka bunu nejikia vatitig naio naruei."

<sup>40</sup> Mia Yesu mijikia kiano jidomiano, naruei berdoṁe banio, berinavo "Saimon, kiniou nejidom never kiri iliano tai ve telisu vanso beamu vo."

Ana Saimon berdoṁe berinavo "Bo ga, Naverloglogiano. Jau komijikia koverno."

<sup>41</sup> Naruei Yesu berdoṁe jibe nei banio berinavo "Toro tomoruo tai, mia tomu juo amila jabue ea naio. Ea naljuo nei, tinene kiano jabue toru, mia tinene, naio kiano jabue burutomoruo laka. <sup>42</sup> Ana ea bogo na ka avulu meran bereio jabue nalo nei, mia abe juo maka ajikia avulu meran

bereio, naruei toro tomoruo nei tiniene mialo abe juo, naio biekkokoalo abe juo ka kialo jabue nonovio. ?Mo bior vite na, tom juo nei na vabe nene na naio monoka tinienriia mēlea toro tomoruo nei?”

<sup>43</sup> Ana Saimon berdoŝe ban Yesu, naio berinavo “Kiniou maka nejikia, ŝeli na kanano jabue burutomoruo laka kovio, naio monoka sidonii naio rivu lie.”

Ana Yesu berenio berinavo “Nao koig, naio jibe na naruei.” <sup>44</sup> Mo Yesu barŝilig naio ka tira nei, jilloglog naio ka Saimon, berinavo “Saimon, bogo na kiniou nebinimej joomo ea kunuamo, maka neial toro tai rudu uei tai rimej ka mia nemijikia nesekon bulagio niamiamo na m̄arabo den jaaku, napano javukia kanado bajago, jau monoka kalaio. Mia jau keial tira nei, naio naruei jekon jaaku ka jogumirano, a miolkon juva ka vijinio. <sup>45</sup> Kiniou nebinimej joomo ea kunuamo, mia jau maka kavan juŝiamo vatitig rivija kiniou tibe ka nebe kanamo bilbilu nabo tai, mia jikar ea bogo na kiniou nebinimej joomo, naio midu kulbibinio tivelinio mon mave ea suvajaaku nam̄ariga. <sup>46</sup> Jau maka kavari bonotanunu rimej ka koyon ea paripariku, mia naio mila ka jaaku ruei. <sup>47</sup> Mia kiniou neber batitig banso, ka tira nei, kanano kariano nalo miroano laka, mia kiniou nebiekkokoa nonovlo biniu ruei, ana mila na tinien jii kiniou toro laka. Mia kiniou nemial ka toro na kanano kariano maka ve toro, kiniou nebiekkokoa naio, mia naio tinien jii kiniou maka rive toro.” <sup>48</sup> Mia Yesu mil batitig ban tira nei bunu, naio berkanio berinavo “Kiamo kariano nonovio naŝa kojorŝa kojidomii bova vururu biorio, kiniou nebiekkokoa nonovlo ruei.”

<sup>49</sup> Mia bogo na Yesu ber iliano na, kulo dolu nalo napano ajuŝa ajinan vio takurano naliko ka bogo nei, nalo maka asaaro laka, nalo ajuŝa amijuvaluva tertelisu banlo, ajuŝa aberinavo “?Mia tete na naio jidom naio rive kei, napano jorŝa berenio naio mila bulag kariano na tomu nalo kanalo jibe na?”

<sup>50</sup> Mia Yesu mil ber ban tira nei vaarakurano bereio, naio berinavo “Kanamo viek-ouoiano milaso kobokar ioruriano ruei. Jau maka bunu kojog rivova, jau komijikia kavano ga, mia Atua kanano tuŝaro to vijaso.”

## 8

### *Tire nalo telabo ajakisor Yesu*

<sup>1</sup> Ana maka vesiou bereio, Yesu naio jorŝa mieliel bano, naio jo ba jel burevure komeli nalo na tertelisu a nalo na tortoru,

mia ea vio nonovio naio jorŝa mioliolu, a jorŝa midu lilianiano vou nabo na Atua kiano navenatuboiانو binimej ban tomu nalo. Mia jibe ka titiliu, kiano duelimo ba juo [12] nalo aju bija ka bogo na, <sup>2</sup> mia tire nalo telabo kija bunu aju iorou ka nalo. Ea tire nalo nene, tealo kalo napano Yesu mieliel kalo bior niununo nalo na kirivova a kanio mieiano na jualo, jibe ka Mere na Maktala, napano nanua beamu niadu aluo ajua naio, <sup>3</sup> bija Joana, napano naio be toro nei Kusa koano, nanua naio be toro na toru tai na iŝauano na Parinio tubo Erot kiano, a bija Susano bunu. Mia nalo miroano lie vo bereio, napano nalo amijja Yesu nalo toru, mia nalo ajuŝa abitikarlo ka ijaiano nalo naŝa tomu nalo aju ajian banlo.

*Jamerijiano na kurukuti na uiti napano ajibirbili ea borotano kinkin veri*

*Mataiu 13:1-9; Mak 4:1-9*

<sup>4</sup> Naruei ea kiri bogo tai, buruŝara tinioj na tomu nalo amoluo ea komeli telabo beve terakurano na kanalo, naruei nalo abinimej amiobijjilo jeliviv ea Yesu, naruei naio mil banlo, buku jamerijiano tai kalo. <sup>5</sup> Naio berenio jibe nei, berinavo “Be toro tai napano ban ka rivisivisii kurukuti ea kiano tiniavio. Bogo napano jorŝa bisivisii kurukuti nene abano, kurukuti tealo ajibirbili ea m̄arabo, mia iorou, tomu nalo abinimej amiel ea abie lelanlo, a menu nalo amikiti nonovlo. <sup>6</sup> A kurukuti tealo ajibirbili ea vio na be tabaŝilio eao, abitovtov soŝeli, mia karina abinimej amekekeu ga, bior maka ve uei tai ea vio nene. <sup>7</sup> Mo kurukuti tealo ajibirbili ea vio nanua beamu maka atekon batitig rivu teli va nalo eao, mia iorou kanio ana ŝeli nana bova nei naio barboŝeio miluo bereio, bisovoko toti nalo bano-mia aŝarŝaro. <sup>8</sup> Mia kurukuti dolu tealo bereio ajibirbili ea kiri borotano nabo tai, mia nalo amililiuo bano-o, ajakou abar m̄arati nalo, bokar toromomou takurano [100].”

Mia bogo napano Yesu berenio iliano nei banlo bisi, ana naio miaga m̄erere banlo, naio berinavo “Toro na be tiliniene, monokanio riagago vatitig ka iliano nei.”

*? Bior vaio ana Yesu jo mil jel ea jamerijiano?*

*Mataiu 13:10-23; Mak 4:10-20*

<sup>9</sup> Ana iorou kanio, ana naiagagoano nalo abinimej ea Yesu mia nalo abika nioti na jamerijiano nei denio. <sup>10</sup> Naruei naio berdoŝe banlo, berinavo “Atua naio mila jibe na ka mia kamiu kumijikia kuvileal ililuklukuano nalo na kiano navenatuboiانو.

*'Mia ea kulo dolu nalo, ililuklukuano nalo na ajuluku ea jamerijiano kia navo, mia ajurña abitio-o mia maka avitilubarlio, a ajurña amiagago-o mia maka ajog lubarlo.'*" Ais 6:9

*Yesu naio ber bisivisii nioti na jamerijiano na kurukuti uiti*

<sup>11</sup> Naruei Yesu ber bisivisii masosoua jamerijiano nei banlo. Naio berenio berinavo "Mo, nioti na jamerijiano nei naio jibe nei. Vite na be moti, naio be kurukuti, mia nina naio jibe kanio Atua kiano iliano. <sup>12</sup> Mia kurukuti nalo napano ajibiribili ea m̄arabo, nina naio jibe kanio napano tomu nalo amijog iliano nei, a kurukuti novo nei ajibiribili ban ea kialo jidomiano nalo. Mia Parinio Siñaro nei naio binimeĩ bar bulag iliano nei bereio den kialo iviso nalo, ka rila amonea re bunu, a ajikia re avokar ioruriano.

<sup>13</sup> "Dolu, nina kurukuti nalo napano ajua tabaḗilio, mia nina jibe kanio tomu nalo nañia amijog Lilianiano Vou na bo nei, mia nalo amijeivio, ajaaro kanio, mia jibe kanio napano maka ve salo bati na bo. Nalo amonea ka bogo bulati ga, mia verenio ve bogokouo, ḗeli na juboluboiano rimeĩ, mia nalo ajoru bereio ga.

<sup>14</sup> "Dolu bunu, nina kurukuti nalo napano m̄a ajua vio napano be teli na bova eaio, a nina jibe kanio napano tomu nalo na amijogio, mia bogo nañia aju amiel abano jibe na, mia ajidom yebekavo toru ea kialo meuliano, mia ajidom m̄elea puruveru, a nalo tiniel jii m̄elea serevuiano nalo na yetemeriba nei. Bajago nalo na abinimeĩ jibe ka teli na bova tai nañia muekolo, ka mia rila ana na mia nalo ajikia re avar m̄arati napano meruo bo ea kialo meuliano nalo leleio.

<sup>15</sup> "Mia nana maariano, nina kurukuti napano ajua borotano nabo, nina javukia napano tomu nalo nañia amiagago ka Lilianiano Vou nabo nei, naruei nalo amije batitigio monea kialo iviso nalo, abokario jikili vatitig bo be riano. Kulo novo nalo na jibe na, nalo ala kialo jidomiano nalo ve terebievi, naruei nalo aim̄au rimemedu rivanvano-o mia avar m̄arati na Ioluanu Vou nei ea kialo meuliano nalo."

*Jamerijiano na yulu*

*Mak 4:21-25*

<sup>16</sup> Ana Yesu ber bunu, berinavo "Kito tomu nalo, verenio kito ravar yulu rimeĩ, mia ve re tai napano roduvanio sel tano ka basaro ḗeli na vite na jibe na. Peli ga, kito reive takilele mave ga ka rila tomu nalo na ver amei joomo aial ka napano vio merera

bo. <sup>17</sup> Mo, na Atua kanano navenatuboiانو naio jibe ka yulu nei, napano vonganei joñia malmaluvo ea kito ka rudulii vite nonovio. Vite nonovio napano ajulukuaju, a ililuklukuano nalo, mia nalo monoka amalmaluvo ea vio medave ka tomu nalo avitilubarlio. <sup>18</sup> Kamiu monoka kuviagago vatitig ka kanaku iliano nalo, a kuvilavon ka kuvisidomii vatitigio. Toro napano be kiano saba miroano ruei, mia naio rivar rivar lie vo ve telabo laka, mia toro napano maka kiano saba, mia rila luvuio vite vaio na telisu nei napano naio tiniene ka ber kiano ruei."

*Yesu kenieno naliko kuruano nalo, abinimeĩ ka avurular naio*

*Mataiu 12:46-50; Mak 3:31-35*

<sup>19</sup> Ana na Yesu kenieno naliko kuruano nalo amiyotuba ka naio ka bogo nei, mia nalo maka ajikia avokar naio joomo, bior burutiniobi toru laka, mila vio telisu. <sup>20</sup> Mia tomu nalo aber lilian iliano binimeĩ bokar Yesu, ana aberenio aberinavo "¡Ai, koniomo naliko kuruamo nalo, nalo yako ajikili aju tavio, ajidom aialso beamu vo!"

<sup>21</sup> Mia Yesu berdoḗe banlo, berinavo "Nana naio be kenieku, ḗeli na kuruaku, nina nalo ga nei napano amijog Atua kiano iliano lu, a nalo ajurña amila javukia ga napano iliano nei berenio."

*Burum̄ara jegi napano Yesu berbureio*

*Mataiu 8:23-27; Mak 4:35-41*

<sup>22</sup> Mo ea legiano tai, Yesu buru naia-gagoano nalo, abiako ea uako tai, naruei Yesu ber kalo, berinavo "Kito m̄a rava tivelinio ea ueiyabo nei." Naruei ajuvan vio, ana abano, <sup>23</sup> mia bogo na uako jo juvan bano, mia Yesu mirano jouo toru ana monmelio. Ana iorou kanio, ana burum̄ara jegi tai jumolu binimeĩ ea ueiyabo nei, mia burum̄ara kenieno niatuva nalo na amidon tanealo bano-o mia uako nei binimeĩ bujo ka jumu, mia nalo amialo ka bova kitkiti ga naruei. <sup>24</sup> Ana nalo aba abio bon Yesu, aber kanio, aberinavo "¡Tubo, Tubo, vaataro ka mia kito ramadudu naruei!"

Ana na Yesu jevijo jumolu, ana naio berbure jegi bija burum̄ara kenieno niatuva nalo nei, naruei vite nalo nei ajuba binilo, vio be tum̄aro nonovio bo.

<sup>25</sup> Ana Yesu ber kalo berinavo "¿Kene-miu viekouoiano nibe?"

Naruei nalo amerou mia amerou laka, amiilo toru, ana na nalo ajurña abivika denlo bereio, aberinavo "¿Toro kenia na? Naio mil ga jibe na mia jegi naio tei amijogkar niono. !Tomnei!"

*Yesu jitig bulag niadu miroano den toro Kerasa tai*

*Mataiu 8:28-34; Mak 5:1-20*

<sup>26</sup> Naruei Yesu nalo abarko abokar tivelinio nene, napano Kalele jirarago ban eaio, nina memedu ka vio nei Kerasa. <sup>27</sup> Mia bogo napano Yesu jabulu, bauro ea vio nei, toro na vio nei tai binimei ka rivotavo vijaio, napano toro nene siñaro nalo ajuai. Bogobe nua ruei, toro nene naio jo jibe ga na, maka riya kulumñarauo tai, a maka ña monmon ea yimo, mia tinien jii ka ña mon ea pakeltavo ga, ea buluvae nalo narña abar kanalo tasiñaro nalo aba amonmoneaio. <sup>28-29</sup> Siñaro nalo nei ajurña ajutua kiki toro nei va telabo ruei, mila na tomu nalo amilavon ka atukuku kanio danñariga, a nalo ajurña amiorkakar ka ñarmieni, ñeli amiorkakar jaano a juñano ka teli, mia naio jomña mila kokorovlo ga, a siñaro nalo nei amijil deven naio binimej joa vio morña nei.

Mia Yesu mialio, mil ban niununo va nei, jitig naio berinavo tuvan toro nene.

Mia toro nei mial Yesu, naio bio banio, a naio mijorua jaano, ana niununo neibano joa naio mil burutomoruo, naio berenio berinavo “?Mia jau, Yesu, Atua Soñi kenerinio, kanamo vaio joa kiniou? !Kiniou nobika jikili denso, ka mia jau kesian re vironiano van kiniou!”

<sup>30</sup> Ana na Yesu bika denio berinavo “? Ana siamo, kei?”

Ana na niununo va nei naio berdoñe, berinavo “Siaku be ‘Tomu na mira miroano.’ ” Naio ber jibe na, bior siñaro nalo narña aba joomo ea naio nalo miroano laka. <sup>31</sup> Mia niununo va nalo nene nalo ajurña abivika jikili den Yesu bereio ka mia naio rijil nalo re, naio rila lo re ava ajoru avatove yetano ea buruñara bulukuti sebi.

<sup>32</sup> Mo ea suku tivelinio na vio nei, be buruñara taara na kiribue, nalo ajurña amiuoiuo ea borotano, ana siñaro nalo neibano amiaga ban Yesu, abika jikili denio aberinavo naio rila lo ava joomo ga ea kiribue nalo nei. Ana na Yesu mijamo ka jibe na banlo, <sup>33</sup> naruei nalo ajaluvo den toro nei, ana nalo aba joomo ea kiribue nalo neibano. Mia soñeli ga, kiribue nalo nene ajikiti, ajjirbilibi ea yabalili tai, abavatove yetano ea buruñara ueiyabo nei, amadudu nonovio ea bulu niogovu.

<sup>34</sup> Ana bogo napano tomu na abitakar kiribue amial vite nei, mia nalo bunu aburo kilkil, aban bereio vonuo, aberial vite nei, mia nalo aberial janea vio reraio bunu, <sup>35</sup> mila ana vio bujo ka tomu nalo abinimej, ka ajidom aial kija. Mia bogo na abinimej, amial ka na Yesu naio jo, a toro narña niununo va nalo neibano aburo

denio ruei, naio jomña jotano ea Yesu jaano. Naruei naio miya batitig kulumñarauo nabo ruei, mia naio jo melumu bo ruei jo, maka bunu rive deden leleio. Bogo napano amialio ka napano toro nei naio binimej bo ruei jibe nei, mia nalo amerou toru.

<sup>36</sup> Mia nalo napano aju jukamu, napano amial vite nonovio, nalo ajukunu kanio ban nalo na abinimej vonga, nalo aber-bisivisiio banlo juñabe ka toro nei nua niadu nalo aban ea naio, mia Yesu mila naio binimej bo bereio ruei. <sup>37</sup> Mia tomu nalo na tanobuku nalo na vio Kerasa, nalo amial ka bova ga, naruei nalo aju ajadu jikili ka Yesu ka ajidom ka mia naio taluvo denlo, bior vite na milalo amerou toru laka. Naruei Yesu nalo abajou bereio ka avan ea kialo uako, ka nalo avan bereio.

<sup>38</sup> Ana bogo na ajurña abajou, toro neibano naio binimej balea Yesu jikili, ka jidom riva to naljuo bogo nonovio, mia Yesu maka rijamo kanio, mia naio berkanio, berinavo <sup>39</sup> “Makanio, bior bo laka ka kava vonuo bereio, a jau kava kover van tomu nalo, kover kalo juñabe napano Atua mila bo mia bo laka banso jibe na.”

Ana toro nei ban bereio, a naio jomña miel jeliviv ea vio nalo na ea tanobuku na kanano buruñara bulukomeli, a naio jomña ber bulavulag iñauano novo nei napano Yesu mila ban naio.

*Jairas kenerinio vevinio, naljuo tira tai napano jokol Yesu ñano kulumñarauo*

*Mataiu 9:18-26; Mak 5:21-43*

<sup>40</sup> Naruei Yesu nalo abarko bereio ueiyabo aba tivelinio, mia buruñara tiniobi na tomu nalo aju rorea naio, mia nalo ajaaro toru ka amial naio bereio. <sup>41</sup> Mia toro na toru tai na yimo na volkouano na kanalo na vio nei, siano Jairas, naio binimej vaataro ka Yesu. Naruei minie yetano kanio, jegi banio, baleaio ka rimej ea kunuano, <sup>42</sup> ka rial kenerinio vevinio, napano mie toru. Tira sesa nei, naio be toro na toru nei kenerinio takurano ñanono ga, a kiano yuka be titai jibe ka duelimo ba juo ga [12], mia kiano mieiano binimej biloulo ruei, mila ana amial ka vaataro ka mia naio rinñaro. Naruei Yesu jumolu, ban bija toro nei abano.

Mia bogo na naio jo ban jibe na, vio bujo ka buruñara tiniobi na aju ajakisosorio, nalo ajurña amivinkakarlo ajeliviv ea Yesu. <sup>43</sup> Mia nalo nene tai kalo, naio be tira tai, napano kiano mieiano na monolero mila naio ka legiano nonovio ga, bokar yuka duelimo ba juo [12] ruei, mia maka ve toro tai napano mijikia rila rivu kiano mieiano nei leleio. <sup>44</sup> Naruei tira nei, naio milavan naio bure toluo nalo nei, naruei mijian lilie

ka naio binimei vaataro ka Yesu taakano, ana na naio jian juñano jibe na ana jokol mñano ikiniono kulukoti. Naio jokol Yesu mñano kulunñarauo jibe na, mia monloglog bogo nei ga, kiano mieiano nei bisi ruei.

<sup>45</sup> Mia kolvare ga Yesu bika, berinavo “? Kenia na jokol kiniou vonganei ga?”

Mia nalo aber “Maka toro tai tokolso,” mia Pitere bunu berkanio berinavo “?Ana Tubo, juñabe? Tom miroano miroano laka na amivinkarkarlo jeliviv easo, a ajumña abalbaliaso.”

<sup>46</sup> Ana Yesu berkanio, berinavo “Makanio, toro tai jokol batitig kiniou nei, bior nomijog lubar ka kanaku moroano togio jaluvo ea kiniou ban ea toro nene ruei.”

<sup>47</sup> Naruei tira nene, naio bitilubar ka naio maka bunu rijikia rilavan naio, naruei naio binimei ea Yesu, napano naio merou toru bano mña jo memebiju ka garuei. Naio binimei mijoru ea Yesu jaano, kamu ka tomu nalo napanoaju na miralo, naio ber bulag nonovio vite ea naio banio, jibe na kar vaio napano naio binimei jokol Yesu, a juñabe napano naio binimei bo ruei ea bogo nei. <sup>48</sup> Ana na Yesu berkanio, berinavo “Nena, kanamo viekouoiano ea kiniou milasa kobo bereio ruei. Atua kiano tumaro to vijaso, jau kava vonuo ga bereio.”

<sup>49</sup> Naruei bogo napano Yesu jomña mil ban tira nei kia ga vo, iliano binimei ea toro na toru nei kunuano, berinavo “Kenerimo vevinio namña na, naio bakovio ruei. Bo ka mia jau kovuru re bunu naverloglogiano na toru na rimeí, ka kala lelan kule re naio.”

<sup>50</sup> Mia Yesu bunu mijog iliano nei, ana na naio ber ka Jairas, berinavo “Jau niukniuku rivieso re, jau kavarkar tiniemo sikili ea Atua ga, bior mia kenerimo vevinio naio rimeul bereio na.”

<sup>51</sup> Naruei Yesu ban bija toro nei ea kiano vonuo, mia bogo napano abinimeí abokar vio nene, naio berbure nalo dolu berinavo mia nalo ava joomo re naliko naio, mia naio buru ga Pitere naljuo Jone, bija Yemesi, naliko niatira sesa nei karamñano a kenieno, mia nalo na ga aba joomo. <sup>52</sup> Mia bogo na nalo aba joomo jibe na, amial ka napano tomu nalo ajumña tiniel miia niatira sesa nene ruei, nalo ajumña ajigio, mia Yesu ber kalo, berinavo “Kamiau kuviteg re rivior niatira na tibe na. Naio maka rimñaro na, mia naio jo monmelio ga na.” <sup>53</sup> Mia nalo abital mñelea ga banio, bior nalo amijikia ruei ka napano niatira nei naio mñarodobi ruei.

<sup>54</sup> Naruei Yesu ba bokar niatira nei juñano, a naio mil banio, berinavo “Kanakanu niatira, jau kotumolu von.”

<sup>55</sup> Naruei monloglog bogo nei ga, nalo amial ka napano niatira nei kiano meuliano binimei bere joaio bereio, naruei naio jumolu jikili ju, naio jomña miel, ana na Yesu ber kalo berinavo bo ka adu kiri sinaniano tai vanio. <sup>56</sup> Mia karamñano a kenieno, nalo amiilo toru napano mila kanalo jidomiano bakovio ruei, mia Yesu ber kalo berinavo mia averial re vite nei van kulo dolu nalo.

## 9

*Yesu miila bulagio kiano naiagagoano nalo aveve juo*

*Mataiu 10:5-15; Mak 6:7-13*

<sup>1</sup> Naruei Yesu bio birovion kiano due- limo ba juo [12], ana na naio mil batitig banlo, jian moroano banlo, mijamo kalo ka amijikia atuvulu simfaro, a ka amijikia aieliel ka mieiano nalo. <sup>2</sup> Naio mila jibe na ka mia naio riila bulaglo ka mia ava aio- liolu ka Atua kiano navenatuboiano, a ka aieliel ka namieiano nalo. <sup>3</sup> A iliano nabo nalo tealoo napano naio ber kalo beamu vo, avona bisi ana na nalo abanio aber jibenei, napano naio berinavo “Tivelinio ka kenemiu mñarabo, mia kamiau kuvar re titai. Mia kamiau kuvar re kenemiu nasitogo namña kubanio, ðeli na kenemiu basaro, ðeli na sinaniano, ðeli na kenemiu puruveru, a mia kuvar re kenemiu kulurñarauo ve juo, mia kamiau kuvar kenemiu kulunñarauo ve takurano ga namña kumiya kar vonganei ka kuvano.

<sup>4</sup> “Mo vonuo na vabe na mia avurukar kamiau kuvitumña, kuva jouro eaio, mia monoka kamiau kuvisaaro ka mia kuvitu kamlikoo mñaratavo na vonuo nene, mia kuvituvan vonuo nei bogo napano mia kuvitaluvo den mñarkomeli nei bereio. <sup>5</sup> A ea mñarkomeli na vabe na ver maka asidom avurukar kamiau ea kunualo nalo, mia kamiau kuvituvan ga kialo vio nene, a bogo na kamiau kuvitaluvo denio, kamiau monoka kuvijubakon bulukievi na mñarabo na vio neibano den jaamiau nalo, tibe ka kijokijo tai, ðeli na iliano na kirisikili tai na kenemiu banlo, ka mia avar vironiano tai napano memedu ga ka kialo bajago na bova nene.”

<sup>6</sup> Ana na naiagagoano nalo abava tavio naruei, nalo aba ajal ea mñarkomeli nalo, nalo ajumña amiololu ka Lilianiano Vou nabo, a nalo ajumña amieliel ka tomu nalo.

*Parinio Tubo Erot Antipas jidom bitovionia Yesu*

*Mataiu 14:1-2; Mak 6:14-16*

<sup>7</sup> Ana ea bogo na, Parinio Tubo Erot nene bunu naio mijog kija ka vaio napano nia Yesu nalo ajumia amilaio, naruei naio jo tiniene burukokorov biorio, bior tomu tealo ajumia aberii Yesu, ka naio be Jone Baruei, napano naio meul bereio den namariano, <sup>8</sup> mia nalo dolu ajumia aber vonvon aberinavo Yesu be tormoru Elaija re nua, napano naio miyotuba bereio, a nalo tealo ajumia aberinavo Yesu be naverialiano nalo re nua nua tai, napano naio jumolu bereio den namariano. <sup>9</sup> Mia Parinio Tubo Erot naio berinavo "Maka ve Jone Baruei na, bior kiniou nomiovlar pariparinio ruei, mia toro namia ajumia aberverii na, naio be kenia bereio?" Mo jidomiano nei mila ana naio jidom toru ka rial kija Yesu.

*Naiagagoano nalo aba amiololu, karina na abinimei bereio*

*Mataiu 14:13-21; Mak 6:30-44; Jone 6:1-15*

<sup>10</sup> Ana naiagagoano nalo napano Yesu miila bulaglo ka ava aioliolu, nalo aborvoru bereio, naruei nalo aberial ka Yesu vite nalo nonovio napano nia amimaukanio. Ana Yesu burulo ajaluvu den tomu nalo, ajubilig telisu ea mmarkomeli tai, siano Betsaeta. <sup>11</sup> Mia karina, tomu nalo amijog ka aju aban ea vio nei, mia nalo bunu ajakisorilo, aban ea vio nene bunu. Mia Yesu naio jaara ga, naio jukunu kija naliko, a kario naio berlogloglo ea tivelinio na navenatuboiano na Atua kiano, a naio mila batitig nalo namia aju ajidom toro tai ka rieliel kalo.

*Yesu bagan tomu menu jimo [5,000]*

<sup>12</sup> Mia Yesu jo naliko banbano-o, karina nalo amial ka napano mmerenio jo batove nonovio, naruei kanano duelimo ba juo [12] abinimei keanio, aberinavo "Ai, Tubo, bo kanio jau kajamo ka tiniobi nei avan bereio ea kanalo vonuo nalo, p̄eli na ea mmarkomeli tealo na, ka amijikia avulu salo sinaniano tealo, a ka amijikia aleal vio tai ka mia amon eaio, bior vio nei kito rojua nei naio bova ga, maka rivu ka vio ribogoko kito eaio."

<sup>13</sup> Mia Yesu ber kalo, berinavo "Ee, makanio. Bo kanio kamiu ga kuvar sinaniano vanlo."

Mia nalo aberdope aberinavo "¡Ajerei! Abe kumemi nubarkar ga joko sesa jimo, bija niado na tertelisu juo. ?Peli na ver makanio, jau kojidom ka mia kumemi naruei, nuva nuvalu sinaniano rivare ka

burutiniobi nalo na?" <sup>14</sup> Mia nalo aber jibe na bior tomu nalo napano aju na nalo miroano laka, napano kulovu nalo ga abokar titai kovio jibe ka menu jimo [5,000].

Ana na Yesu ber kalo berinavo "Kamiu kuva kuver ka tomu nalo na kuver atutano beamu vo, atutano ea taara nalo, napano mia tomu veve duelimo va jimo [50] atua taara tai." <sup>15</sup> Naruei nalo abano amila javukia napano naio berenio, naruei tomu nalo ajutano ea taara nalo. <sup>16</sup> Naruei Yesu bar joko jimo bija niado na tertelisu juo nei, naio jirarago bavin tiniabene, naio milivu kanio, karina burekokorovio, ana bar jian ban naiagagoano nalo ka aviovio ka tanea taara nalo nei. <sup>17</sup> Naruei nalo ajinan banbano-o, mabolo jouo batitigio bo, a iororoti sinaniano napano ajen digio ju, nalo amisonsonlo aban ea basaro solokobaro nalo bokar duelimo ba juo [12].

*Pitere berial ka Yesu be Naverikariano memedu*

*Mataiu 16:13-28; Mak 8:27-31*

<sup>18</sup> Mia bogo tai, ana Yesu jo bolkouo naio takurano, a kanano naiagagoano nalo aju vaataro ka ga naio, naruei naio bika denlo, berinavo "¿Kamiu kumitumia kumijog tomu nalo ajumia aberverii kiniou aber kiniou nebe kei?"

<sup>19</sup> Ana na nalo aber kanio, aberinavo "Tealo aber jau kobe Jone Baruei, a tealo aber jau kobe Naverialiano Elaija, a tealo aber jau kobe naverialiano dolu nalo re nua nua tai napano meul bereio den namariano."

<sup>20</sup> Mo naio bika denlo, berinavo "¿Mo ana jumabe ka kamiu, kamiu kumitumia kuber kiniou nebe kei?" Ana na Pitere naio berdope, berinavo "Jau kobe Naverikariano na Atua kanano."

*Yesu berial kiano mariano*

<sup>21</sup> Naruei Yesu mil jikili, ber kalo memedu, berinavo mia nalo avan re averial vite nei ka tomu nalo, <sup>22</sup> mia naio ber batitigio bo banlo ka mia tumabe ka naio. Naio berenio berinavo "Kiniou nebe Kulinio Kenerinio, mia navurinmaraboiano nalo na kulo Israel nalo kialo, vija tomu na tortoru na kulo lu nalo, bija naverloglogiano na tuboiano nalo, mia avukular kiniou, monoka mia ala vite ve telabo ka ala lelan kiniou. Mia monoka auebin kiniou namiaro, mia ka bogoti ve tolu nene, mia Atua rivitirilar kiniou nemeul bereio."

*Yesu Kiano naiagagoano naio monoka sidom iakurano ga ea kanano sidomiano nalo*

<sup>23</sup> Naruei ea bogo na, Yesu mil banlo, naio berenio berinavo "Toro napano jidom rimej takisor kiniou, naio monoka sidom iakurano ga ea kanano sidomiano nalo, ana mia naio monoka rudu kanano m̄akolkolo ea legiano novovio, jibe napano mia nodu kanaku, naruei naio takisor kiniou nam̄ariga. <sup>24</sup> Neber jibe na bior toro na ver sidom ridururu kiano meuliano, mia naio rilaluvu kiano meuliano. Mia toro na ver rijamo ka kiano meuliano rivior kiniou, mia naio rijev kiano meuliano bereio. <sup>25</sup> Avona ver toro tai bokar vite novo nalo na yetemeriba nei riviniu, mia rilaluvu m̄arabo a rilaluvu kiano meuliano, naio maka rijev vite novo tai leleio.

<sup>26</sup> "Toro nam̄a mimou ka kulo dolu nalo miralo bior kiniou p̄eli bior kanaku iliano, mia kiniou Kulorinio Kenerinio, mia kiniou bunu noimou ea Atua mirano rivior toro nene, ea bogo napano mia nemei bereio eaio, napano mia nemei vija burum̄ara mermerano napano kanaku, a napano be karam̄aku kanano, a napano be nailiano lu nalo kanalo. <sup>27</sup> Riano kiniou neber ka kamiu, be tomu tai ajumolu aju ea vio nei, napano mia maka ajikia am̄aro, rivanvano-o rivokar bogo napano mia aial navenatuboiano na Atua kanano riyotuba."

*Yesu niabene binimej be dolu  
Mataiu 17:1-8; Mak 9:2-8*

<sup>28</sup> Torou ka bogo na napano Yesu berenio iliano nalo na, titai jibe ka sude takurano barlaka bereio rui, naruei naio buru Pitere, Jone, a Yemesi, nalo veri abavin ea burusuku tai, napano jidom rivolkouo. <sup>29</sup> Naruei nalo abinimej abokar vio nene, a bogo nam̄a Yesu jom̄a bolkouo, naiaagoano tolu nalo nei amialio napano mirano binimej be dolu, a amialio ka napano m̄ano kulum̄arauo merera laka, a amiuvu bo mia amiuvu novovio garuei.

<sup>30-31</sup> Ana iorou, tormorou juo nei Elaija naio Mosis, naljuo amiyotuba bija burum̄ara miamoiano na mermerano na tini-abene, ana na abe juo ajum̄a ajukunu naliko Yesu, napano ajum̄a aberii ka mia tum̄abe ana na mia naio monoka riva Yerusalemo, a monoka m̄aro den yetemeriba nei, tavukia napano Atua berkario rui.

<sup>32</sup> Mia beamu, Pitere nalo nei amijog miralo jouo toru, amiyukudovo banbano-o mia amonmelio garuei, mia bogo napano ajevijo bereio, amiilo ka vite nalo nei, napano amial Yesu kiano burum̄ara miamoiano na mermerano, a amial tomu juo nei ajumolu aju bijaio. <sup>33</sup> Naruei

nalo amial ka napano naljuo neibano aju ajuvan vio ka avan bereio, naruei Pitere naio jidom ril, mia maka rijikia vaio ka mia riverenio, ana naio ber ilikodovioano tai ban Yesu, berenio berinavo "Tubo, bo ka napano kito rojua vio nei. Bo kanio kito roim̄auka tobobo ve tolu ea vio nei, tai ve kiamo, tai ve Mosis kiano, a tai ve Elaija kanano."

<sup>34</sup> Mia bogo napano naio jom̄a ber iliano nei, melijo tai binimej midukolo, mia bogo napano amialio ka nalo aju joomo ea melijo nene, nalo amerou binvinlo. <sup>35</sup> Naruei amijog iliano tai miyotuba ea melijo neibano, naio berenio berinavo "Nina be keneriku na, napano kiniou nebitirilar naio rui. Naina naruei monoka kumonmonea naio rivu."

<sup>36</sup> Mia bogo na iliano nei bisi, melijo bakovio, amial ka napano Yesu naio ga takurano ju naliko bereio. Iorou ka nina, naiaagoano nalo aju ajurbanin kanio ga aju, maka ava averii vite neibano amialio ka tomu dolu nalo.

*Yesu mijil lar sim̄aro den m̄eaku tai  
Mataiu 17:14-21; Mak 9:14-29*

<sup>37</sup> Mia ea legiano dolu nene, Yesu naliko nalo tolu nei ajuvan burusuku nei, abatove bereio, mia burum̄ara tiniobi na tomu nalo aju rorea ka ajidom aial naio. <sup>38</sup> Mia bogo napano amiyotuba kalo, toro tai kalo bio jouo ban Yesu, naio berenio berinavo "Naverloglogiano, neber aiou banso, kovitii von keneriku m̄eaku nei, bior naio be keneriku takurano m̄anono ga. <sup>39</sup> Niununo va tai jom̄a binimej ea naio jibe na, mila naio miaga burutomorou laka, a miaburusalsal bano-o m̄a titilevlevi bavin eaio. Tenei jom̄a mila naio napano kirivova laka, mila lelan naio laka, a naio jom̄a monmon ga milaio, naio maka lele tuvan naio torm̄aro bogo tai. <sup>40</sup> Kiniou noburu naio ban ea kiamo naiaagoano nalo, neber ajuo kalo ka ajilar niununo va nei, naruei nalo amila von, amim̄aukanio bano-o, mia abijukudeio ga."

<sup>41</sup> Naruei Yesu berdope, mil banlo, berinavo "?Kamii na, jum̄abe jibe na? Kamii maka kuvarkar tiniemiu sikili ea Atua leleio. ?Mia kiniou monoka noto vija kamii kelvovu nalo riva rivokar nagi? Kiniou tinioku m̄aro ea kamii rui. Mo, bo ga, kovuru keneriku nene rimej vonio."

<sup>42</sup> Naruei nalo aba aburu kiritete nene binimej, mia bogo napano aju abinimej kia ga vo, niununo va nei mila m̄ele niadua kiritete nei bereio-o mia, mila niabene memebiju a ba burukar jikili. Mia Yesu mil jikili, berbure niununo va nene, ana



naio mieliel ka m̄eaku nene, naruei naio buru bereio ba ban karan̄ano. <sup>43</sup> Mia nalo napano amial vite nalo nei, nalo amiilo toru laka ka Atua kanano moroano na loa laka na kirinovo nei, napano mila bo laka jibe nei ban tete m̄eaku nei.

*Yesu berial bereio kiano m̄ariano*

Ana memedu ka bogo na napano m̄a kulo dolu nalo ajun̄a aberverii vite novo napano Yesu milaio, mia Yesu ber iliano tai ka kanano naiagagoano nalo. <sup>44</sup> Naio ber kalo, berinavo “Kam̄iu kuvije tiliniemiū rivu ka kanaku iliano nei, kam̄iu kuvidu vatitigio toa kenemiū jidomiano nalo, ka mia tiniemiū ribobogia re bereio bogo tai. Nao, kiniou neber batitigio ban kam̄iu, Atua miila kiniou jibe Kulorinio Kenerinio, mia vaataro naruei ka mia adu kiniou navan ea tomu nalo jun̄alo napano mia ala bin kiniou nam̄aro.”

<sup>45</sup> Mia naiagagoano nalo maka ajog lubar vo venia napano Yesu jon̄a berii kalo, jibe ka nioti nene joluku kia ga vo, mila maka ajikia ka avitulubar̄io, a amerou bunu ka avika batitig den Yesu tivelinio ka iliano nene.

*?Toro kei naio loa laka ka kulo dolu nalo?*

*Mataiu 18:1-5; Mak 9:33-40*

<sup>46</sup> Mia iorou, ana baravo tai moluo iviso bure naiagagoano nalo, ka mia kei naio to mave ka nalo dolu. <sup>47</sup> Mia Yesu mijikia kialo jidomiano nalo, naruei naio bio kiritete tai napano jo miel binimei kano, naruei naio midu kiritete nene ji ju tivelinio ka naio, <sup>48</sup> ana naio ber kalo, berinavo “Toro napano kiano jidomiano batove ka kiniou, mo naio saaro ka rijeve kiritete nei, nina javukia ga napano naio jaaro ka rijeve kiniou. A toro nam̄a jaaro ka kiniou, jibe ka napano naio jaaro ka nana miila kiniou nebinimei. Nina bior nana ka kam̄iu napano kiano jidomiano rivatove laka, naio naruei napano mia naio loa laka ka kam nonovio.”

*“Toro na maka riverbure kito, naio jon̄a miija kito”*

<sup>49</sup> Ana Jone ber ka Yesu, berinavo “Tubo, kumemi numial toro tai, napano naio jon̄a mijil bulag sim̄aro nalo, naio jo mijil bulaglo ea siamo. Mia toro nene, kumemi maka nuvijikiaio, naio maka ve kito tai, naruei kumemi nuberbureio.”

<sup>50</sup> Mia Yesu berkanio, berinavo “Makanio, kam̄iu kuverbure re naio, bior toro napano maka m̄a riverbure kito, naio jon̄a miija kito kiana.”

*Yesu jidomial ka vaataro ka monoka naio rivavin ea vio Yerusalemo*

<sup>51</sup> Mia Yesu bitilubar ka vonganei, vaataro ka mia Atua rivuru naio rivavin bereio tiniabene, naruei naio midu vatitig kiano jidomiano ruei ka kiano m̄arabo monoka rivavin mave Yerusalemo. <sup>52</sup> Ana na nalo aju amiel abano, ana Yesu miila kiano atevi nalo ajukamu, aban ea m̄arkomeli tai na kulo Sameria kialo, ka ayomon vite nonovio rimemedu ka mia naio mijikia rime iorou. <sup>53</sup> Mia nalo na vio na, maka asidom Yesu nalo ame iouro ea kialo vio, bior nalo maka atun̄a tinie tii ka aija kulo Ju nalo, napano ajun̄a ajel ea kialo vio na abavin Yerusalemo.

<sup>54</sup> Tilikiti napano naiagagoano juo nei Yemesi naio Jone naljuo amial ka napano nalo ajun̄a aberburelo jibe na, abika den Yesu, aberinavo “Tubo, kojidom nubolkouo, nuvio sebi tai taluvo ea vio mave rivatove sisen tanea nalo na?”

<sup>55</sup> Mia Yesu naio bilig naio banlo, berbure kialo jidomiano na jikili nei. <sup>56</sup> Ana naio jukamu kalo, maka bunu ava iouro ea vio nei, amiel ga aban ea komeli dolu tai.

*Toro napano naio jakisor Yesu, maka rijikia siraragd̄i bereio*

*Mataiu 8:19-22*

<sup>57</sup> Tilikiti napano aju amiel ea m̄arabo abano, toro tai binime i vaataro ka Yesu, naio berkar banio, berinavo “Mia kiniou natakisorso, ea vio na vabe na jau kavan eaio.”

<sup>58</sup> Ana Yesu berdoḡe banio, berinavo “Kuli deden nalo abe m̄alo bulukup̄ili na amon eaio, a menu nalo abe m̄alo niuku nalo. Mia kiniou Kulorinio Kenerinio napano nebinimei tiniabene, maka ve kiaku vio tai, ka mia nava nomon eaio. Ver jau kajaaro bunu ka meuliano na jibe na, jau komijikia komei.”

<sup>59</sup> Ana ea bogo nei, toro dolu tai, Yesu berkanio bunu ber rime takisorio, ana naio berdoḡe banio, berinavo “Tubo, bo ga, mia jau kajamo ka kiniou navan nevitikar kanaku tormoruo beamu vo, mia ver naio rim̄aro bogo tai, mia kiniou nemei bereio natakisorso.”

<sup>60</sup> Ana Yesu ber ka naio, berinavo “Jau kotuvan tomu nalo napano maka ajev meuliano vo ka mia ava ativin kanalo tomu na am̄arm̄aro. Mia jau, komei ga, rava roiololu ka Atua kanano nave-natuboiano.”

<sup>61</sup> A dolu tai bunu mila soḡeiano jibe nei, naio bika den Yesu, berinavo “Tubo, mia kiniou tulaka ga natakisorso, mia vite tai ga, kiniou nojidom ka jau kajamo ka

kiniou nava never bogiano bo van nalo na ea kanaku vonuo beamu vo.”

<sup>62</sup> Ana Yesu ber iliano tai banio jibe nei, berinavo “Toro namã jomã jidom m̃lelea kanano vonuo a kiano saba nalo nonovio nei, naio jibe toro namã jelanvu ka uako, a julaka jomã jiraragdi. Toro na jibe na maka rivare ka rimei ve toro na Atua kiano navenatuboiano.”

## 10

*Yesu miila bulag tomu miroano ka aveve juo ava aioliolu*

*Mataiu 9:37-38, 10:7-16, 11:20-24*

<sup>1</sup> Ana ea bogo na, kiado Tubo bitiri bulag kiano naiolioluano tealo bereio. Nalo duelimo va aluo ba juo [72] abiniu, a naio jomã jidomii ka mia rila lo ava atukamu ka naio, ava aveve juo ea m̃arkomeli a ea vio nalo napano mia naio rivarlaka ealo iorou. <sup>2</sup> Naio berlogloglo jibe nei, naio berinavo “Be sinaniano miroano laka ju mermeruo ea tiniavio, mia tomu nalo maka ve telaboaju abarvar bijiilo binimej vonuo. Kamii monoka kuvika sikili van boru na tiniavio nene, ka mia naio riila bulag tomu ta bunu avan ka avarvar sano sinaniano nene nalo rimei. <sup>3</sup> Ver tibe na, mo kamii monoka kuvidu kenemiu m̃arabo kuvano. Mia bo kanio kamii kuvitilubar ka nemiila kamii kuba tavio, jibe ka napano kamii kumitavukia nunu solbouo nalo, napano kumitunã kuba tavio ka mia kuviniua burumãara kuli deden nalo. <sup>4</sup> Bogo na ver kamii kuvano, mia kuvar re siveu na kenemiu puruveru, mia kuvar re kenemiu basaro nalo, a kuvar re kulubue na jaamii tai bereio. Mia kuviel yauo ga tibe na kuvano, kuvitukunu pilipili re ea m̃arabo van tomu nalo.

<sup>5</sup> “A bogo napano kuvano-o kuviyotuba ea yimo na vabe, vite na be moti ka mia kuverenio, kuver tibe nei, kuverinavo ‘Tunãro toa vonuo nei.’ <sup>6</sup> Ana verenio toro na toa vonuo nei naio tinien tii ka tunãro, mia tunãro neibano kuberenio mijikia to vija naio, mia verenio ve re toro tai tibe na, mia tunãro nei rimei ea kamii bereio. <sup>7</sup> A kamii kuvitatan ea re yimo nalo, mia kamii kuvitua ga yimo ve takurano nei ga, mia kamii kuvisaaro ga ka kumisen sinaniano vaio ðeli na kumunu vaio na avar rimei asian van kamii. Kamii kuvimou re ka kuvijev vite novo vaio napano ajidom ala van kamii, bior memedu ga ka toro na imãuano monoka rivar kiano ijaiano ve telisu.

<sup>8</sup> “Tibe na, m̃arkomeli na vabe na kuva kuviyotuba eao, ver asaaro ka avitkar kamii, mia monoka kamii kuvisaaro ka sinaniano vaio napano mia asian van kamii, <sup>9</sup> a mia kamii monoka kuvieliel ka tomu na mieiano nalo na vio nene, a kamii kuvijikia kuver kalo, kuver ‘Vonganei, Atua kanano navenatuboiano binimej vaataro ka kamii, vonganei Atua jo binimej ka ve kenemiu Tubo naruei.’

<sup>10</sup> “A bogo tealo mia kamii kumal-maluvo ea m̃arkomeli tai, mia nalo asaaro re ka mia avuru kamii kuva kuvitu kamliko. Verenio tibe na, mia kamii kuvitakii ga m̃arabo labo kuvan na jel jouro medave ea komeli nene, a kuverial ka tomu nene nalo tibe na, kuverinavo <sup>11</sup> ‘Yevi na m̃arabo na kenemiu vio nei, kumemi numijuba kon bulagio den jaamemi, jibe ka kijokijo tai ka kamii kuvisidomii. Kamii monoka tiniemiu ribobogia re, ka vaataro ga ka Atua kanano navenatuboiano riviedu kean kamii ruei, mia kamii kumilkue kanio, naruei kumilaluvui ruei.’

<sup>12</sup> “Kiniou neber riano ka kamii, ka legiano na tibureiano, mia nalo na jibe na avar vironiano nana jikili loa tovulu nana mia nalo na bulukomeli na Sotomo re nua mia nalo avario.”

*Yesu berii nalo namã maka amonea naio*

*Mataiu 11:20-24*

<sup>13</sup> Naruei Yesu mil jikili ban tomu nalo ea vio tealo, berenio berinavo “!Kulo Korosin, bija kulo Betsaeta, kamii kumila lelan kamii toru liki-e mia! Ver kulo Taia vija kulo Saiton nalo aial kijokijo neibano kamii kumialio ruei nei, mia nalo aviliglo nua ruei. Nalo maka ave kulo Ju, mia nalo aya m̃adabake ga a avuku bulukievi ea pariparilo ruei, nalo atutano atu tibe na ka tomu nalo avitilubar ka nalo amijog bova toru riano bior kialo kariano nalo. <sup>14</sup> Kiniou neber ka kamii, ea bogo na tibureiano, mia kenemiu vironiano tovulu napano ve nalo nei kanalo.

<sup>15</sup> “!A kamii kulo Kapeneam, napano kubarvar ka kamii m̃lele, napano m̃a kumisidom kumijalar kamii ka kumitu mave levlevi, kamii kuvitkar kamii! Mia Atua rivuku bulag kamii kuvatove laka ea bulukuti sebi.”

<sup>16</sup> A Yesu ber bunu ka nalo, berinavo “Toro napano verenio ka mia naio rudukar kamii, naio jo midukar kiniou, a ver toro napano maka sidom kamii, naio jo maka sidom kiniou, a ver toro na maka sidom

kiniou jibe na, naio jo maka sidom toro na toru napano naio miila kiniou nebinimei.”

Naruei bija iliano na, Yesu miila kiano naiolioluano nalo abatavio ka ala iñauano.

#### *Naiolioluano nalo abinimei bereio*

<sup>17</sup> Naruei naiolioluano nalo nei aba amila iñauano novo nalo telabo, karina iorou kanio ana abinimei bereio ea Yesu, napano tinielo bujo laka ka saariano ka vite nalo napano rña amilaio. Abinimei bereio aber ka Yesu, aberinavo “!Tubo, kumemi numiñauka vite nalo ea siamo bano-o bokar napano siñaro nalo bunu ajutano ka kumemi!”

<sup>18</sup> Ana na Yesu berdoḡelo berinavo “Ee, kiado iñauano jibe na naruei. A kiniou bunu, nemiãl Siñaro jumolu den tini-abene, amiila deven naio mijoru batove jibe ka viobijiio tai. <sup>19</sup> Vonganei, kiniou nomijamo ka ban kamiu ruei, ka kamiu kumijikia kuvivikar maro a buruolu, a moroano na kiado uolu kiano naio totano ka jaamiu bunu, ana mia ve re titai rijikia re rila bulag kamiu. <sup>20</sup> Mia kamiu kuvarvar ka kamiu re ka vaio napano kiniou nemijamo ka ban kamiu, napano niununo va nalo ajutano ka kamiu, mia be vite takurano ga napano kamiu kumijikia kuvujo ka saariano kanio, nina napano siemi nalo, ajirikakarlu aju joomo ea niosi na meuliano ruei.”

#### *Yesu ber siva ban karamãno*

*Mataiu 11:25-27, 13:16-17*

<sup>21</sup> Mia ka bogo nei, Yesu bolkouo, berinavo “!Teta o, Tubo na vio mave a Tubo na yetemeriba! Neber siva banso, bior vite nalo napano ea tivelinio na kiniou, jau kobisiḡeio banlo napano kialo jidomiano jibe ka kiritete nalo ga, mia nalo napano ajidomii ka abe rñasou laka, bija nalo napano ajidomii aber amijikia vite, mia jau komilavan vite nalo nei kalo. Riano, Teta, ninei javukia ga nana jau kojidomiio.”

<sup>22</sup> A Yesu ber bunu berinavo “Karamãku mijamo ka vite nonovio jua juñaku ruei. Teta naio ga takurano napano mijikia batitig kiniou ka nobe kei, a kiniou napano nobe kenerinio, kiniou ga takurano napano nomijikia batitig naio, ka naio be kei. Kiniou bija nalo napano nebijauiã bulaglo abe kanaku, ka mia nesiloglog Teta kalo ka mia avarkar tinielo eaio, kumemi naruei numijikia batitig naio ka naio be karimememi.”

<sup>23</sup> Naurei Yesu barḡilig ka kiano naiaga-goano memedu nalo, naio mijualuva banlo bare ka nalo ga ajogio, naio berinavo

“Atua mila bo ban kamiu, napano kumijikia kuvial vite nalo na. <sup>24</sup> Naverialiano telabo a parinio tubo telabo re nua napano ajidom mēlea ka aial vite nalo na, mia maka aial kija bogo tai, a abijuku kouo ka ajog vite nalo na bunu, mia maka ajog kija leleio.”

#### *Jamerijiano na toro na vio Sameria tinien miãa toro Ju tai*

*Mataiu 22:34-40; Mak 12:28-31*

<sup>25</sup> Mia bogo tai bereio, toro tai napano be rñasou bo ka tuboiano, naio jidom rijukujuku Yesu ea vikadeniano tai na kirisikili, naruei naio jumolu ju, bika den Yesu, berinavo “?Naverloglogiano, verenio kiniou nesidom nalavon ka navokar meuliano napano maka ve jukuti nene, mia kiniou monoka nala tuñabe?”

<sup>26</sup> Naruei Yesu berdoḡe bano, berinavo “?Mia kiado Niosi Lu naio ber venia ka tivelinio na? ?Jau kobuluku komialio ber juñabe?”

<sup>27</sup> Ana na toro neibano berdoḡeio berinavo “Niosi Lu ber jibe nei, berinavo: Atua Soḡi napano naio be kiamo Atua, jau monoka tiniemo tii naio, kodu naio to tukamu ea kiamo iviso momou, a ea kiamo meuliano momou, a ea kiamo sikiliano momou, a ea kiamo jidomiano momou, a jau monoka tiniemo tii nalo napano aju vaataro kaso, jau kovijuku rivu kalo, tavukia napano rña tiniem jiio.”

<sup>28</sup> Ana Yesu berkanio, berinavo “Nao, jau kober kirimemedu tanea na. Mia ver jau kala tibe na, mia jau kovokar meuliano na kojomãa kobikanio na.”

<sup>29</sup> Mia tete nei nao mijikia ka naio maka tonãa rila rimemedu tibe na, mia naio jidom rila soḡeiano, naio bika den Yesu, berinavo “?Ana be kei nalo napano rña ajuju vaataro ka kiniou, napano kiniou monoka nala rivu kalo?”

<sup>30</sup> Naruei Yesu berdoḡe kiano vikadeniano nei ea jamerijiano tai, napano naio ber jibe nei berinavo: Toro tai, bogo tai naio juvan vio Yerusalemo naio jo miel batove yako Jeriko. Naruei naio joñãa miel ba bokar vio kouo tai, naruei naio miilo ka taara tai na tomu nalo na vinuano, napano abiako eaio, amue tanea, naio, abar bulag nonovio kiano saba nalo, ana aburo kilkil, napano ajuvan toro nei rñariulu mijoru joã kiano rñarabo togio.

<sup>31</sup> Ana kanado toro lu tai, naio bunu jo miel naio iorou kanio ea rñarabo nene, ana bogo na naio binimei vaataro kean toro neibano, naio ju ḡilig kanio jel ea ikimãrabo tivelinio ka ga bano, naio miel barlaka denio ban ga. <sup>32</sup> Ana iorou kanio, ana toro dolu tai miel binimei. Naio be

Livai nalo tai na, napano ajumã amila inãuano nalo nonovio ea Atua Kunuano Lu, mia bogo na binimeï bokar toro nei, naio bunu maka sidom rijai naio, naio miel ga barlaka ban ea ikinãarabo tivelinio ban ga. <sup>33</sup> Mia iorou ka bereio, toro dolu tai, napano naio jo miel ea kiano burutili m̃arabo na, naio binimeï. Naio be tete re Sameria tai, naruei jibe napano romijikia, nalo nene abe bilbilu va toru naliko kito kulo Ju nalo. Mia bogo na naio binimeï bokar vio na, mial toro na m̃ariulu mijoru mon ea m̃arabo, mia tinien miaia naio toro.

<sup>34</sup> “Mia mio binimeï vaataro keanio, ana jekon batitigio kiano niajebijo nalo, a mia titikivaka ealo, a bitakar batitiglo bo. Naruei naio burular toro nene jumolu, midu jotano mon mave ea kiano togki taakano, ana miel ka bija naio bano-o abinimeï abokar vio tai napano be yimo na jilimebiano tai joaio. Ana naio buru toro neibano ba joomo ea vio nene, miija batitig naio bo mia bo laka.

<sup>35</sup> “Mia kavijo, ana naio bar kanano puruveru tai, bar ban boru na yimo na jilimebiano nei, berenio berinavo ‘Kinioi monoka naven ea kanaku m̃arabo, mia toro nei toa jurnãamo beamu vo. Kovitakar batitig ka vite nonovio, a verenio puruveru na rivare re, mia kinioi nevitiï bereio ka bogo na nemei nei bereio ea kanaku ieliano.’”

<sup>36</sup> Naruei Yesu bika den toro neibano bika vikadeniano nei denio, berinavo “? Jau komial tukunu nei jurnãabe? ?Ka nalo tolu neibano amiel ea m̃arabo napano toro nei jo mon eaio, na vabe kalo mila banio jibe ka napano naio be toro tai napano jo vaataro ka naio?”

<sup>37</sup> Ana na toro nei berinavo “Peli nana tinien miãiao.”

Mia Yesu ber ka bereio, berinavo “Ee naio nao, a jau bunu, jau kava kataki kiano bajago novo na.”

### *Marita naio Mere*

<sup>38</sup> Mia ka bogo na, Yesu naliko kiano na-iaagaoano nalo ajumã amiel abavin mave Yerusalemo, naruei nalo amalmaluvo ea m̃arkomeli na telisu na Betani, ana ea vio na tira na Marita naio buru Yesu ban ea kialo vonuo. <sup>39</sup> Mia bogo na Yesu ba jo bijalo, ana Marita nene kuluene tai, siano Mere, naio jotano kamu ka Yesu jaano, naio jomã miagago ka kiano verloglogiano nalo. <sup>40</sup> Mia ka bogo na, Marita maka tovon ka riagago, naio jomã bukudeli toru ka rila vite nonovio riviniu tu vatitig rorea Yesu, a naio jo jidomii bijovijon ka inãuano nalo nei. Mia iorou kanio, ana naio binimeï mial Mere naio

jomã jotano, naio jomã miagago ka Yesu, naruei naio ber ka Yesu, berinavo “Tubo, kulueku na naio jotano kurano ga jurnãabe na, napano kinioi ga takurano nojomã nomila vite nonovio nalo. Peli jau maka koto kovitilubar koviobo, mia bo kanio jau kover ka rimeï riija kinioi.”

<sup>41</sup> Mia kiado Tubo berdoþe naio berinavo “Marita, jau kobe tira tai namã koje kojidom bijovijon vite m̃ele, a jau kojomã komijog bova m̃ele ka vite telabo na jibe na. <sup>42</sup> Mia be vite takurano ga jo ka mia jau kosidomii ve temi kanio, a vite nene Mere nei naio jo mileal ruei ea kiano meuliano, mia maka nejikia nodu lario den naio bereio.”

## 11

### *Volkouano namã Tubo berloglog ka kito Mataiu 6:9-13*

<sup>1</sup> Bogoti tai, Yesu ba bolkouo ea vio tai, avona bisi, ana naio binimeï bereio, ana na kiano naiagaoano nalo tai bika denio, berinavo “Tubo, bo laka ka ver jau kalavon ka koverloglog kumemi ka kumemi bunu nuvijikia nubolkouo, tavukia na Jone berloglog kiano naiagaoano nalo beamu ka abolkouo tavukia naio.”

<sup>2</sup> Ana Yesu mijamo kanio, naio berinavo “Mo, ver kamiu kuvisidom kubolkouo, kamiu kumijikia kuver tibe nei, kuverinavo:

‘Karamememi, memedu ga ka kumemi nuvitu nuvatove ka siamo lu.

Kumemi nubolkouo ka kiamo nave-natuboiano rimeï.

<sup>3</sup> Kumemi nubika denso ka kavar simemi sinaniano na banei a legiano nonovio.

<sup>4</sup> A koviekokoa kumemi rivior kenememi kariano nalo, bior namã kumemi numituãa nubiekokoa nalo namã abijuku bova ban kumemi.

A jau kotuvan re vite nalo alavon kumemi m̃ele.’”

### *Jamerijano na vikaniano na vite*

<sup>5-6</sup> Mia Yesu naio jidom ka nalo monoka amerou re ka avika vite den Atua, naruei naio ber jamerijano tai banlo, berinavo “Verenio ka bogiano vio vare, keiilo ka kanamo bilbilu tai napano miel binimeï boru ea kanamo vonuo. Mia samo sinaniano maka bunu tai rito, mia monoka jau ketikiti kavan ea tai na kunuano jo vaataro keanso, monoka kovika sikili denio, kover ‘Koig, bilbilu tai miyotuba ka kinioi vonganei ga, mia kinioi nebe deio riano. Maka bunu ve titai leleio ka mia nomijikia nodu rivan naio ka mia senio. ?Jau samo sinaniano tai beva ju kovio

napano komijikia kajamo kanio van kiniou beamu vo?"

<sup>7</sup> "Mia juñabe, rojidomii rober ðeli mia toro na mijikia riverdoðe, verinavo 'Ee koig, jau kala mñlea re kiniou tibe na. Jau keialio, kumemi numituboniko ñaratavo ruei, mia kumemliko kiritete nalo, kumemi numitua mememi jogu nalo ruei, naruei maka bunu nejikia notumolu bereio.' Mia toro na maka rijikia river tibe na."

<sup>8</sup> Mia Yesu naio jusol tukunvano, ana naio ber kalo, berinavo "Peli bogo tealo toro tai rijikia sidomii iakurano ka rijiaso bior jau koje vaatara ga ka naio. Mia ver jau koiñau re ka kovivika sikili denio vano-o, mia monoka sian vite venia napano ña koje kobivika banio."

*Yesu berii navikadeniano na vite den Atua*

*Mataiu 7:7-11*

<sup>9-10</sup> Mia tibe ka kiano jamerijiano Yesu ber bunu kalo berinavo "Toro na ver joña bika vite, julaka mia naio mijikia rijeio, mia verenio toro na joña jirag vite julaka, mia naio mijikia rialelio, mia ver toro na joña miniania ñaratavo julaka, mia ñaratavo nene mijikia rivetavo kanio. Tibe na, mia kamiu kumijikia kuvar vite nalo naña kumituña kubika denio, a mia kamiu kuvileal venia na kamiu kumituña kumisiragio denio, a ñaratavo naña kumituña kuminianiaio mia naio rivetavo ka kamiu. <sup>11</sup> Ver kenerimo tai siserio, naio rivika niado sesa na jo, mia maka kejikia kodu maro tai vanio, <sup>12</sup> ðeli na ver rivika boboti tu na jo, mia maka kejikia kodu buruolu rivan naio ka senio. <sup>13</sup> Be riano ka kamiu kube tomu na kirivova ga nalo, mia maka kamiu tai mijikia rila tibe na, kamiu kumitu kumisaaro julaka ga kaña kumisian tonovo nalo ban kenerimiu nalo. Jibe ga na, bogo napano kamiu kumituña kubika den karamemiu na tiniabene, naio jaaro ga ka sian Niununo Lu van kamiu kenerinio nalo."

*Aberenio Yesu miñau ea Siñaro kiano moroano*

*Mataiu 12:22-30; Mak 3:20-27*

<sup>14</sup> Ana iorou kanio, ana aburu ñarabo ka toro tai na siñaro ban ea naio binimej ban Yesu, siñaro nene mila toro nei maka ril, mia Yesu mijidiglar siñaro nene denio, naruei naio mil bo bereio, mila ana nalo napano amial vite nei amiilo toru laka.

<sup>15</sup> Mia nalo tealo amijoku, naruei nalo aberii niegeniege Yesu, nalo aberinavo "Tete na naio joña mijil bulag siñaro nalo ea ga moroano na siñaro nalo kanalo

tubo, napano siano Belsabel, naio mijamo ka ban naio." <sup>16</sup> A nalo tai bereio, ajidomii bova bunu ka Yesu, naruei nalo ajuña amilavon naio, nalo ajidom ala luñiluñi naio ka naio rila kijokijo tai ea moroano na vio mave ka amijikia aialio.

<sup>17</sup> Mia Yesu mijoglubarbar kialo jidomiano nalo, ana na naio berinavo "Ver tubo tai, kanano tomu nalo avuruburelo, napano mia togio atuðelo ka togio dolu, mia tubo nene kanano iñauano nalo monoka atibirbil. A ver vonuo tai, atuña avuruburelo napano togio sidom rijil togio dolu, mia nalo na maka ajikia atu rivu bogo tai. <sup>18</sup> ?Jibe ga na bunu, ver siñaro nalo na Setano kanano atuña avuruburelo ruei, ana mia navenatuboiano na Setano kanano tumolu tu tuñabe? ! Ana kamiu kumituña kuberinavo jibe na naruei, ka kuber kiniou nojoña nemijil bulag siñaro dolu nalo ea moroano na buruñara siñaro na Belsabel kanano, mia maka rijikia tibe na leleio! <sup>19</sup> ?Mia ver tibe ka naña kamiu kuberenio, juñabe naruei ana kam tealo bunu ajuña amijil bulag siñaro? ?Kei naio mijamo ka moroano na banlo, ðeli Setano bunu ga bo? Bo ka ver kenemiu naiagagoano nalo naña ajuña amijil bulag siñaro nalo ajog kenemiu iliano nalo. <sup>20</sup> Mia makanio, kamiu kuber nina maka rimemedu na. Mia kiniou nojoña nemijil bulag siñaro nalo ea moroano na Atua juñano ga, mia vite na berialio ka Atua kanano navenatuboiano naio ju iviso ka kamiu ruei.

<sup>21</sup> "¡Kamiu kuvialio! Jibe kanio napano ver torkouo tai, naio rivar kiano saba na mira nalo, a tukuku vatitig ka buruñara kunuano. Naruei, vite nalo na toru nei kiano aju bo ga jouro ea kanano burusio. Naina naruei Setano kiano iñauano jibe na naruei. <sup>22</sup> Mia ver torkouo dolu tai rimej napano naio ðirinio jikili loa naio, mia naio rila mira kanio-o tuvulu Setano, ana mia naio mijikia rivar bulag vite nalo na mira na be kanano, napano beamu barkar tinieno eao, a naio mijikia rivar vite nonovio napano ju jouro ea burusio na torkouo kanano, tan kalo van kanano tomu nalo.

<sup>23</sup> "Toro napano maka takisor kiniou, naio jo berbure kiniou, a toro na maka riñau vija kiniou ka kumemi nuvuru kanaku tomu nalo ameji vio takurano, naio joña mijil dedade ealo avebe terakurano."

*Niununo va naio mijikia binimej bereio Mataiu 12:43-45*

<sup>24</sup> Ana Yesu ber bunu, berinavo "Bogo tai, bogo naña amijil lar niadu den toro

tai, niadu nene mijikia riva yeturu ka sir-ago kunuano dolu tai. Mia ver rileal re tai, mia naio riverinavo 'Ee, mia nalavon ka navan bere ea kunuaku moruo na beamu vo.' <sup>25</sup> Mia bogo napano naio binimei, mia rileal ka yimo nene meravo bo jo, abar batitig vite nene nalo biniu ju memedu bo ruei. <sup>26</sup> Ana mia naio rivan rivuru niadu ve aluo dolu napano nalo abova loa naio lie vo, amei vija naio, ka na mia nalo ava joomo bereio ka atua toro nene. Ana toro nene, beamu kiano meuliano bova, mia iorou kiano meuliano bova bova laka."

*Marabo na avokar saariano na be riano*

<sup>27</sup> Ana ka bogo na, tira tai jo naliko nalo napano ajurña amial vite nalo nei, napano rña amijog Yesu kanano iliano, naruei tira nei jaaro rñele kanio. Mia naio miaga rñerere laka naio berinavo "¡Aiou liki! Konio mo napano bariso, midu yu banso, Atua kiano ilivuiano ve toru laka toa naio, napano bar tete tai jibe ka jau." <sup>28</sup> Mia Yesu berdoŕe ban naio, berinavo "Nao, nina be riano na, mia kiniou neber ka jau ka mia Atua kiano ilivuiano rimei ve toru lie bereio vo van toro kei napano naio monmonea Atua kiano iliano nalo, naio mila venia napano naio jorña berenio."

*Tomu na ajidom aial kijokijo*

*Mataiu 12:38-42; Mak 8:11-12*

<sup>29</sup> Ana ka bogo na, tiniobi nalo narña amiagago ka Yesu nalo aju abinimei telabo lie vo, mia Yesu naio mijikia ka nalo miroano kalo nalo abinimei ka ajidom aial kiano kijokijo nalo ga, ana naio mil banlo, berinavo "Kiniou nemial jibe ka tomu nalo na taara na kenemiu banei abova laka. Nalo aju ajidom aial kijokijo toru laka, mia makanio, mia Atua maka rijikia sian kijokijo tai leleio vanlo. Mia naverialiano Jona, kiano kijokijo re nua ga, nina ga mia amijikia aialio. <sup>30</sup> Atua miila Jona, jibe ka kijokijo tai ban nalo na vio Nineva re nua ruei, ana naio miila bunu kiniou Kulorinio Kenerinio nebinimei jibe kijokijo tai ban kamii na vonganei.

<sup>31-32</sup> "Mia kulo Nineva re nua napano amijog Jona kiano iliano nalo, abiliglo ka bogo nene, a mia nalo na atumolu ea legiano na tibureiano, mia aver bulag rimemedu kenemiu torokoriano nalo, bior be toro tai napano naio loa laka ka Jona naio jo bija kamii, mia maka kuvilig kamii.

"Nanua bogo tai bunu tira na toru tai na naio be parinio tubo tai napano naio jumolu ea kiano buruvenuo, napano jo koalabo laka, naio batove binimei ka rijog tormoruo parinio tubo Solomon kiano

ilimasosouano. Naruei tira na toru nei bunu mia naio tumolu tu ea legiano na tibureiano, naio river bulag rimemedu kenemiu torokoriano nalo, bior be toro tai napano naio be masou loa Solomon naio jo bija kamii, mia kamii maka kuvisidom naio leleio."

*Kijokijo juo ea tivelinio na yulu*

*Mataiu 5:15, 6:22-23; Mak 4:21; Luka 8:16*

<sup>33</sup> Mia Yesu ber bunu, berinavo "Bogo na ver rejelan yulu, kito maka retelan ka mia rava roduvanio toa bulutanbo tai ea borotano, ŕeli na mia kito reivekoio ka basaro tai bereio, mia kito rejelanio ka mia reiveio takilele mave, ka mia ver toro na rimei mia mijikia rial ka yulu mereralii vio nonovio biniu."

<sup>34</sup> A Yesu ber bunu, berinavo "Toro mirano naio jibe ka vio takurano napano yulu mijikia mereralii binimei joomo ea mokotenano. Tibe na, ver miramo rimeravo rivu, rivitii batitig vite nalo, mia tibe ka napano tiniemo bujo magmago ka yulu. Mia verenio miramo rivova, tinie jii vite nonovio narña jorña mialio, mia jibe kanio napano tiniemo bujo magmago ka melijokouo. <sup>35</sup> Tibe na, mia kamii monoka kuvitikar rivu, ka yulu napano joa tiniemiu rimei re bunu tibe ka melijokouo bereio. <sup>36</sup> Mia ver tiniemiu rivujo ka yulu tulaka narariga, napano maka ve melijokouo tai ve telisu toaio, mia kenemiu meuliano rimerera vatitig rivu, rudulii vatitig vio nonovio rivu."

*Yesu mil jikili ban navurim̄araboiano na natuano nalo*

*Mataiu 23:1-36; Mak 12:38-40; Luka 20:45-47*

<sup>37</sup> Mia Yesu mil ban tiniobi nalo bano-o, naruei Varisis tai napano jorña miagago kanio ber ka Yesu berinavo mia rivuru naio rivan ea kunuano, ka rila sano sinaniano tai. Ana na Yesu ban bija naio, mia bogo na sinaniano amiomon ju, Yesu ba jotano ea vio na sinaniano. <sup>38</sup> Naruei ka bogo nene, Varisis nalo abokar jikili kialo tuboiano tai ka toro monoka takii m̄arabo tealo ka rña sekon jurña karina mijikia sinano. Mia Varisis nei naio jidom ber Yesu naio be toro lu tai, naio monoka rila tibe ka napano kialo bajago na jikili nei berenio, mia bogo napano naio mial ka Yesu maka sidom bijon ka naio rilao, naio miilo toru laka kanio. <sup>39</sup> Ana Tubo mil ban toro nei, naio berinavo "Kiniou nemijikia kenemiu bajago kamii Varisis nalo ruei. Kamii tiniemiu jii rñelea ka rña kumisekon vatitig rivu darariga kenemiu baja nalo

a kenemiū baju nalo, ana kumituŋa kube ŋarou kanio, kumituŋa kuberianaŋa kamiu kumeravo, a kube lu. Mia buruŋara niamiamo na bijurukar kamiu kia navo, bior kenemiū iviso nalo abujo magmago ka ŋa kumijukubin toro, a kumila kiki toro, a bajago nalo na kirivova jibe na. <sup>40</sup> ! Ai, abe mia ŋa kuviavovu ŋelea re tibe na! ? Kamiu maka kuvitilubar ka Atua naŋa jii vatavio na vite nonovio, naio jii bunu vajoomo na vite nonovio, mia bo laka ka ver kamiu kuvilakon nono tivelinio na kamiu rimeravo rivu ve riano, vatavio a vajoomo bunu. <sup>41</sup> Tonovo nalo naŋa kamiu kumituŋa kumisonlo toru bogo nonovio ban ea kenemiū baju nalo a bija kenemiū baja nalo, ver kamiu kuvituŋa kuvilavon ka ŋa kuvio ka kija ga rivan talinŋasa nalo ga, mia rivu. Ver tibe na, ŋeli mia kamiu kuvial ka kenemiū vite nonovio nalo a mei rimeravo vatitig ruei, ana mia ŋa kumila bijon re bunu kenemiū bajago dolu nalo.”

<sup>42</sup> Naruei Yesu berii bajago nalo na jubol-uboiano na navuriŋaraboiano na nalot-  
tuano nalo ba lie vo, naio berinavo “! Kamiu kulo Varisis, aua! Kamiu kumila bulag kamiu toru laka, mia rivova laka van kamiu. Kiniou nemijikia ka kamiu kumituŋa kubitkar batitig bo daŋariga, ka ver kubar semiu ŋarsiniano duelimio, mia monoka ve takurano rivan ea Atua kunuano, tavukia na tuboiano naio joŋa berenio, a kumituŋa kumila jibe na ka saba nonovio na be kenemiū, ba bokar bunu ŋasebitu sesa nalo a vite nalo bunu na jibe ka ŋarsili nalo. Mia vite nalo na tomormoru naŋa tuboiano berenio, kamiu maka kuvisidomialeio leleio, jibe ka naŋa ber monoka kamiu kumemedu rivu, a kamiu monoka tiniemiū tii Atua a kulo dolu nalo bunu. Ver kamiu kuvisidom kuvokar sikili vite nalo na tertelisu nei, naio bo ga, mia vite nalo na tomormoru nei naruei naio bo ka kamiu kuvituŋa kuvila ruei, mia maka lele kuvilaio.

<sup>43</sup> “!Kamiu kulo Varisis o! Kamiu kumila lelan kamiu toru laka, mia rivova laka van kamiu. Joomo ea yimo nalo na volkouano, kamiu kumisidom ka bogo nonovio kuvit-  
tutano ea vio na be tomu na tortoru nalo jelelo ga, a verenio kuviel ea tomu nalo miralo, kumisidom ka avatove ka kamiu, a avio vatitig kamiu, a averinavo ‘Aiou, naverloglogiano novo, kavijo bo!’ <sup>44</sup> Mia ve kirivova laka rivan kamiu bior kamiu kube tekurano ga, kumitavukia ŋartanbo moruo nalo na tinielo bobogia ea ruei, amiel ŋilinio mave ea ga, maka bunu ve tinielo ka vite jono tai napano menunu mon tano nei.”

<sup>45</sup> Ana ea bogo na, toro tai napano naio be masou bo ka tuboiano, naio bunu joŋa miagago, ana mijog jibe ka Yesu kiano iliano bokar naio bunu bija nalo napano amirŋau jibe ka naio, ana na naio berinavo “!Naverloglogiano, kiniou nomijog jibe ka kojidom keil niegeniege kumemi bunu!”

<sup>46</sup> Ana Yesu berdoŋe, naio berinavo “! Nao-o, mia rivova van kamiu tomu nalo natuboiano bunu! Kamiu kumituŋa kubitiri bulag bereio tuboiano sesa nalo tivelinio ka nalotvano bogo nonovio, nalo ajibe ka vite na teremi napano kumivon kakarlo ea tomu nalo taakalo ka monoka avarlo, mia kamiu kumitu jibe na ga, maka kuvikululu ka ŋarjukujumemiū tai leleio ka rilavon ka riijailo. <sup>47</sup> Mia rivova van kamiu, bior kamiu kumituŋa kumiyovovua batitig ŋartanbo na naverialiano nalo na Atua kiano, mia kamiu kubevirare ga ka korobimiu tomormoru nalo re nua, napano nalo naruei amuebinvin naverialiano nene nalo aŋarŋaro. <sup>48</sup> Kamiu bija nalo nei kubare ga, bior nanua, tomormoru nalo nei amue naverialiano nalo, mia baneŋ kamiu kumisaaro ka kialo inŋauano nene, kumitusolio bereio napano ŋa kumituŋa kumiyovovua martanbo nene nalo.

<sup>49</sup> “Kamiu kumitibe ka ga napano ilimasosouano na Atua kiano ber nua, naio berinavo ‘Mia kiniou neiila kiaku naverialiano nalo a atevi nalo aviedu ealo, mia ala lelanlo, ŋeli mia auebinvinlo aŋarŋaro.’ <sup>50</sup> Iliano nei sano nioti nene ber mia kamiu naruei kuvokar vironiano naŋa korobimiu nalo re nua amuebinvin naverialiano nonovio nalo, jikar ka bogo na tikariano na yetemeriba nei. <sup>51</sup> Nina jikar ea Epel, binimeŋ bokar Sakaraia, napano korobimiu nalo amue taŋaria naio iviso ka boda bija Vio Lu joomo ea Atua Kunuano Lu. Riano, kiniou neber ka kamiu nei, ka vironiano na burukija na Atua kiano naverialiano nalo jua kamiu na vonganei.

<sup>52</sup> “Nao, mia ve kirivova lie vo van kamiu tomu naŋa amijikia batitig tuboiano, bior kamiu naruei kumidu van navetavioano na ŋaratavo na jikiano, ana kamiu maka bunu kuvituŋa kuva joomo eaio, a kamiu kumituŋa kumituko ŋarabo ka tomu dolu nalo naŋa ajuŋa amila vio ka ava jouro.”

<sup>53</sup> Ana Yesu ber iliano nalo nei bisi ana naio batavio den yimo neibano, naruei naverloglogiano na tuboiano naliko Varisis nalo tinielo bitunu tanea ka naio, napano tiniel mimi laka. Ana na nalo abie sosor Yesu daŋariga, nalo ajuŋa abika iliano nalo a vikadeniano nalo na jikirkili banio, ka alavon ka ayukuru naio a ka rila naio river iliano tai na maka rimemedu.

<sup>54</sup> Amiliviko Yesu jibe naio be temeul deden tai, bior ajidom ka aleal kiano iliano nalo tai ka mia amijikia atibure naio riviorio.

## 12

*Iiluklukuano nalo mia amalmaluvo amei medave*

*Mataiu 10:26-27*

<sup>1</sup> Ana na tiniobi nalo ajumã abinimei ea Yesu keano vo, ajovulu menu na tomu nalo miroano. Mia bogo namã abinimei vio takurano jibe na, vio telisu garuei, napano mã ajumã amivinkarlo ga. Ana na bogo na Yesu maka ril vano vo, mia naio mil ban kiano naiagagoano nalo jukamu, berinavo "Kamui monoka kuvitkar vatitigio ka Varisis nalo kialo bajago va nalo, bior nalo ajumã amil ka kuluniolo ga, ajumã amil moruo mia amila sibi ga. Kialo bajago va nalo nei amijikia amaluvo rivokar a rila bulag toro dolu nalo, jibe isi na joko telisu ga mia kirisopeli ba miãiau bokar joko nonovio. <sup>2</sup>Vite nonovio na bova namã tomu na jibe na ajumã amilaviano, ðeli namã aber luklukua ga, mia amalmaluvo ea vio medave navo, ka mia aviniu ajikiaio. <sup>3</sup> Iliano vaio namã toro jomã berenio ea meljokouo, mia monoka ajogio bereio ea legiano, a vite nalo namã toro jomã mijuvaluva kanio ea kunuano ga, mia aiaga m̄erere bereio ea tomu nalo miralo, ka mia aviniu amijikia ajogio."

*Yesu kiano naiagagoano monoka rimerou re ka tomu nalo*

*Mataiu 10:28-31*

<sup>4</sup> Ana na Yesu ber ka bunu kiano naiagagoano nalo, naio berinavo "Banalo, kiniou neber ka kamui ka kamui kumerou re ka nalo namã amijikia aue tamãria mokotenemiu nalo ga, karina mia maka bunu ajikia ala titai bereio ka niunumiu nalo. <sup>5</sup> Mia nejidom neil vatitig rivan kamui ka mia kumerou ka toro kei? Mia kamui monoka kumerou riano ka Atua ga, napano mia naio mijikia rila niabemiu rimãro beamu, karina mia mijikia rivu niunumiu bunu rivan ea vio namã ajog rivova eaio. Lerinio, toro na naruei kamui monoka kumerou ka naio. <sup>6</sup> Mia ver kumerou kanio, mia kamui maka bunu kuvijikia kumerou ka todolu bereio, bior Atua jomã bitikar kamui, naio jo jidomial kamui. Kuvisidomii von menu sesa napano kirijako. Nalo miroano laka janea vio ga, ajibe ka soro ga, aþilivili kalo veru telisu ga ka kirijako jimo, mia Atua jomã tinien maio kalo abeve terakurano damãriganã, naio maka tinien ribobogialo.

<sup>7</sup> A vijumiu nalo na ea pariparimiu bunu, miroano laka, mia naio buluku nonovlo beve terakurano ga. Mia Atua naio jo mial kamui kubo laka jovulu kirijako nalo nei, naruei mia naio rivitkar vatitig kamui rivu ka vite nonovio na kenemiu meuliano."

*Toro na berial ka naio be Yesu kiano Mataiu 10:32-33, 12:32, 10:19-20*

<sup>8</sup> Ana na Yesu berenio, berinavo "Kei namã berial kamu ka tomu nalo miralo ber naio be kanaku toro tai, mia kiniou Kulorinio Kenerinio, kiniou bunu neverial siano van nailiano nalo na mave ka toro nene be kanaku. <sup>9</sup> Mia toro kei namã berial kamu ka tomu nalo miralo ber naio maka ve kiaku, mia kiniou Kulorinio Kenerinio kiniou bunu neverial van nailiano nalo na mave never toro na naio maka ve kanaku.

<sup>10</sup> "Kariano nalo bija ilivovaiano nalo, bija iliano nalo namã mila lelan kiniou Kulorinio Kenerinio, Atua mijikia riviekokoa toro riviorio, mia toro na ver mila lelan tolu na Niununo Lu, beri Niununo Lu kiano imãuano, berinavo Simãro ga mimãukanio, toro na jibe na, Atua maka rijikia riviekokoa bogo tai leleio.

<sup>11</sup> "A verenio bogo tai, tomu nalo tinier kamui, mia avan ea ilivatitigiano ka kamui. Mia amijikia avuru kamui kuvan kuvitumolu kuvitu kamu ea tomu na tortoru na yimo na volkouano nalo miralo, a ea komeli bunu, mia kamui kuvisidomial m̄ele re ka mia kuverdoþelo tumiabe, ðeli na mia kuver iliano na vabe vano. <sup>12</sup> Rimonloglog aura nei ga, mia Niununo Lu ga rijai kamui, ka riverloglog kamui ka iliano na vabe na mia kamui kumijikia kuverenio."

*Jamerijano na toro be sanibaiano napano maka sidomii vatitig kiano meuliano*

<sup>13</sup> Naruei tiniobi nei napanoaju nei nalo tai, naio bio ban Yesu, berinavo "Naverloglogiano, kuruaku naio jomã mijukubin kiniou-o mia, naio maka tomã tan ka batitig karamememi jajuãiano rivijia kiniou. Bo kanio mia jau kover kanio ka naio rila rive verare ga vija kiniou."

<sup>14</sup> Ana na Yesu berdoþe, berinavo "Ai, abe vite na maka ve kanaku ka nalaiio. Kiniou maka nove toro nana mia netibure kamui." <sup>15</sup> Jibe na naruei ana na Yesu maka rila tibe ka na kema nei naio berkanio, mia naio jian iliano tai tivelinio ka sidom m̄elea vite nalo. Naio berinavo "Kamui monoka kuvitkar rivu, maka rivu ka kuvitumã kuvijoku m̄ele ka kulo dolu



nalo, kumisidom mēle ka kuvar vite nalo na be kialo. Kiado meuliano maka toa vite ve telabo nalo napano na roju rabario, mia kiado meuliano jikili jua vite dolu.”

<sup>16</sup> Mia Yesu jusol kiano iliano ea vio na lie vo, naio ber jamerijano tai banlo, naio berinavo “Toro sanibaiano tai kiano borotano toru laka, a bo laka, naruei kiano tiniavio nalo abar marimeuano toru ealo. <sup>17</sup> Mia tete nei naio mial sinaniano nalo nei, naio maka bunu rijikia mia rila tumabe naruei, ka mia rivar vatitig sano sinaniano nalo nei tua vio na vabe, bior kiano yimo na varvatitigiano na sinaniano bija kiano vio dolu nalo abujovujo nonovio ruei. <sup>18</sup> Ana na kema neibano, berinavo ‘! Mia noue bulag kanaku yimo na varvatitigiano na sinaniano moruo nalo nei, ana mo nomijikia noimāu kanio na be terivou dolu nalo bereio, na mia nalo ave tortoru lie vo, na mia rivare ka sinaniano a vite dolu nalo na miroano nei kanaku. <sup>19</sup> Mia bogo na ver noimāu kanio riviniu, mia kiniou naial kiniou tibe ka kiniou riano, kiniou nobo kija naruei! Riano ga, mia kiniou nojog rivu! Mia kiaku saba na miroano nei, mia nesenilo rivano-o mia avitkar vatitig kiniou rivano-o rivokar yuka ve miroano. Ka bogo na, mia noimāu lele re bunu mia nesen vaio na nojidom, a mia nomunu uei tibe na ga, mia notoa meuliano nabo namariga na.’

<sup>20</sup> “Toro nei naio jomā jidom jibe na bano-o, mia naio maka rijikia ka Atua berii ruei ka mia ril vanio naruei, naio berinavo ‘E kodovo, komiavovu ga na, bogiano nei ga, kiniou nojidom nodular bereio kanamo meuliano denso. A vite nalo na miroano namā komimāu bijon kalo na, namā jau komiobijilo be kanamo na, mia ave kei kiano bereio liki na?’”

<sup>21</sup> Ana na Yesu ber kalo, berinavo “Mia tibe na naruei rivar tomu nalo namā ajumā abarbijii kialo saba telabo, napano abe tomu na sanibaiano tivelinio na yetemeriba nei, mia maka leleio ave sanibaiano tivelinio na saba nalo na ea Atua.”

*Yesu berlubarbar banlo jumabe ka toro namā jo jidomii mēlea kiano meuliano Mataiu 6:25-34*

<sup>22</sup> Ana na Yesu ber ka bunu kiano na-iagagoano nalo, naio berinavo “Kar tena, kiniou naber ka kamiū, ka maka rivu ka kenemiu jidomiano rivujo mēle ka imāuano na kuvitkar kamiū ga, ka na mia mā kuvivika, kuverinavo ‘?Mia vio na vabe na mia kito romijikia realeal sinaniano?’ Peli na ‘?Mia rovokar kulumārauo na royaio tumabe?’ <sup>23</sup> Jidomiano nalo na maka rimemedu, bior kenemiu meuliano naio bo loa ka sinaniano, a niabemiu naio

bo loa ka kulumārauo. <sup>24</sup> Kuvisidomii von menu maina nalo namā ajumā amierier janea vio nalo na. Nalo na maka mā aimāuka kialo tiniavio, a maka avavenē ka avarbijii sinaniano rimei vonuo, a maka avar batitig salo sinaniano nalo tua vio nene tai. Mia Atua jomā baganlo, a ea kiano vitiano, naio mial kamiū kubo lie loa ka menu nalo, ana mia naio rivitkar kamiū rivu laka tovulu nalo. <sup>25</sup> ?Kamiū kuberiamā toro napano jomā jidomii kiano meuliano toru laka naio mijikia rila kiano meuliano na bulati na rimei vetebievi kija bere ve telisu? <sup>26</sup> Makanio, maka tibe na, mia bior kamiū maka kuvijikia kuvila titai na telisu jibe na, bo kanio kamiū kuvisidom bijovijon re vite dolu nalo na ea kenemiu meuliano nalo.

<sup>27</sup> “Kuvisidomii von buruniegnegi novo nalo namā ajumā amilluo janea vio na. Nalo na maka mā atu aimāu a maka mā atulu mālo kuluniabele nalo. Mia kiniou naber ka kamiū, Parinio tubo Solomon re nua, napano naio be nasanibaiano laka, a naio be kiano saba nonovio, kulumārauo nalo namā miyaio maka rivar niogniogu na bo tibe ka maniegnegi nalo nei. <sup>28</sup> Maniegnegi nalo namā abe tena bogoti takurano ga, mia beni ana aisebilo ea sebi, mia Atua jo mijovovalo batitigo abo laka. Jumabe, kuberiamā Atua maka rijikia rivar kulumārauo van kamiū? Kale-likī, kamiū na maka kuviekar naio sikili leleio a!

<sup>29</sup> “Bior vite nalo na, mia maka rivu ka kenemiu iviso rivujo ka jidomiano nalo na, kuverinavo ‘? Tumabe ana na mia rosinan, a romunu, a realeal kulumārauo?’ Mia maka rivu ka kuvitumā kuvisidomii bijovijon mēlea laka tibe na. <sup>30</sup> Ierinio, tomu nalo reraio na buruvenuo nonovio na yetemeriba neibano ajumā ajidomii mēlea vite nalo jibe na bogo nonovio ga, mia kamiū, karamemiu naio mijikia ruei ka monoka kuvar vite nalo na jibe na. <sup>31</sup> Tena be moti ka mia kuvisidomii ve toru ea kenemiu iviso nalo, naio be Atua kiano navenatubioano. Mia verenio kuvila tibe na, ana na mia naio rivar bunu vite dolu nalo nei rivar kamiū. <sup>32</sup> Ierinio kiaku nunu sesa nalo, karamemiu naio jidom toru ka rijamo ka kamiū kumei kuve tubo ka kiano tomu nalo, ana na mia kamiū kuvisidomial re titai leleio, mia vite nonovio rimei rivu ka kamiū.”

*Toro na be sanibaiano tivelinio na Atua Mataiu 6:19-21*

<sup>33</sup> Ana na Yesu ber bunu ber “Bo kanio kamiū kuvilivili bulag ka kenemiu saba nalo na, kuvar veru nene van talimāsa nalo ka kuvijailo. Ver kuvitumā kuvila

tibe na, jibe kanio kumitu kubar kenemiu burumāra basaro tai joa vio mave, napano mia maka rijikia rimei dagdago bogo tai, a kuvitumā kuvison bijii kenemiu saba nalo na miroano rivan eaio, ka mia kuvarkar tiniemiu eaio, ka mia toro na vinauano rijikia re ka rivar bulagio den kamiu bereio, ĩeli na mia sivinia ser dudulio re.<sup>34</sup> Mia bo kanio kamiu ve kenemiu saba novo nalo na atua vio mave tibe na, bior mia kenemiu jidomiano nalo atu tulaka ea vio na ga napano kenemiu saba na bo nalo ajuαιο.”

*Naiagagoano nalo monoka atu vatitigio ka mia Tubo rimei bereio*

*Mataiu 24:42-51; Mak 13:33-36*

<sup>35-36</sup> Ana na Yesu ber bunu kalo, berinavo “Kamiu monoka kuvitu derevijo tulaka ka mia kenemiu Tubo riyotuba ka kamiu. Kamiu monoka kuvitibe ka tomu namā amimāu toro na toru tai kanano, napano naio juvanlo ka ban ea soriano tai. Naruei nalo amiyovovualo, ajelan bunu yulu nalo, ajumormolu aju, mia bogo vaio napano mia kialo toro na toru naio rivoru, naio rimei rinia m̄aratavo, mia nalo aju rorea ruei, amijikia avetavo kanio vaarakurano ga.<sup>37</sup> Mia burumāra ilivuiāno van tomu nalo namā amimāu jibe na, ka bogo napano kialo toro na toru boru keanlo, mia nalo aju rorea ruei, nalo ajevijo aju. Mia kialo toro na toru naio saaro ve toru kalo, ana na mia naio riva rijia naio, karina mia rimei mia amiilo ka naio riviolo ka amei atutano ea kiano vio na sinaniano, naio biovio ka sinaniano novo tai banlo.<sup>38</sup> Mīa bekurano ka ver vio bobogio ruei, ĩeli na ba bokar bogiano vio vare, ĩeli na vaataro ka tu riolu, mia ver toro na toru naio rimei, rial ka kiano tomu nalo ajevijo aju rorea naio jibe na, mia naio rila vatitiglo rivu-o mia.

<sup>39</sup> “Mia bereio be verare ga ka ver toro tai napano mijikia memedu ka bogo na toro na vinauano mia rimei ea kunuano, mia toro nei maka rijikia tuvan kunuano to ga tibe na ka naio riva vio dolu, naio monoka to derevijo rorea naio to.<sup>40</sup> Tibe na, kamiu bunu monoka kuvitu rorea vatitig rivu ka mia kiniu Kulorinio Kenerinio nomaluvo, bior mia nomaluvo ka kamiu bereio ea bogo tai napano maka toro tai rijikiaio, ĩeli na tomā sidonii ka mia river nemei bereio eaio.”

*Jamerijiano na toro na imāuano na kiano toro na toru naio binimei bereio*

*Mataiu 24:45-51*

<sup>41</sup> Ana mo Pitere bika den Yesu, berinavo “?Tubo, jamerijiano na jau kober vonganei

na, jau kober ban kumemi kanamo naiagagoano ga, ĩeli na kober ban tomu nalo nei ga abiniu?”

<sup>42</sup> Mia Yesu maka sian verdoĩeiano nene rimemedu vanio, mia naio berdoĩe ban ea jamerijiano tai. Jamerijiano nene naio jibe nei, ber “Ver toro na imāuano tai, napano naio be masou bo laka, a naio biekoou ea kiano imāuano, mia naio rimāu tumabe naruei? Ver kiano toro na toru juvan vio ka riva koalabo, mia naio tuvan kiano naimāuano nalo atua naio jumāno. Mia kema nei naio rivitkar kiano tomu na imāuano dolu nalo, mia naio rivokar vatitig imāuano nalo nene.<sup>43</sup> Mia bogo na toro na toru naio rimei bereio, mia naio rilea ka kiano toro na imāuano nei, naio jo bokar batitig imāuano nalo nene kiano vo. Mia ka bogo na, mia toro na imāuano nei naio rijog rivu ve toru laka,<sup>44</sup> bior mia toro na toru nei naio tuvan vite nonovio na kanano tua jumāno. Ierinio, mia Atua rila tibe na ga bunu.

<sup>45</sup> “Mia ver toro na imāuano nei naio rimāu rivova, mia bogo na ver kiano toro na toru nei tuvan vio ka riva to koalabo, mia naio jidom riverinavo ‘E, toro na toru nei naio ba jo yako kirisiou laka ruei, ĩeli mia rimei re bunu naruei.’ Ana na mia naio tumolu rila kiki tomu na imāuano dolu nalo, a rivijuku rivova ka tire nalo na imāuano, a mia naio tomā sen veru na toro na toru nei kiano, a riva rimunu uei ea legiano nonovio.<sup>46</sup> Ana mia toro na toru nei naio rimei bereio ea legiano tai na mia toro na imāuano nei naio riilo kanio garuei, ea bogoti tai na mia naio risidom re ka mia boru nei rimei eaio. Ana na mia toro na toru nei sian burumāra vironiano van toro nei napano mia rila naio riva toa vio na tomu na pariparilo kirisikili ajuαιο.

<sup>47</sup> “Mia toro na imāuano napano mijikia batitig venia napano kiano boru jidomio ka naio monoka rilaio, karina maka rilaio, mia monoka avitii vatitig naio.<sup>48</sup> Mia toro na imāuano napano mila na bova memedu ga ka mia avitii vatitig naio riviorio, verver naio maka rijikiaio, mia avitiv naio ve toru re.

“Toro na Atua mije ban naio ve toru, Atua jidom ka rial toro nene rimāu ve toru rivijaio. Mia ver toro napano tomu nalo amije vite nalo miroano monea jumāno, mia amijikia avika vite ve miroano lie vo den naio bereio.”

*Yesu be burupati na toro namā mil die toro*

*Mataiu 10:34-36*

<sup>49</sup> Ana na Yesu berenio berinavo “Kiniou nebinimej ka noyon sebi rimemedu ea vio yetemeriba nei, mia bo ka ga ver sebi nene rivilvili ruei, ana makan vo. <sup>50</sup> Buruñara iñauano kouo tai monokoro jo kamu ka miraku kia navo, ka mia monoka nevija dulo eaio, mia vonganei notorña noñidig kar kiniou ruei riviorio. Bo ka tenene rimej soñeli, ka nomijikia nala nonovio. <sup>51</sup> ? Kamiu kumisidom kuberiaña kiniou nebinimej ka nala buruñara tuñaro toa yetemeriba nei? Makanio, maka nemej ka nodu tuñaro toaio, mia nebinimej ka nala bajago na vuruvureiano rimej ve toru lie vo. <sup>52</sup> Mia tikar vonganei, ðeli ea vonuo tai, tomu nalo jumo ajuaio, ana mia nalo tolu nene avuruburelo ka naljuo nene, ðeli na juo nene avuruburelo ka nalo tolu nene. <sup>53</sup> Mia tomu nalo avuruburelo, ka na mia tete ñeaku nalo atudie karamñalo nalo, mia teta nalo atudie kialo tete ñeaku nalo, mia nena nalo atudie kenerilo niatira vevinio nalo, a niatira vevinio nalo atudie atudie niatira na joro vonga ka kenerilo ñeaku nalo, ana mia niatira nalo atudie kenerilo niasimemi nalo.”

*Monoka avitulubar kijokijo na bogo na Yesu kiano*

*Mataiu 16:2-3*

<sup>54</sup> Ana mo Yesu mil ban tiniobi nalo bereio, naio berinavo “Bogo na kito rotuñia roial buruñara melijo na bobogio joa vio naña jegi moluo eaio, romijikia ka mia yuo rimej, mia maka vesiou ga ana na yuo bovo. <sup>55</sup> Mia bogo naña romijog ka kanado jegi na saot joña miuvuvu, nina naruej romijikia ka mia vio rivitunu ñele, ana na mia monoka tibe na ga na. <sup>56</sup> ? Nina naruej, kamiu kumituña kubitulubar ruej kijokijo na vio yauo a yetemeriba, ka mia bogo tuñabe ðeli mia tuñabe, ana mia juñabe kamiu maka kuvijikia kuvitulubar kijokijo nalo na ea kanaku buruñara bogo na vonganei nei napano ña nojo bija kamiu? Peli kamiu maka kuvisidom kuvitulubar ga kovio? Tomnej, kamiu kubarvar laka ka kamiu, kuber vite nalo mia maka kuvilaii.”

<sup>57</sup> “Bo ka ver kamiu kuvilavon ka kuvijikia kuvitulubar kija ka ñarabo na vabe naruej na naio memedu ka kamiu kuvitakio. <sup>58</sup> Verver bogo tai jau kala baravo kam juo toro tai ka titai, mia naio sidom rivurso kavan kotumolu kotu kamu ea toro na tibureiano mirano riviorio, mia bo ka jau kala vio sikili ka keil vatitig rivija naio, beamu ka bogo na kamiu maka kuvoru komeli vo. Ver makanio, ðeli mia naio ruduso kotoa toro na toru naña jibibure toro juñara, ana na toro na

toro nei ðeli mia naio ruduso kotoa tomu naña abokakar tomu nalo juñara, ana mia nalo aduso kotoa yimo na tetavokoiano. <sup>59</sup> Ierinio, kiniou neberii kaso, ka ver tibe na, mia jau maka kejikia kataluvo bereio den yimo na tetavokoiano nene, rivanvano-o mia jau kovulu bulag nono kiamo mauo riviniu beamu vo, ana mia jau komijikia kataluvo bereio.”

“Mia iliano nei naio be riano ban keneriu meuliano na yetemeriba nei, a be riano bunu ea tivelinio na kamiu bija Atua.”

## 13

*Ver koviligso re, mia jau kañaro*

<sup>1</sup> Mia tomu nalo na aju ea bogo na, ajukunu ka kulo Kalele tealo ban Yesu, napano toro na toru na Romo nei Pailat mila bajago na kirivova tai kalo. Nalo aberenio “Nalo na ajua Atua Kunuano Lu, mia monloglog bogo na aju amilotu ka Atua, amila sida banio, mia Pailat nalo abinimej amiel binvinlo añañarño, mia amila kitkiti kialo burukija bija burukija na kialo sida neibano ajuña amilaio.”

Naruej bogo na aber vite nei ka Yesu, ajidomii ruej ka vite na bova nei na maluvo kalo, ðeli be Atua kiano vironiano tai banlo, bior kialo vovaiano tai napano ðeli nalo amilaio.

<sup>2</sup> Ana na Yesu berdoñe banlo, berinavo “Kamiu kuvial kulo Kalele nalo na añañarño kirivova jibe na juñabe na? Peli kuberiaña nalo abe tomu na bova laka, jovulu kulo Kalele dolo nalo, naruej naio be kialo vironiano ga? <sup>3</sup> Kiniou nojidom never ka kamiu never makanio, naio maka tibe na. Mia monoka kuvitkar vatitig rivu, bior ver kuvilig re kamiu, mia kumijikia kuñaro bunu ea bajago na jibe na.

<sup>4</sup> “Mia kamiu kuvisidomii von yimo na siraragkuiano napano joa komeli na Sailomo. Naio bavín loa laka, mia bogo nanua naio mijoru, na jibirbil ea tomu nalo mia nalo duelimo ba arolu [18] añañarño. ?Mia juñabe ka nalo na? ? Peli kumituña kuber nalo na bunu abova loa ka kulo dolo nalo na vio Yerusalemo, mia nina naio jibe ka kialo vironiano tai, a? <sup>5</sup> Mia makanio, naio bunu maka tibe na. Mia kiniou neber bereio ka kamiu, neber monoka kuvitkar kamiu rivu, bior ver kuvilig re kamiu, mia kumijikia kuñañarño bunu ea bajago na tai jibe na.”

*Kijokijo na burubivilo na maka takou*

<sup>6</sup> Ana na Yesu ber jamerijano tai bereio, napano naio ber jibe nei, berinavo “Toro tai, kiano burubivilo tai jau kiano tiniavio.

Mia bogo tai ana toro nei naio binimeia ea burubilivo nene, jidom ka rial von naio jakou p̄eli na maka takou. Naruei naio binimeia mial ka buruiesi nene maka takou leleio. <sup>7</sup> Mia naio mil ban toro nañia bitikar kiano tiniavio, berinavo 'Vonganei bokar yuka tolu ruei, napano nobinimeia najirarago ka burubilivo nei m̄arati, mia maka lele tai. Niabeku mave ka ruei, naio jukoko vio na bo nei kurano ga, mia jau ketelario ga rivano.'

<sup>8</sup> "Ana na toro na im̄auano neibano naio tinien miia burubilivo nei toru, ana ber ka kiano toro na toru nei, berinavo 'Ver tum̄abe, mia kito ralavon ka rotuvan tu ka yuka ve takurano bereio von. Ka mia kiniou nalavon ka noim̄au ka vatitigio von beamu vo, mia nekil p̄ili selvivia burupati, ka mia novisivisi tera buluku ea ka mia rila riluo rivu. <sup>9</sup> Naruei ver riluo rivu, rivar kija m̄arati ka yuka yako, mia mijikia tu bo tibe na bo kanio, ver makanio, mia jau komijikia ketelario rivano.'"

Jamerijiano nene ber be bogo telisu kiano jo ka tomu nalo amijikia aviliglo, verver makanio mia Atua rijev vironiano vanlo.

*Yesu mieliel ka tiramoruo tai ka Legiano Lu*

<sup>10</sup> Ana ea Legiano Lu tai, mia Yesu naio jom̄a berloglog tomu nalo joomo ea kialo yimo na volkouano. <sup>11</sup> Ana ea vio na be tiramoruo tai naio jo, napano niununo na bova tai na mieiano joa naio. Ana niununo napano miadikar naio ka yuka duelimo ba arolu [18] ruei, napano mila na tiramoruo nei taakano jupe laka, naio maka rijikia rivitiri naio memedu leleio. <sup>12</sup> Mia bogo na Yesu jirarag loglogio, bio naio binimeia, ana mil banio, ber jibe nei berinavo "Tiramoruo, kiniou neber jibe nei, neber jau, mieiano nañia bivikakarso na, mia ritaluvo denso vonganei ga." <sup>13</sup> Ana bija iliano nei Yesu midu jum̄ano joaio, mia vaarakurano ga taakano binimeia memedu bo bereio, naruei tiramoruo nei mijog bo toru laka, miaia Atua Sopi-o mia.

<sup>14</sup> Mia navuriñaraboiano na yimo na volkouano nei, naio tinien jer Yesu ka napano naio mieliel ka tiramoruo nei ea Legiano Lu. Naruei naio mil ban tomu nalo, berinavo "Jibe ka na kito romijikia ruei, romijikia ka roim̄auka bogoti ve ari, mia bogoti takurano, maka roim̄au. Ver kamiu kuvisidom ka aieliel ka kamiu, mia bo kanio kumei ka bogoti ve ari ga, mia Legiano Lu na jibe nei naio maka rive bogo nene rimemedu."

<sup>15</sup> Ana na Tubo berdopeio berinavo "Jum̄abe? Peli kamiu kumituñia kumijian kenemiu bue m̄arauo nalo ka Legiano Lu,

p̄eli maka kumijianlo? Peli na kamiu kumituñia kubagan kenemiu temeul nalo a kumituñia kumiyon uei banlo ka Legiano Lu, p̄eli na maka kuvila tibe na? ? Mia bior vaio ana maka kuvisaaro ka namila batitig tonovo tai ea tiramoruo nei? ! Kamiu kubarvar laka, kuber vite nalo mia maka kuvila! <sup>16</sup> Tiramoruo nei, naio be kuviviniedo tai napano kito robiniu romiyotuba ea yati na tormoruo Epraamo, mia Najuboliboiano miorikar naio ka mieiano nei mijil yuka duelimo ba arolu [18] ruei. Ana kiniou namial jibe ka Legiano Lu naio memedu ga ka kito rovurular naio den vio na bova nei napano joaio."

<sup>17</sup> Mia bogo na Yesu ber iliano nei, mila kiano uolu nalo nei amijog amimou toru laka ea tomu nalo miralo. Mia kulo dolu nalo, nalo ajaoro toru laka ka im̄auano na bo nalo na miroano napano Yesu milaio banlo.

*Jamerijiano na kurukubako*

*Mataiu 13:31-32; Mak 4:30-32*

<sup>18</sup> Mia Yesu mil bereio, naio berinavo "Kiniou never iliano venia rivan kamiu ka mia rila na kamiu kuvijikia ka Atua kanano navenatuboiano naio jum̄abe? ? Mia kiniou never navenatuboiano nene naio javukia vite venia? <sup>19</sup> Mia nalavon ka nala rimeravo rivan kamiu ka jamerijiano nei, napano naio ber jibe nei, berinavo, Navenatuboiano nene, naio jibe ka kurukubako napano mijoru ba birakar joa buruiesi tai. Marati nei kiritavaso leleio, mia bogo na miluo, binimeia be buruiesi tai na burutomoruo laka, naruei menu nalo abinimeia amila m̄alo niuku nalo jua jaati nene nalo."

*Jamerijiano na isi*

*Mataiu 13:33*

<sup>20</sup> Ana Yesu ber jamerijiano dolu tai bereio banlo, naio berinavo "Peli mia kiniou neverinavo Atua kiano navenatuboiano naio javukia vite venia bereio? <sup>21</sup> Navenatuboiano nei, naio javukia tira tai nañia jo milalaglag isi na teliki ga bija burum̄ara baju na yevei tai, naruei isi na teliki nei naio mila joko nonovio miyuku toru."

*Be m̄arabo juo ga*

*Mataiu 7:13-14,21-23*

<sup>22</sup> Ana Yesu naio jo midu kiano m̄arabo bereio, naio jo jidom ka rivavin bere Yerusalemo. Mia bogo na jo ban jibe na, jo miel jel ea komeli nalo, jom̄a berloglog tomu nalo. <sup>23</sup> Naruei ea komeli tai, be toro tai bika denio, naio berinavo "Tubo, nalo na mia avokar meuliano, nalo telabo, p̄eli na maka ve telabo laka?"

<sup>24</sup> Naruei Yesu berdoḡelo, berinavo “Kamii monoka kuvilavio sikili ka mia kuva joomo ea bulutavo dolu na, napano na teliki ga. Kiniou neber riano ka kamii, ka mia tomu ve telabo asidom ava joomo, mia maka ajikia alaio. <sup>25</sup> Nina bior iorou, ana mia toro na toru na yimo mia naio rial ka bare ruei, mia naio tumolu, tetavoko vatitigio bereio. Ka bogo na, mia kamii ve telabo kumei kuvidu buron kamii ea m̄aratavo nei, mia kuviniu kuvio kuverinavo ‘Tubo, kumemi nuber bo ka jau kovetavo ka kumemi.’ Mia toro na toru nei naio riverdoḡe ga tibe nei, naio riverinavo ‘Ai, abe kiniou maka najikia kamii lelei! Kamii kube kulo be nalo?’ <sup>26</sup> Ana na mia kamii kuvilavon ka kuver kanio ka bogo na, kuverinavo ‘Ana juḡabe, jau maka bunu kosidomial ka kito naruei rojuḡia rajinan vio takurano daḡariga beamu mugaruei ḡa na? ! Kumemi nene nei naruei naḡia jau kobinimei ḡa koberloglog kumemi janea vio medave nalo ea kenememi komeli nalo!’ <sup>27</sup> Mia naio river kalo, riverinavo ‘Kiniou neber ka kamii vaarakurano nua ruei, ka maka lele nejikia kamii, kamii kube kulo be. Mia namijikia ga ka napano kamii kube tomu naḡia amiḡauka bajago na kirivova ga. !Kamii, kuvitaluvo den kiniou vonganei!’

<sup>28</sup> “Ka bogo na, mia kuvijog rivova ve toru, mia ve buruḡara tegiano, kuviser m̄arjuvomii. Nina bior ka mia kamii kuvial ka napano Atua kiano tomu novo nalo, jibe ka Epraamo, Aisak, Yakovo, a naverialiano dolu nalo bunu, nalo aju bo jouro ea kiano navenatuboiano ruei, mia kamii, avuku kamii kuvitu bo ga tavio tibe na. <sup>29</sup> Ea bogo na, mia kulo dolu vetelabo ayotuba ea sudu veri na yetemeriba nei, amei ka atutano ka asinan ea buruḡara jokoluolu na jouro ea Atua kiano navenatuboiano, mia kamii maka kuvijikia kuva jouro eaio. <sup>30</sup> Mia tibe na naruei, ka nalo naḡia aju iorou, mia atu tukamu, a nalo naḡia aju jukamu, mia atu iorou.”

*Parinio Tubo Erot naio jidom rue bin Yesu*

*Mataiu 23:37-39*

<sup>31</sup> Ka bogo na, ana Yesu jo bavin Yerusalemo kia vo, mia Varisis nalo tai abinimei eaio, aberial kanio, aberinavo “Peli jau maka kejkia, ana Parinio Tubo Erot na, naio berkar ruei ka mia ruebinso. Bo ka jau kataluvo den tanobuku na naio joḡia be tubo eaio, jau kovuro kava Yutea beamu vo.”

<sup>32</sup> Ana na Yesu berdoḡelo berinavo “Kiniou maka nosidomial souo kurkuru na ka naio be toro tai na mijikia rila titai ka kiniou. Kuva kuverial ea mirano kuver kiniou noto nala kiaku iḡauano beamu vo. Kuver kanio kuver kiniou nojoḡia nemijiel bulag siḡaro nalo, a nojoḡia nemieliel ka tomu nalo, a mia notoḡia noiḡau tibe na banei, beni, veua bereio, rivano-o mia neial ka namila nonovio ruei. <sup>33</sup> Mia kiniou namijikia na ver ka kamii, ka mia kamii kuvisidomii ḡielea re kiniou, bior ka legiano nalo nei, kiniou nojo najaluvo den tanobuku nei navan tibe na naruei. Monoka najaka nava novoru Yerusalemo vo, bior namial jibe ka vio na naruei naḡia tomu nalo ajuḡia amuebinvin naverialiano nalo eaio, jikar nua ruei.”

*Yesu naio tinien miia vio Yerusalemo*

<sup>34</sup> Ana na ka bogo na, Yesu tinien miia Yerusalemo ḡa jegidu kanio, naio berinavo “!Yerusalemo, Yerusalemo-o! Bior vaio ana kojoḡia komuebinvin naverialiano nalo, a kojoḡia kojuba binvin tomu nalo naḡia Atua joḡia miilalo abinimei easo? Vatelabo kiniou nejidom nodu juḡaku selvivko kiamo tomu nalo tibe ka sabarou bio kirikiti nalo abinimei amiyuku jel tano ka sibiano, mia kanamo tomu nalo maka asaaro kanio. <sup>35</sup> Mia komialio na, Atua naio jo bilig taakano kaso ruei nei, ana naio miila kiniou nebinimei be moti nei naruei, ana naber kaso, neber mia kanamo tomu nalo ajikia re aial kiniou bereio, rivano-o rivokar bogo na avitilubar kiniou, averii kiniou averinavo

‘!Atua soḡi loa laka, jau keilivu ka naio napano naio jo binimei ea siamo!’”

## 14

*Yesu mieliel ka toro na mieiano tai*

<sup>1</sup> Ana ka Legiano Lu tai, navurim̄araboiano na Varisis tia bio Yesu ba jinano ea kunuano. Mia tomu dolu nalo tealo naḡia maka tiniel tii Yesu, nalo aju bunu ka bogo nei, ajuḡia abitivitii julaka ver naio rila vite tai na maka rimemedu, mia amijikia ala tibekovio ka naio. <sup>2</sup> Mia toro na mieiano tai jo naliko joomo ka bogo nei, napano toro nene niabene nalo jurojurobi tortoru laka. Mia Yesu mial toro nene, <sup>3</sup> naruei mil ban naverloglogiano na tuboiano nalo, bija Varisis nalo napano aju, naio bika denlo, berinavo “?Juḡabe ka tivelinio na kiado tuboiano? ?Naio berenio kito romijikia reieliel ka toro ea Legiano Lu, ḡeli na ber maka rejikia reieliel kanio?”

<sup>4</sup> Mo bogo na Yesu bika vikadeniano nei, amial jibe maka bunu ajikia asian verdoŝeiano rivanio, mia maka bunu ail. Ana na Yesu buru toro nei binimej vaataro keanio, ana mieliel vatitig ka naio bo bereio, berinavo mijikia rivan bereio vonuo. <sup>5</sup> Ana naio mil ban nalo na aju, naio berinavo "Kamiu kuvilavon ka kuvisidomii vonio. Ver kamiu tai, ka Legiano Lu, kenerinio tai, ŝeli na kanano temeul tai, naio riva rijoru rivatove ea bulukuei tai, ana mia jau kala tuŝabe? ? Mia jau monoka kala soŝeli ga kava kovular bereio, ŝeli na mia koverinavo 'Uerei bova naruei, vonganei be Legiano Lu ruei, tuboiano berenio mia kiniou noimŝau re ea Legiano Lu, mia ŝeli keneriku ŝeli na kanaku temeul na tobo beamu vo ea ŝili na, mia beni ga ana mia nava novuru lario?' Peli mia maka bunu kejikia koto rorea titai bereio, mia jau kala soŝeli ga na."

<sup>6</sup> Mia nalo maka bunu ajikia ka mia aver verdoŝeiano venia ka tivelinio na rivan naio bereio, aju buru ga jibe na.

*Maka rivu ka toro riyuku lelar naio bereio*

<sup>7</sup> Mia bogo na aju ka atutano ea sinaniano, Yesu bitilubar ka nalo tealo napano boru na jokoluolu biolo abinimej, tiniel jii toru ka ajidom aleal vio na bo, nalo aba ajutano mave ea tomu na tortoru jelelo. Ana Yesu mial kialo bajago na mŝarouano nei, ana ber kalo, berinavo <sup>8</sup> "Ver bogo tai avioso ka kavan ea sinaniano na soriano tai, ŝeli na jokoluolu tai na jibe na, maka rivu ka koyokovo soŝeli ka kava kototano ea tomu na tortoru jelelo garuei. Peli jau maka kejikia ka vio na, amila batitigio bo joreora toro na toru tai, <sup>9</sup> ana mia boru na jokoluolu nei mia rimej river ka jau, riverinavo 'Aiou kuruaku liki, mia ŝeli jau kavatove beamu vo, bior jau kojorŝa kojotano ea kanaku toro na toru jeleligio na.' Naruei mia jau kavar buruŝara imouiano tai na rila kojog ve kirivova laka, mia monoka jau kavatove ga bereio, kalavon ka keleal kiri vio sesa tai ka na mia komijikia ketivan miramo eaio. <sup>10</sup> Mia bajago na bo naio jibe nei: Ver avioso ka kavan ea sinaniano tai, bogo na kovoru eaio, jau kava kototano rivija tomu ninio ga. Mia ver boru na jokoluolu nene naio rimej, mia naio rialso, mia naio riverinavo 'Oi, buruŝara toro, kiniou nemije batitig jelelo na jo mave ruei, mia kito ve juo ravan ana neti vatitigso.' Ana ka bogo na, mia komijikia kojog rivu ve toru laka, ka boru na jokoluolu rivitiri larso tibe na ea kulo dolu nalo miralo naŝa kumisanan

vio takurano. <sup>11</sup> Tibe na naruei, ka mia toro naŝa miyuku lelar naio, mia adu naio totano, mia toro naŝa midu naio jotano mia ayukular naio to mave."

*Bo ka kovio taliŝasa bunu rimej ea kiamo jokoluolu*

<sup>12</sup> Ana ka bogo na, Yesu ber iliano tai bunu ban toro napano bio naio binimej jinano ea kiano vonuo, naio berkanio, berinavo "Vonganei, kito romial ka napano tomu nalo, bogo na amila sinaniano tai, tiniel jii ga ka avio kialo bilbilu na bo, ŝeli kurualo nalo, ŝeli na kialo mŝaratavo dolu nalo, vija bunu tomu na tortoru nalo na abe sanibaiano naŝa aju vaataro ga kalo. Ajuŝa amilala jibe na naruei, bior amijikia ka iorou, ver nalo nei bunu ala sinaniano tai bogo tai, mia monoka ala meran rivano bereio.

<sup>13</sup> "Mia bajago na bo ka rila bogo na jokoluolu naio maka tibe na. Bo laka ka kovio kulo dolu nalo, jibe ka nalo naŝa abe taliŝasa, ŝeli na nalo na niabelo maka rivu, ŝeli na jaba nalo, ŝeli na merebono nalo, ŝeli na tomu nalo na ajiberbena, amei asinan rivijaso. <sup>14</sup> Tomu nalo na jibe na maka ajikia ala meran rivanso bogo tai, mia bogo na Atua mial ka jau tiniem jaaro ka koburulo abinimej ajanan kamliko ea kanamo vonuo, mia naio saoro laka kaniso. Karina naio rilivu kaso, a mia jau kavar vonga kiamo ijaiano na bo biorio, ea bogo na naio rila kanano tomu na memedu ameul bereio den naŝariano."

*Jamerijiano na soŝeiano Mataiu 22:1-10*

<sup>15</sup> Ana na toro tai napano joa sinaniano nei, naio mijog ka napano Yesu berii ka mia Atua rivitiri bulag kiano tomu na memedu ea legiano na maaro, naruei naio berinavo "Ierinio, mia rivu lie rivan kito ka bogo na, ka napano mia kito raiajol buruŝara jokoluolu na jouro ea Atua kanano navenatuboiano nene!"

<sup>16</sup> Toro na, ŝeli naio joŝa ber naio bo kovio ruei, mia tomu na jibe na maka asidom ave jouro, naruei Yesu ber jamerijiano tai ea tivelinio na, napano jibe nei "Toro na toru tai, naio jidom ka rila sinaniano tai, mia naio bio tomu nalo telabo ka amei. <sup>17</sup> Ana bogo na naio miomon vite nonovio bisi ju, ana miila kiano toro tai ka riva rivuru nalo naŝa abiolo ruei ka amei. <sup>18</sup> Mia bogo na kiano toro nene bano-o miyotuba kalo, nalo abiniu abare ga, ajuŝa amila ilisoŝeiano ga. Tai ber jibe nei, berinavo 'Ierinio, mia kiniou nobulu von ga kiaku niatano tai, naruei nojo napano ka neial von ka borotano nene

juŋabe. Mia kover ka toro na toru kover aua toru vanio, mia maka nejikia nevedu vonganei.’<sup>19</sup> Mia dolu, naio ber jibe nei, berinavo ‘Terinio, mia kiniou nobulu von ga kanaku buluku nalo tai, ka avuru kanaku rukuruku nalo, naruei nojidom ka nava neial ka be Ɔirilo jikili juŋabe. Mia kover ka toro na toru kover aua toru laka, mia maka nejikia nevedu vonganei.’<sup>20</sup> Mia dolu bunu, naio berinavo ‘Terinio, mia kiniou namila jokoluolu na kanaku soriano maka vesiou vo, naruei namial jibe ka Ɔeli mia maka nejikia nevedu, bior saba telabo laka.’

<sup>21</sup> “Ana na toro nei binimej berial iliano nalo nei ka kiano toro na toru, mia bogo na naio mijogio mila naio mila siniabu kalo. Naruei miila kiano toro nei bereio, naio berinavo ‘Mo, jau kala soƆeli kavan ea m̄arabo nalo na tertelisu vaatato na, kava keale talim̄asa nalo, vija nalo napano abe meritovi, vija merebono nalo, ana kuvurulo amei ea kiado jokoluolu.’<sup>22</sup> Naruei naio ba milao, mia iorou kanio ana naio binimej bereio ea kiano toro na toru nei, ana naio berinavo ‘Tubo, vite napano jau koberenio, kiniou nemilaio ruei, mia tomu telabo abinimej ruei mia be vio toru jo kiano vo.’<sup>23</sup> Ana miila naio bereio, berinavo ‘Tibe na, jau kavan bereio, kava lie kija ea vio nalo na komeli, mia katadua sikili toro kei na ver jau kealio, ka monoka amei, ka aison kanaku burusio, ka rila jokoluolu nei rive kirinovo tanea.’<sup>24</sup> Nalo dolu naŋa amila ilisoƆeiano na kirivova na, kiniou nobiolo batitig ka amei ea jokoluolu nei ruei, mia vonganei, mia maka nalo tai kalo napano mia rijikia sen kiri sinaniano nei tai leleio ea jokoluolu nei. !Kiniou neber vatitigio kiana!”

*Yesu monoka to tukamu ea kiano naia-gagoano nalo kialo meuliano*

*Mataiu 10:37-38*

<sup>25</sup> Naruei Yesu naio jo midu kiano m̄arabo ka rivavin Yerusalemo bereio vo, mia tiniobi niukuuku vio bujo kalo ajum̄a ajakisorio. Amiel bano-o, mia naio barƆillig kalo, ber kalo, berinavo <sup>26</sup> “Toro na jidom rimej rue jaaku, mia naio monoka rudu kiniou noto tukamu ea kiano meuliano, kiniou loa laka lie vo ka karam̄ano, kenieno, koano, kenerinio, kuruano, Ɔeli na kuviniene. Toro napano ver maka riilkue ka kiano meuliano, naio maka rivare ka rimej rive kanaku naia-gagoano tai. <sup>27</sup> Mia toro naŋa jidom ka rimej rive kiaku naia-gagoano, naio monoka rila tibe nei. Naio monoka rudu kiano m̄ajakkolo, rue jaaku nam̄ariga, tibe ka m̄akalo, ka naio ka rijog jaleleano rivior kiniou. <sup>28</sup> Bo

ka kuvisidomii vatitig rivu vite nei beamu vo, beamu ka na mia kuvil soƆeli, kuver mia kuvitakisori kiniou.

“Naio jibe ka na toro tai, ver naio sidom ka rim̄auka burum̄ara yimo tai, naio monoka totano, rivitii beamu vo, mia rivuluku vatitig beamu kiano veru na vuliano na im̄auano nei, mia monoka rivitii veve rivu ka naio bare ka mia rila nonovio burum̄ara im̄auano nei, Ɔeli na maka rivare. <sup>29</sup> Ver Ɔeli na, mia naio tikar rim̄auka batitig bulapati, rivavavin kija ga, ana mia naio riilo ka napano juŋano bulati garuei, ana na mia im̄auano nei tei riuedom tobo. Naruei bogo na kulo dolu nalo amei aial yimo neibano jo bija bayimo nene be togio ga jo, a maka ve vodobi nene, mia avital niegeniege m̄elea toro nene-o mia averinavo <sup>30</sup> ‘O, kema na, kiano jidomiano kirinovo laka. Naio jidom rim̄auka kunuano, mia maka rila batitig tiiano na im̄auano, mila na maka rijikia rila nonovio riviniu.’

<sup>31</sup> “Jibe ga na, toro na jidom riverkar ka mia rimej rila im̄auano vija kiniou, naio monoka rila tavukia parinio tubo tai, napano toro na toru dolu jumolu ka naio, buru kiano burum̄ara taara na mira abinimej ka ala mira kanio. Tomu na mira na parinio tubo nei kanano nalo maka ve telabo tavukia toro na toru nei kanano, mia parinio tubo nei monoka rivitii vatitigio ga beamu vo, monoka sidomii vatitigio rivu ka naio mijikia tovulu burum̄ara taara neibano naio jo binimej ka naio kiana, Ɔeli na maka rijikia tovulio. <sup>32</sup> Ver naio rial ka maka rijikia rilao, naio monoka riila toro rieliko m̄arabo ka toro na toru nei, ka bogo napano naio jo koalabo kia ga vo. Naio monoka rivika denio, ka mia rivulu venia na ver toro na toru nei riverenio, ka mia ave juo atua tur̄ano bereio. Tibe na ana naio monoka rivatove ka toro na toru nei, rijamo ka naio nonovio rivanio. <sup>33</sup> Mo kami naŋa kumisidom ka kumej kuvitakisori kiniou, kami monoka kuvitilubar ka kami bunu monoka kuvila tibe na ka kiniou. Toro na maka rijamo ka kiano meuliano kar kiniou, vija rera garuei kiano saba nalo, naio maka rijikia rimej rive kiaku naia-gagoano tai.”

*Jamerijiano na vaatei*

*Mataiu 5:13; Mak 9:50*

<sup>34</sup> Ana Yesu ber jamerijiano dolu banlo, naio berinavo “Vaatei naio be tonovo tai, mia ver bogo tai ana vaatei nene naio rijeja re bunu rivano, naio maka bunu rijikia rila kiano im̄auano, Ɔeli na maka bunu ve titai rijikia rila rijeja rivu bereio. <sup>35</sup> Mo vaatei naio jibe na, naio maka rijikia rila

iñauano na bo easo ea kanamo vonuo, ðeli na ea kanamo tiniavio bunu. Vite na bo kanio, bo ka avuku rivan ea vio na soro ga. Nina naruei be tovorovo na kanaku naiagagoano napano milaluvu kanano moroano ka rila kanaku iñauano.

“Ana toro na be tiliniene bo, bo ka naio rijoglubar kanaku iliano nei.”

## 15

*Yesu mila bilbilu naliko tomu na bova nalo*

<sup>1</sup> Ana ea bogo nalo na jibe na, amial ka napano tomu tealo napano tomu dolu nalo maka tiniel tiilo, jibe ka tomu na takis nalo, bija kulo dolu nalo napano Varisis aber abova, nalo bunu abinimei vaataro ka Yesu ka aiagago ka naio. <sup>2</sup> Naruei bogo na Varisis naliko naverloglogiano na tuboiano nalo aju amial ka Yesu joñia tinien jii ka tukunu vijalo, amial kirivova, ana aju aberinavo “Riano ga, tete na naio jidom ga tomu na kariano na jibe na, a bogo nonovio naio jidom ka riva sinano vio takurano naliko bunu. ?Peli naio mial ka kialo bajago ga naio bo, a kiado naio bova, a?”

<sup>3</sup> Mia kialo jidomiano jibe na mila ana Yesu jukunu banlo ka jamerijiano nalo nañia aberii juñabe ka napano naio binimei ea yetemeriba nei kar toro napano milaluvu m̄arabo.

*Jamerijiano na nunu napano ba kovio Mataiu 18:12-14*

<sup>4</sup> Yesu kiano jamerijiano na be moti ka tivelinio na naio jibe nei, napano naio ber kalo, berinavo “Toro tai, naio be toro nañia bagan nunu nalo, mia kiano nunu nalo abokar toromomou takurano [100]. Kiano nunu nalo telabo mugaruei jibe na, mia ver bogo tai, nalo tai riva kovio, mia naio sidomveia ga, ðeli mia naio sidom bivovijon kanio? Mia monoka naio tuvan kiano nunu dolu nalo na atu bo beamu vo, mia naio rivakar napano ba kovio, mia naio sirag rialealio. <sup>5</sup> Mia bogo napano naio milealio, mia saaro ve toru laka, mia naio rudular nunu tavaliki nene rimon mave ea burusovonano, ana naio rudu rimej bereio. <sup>6</sup> Ana na iorou, ka bogo napano naio batove binimei ea kiano vonuo bereio, mia rivio nalo na ea kiano m̄aratavo, ðeli na kiano bilbilu dolu nalo bunu, ka amei. Ana mia naio tukunu vanlo, riverinavo ‘Ei, vite tai napano kito ramijikia rasaaro ve toru m̄ele riviorio. Kanaku nunu tai napano ba kovio napano ba kovio laka garuei, mia karina naban kanio, najiragio-o, namilealio. ! Bogo

napano namilealio, najaaro mia maka garuei!”

<sup>7</sup> Ana Yesu mila meravo ban Varisis nalo, berinavo “Mia tibe na ga bunu ea vio mave. Tomu telabo napano ajua vio yetemeriba nalo ajavukia kamiu, be tinielo ka aber nalo amemedu ruei, ana ðeli mia saariano na mave rivior kamiu tomu kinkin na jibe na kovio? Mia ver toro na kariano tai ga, naio rivilig kiano meuliano, mia ve burum̄ara saariano ea vio mave, riva lie vo ka mia ve burutomoruo laka. Vite na naruei mila ana tinieku jaaro ka notukunu vija tomu nalo nañia kamiu maka tiniemi tiilo.”

*Jamerijiano na kurukuveru tai napano ba kovio*

<sup>8</sup> Ana Yesu ber jamerijiano ta bunu ea tivelinio na, naio berinavo “Be tira tai, kiano kurukuveru duelimo, napano naio miduvan batitigio bo jo joomo ea kunuano. Ana ver bogo tai, rimej ber riadu kalo mia rial ve takurano naio mijoru ruei, ba kovio tai, mia naio rila tum̄abe naruei? Monoka naio rigoru yulu, rija bulag kiano saba nalo, a riakon vatitig vio ea kunuano, rivano-o mia rialealio. <sup>9</sup> Ana bogo napano rialealio, mia naio rivio nalo na ea kiano m̄aratavo, ðeli na kiano bilbilu dolu nalo, ka amei. Ana naio tukunu kanio vanlo, riverinavo ‘Ai, abe vite tanie napano romijikia rojog rivu ve toru kanio. Kanaku burum̄ara kurukuveru tai nemilaluvuo mijoru banbo kovio tai, mia karina, nejiragio bano-o ana nemilealio bereio. ! Bogo napano nemilealio, kiniou nomijog bo-o mia!”

<sup>10</sup> Ana na Yesu mila meravo ka Varisis nalo, naio berinavo “Naruei mia tibe na ga bunu ea vio mave. Ka bogo napano ver toro na kariano ga tai naio rivilig kiano meuliano, mia Atua kiano nailiano nalo aialio mia saariano ve toru laka ea vio mave.”

*Jamerijiano na m̄eaku napano ba kovio*

<sup>11</sup> Mia Yesu kiano jamerijiano na maariano na tivelinio nei, naio jibe nei, napano berenio berinavo “Kulovu tai, be kenerinio surñano juo, nañia aju amiñau bijaio ea kialo borotano. <sup>12</sup> Ana ka bogo tai, maratou na naljuo nei naio jumolu, berial ka karam̄alo abe juo, berinavo ‘Teta, kiniou nejidom navar saba togio na jajum̄iamo ve kanaku ga.’

“Mia vite na maka rimemedu leleio ka naio rivika tibe na, bior karam̄alo naio meul jo kia vo. Mia karam̄ano maka ril, naio jan ka nonovio kiano saba nalo, mijamo ka togio ban m̄eaku nei, a togio be motoru kanano. <sup>13</sup> Avona bisi, ana



na m̄eaku nei naio jom̄a p̄ilv̄ili ka saba nalo napano karam̄ano bar banio, mia iorou, maka vesiou, amialio ka naio mison nonovio kiano saba nalo, bar kiano puruveru beven ka bano. Mia ba joa buruvenuo dolu tai koalabo laka, ana ea vio na, naio ba mijamo ka momon naio ban bajago na bova, jinan ka puruveru nei bano-o mia mila lelan nonovio biniu.

<sup>14</sup> "Vonganei naio bitilubar ka jum̄ano bulati naruei, ana ea bogo na, burum̄ara vituiano tai binimej bokar buruvenuo neibano naio joaio, naio midu m̄eaku nei naio joa vio tai na kirisikili laka kanio. <sup>15</sup> Ana na naio ba jirag im̄auano tai ka mia rim̄aukanio ka mia p̄eli mijikia rilarur kiano meuliano, naruei ba mir̄au ea toro na toru tai na vio nene, ba bagan kiano kiribue nalo. Meaku nei naio maka rimemedu ka rila im̄auano nei, bior naio bel ka kiribue jibe ka kito kulo Ju dolu nalo, mia nina be im̄auano takurano ga napano naio mijikia rilealio.

<sup>16</sup> "Naruei naio mir̄au jibe na bano-o, mia maka avar sinaniano vanio, a maka m̄arabo tai ka rileal sano sinaniano eaio, mila jijer naio nam̄ariga. Naio jijer jibe na bano-o mila naio jidom sian jum̄ano rivan ea basaro na sinaniano torogio na menunu bija botuotu na kon nam̄a kiano toro na toru naio jom̄a bagan ka kiano kiribue nalo ajenio. <sup>17</sup> Mia bogo napano jidom ka rila tibe na, naio bitilubar naio bereio, naio mial ka kiano bijuku m̄eteano ga mila lelan naio bereio. Mo naio tinien maio bereio ka karam̄ano bija kiano vonuo, naio berinavo 'Riano ga, kiniou nomiavovu toru laka. Kiaku bijuku m̄eteano ga mila kiniou nam̄aro ka vituiano ea vio nei, mia kosidomii von nalo nam̄a atibe ka tomu na im̄auano ga na teta kanano. Naio jom̄a jian sinaniano novo nalo telabo banlo ka legiano nonovio ga, maka ajikia asen nonovio. <sup>18</sup> Ver tibe na, bo laka ka kiniou nalavan ka navan bereio ga, noim̄au kija ga tavukialo. Mia kiniou nava naial teta, never kanio, neverinavo "Aiou teta, kiniou namila burum̄ara kariano va tai ban Atua, a banso bunu. <sup>19</sup> Vonganei, maka bunu rimemedu ka jau keial kiniou tibe ka nebe kenerimo tai, mia nobika denso ka tiniem r̄ia kiniou ka noim̄au kija ga tavukia nalo nam̄a amim̄au kanamo." <sup>20</sup> Mia naio mila vatitig kiano jidomiano jibe na bisi, naruei naio jumolu, binimej ju lilie ju lilie, binimej boru ea karam̄ano.

"Mia naio maka rijikia, mia karam̄ano naio jo tinien maio ka naio julaka ga, naio jom̄a jirarag lili m̄arabo ka p̄eli mia naio rimej. Mia bogo na naio ju koalabo ka kunuano kia ga vo, mia karam̄ano bitilubar naio, tinien miia naio-o mia,

ana jikiti ka riva rivitavo vijaio. Mia bogo napano naio binimej bokar kenerinio nene, miabukario ka jum̄ano be juo, maka sidom tuvanio bereio. <sup>21</sup> Ana m̄eaku mil ban karam̄ano naruei, berinavo 'Aiou teta, kiniou nomila burum̄ara kariano va tai ban Atua, a banso bunu. Vonganei, maka rimemedu ka jau keial kiniou notibe ka kenerimo.'

<sup>22</sup> "Mia karam̄ano berbureio, bio kiano tomu na im̄auano nalo, berinavo 'Ai, kamiu kuvila soḡeli kuva, kuvar kulur̄arauo na bo laka, vija kiano kulubue na jaano, a kiano p̄ejelinio, vite nalo na jibe na, kuvar kumei kuviya eaio. <sup>23</sup> A kiribue m̄arauo nam̄a roju rabagan vurua m̄adigdig kirinovo na, kamiu kuva kuvueio, ka kito rala sado sinaniano tai ka ramijikia rasaaro kitoliko keneriku maratou nei. <sup>24</sup> Bior keneriku nei, naio m̄aro ruei, mia meul bereio; naio ba kovio, mia kito romileal naio bereio.' Ana ka bogo na, nalo abukudel ka jokoluolu na m̄eaku neibano.

<sup>25</sup> "Ana ka bogo nene, kiritete motoru naio bavenei ea tiniavio, ba jo mir̄au ruei, avona kario ana naio binimej bere vonuo. Mia bogo na naio binimej vaataro ka vonuo, naio mijog ka ajum̄a amioiou, a mijog joa na voluano jo jaburu bunu. <sup>26</sup> Ana naio mial nalo na im̄auano nei tai, bika denio, berinavo '?Ei, venia na jibe na nam̄aaju amila vonuo jibe na?'

<sup>27</sup> "Ana toro neibano berinavo 'Ai, abe kuruamo m̄a na! Naio binimej bere ruei, meul bo kia ga vo. Tenene na, karam̄ano naio jidom rila sano sinaniano tai. Amue kiribue m̄arauo nam̄a na ruei!' <sup>28</sup> Mia bogo napano motoru mijogio naio tinien mimi, maka riva joomo naliko. Naruei karam̄ano binimej mil banio, ka rivuru naio riva joomo, mia naio miilkue ga ka rivano. <sup>29</sup> Naio ber ka ga karam̄ano, berinavo '?Teta, yuka vio ruei nam̄a kiniou nojor̄na nomim̄au kanamo ea vio nei? Kiniou nomidu niomo batitig bo ea vite nonovio, mia jau maka lele kala titai tibe na van kiniou. Kiniou maka lele neial ka napano jau koue kirikiti nani tai van kiniou bogo tai ka nala sinaniano tai vija kanaku bilbilu nalo. <sup>30</sup> Mia bogo napano ga jau komial kenerimo novo na naio binimej vonuo bereio, ana kojumolu komue kiribue m̄arauo novo nam̄a rojum̄a rabaganio jo mijabo m̄adigdig bo na. ? Mia tete na naio mila venia bo ruei banso a? Naio bar bulag kanamo burum̄ara puruveru togio ruei, naio ba jen puruveru nene ka ga m̄a mior ka tire nalo ga, bano-o miakon batitig garuei. ?Peli bajago na naruei na jau tiniem jii, tenene na jau komila sano sinaniano kanamo a?'

<sup>31</sup> “Mia karamġano tinien miia motoru nei bunu, ana naio berkanio, berinavo ‘Ei, keneriku, kiniou maka mġa noto nosidomii tibe na liki. Jau komila kiniou najaaro toru ruei, napano mġa kojo bija kiniou damariga, a kanaku saba nonovio na ju, kiniou namijamo ka nonovio ruei banso. <sup>32</sup> Be riano ka keneriku maratoru na naio milaluvu mġarabo na kiano meuliano, mia bogo na naio bilig naio binimei bereio, kiniou tiniek miia naio, ana namial jibe bo ga ka kito rasaaro ka naio, rala sinaniano tai kitoliko. Kuruamo na naio mġaro ruei, mia meul bereio; naio ba kovio, mia kito romileal naio bereio.’”

Naruei Yesu ber ka Varisis nalo, naio berinavo “Mo, jamerijiano nei naio bisi naruei ea vio na. Mia jibe ka napano naio berenio, bo ka toro napano milaluvu mġarabo, naio monoka rivilig naio bereio, tavukia maratoru nei. Mia kamiu monoka kuvitkar vatitigio bunu ka mia kuvitavukia re motoru nei, napano kiano jidomiano kirisikili laka, naio mijoku ka kuruano napano bilig naio ka kiano bajag moruo ruei.”

## 16

### *Jamerijiano na bajago na aiġau vija puruveru*

<sup>1</sup> Iorou kanio, ana Yesu mil ban kiano naiaagogoano nalo, naio berii jamerijiano tai banlo, ana naio berii toro na iġauano tai. Toro nene, naio mial ka mia kiano boru rivukular naio, naruei naio jumolu miġauka vite tai ka mia iorou ana kiano meuliano rivu ga. Jamerijiano nene naio jibe nei, berinavo “Toro na toru tai, naio bitirilar kiano toro tai ka rivitkar kiano puruveru nalo. Mia bogo tai, iliano binimej bokar naio ber kiano toro nene naio jomġa jen kiano puruveru nalo, jomġa mila lelan kiano saba nalo. <sup>2</sup> Naruei naio bio kiano toro nene binimej mial naio, mil ban berinavo ‘Ei, tomu nalo amidu kanamo veriiano ban kiniou ruei. Kiniou namial bo ka mia nodu larso den iġauano na bereio, mia jau kobisi ga. Mia beamu ka na jau kavano, nojodom ka jau kavatitig saba nalo beamu vo, ka mia kiniou namijikia noviti jabue naġa tomu nalo amila jau kiniou.’

<sup>3</sup> “Mia toro na iġauano nei naio mijog bova, berinavo ‘Riano, vonganei bova nono naruei. Toro na toru midular iġauano novo nei den kiniou, maka nejjikia ka mia kiniou nesen venia naruei. Kiniou nojotano ea iġauano nei kirisio ruai, mia maka bunu ve kiaku moroano ka nava noiġauka tiniavio bereio, a kiniou maka nosidom natan ea yimo nalo karġa

noiniogiog sinaniano den tomu nalo bunu. <sup>4</sup> Mo bo ga, kiaku mġarabo naio tibe nei. Mia note vatove kija bereio tomu nalo kialo jabue nalo, mia asaaro ka kiniou-o mia monoka avitkar vatitig kiniou ka bogo na ver toro na toru rivukular kiniou den iġauano nei.’

<sup>5</sup> “Naruei naio ba bio nalo napano kialo jabue jau toro na toru nei, nalo abinimej abeve terakurano eaio, ana naio berinavo ‘?Mo, jau komila jabue ea venia, a bokar vio?’ <sup>6</sup> Ana naio berdoġe, ber ‘Titikivaka basidobidobi duelimo toromomou takurano [100].’ Ana toro neibano berkanio, berinavo ‘Mo, mia kito juo rete rivatove ga. Ninei be kanamo jabue nene, jau kototano ana koyolkon bulag soġelia nana beamu, mia kovivitaia kar ve duelimo va limo [50] ga.’

<sup>7</sup> “Mia naio bano, ana dolu binimej, ana naio bika denio, berinavo ‘?Koig a jau, kanamo jabue venia?’ Ana naio berdoġe, ber ‘Bake na uiti tormomou takurano [100] ga.’ Ana naio berkanio, berinavo ‘Mo, mia kito ve juo rete rivatove ga. Ninei be kanamo jabue nene, jau kototano, ana koyolkon bulag soġelia nana beamu, ana kovivitaia kar ve duelimo va arolo [80] ga.’ Naruei naio mila jibe na-o mila nonovlo abiniu.

<sup>8</sup> “Ana iorou kanio, ana toro na toru nei naio bitilubar vite nei, ana naio ber ka kanano toro naġa jenjen kanano puruveru nalo beamu, naio berinavo ‘Riano ga, jau kobina vatitigio ka kiniou, ana namial jibe kanamo masouano tenia, jau kobe pariparimo kija ga na.’”

Naruei Yesu berinavo “Kamiu kumial kulorinio nalo na yetemeriba nei, bogo naġa amiġau bija puruveru, mia abe masou ka bo, nalo amijikia bajago na ala bilbilu vija tomu nalo, ka mia tomu nalo nene ala rivu kalo iorou bereio. Mia kiniou nemial ka napano keneriku nalo na miamoiano, va telabo nalo maka ave masou batitig rivu ka aiġau vija puruveru napano Atua jian banlo.

<sup>9</sup> “Neberenio batitig ban kamiu, neberinavo, Puruveru naio be tena yetemeriba nei ga, mia verenio mijikia riijasio ka kove bilbilu rivu vija Atua, bo ka koiġau kanio. Ver jau koiġau rivu vija puruveru ea mġarabo na memedu nene, mia iorou kanio ana Atua naio risaaro ka mia rivurso kavan ea vio na maka puruveru toaio, naina naruei be kanamo vonuo na mave.

<sup>10</sup> “Toro na bar ka naio batitig bo ea iġauano na kiritavaso ga, mia kito ramijikia ravarkar tiniedo ea naio ka mia naio rivar naio ka iġauano na toru bunu. Mia toro na miġauka maka rimemedu ea vite na telisu, mia naio riġau rivova lie vo ea

vite na toru. <sup>11</sup> Ver kamiu kuvar vatitig re kamiu ka iñauano nalo na puruveru na yetemeriba nei, mia kei bereio rivar Atua kanano tonovo nalo tua jumemiu ka ve kenemi? <sup>12</sup> A ver kamiu maka kuvijikia kuvimāu rimemedu rivija vite nalo nañā Atua mijamo ka ban kamiu ka bogo bulati ga ea yetemeriba nei, mia kei bereio rijamo ka mauo novo nalo napano ajua vio mave ave kenemiu damāriga?"

*Maka toro rijikia riñāu tubo ve juo kialo*

<sup>13</sup> Mia Yesu ber bunu, berinavo "Bereio, ver toro na iñauano tai, naio riñāu dede ga ea tubo ve juo ve vaarakurano. Ver tibe na, mia naio tinien tii tinene, mia riilkue ka dolu nene, pēli na mia rudu tinene, mia tuvan dolu nene. Kamiu maka kuvijikia ka kuvila ka napano kamiu kube tomu nañā amirñāu Atua kanano, a kube tomu na puruveru ka bogo nene bunu."

*Varisis nalo maka tiniel tii Yesu kiano iliano nalo*

<sup>14</sup> Ana na ea bogo na, Varisis nalo bunuaju kiano vo, ajunā amiagago ka iliano nalo nei. Mia nalo abe tomu nañā tiniel jii mēlea puruveru toru bogo nonovio, naruei nalo abital lelan ga mārabo novo na iñauano bija puruveru napano Yesu berial ban kiano naiagagoano nalo. <sup>15</sup> Ana Yesu mil banlo berinavo "Kamiu tiniemiujii ka kuvila ka napano mia tomu nalo aial kamiu tibe ka tomu na memedu nalo, mia Atua biti dulu venia napano joa kenemiu iviso. Vite miroano napano mā tomu nalo amiaia, aberinavo naio bo, mia ea Atua kiano vitiano tenalo na abova ga."

*Atua kiano navenatuboiano binimeini naruei*

*Mataiu 11:12-13, 5:18; Mak 10:11-12*

<sup>16</sup> Iliano dolu tai napano Yesu berenio, naio berinavo "Beamu, Niosi Moruo jo, napano niosi nalo na Mosis kanano bija niosi nalo na naverialiano nalo kanalo juaio, bano-o binimeini bokar bogo na Jone Baruei. Jone mirñāu bano-o bisi ana vonganei Ioluanu Vou na bo na Atua kanano navenatuboiano naio binimeini, naruei ajunā amioliolu ka janea vio reraio, mia tomu nañā ajidom ka ava jouro eaio naaju amila vio jikili ka ajogkario. <sup>17</sup> Mia nina maka rila ka tuboiano na Atua kanano napano joa Niosi Moruo naio bova ruei. Pēli vio mave a yetemeriba nei nalo ava kovio ga, mia kiri māriliano na tuboiano nei maka rijikia riva kovio bogo tai ka tumolu tu re."

*Maka rivu ka kito rotuvan koado nalo Mataiu 5:31-32, 19:9; Mak 10:11-12*

<sup>18</sup> Iliano dolu tai napano Yesu berenio, naio berinavo "Ver toro tai riilalar koano, ana naio riva rivuru tira dolu, mia Atua mialio ka toro nei naio jo mila siakaiano bija tira dolu nei. Be verare ga bunu ka ver toro tai soro ka tira tai napano koano na beamu miilalar naio ruei: toro nene bunu mila siakaiano."

*Jamerijiano na toro na sanibaiano bija Lasaros*

<sup>19</sup> Yesu ber jamerijiano nei bunu, napano naio ber jibe nei, berinavo "Toro tai, junāno bujo toru laka ka vite na bo nalo miroano, naio miyovovua naio bo laka bogo nonovio, a legiano nonovio amirñāuka sano burumāra sinaniano novo nalo. <sup>20</sup> Toro dolu tai naio bunu jo, napano mā bogo nonovio amidudu naio binimeini amidu naio jo tavio ea burusila na burumāra yimo na toro nei kunuano napano be kiano saba telabo. Toro nei, naio be toro tai na maka ve kiano saba tai, naio be toro tai nañā jo miogio sinaniano, niabene nalo vio bujo ka meniko, a siano be Lasaros. <sup>21</sup> Amidu naio joa vio na ka pēli mia naio mijikia riniog sinaniano nalo nei torogio nañā toro na toru nei jen digio ju, mia makanio. Naio jo miog kuleio ga jibe na, naliko kuli nalo napano abinimeini amiom kanano meniko nalo."

<sup>22</sup> "Milala jibe na bano-o na tete nei naio māraro, ana na nailiano nalo abinimeini amidular naio, aba amidu jo tivelinio na Epraamo, ea vio mave. Ana maka vesiuo ana na toro na toru bunu māraro, ana ajivinio. <sup>23</sup> Mia abuku deven naio ban ea sebi, napano mijog naio bova-o mia bova laka, mia iorou ana naio jirarag bavini, mial koalabo laka, naio mial Epraamo naio jo, a mial ka napano Lasaros jotano naljuo naio, abe juo ajunā ajinan. <sup>24</sup> Ana naio bio banlo, berinavo 'Aue-e, karamāku Epraamo, kovijuku bo tiniem riia kiniou liki, jau keiila Lasaros rimeini rudu juluvati mārjukjunāno titi ka kiri uei tai, ka titi ka minaku. Bior vonganei sebi jijen kiniou mia nomijogio bova toru nei.'

<sup>25</sup> "Mia Epraamo berdoŕeio, berinavo 'Keneriku, jau kosidomial bereio meuliano novo nanua beamu. Ka bogo na, jau kobokar kanamo vite nonovio napano jau kojidom mēlea bo kaso, mia kiri tavaliki Lasaros nei, ea kiano meuliano re nua, vite nonovio maka tai rimelumu van naio. Vonganei, naio mije jogvuiano ea vio nei, ana jau komijog bova toru liki ea vio na. <sup>26</sup> Mia be vite tai ga, naio maka

rijikia riviedu ka rijjaso, bior Atua mila buruñara vio kiri bululuo tai napano jo iviso bure ka kito juo, ka rila ka toro rijikia re taluvo ea vio nei ka riviedu rialso, a maka rijikia taluvo ea vio na jau kojoaio ka rimeĩ ea vio nei.'

<sup>27</sup> "Mia toro nei bika bereio, berinavo 'Teta, aver tibe na, kiniou nabika jikili banso ka keila Lasaros rivatove bereio ea karamñaku kunuano, <sup>28</sup> bior kuruaku nalo jimo aju keano vo. Bo kanio Lasaros riva ridu tiniemaiano vanlo, ver ðeli mia nalo bunu amei ajoru ea jogvaiano nei na.'

<sup>29</sup> "Mia Epraamo berdoþe, berinavo '? Mia bior vaio ana monoka Lasaros naio rivano? Nalo ajuñña abar Niosi Lu ruei, napano vivitauiano lu na Mosis kiano bija naverialiano nalo juaio ruei. Bo ka avuluku nina, ka mia aleal vite nonovio juaio.'

<sup>30</sup> "Mia toro nei naio jo jikili kia navo, naio berinavo 'Teta Epraamo, ðeli mia maka ajikia ala nina na? Mia ver toro tai rimeĩ bereio ea nañariano, river vite nonovio kalo, mia monoka aviliglo kanio na.'

<sup>31</sup> "Ana Epraamo berdoþe, berinavo 'A verenio nalo na maka asidom ajog vaio napano ñña Niosi Lu berenio, maka bunu ve titai bereio ka napano rijikia rilalo amoneaio. Peli toro tai rimeĩ bereio ea nañariano, river vite nonovio nalo vanlo, ðeli na venia, mia asidom re ka amoneaio ga na.'"

## 17

*Bajago na ala jukujukuano rivan toro dolu*

*Mataiu 18:6-7,21-22; Mak 9:42*

<sup>1</sup> Ana Yesu ber ka kiano naiagagoano nalo, naio berinavo "Mia jukujukuano nalo amijikia amei bogo nonovio ga, mia toro napano mila vite tai napano ñña buru jukujukuano jo binimeĩ vaataro, mia rivova laka vanio. <sup>2</sup> Ver aiorikar puruveru tai toa burujono ana avuku naio riva ea buluniogovu, nina na be vironiano tai napano melala ga. Mia toro nañña mila kanaku tete nalo nei tai juvan kiniou, mijoru ea kariano ana maka bunu tu sikili ea kiniou, mia toro nene naio rivar vironiano tai napano kirisikili laka riva lie vo tovulu ninei. <sup>3</sup> Ver tibe na, monoka kuvitikar vatitig kenemiu meuliano nalo bogo nonovio, ka mia ñña kala re jukujukuano rimaluvo ka kiamo bilbilu nalo."

*Bajago na koviekokoa kuruamo*

Ana Yesu berenio, berinavo "Ver jau keial ka napano kuruamo naio jo mijoru

ea kariano, monoka keil van naio ka kovururirio, mo ver naio rivilig naio, monoka jau koviekokoa naio. <sup>4</sup> A ver naio rila rivova vanso ve va aluo ka legiano ve takurano ga, a bogo nonovio, naio mila kirivova karina naio ber vonga berinavo 'Aire koig, aua namila bulagso toru laka. Naber bo ka jau, koviekokoa kiniou,' mia jau kala tuññabe? Monoka jau koviekokoa naio ve va aluo nei nonovio riviniu."

*Moroano na viekouoiano*

<sup>5</sup> Ana atevi nalo abika den Yesu, aberinavo "Tubo, kumemi numisidom ka jau kala kenememi viekouoiano rimeĩ sikili lie vo."

<sup>6</sup> Naruei naio berdoþe, berinavo "Ver kamiu kuvika kiniou ve telisu ga, tavukia kurukuti ñarabako, mia ver kenemiu viekouoiano nene naio sikili rivu, ana mia kumijikia kuver ka burupati burujou yako kuverinavo 'Jau kataluvo den jelemo na vija kanamo pati nalo, jau kava kotu koiluo ea tinia tei iviso,' ana mia naio rimonea kamiu."

*Toro na riñau toro na toru kiano monoka saaro ga ka riñau*

<sup>7</sup> Ana Yesu berinavo "Ver kamiu tai naio ve toro na toru tai, a kanano toro tai toñña rila kiano iñauano. Peli naio riva riñau ea tiniavio, ðeli na rivitikar kiano temeul nalo, ðeli na venia, ana verenio kijev bogo na naio rimeĩ bereio ea iñauano, mia toro na toru nei naio river venia kanio? Maka rijikia river kanio riverinavo 'Mo, jau komei kototano vija kiniou, kito ve juo rosinan,' bior naio be kiano toro na iñauano ga. <sup>8</sup> Mia toro na toru monoka river kanio ga riverinavo 'Mo, mia kava kovorosebi beamu vo. Verenio siniano rimenoko, ana kava koyovovua so rivu, ana kavar saku rimeĩ ka nesenio, a nomunuio, bisi, ana mo jau komijikia koviovio samo.' <sup>9</sup> Mia bogo napano toro na iñauano nei mila nonovio vite nalo nañña toro na toru ber ka naio, mia toro na toru maka rijikia river buruñara siva tai vanio, bior nina be kiano iñauano ga. <sup>10</sup> Mia kam bunu monoka tibe na. Verenio kamiu kuvila vatitig nonovio iñauano napano Atua ber ka kamiu, rivano-o riviniu, mia kuver ga tibe nei, kuverinavo 'Aa, nina maka ve titenia na. Kito rala ga venia napano memedu ka kito ralaio, tavukia Atua kiano tomu na iñauano nalo ga.'"

*Yesu mieliel ka tomu na burumieni nalo duelimo, mia takurano ga ber siva*

<sup>11</sup> Ana ka bogo na, Yesu nalo aju amiel kia ga vo ka avavin Yerusalemo, ana kialo ñarabo jel bure tanobuku juo nei Sameria

bija Kalele. <sup>12</sup> Naruei nalo amiel bano-o, vaataro ka ayotuba ea m̄arkomeli tai, abitavo bija taara tai na tomu na burumieni, nalo duelimo, napano ajujuña ea ikiñarabo. <sup>13</sup> Mia bogo napano amial Yesu, abio jouo banio, aberinavo "Yesu, Tubo, nuber bo kaso tiniem riia kumemi."

<sup>14</sup> Ana bogo napano Yesu mijogio, naio ber kalo berinavo "Kamii kuva kuvar laka ea kulo lu nalo beamu vo, ka avitii veve niabemiu nalo ka aver niabemiu nalo ameravo ruei." Naruei nalo abano, ana bogo napano aju amiel abano, amiilo ka mokotenalo nalo aju abinimei meravo. <sup>15</sup> Naruei nalo tai, bogo napano mial ka naio binimei bo ruei jibe na, naio barpillig binimei, miaia Atua laka, <sup>16</sup> binimei mijorua tano ea Yesu jaano, ber siva kanio. Toro na, naio maka ve Ju tai memedu, mia naio be yati na Ju togio na Samaria. Mia nalo dolu na, nalo abe Ju memedu, mia nalo maka amei bereio.

<sup>17</sup> Ana na Yesu berinavo "Nalo napano niabelo meravo ruei, nalo duelimo, mia nalo kover dolu nene nalo be?" <sup>18</sup> Naina binimei bereio, naio be toro na vio dolu ga, mia ka venia ana naio ga takurano binimei bere ka rivamenea Atua, ana nalo dolu nalo maka amei bereio?"

<sup>19</sup> Naruei Yesu ber kanio berinavo "Koig, jau kotumolu keiel kava vonuo. Kiamo viekouoiano milarurso ruei."

*?Atua kiano navenatuboiano naio rime tum̄abe?*

*Mataiu 24:23-28,37-41*

<sup>20</sup> Ana iorou, kulo Varisis nalo abinimei abika den Yesu, aberinavo "Navenatuboiano na Atua kiano naña jau koma koberii vurua na mia kumemi nuvialio nagi?"

Ana na Yesu berdoŋe, berinavo "Atua kiano navenatuboiano naio maka rijikia rimeibe tibe ka titai napano toro mijikia rialio ka mirano. <sup>21</sup> Naio maka ve titai napano mia averinavo 'O naio naruei, jau komial naio jo binimei kia,' ŋeli na averinavo 'Naio nei jo binimei ruei.' ! Kamii maka kuvitilubarario, mia Atua kiano navenatuboiano naio ju iviso ka kamii ruei!"

<sup>22</sup> Naruei Yesu mil ban kiano naia-gaogoano nalo, naio jukunu banlo ber mia tum̄abe ka legiano na maaro nalo napano aju abinimei. Naio berenio "Iorou kanio ana mia kamii kuvilavio sikili ve toru ka kuvial bogo na mia kinioi Kulorinio Kenerinio noyotuba ea yetemeriba nei, mia nina maka ve kenemiu ka kuvialio. <sup>23</sup> Mia tomu nalo atuña averver averinavo

'Naio nei!' ŋeli na 'Naio yako!,' mia kamii kuvan re rivijalo, bior maka kinioi navo. <sup>24</sup> Mia bogo na kinioi Kulorinio Kenerinio nemeibe bere be riano rimonloglog legiano nene, mia aviniu avitilubarario, mia kinioi nemeibe tavukia vio bijioi tai napano rila niogovu rimerera ea vio tivelinio riva rivokar tivelinio dolu nene. <sup>25</sup> Mia maka ve bogo na vite nene vo, bior beamu ka nina, mia kinioi Kulorinio Kenerinio, tom na vonganei mia monoka ala kiki kinioi ka saba vetelabo, mia monoka avukular kinioi.

<sup>26</sup> "Rivano-o rivokar bogo na mia kinioi Kulorinio Kenerinio nemeibe bereio, mia tomu nalo atu vatitigio re rivu, rivare ga ka nanua amila ea bogo na tormoruo Noa kiano bogo. <sup>27</sup> Ka bogo nene, tomu nalo ajidel ka m̄a ajinan, a ajuña amunu vite nalo, ajuña amila soriano jibe na ga, binimeibe bokar bogo na Noa ba joomo ea kiano buruñara uako nanua naio miñaukano. Naruei buruñara ueimia binimeibe burubulag nonovio kialo meuliano nalo. <sup>28</sup> A ea bogo na Lot kiano jibe na ga bunu. Tomu nalo ajuña ajinan, ajuña amunu vite nalo, ajuña aban ea yimo na v̄ilv̄iliano a amila bijii puruveru, ajuña amim̄auka tiniavio, ajuña amim̄auka yimo, amila jibe na banbano-o, mia maka bunu tinielrimaio ka titai leleio. <sup>29</sup> Mia monloglog legiano napano Lot jumolu den kialo vio, mia sebi bija vovosebi na sebi jinano ajibirbil abavatove ea vio yauo, jijen nonovlo abinui abava kovio. <sup>30</sup> Mia kinioi neber ka kamii ka mia bogo napano mia kinioi Kulorinio Kenerinio nemeibe, mia tomu asidomial re titai, mia asidomial ga, mia nalo aillo va ka buruñara vite nalo na jibe nei amalmaluvo ea kialo meuliano nalo.

<sup>31</sup> "Ea bogo na, ver toro tai toña rivonvon ea kunuano mave ea ino, mia naio rial teneibe naio to rimeibe, mia ver naio rivatove, mia maka rivu ka rilavon ka rivar kiano saba joomo ea kunuano, mia naio monoka rivan ga tibe na. Mia toro naña miñau ea tiniavio, naio bunu maka rivu ka rimeibe bere vonuo, mia naio monoka rivan ga tibe na. <sup>32</sup> Kam tiniemiu ribobogia re Lot koano, napano jiraragodi, mia naio binimeibe puruveru ju. <sup>33</sup> Toro naña jidom rilarur kiano meuliano ga, mia naio rila luvuio, mia nana m̄a mijamo ka kiano meuliano ba kovio, mia rilarur naio bereio. <sup>34</sup> Kinioi neber ka kamii ka ea bogo na, ŋeli ka bogiano napano mia toro tai naio koano amon ea m̄alo jogu, mia amei avurular tinene ga, mia atuvan tinene tobo. <sup>35</sup> ŋeli na tira ve juo atu vio takurano avijii salo baba, mia ve takurano

ga rivano, mia tinene naio tobo. <sup>36</sup> [Peli na tomu ve juo atu aim̄au biju ea tiniavio, tinene tuvan vio rivan mia tinene naio sikili tumomou tu.]

<sup>37</sup> Naruei kiano naiaagoano nalo abika denio aberinavo “? Ana Tubo, vite nalo nene mia ayotuba ea vio be?”

Ana naio berdoṑelo, berinavo “Ea bogo nene, mia tavukia napano ver tena m̄aro tai jo kovio tai. Ea vio na naruei, menu nalo nam̄a ajenjen tena m̄aro, mia nalo amei kanio, monoka nalo ve miroano ea vio nene. Ea vio na vabe napano kariano joa, vio na naruei ve natibureano eaio.”

## 18

*Jamerijiano na tira na jegi ban kiano tubo bano-o mia tubo tinien mītaio*

<sup>1</sup> Ana Yesu jii jamerijiano dolu banlo, ka tunukakarlo ka m̄a tinieo veve juo re bereio ea kanalo volkouano, mia atu sikili dam̄ariga eaio, abolkouo rivano-o mia avokar verdoṑeiano eaio. <sup>2</sup> Kiano jamerijiano nei, naio ban jibe nei, berinavo “Be komeli tai, tubo nene naio be toro kouo tai, be toro tai nam̄a maka rialerinio ea Atua leleio, maka rimerou kanio, a maka tovon tomu nalo bunu. <sup>3</sup> Ana taanou tai bunu joa vio na, napano toro tai jom̄a mila bulag kiano saba nalo bogo nonovio ga, ana taanou nei naio jo ba jo jegi ban kanano tubo, jom̄a mila kiano veriiano ka toro neibano, berinavo ‘Aiou, jau monoka kala titai ka tete na, naio jom̄a mila kiki m̄elea kiniou mia.’ <sup>4</sup> Mia tubo nei maka tinien riia tira nei, naio miovo ka ril van tete neibano. Mia naio mila jibe na banbano-o, mia tira nei naio jom̄a monmon ga ba jegi ban kanano yubo.

“Ana iorou kanio ana tubo nene berenio ‘Kiniou nebe toro tai nam̄a maka nosidom̄ial ka nala vaio nam̄a Atua ṑeli toro dolu ber ka kiniou ka bo ka nalaio. <sup>5</sup> Mia tira nei naio jom̄a binimej jegi vururu ban kiniou mia maka nosidom̄ nala tena m̄a jom̄a berenio. Mia naio jom̄a binimej bika jibe na, mila kiki tanea kiniou toru laka, ṑeli mia nala ga venia nam̄a naio jom̄a bikanio. Ver ṑeli mia tinieku rim̄aro ka nojog kiano tegiano.’”

<sup>6</sup> Ana Yesu mil ban nalo nam̄a ajum̄a amije tilinielo ka jamerijiano nei, ana naio berinavo “? Kamiu kuviagago vatitig ka toyovo nei kiano iliano nam̄a berenio? Bior tira nei jegi va telabo banio, mo mia naio monoka sidom̄ii vite nam̄a tira na naio jom̄a bikanio. <sup>7</sup> ? Mia tum̄abe ka Atua na mave? ? Bogo na naio mijog ka kiano tomu nalo nam̄a bijauia bula-glo, ajum̄a ajegi ban legiano a bogiano,

mia naio rijikia to vesiou tibe na rivano-o mia rila re titai vanlo? <sup>8</sup> Makanio, mia neber ka kamiu ka ver naio rijog ka m̄a kamiu kumitum̄a kubolkouo jikili dam̄ariga banio, mia naio tumolu soṑeli ga tulaka ka rijai kamiu. ? Mia nejidom̄ nevika kamiu bunu, ka ver bogo na mia kiniou Kulorinio Kenerinio nemei bereio ea yetemeriba nei, mia nemijikia neial ka tomu vetelabo atu sikili ea kiniou tibe na, ṑeli na mia ve re tai kovio ga?”

*Jamerijiano na toro nam̄a be m̄arou ka kiano bajago na memedu*

<sup>9</sup> Bogo na Yesu jo bija tomu nalo, naio bitilubar ka napano nalo tealoo ajum̄a abe m̄arou toru laka,aju aberiam̄a kialo meuliano memedu bo ruei, mia ajum̄a abitii saia tomu dolu nalo, amialo jibe ka maka avu tibe ka nalo. Naruei naio berii tomu nalo jibe nei, jii jamerijiano tai, berinavo <sup>10</sup> “Tom juo, aba joomo ea Atua kunuano monloglog bogo na volkouano. Nalo tinene, naio be Varisis, mia tinene, naio mila in̄auano tai napano tomu nalo maka tinie tii naio riviorio, naio be toro na takis. <sup>11</sup> Mia bogo na Varisis naio jo jumolu ka rivolkouo, naio ber jibe nei, berinavo ‘Atua o, kiniou neber burum̄ara sivaiano toru laka nei banso, napano kanaku meuliano naio bo lie jovulu nalo dolu nei kanalo. Nemiaso napano kiniou maka natavukia tomu na vinauano nalo, ṑeli tomu na amijukubin toro, ṑeli tomu nam̄a amila siakaiano, ṑeli tomu na takis jibe ka ninej jumolu ju nei. <sup>12</sup> Makanio, mia kiniou nojor̄a nomila bo laka dam̄ariga, bior kiniou nomondulu ka nojor̄a nobolkouo banso ea legiano juo ka sude takurano, a ea vite nonovio nam̄a kiniou nabokar ka jum̄aku, verver novokar ve duelimo mia monoka nodu ve takurano vanso dam̄ariga. Vite nalo na naruei nam̄a kiniou nojor̄a namilaio ana mila kiniou nobo laka ea miramo.’

<sup>13</sup> “Mia toro na takis naio jo mijog bova bior kiano kariano tealoo nam̄a milaio, mia niabene buru vurebure jibe Atua bitii kiano meuliano maka rimemedu leleio. Naruei naio niabene ṑili ka riva vaataro keanio, naio jumolu ju koalabo ga, mia maka sidom̄ sirarog rivavin mave, naio jurubanini naio jom̄a mijubaluba bairene, naio jegi naio berinavo ‘!Aiou Atua, jau kala lup̄ilup̄i kiniou, a tinien riia kiniou, kiniou toro na kariano.’

<sup>14</sup> “Mo kamiu kumisidom̄ii von: mia Atua naio saaro ka tomjuo nei na vabe kiano volkouano? Nao-o, toro napano bitilubar kiano kariano, naio mijog bova biorio, Atua mijelar kiano kariano. Mia

dolu nene, naio ban bere vonuo napano kanano meuliano jo jibe ka ga bogo na naio binime. Toro naŕa jo bavavin ea naio, mia Atua rudu naio to yetano, mia toro naŕa jo rindu naio jo yetano, mia Atua rivitiri lario."

*Yesu milivu ka kiritete nalo*  
*Mataiu 19:13-15; Mak 10:13-16*

<sup>15</sup> Ana ka bogo na, nena nalo tai abar kenerilo solbouo nalo abinime. ea Yesu, ajidom naio tokol lo, rilivu kalo. Mia bogo na naiagagoano nalo amileal, aberburelo, aber avatavio bereio.

<sup>16</sup> Mia Yesu bio ban tire nalo, ber amei bo ka ga aialio, a naio ber ka naiagagoano nalo, berinavo "Kamiu kuverbure re kiritete nalo na, kuvijamo kalo amei aial kiniou, bior kiritete nalo na, tomu nalo napano ajavukia nalo, nalo ga naruei aju aba jouro rueli ea navenatuboiano na Atua kanano. <sup>17</sup> Kiniou neber be riano ban kamiu, ka toro na ver sidom navenatuboiano na Atua kanano, naio monoka rila naio tibe ka kiritete nalo nei, ver ŕeli, naio maka rijikia riva jouro eaio."

*Kulo Ju nalo kanalo toro na toru tai jidom rivokar meuliano*

*Mataiu 19:16-30; Mak 10:17-31*

<sup>18</sup> Avona bisi, ana tubo tai binime bika Yesu, berinavo "Naverloglogiano novo, neber bo kaso, jau koverial van kiniou ka monoka nala venia ka mia nemijikia novokar meuliano na maka rijikia ribisi."

<sup>19</sup> Ana Yesu berdoŕe, ber "¡Ei! ? Jau komijikia venia, ana kobio kiniou kober kiniou nobo? Maka ve toro dolu tai na rivu ve riano, mia Atua ga takurano. <sup>20</sup> Mia jau kobika kober juŕabe ka toro tai na jibe ka jau mijikia rime. rivu ea Atua mirano. Mo, ŕeli jau komijikia batitig tuboiano nene nalo rueli naŕa aber ka: Jau kala re siakaiano, jau koue taŕaria re toro, jau kovina re, jau kala sibi re, jau kotovon karamamo naio koniomo ga."

<sup>21</sup> Ana tete nei naio berdoŕe ber "Nao, kiniou nomijikia nono tuboiano nalo naŕa jau kober kiana, mia nomijikia na ver ka jau ka kiniou nojoma nabokar batitiglo jikar ea bogo na kiniou nobe meaku kia ga vo. Binime bokar vonganei, maka nalabelea tai."

<sup>22</sup> Mo bogo napano Yesu mijog ka napano naio ber jibe na, naio berenio "Kirinovo, mia tivelinio na jau, vite tai ju keano vo. Jau monoka kava koviliŕili nono ka kanamo saba nalo na miroano na, mia jau kavaruveru nene, kavano katan ka van talimasa nalo. Ver jau kala tibe na, mia ve kanamo vite novo nalo ve miroano ea vio mave. Mo, jau kava kalaio, avona bisi ana komei katakisor kiniou." <sup>23</sup> Mia

bogo napano toro nei mijog iliano nei, naio mijog kiano iviso jegi toru laka, kiano jidomiano kiri temi mele, bior naio be toro na juŕano bujo ka saba toru laka.

*Toro na kiano saba toru, kirisikili ka naio riva jouro ea Atua kiano navenatuboiano*

<sup>24</sup> Naruei Yesu bitii toro na toru nei bano-o, kar na naio berinavo "Ver toro tai na kiano saba toru, ver naio sidom riva jouro ea Atua kiano navenatuboiano, vite na kirisikili kija na. <sup>25</sup> Nao-o, kiniou neber ka kamiu, ver kamele tai riovodulu ea bulumirano nitil tai, nina be kirisikili laka, mia ver toro tai na be kiano saba toru mia naio sidom ka riva jouro ea Atua kiano navenatuboiano, nina naio kirisikili lie vo ka nina."

<sup>26</sup> Mia nalo napano amijog iliano na, nalo abamenea naio kanio, aberinavo "¡Tomnei! Ver tibe na, mia kei naio mijikia rijev meuliano?"

<sup>27</sup> Mia Yesu naio berdoŕe, berinavo "Nao-o, toro maka rijikia rila naio rijev meuliano, mia venia naŕa toro maka rijikia rilaio, mia Atua naio mijikia rilaio rivu ga."

<sup>28</sup> Ana Pitere naio bika, berinavo "¿ Ana mia tuŕabe ka kumemi? Kumemi numituvan kenememi vonuo nalo rueli, ana kumemi nubinime numitakisorso."

<sup>29</sup> Mia Yesu naio ber ka kiano naiagagoano nalo, naio berinavo "Kamiu kuvisidomii melea re tivelinio na. Ka toro kei napano ver tuvan kiano vonuo, ŕeli koano, ŕeli karamano a kenieno, ŕeli na kenerinio nalo, mia ver naio tuvan vite nalo nonovio na rivior inauano na Atua kiano navenatuboiano, <sup>30</sup> mia naio rijev meran bere kiano saba nalo na jibe nei ve miroano lie vo. Nina ea bogo na naruei, a iorou ka bunu ea bogo na ju binime, mia naio rivokar meuliano na maka rijikia ribisi."

*Yesu berial kiano mariano varolu nene*  
*Mataiu 20:17-19; Mak 10:32-34*

<sup>31</sup> Mia bogo na ajuma amiel abano, ana Yesu bio kiano duelimo ba juo [12] abinime kean naio, naruei naio ber kalo berinavo "Kamiu kuviagago vatitig rivu. Vonganei kito roju rabavin Yerusalemo kia nei, mia bogo na kito rovoru ea vio na, vite nonovio nanua naliano nalo abivituaio nua rueli ea tivelinio na Kulorinio Kenerinio, mia kamiu kuvial amalmaluvo takio.

<sup>32</sup> "Mia kamiu kuvial ka napano adu naio toa kulo Romo nalo juŕalo, ka mia aserei niadua rivanio, ala kiki naio, a avule titia naio, <sup>33</sup> a avitiv naio, rivano-o mia auebin naio rimaro. Mia ka bogoti ve tolu nene, ana mia naio tumolu rimeul bereio."

<sup>34</sup> Be kurano ka na Yesu berial vite nonovio meravo banlo jibe na, mia maka lele ajoglubarbar vatitigio rivu. Naio jibe ka napano amilavan iliano nei kalo, mila ana maka avokar batitig nioti na iliano nene.

*Yesu miñauka batitig merebono tai mirano*

*Mataiu 20:29-34; Mak 10:46-52*

<sup>35</sup> Mia Yesu nalo aju amiel abano, abinimej vaataro ka komeli na vio Jeriko, mia merebono tai joña jotano ea ikim̄arabo, naio joña mioglog sinaniano den tomu nalo nam̄a ajeljel ea m̄arabo nei. <sup>36</sup> Naruei merebono nei naio mijog ka Yesu nalo aju abinimej, naliko tiniobi nalo napano ajum̄a amiel bijaio, ana naio bika berinavo "Nalo na vio be na, ajum̄a amiel ka ava be?"

<sup>37</sup> Naruei nalo aberdoḡe aberinavo "¡E, abe Yesu na vio Nasarete ga, naio miel binimej jel kean kito ga!"

<sup>38</sup> Ana toro nei bio jouo, jegi ban Yesu berinavo "¡Yesu, jau Teviti kiano yati, kiniou nojidom ka jau tiniem riia kiniou!"

<sup>39</sup> Mia nalo nam̄a aju amiel jukamu ka Yesu, mijog ka m̄a naio bio jibe na, ana aberbureio, aber naio rimelumu ga. Mia tete nei naio maka sidom rijoglo, mia bio bereio, jouo lie, berenio "¡Yesu, jau Teviti kiano yati, neber bo kaso, tiniem riia kiniou!"

<sup>40</sup> Mia Yesu miel bano, mebi loglog vio nene, ana ber avuro toro nene rimej vaataro kanio. Ana aburio binimej, ana Yesu bika denio, berinavo <sup>41</sup> "¿Jau kojidom ka mia kiniou nala vaio kaso?"

Ana naio berdoḡe berinavo "Aiou, Tubo, kiniou nojidom ka miraku rivu, ka nejikia neial vite."

<sup>42</sup> Ana Yesu berinavo "Mo, vonganei kiniou nesian kiamo siraragiano vanso tibe ka na jau kobikanio. Kiamo viekouoiano milaso kovu bereio." <sup>43</sup> Mia monloglog bogo na, toro nene mirano binimej bo, ana naio joña miel naliko Yesu, naio joña miaia Atua toru laka. Mia tomu nalo bunu napano amial vite nei, amial bo laka, ajum̄a abamenea Atua siano biorio.

## 19

*Yesu biviuo naljuo Sakias*

<sup>1</sup> Mia Yesu nalo abinimej jouro ea komeli na vio Jeriko, ajum̄a amiel aban ka aiovodulio ga. <sup>2</sup> Mia ea vio na, be toro tai jo, siano Sakias. Naio be toro na toru ka nalo na takis ea tanobuku na toru na vio nei, mia bior naio joña miñau bova, joña mijukubin tomu nalo ka kialo puruveru na takis nene, mila jum̄ano bujo kanio,

kiano saba nalo miroano. <sup>3</sup> Mia naio bunu binimej ka bogo nei, jidom rial kija Yesu ka naio be toro na jum̄abe, mia tomu kinkin telabo aju vaataro ka Yesu, aju kovio amila vio telisu laka, mila naio maka rijikia rial vatitigio, bior naio be toro na bulati ga tai. <sup>4</sup> Mia mial bova ga, ana jikiti jukamu ka Yesu nalo, ba bokar buruviove tai, jakio bavim mave joa jaati tai, joreora ka mia Yesu nalo aiel amei, ka mia naio mijikia rial vatitigio.

<sup>5</sup> Mia bogo na Yesu binimej bokar buruviove nei, Sakias miilo ka napano Yesu jirarag bavim, mialio, mil banio berinavo "Sakias, jau katabulu soḡeli. Kiniou nomijoglubar ea kiniou ka banei monoka noto kija ea kiamo vonuo beamu vo."

<sup>6</sup> Mia Sakias mijogio, jumolu jabulu soḡeli batove, naruei buru Yesu ba vonuo ea kunuano, bija burum̄ara saariano tai.

<sup>7</sup> Naruei bogo na tomu nalo amial tenej, nalo telabo maka asaaro, amil mum̄io tertelisu, a berinavo "Toro na Sakias na, naio be toro tai nam̄a miñau kirivova, naio joña mijukubin tomu nalo bogo nonovio ga, mia kar vaio ana Yesu jidom riva to naljuo ea kiano vonuo?"

<sup>8</sup> Mia bogo na aju joomo kario, ana Sakias mijog lubar ka monoka naio rivilig naio, riyelar kiano meuliano, naruei naio jumolu berial ea Tubo mirano, naio ber "Tubo, vonganei kiniou nomijamo ka kiaku saba torogio ban tomu na abe taliñasa, maka ve kanalo titai. A venia nam̄a namila sibilili toro kanio, nebina kalo, mia navar meran bereio vokar ve va veri tukario."

<sup>9</sup> Mia Yesu mijog bo toru laka ka venia napano Sakias mijue bulagio banio, ana berinavo "Kiniou nemial jibe ka banei ioruriano na Atua kiano naio binimej bokar m̄aratavo nei memedu. Tete na naio milaluvu m̄arabo na kiano meuliano, mia naio bunu naio be Epraamo kiano bajulukuti memedu, naio be toro Ju riano, <sup>10</sup> mia kiniou Kulorinio Kenerinio nebinimej ea yetemeriba nei ka nesirago nalo nam̄a amilaluvu m̄arabo jibe toro nei, a ka nalarurlo."

*Jamerijiano na tomu nalo na abitikar kialo toro na toru kiano puruveru*

*Mataiu 25:14-30*

<sup>11</sup> Mo tomu nalo ajum̄a amije tilinielo ka Yesu kiano iliano nalo nei, naruei naio mil banlo ba ber jamerijiano tai kalo. Naio mial bo ka riverlogloglo ka jamerijiano nei, bior naio mijikia ka tomu nalo ajum̄a ajidom aber bogo na naio riva rivoru Yerusalemo, mia naio rila Atua kiano navenatubioano riyotuba kalo



ve vaarakurano ga ruei. Mia vonganei aju abinimei vaataro ka Yerusalemoe ruei, ana Yesu jidom riverlogloglo ka mia naio monoka tuvanlo beamu vo, karina mia naio rime bereio. <sup>12</sup> Naio ber kalo jibe nei berinavo "Be toro na toru tai, aber ka naio ka riel riva koalabo ea vio na parinio tubo na toru joaio, ka avitirilar naio ka rime rive parinio tubo ea tanobuku na kiano, karina, mia mijikia rime bereio rive tubo ea kiano vio. <sup>13</sup> Mia beamu ka bogo na maka rivan vo, naio bio kiano tomu nalo, nalo duelimo, mia mije puruveru banlo abeve terakurano. Ana naio ber kalo berinavo monoka aimāu rivija puruveru nei o-o mia bogo na naio rime bereio. <sup>14</sup> Mia tomu nalo na tanobuku nei amiolu titig toro na toru nei, mia bogo na naio ban kario, ana aberiio aberinavo maka bunu asidom naio ka rime rive parinio tubo kalo. Naruei amiila toru ba ban parinio tubo na toru, aber 'Kumemi maka nuvisidom nuvia kema na rime ka rive parinio tubo ka kumemi, kumemi maka lele garuei nuvisidom jau kodu burumāra sio na vanio.' <sup>15</sup> Mia parinio tubo na toru nei naio mila ga, ana toro na toru nei binime bereio ka rive tubo ea kiano tanobuku. Naruei naio binime bio kiano tomu nalo nei napano naio bar puruveru banlo beamu ruei, naio jidom ka rial ka amīāu eaio abokar puruveru vio bereio. <sup>16</sup> Ana toro na jukamu binime jikili jukamu ea toro nei mirano, berinavo "Tubo, kanamo puruveru takurano ga naio nei, kiniou nomīāu bija bano naio milelar duelimo bereio judu kano.'

<sup>17</sup> "Ana na toro na toru nei naio mial kanano toro nei mīāu bo, ana naio berkanio berinavo 'Bo mia bo, komīāu bo laka. Mia bior jau kobitakar batitig iñāuano telisu na nomidu joa jumāno na, vonganei nodu burumāra iñāuano tai vāso, nebitiri larso ka kovitakar kanaku komeli duelimo na tortoru.'

<sup>18</sup> "Bisi, ana naliano ka binime, naio berinavo 'Tubo, puruveru takurano nua komidu ban kiniou, nomīāu eaio bano-o nemijev jumo bereio judu kano.'

<sup>19</sup> "Ana na toro na toru berkanio, ber 'Kobo, jau bunu komīāu bo, mo mia kiniou nevitiri larso ka mia kovitakar kanaku komeli jumo na tortoru.'

<sup>20</sup> "Avona bisi ana na maariano nene naio binime, berinavo 'Tubo, kanamo puruveru na komidu ban kiniou, nomijuvalukoio batitig ka niakulmārauo tai, nomidu van batitigio jo, naio nei nomidu ber binime ka nodu vāso. <sup>21</sup> Kiniou nojo nomialso jibe ka kobe toro tai na

komijikia kavār bulag vite na toro dolu mije batitigio jo ve kanamo, a komijikia kejinan ea tiniavio na maka komebijaio. Kiamo bajago kirisikili kija jibe na, mila na kiniou nomerou kaso, tenene na maka nala titai ka kanamo puruveru nene, nomidukar batitigio jo bo ga.'

<sup>22</sup> "Ana toro na toru nei tinien jerio, naio berinavo 'Kaleliki, jau kober niegeniege kiniou kirivova tenia navo, napano kober nobe toro kouvo tai jibe na. Mia bo ga, mo kanamo iliano na mia serso bereio. <sup>23</sup> ?Ver kiniou nobe toro na jibe na, bior vaio ana komidukar kurano ka kanaku puruveru jibe na? Bo laka ka ver jau kodu riva toa yimo na puruveru, ka ver nemei bereio, ana nemijikia navar bulagio rivija boboti napano naio miin bulagio.'

<sup>24</sup> "Ana na toro na toru nei naio ber ka nalo dolu na ajikili aju vaataro, berinavo 'Kuvudular puruveru na den jumāno, kuvudu van nana mileal duelimo.'

<sup>25</sup> "Ana nalo aber ka toro na toru nei, aber 'Ana Tubo, naio bar miroano kiana, kiano duelimo ruei'

<sup>26</sup> "Mia toro na toru ber kalo, berinavo 'Nao-o, jibe na naruei. Nana be kiano saba telabo ruei, mia naio rivar ta bunu bereio, mia nana maka kiano titai mia naio rilaluvu venia napano be kanano telisu mugaruei. <sup>27</sup> Mia tivelinio ka kiaku uolu nalo nei, napano maka asidom neve tubo kalo, nejidom ka kuva kuvurulo amei ea vio nei, kuvuebinvinlo arñarñaro kamu ea miraku.'"

Naruei Yesu kiano jamerijiano naio binu ea vio na.

*Yesu binime boru ea vio nei Yerusalemoe Mataiu 21:1-11; Mak 11:1-11; Jone 12:12-19*

<sup>28</sup> Iorou ka napano Yesu ber iliano nei bisi ana naio jumolu, miel jukamu bano, burumārabo kalo abavin Yerusalemoe.

<sup>29</sup> Mia nalo abinime vaataro ka komeli juo na tertelisu nei Betevas bija Betani, ea tivelinio ka Burusuku na Buruolivi nalo. Ana Yesu mil ban kiano naiagagoano juo, berinavo <sup>30</sup> "Kuve juo kuviel kuvan ea komeli na telisu yako jo beamu vo. Mia bogo na ver kuva jouro eaio, mia kuvial togki tai amiorkar ju. Togki nene be mēaku ga, maka ala kor taakano vo, mia kuvijubarlar sano teli ana mo kuvuru kumei bere ea vio nei. <sup>31</sup> Mia ver avika den kam juo averinavo ' ? Ai, kumitu kumijubarlar sano teli ka venia? ' Ana mia kamiu kuverdoḡelo kuverinavo 'Tubo jidom temeul nei ka rila kiano iñāuano tai.'"

<sup>32</sup> Yesu ber jibe na kalo, naruei milalo abano, mia nalo amial jibe ka ga napano naio ber kalo. <sup>33</sup> Ana na nalo aba ajunña amijubar bulag temeul nei sano teli, mia bogo nanña ajunña amilaiio, ana sano taanou nalo abika aberinavo “?Ai, kumijubarlar sano teli ka venia a?”

<sup>34</sup> Naruei nalo aberdoĥelo, aberinavo “Makanio, Tubo naio jidom temeul nei ka rila kiano inñauano tai beamu vo.” <sup>35</sup> Ana nalo amijamo kanio, ana na nalo aburu togki nene binimeĭ ban Yesu, mia abisii bulag nñalo kulukoti nalo mave ea taakano, ana na amidular Yesu bavin jotano mave eaio.

<sup>36</sup> Ana Yesu midu togki nene, jonña miel bano, mia bogo na naio jo bano, mia tomu nalo abisii nñalo kulukoti nalo ea nñarabo, kanio mia Yesu kiano togki mijikia riel mave ealo. <sup>37</sup> Naruei nalo amiel ea Burusuku na Buruolivi nalo, bano-o abinimeĭ aboru ea vio na nñarabo mialolo batove ka rivatove Yerusalemo. Mia bogo na burunñara tiniobi na naiaġagoano nalo miroano amial ka Yesu jo miel binimeĭ vaataro ka vio Yerusalemo, mia ajidomial bereio burunñara inñauano nalo bija kijok-ijo nalo nanña naio milaiio, mia amial jibe ka napano kialo burunñara parinio tubo vou tai naio jo binimeĭ, mila na ajaaro toru kanio, aju abamenea Atua biorio. <sup>38</sup> Ajunña abiovio, aberinavo “!Atua loa laka, keilivu ka parinio tubo nei binimeĭ ea siamo! Burunñara merivuiano ea vio mave, kamiu na ea vio na mave kuvitirilal Atua siano, kiano mermerano bo mia bo!” <sup>39</sup> Mia ka bogo na, Varisis tealo aju iviso ka tiniobi nalo nei, mia maka lele asaaro ka na abitirilal Yesu jibe na, ana na aberii kanio, aberinavo “!Naverloglogiano, koverbure kanamo naiaġagoano nalo na ka auetuba kavuru kaso re tibe na!”

<sup>40</sup> Mia Yesu berdoĥe banlo, berinavo “!Ee, vede ga. Ver nalo aviovio tibe na re, ĥeli mia puruveru rera ga nei monoka nalo aviovio.”

*Yesu jegidu ka komeli lu nei Yerusalemo*

<sup>41</sup> Mia Yesu binimeĭ vaataro ka rivokar burunñara komeli nei Yerusalemo, mia naio jirarag ba jouro eaio, tinien miiaio, ana jġkar ka jogumirano jibirbil biorio. <sup>42</sup> Mila jibe na ana naio mil ban memedu, berinavo “Kiniou nomijog bova toru kaso. Ver jau kovitulubar ga venia miyotuba ea kiamo vio baneĭ nei! Atua jo mila kiamo nñarabo novo tai ka kojev tunñaro eaio, mia jau maka kovitulubar. <sup>43</sup> Mia monoka nover ka jau ka mia bogo tai rimeĭ easo napano mia kanamo uolu nalo ve miroano laka ameĭ kaso. Mia aseliviv

easo atukoso, a mia ayuku bijii borotano rimeĭ vio takurano, ve kialo nñarabo ka mia amijikia avavin ea kanamo burunñara tagvoru nalo. <sup>44</sup> Mia ameĭ jouro, aue vatitigso. Mia auebinvin kenerimo nalo, a mia ala bulag nonovio kunuamo nalo, avar bulag kiamo burukis nonovio avatove mia riviniu. Vironiano na jibe na mia rimeĭ easo bior ka napano jau maka kosidom kovitulubar ka baneĭ be kanamo bogo memedu ka napano Atua maluvo ka rilarurso.” <sup>45</sup> Naruei Yesu miel ba jouro ea komeli, mijaka ban ea Atua Soĥi kunuano lu, ana mial nalo nanña aju aminñau bior veru ea vio na. Naruei naio mijil dedade ealo, berinavo <sup>46</sup> “Atua ber ea kiano Iliano Lu, naio berinavo ‘Kunuaku Lu naio be yimo na volkouano,’ mia kamiu kubiliglar yimo nene rueĭ, binimeĭ jibe ka buluvae tai na tom na vinauano nalo kunualo.”

<sup>47</sup> Ana ka bogo na Yesu jonña bava joomo ea Yimo Lu legiano nonovio, naio jonña berloglog tomu nalo, mia tomu na tortoru ka kulo lu nalo naliko naverloglogiano na tuboiano nalo bija tomu nalo kialo tomu na tortoru maka lele asaro kanio. Ajunña ajiravo kavuru nñarabo ka amijikia ala titai ka rila Yesu monoka rinñaro. <sup>48</sup> Mia bedega, abitulubar ka maka ajikia aleal nñarabo tai, bior tomu nalo nanña ajunña amije tilinielo ka kiano verloglogiano, tiniel jii kiano iliano nalo toru laka, ajidom naio julaka ga.

## 20

*Navurinñaraboiano na vio Israel ajidom averbure Yesu*

*Mataiu 21:23-27; Mak 11:27-33*

<sup>1</sup> Mia ka legiano dolu bereio, ana Yesu ban bere joomo ea Yimo Lu na Atua Kunuano yako Yerusalemo, naio jonña berloglog tomu nalo a jonña mioliolu ka Ioluano Vou na bo banlo. Ana tomu na tortoru na kulo lu nalo bija naverloglogiano na tuboiano nalo bija navurinñaraboiano dolu nalo abinimeĭ eaio, abika denio aberinavo <sup>2</sup> “?Jau kover von ka kumemi, ka nanña jau kojonña komila jibe na ea vio nei ea keĭ siano? ?A keĭ ber kaso ka jau kala tibe na?”

<sup>3</sup> Ana Yesu berdoĥelo, berinavo “Mo, mia kiniou bunu nevika vikadeniano tai den kamiu beamu vo. Kiaku vikadeniano jibe nei, ber <sup>4</sup> ?Varueiano nanña Jone jonña mila nua ban tomu nalo, naio be vite tai napano Atua berkanio ka nña naio rilaiio, ĥeli na Jone ga naio jidom ka rilaiio? Kamiu kuver von nina.”

<sup>5</sup> Mia Yesu kiano vikadeniano nei mila amil toru banlo, ajunña aberinavo “?Mia

kito rover tum̃abe ka naio? !Kito rovi-  
tikario vattig rivu! Ver kito roverinavo  
varueiano na Atua ber ka Jone, mia tete  
na naio monoka rivika bere den kito  
riverinavo bior vaio ana maka romonea  
Jone. <sup>6</sup> Mia bunu, ver kito rover Jone ga  
jidomii ka rilaio, mia tomu nalo tinielser  
kito, mia atuba kito, bior naloaju amonea  
Jone jikili ruei ka napano naio be Atua  
kiano nailliano riano tai.” <sup>7</sup> Ana jidomiano  
na mila ana aberdoŕe ban Yesu aberenio  
nalo maka ajikiaio ga.

<sup>8</sup> Mia Yesu ber kalo, berinavo “Tibe na,  
mia kiniou bunu, maka nejikia never ka  
kamiu ka kei naruei naio ber ka kiniou ka  
nala iñauano nalo nei.”

*Jamerijiano na tomu na bova napano  
m̃a abitikar jiotilikrevi tai*

*Mataiu 21:33-46; Mak 12:1-12*

<sup>9</sup> Ana Yesu ber jamerijiano tai ban tomu  
nalo na ka bogo na, berinavo “Toro na  
toru tai, bija kiano jiotilikrevi tai. Bogo tai  
naio jidom riel rivan ea buruvenu dolu  
tai, napano jo vaatarobe laka, ana juvan  
kiano jiotilikrevi nei ban tomu dolu nalo  
ka mia amei aiñau eaio, ka mia avulu  
vanio. <sup>10</sup> Ana toro na toru nei naio ba jo-  
o, avona bitilubar ka be bogo na m̃arkrevi  
meruo naruei. Jibena miila kiano toro  
tai ka ban bereio ea nalo napano ajua  
kiano jiotilikrevi nei, ka rivar puruveru na  
m̃arkrevi nei togio napano monoka avulu  
vanio. Ana toro nei bano, mia bogo na naio  
miyotuba kalo, nalo maka asidom avuluio,  
mia amue naio ga o-o bisi ana na amiila  
naio ban bereio jum̃ano ravavo ga jibe na.  
<sup>11</sup> Ana toro na toru nei miila kiano toro  
dolu tai bano, mia abitivi naio bunu, amila  
lelan toru laka, ana amijil deven naio ban  
bereio jum̃ano yauo ga jibe na. <sup>12</sup> Mo  
varolu nene, toro na toru nei miila kiano  
toro dolu bereio, mia naio bunu, amueio-o  
bar ja, ea naio toru laka, ana abukulario  
den jiosi.

<sup>13</sup> “Mo toro na toru na jiosi nei naio mial  
bajago na kirivova nei, mia naio maka  
bunu rijikia naruei, berinavo ‘!Aiou! ?  
Bo ka mia nala tum̃abe naruei? Peli von-  
gane, monoka neila ga keneriku rivano.  
Naio be keneriku takurano ga, tinieku jii  
m̃elea naio, mia ver naio rivan mia nalo  
monoka avitulubar avijuku rivu ka naio.’

<sup>14</sup> Naruei miila naio bano, mia bogo na  
tomu nalo amialio, nalo ajidomii kirivova  
kanio. Aberiio ealo, aberinavo ‘Naina be  
toro na toru kenerinio na. Toro na naruei,  
napano ver toro na toru na riva kovio,  
mia naio naruei rivar kiano borotano nene  
tibe kiano jajum̃ano ve kiano. Bo ka kito  
rouebin naio rim̃aro, kanio mia kito ga  
romijikia ravakar borotano nei rive kiado.’

<sup>15</sup> Naruei nalo ajumolu abokario, abuku-  
lario batove den jiosi nene, amuebinio.”

Ana Yesu berinavo “Tukunu nei naio bisi  
ea vio na, mia bo ka kamiu kuvisidomii  
vonio. Bogo na toro na toru rijog tenei,  
mia naio rimeĩ rila tum̃abe ka nalo nei?

<sup>16</sup> Neber ka kamiu neber tomu kirivova  
nei, mia naio rimeĩ ruelo, añarm̃aro ea  
bajago kouo tai, a mia naio rudu kiano  
jiosi nei toa tomu dolu na bo nalo jum̃alo.”  
Ana bogo na amijog Yesu naio ber jibe nei,  
amijog lubar ka iliano nei be ilivaniano  
tai, ber jibe ka kulo Ju maka asidom naio  
napano be Atua kenerinio, ana mia Atua  
rivuru tomu nalo na maka ave kulo Ju  
adu jelelo. Ana vite nei nalo maka asidom  
ajogio, naruei nalo amil jikili aberinavo  
“Vite na jau kojom̃a koberiio na, Atua  
maka lele rijamo ka mia riyotuba tibe na.”

<sup>17</sup> Mia Yesu bitikarlo, bika ber “Kamiu  
maka kumisidom, ana bior vaio ana abivi-  
tauia iliano lu nei napano naio ber jibe nei,  
berinavo

*‘Puruveru na, tomu nalo napano amiñauka  
yimo aber naio bova, mia abuku ban  
ruei,*

*mia vonganei, puruveru nene naio binimeĩ  
be puruveru na kirinovo tai ea sudu  
na yimo, ka rudukar yimo sikili.’  
Iouano 118:22*

<sup>18</sup> “Tomu nonovio na mia ava aserbaŕe  
ea puruveru nei mia ajoru napano mia  
puruveru nene rila kokorov mokotenalo.  
Mia ver riva rivokar bogo na puruveru  
nei rijoru, toro kei napano puruveru mon  
kakario mia rila kitkitio rivova, naio riva  
kovio.”

<sup>19</sup> Ana naverloglogiano na tuboiano nalo  
bija tomu na tortoru na kulo lu nalo,  
abitolubar ka Yesu kiano jamerijiano nei  
jilogloglo memedu, naruei nalo tinie-  
l jio lie vo, ajumolu ajidom avokar naio  
rimemedu ea bogo nei garuei. Ajidom  
toru ka ala titai kanio, mia amila dede  
ga, bior amial ka tomu nalo ajum̃a tinie-  
l jii naio ga. <sup>20</sup> Jibe na naruei ana bogo  
nono ga ajum̃a abitivitio, a nalo tealo  
ajum̃a ajivanlo ga aba vaataro kanio, abar  
kokoalo ga amilalo jibe amonea naio bo,  
mia tena ajum̃a amilaio, ajum̃a abarkakar  
kiano iliano nonovio ga. Kialo jidomiano,  
ka ajidom aleal iliano na naio riverenio,  
ana amijikia ala veriiano van toro na  
toru na vio Romo nene Pailat, ka naio  
mijikia sian vironiano tai vanio tibe ka na  
ajidomio.

*Tena be Atua kanano a tena be Sisa  
kanano*

*Mataiu 22:15-22; Mak 12:13-17*

<sup>21</sup> Ana nalo nam̃a ajum̃a abar kokoalo  
ka napano abinimeĩ vaataro ka Yesu,

bogo tai ana abika vikadeniano tai denio, ajidom ajukubinio. Aberinavo "Naverloglogiano, kumemi nubitilubar ka kiamo iliano a kiamo verloglogiano be riano a memedu. A kumemi nubitilubar ka jau maka ketibure tomu nalo aveve dolu, mia komialo abe veverare ga kojomña koberial Atua kiano m̄arabo na memedu ka tomu nalo nonovio. <sup>22</sup> Ana numisidom nuvika denso tibe nei ka: ?Kiado tuboiano naio ber jum̄abe? ?Naio ber memedu ka kito kulo Ju nalo rovulu takis van parinio tubo na Romo na Sisa, p̄eli na ber maka rimemedu?"

<sup>23</sup> Mia Yesu bitilubar ka ajidom ajukujuku naio, naruei naio ber kalo, berinavo <sup>24</sup> "Kuidu puruveru sesa nene tai rimeii van kinio. ?Kuvial von kei mirano na joaio? ?A sio nei ajiri joaio, be kei siano?"

Nalo aberinavo "Sisa mirano na, a siano na bunu."

<sup>25</sup> Ana naio ber kalo, ber "Mo, tena be Sisa kanano, kamiú kuvidu van Sisa. A tena be Atua kanano, kamiú kuvidu van Atua."

<sup>26</sup> Nalo nei ajidom toru ka avokar vatitig kija Yesu ea tomu nalo miralo ka kiano iliano tai, ana mia bogo nañña amijog kiano verdopeiano nei, amילו toru kano, amial ka naio bokar tanealo, ana nalo aju buru ga, maka bunu ajikia aver bereio titai.

*Tomu na am̄aro mia ameul bereio  
Mataiu 22:23-33; Mak 12:18-27*

<sup>27</sup> Mia iorou ka naina, Satusis nalo tealo abinimeii ea Yesu, ka ajidom avika denio ka tivelinio na vite tai nañña abiekar kouo eaio, aber tomu nalo na am̄arño, maka bunu ajikia ameul bereio ea bogo na maaro. <sup>28</sup> Naruei nalo abika denio, aberinavo "Naverloglogiano, kumemi numisidom nuvikas, ka jum̄abe ka iliano tai nañña tormoruo Mosis re nua naio bivitauiio be kiado. Naio berinavo, ver toro tai riñño den koano, napano maka ve kenerilo tai vo, mia monoka nana lian ka naio rivuru taanou nene ve koano, ka mia rila ka tira nei mijikia rivar tete, ka mia rudu kuruano napano naio m̄aro siano, ka mia siano rimeul to. <sup>29</sup> Mo, ka bogo tai, be kurualo aluo. Motoru kalo buru tira tai be koano, mia m̄aro den koano napano naljuo maka avar kenerilo tai vo.

<sup>30</sup> Ana maratoru naio kija buru tira nene, karina naio bunu m̄aro denio, <sup>31</sup> karina baratoru, naio bunu milaio, bano-o bokar kurualo aluo nene, nalo abiniu amila jibe na kurualo maka ve kenerilo tai leleio. <sup>32</sup> Ana iorou ka koano nalo nao-o abiniu, tira nene bunu m̄aro. <sup>33</sup> Mo jau kover von vite na. Ea bogo na maaro, ka bogo nañña

ajum̄ña aberverio vuru na aber mia tomu nalo atumormolu bereio, mia tira nei naio ve kei koano, bior naio joro ka kurualo aluo nei abiniu ruei?"

<sup>34</sup> Naruei na Yesu berdopeio berenio berinavo "Ea yetemeriba nei ga tomu nalo ajum̄ña ajorjoro, <sup>35</sup> mia nalo napano Atua ber ka amijikia ameul bereio ea naññariano, ka ava joro ea kiano vio, mia maka bunu ajikia alaio. Ka bogo na, maka bunu asorsoro kalo, <sup>36</sup> mia maka bunu ajikia am̄arño, bior mia amei atavukia nailiano nalo. Mia Atua rivuru meul ealo bereio den naññariano, naruei amei ave kenerinio nalo riano.

<sup>37</sup> "Mia ka tivelinio ka na meul bereio na, Mosis bunu berio nua ruei, naina jakii tukunu na buruiesi tai napano sebi joñña bovago eaio. Ea vio na romial ka Mosis naio joñña bio Atua Soñi ber naio be Atua na Epraamo kanano, a Atua na Aisak kanano a Atua na Yakovo kanano. <sup>38</sup> Ana bogo na Mosis naio ber iliano na, tom tolu nei am̄aro ea yetemeriba nei nua bogo be ruei, jibe na am̄aro ea yetemeriba nei, mia aju ameul ea Atua kiano vo. Atua naio maka ve Atua na tomu na am̄aro ga, mia naio jidom ka tomu nalo na aju bija naio nalo abe tomu na ameul. Ea Atua kiano vitiano, tomu nalo nañña am̄aro ruei ea yetemeriba nei, nalo ameul kia ga vo aju."

<sup>39</sup> Ana naverloglogiano na tuboiano nalo, nalo ajum̄ña amiaago ka Yesu kiano verdopeiano ban Satusis nalo, ana amial ka naio be masou bo laka, ana aber "Naverloglogiano, kanamo verdopeiano naio bo mia bo." <sup>40</sup> Aber jibe na bior Yesu kiano iliano nei mila Satusis nalo ameruo ka avika vite tai den naio bereio.

*Yesu Naverikariano naio be tormoruo  
Parinio Tubo Teviti kiano Atua*

*Mataiu 22:41-46; Mak 12:35-37*

<sup>41</sup> Naruei Yesu mil ba lie banlo, bika vite denlo, berinavo "Bior vaio ana nalo ajum̄ña aberloglog kamiú, aberinavo Naverikariano naio monoka riyotuba ea tormoruo Parinio Tubo Teviti nene kiano yati, napano nua naio be Parinio tubo beamu? <sup>42</sup> Kiniu nebika naina, bior beamu, Teviti naio bivitauiia niosi na Iouano kanano, berinavo

'Atua Soñi naio ber ka kiaku Tubo, naio berinavo "Jau kototano ea vameruo na kanaku,

<sup>43</sup> jau koto rorea rivano-o, mia kinio nala kanamo uolu nalo amei tibe ka yebe tai nañña kobijankon jaamo eaio.'" *Iouano 110:1*

<sup>44</sup> "Ea vio na romial ka napano Teviti naio joñña bio Naverikariano ka kiano

Tubo mugaruei. ?Mo bior Teviti naio ber jibe na, mo juñabe ana ajunña aberenio mia Naverikariano naio riyotuba ea Teviti, rive kiano yati tai ga?”

Mia ea bogo tai bereio, amiilo toru ka Yesu kiano iliano nalo.

*Yesu mil jikili ban navurim̄araboiano nalo na nalotuanano*

*Mataiu 23:1-36; Mak 12:38-40; Luka 11:37-54*

<sup>45</sup> Ana tiniobi nalo aju amiagago ka kia ga vo, ana Yesu berial iliano tai, napano be kanano naiagagoano ga nalo kialo. <sup>46</sup> Naio berinavo “Kamii kuvitikar kamii ka naverloglogiano na tuboiano nalo na narnā abarvar kalo rñele ka rñalo burutili kulu-m̄arauo nalo na, a verenio nalo amieliel ea vioruru nalo, ajidom ka tomu nalo monoka avatove kalo, avio vatitiglo averinavo ‘!Aiou, naverloglogiano novo, kavijo bo!’ A ea bogo na jokoluolu p̄eli joomo ea yimo na volkouano nalo bunu, nalo ajidom ka dam̄ariga atutano ea vio na tomu na tortoru nalo kinalo ga. ?Kamii kubitulubar ruei, a? <sup>47</sup> Mia ajunña aburu kialo volkouano nalo kiri p̄etep̄eteli laka, mia ajunña amila sibi ga, bior ka bogo nene ga, nalo ajunña amijukubin taanou nalo, amila bulaglo. Naruei bior kialo bajago nalo na, mia kialo vironiano sikili lie vo.”

## 21

*Taanou tai buku veru sesa juo ban Atua Mak 12:41-44*

<sup>1</sup> Naruei bogo napano Yesu nalo ajua Yimo Lu na Atua Kunuano, ana amial ka napano tomu tealo abinimee ka mia avuku kialo ijaiano ea basaro na Yimo Lu. Naruei Yesu bitiiio, ana naio mial ka nasanibaiano nalo abinimee abuku kialo ijaiano novo nalo, <sup>2</sup> ana na iorou kanio, naio mial bunu taanou tai, napano naio be taliñasa ga, mia naio binimee buku kiri veru sesa juo ga.

<sup>3</sup> Naruei naio berii tira nei banlo, naio berinavo “?Kamii kumial taanou na, napano naio buku kiri veru sesa juo na? Kiniu neber riano ban kamii, ka naio jian loa jovulu nonovio ijaiano dolu nalo na nasanibaiano nalo na kanaloo. <sup>4</sup> Nalo be kialo burunñara veru nalo, mia amije bena ga togio, mia taanou na, veru telisu nei naio bokario ka rijekar kiano meoulano, naio jian nonovio ban Atua.”

*Yesu naio berial ka mia aue bulag Yimo Lu na Atua Kunuano*

<sup>5</sup> Karina iorou ka naina, tomu tealo ajunña aberii Yimo Lu, aberinavo naio kirinovo tai mia, bija sano veru maraiu

nene nalo, a tonovo nalo napano rña tomu nalo abario kañia miyovovua tanobuku nene. Ana Yesu mijog tukunu nalo na jibe nei, ana berinavo <sup>6</sup> “?Kamii kumituñia kumial vite nalo na kuber bo? Neber ka kamii mia iorou ka bogo tai na jo binimee, mia ve re bunu puruveru tai totano vatitig ea jeleigio, bior mia tomu nalo tai amei aue bulag searia yimo na riviniu.”

*Jaleleano monoka mia rimee*

<sup>7</sup> Mia bogo na nalo amijog ka Yesu ber jibe na, abika denio, aberinavo “? Ana Naverloglogiano, mia aue bulag Yimo Lu nene nagi, a mia kumemi nuvijikia nuvial kijokijo venia naruei naio verial ka vaataro ka vite nalo nene amalmaluvo?”

<sup>8</sup> Ana na naio ber kalo, berinavo “Bo ka kamii kuvitikar vatitig kamii rivu, ka mia ve re toro tai rimee rila sibilili kamii, bior mia tomu ve telabo napano mia adu siaku, mia nalo amei averinavo ‘!Kiniu nebe Naverikariano nei!’ p̄eli averinavo ‘!Naina naruei, bogo nene naruei!’ mia maka rivu ka kuvitakisorlo. <sup>9</sup> Ana ver ka bogo na, mia kamii kuvijog utedabaiano na mira, a jaleleano nalo aju vaataro, mia kumemebiju rñele re. Vite nalo na monoka amalmaluvo beamu, mia naina maka ve bogo na maaro nene navo.”

<sup>10</sup> Ana naio ber bunu kalo, berinavo “A parinio tubo nalo, mia ala mira kanio parinio tubo dolu nalo, a venuo nalo atumolu ka venuo dolu nalo. <sup>11</sup> Mia rñii ve toru, mia reraio ea yetemeriba nei mia ve burunñara vituiano a mieiano kouo nalo, a rivija naina mia ve vite na memebijuano ave burunñara kijokijo nalo ea bulu niogovu yauo mave. <sup>12</sup> Mia bogo na ve re vite nalo nei vo, mia tomu nalo ala kiki kamii ve toru laka. Mia nalo amei avokakar kamii sikili, avar niajebijo rivan kamii, ana iorou kanio mia adu kamii kuvitua juñano navurim̄araboiano na yimo na volkouano nalo, p̄eli na avuku kamii kuva kuvitua yimo na tetavokoiano, p̄eli ala kamii kuvitumolu kuvitua mirano kialo parinio tubo nalo p̄eli na kialo navurim̄araboiano nalo. Vite va nalo na mia kuvarilo bior kubokar siaku jikili. <sup>13</sup> Ka bogo na mia sikili laka rivan kamii, mia rive kenemiu bogo na kuvijikia kuverial Ioluanoo Vou na bo vanlo.

<sup>14</sup> “Mia vonganei, bogo na vite nalo nei maka vo, kamii kuvisidom rñelea re ka mia kuver venia ka bogo na, <sup>15</sup> bior rimonloglog bogo nene ga, mia kiniu nesian iliano na masouano rivan kamii. Mia bogo na kuver iliano nalo nei ka kenemiu uolu nalo, mia tovulo, mia ajikia re ka atupeodope bereio kenemiu iliano nene.

<sup>16</sup> “Ka bogo na, mia nalo na ga napano mā kumituṃa kubiolo ka teta ṗeli kuruemiu ṗeli tumano ṗeli bilbilu, nalo na jibe na naruei napano mia amijikia avuru bulag kamiu kuvano, adu kamiu kuvitua tomu na tortoru nalo juṃalo, ka mia ala tanea kamiu rivano-o mia mā auebinvin kamiu tealo aṃarṃaro. <sup>17</sup> Mia tomu nalo tiniel ser kamiu laka, mia nalo asian liliu iliano rivan kamiu napano siaku joa kamiu.

<sup>18</sup> “Mia kiniou neber ka kamiu ka mia vijumiu tai riva kovio deio. <sup>19</sup> Mia kamiu kuvitu sikili rivano-o kuvitovulu juluvati na bogokouo nene, ana ea ṃarabo na naruei mia kamiu kuvokar meuliano riano na kenemiu.”

*Buruṃara mira ea vio Yerusalemo*

<sup>20</sup> Mia ea tivelinio na buruṃara bogokouo nei mia rimei, Yesu ber kalo bereio, ber “Telikiti na ver kuvial taara na tomu na mira atu selivivko buruṃara bulukomeli na vio Yerusalemo, mia kuvijikia ka bogo na buruṃara sano labulagiano nene naio jo binimej vaataro. <sup>21</sup> Mia bogo na kuvial vite nei, kamiu na kuvitua vio Yutea, bo ka kuvuro, kuva kuvitivan kamiu ea suku nalo, mia ver kamiu na kuvitu jouro Yerusalemo, bo ka kumolmoluo kuvuro kilkil, ṗeli na kamiu na kuvitu mave nei, maka rivu ka kuvilavio ka kuvatove vonuo bereio. <sup>22</sup> Nina bior ka bogo na, naio be buruṃara legiano na lameraniano na Atua kiano siniabu, tavukia na vivitauiano re nua nalo aberkakario. <sup>23</sup> Ka bogo na bunu, mia ve kirivova laka rivan tire nalo na be ṃabolo, rivija bunu nalo naṃa ajuṃa amije yu ban kenerilo solbouo nalo. Ka bogo na, mia ve buruṃara najogvaiano ea kiado venuo nei, a buruṃara siniabu rimei ea kiado tomu nalo nene. <sup>24</sup> Mia iobogu na mira rila vinvin ve telabo atibirbil, mia ṃarimieni riorkar ve miroano juṃalo, avurulo ava aiṃau kurano ga ea taara dolu nalo. Mia kulo dolu nalo avie niegeniege kitkit lelan komeli lu na kito kulo Ju kiado Yerusalemo nei, mia ave tubo eaio rivano-o rivokar bogo na Atua jekar ka ve kialo bisi.”

*Mia Kulorinio Kenerinio rimei bereio*

<sup>25</sup> Ana na Yesu berii legiano na maaro, naio berinavo “Ka bogo na, mia amijikia aial kijokijo ea ṃerenio a ea siberio a ea ṃarvitano nalo. Ea yetemeriba nei, mia taara na tomu nalo mia niukniuku rivielo ve toru laka, asidom bijobijon ve toru, mia bogo na aial tei tumolu ve toru to rivavauro, mia nalo ajikia re ka mia tuṃabe kalo. <sup>26</sup> Telikiti na nalo abitulubarbar ka

venia napano mā jo binimej ea yetemeriba nei, a napano vite na tortoru nalo na bul niogovu yauo amikuluku janea vio, mia nalo amemebiju ve toru, meribobogo aṃarṃariulu rivior meroano. <sup>27</sup> Mia ala tibe na rivano-o, ana iorou kanio ana mia aial kiniou Kulorinio Kenerinio noyotuba ea melijo vija kanaku buruṃara moroano a vija kanaku buruṃara miamoiano.

<sup>28</sup> “Ana ea tivelinio na kamiu, ver bogo na kuvial vite nalo nei atikar kaṃa amal-maluvo tibe na, mia kamiu kumerou re. Mia niukniuku rivie re kamiu, mia kamiu kuvitumolu kuvar bulag pariparimiu kuvisirarag mave, bior vite nalo na nioti nene ber kenemiu toro na laruriano naio jo binimej, vaataro ka riyotuba.”

*Kijokijo na burubilivo*

<sup>29</sup> Ana na Yesu ber jamerijiano tai banlo ea tivelinio na bogokouo na jo binimej keano vo, naio berinavo “Kamiu kuvisidomii von burubilivo na, ṗeli na buruiesi dolu nalo na jibe na. <sup>30</sup> Telikiti na kumial jaati nalo abinimej amemeaio, a abinimej amelokloko, a sidiati nalo abar-boṃelo, ana na kamiu kumijikia ka be bogo na vio bitunu jo binimej vaataro. <sup>31</sup> Jibe na bo ka na ver kamiu kuvial kijokijo nalo nei, ajuṃa amalmaluvo jibe na javukia naṃa kiniou naber ka kamiu ruei, mia kamiu kuvijikia ka navenatuboiano na Atua kanano naio jo binimej vaataro kean kamiu. <sup>32</sup> Riano neber ka kamiu, mia vite nonovio na monoka ayotuba tibe na rivano-o, mia iorou kanio ana taara na tomu na ameel ea bogo na ava kovio ea yetemeriba nei. <sup>33</sup> Mia vio yauo rivija yetemeriba nei nalo ve juo bunu ava kovio, mia kanaku iliano nalo maka ajikia ava kovio bogo tai.”

*Kamiu monoka kuvila vatitigio kenemiu meuliano nalo*

<sup>34</sup> Naruei Yesu midu iliano na banlo ka bogo na, iliderevijoiano banlo, naio berinavo “Mo ea tivelinio na kamiu, kamiu kuvitii vatitig kamiu. Maka rivu ka kenemiu meuliano tanea vio, ṗeli na kumunu ṃelea ṃarjuṃelṃelu ṗeli na vite nalo na jibe na, a maka rivu ka kenemiu jidomiano to tulaka ea vite nalo na yetemeriba nei ga. Aver ṗeli, mia kuvituṃa kuvila tibe na rivano-o mia kuviilo ka buruṃara legiano na maaro riyotuba ka kamiu vaarakurano ga tavukia viobijio. <sup>35</sup> Nao, mia tomu nalo tanea vio reraio ea yetemeriba nei, mia atu asidomialio re, atu avitilubarbar re, mia legiano nei rivokarlo tibe ka na menu miilo ka buruniavo julubiniyo ṃaro garuei. <sup>36</sup> Mia monoka kamiu kuvitu derevijo

dañariga, monoka kuvitu kubolkouo ka kuvijikia kuvitu sikili ka kuvilarur kamiu ea vite nalo na mia ayotuba, rila ka mia kamiu kuvijikia kuva kuvitumolu kuvitu ea kiniou Kulorinio Kenerinio miraku.”

<sup>37</sup> Ana na Yesu joña berlogloglo jibe na ea Yimo Lu ka legiano nalo, mia ka bogiano naio jo batavio den komeli, ba joa Suku na Buruolivi Nalo. <sup>38</sup> Mia kavijova nalo, ana tomu nalo ajumolu soḡeli, aban bereio ea Yimo Lu ka ajog kiano iliano nalo.

## 22

*Navurināraboiano na kulo Israel nalo ajum̄a ajidom auebin Yesu keano vo*

*Mataiu 26:1-5,14-16; Mak 14:1-2,10-11;*

*Jone 11:45-53*

<sup>1</sup> Na karina, bogo binimēi vaataro ka nam̄a yuka nonovio, amila kialo jokoluolu juo na tortoru, jibe ka jokoluolu na najenjeniano na beskit napano maka isi toaio, bija jokoluolu na nasidom̄ialiano na ioruriano. <sup>2</sup> Ana ka bogo na, tomu na tortoru na kulo lu nalo bija naverloglogiano na tuboiano nalo, ajum̄a amila vio ka auebin Yesu keano vo, mia maka ajikia aleal m̄arabo tai, bior amerou ka ver alaio, ḡeli mia tomu nalo ajikia ala titai kalo.

*Jutas jukunu bija tomu na tortoru, berkar ka mia tiveluku ka Yesu*

<sup>3</sup> Mia monloglog bogo na ga, siñaro binimēi ba joomo ea Jutas na vio Kariot kiano iviso, napano naio be na duelimo ba juo tai. <sup>4</sup> Ana na maka vesiou, ana naio jumolu, bano ba miyotuba ka nalo napano tortoru ka kulo lu nalo bija tomu na tortoru na kialo menumia nalo, berial kiano jidom̄iano, ana na nalo aberii m̄arabo na vabe napano bo ka mia naio mijikia tiveluku ka Yesu selia rivanlo. <sup>5</sup> Ana na Jutas kiano jidom̄iano milalo amijog bova toru laka, mia nalo amial bo ka aje veru tai rivan naio rivorio. <sup>6</sup> Mia Jutas jaaro kanio, mia jikar ea bogo na, julaka ga naio joña jiravo ka vulu kiano bogo ka ver bogo tai napano ver ve re bunu tomu nalo tai eaio, ana na mia mijikia tiveluku ka Yesu rivanlo.

*Yesu miila Pitere naio Jone ka ava ala vatitig sano sinaniano na maaro*

*Mataiu 26:17-25; Mak 14:12-21; Jone 13:21-30*

<sup>7</sup> Naruei abinimēi monloglog legiano na beamo na jokoluolu na najenjeniano na beskit napano maka isi toaio, napano naio be bunu legiano napano monoka ala sida na nunu sesa nalo ka sidom̄ialiano na ioruriano. <sup>8</sup> Naruei Yesu ber ka Pitere

bija Jone, berinavo “Neila kamjuo ka kuva kuvila vatitig vite nalo na sado sinaniano na jokoluolu nene.” <sup>9</sup> Ana na naljuo nei abika denio aberinavo “?Ana jau kojidom ka nuvila vatitigio to be?”

<sup>10</sup> Ana na Yesu berinavo “Kuve juo kuva kuvokar m̄aratavo na toru na vio Yerusalemo, mia bogo na ver kuva joomo von kiaga eaio, mia kuvial toro tai napano midu burum̄ara bauei tai na rimēi rivetavo ka kamiu. Mia kuvitakisorio kuva a mia naio rivuru kamiu kuvan ea yimo tai. <sup>11</sup> Mia bogo na ver kuva joomo ea yimo nene, mia kuvil rivan toro nene kuvinavo ‘Kiado naverloglogiano naio bika berinavo, Kumemi valauo nalo, kenememi vajoomo naio be, ka nuvijikia nuvisen sinaniano na sidom̄kariano na ioruriano eaio?’ <sup>12</sup> Kuvil tibe na rivanio, naruei mia naio siloglog ka kamiu ka burum̄ara vajoomo tai mave, napano vite nonovio juaio rui, ana na mo kuvila vatitig vite nonovio na sinaniano nei ea vio nene.” <sup>13</sup> Mia Yesu ber jibe na ka naiagagoano juo nei bisi, ana na abano, mia amial ka vite nonovio miyotuba jibe ka ga napano naio beriio kalo jukamu.

Jibe na naruei, ana na amila vatitig sinaniano na maaro na Yesu sano.

*Sinaniano na maaro*

*Mataiu 26:47-56; Mak 14:2-26; Jone 18:3-11*

<sup>14</sup> Karina Yesu nalo abinimēi mave ea vio nene, ana bogo na sinaniano, Yesu ba jotano ea vio na sinaniano, mia atevi nalo abinimēi ajutano naliko. <sup>15</sup> Ana na Yesu mil banlo, naio berinavo “Bogo jiou rui, kiniou najoña nojidom̄ii sado sinaniano na sidom̄kariano na ioruriano nene. Ninei naruei saku sinaniano na maaro, napano kito ga rosinan vio takurano, ana iorou kanio ana mo nemijikia navan ea kanaku bogokouo. <sup>16</sup> Kiniou neber ka kamiu ka joko nei nioti nene berii ioruriano. Mia kiniou nesen re bunu bereio, rivanvano-o rivokar bogo na kiaku ioruriano rimēi ea yetemeriba nei, ea bogo napano mia Atua kiano navenatuboiano rimēi.” <sup>17</sup> Naruei naio midu baja tai, bolokouo ber siva ban Atua biorio, avona bisi ana ber kalo, berinavo “Kam̄iu kuviyon burevure tanea kamiu, kamiu ga kumunio. <sup>18</sup> Nina bior jikar vonganei, mia kiniou nomunu re bunu m̄arjum̄elm̄ielu rivanano-o rivokar bogo na mia Atua kiano navenatuboiano naio rimēi.”

<sup>19</sup> Naruei naio mije salo niajoko, naio bolokouo ber siva ban Atua kanio, avona bisi ana burekokorovio janealo, berenio “Ninei be mokotenaku, napano namijamo

ka bior kamiu, mo mia monoka kamiu bunu kuvitu kuvila tibe na, tibe ka kenemiu buruka ka kiniou.”

<sup>20</sup> Ana iorou kanio, bogo napano ajinan bisi, naio mila jibe na bereio javukia napano mila ka niajoko jukamu, naio midu baja namuniano tai, berenio “Baja nei naio be kijokijo na kiaku burukija napano mia riou ka kamiu, ka vitirilar Atua kiano virakariano vija kamiu. <sup>21</sup> Mia be titai bova, toro na mia tiveluku ka kiniou, naio be kito tai ga napano rojinan vio takurano nei ruei. <sup>22</sup> Mia kiniou Kulorinio Kenerinio monoka nañaro tibe ka nañā aberkario nua ruei, mia toro napano mia tiveluku ka kiniou, tiniēk miia naio, mia rivova lie vo van naio!”

<sup>23</sup> Mia bogo napano amijogio, ana na nalo ajuñā abivika denlo amilavon ka alealio na vabe kalo napano jo jidomii ka mia rila tibe na, mia maka avokario.

*?Kei kalo na mia naio tukamu kalo?*

*Mataiu 20:25-28; Mak 10:42-45*

<sup>24</sup> Ana ka bogo na, siniabu jumolu bure naigagoano nalo, ber mia kei kalo napano mia nalo asirarag kanio ka naio loalo lie, rive kialo navurinañaraboiano.

<sup>25</sup> Mia Yesu mijogio ana na naio berenio berinavo “Kito romijikia ruei tomu na tortoru nalo na yetemeriba nei kialo bajago, Parinio tubo nalo abe tubo ka kialo tomu nalo, a navurinañaraboiano nalo, tomu nalo monoka atovonlo, adu sio na loa laka rivanlo, abiolo aberinavo toro na bitikarlo. <sup>26</sup> Mia kamiu kiaku naigagoano nalo, monoka kuvila re kamiu tibe ka tomu na tortoru nalo nei. Naio be kenemiu napano ðeli mia averinavo naio be toro na toru, mia monoka naio rimeitibe ka kenemiu toro na kiritelisu tai, tibe kanio napano naio moluo iorou. Kamiu tai napano ver sidom ka naio rimeitibe rive kenemiu navurinañaraboiano, naio monoka rimeitibe ka toro na mia ñā riijaja kamiu.

<sup>27</sup> “Ka bogo na sinaniano, toro tai jotano ana toro dolu bar sano sinaniano binimeitibe. Naruei naljuo nei, na vabe nene napano amial jibe ka naio toru lie loa tinene? Kamiu kumijikia, mia kiniou maka netibe ka naio, mia kiniou nebinimeitibe ea yetemeriba nei jibe ka naio nañā mila inaño, miija kulo dolu nalo, bijuku bo kalo.”

*Yesu berkar ijaiano banlo*

<sup>28</sup> Ana na Yesu ber kalo, berinavo “Kamiu na, nemial kumitibe ka kiaku ikurukariano na bo nalo ea bogokouo nalo nañā nabokario, binimeitibe bokar banei.

<sup>29</sup> Mia jibe kanio napano teta naio bitirilar kiniou ka neve tubo ea kiano vio, mia kiniou bunu neber ka kamiu neber nevitiri bulag kamiu kumei kuve ñartubo nalo ea kiaku vio nalo nei. <sup>30</sup> Tibe na, ana na mia kamiu naruei kuvijikia kuvitutano rivija kiniou bereio, mia kito resinan vio takurano jouro ea kanaku navenatuboiano, ana mia kamiu kuvitutano ea vio na mave loa laka bunu ka mia kuve tubo ka bajulukuti duelimo ba juo na Israel nalo.”

*Yesu berial ka mia Pitere rivarbonbonua naio*

*Mataiu 26:31-35; Mak 14:27-31; Jone 13:36-38*

<sup>31</sup> Naruei Yesu mil ban Saimon Pitere, berinavo “O Saimon, jau monoka kovitakar vatitigso rivu. Siñaro tinien jer kamiu ruei, naio jidom toru ka rila bulag kamiu, mia Atua mijamo ka ruei ka mia naio mijikia tokol von kamiu ve telisu, a mijikia tiburelar nana naio bo a nana naio bova. <sup>32</sup> Mia kiniou nobolkouo kaso ruei, a noju jikili ðañariga ea kanaku volkouano ka ver jau kotuñabe, ana na mia kanamo viekouoiano rijoru nonovio denso re. Ana verenio jau komei kovu bereio, komei bereio, mia jau monoka komei kove toro tai na mia kala kuruamo nalo atumulolu atu sikili lie ðañariga.”

<sup>33</sup> Mia Pitere naio berdoñe Yesu berinavo “Tubo, verenio avukuso kavan ea yimo na lakoiano, mia kiniou neviedu rivijaso rivu ga. Peli mia ala kikiso mia nañaro kario, mia kiniou najaaro ga ka kito ve juo.”

<sup>34</sup> Ana na Yesu berkanio, berinavo “Pitere, kiniou neber telerinio ka jau, ka bogiano nei ga, mia tormano tokoko-reko re vo, mia jau kavarbonbonua kiniou ve varolu, koverinavo jau maka kejikia kiniou leleio.”

*Bogo kouo naio miyotuba ruei*

<sup>35</sup> Ana na Yesu bika denlo, naio berinavo “Kamiu kuvisidomii von nanua, ka bogo nañā nemiila kamiu kubano ñā kubioliolu janea vio nalo. Kiniou neber ka kamiu ka mia kuvar re kenemiu saba nalo tealo vija kamiu, jibe ka siveu na veru, ðeli na basaro, ðeli na kulubue dolu na jaamiu, ðeli na vite nalo na jibe na. ?Mia juñabe, kamiu kumial ka jumemiū bulati ka vite nalo tai?”

Naruei nalo aberdoñe aberinavo “Tubo, maka jumememi ve bulati ka titai.”

<sup>36</sup> Ana na Yesu ber kalo berinavo “Nao, naina naruei. Mia vonganei, kito rojua bogo dolu tenia nei. Vonganei, verenio nana be kiano siveu na veru, ðeli na



kiano basaro, mia monoka naio rivar vija naio rivano. Toro na ver maka kiano iobogu na mira tai, bo ka naio riŭilivililar kanio mĉano saluvoiano, mia naio rivar veru nene rivan rivulu ka kiano iobogu na mira tai. <sup>37</sup> Kiniou neber naio nei ka kamiu, bior vivitauiano lu nalo re nua naĉia aberii kiniou, aĵuĉia amalmaluvo abe riano naruei, ban bokar iliano naĉia Aisea naio berenio, napano berinavo

*‘Amila ka naio jibe ka naio bunu be toro va tai na lakokoroviano na tuboiano.’*  
Ais 53:12

<sup>38</sup> Mia naiagagoano nalo aĵuĉia aĵidomii ga iliano na iobogu na mira nei, naruei nalo aberinavo “Tubo, keĵiio, ninei be kiado iobogu na mira juo nei.”

Mia Yesu mial ka napano maka aĵikia dulu kiano iliano nei, ana na naio berinavo “E abe, roberii vite na bare naruei.”

*Yesu ba bolkouo Ketsemani mave ea Suku na Buruolivi Nalo*

*Mataiu 26:36-46; Mak 14:32-42*

<sup>39</sup> Mia Yesu nalo aĵuvan vio nei mave, mia jibe ka napano naio joĉia milαιο, naio miel bavin bokar Suku na Buruolivi Nalo, naio naliko kiano naiagagoano nalo. <sup>40</sup> Mia bogo napano aba aboru ea vio napano Yesu jo ban eaio, amijilimebi eaio, naruei naio ber kalo berinavo “Kamiu monoka kubolkouo tulaka ka mia jukuano nalo ala re kamiu kuvijoru.” <sup>41</sup> Naio ber jibe na kalo, bisĉi ana na naio juvanlo, ba lie denlo telisu ga, naruei minie ka sudu jaano ana bolkouo ban Atua.

<sup>42</sup> Naio bolkouo jibe nei, berenio “Aiou Teta o-o, ver jau komijikia kala mia rivu ga, jau kodular baja na jogvaiano nei kanaku, ka nomunu re. Mia jau kala re kanaku sidomiano, mia kala ga kiamo.” <sup>43</sup> Ana ka bogo nei Yesu mijog temiano toru ea naio, naruei amial nailiano tai jaluvo ea vio mave binimeĉi yetano, binimeĉi miija Yesu ka naio ve ĉirinio sikili bereio. <sup>44</sup> Mia Yesu jo mijog bova toru, jiniomo de sano titi, mia bolkouo jikili lie vo banbano-o mia sano minonoano nalo aĵu abadigdig jibe ka sarukija bavatove ea borotano.

<sup>45</sup> Mia bogo na naio bolkouo bisĉi, ana na jumolu bereio, ban bereio ea naiagagoano nalo, mia mial tinieĉiano na monmeliano muelo rui, aĵu amonmelio ga. <sup>46</sup> Naruei mila bovonlo, berinavo “Ai, ĵuĉiabe ana na kamiu kumitu kumonmelio? Bo kanio kuvitumolu kuvila tibe ka na kiniou naber ka kamiu rui. Monoka kubolkouo ka mia jukujukuano nalo ameĉi re ka ala kuvijoru.”

*Jutas nalo abinimeĉi abokar Yesu*

*Mataiu 26:47-56; Mak 14:43-50; Jone 18:3-11*

<sup>47</sup> Mia bogo na Yesu joĉia mil banlo kia ga vo, amial buruĉara taara na tomu nalo amiyoyotuba kalo, amial ka napano toro tai jukamu kalo abinimeĉi vaataro, nina naio napano beamu, naio be nalo tai, be Jutas. Ana na Jutas binimeĉi vaataro ka Yesu, bokario ana miomiom babibiniono. <sup>48</sup> Mia Yesu mil jukamu banio, berinavo “Jutas, ka vai na konom kukulnioku jibe na mia naio bo ga, mia ka vaio ana jau kojidom kovulvulu ka kiniou Kulorinio Kenerinio ea mĉarabo na jibe na?”

<sup>49</sup> Mia bogo na nalo na Yesu kiano napano aĵkil aĵu vaataro ka naio abitulubar venia nei Jutas nalo aĵidom alai, abika den Yesu, aberinavo “?Tubo, ĵuĉiabe, mia kito retelo ka kiado iobogu na mira?”

<sup>50</sup> Mia Yesu naio maka riverdoĉelo vo mia naiagagoano nalo tai naio jumolu, burular kiano iobogu na mira, miven ea nalo tai, napano naio be toro tai na parinio toro lu kanano, mia naio jetitire ea ga meriniano ana jelar tiliniene vameru.

<sup>51</sup> Mia Yesu mil banio, berinavo “!Ee, to to to! Kito rola re bunu tibe na kalo.” Ana na naio mijiou jokol jeleig burutiliniene toro nei, mia mila vatitigio bereio bo.

<sup>52</sup> Naruei naio bitikar tomu na tortoru na kulo lu nalo naliko tomu na tortoru na menunia nalo na Atua kiano yimo, bija navuriĉaraboiano na kulo Ju nalo kialo, napano abinimeĉi ka naio, naio mil banlo berinavo “?Ĵuĉiabe ana na kubar iobogu bija kenemiu nia nalo jibe na? ? Peli kumitu kumisidom kuberiarĉa kiniou nebe toro na ĉirinio jikili ka mĉa bina ĉeli naĉia muemue toro? <sup>53</sup> Nanua, legiano telabo ga, kiniou noĵo bija kamiu ea Yimo Lu banbano-o, mia bior vaio ana maka kumeĉi vaataro ka kiniou ka kuvokar kinioe ea bogo nalo na rui? Mia nemial jibe ka kamiu kube tomu na melijokouo, napano kubinimeĉi bija moroano dolu nalo na melijokouo, a vonganei be kenemiu aura memedu.”

Mo abinimeĉi abokar Yesu, aburio bano.

*Pitere naio barbonbonua Yesu*

*Mataiu 26:57-58,69-75; Mak 14:53-54,66-72; Jone 18:12-18,25-27*

<sup>54</sup> Bogo na abokar Yesu, aburio ban bereio naliko, abano aba ĵouro ea burusio na parinio toro lu kanano. Mia Pitere bunu joĉia jakisosor vavanlo ga ka bogo nei, naio maka riva vaataro keanlo. <sup>55</sup> Mia bogo na abinimeĉi ĵouro ea burusio nei, tealo aba aĵovokar sebi bilvili ka atuĉalo eaio, mia Pitere bunu ba

jotano naliko. <sup>56</sup> Naruei aju ana jegliano na sebi mereralii Pitere mirano, ana na niatira tai naŋa miŋiau napano jo bijalo, naio bitilubario, ana berenio “!Ai, kamiu kuvialio! Kema na, naio bunu be nalo tai naŋa bogo nonovio ajakisosor tete na.”

<sup>57</sup> Mia Pitere barbonbonua, berinavo “!Ee maka! Kuvivinieku!, kiniou neber vatitig kaso, maka nejikia kema na!”

<sup>58</sup> Karina maka vesiou ga, nalo tai mial Pitere, bitilubario, ber “Ai, jau bunu, kobe nalo tai na.”

Mia Pitere berdoŋe berinavo “Ai kema, abe makanio.”

<sup>59</sup> Mo aju jibe na bano-o, na aura takurano barlaka bereio, dolu binimeŋ berial bereio, ber nŋlea banlo, berinavo “Kiniou neber vatitig ka kamiu, kema na, naio naliko tete re Kalele na jukamu ruei. ! Kuvial, naio bunu be toro Kalele memedu ga ruei!”

<sup>60</sup> Mia Pitere berdoŋe mila sibi bereio berinavo “Kema, abe kiniou maka nejikia tena nŋa kojorŋa koberenio na kojg.”

Ana monloglog bogo naŋa Pitere joŋa ber iliano nei kia ga vo, tu jokokoreko.

<sup>61</sup> Mia bogo na tu jokokoreko, ana Tubo ŋilig parinio binimeŋ, bitikar Pitere, naio bitii kilkil eaio. Naruei Pitere jidomial bereio Tubo kiano iliano nanua berial kanio nua ruei, napano berenio berinavo “Riano kiniou neber kaso, ka bogiano na legiano nene ga, bogo na tu tokokoreko re vo, mia jau kavarbonbonua kiniou ve varolu ruei, kover jau maka kejikia kin-iou.” <sup>62</sup> Mia Pitere naio mijog kirivova toru laka, naio batavio, jegi-i o-o mia jegi.

*Parinio toru lu kiano tomu nalo amila kikii Yesu*

*Mataiu 26:67-68; Mak 14:53-65; Jone 18:19-24*

<sup>63</sup> Mo nalo napano ajuŋa abokakar Yesu ea bogo na, amila kikii naio, a amil vulevulei eaio, ajukukikio, <sup>64</sup> ban amiorko mirano ka mia naio rijikia re rial vite, mia bogo naŋa ajuŋa amijuba biliviligio, amiyotel eaio abika denio aberinavo “Ei, aber jau kobe naverialiano tai, bo ga, jau kabagbag von ka kenia na joŋa mijubaso vonga na.” <sup>65</sup> Mia amila jibe na ka banbano-o, amil niegeniege toru laka.

*Aburu Yesu ban ea komeli na toru na tomu na tortoru na kulo Ju nalo kialo*

<sup>66</sup> Aju jibe na banbano-o mŋerenio bavin garuei, ana na navurimara-boiano na kulo Ju nalo, jibe ka kulo lu na tortoru nalo bija naverloglogiano na tuboiano nalo, abinimeŋ vio takurano ea kialo komeli na toru neibano. Bogo na abinimeŋ vio takurano bisi, ana na aburu Yesu ba jikili ju jukamu ea miralo. <sup>67</sup> Naruei amil banio

abika denio aberinavo “Verenio jau kobe Naverikariano be riano, naŋa kulo Ju nalo ajuŋa amial aber mia monoka rimeŋ, mo, numisidom ka jau koverial ka kumemi vonganei.”

Mia Yesu berdoŋe banlo, berinavo “Kin-iou nemijikia neverial ka kamiu, mia ver neverenio, mia ŋeli kuvisaaro re ka kumonmoneaio. <sup>68</sup> Mia kiniou nejidom ka nevika vite tai den kamiu bunu, mia ver nevikanio, ŋeli mia kamiu kuverdoŋe kulu re ga na. <sup>69</sup> Mia be titai nana kiniou najaaro ka nejidom never ka kamiu naio ber jibe nei, ber ‘Jikar vonganei, mia tibe ka ga napano Iliano Lu berenio ruei, napano berinavo mia Kulorinio Kenerinio riva totano mave tivelinio vameruo ka Atua na moroano toru.”

<sup>70</sup> Mia bogo na amijog iliano nei, abika denio, aberinavo “!Tomnei, venia na jibe na! ?Jau kojo kober jau naruei kobe Atua kenerinio memedu?”

Ana na Yesu berdoŋelo bere “Verver kuvisidom kuver tibe na, mia tibe na ga naruei.”

<sup>71</sup> Mia bogo na amial Yesu joŋa mijamo ka ber naio be Atua kenerinio, tiniel kirimi, aber jibe nei aber “Kema na mil jibe na, kito robitilubar vatitig ka buruŋara tokoriano joa naio ruei. Mia kito resiravo re bunu toro dolu ka rila veriiano na naio bereio, naio kiano iliano ga jibure naio bereio ruei.”

## 23

*Aburu Yesu ba ban ea Pailat, napano be parinio toro na vio Romo naŋa jo bitikar Israel*

*Mataiu 27:1-2,11-14; Mak 15:1-5; Jone 18:28-38*

<sup>1</sup> Ana na nalo na komeli na kulo Ju nalo amijog Yesu kiano iliano bisi, ana ajumormolu, amioburovuronlo ba vio takurano ea buruŋara taara tai, naruei aburu Yesu ba jumolu jukamu ea Pailat mirano ea kiano vio na tibureiano. <sup>2</sup> Naruei amila veriiano ban Pailat, aber bulavulag vite telabo banio, tivelinio ka Yesu. Nalo aberenio aberinavo “Kema na, joŋa mila bulag tomu na kenememi venuo kialo jidomiano, naio joŋa berburelo ka avulu re bunu takis van kiamo boru parinio tubo Sisa na Romo, a naio joŋa miaia naio toru ber naio bar sio na Naverikariano, jibe ka naio be kenememi parinio tubo na toru. Vite nalo na naruei, kumemi numialio ka mirememi memedu.”

<sup>3</sup> Telikiti na Pailat mijog kialo veriiano nei, naruei naio bika den Yesu, berinavo “Mo, jau kija kover kanamo vonio. ?Be

riano ka jau kobe parinio tubo ka kulo Ju nalo ĉeli na makanio?"

Ana Yesu berdoĉe, berinavo "Naina naruei jau konoĉa koberver kiana."

<sup>4</sup> Mia bogo na Pailat mijog venia napano Yesu berenio, naio maka rial ka naio mila tena bova tai, ana ber ka tomu nalo kialo tomu na tortoru nalo, berinavo "Kema na, ea kanaku vitiiano, naio memedu ga, naio maka rila kor leleio tuboiano tai."

<sup>5</sup> Mia nalo maka asidom ka ajog Pailat kiano iliano, mia amila jibe ka tena soĉeli ga tai, ajikili lie vo kanio, aberinavo "Peli ga, tete na naio kirivova ga. Naio ĵoĉa julu vilivilig kenememi tomu nalo kialo jidomiano, a ĵoĉa mioliolu banlo ea vio nonovio, jikar ĵo Kalele, binimej midu nonovio Yutea, binimej bokar bulukomeli na toru nei ruei."

<sup>6</sup> Mia bogo naĉa Pailat mijog aber Yesu jikar kiano inĉauno yako Kalele, ana bikanio berinavo naio be tete re Kalele memedu ĉeli na makanio. <sup>7</sup> Pailat bikanio jibe na bior naio maka ĉa to riadu ka tanobuku na Kalele, mia parinio tubo dolu nei Erot naio be toro na toru ka vio na, mila na ka bogo napano aberial ka Pailat ka Yesu naio be toro Kalele, naio berial ber mia monoka avuru naio riva van parinio tubo Erot ka naio rivitii veve vonio bior kiano tanobuku memedu. Ana ka bogo na, Erot bunu binimej miadu ka Jerusalemo ruei, tenene na aburu Yesu ba ban naio.

<sup>8</sup> Mia bogo na parinio tubo Erot bitilubar ka Yesu nene, naio jaaro, bior naio mijog sano tukunu mugaruei, mila na kirisioj ruei naio jidom rialio kija, mila na naio jidom ka vonganei naruei na, ĉeli mia rial Yesu rila kiano kijokioj tai rivanio. <sup>9</sup> Naruei naio milavon ka tukunu vija Yesu, bivivika vite telabo denio, mia Yesu maka riverĉe titai vanio, naio juburu ga jibe na ju, maka lele ril.

<sup>10</sup> Naruei ka bogo na, kulo lu na tortoru nalo bija naverloglogiano na tuboiano, nalo bunu ajikilaju vaataro ajunĉa amil kilkil ajaanĉi ka ĉa aber bulavulag vite nalo na tivelinio ka Yesu. <sup>11</sup> Mia vite nalo nei naruei mila Erot naliko kiano tomu na mira nalo maka asaaro ka Yesu, ana amila kikio naio, amiyotel searia nana. Karina, amiya tubo nalo ĉalo kulunĉarauo nalo tai eaio, ka amijikia avital eaio, naruei amila banbano-o, karina Erot miila naio ban bere ea Pailat bitii bereio.

<sup>12</sup> Beamu ka vite nalo na, tomu juo na Pailat naljuo Erot abe bilbilu va kalo, mia monloglog bogo na amiaĉau biju jibe nei bereio ka tibureiano na Yesu, burulo abinimej abe bilbilu bo bereio.

*Yesu ĵumolu ĵukamu bereio ea Pailat mirano*

*Mataiu 27:15-26; Mak 15:6-15; Jone 18:39-19:16*

<sup>13</sup> Mia abinimej bere ea Pailat kiano vio, ana naio bio tomu na tortoru na kulo lu nalo bija tubo nalo bija tomu nalo ka amei aialio. <sup>14</sup> Telikiti na nalo abinimej joomo, naio mil banlo, berinavo "Nanua na, kamiu na kuburu toro na binimej jikili jua miraku, kuberial ka naio ĵoĉa bilivilig niegeniege ĉelea kenemiu tomu nalo kialo jidomiano nalo. Mia kiniou nebika vite nalo denio, jibe ka naĉa kumijogio, mia maka neial ka naio mila vite nalo naĉa kumitunĉa kuberenio na, nemial jibe ka naio memedu ga. <sup>15</sup> Naruei nemiĉa naio ba mial Erot ka rivitio, mia Erot maka rialeal titaio, naruei miila binimej ea kiniou bereio. Mo, kiaku tibureiano jibe nei, ber naio maka rila titai napano naio monoka riĉaro riviorio. <sup>16</sup> Mia kiniou nala tibe na ga van naio: mia nala avitiv naio, karina mo atuvan naio rivano, rijikia rivan bereio ea kiano vio."

<sup>17</sup> Ana na bior bogo na be bogo na kulo Ju nalo kialo jokoluolu na toru, ajunĉa ajidom aber jibe ka naĉa Pailat ĵoĉa milala vururu, mia monoka tuvanlar Ju nalo tai naĉa amiadikario jua kiano tetavokoiano. <sup>18-19</sup> Ana ka bogo na, nalo tai naĉa Pailat miadikario, naio kema nei Barabas, napano nanua beamu naio buru tomu dolu nalo amila baravo tai yako Jerusalemo, napano amuebinvin kulo Romo kialo tomu na mira nalo aĉarmĉaro, mila na Pailat miadikario jua kiano tetavokoiano.

Mia bogo na amial ka Pailat jidom ka tuvan Yesu rivan bereio tibe na ga, amiaga ĉerere banio, aberinavo "Ei, maka, makanio! Kumemi numisidom kesilar Barabas rimej bereio rivan kumemi. Mia toro na, kumemi nuber kaso ka numisidom jau kodular kiano meuliano ga."

<sup>20</sup> Mia Pailat maka sidom, naio jidom ka Yesu taluvo ga tibe na bereio, naruei naio milavon ka ril, ber banlo. <sup>21</sup> Mia abuku deven ga kiano iliano, abiovio kanio, aberinavo "Ĉi! Kotukukar, kotukukar toa ĉalkokolo!"

<sup>22</sup> Naruei Pailat mil banlo varolu nene, berinavo "Ĉa kar venia, naio mila venia napano kirivova? Kiniou nemial vite nonovio ruei, maka neleal vovaiano tai toa nai na memedu ka mia naio riĉaro riviorio. Mia kiniou nala avitivio ga, karina mia notuvan naio riva vonuo bereio."

<sup>23</sup> Mia nalo ajuve Pailat kiano iliano bereio, amiaga ĵouo lie jibe na bereio banio, ajaanĉi lie, aber monoka Yesu rivan ea ĉalkokolo, mia nalo amila jibe na

banbano-o na ajovulu naio. <sup>24</sup> Karina Pailat mila kiano tibureiano, berial ber naio mijamo ka kialo vikaniano. <sup>25</sup> Naio napano mña joa nalakoiano bior bajago namña mila mira a bajago namña mue toro, Pailat mijamo ka naio batavio bereio ba banlo jibe ka namña abikanio. Mia tivelinio ka Yesu, naio berial ka mia kiano tomu na mira nalo ala van naio tibe ka ga na kulo Ju nalo ajidomio.

*Aburu Yesu ban ea vio napano Kalvari Mataiu 27:32-44; Mak 15:21-32; Jone 19:17-27*

<sup>26</sup> Ana na aburu Yesu, amiel ban ea vio na atukukakar naio toa mñakolkolo. Bogo na ajumña abano, amial toro na ba yeturu karina jo miel binimei vonuo bereio, nina be Saimon na nanua beamu be toro na vio Saireni, naruei ajutua naio ka rudu Yesu kiano mñakolkolo, mia amidu joa burusovonano, miel jakisor Yesu bano.

<sup>27</sup> Amiel jibe na bano, a ka bogo na vio bujo ka kulo dolu nalo bunu ajumña ajakisor Yesu, na nalo telabo be tire nalo, napano ajumña amiel bija burumñara tegiano bija burumñara tinieiano. <sup>28</sup> Mia Yesu jomña miagago ka kialo iliano na jogvaiano nei, karina naio barþilig parinio, jiraragidilo, mil banlo, berinavo "Tire re Yerusalemo nalo-o, kuvitig re bunu kiniou tibe na. Ver kuvisidom kuvitig, mia kuvitig kamiu ga, a kenerimiu nalo bunu. <sup>29</sup> Kiniou neber jibe na ka kamiu, bior bogo na jikili tai mia rimei, ana na mia nalo na mia atua naio mia aver tibe nei averinavo "Ver tire nalo ve re kenerilo ga! Mia rivu lie vo ver avar re tete ka mia mña rimunu yu ealo, bior bogo nei mia sikili laka van kito rivija kanado solbouo nalo."

<sup>30</sup> "Ana mia bogo na rimei rivova laka vanlo, rivan rivan mia atumulog ateg van burusuku nalo vija suku nalo, aver 'Aiou, kuvitibirbilko kumemi, kuvituba kitkit kumemi, kuvitivinko kumemi.'" <sup>31</sup> Kamiu monoka kuvitigar rivu, bior vonganei buruesi memeai kia ga vo ajumña amila kilkil ea kiniou ruei, mia iorou ka bogo na buruesi rimei rijel bisi, mia amijikia ala rivova laka lie vo van kamiu."

*Ajukukar Yesu ea mñakolkolo*

<sup>32</sup> Ana na ka bogo nei, ajumña aburukakar tomu joo namña amila kokorovio tuboiano, naruei aburulo naliko Yesu, ka auebinvinlo vijaio. <sup>33</sup> Naruei amiel banbano-o, abokar kanano vio, vio tai namña abio ka Bordada na Kulorinio. Ana amidu Yesu ajuku kakario joa mñakolkolo, abitiri lario jumolu ju iviso, mia ajuku kakario tomu na bova juo neibano, abitiri bulaglo

tinene jua Yesu jumñano meruo, a tinene jua jumñano mali.

<sup>34</sup> Jibe na naruei ana na Yesu jomña jaklele ea mñakolkolo, naruei naio mil ban Atua, berinavo "Aiou Teta, jau koviekokoa nalo nei. Nalo maka avitilubar vatitig vite nei mña ajumña amilaio nei."

Ana na iorou kanio, ana tomu na mira naloaju jibe na ajumña amila jibe ka namña amiere mñabujo, ka aleal ka kei kalo na mia rivar Yesu mño kulumñarau tai, a kei rivar tai.

*Amiyotel va ea Yesu*

<sup>35</sup> Mia kulo dolu nalo ajikilaju ga koalabo,aju ga mña abitivitio, mia kialo natukamuano nalo ajumña amil bova ka Yesu, ajumña amiyotel va eao, aberenio "Kumialio kema na! Tomu nalo ajumña aber naio milarur tomu dolu nalo miroano ruei, mia vonganei jumñabe naruei? Aber naio be Atua kiano Naverikariano, þeli na naio be toro novo tai napano Atua miilaio binimei. Aver tibe na þeli bo ka rilurur kija naio bereio!"

<sup>36</sup> Mia na mira nalo ajumña amil niegeniege naio bunu, abinimei amiyuku mñarjumñielu na mjea ban naio ka rimunuio, <sup>37</sup> aberinavo "A verenio jau kobe parinio tubo ka kulo Ju riano, javukia namñaaju aberenio, bo ka jau kalarurso vonganei."

<sup>38</sup> Mia ka bogo na abivitauia tiniemaiano tai, ajuku jo mave ea mñakolkolo mave ka Yesu parinio, na naio berinavo "Kulo Ju kialo Parinio Tubo."

*Tomu juo namña amila kokorov tubotano amil ban Yesu*

<sup>39</sup> Ana na ka bogo nei, naljuo napano ajaklele ea mñakolkolo bija Yesu amil banio na. Tinene mil kirivova banio, javukia nalo dolu nalo, naio berinavo "Mia jau kobe Naverikariano, þeli na makanio? Bo jau kala soþeli, kalarur kito!"

<sup>40</sup> Mia tinene mil banio berbureio, ber "Kaleliki, vonganei be kiado bogo na maariano naruei, mia jau maka kotovon Atua vo. Kito tolu nei tibureiano na amije ban kito be takurano ga, <sup>41</sup> mia tivelinio ka kito juo, memedu ga ka torokoriano namña romilaio, mia tivelinio ka naio, naio maka rila titai leleio."

<sup>42</sup> Ana na mil ban Yesu, bika denio, berinavo "Yesu, bogo na ver komei kove barago, komei bereio, aiou kovijuku rivu, jau tiniemo ribobogia re kiniou."

<sup>43</sup> Ana na Yesu berdoþe banio, berinavo "Kiniou neberkar banso, neber ea legiano na banei ga, mia jau koto vija kiniou ea kiado vio vuiano."

*Yesu m̃aro*

*Mataiu 27:45-56; Mak 15:33-41; Jone 19:28-30*

<sup>44</sup> Mia vonganei, rimei rivokar leri, ana tikar ea bogo na m̃erenio maka bunu merera, mila na melijokouo jovuko reraio vio nonovio garuei, naio jo jibe na bano-o bokar m̃erenio tolu niogoravo. <sup>45</sup> Ana iorou kanio, ana jagidago napano ajelanio jo joomo ea Atua Kunuano Lu, nañia joko vio lu na be lu laka, naio buruþe mielibievi niati juo. <sup>46</sup> Mia ea bogo na, Yesu miaga maariano, ber "Teta, kiniou nomidu niunuku joa juñamo." Mia naio miaga jibe na bisi, ana buruñaria kanano jegi naruei, naio m̃aro.

<sup>47</sup> Ana bogo na toro na toru na mira naio mial vite nei, miolua Atua siano, berinavo "Riano ga na, kema na naio be toro tai na memedu ga!" <sup>48</sup> Mia tiniobi na toru napano abinimeĩ vio takurano ea vio nei, nalo bunu amial vite nalo nei napano m̃a amila ka Yesu, tiniel miia naio toru laka na. Avona bisi, ana na abanvan bereio, amiel bija buruñara jogvaiano, abano bere ea kialo vonuo nalo.

<sup>49</sup> Mia taara dolu na tomu nalo ajua vio nei ka bogo nene bunu, ajikili aju koalabo kija ga, ajum̃a abitivitii vite nalo. Nina be Yesu kiano bilbilu nalo, naliko tire nalo nanua abinimeĩ ea vio Kalele, ajum̃a ajakilili Yesu banbano-o bokar vio nei, mia nalo bunu amial Yesu kiano m̃ariano.

*Yoseve jivĩn Yesu*

*Mataiu 27:57-61; Mak 15:42-47; Jone 19:38-42*

<sup>50</sup> Naruei toro tai na komeli na kulo Ju nalo kialo na Arimatea, mia siano be Yoseve. Naio be toro na toru tai na komeli na toru na vio Yerusalemo, be toro na memedu tai napano kiano bajago kirinovo laka. <sup>51</sup> Naio tai napano jidom toru ka Atua kiano Navenatuboiano rimei, mia beamu ka napano aber ka mia ala vaio ka Yesu, naio takurano kiano jidomiano maka tibe na, naio milavon ka riverburelo ka ala re rivova kanio.

<sup>52</sup> Mia bogo na mijogial ka aber Yesu m̃aro ruei, naio ba jikil jukamu ea Pailat mirano, naio bika denio ka ver mijikia rudu Yesu mokotenano. <sup>53</sup> Ana na Pailat mijamo ka banio, naruei naio ba midular Yesu mokotenano ea m̃akolkolo, naio mijuvuluko ka kuluñarauo, ana midu ba midu vatitig joa buluvae vou tai napano aje vonga, napano maka adu toro tai rimoneaio vo.

<sup>54</sup> Naruei legiano na Yesu kiano m̃ariano, naio be Vraire, jibe ka bogo na amiomon

vite rorea Legiano Lu. Mia vonganei m̃erenio jo mialolo batove, vaatara ka Legiano Lu tikario, nina monloglog bogo na m̃erenio javin. <sup>55</sup> Naruei tire nalo nanua m̃a ajakisior Yesu, jikar Kalele binimeĩ boru ea kiano m̃akolkolo, mia vonganei bogo na amidu mokotenano binimeĩ, ajakisorio bereio. Ajakisior binimeĩ boru ea pakeltavo naruei, amial vio na amidu mokotenano jo mon joomo ea buluvae.

<sup>56</sup> Nalo amialio avona bisi, ana aban bere vonuo ka ala vatitig sano bonotanunu vija pomat. Nalo aboru vonuo ruei, avona bisi ana Legiano Lu jikar naruei, mila na maka bunu ve bogo tai ka avan bereio ka ayovovua Yesu niabene. Mila na nalo aju ga vonuo jibe na, jibe ka nañia tuboiano berenio ber monoka nalo ala ea Legiano Lu.

**24***Buluvae kurano ga jo*

*Mataiu 28:1-10; Mak 16:1-8; Jone 20:1-10*

<sup>1</sup> Legiano Lu barlaka ban kario, ana na viomijeni kanio, naio be legiano na be moti na sude dolu. Mia viomijeni mermeravo kia ga vo, ana na tire nalo nei tealo abar bonotanunu bija pomat nalo na amim̃auka batitiglo ruei, amiel aban bereio ea buluvae ka ayovovua vatitig Yesu niabeno. <sup>2</sup> Naruei bogo na abinimeĩ aboru ea vio nene, amial ka buruñara puruveru na ajubonko kar ka buluvae, ajubon lario ruei, <sup>3</sup> ana na nalo aba joomo, mia amiilo ka napano Yesu mokotenano bakovio tai ruei.

<sup>4</sup> Mia ajikili aju ajidomii dede toru laka-o, mia amiilo ka vaarakurano ga tom juo ajikili aju bijalo. Tom juo nei, m̃alo kuluñarauo miuvu mia miuvu batitigio bo. <sup>5</sup> Mila na tire nalo nei amerou ka avitikarlo, naruei aminie ka sudu jaalo, ajak banini tano kamu kalo. Ana naljuo amil banlo, aberinavo "Oi, tire nalo, kamiu maka kuvijikia kuvial toro na meul ea vio na m̃ariano. <sup>6</sup> Naio maka toa vio na, Atua bitirilal naio ruei. Kamiu kuvisidomii von bereio, venia naio berial ka kamiu ka bogo na naio jo kamliko nua yako Kalele, maka kumei nei vo. <sup>7</sup> Naio ber jibe nei berinavo, jibe ka naio be Kulorinio Kenerinio, mia monoka ajamo ka naio rivon ea tomu na bova juñalo, ka mia atukukakar naio toa m̃akolkolo, mia ka bogoti ve tolu nene, mia naio tumolu rimeul bereio. Naina naruei be iliano nanua m̃a naio berenio ka kamiu ruei."

<sup>8</sup> Mia tire nalo amijog ninei, mila na tiniel maio ka bereio Yesu kiano verikariano, nanua naio ber batitigio bo banlo berinavo mia naio mijikia rimeul bereio. <sup>9</sup> Tiniel maio ka bereio, ana na ajuvan vio nei, aban bere amial atevi duelimo ba tai bija nalo dolu nalo. Mia vite nalo naña amial ea buluvae, aberiio meravo vatitig bo banlo, <sup>10-11</sup> mia nalo nei maka amoneaio, amial jibe ka tire nalo nei ajurña ajukunu vovu ga.

Mia tire nalo na amial vite nalo nei, sialo ajibe nei, Mere re Maktala, Joana, Mere na Yemesi kenieno, bija tire nalo dolu bereio.

*Pitere jikiti ba bitii veve buluvae*

<sup>12</sup> Mia Pitere, naio takurano jidom rialeal ka tenei naio be riano ĩeli na makanio, naruei naio jumolu, jikiti bano-o jidom rial vonio vajoomo na buluvae nene. Naio binime boru ea vio nei, monkorkor ba joomo, mia mial Yesu mñano kuluñarauo nalo aju keano ga, mia mokotenano ba kovio tai ruei. Ana na naio batavio bereio miel ba vonuo, naio jo jidomii toru laka ber vite nei naio juñabe nei, ĩeli na nioti nene venia.

*Naagagoano juo amiel abatove Emeas abiviuo Yesu*

<sup>13</sup> Ana iorou ka ninei bereio, ka legiano nene ga, tom juo kalo ajuvan vio Yerusalemo ka avan ea komeli na telisu tai, siano Emeas. Marabo na ban ea vio na maka ve tebiavi laka, naio jibe ka sadu duelimo titai, <sup>14</sup> ana bogo naña amiel abano, ajukunu toru ka vite nalo na abarlaka ruei.

<sup>15</sup> Ajukunu abano-o, ana na Yesu miel binime iorou kalo, jo miel nalikolo abano. <sup>16</sup> Amial naio jonña miel bijalo, amialio jibe ka valauo tai ga, bior miralo maka ajikia avitilubar naio. <sup>17</sup> Ana na Yesu bika denlo, berinavo “? Kube juo kumituña kumiel jibe na, kumitukunu ka venia?” Mia bogo na bika jibe na, amebi ajikili aju ga jibe na, miralo bova kanio.

<sup>18</sup> Naruei nalo tinene, siano Kleopas, berdoĥe ban Yesu, berinavo “Tomu nalo telabo na vio reraio ajurña amiadu ka Yerusalemo ka bogo na, mia ĩeli jau takurano maka kojog buruñara vite nalo na amalaluvo vonganei yako, a?”

<sup>19</sup> Ana Yesu bika ber “? Ana vite venia nalo naña jau kojorña koberenio na?”

Nalo aberdoĥe, aberinavo “Tenei be tivelinio na tete re Nasarete nei, Yesu. Naio binime, be naverialiano tai, naio miñauka kijokijo telabo ea buruñara moroano na kiano, mioliolu berloglog tomu nalo bo laka, mila ajidom naio toru laka, ba bokar bunu ka naña Atua Soĥi berial ber naio jaaro toru laka ka naio. <sup>20</sup> Mia

karina, nanua viomijeni niovo ga, kulo lu na tortoru bija kiado natukamuano nalo, tiniel jer naio, aburu naio jel ea buruñara komeli nalo banbano-o na ajibure naio aber monoka mia riñaro, ana aban ajukakar naio joa mñakololo ana mñaro. <sup>21</sup> Nanua beamu, kenememi jidomiano joa naio ka mia naio naruei mia rilarur kito kulo Israel, ka mia naio rivuru bulag kito den kulo Romo nalo kialo moroano, mia vonganei vite nonovio ba bova bereio ruei. Naio buro den kumemi banei be kiano bogoti tolu nei naruei.

<sup>22</sup> “Mia be vite tai bereio mila kumemi numiilo mñele kanio, mila numituña numisidom bijovijonio ka kia nei vo. Banei ga napano tu tokokoreko ve vaarakurano kia ga vo, kenememi tire nalo tealoo ajevijo aban bereio ea buluvae ea vio na amidu Yesu mokotenano mon eaio, aban ka ayovovuao vatitig rivu. <sup>23</sup> Mia bogo na aboru ea vio nene, amial ka mokotenano maka bunu toa vio na jo mon eaio, naruei ajikiti abinimei bere ea kumemi, mia maka nina ga, mia aberialio ka amial bunu naliano naljuo, napano aberial aberinavo Yesu meul bereio ruei. <sup>24</sup> Ana kumemi tealoo ajidom aialio vatitig, naruei aban ea buluvae, amialio javukia napano tire nalo nei aberenio, maka lele aial naio.”

<sup>25</sup> Naina naruei be iliano napano tom juo neibano aberiio ka Yesu, bogo na ajikili ajua mñarabo. Naruei naio bunu mil ber kalo, berinavo “Tomnei, kamii kube bulubau nalo ga. Naverialiano nalo aberial batitig bo vite nalo na kirisiou ruei, mia juñabe maka kumonroneaio vo? <sup>26</sup> Peli na kamii kumijikia ruei, napano mia Atua rivitirilar kiano Naverikariano naio ve toro na toru ea yetemeriba nei. Mia kamii maka kuvitilubar ka Iliano Lu nalo aju aber mia ala Naverikariano rojog rivova, ala bulag naio beamu, karina mia Atua mijikia vitirilar nalo, rivokar kiano buruñara mermerano.”

<sup>27</sup> Naruei Yesu jo jukunu banlo jibe na naruei, berlogloglo ba lie vo. Naio jikar ea Mosis kiano niosi nalo, binimei bokar Naverialiano nalo kialo niosi nalo, naio jonña ber bisivisii meravo banlo juñabe napano iliano moruo nei jonña jiloglog naio ga, ĩeli na ajurña aberii danñariga naio. <sup>28</sup> Naruei abe tolu amiel aban bereio, mia maka vesiou ana abinimei vaataro ka komeli na tom juo nei aban kalo. Mia nalo amial jibe ka Yesu miel ka riel rijaka, <sup>29</sup> mia ajikili kanio ka naio to vijalo beamu vo. Amil banio, aberinavo “Koig vonganei, mñerenio jo mialolo batove keano, vaataro ka vio rimelijo naruei. Jau komei koto kija vija kumemi beamu, romon ea vio nei ga vo.”

Ana na Yesu ba jo naliko ea kialo vio. <sup>30</sup> Aju bano na monloglog bogo na sinaniano, mo nalo abinimej ajutano vio takurano ea vio na sinaniano. Naruei be bogo na abolkouo ka sinaniano, mia Yesu ga naio jumolu midu sano niajoko, naio bolkouo ban Atua ber siva kanio, naio burekokorovio bar janealo. <sup>31</sup> Mia bogo na naio mila jibe na, memedu ka bogo na naruei ana miralo jibe ka betavo, abitilubar ka naina jo naliko na, be Yesu nene na. Ana aju amial naio, mia bogo bulati ga, mia naio jaluvo ba kovio denlo bereio. <sup>32</sup> Naruei abe juo ajunja aberverii, aberinavo "Ajerei, robe juo garuei maka rovitilubar, mia naio be kiado Tubo nañariga neibano. Mia riano ga, bior bogo naña roju rojukunu bija naio rojakii nñarabo robinimej, napano naio jomña ber bisivisii Iliano Lu nalo ban kito, kiano iliano nalo ajese laka, ajibe ka sebi jo bovago joomo ea kiado iviso."

<sup>33</sup> Mia bogo na amijikia ka amial Yesu mirano ruei, maka bunu amonmelio, mia ajumolu soñeli, amiel ea burumñara miamo aban bereio Yerusalemo ka averialio ka nalo dolu nalo.

Mia nalo aba amaluvo ka duelimo ba tai napano aju abior vio takurano kia ga vo naliko dolu nalo, <sup>34</sup> mia naljuo maka ail vanlo vo, mia nalo aberial kanalo jukamu aberinavo "¡Ai, tom juo, abe bogo na ga kubano, titai miyotuba ea vio nei! Iliano napano tire nalo aber beamu, naio be riano ga. Kiado Tubo naio jumolu den nañariano ruei, Pitere nei mialio ka mirano memedu." <sup>35</sup> Ana na naljuo nei bunu ajusolio kialo iliano, nalo aberii jumñabe ka Yesu miyotuba ka naljuo ea nñarabo, a ka napano maka avitilubar naio, banbano-o bokar ga bogo napano jan ka joko janealo.

*Yesu maluvo kean kiano naiaagoano nalo*

*Mataiu 28:16-20; Mak 16:14-18; Jone 20:19-23; Inñauano 1:6-8*

<sup>36</sup> Mia bogo naña naljuo nei ajunña ajukunu banlo ka vite nalo nei kia ga vo, amiilo va ka napano Yesu jikili ju iviso kalo garuei, naio ber kalo berinavo "Tumñaro rito vija kamiu."

<sup>37</sup> Yesu binimej ealo jibe na, mila na ajidomii aberinavo naio be simñaro tai, mila na amerou toru laka. <sup>38</sup> Mia Yesu bitilubar ka amerou kanio, ana naio bika denlo berinavo "¡Ai, ka venia kamiu kuvisidomii nñelea jibe na? Kenemiu iviso veve juo re bunu! <sup>39</sup> Kuvial vonio jumñaku vija jaaku, jeleig venia nalo nei jualo! Kam kuvialio, ninei be kiniou ga nei! Kumei kuvitokol veve niabeku torogio nalo nei,

bior vite na jibe ka simñaro maka ve buruii, a maka ve niamoiou tibe ka mokotenaku nei." <sup>40</sup> Ana naio jomña mil banlo jibe na, naio jiloglog jumñano bija jaano kalo ka ajikia avitii vevelo.

<sup>41</sup> Ana ka bogo na, naiagagoano nalo, kialo jidomiano jomña mirñau toru jibe na, napano ajaaro toru ka amial aberii Yesu, mia ajidom deio kia ga bunu. Ana Yesu mil bereio, bika denlo berinavo "Ei kamiu kuburosebi ruei?" <sup>42</sup> Mia nalo amijege niado menoko ju ruei, ana na amidu niatai ban Yesu, <sup>43</sup> mia naio midu denlo, naruei kamu ka miralo naio jenio.

*Yesu mil maariano ban kiano naiaagoano nalo*

<sup>44</sup> Karina na, Yesu mil banlo, berinavo "Bogo na nanua mña nojo kitoliko nua, kiniou nojomña neberii iliano miroano ea yati na nonovio na Navivitauiano Lu nalo ban kamiu ruei. Kiniou nobar iliano nalo na ea niosi na Mosis kiano, ea naverialiano nalo kialo niosi nalo, a ea niosi na Iouano lu nalo, naruei kiniou neberial ka iliano nalo na naruei, aberii kiniou ga, mia amei ave riano rivesiou re ga na. Tenene na kiniou neber jibe na ka kamiu, mia vonganei naruei kumial vite nonovio nalo na abinimej be riano ruei ea miremiu nalo."

<sup>45</sup> Naruei Yesu jomña berlogloglo ba lie vo, mila kialo jidomiano nalo ba toru laka bereio joomo ea Vivitauiano Lu nalo nei, naruei vite nalo nonovio binimej meravo bo kalo. <sup>46</sup> Naio ber kalo berinavo "Nina naruei, iliano nalo nei aberii jibe na naruei, ka Naverikariano, mia añele naio rijalele rivano-o mia rimñaro, mia sano bogoti tolu nene, mia naio tumolu den nañariano rimeul bereio. <sup>47</sup> Ana iorou kanio, ea siano ga, mia kiano tomu nalo mia atikar to yako Yerusalemo, mia avan ea yetemeriba vodolu, avan aioliolu van taara nonovio na tomu nalo, averial vanlo ka monoka aviliglo ka mia amijikia ajev viekokoano ka kialo vovaiano nalo.

<sup>48</sup> "Naruei kamiu napano mña kumial vite nonovio nalo na ka miremiu, kamiu nene naruei kuva kuverialio van tomu dolu nalo ka vite nalo nene be riano. <sup>49</sup> Inñauano nei, naio be inñauano tai na kirisikili laka, mia kiniou nodu moroano tai toa kamiu ka mia rijai kamiu kuvituvulio. Moroano nei, Teta kiano verikariano naio jo, ka mia naio riila lario sel mave tiniabene rimej rivujo loa ea kamiu, tenene na kiniou nejidom never ka kamiu, ka kamiu kuviel dedade re den komeli nei vo, mia monoka kuvitu rorea ea vio nei beamu vo-oa, ka kuvokario."

*Atua buru Yesu ban bere mave ea tini-abene*

*Mak 16:19-20; Inãuano 1:9-11*

<sup>50</sup> Bogo na ka mia Yesu jidom ka tuvanlo, jukamu kalo abatove ea komeli sesa na Betani. Abinimei abokar vio nene, ajurña jibe na, banbano-o na Yesu jumolu jian jurñano loalo, milivu kalo. <sup>51</sup> Naio jorña mioa vatitiglo banbano-o, jo jikar juvanlo bavin mave tiniabene bereio. <sup>52</sup> Naruei naiagagoano nalo amial kialo Tubo naio buro denlo bereio, ana na nalo aminie ka sudu jaalo abatove amilotu ka naio, karina aban bere Yerusalemo, napano ajaaro mia ajaaro. <sup>53</sup> Mia ajua vio na banbano-o ana damariga ea bogo nalo na volkouano nalo ajurña aban ea Atua Kunuano Lu amiaiaio naio.

Naina naruei be Lilianiano Vou na Yesu Kristo napano kiniou Luka nebitautia, maaro ea vio na.



## Yesu Kristo Kiano Ioluanu Vou Napano JONE Bivitauiaio Verialiano Moti

### *Tukunu bulati na niosi nei*

Niosi nei, Yesu Kristo Kiano Ioluanu Vou napano Jone jirio, naio berii Yesu, ber naio be Atua kanano Iliano napano binime i be kulorinio, naruei jo bija kito. Ea niosi nei, Jone berinavo naio bivitauia kiano iliano nalo, ka tomu nalo napano avulukuio ajikia amonea ka Yesu naio be toro napano Atua berkario ka riila naio remei ka rilarur tomu nalo, a be Atua Kenerinio. Mia naio bivitauia jibena, ka ajikia ajev meuliano ea Yesu siano, bior napano amonea naio (20, 31).

Vite moti napano Jone berenio, naio ber ka Yesu, naio be iliano nei napano beamu laka, naio jo bija Atua. A iorou, naio berii vremesiano nalo napano Yesu milaio, napano amijika aija kito, ka kito rovtlubar ka Yesu be Atua Kenerinio, napano Atua berkario ka riila naio rime i ka rilarur kito. A iorou ka vremesiano nalo nei terakurano napano Yesu milaio, Jone berii nioniag nalo nene. Naio berial napano tomu tealo amonea Yesu a ajakisor naio, mia tomu tealo maka asidom amonea naio. Ea mirano duelimo ba tolu [13] ba bokar mirano duelimo ba aluo [17], Jone berii vite nalo napano amaluvo ea bogiano nei napano uolu nalo abinime i ka avokar Yesu. Ea bogiano na barlaka na, Yesu jo mil ban kiano tomu nalo, ka ala vatitig vite nalo tu napano mia rime i rivokarlo, a ril ka ridular kialo jidomiano beamu, ana iorou kiano uolu nalo amei avokar naio.

Ea togio maaro na niosi nei, Jone berii napano uolu nalo nei abinime i abokar Yesu, aburu naio aban ea voroniano, a iorou aba ajukukar naio ea makolkolo, naruei naio m̄aro, a iorou, naio meul bereio a kanano tomu nalo amial naio. Ea niosi nei, Jone berii meuliano na napano jo maka jikia ribisi, napano toro mijikia rivokar ga ea Yesu Kristo. Meuliano nene jikar vonigane i, a binime i ea tomu nalo ga napano amonea Yesu ka naio ga be m̄arabo, a be burupati na ilirianiano, a be burupati na meuliano.

Mia vite burtomoluo napano kito romial va miroano ea niosi nei, naio be bajago napano bogo na Yesu jo berloglog tomu nalo, naio jo berii vite nalo napano toro

jo miñauka bogoti nonovio ea kiano meuliano. Naio mil ea bajago na jibene i bija jamerijiano nalo, ka rila kijokijo van kiano tomu nalo napano amonmonea naio, ka verial bajago na meuliano na moneano. Naina vite nalo jibeka uei, a joko, a mi-amoiario, a toro na vitikariano na nunu bija kiano nunu nalo, a telikrip nei bija marati.

### *Torogio nalo na niosi nei*

Iliano moti 1:1-18

Jone Baruei bija Yesu kiano tomu nalo na beamu 1:19-51

Yesu miñauka kiano iñauano 2:1—12:50

Yesu kiano bogoti maariano yako Yerusalemo 13:1—19:42

Yesu meul bereio bija kiano tomu nalo amial naio 20:1-31

Yesu miyotuba kean kiano tomu nalo yako Kalele 21:1-25

### *Naverikariano naio jo beamu ka tiiano na yetemeriba nei*

<sup>1</sup> Beamu beamu, ea burupati, naio narña abio ka Parinio Bajago na Atua kiano bajago naio jo, naio jo bija Atua, a naio, naio be Atua. <sup>2</sup> Ea bogo na tiiano na vite nonovio, naio bija Atua ruei, <sup>3</sup> naio miñauka iñauano na riñauka vite nonovio, maka ve vite tai na naio maka riñaukanio.

<sup>4</sup> Meuliano na be riano maluvo den naio ga, naruei meuliano nei binime i jibe ka yulu na taara nonovio na tomu nalo. <sup>5</sup> Naio binime i jibe ka yulu narña mereralii nalo na ajua melijokouo, ana melijokouo neibano naio maka rijikia tovulio.

### *Jone Baruei naio binime i berial ka yulu naio jo binime i*

<sup>6</sup> Karina, Atua naio miila kanano toro tai binime i ea yetemeriba nei, naina be Jone. <sup>7</sup> Naio binime i jibe nailliano tai, ka riverial riverinavo toro na yulu nene naio jo binime i, ka rijai tomu nalo nonovio ka ajikia amonea ka toro na naio be Atua kanano yulu. <sup>8</sup> Jibe na, Jone naio maka rive yulu nene navo, mia naio be toro na verialiano ga.

<sup>9</sup> Mia iorou kanio, toro na yulu nene naio binime i miyotuba ea yetemeriba nei. Naio be yulu napano be riano, napano naio bo laka, naruei binime i ka rudu kanano yulu toa tomu nalo nonovio kanalo meuliano.

### *Yulu na yetemeriba*

<sup>10</sup> Toro na yulu, naio naruei napano jii yetemeriba nei, mia bogo na binime i eaio, ana tomu nalo na yetemeriba nei maka avitilubarario. <sup>11</sup> Naio binime i be

moti ea kanano tomu nalo kanalo vonuo, mia nalo na ea kanano torogio nei maka asidom naio ga. <sup>12</sup> Mia tealo ajaaro kanio, amoneaio, naruei ea nalo na abiniu, naio mijamo kalo ka amijikia amei ave Atua kenerinio nalo. <sup>13</sup> Naio milalo amiyotuba valuo bereio, napano maka tibe ka napano kiritete nalo amiyotuba jakii yati na burukija, ĩeli na jidomiano na tira bija surñano kialo, ĩeli na toro kanano jidomiano, mia amiyotuba bereio jakii jidomiano na Atua kanano.

*Parinio Bajago na Atua kiano naio binime be toro*

<sup>14</sup> Tibe na, Parinio Bajago na Atua kiano naio binime be toro riano, naio binime jo iviso ka kito, naruei kito romial kanano meuliano na bo nene, naio bujo laka ea bajago na tiniememiano a bajago na iliriano. Naio be novo na bo laka be motoru na Karamiado kenerinio, naruei kumemi numial kanano buruñara mermerano nene, napano be kanano, naio ga takurano.

<sup>15</sup> Mia bogo namña Jone Baruei berii naio nua, naio berinavo "Naina namña kiniou nojonña neberii ban kamiu, neber mia naio rime iorou ka kiniou, naio loa laka, mia kiniou yetano ga, bior ka napano naio meul beamu laka garuei, mia kiniou nebe na vonganei ga."

<sup>16</sup> Naio bujo ka bajago novnovo nalo, mia bogo novnio naio jo mila bo toru ban kito, kiano buruñara tiniememiano mila kito romijog bo toru bogo novnio. <sup>17</sup> Beamu, Atua bitirilar tormoruo Mosis, ka naio du ga kanano tuboiano binime ban kanano tomu nalo, mia Yesu Kristo, Atua bitirilar naio ka naio naruei bar bajago na tiniememiano a iliano na iliriano binime ea yetemeriba nei. <sup>18</sup> Kito kulorinio, maka kito tai napano naio mijikia Atua, a rialio ka mirano, mia toro napano naio jo dañariga ea Atua kanano jidomiano, naljuoaju vio takurano bogo novnio, naio naruei binime mila kito remijikia Atua bija kanano bajago novo nalo.

*Jone Baruei naio mial Naverikariano Mataiu 3:1-12; Mak 1:7-8; Luka 3:15-17*

<sup>19</sup> Ana bogo na Jone Baruei naio jonña mioliolu banbano-o na, navurimñaraboiano na kulo ju nalo na vio Yerusalem aju ajidomii toru aberinavo naio mimñau jumñabe na, ĩeli vede naio be Naverikariano, ĩeli naio be kei. Naruei nalo amiila kulo Lu tealo bija tomu na tortoru na yati lu na Livai, naruei nalo abinime abika denio aberinavo "Jau kobe kei?"

<sup>20</sup> Naruei telikiti na abikanio, naio ber bulag batitig vite novnio banlo,

naio berdoĥelo berinavo "Makanio, kiniou maka neve Naverikariano nene."

<sup>21</sup> Ana nalo aberinavo "? Ver tibe na, jau kobe tormoruo Elaija re nua, naruei jau komeul bereio, ĩeli? Nina bior Iliano Lu berenio mia naio monoka rime bereio beamu ka Naverikariano."

Mia naio berdoĥe bereio, berinavo "Makanio, kiniou maka neve toro nene."

Naruei nalo aberinavo "? Mo, mia vede jau kobe naverialiano nanua mña Mosis naio berkario ruei?"

Ana bereio naio berdoĥe, berinavo "Makanio."

<sup>22</sup> Naruei abika bereio denio aberinavo "? Ana jau kobe kei bere na? Jau monoka kover titai van kumemi ka numijikia nuvan bere nuverialio van nalo napano amila kumemi nubinime. Jau kover vatitig ga van kumemi, koverinavo, jau kobe kenia."

<sup>23</sup> Ana kanano verdoĥeiano na ea bogo nei, naio jibe nei berinavo "Kiniou nebe niono kurano ga ea vio yauo, namña Naverialiano Aisea beriio nua ruei. Kiniou nebe niono napano binime ka riverial riverinavo 'Kuvila vatitig rivu mñarabo nalo na Tubo kanano ea kenemiu meuliano nalo.'"

<sup>24</sup> Nalo tai kalo napano ajua bogo na, nalo abe Varisis, <sup>25</sup> naruei nalo abika bere denio, aberinavo "Kumemi numijog jau kober ruei ka jau, maka kove Naverikariano, a maka kove Elaija, a maka kove naverialiano namña Mosis berenio. ? Ver tibe na bior venia ana jau koberenio kobare ka koorña kabaruēi mele ea tomu nalo janea vio jibe na?"

<sup>26</sup> Ana Jone berdoĥe banlo, berinavo "Kiniou, varueiano na kiniou nojo nami-laiio ban nalo na, naio ea uei ga. Mia toro dolu tai mia naio rime rudu jeleku, napano naio jo iviso ka kito ruei, mia kamiu maka kuvijikia naio vo. <sup>27</sup> Naio loa lie laka ka kiniou, jibe ka napano kiniou maka navare ka nava vaatato ka naio, neiel vijaio, ĩeli neivelar kanano kulubuei."

<sup>28</sup> Naruei vio nei naruei napano nalo abano ka aial Jone ea, naina ea tanobuku na vaatato ka komeli na Betani, ea mñarauei na Yortano tivelinio bano, nina ea vio namña Jone naio jonña baruei a tomu nalo.

*Yesu, naio be nunu solbou na sida na Atua kanano*

<sup>29</sup> Ana legiano dolu nene, Yesu naio miel ba miyotuba ka Jone Baruei bija kumemi naiagaoano nalo kiano ea vio namña numituaio. Ana bogo na Jone mial Yesu, naio berial ka kumemi, naio berinavo "! Mm, kamiu kuvial toro yako naio jonña miel binime kiana! Naio, jibe nunu solbou

na Atua kanano, napano mia naio rivar bulag vironiano na kariano nalo na tomu nalo na yetemeriba nei kialo. <sup>30</sup> Naio nañia kiniou nojoña neberiiio ban kamiu nua ruei, neberinavo: Iorou ka kiniou, mia toro na toru tai rimeï napano mia tukamu ka kiniou, naio loa laka lie vo bior naio jo jukamu ka kiniou. <sup>31</sup> Kiniou neber iliano nei beamu, maka nejikia ka mia ve kei, maka nejikia ka naio be kanaku tumano ga na, mia kiniou nemijikia ga ka monoka navaruei ea kito kulo Israel, ka rila ka mia romijikia rovitilubar kiado toro na toru nei."

<sup>32-33</sup> Ana Jone naio ber bisivisii vatitigio ban kumemi juñabe ka na naio mijikia ka Yesu naio be Naverikariano. Naio berinavo "Jibe ka nañia neber beamu ruei, maka nejikia naio be kei, mia maka vesiuo ga, ana Atua mil ban kiniou, naio ber jibe nei, berinavo ver bogo na jau keial kanaku Niununo Lu naio rivatove totano ea toro tai, naina naruei mia naio rivaruei ea tomu nalo ea kanaku Niununo.

"Naio ber jibe na ka kiniou, ana bogo na namial Yesu nene, namial napano Niununo juvan vio mave, batove ea naio javukia vaama tai, binimeï bujo joa naio. <sup>34</sup> Bior vite na naruei napano namialio, nemijikia neverialio vatitigio van kamiu, ka be riano ga, toro na naio be Atua Kenerinio memedu."

*Yesu kanano naiagagoano juo na be moti abinimeï ea naio*

<sup>35</sup> Ana ea legiano dolu nene bereio, ana Jone Baruei naio jo keano ea vio nei vo, naio joña jukunu bija kumemi liko Adru, napano ea bogo nene kumemi nube kanano naiagagoano. <sup>36</sup> Ana namial Yesu jo miel binimeï barlaka jel vaataro ka kumemi. Ana Jone berial ban kumemi, berinavo "I Tom juo, kuvial toro yako, naio jibe ka kirikiti nunu na telisu na sida na Atua kanano na!"

<sup>37</sup> Kumemi juo numijog Jone naio ber jibe na, naruei vaarakurano ga nube juo numitumolu, nubano numitakisor Yesu. <sup>38</sup> Ana Yesu barñilig naio ka kumemi, berinavo "Tomu juo, kiniou namial jibe ka kam juo kumisidom titai kovio."

Ana nuberdoñe naio, nubio naio jibe ka kenememi naverloglogiano, ana nuberinavo "?Rapai, jau kobinimeï ea vio nei, vio na vabe jau kojoña komon eaio?"

<sup>39</sup> Ana naio berinavo "Mo, kamiu kumei, rava kuvialio." Ana numiel nuba nubokar vio nañia Yesu joaio ka bogo na, a jikar ea titai jibe ka mferenio veri niogoravo, numitu bija naio, numitukunu banbano-o bokar vio melijo nonovio.

<sup>40</sup> Ana Andru nene napano kumemi juo numijog Jone berii Yesu numitumolu numitakisor naio jibe na, naio be Andru napano naio be Saimon Pitere kuruano na telisu. <sup>41</sup> Ana Andru nene naio ka takisor Yesu garuei, mia naio ban soñeli ka kuruano nei beamu vo, ana bogo na naio mileal naio berii banio, berial Naverikariano, napano kulo Ju nalo abio ea iliano na Ipru aberinavo Misaea, a kulo Kris nalo abio ea iliano na Kris aberenio Kristo. Naio berial kanio, berinavo "Kuruaku, Naverikariano ñia na, kumemi numileal naio ruei." <sup>42</sup> Berial ka kuruano nei, ana buru binimeï ea Yesu.

Ana bogo na Yesu mialio, naio berinavo "?O, jau na naruei kobe tormoruo Jone kenerinio dolu nene, siamo Saimon? Mo vonganeei kiniou nesisiaso bereio, never siamo Kevas." Sio nei bunu naio be iliano na Ipru, napano naio ber puruveru, napano ea iliano na vio Kris aberenio Pitere.

*Yesu buru naiagagoano dolu juo abinimeï ajakisor naio*

<sup>43</sup> Ana ea legiano dolu tai bereio, Yesu jidom rudu kanano ñarabo bereio, naio jidom rivarkor vio, rivan bere ea kanano tanobuku na vio Kalele. Nubano jibe nei, ana Yesu mial toro tai bereio, berkanio berinavo "Jau komei katakisor kiniou." Toro nene siano Vilip, <sup>44</sup> napano naio bunu ea komeli na Andru naio Pitere kanalo nei Betsaeta.

<sup>45</sup> Ana maka ve sio, Vilip naio ba jirag kanano bilbilu tai, siano Nataniel, naio ba berkanio, berinavo "Toro na toru nañia tormoruo Mosis naliko naverialiano nalo abivitau kakario, aberialio nuanua ruei, naio miyotuba iviso bure kito ruei. Kumemi numileal naio ruei, be toro Nasarete tai, kenerinio tormoruo tai siano Yoseve, ana toro nene, naio siano Yesu."

<sup>46</sup> Mia bogo na Nataniel mijog ka Yesu naio be na komeli na telisu nei, naio bika berinavo "Ana juñabe? Tonovo na toru tai na jibe na naio maka rijikia riyotuba ea komeli na telisu na Nasarete nei!"

Ana Vilip berdoñe, berinavo "Ai, abe jau keil re tibe na, jau komei ga keial naio beamu vo."

<sup>47</sup> Ana naljuo aban bereio ea Yesu, mia bogo na amiel abinimeï vaataro kanio, Yesu mial Nataniel, berii, berinavo "Lerinio, kiniou namial toro na jibe toro novo na Israel tai memedu na, toro tai napano maka ve sibiano ea naio leleio."

<sup>48</sup> Mia Nataniel mijog Yesu berii naio jibe na, naio bika berinavo "?Ana juñabe jau komijikia ka kiniou nebe toro na jibe na?"

Mia Yesu berdoŝe naio berinavo "Bogo na Vilip maka riviedu kaso vo, bogo na jau takurano kojo komijilimebi yetano ea vamelu na buruviki, kiniou namialso ruei kiana."

<sup>49</sup> Mia Nataniel miilo va ka Yesu kiano jikiaiano, berinavo "Naverloglogiano, jau kobe Atua kenerinio riano! Jau kobe parinio tubo na Israel memedu kia na!"

<sup>50</sup> Ana Yesu ber banio, berinavo "Kiniou neber iliano tai na telisu banso, ka kiniou namialso ea buruviki na, mia vaarakurano ga jau komonea kiniou jikili! Nina naio bo laka, mia neberkar banso ka mia jau kaial vite na iloiano ve telabo bereio, napano nalo tortoru lie todovulu ninei na jau komialio navo. <sup>51</sup> Nao, kiniou neber memedu, ka mia kamii kuvial ka vio mave naio rivetavo to, vija nailiano nalo na vio mave na atu amei yetano ea kiniou atu avavin mave bereio, atu avatove bereio avavin tibe na. Vite kinkin nalo na tibe na ana mia kamii kuvijikia kuvialio bior ka kiniou nebe Kulorinio Kenerinio, jibe napano kiniou tena vio mave, a nebinimej nebe kulorinio riano."

## 2

*Yesu kiano kijokijo na be moti, ea soriano na vio Kana*

<sup>1</sup> Mia Yesu nalo abinimej aboru ea tanobuku na Kalele ruei, ana ea legiano tolu nene, jokoluolu na soriano tai ea komeli na Kana. Mia Yesu kenieno naio ba miyotuba ea jokoluolu nene ruei, <sup>2</sup> ana iorou kanio amila toru binimej ka Yesu naliko kanano naiagagoano nalo, abiolo bunu ka amei eaio. <sup>3</sup> Mia Yesu nalo abano amiyotuba ea jokoluolu,aju naliko tomu nalo banbano-o, mia vite tai bova, uei na amunu ea jokoluolu nei naio binii soŝeli. Ana Yesu kenieno binimej berialio ban Yesu, naio berinavo "Munuiano na toro na toru na jokoluolu mila battitigio, amunu koko kanio, binii ruei vio be teau, amila de battitigio garuei."

<sup>4</sup> Ana Yesu berdoŝe, mil banio berinavo "Tiramoruo, venia na iŝauano na naio joa kiniou? Jau kodu re toa juŝaku, bior kanaku bogo na nala vite nalo na jibe na, naio maka vo."

<sup>5</sup> Kenieno naio mijog venia napano Yesu berenio, mia naio ber ka tomu na iŝauano na jokoluolu nei, berinavo "Venia na mia naio river ka kamii ka kuvilaio, mia kamii kuvil re, kamii laio ga."

<sup>6</sup> Ana Yesu mial buruŝara basi-dobidobi na uei tai aju vaataro, naŝa kulo Ju nalo abar ka ŝa ajekon ka vite nalo jibe ka na kanalo nalotvano naio berenio. Buruŝara

basidobidobi nalo nei amiuŝauka ea puruveru, abe verare ka sadu toromomou takurano janealo, basidobidobi nene nalo binii be ari. <sup>7</sup> Ana naio ber kalo berinavo "Kamii kuva kuviov uei, ana kuvar kumei kuvioionio rivan ea basidobidobi nalo nei rivano-o avuvujo magmago." Naruei nalo amila banbano-o na amisono batitigio abujovujo.

<sup>8</sup> Ana Yesu naio berenio berinavo "Mo, vonganei kuviov ve telisu eaio, ana kuvar va van toro na toru na jokoluolu nei ka naio rijikia rimunu vonvonio." Naruei nalo abiovio, abar ba ban naio.

<sup>9</sup> Naruei toro na toru nei naio munu vonvonio, mijog jibe ka binimej be ŝarjuŝelŝelu ruei, mia naio miilo toru kanio, naio maka rijikia ka amileal munuiano nei ea vio na vabe. Mia nalo ga napano abiovio, amijikia, mia maka aver kanio, mia naio bio toro na joro vonga binimej mial naio. <sup>10</sup> Toro nene naio binimej, ana toro na toru nei berkanio, berinavo "Ea jokoluolu dolu nalo, ajuŝa abiov ŝarjuŝelŝelu nana bo naio binimej jukamu, mia bogo na tomu nalo amunu kija banbano-o, karina abiov vonga ŝarjuŝelŝelu na maka rivu laka binimej iorou. Mia ea jokoluolu nei ajuŝa amunu uei banbano-o, karina jau kobiov vonga ŝaku ŝarjuŝelŝelu napano naio bo laka, naio binimej maariano garuei. Ka venia komila jibe na?"

<sup>11</sup> Vite nei naŝa Yesu naio mila ea bulukomeli na Kenan ea vio Kalele, naio jibe ka buruŝara vremeniano tai, be kiano vremeniano na be moti napano milaio. Naio mila jibe ka na naio jo jikar jo jiloglog kanano moroano na vio mave, mia bogo na naiagagoano nalo amialio, kanalo moneano na ea naio, ka naio be Naverikariano na be riano, binimej baviv lie vo. <sup>12</sup> Bisi naruei ana nalo abiniu aban bere ea Kapeneam bereio, nina be Yesu, kenieno, a kurvano nalo, bija kanano naiagagoano nalo, abinimej abokar vio nei ana aju kija jibe na ba bokar legiano nalo tai.

*Yesu mijil dedade ea nalo naŝa aju aŝilvili ka saba joomo ea Atua kanano Yimo Lu*

*Mataiu 21:12-13; Mak 11:15-18; Luka 19:45-46*

<sup>13</sup> Mia bogo tai, vaataro ka bogo na kulo Ju nalo ala kanalo jokoluolu na toru, Jukoluolu na Sidomkariano na Ioruriano. Ana kanalo bajago tai, ber yuka nonovio nalo nonovio monoka ala vonio ka avavin Yerusalemo monloglog bogo ka ala jokoluolu nei, ka sidomkariano na korobilo nalo

ajaluvu den Ijivi, ana ka bogo nei, Yesu bunu naio bavin. <sup>14</sup> Naio ba bokar vio nene, ana ba miyotuba ea Atua kanano Yimo Lu, mia naio mial ka napano nalo telabo aju napano ajuña aṣilvili ka buluku, nunu, bija menu nalo, mia naio mial nalo naña amijebukua veru dolu nalo binimei be veru na memedu na Atua kanano Yimo Lu. Irñauano nalo nene abe irñauano na bo tai, bior abe irñauano na aṣilvili ka vite na tomu nalo monoka avulu ka ala sida kanio, mia titai bova, nalo aju amijukubin tomu nalo toru, mia mave kanio, nalo aju amilaio jouro ea burusio na vio lu.

<sup>15</sup> Ana Yesu naio mial ka naña amila niegeniege dolu ga yimo lu nene jibe na, naruei naio tinien mimi, bar teli nalo, buru vuronlo jibe na, ana banku kalo. Naio ba jibe na, naio ba mijil dedade ealo bija kanalo nunu a buluku nalo abava tavio den Atua kanano Yimo Lu, mia ea tivelinio na nalo naña aju amijebukua veru, naio ba miyon bulag kanalo basaro na puruveru nalo, naio bilig bulag kialo barobaro nalo bijaio. <sup>16</sup> Nalo naña aju aṣilvili ka menu nalo, naio mil banlo berinavo "¡A, kuvar bulag kenemiu saba nalo na ea vio na! ¡Kamii kuvila re karañaku kunuano nei rimei ve kenemiu yimo tai na kuvokar veru eao tibe na!"

<sup>17</sup> Ana bogo na kanano naiagagoano nalo amial Yesu naio mijil dedade ealo jibe na, mila na nalo tiniel maio ka vivitauiano lu tai bereio, jibe ka na naio berii Naverikariano beamu ruei, napano berenio berinavo "*Kanaku jidomiano temi laka ea kanamo yimo lu, naio jibe ka sebi tai bovago ea kanaku iviso.*" *Iouano 69:9*

<sup>18</sup> Mia ka tenei, tomu na tortoru na kulo Ju nalo, nalo bunu amial venia napano Yesu milaio, naruei nalo abika denio, aberinavo "Venia napano jau komilaio vonga na, naio be burumara vite tai. ?Mia jau na komijikia kala vremesiano na vabe ea mirememi, ka rila kumemi nuvijikia nuvial ka naio rimemedu ka jau kala tibe na?"

<sup>19</sup> Ana Yesu berdoṣe banlo, naio berinavo "Mo, kanaku vremesiano naio jibe nei: kamii kuvue bulag Yimo Lu na, avona iorou kanio, ea legiano ve tolu ga, mia kiniou nevitiri lario bereio."

<sup>20</sup> Ana nalo aberinavo "Nalo naña aminauka yimo na, aminauka ba bokar yuka duelimo va veri ba ari [46], mia juñabe ana jau kober jibe na, kober komijikia kovitiri lario bereio ka legiano ve tolu ga? !Maka leleio rijikia tibe na!" <sup>21</sup> Nalo amil jibe na, a nina bior nalo maka ajikia

vaticig rivu venia naña Yesu naio berii ea bogo na. Nalo maka avitulubar ka bogo na naio joña berii Atua kunuano na, nioti nene jibe ka mokotenano. <sup>22</sup> Ana iorou laka garuei, iorou ka na naio jumolu bere den m̄ariano, kanano naiagagoano nalo ajidomialio bereio ka naio ber iliano nei banlo, ana mila na amonea lie vivitauiano lu nalo bija Yesu kanano iliano nalo banlo.

<sup>23</sup> Naruei Yesu nalo ajua jokoluolu na ea Yerusalemo banbano-o na, naio joña mila vremesiano telabo, mia bogo na tomu nalo amialio, nalo telabo amoneaio ka naio be Naveri-kariano. <sup>24</sup> Mia Yesu maka to rijamo ka naio laka vanlo, naio maka to rivarkar tiniene m̄ele ealo, bior naio mijikia batitiglo. <sup>25</sup> Toro dolu tai rijikia re river titai van Yesu ea tivelinio na toro kanano bajago, bior naio mijikia vaticigio ruei, naio mijikia vite nonovio napano aju joomo ea toro kanano jidomiano.

### 3

#### *Nikotimas binimei mial Yesu*

<sup>1-2</sup> Ana ka bogo tai bereio, ka bogiano tai, kulo Israel nalo kanalo navurñaraboiano tai naio binimei ka jidom rial Yesu. Toro nene naio be Varisis nalo tai, siano Nikotimas. Mia naio binimei, naio mil bija Yesu naio berinavo "Naverloglogiano, kumemi numialso, nubitilubar ka jau kobe naverloglogiano tai napano jau kobinimei ea Atua, bior maka ve toro tai napano mijikia rila kijokijo naña jau kojoña komilaio, ver Atua to re vija."

<sup>3</sup> Ana Yesu berdoṣe banio, berinavo "Ee, burutomoluo nalo na bo, a monokanio never ve riano bo vanso, toro na maka sidom rimoluo bereio ve terivou, mia Atua naio maka rijikia rive tubo ea kiano meuliano."

<sup>4</sup> Mia Nikotimas naio miilo ka iliano nei, ana berinavo "¡Tomnei! ?Mia toro na be tormoruo ruei naio mijikia rimoluo bere tuñabe? Kiniou maka ve tinieku ka mia naio mijikia riva joomo bereio ea kenieno mabono, ka mia naio rimoluo ve vaarakurano bereio."

<sup>5</sup> Ana Yesu berdoṣe berinavo "Kiniou neber riano banso, ka toro monoka riyotuba ea uei, a monoka riyotuba ea Niununo. Ver ṣeli, mia naio maka rijikia riva jouro ea Atua kanano navenatuboiano.

<sup>6</sup> Toro naio mijikia rivar bereio toro ga, mia Atua kanano Niununo naio mijikia rivar bereio niununo vou ea toro kanano meuliano. <sup>7</sup> Naina naruei be yotubaiano valuo naña kiniou nojo neber kaso. Tibe na, jau keiilo re bunu ka kiniou neber kaso ka jau monoka komoluo bereio.

<sup>8</sup> “Kosidomii von jegi. Jeg naio jorña miuvuvu, naio jo janea vio jibe ka ga na naio jidom, ðeli na kito roju romijogio, mia kito maka rejikia ka naio jo binimej jumãbe, ðeli na naio jo ba be. Mía m̃arabo na Niununo naio riñau ea toro kanano meuliano jibe na naruei, naio jibe ka jegi.”

<sup>9</sup> Mía Nikotimas naio jidomii bijon iliano nei toru laka, ana bika berinavo “?Tomnei, mia vite na naio mia tumãbe na?”

<sup>10</sup> Ana Yesu berdoþe banio, berinavo “Jau kobe naverloglogiano na toru tai na kulo Israel kialo ruei, mia kiniou nemial jibe ka vite nalo namña kiniou nojorña neber bisivisio banso na, jau maka lele kejikia vo, a! <sup>11</sup> Kaiagago rivu! Javukia namña naverialiano nalo amilaio beamu ruei, kiniou nojorña neberial ga venia na rña kiniou nemijikiaio, ðeli na venia na rña kiniou namialio, mia tibe na damãriga, kamiu tomu nalo na vio Israel kamiu maka kuvisidom kuvisov kenememi iliano nalo. <sup>12</sup> Kiniou nojo neberii saba nalo na yetemeriba nei ban kamiu, mia maka kuvisidom kumonmoneaio, mia ver neverii saba nalo na vio mave, mia kamiu kuvijikia kumonmoneaio tumãbe? Kiniou namial ka mia ve deio ga. <sup>13</sup> Mía kiniou Kulorinio Kenerinio, kiniou ve takurano ga nemijikia neverloglog kamiu ka na vio mave, bior ka napano maka ve toro dolu tai riva rial vio nene, mia kiniou ga Kulorinio Kenerinio najaluvo den naio nebinimej yetano ruei, a iorou, mia navan bere eaio.

<sup>14</sup> “Beamu beamu tormoruo Mosis nalo ajua vio yauo, maro nalo ajumã ajer binvinlo, mia naio bitirilar iesi tai, midu butoto maro jo mave, ana kei kalo napano maro jerlo, mia ver sirarago ga vitikar maro na jo mave, mia Atua rilarrurlo. Ana ea m̃arabo nene kia ga, mia monoka adu kiniou Kulorinio Kenerinio bunu noto mave ea iesi tai. <sup>15</sup> Naruei toro kei na rimonea kiniou, mia naio rivokar meuliano vou nei napano naio maka ve jukuti nene.”

<sup>16</sup> Yesu ber jibe na bior Atua tinien jii tomu nalo na yetemeriba nei toru laka, naruei naio mijamo ka kenerinio na kirinovo laka, napano naio ga takurano be kanano, binimej m̃aro kar kito, naruei toro kei napano rimonea naio, mia maka rijikia riva kovio, mia rivokar meuliano na bo nei napano maka rijikia ribisi bogo tai. <sup>17</sup>?Ana bior vaio Atua miila kenerinio nei binimej yetano ea yetemeriba nei? Maka riilaio rimej ka tibure tomu nalo na yetemeriba nei, mia miilaio binimej ka rijamo ga kanano meuliano ka rilarrur kito.

<sup>18</sup> “Toro kei napano rimonea kenerinio nei ve riano, mia Atua tibure re naur, mia toro na maka rimoneaio, vironiano joa naio ruei, bior naio maka rimonea Atua kenerinio. <sup>19</sup>?Ana vironiano nei napano mia Atua naio monoka rilailo, burupati nene be venia? Naina bior napano naio miila kanano yulu binimej ea yetemeriba nei, mia tomu nalo ajumã amila kikiio ga banbano-o na, maka asaaro kanio, mia ajidom ga bajago na bova tena melijokouo. <sup>20</sup> Mía nalo nonovio namña aju amila bova jibe na, jibe ka napano maka asidom yulu nei leleio, a maka asidom amei vaataro kanio, bior amerou ka aberinavo vede mia naio rila kanalo vovaiano nalo ayoyotuba ea vio medave, naruei tomu nalo ajikia avitilubarario. <sup>21</sup> Mía nalo namña amirñau ea bajago na bo a memedu, nalo maka amerou ka toro na yulu nei, a nalo abinimej vaataro kanio. Nalo ajaaro kanio, bior yulu nene naio rila meravo vatitig ka vite nalo namña amilaio, nalo amirñauka amonmonea ga jidomiano na Atua kanano.”

*Jone Baruei naio jaaro ka Yesu jikar kanano imãuano*

<sup>22</sup> Ana iorou ka vite nalo nei, Yesu buru kanano naiagagoano nalo ajuvan vio Yerusalemo abatavio ea tanobuku na vio Yutea. Nalo aju jibe na, naruei ajumã abaruei ea tomu nalo. <sup>23</sup> Ana ka bogo nene nei ga Jone Baruei bunu naio joa vio dolu tai, siano Aenon, vaataro ka vio na Salim. Naio binimej ea vio na bior uei tai joaio, mia tomu nalo na aju abinimej ka naio, naio jorña baruei ealo ea marauei nene. <sup>24</sup> Nina ea bogo na nalo maka avokar naio, a maka avuku naio riva joomo ea yimo na lakoiano vo.

<sup>25</sup> Naruei ka bogo na Jone kanano naiagagoano nalo amila iliano tai bija toro Ju dolu tai, ea tivelinio ka m̃arabo na sekon vite nalo jibe ka kanalo nalotuno berenio, ana ea tivelinio na bunu varueiano nalo napano Jone bija Yesu kialo. <sup>26</sup> Aberii banbano-o karina abinimej amial Jone, abika denio, aberinavo “Naverloglogiano, kumemi numisidom nuvika denso ea tivelinio na toro na Yesu napano beamu, bogo na kito rojua marauei na Yortano tivelinio bano, naio binimej mialso, naruei jau koberial saba telaboio naio. Vonganei, naio bunu binimej jo baruei ea tomu nalo, mila abiniu aju ajuvarvan kito aban ea naio ga, vio bujo mia vio bujo.”

<sup>27</sup> Ana bogo namña aber jibe na ka Jone, naio maka rijoku, maka rijog rivoa, mia naio jaaro ga, berinavo “Kito tomu

nalo nonovio monoka roinãauka ga venia napano Atua naio midu jua juãado. <sup>28</sup> Javukia napano kamiu kumijikia batitigio rui, naãa kiniou nojomãa neberial julaka ga, ka kanaku iãauano, kiniou maka neve Naverikariano, mia nebinimei beamu ka naio ga, ka neverial ka naio jo binimei rui. <sup>29</sup> Ana vonganei jibe ka naãa kamiu kuberialio ban kiniou, naio binimei jo mila kanano iãauano rui, ana vite nei najaaro kanio, namialio bo laka.

“Naio jibe ka bogo na soriano, napano naio jibe nei. Ver toro na naio soro, kanano bilbilu tai, naio riija naio ve toru ka aiomon saba nonovio na jokoluolu, mia karina, ea legiano nene, bogo na avuru tira rimei, tira nei naio maka riva totano vija naio mia naio ba jotano bija koano ga. Mia naio maka rijog vova, kanano saariano naio bare ka toro na soriano kanano. A vonganei kiniou bunu najaaro jibe na, napano kanaku naiagagoano nalo aju ajakisior Yesu. <sup>30</sup> Nina bior Tubo Naverikariano naio monoka to rimei ve toru lie tibe na tulaka, kiniou monoka nomei nove telisu lie vo.”

*Naverikariano naio binimei miãau juãabe ea yetemeriba nei?*

<sup>31</sup> Ana Jone Baruei naio berii Naverikariano, berinavo “Naio be na vio mave, naruei naio mave loa vite nonovio. Kito romiyotuba ea vio yetano nei, kito robe na yetemeriba nei ga ana romijikia roverii vite nalo na vio nei ga. Mia naio, jibe ka naãa kiniou neberenio, naio jaluvo ea vio mave binimei yetano, naio loa lie ka tomu nonovio, <sup>32</sup> napano naio binimei jomãa berial vite nalo naãa naio mialio beamu ea vio mave, a vite nalo naãa naio mijogio. Naio berial vite nalo na, mia tomu nalo maka asidom kanano iliano, maka amoneaio. <sup>33</sup> Telabo na maka amoneaio, mia kito naãa kito romoneaio, kanado moneano naio jekar batitigio ka Atua, kanano iliano nalo be riano, a amemedu batitigio bo ga. <sup>34</sup> Kanano iliano nene nalo, naio miãa Naverikariano naio binimei berial ban kito rui, ana romijikia ka iliano nalo nei abe riano. Nina bior bogo na Naverikariano binimei, kito romial ka napano naio mil ea moroano na Niununo na Atua kanano, bior Atua jian kanano Niununo banio, maka ve torogio ga, mia momonio garuei. <sup>35</sup> Karamãano Atua nene naio tinien jii kenerinio nene nei naio toru laka, naruei naio bar vite nonovio jua juãano.

<sup>36</sup> “Tibe na, kito napano romonea naio, robokar rui meuliano nei napano naio to tobo to. Mia toro napano maka mã

rimonmonea naio, mia naio rijikia re rial meuliano nei bogo tai, mia Atua kanano tiniemimiano ve toru toa naio.”

#### 4

*Yesu naio jidom rivan bereio Kalele, naio jel ea vio Sameria*

<sup>1-2</sup> Ana ka bogo na, iliano jo jeliviv, ber Yesu jomãa buru naiagagoano telabo abinimei ajakisior naio, a jomãa baruei ealo. A maka ve Yesu naãa naio baruei ealo, mia kumemi kanano naiagagoano nalo ga numitumãa numilaio, mia tomu nalo amialio ka nalo napano Yesu kanano aju abinimei miroano, jovulu Jone Baruei kanano.

Naruei nalo ajumãa aberver iliano nei ba janea vio jibe na, ba bokar Varisis nalo, mia bogo na Yesu mijogio ka nalo bunu amijikia vite nei a mila nalo amijog bova biorio, <sup>3</sup> naio mial bo ka tuvan vio Yutea, naio rivatove bereio Kalele. Naruei kumemi numituvan vio nei, nubano jibe na, <sup>4</sup> mia Atua jiloglog ka kenememi mãarabo monoka va sel ea tanobuku na Sameria.

<sup>5-6</sup> Naruei kumemi numitu numiel nubano, numalmaluvo ea komeli na vio na tai, siano Saika. Vaataro ka komeli nene, be bulukuei tai jo, napano jikar nuanua rui, jo binimei jibe na, abio ka Yakovo mãano uei. Borotano nene, beamu be tormoruo Yakovo kanano, ana iorou kanio ana mijamo ka ban kenerinio Yoseve.

Naruei kumemi liko Yesu numiel nubinimei nuboru ea uei nene, be bogo niogoravo memedu, naruei Yesu mijog tinien maro laka bior burutili ieliano ea burutiniano na jikili, ana naio ba jotano mave ea tagvoru na bulukuei nene.

*Yesu bitavo bija tira re Sameria tai*

<sup>7-8</sup> Numitua uei nene bano-o, bisi ana na kumemi naiagagoano nalo numitumolu nubano ea komeli ka nuvulu simemi sinaniano, mia Yesu naio ga takurano jo mijilimebi. Mo iorou kanio tira re Sameria tai naio miel binimei ka jidom riviove uei. Naio binimei ana Yesu bika denio berenio “? Aiou, jau komijikia koviov mãaku uei tai?”

<sup>9</sup> Ana tira nene, naio maka rijikia Yesu, mia bitilubar ka naio be toro Ju tai, mia milo toru laka ka napano naio mil batitigio bo ban naio jibe na, bior ka bogo na, kulo Ju nalo bija kulo Sameria nalo abe bilbilu va maka avior kalo. Ana tira nei naio bika den Yesu, naio berinavo “?Juãabe na jau, kobe toro Ju, komil ban kiniou tira na Sameria, na jau kobika uei den kiniou?”

<sup>10</sup> Naruei ana Yesu naio berdoãe berinavo “!Tira, verver jau komijikia ga ijaiano

na bo napano Atua naio jidom sian vanso! !Verver jau komijikia ga ka kiniou nebe kei nei ga narña nebika uei denso! Ver tibe na, vede maka ve kiniou na nebika uei denso, ana mia jau kovika uei den kiniou. Mia bogo na ver jau kovika uei den kiniou, nemijikia nesian uei na be uei na ridu meuliano vanso.”

<sup>11</sup> Naruei tira nei naio mijog vite na, naio bika den Yesu, berinavo “Toro na toru, jau maka ve kanamo titai ka jau koviov ka uei nene, mia bulukuei nene naio bululuo batove laka. Tibe na, uei na meuliano narña jau kojorña koberenio na, mia jau koviovio tumabe, ðeli na mia jau koviovio ea vio be? <sup>12</sup> Mia jau kojorña kober uei na dolu na, mia ninei jo nei naio be uei na bo tai. Korobido tormoruo nanua na Yakovo, naio kanano uei nei. Naio munu bano-o, naliko kenerinio nalo, bija kanalo temeul nalo, naruei amila lilian binime binime bokar banei. ?Jau kober jau kobo loa tormoruo Yakovo ana komijikia kala uei tai na bo loa ninei?”

<sup>13</sup> Ana na Yesu berdoðe banio berinavo “Nao, uei nei naio bo, ana mia bogo na kito romunuio, mia maka vesiou ana midoujer kito bereio. <sup>14</sup> Mia toro na naio rimunu uei nei napano nemijikia nesianio vanio, karina mia naio maka rijikia midouser naio bereio. Mia uei napano naio rimunuio, mia rime tibe ka burupati uei bereio joomo ea kiano iviso, ve uei na meuliano napano maka ve togio eaio, naio jorña mieraro den naio damariga, maka rijikia tabo bogo tai.”

<sup>15</sup> Mia tira nei, naio maka rijikia vatitig vo Yesu kanano iliano, naruei naio berinavo “Toro na toru, ver tibe na, bo ka jau kodu uei na ve telisu van kiniou ka nomunuio, mia nomidou re bunu, ka mia nemei re bunu noviov uei tulaka ea vio nei.”

<sup>16</sup> Ana Yesu jidom ka tira nei naio jikia ka naio be kei, a berkanio, berinavo “Kiniou never titai ka jau beamu vo. Jau kavan bereio, jau kovio koamo kovuru naio rime bere ea vio nei.”

<sup>17</sup> Ana tira nei berinavo “Ee, maka ve koaku tai!”

Ana Yesu berkanio, berinavo “Rian ga na, jau kober memedu na, ka jau maka ve koamo tai. <sup>18</sup> Nina bior ka tomu nalo na kojoru kalo beamu rui napano abiniu abokar jimo, mia vonganei kojo bija toro tai bereio napano maka kosoro kanio. Jibe na na kanamo iliano be riano na, jau maka ve koamo tai.”

<sup>19</sup> Mia tira nei naio miilo toru laka ka napano Yesu mijikia batitig kiano meuliano jibe na, ana berinavo “Rian ga na, toro na toru. Vonganei kiniou nemijikia naruei,

ka jau kobe naverialiano tai. <sup>20</sup> Naio bo laka kiana, mia ðeli jau kobe kulo Ju nalo kanalo naverialiano ga na. Mia kumemi kulo Sameria, kenememi vio lu naio napano be buruñara burusuku yako Kerasim, napano korobimemi nalo amila lotuano na Atua eaio nua rui, binime bokar banei. Mia kamiu kulo Ju nalo, kumitu kumisikili ka kenemiu buruñara komeli lu na Yerusalemo, naio ga takurano be vio na memedu ka ña amila lotuano ban Atua. Tibe na, kei naio memedu, kamiu ðeli na kumemi? Kover vonio!”

<sup>21-22</sup> Mia Yesu jaaro ka rivuriri tira nei kanano jidomiano ea tivelinio na bajago na memedu na amila lotuano ban Atua, ana berkanio, berinavo “Nao kuvivinioku, jau kober be riano na, kiado lotuano kito juo naio maka rive verare. Mia nina maka rivior vio na amila lotuano ave juo, mia bior vite napano jibe na: Kamiu na ea vio na, kamiu kumiturña kumila lotuano, mia kamiu maka kuvijikia batitigio naio napano kamiu kumiloto banio, mia kumemi kulo Ju, Atua naio bijauialar kumemi ka toro na rilurur tomu nalo naio miyotuba ea kenememi torogio. Naruei kumemi numijikia batitig kenememi Atua nei napano ña kumemi numiturña numiloto kanio.

“Mia kiniou nemijikia never kaso ka mia tibe na re tulaka. Mia jau monoka komonea kiniou, napano neber kaso vonganei ka bogo tai jo binime napano mia lotuano vou tai tikario, napano ve kanado rovinu. Toro Ju ðeli na toro Sameria, mia residomial re bunu ka vio na memedu ka rolotu ka Atua naio be suku na, ðeli na komeli na Yerusalemo, ðeli na vio be bereio. <sup>23</sup> Mia buruñara vite na mia residom, naio jibe nei, ber bogo na kolotu ka Atua, mia monoka kotuvan Niununo Lu rinñau ea niunumo, a monoka kolotu ka naio ve riano, memedu ka kiano iliriani-ano.

“Nina napano Atua Teta naio jidomio, ana vonganei rui a ea bogo na jo binime, mia naio rivitakar kanano taara na lotuano riano, napano amijikia alotu ka naio ea bajago novo na jibe na. <sup>24</sup> Atua naio be niununo, naruei toro na jidom rilotu kanio monoka rilotu ka naio ea kanano iviso, a vite nei naio monoka rive riano ea kanano meuliano.”

<sup>25</sup> Ana tira nei, naio jo monea ka mia Naverikariano naio rime, naio napano iliano na vio Kris naio ber Kristo, naruei naio ber ka Yesu, berinavo “Vite nalo nei na jau kojorña koberenio, vede abe riano, mia kiniou nomonea ka Naverikariano napano mia naio rime, mia naio naruei riverial vite nonovio ve riano vatitigio van kumemi.”



<sup>26</sup> Naruei Yesu ber iliano telisu nei ga banio, berinavo “Naio namña jau kojomña koberenio, kiniou nene nei ga nei, namña nojo nojukunu bijaso vonganei.”

<sup>27</sup> Naio berial naio ban tira nei jibe na bisi, ana naiagagoano nalo abinimei aboru ea vio nene bereio. Naruei amialio ka napano Yesu jomña jukunu bija tira nei, jibe ka naljuo nei ga, naruei nalo amiilo kanio. Nalo amiilo, mia nalo aju buru ga, maka ve nalo tai kalo napano naio rivika den tira nei ka naio jidom venia, ðeli na rivika den Yesu river naljuo ajumña ajukunu ka venia. <sup>28</sup> Mo tira nei jumolu, mebi ka mñano bauei jo bo, naruei naio miel ban bere vonuo ea komeli. Ana bogo napano boru vonuo, naio ba berialio ka tomu nalo, berinavo <sup>29</sup> “Valauo ju tai naio jo rove yako ea bulukuei, naio jukunu ban kiniou, naio mijikia vite nonovio ea kanako meuliano. Kiniou namial naio jibe ka Naverikariano garuei memedu, ðeli na? Kamiu kumei, ravatove reialio.” <sup>30</sup> Naruei nalo ajumolu ajaluvo abatove ka ajidom aial Yesu nene.

#### *Jamerijano na sinaniano na meruo jua tiniavio*

<sup>31</sup> Mia bogo na aju amiel abinimei maka ayotuba vo, ana naiagagoano nalo abar bulag salo sinaniano napano aba abuluio, aberii ka Yesu aberinavo “Naverloglogiano, komei kesinan.”

<sup>32</sup> Mia Yesu naio maka rimei, mia abio bereio bano-o, karina Yesu berinavo “Kamiu kuvisinan, kiniou be saku sinaniano dolu tai naio jo napano kamiu maka kuvijikiaio.”

<sup>33</sup> Naiagagoano nalo amijogio nina, naruei nalo amil banlo, aberinavo “?Ana kenia naio bar sano sinaniano nene binimei? !Kito maka reial toro tai leleio!”

<sup>34</sup> Ana na Yesu ber kalo, berinavo “Makanio, sinaniano na kiniou nojo neberenio na naio dolu kiana. Saku sinaniano, naio be imñauano na jogkariano na tinieiano na naio namña miila kiniou nebinimei yetano nei, a kiniou monoka noimñau ka nonovio riviniu rivanvano-o na ribisi. <sup>35</sup> Bogo namña kito romebija tiniavio, rojumña rober bogo nonovio jibe nei, roberinavo: Siberio veri ju, ka sinaniano rimeruo. Mia vonganei ea Atua kanano tiniavio, tomu nalo aju ruei ka ajog Atua kiano iliano, jibe sinaniano nalo na amermeruo ruei. Kiniou nojidom ka kamiu kuvila vonio ka kuvetavo ea miremiu, na kiu kuvisirarago vatitig tanea vio, ana mia kuvijikia kuvial sinaniano nalo ameruo bo ruei, vonganei be bogo na ava avario rimei. <sup>36-37</sup> Mia nalo namña

ava avario, mia nalo asaaro ve toru laka bior kanalo vuliano telisu naio jo ruei, ana bogo na avar sinaniano nene rimei vonuo na meuliano na maka ve togio nene, toro na toru na mebija, mia naio bunu saaro ve toru. Naio jibe ka ga iliano napano ber jibe nei, berinavo ‘Toro tai naio ba mebijo, mia toro dolu naio ba bario, mia burumñara saariano be tena nalo nonovio.’ <sup>38</sup> Jibe na, kiniou nojomña nemiila kamiu ka kuva kuvuru tomu nalo napano kulo dolu nalo amila burumñara imñauano kalo ruei, mia vonganei kam nonovio kuvije buron kamiu ea jogvuiano na imñauano nene.”

#### *Kulo Sameria telabo amonea*

<sup>39</sup> Mia bogo napano kulo Sameria napano ea komeli nei amijog tira nei naio berii jumñabe ka na Yesu mijikia vite nonovio ea kanako meuliano, nalo amiilo toru, naruei mila nalo telabo amonea Yesu. <sup>40</sup> Ana bogo na abinimei ka aial naio, aju ajukunu bija naio banbano-o, karina abika naio ka nuva vonuo, nuvitu kija vijalo. Naruei nuba numitu bijalo ba bokar bogoti juo, <sup>41</sup> mia nalo telabo lie amonea naio bior kanano iliano novo nalo. <sup>42</sup> Aber ka bunu tira nei, aberinavo “Beamu, kumemi numijog venia ga napano jau kober ka kumemi, maka nuvijikia, mia vonganei, kumemi numijog kanano iliano memedu ga, kumemi numijikia ka be riano ga, kanado toro na toru nei, naio be Ioruriano na yetemeriba.”

#### *Yesu kanano vremesiano juo nene Kalele, naio mieliel ka tubo na toru tai kenerinio*

<sup>43</sup> Mia bogoti juo nei barlaka bisi ana kumemi liko Yesu numituvan vio nei nubano, numidu bere kenememi mñarabo ka nuvatove ea tanobuku na Kalele. <sup>44</sup> Yesu jidom rivan bereio ea kiano vio Kalele, bior naio mial tomu dolu na vio dolu aberverii naio, ajirag naio laka janea vio. Nina jakii kiano iliano tai, napano berinavo “Tomu dolu nalo tiniel jii ka aiagago vatitig ka naverialiano, mia tomu na kanano vio nalo makanio, ajidom naio be iakurano.” <sup>45</sup> Mia bogo na nubinimei numiyotuba ea vio Kalele, tomu nalo na kiano vio ajaaro toru ka ala vorvoruano ka naio. Naina bior beamu, nalo telabo bunu aju ajua jokoluulo na Yerusalem, ana amial ruei vijuku mñeteiano na Yesu mila ea Atua Kunuano Lu ka bogo na, ana amialio ka naina bo laka.

<sup>46</sup> Naruei naio jomña miel ea vio nalo na Kalele binimei bokar bereio komeli na Kenan, nanua naio bilig uei binimei be mñarjumñelñelu. Ana ka bogo na, tubo na

toru tai na komeli dolu na Kapeneam naio joa vio na, mia naio joña mijog bova bior kenerinio tete surñano naio mie toru laka vaatara ka ga riñaro. <sup>47</sup> Mia bogo na naio mijog ajuña aberii ka Yesu naio juvan vio Yutea binime Kalele bereio ruei, naio ba mileal naio. Naruei naio mial Yesu, jegi banio ka riva vonuo rieliel ka kenerinio nene. <sup>48</sup> Ana na Yesu ber kanio berinavo "Vede jau bunu jau kojibe ka tomu dolu nalo. Bogo nonovio ga ajidom vremesiano ninio nalo, mia ver noiñau kanio, mia amonea kiniou kanio. Mia bogo napano maka bunu atu aialio, nalo maka asaaro ka amonmonea kiniou."

<sup>49</sup> Mia tubo na toru nei naio jikili kanio, berinavo "Toro na toru, neber bo kaso jau komei soñeli, ver ðeli mia keneriku nene naio rivakovio."

<sup>50</sup> Mia Yesu naio jidom ka tubo nei monea kanano iliano ga, naio berinavo "Makanio, mia jau ga ve takurano kavano. Kiniou neber kaso neberinavo kenerimo nene mia naio riñaro re na, naio rimeul rivu ga." Naruei toro nei monea iliano napano Yesu berkanio, ana na juvan vio ka riva vonuo bereio.

<sup>51</sup> Ana na viobijeni kanio, bogo na naio joña miel ban bere ka rivano, naio bitavo bija kanano tomu nalo, napano ajuña amiel bior naio. Mia nalo aberial banio, aberinavo "Kenerimo naio mijog bo ruei jo."

<sup>52</sup> Naruei naio bika denlo, berinavo "Kamiu kuvisidomii vatitigio: bogo na vabe naruei na kamiu kumialio jikar ka binime bo bereio?"

Nalo aberdoñe aberinavo "Kumemi numialio jibe ka niabene binime menini bo ea niogoravo naniovo, jibe ka mñerenio takurano." <sup>53</sup> Mia tete nei karamñano naio mijogio jibe na, naio mijikia ka nina naruei bogo memedu ga ka napano Yesu ber kanio berinavo "Kenerimo naio riñaro re, naio rimeul rivu ga to." Naruei vite na mila karamñano, bija nalo nonovio ea kanano mñaratavo, amonmonea Yesu.

<sup>54</sup> Naruei ielieliano na tete nei, Yesu mila iorou ka napano naio jaluvo den vio Yutea binime, a naio naruei be kiano vremesiano valuo nene ea tanobuku na vio Kalele.

## 5

*Yesu mieliel ka toro tai na niabene mñaro kirisiou laka ruei*

<sup>1</sup> Ana Yesu naio jo Kalele kirisiou kija banbano-o na bokar bogo na kulo Ju nalo kanalo jokoluulu dolu mave yako Yerusalemo. Naruei Yesu nalo aban bere mave ea jokoluulu nene. <sup>2</sup> Ajua vio

Yerusalemo jibe na na ea legiano tai ana Yesu miel ba batove vaatara ka buruñara mñaratavo na komeli nei napano abio ka Maratavo na Nunu, ana nalo aban ea vio tai napano be uei na mña amijeljelioa naio joaio, napano ea kialo iliano, abio ka Betsata. Naruei jeliviv ea bauei nei, be mñarsuñiki jimo nene ju, napano amimñau kalo ea puruveru. <sup>3</sup> Mo bogo nonovio ga be tomu na mieiano nalo, be merebono nalo, be jaba nalo, a be nalo na niabele mñarmñaro, nalo na jibe na nalo miroano lakaaju abinime amonea mñarsuñiki nalo nei. Abinime jibe na, bior uei nei, naio miyukulkulu be ve vaarakurano ga, <sup>4</sup> jibe ka Atua kanano nailiano naio binime milao, mo ver nalo amial jibe na, namieiano kei napano naio ba bokar uei nei jukamu, mia mieiano vaio naniña joa naio mia ribisi denio vaarakurano ga. <sup>5</sup> Jibe na, tomu na mieiano naloaju abinime ea vio nei, mia ka bogo nene nalo nene tai be toro tai napano niabene nalo binu mñarmñaro bokar yuka duelimo va rolu ba arolu [38] ruei. <sup>6</sup> Ana bogo na Yesu binime, naio mial toro nene, mia mijikia toro nei naio jo mon bior mieiano nei bogo jiou ruei jibe na, ana naio bika denio berinavo "?Koig liki, jau kojidom ka niabemo rime rivu, ina?"

<sup>7</sup> Ana na toro na mieiano naio berdoñe berinavo "Toro na toru, kiniou nojidom toru kiana, mia bogo nonovio, ver uei naio miyukulkulu, mia maka toro tai ka rudu kiniou navatove tii kiniou notoa ea. Ana bogo na kiniou takurano nemiel vonvon nabatove mia toro dolu naio binime batove bokar uei nene jukamu ka kiniou."

<sup>8</sup> Ana Yesu mil memedu ban toro nei naio berinavo "Mo, jau kotumolu, jau kavara mñamo yebe, koel kavano." <sup>9</sup> Naruei ea Yesu kanano iliano nei, toro nei niabene nalo na abova abinime abo nonovio, ana naio jumolu bar mñano yebe, jumolu miel ba vonuo.

Ana ka legiano nei na vite nei miyotuba eao, naio be Legiano Lu tai na kulo Ju nalo kanalo, <sup>10</sup> mila na ka bogo na tomu na tortoru na kulo Ju nalo amial ka kema nei naio jo miel bija mñano yebe, ana amil banio biorio, aberbureio, aberinavo "Ai, abe banei be Legiano Lu kiana! Jau koje komidu mñamo yebe jibe na, jau komila korov kiado tuboiano kulo kito Ju nalo."

<sup>11</sup> Mia naio berdoñe banlo, naio berinavo "Kiniou niabeku nalo burukokorovio, mia toro nene binime mieliel ka kiniou, berii ka kiniou berinavo nodu mñaku jogu navano."

<sup>12</sup> Mia nalo ajidom ajikia vatitig lie vo, nalo abika denio, aberinavo "?Ana kenia na? ?Naio be kenia napano naio ber kaso ka jau kala tibe na?"

<sup>13</sup> Mia kema nei naio maka rijikia rivrenio, bior napano naio maka rijikia ka be Yesu napano mieliel ka naio, mia maka bunu rijikia rial naio bior napano be buruñara tiniobi na jo, mia Yesu jo miel bure nato nene, naio jaluvo den vio nei ruei.

<sup>14</sup> Ana iorou kanio maka vesiou, ana Yesu mial toro nene bereio joomo ea Yimo Lu, ana berkanio berinavo "Vonganei na jau kobinimei kobo ruei, bo ka jau kovitikar vatitigso. Jau kotuvan nonovio kanamo kariano nalo, ver maka vede titai naio riva rivoa lie kaso tovulu napano beamu." <sup>15</sup> Ana ka bogo na kema nei naio mijikia ka be Yesu nei napano mieliel ka naio, naruei naio ba berialio ka tomu na tortoru na kulo Ju nalo kialo.

<sup>16</sup> Mia bogo na nalo amijogio ka be Yesu napano naio mieliel ka toro nei, tiniel jer naio, nalo maka asaoro ka na naio mila tenei ka Legiano Lu, naruei nalo ajikar ka amila baravo abilvili ea naio.

<sup>17</sup> Ana na Yesu berdoŕelo, naio berinavo "Karamaku, naio joña miñauka kanano inñauano nalo na bo ea bogo ninio, ba bokar bunu Legiano Lu nalo, mia kiniou bunu monoka noto nala tibe na ga napano naio milaio."

<sup>18</sup> Jibe na ga ka bogo na, navurinara-boiano na kulo Ju nalo ajumña abitiñi Yesu ruei aber naio be toro naña mila bulag tolu na Legiano Lu. Mia vonganei mave ka naio, nalo amijog ka napano naio joña bio Atua be karamano memedu, nalo amialio jibe ka naio joña mila naio be verare bija Atua. Naruei vite nalo nei mila ana abinimei abitunu lie vo, ajidom toru laka ka auebinio rimaro.

*Atua kenerinio bija Karamano naljuo amimau be verare ga*

<sup>19</sup> Ana Yesu ber kalo, naio berinavo "Kiniou neber be riano ka kamiu, ka kiniou Atua kenerinio, kiniou maka nejikia nela titai kiniou ga ve takurano, mia venia ga napano nemial Karamaku milaio, naina naruei kiniou bunu nemilaio jibe na. <sup>20</sup> Atua teta naio tinien jii mēlea kiniou kenerinio, ana joña jiloglog kiniou ka vite nonovio napano naio jidom ka mia nalaio. Abe inñauano dolu nalo ju kiano vo napano nalo tortoru lie vo, napano mia karamakusian van kiniou ka mia noimauka iorou, a bogo napano mia noimaukanio, mia kamiu kuviilo ve toru kanio. <sup>21</sup> A bunu, tibe ka napano Teta naio bitiri bulag bereio nalo napano ña añarnaro naio jian bere kialo meuliano banlo, mia kiniou Kenerinio bunu nemijikia nesian meuliano van toro kei naña nojidom nesian vanio. <sup>22</sup> Mia Teta, maka ve naio ga naña

mila tibureiano, mia inñauano na bunu naio midu joa jurñaku, <sup>23</sup> ka rila na tomu nonovio monoka avatove ka kiniou, tibe ka naña abatove ka Karamaku. Tibe na, toro naña naio maka to rivatove rivu ka kiniou Kenerinio, jibe ka naio maka to rivatove rivu ka toro na toru napano miila kiniou nabatove."

*Mariano a meuliano*

<sup>24</sup> Ana Yesu mil lie vo, naio berinavo "Kamiu kuviagago vatitigio. Toro kei naña monmonea kanaku iliano, a naio monea nana naio miila kiniou nabatove, ea bogo nei memedu mia naio rivokar meuliano. Naio maka totano yetano ka tibureiano tai leleio, bior naio jumolu den bajago na ñariano, ba bokar kiano meuliano vou ruei.

<sup>25</sup> "A kiniou neber ilirianio nei bunu ban kamiu, ka bogo na jo binimei vonganei napano nalo naña Atua mial ka añarnaro den bajago va, mia nalo ajog jooku kiniou Atua kenerinio, mia nalo na ajogkario, mia avokar meuliano. <sup>26</sup> Kiaku Teta, meuliano na be riano joa naio ga, naruei naio mijamo ka meuliano nei na joa kiniou, <sup>27</sup> mia naio mijamo ka bunu ka kiniou Kulorinio Kenerinio, mia nala inñauano nalo na tibureiano.

<sup>28</sup> "Vite nalo nei, nalo maka ve tena kamiu kuviilo kalo, mia naio monoka tibe ga na ea bogo napano kiniou nojo noberenio ka naio jo binimei. Mia nalo naña amonmelio ea borotano mia ajog jooku naio rivio, <sup>29</sup> naruei mia ana kialo tumoliano bereio ka aje meuliano, ana tomu nalo na aimau bova, kialo tumoliano ka avokar tibureano."

*Vite nalo na rijai Yesu kiano iliano nalo*

<sup>30</sup> Ana Yesu mil lie vo, naio mil memedu ban tomu na tortoru na kulo Ju nalo napano maka asidom amonea naio, naio berii vite nalo na ña ajiloglog naio ka naio be riano. Naio berenio berinavo "Ea tivelinio na tibureiano, napano mia kiniou nala, mia kiniou nala re tibe ka kanaku jidomiano kiniou ve takurano ga, mia nala ea ga venia napano nomijog Teta berenio. Tibe na, mia kanaku tibureano naio memedu ga, bior napano maka nala ka kanaku jidomiano, mia nemila ea Teta kiano na naio juvan kiniou nebinimei. <sup>31</sup> Naruei nemil jibe na ban kamiu, nemijikia ka nojo neberii kiniou bereio, ana vede nalo tai amial ka maka rimemedu ka neil tibe na, nalo maka ajikia amonea iliano na jibe na. <sup>32</sup> Mia naio bo ga na, naio maka ve titenia, bior napano be vite dolu nalo na ña amija kanaku iliano amijikia atumolu atu.

“Na be moti nene, naio be toro tai napano naio berial vite ninio ban kinioiu napano abe riano laka. <sup>33</sup> Ninei be Jone Baruei nei, napano beamu, kamiu kumituvan iliano ba banio, kamiu knobika juriabe ka kinioiu eaio, naruei naio berial vite nonovio be riano bo ban kamiu. <sup>34</sup> Mia maka rivu ka kamiu ve tiniemiu ka iliano na toro tai jibe na Jone mila kanaku iliano tumolu tibe na. Mia kinioiu nejidom kamiu kuvisidomii vatitig rivu bereio ea venia napano Jone berial ban kamiu ea tivelinio na kinioiu, bior nojo namila vio ka najai kamiu ka kuvijikia kuvokar ioruriano. <sup>35</sup> Kinioiu neber Jone nene ka kamiu, bior naio javukia yulu tai napano mereralii batitig kenemiu jidomiano, napano kumisaaro telisu ka naio.

<sup>36</sup> “Mia vite dolu na nã miija kanaku iliano, be toru lie ea vite nalo na nã Jone beriio. Vite nei naio be kijokijo nalo napano Teta naio mijamo ka ban kinioiu ka neiãaukanio ea miremiu. Iãauano nalo na tomormoruo nei na nã kinioiu nojo namilaiio amiija kanaku iliano nei toru ka be riano ka napano Teta nei naruei naio miila kinioiu nebinimej.

<sup>37</sup> “Mia mave ka vite juo nei, dolu nene naio jo, naina be Karañaku napano mila kinioiu nebinimej. Kamiu maka lele kuvijog jooona a maka lele kuvial mirano, mia naio bunu, kanano iliano nalo amiija toru ka kanaku iliano, na aberial kinioiu. <sup>38</sup> Mia kamiu kumila napano maka ve jeleigio ka iliano nei ea kenemiu meuliano, bior napano kamiu maka kuvisidom kumonea naio napano miila kinioiu nebinimej. <sup>39</sup> Bogo telabo kamiu kumituña kubitii vatitig Vivitauiano Lu nalo, bior kumituña be tiniemiu ka mia kuvileal kenemiu meuliano napano maka ve jukuti nene, ana Vivitauiano Lu nalo nei naruei napano aberial kinioiu. <sup>40</sup> Aber ka kinioiu ga nebe burupati na meuliano nene, mia kamiu maka kuvisidom kumei kuvokar meuliano nene ea kinioiu.”

<sup>41</sup> Naruei Yesu mial kialo veribinio, mil jibe nei berinavo “Vite nalo na nã kinioiu nojo nemila, maka noto nala rivior ka nejidom kamiu kuvitirilar siaku, makanio. Kinioiu maka nesidomial naina, <sup>42</sup> mia be vite tai na bova, kinioiu nemijikia batitig kamiu ruei, naruei nemijikia ka kamiu maka tiniemiu tii Atua leleio. <sup>43</sup> Bogo na nã kinioiu nomiyotuba ka kamiu, nebinimej ea karañaku siano, mia kamiu maka kuvisaaro ka kinioiu. Mia ver bogo tai toro dolu tai rimej, napano rimej ea naio ga ve takurano siano, a vede mia kamiu kuvisaaro kano ga. <sup>44</sup> Kinioiu tinieku miia

kamiu toru laka, mia namial jibe kiride ka kuvijikia kuvokar moneano riano bogo tai. Naina bior napano darñariga, kamiu kumitu tiniemiu jii ka kuvidular siemiu rivavin. Kamiu maka kuvitu kuvisidom ka kuvijebukua kenemiu bajago leleio, ka kuvila vite nalo napano iorou mia Atua naio mijikia rivitiri bulag kamiu riviorio.

<sup>45</sup> “Kinioiu neber iliano nalo nei ban kamiu, ðeli kumitu kumisidom kuberinavo ‘Uerei, kema na tinien jer kito, ðeli ea bogo na tibureiano mia naio naruei napano mia riverial kanado torokoriano nalo van Teta Atua ea vio mave.’

“Mia makanio, ve re kinioiu na mia nala tibe na, mia ve dolu tai na mia naio rilαιο. Dolu nene, nina be tormoruo Mosis, napano nã kumitu kubarkar tiniemiu ea naio ka mia naio river iliano na mia rijai kamiu, mia kinioiu neber vatitig ban kamiu, naio naruei napano mia river bulag vovaiano nalo na kenemiu na. <sup>46</sup> Kamiu kumituña kuberinavo kumitu kumonea jikili tormoruo Mosis kanano iliano nalo nei, mia ver tibe na bior vaio ana kamiu maka kumonea kinioiu bunu, bior napano tormoruo na darñariga naio bivitauii kinioiu ga. <sup>47</sup> Mia vonganei kinioiu nemial jibe ka napano kamiu maka kumonea vivitauiano na kanano, mia ka tenei, kamiu kuvijikia dulu re ka kumonea kanaku iliano nalo bunu.”

## 6

*Yesu bagan tomu nalo jovulu menu jimo [5,000]*

*Mataiu 14:13-21; Mak 6:32-44; Luka 9:10-17*

<sup>1</sup> Iorou ka naina, kumemi liko Yesu numidu uako numituvan kanano tanobuku bereio, nubar kor buruñara ueiyabo nei Kalele, napano tealo abio ka ueiyabo na Taiperias. <sup>2</sup> Mia bogo na tomu nalo amial ka numitu nubano jibe na ea tivelinio, ajumolu ajakisor kumemi. Ajidom avan vija Yesu bior naloaju amial burutomoluo na ielieliano na naio jomã mila ea nalo napano nã abokar mieiano nalo. <sup>3</sup> Ana nubano nubokar tivelinio nene, numiel nubavin ea suku tai napano joa vio na, numiel nubanbano-o na numebi. <sup>4-5</sup> Ana Yesu naio jotano jo jirarag ba laka, naio mial buruñara tiniobi napano naloaju amiel abinimej ka naio. Naio bitilubar ka nalo telabo abe tomu na vio kinkin napano ajuruña amiel vei ka ava Yerusalemo. Naloaju abano bior buruñara jokoluolu na kulo Ju nalo kanalo, Jokoluolu na Nasidomkariano na Ioruriano, napano mia ala rivesiou re.

Naruei bogo na Yesu naio mial nalo ka aju abinimei, naio bika vite tai den Vilip, naio berinavo "Vilip, nalo na aju jjerlo toru laka liki kiana. ?Mia kito rovulu salo joko turñabe?"<sup>6</sup> Vikadeniano nei Yesu kanano, naio be tena rilavon kija Vilip ga, bior Yesu naio mijikia ruei vite napano mia naio rilaio van tomu nalo nei.

<sup>7</sup> Ana Vilip naio berdoŕe, berenio ga berinavo "Ver kiniou noimñau yuka ve takurano, mia maka nejikia neleal puruveru rivare ka novulu ka sinaniano na nalo aviniu ajevio ve tertelisu!"

<sup>8</sup> Naruei naiagagoano dolu nene, be Adru, napano be Saimon Pitere kuruano napano teliki, naio berial ban Yesu, berinavo<sup>9</sup> "Tubo, kiniou nemileal mñeaku tai jo nei, naio bar joko sesa jimo [5] bija niado moaio juo [2]. Ninei naio telisu ga mia tomu nalo miroano laka."

<sup>10</sup> Mia Yesu naio berinavo "Makanio, naio bo ga na. Kuver ka tiniobi nalo ka atutano yetano beamu vo." Naruei nuber kanilo, ka nalo atutano ea mñajumunei, ana naruei numial tomu nalo nene bokar menu jumo [5,000] titai jibe na. <sup>11</sup> Naruei Yesu naio bar joko jimo nene ana bolkouo, ber siva biorio. Avona bisi ana jikar ka mña burekokorovio a jijian bulag ban nalo napano ajumña ajutano, naio mila jibe na ga bunu bija niado, jijianio ban nalo nonovio jibe ka na nalo tiniel jii ka asenio.

<sup>12</sup> Naruei nalo ajenio banbano-o na mabolo jouo, ana Yesu ber ka kumemi, naio berinavo "Sinaniano torogio na be va ju, kito ralaluvu re, ana bo ka kuvar bijio riva vio takurano." <sup>13</sup> Naruei kumemi nubano nuban niati joko jimo nei binimei, napano nalo ajen digio ju, naruei numisonlo ban ea basaro banbano bokar basaro duelimo ba juo [12] garuei.

<sup>14</sup> Mo bogo na tomu nalo abitulbar buruñara burutomoluo napano Yesu milaio, ajumña aber jibe nei kalo aberinavo "Kiado buruñara naverialiano na mña korobido nalo aberkario ka mia naio rimei riyotuba ea yetemeriba nei, tete na naruei naio be naverialiano nene memedu kiana."

<sup>15</sup> Naruei nalo aju ajidomii ka ava avokar Yesu, ajidom atutuaio ka avitirilar naio rimei rive kanalo parinio Tubo, mia bogo napano naio mijog lubar ea naio venia napano ajidomii ka alaio, naio jaluvo denlo, miel naio takurano ga ba bavin lie vo ea burusuku nalo nei.

*Yesu miel mave ea niunuku tai*

*Mataiu 14:22-27; Mak 6:45-52*

<sup>16</sup> Naruei kumemi naiagagoano nalo numial ka napano mñerenio jo batove, numial bo ka nuan bereio, naruei nubatove ea tivelinio na ueiyabo. <sup>17</sup> Nubatove mia

maka bunu nuvia Yesu riyotuba bereio ka kumemi, mia bior napano vio bobogio ruei, numidu kenememi uako, numituvan vio bereio nubeluo ka nuvavin ea ueiyabo ka nuvarkor bereio nuvan ea vio Kapeneam. <sup>18</sup> Naruei numitu nubano jibe na, kiri jegi tai binimei jo miuvuvu kija, naio mila na tei jikar ka bieveluo laka. <sup>19</sup> Mia bogo napano nubeluo koalabo kija ruei, jibe sudu jimo, numiilo ka napano Yesu naio jonña miel mave ea niunuku uei jo binimei vaatara. Naruei numerou kanio toru laka, <sup>20</sup> mia naio mil ban kumemi berinavo "¡Oi, kamiu kumerou re! Kiniou ga nei."

<sup>21</sup> Ana numijog bo bereio, mia nuburu naio bavin ea uako, mia vaarakurano numial ka kenememi uako naio jologogio vio na numisidom ka nuvan ea ruei.

*Tomu nalo abinimei ajiravo Yesu*

<sup>22</sup> Naruei ea kavijo, nalo na laka yako ea ueiyabo nei tivelinio, napano Yesu baganlo vonga, nalo aju ajidom toru ka Yesu naio jo jumabe. Nalo aju ajidom jibe na bior bogo napano kumemi liko Yesu nubinimei ealo, numidu uako takurano ga, mia nalo amial ka napano kumemi numidu uako nene nubano bere ruei, mia Yesu naio maka rivan vija kumemi, naio takurano jobo. Mia vonganei nalo maka bunu ajikia aleal naio ealo, <sup>23-24</sup> mo nalo abano abar uako dolu nalo tai, nalo abarkor ea vio Kapeneam ka asirav kumemi. Uako dolu nalo nei, maka ave kanalo, mia be kulo Taiperias nalo kanalo napano nalo abinimei aborvoru ealo, abano vauro ea vio na ga mña Yesu bolkouo ka joko eaio, naio mila binimei bare ka nalo asenio.

*Yesu berenio ber naio be joko na meuliano*

<sup>25</sup> Naruei tomu nalo nei abinimei aboru Kapeneam, ana abavauro, naruei nalo ajiravo Yesu. Mia bogo na amilealio, abika denio, aberinavo "Naverloglogiano, jau kobinimei bere koboru ea vio nei ka bogo na vabe?"

<sup>26</sup> Mia Yesu naio mijikia venia napano ajidom aial naio bereio riviorio, ana naio berdoŕe banlo, berinavo "Ver kamiu kubinimei kumisirav kavulu kiniou bereio bior kumial kanaku burutomoluo nalo ana kubitulbar ka kiniou kiniou kei, naina naio bo na. Mia kiniou nemial jibe ka kamiu kumitu kumisidomial ga ka naniovo kiniou nabagan vatitig kamiu, kumisan banbano-o mabomiu nalo abujovujo vatitigio bo, tenene na kamiu kumisidom ka mia tibe na bereio banei, ŕeli makanio? <sup>27</sup> Mo, kanaku ilirianiano van kamiu naio jibe nei: kamiu kuvitumña kuvisidomii mñele re rivior sinaniano ga napano naio be

tena bogo bulati ga naio jooono bereio. Mia bo kanio kuvirñau sikili rivior sinaniano nei na mña naio mijikia to damñariga to, naio mijikia to to riva rivokar bogo na meuliano nei napano naio maka ve jukuti nene. Be riano, mia kiniou Kulorinio Kenerinio nemijikia nesian meuliano nene van kamiu, bior ka napano teta Atua naio jekarlar kiniou takurano ga ka nela tibe na.”

<sup>28</sup> Naruei nalo abika denio, aberi-navo “Ana ver kumemi nuvisidom ka kumemi nuvila vite nalo narña Atua naio jidomio, mia monoka nuvirñauka turñabe?”

<sup>29</sup> Ana Yesu berdoŕe banlo berinavo “Buruñara vite napano Atua jidom ka kuvirñau kanio, naio jibe nei: kamiu kumonea rive riano ea kiniou napano Atua miila kiniou nebinimeia ea yetemeriba nei.”

<sup>30</sup> Ana nalo abika bereio, aberinavo “? Ana jau, venia naruei be kanamo burutomoluo napano ver kumemi nuvalio, mia kumemi nuvijikia nuvimoneaso? ?Mia jau kala iñauano vabe na bo van kumemi?”

<sup>31</sup> Kumemi nubika jibe na bior ka napano numitu numisidomial kanado tormoruo nalo na beamu, nanua na ajua vio yauo. Aju jibe na, mia Mosis miila burutomoluo tai na bo banlo, napano damñariga nalo aju abar joko na abio ka mana, mia nalo ajenio, maka lele siserlo. Vite na naio joa niosi lu, a naio berenio berinavo ‘*Damñariga naio baganlo ka joko na vio mave!*’” Eks 16:4

<sup>32</sup> Ana Yesu berdoŕelo bereio, berinavo “Nao, vite na naio joa niosi lu, mia joko napano Mosis bario, naio maka ve joko na vio mave. Joko na vio mave napano be riano, karamñaku ga naio mijikia sianio.

<sup>33</sup> Atua kanano joko be kiniou napano najaluvo ea vio mave nebinimeia yetano, ka nesian meuliano vou rivian tomu na yetemeriba nalo.”

<sup>34</sup> Ana nalo aberdoŕe, aberinavo “Tubo, naina naruei be joko narña kumemi numisidom tulaka.”

<sup>35</sup> Ana Yesu berial banlo, naio berinavo “Kiniou, kiniou nebe joko na meuliano. Toro kei napano naio rimeia ea kiniou, naio maka lele rijikia siser naio bereio, mia toro kei napano naio rimonea kiniou, naio maka lele rijikia midou ser naio bereio.

<sup>36</sup> Be vite takurano ga naio bova, jibe ka napano neber ka kamiu ruei, napano kamiu kumial kiniou bija kanaku burutomoluo nalo ka miremiu ruei, mia kamiu maka kuvisidom kumonea kiniou. <sup>37</sup> Ana mia monoka tomu tai napano mia amonea kiniou, bior nalo nonovio napano teta mudulo ajua jurñaku, mia monoka amei ea kiniou, mia nalo nonovio napano mia amei ka kiniou, ve re tai kalo napano mia

novukulario bereio, mia novokar vatitiglo aviniu ave kanaku.

<sup>38</sup> “Kiniou najaluvo ea vio mave naba-tove yetano ea yetemeriba nei, maka ka mia nala kanaku jidomiano, mia ka nala jidomiano na kanano napano naio miila kiniou nabatove. <sup>39</sup> Mo kanano jidomiano naio jibe nei, ka nalo napano naio mudulo ajua jurñaku, mia kiniou nalaluvu re nalo tai kalo, naio jidom ka ea legiano na maaro mia kiniou nevitiri bulag nonovlo bereio. <sup>40</sup> Karamñaku naio jidom toru ka tibe nei naruei, ka nalo nonovio napano mña amial kiniou, ana amonea kiniou, mia nalo avokar meuliano nei napano naio maka ve jukuti nene, a naio jidom toru bunu ka ea legiano na maaro, ka mia kiniou naruei nevitiri bulaglo bereio.”

*Navurñaraboiano na kulo Ju nalo maka asaaro ka Yesu kanano iliano nalo*

<sup>41</sup> Naruei bogo na kulo Ju nalo kanalo tomu na tortoru aju amiagago ka Yesu kanano iliano nalo nei, nalo maka asaaro leleio, naruei ajuñña amil murñi kanio. Be kanano iliano tai napano nalo maka asidom ajogio, naina be iliano napano naio berial ber naio be joko napano naio jaluvo ea vio mave batove ea yetemeriba nei. <sup>42</sup> Nalo aberii ealo aberinavo “?Jurñabe ana toro na naio joñña berial ban kito ber naio jaluvo ea vio mave tiniabene naio binimeia ea kito? Naio maka ve toro kokouro tenia na, kito romijikia batitig naio ruei, bija kenieno a karamñano bunu. Nalo be tormoruo Yoseve ga kenerinio na, Yesu.”

<sup>43</sup> Ana Yesu berdoŕe banlo naio berinavo “! Oi, ilimuñiano ea kiniou naio bare, kamiu kuviagago vatitiglo beamu vo!

<sup>44</sup> Toro kei napano naio binimeia monea kiniou vonganai, mia ea legiano na maaro kiniou nevitiri lar naio rimeul bereio. Mia Teta napano miila kiniou nebinimeia, ver naio rivuru re toro na rimeia ea kiniou, mia naio maka rijikia rimeia. <sup>45</sup> Niosi na naverialiano Aisea kanano naio berial iliano tai, naio berinavo

*‘Nalo nonovio, mia Atua ga naio river-logloglo,’* Ais 54:13

ana mia never nalo narña ajog batitiglo iliano na Teta Atua kanano, narña naio berloglog batitiglo kanio, nalo naruei mia amei ea kiniou. <sup>46</sup> Ana nalo na jibe na, mia ve re tai kalo napano aial Teta Atua, bior be toro takurano ga mial naio, nina be kiniou napano nejaluvo denio nebinimeia.

<sup>47</sup> “Nao, kiniou nojorña neber be riano laka ban kamiu, ka tomu nalo nonovio napano amonea kiniou, aju jouro ea meuliano ruei, na maka jikia bisi, <sup>48</sup> bior

kiniou, kiniou nebe joko na meuliano. <sup>49</sup> Joko nei naio maka rive verare ka joko na mana napano kulo moruo nalo ajenio ea vio yauo. Nalo ajen banbano-o na, karina maka ve nalo tai kalo napano naio rimeul tobo to, nalo abiniu ajurña aňarmaro jibe na ga. <sup>50</sup> Mia ver joko tai to, ana toro napano toña senio mia naio rijikia re riňaro bogo tai, naina naruei kito rejisia ka joko na vio mave memedu. <sup>51</sup> Mo, kiniou naruei, kiniou nebe joko napano meul mugaruei, napano jaluvo ea vio mave binimei ea yetemeriba nei, ka toro na naio senio, naio meul tobo to. Joko nene naruei be mokotenaku, napano kiniou nemijamo ka bior yetemeriba vodolu nei, nejian bior meuliano na kanano tomu nalo.”

<sup>52</sup> Naruei Yesu kanano iliano nalo nei kirisikili laka ka tomu na tortoru na kulo Ju nalo kialo nei ajikia batitigio rivu, naruei ajurña abivika aberenio “Venia na? Toro na naio ber ka mia naio sian niamoiano van kito ka kito resenio, ĩeli na naio ĩorña ber venia?”

<sup>53</sup> Naruei Yesu naio ber bisivisii meravo banlo ea tivelinio na nioti na kanano marioano, naio berinavo “Kiniou neber riano ban kamiu, neber kamiu monoka kuvisen niamoiano na kiniou Kulorinio Kenerinio, a kamiu monoka komunu kanaku burukija. Ver ĩeli, mia kanaku meuliano naio maka rijikia toa kamiu. <sup>54</sup> Mia naio napano ĩa jen niamonioku, a naio munu kanaku burukija, naio bokar meuliano napano maka ve jukuti nene, mo mia kiniou nevitirililar naio bereio ea legiano na maaro, nala naio rimeul bereio. <sup>55</sup> Nina bior niamonioku, naio be sinaniano dolu tai, a kanaku burukija, naio be munuiano dolu tai laka. <sup>56</sup> Naio napano ĩa jen niamonioku, a naio munu kanaku burukija, kanano meuliano momou joa kiniou, a kanaku meuliano momou joa naio. <sup>57</sup> Karaňaku na be burupati na meuliano, ana naio miila kiniou nebinime, mia kiniou nojo nomeul ea kanano meuliano napano joa kiniou, naruei naio napano ĩa jen niamonioku, mia naio rimeul ea kanaku meuliano napano joaio. <sup>58</sup> Naina naruei kiniou nojorña neber ea kanaku iliano ea tivelinio na joko nei napano jaluvo ea vio mave naio batove. Joko nei naio maka tibe ka joko nei nanua ĩa korobido moruo nalo ĩa ajenio mia nalo ajurña aňaro jibe na ga. Naio be joko napano toro kei napano ver naio senio, mia naio mijikia rimeul to tobo to.”

<sup>59</sup> Iliano nalo nei naruei Yesu jo berloglog kalo joomo ea yimo na

volkouano na vio Kapeneam.

*Naiagagoano telabo nalo ajuvan Yesu nalo abanvan bereio*

<sup>60</sup> Mia bogo na, Yesu naio ber iliano nalo nei, kumemi kanano naiagagoano nalo telabo ajidomii naio bereio, aberinavo “Kanano verloglogiano nalo nei kirisikili kiana. ?Kei bereio naio mijikia rijoglubarbar vatitigio?”

<sup>61</sup> Mia Yesu naio mijog lubar ea naio ka kanano naiagagoano tealo ajurña amil mumii ka naio tertelisu jibe na, ana naio bika denlo, naio berinavo “?Jumabe, kamiu maka kuvisaaro ka kanaku iliano telisu nei, mila kamiu kumisidom kuvituvan kiniou bereio? <sup>62</sup> Ver tibe na, maka nejikia kamiu naruei. Ver bogo tai, kamiu kuvial kiniou Kulorinio Kenerinio notuvan kamiu, navan bere ea kanaku vio mave, mia tumabe naruei? Peli mia tiniemiu bobogia kiniou naruei! <sup>63</sup> Kanaku iliano nalo nei abe m̃arabo na Niununo, abe m̃arabo na meuliano. Kulorinio naio mijikia rivar bere kulorinio, mia kulorinio naio maka rijikia sian meuliano riano nei van kulorinio dolu. Vite na Niununo na Atua kanano ga naio mijikia sianio. <sup>64</sup> Mia nebitilubar ka kamiu tealo kumonea ruei, mia tealo makanio.”

Yesu naio ber nina, bior ka napano beamu ruei, naio mijikia kulo be nalo naña maka amonea naio, ba bokar napano naio mijikia kei kalo napano mia naio tiveluku kanio. <sup>65</sup> Ana Yesu ber kalo bunu, naio berinavo “Tealo mia amonea, a tealo mia amonea re, naina naruei kiniou neber batitigio ban kamiu iliano nei naruei, ka maka toro tai rijikia rimei ea kiniou, ver karaňaku maka rijamo ka naio rimei.”

<sup>66</sup> Naruei ea bogo nei, kumemi tealo kanano naiagagoano nalo amial jibe Yesu kanano verloglogiano nalo nei, abinime jikili lie vo, naruei amialio ka be de ga, ana nalo aban bereio, maka bunu atu atakilili kumemi.

*Pitere naio berial jikili kanalo moneano ban Yesu*

<sup>67</sup> Ana bogo napano Yesu naio mial ka napano tomu tealo ajuvan naio bereio, naio mil ban kumemi kanano naiagagoano duelimo ba juo [12] nei, naio bika berinavo “?Ana jumabe ka kamiu? ?Peli kamiu bunu tiniemiu jii ka kuvan bere vija nalo na?”

<sup>68</sup> Ana Saimon Pitere naio berdoĩe, berkar jikili ban Yesu, berinavo “Tuĩo, ver kumemi nuvituvanso, mia kumemi

nuva nuvitakisor kei bereio? Jau takurano ga napano ioluano na meuliano na joaso,<sup>69</sup> jau ga takurano napano vonganai kumemi numonmoneaso, a kumemi numijikia ruei ka jau kobe Naverikariano Lu napano Atua juvanso kobinimei ka kolarur kumemi.”

<sup>70</sup> Ana Yesu berdoŕe, naio berinavo “Nao, kiniou nebijauia bulag kamiu du- elimo ba juo [12] na be kanaku, ka kamiu kumonea kiniou tibe na, mia iviso bure kamiu, kamiu tai naio be siñaro memedu.” <sup>71</sup> Mia Yesu naio maka riverial kumemi tai siano ka bogo na, mia iorou kanio ana nubitilubar ka ea kanano iliano nalo nei, naio joña ber Jutas, tormoruo Saimon re Kariot kenerinio, napano naio be tai ka kumemi duelimo ba juo [12], mia naio maka ritovonio, naio jiveluku ka kanano Tubo novo nei.

## 7

*Yesu kuruano nalo maka avijurukar batitig naio rivu*

<sup>1</sup> Iorou ka naina Yesu naio joña miel jeliviv, joña ban ea ga vio na be kiano tanobuku ga nei Kalele. Naio maka bunu toña rivavin ea vio nalo na tanobuku na vio Yutea, bior navurim̄araboiano na kulo Ju na vio na nalo ajum̄a ajirarag ka naio ruei, ka ajidom ka ala bin naio riñaro. <sup>2</sup> Mia bogo tai, be vaataro ka bogo na burum̄ara jokoluolu tai na kulo Ju nalo kialo bereio, napano be Jokoluolu na Yimo Tobobo. Mia jibe ka ga bogo nonovio, nalo miroano tiniel jii ka avavin Yerusalemo kanio. <sup>3</sup> Mia ka bogo na, Yesu kuruano nalo amel banio, aberinavo “Ei, jau kojo bogo jiou ea vio nei ruei, bo ka jau kalavon ka kavavin Yutea, ka kanamo naiagagoano nalo na yako nalo kija amijikia aial kijokijo nalo naña jau kojom̄a komilaio. <sup>4</sup> Jau kojidom ka tomu nalo ajikia vatitigso, a kojom̄a komim̄au lukuluku ga. Ver be riano ka naña jau komila burum̄ara burutomoluo nalo nei, bo kanio kava koyotuba ea yetemeriba mirano.” <sup>5</sup> Mia nalo nei kialo iliano nei jibe ka amiyotel ea ga Yesu, bior nalo abe kuruano memedu, mia nalo maka amonea naio.

<sup>6</sup> Mia Yesu berdoŕelo, naio berinavo “Kamiu kumijikia kuvila kenemiu vite nalo ea bogo na vabe ga napano kamiu tiniemiu jii ka kuvilaio, mia kiaku burum̄ara bogo naio maka rimei vo. <sup>7</sup> Kamiu kumijikia kuvila kenemiu inñauano nalo rivu ga, tomu nalo maka ajikia asern̄i ka kamiu riviorio, mia bogo na kiniou nemila kiaku inñauano, neberial ka kialo bajago va nalo na yetemeriba nei maka

rimemedu, mia nalo ajern̄i ka kiniou toru laka. <sup>8</sup> Tibe na mia kamiu ga kuvavin Yerusalemo, kiniou notobo nei ga beamu vo. Kiniou maka nejikia nava noyotuba ea mirano tomu nalo na jokoluolu nei, bior kiaku bogo jo binimei, mia maka rimei nonovio vo.” <sup>9</sup> Naio ber iliano nei banlo, avona iorou kanio ana nalo abano ana naio jobo.

*Iorou kanio ana Yesu bavin ea jokoluolu*

<sup>10</sup> Yesu jobo jibe na, mia maka vesiou ga, naio bunu bavin Yerusalemo, mia maka tibe ka na tomu nalo amijikia aial naio, mia naio milavan naio. <sup>11</sup> Naruei tomu na tortoru na kulo Ju nalo, ajum̄a ajidomiio ruei ka ŕeli mia naio rimei ea jokoluolu, naruei nalo ajum̄a ajiravo naio janea vio, abivika aber naio jo be. <sup>12</sup> A tomu nalo bunu, bogo nonovio ajum̄a aberverii naio, napano nalo tealo ajum̄a aber naio be toro na bo tai, a tealo aber naio kirivova, naio joña mila niegeniege m̄elea tomu nalo kialo jidomiano. <sup>13</sup> Ajum̄a aberverii Yesu jibe na, mia maka atum̄a averial naio ea vio medave, bior amerou ka ver kialo tomu na tortoru ajogio, mia ala titai kalo.

*Yesu ba miyotuba ea Atua kunuano lu*

<sup>14</sup> Mo nalo ajua jokoluolu banbano-o na, legiano tealo barlaka ruei, mia Yesu naio mial bo ka riva rivavin ea Atua Kunuano Lu ka riverloglog tomu nalo bereio. <sup>15</sup> Mia bogo na tomu na tortoru na kulo Ju nalo kialo amijog kiano verloglogiano novo nei, amiilo toru laka, aberinavo “Jum̄abe ana tete nei naio mijikia vatitig Atua kiano iliano jibe na? Naio maka rivan ea yimo na verloglogiano leleio, mia kiano verloglogiano kirinovo-o mia!”

<sup>16</sup> Ana jibe na Yesu naio berial banlo, berinavo “Venia naña nojom̄a nejiloglog ban kamiu, maka ve kiaku, mia be Teta na naio miila kiniou nebinimei ea yetemeriba nei kiano. <sup>17</sup> Ver toro tai saaro ka rila ga Teta kiano jidomiano, mia naio rila toro nene mijikia rivitii vatitig kanaku verloglogiano nalo. Mia toro nene naio mijikia rivitilubar ka kiniou maka noto neverloglog tomu nalo selia ga siaku, mia mijikia rivitilubar ka verloglogiano nalo nei, be riano laka ka amaluvo ea Atua. <sup>18</sup> Ver kito reial toro tai toña rila iliano ea siano bereio, kito romijikia ka naio joña midular naio ga rivavin. Mia ver toro na ña mil, midular kiano toro na toru siano napano miila naio binimei, romijikia ka naio be riano ga, naio maka toña rilasibi.

<sup>19</sup> “Toro tai na mila jibe nei be Mosis. Atua jian kiano tuboiano banio, naruei naio binimei jian ban kamiu, ana kamiu kumitum̄a kumila kokorovio ruei. Mia jum̄abe na kamiu kumisidom kuvuebin



kiniou naŝaro, bior kuberinavo namila korov tuboiano? Naio memedu jibe na?"

<sup>20</sup> Naruei tomu nalo aberdoŝe aberinavo "Jerei, vonganei kojorŝa komil vovu jibe ka siŝaro tai joaso! Kei jidom rueso? Koverial vonio!"

<sup>21</sup> Ana Yesu berdoŝe, berinavo "Nanua beamu nebinimej ea vio nei, nemila buruŝara burutomoluo tai ea miremiu, nemieliej ka toro na be javuluku. Mia bogo na kumialio, maka kumisaaro kanio, kuberinavo kiniou nomirŝau bova ga ka napano nemila ea Legiano Lu. <sup>22</sup> Mo bo ka kamiu kuvilavon ka tiniemiu rimaio bunu ka bajago na pakuveu, javukia tormoruo Mosis naliko tormoruo dolu nalo na beamu ka naio, jibe ka Epraamo nalo, aĵian ban kito. Naio bunu be irŝauano tai kiana, mia ver legiano na ala rijoru ea Legiano Lu, kamiu maka kuvisidomialio, na kumituŝa kumila ga. <sup>23</sup> Kamiu kumituŝa kuber maka kuvisidom kuvila korov Mosis kiano tuboiano, mia danŝariga kumijamo ka ala irŝauano na pakuveu ka Legiano Lu nei, naio bo ga na. Mo ver kamiu kumijamo ka nina, ana bior vaio ana kamiu tiniemiu mimi mŝele jibe na ban kiniou bior kiri irŝauano sesa novo na kanaku na takurano ga nei, napano namila batitig kiri tavaliki nei niabeno bo bereio ea Legiano Lu? <sup>24</sup> Kiniou nemial jibe ka kamiu kumituŝa kubitii vite nalo na jibe nei ea kulukuti ga, mia bo laka ka kuve masou kija, kuvilavonj ka kuvisidomii rivu vite nalo riva rivokar niamoiou."

*Aberivonvon ka Yesu be Naverikariano ŝeli na maka ve naio*

<sup>25</sup> Ana ka bogo na tomu telabo na Yerusalemo amial ka napano Yesu joŝa berloglog joomo ea Yimo Lu, mia nalo amilo, aberinavo "Ierinio ga na! Toro nene kia ga nei navo, napano tomu na tortoru aĵuŝa aber aĵidom ka auebinio riŝaro. <sup>26</sup> Be naina joŝa berial kiano iliano jibe na ga, naruei nalo maka bunu alavon ka ala titai ka leleio. Kito maka rejikia, ŝeli maka asidom ail vanio bior napano abitulubar batitigio rueli ka be riano ka toro nei, naio be kiado Naverikariano memedu. <sup>27</sup> Mia makanio, maka rejikia ka reverenio aver naio nina ga, bior napano kiado moneano tai rueli, ka Naverikariano, bogo na ver naio riyotuba, mia maka ve toro tai rijikia river naio joa vio be na binimej na. Mia toro nei Yesu, kito nonovio romijikia kiano vonuo rueli." Nalo aber jibe nei, aber ŝeli Yesu abario jo Nasarete, mia makanio, naio abario jo Betleem.

<sup>28</sup> Mo bior nalo aĵuŝa aber jibe na, Yesu jaanŝi ka berlogloglo joomo ea Yimo

Lu, naio berial iliano nei banlo, berinavo "Kamiu kuberianŝa kumijikia kiniou, a kuberianŝa kumijikia vio napano nebinimej eao, mia nemial jibe ka maka kuvijikia batitigio rivu. Nebinimej ea vio nei, maka ea kiaku jidomiano, mia toro dolu tai miila kiniou nebinimej, napano naio be burupati na ilirianiano. Mia jibe ka maka kuvijikia kiniou, mia maka kuvijikia naio bunu. <sup>29</sup> Mia naio, kiniou naruei napano nemijikia naio batitigio bo, bior ka napano naio naruei miila kiniou nebinimej ea yetemeriba nei."

<sup>30</sup> Mia Yesu kiano iliano nalo na jibe nei mila aĵikili lie vo ka monoka avokakar naio, ana maka ve toro tai leleio ka napano mijikia tokolio, bior ka napano kiano bogo maka rimej vo. <sup>31</sup> Aĵidom aue naio, mia tomu nalo miroano laka amonea naio rueli, bior burutomoluo nalo napano joŝa milaio. Aber jibe nei aberinavo "Ana mia Naverikariano na vabe napano mijikia rimej rila burutomoluo venia bereio tovulu naio? Makanio, tete nei naio be kiado Naverikariano memedu kiana."

*Amiila tomu na mira aban ka Yesu*

<sup>32</sup> Mia Varisis tealo aĵuŝa amiagago ka tomu nalo naŝa amijakar Yesu ka kialo iliano nalo, mia amila soŝeli, aba amil bija kulo lu na tortoru nalo, naruei abiorkar ka monoka ala titai ka Yesu vonganei ga. Ana amiila kialo kukuano nalo, ka ava asirago buluvio ka avokar Yesu, ka avuru naio rimej bere vanlo.

<sup>33</sup> Ana Yesu berial, berinavo "Mia kiniou nemijikia noto vija kamiu bogo ve telisu ga bereio, karina navan bereio ea naio napano miila kiniou nebinimej. <sup>34</sup> Bogo napano navan bisi, mia kuvila von ka kuvisirag kiniou rivanvano-o, mia maka kuvijikia kuvileal kiniou. Vio napano mia nava notoao, mia maka kuvijikia kumej eao."

<sup>35</sup> Mo bogo napano tomu na tortoru na kulo Ju nalo kialo amijog iliano nei, abitovitonu eao, aĵuŝa aber kalo, aberinavo "Kema na jo ber vio be na, ka mia naio rivan ea karina mia kito rejikia re realeal naio bereio eao? Peli naio jidom rivan ea vio dolu nalo na yetemeriba napano kuruado Ju aburo aban ea ka bogo na buruŝara vurubureiano, tenene na naio jidom riva riverlogloglo kija kovioho?

<sup>36</sup> Mia naio ber venia na, ber mia kito resirag naio rivan-o mia kito realeal re naio. Mia tuŝabe ea kiano iliano napano berinavo naio to rivan ea vio tai napano kito rejikia re ratakisorio, maka rejikia ravan eao?"

Mia ka bogo na, kukuano nalo maka avokar Yesu vo.

*Yesu mioliolui Niununo Lu, be uei na meuliano*

<sup>37</sup> Naruei amila jokoluolu nene bano-o, na binimei bokar legiano maariano nene, napano jibe ka legiano na toru nene. Mia bogo napano aju vio takurano, Yesu jumolu bio jikili jibe nei, naio berial berinavo "Kamui kei na midou jer, bo naio rimei ea kiniou, rimunu uei na meuliano. <sup>38</sup> Toro naña monea kiniou, mia rivu laka vanio, tibe ka naña Vivitauiano Lu naio berenio, napano berinavo

"Toro na jibe na, mia tiniene rivujo ka uei na meuliano, rivano-o rio magmago lou ea naio bereio tibe ka uei naña mieraro."

<sup>39</sup> Mia Yesu kiano iliano nei, naio j-jamerji ka Niununo Lu, bior ka napano naio mijikia ka iorou, nalo na ña amonea naio, mia avokar Niununo Lu. Mia ka bogo na, Niununo Lu naio maka rimei vo, bior ka napano Yesu naio jo kia navo ea yetemeriba nei, naio maka riva totano ea kiano vio lu na mave vo.

*Jidomiano niukniuku ka Yesu*

<sup>40</sup> Mia bogo napano tomu nalo amijog Yesu bio jibe na, kialo jidomiano nalo ba beve dolu. Nalo tealo aberinavo "Toro na, naio be naverialiano jibe Mosis naña kito romoneaio ka mia naio rimei." <sup>41</sup> Tealo abeinavo "Nina, jibe na kovio, ñeli na ver maka naio be kiado Naverikariano garuei."

Mia nalo tealo aberdoþe, aberinavo "Makanio, maka iliano tai napano river Naverikariano mia rive toro Kalele tibe ka tete na. <sup>42</sup> Kiado Vivitauiano Lu ajuña aber ga mia Naverikariano mia naio riyotuba ea Parinio Tubo Teviti kiano yati, mia naio rive toro re Betleem." <sup>43</sup> Mia jidomiano telabo ka naio jibe na banbano-o, mila na tomu nalo aburuburevurelo bior Yesu. <sup>44</sup> Mo tealo nalo maka lele asaaro ka naio, amial bo ka avuku naio rivan ea nalakoiano, mia iorou kanio maka tai kalo napano ava vaataro kanio ka avokario.

*Navurim̄araboiano nalo tinieljer Yesu toru laka*

<sup>45</sup> Mia iorou ka vite nalo na, kukuano nalo na Yimo Lu aban bereio ea kulo lu na tortoru bija Varisis nalo, ka asian veriiano rivanlo. Ana bogo napano amiyotuba ea miralo, tomu na tomormoruo nei maka aial Yesu, ana amil banlo, aberinavo "Ana toro nene naio be napano numiila kamui

kanio? ?Bior vaio ana kamui maka kuvuru naio rimei?"

<sup>46</sup> Naruei kukuano nalo nei aberdoþe, aberinavo "Kumemi numiagago ka kiano iliano nalo abo mia abo, maka ve toro dolu tai napano mijikia riverloglog kito rivu tibe ka naio."

<sup>47</sup> Mia verdoþeiano nei mila Varisis nalo amiilo kanio, aberinavo "Tomnei, vonganei kamui bunu, kema na buru kenemiu jidomiano ba be vovu! <sup>48</sup> Kamui kumijamo ka naio milasibilili kamui, mia juñabe, kamui kumial ea kumemi tomu na tortoru ñeli na ea kumemi Varisis, be tai napano amonea naio? Makanio. <sup>49</sup> Nalo ga naña amoneaio, nina be taara kirivova dedade nalo na, mia nalo na maka ajikia vite. Maka ajikia batitig kiado tuboiano rivu, Atua berkar iliano va ka kialo vironiano ruei."

<sup>50</sup> Ajuña amil jikili jibe na, mia nalo tai milavio jikili ka rila kialo iliano rivatove bereio. Nina be Nikotimas, napano nua beamu ea bogiano tai, naio ba jukunu bija Yesu. <sup>51</sup> Naio ber kalo, berinavo "Kito rojuña romil ea toro na jibe na, javukia napano rojuña rejibure naio ruei. Mia kiado tuboiano berbure nina, naio ber ver kito rosidom reil van toro tai, kito monoka rotutano ea komeli kitoliko, monoka rodu bogo rivanio ka naio riverial kiano jidomiano van kito, ka kito monoka rovika vikadeniano nalo ka realeal ka be riano naio mila jibe na ñeli na juñabe. Nina naruei ñarabo na ala iñauano memedu."

<sup>52</sup> Mia maka asidom aiagago ka kiano iliano nei, bior amial ka napano naio mikurukar Yesu. Amil banio, aberinavo "Tomnei, jau kojorña komil jibe na jau bunu kobe toro Kalele tai bereio! Kosidomii vatitig rivu ka venia napano Iliano Lu berenio. Maka leleio ve iliano tai napano riverial ka mia naverialiano vou tai naio tumolu rove yako Kalele rimei mave ea vio nei."

<sup>53</sup> Naruei kialo iliano nalo ba bi-rankakario ea vio na ga, karina nalo abeve terakurano abanvan bereio ea kialo vonuo nalo.

## 8

*Tira napano aberenio amilealio ka naio be nasiakaiano*

<sup>1</sup> Naruei Yesu juvan Yimo Lu, naio miel ban bereio ea Suku Na Buruolivi. <sup>2</sup> Naio mon ea vio na-o viomijeni kon naio, ana kavijo naio ban bereio ea Yimo Lu na Atua Kunuano. Bogo napano tomu nalo amial naio, nalo telabo abinimeio eaio, naruei naio jotano joña berlogloglo.

<sup>3</sup> Mia maka vesiou, naverloglogiano na tuboiano bija Varisis nalo, aburu tira tai binimeia eao, amila naio jumolu jua mirano na tomu nalo. Tira nene, aju abokar naio jibe na bior aberenio naio mila siakaiano bija toro tai, mia nalo tai amial, aberialio. <sup>4</sup> Ana amila naio jumolu ju jibe na, amil ban Yesu, aberinavo "Naverloglogiano, tira nei amileal naio jonia mila siakaiano. <sup>5</sup> Mia jibe ka napano Mosis kiano tuboiano berenio ea tivelinio na kariano nei, vonganei naruei kumemi monoka nuvitubabinio ga rimaro. Mia tuboiano na Romo berenio be lu ka nuvitubabin toro. <sup>6</sup> Mia juruabe ka jau, kiamo jidomiano juruabe?"

<sup>6</sup> Naruei vikadeniano nei, maka avika masosou den Yesu, mia ajurna aburu vonvonio, ka naio river belbeleia titai napano mia iorou kanio ana amijikia atibure naio riviorio.

Mia Yesu naio maka riverdope, naio maka river vite tai, mia jurubanini ga, bitiri martukuji na juruabe naio bivitauia iliano tai ea borotano.

<sup>7</sup> Ana ajurna abivika denio juruabe ka tira neibano, ana Yesu barlar naio bereio, mil banlo, berinavo "Mo, ver kamiu tai napano maka lele ve kariano tai toa kiano meuliano, mia naina rivuku puruveru na tukamu, tuba tira nei." <sup>8</sup> Vaarakurano bereio, naio jurubanini batove, bivitauia iliano dolu tai ea borotano.

<sup>9</sup> Mia bogo napano amijog venia napano Yesu ber kalo, ajikar ka abeve terakurano abanvan bereio. Na naio jukamu, be kialo tormoruo tai, mia iorou ka naio, nalo dolu bunu aburu dedade ealo beve terakurano, o-oa ka tira nei ga jumolu ju ea Yesu mirano. <sup>10</sup> Mia Yesu bitikar naio bavin, naio bika berinavo "?Tira, nalo napano aju be? ?Maka bunu nalo tai sidom tibureso?"

<sup>11</sup> Ana tira neibano naio berdope, berinavo "Tubo, maka bunu toro tai."

Mia Yesu berenio berinavo "Bo ga, mia kiniou bunu natibureso re. Jau komijikia kava vonuo bereio ga, mia kola re bunu kariano bereio."

### *Yesu ber naio be yulu na yetemeriba*

<sup>12</sup> Mo iorou kanio ana na Yesu mil banlo bereio, naio berinavo "Kiniou nebe yulu na yetemeriba, toro kei napano takisor kiniou, mia naio riel re bunu ea melijokouo, ana mia yulu na meuliano toa naio."

<sup>13</sup> Mia Varisis nalo tealo napano aju kia navo abukular kiano iliano bereio, aberinavo "Jau kober jibe na, jau ga bereio komiija kanamo iliano, jau kojonia komidular jau bereio bavin. Tibe

na, kumemi maka nuvijikia numoneaso, kanamo iliano maka ve riano ga."

<sup>14</sup> Ana na Yesu berinavo "Peli namila jibe na kovio, mia kiaku iliano nonovio peli kiaku verloglogiano abe riano laka. Kiniou nemijikia nonovio vite na tivelinio ea kiniou, ka kiniou nojo be na nebinimeia ea vio nei, peli na nojo nei ka mia nava be bereio, mia kamiu maka kumijikia lele tivelinio na kiniou. <sup>15</sup> Kumiturua kumitibure kiniou ea jidomiano na toro, mia kiniou maka netibure toro leleio. <sup>16</sup> Mia ver bogo tai netibure tomu nalo, mia kiaku tibureiano naio rimemedu ga, bior napano kiniou re ve takurano nalaio, mia kumemi juo naina napano mila kiniou nebinimeia, kumemijuo nuvila buronio.

<sup>17</sup> "Mo ea kenemiu tuboiano, abivitauia jibe nei berinavo ver ve tomu ve juo aikurukar iliano tai, mia kamiu kumoneaio, <sup>18</sup> naruei mia monoka tibe na bunu ea kumemi juo Teta. Kiniou neber kiniou nebe riano, a naio mikurukar kiniou, mila na vonganei kamiu monoka kumonea kiniou."

<sup>19</sup> Nalo amijog iliano nei, naruei abika denio, aberinavo "Jau kojonia kober karamamo na, mia naio jo be vonganei?"

Ana na Yesu berdope, naio berinavo "Kamiu maka kuvijikia naio, jibe ga napano maka kuvijikia kiniou. Ver kumijikia batitig kiniou rivu, mia rila kamiu kuvijikia vatitig naio bunu rivu, a maka kuvijikia kuvika vikadeniano tibe na, ana makanio." <sup>20</sup> Iliano nalo nei, Yesu berlogloglo ea Yimo Lu, nina ea tivelinio na naio, vio be na mia avar vatitig kiano ijaiano na veru nalo napano ajuvan ban Atua. Ana ea bogo nei, maka ajikia avakar naio, bior maka kiano bogo vo.

<sup>21</sup> Ana Yesu berial bunu jibe na banlo, naio berinavo "Kiniou nava kovio den kamiu naruei. Bogo na ver nava kovio varlaka, mia kamiu kuvisirago kiniou, rivano o mia kuvial re kiniou, mia kumarnaro vija kenemiu kariano nalo. Kiniou navan ea vio tai napano mia maka kuvijikia kumei eao."

<sup>22</sup> Telikiti napano tomu na tortoru na kulo ju nalo amijog iliano nei, abika aberinavo "?Kema na naio jidom rila venia? Naio ber mia naio rivan ea vio tai na kito maka rejikia ka ravan eao, peli na naio ber mia rila kuku naio rimaro bereio bo?"

<sup>23</sup> Ana na Yesu berenio berinavo "Kenemiu jidomiano a kiaku jidomiano abe dolu laka. Kamiu kube na vio yetano nei ga, mia kiniou nebe na vio mave, kamiu kube na yetemeriba, kiniou maka neve kiano. <sup>24</sup> Ana jibe ka napano kiniou neber ruei,

mia kuñarñaro ga rivija kenemiu kariano nalo. Ver kumonea re kiniou ka kiniou nebe naio napano jo jobo jo, mia monoka tibe na ga.”

<sup>25</sup> Ana nalo abika, aberinavo “Abe jau kover vonio bereio, ka jau kobe kei.”

Ana na Yesu buku bere iliano banlo, naio berinavo “Kiniou nebe naio ga napano nanua jkar beamu ruei binimej bokar vonganei, kiniou nojo neber kiniou nebe naio ga. <sup>26</sup> Naina ga kiniou nojoñña neber tivelinio na kiniou. A tivelinio na ea kamiu, ve vite miroano napano nemijikia neverenio, mia ðeli ver neverenio, a be iliano na tibureiano nonovio. Ana vite nalo napano nojoñña neberial ea yetemeriba nei, naio be iliano nalo ga napano nomijog den naio napano miila kiniou, bior dañariga, kiano iliano nalo amemedu laka.” <sup>27</sup> Yesu bisi meravo ga jibe nei, berii karamano na mave banlo, mia maka ajikia leleio.

<sup>28</sup> Naio mil bereio banlo, naio berinavo “Telikiti napano kuvitelan kiniou Kulorinio Kenerinio mave ea iesi ñakolkolo bisi, mia kamiu kumijikia ka kiniou nebe kenemiu Naverikariano. Mia kamiu kuvitubar ka napano vite nonovio nañña namilalo, maka nala kiniou ga ve takurano, mia dañariga neber ga venia nañña Teta naio berloglog ka kiniou. <sup>29</sup> Naio naruei napano miila kiniou nebinimej, a naio jo bija kiniou vonganei. Naio maka leleio tuvan kiniou bogo tai, bior dañariga nojoñña namila vite nonovio jibe ka ga nañña naio jaaro kanio.” <sup>30</sup> Yesu naio jomía mil jibe na, kiano iliano nalo aburu kulo Ju telabo amonea naio.

*Ilirianiano mila ñarimieni nalo na kariano ajibirbili bereio*

<sup>31</sup> Yesu mil ban nalo na amonea dovorovo ea naio, naio berinavo “Ver kamiu kuvokar sikili kiaku iliano, kuviturña kuviduio, kamiu kuve kiaku naigagoano riano nalo. <sup>32</sup> Mia kamiu kuvijikia ilirianiano, naruei mia ilirianiano rila ñarimieni nalo atibirbili den kamiu.”

<sup>33</sup> Nalo aberdoñe banio, aberinavo “Ai, abe kumemi nube tormoruo Epraamo kiano yati nalo, maka numiturña numiñau kurano ea toro na toru dolu tai. ? Mia jurñaabe ana jau koberinavo mia ñarimieni nalo atibirbili den kumemi?”

<sup>34</sup> Yesu berdoñelo, naio berinavo “Kiniou neber riano ban kamiu, tomu nonovio napano ña amila kariano, nalo abe tomu nañña aju amirñau kurano bior kariano, ñarimieni na kariano miadikarlo jikili. <sup>35</sup> Kamiu kumiturña kumirñau kurano ga bior toro na toru na kariano kanano,

mia kamiu maka kuve kiano ñaratavo. Mia kiniou, notobo rivija karamñaku, bior kiniou nebe kiano ñaratavo memedu. <sup>36</sup> Kiniou nebe tete na mave, mia ver novulu bulag kamiu, mia kamiu bunu kumijikia kuvitu dañariga vija kiniou ea vonuo na mave.”

*Yesu berenio nalo maka ave Epraamo kenerinio, nalo abe Siñaro kenerinio*

<sup>37</sup> Ana Yesu ber bunu ka tomu nalo, naio berinavo “Kiniou nemijikia vatitig ka napano kamiu kube tormoruo Epraamo kanano yati nalo memedu, ana Epraamo kanano yati nalo nei naruei napano bo ka ver asaaro ka kiniou. Mia makanio, kamiu tealo kube yati nene nalo naruei napano kiaku iliano maka totano batitig rivu ea kenemiu iviso, naruei kumisidom toru ka kuvue bin kiniou nañaro. <sup>38</sup> Bo ka kamiu kumonea kiaku iliano nalo, bior kiniou nojoñña neberial ga venia napano kiniou nemial bogo napano nojo bija Teta, mia kamiu kumiturña kumila ga venia nañña kumijog karamemiu naio berenio.”

<sup>39</sup> Mia aberdoñe, aberinavo “Riano ga, bior karamememi tormoruo buo Epraamo re nua nua laka.”

Ana na Yesu berinavo “Maka leleio! Ver kamiu kube tormoruo Epraamo kenerinio riano, mia bo ka kamiu kija kuviturña kuvila von ka kuvila vite nalo avu tibe ka nañña naio milaio. <sup>40</sup> Ana makanio, kamiu kumiturña kumila vite kirivova laka. Jibe kiniou, nebe toro tai nañña nojoñña neberial ga ilirianiano nalo napano nomijog Atua naio ber ka kiniou, mia kamiu kumiturña kumisidom kuvuebin kiniou nañaro. ? Peli kamiu kuberiañña bajago na naruei napano kenemiu tormoruo Epraamo tinien jii ka kuvilaio? <sup>41</sup> Makanio, kiniou nemial jibe ka maka naina, mia be karamemiu dolu tai napano naio jo, kamiu kumirñau kiano.”

Mia nalo aberinavo “!Jerei, venia na! ! Kojidom kala kumemi nuve tete na ñarabo nalo, kumemi maka nuvijikia karamememi! Karamememi takurano riano ga naio jo, naina be Atua.”

<sup>42</sup> Ana na Yesu berinavo “Ver iliano na be riano, ka Atua naio be karamemiu, mia kamiu monoka tiniemiu tii kiniou ve toru mia, bior ka kiniou najaluvo den naio nebinimej ea vio nei. Kiniou maka nemej tibe ka napano kiniou ga, mia naio naruei miila kiniou nebinimej. <sup>43</sup> Kiniou nojoñña neberii vite nalo na ban kamiu banbano-o kiride ga, mia dañariga kamiu maka kumijikia leleio. Kiniou maka nejikia den kamiu, bior vaio ana maka kuvisidom ka kuvokar vatitig rivu kiaku iliano na?

44 Kamiu, karamemiu Siñaro, a kamiu tiniemiu jii ka nãa kuvila tena bova tibe ka ga napano naio jidomio. Jikar nua ea tikariano binimeí, naio be toro nañã muebin toro nãaro a naio maka tinien tii ilirianiano, naio maka tumolu tua tivelinio ka naio leleio. Bajago na memedu na kiano, naio mil dañariga ea buruñara kenieno sibiano nei, bior naio be burupati na sibiano nalo nonovio, naio be teta na bajago na sibiano. 45 Naio jibe nei, mia bogo napano kiniou nebinimeí, neberial ilirianiano novo nalo ban kamiu, mia karina kamiu maka kuvisidom kumonea kiniou bereio. 46 Mia kamiu kei na naio mijikia riverial kiaku beleano tai? Mia ver kumial ka nemil be riano, bior vaio ana maka kumonea kiniou?

47 "Toro na be Atua kanano, naio jo miagago vatitig ka Atua kiano iliano. Mia kamiu na ver kamiu maka kuvisidom ka kuvijog kiano iliano nalo, nemijikia ka nina bior kamiu maka kuve kiano leleio."

#### *Yesu naio Epraamo*

48 Mia Yesu kiano ilisikiliano nalo nei mila tomu na tortoru na Ju nalo amijog bova, ana nalo abika denio, aberinavo "Kumemi numijog aber jau maka kove Ju rimemedu na, jau kobe niabe leri na Sameria ga tai. Ana kumemi numial napano siñaro tai joaso, naio jorña milaso kobe kodovo kija. ?Iliano nalo na abe riano, ðeli na makanio?"

49 Ana na Yesu berdoðelo, naio berinavo "Makanio, maka ve siñaro tai toa kiniou. Vite nalo nañã nojorña nemilaio, nemila ka karamiaku siano rivavin. Vite nalo nañã kamiu kumilaio ka kiniou, kumila ka siaku vatove. 50 Nina maka ve titai ea kiniou, bior ka napano kiniou maka noto noinãau ka nala siaku rivavin. Mia be toro na toru jo napano naio jidom ka tom nalo bo ka atovon kiniou, mia naio ga ve takurano tibure vite nonovio ea tivelinio na. 51 Mia be iliano tai napano be riano napano nemijikia never ka kamiu jibe nei, ka ver kamiu tai rivokar kiaku iliano sikili, naio rudukario, mia naio maka rijikia rial nañariano bogo tai."

52 Ana Ju nalo amijog iliano nei, aber ka naio, aberinavo "Vonganei numijikia batitig ka Siñaro joaso ruei. Jau kober toro napano tovonso mia naio maka rijikia riñaro, mia ve re toro tai napano mia maka riñaro bogo tai. Tormoruo Epraamo naio meul banbano-o karina naio nãaro, a naverialiano nalo bunu aminãau banbano-o karina añarñaro. 53 ?Peli na jau komialso jau loa laka ka kiado tormoruo lu nalo a? ?Jau koberianã jau kobe kei bereio, m?"

54 Ana na Yesu berdoðe, naio berinavo "Ver kiniou neverial ka kamiu, ðeli kumial jibe na ka napano nomidular siaku bavin bereio, mia kamiu kuvial rivova. Toro dolu tai ga napano nãa jo mila siaku bavin, nina naio napano nãa kuber naio be kenemiu Atua, naina be karamiaku. 55 Naio, kamiu maka kuvijikiaio, mia kiniou nemijikia batitig naio. Kiniou maka nala sibi tibe ka kamiu, neber vatitigio ga na, ka kiniou nemijikia batitig naio bo, a kiano iliano nonovio, nemije batitig bo monea kiaku meuliano. 56 Nemijikia never bunu ka korobimiu tormoruo Epraamo, naio tai napano jidom toru ka rial kiaku bogo nei. Naio jidom rial ka kiniou noyotuba ea kiano torogio, nemei nala kiaku inãauano nei, a bogo na naio rialio bisi, mia naio saaro mia saaro."

57 Ana Ju nalo abika naio aberinavo "Jau maka kove tormoruo tai tibe naio vo, kanamo yuka maka rivokar duelimio va limo [50] vo. ?Ana na jurñabe ana jau kojorña kober jau komijikia tormoruo Epraamo re nua nene? ?Jau komial kovio tai?"

58 Ana Yesu naio berdoðelo, naio berinavo "Kiniou neber riano ban kamiu, ka tormoruo Epraamo re nua nei, kiniou nojukamu laka ka naio. Bogo na naio maka vo, mia kiniou nebe naio napano jo beamu ruei." 59 Ana telikiti napano kulo Ju nalo amijog ka napano Yesu jorña ber kiri iliano telisu neibano, napano naio jibe ka Atua siano lu tai, ana amijikia ka naio jo ber naio be Atua, mia nalo tinie mimi toru. Naruei ajirag puruveru ka atuba Yesu riñaro, mia naio juvan naio bena ga denlo, juvan Yimo Lu ba tavio bereio bano.

## 9

### *Toro napano naio miyotuba naio be merebono*

1 Ana kumemi naiagagoano nalo kumemi liko Yesu numiel nubano, naruei bogo na numiturña numiel nuban jibe na, numial toro tai napano bogo na naio miyotuba, naio be merebono. 2 Mia nubika den Yesu, nuberinavo "?Naverloglogiano, venia mila kema na? ?Peli mauo na kiano kariano ga, ðeli na mauo na kenieno naio karamiãano kialo, mila naio be merebono jibe na?"

3 Ana Yesu berdoðe naio berinavo "Peli ga, naio maka ve kiano kariano, a maka ve kariano na kiano tormoruo juo kialo, mia naio miyotuba jibena ka rila ga ka mia tomu nalo amijikia aial moroano na Atua kiano riñau ea kiano meuliano. 4 Jibe na, mia nalarur naio vonganei, bior bogo napano viomijeni kia ga vo, kito monoka

roiñau sikili, monoka roiñauka naio napano mila kiniou nebinime i ka kiano iñauano nalo. Melijokouo jo binime i, napano kito maka bunu rejikia roiñau eai. <sup>5</sup> Mia vonganei, kiniou nojo yetano ea vio nei, kiniou nebe yulu na yetemeriba nei."

<sup>6</sup> Yesu naio ber jibe na bisi, ana naio buvulei ea bulukievi na borotano, naio monkorkor batove mila kitkiti tinio melmeloko jibe bulukinia, karina naio bijan ea toro neibano mirano be juo. <sup>7</sup> Ana naio mil banio, naio berinavo "Mo, jau kavano, kavatove ea bulukuei na Sailomo, kesekon batitig bereio miramo."

Uei napano Yesu berkanio, siano naio berenio "uei na riila rivano." Ana toro nene naio batove, mila jibe na, mia mirano abinime i abo. Ana naio binime i bereio kean kumemi bija Yesu, napano naio mijikia bitilubar vite nonovio bo.

*Iliano telabo ka tivelinio na merebono nei*

<sup>8</sup> Ana iorou, nalo na vaataro ka toro nei, bija nalo nanua beamu amial naio jomã miogio, amial naio bereio, mia aberenio aberinavo "?Merebono ña na naina ðeli, napano beamu jomã miogio sano janea vio damãariga na, ðeli na maka ve naio?"

<sup>9</sup> Mia nalo tealo aberinavo "Nao, naio ga na," a tealo aber "Ee, toro dolu ga na napano midu mirano," mia toro nene naio ga berial meravo banlo, berinavo "Kiniou nene nei."

<sup>10</sup> Mia bogo napano berial naio banlo jibe na, ana abika denio, aberinavo "Jumãbe ana miramo bo bereio jibe na?"

<sup>11</sup> Mia naio berdoðelo, berinavo "Toro ña na Yesu, naio naruei mirãaukanio. Naio mila kitkiti bulukinia telisu ea tinio, naio miaia jeleig miraku, ana naio berenio navatove ea uei na Sailomo, nese konio bulag den miraku bereio. Mia nemila ga jibe na, nabatove, nejekon miraku, namial jibe ka tinia miraku bo naruei."

<sup>12</sup> Ana nalo abika Yesu denio, aberinavo "?Mia toro nene naio jo be vonganei?"

Naio berdoðelo berinavo "Maka nejikia, maka bunu naialio."

*Varisis nalo aburubure jidomiano juo ka tivelinio na ielieliano nei*

<sup>13</sup> Ana iorou, aburu toro neibano beamu mirano bono ba ban Varisis nalo ka amijikia aialio. <sup>14</sup> Aburu naio ba jibe na bior napano legiano napano Yesu milarur toro neibano mirano eai, naio be Legiano Lu tai, mia nalo aberinavo ðeli Yesu mila iñauano tai napano tubolano na legiano nei naio burbureio.

<sup>15</sup> Telikiti napano abinime i aberial ka Varisis nalo, abika den toro nene, aberinavo "Mo, jau kija kala vonio ka kover jumãbe ana miramo binime i bo."

Ana naio ber ga jibe nei, naio berinavo "Maka, toro nene bijan bulukinia melmeloko telisu ea miraku, avona bisi ana nabano nejekon bulagio bereio ga, ana kiniou nemijikia nemial vite nonovio bo."

<sup>16</sup> Telikiti na Varisis nalo amijogio, tealo aberinavo "Toro narãa mila tena, naio mila jibe na naio maka rialerinio ea tuboiano na Legiano Lu. Jibe na naio maka taluvo den Atua rime i."

Mia tealo dolu aberenio aberinavo "Peli ga, ver be riano ka naio be toro va tai napano mila korov tuboiano, jumãbe ana naio mijikia mila burutomoluo novo nalo jibe na?" Ana nalo aberii jibe na bano-o, mila na ajua jidomiano juo biorio.

<sup>17</sup> Ana nalo abika bereio den toro nei napano beamu naio mirano miunu, aberinavo "?Ana jau, jau na naruei napano naio mirãauka miramo, mia jau kover venia tivelinio ea toro neibano?"

Naruei naio berdoðe memedu ga banlo, berinavo "Naio be naverialiano riano tai."

<sup>18</sup> Naio ber jibe na, mia tomu nalo na tortoru na Ju nalo maka amonmonea veriano na, maka amonmonea ka beamu toro na mirano bono, vonganei naio mijikia jirarag. Karina abio kararãano a kenieno abe juo ka amei aialo.

<sup>19</sup> Telikiti naljuo abinime i, abika denlo, aberinavo "Kuvitii vatitig toro na vonio. ? Nina be kenerimiu memedu, napano aberinavo naio miyotuba naio be merebono, ðeli na maka ve naio? ? A ver be naio, jumãbe ana mirano binime i bo bereio jibe na?"

<sup>20</sup> Naruei aberdoðe, aberinavo "Kumemi numijikia ka naio be kenerimemi, numijikia ka bogo napano nubario binime i bokar vonganei, naio be merebono batitigio. <sup>21</sup> Mia kumemi maka nuvijikia jumãbe ana naio mijikia mial vite nalo vonganei, kumemi maka numijikia keinia napano mila mirano binime i bo bereio jibe na. Mia bo ka kamiu ga kuvika vonio, naio maka ve tete na, naio mijikia mil." <sup>22</sup> Tom juo na amil jibe na, ajuvan kija ga kialo jidomiano, bior ka napano tomu na tortoru na kulo Ju nalo aberio ruei aberial ka toro kei napano naio rimonea ka Yesu be Naverikariano, mia avukular naio tusolo re bunu ea Atua kunuano lu. <sup>23</sup> Aberial jibe na, na tomjuo nei amerou, mila aberinavo maka ajikia ga, aberinavo "Bo ka kamiu kuvika naio ga, naio maka ve tete na."

*Varisis nalo amil bereio ban toro nei napano be merebono*

<sup>24</sup> Ana vaarakurano bereio, abio bere merebono nei nua naio binimej joomo keanlo. Naio ba joomo naruei amil jikili banio, aberinavo "Jau kover Atua na mave siano, jau koverial vite nonovio na be riano ga van kumemi, bior vonganei kumemi numileal ruei ka kema na naio be toro kirivova na lakoroviano na tuboiano."

<sup>25</sup> Ana toro nei naio berdoŝelo, naio berinavo "Naio be toro na bo ŝeli maka ve toro na bo, kiniou maka nejikia. Vite takurano ga na kiniou nemijikia, jibe ka. Nua beamu, miraku bono batitigio, mia vonganei kiniou nemijikia nemial vatitig vite nonovio."

<sup>26</sup> Mo nalo abika aberinavo "?Mia ver tibe na, naio miŝau kaso juŝabe? ?Naio mila batitig miramo juŝabe?"

<sup>27</sup> Ana toro nei berdoŝe, berinavo "Kiniou neber bisivisii vatitig bo vite nonovio ban kamiu vaarakurano ruei, mia kamiu maka kuvisidom kuvijogio, ana vonganei kumisidom kuvijogio bereio. ?Kar venia? ?Peli tiniemiu jii ka kamiu bunu kumei kuve kiano naiagagoano nalo na?"

<sup>28</sup> Naio ber jibe na, jibe ka naio miyotel ealo kija telisu, mia nalo tinieŝ jer ŝealea naio, amil jikili banio, aberinavo "IA! Jau ga kove kiano naiagagoano, kumemi nube naiagagoano nalo na tormoruo lu Mosis kiano. <sup>29</sup> Mosis nei, kumemi numijikia batitigio bo ka be riano ka Atua berial kiano iliano nalo banio, mia tivelinio ka toro dolu na, kumemi maka nuvijikia naio, ka naio be toro na vio be ŝeli na naio binimej juŝabe."

<sup>30</sup> Naruei toro nei naio berdoŝe, naio berinavo "I Tomnei, kiniou nemiilo va ka kamiu ka napano maka kuvijikia naio! Naio joŝa mila buruŝara iŝauano nalo jibe na, banbano-o na naio mila batitig miraku, mia kamiu maka kuvijikia ka naio be kei ŝeli na naio be toro re be. <sup>31</sup> Kito romijikia ka ver toro va naio rivio van Atua, mia Atua maka rijikia riagago kanio, mia ver toro na be toro naŝa milotu ka naio a napano joŝa mijogkario, ver naio rivio naio, mia naio riagago kanio. <sup>32</sup> Mia toro nene, Atua joŝa miagago ka naio, bior jikar ea tikariano na yetemeriba nei binimej bokar vonganei, maka lele aial toro tai rilarur bereio toro napano naio miyotuba mirano bono. <sup>33</sup> Kema na naio monoka jaluvo ea Atua ga binimej ea vio nei, ver ŝeli naio rijikia re rila vite tai leleio tibe na."

<sup>34</sup> Mia maka lele asaaro ka napano toro nei mil banlo jibe nei, aberinavo "Tomnei, jau, jau toro kiriniagiago laka. Jau komiyotuba bija bajago na kariano ga,

binimej bokar vonganei. ?Mia jau kobe kei koberiaŝa komijikia koverloglog kumemi bereio, ee kamali?"

Amil niegeniege naio banbano-o na, amijil lar naio batavio bereio.

*Toro merebono nei naio balea Yesu*

<sup>35</sup> Mia maka vesiou Yesu naio mijog ka napano amijil lar tete nei jibe na, mia ba milealio, bika denio, berinavo "?Juŝabe? ?Vonganei jau komonea Kulorinio Kenerinio ruei ŝeli makan vo?"

<sup>36</sup> Mia toro nei naio bika den Yesu, naio berinavo "?Ana naina kober na, naio be kei? Ver jau komijikia koverialio ka kiniou, mia nemijikia nomonea naio ga."

<sup>37</sup> Ana Yesu berdoŝe, naio berinavo "Jau komial naio ruei, jau komial naio vonganei. Kiniou ga nene nei, naŝa nojo nemil bijaso nei."

<sup>38</sup> Ana naio berdoŝe, berinavo "Aiou Tubo, ver tibe na, kiniou nomoneaso vodolu." Ana toro nei jidel dolu ka miaia Yesu.

*Yesu mil ban Varisis nalo*

<sup>39</sup> Ana na Yesu mil, berinavo "Kiniou nebinimej ea yetemeriba nei ka nevitiu tomu nalo, ka rila meravo ka tomu nalo naŝa abe merebono, amijikia aial vite, a ka tomu nalo naŝa aberiaŝa amijikia amial vite, ajikia ka abe merebono ga."

<sup>40</sup> Mia Varisis tealo aju vaataro ga, amijog iliano nei, abika den naio aber "?Ana jau kober kumemi bunu nube merebono a?"

<sup>41</sup> Ana Yesu berdoŝe, berinavo "Ver ve riano ka kamiu kuve merebono naio bo ga, kamiu kuvijikia re kuvar vironiano riviorio. Mia bogo napano kumituŝa kuberinavo kamiu kumijikia kumial batitigio vite nonovio, buruŝara beleano na joo kamiu ruei."

## 10

*Jamerijiano na burusio na nunu nalo*

<sup>1</sup> Ana Yesu naio mil lie vo, naio berii jamerijiano tai banlo, ka tivelinio na burusio na nunu, napano ajuŝa amiŝau vei ka napano mia nunu na tomu ve telabo kialo amijikia atu amon jouro eao. Naio berenio jibe nei, berinavo "Kiniou neber be riano ka kamiu, ka toro naŝa maka selia morouo ka riva jouro ea burusio na nunu nalo, mia naio mijalao burusio, toro na jibe na naio be toro va na vinauano ga. <sup>2</sup> Mia naio napano ŝa jeljel ea morouo naŝariga memedu, naio naruei be toro na be riano na bitikar nunu. <sup>3</sup> Ver adu toro tai to ka ŝa riviti kuku ka morouo, mia bogo na toro na bitikar nunu rimej, mia morouo mijikia rivetavo ga ka naio, mia bogo napano naio ba jouro, nunu

nonovio abiniu amijog jooon, mia naio bio nalo na ga abe kiano sialo, mia nalo nei ga ajumolu, naruei naio jukamu kalo abava tavio. <sup>4</sup> Telikiti napano naio jukamu kalo abatavio bisi, naio miel jukamu kalo, ana nalo amiel orou ka naio abano, bior ka napano amijikia vatitig joa na jooon. <sup>5</sup> Nalo maka ajikia ala tibe na ka valauo tai, mia nalo amerou ga kanio, bior napano amijog lubar dede joa na toro dolu jooon.”

<sup>6</sup> Jamerijiano nei Yesu ber kalo, mia maka ajikia yati nene.

*Yesu ber naio be morouo na burusio na nunu*

<sup>7</sup> Jibe na, mia Yesu mil lie vo banlo ea tivelinio na burusio na nunu, naio berinavo “Kiniou neber riano ka kamiu, ka morouo na burusio na nunu nalo, kiniou nene nei. <sup>8</sup> Kulo dolu naña abinimei jukamu ka kiniou, naña amila sibi aber mia avitigar vatitig nunu nalo, abe tomu kirivova na vinauano ga, a bogo naña aba amiyotuba ka nunu nalo, nunu nalo maka ajogilo. <sup>9</sup> Kiniou ga nebe morouo na burusio, toro na rimei selia kiniou ga, mia kiniou nevitigar vatitig kiano meuliano. Mia naio mijikia rivatavio ka sirago sano sinaniano, karina mijikia rimei rimon jouro ka bogiano, naio mijikia rimei rivan tibe na rivu ga. <sup>10</sup> Toro na vinauano naio binimei ka rivuru bulag bona nunu, ðeli na rue binvinlo amãrãaro, ðeli na ka rila lelanlo ve toru ga, mia kiniou nebinimei ka ajikia avokar meuliano, ka amijikia asaaro ka meuliano tai napano rivu laka rivanlo.”

*Yesu naio berinavo naio be toro na vitikariano na bo na nunu nalo*

<sup>11</sup> A Yesu ber bunu, naio berinavo “Kiniou nebe toro na vitikariano na bo na nunu nalo. Toro na bitigar batitig nunu nalo, naio monoka saaro ka rijamo ka kiano meuliano ka rilarur nunu nalo kialo meuliano. <sup>12</sup> Ver toro na inãuano ga tai, naio maka rijikia rivitigar rivu nunu nalo tibe na, naio maka tinien tiilo tibe na, bior maka ave kiano nunu nalo. Ver bogo tai naio rial buruñara kuli deden amei rivior nunu nalo nei, mia naio rimerou ga, naio tumolu rivuro, naio tuvan nunu nalo atubo ga, naruei mia kuli deden nalo nene abinimei ajer lo ana amlabulag lo, ana amjilo aburo aba dedade. <sup>13</sup> Toro nei buro den nunu nalo jibe na, bior naio be toro tai napano mirãauka kiano veru ga, mia naio maka rialerinio ea nunu nalo leleio.

<sup>14</sup> “Mia kiniou, nebe toro na nabitigar batitig bo kiaku nunu nalo. Kiniou nemijikia batitig bo nalo napano abe kiaku, a nalo bunu amijikia batitig kiniou bo. <sup>15</sup> Kumemi numijikia batitig kumemi javukia napano kumemi juo Teta numisidom batitig kumemi juo bo. A kiniou tinieku jii kiaku nunu nalo bare ka najamo ka kiaku meuliano riviorlo. <sup>16</sup> A kiaku nunu dolu nalo miroano napanoaju bunu, napano maka amei atu jouro ea kiaku burusio nei vo, naruei kiniou monoka novio nalo bunu, mia bogo na ajog jooku, mia amei. Mia kiniou nala tibe na-o mia kiaku nunu aviniu amei ave burukuti ve takurano ga vija kiniou, kialo toro na vitikariano na toru nene.

<sup>17</sup> “Rivano-o mia kiniou najamo ka kiaku meuliano riviorlo, naruei mia karamãaku naio saaro ve toru ka kiniou kanio. Mia nemijikia never bunu ka kiaku meuliano nei napano ver nesian rivano, mia nodu bereio. <sup>18</sup> Vere toro dolu tai napano mia rudular kiaku meuliano nei den kiniou, mia kiniou ga takurano nemijamo kanio. Be kiaku ga nesian rivano, a be kiaku ga ka mia nodu bere rimei. Ka noirãau tibe na, Teta ga mije monea kiniou.”

<sup>19</sup> Ana bogo tai bereio, Yesu kiano iliano na jibe nei mila na kulo Ju nalo aburuburelo ea jidomiano juo bereio. <sup>20</sup> Telabo kalo aberinavo “Simãroba ga joa naio, kema na miavovu tanea na! Kuviagago ka re naio!” <sup>21</sup> A tivelinio dolu aberinavo “Makanio, kiano iliano na bo nalo na maka ave iliano na toro napano simãroba toa naio. ?A mia tumãbe, mia simãroba naio mijikia rilarur merebono binimei rivu bereio jibe ka napano naio mila ruei na?”

*Yesu berial naio batitig bo ban kulo Ju*

<sup>22</sup> Ana ea bogo na be bogo na jokoluolu na toru bereio, mave yako Yerusalemo. Jokoluolu nei abio ka Jokoluolu na Aiko Vatitig Atua Kunuano Lu, a ajurña amilaio ea bogo na niavo. <sup>23</sup> Yesu bunu ba joa jokoluolu nene, ana bogo tai miel ban ea buruñara mãrsuþiki nei naña abio ka Solomon kiano Marsuþiki.

<sup>24</sup> Naruei tomu na tortoru nalo na kulo Ju napanoaju, abinimei amivonlo jelviv ea naio, abika jikili denio, aberinavo “Bogo jiou ruei kumemi numisidom nuvijikia vatitigso ka jau kobe kei, mia jau komila lukuaso ka kumemi mia! Ver jau kobe kenememi Naverikariano riano, kumemi numisidom ka jau monoka koverial vatitig rimeravo rivu van kumemi vonganei.”

<sup>25</sup> Ana Yesu berdoþe, naio berinavo “? Ana kiniou neber batitig bo ban kamiu ruei, ðeli na makanio? Kiniou neber



ka kamiu ruei mia maka kumonea ga. A burum̄ara iñauano nalo napano m̄a nemilaio ea karam̄aku siano, jibe ka napano kamiu kumituriña kumialio ruei, nalo bunu abisikon kiniou jo medave bo ka kamiu,<sup>26</sup> mia naina bunu kamiu maka kumoneaio. Peli nina bior kamiu maka kuve burukuti na kiaku nunu nalo.<sup>27</sup> Kiaku nunu nalo amijog lubar jooa na jooku, a kiniou nemijikia batitiglo abiniu, a nalo ajum̄a ajakisor kiniou.<sup>28</sup> Kiniou nojom̄a nejian meuliano nei napano maka ve jukuti nene banlo, ka mia ava kovio deio, a ve re toro tai napano mijikia rivuru bulaglo den jum̄aku.<sup>29</sup> Nina bior napano karam̄aku naruei napano naio jianilo ban kiniou, a naio jikili lie jovulu tomu dolu nalo nonovio, mia maka ve toro tai napano rijikia rivuru bulagio nunu nalo nei den jum̄ano.<sup>30</sup> Nao-o, kiniou bija Teta kumemi juo nube takurano.”

#### *Kulo Ju nalo tiniel jer Yesu*

<sup>31</sup> Mia bogo napano Yesu ber iliano nei bisi, ana tomu na tortoru na kulo Ju nalo tiniel jer naio bereio, abar puruveru ninio ga ajidom atuba ka naio rim̄aro.<sup>32</sup> Yesu mialio, ana mil banlo, bika ber “?Kiniou namila burum̄ara iñauano kela na bo na Teta naio jidomio ka nala ea miremiu ruei, ana kamiu kumisidom kuvituba kiniou tibe na bior na vabe kalo?”

<sup>33</sup> Ana nalo aberdope, aberinavo “Maka, kumemi nuvisidom nuvitubaso, maka rivior iñauano na bo tai, mia bior napano jau kojom̄a komila niegeniege laka ka Atua siano lu, ka napano jau, kobe toro ga, mia dam̄ariga kojom̄a komila von ka kalaso kotibe ka Atua garuei.”

<sup>34</sup> Ana Yesu berdope, naio berinavo “Ea kiado Niosi Lu, Atua kiano iliano tai joa Niosi na Iouano, napano naio mil ban kulo Israel, naio berii jum̄abe abe kenerinio, ana naio mil jibe na banlo, naio berinavo ‘Kamiu kumitibe ka atua nalo ga.’

<sup>35</sup> “Tibe na, ea vio nei kito romial napano nalo napano Atua kiano iliano nene ban ealo, abe kulorinio ga nalo, mia iliano nei berinavo nalo abe atua nalo, a iliano nene naio be kiado vivitauiano lu tai, naio monoka ve riano ga.<sup>36</sup> Atua naio berii kiano tomu nalo jibe nei ruei, ana mia jum̄abe ka kiniou, napano kiniou ga takurano naio mioa kiniou miila kiniou nebinimei ea yetemeriba nei? Memedu ga ka neverenio ka naio be Atua karam̄aku, a kiniou nebe kenerinio, a mia kamiu kuber maka rivu ka naber jibe nei. Mia kamiu kuber nojom̄a namila niege Atua siano lu, mia maka tibe na.<sup>37</sup> Ver be riano ka kiniou nojom̄a nomim̄au maka

ve karam̄aku kiano, mo, kamiu kumonea re ana bo ga.<sup>38</sup> Mia ver kiniou notom̄a nala kiano iñauano nalo, peli mia kumonea kiniou peli na kamiu kumonea re kiniou, mia kamiu monoka kumonea kiaku burutomoluo nalo, ka abe Atua kiano burutomoluo riano. Ver tibe na, mia kamiu kuvijikia kuvitilubar ka Teta naio joa kiniou be riano, a kiniou nojoa naio.”<sup>39</sup> Yesu naio ber jibe na kalo, mia kialo jidomiano nalo kirisikili bare dam̄ariga. Amila von ka avokar sikili naio bereio, mia amiilo ka napano naio jaluvo iviso denlo bano.

<sup>40</sup> Naruei Yesu naio jaluvo Yerusalemo, barkor uei na Yortano nei ba tivelinio ea vio nanua Jone Baruei naio baruei ea tomu nalo. Naruei Yesu joa vio na kirisiou kija,<sup>41</sup> mia tomu nalo ajum̄a abinimei ka naio dam̄ariga. Abinimei, aberii Yesu aberinavo “Jone nanua na naio maka rila burutomoluo tavukia nar̄a kema nei naio jom̄a milaio, mia naio jom̄a berial vite telabo ea tivelinio na naio, naruei kito rojum̄a romial ka mirado ka napano vite nonovio napano naio berenio na ajum̄a abinimei be riano ga.”<sup>42</sup> Naruei kialo jidomiano jibe na mila napano nalo telabo ea vio nei amonea Yesu.

## 11

#### *Tukunu na Lasaros*

<sup>1</sup> Mia bogo napano Yesu naio jo laka kia ga vo, mieiano na jikili tai binimei bokar kiano bilbilu tai, napano naio be Lasaros. Naina be Lasaros napano kuviviniene juo be Mere naio Marita, a nalo tolu nei tena komeli na telisu na Betani vaataro ka Yerusalemo.<sup>2</sup> A Mere nei bunu napano iorou, naio miyon bonotanunu ea Yesu, naio miolkon jaano nalo ka vijinio.<sup>3</sup> Mia bogo napano kuviviniene juo nei amial ka kum̄anelo na m̄aro naio mie toru jibe na, amiila toru ka Yesu, aberinavo “Tubo, kiamo bilbilu m̄a na jau tiniemo eaio, naio mie laka.”

<sup>4</sup> Ana bogo na iliano nei binimei bokar Yesu, naio maka rivano, mia naio ber ga, berinavo “Kiano mieiano na maka ve tena m̄ariano, mia mieiano na naio jibe Atua kiano m̄arabo tai ga, ka naio riverial kiano mermerano, a ka riverial kiano burum̄ara moroano na jian ban kiniou Atua Kenerinio.” Yesu naio ber iliano na, jibe na ka naio mijikia vite na mia naio rilao.

<sup>5</sup> Yesu tinien jii Marita toru laka bija kulueno na telisu a kum̄anelo nei, a naio mijog bova toru kalo, mia maka rimonloglog bogo na tenei vo.<sup>6</sup> Jibe na, mia naio maka rivan vo, naio jo bere legiano juo ea vio

nei ea marauei na Yortano tivelinio bano. <sup>7</sup> Naio jo bere bogoti juo jibe na, bisi ana naio ber ka kumemi kiano naiagagoano nalo, naio berinavo “Kito m̃a, ravarkor ravan bere ea tanobuku na Yortano.”

<sup>8</sup> Mia kumemi numitu tiniememi maio ka kia ga vo nanua tom na tortoru na kulo Ju nalo na ea tanobuku nei tiniel jer m̃elea Yesu, mila na numerou ka nuvan bereio. Naruei nubika den Yesu, nuberinavo “? Naverloglogiano, juñabe? Vonganei ga napano kito roju yako, kulo Ju nalo amila vio toru laka ka ajidom atubabinso kañaro, mia vonganei ana jau koberinavo mia kito ravan bereio.”

<sup>9</sup> Ana Yesu naio ber ka kumemi naio berinavo “Kiaku verdoŕeiano ban kamiu naio jibe nei: Ea legiano, ea aura duelimo ba juo nene, burum̃ara inio mereralii vio, mila na toro mijikia miel bo, maka tom̃a rijorjoru taatei. <sup>10</sup> Mia toro napano mila von ka riel ea melijokouo bogiano, mia naio to rijorjoru, bior napano inio nene maka bunu mereralii kiano m̃arabo.”

<sup>11</sup> Yesu naio ber iliano nei ban kumemi, berial ka naio mijikia riel rivu ga, maka jikia vite tai na bova eaio, vano-o vokar bogo na Atua berkar ruei ka mia ajikia auebinio. Naruei naio jusol bereio, berinavo “Kiado bilbilu neibano naio monmelio ruei. Vonganei, kito ravan ka novio bonio.”

<sup>12</sup> Mia kumemi naiagagoano nalo maka nuvijikia lubar nioti na iliano nei, naruei nuberinavo “Tubo, ver naio monmelio ga, nina bo ga na, mia naio rijog rivu bereio ga.” <sup>13</sup> Nuber jibe na bior ka napano numitu nuberiaña Yesu naio ber ka Lasaros naio mijilimebi ga, mia Yesu naio ber Lasaros kiano m̃ariano.

<sup>14</sup> Naruei Yesu berial meravo ban kumemi, naio berinavo “Lasaros naio m̃aro ruei, <sup>15</sup> bior bogo na naio mie, maka noto vijalo. Mia jibe na kiniou nemial mia rivu ga, ŕeli rivu lie van kamiu, bior kiano m̃ariano na mia rimeĩ tibe ka kenemiu buluvio tai, ka kuvijikia kumonea kiniou ve riano. Mo, kito ravan eaio.”

<sup>16</sup> Mia kumemi naiagagoano nalo numituña numerou ka nuvano, naruei Tomas m̃a na abio naio ka Tomas Savoro, naio ber ka kumemi, naio berinavo “Kamiu kuvitumolu, kito rovinu ravano, kiado Tubo naio jidom riva riñaro tibe na, bo ka kito rovinu ravano, rañaro vaarakurano kitoliko naio.”

<sup>17</sup> Naruei kumemi nubiniu numiel nubano, nubano numiyotuba ea komeli telisu na Betani. Ana aberial ban Yesu ka amidu Lasaros taati monea buluvae bogoti ver barlaka ruei. <sup>18</sup> Mia komeli nei Betani naio jo vaataro ga ka komeli labo

nei Yerusalemo, titai jibe ka kilometa tolu ga, <sup>19</sup> mila na kulo Ju nalo na Yerusalemo nalo telabo, bogo na amijog m̃ariano nei, tiniel miia Marita naljuo Mere toru, naruei abinimei ka ateg naio vijalo. <sup>20</sup> Mia Marita naio jo naliko, ana amiila toru binimei ban naio aber Yesu binimei joa m̃arabo ruei, naruei naio jumolu ban ka rivan juñano naljuo naio. Mia kuluene neibano telisu Mere naio jo joomo ga ea yimo, a naio maka rivatavio. <sup>21</sup> Mo Marita, naio binimei mial Yesu, naio berkanio, berinavo “! Kanaku Tubo liki, ver jau komei ea vio nei ga, mia kuñanememi riva kovio re na! <sup>22</sup> Mia kiniou nomonea ka be kurano ka napano naio m̃aro, mia venia na ver jau kovika den Atua, mia naio rijamo ka ga vanso.”

<sup>23</sup> Ana Yesu berkanio, berinavo “Marita, mia kuñanemo naio tumolu rimeul bereio na.”

<sup>24</sup> Naruei Marita berdoŕeio berinavo “Ee, kiniou nemijikia nina, nemijikia ka mia rimeul bereio ea burum̃ara tumoluanano bereio ea legiano na maaro.”

<sup>25</sup> Ana Yesu berial iliano nei kano, naio berinavo “Kiniou nebe m̃arabo na tumoluanano bereio, kiniou nebe burupati na meuliano. Toro na rimonea kiniou, buriakurano naio monoka riñaro ea yetemeriba nei, mia naio rimeul bereio. <sup>26</sup> Toro napano rivokar meuliano nei, a viekouoiano ea kiniou toa naio, naio mia rivokar re m̃ariano bogo tai. ?Marita, jau komonea jibe na a?”

<sup>27</sup> Ana naio berdoŕe, berinavo “Aiou, Tubo, nomonea. Kiniou nomoneaso, ka jau kobe Naverikariano, jau kobe Atua kenerinio, jau kobe naio nam̃a aber jikar beamu ruei ka mia rimeĩ rilarur tomu nalo na yetemeriba nei.”

*Yesu, jogumirano jibirbili*

<sup>28</sup> Telikiti na Marita ber jibe nei ka Yesu avona bisi, ana naio milivi joomo bereio, ban ka kuluene nei Mere, mijuvaluva banio, berinavo “Naverloglogiano nene, naio binimei ruei, naio joa m̃arabo yako, naio jidom rialso beamu vo.” <sup>29</sup> Mere mijogio, naruei jumolu vaarakurano, jidom ka rivatove ka rial Yesu, <sup>30</sup> nina rove ea m̃arabo napano Marita mial naio ruei eaio, bior ka napano naio maka rimeĩ jouro ea komeli vo. <sup>31</sup> Mia kulo Ju nalo napano aju bija Mere joomo amial ka naio jumolu soŕeli jibe na batavio, naruei ve tiniel ka naio jidom riva teg bereio ea buluvae, naruei nalo bunu ajumolu ajakisorio.

<sup>32</sup> Ana Mere naio miel binimei bokar vio na Yesu joaio. Ana bitikario, binimei vaataro kano, buku naio mijoru ea jaano, jegi banio, berinavo “!Tubo, ver jau komei

ea vio nei ga, mia kumāneku riva kovio re na!”

<sup>33</sup> Mia naio jomā jegi jibe na, a kulo Ju dolu nalo napano mā ajakisorio, nalo bunu abinimei ajumā jegi. Mia telikiti napano Yesu naio mial Mere nalo kialo burumāra jogvaiano nei, naio bunu mijog bova, mijog tenei jibe ka temi laka ea kiano iviso, <sup>34</sup> ana naio bika denlo, berinavo “? Kamiu kumidu naio mon be?”

Ana nalo aberinavo “Tubo, jau komei rava raialio.”

<sup>35</sup> Mia Yesu mijogio jibe na, mila jogumi-rano jibirbili.

<sup>36</sup> Mia nalo amial ka naio jegi jibe na, tealo aberinavo “!Ierinio, naio tinien jii tanea kiano bilbilu nei, naruei naio tinien miāio mia tinienmiāio!” <sup>37</sup> Mia tealo dolu nalo,aju abivika denlo, aberinavo “Toro na naruei nanua beamu naio mila na merebono mirano binimei bo bereio. Peli verenio naio sidom, naio mijikia rila ka napano kiano bilbilu naio maka rijikia rivakovio ga peli?”

*Yesu naio biobon Lasaros jumolu den māriano*

<sup>38</sup> Mia Yesu naio miel ban bija burumāra jogvaiano nei, naliko Mere nalo aba amiyotuba ea buluvae napano Lasaros taati mon eaio. Bulukuveru nei naio be buluvae tai, napano amidu burumāra puruveru tai joko buluku tavo nene. <sup>39</sup> Ana Yesu naio berinavo atubonlar puruveru na toru nei.

Mia Marita naio mijog Yesu ber atubonlar puruveru, mia naio jidom riverbureio, ber kano, berinavo “Tubo, maka rivu ka rala tibe na, bior naio māro bogoti ver barlaka rui, mia bonoti rivova laka na.”

<sup>40</sup> Ana Yesu berdoŕe banio, berinavo “? Ee, jau maka koto ŕniemo rimaio vo ka kiaku iliano nei napano neber ka jau rui? Kiniu neber na ver jau komonea ga, mia keial moroano na Atua kiano naio rimāu.”

<sup>41</sup> Ana ajidel ka ga, ajubonlar burumāra puruveru nei, bisi ana na Yesu naio jirarag bavin mave, naio bolkouo, berinavo “Teta, kiniu neber siva toru banso ka napano jau kajaaro ka mā komijog kanaku valeiano nei. <sup>42</sup> Kiniu nemijikia ka venia napano ver kiniu nesidom nevika denso, mia jau kojogio ga. A vite nei mia kiniu nevika denso vonganei, nebika ea tomu nalo nei ajumol aju miralo, ka nalo bunu ajikia ajogio. Naruei ver aial ka napano mia jau koverdoŕe rivan kiniu tibe ka na nobikano, mia rijikia rijailo ka amonea ka be riano ka napano jau naruei komiila kiniu nebinimei ea yetemeriba nei.”

<sup>43</sup> Mia telikiti napano Yesu bolkouo bisi jibe na, ana naio bio jikili jibe na ba

ban naio berinavo “Lasaros, jau kotumulou komei tavio.”

<sup>44</sup> Naruei amillo ka napano toro na māro nei naio jumolu miel binimei tavio, bija kulumārauo napano abiviko ka naio, napano mā ajumā ajarakii lele gorogoro ea jumāno a jaano a parinio kia ga vo. Naruei Yesu naio ber kalo berinavo “Mo, kamiu kuvijubar bulag kulumārauo nalo nei denio, ka mia mijikia riel rivu bereio.” Ana nalo amilaio, naruei Lasaros naio meul bo naio jo naliko bereio.

*Komeli na toru naio birokar ka monoka auebin Yesu rimāro*

*Mataiu 26:1-5; Mak 14:1-2; Luka 22:1-2*

<sup>45</sup> Mia kulo Ju nalo telabo napano ajakisior Mere abinimei ea bulukuti puruveru nei, telikiti napano amial ka napano Yesu naio mila Lasaros meul bereio jibe na, amonea batitig naio bo. <sup>46</sup> Mia nalo tealo maka amoneaio, aban bereio, aba amial Varisis nalo, aberial kalo ka venia napano Yesu milaio. <sup>47</sup> Ana telikiti na amijogio, maka lele asaaro kano, naruei nalo bija tomu na tortoru na kulo lu nalo, abio nalo dolu na burumāra komeli na kulo Ju abinimei vio takurano. Naruei telikiti napano abinimei vio takurano bisi, aberial kalo aberinavo “? Mia kito rala venia ka toro nei naruei? Naio jomā mimāuka burutomoluo na tortoru telabo janea vio ea kiado tomu nalo miralo. <sup>48</sup> Ver kito roverbure re naio, mia naio rila tibe na rivano-o mia ve re tai napano mia rimonea naio, mia naio rivuru nonovlo atakisior naio ga. A ver nalo na mira na vio Romo aial tete na naio jomā mila von ka rila naio rimei rive navurimāraoboiano na toru tai tibe na, mia ala siniabu ka kito kulo Ju rovinu. Mia amei ala mira ka kito-o mia auelar kiado taara kito rovinu vija kiado Atua kunuano lu.”

<sup>49</sup> Ajumā aber jibe na, mia kialo navurimāraoboiano na toru nei Kaivas, napano ka yuka nei naio bokar sio na Parinio Toro Lu, naio ber kalo, berinavo “?Tomnei, bior venia ana kube vovu jibe na, ka napano maka bunu kuvijikia ka mia kito rala venia ka toro na? <sup>50</sup> ? Venia naio bo ka kamiu? Bo ka napano toro na ve takurano rila kito rovinu rava kovio, peli na bo ka naio ga ve takurano rimāro ka rilurur meuliano na kiado taara rovinu?”

<sup>51</sup> Mia ea bogo napano naio ber iliano nei, beriamā jomā berial kiano jidomiano ga. Atua mila naio bokar imāuano na Parinio Toro Lu ka bogo na, mia Atua kiaga vo naio midu iliano nei joa kiano jidomiano ka naio riverial iliriano tai, ka ver Yesu naio monoka rimāro ka rilurur tomu nalo kialo meuliano aviniu. <sup>52</sup> Naio maka

ríjikia, mia naio jo berial ka iorou kanio, telikiti napano mia Yesu naio riñraro, mia naio maka riñraro rivior taara na kulo Ju nei ga, mia kiano mñariano nei naio kario Atua kenerinio dolu nalo napano aju janea buruvenuo dolu bunu, ka mia rivuru birovionlo aviniu amei ave mñaratavo ve takurano.

<sup>53</sup> Mia ea bogo na, Kaivas naio berial iliano nei, naio buru tomu na tortoru na kulo Ju nalo kialo jidomiano nonovio naruei, ka Yesu monoka riñraro ga. A jikar ea bogo na, ajuña aberii damariga, ka mia ajikia ala tuñabe. <sup>54</sup> Mia kialo jidomiano nei mila na Yesu maka bunu rijikia rieliel iviso ka tomu nalo na tanobuku nalo nei na Yutea, ana naio buru bulag kumemi nubano numitua komeli na telisu tai, siano Ivraem, napano naio jo yako ea tanobuku napano vaataro ka vio teauo.

*Vaataro ka bogo na Jokoluolu na Sidomkariano na Ioruriano na maaro na Yesu kiano*

<sup>55</sup> Naruei be vaataro ka bogo na jokoluolu na kulo Ju nalo kialo, napano be Jokoluolu na Sidomkariano na Ioruriano. Ana kulo Ju nalo napano ajua tanobuku dolu ninio, ajuña ajuvan kialo vio nalo abavin Yerusalemo, ajidom avan ea Atua kunuano Lu, amila sida na meravoiano nalo ka mia ajikia ameravo ea Atua mirano beamu vo, karina jokoluolu naio tikario. <sup>56</sup> Telikiti napano tomu nalo nei ajuña abavin ea Yimo Lu, ajuña amila von ka ajirag Yesu-o mia maka alealio. Ana ajuña abivika denlo, aberinavo “? Ee, kamiu kuber venia? ? Mia ver naio riyotuba ea jokoluolu nei, ðeli na naio rimei re?” <sup>57</sup> Naruei parinio kulo lu nalo bija Varisis nalo, nalo bunu ajuña ajidom ka ðeli mia Yesu rilavon ka riyotuba ea bogo nei. Naruei nalo aberial jikili ka ver aial Yesu to kovio na, monoka ala iliano rimei ealo ka amijikia amei avokakar naio sikili.

## 12

<sup>1</sup> Mia telikiti napano Jokoluolu na Sidomkariano na Ioruriano nei naio maka vo, bogoti ari ju, ana kumemi liko Yesu nubano nubokar bereio komeli na telisu nei Betani. Naruei nubano numiyotuba bereio ea Lasaros kiano vonuo, naio napano Yesu nanua mila meul bereio den mñariano maka vesiou ga. <sup>2</sup> Kumemi numitu bijalo jibe na bano-o, ana nalo nei aber ajidom ala Yesu sano sinaniano tai. Ana telikiti na amila batitig vite nalo binu, kumemi nubinimeí numitutano, Lasaros bunu jotano bija kumemi, naruei

kuviviniene nei Marita naio joña barvar simemi sinaniano binimeí. <sup>3</sup> Naruei Lasaros kuviviniene dolu nei Mere, naio bunu jo, naruei naio midu buruñara pati bonotanunu tai binimeí, napano jibe mñatei, napano kidi nene bavín laka. Mo naio miduio, naio binimeí vaataro ka Yesu, naio mionio jelele Yesu jaano nalo. Karina Mere nene bar burutiltili vijinio, naio miolkon bereio, mia maka vesiou, bonoti bonotanunu novo nei janunu misono batitig vio joomo ea kunualo nei.

<sup>4</sup> Ana ka bogo na, Yesu kiano naia-gagoano napano iorou kanio ana naio jiveluku ka naio, Jutas na Kariot, naio bunu jo mial vite nei. <sup>5</sup> Naio berinavo “? Bior vaio ana maka avilivillilar ka buruñara bonotanunu nei ga? Ver tibe na, amijikia avokar buruñara veru tai tibe ka veru na imñauano na yuka ve takurano ka rijai talimasa nalo. !Mila kule ga na!” <sup>6</sup> Naio ber jibe na, mia naio maka sidomial talimasa nalo. Naio ber jibe na bior naio naruei joña bitikar kenememi basaro na veru, a joña bina kanio, joña jen kenememi veru, mila naio be viti bunu ka veru na bonotanunu nei.

<sup>7</sup> Mia Yesu berdoþe venia napano Jutas berenio, naio berinavo “Ee, maka rivu ka jau keil niegeniege kuviviniendo tibe na. Naio mila jibe na ban kiniou bior napano naio jo jidom mñelea ka napano bogoti na mia navan ea buluvae jo binimeí vaataro laka naruei. <sup>8</sup> Mia ve talimasa nalo atu vija kamiu bogo nonovio, na mia kamiu kumijikia kuvijailo tibe na, mia ka kiniou maka nejikia noto vija kamiu bogo nonovio, mia venia napano naio milaio ban kiniou vonganei naio bo ho laka mia.”

<sup>9</sup> Ana maka vesiou, lilianiano naio ba bokar tomu nalo napano aju amidu bijiilo yako Yerusalemo bior jokoluolu, ka vonganei Yesu naio binimeí jo Betani ruei. Mo nalo abatavio ka aialio, a maka ve naio ga, mia ajidom aial Lasaros bunu, nanua Yesu mila naio meul bereio den mñariano maka vesiou. <sup>10-11</sup> Tomu nalo aju aba amial Lasaros jibe na bisi, a venia napano Yesu mila banio mila napano nalo telabo kalo, ba bokar kulo lu na kulo Ju tealo, aburo ajuvan kialo navurimñaraboiano dolu nalo abinimeí amonea Yesu. Ana ka tena, tomu na tortoru na kulo lu aberiio, abirokar ka mia aleal mñarabo tai ka ajikia auebin Lasaros riñraro bo.

*Yesu naio binimeí boru ea vio nei Yerusalemo*

*Mataiu 21:1-11; Mak 11:1-11; Luka 19:28-40*

<sup>12</sup> Mo Lasaros nalo amila Yesu sano sinaniano nei bisi, ana ka legiano dolo nene, iliano ba bokar buruñara tiniobi nei napano aju Yerusalemo bior jokoluolu, ka vonganei Yesu naio jo binime rui. <sup>13</sup> Mo tomu nalo amijogio, ana nalo ajumolu aba aje m̄arñali nalo, abarkakar ka juñalo nalo amieli abadigdig aba tavio ka aviviuo naio ko m̄arabo.

Ajidom ka ala rivan naio tibe na ka napano naio rimei ve kialo parinio tubo, naruei nalo aba tavio jibe na, ajuñña abiovio, aberinavo

*“!Bo mia bo laka! !Kito ravamenea naio, be kiado parinio tubo vou na Israel!*

*! Atua soñi, jau keilivu ka naio napano binime ea siamo!” Iouano 118:26*

<sup>14</sup> Ana Yesu naio jo miel binime, naruei milalo aburu kirikiti togki tai binime banio, ana naio jotano eaio miel binime. Vite na napano naio mila na naio jakii memedu iliano na Iliano Lu tai napano berinavo

<sup>15</sup> *“Kamii kulo Yerusalemo nalo, kamii kumerou re bunu.*

*Kuvialio, vonganei kenemiu parinio tubo naio jo binime ea kamii naruei.*

*Naio joa kirikiti togki ga tai naio jo binime.” Sek 9:9*

<sup>16</sup> Ana ea telikiti na, kumemi naia-gagoano na Yesu kiano, kumemi maka nuvisidomialo iliano na, mia iorou, telikiti napano naio bavin mave bisi, kumemi nubitilubar ka iliano moruo re nua nei naio berial naio memedu, ka napano naio mila vite nonovio memedu ga ka venia nañña Vivitauiano Lu aberialio beamu ka mia Naverikariano naio rilailo.

<sup>17</sup> Naruei tiniobi toru nei aju aborvorua Yesu jibe na. Nalo miroano napano naniovo ga aju bija naio telikiti na naio bio Lasaros meul bereio den m̄ariano, ana aba aberial buruñara burutomoluo nei ban nalo dolo nalo. <sup>18</sup> Mia telikiti napano kulo dolo nei amijog burutomoluo nañña Yesu milailo, nalo ajidom aial naio, naruei abinime bunu ka ava aviviuo naio. <sup>19</sup> Ana nalo nonovio nei, abe buruñara tiniobi rui, mia bogo napano Varis nalo amialio, amijog bova, ajubar parilo, aberinavo “Kito romila vio ka kema nao-o mia bova ga. Naio jovulu batitig kito ga, naio buru yetemeriba vodolu ga ajakisor naio rui kiana.”

*Kulo Krik tai ajidom aial Yesu*

<sup>20</sup> Tomu nalo miroano nañña abavin Yerusalemo ka alotu ka Atua ka jokoluolu nañña, a nalo tealoo maka ave Ju, nalo abe kulo Krik nañña amonea Atua javukia kulo

Ju nalo. <sup>21</sup> Mia telikiti napano nalo nei ajuñña amijogjog mugaruei sio nei Yesu, naruei ajidom aial naio. Naruei aba ajiragio, amileal kiano naiagagoano nei Vilip napano be tena Betsaeta yako Kalele, ana abika Yesu denio. <sup>22</sup> Ana Vilip ba berial ka Andru, karina naljuo aba aberial ka Yesu.

<sup>23</sup> Ana bogo napano Yesu naio mijog ka napano nalo nei bunu napano maka ave kulo Ju ajidom aial naio, naio berial berinavo “Vonganei, be aura nene memedu ka Atua rila kiniou Kulorinio Kenerinio siaku rivavin. <sup>24</sup> Kiniou neber be riano ban kamii, ka ver kurukuti tai, ver amebija re, mia naio ve takurano to kurano ga tibe na. Mia ver amebijao, mia naio rimei menunu, mia karina mia naio rivar m̄arati ve telabo bereio. <sup>25</sup> Jibe nei, naio napano jidom m̄lelea kiano meuliano na yetemeriba nei loa ka napano naio jidom kiniou, mia rila luvuo, mia naio nañña maka sidomialo lele naio, mia naio to rivu ga rivano-o rivokar meuliano vou napano maka ve jukuti nene. <sup>26</sup> Toro Ju ðeli na toro Krik nañña ber jidom riñau kiaku, jidom riija kiniou, naio monoka takisor kiniou damariga. Mo ver naio to takisor kiniou tibe na, mia vio vabe nañña nava notoa, mia naio bunu mijikia rivija kiniou. Toro nañña be kiaku naim̄auano, mia Atua sian sio na bo van naio.”

*Yesu berii kiano m̄ariano*

<sup>27</sup> Mo Yesu naio jikar ka jidomii ka napano vesiou re, mia naio monoka riñaro, naruei naio mijog deio ea kiano iviso. Naruei naio berinavo “Vonganei, kiniou namijog jidomiano niukniuku joomo ea kiniou. ? Mia kiniou never venia rivan karanñaku? ? Bo ka kiniou novolkouo, nevika den naio, neverinavo: Teta, aiou jau kovurular kiniou den aura na bogokouo nei? Mia maka rivu ka neber tibe na, bior kiniou nebinime ea yetemeriba nei kar iñauano nene ga na. <sup>28</sup> Makanio, mia kiniou neber jibe ga na, neberinavo: Teta, aiou jau kala siamo rimei ve toru riano ea venia napano mia ala ka kiniou.”

Naruei telikiti napano Yesu naio ber iliano nei bisi, niono tai na mave mil batove berinavo “Kiniou nojo namila siaku bavin easo rui, a mia kiniou nala bere navo.”

<sup>29</sup> Ana tiniobi nalo napano m̄ña aju vaataro amijog jooa na niono nene, mia nalo tealoo aber nina be tubaal tai ga, a nalo tealoo aber “Makanio, nailiano tai na mil banio.”

<sup>30</sup> Naruei Yesu berial kalo, naio berinavo “Niono nei napano kito romijogio vonganei, naio maka rimei ka kiniou nejogio,

mia naio binimeí ka kamiú, ka kamiú kuvijikia ka kiniou nebinimeí be. <sup>31</sup> Monoka tibe na bior ka napano vonganei be bogo na tibureiano na yetemeriba, be bogo na avukular parinio tubo simaro na yetemeriba naruei. <sup>32</sup> Ka kiniou nala inãuano na, mia monoka kiniou natakilele mave ea m̃akolkolo, mia bogo napano noto mave tibe na, nomijikia novuru nono tomu nalo aviniu amei ea kiniou.”

<sup>33</sup> Ana Yesu kiano iliano nei, naio bere-nio ka rila rimeí rimeravo vanlo ka kiano m̃ariano naio ve m̃ariano na jum̃abe. <sup>34</sup> Mia bogo na tiniobi nalo amijogio, aberinavo “Kumemi numitum̃a numijog ka nam̃a abuluku Vivitauiano Lu, ber ka mia Naverikariano mia naio rimeul toboto, mia rijikia re rimaro bogo tai. ? Tibe na, jum̃abe jau kojo kober ka mia atelan Kulorinio Kenerinio mave ka naio rimaro? ?Vede jau kojom̃a kober toro dolu tai ga kovio? ?Kei Kulorinio Kenerinio na nam̃a jau kojom̃a koberenio, kober ka mia tibe na kanio?”

<sup>35</sup> Naruei Yesu berdoŋe banlo, naio berinavo “Kiniou nebe yulu na Atua kiano, na nomijikia noto lie vo vija kamiú bogo ve telisu bere vo. Mia bogo napano noto vija kamiú, bo ka kamiú kuvitum̃a kuviel ea miamoiano nene, ver ŋeli, mia melijokouo sovoko kamiú, a toro napano jom̃a mila von ka riel naio rijikia re bunu rivitilubar kiano m̃arabo. <sup>36</sup> Telikiti napano kiniou burupati na yulu nojo kia ga bija kamiú, bo kamiú kumonea kiniou, ka kuvijikia kumei kuve tomu na miamoiano.”

Mia bogo na Yesu ber iliano nalo nei bisi, naio juvanloaju, naio ba jo luku ea vio tai napano ajikia re amei bunu rivior naio eaio.

*Kulo Israel maka asidom amonea Yesu*

<sup>37</sup> Yesu minãuka burutomoluo na tortoru telabo ea miralo ruei, mia be iakurano maka asidom amoneaio ga. <sup>38</sup> Kialo bajago na, amila bereio javukia ga nanua m̃a kulo moruo Ju re nua amila ka bogo na naverialiano Aisea, napano naio beriio ea kiano iliano juo. Tai naio ber jibe nei, berinavo

“? Atua Soŋi, kumemi numitum̃a nuber bulavulagio banlo, mia nalo maka asaaro ka amoneaio,

a jau kobisipe moroano na jum̃amo banlo, mia kei kalo naio rivitilubarío? Maka tai!” Ais 51:1

<sup>39</sup> Mia dolu nene, naio bunu ber kalo ka maka ajikia amoneaio, naio berinavo

<sup>40</sup> “Atua jidel kalo banbano-o mia deio ga, ana naio mila miralo nalo abe merebono,

naio mila kialo iviso nalo abinimeí jikili laka.

Mia miralo nalo ajikia re bunu aial vite, ana kialo iviso maka ajikia ajoglubarbar vite.

Ver ŋeli, mia aviliglo amei bere ea kiniou ruei, ka mia kiniou neielielilo.” Ais 6:10

<sup>41</sup> Mia Aisea kiano iliano nei binimeí ea naio, iorou ka napano naio mial mi-amioano na Naverikariano joomo ea Atua Kunuano Lu, mia vonganei kito romial ka naio berií Yesu memedu, bija nalo na ea kiano bogo.

<sup>42</sup> Mia jibe ka nam̃a iliano nei berenio, telabo maka amonea Yesu, mia tai amoneaio, ba bokar kialo navurim̃araboiano tealó. Naina bo, ana vite tai naio bova, ajum̃a amila vavanlo ka amoneaio, bior amerou ka Varisis nalo, amerou ka tibe m̃a na mia avuku bulaglo den kialo yimo na volkouano. <sup>43</sup> Nalo amerou jibe na bior napano maka bunu asidomii ka ala vite napano mia Atua rijikia saaro kalo riviorio, mia ajidom ga toru ka mia kulo dolu nalo aialo tum̃abe.

<sup>44</sup> Ana Yesu naio berial burum̃ara ili-maariano tai ea kanano tomu nalo miralo, naio berinavo “Naio napano monea kiniou, maka rimonea kiniou ve takurano ga, mia jibe na naio monea kumemi juo naio napano miila kiniou nebinimeí, <sup>45</sup> a naio napano jom̃a mial kiniou, jibe na naio jom̃a mial naio. <sup>46</sup> Kiniou nebinimeí ea yetemeriba nei, jibe ka kanano yulu, ka rila ka napano toro kei na rimonea kiniou, mia naio toa re melijokouo. <sup>47-48</sup> Mia ver tealó ajog kanaku iliano, naruei nalo ajogkar re, ŋeli ver tealó ailuke ka kiniou maka asidom ajog kanaku verloglogiano, nalo na mia avar kanalo tibureiano nalo ea Legiano na maaro. Ea bogo na, ve re kiniou napano mia notumolu netiburelo, bior kiniou maka nemei ka netibure tomu nalo na yetemeriba nei, mia kiniou nebinimeí ka nalarurlo, mia vite napano mia tiburelo, nina be kanaku iliano napano neber kalo ka bogo napano nojo bijalo kia ga vo. <sup>49</sup> Kanaku iliano mijikia rila tibe na, bior ka bogo napano nojom̃a naberial iliano nalo na, maka neil ea siaku kiniou ga ve takurano, mia nemil ea Teta siano napano naio miila kiniou nebinimeí yetano. Naio ga berial batitig ban kiniou vite nonovio na monoka neverialio, <sup>50</sup> naruei jibe na, dam̃ariga kiniou notom̃a never vite nonovio napano Teta naio jidom ka neveriio. A kanano tuboiano nalo na, namijikia ka be meuliano na bo nei napano maka ve jukuti nene joalo.”

## 13

*Beni be Yesu kiano bogo na maaro na meuliano, naio jekon kiano naiagagoano nalo jaalo*

<sup>1</sup> Vonganei, vite nonovio ju batitig ruei, beni ga naruei ana ve buruñara legiano, napano Jokoluolu na Sidomkariano na Ioruriano naio tikar eaio. Naruei Yesu naio jo bitilubar ruei ka kiano bogo binime, legiano na beni ga be kiano bogo na naio monoka tuvan yetemeriba nei ka rivavin mave ea karamano. Binime bokar bogo nei, ea ñarabo telabo, naio bijuku bo laka ban nalo na abe kanano napano ajua yetemeriba nei ruei, naio tinien jillo toru laka, mia vonganei be bogo na naio tinien riialo lie vo, rivano-o rivokar napano mia kiano meuliano rivakovio riviorlo.

<sup>2</sup> Naruei naio jo kumemi liko kiano naiagagoano nalo ea vio mave, naio jo mila sano sinaniano na maaro kumemi liko. Mia Jutas na Kariot, tormoruo Saimon kenerinio, naio bunu jo kumemi liko kia ga vo ea bogo nei, naio jo bija kanano tiniekakariano ka mia tiveluku ka Yesu, ka na Simaro midu joa tiniene ruei. <sup>3</sup> Kumituña numisinin banbano-o mia Yesu jo tinien maio ka jumabe ka beamu, naio jaluvo den Atua naio binime yetano, a jumabe ka napano vonganei Atua bar vite nonovio jua jumano, a tumabe ka napano mia naio monoka tovulio, karina mia naio mijikia taluvo den yetemeriba nei ka rivavin bereio mave ea naio. <sup>4</sup> Naio mijog ka buruñara tinietiano ea naio ka kumemi kanano naiagagoano nalo, a naio jidom ka rila burutomoluo tai ka tinietiano nei van kumemi. Naruei naio jumolu, ba miyalar ñano kulukoti, jukulou ka iolkoniano tai, <sup>5</sup> midu baju na uei tai, midu binime, ana naio jikar ka jekon jaamemi nalo, naio mila jibe ka naio be kenememi toro na inñauano tai. Naio jomña jekon jaamemi jibe na bano-o, ña miolkonlo ka iolkoniano napano naio jomña jukulou kanio, <sup>6</sup> banbano-o na binime bokar Saimon Pitere jaano. Mia Pitere jo mial ka napano binime bokar naio, naruei naio ber kanio berinavo “?Tubo, venia na? Jau kobe kenememi toro na toru, maka rimemedu ka jau kesekon jaaku tibe na.”

<sup>7</sup> Mia Yesu berdoþe, berinavo “Pitere, venia napano kiniou nojomña nemila vonganei, jau maka kovitilubar vo. Mia iorou kanio ga mia jau kejkia vatitigio rivu.”

<sup>8</sup> Mia Pitere naio jo jidom riverbure Yesu kija vo, naio berinavo “Makanio Tubo, najamo ka lele re so ka kesekon jaaku.”

Ana Yesu naio berinavo “Ver kiniou nesekon vatitigio re, maka ve kanaku titai toaso.”

<sup>9</sup> Naruei telikiti na Pitere naio mijog ninei, kiano jidomiano be dolu kija, naio ber ka Yesu berinavo “!Tubo, ver tibe na, najamo ka ga, nejidom ka jau kesekon kiniou maka ea jaaku ga, mia ea mokotenaku reraio, riva rivokar bunu jaaku a pariku!”

<sup>10</sup> Ana Yesu berdoþe ban Pitere ea jamer-ijiano sesa tai, na berial jumabe na toro naio meravo ka kiano kariano. Naio berinavo “Toro napano mijeliou vonga, niabene reraio meravo nonovio ruei. Ana ver jaano riagiago bereio, mia naio maka rijikia riva rijeliou nonovio bereio, mia naio sekon ga jaano. Mia kiniou nemial kamiu kumitibe na. Kamiu kumeravo nonovio bo ruei, mia kamiu tai ga maka tibe na, naio miagiago dolu ga jo.” <sup>11</sup> Mo Yesu naio ber jibe nei, ber maka nuvinu napano numeravo, bior ka napano naio mijikia ruei ka kumemi tai napano mia vesiou re mia naio tiveluku ka naio.

<sup>12</sup> Naruei Yesu jekon Pitere jaano bija kumemi dolu nalo-o bisi na ba miya ñano kulukoti bereio, jotano ana bika den kumemi, naio berinavo “?Kamiu kubitilubar inñauano na namila ban kamiu na, þeli na makanio? <sup>13</sup> Vite na naio jibe nei. Telikiti namña kubio kiniou kuber Naverloglogiano þeli na Tubo, kamiu kumituña kuber riano ga na. <sup>14</sup> Mia ver kamiu kumial ka napano kenemiu Naverloglogiano þeli na kenemiu Tubo naio jekon jaamiu, bo ka kamiu bunu kuvituña kuvisesekon jaamiu nalo, kamiu kuvilala bajago novo nalo tibe na ea kamiu bogo nonovio. <sup>15</sup> Kiniou nemila jibe na ban kamiu ka mia kamiu kuvue jaaku ea legiano nalo na ju binime kiana, ka mia kamiu kuvila bereio van kamiu tibe ka na kiniou nemila ban kamiu ruei. <sup>16</sup> Kiniou neber riano ka kamiu, ka toro na inñauano naio maka to loa kiano tubo, þeli na toro na midu iliano naio maka to loa nana mila naio bano. <sup>17</sup> Mia verenio kamiu kumijikia ka kanaku iliano nalo nei abe riano, a ver kamiu kuvituña kuvila venia napano ña neberenio, mia buruñara ilivuiano ve toru laka rime rivan kamiu iorou.”

*Yesu berial ka mia Jutas rivar bonbonua naio*

*Mataiu 26:22-25; Mak 14:17-21; Luka 22:21-23*

<sup>18</sup> Ana Yesu berenio “Kiniou neber jibe na, mia maka never kito nonovio, bior kito tai naio jo, napano kiano jidomiano bilig be dolu ruei. Ierinio, kiniou nemijikia batitig kamiu kubiniu napano nebijaia

bulag kamiu, mia kiniou nemijikia ka mia kamiu tai naio rila rimemedu ga takii napano Vivitauiano Lu berial nua ruei, napano ber jibe nei, berinavo

*Naina mia kumemi ve juo nuvisen bitiran saku joko,*

*naio mudular buruŋeiano ka rivuta davalara ka kiniou ruei. Iouano 41:9*

<sup>19</sup> “Vite na kirivova tai vo mia kiniou nejidom neverial ka kamiu beamu, naruei bogo napano mia kamiu kuvialio iorou kano, ana vesiou re mia kumijikia kumoneaio ka kiniou nebe riano, kiniou nobe naio napano jobo jo. <sup>20</sup> Kiniou neber riano ka kamiu, toro naŋa mila ilivorvoruano ban toro naŋa midu kiaku iliano napano naŋa nemilaio, naio javukia napano naio mila ilivorvoruano ban kiniou, a naio naŋa mila ilivorvoruano ban kiniou jibe na, naio jibe ka napano naio mila ilivorvoruano ban naio napano miila kiniou nebinimej.”

<sup>21</sup> Yesu ber iliano nei ban kumemi bisi, ana naio jikar ka mijog ka napano kiano iviso bujo ka jidomiano na temi laka, banbano-o karina naio berial meravo ea mirememi, berinavo “Ierinio kiniou neber ka kamiu, mia kamiu tai tiveluku ka kiniou.”

<sup>22</sup> Mia bogo napano naio ber jibe na, kumemi numiilo, numitumŋa nubiti kumemi jeliviv bereio, maka nuvijikia ka naio jo ber kumemi na vabe naruei.

<sup>23</sup> Ana ea bogo na, kiniou Jone, jibe ka naiagagoano tai napano Yesu tinien jii kiniou mŋelea, nojona nojotano vaataro lie ka naio, <sup>24</sup> naruei Saimon Pitere mil ka jumano ban kiniou, berinavo “Ai koig, jau kovika vatitigio bere vo, kover naio joŋa ber kenia.”

<sup>25</sup> Naruei nemijian kiniou telisu, nemijian paripariku ba vaataro ka Yesu, nemijuvaluva banio, neberinavo “?Tubo, jau kojona kober kumemi kei?”

<sup>26</sup> Ana Yesu berdoŋe, berinavo “Kiniou nojona neber ga naina napano niati joko sesa nei, kiniou nejiti ka vaatei, karina nejian banio.” Naruei naio mila jibe ka ga nanua naio berenio, naio midu niati joko sesa tai, naio jiti ka mememi vaatei, bisi na naio midular jian ban Jutas tormoruo Saimon na Kariot kenerinio. <sup>27</sup> Mo Jutas midu jenio, mia ea bogo nene ga, Siŋaro bunu naio binimej ba joomo eaio. Ana Yesu berkan naio berinavo “Jau, venia napano kojidom kala, jau kavan soŋeli kala beamu vo.”

<sup>28</sup> Mia ka kumemi dolu nalo napano naŋa numitutano ea sinaniano nei kumemi liko Yesu nene, maka ve kumemi tai napano

naio rijikia bior venia ana Yesu ber iliano nei ban Jutas. <sup>29</sup> Kumemi tealo be tinielo ka Jutas naio bitikar kenememi basaro na veru, tenene na Yesu miila naio ban ka rivulu sinemi sinaniano, ŋeli na ba bar veru ban taliŋasa nalo, ŋeli na titai na jibe na. <sup>30</sup> Mia Jutas naio mijikia batitig venia napano Yesu berkanio, naruei ka bogo nei ga napano naio midu joko sesa nei bisi, kolvare ga naio jumolu ba tavio bereio, napano viobobogio laka ruei.

*Tubeiano vou na tinietiano*

*Mataiu 26:31-35; Mak 14:27-31; Luka 22:31-34*

<sup>31</sup> Mia bogo na Jutas bisi, ana Yesu jikar berloglog kumemi bereio ka vite telabo. Naio ber ka kumemi, naio berinavo “Vonganei be bogo na Kulorinio Kenerinio kiano miamoiano rimalmaluvo, vonganei be bogo na naio rila Atua kiano miamoiano rimej ve toru lie vo. <sup>32</sup> A verenio venia napano mia naio rilao, mia naio rila Atua siano rivavin, ana iorou ka nina, bogo vesiou re leleio, mia Atua rivitirilal kiniou kenerinio bereio, naio rila siaku bunu rivavin.

<sup>33</sup> “Keneriku nalo, be bogo telisu ga jo napano kiniou nemijikia noto kia vo kitoliko, vaataro ga ka monoka nataluvo den kamiu. Telikiti na kamiu kuvial ka napano nataluvo den kamiu bisi, mia kamiu kuvisidom kuvila von ka kuvisirag kiniou tanea vio rera ga. Mia venia naŋa kiniou neber ka tomu na tortoro na kiado ju nalo dolu, neber bere ban kamiu, ka vio vabe na mia kiniou navan eaio, kamiu maka kuvijikia kuvitakisora kiniou eaio vonganei. <sup>34</sup> Ana vonganei, kiniou nejian tubeiano vou tai ban kamiu, ka monoka kamiu tiniemiu titi kamiu ve toru, rivanvano-o mia tibe ka ga napano kiniou tinieku jii kamiu. <sup>35</sup> Mia ver kamiu tiniemiu titi kamiu mŋele tibe na, naina be mŋarabo na rila tomu nalo na yetemeriba nei aial ka kamiu kube kanaku naiagagoano nalo riano.”

<sup>36</sup> Yesu ber buruŋara iliano nei bisi, ana Saimon Pitere jo tinien maio ka napano Yesu naio berenio mia naio taluvo den kumemi, naruei naio bika, berinavo “?Ana Tubo, mia kava be na?”

Ana Yesu berdoŋe, berinavo “Kiniou noto navan ea vio tai napano kamiu maka kuvijikia kuvitakisora kiniou eaio vo, mia kamiu kuvijikia ga kumej navo.”

<sup>37</sup> Mia Pitere mijogio, naio bika bereio, berinavo “?Tubo, bior vaio ana kiniou maka nejikia nevedu kito juo vonganei.



Kiniou najaaro ga, namijamo ka kiaku meuliano riviorso vonganei.”

<sup>38</sup> Ana Yesu berkanio, naio berinavo “? Jau kober ka mia jau kajamo ka kiamo meuliano rivior kiniou? Bo ga, mia kiniou neber riano banso, neber ka bogiano nei ga, bogo na tu tokokoreko re vo, mia jau kavarbonbonua kiniou ve varolu [3] ruei, kover jau maka kove kanaku.”

## 14

*Yesu mila ililuṣiluṣiano ban kanano naiaagoano nalo*

<sup>1</sup> Mia Yesu mial ka napano kumemi naiaagoano nalo numijog bova ka na monoka mia naio taluvo den kumemi, naruei naio ber ka kumemi, berinavo “Kamui kuvila tiniemiu rijog vova mēle re, kamui kuvarkar tiniemiu ea Atua, ana kuvarkar tiniemiu ea kiniou bunu. <sup>2</sup> Tibe ka naṣia kiniou neberenio ruei, kiniou navan ka nala vatitig kenemiu vio nalo mave ea Teta, a mave ea kunuano be vajoomo miroano napano bare ka kamui nonovio. Ver ṣeli, kiniou maka nejikia never tibe na ka kamui. <sup>3</sup> Kiniou navan ka nala vatitig rivu kenemiu vio nene, avona bisi, mia kiniou nemei bereio yetano nei ka kamui, novuru bulag kamui kumei ea kiniou, ka na mia kamui kuvijikia kuvitu daṣariga vija kiniou ea vio napano mia notoiaio. <sup>4</sup> Mia ṣarabo na ka riva rivokar vio napano mia kiniou noto navan eaio, kamui kumijikia ruei.”

<sup>5</sup> Ana Tomas bika denio, berinavo “Tubo, kumemi maka nuvijikia vio be na jau kojoma koberenio mia jau kavan eaio, mia tumabe ana kumemi nuvijikia ṣarabo na rivan eaio?”

<sup>6</sup> Ana Yesu berinavo “Kiniou nebe burupati ṣarabo, kiniou nebe burupati ilirianiano, kiniou nebe burupati meuliano. Maka toro tai rijikia rivan ea karamaku, ver naio maka selea kiniou. <sup>7</sup> Ver kamui kuvitilubar ka kiniou nebe kei, naio jibe ka kumijikia bunu karamaku ruei. Mia vonganei, kamui kumiturna kumial naio ruei, mila na jkar vonganei, kamui kumijikia naio be riano.”

<sup>8</sup> Ana Vilip bika denio, naio berinavo “Tubo, vite na naruei kumemi numisidomio, ka nuviai kija karamado vo. Aiou, ver jau kovisiṣe naio van kumemi, mia kumemi nuvijikia nuvisaaro-o mia.”

<sup>9</sup> Ana Yesu berdoṣe, berinavo “? Vilip, kiniou nojo bija kamui-o bokar yuka vio ruei, mia jau maka kovitilubar kiniou vo? Jibe ka naṣia nojoma neberenio na, ka toro napano mial kiniou, naio jo mial Teta ruei. ?Mia jumabe ana jau kojoma kobika bereio ka kiniou nevisiṣe Teta na mave

van kamui? <sup>10</sup> ?Jau komonea ka kiniou ea Teta, a Teta naio ea kiniou, ṣeli na jau maka komoneaio? Iliano nalo naṣia neber ka kamui, maka kiniou ve takurano naṣia nemil ea siaku ga, mia Teta napano joa kiniou naio jo mila kiano iṣauano nalo jel ea kiniou. <sup>11</sup> Bo ka kamui kumonea venia naṣia neberenio, ka kiniou ea Teta, a Teta ea kiniou. Ver kamui maka kuvijikia kumonea kiniou rivior kanaku iliano ga, monoka kumonea rivior iṣauano nalo naṣia kumialio napano ma namilaio ruei.

<sup>12</sup> “Kiniou neber riano ka kamui, ka toro kei napano naio rimonea kiniou, mia naio bunu riṣauka iṣauano nalo napano nojoma namilaio. Mia notuvan vio navavin bereio ea Teta, karina iorou neiila Niununo rime, mia naio mijikia rila burutomoluo nalo na tomormoru bereio lie vo, tovulu nalo napano kumialio ruei.

<sup>13</sup> “Kiniou neberkar ban kamui, ka venia napano mia kuvika ea siaku, mia kiniou nala ga rivan kamui. Mia kiniou nala ga tibe na van kamui, ka rila ka Teta siano naio mijikia rivavin ve toru lie vo iviso ka kamui, ea iṣauano naṣia kiniou, nejibe ka kenerinio, namilaio. <sup>14</sup> Tibe na, venia na kuvika den kiniou, mia nala van kamui.”

*Yesu naio berkar Niununo Lu banlo*

<sup>15</sup> A Yesu ber bunu ka kumemi, naio berinavo “Ver kamui tiniemiu jii kiniou be riano, mia monoka kuvokar vatitig rivu kanaku tuboiano nalo. <sup>16</sup> Mia kiniou noto re bunu vija kamui, ana mia nevika den Teta ka mia naio riila toro dolu tai ka riija kamui ka mia ridu jeleku ea kenemiu. Naio napano mia rime, mia naio to vija kamui daṣariga, <sup>17</sup> naio be Niununo na ilirianiano. Tomu nalo na melijokou na yetemeriba maka ajikia avokar naio, bior ka napano nalo maka ajikia avitilubar, maka ajikia naio ga, mia kamui kumijikia batitig naio bo bior naio naruei napano mia rivija kamui bogo nonovio, to vija kamui to toboto.

<sup>18</sup> “Kanakanu naiaagoano nalo, mia kiniou notuvan lelan re kamui napano mia kuvitu tibe ka kirikiou ga. Maka leleio, mia kiniou nemei bere ka kamui. <sup>19</sup> Bogo teliki ga jo kiano vo, vesiou lele re, karina mia tomu nalo na yetemeriba nei ajikia re bunu aial kiniou bereio. Mia kamui ga kuvial ka napano mia nemeul bereio, a bior mia nemeul, mia kamui bunu kumeul. <sup>20</sup> Ea legiano na naruei napano mia kamui kuvial ka napano nemeul bereio, mia kuvijikia ka kiniou ea Karamaku, a kamui ea kiniou, a kiniou ea kamui. <sup>21</sup> Naina tinien jii kiniou be riano, naio be naina bokar batitig kanaku tuboiano a naio jo miduio. Naina tinien jii kiniou jibe na, mia

karamĉaku tinien tii naio, vija kiniou bunu mia tiniĉku tii naio, notoĉna noyotuba ka naio ka rila naio mijikia rijikia kiniou lie vo.”

<sup>22</sup> Ana kumemi naiagagoano nalo tai, napano naio be Jutas napano naio maka ve Jutas na Kariot, mia naio bika den Yesu, naio berinavo “Ana Tubo, jau koberinavo mia jau kotoĉna komalmaluvo ka kumemi, ana mia jau kala ea mĉarabo na vabe ka napano mia tomu dolu nalo na yetemeriba nei bunu ajikia re aialio?”

<sup>23</sup> Ana Yesu berdoĉe, berinavo “Ver toro tinien tii kiniou, mia naio rivokar vatitig kanaku iliano, ana mia karamĉaku tinien tii naio. Ana mia kumemi ve juo nuviedu ea naio, nuvila kenememi vonuo ea kiano meuliano, mia maka rijikia tibe na ea tomu na maka amoneaio. <sup>24</sup> Mia toro na maka tinien tii kiniou, mia naio maka rimonea batitig kanaku iliano. Naina naruei be verdoĉeiano na kenemiu vikadeniano, ana iliano napano kumijogio ruei, naio maka ve kanaku, mia naio be Teta napano naio miĉla kiniou nebinime ea vio nei kanano.”

<sup>25</sup> Ana Yesu naio berinavo “Tilikiti naĉna kiniou noĉo kia ga vo bija kamiu, noĉoĉna neber vite telabo jibe na ban kamiu ruei. <sup>26</sup> Mia bogo napano navano, mia Teta naio riĉla Niununo na iĉaiano rimeĉi, ana mia naio ridu jeleku, naio riverloglog kamiu ka vite nonovio, ana mia naio rudu sidomii kakarioano na kanaku iliano nalo nonovio ea kenemiu jidomiano. <sup>27</sup> Kiniou mia navano, mia notuvan tuĉĉaro to vija kamiu. Kanaku tuĉĉaro naio be tuĉĉaro na bo tai napano yetemeriba nei naio maka rijikia riĉe van kamiu. Tibe na, kamiu kuvila re ka mia tiniemiu rivujo mĉele, a kamiu kumerou ka re vite nalo. Kamiu kuvisidomi mĉele re, <sup>28</sup> bior ka napano mia tibe ka naĉna nabereno ka kamiu ruei, ka kiniou nava koalabo beamu, karina mia nemeĉi bereio ea kamiu. Vede kamiu kuvijog vova ka na mia navano, mia ver kamiu tiniemiu tii kiniou, bo ka kamiu kuvisaaro ve toru laka ka na mia nejikia nava neial bereio karamĉaku, napano naio loa laka lie vo ka kiniou.

<sup>29</sup> “Vite nalo na nalo makan vo, mia vonganei kiniou neberial batitigio bo ban kamiu ruei, mia bogo na kuvial maluvo memedu ga ka venia nebereno, ana mia kamiu kuvijikia kumonea kiniou ka neberiano. <sup>30</sup> Mia vonganei, kiniou maka nejikia never vite ve telabo rivan kamiu, bior parinio tubo naĉna jo mila tuboiano ea yetemeriba nei, vonganei naio jo binimeĉi ka kiniou ruei. Kanano moroano naio maka rivare ka tovulu kanaku moroano, <sup>31</sup> mia kiniou nemijamo ka ga kiniou ea

juĉano, bior monokanio nala venia napano mĉa Teta berialio ka naio jidom ka kiniou nalaio. Mia nemila jibe na, ka tomu nalo na yetemeriba nei nalo ajikia avitilubar ka kiniou tiniĉku jiilo.

“Kito mĉa, vonganei kiano bogo nene na ruei, rotumolu rava tavio.”

## 15

*Yesu naio be burupati na teli napano beriano*

<sup>1</sup> Naruei ka bogo na numiel nubano, Yesu naio ber iliano ta bunu ban kumemi. Naio berinavo “Kiniou nebe burupati na telikrevi na be riano, mia Teta naio jibe ka toro na bitikar jiotilikrevi nei. <sup>2</sup> Naio joĉna bitii veve batitig tilikiti nene nalo, mia ver naio mial tilikiti nene tai napano mia maka rivar mĉarati, naio telario, a ver naio mial tai napano bar mĉarati, mia bivikon bulagio sidiati nalo denio bo, ka rijikia rivar mĉarati ta bunu bereio. <sup>3</sup> Vite na namila ban kamiu ruei, a vite napano bivikon batitig kamiu na, naio be kanaku iliano nalo naĉna noĉoĉna neber ka kamiu. <sup>4</sup> Kamiu kube saku tilikiti, kamiu monoka kuvijurukar vatitig kiniou rivu, a mia kiniou novijurukar vatitig kamiu rivu. Ver tilikiti rivijurukar vatitig re burupati, mia maka rijikia rivar mĉarati naio ga, mia bare ga ka kamiu bunu, ver kamiu kuvijurukar re kiniou rivu, mia kenemiu meuliano maka rijikia rivar mĉarati na bo leleio.

<sup>5</sup> “Kiniou nebe burupati na teli, a kamiu kube saku tilikiti nene nalo. Naio napano bijurukar kiniou a napano kiniou nobijurukar naio, naio naruei kiano meuliano mijikia rivar mĉarati ve buro nalo, bior ver kiniou re ea kamiu, mia maka kuvijikia kuvila vite tai na bo leleio ea Atua mirano. <sup>6</sup> Ver toro tai vijurukar re kiniou, naio tibe ka tilikiti tai napano binimeĉi menoko, ka mia atelario, adu avuku rivan ea sebi, ka mia sebi sisenio. <sup>7</sup> Ver kamiu kuvitu rivu daĉnariga ea kiniou, a kanaku iliano to rivu daĉnariga ea kamiu, venia naĉna kamiu kumisidom ka kuvikano, kamiu kumijikia kuvokario. <sup>8</sup> Bo kanio kamiu kuvar mĉarati ve telabo ea kenemiu meuliano, nina naruei naio memedu ga ka kiaku naiagagoano naio toĉna rilalo, a ve mĉarabo bunu ka rila Teta siano rivavin lie vo. <sup>9</sup> Teta naio tinien jii kiniou toru laka, mia javukia ga napano naio tinien jii kiniou, kiniou bunu tiniĉku jii kamiu, naruei bo ka mia kamiu kuvijurukar vatitig ea kanaku tinietiano nene. <sup>10</sup> Ver kamiu kumituĉna kubokar vatitig kanaku tuboiano, kumijikia kuvijurukar ea kanaku tinietiano, tavukia naĉna kiniou noĉoĉna nabokar batitig ruei

karamāku kanano tuboiano, nobijurukar batitig joomo ea kanano tintietiano nene.

<sup>11</sup> “Naruei vite nalo naña nojo nober ka kamiū, nemije ban kamiū ka kanaku saariano jikia toa kamiū, naio mila napano ve buruñara saariano tai napano bo mia bo naio mijikia toa kamiū danñariga. <sup>12</sup> Ana kanaku tuboiano dolu tai na maariano na mia neje van kamiū naio jibe nei, ber kamiū tiniemiuti tii kamiū tulaka, tavukia naña kiniou tinieku jii kamiū. <sup>13</sup> Maka bunu ve tintietiano dolu tai ka mia rivu lie tovulu tintietiano napano mia toro tai rijamo ka kiano meuliano, naio riñaro ka rilarur kanano bilbilu. <sup>14</sup> Verver kamiū kumidukar kanaku iliano nalo, kube kiaku bilbilu nalo ruei. <sup>15</sup> Kiniou novio re kamiū bunu ka kanaku tomu na iñauano ga, bior toro na iñauano naio miñau ga, naio maka rijikia batitig kanano tubo kanano jidomiano na kiano iñauano. Mia kiniou nemial kamiū kumitibe ka kanaku bilbilu, bior vite nonovio naña nomijog Teta ber ka kiniou, kiniou neberial meravo bo ban kamiū. <sup>16</sup> Kamiū maka kuvijauia kiniou ka neve kenemiu, mia kiniou naruei nebijauia kamiū ka kuve kanaku, kiniou nebitiri bulag kamiū ka kuva kuvar mñarati ea kenemiu meuliano nalo, mñarati napano mia to toboto. Ana ver bogo napano kamiū kuvituña kuvan tibe na, venia na mia kuvika den Teta na mave ea siaku, mia naio sian van kamiū. <sup>17</sup> Mia kanaku tuboiano nene na jibe nei, ber kamiū monoka tiniemiu titii kamiū.”

*Tomu nalo na yetemeriba nei mia nalo asernii ka Yesu kanano naiagagoano nalo*

<sup>18</sup> Ana Yesu naio berinavo “Ver mia kuvial ka mia tomu nalo na yetemeriba nei napano maka amonmonea, nalo asernii ka kamiū, kamiū kuviilo mñele re kanio. Kamiū monoka kuvisidomial ka napano nalo nei ajernii ka kiniou beamu ruei, karina nalo asernii bunu ka kamiū iorou. <sup>19</sup> Ver kamiū kuvitibe ka tomu nalo na yetemeriba nei ga, mia nalo asaaro ga ka kamiū, mia kiniou nebijauia bulag kamiū kumitaluvo den meuliano na yetemeriba nei. Kamiū maka bunu kuve verare ka kanano tomu nene nalo, ana rila na mia nalo asernii ka kamiū nañariga. <sup>20</sup> Mia bo ka kamiū kuvituña tiniemiu rimaio nañariga ka kanaku iliano nalo naña naber ka kamiū ruei, napano naberinavo: Toro na iñauano naio maka loa ka kiano tubo. Iliano na jaati nene ber javukia ga naña amila kiki lelan kiniou, mia ala kiki lelan kamiū bunu. Mia tibe ka ga naña maka ajogkar kanaku iliano nalo,

mia ajogkar re bunu kenemiu iliano nalo. <sup>21</sup> Bajago va nalo na jibe na mia ala ka kamiū bior kamiū kube kanaku, mia ala bior maka ajikia naio napano miila kiniou nebinime yetano nei.

<sup>22</sup> “Ver nemei re neverial vite nonovio rimeravo ea miralo, mia Atua rialo re river nalo amila korov kanano iliano. Mia vonganei, maka ajikia aver soñeiano tai rivior kanalo kariano ka rila parilo sikili ka Atua, bior amijog kiaku iliano nalo ruei. <sup>23</sup> Nao, be riano ka parilo jikili ka Atua ruei, bior napano ajernii ka kiniou, ana naio javukia ga napano ajernii bunu ka Karamāku.

<sup>24</sup> “Verver re kiaku burutomoluo nalo napano amial nemilaio, napano maka toro dolu rijikia rilaio, ðeli mia Atua maka jikia river ka kariano jualo. Mia makanio, amialio ruei, mia maka ga amoneaio, ajidel dolu ka ga mña ajernii ka kumemi juo karamāku. <sup>25</sup> Vite na naio memedu ga ka iliano tai napano Atua mudu jo joomo ea Vivitauiano Lu, napano berinavo ‘Ajernii mñele ka kiniou kurano, maka rivior kanaku beleiano tai.’ *Iouano 35:19, 69:4*

<sup>26</sup> “Mia kiniou neber ka kamiū, ka mia neiila Niununo na ijaiano taluvo ea Teta mave riyotuba ka kamiū, napano naio be Niununo na jaluvo ea Atua kanano meuliano, napano be Niununo na ilirianiano. Mia naio rime riverial kiniou lie vo van kamiū, <sup>27</sup> ana iorou, mia kamiū bunu monoka kuverial kiniou ta bunu van kulo dolu nalo. Nina bior kamiū naruei kitoliko danñariga jikar ea tikariano na kanaku iñauano binime bokar vonganei.”

## 16

<sup>1</sup> Karina Yesu jo mil lie vo ban kumemi kiano naiaga-goano nalo kia navo, naio berinavo “Iliano nalo nei, neber ka kamiū na ka amijikia avokar vatitig kamiū, ka mia kenemiu moneano ajuro re bogo tai. <sup>2</sup> Nao, kamiū monoka kuvijikia ka kiado tomu na tortoru nalo, mia avuku bulag kamiū den yimo nalo na volkouano na kanado, mia rivova laka van kamiū rivano-o rivokar bogo na ver auebinvin kamiū kuñarñaro, mia nalo averinavo nina naio be iñauano na bo tai napano nalo amila ka Atua saaro riviorio. <sup>3</sup> Mia nalo amijikia ala tibe na rivan kamiū, bior binime bokar vonganei maka ajikia vatitig Teta na mave, a maka ajikia batitig kiniou bunu. <sup>4</sup> Mia iorou kanio, bogo napano ver kuvial vite nene amalmaluvo ka kamiū tibe na, kuvijikia kuvisidomialio bereio,

kuvijikia kuverinavo 'Terinio kiana, vonganei romial vite nalo na jibe ka ga napano Tubo naio ber bisivisii ban kito beamu ruei.'"

*Mia Niununo Lu rijailo*

Ana Yesu berinavo "Vite na, kiniou maka nojoma noberenio ka kamiu nua ruei, bior ea bogo na kiniou nojo kia ga bija kamiu vo. <sup>5</sup> Mia neber ka kamiu vonganei bior ka napano mia vesiou re, monoka notuvan kamiu, navan bereio ea naina nua beamu miila kiniou nebinime. Kiniou nojoma neberver jibe na ban kamiu ruei, mia nemial ka kamiu maka kuviturua kuvivikano mia kiniou nava be, peli na navan ea vio na juruabe, <sup>6</sup> bior ka bogo napano neber ka monoka notaluvo den kamiu tibe na, kenemiu iviso mijog bova toru laka biorio. <sup>7</sup> Mia makanio, naio monoka tibe na ga. Neber be riano ban kamiu, mia rivu laka van kamiu ka nataluvo den kamiu, bior ver navan re, mia Niununo na ijaiano naio maka rijikia rimei, avona ver navano, mia neilla naio rimei ea kamiu. <sup>8</sup> A Niununo na, bogo na naio rimei, mia naio rila inuano ea yetemeriba nei, rila kiano tortu nalo ka asidomlubar jidomiano na tortoru tealo, tai ea tivelinio na kialo kariano nalo, tai ea tivelinio na kanaku memeduano nalo, a tai ea tivelinio na Atua kiano tibureiano vanlo.

<sup>9</sup> "Moti nene, be Niununo nene rila avitilubar ka burupati na kialo kariano naio be kialo bajago na maka asidom amonmonea kiniou.

<sup>10</sup> "A tinene, mia Niununo nene rilalo avitilubar ka kiniou maka nala vova, nememedu laka. Kiniou nabare ka nemijikia navan bere mave ea karamaku, mia nalo aial re bunu kiniou.

<sup>11</sup> "A tolu nene, mia Niununo nene rilalo avitilubar ka mia Atua naio rijikia tiburelo, tibe ka ga napano naio jibure tubo kirivova nei ruei napano naio jo be tubo ka yetemeriba vonganei.

<sup>12</sup> "Vite telabo aju kiana vo ka mia neverialio, mia nemial ka napano kumijog bova jibe na, maka nejikia never ka kamiu vonganei. <sup>13</sup> Mia bo ga, bior mia iorou kanio, bogo na Niununo na ilirianiano naio rimei ea kamiu, mia mijikia rivuru marabo ka kamiu, mia kuvokar ilirianiano dolu nalo nei. Ilirianiano nalo na mia naio riverloglog ka kamiu, mia river re ea kiano jidomiano ga, mia na naio mijogio ea vio mave, naio naruei mia naio riverialio ka kamiu, riva rivokar napano mia naio mijikia riverloglog vatitig kamiu ea tivelinio na vite nalo napano mia amalmaluvo ka kiniou rivesiou re. <sup>14-15</sup> Miamoiano nalo na

be Teta kiano, abe kiaku bunu, naruei mia Niununo rudu kiaku iliano nalo na rimei rije vatitig rimonea kenemiu meuliano. Ea marabo na naruei mia Niununo naio rila kiano inuano rimemedu, ka napano rudular siaku medave."

*Buruvara saariano ka bogo na Yesu rime bereio*

<sup>16</sup> Mia Yesu ber bunu ban kumemi, naio berinavo "Mia vesiou re, bogo ve teliki ga, ana mia kamiu kuvial re bunu kiniou, karina, bogo ve teliki ga bereio, ana mia kamiu kuvial kiniou bereio."

<sup>17</sup> Naruei kumemi naiagagoano nalo numijog iliano nei, nuberver ban kumemi nuberinavo "Kito maka rejikia vatitig rivu leleio vite nalo nei napano naio joma berio. Beamu nua naio joma berinavo mia naio rivan bereio riva to naljuo karamiano mave tiniabene, mia vonganei naio berinavo vesiou re, kito reial re naio, karina vesiou re bereio, mia kito reial naio. <sup>18</sup> A bogo ve teliki noma naio joma ber na, nioti nene ber venia? Kito maka ravokar kiano jidomiano leleio!"

<sup>19</sup> Ana Yesu naio mijikia ka napano numisidom ka nuvika vatitig vite nalo nei denio, ana naio jikario, naio berinavo "Peli kamiu kumituma kubivika ea kamiu peli ea tivelinio na kiaku iliano nei? <sup>20</sup> Bo ga, mia kiniou neverial vatitig van kamiu tibe nei, ka mia kuviteg, kuvijog rivova ka venia na ala ka kiniou, mia tomu dolu nalo na yetemeriba nei mia asaaro kanio, ajog rivu ve toru laka. Mia tiniemiu rivujo ka jogvaiano rivano-o, karina mia nemeul bereio ea narariano, mia kuvial kiniou bereio, mia kenemiu jogvaiano naio rivilig rimei ve jogvuiano bereio. <sup>21</sup> Mia nina tavukia ga tira na be mabono, napano ver rimonloglog kiano aura nene, mia taakano rijalele naio monoka rijog rivova-o mia ka naio rudu kenerinio. Mia bogo napano naio midu besi, naio maka bunu sidomial kiano jogvaiano, mia naio tiniene bujo ka saariano bior kanano kiri solbouo neibano naio miyotuba ea yetemeriba nei.

<sup>22</sup> "Naruei mia kamiu kuvitibe na ga. Vonganei mia tiniemiu nalo avujo lou ka buruvara jogvaiano, mia iorou kanio ana mia namalmaluvo ka kamiu bereio, ka na mia kamiu kumijikia kuvisaaro bereio ea buruvara saariano tai napano mia ve re toro tai naio rijikia rudular den kamiu bogo tai. <sup>23</sup> Mo bogo napano mia namalmaluvo ka kamiu, vede mia kuvisidom ka mia kuvika vite ve telabo den kiniou, mia makanio. Tenalo na kamiu kuvika re den kiniou, kamiu kumijikia kuvika rimemedu den Teta na mave. Kuvijikia kuvika ea siaku ga, naruei naio mia rijamo ka rivan

kamiu. <sup>24</sup> Binimej bokar vonganei, kamiu maka kuviturña kuvivika vite nalo ea siaku, a tikar banei, ver kuvivika ea siaku, na mia kumijikia kuvokario, a mia naio rila tiniemiu rivujo ka saariano. <sup>25</sup> Binimej bokar vonganei, nojõña nober vite nalo ban kamiu ea jamerijiano nalo, mia bogo nene jo binimej ka napano mia neilluku re bunu tibe nei rivan kamiu, ana mia neverii Teta na mave van kamiu, nemi-jikia neverial vite nonovio rimeravo rivu vatitigio van kamiu. <sup>26</sup> Ana ea bogo na, mia ve re kiniou ga napano kiniou monoka nevika vite nalo den Teta kar kamiu, ana mia kamiu ga kumijikia kuvika denio rimemedu ea siaku. <sup>27</sup> Kamiu kumijikia kuvika naio rimemedu, bior ka napano naio mial ka napano kumiturña tiniemiu jii kiniou, a naio mijikia ka napano kumonea kiniou ka nomoluo den naio nabatove ea yetemeriba nei. <sup>28</sup> Ana ea tivelinio ka vio na mia kiniou noto navan ea, nemijikia never jibe ka na neber vonga, ka napano najaluvo ea Teta na mave nebinimej ea yetemeriba nei, naruei mia nataluvo den yetemeriba nei bereio ka navan bere ea karamaku kanano vonuo.”

<sup>29</sup> Naruei nuberdoþe, nuberinavo “Tubo, vonganei jau maka bunu koilluku ea jamerijiano! Bogo naña kober vite nalo meravo jibe na mia kumemi numialio bo laka. <sup>30</sup> Kumemi numijog kiamo iliano nalo, mila nubitulbar ka jau komijikia vite nonovio. Bogo na maka nuvika vikadeni-ano vo, jau komijikia ruei vite na nuvika denso. Jibe na, vonganei numonea jikili ka be riano, ka jau komoluo ea Atua ana kobinimej ea vio nei.”

<sup>31</sup> Ana Yesu naio berdoþe kumemi, naio berinavo “Peli vonganei ga ana kamiu kumoneaio, a? <sup>32</sup> Bo kamiu kumoneaio, bior aura naña kiniou nojõña nober, naio jo binimej, ver þeli naio binimej ruei. Ea bogo nene, mia ajil kamiu kuve dedade tanea vio, þeli na kuvanvan veve terakurano bereio ea kenemiu vonuo nalo, mia ve re tai to vija kiniou, mia kiniou ga ve takurano noto. Mia naina naio bo ka ga kiniou, bior nemijikia ka mia ve re kiniou ga ve takurano mia Teta naio vija kiniou damariga. <sup>33</sup> Kiniou neber jibe na ka kamiu ka kamiu niukniuku rivie re kamiu, a ka kamiu kuvijog re rivova. Kenemiu meuliano na yetemeriba nei mia rivujo ga ka bogokouo, mia kiniou nojovulu voviano na yetemeriba nei, naruei kenemiu meuliano na ea kiniou, mia kamiu kuvileal tumaro na bo tulaka.”

## 17

*Yesu kiano volkouano na tomorrow*

<sup>1</sup> Mia bogo na Yesu ber iliano nalo na bisi, ana naio river rivolkouo rivan karamano. Naio jirarag bavin tiniabene, berinavo “Teta o, kiniou nemijikia ka vonganei be kiaku bogo na jogvaiano binimej naruei. Aire, jau kovitkar kiniou kenerimo siaku, naio rivatove re, mia naio rivavin, ka na mia nemijikia nodular lie siamo bunu bereio. <sup>2</sup> Nomonea ka mia jau kala tibe na, bior komidu buruñara moroano na ban kiniou ruei, ka mia neve tubo ka tomu nonovio. Mia jau komijamo ka ban kiniou ka nalo napano komije monea juñaku, mia nemijikia najamo ka meuliano napano naio maka rijikia ribisi bogo tai rivanlo. <sup>3</sup> Mo mñarabo na meuliano nene napano naio maka rijikia ribisi naio jibe nei, kanio napano amijikia jau, Atua takurano ga napano naio be riano, bija bunu kiniou Yesu Kristo napano jau komi-ila kiniou nebinimej. <sup>4</sup> Kiniou nojuvanso nebinimej ka nala siamo rime ve tomorrow ea yetemeriba nei, naruei nomiñauka vite nene ruei, banbano-o vaataro ka nala nonovio iñauano nalo napano kojidom nalaio. <sup>5</sup> A Teta, nojidom novika ver kiniou nevedu notumolu notua miramo bereio, mia jau kodu kiniou bere noto vijaso kito ve juo reje tuboiano bereio ea mermerano na vio mave, tibe ka napano kito juo romila beamu naña rejii yetemeriba nei.”

*Yesu bolkouo ka kiano naiagagoano nalo*

<sup>6</sup> Mia Yesu jo bolkouo lie bano, berinavo “Teta, ea tivelinio na nalo na yetemeriba nei napano kobijauia bulaglo abe kiamo, jau kojianlo ban kiniou, jau komijelo amonea juñaku, naruei nemijikia never ka jau ka neberialso kalo ruei. Vonganei naruei nalo ajurña abokar jikili kiamo iliano Lu.

<sup>7</sup> “Nalo abitulbar ruei ka vite novo nonovio napano ajua kiniou, nalo ajavukia kiamo ijaiano nalo ban kiniou, <sup>8</sup> bior kiamo iliano napano kojian ban kiniou, kiniou nejian solio ka banlo, naruei nalo amijevo nonovio ruei, mila na vonganei nalo amonea jikili ka kiniou najaluvo easo nebinimej, jau naruei komiila kiniou.

<sup>9</sup> “Nobolkouo banso vonganei, maka nosidom nobolkouo ka tomu nonovio na yetemeriba reraio vaarakurano, naruei nojidom nobolkouo lie vo rivior nalo napano jau komijelo ban kiniou, bior napano nalo abinimej abe kanamo ruei. <sup>10</sup> Nalo nonovio na abe kiaku, abe kiamo, a nalo nonovio na abe kiamo, abe kiaku, a nalo napano jau komiilalo ka kiniou, abe burupati na kiaku mermerano.

<sup>11</sup> “Mo vonganei binimej bokar bogo napano mia kiniou nevedu easo bereio,

maka nejikia noto bunu ea yetemeriba nei, mia kanado tomu nei mia nalo atu ga. Tibe na, Karamãaku lu, bo ka jau kovitakar nalo nei napano komiilalo ka kiniou, jau kovokar vatitiglo rivu joomo ea kanado ñaratavo, ka mia amijikia amei ve takurano, tibe ka na kito juo robe takurano. <sup>12</sup> Tilikiti napano nojo bijalo, nebitakar batitiglo, nobokar batitiglo yetano ka siamo. Nobitikuku batitiglo kalo banbano-o nalo abiniu aju batitig bo ea kiniou, mia nalo ve takurano ga kalo monoka taluvo den kiniou, tibe ka ga napano Vivitauiano Lu berialio, nina be toro napano be kenerinio navakovioano.

<sup>13</sup> “Vaataro ka ga kiniou nomei bere ea jau naruei, mia nejidom neverial iliano nalo na ka bogo napano nojo kia ga ea yetemeriba nei vo, ka rila buruñara saariano nei naña joa kiniou vonganei, mia naio mijikia rimei ve toru bunu ea nalo dolu na. <sup>14</sup> Kiniou nejian kanamo iliano banlo ruei, mia bogo na kulo dolu na yetemeriba nei aial nalo, aserrñi tanea kalo. Nina bior abinimei jibe ka maka bunu ave na yetemeriba nei, javukia napano kiniou maka nove na yetemeriba nei. <sup>15</sup> Mia kiniou nojoma nobolkouo bior nalo na kaso, maka noto novika ka mia kovuru bulaglo den yetemeriba, mia kiniou nobika ka bogo napano aju kia ga yetemeriba nei, mia jau kuvurukolo vatitiglo rivu, ka mia toro kirivova nei rila lelanlo re. <sup>16</sup> Aiuo, jau kovitakar vatitiglo, bior nalo ajibe ka kiniou ga, kumemi nube valauo ga ea yetemeriba nei. <sup>17</sup> A nobolkouo bunu ka mia koverloglog kanamo ilirianiano rivanlo, ka naio riko nonovio kialo meuliano nalo amei ave lu, ave kiamo jau takurano ga. <sup>18</sup> Nobolkouo kalo jibe na, bior jibe ga naña jau komiila kiniou nebinimei ea yetemeriba nei, naruei kiniou nojoma nemiila bulaglo bunu ka avanvan eaio. <sup>19</sup> Nomioko kiaku meuliano vanso riviorlo, ka mia nalo bunu aioko kialo meuliano rivanso rive riano.”

#### *Yesu bolkouo ka namoneano nalo*

<sup>20</sup> Ana Yesu jo bolkouo keano, berinavo “Teta, kiniou nojoma nobolkouo banso, maka nobolkouo rivior nalo nei ga, mia nobolkouo bunu bior nalo dolu napano mia amonea kiniou rivior kialo iliano nalo napano abe kiaku. <sup>21</sup> Kiniou neber bo kaso Teta, ka mia nalo nonovio nei amei ave takurano, rivare ga ka kito juo. Jau, jau ea kiniou, a kiniou, kiniou easo, mia nalo bunu monoka nalo ea kito, ka mia rila napano yetemeriba momou nei rijikia rimonea ka kiniou najaluvo denso, jau komiila kiniou nebinimei yetano. <sup>22</sup> Buruñara

mermerano naña kejian ban kiniou, ana kiniou nejianio banlo, ka na mia amijikia amei ave takurano tibe ka napano kito juo kito takurano. <sup>23</sup> Jau, jau ea kiniou, a kiniou, kiniou ealo, ka mia amijikia amei ve takurano ea vite nonovio, a bogo napano tomu nalo na yetemeriba nei aialio, mia amijikia avitilubar ka be riano, ka jau naruei komiila kiniou nebinimei, a avitilubar ka napano jau tiniemo jילו toru laka jibe ka napano jau kojoma tiniemo jii kiniou.

<sup>24</sup> “Vonganei Teta, nemil maaro jibe nei, nejidom toru laka ka nalo naña jau kejian ban kiniou, mia iorou ajikia avija kiniou ea kanado vonuo. Kiniou nejidom avija kiniou ka ajikia aial kanaku buruñara mermerano nei, napano jau komije ban kiniou beamu ea tiiano na yetemeriba nei, bior jau tiniemo jii kiniou toru laka. <sup>25</sup> Teta, jau kobe lu a komemedu, mia tomu dolu nalo na yetemeriba nei maka ajikiaso, mia kiniou nemijikia batitigso bo dañariga. Naruei kiniou namila ka napano vonganei kanaku naiaagaoano nalo amijikia ka kiniou najaluvo denso, jau komiila kiniou nebinimei. <sup>26</sup> Kiniou nemila napano vonganei, telabo napano amijikia kanamo bajago novo ruei, a mia kiniou nala riva lie vo, ka mia buruñara tinietiano na tiniemo jii kiniou kanio naio mijikia toalo, a ka mia kiniou bunu noto vijalo bogo nonovio.”

Naruei volkouano na Yesu kanano ban karamãano binu ea vio na.

## 18

### *Abokakar Yesu*

*Mataiu 26:47-56; Mak 14:43-50; Luka 22:47-53*

<sup>1</sup> Yesu berial iliano nalo nei, naio bolkouo bisi, ana na naio jumolu jukamu ka kumemi kiano naiaagaoano nalo, numituvan Yerusalemo bereio, numiel ea burumeliyo nubatove ea bolu na Kitron tivelinio bano. Numiel nubano nubokar jioburuolivi tai na telisu naña Yesu joña banvan eaio va telabo ruei, naruei numitu kija ea vio na beamu vo. <sup>2</sup> Vio nei, Jutas jo jakisor kumemi liko Yesu nuban eaio va telabo ruei, ana naio mijikia batitiglo bo ruei ka bogo na a ñeli kumemi numitua vio na kovio. Jibe na, ka bogo nei naio ba berial Yesu ka tomu na tortoru nalo ruei, mila na amiila kialo tomu nalo ajakisorio, ana naio buruñarabo kalo abinimei ea vio nei ka Yesu. <sup>3</sup> Nalo neibano tomu na tortoru na kulo lu bija Varisis nalo amiilalo, nina be taara tai na tomu na mira na vio Romo, bija taara tai nakukuano na

Yimo Lu. Ana nalo aju amiel abinimei bija blayulu nalo, bija kialo tena mira nalo. <sup>4</sup> Abinimei ajidom avokar Yesu, mia naio jonā mijikia batitigio bo rui vite nalo napano mia riyotuba ka naio, mia bogo napano naio mial lo, naio maka riilo, mia naio miel ku kalo ga ban ka rivitavo ka nalo, ana mil banlo, bika berinavo “?Ei, kamiu kumitumā kumisirag kei?”

<sup>5</sup> Naruei nalo nei ajumolu aju napano Jutas, toro na jiveluku ka Yesu, naio jo jumolu lelan bijalo, mia nalo aberdoḡe banio, aberinavo “Kumemi numitumā numisirag kema na Yesu, napano naio tena Nasarete.”

Ana Yesu berdoḡelo, naio berinavo “Naio namā kamiu kumitumā kuber na, kiniou nene nei naruei.” <sup>6</sup> Naruei telikiti napano Yesu ber iliano nei kalo, amiilo mia mila amiel davarvatu vaarakurano, ajibirbili dedade ea borotano.

<sup>7</sup> A vaarakurano bereio, Yesu bika bereio denlo, berinavo “?Kamiu kuvila von ka kuver bere vonio, kamiu kumitumā kumisirag kei?”

Naruei aber bereio, aberinavo “Kumemi numisirag Yesu na vio Nasarete.”

<sup>8</sup> Ana Yesu naio berinavo “Jibe ka namā kiniou neberenio rui, kiniou nene nei naruei. A ver kamiu kubinimei kar kiniou takurano ga, bo ka kamiu kumijamo ka dolu nalo nei kanaku amijikia avano ga tibe na, kuvitokol re lo.” <sup>9</sup> Naio ber jibe na kalo, mila na kiano iliano tai napano naio berial vonga ea kiano volkouano ban karamāno naio miyotuba, napano naio ber jibe nei, berinavo “Ea nalo napano komijelo ban kiniou, maka ve nalo tai kalo napano kiniou namiluvu naio bano.”

<sup>10</sup> Aju jibe na, mia amiilo ka napano vaarakurano ga, Saimon Pitere naio jumolu burular kiano iobogu na mira, naio babijan ban parinio toro na ināuano tai na parinio toro lu, naruei naio jetitire ea ga, mioplar tiliniene tivelinio va meruo. Toro nene siano Malkusi. <sup>11</sup> Ana Yesu mil ban Pitere, naio berinavo “Pitere, jau kodu vatitig bereio kanamo iobogu na mira na riva joomo ea siveu nene bereio. ?Jumābe, jau maka kosidom ka kiniou navan ea bogokou na jogvaiano napano Teta na mave naio mije ban kiniou? Makanio, monoka navan eaio ga.” <sup>12</sup> Yesu naio ber jibe na avona bisi ana tomu na mira, bija kukuano nalo na Yimo Lu, abinimei abokakar Yesu jikili, amiorkar vatitig jumāno be juo, aburu naio bano.

*Aburu Yesu ban ea Parinio Toro Lu kiano vio*

<sup>13</sup> Naruei aburu Yesu bano, amaluvo ea Parinio Toro Lu kiano burusio, ana vite na jukamu napano amilaio, aburu Yesu ba miyotuba ea vio napano tormoruo nei Anas joaio. Anas nene, naio be Parinio Toro Lu nua beamu, mia naio joa vio na kia bija Parinio Toro Lu vou, bior napano Parinio Toro Lu vou nene, naio joro ka kenerinio vevinio niatira. <sup>14</sup> Toro nene siano Kaivas, mia naio naruei napano nua beamu, naio berial mārabo tai ban navurimāraboiano nalo na kulo Ju kialo. Naio berinavo verver amial ka monoka auebin toro tai ve takurano ka rilarur tomu ve telabo kialo meuliano, naio mijikia rijamo ka rivu ga.

*Varbonbonuano moti napano Pitere mila ka Yesu*

*Mataiu 26:69-70; Mak 14:66-68; Luka 22:55-57*

<sup>15</sup> Jibe nei naruei, aburu Yesu ban ea vio napano Anas joaio, ana ea bogo na, kumemi juo Saimon Pitere numitu numitakisorlo. Beamu kumemi juo Parinio Toro Lu nei nuburon vio takurano, naruei amijamo ka kiniou natakisor Yesu nava jouro, mia aberbure Pitere jo bo. <sup>16</sup> Aber naio to tavio ga ea morouo, mia bogo napano nemial jibe na, nabano bereio, nemil ban toro na toru nei kiano niatira na ināuano tai, napano jikili jua morouo. Ana niatira nei mijamo ka kiniou ka novuru Pitere bunu riva jouro. <sup>17</sup> Mia bogo napano Pitere jo binimei jouro, niatira nei mialio, bika denio, berinavo “?Ana jau bunu kobe naiaagoano tai na toro nei kanano, ina?”

Mia Pitere naio mijogio, miilo kanio ana berdoḡe mila sibillio, berinavo “Ee, makanio.”

<sup>18</sup> Ana Pitere naio mial ka napano tomu na ināuano bija kukuano nalo ajovokar sebi tai ka vovojulu, ana ajumolu aju jeligiv eaio amijegilo, mia naio bunu ba vaataro kalo, jo mijegi naio eaio.

*Parinio Toro Lu moruo Anas mila vikadeniano nalo den Yesu*

*Mataiu 26:59-66; Mak 14:56-64; Luka 22:66-71*

<sup>19</sup> Naruei amila Yesu jumolu ju jukamu ea mirano Parinio Toro Lu moruo nei Anas, ana naio bika vite telabo denio. Naio bika jumābe ka naiaagoano nalo napano amonmonea naio, a bika denio ka tivelinio na verloglogiano nalo namā naio jonā jian banlo. <sup>20</sup> Mia Yesu maka river vite ve telabo vanio, mia naio ber vatitigio ga banio, berinavo “Vite nonovio napano nojorā neberloglogio, kiniou maka lele neverloglog lukuvanio mia kiniou nojorā

neberialio ea vio medave meravo banlo abiniu. Dañariga nojoma neberloglog kiado kulo Ju joomo ea yimo na volkouano, ðeli na joomo ea Yimo Lu, naruei dañariga nalo miroano ajumña amiagago ka kiniou.<sup>21</sup> ?Tibe na, bior venia ana jau kobika den kiniou ka neberlogloglo jumñabe? Ver jau kosidom kejikia, mia bo ka jau kovika von nalo nañña dañariga ajumña amiagago ka kiniou. Nalo amijikia batitigio na.”

<sup>22</sup> Mia bogo na Yesu ber iliano nei, nakukuano nalo tai kalo napano naio jikili ju vaataro kanio, naio mijogio jibe ka Yesu jomña miyotel ea toro na toru nei, naruei naio mijuba Yesu, mil banio berinavo “? Ei, jau be tiniemo ka koverdoþe toro lu na kanado ka iliano na jibe na! Jau kovitkarso.”

<sup>23</sup> Mia Yesu berdoþeio berinavo “Kovitti vatitigio vonio kanaku iliano nei. Ver nomila sibi, bo ka jau koverial ea nalo na miralo, ka namila sibi jumñabe. Mia ver maka never vite tai napano maka rimemedu, bior vaio ana komijuba kiniou?”

<sup>24</sup> Ana kario, aburu Yesu, napano amiorkakar jumñano nalo kia ga vo, ajaluvo den tormoruo Anas, aburu naio ban ea komeli na Parinio Toro Lu Kaivas kanano, ana naio mila vijagiano kanio.

*Varbonbonuano valuo napano Pitere mila ka kiano Tubo*

*Mataiu 26:71-75; Mak 14:69-72; Luka 22:58-62*

<sup>25</sup> Mia Saimon Pitere jikili ju bijalo ea tivelinlio na sebi,aju amijegilo, ana abitilubar kija naio, ana abika denio aberinavo “?Jumñabe, ðeli jau bunu kobe toro na kiano naiagagoano tai?”

Ana naio berbure, naio berdoþe berinavo “Makanio, kiniou maka neve kanano.”

<sup>26</sup> Pitere berdoþe jibe na, mia nalo tai napano mña ajumolu aju na naio be Parinio Toro Lu kanano toro na inñauano tai, napano naio be torogio tai nanua Pitere jelar buru tiliniene meruo. Naio jikili lie vo ka bika bereio den Pitere, naio berinavo “? Peli jau maka kove kanano tai, mia kiniou be tinieku ka namialso bija naio yako ea buruolivi ruei?”

<sup>27</sup> Mia Pitere milavanoio jikili, naio barbonbonua varolu ka ninei, naio berinavo naio maka rijikia Yesu, mia monloglog ka aura nene ana amijog tormano jokoko-reko.

*Aburu Yesu ba jikili jukamu ea Pailat mirano*

*Mataiu 27:1-2,11-14; Mak 15:1-5; Luka 23:1-5*

<sup>28</sup> Naruei viomijeni mermeravo kia ga vo, maka viorijeni vatitig vo, mia Kaivas naio mil ban Yesu ruei, naruei aburu naio ajaluvo den vio nei bereio, aban ea Pailat kanano komeli. Pailat naio be toro na toru napano kulo Romo abitirilar naio ka rije tuboiano ea buruvenuo na kulo Ju nalo kialo.

Mia ka bogo na abinimei vaataro ka kanano komeli, kulo Ju nalo kialo navurimñaraboiano tinielo maio ka jibe ka napano abel ka ava joomo ea yimo nei, ajidomii ver ava joomo eaio mia rila amei ameravo re bunu ea Atua mirano, mia ajikia re ka avijurukarlo ka sinaniano na Jokoluolu na Sidomkariano na Ioruriano. Tenene na, aburu Yesu, abinimei aju tavio ga, mia maka ava joomo. <sup>29</sup> Ana aberial ka Pailat, ana naio binimeio avio mial lo, bika denlo, berinavo “Mo, kamiu kuver von kema nei mila venia na bova ana kuburu naio binimeio jua miraku kavijova niogoravo nei jibe na.”

<sup>30</sup> Ana nalo aberdoþe, aberinavo “Maka, kumemi numijikia nuver kaso ka toro na, naio mña mila kirivova-o mia! Ver ðeli, mia kumemi maka nuvijikia nuvuru rimeio vanso.”

<sup>31</sup> Ana Pailat berinavo “Ver tibe na, mia kamiu ga kumijikia kuva kuvisian vironiano na vabe van naio napano memedu ka kenemiu tuboiano.”

Naruei navurimñaraboiano na kulo Ju nalo aber kanio aberinavo “Ea kenememi tuboiano, kumemi numijikia nuvitibure naio ka atuba bin rimaro, mia vonganeio tuboiano na vio Romo naio berbure kumemi bereio ka mia kumemi maka nuvijikia bunu ka nuvila tibe na. Jau takurano ga, kobe toro na toru na parinio tubo na vio Romo kanano, jau ga komijikia kalaio, jau ga komijikia koverinavo asian vironiano na mñariano rivanio ea mñakolkolo.”

<sup>32</sup> Mia bogo napano amije iliano nei ban Pailat, maka ajikia, mia aju amila Yesu kiano iliano tai re nua naio binimeio beriano. Nina bior naio berial kiano mñariano ruei, berenio memedu ga ea venia napano kulo Romo nalo ajumña amila, napano ajuk kakar toro ea mñakolkolo.

<sup>33</sup> Mia Pailat jidom ril kija naljuo Yesu ga, ana naio ba joomo ea kiano komeli, naio bio ber Yesu rimeio rial naio vo. Naruei amiila Yesu ba joomo, ana Pailat bika denio, berinavo “Kiniou nojidom ka jau



koverial vatitig rivu van kiniou. Jau kobe Parinio Tubo na kulo Ju be riano, ðeli na makanio?"

<sup>34</sup> Mia Yesu maka riverdoþe rimemedu rivanio, mia naio berdoþe lilii ea navikadeniano tai, naio berinavo "¿ Kanamo vikaniano na, jau kobika vatitigio, ðeli na jau kobika den kiniou bior venia ga napano jau komijog nalo dolu ajumña aber niegeniege kiniou kanio?"

<sup>35</sup> Ana Pailat berdoþeio, berinavo "Ii, kiniou maka nejikia den kamiu kulo Ju nalo, kiniou maka neve kamiu tai. Kiniou nemijikia ga ka kanamo tomu nalo naliko tomu na tortoru na kulo lu nalo na kenemiu, nalo aburuso kobinimej ka netibureso. Jibe na, nojidom nejikia ga ka jau komila venia napano nalo amialio maka rimemedu?"

<sup>36</sup> Ana Yesu berdoþe, berinavo "Nalo ajidom ka jau monoka ketibure kiniou, bior ka napano nalo maka asidom kiniou neve tubo kalo. Mia kanaku tuboiano naio maka tibe ka tuboiano nalo na yetemeriba nei. Kanaku tomu nalo maka ala mira vija nalo na abinimej ka avokakar kiniou ruei na, ka mia kiniou navan ea re kenememi tomu na tortoru na kulo Ju nalo jumalo. Kumemi maka nuve tomu na mira tibe na, bior kanaku tuboiano naio maka ve tena yetemeriba nei."

<sup>37</sup> Ana Pailat berkanio, berinavo "¿A na mña ka nomijog koberii kiamo tuboiano, jibe ka napano jau kobe parinio tubo tai ruei ina?"

Ana Yesu berinavo "Naina naruei! Jau kobakario vatitigio kiana, javukia napano jau koberenio. Kiniou nebinimej yetemeriba nei, nomiyotuba eaio, kar vite na ga naruei, a ka kiniou nemei neverial ilirianiano nalo van kiano tomu nalo. Toro na mña naio jikili ju tivelinio na ilirianiano, mia naio riagago rivu ka kiaku iliano."

<sup>38</sup> Naruei Pailat bika den naio bereio, berinavo "Ana kei mijikiaio, ilirianiano naio be vaio na?"

*Pailat jidom tuvan Yesu rivan bereio*

*Mataiu 27:15-31; Mak 15:6-20; Luka 23:13-25*

Telikiti napano Pailat ber iliano nei bisi, naio jumolu batavio bereio, ana naio berial ka kulo Ju napano ajikili aju tavio, naio berinavo "Tete na, kiniou nobitio ruei mia maka naleal vite na bova tai toa naio leleio. Bo kanio naio mijikia riva tavio bereio ga tibe na. <sup>39</sup> Mia ver kamiu kuvitumña tiniemiu rimaio, ka yuka nonovio, ea jokoluolu nalo nei, nojomña noburular kamiu tai napano joa nalakoiano, nomijamo ka naio biedu bereio ea kamiu jibe na ga. Naruei kiniou nemial jibe ka ea yuka

nei, naio bo ka ver kiniou notuvan toro nei, kenemiu Parinio Tubo kulo Ju nalo, naio riviedu ea kamiu tibe na ga."

<sup>40</sup> Naio berial jibe na, mia nalo maka asidomio, amiaga burelo aberinavo "Makan, maka leleio, kumemi maka nuvisidom toro na. Kotuvan dolu na Barabas rimej maluvo kean kumemi bereio." Barabas na mña aberio, naio be toro Ju tai napano nanua mila baravo die kulo Romo nalo.

## 19

*Pailat mijamo ka avitiv Yesu*

<sup>1</sup> Mia Pailat naio jidomii ka tuvan Yesu rivano, mia tomu na tortoru na kulo Ju nalo ajikili ka aberbureio. Ana Pailat jidom rila titai ka asaaro kanio, ana naio miila kiano tomu na mira ka alavon ka avitiv naio kija beamu vo. <sup>2</sup> Mia na mira nalo aburu naio bano, abar nionoti tilikibi abili vatitigio bo, ana amidu joa pariparinio jibe ka toro na toru tai kiano batubatu. Mia abar kulukoti na bo tai napano be si, jibe parinio tubo mñano, amiya ea naio. <sup>3</sup> Ana aju lilie abinimej vaataro kanio, abeve terakurano amiyotel eaio, aberinavo "¡Parinio tubo na kulo Ju nalo kialo, aiau! ¡Kumemi nubatove kaso!" Aber iliano nei kanio, ajumña amijubajuba kulbibinio.

<sup>4</sup> Bisi na iorou kanio, ana Pailat naio ba tavio bereio kean tomu na tortoru na kulo Ju nalo kialo napano aju tavio kiano, naio berial kalo, berinavo "Mo, vonganei kiniou nojidom kamiu monoka kuvitilubar ka kiniou maka bunu neleal ka kema nei, vovaiano joa naio leleio, naina naruei mia kiniou novuru rimej rivan kamiu bereio." <sup>5</sup> Naio ber jibe na, ana Yesu naio miyotuba tavio, jikili ju kamu ea miralo, bija batubatu na tilikibi ea parinio bija kulukoti napano amiya eaio. Naruei Pailat berial ka kulo Ju nalo, berinavo "Nainei naruei be kenemiu toro na toru!"

<sup>6</sup> Mia tomu na tortoru na kulo lu nalo, bija navitikariano nalo na Yimo Lu, bogo napano abitilubar venia napano Pailat naio jidom rilaio, nalo maka lele asaaro kanio naruei, nalo ajumña amianganiaga, aberinavo "Kuvituku kakar naio ea mñakolkolo! ¡Kuvituku kakar naio ea mñakolkolo!"

Mia Pailat maka bunu rijikia tovulu lo naruei, mijamo, berinavo "Mo, ea kanaku vitiiano, kema nei naio maka rila vite tai vova lele garuei, a verver kuvisidom, kamiu ga kuvuru naio kuvituku kakario ea mñakolkolo."

<sup>7</sup> Mia bogo na amijogio, maka asaaro, aberinavo "E makanio! Komijikia ruei ka

maka nuvijikia nuvila tibe na. A be riano, bo ka kema na naio riñaro, bior naio milakorov kenememi tuboiano. Naio joña milavonio ka vavavinia naio tulaka, ka ver naio be Atua kenerinio. A jau ga naruei komijikia kala riñaro.”

<sup>8</sup> Mia bogo na Pailat mijogial vite nei, buruñara moroano tai binimei ea naio bereio, naio jo jidomii toru ka Yesu naio be toro na vabe bereio, <sup>9</sup> ana naio ba joomo ea kanano komeli bereio, naio bio Yesu binimei, bika denio, berinavo “?Jau, vio na vabe naruei naio be kanamo vio mededu?”

Naio bikanio, mia Yesu maka ril, maka river titai vanio. <sup>10</sup> Mila na Pailat naio berinavo “Ei, jau kojoma maka keil tibe na, jau ga komila bulago bereio. Bo kanio jau kover titai van kiniou, bior kiniou naruei, joa kiniou ka nala venia napano nojidom nala vanso. Ver nosidom jau kava tavio bereio tibe na ga, kiniou nemijikia nalai, ðeli na ver kiniou nosidom kañaro ea ñakolkolo, kiniou nemijikia nalai. Vede jau komijikia vite na naruei?”

<sup>11</sup> Vonganei Yesu mil naruei, naio berdoþe banio, berinavo “?Peli jibe na kovio, mia be kei na naio mije moroano na banso ka kala tibe na? Verver Toro na toru na mave naio maka rijamo ka vanso, maka kejikia kala titai ka kiniou leleio. Ver koverinavo kiniou nañaro, nina be kiamo vovaiano tai ruei, mia naio napano midu kiniou nojoa juñamo, naio mila bova laka, naina be kiano buruñara kariano tai na.”

<sup>12</sup> Telikiti napano Pailat mijog Yesu mil jibe na, naio milavon bereio naio jidom ka tuvan naio rivan ga tibe na, mia kulo Ju nalo kialo tomu na tortoru abio bereio, aberinavo “Kema na naio barvar ka naio-o mia, berinavo naio be parinio tubo tai, naio jidom rila naio to mave, ka kanamo toro na toru nei Parinio tubo Sisa naio totano. Tibe na, ver jau kotuvan naio rivano ga tibe na, jau komila iñauano tai napano mia Sisa naio maka saaro ka leleio ga, mia rivuku larso den kiamo iñauano na.”

<sup>13</sup> Nalo aber jibe na, mila na Pailat kiano jidomiano beve juo bereio ana naio mila aburu Yesu ba tavio ea komeli bereio, ana ba jotano mave ea kiano vio tai na tibureiano, napano abio ka Puruveru Vodobi, ðeli na napano kulo Ju abio ka Kapata. <sup>14</sup> Ana ka bogo na, binimei bokar niogoravo naruei, nina ea legiano na imoniano na vite nonovio na beni nene napano be buruñara legiano na Jokoluolu na Sidomkariano na Ioruriano.

Mia Pailat naio jotano mave ruei, naio jiloglog Yesu ban tomu na tortoru na kulo Ju nalo napano ajikili aju yetano aju,

naio berinavo “!Nina naruei, be kenemiu Parinio Tubo nei!”

<sup>15</sup> Mia maka asidomio, amiaga koko vio laka, aberinavo “!Kuvurular naio rivano! Kuvituku kakario mave ea ñakolkolo, kuvuebin riñaro!”

Ana Pailat naio berdoþe banlo, berinavo “!Tomnei! ?Juñabe, kamiu kumisidom ka kiniou nala ka napano mia auebin kenemiu Parinio Tubo nei?”

Naruei tom na tortoru na kulo lu nalo aberdoþe, aberinavo “?Kei naio ber naio be kenememi Parinio Tubo? Toro na toru Sisa naio ga takurano be kenememi Parinio Tubo.”

<sup>16</sup> Mia Pailat mial ka ajikili laka, mo naio mijamo ka Yesu banlo, midu naio joa juñalo ka atukukakario ea ñakolkolo, tavukia napano nalo ajidomio.

*Ajukukakar Yesu ea ñakolkolo*

*Matau 27:32-50; Mak 15:21-37; Luka 23:26-46*

<sup>17</sup> Pailat midu Yesu joa juñalo, naruei nalo aburular naio bano. Mia bogo napano aju abano, amila napano Yesu midu ga bereio kiano ñakolkolo, naruei ajukamu kanio aba abokar suku sesa napano sano veru nene nalo ajavukia bordada na kulorinio tai, napano abio jelea iliano na Ipru aber Kolkota.

<sup>18</sup> Ea vio nene naruei, ajukukakar Yesu ea ñakolkolo, a bija tom juo dolu bunu, tinene jo tivelinio ka naio, a tinene jo tivelinio a naio jo iviso kalo.

<sup>19</sup> A Pailat kiano iliano tai, naio berii kalo ka avivitaui bisi na atukukario to mave ka Yesu parinio, jibe napano naio ber “Yesu re Nasarete, kulo Ju nalo kialo Parinio Tubo.” <sup>20</sup> Iliano nene, avivitaui jel ea iliano tolu, Ipru na kulo Ju kialo, Latin na kulo Romo kialo, a Krik na kulo Kris kialo, naruei amidu jo mave ea Yesu kiano ñakolkolo. Vio na ñakolkolo nei naio vaataro ga ka bulukomeli, mia tomu nalo nañama ajurña amiel abinimei ña abarvar laka ea vio nei amial iliano nei ana ajuña abulukuio. <sup>21</sup> Mia tomu na tortoru na kulo lu nalo na kulo Ju nalo maka asaaro ka iliano nei. Nalo aberilubarbar ban Pailat, aberinavo “Toro na toru, jau koberenio avivitaui tibe nei aver ‘Parinio Tubo na kulo Ju kialo,’ jau kober maka rimemedu laka. Kumemi numisidom ka avilig bereio, avivitaui tibe nei, aver ‘Naina, naio ber be kulo Ju nalo kialo Parinio Tubo.’”

<sup>22</sup> Mia Pailat maka sidom, naio jidom ka tobo ga tibe ka napano naio berenio, ana naio berial banlo mededu, berinavo “Vite napano nebivitaui, nebivitaui ruei.”

*Namira nalo ajanika Yesu kiano kulumārauo nalo ealo*

<sup>23</sup> Tomu na mira nalo ajuku kakar Yesu naltolu ea kialo māakolkolo, mia amijilimebi. Tomu na mira nalo nei nalo veri, abokar Yesu māno kulumārauo nalo, mia aberinavo atan kalo ea taara ve veri, tai kanano tai, tai kanano tai, jibe na. Nalo ajanka jibe na ba bokar Yesu māno kulukoti na toru, mia maka asidom ajede kokorovio niati ve veri ealo bior kulukoti nene, maka aiasosolio, mia amimāuka ea burumāra niati kulumārauo takurano ga.

<sup>24</sup> Mila na aberver kalo, aberinavo "Maka rivu ka rejede lelan kulukoti na, mia bo ka kito reiere mābujo ga riviorio." Mia maka ajikia, mia nalo ajumā amila memedu ga ka iliano tai ea iouano tai ea Niosi Lu na iouano re nua ruei. Iliano nene naio ber jibe nei, naio berinavo

*Ajanka māku kulumārauo jan ealo,*

*mia amiere mābujo ka māku kulukoti.*

*Iouano 22:18*

Iliano nei naio ber jibe nei, memedu ga ka venia napano tomu na mira nalo amilaio.

*Yesu mil ban kenieno*

<sup>25</sup> Nalo ajelan Yesu mave ea kiano māakolkolo jibe na, a ea nalo napano mā ajikili aju vaataro ajumā abitio, be tira veri. Nalo nei be Yesu kenieno, a kenieno dolu na teliki, a Mere napano koano Klopas, a Mere na vio Maktala. <sup>26</sup> Ana Yesu jirarag batove, naio mial kenieno, a naio mial ka napano kiniou bunu, napano kumemi juo nube kuruememi, nejikili noju vaataro, ana naio berial kiniou ban kenieno, naio berinavo "Tiramoruo, ninei be kenerimo nei naruei." <sup>27</sup> Mia naio mil ban kiniou bunu, naio berinavo "Naina, be koniomo nei naruei."

Mia jikar ka bogo na, kiniou noburu tiramoruo nene binimei mon ea kiaku vonuo, kiniou nobitkar batitig naio bo jibe ka kenieku.

*Yesu naio māro*

<sup>28</sup> Yesu naio mijog bova mave ea māakolkolo banbano-o naio bitilubar ka kiano imāuano naio mila nonovio binu ruei, naruei naio berial berinavo "Midou jer kiniou." Nina be kiano iliano tai bereio napano naio ber ka iliano tai ea Niosi na Iouano Lu nalo rimeve rive riano. <sup>29</sup> Mia nalo amijog ka napano naio ber midou jerio, naruei nalo amidu burujumu tai, abudom ea mālo mārjumēlmēlu tai napano jua baju tai, ana nalo amiyukuru kar ka jaiesi tai, ajan bavin jokol Yesu niono. <sup>30</sup> Mārjumēlmēlu nei jokol niono bisi, ana

naio berial iliano tai, naio berinavo "Biniu binu naruei." Mia bogo napano naio ber iliano nei, naio jurubanini ka parinio, naio mijamo ka niununo bano, naio burumāria kiano jegi ana mārodobi.

*Amieldulu Yesu merikono*

<sup>31</sup> Bogo napano Yesu māro, nina ea legiano viovare ea legiano na lavatitigiano na vite nonovio na Jokoluulu na Sidomkariano na Ioru-riano. Jibe na mia beni nene, naio be legiano lu na toru na jokoluulu nene, mia ea bogoti na, be lu laka ka atokol mokotenano kulorinio na māro. Mila na tomu na tortoru na kulo Ju nalo ajidom ka monoka avar bulag mokotenalo tomu tolu nei beamu, karina mērenio rijoru. Mia amerou ka tibe mā nalo tolu nei tai maka rimāro vo, naruei amiila toru ba ban Pailat, abika ka ver amijikia asavokorov jaalo ka amārmāro soḡeli. <sup>32</sup> Ana Pailat mijamo kanio, mia kanano tomu na mira nalo abinimei ajavo korovio naio jaano napano ajukar naio ea māakolkolo tivelinio ka Yesu, karina amila ka nalo tinene. <sup>33</sup> Mo nalo abano ka ala ka Yesu bunu, mia amial ka napano mārodobi ruei, mila na maka bunu ala kanio.

<sup>34</sup> Mia na mira tai midu kiano mira, julu dulu Yesu merikono tivelinio, naio miyuku ba joomo banbano-o amial ka napano burumāra burukija bija uei mirararo batove. <sup>35</sup> Naruei vite nei naio be riano laka, bior ka napano kiniou namial ka miraku. Nomijikia ka be riano, ana neberial ka kamiu, naruei kamiu bunu kumijikia kumonea ka vite nei naio be riano ga. <sup>36</sup> Vite nalo nei ama-luvo jibe na ka rila iliano nalo na ea vivitauiano lu nalo re nua amei ave riano. Iliano tai naio ber jibe nei, berinavo

*"Maka bunu na niabene tai napano mia rivurikorovio,"*

*Iouano 34:20*

<sup>37</sup> a dolu nene naio berinavo

*"Ajulu niegeniege lelan naio, bisi na mia atu avitii naio."*

*Sek 12:10*

Naruei bajago na Yesu kiano māriano naio jibe ga na napano iliano nalo na aberialio nuanua ruei.

*Amidu Yesu mokotenano mon ea buluvae*

<sup>38</sup> Mia toro na toru tai na kulo Ju nalo kialo, siano Yoseve, na vio bulukomeli na Arimatea, naio be Yesu kiano naiagagoano tai kirisiou kija ruei, mia naio jomā milavan kiano moneano ka napano naio jomā mermerou ga ka tomu na tortoru dolu nalo. Mia bogo napano kiano Tubo naio māro, karina merouano nei

bakovio, naruei naio ban ea Pailat mirano, bika Yesu mokotenano. Ana Pailat mijamo kanio, ana naio ba midular Yesu mokotenano ea m̄akolkolo. <sup>39</sup> Mia toro dolu tai naljuo Yoseve ka bogo na, nina be Nikotimas m̄a napano beamu, naio ba lukuluku ga ka riva rial Yesu ea bogiano tai ka ritukunu vijaio. Naruei Nikotimas naio binime i ka bogo nei, naio bar bunu saba tai binime i ka rujuvuluko batitig ka Yesu mokotenano, bija burum̄ara bamaatei tai, napano natemiiano nene juvulu kilo due-limo va rolu [30]. <sup>40</sup> Naruei nalo amidu Yesu mokotenano, amijuvuluko ka kulum̄arauo nalo napano mivu, bija m̄aatei nalo neibano jibe ka nam̄a kulo Ju nalo ajum̄a amilaio julaka ea kialo m̄ariano nalo. <sup>41</sup> Amijuvuluko bisi, mia vaataro ga ka vio napano ajukukakar naio m̄aro ea, tiniavio tai jo, mia jouro ea tiniavio nene be bulukupili vou na puruveru tai jo, napano aje vonga ka adu tasim̄aro romoneaio, mia maka ve tai rivan ea vo. <sup>42</sup> Naruei amial ka vaataro napano m̄erenio rivatove, bogo bulati ga ana Legiano Lu tikario, naruei amidu Yesu mokotenano mebi joomo ea vio nene.

**20**

*Buluvae be teau jo*

*Mataiu 28:1-8; Mak 16:1-8; Luka 24:1-*

12

<sup>1</sup> Amidu Yesu mokotenano mon joomo ea buluvae nene, joa bano-o bokar legiano moti na sude dolu. A be tire nalo tealo kalo, jibe ka Mere na vio Maktala nalo, ajumolu kavijova niogoravo amiel ea vio bobogio abinime i ea buluvae.

Mia bogo napano abinime i vaataro, amilo va ka napano burum̄ara puruveru maka bunu toko buluniono buluvae, amelivilivilar kanio ruei jo mon tivelinio ka ga. <sup>2</sup> Mia bogo napano Mere naio mialio, naio bap̄ilig jikiti ban bereio, naio binime i mial Saimon Pitere bija kiniou nam̄a kumemi juo Yesu numitibe kuruememi, naio berialio ka kumemi juo, berinavo "1Ai, abe Yesu mokotenano ba kovio tai ruei! Amidu lario ba kovio, kumemi maka nuvijikia ka naio jo be naruei."

<sup>3</sup> Kumemi juo numijogio, naruei numitumolu nuban sopēli ea buluvae.

<sup>4</sup> Numitikiti nubano, mia nojvulu Pitere, noboru ea vio nene jukamu, mia Mere bunu jakisor kumemi binime i bereio. <sup>5</sup> Nabano naboru ea buluvae, naban vaataro neminiadu ba joomo ea vio nei napano amidu Yesu mokotenano mon eaio. Mia maka bunu neialio, mia nemial ga kulum̄arauo napano amijuvuluko ka Yesu, jibirbil jibe na gaaju, mia maka nava

joomo. <sup>6</sup> Mia maka vesiou ana Saimon Pitere naio iorou binime i mijaka ba joomo ea buluvae. Naio mial kulum̄arauo nene nalo, jibe ka ga napano amijuvuluko ka Yesu nua viomijeni niovo ruei. <sup>7</sup> Mia be ielikono tai, napano amiorkar ka Yesu parinio, naio maka to vija kulum̄arauo nalo, mia amijuku batitigio bereio jo naio takurano.

<sup>8</sup> Pitere naio jo m̄a bitii vite nalo nei jibe na, mia kiniou bunu naba joomo nebitio. Nubitio jibe na, numijikia naruei a numonea ka napano Yesu jumolu bereio meul den nam̄ariano ruei, be riano mia be riano.

<sup>9</sup> Beamu, kumemi naiagagoano nalo maka nuvisidomiio ka mia tibe na, bior napano maka nuvijikia ka napano Vivitauiano Lu nalo ajum̄a aberialio ruei ka mia kiado Naverikariano monoka rim̄aro karina mia naio rimeul bereio. <sup>10</sup> Beamu, maka nuvijikiaio, mia vonganei kumemi juo numialio ka mirememi. Naruei nubitio banbano-o, bisi ana kumemi nuban bereio vonuo.

*Mere na vio Maktala mial Yesu Mataiu 28:9-10; Mak 16:9-11*

<sup>11</sup> Kumemi juo nuba vonuo bereio, mia Mere naio jikili juo tavio ea niono buluvae nei ga juo jogumirano jibirbili. Naio jo m̄a jegi jibe na banbano, mia naio jirarag ba joomo ea buluvae, <sup>12</sup> naruei naio miilo bereio ka nailiano juo amiya kulum̄arauo napano miuvuruvo laka,aju ajutano mave. Tinene jotano ea vio napano beamu Yesu parinio mebi eaio, a tinene naio jotano ea vio na jaano ban eaio. <sup>13</sup> Ana naljuo amel ban Mere, aberinavo "Koig, jau kojom̄a kejegi vaio?"

Naio berdopē berinavo "Amidular kanaku Tubo bakovio tai, maka nejikia ka amidu naio mon be naruei." <sup>14</sup> Naio beriliano na, karina naio jiraragodi bereio, naio mial toro tai jumolu jikili juo. Naio maka rivitilubarario, mia be Yesu nene.

<sup>15</sup> Naruei Yesu bunu bika denio, berinavo "Koig, jau kojom̄a kejegi vaio? Kojom̄a kejirag kei ea vio nei?"

Mia Mere naio beriam̄a toro na im̄auano ea vio nei ga, naio berdopē banio, berinavo "Toro na toru, ver jau naruei komidular naio ea vio nei, aiou, jau koverial ka kiniou vio be naruei komidu mokotenano joaio. Kiniou nojidom ka nodu rimeul to vatitig ea jeleigio bereio."

<sup>16</sup> Naruei Yesu bio Mere ka siano, berinavo "Mere!"

Naio mijogio, ana baripēligio, bitilubar ka be Yesu, ba vaataro kanio, bioio mije kialo iliano, berinavo "Raponi!" napano

nioti na iliano nei berinavo “Naverloglogiano.”

<sup>17</sup> Ana Yesu ber kanio, berinavo “Mere, to, kotokol re kiniou tibe na. Kiniou maka najikia notoa vio nei, bior maka nava mave vo ea Teta. Mia bo jau kavan ea kuruaku nalo, koverial kalo ka kiniou neber jibe na, ka vonganei, kiniou nojo nabavin mave bereio ea naio napano be karamiaku, a be karamemiu, napano be kiaku Atua, a be kenemiu Atua.”

<sup>18</sup> Ana Mere na Maktala naio mila jibe na naruei, binimej bereio ea kumemi na-iagagoano nalo, berialio berinavo “Kiniou namial Tubo ka miraku,” a naio berial ka kumemi vite nalo namia Yesu berkanio.

*Yesu miyotuba ka naiagagoano nalo*

*Mataiu 28:16-20; Mak 16:14-18; Luka 24:36-49*

<sup>19</sup> Ana ea legiano moti na sude nei kia ga vo, kijeve nene, na kumemi naiagagoano nalo numitu vio takurano joomo ea vio namia numitua numituluku eao. Nubukar batitigio m̄aratavo nalo, bior ka napano numerou ka tomu na tortoru na kulo Ju tiniel ser kumemi bunu, tavukia namia tiniel jer Yesu beamu ruei. Numitu jibe na, mia kolvare ga, Yesu maluvo binimej jikili ju iviso ka kumemi, berinavo “! Tuñaroano to vija kami!” <sup>20</sup> Naio ber jibe na, karina naio jiloglog ka kumemi ka jeleig butoto nalo ea jumano bija burum̄ara niajebijo na ea merikono tivelinio. Numialio, mia bogo napano nubitulubario ka be Tubo, numisaaro mia numisaaro. <sup>21</sup> Naruei naio ber ka kumemi bereio, berinavo “Tuñaroano to vija kami!” A naio jusolio, berenio “Javukia ga napano Karamiaku naio miila kiniou ka nala kiano in̄auano, naruei kiniou neiila kija kamiu bunu ka kuvila tibe na.”

<sup>22</sup> Iorou ka nina, naio miuvu jegi binimej ea kumemi, naio berinavo “Kamiu kuvokar Niununo Lu. <sup>23</sup> Toro kei napano ver kamiu kuviekokoa naio rivior kiano kariano, mia kariano nene taluvo den naio, mia toro kei napano ver kamiu kuviekokoa re naio rivior kiano kariano, mia kariano nene to dam̄ariga ea naio.”

*Tomas mialio ana naio moneaio*

<sup>24</sup> Telikiti napano Yesu maluvo ea kumemi, kumemi tai maka to, nina be Tomas Savoro. <sup>25</sup> Iorou kanio, numial naio, nuberialio kanio, nuberialio “!Tubo naio maluvo ea kumemi, numial naio ruei!”

Mia naio maka sidom rimoneaio, berinavo “Makanio, kiniou monoka naial naio ka miraku. Ver kiniou naial re jeleig butoto ea jumano, a notokol ka m̄arjukujum̄aku

nei, a ver kiniou nasian re jum̄aku nei ea niajebijo ea merikono, mia kiniou nomonea re ka naio meul bereio.”

<sup>26</sup> Tomas berial kanano jidomiano nei, mia sude takurano barlaka bano, na kumemi numitu vio takurano bereio ea vio nei nua. Ea bogo nene Tomas bunu jo kumemliko, a m̄aratavo nalo ajetavo batitigio bo aju, mia Yesu miyotuba ka kumemi vaarakurano bereio, berinavo “! Tuñaroano to vija kami!” <sup>27</sup> Naio mil ban Tomas, berkanio, berinavo “Naine be jum̄aku, jau koyuku m̄arjukujum̄amo, kotokol veveio. Naine be merikoku, jau kodu jum̄amo toaio. Jau kovitovtonia re bunu, koviekar kiniou sikili.”

<sup>28</sup> Tomas mijogio, bitii Yesu, naruei berdoŋe berinavo “Kanku Tubo, jau kobe kanku Atual!”

<sup>29</sup> Ana Yesu berkanio, berinavo “? Jum̄abe, jau komial kiniou, ana komonea kiniou? Nina bo, mia burum̄ara iliviuano toa nalo napano maka aial kiniou vo, mia amonmonea kiniou ruei.”

*Iliano na maaro tai*

<sup>30</sup> Saba miroano napano Yesu milaio, nebitavaia jua niosi nei ruei, mia naio mila burutomoluo dolu telabo bunu ea mirememi napano maka nevitavaia bulagio. <sup>31</sup> Mia iliano nonovio na jua niosi nei, be tena rijaj kamiu kumijikia kumonea ka Yesu naio be Naverikariano, naio be Atua kenerinio riano. Naruei kenemiu moneano ea siano na, mia ve m̄arabo na mia kuvokar meuliano ea naio.

## 21

*Yesu naio miyotuba bereio, ka kiano naiagagoano aluo*

<sup>1</sup> Iorou kanio, kumemi naiagagoano nalo tealu numitua burum̄ara ueiyabo nei na Taiperias, ŋeli na Kalele, ana Yesu miyotuba. <sup>2</sup> Kumemi napano numitu ea bogo na, be Saimon Pitere, Tomas Savoro, Nataniel na vio bulukomeli na Kenan yako Kalele, kiniou bija kuruaku na toru na Yemesi, bija kumemi juo bereio. Naruei Yesu kiano yotubaiano ea bogo na naio jibe nei.

<sup>3</sup> Beamu, Saimon Pitere naio berial berinavo “Mo, kiniou nava novuku levlevi tavio beamu vo.”

Naruei numitumolu nuberialio “Bo ga, kitoria rovinii.” Naruei nubatove, numidu uako nuba nubuku levlevi. Naruei numitua tei bano-o bokar viomijeni, mia maka lele nuvokar niado tai.

<sup>4</sup> Mia bogo napano viomijeni mermeravo, Yesu binimej jikili ju uro ea vio nei,

numialio ka be toro tai ju, mia maka nuvutilubar ka be naina naruei.

<sup>5</sup> Ana Yesu bio ban kumemi, bika ber “?Keneriku nalo, kubar kija niado p̄eli na makanio?”

Naruei nuberinavo “Maka leleio.”

<sup>6</sup> Ana naio berinavo “Mo, kuvila tibe nei. Kuva kuvuku bere kenemiu levlevi, mia kuvuku re bunu tavukia beamu, kuvila von ka kuvitubarvanio ea jumemiu meruo beamu vo, mia nomijikia ka mia kuvokar niado tealo.”

Kumemi maka nuvutilubar ka be Yesu na jo mil, mia nubano numitubarvan levlevi javukia ga napano naio berenio. Mia vaarakurano ga bujo, niado mia niado, mia bogo na kumemi nuburu vonio ka rime i mave numila deio ga, naio temi laka ka niado. <sup>7</sup> Ana vonganei nubutilubar ka be Yesu, ana kiniou napano kumemi juo Yesu nube kuruememi, neber ka Saimon Pitere, neberinavo “Pitere, keialio. Tubo yako ju.”

Bogo napano Pitere naio mijogio jibe na, ana naio jumolu vaarakurano, miya kiano kulukoti bereio, biako batove ea tei, mia ba uro. <sup>8</sup> Maka nuvitu laka ka vio uro, titai jibe ka meta toromomou takurano [100], mia Pitere naio jukamu ka kumemi, ana numidu uako kumemi iorou, napano nuburude lilian levlevi nei bujo ka niado.

<sup>9</sup> Mia bogo napano nuboru uro, numial ka napano sebi tai jo, napano ajumia amijege niado ea vovosebi nene ruei, a numial ka napano joko nalo na terteliki bunu amenoko batitigio bo ju. <sup>10</sup> Ana Yesu berinavo “Niado napano kubokarlo naruei, kuvar tealo rime i rive sado.”

<sup>11</sup> Ana Saimon Pitere naio batove ea tei, bavin ea uako, burular levlevi, buru binime i uro. Niado nalo miroano laka, numerou ka mia levlevi naio rivurkokorovio, mia makanio, nuburu binime i bo ga. Mia bogo napano nubur bulavulag niado nalo, nubulukulo bokar toromomou takurano duelimo va jimo ba tolu [153].

<sup>12</sup> Naruei bogo napano niado nalo na aju amijegeio amenoko bo, ana na Yesu bio, berinavo “Mo, kamii kumei kuvisinin.”

Ea bogo nei, nubutilubar ka be Tubo, maka bunu nuvila von ka nuvikanio ka naio be kei. <sup>13</sup> Naruei nubinime i numitu vio takurano naruei, ana Yesu midu joko burebove janea kumemi, bija niado nalo bunu, ana numisenio.

<sup>14</sup> Nina naio jibe ka Yesu kiano varolu napano naio miyotuba ka kumemi kiano naiaagoano nalo, iorou ka napano Atua mila naio meul bereio ea namariano.

### *Yesu naio Pitere*

<sup>15</sup> Telikiti napano numije simemi sinaniano na kavijo bisi, ana na Yesu jidom tukunu kija vija Saimon Pitere. Naio bika denio, berinavo “?Saimon, Jonas kenerinio, jumabe? Jau tiniemo jii kiniou loa laka, juvulu ka napano nalo dolu tinielo jii kiniou, p̄eli na makanio?”

Ana Pitere berdopeio, berinavo “Tubo, vite na jau komijikia ruei, ka kiniou najaaro toru kaso.”

Naruei Yesu berkanio, berinavo “Maraiu, mo jau kavagan kiaku nunu solbouo nalo.”

<sup>16</sup> Ana vaarakurano bereio, Yesu bika denio, berinavo “?Saimon, Jonas kenerinio, jau tiniemo jii kiniou toru laka, p̄eli na makanio?”

Ana Pitere berdope, berinavo “Tubo, vite na jau komijikia ruei. Javukia napano neberkario, kiniou najaaro toru laka kaso.”

Naruei Yesu berkanio, berinavo “Maraiu, mia jau kovitikar kiaku nunu nalo.”

<sup>17</sup> Ana bereio, be varolu nene, Yesu bikanio, berinavo “?Saimon, Jonas kenerinio, jau kajaaro ka kiniou be riano, p̄eli na makanio?”

Mia bogo napano Pitere naio mialio ka napano Yesu jonia bika den naio jibe na ba bokar varolu, naio mijog mimou, ana berkar ban Yesu, berinavo “Tubo, abe jau komijikia vite nonovio. Jau komijikia batitigio bo ruei ka napano kiniou najaaro toru laka kaso.”

Ana Yesu berkanio, berinavo “Maraiu, jau kavagan kiaku nunu nalo. <sup>18</sup> A neber riano ka jau jibe na, ka beamu, bogo na kobe meaku kia ga vo, kojorña komila jibe ka ga namia kojidom kala. Jau takurano komiel janea vio na vabe napano kojidom kavan eaio. Mia nomijikia never kaso ka bogo na mia komei kove tormoruo, mia tomu dolu aya kulumarauo easo, avokar jumamo, avuruso kavan ea vio napano maka kosidom ka kavan eaio.”

<sup>19</sup> Iliano na Yesu kiano nei, naio jibe ka napano jo berialio jumabe ka mia auebin Pitere. Ea kiano mariano, naio mila bajago tai napano naio midu naio ju tano, mia rivitirilar Atua siano to mave.

Mia iorou ka Yesu ber ka Pitere jibe na, naio buru bere naio, ber naio takisorio bereio, berinavo “Jau komei, katakisori kiniou damariga.”

### *Yesu naio Jone*

<sup>20</sup> Mia bogo napano Yesu jukunu bija Pitere bisi, ana Pitere barpilig naio, mial kiniou, Yesu kiano bilbilu na bo, nojo vaataro ka naljuo. Kiniou nei napano

beamu, ea sinaniano na maaro, nojotano vaataro ka Yesu, nebika naio ka ea kumemi naiagagoano nalo, kei naio mia tiveluku ka naio. <sup>21</sup> Mia bogo napano Pitere mial kiniou, bika den Yesu, berinavo “Tubo, jumabe ka bilbilu nei?”

<sup>22</sup> Naruei Yesu berkanio berinavo “Ver kanaku sidomiano ka mia naio rivakovio re, mia mijikia to tibe na-o vokar napano mia kiniou nemei bereio, vite na be kanaku, maka ve kanamo ka mia kover titai kanio. Mia venia napano be kanamo ka kala, nober kaso ruei, ka katakisor kiniou namariga.”

<sup>23</sup> Mia iorou ka bogo na, bogo napano namoneano dolu nalo amijog ka napano Yesu mil jibe na, amijog belea, aberiamña Yesu berii kiniou, berkar ka mia maka nejikia nomaro bogo tai. Mia Yesu maka river tibe na, naio ber ga ka ver naio sidom, mia rijikia tibe na. Tibe na, nioti nene ber ka vite na Pitere bikanio, naio maka ve kanano, mia be Yesu kanano ga.

*Iliano na maaro*

<sup>24</sup> Mia kiniou naruei napano nojomña nober bulavulag vite nalo nei, nojomña nobivitauia bulagio batitig bo ka kuvijikia kuvulukuio. A kito rovinu romijikia romonmonea ka iliano nalo nei abe riano laka.

<sup>25</sup> Bo ga naruei, niosi nei binime maaro ea vio nei naruei. Mia vite telabo napano Yesu milaio ajuao, mia vite telabo mia telabo bereio napano Yesu milaio maka atuaio. Ver kito rovivitauiaio nonovio, nomial jibe ka p̄eli mia kiano niosi nene nalo ve miroano laka, rivanvano-o mia vio ve teliki ea yetemeriba nei.

## Atevi Nalo Kialo IMAUANO NALO Verialiano Moti

### *Tukunuano bulati na niosi nei*

Niosi nei Atevi Nalo Kialo Iñauano Nalo, Luka bivitauia ba ban toro tai, siano Teovilas. Ninei niosi juo napano Luka jirio, a binimej iorou ka kiano niosi moti napano siano Yesu Kristo kiano Ioluano Vou napano Luka jirio. Niosi nei, Atevi Nalo Kialo Iñauano Nalo, napano siano na bulati Iñauano Nalo berii Yesu kiano atevi nalo kialo iñauano na beamu, napano Niununo Lu buru m̄arabo kalo ka ala iñauano na verialiano na ioluano vou, tikario Yerusalemo, ban ea vio nalo na Judia a yako Sameria, banbano-o du nonovio nalo na yetemeriba (Iñauano Nalo 1:18).

Niosi nei be tukunuano tai na namo-meano nalo na beamu napano jikar ea taara tai na Israel napano amonea, amiluo-o binimej toru, jovoko nonovio yetemeriba. Ea niosi nei, Luka jidom ka nalo napano amonea, nalo ailikuei re Parinio Tubo na Romo, napano midururu ea vio nalo ea bogo nene. Mia naio jidom verial ka vite nalo napano taara na Israel nalo amonea naio, nalo abinimej amaluvo ea ioluano vou nei ka tomu nalo na abe namoneano nalo amonea naio.

Niosi nei be kiano yati tolu, napano berial ka ioluano vou jo maluvo ba liei ea vio nalo, a yimo lu jo miluo bogo nonovio. Beamu, berii yimo lu napano jikar yako Yerusalemo, iorou ka bogo na Yesu bavini ea tiniabene. Mia valuo nene, berii napano iñauano bunu jovoko vio nalo na Mediterenian, bano-o boru Romo.

Vite burtomoluo tai napano niosi nei berii, be iñauano na Niununo Lu. Bogo na atevi nalo aju kea yako Yerusalemo memedu ka bogoti na Jokoluolu na Yuvi Meruo, Niununo Lu binimej ealo, a jian moroano banlo. Mia iorou ka bogo na, Niununo Lu judu ka mija iñauano na yimo lu, a mija navurum̄araboiano nalo nei ea kialo iñauano.

Ea niosi nei, be iliano nalo na atevi nalo aberialio, a berial ka kialo iliano nalo amijevio moroano, bilig tomu nalo kialo meuliano napano amonmoneaio, amija tomu na moneano nalo ka avuron vio takurano.

### *Torogio nalo na niosi nei*

Yesu jian iliano maariano a kiano verikariano ban kiano tomu nalo 1:1-14

Nalo abijauialar nana mia tujelain Jutas 1:15-26

Nalo aberial ioluano vou yako Yerusalemo 2:1—8:3

Nalo aberial ioluano vou yako Judia bija yako Samaria 8:4—12:25

Pol kiano iñauano nalo 13:1—28:31

Pol kiano ieliano moti 13:1—14:28

Na vurum̄araboiano abokar vioriano yako Yerusalemo 15:1-35

Pol kiano ieliano valuo nene 15:36—18:22

Pol kiano ieliano varolu nene 18:23—21:16

Pol joa nalakoiano yako Yerusalemo, a yako Sisari bija yako Romo 21:17—28:31

### *Iliano na jukamu*

<sup>1</sup> Nao, kanaku bilbilu Tiovilas, kiniou najaaro ka nevitavo vijaso ea niosi dolu nei. Ea kanaku niosi na jukamu napano nejiri banso, nojo nejiri tukunuano na vite nalo napano Yesu jom̄a milaio, a napano naio jom̄a berloglogio, nina jikar ea kiano iñauano, <sup>2</sup> binimej bokar bogo napano ea moroano na Niununo Lu, naio jian kiano iliano na maaro ban kanano atevi nalo napano naio jo buru bulaglo ruei, ana iorou kanio ana Atua buru naio bavin bereio.

<sup>3</sup> Bogo napano naio meul bereio ruei ea namariano, napano maka rivavin vo, ana bogoti telabo, naio jo malmaluvo kalo ba bokar legiano duelimo va veri [40], ka rila rimeravo vatitigio vanlo ka naio meul bereio ea namariano be riano. Ea bogo na, nalo ajum̄a abitulubarbar naio, mia naio jom̄a berii m̄arabo nalo na Atua kanano navenatuboiano banlo.

<sup>4</sup> Bogo tai napano naio joa vio tai naliko, ana jian iliano nei banlo, berenio, berinavo “Mia kamiu monokanio kuvituvan re vio nei Yerusalemo vo, monokanio kuvitu rorea beamu vo ka mia kuvokar Niununo Lu na Teta naio berkario ruei ka mia sian van kamiu, jibe kanio nam̄a neberii ka kamiu bunu ruei. <sup>5</sup> Beamu, Jone Baruei naio baruei ea tomu nalo ka uei ga, mia vesiou re, legiano tai avar laka, mia Atua naio rivaruei ea kamiu ve riano, nina ea Niununo Lu.”

### *Yesu bavin ea tiniabene*

<sup>6</sup> Ea bogoti tai bereio, napano atevi nalo abinimej vio takurano naliko Yesu, abika denio, aberenio aberinavo “?Tubo jum̄abe, be bogo nene memedu kanio mia jau kala kito kulo Israel nalo kito ve kiado parinio



tubo bereio, ðeli na maka ve bogo nene vo?"

<sup>7</sup> Ana Yesu berdoðelo, berinavo "Maka ve kenemiu ka mia kamiu kuvijikia bogoti nene nalo ðeli na legiano nalo napano Karañeku naio ga takurano, naio bar batitigio ju ruei ka mia tibe na, tibe na.

<sup>8</sup> Ana na iorou kanio, Niununo Lu naio rimeia ea kamiu, ana bogoti nei naruei kuvijev moroano, ana mia kamiu monokanio kuva kuverial kiniou ea vio Yerusalemo nei, a ea vio dolu nalo nonovio napano yako Yutea vija Sameria, rivano-o rivokar vio dolu nalo na yetemeribia reraio."

<sup>9</sup> A bogo napano naio ber iliano nei bisi, mia nalo aju abitikar naio memedu kia ga vo, ana Atua burular naio bavin, ana melijo tai binimeia midukoio, ana nalo nei maka bunu aial naio bereio. <sup>10</sup> Bogo napano nalo ajuña abitikar kia ga tini-abene, nalo amiilo kolvare ga ka tomu juo na kialo kulunñarauo miuvuruvu, nalo abinimeia abitirikarlo aju naliko, naljuo aberinavo <sup>11</sup> "Ai, kulo Kalele nalo! Kamiu kuvijog re rivova, ana kuvitu kuvisirarag re vavin vesio tibe na. Yesu nene napano Atua burular den kamiu bavin tiniabene, monokanio mia naio rimeia bereio, a mia rimeia bereio tavukia ga na naio bavin tiniabene ruei, napano kumialio vonganei na."

*Taara na atevi nalo*

<sup>12</sup> Ana atevi nalo ajuvan suku nene, napano naio be Suku Na Buruolivi Nalo, nalo aban bereio abatove ea vio Yerusalemo, maka ve tebievi laka, mia jibe ka kilometa menu takurano ga. <sup>13</sup> Nalo abinimeia aboru Yerusalemo, ana aban bereio ea vajoomo na mave ea yimo na ajujuao mugaruei. Mia sialo nalo nene ajibe nei: Pitere, Jone, Yemesi, a Andru; bija Vilip, Tomas, Bartolomio, a Mataiu; a bija Yemesi, napano Alveas kenerinio, bija Saimon napano naio be nalo tai napano jukamu ña amila baravo ka kulo Romo nalo, naliko Jutas, napano Yemesi kenerinio. <sup>14</sup> Ana ea bogoti nalo nei, nalo nei, naliko tire nalo, amidu buronlo bogo nonovio ka volkouano. A Mere, Yesu kenieno, bija Yesu kuruano nalo bunu, amidu buronlo nalikolo.

*Toro na rudu jeleig Jutas*

<sup>15</sup> Be legiano tealo abarlaka ruei, ana namoneano nalo abinimeia vio takurano, nalo abokar titai jibe kanio toromomou takurano duelimo valuo [120] abiniu. Ana ea bogo na, Pitere naio jidom riverii vanlo ka mia ala tunñabe ka aleal toro na mia rudu jeleig Jutas. <sup>16-19</sup> Nina bior iorou

kanio ana Jutas naio mila kanano irñauano va nei nua ruei, naio bulu niatano tai bija puruveru na naio mijevio, ana naio ga mijoru ea vio nene, ana mabono buruðeio, naruei tinieno nalo amolmolou, ana naio ñaro. Mia tomu nalo na vio Yerusalemo amijogial lilianiano nei, mila ana nalo abio niatano nei kanio kanalo iliano, aberinavo "Akeltema," nina be iliano tai na berenio "Vio Na Burukija."

Tenene na Pitere naio jidom riverii vite nene van namoneano nalo, naio jumolu ju kamu ea miralo, mil banlo, berinavo "Bilbilu nalo, nanua Niununo Lu mil ea Teviti niono, naio berii Jutas nene kiano irñauano, napano naio burunñarabo ka tomu nalo abinimeia abokar Yesu, mia iliano nalo nei abinimeia abe riano ruei, kanio mia Iliano Lu monokanio rive riano bogo nonovio. Jutas nene naio be kumemi tai, napano Tubo bitirilar naio ka mia naio rivokar irñauano rivija kumemi, <sup>20</sup> mia vonganei, naio jibe kanio na iliano juo napano joa Niosi na Iouano, napano tinene naio berinavo

*'Bo kanio mia kunuano to kurano ga, mia maka toro tai rijikia toaio,' Iouano 69:25*

mia tinene bunu, napano naio berenio *'Bo kanio toro dolu rudu jeleig.'* Iouano 109:8

<sup>21-22</sup> "Bior vite na, monokanio toro tai rimeia bereio tusol kumemi ka riverial ka verenio Yesu, kiado Tubo, naio meul bereio ea namñariano. Toro nene naio monokanio ve nalo tai napano aju bija kumemi nanua, ea bogo nalo namña Tubo naio joña miel kumemliko. Naio monokanio ve toro tai napano naio joa bogo nalo namña Jone miolioluii kanano varueiano, binimeia bokar legiano na mia Atua burular Yesu den kito, ka naio bavin bereio."

<sup>23</sup> Naruei ana nalo aberial tomu juo nei sialo. Tinene, siano Yoseve, napano abio kanio Basabas, a be siano dolu tai bunu, aber Jastas. A toro tinene siano Matias. <sup>24</sup> Naruei ana nalo abolkouo, aberenio "Atua-o, jau ga kobe Atua Na Masosouano, komijikia venia napano joa tomu nalo kanalo iviso. Mo, kumemi numisidom ka jau kesiloglog van kumemi tomu juo nei na vabe nene napano jau koburu naio ruei, <sup>25</sup> kanio mia naio rivokar irñauano na atevi, napano Jutas juvanio ruei ka rivan ea kanano vio na laveniano nene rimemedu."

<sup>26</sup> Nalo abolkouo bisi, naruei nalo amila jibe kanio namña amiere ññabujo, ana

1:8 Mat 28:19; Mak 16:15; Luk 24:47,48    1:9 Mak 16:19; Luk 24:50,51    1:13 Mat 10:2-4; Mak 3:16-19; Luk 6:14-16    1:16-19 Mat 27:3-8    1:21-22 Mat 3:16; Mak 1:9; Luk 3:21, Mak 16:19; Luk 24:51

Matias siano maluvo. Naruei ana nalo abitirilar naio, ana nalo abuluku naio bija nalo dolu napano duelimo ba tai [11] nei, ana mila nalo duelimo ba juo [12] bereio.

## 2

### *Niununo Lu binimej*

<sup>1</sup> Ea legiano na Jokoluolu Na Uiti Meruo, namoneano nalo abinimej aju vio takurano, <sup>2</sup> naruei vaarakurano ga, be malioano tai maluvo ea tiniabene, napano naio jibe ka burumāra jegi tai miuvuvu, ana malioano nei barko nonovio vio nalo na yimo nei napano ajutano joomo eaio. <sup>3</sup> Naruei ana nalo amial vite tai jibe kanio sebi naio bilvili, ana na sebi nene jerabo ba janea nalo abeve terakurano. <sup>4</sup> Naruei nalo nonovio, Niununo Lu binimej bujo magmago ealo, milalo amil ka iliano dolu nalo, jibe ka napano Niununo nei naio milαιο ana nalo amijikia amil kanio.

<sup>5</sup> Naruei ea vio Yerusalemo, be kulo Israel nalo aju, napano nalo abe tomu na volkouano nalo. Nalo na ajumolu ea vio telabo na yetemeriba nei, nalo abinimej. <sup>6</sup> Naruei nalo nei amijog malioano nei, ana nalo naliko kulo dolu nalo, nalo telabo abinimej ea vio nei. Mia nalo nei amiilo toru laka, bior tomu nalo neibano Niununo binimej ealo, nalo ajunā amil, mia tomu nonovio ga aju amijog kialo iliano nalo memedu ga. <sup>7</sup> Naruei nalo amiilo binvinlo, amemebiju, aberinavo "¡Uerei tomu nalo! Tomu nalo napano ajunā amil jibe na, mia nalo abe kulo Kalele ga. <sup>8</sup> ?Juniabe ana kito roju romijog ka nalo ajunā amil kanio kanado iliano nalo jibe na? <sup>9-11</sup> Kito robe tomu na buruvenuo telabo napano roju nei, na vio Patia, na vio Mitia, na vio Elamo, na vio Mesopotomia, na vio Yutea, na vio Kapatosa, na vio Pontas, na vio Esia, na vio Vrijia, na vio Pamvilia, na vio Ijivi, na vio Krit, na vio Arapia, na vio Lipia ea tivelinio ban yako Saireni, a ea burumāra bulukomeli na vio Romo bunu. Kito tealo robe kulo Israel nalo memedu, mia tealo napano maka ave kulo Israel beamu, mia iorou kanio ana abinimej amidu kanado moneano. Mia kito robiniu, roju romijog ka nalo ajunā amil ka kanado iliano nalo beve terakurano, ajunā aberii burumāra iñauano na tortoru napano Atua naio milαιο." <sup>12</sup> Naruei nalo amiilo toru, a kanalo jidomiano ba kovio, ana maka bunu ajikia ka mia atuñabe naruei, ana nalo ajunā abivika denlo, aberinavo "¡Uerei tomu nalo! ?Venia na jibe na?"

<sup>13</sup> Mia nalo tealo aju bunu abital ealo napano Niununo binimej joalo ruei, aberinavo "A, tomu nalo na amunu ñelea uei ga mila ana abe kodovo jibe na."

### *Pitere mil banlo*

<sup>14</sup> Ana Pitere naliko atevi dolu nalo duelimo ba tai [11] nalo ajumormolu abinimej aju vio nei, ana naio mil jouo banlo, napano berial jibe nei, berinavo "Bilbilu nalo, napano kamiu kube kulo Ju, bija kamiu kulo dolu nalo napano kamiu kumitua vio nei, ea Yerusalemo, kamiu kuviagago vatitigio ka kiniou ka never bisivisii vite nei van kamiu. <sup>15</sup> Tomu nalo nei makanio parilo selivivi tibe ka napano kumitunā kubereno, makanio, bior vonganei naio be ñerenio koveri [9] kavijo kia ga nei vo. <sup>16</sup> Mia vite napano kumialio, nina vite nañia Naverialiano Joel naio berio nanua ruei, berinavo

<sup>17</sup> *'Atua berenio "Ea legiano nalo na bogo na maoro nei, mia kiniou nesian Niunuku van tomu nalo nonovio.*

*Ana mia kenerimiu nalo aver bulavulag kanaku iliano,*

*a mia kenemiu ñeaku nalo amon derevijo aial vite nalo,*

*a kenemiu tormoruo nalo, mia amonovovuii na monovovuano nalo.*

<sup>18</sup> *Riano ga, ea bogo na, mia kiniou nesian Niunuku,*

*rimej ve toru ea ñeaku nalo a merevono nalo ka kanaku iñauano, ana mia nalo aver bulavulag kanaku iliano.*

<sup>19</sup> *Mia kiniou nala vite na iloiano nalo ea vio yauo,*

*vija burutomoluo nalo ea yetemeriba nei,*

*mia ve burukija a sebi a burumāra you banunu ve toru bunu atu.*

<sup>20</sup> *Beamu, ñerenio mia naio rimej ribobogio, a mia siberio naio rimej rivilvili tibe ka burukija.*

*Ana iorou kanio, ana legiano na toru na Atua kanano, napano mia rivu laka, naio mijikia rimej.*

<sup>21</sup> *Mia ea bogo nene, ana toro kei napano verenio rivio ka Atua siano, mia Atua rilarur naio."* Joel 2:28-29

<sup>22</sup> "Tomu nalo na Israel, kamiu kuviagago vatitigio ka kiaku iliano nei. Yesu na vio Nasarete, naio be toro napano Atua jiloglogio meravo ka kamiu ka naio be Naverikariano. Atua mila jibe na nina ea iñauano nalo na moroano bija burutomoluo nalo napano naio mila Yesu miñaukanio ea miremiu nua ruei. Vite nalo na kamiu kumitu kumijikia ruei, <sup>23</sup> mia bogo na Atua midu naio joa

jumemiu, kamiu kumitumolu kumuebin naio ñaro, napano mia kumijamo ka taara va nalo ajukukakar naio ea ñakolkolo. Bogoti napano kamiu maka kuvila vite nei vo, mia Atua naio mijikia ruei ka mia naio rimeitibe na, ana naio mijamo kanio, bior vite na jakii jibe na ka naio jidom kakar batitigio nua ruei ka riñaukanio. <sup>24</sup>A karina, moroano na ñañariano maka rivare ka rivokar Yesu sikili, mia Atua burular naio den ñañariano kiano taniabe jaleleano, ana na mila naio meul bereio. <sup>25</sup>Nina jibe ka Teviti kiano iliano tai re nua, napano naio berii Kristo, napano berinavo

*‘Kiniou nemial ka napano Atua jo bija kiniou bogo nonovio,*

*naio jo tivelinio vameruo na kiniou, ana mila kanaku iviso maka rimemebiju.*

<sup>26</sup>*Jibe na naruei, ana tinieku jaaro, a buruminaku miou,*

*kiniou nebe toro ga, mia nabarkar tinieku jikili ea Atua.*

<sup>27</sup>*Ana jau Atua, mia jau kotuvan re niunuku toa vio na ñañariano,*

*a mia jau kajamo ka re taniabene na kanamo Toro Lu na kanamo iñauano rimenuu.*

<sup>28</sup>*Jau kobisiþe ñarabo nalo na meuliano ka kiniou ruei,*

*a mia tinieku rivujo ka saariano na toru, napano jau koje bija kiniou.’* Iouano 16:8-11

<sup>29</sup>Banalo, kiniou nejidom neverial vite nei rimeravo van kamiu. Korobido nanua beamu, napano siano Teviti, naio ñaro bogo be ruei, ajivinio nua ruei. Ninei be sano ñartanbo nene nei joa kanado vio, jo binimei bokar vonganei. <sup>30</sup>Mia bogo napano naio jo meul kia ga vo, mijikia ruei ka Atua berkar jikili banio, berinavo mia bogo tai, kanano yati tai naio monokanio totano bereio ea kanano jobaro na toru, tavukia napano kanano yati naio rimeitibe parinio tubo ka tomu nalo, tibe ka Teviti napano naio be parinio tubo jukamu. Ana Teviti nene naio be naverialiano tai, <sup>31</sup>mia bogo napano vite nei maka riyotuba vo, naio mial ruei ka mia Atua rila Naverikariano nei naio rimeul bereio ea ñañariano. Tenene na ña Teviti naio berenio ea kanano iliano napano berenio, berinavo Atua naio maka tuvan niununo tobo ea vio na ñañariano, a maka rijamo ka kanano tati tobo rimenuu.

<sup>32</sup>Vite nei naruei kumemi numitumña nuber bulagvulagio, ka Atua bitirililar toro neibano Yesu nene den ñañariano bereio. <sup>33</sup>Atua bitirilario, ana buru lario bavin ruei, midu jo tivelinio vameruo ka naio.

Ana jibe ka napano Atua Karañado berkario, naio sian Niununo Lu van naio, ana Yesu rion Niununo Lu van kumemi, ana Niununo Lu nei naio jo mirñauka vite nalo nei napano ña kamiu kumitumña kumialio a napano ña kumitumña kumijogio.

<sup>34</sup>Ea Teviti kanano iliano nene, naio maka riverii naio, bior napano maka ve naio napano rivavin tiniabene tibe na, mia naio berii Naverikariano nei. A kanano iliano dolu jibe nei bunu, napano naio berinavo *‘Atua Soþi naio ber ka kiaku Tubo, berinavo*

*“Jau kototano tivelinio vameruo ka kiniou, koto ñañariga,*

<sup>35</sup>*mia kiniou nala kanamo uolu nalo amei atibe ka ñadayebe na kovulan jaamo eaio.”* Iouano 110:1

<sup>36</sup>Bior vite nalo nei naruei, mia kiniou nejidom never bisivisii rimeravo van kamiu, ñaratavo vodolu nonovio na Israel, ka Yesu nene napano Atua bitiri lario nua beamu be kiado Tubo a be Naverikariano, ana kamiu kumituku kakario ea ñakolkolo ruei.”

*Tomu telabo amonea Yesu*

<sup>37</sup>Mia bogo napano tomu nalo amijog iliano nei, nalo amijog jibe ka julu kanalo ñaravuo ba bokar kanalo buruiiu memedu, naruei ana nalo abika den Pitere a atevi dolu nalo, aberinavo “?Banalo, mia kumemi nuvila tumñabe naruei?”

<sup>38</sup>Ana Pitere naio ber kalo berinavo “Kamiu nonovio, kuvilig kamiu, kuvan ea varueiano ea Yesu Kristo siano, ka mia Atua riviekokoa kenemiu kariano nalo. A mia Atua naio sian Niununo Lu rivan kamiu, tibe ka kanano ijaiano novo tai van kamiu, <sup>39</sup>bior verikariano napano Atua mila naio mila ban kamiu, a mila ban kenerimiu nalo, a mila bunu ban kulo dolu nalo napano aju koalabo kia ga vo. Verikariano nei naio joa nalo napano kanado Atua Soþi naio joña biolo.”

<sup>40</sup>Ana Pitere joña ber iliano novo telabo ka mia rivurlo amei, ana naio berenio berinavo “Kamiu monokanio kuvituvan kariano na kulo va nalo na vonganei, kamiu kuvilarur kamiu den vironiano napano jo binimei ealo.”

<sup>41</sup>Naruei nalo telabo kalo napano amijog Pitere kanano iliano nei, ana nalo amonea naio kanio, ana abaruei ealo. A ea tomu nalo nonovio napano ajua legiano nei, nalo telabo laka mia titai jibe ka menu tolu [3,000] napano abinimei ajusol lo ea kanalo taara nene.

*Namoneano nalo kanalo tinieano takurano*

<sup>42</sup> Ana namoneano nalo nei nalo aju abokar jikili bajago nalo nene, napano nalo amiagago julaka ka atevi nalo aberlogloglo, a nalo amijeburonlo bogo nonovio ea tinieano takurano novo ea kanaloo taara, a nalo ajumia ajinan vio takurano bogo nonovio, a nalo abarlo ka aura na volkouano nalo bogo nonovio. <sup>43</sup> Naruei atevi nalo amirñauka vite na iloiano telabo, bija burutomoloo telabo, mia tomu nalo amial vite nalo nene, tinielo memebiju toru. <sup>44</sup> Mia namoneano nalo, abe tinielo takurano banbano-o, mia nalo ajumia amijamo ka kanaloo saba nalo ka ve kialoo bitiravirano. <sup>45</sup> Jibe na, ana nalo aju aþilivili ka kialoo borotano nalo a vite dolu nalo na be kialoo, ka avio ka puruveru nene nalo napano abokario van nalo kei napano abe talimñasa ka vite tealoo. <sup>46</sup> Legiano nonovio, nalo nei aju amijeburonlo jibe ka taara takurano, joomoo ea Atua Kunuano Lu, a nalo ajumia ajinan vio takurano ea kunualoo nalo joomoo. A bogo nonovio napano nalo ajumia amijeburonlo jibe na, mia nalo ajaaro toru laka, a bogo nonovio aju abatove ka Atua, a damñariga nalo aber siva toru banio bior meuliano novo nei napano naio jian banloo, <sup>47</sup> ana nalo abameneaa naio kanio. A ea bogo nei, kulo dolu nalo bunoo ajaaro ka kialoo bajago voo novo nei, a legiano nonovio, Atua Soþi naio jo milarur tomu ta bunoo vo, naio jo buru bironloo ea taara na atevi nalo kialoo.

### 3

#### *Javulukoo tai jumoloo miel*

<sup>1</sup> Ana legiano tai, monloglog ee bogo na volkouano na niogoravoo, mñerenio tolu, Pitere naio Jone, naljuoo aju abavin ee Atua Kunuano Lu. <sup>2</sup> Naruei be toro tai napano bogo na naio moloo be javulukoo, mia legiano nonovio nalo ajumia amiduio binimee amebi kanio joa morouoo napano aber “Morouoo Maraii,” nina ee Atua Kunuano Lu. Ana javulukoo nei naio jomñaa miog ijaiano den nalo namñaa ajumñaa aba joomoo ee Yimoo Lu. <sup>3</sup> Naruei naio mial Pitere naio Jone napano naljuoo aju aba joomoo, mia naio miog ijaiano tai den naljuoo. <sup>4</sup> Ana na Pitere naio Jone, naljuoo abamere ee toro nei, ana Pitere naio berkanio, berinavoo “Koig, jau kovitikar kumemi juoo beamu voo.” <sup>5</sup> Naruei naio bitikarlo, jidomii berianñaa mia naio rivokar vite novo tai denloo. <sup>6</sup> Mia Pitere naio berkanio, berinavoo “Koig, kiniouo maka neje puruveru tai leleio, mia vite novo tai takurano ga napano nemijevio ka mia neje vanoo. Vite nene ninei: ee Yesu Kristo toro re Nasarete sianoo, kiniouo neber kaso, jau kotumuloo naruei, keiel.”

<sup>7</sup> Naruei Pitere monokorkoro bokar toro nei jumñano meruoo, ana miija toro javulukoo nei ka naio tumoloo, ana vaarakurano ga, jaano be juoo abinimee abo ajikili. <sup>8</sup> Naruei naio jumoloo vaarakurano ga, jumoloo juoo, miel vonvonio. Ana bogo napano naljuoo aju abano, ana naio jo jakisorlo, ana nalo tolu abano abaa joomoo ee Atua Kunuano Lu, napano mia toro nei jo jaaro toru laka, jo miel, jajabujoo, naio jo miaia Atua.

<sup>9</sup> Naruei nalo napano aju joomoo amialioo ka toro nei napano jomñaa miel a jomñaa miaia Atua, <sup>10</sup> naruei bogo napano nalo abitulubario, nalo aberinavoo “!Mm, kamiuu kuvialio! Nina be toro javulukoo namñaa naoo! Bogo nonovio naio jomñaa miog puruveru tavio ee morouoo na ee Yimoo Lu, vonganeei naio binimee bo jo mieliee ruei.” Naruei nalo amemebiju vattigio bior vite nei napano maluvoo ee toro nei.

#### *Pitere mil banloo joomoo ee Atua Kunuano Lu*

<sup>11</sup> Mia bior tomu nalo amiiloo toru, nalo ajikiti abinimee ee nalo tolu nei ee mñarsuþiki na Atua Kunuano Lu, napano sianoo “Solomon Kanano Marsuþiki.” Ea vio na, toro neibano jomñaa jakii Pitere naio Jone kia navoo. <sup>12</sup> Bogo napano Pitere mial ka tomu nalo nei abinimee vaatara, ana naio mil banloo, berinavoo “?Ai, kito kulo Israel nalo, jumñabe? ? Ka venia ana kamiuu kumiiloo mñeele ka vite nei, ana kubitii mñeele kumemi juoo jibe na? ? Peli kamiuu kumisidom kuberiañaa kumemi juoo ga numilaa toro nei naio mijikia miel ee kenememi moroano ga, þeli na kuberiañaa kumemi juoo nube kulo lu, þeli na venia? !Makanio! <sup>13</sup> Mia Atua ga mila vite nei naruei, Atua napano Epraamoo a Aisak a Yakovoo kanaloo, a napano be Atua na korobidoo dolu nalo kanaloo bunoo. Naio mila vite novo nei ka rivitirilaa kiano toro na iñauano nene Yesu sianoo ee miremiuu nalo. Mia nina be Yesu nene kia ga navoo, napano kamiuu kuburu naio ban ee kiadoo komelii na toro nei, ana Pailat mialioo berenio Yesu naio bo ga, ana berinavoo naio mijikia rivatavio ga bereio, mia ka bogo na ana kamiuu kumil jikili ban Pailat ee mirano, kuberinavoo Yesu naio mila sibi ga, ana kamiuu maka kuvisidom naio. <sup>14</sup> Bekurano ka naio bar sio na ka be Toroo Lu a Toroo Na Memedu, mia ee bogo napano kenemiuu iliano jibe na naruei, kuber maka kuvisidom naio. Mia kuber ka ga Pailat kuberinavoo kamiuu kumisidom toro namñaa muemue toro mñaroo ruei naio mijikia taluuo, mia Yesu naio tobo, ana Pailat naio mijiamoo kanio. <sup>15</sup> Tenene na mia kamiuu

kumuebin ruei Burubati Na Meuliano naio m̄aro, mia iorou kanio ana Atua mila naio meul bereio den nam̄ariano, mia vite nei naruei kumemi numial ka mirememi, ana na numituñia nuber liliano. <sup>16</sup> Mia Yesu siano nene naruei naio mila javuluku neibano kumijikia vatitigio naio, binimej bo, jibe ka napano kumialio nei. Toro nei jaano be juo jikili bo bereio ga ea miremiu vonganei, bior ka ga napano kumemi numonea jikili ea moroano na Yesu siano.

<sup>17</sup> “Mo bo, kuruaku nalo. Kiniou nemi-jikia ka vite nalo nanua kamliko kenemiu tomu na tortoru nalo kumila ka Yesu, kamiu novovio ga kumilaio bior maka kuvijikiaio. <sup>18</sup> Mia nina naio be Atua kanano m̄arabo ka rila iliano nalo napano naio berial nanua ruei nalo amei ve riano. Ea iliano na kanano naverialiano nalo, naio berialio ruei ka mia Naverikariano na kanano naio monokanio rijog rivoa ea mokotenano. <sup>19</sup> Mo, ana kamiu monokanio kuvilig kamiu, monokanio kumei bereio ea Atua, ka mia naio riolkon kokoa kenemiu kariano nalo. <sup>20</sup> Verenio kuvila tibe na, mia Atua naio mijikia sian moroano vou van kamiu ea kenemiu meuliano, a naio mijikia riila kenemiu Naverikariano na naio jji batitigio ruei, nina be Yesu, napano mia naio rimej bereio. <sup>21</sup> Mia Yesu naio monokanio to mave beamu vo, rivano-o rivokar bogo napano mia Atua sidom rila vite nalo novovio amei ave terivou bereio, tibe ka napano naio ber bulagio ruei ea iliano nalo na kanano naverialiano lu nalo re nua beamu. <sup>22</sup> Ana nalo nene tai napano ber jibe na naio be Mosis, napano berinavo ‘Kenemiu Atua Soñi na mia naio rila kenemiu naverialiano tai naio tumolu iviso ka kamiu, tibe ka napano mila kiniou nojumolu noju iviso ka kamiu ruei. Naverialiano nene mia naio ve toro na kenemiu vio ga, a mia kamiu monokanio kuviagago vatitigio ka kiano iliano nalo.

<sup>23</sup> Mia tomu nalo napano maka adu kiano iliano nalo, mia Atua rivuku bulaglo den kiano tomu nalo kar ga ruei, kanio mia nalo ava kovio.’

<sup>24</sup> Tena Mosis naio berenio, a naverialiano dolu nalo bunu, jibe ka Samuel, naliko nalo napano abinimej iorou ka naio, ea kanalo iliano nalo, na nalo ajurñia aberij vite nalo na kiado legiano nalo na vonganei. <sup>25</sup> Verikariano nalo napano Atua jian nua ea iliano nalo na naverialiano nalo na kanano, nalo abe kenemiu, a kamiu kumitu joomo bunu ea virakariano nei napano Atua milaio ruei naliko korobido nalo re nua, jibe ka napano Atua ber ka Epraamo, naio berinavo

‘Mia kiniou nala ka mia ilivuiano rimej van tomu nalo na yetemeriba nei, rimej riyotuba ea ga kanamo bajulukuti ga.’

<sup>26</sup> Memedu ka verikariano na, Atua mila Yesu jumolu ruei jibe ka kanano toro na irñauano, ana naio maka riila naio rimej ea kulo dolu nalo, naio miila binimej ka kamiu jukamu. Naio miila Yesu binimej ka rila rivu laka van kamiu, napano mia naio rivilig kamiu, ka kuvituvani kenemiu bajago va nalo.”

## 4

<sup>1</sup> Ana Pitere naio Jone, naljuoaju ami-oliolu kia ga vo ban tomu nalo, ana kulo lu nalo, naliko natukamuano nakukuano nalo na Atua Kunuano Lu, naliko Satusis nalo, abinimej vaataro ka naljuo nei. <sup>2</sup> Nalo nei tiniel mimi kilkil, kanio naljuo nei ajurñia aberloglog tomu nalo aber jibe ka napano Yesu meul bereio den nam̄ariano, tomu nalo bunu amijikia ameul bereio tibe na. <sup>3</sup> Naruei nalo abokakar naljuo, aburulo aban ea yimo na tetavokoiano ka atu rorea riva rivokar beni kanio, bior be bogo luvu ruei. <sup>4</sup> Mia tomu dolu telabo napano amijog kanalo iliano, nalo amoneaio, mia mirano na suñano nalo ga na amoneaio, vaataro ka rivokar menu jumo [5,000].

*Aburu Pitere naio Jone aban ea kulo Ju nalo kanalo komeli labo*

<sup>5</sup> Ea legiano dolu nene, tomu na tortoru na kulo Israel, naliko kialo navurin̄araboiano nalo, naliko naverloglogiano na tuboiano nalo, abinimej vio takurano nei Yerusalemo. <sup>6</sup> Naruei ana nalo aba ajutano ea komeli na toru naliko Anas, napano naio toru ka kulo lu nalo, a naliko bunu kulo kouo dolu tealo jibe ka Kaivas, a naliko Jone, a Aleksada, a kulo dolu nalo na m̄aratavo na toru na kulo lu nalo nei. <sup>7</sup> Naruei nalo amiila atevi juo nei ajumoluaju iviso kalo, ana nalo abika vikadeniano tai denlo nei. Nalo abika aber “?Kei naio berenio ka kamjuo ka kuvila tibe na van javuluku na? ?A kamiu kumijevio moroano na be?”

<sup>8</sup> Naruei Niununo Lu binimej bujo ea Pitere, ana Pitere naio mil banlo, berinavo “Kiniou nojumolu nojukamu ea miremiu, kamiu tomu na tortoru nalo na vio Israel, a navurin̄araboiano nalo, <sup>9</sup> mia kiniou nemial jibe ka kamiu kumiturñia kubika den kumemi juo, ka jurñabe ka irñauano novo na kumemi juo numirñaukanio ea javuluku nei, mia jurñabe ana kumemi numirñaukanio bo bereio. <sup>10</sup> Mo, kiniou najaaro ga ka nesian verdoñeiano na kenemiu vikadeniano nene, ka mia kamiu

kuvijikiaio, a ka mia tomu na vio Israel bunu ajikiaio. Neber javuluku nene, naina jumolu jukamu ea miremiu ju na, bija jaano novo juo nene, naio binimeu bo ruei ea moroano na Yesu Kristo na vio Nasarete siano. Yesu nene naio nanua kamiu kumuebinio m̄naro ea m̄akolkolo, mia Atua bitiri lario meul bereio den nariariano. <sup>11</sup> Nina jibe kanio na Iliano Lu berii naio, napano berinavo

*'Kamiu tomu napano m̄a kumim̄aukanio yimo,*

*kamiu kubukular belea iesi tai,*

*napano vonganei naio binimeu be m̄artea stovo na ju iviso kanio yimo ruei.'*  
*Iouano 118:22*

<sup>12</sup> Mia maka m̄arabo dolu tai bereio napano mia romijikia rovokar meuliano eaio, bior Atua naio maka sian sio dolu tai leleio van kito ea yetemeriba nei napano mijikia rilalarur kito eaio."

<sup>13</sup> Naruei tomu na tortoru nalo nei amilo toru, bior nalo abitulubar ka Pitere naio Jone naljuo maka ave tomu na tortoru leleio, a naljuo maka ajikia vite ve telabo, mia naljuo nei maka niukniuku rivielo leleio. Naruei nalo amileal bunu ka beamu, tomu juo nei amiel naliko Yesu bogo nonovio. <sup>14</sup> Ana nalo maka bunu ajikia aue dobi Pitere kanano iliano leleio, bior toro napano jaano be juo binimeu bo ruei naio jumolu ju naliko naljuo nei.

<sup>15</sup> Mia nalo aber kanio nalo tolu nei aberinavo nalo avatavio beamu vo, ka mia nalo amijikia averii vite nei. <sup>16</sup> Nalo tolu nei aba tavio, naruei tomu na tortoru nei aberii nalo aberenio "'Mia kito rala tum̄abe ka tomjuo nei? Tomu nalo na Yerusalemo abiniu amijog vite nei ruei ka tomjuo nei amila iñauano na toru tai ban javuluku nei ruei, mia maka bunu rejikia roverbure iliano nei bereio. <sup>17</sup> Mia bo ka kito ralavon ka iliano nei riva lie re bunu van tomu nalo, mo ver tibe na mia roverbure naljuo nei ka mia ail re van tomu nalo averii sio nei Yesu vanlo."

*Komeli na toru berbure Pitere naio Jone*

<sup>18</sup> Ana nalo abio tomu tolu nei ka amei joomo bereio, naruei amil jikili ban atevi juo nei, aberenio, aberinavo "Kamjuo na mia kuverii re bunu Yesu siano van tomu nalo, a kuverlogloglo re ka naio."

<sup>19</sup> Mia Pitere naio Jone, naljuo aberdopelo, aberinavo "'Jum̄abe? ? Peli memedu ea Atua mirano ka kumemi nuvitovon re naio, mia kumemi nuvitovon ga kamiu? Nina bo na mo kamiu kuver vonio tena, <sup>20</sup> mia kumemi nei, kumemi maka nuvijikia nuviturm̄aro leleio ga. Saba nalo

na numial ka mirememi, monoka nuverial vija nana numijog ka tiliniememi."

<sup>21</sup> Naruei tomu na tortoru nalo nei amil jikili lie bereio ban naljuo neibano, aberburelo javukia ga nanua beamu, karina na aberenio naljuo amijikia ava tavio, bior maka bunu ajikia aleal m̄arabo tai ka mia aje vironiano van naljuo, bior ga tomu nalo ajur̄na abamenea Atua bior venia napano maluvo kanio javuluku nei, <sup>22</sup> napano bogo na, naio be kiano yuka duelimo va veri [40] barlaka ruei.

*Namoneano nalo kanalo volkouano*

<sup>23</sup> Bogo napano Pitere naio Jone naljuo aba tavio, naljuo aban bereio memedu ea taara na namoneano nalo. Naruei naljuo aberial iliano nalo na tomu na tortoru na kulo lu nalo kanalo a navurim̄araboiano nalo aberenio, <sup>24</sup> mia bogo napano namoneano nalo amijog iliano nei bisi, ana nalo abolkouo ban Atua. Nalo aberenio "Atua Soḗi, Atua Soḗi, jau kojii tiniabene, a borotano, a tei, a vite nonovio na jua yetemeriba nei. <sup>25</sup> Kumemi numisidomial kanamo Iliano Lu tai, napano korobimemi tormoru Teviti, napano naio be kanamo toro tai, naio berialio ea moroano na Niununo Lu, napano naio berenio jibe nei, berinavo

*'?Bior vaio ana tomu napano maka amonea aju tiniel mimi m̄ele jibe na?*

*?Tomu nalo aju ajidom ka ala iñauano na bova, ana bior vaio ana maka ajikia alaio?*

<sup>26</sup> Parinobuto nalo na yetemeriba nei, nalo ajumolu aju battitigio ka ala mira, ana tomu na tortoru nalo abinimeu vio takurano biorio,

*mia maka ajikia ka nalo ajur̄na amila mira naliko Atua Soḗi, a bija kanano Naverikariano.'*  
*Iouano 2:1,2*

<sup>27</sup> Atua Soḗi, kumemi numial iliano nei beriano, naio memedu ga ka kenememi bogo na vonganei, bior memedu ea bulukomeli nei, Erot naio Pontas Pailat, naliko kulo Israel nalo, naliko kulo dolu nalo nei, tiniel mimi toru ka Toro Lu na kanamo iñauano nei Yesu, napano naio be Naverikariano napano jau komioakoio, ana nalo ajidomii kakario ka mia ala lelan naio. <sup>28</sup> Nalo nei abinimeu vio takurano ka ala tibe na, mia nalo amila memedu ga ka venia napano jau koje kojidomii kakario ruei beamu, ana jau kobitirilar kober mia monokanio tibe na. <sup>29</sup> Mia Atua Soḗi, kumemi nubika denso ka tiemo monmaio vatitigio rivu ka iliano nalo na jikirkili nei napano nalo ajur̄na aberio ka kumemi, mia kumemi numisidom ka jau kajai kumemi, tomu na kanamo iñauano, ka mia kumemi

nuverial kanamo iliano, ka mia tiniememi rimemebiju re, a numerou re. <sup>30</sup> Mia kumemi nubika bunu denso ka jau ke-sianlar juñamo, kala tomu na mieiano nalo ajog rivu bereio, a ka mia kumemi numijikia nuvila burutomoluo nalo ðeli na vite na vremeniano nalo, ea kanamo Toro Lu na kanamo inġauano nei Yesu siano.”

<sup>31</sup> Mo bogo napano nalo abolkouo bisi, ana vio napano aju abior eaio mikulkulu, naruei Niununo Lu binimej bujolou ealo, milalo abano aberial Atua kanano iliano, napano kanalo jidomiano jikili lie ea naio.

*Namoneano nalo amijja bitiraviranlo ea vite nalo*

<sup>32</sup> Naruei ea bogoti nei, taara na namoneano nalo, kialo meuliano nalo binimej bo laka, jibe kanio tinielo takurano ga, a be kialo jidomiano takurano ga, mila ana maka toro tai napano mia sikili ka sidom riverenio ka vite nalo napano be kanano mia nalo abe kanano ga, mia nalo aju amijamo ka kanalo saba nalo be kialo bitiraviranlo. <sup>33</sup> Mia atevi nalo aju aber bulavulag ea tomu nalo miralo, ka kiado Tubo Yesu, naio meul bereio den narariano, mia kanalo iliano nene be moroano toru eaio, mia namoneano nalo amial ka bogo nei, Atua naio jo milivu toru kalo ea kiano tiniememiano banlo. <sup>34</sup> Maka nalo tai ea kanalo taara, napano juñano ve bulati ka vite tai, bior tomu nalo napano be kanalo borotano ðeli na kunualo, aju aþilivili bulagio ka vite nalo nei, ana nalo ajumia abar puruveru nene nalo abinimej, <sup>35</sup> ajuvanio joa atevi nalo juñalo. Mia iorou kanio, ana atevi nalo abarburevure puruveru nalo nene ban namoneano nalo tealo napano juñalo bulati ka vite nalo.

<sup>36</sup> Nalo tai nene napano naio jakij bajago na, naio be Yoseve, napano miyotuba ea bajulukuti na Livai, abar naio ea uleule na Saipras, mia nina naruei napano atevi nalo ajisia ka sio dolu bereio be Barnabas, napano sio nei sano nioti nene berenio “Toro narña miijalar toro dolu kiano jidomiano.”

<sup>37</sup> Naio mila inġauano novo tai jibe na naruei, napano naio þilivililar ka kanano niatano tai, ana bar puruveru nene abinimej, juvanio joa atevi nalo juñalo.

## 5

*Ananaias naio koano Savira*

<sup>1</sup> Mia be toro dolu tai, siano Ananaias, napano koano siano Savira, naio bunu þilivililar ka niatano tai napano be kanalo naljuo, <sup>2</sup> ana naio bar puruveru nene togio, naio bar binimej juvanio jua atevi nalo juñalo. Mia naio bar van puruveru

na borotano nei togio, bokar bokanio be naljuo kanalo, a koano tira bunu naio mijikia vite nei, naio jaaro toru kanio. <sup>3</sup> Naruei Pitere berkanio, berinavo “? Ananaias, juñabe ana jau komijamo ka Siñaro binimej mila lelan kiamo iviso jibe na, ana jau komila sibilili Niununo Lu, ka napano jau kobokar bokanio puruveru na borotano nei togio nene? <sup>4</sup> !Komialio kiana! Bogo na jau maka koþilivililar ka niatano nei vo, be kei kiano? Naio be kanamo ga. Mia bogo napano jau koþilivililar kanio, puruveru nene bunu jua kei juñano? Naio ju kia ga vo ea juñamo. Mia bogo na jau koberkar ka kavar nonovio van Atua, jau monokanio kala tibe na naruei. ?Ana venia na mila kiamo jidomiano napano jau komila sibi ga bereio jibe na? !Mia jau maka kala sibilili ga tomu nalo, mia jau komila sibilili Atua memedu ga!”

<sup>5</sup> Bogo na Ananaias naio mijog iliano nei, vaarakurano ga naio mijoru batove ea borotano, naio m̄arodobi. Mia nalo napano amijog lilianiano nene, amemebiju toru. <sup>6</sup> Naruei ana kialo m̄eaku nalo ajumolu, amijuvuloko tati na naio, ana amiduio aba tavio, aba ajivinio.

<sup>7</sup> Vaataro ka m̄erenio ve tolu rivar-laka, ana koano tira Savira, napano naio maka rijikia vaio napano maluvo ka koano, naio kija binimej joomo. <sup>8</sup> Ana Pitere naio bika denio, ber “Savira, jau koverial ka kiniou. ?Nina be puruveru vodolu na kenemiu niatano nene na, ðeli na makanio?”

Tira nei naio bunu mila sibi, berdoþe berinavo “Makanio, tenalo nei ga binju be kiaku.”

<sup>9</sup> Ana Pitere naio berkanio, berinavo “? Juñabe ana kamjuo kumila sibi jibe na? !Kamjuo kubironkar ka mia kuvila von Atua Soþi kanano Niununo! ?Kojog tomu nalo na aju amiel abinimej ea m̄aratavo? !Nalo ajivin koamo ruei abinimej, mia vonganei na, mia nalo aþierso bunu kava tavio!”

<sup>10</sup> Mia bogo napano tira nei naio mijog Pitere kanano iliano nei, ana mijoru memedu ea Pitere jaano, m̄arodobi. Mia m̄eaku nalo nei abinimej joomo bereio, ana bogo napano nalo amial ka tira bunu m̄aro ruei, ana aþier bunu taniabene ba tavio, aba ajivinio jo tivelinio ka koano surñano. <sup>11</sup> Naruei namoneano nalo napano ea lotuano, a kulo dolu nalo bunu napano amijogial lilianiano nei, nalo amemebiju toru laka.

*Burutomoluo nalo a vite na iloiano nalo*

<sup>12</sup> Mia ka bogo nei atevi nalo aju amila burutomoluo telabo na Atua kanano moroano, bija vite na iloiano telabo bunu, ea tomu nalo miralo. Mia bogo nonovio, nalo nei bija namoneano dolu nalo ajurña ajusol nalo vio takurano ea Solomon kanano Marsuñiki, ea Atua Kunuano Lu. <sup>13</sup> Ana tomu nalo telabo aju abatove kalo, mia nalo napano maka amoneaio, nalo telabo amerou ka avan aiaburelo. <sup>14</sup> Mia dañariga, tomu tealo a tire ajurña amonea Yesu, nalo aju abinimei telabo telabo lie vo, mia nalo na, Atua Soñi naio jusol nalo ea taara na namoneano nalo kanalo taara. <sup>15</sup> Bior vite nalo nei bunu, tomu nalo aju aburu kialo tomu na mieiano nalo abinimei, ana amidu nalo aju amon ea ñalo jog a ñalo yebe nalo, ea ikinñarabo. Nina nalo amila jibe na ka bogo na Pitere naio riel sel ea vio nei, mia verenio niununo nene ga tokol nalo tealo, mia nalo avu bereio. <sup>16</sup> Mia be tomu telabo bunu ea ñarkomeli sesa nalo na aju jeliviv Yerusalemo, napano nalo abinimei bunu, a nalo aburu kanalo tomu na mieiano nalo abinimei, bija nalo tealo napano siñaro ban ealo, ana atevi nalo amilarurlo abo bereio.

*Tomu na tortoru nalo na vio Israel amiadikakar atevi nalo*

<sup>17</sup> Ana parinio toro lu, naliko kanano bilbilu nalo, ninei be Satusis nalo na vio na, nalo amijoku toru laka ka atevi nalo, <sup>18</sup> ana aba amiadikakarlo, abukulo aba joomo ea yimo na teta-vokoiano, naliko tomu na bova nalo napano nalo ajua ruei. <sup>19</sup> Aju ga banbano-o na ka bogiano, ana Atua kiano nailiano tai binimei, ana betavo ea ñaratavo na yimo na tetavokoiano nei, ana naio jukamu ka atevi nalo aba tavio bereio. <sup>20</sup> Naio ber kalo, berinavo “Kamii kuva kuvitumolu kuvitu joomo bereio ea Atua Kunuano Lu, kamii kuverial iliano na meuliano vou nei van tomu nalo bereio.”

<sup>21</sup> Ana atevi nalo amonmonea iliano nei, mia bogo na viomijeni mermeravo kia ga vo, ana nalo aba joomo ea Atua Kunuano Lu bereio, nalo aju amioliolu.

*Komeli na toru na Israel mil ban atevi nalo*

Ana ea kavijo nene kia ga vo, ana parinio toro lu naliko kanano bilbilu nalo nei, abio navurinñaraboiano dolu na Israel nalo ka nalo ameí atutano ea kanalo komeli na toru nei. Nalo nei abe tinielo ka aberiamña atevi nalo aju kia ea tavokoiano vo, mia bogo napano nalo abinimei vio takurano ruei jibe na, ana ajuvan iliano ban ea

yimo na tetavokoiano ka mia kukuano nalo avurulo ameí.

<sup>22</sup> Mia bogo na nalo aba aboru ea yimo na tetavokoiano, mia nalo maka ajikia aleal lo. Ana nalo abinimei bereio ea komeli, amila iliverioiano, aberinavo <sup>23</sup> “Bogo na kumemi nuba nuboru ea yimo na tetavokoiano, mia kumemi numial ka napano ñaratavo naio birako batitigio jo, napano abukario bo ga jo, mia kukuano nalo na ñaratavo nene ajumolu ajikili aju. Mia bogo na kumemi nubetavo, nuba joomo, mia maka bunu nuvia toro tai to.” <sup>24</sup> Mia tomu na tortoru na kulo lu nalo, a natukamuano nakukuano na Atua Kunuano, bogo na amijog iliano nei, maka bunu ajikia juñabe ka atevi nalo nei naruei.

<sup>25</sup> Mia ka bogo na, ana toro tai binimei berial lilianiano dolu tai banlo, ber “!Jerei tomu nalo! Tomu nalo napano kuburulo aban ea yimo na tetavokoiano, nalo ajumolu aju joomo ea Yimo Lu, ajurña aberloglog tomu nalo bereio ruei!” <sup>26</sup> Ana bogo napano natukamuano nei mijogio, naruei naio naliko kanano kukuano nalo aba aburu atevi nalo neibano abinimei bereio, mia nalo amila ea bajago na melumu ga, bior ka nalo amerou ka mia tomu nalo na vio nei atubalo ka puruveru riviorio.

*Aburu atevi nalo aban ea komeli na toru bereio*

<sup>27</sup> Nalo nei aburu atevi nalo abinimei joomo, ana amila lo ajumolu aju kamu ea tomu na tortoru nalo nei miralo. Ana na parinio toru lu nei naio joña bika denlo, berinavo <sup>28</sup> “? Juñabe? Kumemi nuberbure kamii kirisikili ruei, ka mia kamii kuverii re bunu sio nei van tomu nalo, ñeli na kuveriloglog tomu nalo ka naio. ? Mia vonganei juñabe? Kamii kumila mia vio Yerusalemo naio bujolou ruei ka kenemii iliano nalo, a kamii kumitu kuberenio kumemi naruei nube burupati na toro nei kiano ñariano.”

<sup>29</sup> Mia Pitere naliko atevi dolu nalo aberdoñe, aberinavo “Mia monokanio kumemi numonmonea Atua loa ka napano numonmonea kulorinio. <sup>30</sup> Kamii kumuebin Yesu ruei, kamii kumitukukakar naio ea ñakolkolo, mia Atua Soñi napano naio be korobido nalo kanalo, naio mila naio meul bereio den ñariano. <sup>31</sup> Atua nene naio bitirilar naio ruei ka naio to tivelinio vameruo na naio, ka naio ve kiado Navurinñaraboiano a ve kiado Ioruriano. Atua naio mila jibe na ka kulo Israel nalo amijikia aviliglo, a ka mia naio mijikia riviekokoa kanalo kariano nalo. <sup>32</sup> Ana kumemi, kumemi tomu na numial vite



nalo na ka mirememi ruei, a numitu ka ña nuverialio van tomu nalo, nina kumemi liko Niununo Lu napano Atua naio jian ruei ban tomu nalo napano amonmonea naio.”

*Kamaliel naio mil ban komeli na toru nei*

<sup>33</sup> Bogo napano nalo na komeli na toru nei amijog iliano nei, mia iliano nei jululo ñiele, mila ana tiniel mimi ñiele ka atevi nalo, ana nalo ajidom ka atiburelo ka mia añaro. <sup>34</sup> Mia nalo tai kalo, napano nalo ajurña abatove ka naio, naio be Vari-sis, naio be naverloglogiano na tuboiano, siano Kamaliel, naruei naio jumolu berinavo avuru atevi nalo ava tavio beamu vo. <sup>35</sup> Ana naio mil ban komeli na toru nei, berenio “Tomu na tortoru na Israel, miremiu ea kamiu, kamiu monoka kuvisidomii vatitigio rivu ka vite napano kumisidom ka kuvilaio ka nalo na. <sup>36</sup> Kamiu kuvisidomii toro nei Tutas. Nanua beamu kanio, maka vesiou laka, naio jumolu, ber naio be toro tai, a be titai jibe ka tomu nalo duelimo toromomou veri [400] napano aba abijurukario. Mia tomu nalo amuebin naio ruei, mia amijil dedade kanano tomu nalo abeve terakurano, mia kanano taara nei binimej be kurano ruei. <sup>37</sup> Iorou ka nina, nina ea bogo napano abuluku tomu nalo, Jutas nei na vio Kalele, naio bunu jumolu, buru tomu nalo ajakisor naio. Mia iorou kanio, ana nalo amuebin bunu, a nalo amijil dedade ea kanano tomu nalo bunu abeve terakurano.

<sup>38</sup> “Mo ana, ea vite nei napano rojumña roberio, kiniou neber jibe nei, neber mia kito rotuvan tomu nalo na atu ga tibe na, mia rala re titai kalo. Nina bior ka ver kialo jidomiano ñeli na kialo iñauano nei rimaluvo ea ga toro, mia vite nei bunu naio monoka rijoru, <sup>39</sup> mia verenio naio miyotuba ea Atua, kito maka rejikia roverbureio. Mia verenio kito ralavonio ka roverbureio, ñeli mia releal ka kito rojuko vio ka Atua kiano iñauano novo tai.”

*Abitiv atevi nalo*

<sup>40</sup> Ana komeli na toru nei mijog iliano masosouano na Kamaliel nei kiano, napano naio berenio mia nalo ala re titai ka atevi nalo nene, mia nalo aberenio mia atakii ga tibe kanio napano naio berenio. Ana nalo abio atevi nalo ka amei joomo bereio, ana ajan vironiano telisu banlo, abitvivo, amil kilkil banlo bereio, aberenio averloglog tomu nalo re bunu kanio sio nei Yesu, avona bisi, ana amiila bulaglo abano.

<sup>41</sup> Ana atevi nalo aba tavio den burumñara komeli nei, mia nalo maka ajog rivova, amijog bo laka ga bior ka Atua

naio mialo abe verare ka avokar imouiano ea tomu nalo miralo, kario Yesu siano. <sup>42</sup> Ana nalo maka ajogkar kialo tomu na tortoru nei, ana legiano nonovio, joomo ea Atua Kunuano Lu, a joomo ea tomu nalo kunualo, maka nalo atuvan leleio ka napano nalo ajurña aberloglog tomu nalo, napano nalo ajurña amioliolu ka Ioluanou Vou na Yesu, ka naio be Naverikariano.

## 6

*Amioako tomu na ijaiano nalo aluo*

<sup>1</sup> Ana ea bogo na, Yesu kanano naia-gagoano naloaju abinimej telabo lie vo, mia baravo tai jumolu vivo kalo. Mia nalo tivelinio be kulo Ju nalo napano nalo amil jelea Kris, a tivelinio dolu naio be kulo Ju nalo napano amil jelea ga kanalo iliano napano Ipru. Ana nalo napano amil jelea Kris, nalo ajurña amila vukuleleano, nalo aberenio legiano nonovio, bogo napano nalo abio ka bulag kanalo ijaiano telisu ban taanou nalo, mia nalo maka ala rimemedu van kanalo taanou nalo. <sup>2</sup> Ana atevi duelimo ba juo [12] nalo amijog iliano nei, abio burumñara taara na naia-gagoano nalo nonovio ka nalo amei vio takurano, ana amil banlo, aberinavo “Banalo, maka rivu ka kumemi nuvituvan iñauano na verialiano na Atua kanano iliano, kanio kumemi nuvitu nuvitikar ga iñauano dolu nalo na. <sup>3</sup> Verenio tibe na, kamiu monokanio kuvileal tomu ve aluo ea kamiu, napano sialo bo ea tomu nalo miralo, a napano abujo ka Niununo Lu, a napano abarlo ka iñauano, kanio mia kumemi nuvitiri bulaglo ka nalo ave taara sesa ka avitikar vatitig iñauano dolu nalo nei. <sup>4</sup> Ana tibe na, mia kumemi atevi nalo, kenememi vivo vodolu naio mijikia tumolu tu sikili bogo nonovio ea iñauano nana volkouano a nana verialiano na Atua kanano Iliano Lu.”

<sup>5</sup> Naruei nalo napano ea burumñara taara nei, nalo amijog jidomiano nei, mia ajaaro toru laka kanio, ana amileal tomu aluo jibe kanio napano nalo aberenio. Nalo aluo nei napano amilealo, nalo tai be Stevin, napano be toro tai napano jikili ka monmonea, a naio bujo ka Niununo Lu, bija Vilip bunu, a Pokaras, a Nikeno, a Timon, a Pamenas, a Nikolas toro na vio Antioko, napano naio maka ve toro Ju, mia naio monea kulo Ju nalo kanalo Atua ruei. <sup>6</sup> Naruei nalo aburu nalo aluo nei abinimej ajumoluaju kamu ea atevi nalo nei miralo, ka atokol parilo, a aioakolo.

<sup>7</sup> Ana vite nei napano amila, mila ka bogo nonovio, Atua kanano iliano naio jo jeliviv ea tomu nalo, a taara na naia-gagoano na Yerusalemo naio jo binimej

telabo lie vo, bano-o bokar bunu kulo lu nalo telabo napano kolar Ju nalo kanalo, nalo bunu amijeivio moneano.

*Kulo Ju nalo tealo aburu Stevin ban ea kanalo burum̄ara komeli*

<sup>8</sup> Naruei nalo aluo nei tai, napano Stevin, naio be toro tai napano bujo ka Atua kiano tiniememiano, a bujo bunu ka burum̄ara moroano na Atua kiano, mila ana naio miñauka burutomoluo telabo a vite na iloiano bunu ban tomu nalo. <sup>9</sup> Mia kulo Ju nalo tealo napano ajua vio na, maka asaaro ka Stevin leleio, nalo naruei ajikar ka ajidom ala siniabu kanio. Nalo nei, abe kulo Saireni, a kulo Aleksadria, napano naloaju Yerusalemo ea bogo na, a naliko kulo Selisia tealo bunu, a kulo Esia tealo, napano abinimeia amiasol bijalo. Telabo ka nalo nei nalo ajibe ka bagaro takurano ga, napano ajuburon vio takurano julaka ea yimo na volkouano na kulo Ju nalo kialo tai. <sup>10</sup> Mia nalo nei amila vio ka averbure Stevin, bano-o mia kiri deio ga, bior Niununo Lu naio mila Stevin be masou batitigio ea kiano iliano nalo, mia kialo ilimimiano nalo nei maka ajikia atuvulu naio leleio. <sup>11</sup> Ana nalo aba amieal tomu tai bereio ka ava ala sibilili tomu na tortoru nalo, ana nalo nene aba aberial aberinavo "Kumemi numijog toro na naio mil niegeniege Mosis kiano tuboiano, a naio mila searia Atua kiano tolu bunu."

<sup>12</sup> Ana ea bajago na, amila jibe ka navurim̄araboiano nalo, a naverloglogiano nalo na tuboiano nalo, bija tomu dolo nalo telabo, tinielo bilulu ñele ka Stevin. Ana nalo abinimeia abokakar naio jikili, ana aburu ban ea komeli na toru na kulo Ju nalo kialo. <sup>13</sup> Ana ea bogo na naruei, ana ilisibiano naloaju amalmaluvo telabo lie vo, napano amil aber niegeniege Stevin, aberinavo "Bogo nonovio ga, toro na naio jom̄a mili niegeniege kiado Atua kunuano Lu, bija Moses kiano tuboiano. <sup>14</sup> Mia kumemi numijog ka napano naio berii kiado Atua Kiano Yimo, napano naio berenio berinavo mia toro Nasarete na napano Yesu, mia naio rila bulag Yimo Lu nei, a mia naio rivilig bunu kiado bajago moruo nalo napano Mosis jianio nanua bogobe ruei, napano kito robokar batitigioaju binimeia bokar vonganei. !Toro nei Stevin naio jom̄a ber bulavulag vite nalo na, naio jo mila lelan kito toru laka nei!"

<sup>15</sup> Nalo amijog iliano nei, naruei aṗilig pariparilo ka avitakar Stevin, ka naio rudu kiano verdoṗeiano kanio iliano nei, ana bogo napano abitikario, nalo amialio ka napano mirano binimeia jibe ka mirano nailiano tai garuei.

## 7

*Stevin kiano iliano: Naio jukunu ka Epraamo jukamu*

<sup>1</sup> Naruei ana parinio toro lu nei naio bika den Stevin, naio berenio berinavo "?Ana jau, jau kober jur̄iabe? ?Riano ka napano jau kojom̄a kobuku bulavulag iliano nalo na jibe ka na nalo ajum̄a aberenio na, ṗeli na makanio?"

<sup>2</sup> Ana na Stevin naio berdoṗe, berenio berinavo "Karam̄aku nalo a kuruaku nalo, kamiu kuviagago ka kiaku verdoṗeiano beamu vo. Mia kiniou neverii korobido moruo nalo re nua tukamu vo. Nanua nanua laka, tormoruo Epraamo naio joa kanano buruvenuo napano Koltia, ea burum̄ara vio napano Mesopotomia, ana Atua na mermerano na kiado naio maluvo ka naio, berial kanio, berenio berinavo <sup>3</sup> 'Jau monoka kataluvo den kiamo m̄aratavo, a den kanamo vio, ka kavan ea buruvenuo tai napano mia kiniou nesiloglogio kaso.' <sup>4</sup> Naruei Epraamo jaluvo den Koltia, naio ba joa bulukomeli na Aran jukamu, banbano-o karam̄ano m̄aro, ana Atua buru naio binimeia joa buruvenuo nei napano kito rojuao vonganei.

<sup>5</sup> "Mia bogo napano Epraamo naio binimeia bokar vio nei, mia Atua maka rudu nitano tai ve telisu leleio vanio, a ea bogo na Epraamo naio maka rivar kenerinio bunu vo, mia naio bokar jikili ga verikariano napano Atua naio ber kanio nanua ruei, napano berkar berinavo mia buruvenuo vodolu na vio nei ve Epraamo kiano, vija kiano bajulukuti nalo napano mia nalo avavavin amei iorou ka naio. <sup>6</sup> Iliano napano Atua ber ka Epraamo ka bogo na jibe nei, napano Atua berenio, berinavo

'Mia kanamo bajulukuti nalo na mia ava atua buruvenuo dolo, a mia nalo aim̄au kurano ga van sano tubo nene nalo,

napano bisi ana mia nalo ala kikilo ñele rivano-o rivokar yuka ve duelimo toromomou ve veri [400].

<sup>7</sup> Avona bisi, ana mia kiniou netibure buruvenuo nene, mia nesian viro-niano van kiano tomu nene nalo, ana na mia novuru bulag kanamo bajulukuti nalo bereio,

ka nalo amei bereio a alotu van kinio eua kenemiu vio kar garuei nei napano nejian ban kamiu.'

<sup>8</sup> "Mia ka bogo na naruei, Atua berenio bajago na pakuveuano ban Epraamo, javukia tovorovo tai ka virakariano nei napano Atua mila kario bija naio, mia bogo napano kenerinio Aisak nene naio moluo, bogoti aluo barlaka bano, ana Epraamo mila pakuveu kanio. A karina, Aisak

bunu mila jibe na ka kenerinio Yakovo, mia iorou kanio, Yakovo bunu naio mila ban kenerinio duelimo ba juo [12], napano vonganei kito rojuma robiolo ka parinio karamiādo nalo re beamu laka.”

*Stevin naio berii Yoseve*

<sup>9</sup> Mia Stevin naio joña mil kia ga vo, naio berenio berinavo “Tete nei Yoseve, naio be parinio karamiādo nalo nei tai, ana kuruano dolu nalo amijoku mēle ka naio, ana aṗiliṗililar ka naio ban ka riva riñau kurano ea buruvenuo na Ijivi. Mia Atua jo bija naio ea vio nene, <sup>10</sup> mia miija naio ka kiano bogokouo nalo na jikili nei, banbano-o mila napano parinio tubo na vio Ijivi nei, napano siano Vero, naio mial Yoseve kiano masouano bo laka, ana Vero nei naio midu iñauano nalo na tortoru na vitikariano na kanano buruvenuo ban ea Yoseve juñano naio takurano.

<sup>11</sup> “Ana ea bogo na, ana be buruñara vitu tai ea vio Ijivi a ea vio napano korobido nalo kanalo Kenano, ana nalo amijog bova mēle biorio, nalo amial ka napano abe deio naruei, nalo maka lele salo sinaniano tai bunu. <sup>12</sup> Mia tormoru Yakovo naio mijog ka napano be sinaniano na ṗiliṗiliano tealo ju keano Ijivi vo, naruei naio miila kenerinio nalo, napano abe parinio karamiādo nalo, ka nalo avavin mave Ijivi ka avar tealo ve salo. Nina be kialo ieliano motiano garuei napano aba Ijivi. <sup>13</sup> Ea kialo ieliano valuo nene, Yoseve naio jiloglog naio ka kuruano nalo, a tukunuaano na Yoseve kiano m̄aratavo nalo nei bano-o bokar Vero bunu. <sup>14-15</sup> Ana Yoseve naio juvan iliano ba ban karamiādo Yakovo, berinavo naio naliko kanano m̄aratavo nalo monoka amei atu naliko naio, ana na Yakovo nalo abokar duelimo va aluo ba jumo [75], napano abavin aba aju Ijivi. Nalo aju banbano-o, ana iorou kanio Yakovo nei naliko kanado tormoru dolu nalo nei nalo am̄arm̄aro ga ea vio nei. <sup>16</sup> Mia iorou laka kanio, ana na nalo abar burio nene nalo aban bereio ea kanalo vio nei, ea vio tai siano Sekem, ana ajivinlo ea pakeltavo tai napano Epraamo naio bululario nanua ruei den kulo Amaro.”

*Stevin naio berii Mosis*

<sup>17</sup> Mia Stevin naio joña mil kia ga vo, naio berinavo “Kanado tomu nalo ajua vio Ijivi ka yuka telabo bereio vo, naruei nalo amiluo abinimeī napano nalo telabo lie vo, ana Atua naio mialio berinavo naio be bogo memedu naruei ka naio rila tibe ka napano naio berkario ban Epraamo nua ruei, berinavo mia naio rivurbulag kanano bajulukuti nalo den kanalo iñauano kurano ga. <sup>18</sup> Ana ea bogo

na, parinio tubo vou tai naio jumolu ea vio Ijivi ruei, napano naio maka rijikia tukunuano na Yoseve kanano re nua a bija kanano m̄aratavo nalo, <sup>19</sup> ana naio mila bova mēle ban kanado bajulukuti nalo re nua nei, napano bututualo ka atuvan lelan kenerilo nalo ka am̄arm̄aro ka mia amei re vetelabo.

<sup>20</sup> “Mia memedu ka bogo na, Mosis naio moluo, napano naio be tete mudomudomu kirinovo tanea. Ana karamiādo naio kenieno, abe juo ajivan naio joomo ea kunualo, banbano-o bokar siberio tolu, <sup>21</sup> mia karina, maka bunu ajikia ala titai, ana na monoka atuvanlaro. Mia karina, parinio tubo kenerinio vevinio nei ga milealio, ana na midular Mosis ana bitikar luṗilupuṗo ka ve kanano. <sup>22</sup> Naio jo miluo bavin jibe na banbano-o, ana nalo ajumiā aberloglogio ka masouano na kulo Ijivi nalo kanalo, ana naio binimeī be toro novo tai ea ilimasouano a ea kiano iñauano bunu.”

*Mosis naio milavon ka jidom rilarur kulo Israel*

<sup>23</sup> Ana na Stevin naio berenio, berinavo “Naruei ka bogo napano Mosis kanano yuka binimeī bokar duelimo va veri [40] titai jibe na, ana naio tinten maio ka kulo Israel dolu nalo napano aju keano, napano ajibe ka kuruano nalo, ana naio joña jikar ka rivano m̄a miamiadu kalo kijakija. <sup>24</sup> Ana bogo tai naio bano, mial ka napano toro Ijivi tai jo mue toro Israel tai, ana naio ba miija toro re Israel nei, ana milameran ban toro re Ijivi nei, ana muebinio m̄aro. <sup>25</sup> Nina bior ka napano Mosis naio jidomii ruei berinavo mia Atua rivitirilar naio ka rilarur kiano tomu nalo nei, ana ka bogo na, kulo Israel nalo maka avitilubar Mosis vo ka mia naio rila tibe na vanlo.

<sup>26</sup> “Ana ea legiano na beni nene, naio mial kulo Israel juo napano ajumiā ajukulo, ana naio ban ka jidom rila naljuo nei avanjuñalo bereio, ana ber kalo, berinavo ‘Ei, kamjuo kuviagago. ?’ jibe ka kamjuo kube kuruemiu ga na, juñabe ana kamjuo kumue lelan kamiū jibe na?’

<sup>27</sup> “Mia nana napano mila maka rimemedu ban dolu nene, naio jubonlar Mosis, naruei berkanio, berinavo ‘? juñabe, kei bitiri larso ka mia kove kenememi toro na toru, a ka ketibure kumemi tibe na?’ <sup>28</sup> Peli jau kojidom kouebin kiniuo tibe ka napano jau komuebin toro re Ijivi naniovo, a?’”

<sup>29</sup> “Telikiti napano Mosis naio mijog iliano nei, mijog bova toru laka, ana jumolu buro den vio Ijivi, beven kanio ba joa buruvenuo dolu tai siano Mitiano, ana joa

vio na kirisiou kija, ana kenerinio naljuo amoluo ea vio na.”

*Mosis mijog Atua mil banio*

<sup>30</sup> Ana Stevin naio berinavo “Naruei Mosis joa vio na banbano-o bokar yuka duelimo va veri [40] bereio, karina legiano tai ana naio joa vio yauo tai, vaataro ka buruñara burusuku na vio Sinai. Naruei naio mial nailiano tai maluvo kanio ea sebi tai napano jijen buruiesi tai. <sup>31</sup> Ana Mosis naio miilo toru ka vite nei napano mialio, ana ba vaataro ka buruiesi nei ka rivitii batitigio. Ana naio mijog Atua Soñi joono, napano berenio, berinavo <sup>32</sup> ‘Kiniou nebe Atua ka korobumo tormoruo nalo, jibe ka Epraamo, Aisak, a Yakovo.’ Ana Mosis naio memebiju toru, naio merou ka rivitikario. <sup>33</sup> Ana Atua Soñi nei berkanio bereio, berinavo ‘Jau keielar kanamo kulujabue, bior vio napano jau kojumolu kejikili kojuaio na, naio be vio lu tenia. <sup>34</sup> Mia kiniou neber kaso, neberinavo kinio nebitii batitigio ruei jogaiaio nalo napano kanaku tomu nalo ea vio Ijivi kanalo, a nemijog ruei kanalo tegiano nalo. Naruei kiniou nojo nebinime i naruei ka novuru bulaglo, a jau keialio, kiniou nojo nemiilaso bunu ka javan bereio ea vio Ijivi tukamu, ka jau kove kanaku toro na rila iñauano nei.”

*Kulo Israel nalo maka asidom Mosis*

<sup>35</sup> Mia Stevin naio joñia milili kia ga vo banlo, berinavo “Mo Mosis na, naio naruei napano beamu nalo maka asidom naio, napano nalo aberenio iliano nei naruei, aberinavo ‘?Jumñabe, kei bitirilarso ka kove kenememi toro na toru, a ka jau ketibure kumemi?’ Mia Atua naruei napano miila nailiano binime i joa buruiesi napano jo bovago na, ka rivitirilar Mosis bereio ka naio ve tubo a rive naioruriano na kulo Israel nalo. <sup>36</sup> Ana nina be Mosis nene kia ga navo napano naio buruñarabo ka kulo Israel nalo ajaluvo den vio Ijivi, nalo abinime i. A bogo nonovio, ea vio Ijivi, a ea Tei Mia, a bereio ea yuka duelimo va veri [40] ea vio yauo, naio joñia mila vremesiano ea Atua kanano moroano, a mila saba nalo na burutomoluo nalo banlo. <sup>37</sup> Mia nina Mosis nene kia ga navo, napano naio berial ka kulo Israel nalo, naio berinavo ‘Mia Atua naio rivitirilar kamiu tai ga rimemedu, tibe ka kenemiu naverialiano dolu, jibe ka napano naio bitirilar kiniou jukamu ruei.’ <sup>38</sup> A ninei be Mosis nene kia ga navo napano naio jo naliko korobido tormoruo nalo a naliko kulo Israel dolu nalo, ka bogo napano nalo amiel burukuti ea vio yauo, a napano naio jo naliko nailiano nei napano mil banio mave ea burusuku na, Sinai. Ka bogo

na, ana Atua jian iliano na meuliano ban Mosis nene ga, ana Mosis nene naio bar binime i jian banlo.

<sup>39</sup> “Mia korobido tormoruo nalo nei nalo maka asidom ajogkar Mosis leleio, a nalo abukular kanano iliano nalo ga, ana ea kialo jidomiano nalo, ajumñajidom ka avan bereio Ijivi ga. <sup>40</sup> Mia bogo napano Mosis jaluvo denlo, ba jo kirisiou ea burusuku na Sinai, nalo ajidomii bereio kialo meuliano re nua ea vio Ijivi, naruei nalo aber ka Erono nei, aberenio ‘Kumemi numisidom ka jau monoka koimñauka kanado tavoru tai, ka mia nalo amijikia avuru mñarabo ka kito ravano, bior Mosis nei, naio buru bulag kito ea vio Ijivi naio buruñarabo ka kito robinime i ea vio nei, mia kito maka bunu rejikia ka naio jo be naruei, ðeli na mia tumñabe ka naio.’ <sup>41</sup> Naruei nalo abano amila jibe na, amimñaukanio tavoru na kirikiti buluko napano be buruolu, ana amila sida banio, a nalo amimñaukanio buruñara jokoluolu tai ka kialo tavoru nene napano nalo ga amimñaukanio ka jumñalo nalo.

<sup>42</sup> “Naruei bogo napano Atua mial vite nei, ana naio bilig taakano kalo, a juvanlo ka ava alotu ka mñarivitano nalo. Nina jibe ka Atua kanano iliano tai napano Naverialiano Amos naio berialio ea Iliano Lu, napano berenio berinavo,  
 ‘!Kulo Israel!

?Julaka ea yuka duelimo va veri [40] ea vio yauo,  
 kamiu kumue temeul nalo ka mña kumila sida,  
 mia nina be kanaku sida nalo na ðeli na kei kiano?

<sup>43</sup> Makanto, maka kuvila rivan kiniou, mia kumilotu ka tavoru nalo ga napano mña kamiu ga kumimñaukanio,

jibe kanio Molek na,  
 napano kumiel bija kanano tobobo,  
 a javukia bunu Revano na,  
 napano kamiu kubar tavoru na kiano mñarivitano jukamu ka kamiu.

Kanio vite na, mia kiniou neñili bulag kamiu kuva koalabo den kenemiu buruvenuo, kamiu kuva kuvitu laka yako Babilono tivelinio bano.” Amos 5:25-27

*Stevin berii ka napano Atua mijai kulo Israel nalo toru laka*

<sup>44</sup> Mia Stevin naio berenio, berinavo “Ka bogo napano korobido tormoruo nalo napano ajua vio yauo, ana Atua mil ban Mosis berinavo naio monoka rimñauka kanano tobobo tai, tavukia kijokijo tai ka riverialio river Atua naio jo nalikolo dañariga. Naruei nalo amimñaukanio memedu ka tiiano napano Atua berial

banio, ana naruei nalo ajumña amijijian lilian tobobo nene ban taara nalo. <sup>45</sup> Nalo ajumña amila jibe na, binimej bokar bogo napano Yosua naio jukamu ka kiado tormoruo nalo abinimej amijil bulag kulo dolu nalo napano abinimej ajua kanado borotano nei ruei. Ana Atua naio buru kiado tormoruo nalo abinimej bereio jouro ea kiado buruvenuo nei, naruei ea bogo nei nalo amidu tobobo nei binimej jouro bijalo, jo bijalo binimej binimej bokar bogo napano tormoruo Teviti be parinio tubo.

<sup>46</sup> “Ana Teviti naio mial ka napano Atua jaaro mēle ka naio ka saba telabo, naruei naio bika ka verenio Atua naio mijikia rijamo ka mia naio riñauka kunuano lu tai, ka Yakovo kiano bajulukuti nalo amijikia ava abolkouo vanio eaio. <sup>47</sup> Mia kito monaka rijamo ka Teviti ka naio riñauka yimo tai napano jibe na, mia karina kenerinio napano Solomon naio miñauka buruñara kunuano lu nene. <sup>48</sup> Mia kito monaka rosidomii bunu, ka Toro Na Toru Na Mave Laka maka rijikia toa yimo tai napano tomu nalo ga amimaukanio, jibe ka napano Naverialiano Aisea naio berenio, berinavo

<sup>49</sup> ‘Atua Soñi naio berenio, berinavo  
 “Tiniabene ga tibe ka kanaku vio na nototano eaio,  
 a yetemeriba naio jibe ka jeleigio vio na novulan jaaku mave eaio.

?Kamiu kuberianña kumijikia kuvimauka yimo venia,  
 ka kiniou nava notoaoio?

?Peli na kamiu kuberianña kumijikia kuvimauka vio vaio,  
 ka kiniou nava nejlimebi eaio?

<sup>50</sup> Vite nalo nonovio nei napanoaju,  
 mia kiniou ga na neji nonovio lo abiniu.””  
 Ais 66:1,2

*Stevin berenio kulo Israel maka ajogkar Atua*

<sup>51</sup> Mia Stevin naio jidom ka rila nonovio kiano iliano naruei, ana naio mil ban tomu na tortoru na kulo ju nalo napano ajua komeli, ana ber kalo, berinavo “A kamiu, kamiu kumitibe ga ka korobido tormoruo nalo nanua beamu na. Tomnei, pariparimiu jikili laka, a tili niemiu nalo abonbono, maka asidom ajog Atua kanano iliano, a tiniemiano nalo ajavukia tiniene tomu nalo napano maka ave pakuveu ga. Kamiu kube tomu namña aberbure mēlea Niununo Lu bogo nonovio. <sup>52</sup> Atua kanano naverialiano nalo re nua, korobido tormoruo nalo amila kiki nonovio lo abiniu, a amuebinvinlo telabo, be kurano ka abe tomu nalo napano Atua miilalo abinimej ka averial ka Toro Lu na Atua

kiano iñauano, mia naio jo binimej. Mia kamiu kubova kitkiti garuei, bior bogo napano toro nei naio maluvo ka kito ruei, mia kamiu kubiellar naio a kumuebin naio mñaro. <sup>53</sup> Kamiu naruei napano kubokar Atua kiano tuboiano nene ruei, napano beamu nailiano nalo amidu binimej, mia kamiu maka kuvijogkario, kumitumña kumila kokorovio damñariga.”

*Nalo ajubabin Stevin mñaro*

<sup>54</sup> Stevin kiano iliano bisi ea vio na, mia bogo napano tomu na tortoru na bulukomeli amiagago ka naio, iliano nalo nei ajuluborua tinielo, naruei nalo tiniel mimi mēle, ana na ajumña ajer mñarjuvulo biorio. <sup>55</sup> Mia Niununo Lu naio binimej bujolou toru ea Stevin, ana na naio jirarago bavin vio mave, jo bitivitii banbano-o, ana mial burumñara miamoiano na mermerano napano joko vio ka Atua, a naio mial bunu ka Yesu jikili ju mave ea vio na bavin laka vaataro ka tivelinio na naio, nina ea jumñano meruo. <sup>56</sup> Naio mial vite nei ana ber kalo napanoaju, berinavo “!Aiou! Kiniou nojo nemial vio mave naio betavo jo, ana nemial Kulorinio Kenerinio jumolu ju tivelinio ea Atua jumñano meruo.”

<sup>57</sup> Mia tomu na tortoru nei ami-jogivaio napano Stevin berenio, a nalo amijog jibe ka iliano tai na mia rila kule Atua, naruei nalo amiaga toru, abuko burutilinielo nalo ka ajog re bunu Stevin, naruei nalo ajikiti abinimej ea naio, <sup>58</sup> mia vaarakurano ga, abokar naio jikili, ana abatete kano batavio den bulukomeli. Aba tavio den bulukomeli nene, ka atubabinio, mia aberinavo tomu nalo nanua aber bulag iliano nalo na ka mia rila ana Stevin rivar vironiano, aberenio berinavo nalo nene naruei monoka avisove ka puruveru na jukamu. Naruei nalo amiya bulag mñalo kulukoti nalo, ajuvanlo ajua mēaku tai jumñano napano naio jo naliko ea bogo na, napano siano Sol, ana na nalo naaju ajuba Stevin.

<sup>59</sup> Ana bogo napano ajuba Stevin ba mia naio bolkouo, bio ban Atua, berinavo “!Aue, Tubo Yesu-o, koig kajamo ka niunuku riviedu to vijaso koig liki!” <sup>60</sup> Ana naio minie ka sudu jaano, ana mil medave, berenio, berinavo “Tubo-o, koig jau koje re vironiano van nalo nei rivior kialo kariano nalo neibano naloaju amila ka kiniou nei.” A bogo napano naio berenio iliano nei bisi, ana mijoru mon napano mñarodobi garuei.

**8**

<sup>1-3</sup> Mia Sol neibano jo ea bogo nei, naio mial vite neibano, napano ajubabin Stevin mñarodobi, naio mial jibe ka napano amila

iñauano na bo tai. Ana maka vesiou, mia tomu tealo na ñirilo ajikili ka volkouano, nalo maka amerou, mia nalo amijog bova toru laka, naruei abinimeí amidu Stevin tati abano, ajigi mia ajigi, ana aba ajivinio.

*Sol joña mue lelan nalo napano ña amonea Yesu*

Ana jikar ea bogo na, Sol nalo amila bova lie vo ban taara na namoneano nalo yako Yerusalemo. Mia ajuña amijil kikilo bova bano-o, mila napano miroano ka nalo aburo ka vio nei aban ea vio dolu nalo ea vio Yutea bija Sameria, mia atevi nalo maka avano, mia nalo aju ñañariga Yerusalemo. Mia Sol nalo ajerñi ñeñe vo ka namoneano nalo, ba lie vo, a nalo aju aban janea kunualo nalo, naruei aburu bulaglo, abukulo aban ea yimo na teta-vokoiano, nina be suñano nalo a tire nalo bunu.

*Vilip ba mioliolu ea tanobuku na Sameria*

<sup>4</sup> Naruei namoneano nalo miroano aburovuro dedade den Sol nalo ea bogo nei, mia bogo napano ajuña ajanea vio jibe na, nalo ajuña amiololu ka Yesu kiano iliano abano. <sup>5</sup> Ana nalo tai kalo, be toro nei Vilip, napano nalo abitirilar naio jibe ka tikon jukamu, naio binimeí rove yako ea buruñara bulukomeli tai na vio Sameria, naio mioliolu be moti garuei ka Naverikariano Yesu ban tomu nalo na vio na. <sup>6</sup> Ana nalo na ajuña amiajago vatitigio ka kanano iliano, a nalo amial burutomoluo nalo napano naio miñaukanio, <sup>7</sup> jibe ka napano siñaro nalo ajaluvo den tomu nalo telabo, napano bogo na amoluo, nalo amiaja burutomoru laka, naruei nalo aburo kilkil. A amial bunu ka napano nalo na niabele tivervelinio nalo amarnaro, bija javuluku nalo, abinimeí abo bereio. <sup>8</sup> Naruei ea vio nei, tiniobi nalo ajaaro mia ajaaro toru laka ka vite nalo neibano amijogio a napano amialio.

*Juñaliano tai siano Saimon*

<sup>9</sup> Mia beamu, ka napano Vilip maka rimeí ea vio Sameria nei vo, be juñaliano tai naio jo, napano siano Saimon. Jikar bogo be nua ruei, naio bar semeí telabo a joña miñauka vite telabo jibe na, mila ana naio joña berial naio ber naio be toro dolu tai, naruei tomu nalo na tanobuku na nalo aju amiilo toru bogo nonovio kanio. <sup>10</sup> Kialo tomu na tomormoru nalo, bija tomu dolu nalo, nalo ajuña amonea kanano iliano nalo, a nalo ajuña aber jibe nei, aberinavo “!Kaleliki! Toro na, Atua kiano moroano tai joa naio riano. Nina monokanio moroano na naruei napano ro-juña romijog aberio, abio ka ‘Buruñara

Moroano.” <sup>11</sup> Nalo aju amiilo toru ka naio jibe na naruei, napano jo mila vite nalo na bogo be nua ruei, nina naruei milaio ana amonea naio.

<sup>12</sup> Mia vonganei, napano Vilip binimeí mioliolu banlo, ana nalo amonea kiano iliano nei naruei, napano naio mioliolii navenatuboiano na Atua kanano, a sio nei Yesu Kristo banlo. Naruei nalo abiniu amonea iliano nene, a nalo amijev na varueiano, nina suñanalo a tire nalo bunu, <sup>13</sup> binimeí bokar bunu toro nei Saimon, naio bunu monea, naruei abaruei eao. Ana iorou ka nina, ñañariga naio jo lili ga Vilip, naio joña miilo toru ñañariga ea burutomoluo nalo a buruñara iñauano nalo na moroano na Atua kanano napano Vilip joña milaio.

<sup>14</sup> Naruei maka vesiou ga, ana iliano na vite nalo nei napano amiyotuba ea vio nei naio ba bokar atevi nalo yako Yerusalemo, berinavo kulo Sameria bunu, vonganei nalo amonea Atua kiano iliano ruei. Naruei atevi nalo aberio, amial bo kanio nalo aiila Pitere naio Jone ka naljuo ava ayotuba kalo, ka ave juo ala vonio ka avitii veve vite nalo nene. <sup>15</sup> Naruei naljuo nei abatove ea nalo na Sameria jibe na, ana abe juo ajokol pariparilo, a abolkouo biorlo ka Atua sian Niununo Lu vanlo. <sup>16</sup> Abe juo abolkouo kalo jibe na, bior ka napano Vilip naio baruei ea nalo nei ruei ea Tubo Yesu siano, mia Niununo Lu naio maka rivatove ealo vo. <sup>17</sup> Jibe na, ana Pitere naio Jone, naljuo amila jibe na banlo naruei, ana nalo abokar Niununo Lu ka bogo nene naruei. <sup>18</sup> Naruei na juñaliano nei Saimon, bogo napano naio jo mialio ka napano atevi nalo nei ajokol pariparilo napano ajikar vonga ka amonmonea jibe nei, mila ana nalo abokar Niununo Lu, naruei naio mijoku ka kialo moroano na. Naruei naio ba bar puruveru na toru tai binimeí, mijian ban naljuo nei, jidom rivulular moroano neibano joa naljuo nei, <sup>19</sup> ber kalo, berinavo “Nina naruei kiniou nejidom ka kamiu kuvisian moroano na togio van kiniou, ka kiniou bunu nemijikia notokol tomu nalo pariparilo, ka mia amijikia ajev Niununo Lu.”

<sup>20</sup> Mia Pitere naio maka lele saaro ka vaio napano Saimon bikanio, naio tinien jerio, naruei mil jikili banio, berinavo “!Tavaliki! Maka nejikia navar kanamo veru napano jau koberiaña komijikia kovulular moroano na Atua kiano kanio. Nina naio be ijaiano ga tai napano Atua mijikia sian kurano ka ga van toro. Kiniou neber kaso, mia kanamo puruveru mia rivano, sebi sisenio ea vio na jogvaiano, ana jau bunu katakisorio kavano. <sup>21</sup> Mia vonganei naruei kumemi numijikia vatitigso, ka

maka rivu ka kala iñauano rivija kumemi, bior ka napano kanamo iviso maka to batitigio rivija Atua leleio. <sup>22-23</sup> Peli ga, kiamo iviso naio bujo ka jokvano ga, a kiamo kariano va nalo amiorkakar melea kanamo meuliano laka. Jau monoka koviligso ka kanamo jidomiano va nalo nene, jau monoka kobolkouo van Atua ka naio riviekokoaso riviorio.”

<sup>24</sup> Ana na Saimon naio berdoŕe, berinavo “!Inau! Verenio tibe na, kiniou nejidom toru ka kamiu kubolkouo van Tubo kar kiniou, ka mia vite kouo nalo namañ kumituña kuberenio na, mia nalo ameñ re ea kanaku meuliano.”

<sup>25</sup> Naruei atevi juo nei, Pitere naio Jone, naloaju kija bere vo naliko nalo nei, naloajuña aberbisivisii vite nalo napano ña Kristo milaio a Atua kanano iliano nalo, banbano-o bisi ana nalo ajaluvo ea vio nei, amidu ñarabo na ka avan bereio mave Yerusalemo. Mia bogo napano naljuoajuña amiel ea ñarabo abano,ajuña amioliolu ka Ioluano Vou na Yesu ea ñarmarkomeli telabo ea tanobuku na Sameria bisi, ana na nalo abinimeñ aboru bereio Yerusalemo.

*Vilip mil bija torbobogio tai re Itiopia*

<sup>26</sup> Naruei bogo napano Vilip naio jo miñau yako Sameria kia ga vo, ana Atua kanano nailiano tai binimeñ eao, mil banio, berinavo “Vilip, kiniou neber ka jau, neber jau kotumolu, kava katakii ñarabo napano jkar Yerusalemo bavín ea komeli na Kasa.” Mia ñarabo nene be ñarabo napano bavín jelea vio yauo.

<sup>27-28</sup> Jibe na, ana Vilip naio mijog iliano nei, ana jumolu, jkar ka ban naruei. Naio jo miel ban jibe na, mia miilo ka torbobogio tai napano joa kanano rukuruku napano parinio bue ñarauo burio, binimeñ ea ñarabo nene. Toro nene naio joña buluku Niosi Lu napano Aisea bivitauia. Naio be toro na toru tai na tira na toru tai na vio Itiopia, napano abio tira nene ka Kedesi, napano nioti nene berenio naio be parinio tubo ea kanalo buruvenuo. Toro nei kanano iñauano be tena rivitkar iñauano nalo na tortoru ea tivelinio na veru na tira na toru neibano kanano, a toro nene, naio be toro tai bunu napano nanua ruei amila jibe ka tuñaro. Naruei ea bogo na, naio batove Yerusalemo ruei ka rivolkouo van Atua, naruei naio jo jakii kanano ñarabo ka rivan bereio ea kiano vio. <sup>29</sup> Jibe na, ana Vilip bunu jo miel ea ñarabo nene bano, a toro na toru nei bunu joa kiano rukuruku buru bano, naruei Vilip mialio. Mia bogo napano Vilip mialio, Niununo Lu mil banio, berinavo

“Jau katakisor toro na, kava vaataro ka kanano rukuruku.”

<sup>30</sup> Naruei Vilip jikitisosorio bano, naruei naio ban vaataro, mijog ka napano toro nei naio joña buluku niosi na Naverialiano Aisea. Naruei naio bika denio, berenio berinavo “?Juñabe, jau kobuluku lubar batitigio iliano na jau kojorña kobulukuio na, ñeli na makanio, jau maka kovuluku lubario?”

<sup>31</sup> Ana na toro nene berdoŕe berinavo “?Koig, ana mia kiniou nejikia tuñabe, ka napano maka toro tai to, ka riveribisivisii iliano nei van kiniou?” Ana na naio ber ka Vilip, berinavo “Mo verenio tibe na, mia jau komeñ mave beamu, kito ve juo rotu tano ea vio nei.” Ana na Vilip bavín ea rukuruku.

<sup>32</sup> Mia Iliano Lu napano Aisea naio bivitauia, napano toro na toru nei joña milavonio ka rivulukuio ea bogo nei, nina be iliano napano ber jibe nei, berenio berinavo

*“Toro nene jibe ka nunu tai, bior ka bogo napano abokar naio ka mia aueio, mia naio melumu ga, ñeli na naio jibe kano kirikiti nunu tai, ka bogo napano aburon bulag vijinio napano be moti, mia maka rijikia riaga.*

*Toro nene naio jibe na naruei, napano ea bogokouo na kiano meuliano, naio maka rijikia riveriŕe iliano tai leleio, mia naio mon melumu ñamariaga.*

<sup>33</sup> *Nalo amila buruñara iñauano toru laka ban naio ruei, mia bogo na ajibureio, nalo amila maka rimemedu kano.*

*Mia nalo amial ka maka ve kenerinio tai ka rudu siano, bior aje korovio kiano meuliano ea yetemeriba nei kiri bulati ga.” Ais 53:7,8*

<sup>34</sup> Mo toro na toru nei bikanio nioti na iliano nalo nei den Vilip, berinavo “Kiaku bilbilu, jau kover bisivisii vonio van kiniou ka naio be kei napano naverialiano nei naio joña berii nei? ?Naio joña berii ber ga naio, ñeli na naio joña berii toro dolu tai?”

<sup>35</sup> Ana na Vilip jukunu ka banio, naio jkar memedu garuei ea Iliano Lu neibano joña bulukuio nei, jakii ba lie ana berial Ioluano Vou na bo vodolu na Yesu kiano banio. <sup>36</sup> Mia ka bogo na, abe juoaju aburo ea rukuruku kia ga vo, ajakii ñarabo abano, mia nalo abinimeñ abokar vio tai napano uei tai joaio. Naruei bogo napano toro na toru nei naio mial uei nei, naio mil ban Vilip, berinavo “Kiniou nejidom ka jau kavaru ei ea kiniou, mo kealio, ninei be uei

tanie jo. ?Peli maka bunu ve titai tokovio ka kito juo ka kavaruēi ea re kiniou a?”

<sup>37</sup> [Ana na Vilip berdoḡe, berinavo “Jibe nei, verenio jau komonea vija kiamo iviso momou reraio garuei.”

Ana na toro nei berial ka Vilip, berinavo “Kiniou nomonmonea ka Yesu Kristo naio be Atua Kenerinio riano.”] <sup>38</sup> Naruei toro na toru nei mila kiano rukuruku mebi ea vio nei, ana abe juo amiel abatove, ajudobi joomo ea tinia uei, ana mo Vilip baruei ea toro Itiopia neibano.

<sup>39</sup> Mia bogo na abavin den uei nei bereio, mia Niununo Lu binimeī burular Vilip den vio nei kolvare ga, mila ana toro na toru nei maka bunu rial naio. Ana naio ba jotano bereio ea kanano rukuruku, jakii kiano m̄arabo, naruei naio jo bano, napano tiniēno jesei mia jesei toru laka. <sup>40</sup> Mia Vilip jibe ka napano naio jaluvo ruei, mia miilo ka mial ka napano naio joa bulukomeli na vio Asotas ruei. Mia naio jo miel batove, ba jelea komeli na tanobuku na vio na, jo mioliolu ka Ioluano Vou na bo banbano-o bokar buruḡara bulukomeli na vio Sisiria.

## 9

*Atua bilig Sol binimeī be Yesu kanano toro*

*Iñauano 22:4-16, 26:9-18*

<sup>1</sup> Naruei ea bogo nene, Sol napano beamu naio joḡa mila baravo ḡele ka namoneano nalo, naio joḡa tinien jer Tubo kiano naiagagoano nalo kia ga vo, a naio joḡa berkar kia ga vo berinavo mia naio ruebinvin nalo tibe na. Tenene na bogo tai, ana naio ba mial parinio kulo lu nalo, <sup>2</sup> naio bika ijaiano tealo denio. Sol jidom ka parinio kulo lu nei rivivitauiā niosi nalo tealo van navurim̄araboiano na yimo na volkouano na kulo Ju nalo kanalo, nina ea vio Tamaskas, ka riverial vanlo ka monoka ajamo ka Sol rivatove ealo ka sirag tomu nalo napanoaju joomo ea vaio napano ḡa abio ea bogo na kanio “Marabo Vou,” ninei be namoneano nalo. Sol mila jibe na bior naio jidomii ka riva rivokakarlo sikili, sum̄ano nalo a tire nalo, ana mo naio rivurlo avan bereio Yerusalemo, napano beamu nalo aburo kanio, ka rivukulo avan ea yimo na tetavokoiano. Ana toro na toru nei bivitauiā jibe ka napano Sol bika denio, ana midu jian banio.

<sup>3</sup> Mo Sol naio bar ḡa niosi nalo nei, karina ana naio juvan vio Yerusalemo naio jo batove Tamaskas. Mia Sol naloaju amiel bano-o legiano tealo ruei, ana na nalo abinimeī vaatara ka vio nei Tamaskas, mia naio miilo kolvare ga ka Atua kanano

buruḡara miāmoiano tai maluvo ea tini-abene, mereralii vio napano Sol joḡa miel eaio. <sup>4</sup> Miāmoiano nene midulii Sol jibe na, mila mijoru ea borotano, ana naio mijog niono tai mil banio, berinavo “!Sol, Sol! ?Kar vaio ana jau kojoḡa komila lelan kiniou ḡele, jibe ka na kojoḡa komila na?”

<sup>5</sup> Bogo napano Sol mijog vikadeniano nei, ana bikanio, berinavo “?Tubo, jau keinia?”

Ana Yesu berdoḡe jibe nei berinavo “Yesu napano jau kojoḡa komila kiki naio, kiniou nene nei naruei.” <sup>6</sup> Ana Yesu naio berkanio bunu, berinavo “Mo jau, kotumolu, keiel kava jouro ea komeli na Tamaskas, ana mia toro tai rimeī riverial vāso ka mia jau kala tuḡabe.”

<sup>7</sup> Naruei ana tomu nalo napanoaju ḡa amiel naliko Sol ea bogo na, nalo amijog iliano nalo nei, mia maka aial toro tai na ber kalo, naruei nalo amiilo toru kanio, ajikiliaju vovu gaaju jibe na, maka bunu kanalo iliano tai ka mia aver kalo. <sup>8</sup> Avona bisi, ana Sol naio mila jibe ka na Yesu berenio. Naio jumolu bereio, mia bogo napano bisipe mirano, mia maka rijikia rivitilubar titai leleio, jibe kanio napano mirano miununu ga. Vite nei naruei milaio ana nalo abokar juḡano, ana abalavo kanio ka ava Tamaskas. <sup>9</sup> Naruei nalo aba aboru vonuo ea vio nei, mia Sol naio mirano miununu jo jibe na ba bokar bogoti tolu, a ka bogo na, naio maka sen titai a naio maka rimunu titai, naio mondu lu ga.

*Ananaias ba bolkouo ka Sol*

<sup>10</sup> Naruei ea vio neibano Tamaskas, be naiagagoano tai jo, siano Ananaias, mia naio mial ka napano Tubo Yesu bio siano, jibe ka namonvovuano tai, naio berkanio, berinavo “Koig, Ananaias.”

Ana Ananaias miolu, berinavo “Nao, kiniou nei Tubo.”

<sup>11</sup> Ana na Tubo berkanio, berinavo “Jau kotumolu kavatove iviso ea bulukomeli na, jau katakii m̄arabo na telisu na abio kanio ‘Marabo Na Memedu,’ mia jau kava kovoru ea Jutas kunuano. Ana ea yimo nene, jau kovika toro na vio Tarsis tai napano naio siano Sol. Mia toro na, vonganei naio jo bolkouo, a naio mial visipeiano tai ruei, <sup>12</sup> ana ea visipeiano nei, naio mial jau naruei, napano kobinimeī joomo ka naio, ana komidu juḡano jo mave ea naio, ka mia mirano sirarag bereio rivu.”

<sup>13</sup> Mia bogo napano Ananaias mijog iliano nei naio miilo va kanio, ana berinavo “Tubo, kiniou nemijog tomu telabo aberii toro na kiano bajago ban kiniou ruei, a aberial juḡabe napano ḡa mila ka kanamo namoneano lu nalo napanoaju Yerusalemo, <sup>14</sup> a vonganei, nemijog



naio binimei ea vio Tamaskas ruei, bior tomu na tortoru na kulo lu nalo amidu moroano banio ruei ka mia naio rimei rivokakar kumemi nalo napano numiturnia nubolkouo ka siamo.”

<sup>15</sup> Ana Tubo naio berkanio, berinavo “Jau komerou re, mia jau kavan ga, bior kiniou nebitirilar toro na ruei, ka mia naio rila kanaku iñauano, ka mia naio rivar siaku riva tanea taara dolu nalo na maka ave kulo Israel, riva rivokar kialo parinio tubo nalo, a rivan kulo Israel nalo bunu kija. <sup>16</sup> Mia kiniou nala naio rivitilubar vite kouo dolu tai bunu, ka mia naio monoka rijog rivova ka vite ve telabo kario siaku, ea bogo napano mia naio toña riverialio.”

<sup>17</sup> Ana Ananaias midu iliano nei, ana ban ea yimo napano Tubo berkanio, ana ba joomo naruei naio mial Sol, ana midu jumano jo mave ea parinio. Ana mil banio berinavo “Kuruaku Sol, Tubo naio miila kiniou nebinimei ka neialso, nina be Tubo Yesu napano miyotuba kaso ea bogo napano jau kojorña komiel ea ñarabo kobinimei. Naio miila kiniou nebinimei ka mia nobolkouo ka miramo, ka mia rivu bereio, a ka mia Niununo Lu rimei rivujo lou easo.” <sup>18</sup> Naruei naio bolkouo kanio, mia vaarakurano ga vite nalo napano jibe ka tiririkiti niado ajibirbil den Sol mirano, mila ana mirano abo bereio. Naruei Sol naio jumolu ju, ana ea bogo nei, aburu aba abaruei eaio. <sup>19</sup> Mia naio jinano moti bere, a mijog pirinio jikili bo bereio.

#### *Sol jikar ka mioliolu ea vio Tamaskas*

Naruei Sol naio jo legiano tealo bereio yako Tamaskas naliko naiagagoano nalo napano ajua vio na. <sup>20</sup> Mia maka vesiou, ana naio jorña ba joomo ea kulo Israel nalo kanalo yimo na volkouano nalo na vio nei, ana naio jo joomo jorña mioliolu ka Yesu, berinavo naio be Atua kenerinio riano. <sup>21</sup> Mia tomu nalo napano amijogio, nalo amiilo toru laka, a ajurña abivika denlo, aberinavo “!Tomnei! Toro nanua beamu naio jo Yerusalemo, jorña mue lelan tomu nalo naña ajurña aberenio sio na napano vonganei naio bunu jorña mioliolu kanio bereio. Kamiu kuvialio, naio binimei ea vio nei kar ga vite nene kia ga navo, ka naio riadikar tomu nalo nene, ka rivurlo avan bereio, rivan parinio kulo lu nalo yako Yerusalemo, mia vonganei naio ba be dolu ruei. ?Venia mila naio jibe na?”

<sup>22</sup> Mia Atua mija Sol ka kanano iliano binimei temi lie vo, mia naio jo bokar tomu nalo telabo lie, napano jo mila meravo laka banlo ka Yesu, naio naruei be Naverikariano na memedu riano. Ana kulo Israel dolu nalo napano ajua vio

Tamaskas, maka aleal verdoñeiano na bo tai leleio ka atukovio ka Sol kiano iliano nalo, mia kanano iliano nalo amila searo ea kanalo jidomiano nalo batitigio.

<sup>23</sup> Naruei bogoti tealo barlaka bano, ana Sol jorña mioliolu jibe na, ana kulo Israel nalo ajumolu abinimei vio takurano, aberii ka aleal ñarabo tai ka auebin naio riñaro. <sup>24</sup> Mia bogo nonovio, ka legiano a bogiano, naloaju rorea naio ea buruñara morouo nalo napano ju bure tagvoru na komeli nei, ka mia amijikia auebin verenio rilavonio ka rivuro. Mia iliano nei binimei bokar Sol, <sup>25</sup> naruei kiri bogiano tai, ana nalo napanoaju bija naio amidu naio bano, amisonio ban ea buruñara basaro tai, ana naloajuvarvan naio batove-e boru yetano tavio ka tagvoru na komeli nei. <sup>26</sup> Naruei Sol buro den vio nei Tamaskas, naio bavin Yerusalemo bereio.

#### *Sol ban bereio Yerusalemo*

Ana na Sol ba Yerusalemo, mia naio jidom riva rivijurukar rivija naiagagoano nalo na vio na, mia maka amonea naio ka averenio naio be Yesu kiano naiagagoano riano tai, mia nalo niabele jili kanio, mila na amerou ñele kanio. <sup>27</sup> Mia nalo tai kalo be Barnabas, naio mial ka Sol naio be riano, ana jidom ka riijaio, mila kiano ñarabo ka mia mijikia rivan sikili tu tukamu ea naiagagoano nalo miralo. Ana abe juo abano, ana Barnabas berial kalo jumabe ana Sol mial kiado Tubo ea ñarabo, a napano kiado Tubo mil banio jumabe, a naio berial bunu jumabe napano Sol jikili laka ka mioliolu yako Tamaskas ka Yesu siano. <sup>28</sup> Naruei nalo amijog iliano nei, nalo ajaaro kanio, ana na Sol naio jo naliko, jo ban ea vio nalo na Yerusalemo, a naio maka leleio rimerou, mia jorña mioliolu ka kanado Tubo Yesu siano. <sup>29</sup> Ana naio jorña mil bunu naliko kulo Israel nalo napano ajurña amijev tomu na vio Kris nalo kanalo iliano, naio jorña mila mira ka iliano naliko, banbano-o mia nalo ajidom auebin naio riñaro. <sup>30</sup> Mia bogo napano namoneano nalo amijog vite nei, mia nalo aburu Sol batove Sisiria bo ga, avona karina nalo aber bogiano bo kanio, ana nalo amiven naio ban ea kiano vio Tarsis bereio.

<sup>31</sup> Ana ka bogo na, namoneano nalo napanoaju rorea ea vio Yutea, a ea vio Kalele, a ea vio Sameria, nalo amial bogo melumu kija kalo. Ana na Niununo Lu naio jo miijalo, naio jo mila na tumaro binimei jikili lie vo, ana jo mila mirano na namoneano naloaju abavin lie vo, ana namoneano nalo nene naloaju ajovon kiado Tubo ñarariga.

*Ea vio Lida, atevi Pitere mila batitigio Aneas jaano*

<sup>32</sup> Naruei ea bogo na, Pitere naio miel janea komeli nalo na tanobuku nei, naio joña mioliolu, karina bogo tai bereio, batove ka riaduka namoneano lu nalo na yako ea komeli na Lida. <sup>33</sup> Ana bogoti napano boru ea vio na, mial toro tai napano niabene tivelinio ñaro, mila naio mon ea ñano jogu ka yuka arolu [8] ruei. Toro nene, siano Aneas. <sup>34</sup> Mia bogo napano Pitere mialio, ana berkanio jibe nei, berinavo "Aneas, kiniou neber ka jau, Yesu Kristo rila vatitigio niabemo rivu bereio. Jau kotumolu kojukio ñamo yebe." Mia vaarakurano ga, Aneas jumolu, niabene bo ruei. <sup>35</sup> Ana na tomu nalo na vio Lida bija nalo na ea vio vodobi na Saron, amial toro nei binimej bo ruei, ana nalo abilig kanalo meuliano nalo abiniu amdu ban Atua.

*Pitere mila Toraka meul bereio yako Jopa*

<sup>36</sup> Mia ea vodobi nei be bulukomeli tai, siano Jopa, mia namoneano tai kalo napano joaio, naio be tira na, napano siano Tapita. Nina be sio tai napano jelea iliano na Krik aber Toraka, sano nioti nene ber temeul maraiu tai napano siano tia. Tira nei, naio mila iñauano novo nalo telabo julaka, a joña miija talimñasa nalo dañariga. <sup>37</sup> Ana ka bogo na, mieiano tai bokario, bano-o mia ñarodobi, naruei nalo ajekon niabene, ana amidu batitigio joa kunuano mave, ka atigio. <sup>38</sup> Mia bogo napano naiagagoano nalo na vio Jopa amijogal ka Pitere naio jo ga vaataro ea komeli dolu yako Lida, nalo amiila tomu juo ka avan soñeli kanio. Ana abano amiyotuba ka Pitere, abika ñelea ga naio, aberinavo "Kumemi numisidomso toru ka komei soñeli kean kumemi."

<sup>39</sup> Jibe na naruei ana Pitere bar vio jumolu, ban bija naljuo ana nalo abano. Bogo na naio binimej boru, ana aburu naio bavin ea vodobi na jo mave napano amidu batitigio tira nei jo mon eao. Mia taanou nalo abinimej aju jeliviv ea ajumña ajigio ruei, a bogo na Pitere binimej, ajian kulusoto nalo a kulutiresi nalo napano tira neibano naio joña jululo bogo napano meul jo kia ga bijalo. <sup>40</sup> Ana iorou kanio, na Pitere ber jidom ava tavio beamu vo, a iorou ka napano aba tavio, ana na naio minie ka sudu jaano ana bolkouo. Ana barlar parinio bitikar tira nei mokotenano, mil banio, berinavo "Tapita, jau ketevijo." Mia vaarakurano ga tira nene bisiñe mirano, mia bogo napano naio mial Pitere, naio barlar naio jumolu jotano jo. <sup>41</sup> Ana Pitere mijou bokar juñano, ana burular

naio jumolu, bio ba tavio ban namoneano nalo bija taanou nalo. Ana nalo abinimej joomo, ana naio ber kalo, berinavo "Nainei naruei, kenemiu tira nene, Atua mila naio meul bereio."

<sup>42</sup> Mia iliano na burumñara vite neibano soñeli ga jaburu janea komeli na vio Jopa, ana mila tomu telabo amonea kiado Tubo biorio. <sup>43</sup> Naruei Pitere naio jo jiou kija ea vio Jopa, nina ea toro tai, siano Saimon, napano naio be toro na ña miñauka vite ea kulukuti bue ñarauo.

## 10

*Atua mil ban Kornelias*

<sup>1</sup> Mo be bulukomeli dolu tai jo koyou ea tanobuku nei, napano siano Sisiria, a be toro na toru tai na be na tukamuano na kulo na mira nalo na vio Romo, naio joa vio na, naio siano Kornelias. Ana naio joña bitikar taara tai na mira nalo, napano abokar toromomou takurano [100] na tomu nalo, a nalo abio kanano taara nei kanio "Taara Na Vio Italia." <sup>2</sup> Mo toro na toru nei, naio be toro novo tai, a naio naliko kiano ñaratavo nalo dañariga nalo ajumña abolkouo ka Atua, a amilotu kanio, a bogo novonio nalo ajumña amiija tomu na vio Israel nalo napano abe talimñasa ga, ajumña ajian ijaiano toru banlo. <sup>3</sup> Mo ea legiano tai, titai jibe kanio ñerenio tolu [3], monloglog bogo na volkouano na niogoravo, ana naio mial vite tai jibe kanio visipeiano, napano Atua jiloglog kanio. Vite napano naio mialio, meravo batitigio bo, a mial ka napano Atua kiano nailiano tai batove binimej joomo ea kunuano, naruei bio berinavo "¡Kornelias!"

<sup>4</sup> Mia bogo napano Kornelias mial nailiano nei, naio merou bin naio, naruei naio jo bitikar nailiano nei jikili, ana berinavo "¿Venia na?"

Ana nailiano nei berdoñe, berinavo "Atua naio mijog kanamo volkouano nalo ruei, a maka tiniene ribobogia bajago novo nalo napano ña komila ban talimñasa nalo, naio jaaro kanio a naio jo tintin maio kaso kia ga vo. <sup>5</sup> Mo naio ber kaso berinavo jau monokanio keiila kanamo tomu tai avan ea bulukomeli na Jopa, ka avio toro tai napano siano vodolu be Saimon Pitere, ka naio rimej ea vio nei. <sup>6</sup> Toro nene naio joa toro dolu tai kanano vonuo, napano siano Saimon bunu, kunuano jo koyou vaataro ka tei, naio be toro napano miñauka vite ea kulukuti bue ñarauo."

<sup>7</sup> Naruei nailiano nei berial iliano nei bisi, ana javin bereio. Ana Kornelias naio bio kanano tomu naimñauano juo, a bija kanano toro na mira napano naio bunu joña milotu ka Atua, napano naio jo bija

naio julaka, bitikar naio, ana nalo tolu nei abinimeí eaio. <sup>8</sup> Ana naio berial vite nei banlo abe tolu, avona karina miilalo aban ea vio Jopa ka avuru Pitere rimeí.

*Atua jiloglog ka Pitere bunu ka visiþeiano tai*

<sup>9</sup> Leri ka beni nene, bogo napano tomu nalo nei aju amiel abinimeí Jopa kia ga vo, Pitere naio jo, naruei naio jidom rila volkouano na legiano viovare, mia jibe na bogo nonovio ana naio ban ea vio vodobi mave ea yimo napano naio joaio. <sup>10</sup> Naio joa vio na, naruei naio mijog ka jijerio, naruei naio berenio avurosebi. Mia bogo napano nalo ajurña amirñauka sano sinaniano kia ga vo, naio mial visiþeiano tai napano Atua jiloglog kanio jibe kanio monovovano tai. <sup>11</sup> Ana mial vio mave betavo, ana naio mial titai jibe kanio panpano na toru tai, naio jo batove yetemeriba nei. Naio mial ka napano nalo aju abokar sudu nene nalo be ver, naruei nalo ajurña ajuvarvan batove. <sup>12</sup> Ana joomo ea panpano nei, Pitere mial ka be temeul kinkin dolu nalo ajaio, bija bunu vite nalo napano Atua naio milalo abe lu ka kulo Israel nalo asenio re, jibe kanio mñaro nalo, a niobi nalo, a menu nalo. <sup>13</sup> Ana naio mijog joono tai mil banio, berinavo "Pitere, jau kotumolu, koue vite nalo nei tai ana jau kesenio."

<sup>14</sup> Mia Pitere naio berinavo "Peli ga Tubo, maka lele rijikia tibe na. Kiniou maka lele nesen vite nalo na jibe na napano maka rimemedu ka asenio, a ka napano kumemi kulo Ju nalo kumemi nubel kanio."

<sup>15</sup> Ana naio mijog joono nei bereio naio berenio, berinavo "Vite napano kiniou Atua neber rui neberinavo naio meravo, jau maka bunu kejikia kover naio miagiago." <sup>16</sup> Ana vite nei naio maluvo jibe na valuo kanio, naruei iorou kanio ana varolu nene bereio, napano Pitere naio jo berbure kia ga vo, ana panpano na toru nei naio jo bavin bereio.

*Pitere bokar nioti na kiano monovovano nene*

<sup>17</sup> Ana Pitere naio mijog bova, naio jidom dede nioti na vite napano maluvo kanio, mia bogo napano jomña jidom dedeio kia ga vo, Kornelias kiano tomu tolu napano naio miilalo abano, nalo abinimeí aboru Jopa. Naruei nalo abika Saimon kunuano den tomu tai, ana ajiloglog yimo nene kalo, ana nalo abinimeí ajikili ajua Saimon kunuano mñaratavo. <sup>18</sup> Naruei nalo abio jouo, aberenio "?O, be toro tai siano Saimon napano siano tinene abio ka Pitere, naio jo kamliko ea yimo na, þeli na makanio?"

<sup>19</sup> Ana ea bogo nei Pitere naio jotano jomña jidomii kia ga vo vite neibano mialio, ana Niununo Lu mil banio ber ka, berinavo "? Jau komijogio? Tomu tolu nalo ajurña ajiragso, nalo nene na ajikili aju tavio, ajurña abioso kiana. <sup>20</sup> Mo jau kotumolu kavatove keialo, avona verenio nalo avaleaso ka mia kavan rivijalo, mia monoka jau kosidomii re ka mia kavan re kamliko, mia jau katakisorlo ga kavano, bior kiniou nemiilalo abiedu kaso."

<sup>21</sup> Ana Pitere jumolu jabulu batove tavio, ana mial nalo tomu nei, ana mil banlo, berinavo "Ninei be kiniou napano kamiu kumisiragio. ?Kamii kumisidom kiniou ka titai kovio þeli na?"

<sup>22</sup> Ana nalo nei aberdoþe, aberinavo "Nao, kumemi nubinimeí ea kenememi parinio navuriñarabioano na mira, Kornelias, ana naio miila kumemi nubinimeí kaso, kanio jau komei ea kunuano ka naio rijog kija kanamo iliano nalo tai. Atua kiano nailiano tai mil banio ka naio rivioso ka komei tibe na. Kenememi toro na toru nei, naio maka ve toro Ju, mia naio be toro na memedu tai napano damñariga naio jomña bokar batitig bogo na volkouano nalo nonovio na kenemiu, a kulo Israel bunu ea kenememi vio nei nalo tiniel jii naio toru laka. Naio miila kumemi nubinimeí kaso, tenene na kumemi numitu nei." <sup>23</sup> Mo bior mñerenio batove rui, ana Pitere naio burulo aba amon ea yimo napano naio joaio, ka mia aviniu aiel kia ga kavijova avatove.

*Pitere ba miadu ka Kornelias*

Viomijeni kanio bereio, ana Pitere naio bano naliko, a naliko bunu namoneano dolu nalo na vio Jopa, nalo aban bunu naliko. <sup>24</sup> Nalo aba vio melijokolo mñarabo togio, naruei nalo amon, mia viomijeni bereio, ana nalo abatove ea vio Sisiria. Ea vio na, Kornelias naio jo naliko kiano mñaratavo nalo, a naio bio bunu kiano bilbilu nalo ka amei atu rorea Pitere nalo. <sup>25</sup> Telikiti napano Pitere binimeí boru ea Kornelias kunuano, Kornelias binimeí biviuo naio, mijoru ea jaano jibe ka naio milotu kanio. <sup>26</sup> Mia Pitere burular naio jumolu bereio, berkanio berinavo "Aiou, koig, jau kotumolu kotu memedu. Kejiio, kiniou nebe kulorinio ga." <sup>27</sup> Mo, ana Kornelias jumolu, ana nalo ajikar ka ajukunu, naruei naljuo aba joomo ea yimo, napano ka bogo nei naruei Pitere mialio ka napano tomu nalo telabo aju rorea naio joomo.

<sup>28</sup> Mo Pitere naio mil banlo naruei, berinavo "Kamii kumituñña kumijikia batitigio ka napano tivelinio na nalotvano na kumemi kulo Ju nalo, maka nuvijikia nuva joomo ea kulo dolu nalo kunualo napano

maka ave kulo Ju, ñeli na nuve bilbilu vu rivijalo. Mia vonganei, Atua naio jiloglog meravó bo ban kiniou ka maka rimemedu ka nevíti va ea tomu nalo tealo neverinavo nalo abova ñeli na nalo amiagiago ga.<sup>29</sup> Bior vite na naruei napano Atua jiloglog ban kiniou, maka never bure nalo na ka bogo napano abinimeí ka kiniou, ka mia neverenio re maka nejikia nemei, mia kiniou nebinimeí ga. ? Ana nejidom ka kamiú kuverial van kiniou, kuverinavo kamiú kubio kiniou ka nemei ka venia?"

<sup>30</sup> Mo ana Kornelias naio berdoñe Pitere, naio berinavo "Nao, koig siva tanea. Vonganei, bogoti tolu barlaka ruei, monloglog bogo nene jibe nei naruei, ka ñíerenio tolu ka niogoravo, kiniou nojo joomo ea kunuaku ga, nojorña nemila volkouano na niogoravo. Nojorña nobolkouo, ana nemiilo ka nailiano tai binimeí jumolu ju kamu ea miraku, napano ñano kulunñarauo mieg bo laka. <sup>31</sup> Ana na naio mil ban kiniou, berinavo 'Kornelias, Atua naio jorña mijog kanamo volkouano nalo, a naio jorña jidomial kanamo bajago novo nalo napano ña jau kojorña komila ban talimasa nalo. <sup>32</sup> Mo jau monokanio kala tibe nei: monoka keiila tomu nalo tai ava Jopa ka toro tai, ka mia toro nene rimeí rivijalo bereio. Toro nene siano vodolu be Saimon Pitere, a naio joa toro dolu tai kunuano napano naio bunu siano Saimon, napano kanano iñauano naio jorña miñauka vite nalo telabo ea kulukuti bue ññarauo. Mia kanamo tomu nalo amijikia aleal kunuano nene jo koyou vaatáro ka tei.' <sup>33</sup> Nailiano nene naio mil ban kiniou jibe na, naruei soñeli ga nemiila tomu nalo na abiedu kaso, a kiniou neber siva toru banso ka kanamo bijukuvuiano napano jau kobinimeí ka kumemi ea vio nei. Mo, kito robinuía rojua vio nei, kamu ka Atua mirano, ka mia kumemi nuvíjog iliano napano Atua ber kaso, ka mia jau koveriio van kumemi."

#### *Pitere mil ban Kornelias nalo*

<sup>34</sup> Pitere mijog iliano nalo nei, ana mil banlo, berinavo "Bo ga, ana mo kiniou neberenio siva toru laka napano kamiú kumidu bogo nei ban kiniou, ka kiniou nemijikia neil van kamiú. Nejaaro toru laka, bior vonganei nebitilubar ka be riano toru laka ka napano Atua naio maka rivitisa ea kulo dolu nalo. <sup>35</sup> Toro Israel, ñeli na toro napano maka rimoluo ea bajulukuti nei, ñeli na toro be bereio, mia avona naio tovon Atua, rila ga vite nalo napano Atua naio jidomio, mia Atua naio saaro ka naio.

<sup>36</sup> "Iliano napano Atua naio miila binimeí ban kumemi kulo Israel nalo, kamiú kumijikia ruei, napano naio be ioluanó

novo tai napano berial berinavo toro mijikia rivokar tuññaro napano naio be riano ea Yesu Kristo, napano naio be Tubo ka tomu nonovio na yetemeriba nei reraio. <sup>37</sup> Ana kamiú kumijikia sano natukunuano nene, napano beamu, ana Jone Baruei naio binimeí mioliolu ka kanano varueiano nei, ana iorou ka nina, be buruññara vite na maluvo ka kito, jikar rove yako Kalele, bano-o bokar nonovio vio reraio napano Yutea. <sup>38</sup> Buruññara vite nene, nina Yesu na vio Nasarete na bija buruññara iñauano nalo napano naio jorña milaio, napano Atua midu kanano Niununo Lu banio, bujolou batitigio toru eaio, a naio midu kanano buruññara moroano toru banio, ana Yesu jo miel jeliúv ea vio nonovio, mila iñauano novo nalo a mila batitig bunu ga nalo napano Siñño jorña mila lelanlo laka. Yesu mila vite nalo na, bior napano Atua jo bija naio.

<sup>39</sup> "Mo vite nalo nei napano naio jorña mila yako Yerusalemó, a ea tanobuku dolu bunu ga nalo ea kenememi buruvenuo kumemi kulo Ju nalo, kumemi atevi nalo numituñña nuberial vite nalo nei ban tomu nalo. Numituñña nuberial ka napano kenememi tomu na tortoru nalo ajukakar Yesu ea ññakolkolo, ana na naio ñño, <sup>40-41</sup> ana ea legiano tolu nene, Atua burumeulia naio bereio. Ana Atua mila kumemi tealo numialio, napano kumemi numitu tano, numisina a numunu uei bijaio. Mia Atua maka rijamo ka naio rimaluvo tibe na ka tomu nalo nonovio, mia naio maluvo ka ga kumemi nalo, napano Atua bitiri bulag kumemi jibe nei, ka mia nuverial van tomu dolu nalo ka Yesu naio meul bereio ruei. <sup>42</sup> Ana bogo napano Yesu jo bija kumemi jibe na, naio mil ban kumemi, berinavo kumemi monoka nuvisivisii kiano Ioluanó Novo van tomu nonovio, a monoka nuvíla rimeravo vatitigio vanlo ka Atua naio bitirilar naio takurano ka naio tibure tomu nalo, nina nalo napano añño ruei, a nalo napano mia nalo ameul kia ga vo ea bogo na tibureano. <sup>43</sup> Ninei be Yesu nene kia ga napano naverialiano nalo aberial naio nanua ruei, napano aberenio aberinavo mia Atua riviekokoa tomu nalo napano amonea siano kialo kariano nalo, nina nalo napano mia avie kouo ea naio."

#### *Niununo Lu mijoru burelo*

<sup>44</sup> Bogo napano Pitere jo mil kia ga jibe navo, nalo amiilo ka napano Niununo Lu binimeí batove ba bokar nalo napano ajunña amiagago kanio. <sup>45</sup> Ana namoneano dolu nalo napano ajuvan vio Jopa naliko Pitere abinimeí, nalo abe kulo Ju nalo, naruei nalo amiilo toru manenea ka vite

nalo nei, bior napano binimeí bokar bogo nei, ana nalo aberiamña Niununo Lu naio be jidomiano tai napano Atua jian ga ban kulo Ju nalo ga. <sup>46</sup> Mia vonganei, nalo amial ka napano nalo napano maka ave kulo Ju, mia nalo amil ka iliano dolu nalo, ana ajumña amiaia Atua toru laka, ana na nalo amijikia ka naio jian Niununo Lu ban nalo napano maka ave kulo Ju nalo bunu.

<sup>47</sup> Ana na Pitere ber ka nalo napano naliko naio, berinavo “!Kamíu kumialio na! Vonganei, nalo abokar Niununo Lu jibe ka ga napano kito rabakario jukamu. Jibe na, mia maka rejikia roverburelo bunu ka mia ravaruéi re ealo.” <sup>48</sup> Bisi ana Pitere nai ban Kornelias nalo, berinavo ajev navaruéiano ea Yesu siano, ana nalo abaruéi.

Naruéi nalo abalea Pitere jikili bunu ka naio to rivijalo ka bogoti tai bere vo.

## 11

*Pitere mila veriiano ban namoneano nalo na Yerusalemo*

<sup>1</sup> Ana maka vesiou, na lilianiano nei bano-o bokar atevi dolu nalo yako Yerusalemo, bija bunu namoneano dolu nalo ea tanobuku momou na vio Yutea, berinavo be tomu tealo napano maka ave kulo Ju napano nalo amonea Atua kiano Ioluano Vou ruei. <sup>2</sup> Ana namoneano tealo na vio Yerusalemo ajidomii kirisikili aberinavo namoneano dolu nalo napano maka ave kulo Ju, nalo bunu monoka ave pakuveuio ka mia atibe ka kulo Ju, mia bogo napano Pitere naio bavin ea vio Yerusalemo, nalo aber niegeniege naio bova laka. <sup>3</sup> Nalo amil banio, aberinavo “?Jumñabe ana jau kaba koje kamliko tomu kurano nalo napano maka ave pakuveulo, a kojomña kojinan kamlikolo bunu?”

<sup>4</sup> Naruéei Pitere naio mil banlo, jikar ea sano burupati nene naio ber bisivisii batitigio vite nonovio banlo, jukunu banlo jibe nei, berinavo <sup>5</sup> “Nanua beamu kiniou nojo Jopa, bogo tai nojomña nobolkouo. Nojo mña nobolkouo bano mña nojobobogu garuei, ana nomial titai jibe ka burumñara panpano tai, napano naio jumolu den vio mave binimeí yetano, napano ajumña abokakar sudu ver nene nalo, nalo ajumña ajuarvan binimeí yetemeriba, binimeí yetano vaataro kean kiniou. <sup>6</sup> Nobitii batitigio joomo ea panpano nei, naruei nomial temeul nalo na vonou, naliko temeul nalo na yeturu, bija mñaro nalo a niobi nalo, bija menu nalo, aju joomo eaio. <sup>7</sup> Kiniou nojomña nobitikario, ana nomijog joomo tai mil ban kiniou, naio berinavo ‘Pitere, jau kotumolu, koue vite nalo na tai, ana mo

kesenio.’ <sup>8</sup> Ana kiniou neberinavo ‘!Ee, Tubo! !Peli ga, maka rijikia tibe na! Vite nalo na jibe kanio maka rimemedu ka asenio, a kumemi kulo Ju nalo nubel kalo, kiniou nojomña nebel batitigio kalo julaka ga.’ <sup>9</sup> Ana na kiniou nomijog joomo na vio mave mil bereio ban kiniou, berinavo ‘Vite napano kiniou Atua neberenio ruei ka naio meravo, mia jau maka bunu kejikia kover naio miagiago bereio.’ <sup>10</sup> Nomijog iliano na miyotuba jibe na varolu avona bisi, ana panpano nene bija saba nene nalo napano ajaúio, aburio bavin mave bereio.

<sup>11</sup> “Naruéei monloglog ka bogo na, ana tomu tolu tai abinimeí aboru ea yimo napano kumemi numituaio, napano toro na vio Sisiria tai naio miilalo abinimeí ka avuru kiniou navan bereio kumemilikolo. <sup>12</sup> Naruéei Niununo Lu naio mil ban kiniou, berinavo ‘Jau maka kejikia koverenio maka kasaaro ka kava kamliko nalo tolu na,’ mia kiniou naban ga, a kuruado dolu nalo ari nei na vio Jopa, nalo bunu abinimeí kumemilikolo. Kumemi nubano-o nuboru Sisiria, ana na nalo aburu kumemi nuban ea toro neibano Kornelias kunuano.

<sup>13</sup> “Naruéei nuba joomo, ana naio jomña jukunu ban kumemi, jomña berii jumñabe napano naio mial nailiano tai maluvo ka naio, jumolu ju kamu ea mirano joomo ea kunuano nei, ana na nailiano nene mil banio, berinavo ‘Jau keiila toru riva Jopa, ka toro napano Saimon Pitere, naio monoka rimeí rialso. <sup>14</sup> Toro na mia naio rimeí riverial lilianiano tai van kamíu napano mia iliano nene naio mijikia rilarurso rivija kanamo mñaratavo nalo.’

<sup>15</sup> “Mia bogo napano Kornelias naio mil bisi, ana na kiniou kija nemil banlo, mia monloglog bogo napano nojomña nejikar ka nemil kia ga, ana Niununo Lu batove ealo javukia ga napano jomña batove ea kito be moti nanua ruei. <sup>16</sup> Kiniou nemial vite nei, ana tinieku maio ka bereio kanado Tubo kanano iliano, napano berio nanua, berinavo ‘Jone baruei ea kamíu ka uei, mia bogo vesiou re, ana mia kamíu kuvokar varueiano napano ea Niununo Lu.’ <sup>17</sup> Mo kito kulo Ju nalo, napano kito romonea kiado Tubo Yesu Kristo ruei, Atua jian kiano Niununo ban kito, jibe ka ijaiano tai, mia bogo napano nemial napano Atua jian ijaiano nene kia ga banlo napano maka ave kulo Ju, ana vite na mila kirimeravo batitigio ea kiniou ka vonganei, maka lele rimemedu ka mia neverenio tomu nalo nei nalo maka ajikia amei jouro kitoliko. ! Kiniou nebe kenía, ka neielkue kanio Atua tibe na, verenio naio sidom ka rila tibe na vanlo!”

<sup>18</sup> Naruei ea bogo napano nalo nei na Yerusalemo neibano nalo amijog Pitere kanano iliano, nalo maka bunu ajikia averenio titai vanio, mia nalo ajaaro ga toru, a nalo abamenea Atua toru laka, aberinavo “!Riano ga na o-o! Vonganei ga kito robitilubar vatitigio ka Atua naio jaaro mñele ban nalo napano maka ave kulo Ju bunu, ana na naio midu buluvio banlo bunu ka mia nalo amijikia aviliglo, a ka nalo amijikia avokar meuliano riano ea naio.”

*Taara na namoneano nalo na vio Antioko*

<sup>19</sup> Ana nanua, bogo napano Sol nalo amuebin Stevin naio mñaro ruei, Sol nalo nei amila lelan liki namoneano dolu nalo ea vio Yerusalemo bunu, naruei namoneano nei nalo telabo aburo dedade janea vio abeve terakurano. Nalo tealó aburo vio tebievi laka aba abokar tanobuku na vio Vonisia, tealó aburovuro lilian kalo aba abokar uleule na vio Saipras, a tealó aban lie vo aban ea burumñara bulukomeli labo tai, napano siano Antioko. A bogo napano nalo ajua vio nalo na, nalo ajumña aberial Ioluano Vou nei, mia nalo ajumña aberbisivisió ban ga nalo napano abe kulo Ju javukialo. <sup>20</sup> Mia karina, ea vio Antioko nei be namoneano dolu nalo napano ajaluvo ea tanobuku na Saireni a uleule na Saipras, nalo abinimeí bunu, amioliolu, mia nalo ajumña aber lualua Ioluano Vou na Tubo Yesu ban nalo na vio Antioko napano maka ave kulo Ju. <sup>21</sup> Naruei Atua kanano moroano jo binimeí toru ea nalo na, a tiniobi toru amijog kanalo iliano nalo, ana na nalo amonea Yesu, nalo abiliglo abinimeí ea naio.

<sup>22</sup> Ana na lilianiano na vite nei binimeí bokar taara na namoneano nalo tilinielo ea vio Yerusalemo, berinavo Atua kiano iliano bano-o bokar nalo na maka ave kulo Ju ruei, mila ana nalo amiila Barnabas ban ea vio Antioko ka naio rial vonio vite nei vo. <sup>23</sup> Bogo napano Barnabas naio boru ea vio na, naio mial vite nei be riano laka, napano Atua milivu toru ka tomu nalo nei kialo meuliano nalo, ana na mila naio jaaro toru laka kanio, naruei naio jusol iliano banlo ka avokar Tubo sikili, vija kialo iviso vodolu nalo, ea bogo na bo a ea bogo na bova. <sup>24</sup> Barnabas naio mila jibe na bior naio be toro novo laka, napano Niununo Lu bujolou eaio, a naio biekouo ea Atua, mo jibe na, ana tomu telabo abinimeí ea Atua ka bogo na.

<sup>25</sup> Mia Barnabas naio mial ka be irñauano toru ea vio Antioko, naruei mial

bo ka rila vonio ka rivan ea bulukomeli na vio Tarsis, ka rileal Sol, ka rivuru nalo rimeí ka rijai irñauano. <sup>26</sup> Bogo napano naio milealio, ana burio abinimeí bereio aba Antioko. Abe juo amijai namoneano nalo ea vio na, aberloglog tiniobi toru, amirñau jibe na bano-o bokar yuka vodolu. Ea bulukomeli labo nei Antioko, kulo dolu nalo amilikotkotu kija ka naiagagoano nalo, abiolo ka “Kristo tomu nalo” ðeli na “Kristin nalo” a nina naruei nalo aberenio sio nei be moti.

<sup>27-30</sup> Naruei ka bogo na, namoneano tealó napano abe naverialiano, ajumolu ea vio Yerusalemo abinimeí aboru Antioko, ana na nalo nene tai, siano Akabas, naio jumolu, mil ea moroano na Niununo Lu, berinavo “Mia bogo vesiou re, ana na mia vituiano tai ve toru rivokar tomu nalo nonovio ea venuo reraio na kanado tanobuku.”

Naruei bogo napano naiagagoano nalo na vio Antioko nalo amijog iliano nei, nalo aberii bisí, ana aberinavo mia aviniu monoka asuvan puruveru na vabe napano toro ve takurano naio mijikia suvanio, ka atuvan riva van kurualo nalo napano ajua tanobuku na vio Yutea, ka rijailo ka nalo atu rorea batitigio ka bogokouo nene. Naruei nalo ajuvan puruveru nei, ana amijev ijaiano nei monea Barnabas naio Sol jumñalo, ka mia naljuo nei avar riva van navurimñaraboiano na namoneano nalo na vio Yerusalemo.

A naverialiano nei kiano iliano be riano, bior napano iorou kanio, be bogokouo tai bokar vio nalo nei javukia ga napano naio berialio, ana nina ea bogo napano Klotias naio jomña be parinio tubo ka vio Romo.

**12**

*Tomu na tortoru nalo amue kulo namoneano nalo, amila bulaglo toru laka*

<sup>1</sup> Ea bogo nei, napano naljuo abar ijaiano nene binimeí yako Yerusalemo, Parinio Tubo Erot jo mue searo ea taara na namoneano nalo tealó. <sup>2</sup> Kanano tomu na mira nalo tealó aba abokar Jone kuruano nei, Yemesi, ana amuebinio ka kanalo iobogu na mira nalo.

<sup>3</sup> Ana kulo kouo nalo na kulo Ju nalo kanalo, nalo ajaaro toru ka vite nei, ana mila Parinio Tubo Erot naio mila bajago nei ba lie vo jibe na, ana naio berkanio kanano tomu nalo nei ka ava avokar bunu ga Pitere. Naio mila nina monloglog bogo na jokoluolu na kulo Ju nalo kanalo, napano nalo amila Jokoluolu Na Sidomkariano na Ioruriano, a bija bunu ga Jokoluolu Na Sinaniano Na Taba. <sup>4</sup> Erot jo jidomii

berinavo verenio bogo na jokoluolu nei rivarlaka bisí, ana mia naio rivuru Pitere riva tumolu tukamu ea tomu nalo miralo, ka nalo ail vanio, a ka nalo averenio naio monoka riñaro.

Jibe na naruei, tomu nalo nei aba abokar Pitere, ana abuku naio ban ea yimo na tetavokoiano, a nalo amidu bagaro na mira nalo veri ka asirarag kuku vatitig kanio, napano bagaro nalo nei kanalo tomu nene nalo abeve veri ealo. <sup>5</sup> Ana bogo napano Pitere jua yimo na tetavokoiano jibe na, namoneano nalo aju abolokouo jíkili ka naio julaka ga ban Atua.

*Nailiano binimeí burular Pitere den yimo na tetavokoiano*

<sup>6</sup> Pitere joa yimo na tetavokoiano bano-o, bokar bogiano napano Erot jo jidomii berinavo ea kavijo nene, mia rivuru Pitere riva tumolu tukamu ea tomu nalo miralo ka atibue. Ea bogiano nene, Pitere naio jo monmelio, nina iviso ka tomu na mira naljuo, napano amiadikar Pitere ban ea naljuo nei bija marimieni juo. A be tomu dolu juo na mira bunu napano naljuo aju abitikar ñaratavo nalo na yimo na tetavokoiano nene. <sup>7</sup> Mia kolvare ga, Atua kiano nailiano tai naio jumolu ju joomo ea vio nei, ana buruñara miamoiano na toru laka ea vio nene. Ana nailiano nei ba mikulkulu ka burusovonano Pitere, ka biobonio, ana berinavo “!Jau kalasoñeli, kotumolu!” Ana marimieni juo nei ajaraluvo ga jibe na den Pitere jumano kolvare ga, ajibirbil batove juai borotano. <sup>8</sup> Ana na nailiano nei berinavo “Kovitirakar vatitigio kanamo kulubue na serikar mabomo, keya kanamo kulubue na jaamo a ñamo kulusoto, ana kito ve juo ravano.” Ana Pitere mila jibe na, <sup>9</sup> ana jakisor nailiano nei naljuo abano. Ea bogo nei, Pitere maka rijikia ka vite nei naio be riano kovio, ñeli na jumabe, bior naio jidom berinavo ñeli naio monvovu kia ga vo. <sup>10</sup> Ana naljuo aju abano, ajodovulu ñaratavo na be moti napano toro na mira juaio, aba ajovulu bunu ga ñaratavo juo napano toro na mira juaio, naruei naljuo abinimeí abokar buruñara ñaratavo na maariano napano be ñarabo na aba tavio den yimo na lakoiano. Buruñara ñaratavo nene aminñaukanio be butoto, ana bogo na abe juo abinimeí vaatara kanio, naio ga betavo kanio, ana abe juo aba tavio. Ana na abe juo amiel kija ga telisu ea ñarabo aban jibe na, ana Pitere miilo ka nailiano nei jaluvo den naio kolvare ga, ana Pitere naio ga takurano ju.

<sup>11</sup> Ana ea bogo nei ga, Pitere bitilubar ka vaio napano nailiano nei mila banio, ana berinavo “!Tomnei! !Riano laka nei!

Nemijikia naruei ka napano Atua miila kanano nailiano nei binimeí ka rivinalar kiniou den Erot jumano, a ka rivurular kiniou den vite na bova nalo napano kulo Israel nalo aju ajidomio kia ga ka aber mia ala van kiniou.” <sup>12</sup> Pitere bitilubar vatitig vite nei naruei, ana naio ban memedu ga ea Jone Mak kenieno kunuano, siano Mere. Ea yimo nei naruei, nalo telabo napano ajua vio na ruei ka mia abolokouo rivior naio.

<sup>13</sup> Ana Pitere boru ea yimo nei, minia ñaratavo nene, ana niatira sesa na vio nei tai, siano Rota, naio binimeí ka rivetavo.

<sup>14</sup> Naio maka rivetavo vatitig ka ñaratavo nene vo, mia mijog lubar Pitere joono ka mil banio, ana jaaro mia jaaro, juvan ñaratavo nene jo, ana jikiti ba berial banlo, berinavo “!Pitere nene nei! !Pitere nene nei naio jumolu ju tavio ea kiado buluñaratavo ruei!”

<sup>15</sup> Ana nalo aber kanio, aberinavo “!Jau keil vovu re tibe na!”

Ana naio ber batitigio bereio banlo, berinavo “!Maka leleio, kiniou maka nalasibi nei, neber riano nei!”

Ana nalo aber kanio bereio, aberinavo “!Makanio! Ver tibe na, ñeli sano siñaro nene ga na koviobo?”

<sup>16</sup> Nalo ajumia amil kia ga jibe, ana Pitere naio ju kia tavio, naio ju minia dolu ka ga ñaratavo bano-o, ana nalo aba abetavo kanio. Bogo napano abetavo, ana nalo abetilubar ka be Pitere, mia nalo amiilo toru laka. <sup>17</sup> Ana Pitere jisiu benavena ga banlo, juvan jumano berinavo aturñaro ga, ana naio jukunu banlo ka jumabe napano Atua burular naio den yimo na tetavokoiano. Ana naio ber kalo berinavo “Bo ka kamii kuva kuverial vite nei van Yemesi vonganei, a vija bunu ga kuruado dolu nalo na.” Ana iorou kanio, ana Pitere jaluvo bereio, ba joluku ea vio dolu tai.

<sup>18</sup> Mia kavijo, ana tomu na mira nalo amemebiju toru ka napano Pitere maka bunu toa marimieni nalo nei leleio, ana nalo amerou, maka bunu ajikia mia ala tumabe naruei, nalo ajumia abivika denlo, aberinavo “?Ana toro nei buro jumabe nei a naio ba jo be na?” <sup>19</sup> Ana iliano nei ba bokar Parinio Tubo Erot berinavo Pitere ba kovio ruei, ana Erot miila kanano tomu nalo aba ajirragio bano-o, mia nalo maka ajikia alealio. Ana Erot mil ban kiano tomu nalo napano nalo aju kuku ka Pitere, ana nalo nene maka ajikia averenio vite tai vanio, ana Erot berinavo avuku bulag nalo nene ana auebinvinlo añarnaro.

Mia iorou kanio, ana Erot juvan vio nei Yutea bereio, batove ba jua buruñara bulukomeli na toru napano Sisiria.

*Tukunuano na m̄ariano na Parinio Tubo Erot kiano*

<sup>20</sup> Ana ea bogo nei napano Erot naio jon̄a mijil namoneano nalo kia ga vo, naio jon̄a mila baravo toru bunu bija tomu na buruñara bulukomeli juo nei Taia a bija Saiton, ban bano-o mia mila tomu na komeli juo nei amerou toru laka, aberenio aberinavo verenio baraviano nei rimej rivova mia rimej sikili kalo. Nalo na ajidom jibe na bior napano nalo aju ameul ga ea sinaniano nalo napano nalo abar ga ea Erot nene kiano borotano tai. Ana nalo amila kanalo kulo kouo tealo ka amei ala merevu naliko Erot. Ana nalo nei abano abe bilbilu batitigio bo naliko toro kouo tai na Erot kiano, napano siano Plastas, ka naio mijikia rijailo a rila kialo m̄arabo ka amijikia ail rivija Erot ka atu rivu bereio ea tuñaro rivija naio. <sup>21</sup> Ana Erot berial legiano tai berinavo nalo amijikia amei aial naio eaio, ana ea legiano nene nalo abinimej. Ea bogo nei, Erot miya m̄ano buruñara kulusoto novo nalo, jibe kanio napano naio be buruñara parinio tubo, a jotano ea kiano buruñara jobaro, ana jon̄a jian kiano iliano tai banlo. <sup>22</sup> Ana nalo nei amijog kiano iliano nene, ana ajidom ajubololili naio p̄eli na tuñabe, ana nalo abio jouno, aberinavo “!Uerei, ninei maka ve toro na mil nei, p̄eli nina be Atua ga na, a!”

<sup>23</sup> Ana Erot mijog iliano nei, mia jaaro kanio, a barvar ka naio bunu ga ka napano nalo aberinavo naio be Atua, ana memedu ka bogo nei, nailiano na Atua kiano tai binimej mue naio, bior napano naio maka riverburelo ka aiaia ga Atua, mia aiaia re toro. Mia maka lele vesiou, ana ilo va nalo abujolou eaio, ana ajer kokorovio tiniene ana naio m̄aro.

<sup>24</sup> Ana ea bogo nei, bekurano ka napano tomu nalo na ajibe ka Erot nei nalo aju amila vonio ka m̄a auedom iñauano na Atua kiano, mia Atua kiano iliano naio jo jaburu miadu ban ea vio nonovio, a jo bar m̄arati telabo.

<sup>25</sup> Ana Barnabas naio Sol, abe juo amidu ijaiano napano namoneano nalo na vio yako Antioko nalo abuku rui, abar ban navurim̄araboiano nalo na namoneano nalo na yako Yerusalemo, bisi ana abe juo abatove, aban bereio yako Antioko, ana ea bogo nene, aburu Jone Mak jakisorlo.

### 13

*Amioako Barnabas naljuo Sol*

<sup>1</sup> Ea taara na namoneano nalo yako Antioko neibano, ana tomu tai nalo aju napano abe naverialiano nalo, a tealo napano abe naverloglogiano nalo. Nalo

nei tai kalo kanalo sio jibe: Barnabas, a Simion Kuluniabene Bobogio, a Lusias na vio Saireni, a Manaen nei nanua m̄aratavo na Parinio Tubo Erot nalo amidular naio bogoti napano naljuo Erot abe kiritete kia ga vo, a naliko nalo na, Sol bunu. <sup>2</sup> Ana bogoti tai, ana nalo nene naliko namoneano dolu nalo amondulu, ana aju amilotu ka Atua, ana Niununo Lu mil banlo, ber kalo berinavo “Kamiu kuvurular Barnabas naio Sol den kamiu vonganei, kuvitiri bulaglo ave juo ka ala iñauano tai napano kinioi nejidom ka alaio.”

<sup>3</sup> Ana iorou, amondulu bogo tai bereio ka abolkouo, ana nalo abokar Barnabas naio Sol pariparilo, ana amioakolo abe juo, bisi ana amila bulaglo abano ka ala Atua kiano iñauano.

*Barnabas naljuo Sol aboru yako Saipras*

<sup>4</sup> Ana jibe ka napano Niununo Lu mila bulag Barnabas naljuo Sol jibe na, abe juo ajuvan vio Antioko, ana abatove ea m̄arkomeli nei Selusia napano jotano koyou, ana nalo ajel ea uauako tai, aba aboru ea uleule na Saipras. <sup>5</sup> Ea uleule nei, abe juo abauro ea buruñara bulukomeli na Salamis, ana naljuo aban ea yimo na volkouano nalo na kulo Ju nalo kialo, ana ajun̄a aberial Atua kiano iliano. Ana ea bogo na, Jone Mak bijurukarlo kia ga vo, ana naio jon̄a mijailo ka iñauano.

<sup>6</sup> Ana nalo tolu nei amiel ea uleule nei, abatove abokar togio dolu nene, ea bulukomeli dolu na toru nei Pavos. Ana ea vio na, amial toro tai napano mijikia mila m̄esi ka tomu nalo jo, napano naio be toro Ju tai, siano Baryesu, a abio bunu naio jel ea iliano na kulo Kris nalo kialo, aber Elimas. Toro nei naio jon̄a mila sibi janea vio, naio jon̄a berenio naio be Atua kiano naverialiano tai. <sup>7</sup> Ana toro napano m̄a mila m̄esi nei, naio be toro na toru tai bunu ea iñauano na parinio tubo na uleule na, napano Sejes Poloso. Ana parinio tubo nei, naio be toro tai napano mijikia batitigio vite bo, ana bio Barnabas naljuo Sol ber amei aialio, bior napano naio jidom ka rijog Atua kiano iliano tai denlo. <sup>8</sup> Ana bogo napano naljuo abinimej, ana toro na mijikia mila m̄esi nei naio milidielo, milavio ka riverbure naljuo nei a jidom ka parinio tubo nei naio rudu re bunu moneano ea Yesu. <sup>9</sup> Naruei Sol, napano ajun̄a aber bunu siano aber Pol, naio binimej bujolou ka Niununo Lu, ana tiniamirano bitikar jikili ban ka toro nan̄a mila m̄esi nei, <sup>10</sup> ana berkanio, berinavo “! Jau kobe Siñaro kenerinio memedu! Vite nonovio napano bo, mia jau maka kosidom leleio, ana jau kobujo ka sibiano a bajago va nalo ga. Atua kiano iliano nalo, jau



kojorña kobilivilig lelarío julaka ka rimeí rive sibiano bereio. <sup>11</sup> Vonganei ga mia keial Atua jumãno rivokarso rimemedu. Vonganei ga mia jau miramo ribono, mia jau kojikia re keial legiano vesiou kija.”

Ana kolvare ga ana toro na mijikia mila mēsi nei naio mial jibe ka napano iou tai na yeturu napano kiri bobogio laka binimeí juko mirano, ana naio jo miel vovu ga jibe na ka jidom ríleal toro tai ka rivokar jumãno ka rivurío rivano. <sup>12</sup> Ana bogoti napano parinio tubo naio mial vite nalo nei, ana naio monea Atua kiano iliano, ana bogo napano Barnabas naio Pol aberloglog naio ka iliano lu nalo nei, ana naio miilo kanio, mialio bo mia bo.

*Pol naljuo Barnabas abano Antioko dolu tai, ea tanobuku na vio Pesitia*

<sup>13</sup> Ana Pol nalo ajuvan vio Pavos, ana ajel ea uako abatove naruei abauro ea tanobuku nei Pamvilia, ana nalo amiel abano-o abokar bulukomeli nei Peka. Ana ea vio na, ana Jone Mak juvanlo, maka bunu takisorlo, mia naio ban bereio Yerusalemo.

<sup>14</sup> Ana Pol naljuo Barnabas, ajuvan vio Peka, ana amiel naruei aba aboru ea tanobuku na vio Pesitia, aba abokar bulukomeli tai napano siano Antioko bunu. Ajua vio na, ana ea Legiano Lu, ana aba joomo ea yimo na volkouano na kulo Ju nalo kialo, ana ajutano naliko tomu nalo. <sup>15</sup> Ana navurimãraboiano nalo amila lotuano, ba bokar napano abuluku Iliano Lu, ana nalo abuluku vivitauiano tai ea Mosis kiano tuboiano, a tai ea niosi na naverialiano nalo. Ana bogo napano vulukuiano nalo nei bisi, ana kulo navurimãraboiano nalo abika den Pol naljuo Barnabas, aberinavo “Banalo, verenio kamjuo kumije iliano tai napano mijikia rijai tomu nalo kialo meuliano, ana mo kumemi numisidom kamjuo kuverialio van kumemi.”

<sup>16</sup> Ana na Pol jumolu, ana buku jumãno, ber amelumu ka aje tilinielo ka naio ana mil banlo, berinavo “Mia bo, ana kiniou nejidom ka kamiu kulo Ju nalo, naliko kulo dolu nalo napano kamiu bunu kumonea kenememi Atua, kamiu nonovio kuvije tiliniemiú rivu ka kiaku iliano nei. <sup>17</sup> Kiado Atua nei, naio naruei napano bitiri bulag kiado kulo moruo nalo na beamu, a naio naruei napano mila nalo abinimeí miroano laka ea bogo napano amimãu kurano yako Ijivi, a naio ga bereio napano buru bulaglo den bogokouo nei, ea kiano burumãra moroano nei. <sup>18</sup> Ana naio burumãrabo kalo aba tavio aban ea vio yauo,

ana amiel ea vio na bano-o bokar yuka duelimo va veri [400], ana va telabo ka bogo na nalo ajumã abilig taakalo ka Atua, mia naio maka lele tuvanlo. <sup>19</sup> Naruei ka bogo napano abinimeí abokar buruvenuo nei Kenano, napano Atua berkar ka mila rudu vanlo, ana naio jitig bulag bajulukuti aluo na kulo dolu nalo napano abinimeí ajua vio nei ruei, karina midu borotano nene ban korobido nalo, abe boru kanio, ana aba ajua bokanio. <sup>20</sup> Jikario ea bogo napano abano be moti garuei Ijivi, binimeí bokar bogo napano abano bereio jouro ea kanalo buruvenuo bereio, bokar titai jibe ka yuka duelimo toromomou veri duelimo va limo [450].

“Ana ea bogo napano ajua kanalo borotano jibe na, ana Atua bitiri bulag kanalo tubo nalo, ka avurimãrabo kalo ka rña atiburelo, ana tubo nalo nei amimãu mã jibe na ba bokar nalo toro na maariano nei Naverialiano Samuel. <sup>21</sup> Ana nalo aberinavo maka bunu asidom tubo nalo na jibe na, mia aber ka Samuel aberinavo naio ríleal toro tai napano mijikia ve kanalo parinio tubo na toru. Ana Atua jiloglog Sol, Kis kenerinio, banlo, napano naio be bajulukuti na Beniamen kiano, ana Sol binimeí be kanalo parinio tubo na toru na be moti garuei, ana naio be tubo kalo bokar yuka duelimo va veri [40]. <sup>22</sup> Karina, na Atua burular Sol bereio, ana bitirilar Teviti midu jeleigio, ana Atua jaaro toru ka Teviti, naio jo berii berinavo ‘Ea Teviti nei, Jese kenerinio, mia kiniou nemial ka nabokar toro tai napano kiano bajago jakii kiaku jidomiano memedu, ana nemijikia ka mia naio rimãu tibe ka ga napano nejidomio.’ <sup>23</sup> Ana Atua naio berkar ban korobido nalo re nua nua nalo ruei, berinavo mia naio rudu toro tai ea tormoruo Teviti nei kanano bajulukuti, rudu naio van kito kulo Ju nalo, tibe kiado Ioruriano, ana vite nei Atua milaio ea toro nei Yesu ruei.

<sup>24</sup> “Beamu, bogo napano maka Yesu nei rimeí vo, ana Jone Baruei jo mioliolu ban kito, berinavo ‘Kamiu monoka kuvilig kamiu, ana monoka kuvan ea varueiano.’ <sup>25</sup> Ana bogo na Jone vaaturo ga ka rila nonovio imauano nalo napano Atua midu banio, ana naio jonã bika den tomu nalo, berinavo ‘?Kamiu kumisidomii kuberiamã kiniou nebe Naverikariano? Kiniou neber ka kamiu, kiniou maka leleio neve toro napano kamiu kumitu rorea naio nei, makanio. Mia na iorou ka kiniou, naio jo binimeí kia ga nei, naio bo mia bo, a naio be lu laka, ana nemial jibe maka neve verare ka neve kiano toro na imãuano,

maka navare ka nava vaatara ka mia neivelar kiano kulubue na jaano.’”

*Pol ber napano tomu na tortoru na kulo Ju nalo, nalo naruei amuebin Yesu*

<sup>26</sup> Ana Pol ber kalo, berinavo “Kuru-aku nalo, kamiu tealo napano abe kulo Ju nalo memedu, napano kumaluvo ea bajulukuti na Epraamo kanano, a kamiu tealo abe kulo dolu nalo, ana kumonea kenememi Atua kumemi kulo Ju nalo, kiniou nejidom ka kamiu nonovio monoka kuvitilubar ka kito nei naruei, napano Atua jian iliano na ioruriano ban kito ruei, mila ana kiniou nojomña neberial ban kamiu nei. <sup>27</sup> Nalo na vio Yerusalemo naliko kanalo tomu na tortoru nalo, nalo maka lele avitilubar Yesu ea bogo napano naio binimeí, a maka avitilubar ka naio be Ioruriano napano naverialiano nalo aberiio ea Iliano Lu nalo napano abuluku julaka ea Legiano Lu nalo. Tibe na, nalo maka avitilubarío, mia amila ka naverialiano nalo kialo iliano telaboamei ave riano, bior nalo naruei ajibure kanalo Naverikariano nene nei aber naio monokanio riñaro. <sup>28</sup> Maka ajikia aleal titai napano rimemedu ka mia naio riñaro riviorio, mia ajikili ka Pailat ka naio monoka rijamo ka riverenio nalo amijikia auebinio. <sup>29</sup> Ana amila kikió jakii ga vaio napano naverialiano nalo aberialio bogbe nua ruei, napano aberenio mia tomu nalo ala van naio, rivano-o mia auebinio ea ñakolkolo, ana iorou kanio amidu tati nene, aba amidu joa buluvai. <sup>30</sup> Ana Atua mila naio meul bereio den nañariano, <sup>31</sup> ana ea bogoti tealo telabo kija, ana na naio joñña mioyoyutuba ka kanano tomu nalo napano beamu naliko naio yako Kalele, a napano ajakisorio abinimeí mave Yerusalemo. Ana nalo napano ñña amial Yesu jibe na ruei, mia nalo nene naruei ajunña aberverio ban tomu nalo aberenio naio meul bereio den nañariano ruei.

<sup>32</sup> “Mia vonganei, ea vio nei, kumemi juo nubinimeí ea kamiu ka nuvar Lilianiano Novo nei rimeí van kamiu. Kumemi juo nuberial ban kamiu, nuber vite novo nalo napano Atua berkario ban korobido nalo re beamu, berenio mia rila van kiano tomu nalo, <sup>33</sup> ana vonganei vite nalo nene abinimeí abe riano ea kito ruei, kito kumãbilo nalo, a ea kito kulo dolu napano kito romonea naio. Ana kito robokar vite novo nei ea kiado bogo ga, napano Atua miila Yesu binimeí yetano ea yetemeriba nei, a mila naio meul bereio den nañariano kar kito.

“Ea Iliano Lu, Iouano mirano juo naio berii vite nei, napano ber

*‘Kiaku tete, nemial jibe ka banei kobinimeí kobe keneriku, ana kiniou nebinimeí nebe karañamo riano.’ Iouano 2:7*

<sup>34</sup> Ana ea tivelinio napano Atua mila Yesu meul bereio den nañariano, napano naio maka rijikia rivan bereio ea ñartanbo, ea tivelinio nei iliano juo na Iliano Lu aberenio ruei. Ea iliano na be moti ana Atua berii jibe nei, berinavo

*‘Ilivuiano lu nalo nei napano kiniou neberkario nua ban Teviti beamu ruei,*

*nalo aju ajikili kia ga vo,*

*ana vonganei mia kiniou neje van kamiu naruei.’ Ais 55:3*

<sup>35</sup> Ana iliano tinene na tivelinio nei, naio joa Iouano tai bereio, napano toro napano jirio, naio mil ban Atua, berinavo

*‘Mia jau kojikia re kajamo ka kiamo toro lu rial nañariano,*

*þeli na mokotenano rimenuu bogo tai.’ Iouano 16:10*

<sup>36</sup> “Ana iliano nalo nei maka atunña averii tormoruo Teviti nanua beamu, bior karina napano naio mila Atua kiano iñauano ban kiano tomu nalo, ban bano-o mia naio ñaro garuei, ana ajivin jo bija korobinio nalo, ana mokotenano mon ea vio na bano-o mia menunu. <sup>37</sup> Ana iliano nalo nei aberii Yesu nei ga, aberii napano mokotenano maka riva rivova tibe na, mia Atua bitirililar naio meul bereio.”

*Pol berii viekokoano naio joa ga Yesu*

<sup>38</sup> Ana Pol naio berinavo “Kuruaku nalo, ver tibe na, kiniou nejidom ka kamiu monoka kuvijikia vatitigio vite nei, ka ea ga Yesu nene ga, ana Atua jo mila ban kitojuo berii naio biekokoa kiado vovaiano nalo bunu ruei. <sup>39</sup> Mosis kiano tuboiano maka lele rijikia rivurular kitojuo den kiado bajago na vovaiano, mia jau kei, napano verenio komonmonea Yesu sikili, ana mia naio rijelar kiamo bajago na kariano denso. <sup>40</sup> Tibe na, monoka kuvitkar vatitig kamiu rivu, bior ver makanio, mia kuvitibe ka napano naverialiano nalo kialo iliano tai berenio, <sup>41</sup> napano berinavo

*‘!Kamii kuvialio! Kamii kumitunña kubital niegeniege vite lu nalo,*

*mia vonganei mia kuvitilubarío, karina mia kumãrmaro.*

*Bior napano kiniou nojo nemila iñauano tai iviso bure kamiu ka bogo napano kumeul kia ga kia navo,*

*ana nalo aju aberbisivisii meravo ban kamiu,*

*mia maka kuvisidom kumonmoneaio.”*  
*Apakuk 1:5*

*Tomu nalo na vio Antioko ajaaro ka Pol kiano iliano*

<sup>42</sup> Ana Pol mil banlo bisi, ana na nalo aba tavio, ana tomu nalo abinimei abika jikili den Pol, aberinavo “Kumemi numisidom nuber ea Legiano Lu nei napano jo binime, mia kamjuo kumei nei bereio ana mo kuverloglog kumemi lie vo ka vite nalo nei.” <sup>43</sup> Naruei bogo napano Pol naljuo Barnabas aju abano, ana kulo Ju nalo telabo naliko bunu kulo dolu nalo napano abinimei ajibe kulo Ju nalo ruei, abinimei amiel ajakisor naljuo aban napano aber atukunu lie vo. Naruei atevi juo nene amil banlo, aberii kalo aberenio nalo monokanio avarkar tinielo lie vo ea Atua, a nalo monoka ala vonio ka ava joomo lie vo ea kiano tiniememiano. <sup>44</sup> Ana jibe ka napano nalo aberii ka Pol naio Barnabas ruei, ea Legiano Lu dolu napano binime iorou, ana viobujo ka kulo Ju nalo, a viobujo bunu ka kulo dolu nalo ea bulukomeli nei abinimei vio takurano ga, ka aber aiagago ka Pol jorĩa mioliolu ka Iliano Lu na Atua kiano. <sup>45</sup> Mia bogo napano kulo Ju nalo kialo tomu na tortoru nalo amial tomu dolu nalo telabo nei, ana amijoku kanio, aju amil bova ka ga Pol, ajunĩa aberii ka tomu nalo aberenio naio jorĩa milasibi ga na. <sup>46</sup> Mia Pol naio Barnabas naljuo maka tinielo rimemebiju, naljuo aju amil toru ga, naljuo kanalo iliano ba jikili lie vo, ana aberii ka kulo Ju nalo nei, aberinavo “Kumemi numial memedu ka mia Iliano Lu na Atua kiano napano kumitunĩa nuber ka kamii, rime i rivokar kamii kulo Ju nalo ve moti, beamo ka kulo dolu nalo. Mia maka kuvisidom kumoneaio, ana kumitunĩa kubuku searia bulagio ga bano, javukia napano maka bunu kuvijikia kuvokar meuliano na maka rijikia ribisi. Mia bo ga, jua ga kamii, mo ver tibe na mia kumemi nuva nuvioliolu ga van nalo napano maka ave kulo Ju nalo. <sup>47</sup> Bior napano Iliano Lu tai berenio ruei napano kumemi monoka nuvila tibe na, napano Atua naio berenio, berinavo “Kiniou nebitiri larso ka mia jau komerera, kotibe ka yulu tai rimererali nalo napano maka amonea kiniou vo.

*Mia jau kavara kiaku ioruriano riva rivokar vio reraio nalo ea yetemeriba.”* Ais 49:6

<sup>48</sup> Ana bogo napano nalo na maka ave kulo Ju amijog iliano nei, mia nalo amijog bo toru laka biorio, aberinavo “!Tomnei, Atua kiano iliano nei naio bo mia bo, koig kumemi tiniememi jiio-o mia!” ana nalo

napano Atua berkarlo ka mia avokar meuliano napano maka rijikia ribisi, nalo nei naruei amonea Yesu ea bogo nei. <sup>49</sup> Ana jikario ea bogo nei, Tubo kiano iliano jorĩa mijiajian janea vio nonovio ea tanobuku nei.

*Kulo Ju nalo tiniel jer Pol naio Barnabas*

<sup>50</sup> Mia kulo Ju nalo napano amijoku aba amial tire nalo na tortoru nalo ea kialo yimo na volkouano, bija navurimãaraboiano na mãarkomeli nei, ana amil banlo amila searo ea kanalo jidomiano, ban bano-o mia tomu na tortoru nalo nei amila tomu nalo aba amijil lar Pol naljuo Barnabas den kanalo vio. <sup>51</sup> Ana bogo napano naljuo aju aba tavio, ana naljuo amila kijokijo tai ban nalo na mãarkomeli nei, nalo amijuba kon yevi na mãarabo napano jua jaalo.

Ana nalo ajaluvo den vio Antioko, aba abokar mãarkomeli nei Aekoniam, <sup>52</sup> mia naãagagoano vou nalo napano aju yako Antioko, tinielo jaaro toru, a Niununo Lu binime bujolou vatitig ealo.

## 14

*Pol naio Barnabas, naljuo amioliolu ea vio Aekoniam*

<sup>1</sup> Naruei ea komeli na vio Aekoniam, vite nonovio amalmaluvo javukia napano ea vio Antioko garuei. Pol naljuo Barnabas aboru ea vio na, mia iorou kanio ana abe juo aba joomo ea yimo na volkouano na kulo Ju nalo kialo, naruei amioliolu. Abe juo amioliolu bija Atua kanano moroano, naruei tomu telabo napano ajua vio na amonmonea Ioluanou Vou na bo nei, napano nalo togio abe kulo Ju, a nalo togio abe kulo Kris. <sup>2</sup> Mia kulo Ju dolu nalo napano aju na, maka asidom amonmonea, naruei iorou kanio ana aba amila vonio ka avilig lelan tomu dolu nalo napano maka ave kulo Ju kialo jidomiano, nalo amila tiniel jerlo nalo napano amonea vonga. <sup>3</sup> Vite na naruei naio mila ana na Pol naio Barnabas, naljuo aju lie vo ea vio na, aju bogo tebievi kija, ka alavon ka aija namoneano nalo. Mia bogo napano nalo aju naliko jibe na, mia maka amerou ka nalo napano tiniel jerlo, mia amioliolu dolu ga ka Tubo Yesu banlo, a ka aberii kiano burunãara tiniememiano ban tomu nalo. Ana Tubo naio mila tomu nalo abitilubar ka kanalo iliano nalo abe riano, bior naio mijamo ka ban naljuo ka amila burutomoluo nalo a vite na iloiano telabo bunu ea vio nei.

<sup>4</sup> Mia tomu nalo na komeli nei nalo aburuburelo ea taara juo naruei, napano

tealo amijakar kulo Ju nalo, mia nalo tealo amijakar atevi juo neibano. <sup>5</sup> Tivelinio juo nei ajumña amila baravo kalo jibe na, ban bano-o mia kulo Ju nalo naliko kulo dolu nalo napano maka lele tiniel tii namoneano nalo neibano, bija bunu kanalo tomu na tortoru tealo, nalo naruei aber kakar ka mia atuk atevi nalo nei a atuba binvinlo añarmñaro.

<sup>6-7</sup> Mia atevi juo neibano nalo amijog vite nei, ana amial aber bo kanio avuro den vio nei, ka ava aje jogvuiano ea vio tai. Jibe ga na, nalo ajumolu den vio nei, aban ea tanobuku dolu na vio Likonia, ana nalo aba aberial Ioluano Vou na bo ea tanobuku na vio na, bija sano komeli nene juo, napano sialo jibe nei, Listra bija Tebe.

*Pol naio Barnabas naljuo amioliolu ea vio Listra*

<sup>8-9</sup> Naruei ea mñarkomeli na yako Listra, bogo tai ana Pol naio jomña mioliolu ban tomu nalo, mia toro tai be javuluku naio jomña jojo tano, jomña miagago ka Pol. Toro nei jikar ea bogo napano naio moluo, naio maka leleio riel bogo tai, bior jaano be juo abuluk.

Naruei Pol mial ka toro nei jomña miagago batitigio ka naio, a mijog lubar ka toro javuluk nei naio jo monea Yesu ka mia naio mijikia rila vatitig jaano ve juo. Naruei Pol bitii kilkil eaio, <sup>10</sup> ana bio naio, berinavo "¡Toro javuluk, jau kotumolu, kesikili kotu ka jaamo ve juo!" Naruei toro nei mijog Pol mil banio jibe na, naruei naio jumolu soḡeli ga, ana na jo miel bija jaano be juo napano abinimej ajikirkili bo ruei.

<sup>11</sup> Ana bogo napano tomu nalo amial vite nei napano Pol milaio ea toro javuluk nei, naloaju abiovio kanio jel kialo iliano, aberinavo "¡Aiou! ¡Kiado atua nalo amidu kulorinio mirano, abatove kean kito jibe ka toro garuei!" <sup>12</sup> Naruei nalo ajian sio na ban Barnabas, abio naio ka Susu, napano naio be sio na parinio tubo na kialo atua nalo, a ajian sio na ban Pol, abio ka Emis, ka naio be sio na toro napano jomña bar kanalo atua nalo kialo iliano nalo, bior amial ka Pol naio jomña mil lie jovulu Barnabas.

<sup>13</sup> Ana tavio ea morou na komeli nei, yimo lu tai tena kialo atua nei, Susu, naio jo, bija toro lu nene, naruei na toro lu nei naio jidom riomon ka tomu nalo monoka avuru sida rivan Pol naio Barnabas, napano nalo ajidomii aber tomjuo nei abe kanalo atua. Naruei toro lu nei milalo amila soḡeli aba aburu bue mñarauo nalo abinimej, ana amiovuualo ka maniegiegi nalo, ka auebinvinlo ea burusio na yimo lu neibano.

<sup>14</sup> Naruei Barnabas naio Pol, naljuo maka atuñña ajikia kialo iliano, napano ajumña aberii vite nalo nei, mia bogo napano naljuo amijog venia napano ajumña ajidomii ka alaio, naljuo amijog bova-o mia! Atevi juo neibano, naljuo maka asaaro leleio ka napano tomu nalo nei ajidom alotu kalo, mila na abe juo amijede mñalo kulusoto nalo, ajikiti aba ajikiliaju iviso ka tomu nalo nei, amiaga, aberinavo <sup>15</sup> "¡Kuverburelo, kuverburelo! ¡Kamii kuvila re tibe na van kumemi! ¡Kumemi juo nube toro ga javukia kamii ga, maka nuve atua nei! Kumemi nubinimej ga bija Lilianiano Vou na bo, nubinimej ka nuverial van kamii ka monoka kuvituvan kenemiu bajago morou nalo na jibe na atu, kuvolkouo re bunu ka kenemiu atua nalo na telabo napano añarmñaro ga. Mia nubinimej ka nuverial van kamii ka Atua takurano ga jo napano naio meul, a numisidom nuvilig kamii van naio, napano naio ga naio jii na vio yauo bija borotano, bija tei, a naio jii vite nalo nonovio napano ajua vio nonovio nalo ea yetemeriba nei. <sup>16</sup> Ea yuka nalo na telabo ḡeli na terati nalo napano abarlaka ruei, Atua mijamo ka tomu nalo na vio yetemeriba, jibe ka kamii, nalo ajumña amiel ajakii bajago doldolu nalo, a maka ajikia naio, ana na nalo amila lotuano jibe ka ga napano ajidomii aber memedu ka alaio. <sup>17</sup> Nemial ka napano kamii kumila jibe na bior kamii maka kuvijikia naio, mia tivelinio ka naio, naio maka ruduvan naio reraio ka kamii, bior bogo nonovio naio jomña jiloglog naio tertelisu dañariga ka kamii, berinavo naio be riano, a napano kiano bajago ea kamii kirinovo laka. Naio naruei naio jomña mila kiano yuo bovo jibirbili batove, a naio naruei napano jomña mila vite nonovio amiluo ea tiniavio nalo na kenemiu, nalo abar salo nioti nalo ka bogo nene memedu. Naio naruei jomña mila kamii kumisaaro a kamii kumijog bo toru laka ea sinaniano novo nalo napano kumiturña kubar ea kenemiu tiniavio nalo nene."

<sup>18</sup> Pol naio Barnabas naljuo aber iliano na jibe na naruei, mia kolvare ga ka mia ajikia re ka mia averbure re tomu nalo nei napano ajidom mñelea ka ala lotuano vanlo a napano amiomon sida kalo. Mia iorou kanio napano nalo amijog tomjuo nei kialo iliano, ana na nalo maka bunu alaio bereio.

<sup>19</sup> Avona kario, ana kulo Ju nalo tealo napano mña amijil Pol naio Barnabas ea vio Antioko a ea vio Aekoniam ruei, vonganei ana nalo aba amiyotuba ea vio Listra nei bereio. Naruei nalo ajumña ajukuna ban kulo Listra nalo, ban bano-o mia aburu

batitigio kialo jidomiano nalo abano be dolu bereio, avona kario, ana nalo aban ka Pol, ana ajubaio ban bano-o mia amialio aberianã naio ñaro ruei. Naruei nalo aburutitigia taniabene ba tavio ea komeli, abuku searia naio jo jibe ga na, naruei aban bereio. <sup>20</sup> Mia naiagagoano tai abinimeĩ amidu batitig Pol, ana naloaju naliko, avona bisi, ana naiojevijo bereio, ana ban bereio vonuo nalikolo. Mia ea kavijo, ana naljuo Barnabas, abe juo amiel, aban ea ñarkomeli dolu na telisu nei Tebe.

*Pol naio Barnabas, abe juo aban bereio, ajakii jaalo ajel ea vio nalo nei bereio*

<sup>21</sup> Naruei ea vio Tebe, Pol naio Barnabas abe juo amioliolu, mia ea vio na nalo aburu tomu telabo abinimeĩ amonea, abinimeĩ abe Yesu kiano naiagagoano nalo. Ana iorou kanio, ana naljuo ajaluvo ea vio Tebe bereio, ajikar ka avan bereio, naruei nalo ajakii ñarabo nene kia ga napano nanua ajel eaio abinimeĩ. Jibe na ga nalo avan bereio ea vio Listra, karina, Aekoniam, karina, aba aboru Antioko na vio Pesitia. <sup>22</sup> Ana ea vio nalo nei, aberloglog namoneano nalo bereio, mia ajian iliano novo nalo ka rijailo, a nalo aberinavo “Be iakurano ka napano ñeli mia kito romijikia roviniua bogokouo nalo, ñeli na mia tomu nalo ail die kito, mia ka kito rava jouro ea Atua kiano navenatuboiano naio monokanio tibe ga na naruei. Verenio tibe na, kamiu kumelulukuku re, kuvan re bunu, mia kuvitumolu kuvitu sikili ea Kristo ñarariga.” Nalo aber iliano nalo na jibe na, mila ana namoneano nalo abokar jikili moneano. <sup>23</sup> Ana ea komeli nalo abiniu, ajokol tomu nalo tai parilo ka ave navagadeano nalo ka taara na tomu na moneano nalo, ana nalo ajuvan sinianio ka abolkouo kalo. Naruei amidulo ajuva Tubo juñano, napano nalo amonea ka mia naio rijailo tulaka.

<sup>24</sup> Naruei naloaju aban bereio jibe na, amiovodulu ea tanobuku na vio Pesitia, bisi na abinimeĩ ea tanobuku na vio Pamvilia. <sup>25</sup> Ea tanobuku nei, amioliolu ea komeli na vio Peka, karina abatove ea vio Atalia, koyou ea tei, <sup>26</sup> ana nalo amidu uako, aba aboru bereio ea komeli na vio Antioko, nina ea vio Siria. Nina be buruñara komeli labo napano beamu, nalo abolkouo ka Pol naljuo Barnabas, ka mia Atua kiano tiniememiano vija kiano vitikariano vu novo to rivijalo, ana na amiila bulaglo ka adu Lilianiano Vou na bo rivano. Mia vonganei naruei, naljuo amila nonovio batitigio buruñara imãuano nei, ana abinimeĩ bereio ruei. <sup>27</sup> Naruei nalo abio ban namoneano nalo ka aviniu amei vio takurano, ana aberii iliveriioano banlo,

a naljuo aberbisivisii batitigio banlo ka juñabe ana Atua naio betavo ka nalo napano maka ave kulo Ju, ka mia nalo bunu amijikia amonmonea, a amijikia aiasol ea navenatuboiano na kanano.

<sup>28</sup> Ana na naljuoaju bunu siberio tulu titai jibe na naliko namoneano nalo ea vio Antioko.

## 15

*?Namoneano vou nalo monoka atakii Mosis kiano Tuboiano ñeli na makanio?*

<sup>1</sup> Ana bogo napano Pol naljuo Barnabasaju kia ga vo yako Antioko, kulo namoneano tealo na tanobuku na vio Yutea, napano abe kulo Ju, abatove ea vio nene. Ana bogo napano nalo amioliolu ban kulo namoneano dolu nalo na vio Antioko, aberial kanalo verloglogiano tai, aberinavo “Verenio kamiu kulo namoneano nalo tealo, maka ave pakuveu takii vaio napano Mosis kiano tuboiano berenio, mia Atua maka rijikia rilarurlo.”

<sup>2</sup> Mia Pol naio Barnabas, naljuo maka asaaro leleio ka iliano nei, bior amijikia ka Lilianiano Vou na bo na Tubo kiano naio maka river tibe na, naruei amil jikili banlo, amila baravo naliko jiou kija jibe nei, ka amila vonio ka averbure nalo nei averloglog re bunu tomu nalo ka vovuiano na jibe nei.

Ana kulo namoneano na vio Antioko, nalo ajidomii ñelea iliano nalo nei bano-o mia deio, ana amial jibe bo ka nalo aiila Pol naio Barnabas, a vija bunu ga nalo tealo, avavin Yerusalemo, avan aial atevi nalo a navurimãaraboiano nalo, ka ajog vonio ka kulo kouo nalo nei ajidomii juñabe ka tivelinio na vite neibano ajumã amila baravo biorio.

<sup>3</sup> Naruei, kulo namoneano nalo amiilalo abano, abatove ea tanobuku na ea vio nalo na jibe kanio Vonisia, karina vio Sameria, a ea bulukomeli nonovio napano amiovodudulu eaio, ajumã abior bija kulo namoneano nalo, a ajumã ajukunu naliko ka juñabe ana nalo aba ajeliviv ea bunu nalo napano maka ave kulo Ju, a aberial Lilianiano Vou na bo banlo, a juñabe ana viobujo kalo abiliglo abinimeĩ ea Atua ruei. A kialo veriiano nei naio mila namoneano nalo ajaaro toru laka, a nalo abamenea Atua biorio.

<sup>4</sup> Nalo amila jibe na ban bano-o, abatove abokar vio Yerusalemo, ana aba amial taara na namoneano nalo, a bija atevi nalo a navurimãaraboiano nalo na nalotvano, mia nalo nei ajaaro ka amial Pol naliko Barnabas, amila ilivorvorvano banlo. Jibe na ana mo Pol naio Barnabas naljuo bunu amila veriiano bunu ban nalo na vio

Yerusalemo, aberii jumabe napano Atua naio mila iñauano telabo ruei banlo, napano naljuo aba abokar nalo napano maka ave kulo Ju, a amioliolu banlo, aberinavo verenio nalo amonea ga Kristo, mia Atua naio rilarrurlo.

<sup>5</sup> Ana bogo napano naljuo amila iliverioano jibe na, kulo namoneano nalo tealo napano abe kulo Ju, napano abe Varisis, ajumolu aberial kanalo jidomiano nene bereio, aberinavo “Bo ka nalo napano maka ave kulo Ju, avona verenio nalo tinielo ka amonea Kristo, mia nalo monoka ave pakuveu bunu ga, a monoka atakii bunu ga iliano dolu nalo na Mosis kiano tuboiano, mo verenio atakii kiado bajago kito kulo Ju nalo tibe na, mia kito romijikia roverenio mia Atua naio saaro kalo.”

*Buruñara vioriano ea vio Yerusalemo*

<sup>6</sup> Ana nalo ajunña aberii vite nei toru laka, mila jibe na ana atevi nalo a navurimaraboiano nalo aberinavo monoka ala vioriano tai ka averiio. <sup>7</sup> Ana ea vioriano nei, nalo amil banbano-o mia Pitere jumolu, mil banlo, berinavo “Kuruaku nalo, kamiu kumijikia ruei ka beamu, Atua naio bitirilar kiniou ka neve moti na kito ka nava noioliolu ka Lilianiano Vou na bo nei van nalo napano maka ave kulo Ju, mia vonganei kito roju romijog ka napano nalo telabo ajunña amonea Yesu ruei. <sup>8-9</sup> Atua naio mila jibe na bior naio maka tibure nalo nei den kito, mia naio mial tinielo beberare jibe ka napano naio mijikia vatitig vaio napano jua kiado iviso nalo. Naio berial ka naio jaaro ka nalo amijikia amonea kia ga marabo napano kito rojunña romoneaio, napano naio mije Niununo Lu banlo, a napano naio jekon kialo iviso nalo meravo bunu, bior nalo abarkar tinielo ea naio, javukia kito. <sup>10</sup> Atua naio mila bo laka banlo ruei, mia vonganei, kito tealo ajidom ka ala sikili vanlo bereio. Verenio kito rosidom resikili ka nalo nei ka avar vite na teremi na kiado tuboiano ea taakalo, tibe napano ajunña aberenio, tibe na ana kito roju ramila von Atua bereio. Korobido nalo amial kiado tuboiano nei ana aber naio kirisikili laka, mia kito bunu romialio ka maka toro tai napano rijikia rudu nonovio iliano nene nalo riviniu. <sup>11</sup> Mia nalo amoneaio, a kito bunu ga romoneaio bijalo, ka kito nonovio rabarkar tiniedo ea Tubo Yesu, a robokar bunu meuliano ea naio, binimej ga ea kiano tiniememiano ga.”

<sup>12</sup> Naruei nalo napano ea vioriano nalo maka bunu ail bereio, miaaju melumu ga, ana amidu bogo na iliano tai ban Pol

naljuo Barnabas, nalo tinielo ka aber ajog kija bere lie vo burutomoluo nalo a vite na iloiano nalo napano naljuo amilaio ea moroano na Atua kiano ban nalo napano maka ave kulo Ju, ea bogo napano naljuo aba amiel jeliuv ealo.

*Yemesi jusol kialo iliano nalo*

<sup>13</sup> Ana bogo napano naljuo ajukunu ka vite nalo nei bisi, ana Yemesi nei, napano naio be kanalo toro na toru tai yako Yerusalemo, naio jumolu jusol iliano ban tomu nalo, berinavo “Kuruaku nalo, nejidom kamiu kuviagago ka kiniou beamu vo. <sup>14</sup> Kito romijog mia ruei ka napano Saimon nei, napano Pitere, naio ber bisivisii batitigio ban kito ruei jumabe napano Atua malmaluvo moti ka nalo napano maka ave kulo Ju, a napano naio buru bulag nalo tealo abinimej ka ave kulo vou tai napano siano joaio. <sup>15</sup> Ana ea Iliano Lu, iliano napano kiado naverialiano nalo nanua beamu aberenio, naio ber ka mia tibe na naruei. Nalo tai napano naio ber jibe na, naio be Amos, napano naio berial Atua kiano iliano tai, berenio jibe nei, berinavo <sup>16</sup> ‘*Karina, mia kiniou nemej bereio, neimiau vatitigio ka Teviti nene kiano bajulukuti tai napano mijoru, naio rimej rimeul bereio.*

*Bajulukuti nene javukia yimo tai napano burukokorovio bova ju nei, mia kiniou nevitirilario bereio.*

<sup>17</sup> Ana jibe na, tomu dolu nalo napano maka ave kiaku vo, nalo ajirav kiniou Atua Soñi,

*a tomu nalo na buruvenuto nonovio na yetemeriba nei, napano nomidu siaku jualo ruei, mia nalo amei ave kiaku tomu nalo.*

<sup>18</sup> Kiniou nebe Atua Soñi, napano nemila tomu nalo abitilubar vite nalo nei, jikar nanua beamu laka ruei, kiaku verikariano jibe na naruei.” Amos 9:11,12

<sup>19</sup> Ana Yemesi mil lie vo, ber bisivisii kiano jidomiano, berinavo “Ea kiaku vitiiano, naio jibe nei naruei. Mia maka rivu ka kito rovijuku kouo ðeli na rala melea nalo napano abiliglo vonga abinimej ea Atua, napano maka ave kulo Ju. Maka rivu ka roverenio nalo monoka ave pakuveu, ðeli na nalo monoka atakisor kiado tuboiano tibe na a tibe na. <sup>20</sup> A vaio ga napano bo ka kito rala vanlo, tibe nei, ka mia rovivitauia mñesi tai, roverial vite ve tolu. Vite na be moti, rovere ka, mia nalo asen re bereio sunbue nalo napano kulo dolu nalo amila ka sida ban kanalo tavoru nalo, nalo monoka aveli kalo. A tinene, nalo ala re bereio bajago va, na

jibe ka siakaiano ħeli na siakiano. A tolu nene, asen re bunu ga burukija na vite na meul, jibe sunbue na vite na meul napano burukija nene maka tabo vattitigio vo eaio. <sup>21</sup> Tomu nalo ajunġa amijikia vite nalo nana napano maka rimemedu ka ala, bior Moses kiano tuboiano naio jo berenio, a nalo ajunġa abuluku bulag tuboiano nene a amioliolu kanio julaka ga ea Legiano Lu nalo ea kanalo yimo na volkouano na kanalo mġarkomeli nalo, jikario nanua ruei binimej bokar banei.”

*Tomu natortoru nalo na Yerusalemo abivitauija verdoġeiano ban nalo na vio Antioko*

<sup>22</sup> Ana iorou kanio, ana nalo amial jibe ka amil bare, ana atevi nalo a navurimġaraboiano nalo, a bija bunu ga kulo na namoneano nalo nonovio, nalo amial jibe bo ka mia aiila nalo tealo avan bereio naliko Pol naljuo Barnabas, avatove bereio yako Antioko. Naruei nalo ajekar kanalo kulo kouo juo na inġauano nei, Jutas Barsabas naljuo Sailas, aberinavo mia naljuo nei avano. <sup>23</sup> Mia nalo abivivitauija bunu mġesi tai ka naljuo amijikia adukario avatove, ana mġesi nene berenio jibe nei, berinavo “Kumemi atevi nalo bija navurimġaraboiano nalo na vio Yerusalemo, napano kumemi nube kuruado bija kamiu ea Yesu, kumemi numisaaro toru laka ka nuviviuo kamiu bereio ea mġesi nei. Kumemi nubivitau ea mġesi nei biedu ban kamiu mġarkomeli na vio Antioko, a sano tanobuku napano Siria, a ban kamiu bunu ga ea tanobuku na vio Silisia, ninei kamiu nalo napano maka kuve kulo Ju, napano beamu kamiu kumitua melijokouo ga. <sup>24</sup> Iliano binimej bokar kumemi ruei, berinavo beamu, kumemi tealo abiedu rove ea kamiu a nalo aberloglog kamiu aber kamiu na monoka atakisor kenememi tuboiano nalo kumemi kulo Ju, aver makanio, mia Atua naio maka rijikia rilarrur kamiu. Kumemi numijikia ka iliano nei mila lelan kenemiu jidomiano nalo toru laka, a mila kamiu kumijog bova laka, ana iliano nei napano nalo aberenio, kumemi maka nuvijikiaio, kumemi maka nuver kalo ka monoka aviedu averloglogio tibe na van kamiu. <sup>25-26</sup> Ana kuruado novo juo nei, Pol naljuo Barnabas, napano nalo na maka asidomii ve temi ka kanalo meuliano, mia aju ajidom yebekavo toru ka ga averial Tubo Yesu Kristo siano, kamiu kuvila nalo na amei aial kumemi rivior vite nei. Ana kumemi nuvioro kanio, kumemi nuvitio rivano-o, naruei nuvionkario ka mia nuviila kuruado juo na vio nei adu mġesi nei, aviedu bereio naliko Pol naio Barnabas. <sup>27</sup> Naljuo neibano, Jutas

naio Sailas, mia ave juo atukunu vattitigio lie vo van kamiu, riveverare ka ga vaio napano nubivitauija ban kamiu ea mġesi nei. <sup>28</sup> Ana ea kenememi vitiano, a ea vitiano na Niununo Lu kiano bunu ga, kumemi numial jibe bova ka nuvututua ka monoka kuvijogkar kenememi tuboiano nalo kumemi kulo Ju. Mia kumemi numial jibe vite nalo nei tealo napano kumemi kulo Ju nalo maka nuvisidom leleio, a bo ka kamiu bunu kuvila re, ka mia rila ana kumijikia kuvitu rivu kamliko kuruado dolu nalo napano abe kulo Ju. <sup>29</sup> Vite nalo nei, tai berenio jibe nei, berinavo mia kamiu monoka kuvel ka sunbue napano kulo dolu nalo amila sida kanio ban kanalo tavoru nalo ruei. Ana na juo nene, mia kamiu kuvisen re burukija, ħeli na sunbue na vite na meul napano sano burukija maka riou konio vo. A na tolu nene, mia kamiu kuvila re bajago na bova nalo, jibe kanio siakaiano a siakiano.

“Verenio kamiu kuvituvan vattitigio vite nalo nei, kumemi numial ka tibe na mia ve novo laka van kamiu nonovio. Bo ga, mia kenememi iliano ribisi ea ga vio na.”

<sup>30</sup> Ana nalo amiila Pol naio Barnabas naliko naljuo dolu nene, aban bereio abatove rove yako Antioko. Bogo napano nalo nei aboru ea vio nei, abio taara na kulo na namoneano nalo abinimej vio takurano, ana amidu mġesi nei banlo. <sup>31</sup> Naruei nalo na vio Antioko abuluku mġesi neibano, naruei nalo ajaoro toru laka ka iliano novo nalo napano nalo na vio Yerusalemo abivitauija binimej banlo. <sup>32</sup> A naljuo na vio Yerusalemo neibano, Jutas naio Sailas, naljuo nei abe naverialiano, mia ajunġa amioliolu ban nalo napano Antioko, aberinavo monoka avarkar tinielo sikili ea Kristo tulaka ga, ana amila kialo iviso nalo jumolu ju jikili, ea kanalo iliano novo telabo napano aberenio.

<sup>33-34</sup> Nalo aju amil banlo jibe na ea legiano telabo, ana iorou kanio, ana nalo na vio Antioko amivenlo aban bereio ea kialo mġarabo, abolkouo ka naljuo, aber “Tumġaroano na Atua kiano to vija kamjuo.” Ana naljuo abavin bereio ea vio Yerusalemo. <sup>35</sup> Ana Pol naljuo Barnabas, naljuo aju bokar siberio tai bere vo yako Antioko, ajunġa amija kulo dolu nalo napano ajunġa amioliolu a aberloglog tomu nalo ka Atua kiano Iliano Lu.

*Pol naio Barnabas, naljuo amila baravo*

<sup>36</sup> Mia iorou kanio, ana Pol ber ka Barnabas, berinavo “?Ei, jumġabe, mia kito ve juo ravan bereio ka reiadu ka kuruado a kuviviniedo nalo ea vio nalo napano mġa rabano rabisivisii Iliano Lu na Atua

kanano banlo beamu vo? Naruei kito ve juo rava ralavonio ka reial lo aju juñabe.”

<sup>37</sup> Ana Barnabas berinavo “!Bo laka koig, kiniou najaaro toru kanio! Ana kiniou nejidom toru ka rovurukar Jone Mak nei rimeí vija kito.”

<sup>38</sup> Mia Pol naio jo jidomii kia ga nanua ea kialo ieliano na jukamu, Jone Mak nene naio buro denio vaarakurano ruei, nina yako Pamvilia, napano bogo napano iñauano maka riviniu vatitigio vo mia naio barpilig naio ban bereio. Tenene na, Pol mialio maka rivu ka Jone Mak rimeí vijalo ea kanalo ieliano dolu nei bereio. <sup>39</sup> Vite nei naruei mila ana Pol naio Barnabas abilvilii ealo memedu, naruei nalo aburuburelo. Barnabas naio ba buru Jone Mak ga, ana naljuo aba ajal ea uako tai, abe juo aba amimñau yako Saipras, <sup>40</sup> mia Pol naio ba bijauia Sailas. Ana kulo namoneano nalo abolkouoko naljuo nei aberinavo mia Atua kiano tiniemebiano a kiano vitikariano novo to rivijalo. <sup>41</sup> Ana naljuo amiel aba ajeliviv ea tanobuku juo na Siria bija Silisia, amimñauka ala taara na namoneano nalo ka amei asikil lie vo.

Nina jibe kanio Pol kanano buru-mñara ieliano valuo nene.

## 16

*Timoti bunu naio bano naliko Pol naio Sailas*

<sup>1</sup> Naruei ea kiano burumñara ieliano valuo nene, Pol binimeí bokar bereio komeli juo nei Tebe bija Listra. Naruei ea vio Listra nei, be naiagagoano tai jo na, nina be toro mēaku nei Timoti. Timoti nene kenieno be tira re Ju tai, napano naio monmonea Yesu ruei, mia karamñano naio maka ve toro Ju, naio be toro tai na vio Kris. <sup>2</sup> Naruei kuruado nalo na Timoti kiano vio, bija nalo na komeli dolu na vaataro nei Aekoniam, nalo amial ka Timoti naio mila Tubo kiano iñauano banlo bo laka. <sup>3</sup> Naruei Pol naio jidom rivuru Timoti rivan vijaio ea kiano ieliano nei, mia be titai ga takurano naio bova, nina ga napano Timoti naio maka rive pakuveu, nina bior karamñano naio maka rive toro Ju. Mia Pol naio mijikia ka verenio Timoti takilili naio tibe na, mia kulo Ju nalo mia averbure naio ka riva joomo re ea kanalo yimo na volkouano nalo, a mia asaaro re ka ajog kiano iliano nalo. Mia bior vite na, ana na Pol miila Timoti ba amila pakuveu ka naio, karina iorou kanio ana nalo tolu nei Pol, Sailas, Timoti, abano. <sup>4</sup> Naruei ka bogo na nalo ajumña ajeliviv ea komeli nalo, ajumña ajian iliano ban namoneano nalo, aberial

banlo tuboiano napano naiagagoano nalo a navurimñaraboiano nalo re Yerusalemo aberenio ea kialo vioriano jukamu ruei, ana na Pol nalo aber kalo ka monoka atakilili iliano nalo nei naruei. <sup>5</sup> Naruei bogo napano Pol nalo ajumña amiadu a aberloglog taara na namoneano nalo jibe na, mila ana taara nalo nei ajumolu aju jikili batitigio lie vo, a nalo amial ka napano namoneano nalo aju abinimeí telabo lie julaka ga.

*Ajuo vio Troas, naruei Atua mil ban Pol ea namonvovvano*

<sup>6</sup> Naruei Pol nalo ajidomii ka ayotuba ea komeli nalo na telabo ea tanobuku na vio Esia, mia Niununo Lu berburelo ka avan re, averial Iliano Lu ea vio na, mila ana na amiyotuba ea ga tanobuku na vio Vrijia a vio Kalesia. <sup>7</sup> Ajumña aban jibe na, ana bogo napano abinimeí vaataro ka tanobuku na Mesia, amila vonio ka ava tove ea tanobuku na toru Bitinia, mia bogo tai bereio, Yesu kiano Niununo maka rijamo kalo ka avan tibe na. <sup>8</sup> Naruei nalo amiovodulu vonga ea vio Mesia yako ga, abanbano-o abokar komeli nene tai koyou ea tei, siano Troas. <sup>9</sup> Naruei ea vio na, ka bogiano, Pol naio monmelio mial toro tai tena tanobuku na toru na tei tivelinio yako Masetonia, mia toro nene binimeí ka Pol, jegi banio, bika denio, berinavo “Aiou koig liki, kumemi numisidom toru ka jau kavarkor komei keial kumemi, kanio mia kajai kumemi.” <sup>10</sup> Ana ea bogo na, kiniou Luka nojo kumemliko nalo bunu, mia bogo napano Pol berial ka naio mial toro nei mil ban naio, vaarakurano ga kumemi nubano numisirag mñarabo ka nuvijikia nuvarkor nuva Masetonia, bior numijikia ka Atua naio bio kumemi ruei ka nuva nuviololu ka Lilianiano Vou na bo nei vanlo.

*Ajuo vio Vilipai, ana tira na Litia naio monea*

<sup>11</sup> Tibena naruei, kumemi numidu uako, numituvan vio Troas, nuburo nubano-o nubokar uleule na vio Sametresi. Naruei numonmelio ea vio na, mo kavijo, ana na nubano-o nubokar tanobuku na vio Masetonia, naruei nubauo ea sano komeli na Niapolis. <sup>12</sup> Naruei ea tanobuku na Masetonia nei, burumñara bulukomeli dolu tai jo, napano naio jotan ka vitikariano na parinio tubo na vio Romo. Komeli nene siano Vilipai, naruei numiel nubano-o nuboru eao. Numitu legiano juo tolu ea vio na, banbano-o bokar Legiano Lu. <sup>13</sup> Mia kumemi numijog ruei ka aberenio ea Legiano Lu, kulo Ju nalo na ea vio na ajumña amila lotuano ea vio na volkouano



tai rove yako ea uei tai, ea komeli tivelinio bano. Naruei bunu numitaluvo ka nuvato ve ka nuvia lo ea vio na, naruei kumemi numitutano numitukunu kumemliko tire nalo tai napano aju kamu abinime i ruei ajuao.

<sup>14</sup> Tire nalo nei tai, naio maka rive Ju, mia naio jo monmonea Atua. Naio be tena komeli na vio Tuatira, mia be kiano burumġara inġauano, naio joġġa ġiliġili ka kulumġarawo na be vabolo na kirinovo nalo napano aminġaukanio ea kiano vio. Tira nei, siano Litia. Ana ea bogo na, Tubo betavo ea kiano jidomiano, naruei naio midukar batitig iliano napano Pol joġġa berio banlo, mia naio bokario jikili bo ea kiano iviso. <sup>15</sup> Ana ea bogo na, Litia nei naliko nalo na ea kiano vonuo, abiniu abokar varueiano. Avona bisi, ana naio jadia jikili ban kumemi, naio berinavo "Verenio kamiu kumial kiniou noju jikili riano ea Tubo, kiniou nejidom ka kamiu kumei kuvitua kunuaku kija." Jibe na naruei, ana na naio buru kumemi nuba numitua kanano vonuo.

*Abuku Pol naio Sailas aban ea nalakoiano*

<sup>16</sup> Naruei ea legiano tai bereio, ana kumemliko Pol nubatove bereio ea kanalo vio na volkouano, naruei nubitavo bija niatira tai ea mġarabo. Niatira nei, tomu tai abulular naio ka rimġau kanalo, mia niununo va tai joaio napano abio ka niununo na mġaro, napano be niununo na joġġa mial vite nalo napano mia ayoyotuba iorou. Naruei tomu nalo telabo ajuġġa abinime i abika den niatira nei kiano tomu na tortoru nalo, ka naio riverial vanlo ka mia tumġabe ka kanalo meuliano nalo. Ana bogo napano niatira nei berial banlo, ana nalo ajuġġa abar ijaiano ban kanano tomu na tortoru nalo, mila ana bogo nonovio nalo ajuġġa ġurġalo bujo ka puruveru telabo biorio. <sup>17</sup> Naruei kumemi numiel nuban jibe na, mia niatira nei jakisor kumemi naio iorou, naio joġġa miagiaga toru ban tomu nalo nonovio ga, jo berinavo "Ai! Abe tomu nalo na nalo abe tomu na amirġau Atua kanano napano meul ea vio soġġi mave. Nalo naruei amijikia averial mġarabo na ioruriano van kamiu."

<sup>18</sup> Karina, naio joġġa mila jibe na ban kumemi ka legiano telabo, mila Pol mijog bova-o deio, ana bokar bogo tai ana naio tinien jer niununo va nei, ana jiraragidi, berkanio, berinavo "I E, bare! Neber kaso memedu, ea Yesu Kristo siano, jau komoluo den niatira na vonganei." Mo vaarakurano ga, naio buro den niatira nei naio bano.

<sup>19</sup> Naruei bogo napano niatira nei kanano tomu na tortoru nalo nei amialio ka mġarabo na na mġa abar kanalo puruveru eaio binime i bova ruei, tiniel mimi toru ka Pol naio Sailas. Naruei nalo aburu tomjuo nei aba ajumolu ajukamu ea natibureano na vio Romo nalo miralo ea komeli. <sup>20</sup> Naruei nalo aberial banlo, aberinavo "Kulo Ju nalo na, abinime i ea kanado vio, nalo aju amila bulag kito toru o-o mia. <sup>21</sup> Nalo ajuġġa ajadia kito ka ratakii kanalo bajago tealoo, mia ea tuboiano na vio Romo napano roju tan kanio ea vio nei, maka rimemedu leleio ka rala tibe ka napano nalo ajuġġa aberenio."

<sup>22</sup> Naruei tomu nalo amila burumġara uetubaiano na, a nalo amila searia Pol naio Sailas, ajidom atukulo, naruei natibureano nalo nei aberenio ajede bulag kanalo kulumġarawo ealo ave juo, ana na avitivilo ka iesi. <sup>23</sup> Naruei nalo abitiv searialo jibe na-o bisi, ana na aburulo aba abukulo aban ea nalakoiano, mia amil jikili ban toro na bitikar nalakoiano, aberinavo monoka naio rivokar batitiglo ka avuro re bereio, ver ġeli mia rivova ka naio. <sup>24</sup> Naruei bogo napano toro nei naio mijog iliano nei, naio buru tomjuo nei aba laka joomo, ea vio kouo tai napano mġa aburu nalo na parilo jikili laka aban eaio, naio miorkakar jaalo aban ea burumġara iesi napano naio joa vio na.

*Borotano memebiju, a mikulkulu ka nalakoiano*

<sup>25</sup> Naruei Pol naio Sailas naljuo aju banbano-o bokar bogiano iovare, ajuġġa abolkouo ban Atua ea iouano lu nalo, a nalo dolu napano aju nalikolo ea nalakoiano nalo ajuġġa amiagago ka bunu. <sup>26</sup> Naruei nalo amiilo toru laka, napano kolvare ga, burumġara mġi tai binime i, mikulkulu ka yimo nalakoiano nei, mukulkulu ka tati nalo reravo. Ana amial mġaratavo nonovio abevetavo, a marimieni nonovio napano amiorakakar ka ġurġalo a jaalo ajibirbili ga bunu. <sup>27</sup> Mġa toro na bitikar yimo nalakoiano nei naio jevijo, naruei jikiti binime i mial mġaratavo nonovio abiniu abevetavo aju, mia berianġa nalo napano aju joomo, nalo abiniu aburovuro abeve terakurano ajanea vio ruei. Naruei vite nei mila naio merou toru, naruei midular kiano iobogu na mira, ka jidom rielbin naio rimġaro. <sup>28</sup> Mġa Pol mialio, ana bio jouo banio, berinavo "I Ei, jau kotovo kala lelanso re vo! Kumemi nonovio nubitu kiaga ea vio nei." <sup>29</sup> Naruei toro nei naio bio ber avar yulu rime i, naruei jikiti ba joomo ea vio napano Pol naio Sailas ajuao, mia memebiju mia memebiju. <sup>30</sup> Avona karina, naio burulo

aba tavio bereio, ana bika denlo, berinavo “?Ai, tomjuo na tortoru, mia monoka nala vaio ana na mia neje ioruriano?”

<sup>31</sup> Naruei tomjuo nei aber kanio aberinavo “Jau monoka komonea Tubo Yesu, ana jau kovokar ioruriano, jau kamliko nalo na ea kanamo m̄aratavo.” <sup>32</sup> Naruei nalo aberial Tubo kiano iliano banio, a ban nalo na ajua kiano vonuo, <sup>33</sup> mia memedu ka bogiano viovare ga, toro nei naio mila batitig Pol naio Sailas kanalo niajebijo na menko nalo, ana kanio bogo nei bunu, nalo abaruei ea naio naliko nalo na ea kanamo m̄aratavo. <sup>34</sup> Naruei naio burulo aba joomo ea kunuano, naruei bar sinaniano banlo, ana naio naliko nalo na kiano vonuo nalo ajurña ajaaro-o mia ajaaro, bior vonganei nalo amileal Atua ea kialo meuliano nalo.

<sup>35</sup> Ana ea kavijo nene ga, ana na nati-bureano nalo maka ajikia vite nei vo, mia nalo ajutano bereio bisi, ana amiila kialo tomu nalo abinime i aberial, aberinavo “Tomu juo na nalo amijikia ava tavio ga.”

<sup>36</sup> Naruei toro na bitikar nalakoiano nei naio binime i berial ka Pol, berinavo “Natibureano nalo amiila toru binime i aberinavo kamiu kuve juo kumijikia kuva tavio ga. Tibe na mo kamiu kumei, kuvan ga tibe na. Mia kito rela re bunu iliano van kito rivior vite nei.”

<sup>37</sup> Mia Pol naio ber ka nalo nei, berinavo “Ee, makanio, maka tibe na. Kumemi bunu numitutano ka parinio tubo re Romo nene, a ea kiano tuboiano, natibureano nalo na amila maka rimemedu ka kumemi ga na. Maka aleal ka kumemi numila tena bova tai, ana abitiv kumemi ea tomu nalo miralo, karina abuku kumemi nuba joomo ea nalakoiano, naruei vonganei ana ajidom ajil bulagio bena ea kumemi ga tibe na. !Makanio, kuvan bereio kuver kalo kuverinavo nalo naruei monoka amei ana mo avuru bulag kumemi ea vio nei, nalo monoka amei nei averenio iliano tai van kumemi beamu vo!”

<sup>38</sup> Naruei tomu natibureano nalo abar Pol kanano iliano nalo nei aban bereio, ana bogo napano nalo amijogial ka Pol naljuo Sailas, nalo bunu ajutano ka natuboiano re Romo, naruei nalo amerou toru. <sup>39</sup> Naruei abinime i aberenio iliano tai banlo, karina aburulo aban ea m̄arabo, aberinavo ajidom ka monoka nalo ataluvo den vio nei. <sup>40</sup> Mia Pol naio Sailas, aban bereio amiyotuba ea Litia kunuano jukamu, karina iorou kanio, ana na nalo amial kuruado nalo bereio ana ajan iliano novo nalo na be tena ilivituniano banlo, a karina iorou kanio ana nalo ajaluvo den komeli nei.

## 17

### *Pol naio Sailas, ajua vio Tesalonaika*

<sup>1</sup> Naruei Pol naio Sailas, naljuo amiel abano, ana ajel ea m̄arkomeli juo nei Amvipolis bija Apolonia, abinime i abokar m̄arkomeli nei, Tesalonaika. Markomeli nei be yimo na volkouano tai na kulo Ju nalo kialo joaio, <sup>2</sup> ana jibe ka napano Pol jorña mila ea vio nonovio napano ban eaio, naio jusol nalo na vio nei, jo ban bijalo joomo ea kialo yimo na volkouano nei, ea bogoti nalo na volkouano. Ana ea Legiano Lu tolu, naio jorña mila jibe na, a mil vatelabo bijalo ea vaio napano Iliano Lu jorña jiloglogio. <sup>3</sup> Pol naio jorña jilogloglo kanio, a jorña berial binime i meravo bo, berinavo takii vaio napano Iliano Lu bere-nio, naio memedu ga ka napano kanalo Naverikariano, tomu nalo amila searo ga banio, banbano-o naio m̄aro, ana iorou kanio monoka naio rimeul bereio den nam̄ariano. Ana Pol berial banlo, berinavo “Yesu nei napano nojorña neberio, naio naruei, be kiado Naverikariano nene.”

<sup>4</sup> Ana nalo tealo napano ajurña amia-gago, amialio aber iliano nene be riano, ana amonea Yesu, ana abinime i amia-sol Pol naio Sailas. Ana ea vio na, be tomu nalo na maka ave kulo Ju, mia napano amonea Atua ruei, ana nalo telabo bunu amonea Yesu ruei, bija bunu natuka-muano telabo na tire nalo kialo.

<sup>5</sup> Mia tomu na tortoru na kulo Ju nalo maka asaaro, nalo amijoku, ana naruei aberii ka mia ala von vite tai. Ana aba amial terati na parilo jikili nalo na vio nei, ana aburu nalo tealo napano abova lie vo, ana aba aburu tomu nalo telabo bereio ana amila burum̄ara tiniobi na, ana nalo aba amila burum̄ara uetubaiano janea m̄arkomeli nei. Ana nalo aberianña Pol naljuo Sailas nalo ajua yimo na toro tai kunuano, siano Jesono, ana nalo aban kalo ea yimo nene, ka avurulo ava komeli. Ana abinime i abokar yimo nei, ana amila searo mia, amila korovio m̄aratavo nene, <sup>6</sup> mia maka aleal naljuo joomo eaio. Ana abokar ga Jesono nene, bija kuruado dolu nalo, ana aburulo aba ajumoluaju ea mirano kulo navurim̄araboiano nalo na m̄arkomeli nei. Amil toru, aberinavo “Kulorinio nalo napanoaju abiliglar kiado yetemeriba nei, aban ea vio dolu nalo telabo ruei, mia vonganei abinime iaju kija kitoliko naruei. <sup>7</sup> Ana toro nei, Jesono, naio burulo aban ea kunuano, ana nalo nei abova, ajurña amila kokorov tuboiano na parinio tubo na vio Romo nei, Sisa, kiano. Sisa nene ga naio berenio ruei ka mia rolotu ka naio ga, mia nalo nei ajurña aberenio aberinavo parinio tubo

takurano ga ea yetemeriba nei, nina naio be toro tai napano siano Yesu.”<sup>8</sup> Ana tomu nalo bija kulo navurim̄araboiano nalo na m̄arkomeli nei, bogoti napano amijog iliano nei, mia nalo tinielo jikili, ana ajum̄ia amiaganiaga a ajum̄ia amil bova toru laka.<sup>9</sup> Ana na kulo navurim̄araboiano nalo nei aber Jesono nalo monoka adu burum̄ara puruveru tai toa jum̄alo, ka rila ana mia avokar re bunu Pol to vijalo bereio bogo tai, ver p̄eli mia maka ajikia avar merano bereio puruveru nene. Ana iorou ka napano amidu puruveru nene jo, ana amijamo ka nalo aba tavio bereio.

*Pol naio Sailas, aja via Beria*

<sup>10</sup> Ana bogiano kia ga, ana kuruado nalo na vio na aban amivenbena Pol naljuo Sailas ea kanalo m̄arabo, ana naljuo aban bere mave ea m̄arkomeli tai bereio, nina Beria. Mia bereio naljuo aju aba joomo ea yimo na volkouano na kulo Ju nalo na vio nei kialo.<sup>11</sup> Kulo Ju nalo na vio nei nalo abo, a nalo abe kialo vijauano, maka atibe ka nalo na vio Tesalonaika, nalo abar jidomiano novo ka napano amijikia amiagago vatitigio bo ka Pol naio Sailas kialo verloglogiano. Mia legiano nonovio, nalo tiniel jii m̄elea ka avitii Tubo kiano Iliano Lu ka aleal aver naljuo aberii be riano p̄eli na jum̄abe.<sup>12</sup> Amila jibe na bano-o, mia maka vesiou, ana na ajikar ka amonea naruei, ana navurim̄araboiano na tire nalo re Kris nalo bunu, naliko kulo Kris nalo telabo, nalo bunu amonea.

<sup>13</sup> Mia karina, ana iliano ban bereio bokar kulo Ju nalo yako Tesalonaika nanua, ana aberenio vonganei Pol naio jum̄a miololu ka Atua kiano iliano yako Beria bunu, ana nalo tinielo jikili bereio. Ana abinimei mave yako Beria, ana amila searo ea kulo Beria dolu nalo kanalo jidomiano bereio ka rila nalo tiniel ser naljuo ka ajil lo avano.<sup>14</sup> Ana kuruado nalo amial vite nei, aber bo ana amila Pol ka rivatove soḡeli koyou bereio, mia amial aberii Sailas naio Timoti, naljuo amijikia atu beamu vo, naljuo abo ga.<sup>15</sup> Ana nalo aburu Pol ea kiano m̄arabo, abatove koyou ea tei, ana amidu uako tai ana aba abokar burum̄ara bulukomeli nei, Atene. Ana bogo napano nalo ajuvan Pol ea vio nei ka avan bereio, ana Pol berii kalo berinavo mia Sailas naljuo Timoti, nalo bunu monoka ava tove soḡeli ea naio vesiou re, ka mia nalo air̄au vio takurano bereio vija naio.

*Pol joa via Atene*

<sup>16</sup> Naruei Pol joa via Atene, naio joreora Sailas naljuo Timoti ka naljuo amei, ana bogo napano naio jum̄a jirarag veve via janea m̄arkomeli nei, mia naio mial ga

ka napano vio bujo ga ka tavoru nalo, ana tenei mikuru kiano iviso.<sup>17</sup> Ana naio jo ban ea yimo na volkouano na kulo Ju nalo kialo, ana jum̄a mila iliano nalo telabo ka vite nalo nei bijalo a bija bunu kulo dolu nalo napano amonea Atua. Ana legiano nonovio ga, naio jum̄a ban bunu ea vio medave na m̄arkomeli, ka tukunu vija toro kei napano ver rialio ea vio nei.<sup>18</sup> Ana yako Atene, be burum̄ara yimo juo na verloglogiano na m̄asosouano, napano tomu na verloglogiano nalo na yimo juo nei, abiolo ka kulo Epikururu nalo, bija kulo Stoiki nalo, ana nalo aju abior bunu bija Pol.

Mia nalo tealo ajum̄ia amili tertelisu ban Pol, aberinavo “!Toro na mil m̄ele mia, mia naio maka rijikia vite na bo tai ka napano mijikia riverii ka kito.” Mia tealo bereio, amijog ka napano Pol jum̄a berii Yesu bija tumoluano, ana nalo ajidomiio aber nina tomu juo na, ana aberinavo “Peli, kumemi numial nuber toro nei naio jum̄a berii atua dolu nalo a niununo dolu nalo na buruvenuo na koalabo ga tai.”

<sup>19</sup> Ana iorou kanio, ana kulo Atene nalo abio Pol aberenio naio riva totano vijalo ea kanalo burum̄ara komeli, mave ea burum̄ara burusuku na vio nei, napano siano, Areopakas. Ana abika den Pol, aberinavo “Kumemi numisidom ka jau kalavon ka koverii verloglogiano vou nei napano m̄a kojom̄a koberial ban tomu nalo.<sup>20</sup> ?Kumemi numijog jibe verloglogiano na naio be dolu ga, ana kumemi numisidom nuvijikia ka vite nalo na kojom̄a koberenio na, salo nioti nene be venia?”<sup>21</sup> Ana bogo napano amila jibe na, ana aju ajakii kanalo bajago kouo tai, bior napano kulo Atene naliko kulo dolu nalo napano aja via na, nalo ajidom m̄elea ga ka dam̄ariga, ana atu ga ajog p̄eli na atukunu ka verloglogiano p̄eli na iliano vou, p̄eli na jidomiano dolu nalo, p̄eli na tomu nalo kialo moneano nalo.

<sup>22</sup> Naruei Pol jumolu jua miralo ea komeli nei napano jo mave yako Areopakas, ana mil banlo. Naio ber kalo, berinavo “Tomu na tortoru na vio Atene nalo, kiniou nemial jibe ka kamiu tiniemiu jii m̄elea nalotvano nalo toru laka, juvulu napano kulo dolu nalo tinielo jii.<sup>23</sup> Bogo napano nojum̄a nemiel ea komeli nei, ana nemial vio lu nalo a boda nalo, a kenemiu tavoru nalo telabo laka, mia bogo tai ana nemial boda tai napano aje vivitauiano tai joaio, napano berinavo ‘Boda na atua napano maka rejikia naio.’ Ee, kamiu kumitum̄a kumilotu ka atua nene, mia kubere be riano ga, maka kuvijikia leleio naio, ka naio be kei. Mia be Atua riano takurano ga napano naio jo, a naio naruei

kiniou nejidom neverial van kamiu ka kuvijikia naio. <sup>24</sup> Naio naruei naio be Atua Tomoruo napano jii yetemeriba nei, a vite nalo nonovio napano romial ajuai. Naio naruei naio be Parinio Tubo na tiniabene a be Parinio Tubo na yetemeriba nei. Naio maka lele toa vio lu nalo ðeli na vite lu nalo napano kulorinio nalo ga amilaio, <sup>25</sup> a naio maka to ga vain kito tomu nalo ka mia ravaganio ðeli na rovitikario. Peli ga, bior naio naruei, naio jian meuliano, a jian jegi, a jian vite nonovio ban tomu nonovio nalo. <sup>26</sup> Atua nene naruei, naio mila tomu kinkin nalo nonovio amaluvo ea toro na jukamu napano naio jii, ana jukamu beamu ruei, naio jekar bogoti nalo a vio nalo reraio ea mirano yetemeriba nei, napano mia kulo kinkin nalo nei amijikia ameul eaio. <sup>27</sup> Naio mila jibe na ka kito nonovio monoka rosidomii ka monoka realeal Atua nene, ana mila kito roju rojian juriado ban ea vio bobogio ka rabagbago ka kiano yulu. Mia bo ka rosidomiikar bunu, ka Atua nene, naio maka to koalabo laka, mia naio jo ga vaataro ka kito terakurano. <sup>28</sup> Tomu nalo ajiri kenemiu iouano nalo aberii vite nei ruei, napano tai berii jibe nei berinavo ‘Kito romeul ea naio, kito romiel ea naio, kito ea ga naio danjariga,’ ana dolu berii jibe nei, berinavo ‘Kito nonovio naruei kito robe kiano kulo vou nalo.’

<sup>29</sup> “Ana bior ka napano kito nonovio robe Atua nene kenerinio nalo jibe na, ana maka rimemedu leleio ka rotu rosidom rover naio jibe ka tavoru tai napano juriado toro ga miñaukanio ea niogo, ðeli na ea verumera, ðeli na ea puruveru, napano amiñauka jakii vaio napano jua ga kialo jidomiano. <sup>30</sup> Beamu laka ruei, ea meljokouo, tomu nalo maka ajikia vite tai, mia Atua bijuku bo kalo, naio maka tonña rivuluku kanaló vovaiano nalo ea bogoti nene. Mia vonganei naruei, ana na Atua berial memedu ga ban kulorinio reraio ea vio nonovio, berinavo monoka nalo aviliglo. <sup>31</sup> bior ka napano naio berkar legiano nene ruei, napano mia naio tibure yetemeriba nei, tibe ka napano rimemedu ka mia naio rila, a naio berkar bunu ruei kiano toro tai napano mia rila kiano iñauano nene. Naio mila vite nei mer-avo batitigio ban tomu nalo ruei, napano kiano toro lu nei, nalo amuebini ñaro ruei, avona bisi ana Atua bitirilario meul bereio.”

<sup>32</sup> Ana binimeí bokar vonganei, mia nalo ajuriña amiagago vatitigio ka Pol, mia bogoti napano amijog ka naio jonña berii berinavo toro tai ñaro, mia Atua mila

naio meul bereio, mia nalo tealo abital searo ea naio biorio, mia nalo tealo aberkanio, aberinavo “Bo ga, tobo beamu vo. Peli mia kumemi nuvidu bogo vanso ka mia kotokunu bereio van kumemi bogo tai navo.” <sup>33</sup> Ana Pol mial ber nalo maka bunu tiniel tii ka aiagago kanio, ana jumolu denlo batove bereio, <sup>34</sup> ana tomu nalo na vio nei tealo amoneaio, ana aju abinimeí abior vio takurano bija Pol, napano nalo tai kalo, naio be toro na toru tai na komeli na vio Areopakas nene memedu, siano Tionisia, ana tai bereio, naio be tira tai, naio siano Tamarisi, a nalo dolu bunu.

## 18

### *Pol jo yako Korin*

<sup>1</sup> Ana iorou ka vite nalo neibano Pol mila yako Atene, naio jaluvo denio, ana ban yako ea burumñara bulukomeli dolu na Korin. <sup>2</sup> Ana ea vio na, naio mileal toro Ju tai napano toro nene be toro tai na tanobuku na vio dolu Pontas, mia naio ba joa venuu na vio Italia, ea sano burumñara bulukomeli na vio Romo, mia vonganei, naio naljuo koano, abinimeí vonga aju Korin, bior Parinio Tubo Klotias na vio Romo naio bukubulag kulo Ju nalo ea kiano vio nei. Mia toro neibano siano Akuila, a koano siano Prisila.

Jibe na ana Pol ba mial naljuo, <sup>3</sup> mia naljuo aberenio bo ka Pol naio to naliko, ka aimñauka puruveru kija, bior naljuo naliko Pol, naltolu, kialo iñauano takurano, napano iñauano namña ajul panpano na yimo. <sup>4</sup> Mia amiñau jibe na banbano-o, mia ea Legiano Lu nalo, Pol naio jonña ban ea yimo na volkouano na kulo Ju nalo kialo, mia jonña mila iliano telabo laka naliko kulo Ju, a naliko bunu kulo Kris napano ajuai, naruei naio mila jibe na banbano-o mia jo buru nalo telabo.

<sup>5</sup> Mia iorou kanio, ana Sailas naljuo Timoti nalo abinimeí aboru iorou ea vio nei, ana ea bogo na, Pol naio mijamo ka momonio kiano bogo ea Tubo kiano iñauano, ka napano naio jonña mioliolu, jonña berialio ban kulo Ju nalo berinavo kialo Naverikariano riano napano ña aju rorea ka naio rimeí, nina be Yesu nene napano binimeí ruei. <sup>6</sup> Ana iliano nei mila ana kulo Ju tealo tiniel jer Pol, mia aberdoþe niegeniegeio kirivova laka, naruei amila banbano-o mila ana bogoti tai ana Pol mila kijokijo tai banlo, napano mijagdago bulag ka bulukievi na vio nei den ñano kulumñarauo, ber kalo berinavo “Ilirianiano na Atua kiano kinioú neberial batitigio ban kamiu kulo Ju ruei. Mia verenio kamiu maka kuvisidom kuvijogkario, kuvisidom

kuvanvan kovio ga, kiniou neber ka kamiu ka kenemiu burukija toa jumemiu ga, maka bunu toa jumaku naruei. Tikar vonganei, kiniou notuvan kamiu, mia nava neverial Lilianiano Vou Na Bo nei van nalo napano maka ave kulo Ju.”

<sup>7</sup> Ana na Pol jaluvo denlo ea kialo yimo na volkouano, naruei naio ba jua ga yimo tai napano jumolu ju ga tivelinio ka yimo na volkouano neibano. Yimo nene be toro tai napano maka rive toro Ju kunuano, mia vonganei naio monea Atua rui, napano siano Titias Jastas. <sup>8</sup> Mia navurim̄araboiano na yimo na volkouano nei, napano siano be Krispas, naio tai nene napano monea Tubo Yesu, naio naliko nalo na ea kiano m̄aratavo, a be tomu dolu nalo telabo na vio Korin bunu napano bogo napano amijog Pol kiano iliano nalo, mia nalo amoneaio, mia karina amila varueiano ealo.

<sup>9</sup> Ana iorou kanio ea bogiano tai, ana Pol monmelio ana na mial Tubo mil banio, berinavo “Pol, jau komerou re ka tomu nalo, mia jau kala bo ka ga, koto koverial kiaku iliano. Mia jau kala re ka napano tomu dolu nalo ala so koto melumu, <sup>10</sup> bior kiniou nojo bijaso. Mia ve re bunu toro tai ea komeli nei napano mia rijikia tukuso p̄eli na rijilso, bior kiniou be kiaku tomu nalo telabo rui ea vio nei.” <sup>11</sup> Ana na Pol naio joa vio nei bogo tebievi kija ga, ba bokar yuka vodolu a togio bereio, a bogo nonovio naio jon̄ia berloglog Atua kiano iliano ban tomu nalo.

*Kulo Ju nalo aburu Pol ban ea komeli*

<sup>12</sup> Ana ea bogo na, parinio tubo na vio Romo naio bitirilar toro tai ka ve tubo na tanobuku reraio na kulo Kris nalo kialo, mia toro nene siano, Kalio. Naruei ea bogo na, kulo Ju nalo aberii abirakar ka monoka ala vite tai ka tokovio ka Pol ka naio rioliolu re bunu, naruei nalo aba abokar Pol, ana aburu naio ban ea komeli na Kalio nene kiano. Naruei kulo Ju nalo aberial ka Kalio bija kiano natibureano juo, nalo aberinavo <sup>13</sup> “Toro nei, naio jon̄ia milavonio ka rivuru tomu nalo ka ava abolkouo van Atua ea m̄arabo nalo tai napano maka rimemedu leleio ea tivelinio na kenememi tuboiano.”

<sup>14</sup> Ana na Pol naio jon̄ia jidomii ka sian kiano verdopeiano ea kialo iliano nei naruei, mia naio maka ril vo, ana na Kalio nei monkoyo, mil kija ban kulo Ju nalo. Naio ber kalo, berinavo “Kulo Ju nalo, verenio kamiu kuverii ka kiniou ka toro na naio mila bajago nalo napano abova laka, p̄eli na naio mue toro tai, p̄eli na naio bina, p̄eli na titai tibe na, mo bo ka kiniou naiagago ka kamiu. <sup>15</sup> Mia venia napano

kuberenio, mia nemijog jibe ka maka ve titenia leleio, be vite kurano ga ea tivelinio na kenemiu tuboiano na kamiu kulo Ju ga. Verenio tibe na, ana na mia kamiu ga kuvitio, kiniou maka nasaaro ka neiaagago ka vite nalo na p̄eli na nala tibreiano tai riviorio.”

<sup>16</sup> Mo ea iliano nalo nei mia naio mijil bulaglo den kiano komeli bereio. <sup>17</sup> Naruei vite nei mila tinielmimi lie vo, mia bogo napano aba tavio, abokakar natukamuano vou na kialo yimo na volkouano, napano siano Sostinis, naruei ajuk niegeniege naio ea ga m̄aratavo na komeli nene. Naruei Kalio naio jo bitio, mia naio maka riarlerinio eaio, naio maka rila titai leleio ka nalo nei.

*Pol naio jo yako Eveso, karina ban bereio Antioko*

<sup>18</sup> Mia iorou ka nina, ana na Pol jo bogo tebievi lie bereio vo naliko kuruado nalo na vio Korin, ana iorou kanio ana naio jaluvo denlo, jidom rivan bereio Siria, ana ea bogo na, Prisila naio Akuila, abe juo naliko naio. Naruei nalo abajou koyou ea tei, ea komeli na vio Kenkria, naruei ea vio na, ana Pol berenio avuron vijinio. Nina bior naio mila verikariano na tai jikili bija Atua beamu rui, ana vonganei vite nonovio na ea verikariano nei abiniuviniu rui, ana nalo aburon vonga vijinio ea bogo nene. Ana nalo abavin ea uako tai, napano naio jo ban ea vio Eveso. <sup>19</sup> Mia bogo napano abinime aboru Eveso, ana na nalo abouro, naruei ana Pol naio berenio mia Prisila naljuo Akuila nalo atu aim̄au ea vio na beamu vo. Mia naio juvan naljuo, ba joomo ea yimo na volkouano na kulo Ju nalo kialo ea vio nei, a mila iliano telabo bijalo. <sup>20</sup> Nalo ajaaro ka ajukunu naliko Pol, naruei nalo ajidom ka naio to kija rivijalo ka amijikia ail lie vo vijaio, <sup>21</sup> mia Pol naio ber kalo, berinavo “Siva tanea, mia kiniou monoka navan bereio ea vio Siria beamu vo. Mia verenio Atua kiano tilano, mia kiniou nemei ea kamiu bereio ea vio nei Eveso vesiou re.” Naruei naio takurano jumolu den nalo nei, ana midu uako ban bereio.

<sup>22</sup> Mia bogo napano naio binimei bereio o boru Siria, naruei bauru ea bulukomeli na vio Sisiria, ana na ba bavin Yerusalemo. Karina naio ba miyotuba ka taara na namoneano nalo, mia iorou kanio, ana na naio batove bereio yako Antioko. Nina naruei ana na Pol mila nonovio kiano burun̄ara ieliano valuo nei.

*Pol naio miel bereio, ninei be kiano varolu nene*

<sup>23</sup> Ana na Pol naio jo yako Antioko banbano-o, bisi na naio juvan vio nene

bereio, ban bereio ea komeli dedade nalo na tanobuku na vio Kalesia bija Vrijia. Naio jel ea komeli nalo nei vaarakurano ruei, mia naio ban ealo bereio ka rijai naiagagoano nalo ka atu sikili lie vo.

*Apolos naio mioliolu ea vio Eveso bija vio Korin*

<sup>24</sup> Mia bogo napano Pol naio maka rimeii rivoru bereio Eveso vo, mia toro Ju tai binimeii ea vio nei, naio be toro na burumara komeli yako Aleksadria. Toro nei, siano Apolos, naio be toro tai napano pariparino bo laka, napano mijikia iliano nonovio napano jua Vivitauiano Lu nalo, a naio be toro tai nariña mioliolu bo-o mia bo. <sup>25</sup> Nalo aberloglog naio batitig ka Tubo kiano m̄arabo ruei, naruei naio mijamo ka kiano meuliano vodolu ka mia n̄a rioliolu p̄eli na riverloglog vatitig tomu nalo ka vite nalo ea Yesu. Mia vite nonovio na n̄a naio jom̄a berenio naio kirimemedu laka, mia vite takurano ga, naio maka rijog vo ka napano tomu nalo monoka avaruei ea Yesu siano, naio mijikia ga varueiano napano Jone Baruei milaio jukamu nua beamu. <sup>26</sup> Mia bogo napano naio jom̄a ba mioliolu joomo ea kulo Ju nalo kialo yimo na volkouano, mia naio maka rimerou kalo, maka rialerinio. Mia bogoti tai, ana na Prisila naio Akuila, abe juo amijog ka napano naio jom̄a mioliolu jibe na, naruei amijog lubar ka toro nei maka rijikia batitig vite nalo nei tealo vo ea m̄arabo na Atua kiano, ana na nalo aburu naio aberloglog vatitig naio ka vite telabo bere vo.

<sup>27</sup> Ana iorou kanio, Apolos naio jidom rivan ea kulo Kris nalo kialo vio yako Akaia, naruei banalo na yako Eveso nalo aberinavo bo laka verenio rivan tibe na, naruei nalo abivitauiña m̄esi tai ban naiagagoano nalo yako ka mia Apolos naio mijikia ridukario rivanu, ka rila nalo asaaro ka avurukar naio to rivijalo. Mia bogoti napano naio bano-o bokar vio na, naio miija vatitig nalo napano Atua kiano tiniememiano milalo amonea ruei. <sup>28</sup> Naio mijailo napano ea tomu nalo miralo, naio jilogloglo ka juñabe ana kulo Ju nalo amilaluv m̄arabo, bior naio ber meravo ka iliano telabo napano ajua Vivitauiano Lu napano aberenio meravo vatitig ka Yesu naio be Naverikariano riano. Ana bogo napano kulo Ju nalo amijog kiano verloglogiano nei, nalo maka bunu ajikia aver titai bereio.

## 19

*Pol naio joa vio Eveso bereio*

<sup>1</sup> Naruei bogo napano Apolos naio ba jo kia ga Korin vo, mia Pol naio jo miel jel ea kiano m̄arabo napano jel ea tanobuku na mave ea suku nalo, naruei naio jakii m̄arabo nene banbano-o binimeii boru Eveso. Naruei ea vio na, naio bano-o miyotuba ka taara na telisu na naiagagoano nalo kialo napano naloaju, <sup>2</sup> ana bogoti tai, ana na naio bika denlo, berinavo “? Mia bogoti napano kamiu kumonea Yesu, mia kumijev Niununo Lu rimeii ea kamiu ka bogoti na, p̄eli na maka kuvijevio?”

Naruei nalo aberdope, aberinavo “?Ana Niununo Lu na vabe na? Kumemi maka lele nuvijog kija vo ka be titai jibe na.”

<sup>3</sup> Ana na Pol naio bika denlo bereio berinavo “?Mia bogoti napano abaruei ea kamiu, mia kamiu kumial ka sano nene be venia?”

Naruei nalo aberdopeio, aberinavo “Abaruei ea kumemi, numial jibe ka ga varueiano nanua Jone naio jom̄a milaio.”

<sup>4</sup> Ana na Pol naio berloglog vatitiglo, berinavo “Nao, nina bo ga na, ana varueiano napano Jone naio jom̄a milaio nua ban tomu nalo, naio jibe ka kijokijo ga tai ka ber ka tomu nalo nei abiliglo ruei, mia nina maka riverenio ka tomu nalo nei amonea Yesu ruei na. Mia Jone naio mijikia vite nei bunu, bior ka napano naio binimeii jukamu, mia jom̄a ber ka tomu nalo berenio monoka amonea nana mia naio rimeii iorou kanio, jibe ka Yesu.” <sup>5</sup> Mia nalo na vio Eveso amijog Pol kiano naverisivisiano nei, mia amial bo laka ka avokar varueiano ealo bereio, ana na nalo abaruei ealo ea Tubo Yesu siano. <sup>6</sup> A ka bogoti na, ana Pol naio jokol pariparilo, naruei Niununo Lu binimeii ealo, mila ana nalo ajum̄a amijev ka iliano dolu nalo, a mila bunu ajum̄a aber bulavulag bunu iliano tealo napano n̄a Atua jian banlo. <sup>7</sup> Ea kialo taara na telisu nei, mirano nene titai jibe kanio duelimo ba juo [12] ga.

<sup>8</sup> Naruei Pol naio jo Eveso siberio tolu [3] bereio, mia bogo nonovio naio jom̄a ba joomo ea kulo Ju nalo kialo yimo na volkouano, mia mila iliano telabo banlo. Mia bogo tai na maka rialerinio ealo, mil kirisikili banlo, bogo tai bilvili ealo, a bogo tai jegidu kalo ka mia nalo amei jouro ea Atua kiano navenatubioano. <sup>9</sup> Mia naio mila jibe na banbano-o, mia mial ka napano bijuku deio, bior nalo pariparilo kirisikili ga, mia nalo maka asidomii ka amonea leleio. Ana nalo tealo ajum̄a aberii niegeniege lelan Marabo Vou nei ban kulo dolu nalo joomo ea yimo na volkouano nei, ana na Pol naio jumulu burubulag bereio naiagagoano nalo, ajaluvu den kulo Ju nalo

nei, mia legiano nonovio nalo aba abior a amioliolu ban tomu nalo na ea yimo na teninio na toro nei Tirenas kiano. <sup>10</sup> Nina, Pol naio jorña milala jibe na banbano-o bokar yuka juo [2] bereio, naruei mila ana tomu nalo na burumñara tanobuku nei Esia, kulo Ju nalo naliko tomu dolu, nalo nonovio amijog Tubo kiano iliano.

*Tomu tealo abolkouo ea Yesu siano amilaluvio*

<sup>11</sup> Ana bogo napano Pol naio jorña miñau jibe na yako Eveso, mia Atua miñau ea naio, mila burutomoluo na tortoru nalo telabo ka rijai tomu nalo. <sup>12</sup> Mia verenio niati kulumñarauo na telisu tai, ðeli na soto tai, mia tomu nalo abario ba ban Pol bu veveio jukamu vo, bisí ana abar bano, aburu ea tomu namieiano nalo niabelo, mia kulumñarauo nalo nei amijil bulag kialo mieiano nalo, ðeli na niununo va nalo napano ajualo.

<sup>13</sup> Ana ka bogo na, kulo Ju tealo bunu aju ajanea tomu nalo, aju amijidig bulag niununo va nalo denlo. Nalo nei maka amonmonea Tubo Yesu, mia bogo napano amijog ka napano Pol miñau jumñabe, mia nalo bunu ajidomii ka mia ala vonio ka mia aiñau ea moroano na sio nene. Mia bogo napano amijidig bulag niununo va, amil banio, aberinavo “Nuber kaso memedu ea Tubo Yesu napano ña Pol jorña mioliolu kanio, ka jau kataluvo den toro na.”

<sup>14</sup> Ana be bogo tai, ñeaku nalo tealo bunu ajidom ala vonio tibe na. Nalo na, nalo kiritete aluo na toro tai na be parinio toro lu ka kulo Ju nei, napano siano Skeva. <sup>15</sup> Naruei nalo nene abinimei abolkouo ka toro tai napano niununo va joaio, naruei amil ban niununo va nei ka taluvo denio, mia niununo va nei naio tinien jerlo, berinavo “Mo, kiniou nemijikia sio na Yesu, a nojo nemijog sio na Pol bunu, mia kamiu kenía? !Kiniou maka lele nejikia kamiu, kamiu kuvitkar kamiu vo!” <sup>16</sup> Mia kolvare ga, toro nei biako binimei ealo, midonilo bano-o jovulu nalo aluo neibano, mila niegeniege tanealo napano mijede bulag nonovio ñalo kulumñarauo nalo. Naruei nalo aburo den vio nei napano amijeljel lulua ka salo burukija naruei. <sup>17</sup> Naruei tomu nalo aberii vite nei bano-o bokar Ju nalo naliko kulo dolu nalo, mila na nalo na vio Eveso abiniu amijogio, mia vite nei mila ana nalo amemebiju kija, ana abamenea Tubo Yesu siano lie vo.

<sup>18</sup> Ana iorou kanio, ana nalo telabo kalo napano vonganei abinimei abe namoneano nalo ruei, nalo abinimei aber bulavulag ka ajumña abar semei, a aber bulavulag vite nalo nanña ajumña

amiñaukanio ea burisolu nalo. <sup>19</sup> Mia nalo tealo napano abe tomu na burupati burisolu memedu, abarvar vite nalo nanña amiñau bijaio, jibe kanio kialo niosi nene nalo binimei vio takurano, naruei kamu ea tomu nalo miralo napano aju amialio ka bogo na, abuku nonovio ban ea sebi. Niosi nalo nei miroano laka, mia bogo napano ajumña ajidomii sano puruveru nonovio nene nanua beamu abulu kanio niosi nene nalo, amialio jibe ka burutomoruo laka, jovulu taamñaka [1,000,000] puruveru telabo laka. <sup>20</sup> Mia bogo napano vite nalo na jibe nei amalmaluvo, mia nalo aju amialio ka Atua kiano moroano miñau jikili laka, mia amialio ka napano Tubo kiano iliano jorña mikulkulu ba buru tomu ta bunu lie vo ea vio nonovio.

*Siniabu toru ea vio Eveso*

<sup>21</sup> Mia Pol bitilubar ka Atua kiano iñauano jo bavin, ana mijog ea naio ka monoka rimñau rivan lie vo, ka mia selivivi rivitii veve bereio tanobuku nalo na vio Masetonia vija vio Akaia, yako Kris, a karina, mia naio riva Yerusalemo bereio. Ana naio berkario bunu ea bogo na, berinavo “Mia iorou ka napano kiniou navan bereio Yerusalemo, mia monoka neiel bereio navan lie vo, monoka najakao novoru Romo.” <sup>22</sup> Mia naio mial ka mia naio monoka to bogo ve telisu kija bereio beamu vo ea tanobuku na vio Esia vija burumñara komeli nene nei Eveso, naruei kiano tomu juo na ijaiano nei, Timoti naljuo Erastas, naio miilalo ajukamu aban ea vio Masetonia.

<sup>23</sup> Ana ea bogo na, napano Pol naio jo kia ea vio nei Eveso vo, ana burumñara siniabu tai jumolu tivelinio ka Marabo Vou na Yesu kiano. <sup>24</sup> Vite nei, burupati nene napano kulo Eveso, aberenio kanalo atua, naio be tira tai, siano Atemes, a nalo ajumña abolkouo ka kanano burumñara tavoru na ea burumñara yimo lu na kanano. Mia toro tai na vio na, siano Timitrias, naio buru tomu telabo abinimei amiñau kiano, napano ajumña amiñauka kiri tavoru sesa nalo na yimo lu na atua na tira nei kanano, nalo amiñaukanio ea verumera, ana tomu nalo ajumña abulu denio, napano mia naio naliko kiano tomu nalo abar tanea puruveru miroano biorio.

<sup>25</sup> Ana iorou kanio, naio mial ka napano iñauano na ña Pol jorña milaio naio jorña muedom kanano iñauano nei ruei, ana bogoti tai ana naio bio ban kiano tomu nalo, naliko tomu dolu nalo napano ajumña amiñauka vite nalo ea verumera, naruei bogo napano nalo abinimei vio takurano, mia mil banlo, berinavo “Mo, tomu nalo, kamiu kumijikia ruei ka

kito roju romeul ea ga kanado iñauano neibano mña kito rojuña romiñauka vite nalo ea ga verumera. Iñauano na ga mila ana kito rojuña rabar kija puruveru. <sup>26</sup> Mia neber ñeli kamiu kumijog ruei, ñeli na kito tai romial ka mirado, ka napano toro nei Pol naio jo bilig tomu nalo kanalo jidomiano nalo aju abano be dolu. Naio jomña mila ea vio na, a jomña mila bunu ka komeli nonovio na buruñara tanobuku na kanado nei Esia, napano jomña berloglog tomu nalo ka tavoru nalo napano mña jumano toro ga miñaukanio, nalo maka ave atua riano lelejo ga. <sup>27</sup> Ana kiniou nemialio ka toro na kanano iliano na mia rila kiado iñauano nei rivatove laka, ka napano mia tomu nalo asidom re bunu ka mia avulu vite nalo napano mña kito romiñaukanio. Mia mave ka nina, kitoliko kulo Esia, a vija bunu tomu dolu reraio ea yetemeriba nei, rojuña romilotu ka kiado atua na bo nei Atemes, mia ñeli toro na naio jidom rivuku lelan naio kovio, ñeli na naio jidom rila kunuano lu rimei rive vite kurano ga tai kovio.”

<sup>28</sup> Naruei bogo na nalo amijog iliano nei, amila legleg tinielo ana mila tiniel mimi toru laka, mia ajurña amiaia ga aberinavo “Atemes na Eveso naio bo mia, naio ga takurano kito rojidomio-o!” <sup>29</sup> Ana na abitunu vatitigio, naruei aba amila buruñara uetubaiano ea komeli, ana aba abokar Kaias naljuo Arestakas, tomjuo na vio Masetonia napano naljuo ajurña amiel naliko Pol abinimei ajua vio nei, ana aburulo, ajikiti kalo aba joomo ea buruñara vio na vioriano na Eveso nei, mia kulo Eveso bunu aba naliko, abano amison vio nei bujo vatitigio.

<sup>30</sup> Naruei Pol jidom ka riva joomo bunu ka mia rilavonio ka ril van tiniobi nei, mia naiagagoano nalo na vio Eveso amerou ka mia aue beleaio, ana na aberbure naio. <sup>31</sup> Mia tomu na tortoru tealu na mñatatoke komeli na kulo Esia kialo, nalo amila bilbilu bo naliko Pol, naruei nalo bunu amiila toru binimei, abika jikili den Pol ka mia naio rivan re joomo, mila ana naio maka bunu rivano bereio.

<sup>32</sup> Naruei joomo ea vio nei, tomu nalo aju amila buruñara mñaduano, nalo telabo amil vaarakurano, tealu amil ban jibe nei, a tealu amil be dolu, a nalo telabo maka lele ajikia ka nalo aju bior kar venia.

<sup>33</sup> Naruei kulo Ju nalo amerou ka mia tibe mña na averenio nalo naruei abe burupati na siniabu nei, ana na nalo amiyukular nalo tai, siano Aleksada, naio ba jumolu jukamu ea tomu nalo nei miralo ka rilavon ka ril vanlo ka tiniel ser re nalo kulo Ju nalo. Naio buku jumano ka rila atu melumu ga, mia nalo be kialo jidomiano

ruei ka aberiaña naio be toro na siniabu nei tai naruei. <sup>34</sup> Ana karina, bogo napano abitulubar ka naio be toro Ju ga tai, mia mñaduano nei naio maka lele rivatove, mia aju amiaga burutomoruo ea tira na be kialo atua nei siano, amiaia ga amidu buron joolo kanio, aberinavo “!Kenememi Atemes kumemi kulo Eveso naio bo-o! ! Kenememi Atemes naio takurano ga bo-o laka-o!” Mia nalo ajurña amiaga jibe na ba bokar aura juo titai jibe na.

<sup>35</sup> Mo iorou kanio, ana tubo tai na vio Eveso nei naio jumolu jukamu ea miralo, naio milavon ka amelumu bereio bano-o bisi, ana naio ber kalo, berinavo “Tomu nalo na vio Eveso, kito nonovio romijikia batitigio ruei ka kiado komeli nei naio be buruñara komeli tai, a naio be komeli lu tai. Kito naruei, rojuña robitkar yimo lu na kiado buruñara atua nei, Atemes, a romijikia ka kiado moneano be riano, bior nanua beamu, mñarivitano tai mijoru, ana sano buruñara puruveru lu nei mijoru jel tiniabene binimei, napano maka rijoru ea vio dolu, mijoru ea kito ga, naruei kito roju robitkario bo. <sup>36</sup> Vite nalo na romijikia ruei ka abe riano ga, tomu nalo na vio dolu nalo maka ajikia aili lelan leleio. Verenio tibe na, mia bo ka kito ralavon ka rotu rivu dañariga. <sup>37</sup> Ana ea tivelinio na naljuo nei napano kamiu kuburulo abinimei ea vio nei, kiniou maka nojog ka napano kuverenio ka aba abina ka vite lu tai ea yimo lu na kanado atua, ñeli na amiolua siano, ana tibe na mia maka rejikia rala titai ka naljuo ea vio nei.

<sup>38</sup> “Mia verenio tomu nalo na amiañauka verumera nei, jibe ka Timitrias nalo, verenio nalo be kanalo veriano kia navo ka ala ka tomjuo nei, mo, be kiado komeli nalo aju, mia be kiado natibureano nalo aju, mia verenio nalo aial ka tuñabe ana amijikia avurulo ava ail vanlo ea sano vio nene. <sup>39</sup> Mia verenio kamiu kuvisidomii ka be titai kia navo ka rovinu rovitio bereio, mo bo, romijikia rovitio ga ea kiado viorian tai bereio.

<sup>40</sup> “Nina, bior ka napano bajago namña rojuña romilaio banei, kito raba koalabo laka ruei na. Maka lele ve vite tai rimemedu ka napano mia kito romijikia rala buruñara mñaduano nei riviorio, a verenio makan, ñeli ana mia tomu na tortoru nalo na vio Romo mia nalo avuku kito ea nalakoiano novo kario kiado iñauano nana banei nene.”

<sup>41</sup> Mia bogo napano naio berenio iliano nei bisi, mia tomu nalo kanalo jidomiano nalo abavatove bo bereio ruei, naruei naio jetavoko iliano ana naio ber kalo ka nalo amijikia aieliel dedade bereio.



## 20

*Pol miadu bereio ka namoneano nalo ea vio Masetonia bija ea vio Kris*

<sup>1</sup> Mia be legiano tealo bereio, bogo napano burum̄ara māduano napano kulo Eveso nei nalo amilaio batove bereio, mia Pol naio bio namoneano nalo abinimeio vio takurano, naruei naio jian iliano novo banlo ka atu sikili lie vo, naruei naio mil maariano banlo, ana juvanlo, ba Masetonia bereio. <sup>2</sup> Ana ea vio na, naio ba miel jel ea kiano tanobuku nalo, mia ea vio nonovio naio jon̄a mijai tomu nalo ea kiano iliano novo nalo, ana iorou kanio, bavin bere Kris, napano bulukomeli labo nene naio be Korin. <sup>3</sup> Naruei Pol naio joa vio na bano-o bokar siberio tolu, naruei naio jo jidomii ka sel ea uako tai napano naio jo, ka mia rivan ea vio Siria bereio. Mia vaataro ka avuru veru, mia iliano boru ea naio berinavo kulo Ju nalo na vio na, ajum̄a amila jidomiano va tai ka ala van Pol ea bogo napano naio jo ban ea m̄arabo togio kia ga vo, mila ana naio maka bunu rivan ea uako nene, mia midu m̄arabo na tebievi, miel barlaka ba jeliviv ea vio Masetonia bereio. <sup>4</sup> Ana ea bogo na nalo tealo napano abano naliko naio, jibe kanio Sopata na vio Beria, napano Piras kenerinio, naliko Arestakas a Sekantas, naljuo na vio Tesalonaika, bija Kaias na vio Tepi, bija Timoti, a bija bunu Tikikas a Trovimas, naljuo na vio Esia.

*Pol naloaju yako Troas*

<sup>5</sup> Naruei nalo nei tealo kalo napanoaju naliko Pol, nalo ajukamu aba aboru Troas. <sup>6</sup> Ana Pol naio iorou bano, mia kiniou Luka, nojusolo bereio ea vio Vili-pai, a kumemi numila Jokoluolu Na Sinaniano Na Taba ea vio na. Bogo napano jokoluolu nei bisi, ana numisel ea uako, nuburo bano-o nubokar bogoti jumo, naruei nubinimeio nuboru Troas, napano nalo napano ajukamuaju rorea kumemio eio. Naruei kumemio nubiniu numitua vio Troas bokar bogoti aluo [7].

<sup>7</sup> Ana ea Legiano Lu, bogo napano m̄erenio batove bisi, jibe ka napano legiano na be moti na bogoti aluo jikario naruei, kumemio nubior kumemio liko namoneano nalo na vio na, nubolkouo a nubure kokorovio joko lu. Naruei Pol naio jidomii ka ber mia nuvituvan kavijova kia ga vo, mia bior ninei be vioriano na maariano kumemio liko, be iliano telabo, mila Pol bunu mil vio tebievi, ba bokar bogiano viovare vaarakurano. <sup>8</sup> Naruei ea bogo nei, kumemio numitu nubior ea vajoomo tai mave ea vio vodobi tolu, mia tomu nalo abar yulu telabo binimeio, ana mila vio bituvitunu toru laka joomo.

<sup>9</sup> Naruei m̄eaku tai, siano Yutikas, naio jon̄a jotano ea bulukujegi, mia bogo napano Pol jon̄a mioliolu jiou bano-o, ana m̄eaku neibano mirano jouo mia mirano jouo. Naio mila jibe na banbano-o monmelio bobogu naruei, mia amiilo kanio naio mijoru ea bulukujegi nei, mijoru batove tavio ban manenea naio ea borotano. Vio nei naio jo laka mave, naruei bogo na ajikiti abatove, abokar naio, mia amialio ka napano m̄aro ruei. <sup>10</sup> Mia Pol bunu batove ka rial naio, naio mon korkoro batove, miabukario ka jum̄ano be juo, naruei naio ber kalo, berinavo "Kamiu kuvijog rivova re, kuvitigio re, vonga nei kiano meuliano binimeio ea naio bereio ruei nei."

<sup>11</sup> Ana na Pol nalo abavin bereio, ana nalo amijev Sinaniano Lu nei, karina na nalo ajinan, ana iorou ka nina, ajukunu bereio bano-o viomijeni konlo, ana na Pol juvanlo bano. <sup>12</sup> Ana tivelinio ka m̄eaku nei, nalo aburu naio meul batitigio bereio jo naliko aba vonuo, a nalo amijog bo toru laka ka napano Pol mila batitigio m̄eaku nei banlo.

*Pol naloaju m̄arabo ka avan bereio*

<sup>13</sup> Mia Pol naio ber ka kumemio ruei berenio nuvitukamu nuvisel ea uako, nuva nuvitu rorea naio ea komemio na vio Asoso, mia naio rimeio iorou, riel ga sel uro. <sup>14</sup> Naruei kumemio nubano nuboru Asoso, karina naio binimeio iorou, binimeio mave ea uako, naruei kumemio nubiniu nubano nuboru ea bulukomemio na vio Maetilin ea uleule sesa tai.

<sup>15</sup> Karina, kumemio nuburo-o nubokar legiano takurano bereio, mia nubauo numijaka ea uleule sesa tai bereio, siano Kiosi, a iorou kanio nina, ea legiano dolu nene, kumemio nubinimeio nuboru ea uleule sesa na Samoso, mia legiano dolu nene bereio, ana nuboru ea komemio na vio Maelitas ea tanolabo, naruei nubauo ea vio na. <sup>16</sup> Ea bogo na, kumemio nubarlaka ga ea vio Eveso jibe na, maka nuvauro eio, bior Pol naio mial berinavo maka rivu ka kito rodu bogo ve telabo laka ea tanobuku nei na vio Esia, bior naio jo jidomii ka verenio nuvijikia nuvila, mia bo ka nuvoru Yerusalemo rimemedu ka bogo na Jokoluolu na Yuvi.

*Pol naio joa vio Maelitas, naio mil maariano ban navurim̄araboiano nalo na vio Eveso*

<sup>17</sup> Naruei ea vio Maelitas, Pol miila toru ban ea vio Eveso, berinavo navurim̄araboiano na nalotvano nalo amemio aial naio. <sup>18</sup> Naruei iorou kanio ana nalo abinimeio, ana Pol berial kiano iliano na maaro banlo. Naio ber jibe nei, berinavo "Kamiu, kamiu kumijikia

batitig kiniou bo ruei, napano jikar ea bogo napano nebinimeí be moti garuei ea kiado tanobuku nei, na vio Esia, binimeí bokar vonganei, kiniou nojo bija kamiú bogo tebievi ruei. Mia kumijikia batitig kanaku bajago bunu a kanaku iñauano nalo na Tubo kanano napano ña nemilaio ruei. <sup>19</sup> Kamiú kumijikia ka iñauano nalo na, nojorña nemilaio napano kanaku jidomiano melumu ga, a nemilaio ea jogumiraku, a nemilaio bunu ea bogokouo naio napano kulo Ju nalo amila ban kiniou, napano miyotuba ea kialo tiniemimiano nalo kar kiniou. <sup>20</sup> A kamiú kumijikia batitigio bunu ruei, napano iliano nonovio napano memedu ka averenio, napano mijikia riija kamiú, iliano nalo na maka noimou ka naverialio van kamiú, ñeli na maka nemerou ka neverloglog kamiú kanio, nina ea bogo nalo napano kito rojua vio medave bija tomu telabo, ñeli na ea bogo nalo napano kiniou nojorña nemiel jeliviv ea kunuemiú nalo. <sup>21</sup> Mia kiniou nemil ban kulo Ju nalo ñeli na nemil ban nalo napano maka ave kulo Ju, mia maka neialerinio, mia nojo nejikili kalo, neberial banlo, neberenio nalo nonovio monoka aviliglo amei ea Atua, monoka amonea kiado Tubo Yesu Kristo.

<sup>22</sup> “Mia vonganei, kiniou nojo naban bereio yako Yerusalemo, mia maka nejikia venia mia kulo Ju nalo ala van kiniou ka bogo napano mia novoru ea vio na, mia nomijog lubar ea kiniou ka Niununo Lu naio jorña buru kiniou jibe na, naruei monoka navan ga. <sup>23</sup> Mia Niununo Lu naio jorña mila kirimeravo ban kiniou ruei ka napano ea bulukomeli nonovio nalo napano mia notorña navan ealo, mia monoka novokar bogokouo nalo, mia tomu nalo aju rorea ga ka mia avuku kiniou navan ea nalakoiano. ?Tenene na kiniou nemial ka ver kiniou navan yako Yerusalemo, ñeli mia tibe na ga bunu bo? <sup>24</sup> Mia naio bo ga na, bior napano maka nevitii kanaku meuliano naio rive vite tai, ñeli na mokotenaku, ka monoka nesidomiio ñelea, ñeli ga. Mia kiniou nejidom titai takurano ga, ka mia nemijikia novuro ga rivano-o mia novokar juluvati na iñauano napano Tubo Yesu midu joaio jumaku, ka napano monoka neverial Ioluano Vou na Bo na Atua kiano na tiniememiano ea vio reraio ga.

<sup>25</sup> “Ana vonganei, nemijikia bunu ruei ka kamiú napano nojorña najanea kamiú, napano nemiolio lu ka Atua kiano nave-natuboiano ban kamiú, nemijikia ka mia kamiú nonovio maka lele kuvijikia kuvial miraku bereio bogo tai. <sup>26</sup> Verenio tai ka

kamiú maka rudu Atua kiano iliano nalo ea kiano meuliano vo, napano ña neber ka kamiú ruei mia naio riva kovio, mia verenio naio riva kovio, kiano burukija ritoa naio, mia ritoa re kiniou, <sup>27</sup> bior kiniou neberial ñarabo ban kamiú ruei, mia kiniou maka noduvan Atua kiano jidomiano leleio ka kamiú.

<sup>28</sup> “Naruei kamiú navurim̄araboiano nalo, bior Niununo Lu bitiri bulag kamiú javukia tomu nalo na ña abitikar nunu nalo na Atua kiano nalotuano nei, napano naio bulular ka burukija na kenerinio kanano, naruei kamiú monoka kuvitikar vatitig kamiú, a monoka kuvitikar vatitig nalo na. <sup>29</sup> Nao nejidom never ka kamiú, bogo napano ka mia kiniou nataluvo den kamiú bisi, mia nemijikia ka mia kuli deden nalo amei, aser negieniege lelan kenemiú nunu nalo, mia nalo ala von ka ala dedade ealo, ava aveve terakurano. <sup>30</sup> Mia kiniou nemijikia never bunu, ka mia iorou kanio, mia kamiú tomu na tortoru tai ka kamiú ga, mia nalo atumolu, mia aver ilivovuiano na sibiano ve telabo, ka ala von ka avuru bulag naiagagoano nalo ava atakisorlo ga. <sup>31</sup> Tibe na, kamiú monoka kuvitu vatitig, a monoka kuvisir-arago vatitig rivu, a monoka kuvisidomial ka kuvim̄au kouo tibe ka napano kiniou nemilaio ka bogo napano nojo bija kamiú bano-o bokar yuka tolu momou, napano bogo nonovio, ea legiano a ea bogiano, nojorña neberloglog tomu nalo, a neberial Atua kiano iliano memedu banlo, bano-o mia jogumiraku ña jibirbili biorlo.

<sup>32</sup> “Mo vonganei, maka bunu toa jumaku ka mia nevitikar kamiú, mia nomidu kamiú kumitua Atua jumano ga. A nobolkouo ka mia lilianiano Vou na Bo na tiniememiano na kanano, mia naio torña rijai kamiú, rila kamiú kuvitu sikili, a rila ka mia kamiú bunu, kamiú kuvijikia kuvar ilivuiano maraiú nalo napano mia Atua rivar iorou van kiano tomu lu nalo.

<sup>33</sup> “Mo nejidom kamiú monoka tiniemiú rimaio ka bogo napano kiniou nojorña na kitoliko, kiniou nojorña nemim̄au jibe na ga, a kiniou maka neyabar ka kenemiú saba novo nalo na jibe kanio kenemiú puruveru nalo, ñeli na kenemiú kulum̄arauo nalo. <sup>34</sup> Mia maka neverenio ka mia kuvitikar kiniou ka saba nalo na, mia kiniou ga nebitikar kiniou ea iñauano na jumaku be juo nei, mia nebitikar bunu nalo napano ajum̄a amim̄au bija kiniou ea bogo nei. <sup>35</sup> Naruei ea ñarabo na, a ea bajago dolu nalo bunu, kiniou nejiloglog ka kamiú, neber bo ka kito roim̄au kouo ka rajai tomu nalo napano amelukluku a

abijukude, bior kito monoka rosidomial Tubo Yesu kiano iliano tai, napano berinavo 'Verenio jau kovokar kiamo ijaiano tai, mia kojog rivu, mia verenio jau kesian ijaiano tai rivano, mia kojog rivu ve toru lie, ilivuiano naio toaso.'

<sup>36</sup> Mia bogo napano Pol naio ber iliano nei bisi, ana nalo aminie, naruei naio bolokouo nalikolo. <sup>37</sup> Mo nalo ajikar ka ajegi naruei, mia abanjumġalo naliko Pol, ajakia naio amijubaluba naio-o mia, <sup>38</sup> bior nalo ajumġa ajidomial kiano iliano tai ga, napano ber mia aial mirano re bunu bogo tai. Kiano iliano nei naruei mila ana nalo amiel naliko, amiven binimej bereio ea uako napano kumemi numisel eaio.

## 21

*Luka berii ka naio naliko Pol nalo, aba aboru Yerusalemo*

<sup>1</sup> Ana kumemi numituvan nalo ajua vio nei Maelitas, ana nuburu mġaaja, napano memedu ga nuboru ea uleule sება na Kos, ana numon ea vio nene. Viomijeni kavijo, ana kumemi numituvan vio bereio, nubano-o nuboru bereio ea uleule dolu na Rotis, ana numon bereio, viomijeni kavijo, ana nubano bereio, napano nuboru ea bulukomeli na Patara ea tano labo. <sup>2</sup> Ana kenememi uako nei naio ba boru ga ea vio na ga, ana numitabulu nubauro. Ana bogo napano numileal bereio uako dolu tai napano ban yako Vonisia, ana nubavin eaio, ana aburu mġaaja, ana numitua kenememi mġarabo bereio. <sup>3</sup> Kumemi nubano ga jibe na ea burumġara tinia tei na toru, ana nubitikar ga burumġara uleule na Saipras, ana numituvan joa kenememi va maġ ga, ana nubano-o ka mia nuvoru ea tanobuku na Siria napano numisidom ka nuvan eaio. Uako nei naio bar togogo nalo ka riva tuvanlo ea bulukomeli na Taia, ana bogo napano nubano nuboru ea vio nene, ana nubauro eaio. <sup>4</sup> Ana nubano numisirav naiagagoano nalo ea vio nei, ana iorou kanio ana numitu kumemi liko bano-o bokar legiano aluo [7]. Ana ea bogo na, nalo amial napano Niununo Lu jiloglog nalo napano mia tumġabe ka Pol yako Yerusalemo, ana amil banio, tinielo ka averbure naio ka mia naio rivan lie re ka mia naio rivokar vio nei. <sup>5</sup> Mia Pol mijog ea naio, ber pġeli ga, monoka naio rivan ga, ana iorou kanio, kumemi nuban bereio ea kenememi mġarabo. Ana ea bogo na, sumġano nalo a tire nalo naliko kiritete nalo, amiel kumemi liko nuba tavio ea kanalo bulukomeli, ana amiven kumemi nubatove bereio ea kenememi uako. Ana kumemi nubiniu numinie ea

bayono, ana nubolkouo ka kumemi, bisi ana nubanijumememi kalo. <sup>6</sup> Ana nubavin bereio ea kenememi uako, ana nalo aban bereio aba vonuo.

<sup>7</sup> Ana kumemi numituvan vio Taia, ana nuburo nuba ea mġarkomeli na vio Tolimeas, ana ea vio na nuba nubitavo bija kuruado nalo, numitu kumemilikolo ea ga legiano takurano nei. <sup>8</sup> Ana kavijo, naruei numituvan vio nei bereio, ana nubinimej nuboru ea bulukomeli na Sisiria, ana ea vio nei naruei, nubauro nuba numitua toro na Lilianiano Vou na Bo nei, Vilip, kunuano, napano naio naruei naio be nalo aluo nei tai napano abitiri bulaglo beamu ka aija irġauano, nene yako Yerusalemo. <sup>9</sup> Ana Vilip nene, kenerinio vevinio nalo veri aju vonuo, nalo maka asoro vo, ana nalo nei, bogo telabo Atua jomġa jian iliano banlo, ana nalo aberialio ban tomu nalo. <sup>10</sup> Ana kumemi numitua vio nei kumemilikolo ka legiano tealo ruei, ana naverialiano tai juvan vio Yutea binimej rove ea vio nei, toro nene sġano Akapusi. <sup>11</sup> Ana naio binimej ea kumemi, jidom rila tovorovo tai van Pol, ana bar Pol kiano kulumġarauo tai, mġenkar jumġano bija jaano kanio, ana berial, berinavo "Niununo Lu berenio berinavo "Toro napano kiano kulumġarauo nei, mia kulo Ju na vio Yerusalemo, mia aiorikario tavukia ga, naruei iorou kanio, ana ala naio rivan ea nalo napano maka ave kulo Ju nalo jumġalo, napano mia ala searo vanio." <sup>12</sup> Naruei ea bogoti napano kumemi numijog iliano nei, kumemliko nalo napano aju ea bogo na, nubitig Pol, numisikili ka naio nuberbure ka naio ka maka rivu ka rivan bereio mave yako Yerusalemo.

<sup>13</sup> Ana Pol berdoġe ban kumemi, berinavo "Ee, tomu nalo, kamiu kumitumġa kumiteg jibe na, mila nemijog jibe ka mia kiaku iviso rivurkokorovio ga. Mia vite nonovio naio bo ga, verenio nalo na vio Yerusalemo adu kiniou notoa yimo na nalakoiano rivior Tubo Yesu sġano, nina naio bo ga na, ana verenio sikili ga tibe na rivano-o mia namġaro, nina kiniou najaoro ka ga."

<sup>14</sup> Ana kumemi numilavon ka nuverbure naio tibe na-o mia nuberbure deio ga, ana nuberenio ga, nuberinavo "Bo ga, mia monoka tibe ka ga na Tubo naio jidomio."

<sup>15</sup> Ana kumemi numitu legiano tealo bunu ea vio na Sisiria, naruei iorou kanio, ana numila battigio kenememi basaro nalo bereio, numituvan vio nei, ana numiel nubavin yako Yerusalemo. <sup>16</sup> Ana na naiagagoano nalo tealo na vio Sisiria ajakisor kumemi bunu ga, ana bogo napano

nubinimeí nuboru Yerusalemo, ana aburu kumemi nuban ea toro na vio Saipras tai kunuano, ka napano mia nuvitu kumemliki. Toro nene, naio bunu be naiagagoano tai napano be moti, napano nalo amonea Yesu garuei jukamu, a naio siano, Nasono.

*Ea vio Yerusalemo, Pol ba mial Yemesi*

<sup>17</sup> Ana bogoti napano kuruado nalo amial kumemi nubinimeí nuboru bereio ea vio Yerusalemo ruei, mia ajaaro toru laka. <sup>18</sup> Naruei numon, viomijeni kavijo ana kumemliki Pol, nubano numaluvo ka Yemesi, ana navurim̄araboiano dolu nalo na nalotvano na vio Yerusalemo bunu nalo aju ea bogo nei. <sup>19</sup> Ana nubanjumememi kalo, naruei Pol mil banlo, naio berial vite nonovio beve terakurano napano Atua milaio ruei, miyotuba ea iñauano na kanano, nina ea nalo napano maka ave kulo Ju, napano naio joñã ba jeliviv ea kanalo vio nalo.

<sup>20</sup> Ana bogo napano nalo amijog veriiano na Pol nei kanano, ana mila nalo amijog bo laka, ana amiaia Atua biorio. Mia ka bogo nei, be iliano nalo telabo bunu yako Yerusalemo, napano kar Pol, ana nalo amijikia vite nei, naruei aberii ka Pol, aberinavo "Tavaliki Pol, jau komijikia ruei ka ea vio nei nalo menu tealo napano amonea vonga, nalo abe kulo Ju ga nalo, a jibe kanio napano jau komijikia, tomu nalo na jibe na amijikia atumolu atu sikili laka ea kiado tuboiano moruo nalo. <sup>21</sup> Mia nalo amijogio ruei, ka napano tomu nalo ajurñã aberveriiso kirivova, aberenio jau kojorñã koberloglog kiado torogio nalo kirivova napano ajua buruvunu dolu laka yako. Aber jau kojo koberloglog searialo, kober bo ka atuvan tuboiano na Mosis kiano vija kiado bajago moruo nalo, a bo laka ka ala re bunu pakuveu ea kenerilo nalo.

<sup>22</sup> ? Ana mia kito rala vaio naruei, bior iliano nalo nei amila nalo tiniel jerso ñele ruei? Ana vonganei, mia vesiou re, ana mia monoka ajog bunu ka jau kobinimeí koja vio nei ruei. <sup>23</sup> Mia bo ga, jau kala ga tibe ka napano kumemi nuverenio ka jau, bior numileal ñarabo tai ruei napano mia jau komijikia kala ka mia koue bulag kialo tiniemimiano nei. Mia monoka kala tibe na: ea vio nei, be kenememi tomu nalo ver napano beamu, nalo amila verikariano na jikili tai ban Atua, aberenio mia aveli ka vite tealo nalo rivano-o rivokar bogo na jibe nei. <sup>24</sup> Ana beni, naio be kanalo bogo ka monoka avan ea Atua Kunuano Lu, ka ala vite nalo ea tivelinio na kanalo verikariano nei, jibe ka volkouano nalo, bija ijaiano na meravio, a vite nalo na jibe nei ka rila ana amijikia

avuronbijilo bereio. Ana numial nuber bo ka verenio jau bunu kavan rivijalo, jau kava koto vijalo ea bogo napano ala vite nalo nei, ana vite reraio ga nalo napano monoka avulu ea bogo nei, bo bunu ka verenio jau ga kovitiilo. Ana verenio kala tibe na, ana mia tomu nalo aial ka jau kobe toro tai napano kojo kajaaro ga ea tuboiano na Mosis kiano bija bajago nene nalo kia ga, ana mia ajikia iliano napano amijogio, napano beriiso, naio maka rive riano ga. <sup>25</sup> Ana ea tivelinio na nalo napano maka ave kulo Ju, napano nalo amonea ruei, kito roberii vite nei nua ruei, ana kiado iliano napano roberenio nanua ruei, ana kumemi nubivitaia ea mosi tai ba banilo rui. Kumemi nuberial banlo, nuber monoka nalo aveli ka sunbue nalo napano kulo dolu nalo amila sida kanio ban kanalo tavoru nalo ruei, a monoka asen re burukija, a asen re sunbue na temeul nalo napano sano ja maka riou kon vo, a mia monoka ala re bajago nalo napano bova, jibe kanio siakiano, ñeli na siakaiano."

<sup>26</sup> Naruei Pol ba mila jibe ka napano nalo aberenio, napano ea legiano dolu, ana naio buru nalo veri neibano, ba mila ijaiano na meravio nalikolo, a ba joomo ea Atua Kunuano Lu bunu bijalo, ka rijogio verenio kanalo verikariano naio riva rivokar legiano ve vio, ana monoka asian kanalo ijaiano nalo beve terakurano ka verikariano nei ea legiano vaio. Ana aberenio legiano ve aluo [7] rivar laka, ana mia atikar ka ala vite nalo nene.

*Abokar Pol jo joomo ea Atua kiano Yimo Lu*

<sup>27</sup> Ana ea bogo nei, kulo Ju tealo aju joomo ea Atua Kunuano Lu napano ajumolu ea tanobuku na vio Esia, ana abinimeí, ninei ea vio nalo napano Pol jeliviv ea beamu ruei. Ana bogo napano bogoti aluo [7] na verikariano na Pol nalo kialo vaataro ga ka riviniu, ana kulo Ju nalo neibano amial napano ka Pol jo joomo ea Atua Kunuano Lu. Ana nalo amila burumñara ñaduano, aba abokar Pol, ana ajukunu niegeniege naio ban tomu nalo, <sup>28</sup> amiaga ealo, aberinavo "¡Ai, kamiu kulo Israel nalo, kuvijai kumemi ka toro nei! Toro nei naruei naio ban ea vio nonovio, ana joñã berii niegeniege kito kulo Ju nalo, napano robe Atua kiano kulo lu nalo, a naio joñã berloglog niegeniege tomu nalo ber kiado tuboiano bija kiado Yimo Lu nei, maka ave titenia. A kumemi numijikia bunu ka naio buru bena tomu nalo tealo napano maka ave kulo Ju nalo, abinimeí jouro ea tanobuku lu na Yimo

Lu nei. !Naio binimeí mila lelan tolu na Yimo Lu nei, bo ka kito rala titai ka naio!”<sup>29</sup> Nalo aber jibe nei, aberinavo Pol buru toro tai napano maka rive toro Ju binimeí jouro ea tanobuku lu, bior napano amial Pol tavio ea ñarabo ka napano naio miel naljuo Trovimas nei na vio Eveso, napano naio maka rive toro Ju, ana nalo aberiaña Pol buru naio ba joomo.

<sup>30</sup> Ana nalo ajumña amila jibe na joomo ea Yimo Lu, ana ñaduano nene naio ban ea vio nonovio nalo nei ea bulukomeli bunu, ana milaio ana tomu dolo nalo ajikiti abinimeí. Abinimeí naruei abokakar niegeniege ga Pol, ana aburu naio ba tavio ea Yimo Lu nei, ana bogo napano aba tavio kario, ana kulo lu nalo ajetavoko vatitig ñaratavo na tortoru nene nalo.<sup>31</sup> Naruei bogo napano burumñara mira judolu ga mijian yako. <sup>32</sup> Ana toro na toru nene jumolu vaarakurano, bio kiano tomu nalo, naliko kanalo tomu na mira nalo, ana nalo ajikiti abatove ea vio napano ajumña amila burumñara ñaduano nei eaio. Ana bogo napano tomu nalo amial toro na toru na mira nei binimeí bokar vio nei, ana ajuvan Pol, maka bunu atukuio. <sup>33</sup> Ana toro na toru nene binimeí, mil ban kiano tomu nalo, berinavo ava avokar Pol, ana avivikar jumño nivelinio rivan ea nalo tai a nivelinio ea dolo tai ka marimieni. Naruei naio bika denlo, berinavo “?Ana toro nei naio be kei? ?A naio mila venia ka kami?”

<sup>34</sup> Ana tomu nalo telabo ajumña amiaga kokovio toru laka, tealó aber jibe nei, tealó aber jibe na, banbano-o mia toro na toru nei naio maka bunu rijikia rijoglubar iliano tai leleio ea nivelinio na vaio napano ajumña amilaio, naruei naio miila kiano tomu nalo berinavo avuru Pol rivan bereio ea kanalo burusio.

<sup>35</sup> Ana bogo napano ajumña aban ea ñarabo sesa tai, ana ñarabo nene naio bujo ga ka tomu nalo napano ajumña tinielo ka ajidom atuku Pol kia ga vo. Naruei tomu na mira nalo aburu ga Pol bano,<sup>36</sup> ana taara na tomu naloaju iorou kanio abinimeí, ajumña abiovio kanio aberinavo “!Kuvuebin toro kirivova na a! !Kuvuebin ga naio rimñaro!”

<sup>37</sup> Ana nalo ajumña abano, mia vaatara ga ka amei avokar ñaratavo na ka mia ava jouro ea burusio na tomu na mira nalo nei, ana Pol bika den kanalo toro na toru,

berinavo “Novika denso, kajamo ka kiniou nevika titai denso vo.”

Ana toro na toru nei naio miilo ka Pol mil jel Krik banio, naio berinavo “!A, jau komijikia ga komil jelea Krik! <sup>38</sup> ?Jibe na, kiniou nejidom neverii jau kobe toro Ijivi nanua maka vesiou ga ana milavon ka rila baravo, ana naio buru bulag tomu nalo menu veri [4,000] aban ea kanano taara na ñña amuemue tomu nalo, mia nalo aburo abano ajulukú ea vio yauo? ?Jau naruei jau kobe toro nene, a?”

<sup>39</sup> Naruei Pol berdoþeio, berinavo “Ee, makanio, kiniou nebe toro Ju ga tai memedu nei, mia kiniou nemijikia nemil jel ea Krik, bior nebe toro na burumñara bulukomeli na vio Tarsis, ea tanobuku na vio Silisia. Tenene na kiniou nejidom nevika denso ka jau kajamo ka kiniou ka neil kija rivan tiniobi nalo na beamu vo.”<sup>40</sup> Naruei toro na toru nei naio mijamo, ana Pol jumolu ju mave, ana buk jumño beramelumu, ana abinimeí amelumu batitig bo. Ana naio mil banlo, mil jel ea kulo Ju nalo kialo iliano ga memedu.

## 22

*Pol mil ban nalo napano ajidom auebin naio rimñaro*

<sup>1</sup> Naruei Pol naio mil banlo berinavo “Banalo, kamliko teta nalo, kiniou nejidom ka kamiú kuvijamo ka kiniou never bisivisii vatitig vite nonovio van kamiú. Kamiú kuvia gago vatitig rivu ka kiniou beamu vo.”<sup>2</sup> Mia bogo napano amijog ka Pol naio jomña mil banlo ea kialo iliano, napano mil jel Ipru, naruei nalo amelumu bo, ana ajidom ajog kanano iliano.

Ana naio berenio, ber<sup>3</sup> “Kiniou nebe toro Ju ga tai, jibe ka kamiú, a kiniou nemiyotuba ea komeli na vio Tarsis, ea tanobuku na vio Silisia. Mia bogo napano kiniou telisu kia ga vo, nebinimeí ea vio nei, ea vio Yerusalemo, a nomila kakario ea naverloglogiano na Kamiliel, napano kamiú kumijikia batitigio naio ruei. Kiniou nojoa jaano, naio berloglog batitig kiniou ka tuboiano na kiado tormoruo nalo kanalo, bano mia kiniou bunu nomue jaano, nebinimeí nebe naverloglogiano na tuboiano nene. A jibe ka napano kamiú banei, kamiú kumisidomii toru ka kuvila Atua siano rimeí ve toru, kiniou bunu, ea bogo nanua, kiniou nemila Atua kiano iñauano bija kiaku meuliano momou.<sup>4</sup> Ea bogo na, kiniou bunu nebe toro tai napano ñña tinioku jerlo laka napano ajumña ajakii Marabo Vou nei, napano kiniou nojomña nejeliviv ka nesiravo nalo

na mña aju ajakiio, ana kiniou nojořña nobokakarło, a nojořña nobukulo aban ea yimo na tetavokoiano, suřño nalo a tire nalo. Ka bogo na, kiniou nejidom ka nalo monoka ařmãrãro ga, a nejidom ka kialo mñarabo nei naio ribisi sořeli ga.<sup>5</sup> Mia vite nei, kamiu kumijikia kuvika den parinio toro lu vija navuriřaraboiano na kanano komeli, bior ka napano nalo amijikia batitig bo ka kiniou napano nemila jibe na. Ana ka bogo na, abivivitauia mřesi tealo ka rila ka mia nemijikia nava nejili tomu nalo kario Marabo Vou nei ea kanalo viu nalo.

“Ana ka bogo tai, kiniou nomidu mřesi tai jibe na, mia nejidom ka navatove yako Tamaskas ka novokakarło ea vio na, ka noiorkakarło ka marimieni a ka novurulo amei bereio ea vio nei ka mia kanado tomu na tortoru nalo aje vironiano vanlo.

<sup>6</sup> “Ana ka bogo na, nojo nemiel nabano, mia legiano viovare, vaataro ka ga novoru Tamaskas, mia nemillo ka napano kolvare ga burumãra miamoiano tai na vio mave mereralii vio napano nojořña nemiel eaio.<sup>7</sup> Naruei vite nei mila ana nomijoru nabatove ea borotano, ana nemijog iliano tai berinavo ‘!Sol, o, Sol, o! ?Bior venia ana jau koje komila lelan kiniou jibe na ka napano jau komila na?’

<sup>8</sup> “Ana na nebika denio neberinavo ? Ana Tubo, jau kobe keinia?”

“Ana kiniou nemijog mil ban kiniou bereio, berinavo ‘Yesu re Nasarete nene nei, napano jau komila bova banio, ninei be kiniou nene nei.’<sup>9</sup> Naruei nalo napano aju iorou ka kiniou ka bogo na, nalo abitikar burumãra miamoiano nene, mia nalo maka ajog jooono nei napano jorña mil ban kiniou.

<sup>10</sup> “Avona bisi ana nebika bereio, neberinavo ? Ana Tubo, mia kiniou nala tuřabe naruei?”

“Ana Tubo mil ban kiniou, berinavo ‘Jau kotumolu, keiel kava jouro ea vio Tamaskas ga, ana mia toro tai rimeii riverial vanso iřauano nalo napano kiniou nemije vatitigio ju rueli ka mia jau koiřaukanio.’<sup>11</sup> Ana nemijog iliano nei, mia maka bunu nejikia neial vite, bior burumãra miamoiano neibano naio mila miraku miununu garuei, naruei nalo abokar jumãaku ga, aburu mñarabo ka kiniou jibe na, nubano-o nuboru Tamaskas.

<sup>12</sup> “Ana na maka vesiou ga, toro tai na vio na naio binimeii mial kiniou. Naio be toro tai napano be Atua kiano riano, a naio monmonea kanado tuboiano, a kanado Ju nalo na vio nei nalo amial naio jibe ka toro novo tai laka, mia siano be Ananaias.

<sup>13</sup> Naruei naio binimeii jikili ju vaataro ka kiniou, ana mil ban kiniou, berinavo ‘Kuruaku Sol, vonganei, neber ka jau miramo avu bereio.’ Ana ea aura nene ga jibe na naruei, ana nemijikia nemial Ananaias nene mirano.<sup>14</sup> Mia naio mil ban kiniou bereio, berinavo ‘Atua Tomoru na korobido nalo kanalo, naio berkarso nua rueli, ka mia jau naruei komijikia kejikia kanano sidomivaniano na toru tai, a ka mia jau naruei keial kiano Toro Memedu, a kojog kanano iliano.<sup>15</sup> Atua naio berkarso rueli, ka mia jau kava koverial ka tomu nalo ea vio nonovio, ka vite nalo na jau komialio a napano jau komijogio.<sup>16</sup> Mia vonganei ga, kito monoka rala vite tai beamu vo. Jau monoka kotumolu, kavaruie ea Yesu siano, naruei sio nei ga naio mia sekon bulag nono kiamo kariano nalo, ana mia jau komei komeravo ea Atua mirano.’

<sup>17</sup> “Avona kario, ana kiniou nebinimeii ea vio nei Yerusalemo bereio, ana naban ea Atua Kunuano Lu, ka nejidom nobolkouo. Ana bogo napano nojořña nobolkouo, nemijogio jibe ka kiaku jidomiano ba kovio,<sup>18</sup> ana nemial Tubo mil ban kiniou, berinavo ‘Jau kala sořeli, kataluvo den vio Yerusalemo vonganei, bior ver nalo na vio nei, ver kotukunu vanlo ka venia napano nemila banso, mia nalo maka ajikia amonmoneaso leleio.’

<sup>19</sup> “Mia kiniou neberii ka naio, neberinavo ‘Ana Tubo, nalo amijikia batitigio kiniou rueli, bija venia napano mña nojořña nemilaio beamu. Nalo amijikia ga ka kiniou naruei nojo nejeliviv ea yimo na volkouano na kumemi kulo Ju nalo kenememi, a nojořña nobokar nalo napano amoneaso. A amial rueli napano nojořña nebitilo, a nojořña nobukulo aban ea nalakoiano, naruei nejidom neber monoka amonea kiniou ga ka nebe riano ga.<sup>20</sup> Mia nanua, bogo napano kanamo toro na Stevin, kiano burukija miou, nalo amijikia batitig ka kiniou naruei nojo bijalo ka bogo na. Bogo napano nalo ajubabinio mñar, kiniou nemijjalo, a kiniou nebitikar batitig mlaio kulukoti nalo. !Monoka nalo aiagago ka kiniou ga na!’

<sup>21</sup> “Mia Tubo naio ber ka kiniou ga, berinavo ‘Jau kataluvo den vio na ga, kiniou nejidom neilas kavan ea vio nalo na koalabo laka, jau kavan ka nalo napano maka ave kulo Ju nalo.’”

<sup>22</sup> Ana binimeii bokar aura nei, ana nalo nene napano ajurña amiagago ka Pol aju amije tilinielo batitigio ga kanio, mia vonganei, kanalo siniabu ka naio binimeii bereio, naruei nalo aju amiagiaga ga bereio, aberenio “!Ei, bo ka auebin ga

toro kiri bova na riřaro! !Kito maka rosidom toro na jibe na naio rimeul toa vio yetemeriba nei!" <sup>23</sup> Naruei nalo ajuřia amiagiaga ga jibe na, a ajuřia ařilig řialo kulukoti nalo ea Pol, a aju ajuvu bulukievi na řarabo janea vio. <sup>24</sup> Ana toro na toru na mira naio ber ka avuru Pol taluvo den tiniobi nalo na, riva jouro ea kanalo burusio ga, a naio berenio nalo avitivio kija, ařikili kanio ka aleal vite venia naruei naio řila ana na tiniel jer řilea naio toru jibe na.

<sup>25</sup> Mia bogo napano amiorkar naio bisi, ana ařidom avitiv naio naruei, mia Pol ber ka kanalo navuriřaraboiano nei tai, berinavo "?Juřiabe, memedu ka kamiu kuvitiv tavukia toro tai napano naio jotano ka navitikariano na vio Romo, a napano naio maka rivan ea komeli vo ka atibure vatitig naio, řeli na kamiu kumijikia kuvitivio ga tibe na a?"

<sup>26</sup> Mia bogo napano navuriřara-boiano nei naio mijog Pol kanano vikadeniano nei, naio berenio mia avitiv re naio tukamu vo, ana sořeli ga naio ba mial kanalo toro na toru, berinavo "?Ei, mia jau kala tuřabe ka toro nei naruei? Naio berialio ber naio jotano ka vitikariano na vio Romo."

<sup>27</sup> Naruei toro na toru nei binimej ka rial Pol bereio, naruei bika denio, berinavo "!Ei, jau kover vatitig rivu! ?Jau kojotano ka vitikariano na vio Romo, řeli na makanio?"

Ana Pol berdořeio, berinavo "Ee, kiniou nejibe na naruei."

<sup>28</sup> Naruei toro na toru nei ber ka Pol berinavo "?Ana jau kojuřabe na jibe na? Ka kiniou jibe na, kiniou nobulu buruřara puruveru nei."

Ana Pol berenio jibe nei, berinavo "Ii, mia kiniou, karamřaku jibe na mugaruei, ana kiniou nemiyotuba, nejibe kanio bunu." <sup>29</sup> Mia bogo napano nalo napano ka avitiv naio amijog iliano nei, amijikia naruei ka Pol naio be toro na toru tai jibe na. Ana ajaraluvo den naio vaarakurano, amijikia ka mia avitiv re naio naruei, a toro na toru nei bunu, vonganei naio bunu merou kija, bior ka napano naio be toro na mira na vio Romo tai, mia naio řila bova ruei ka Pol napano naio bunu jotano ka navitikariano na vio Romo.

*Aburu Pol ea kulo Ju nalo kanalo buruřara komeli*

<sup>30</sup> Mia kavijo nene, ana toro na toru na mira nei naio jo řidomio ka rijikia kia na vo venia naruei be burupati na siniabu

nei, ana naio bio tomu nalo na tortoru na kulo lu nalo bija navuriřaraboiano na kulo Ju nalo kialo, ber monoka atu rorea naio ea buruřara kanalo komeli. Naruei naio berenio ajubarbulag řarimieni den Pol, ana naio buru batove ea buruřara komeli neibano, naio bitirikar Pol ju iviso ka nalo.

## 23

<sup>1</sup> Naruei Pol naio buku mirano memedu ea tomu na tortoru nei, ber kalo, berinavo "Kuruaku nalo, ea nono kiaku meuliano binimej bokar banei, ea iřauano nonovio na Atua kiano napano nemilaio, maka nojog titai tuluborua kiaku iviso, ka river kiniou namila maka rimemedu. !Maka leleio ga ruei!"

<sup>2</sup> Mia bogo napano parinio toro lu nei Ananias mijog iliano nei, naio tinien mimi toru laka ban Pol, a ber ka nalo napano aju vaataro ka Pol ber nalo ajuba niono. <sup>3</sup> Naruei Pol mil kija ban naio naruei, berinavo "!Ei, jau kovitikarso, mia Atua ruebinso navo! Jau kojo tano ea vio na kiado natuboiano, ea vio na natibureano na toro, mia karina jau na naruei komila korov tuboiano nene bereio, napano koberenio ajuba kiniou tibe na. Jau kobe kulmedede ga tai na kojo na."

<sup>4</sup> Mia nalo napano aju vaataro aberinavo "?Ei, jau koberiařa bo ka keil rivova tibe na van Parinio Toro Lu na Atua kanano tibe na, řeli na tuřabe?"

<sup>5</sup> Naruei Pol naio berinavo "!Aa, riano-o! Kuruaku nalo, kiniou namijog kiano iliano mia maka nejikiaio, maka bunu nesidomiiio never naio be Parinio Toro Lu na. Mia jibe ka napano kamiu kuberial batitigio ban kiniou ruei, naruei nemijikia ka nemil maka rimemedu ka naio, bior Atua kanano Iliano Lu berial batitigio ruei, ber maka rivu ka kito reil rivova van toro na toru na tomu nalo na kiado."

<sup>6-8</sup> Naruei Pol maka bunu rijikia venia mia naio riverenio naruei, ana mial ka nalo napano aju joomo ea vioriano ka bogo na, togio abe Varisis, a togio abe Satusis. Taara juo nei ajuřia amila baravo toru, bior Satusis nalo aberenio mia tomu nalo maka ařikia ameul ea nařariano, mia aberenio vite nalo na jibe kanio nailiano nalo, řeli na niununo nalo, aberenio vite nalo nei maka titai tibe na, mia Varisis nalo amonea vite nalo nei. Ana Pol mijikia naruei ka mia river tuřabe, naruei naio bio ban tomu nalo na tortoru nei, berinavo "Kuruaku nalo, kiniou namaluvo ea yati na Varisis memedu. Karamřaku nalo abe Varisis, a kiniou bunu nebe Varisis. Naruei

bija Varisis nalo, kiniou nomonea ka bogo napano toro m̄arabo, karina, mia naio mijikia rimeul bereio. Naruei nejidom jibe ka kiniou nojumolu nojukamu ea miremiu bior tomu tai ajidom ail van kiniou rivior kiaku moneano nei.”

Naruei Pol kiano iliano nei mila ana Varisis nalo napano aju ana ajikar ka amila baravo bereio naliko Satusis nalo napano aju nei, mila ana nalo nonovio na ea vioriano nei aburuburelo bereio. <sup>9</sup> Amila jibe na bano-o, binimeĩ toru laka, a karina, nalo naverloglogiano tealo ka tivelinio na Varisis nalo ajumolu, amil kirisikili laka, aberinavo “Kumemi numial ka toro na naio bo ga, maka vite tai ka napano mia kito romijikia reil vanio riviorio. ?A kei mijikia, p̄eli be riano ga ka niununo tai bo p̄eli na nailiano tai mil ban naio kovioobo?”

<sup>10</sup> M̄ia siniabu nei ba toru laka naruei, nalo ajum̄a ajidom ka atukulo riviorio, ana toro na toru na kulo na mira kialo mialio ka bova, naio merou ka tibe m̄a na mia nalo aser niegeniege laka ka Pol, naruei naio m̄ila kiano tomu nalo abatove, aburular Pol denlo, ana aburio ban bereio ea kialo burusio.

<sup>11</sup> Ana ka bogiano, Pol mial ka napano Tubo ju jumolu ju vaataro keanio, napano jom̄a mil banio, berinavo “Pol, mia komerou re. Jau koberial batitig kiniou ban tomu na abe p̄irilo ea vio nei ruei, ana kiniou nejidom ka mia jau monoka kala tibe na ga, ve vaarakurano bereio, nina ea vio Romo.”

#### *Kulo Ju tealo abarvio ka auebin Pol*

<sup>12</sup> Ana ea kavijo, kulo Ju nalo tealo abinimeĩ vio takurano ka atuluku ga, ka averii ka mia tum̄abe ana mia amijikia auebin Pol. M̄ia bogo napano amileal m̄arabo tai bisi ana aberkar ea Atua siano ka mia atuvan sinaniano vija munuiano nalo, rivano-o mia auebin Pol tukamu vo. <sup>13</sup> Naruei nalo napano abijurkar iliano nei a napano amilakakar verikarano jibe na, nalo ajodovulu tomu nalo duelimo va veri [40].

<sup>14</sup> Ana iorou kanio ana aba amial tomu na tortoru na kulo lu nalo, naliko navurin̄araboiano nalo, ana aberial vite nei banlo. Aberinavo “Kumemi nuberkar jikili ea Atua ruei, ka mia kumemi nuvel ka sinaniano nonovio rivano-o mia rivokar bogo napano mia numijikia nuvue bin toro na. <sup>15</sup> M̄ia kumemi numisidom ka kuvijai kumemi, napano kamiu kamliko nalo na ea kiado komeli, kamiu kuviila toru rivon ea toro na toru na tomu nalo na mira na, ka naio rivuru toro nene rivatove ea komeli bereio, kamiu kuvila sibilili naio ga kuver kumisidom kuvitii bereio iliano

nalo na. Naruei mia kumemi nuvitu rorea ea m̄arabo ga, a bogo napano amei, mia nuvuebinio, napano naio jo koalabo ka komeli kia ga vo.”

<sup>16</sup> M̄ia iorou kanio, ana na Pol, kuviviniene kenerinio tai naio mijogial ka napano ajum̄a aberii ka mia ala tibe na, naruei kiritete nei naio ba memedu ea burusio na tomu na mira nalo kialo, ana ba berial vite nei ban Pol. <sup>17</sup> Ana Pol bio tomu na mira nei tai kalo, berinavo “Ai, koig kobijuku bo, jau kovuru m̄eaku nei riva rial kenemiu toro na toru, naio mijikia titai napano bo ka mia toro na toru na naio monoka rijogio.”

<sup>18</sup> Naruei naio buru Pol kumerano nei ba ban kialo toro na toru, a berkanio berinavo “Pol napano jo rove yako ea nalakoiano, naio berenio novuru kumerano nei rimeĩ river titai vanso.”

<sup>19</sup> Naruei toro na toru nei naio bokar m̄eaku nei jum̄ano, ana burio ba jibe ka naljuo ga, naruei bika denio, berinavo “? M̄ia jau kojidom kover venia van kiniou?”

<sup>20</sup> Ana na Pol kumerano nei ber bulavulagio banio, ber “Jau keialio, tomu na tortoru nalo na kulo Ju abitirilar kanalo tiiano tai ruei, ka mia auebin kumeruaku nei, Pol. Nalo aberenio ruei ka mia aiila toru rimeĩ vanso, ka nalo ajidom avitii vatitig bere vo ea tivelinio na iliano nalo nei, ka mia nalo avikaso ka beni, mia jau kovuru Pol rivatove bereio ea kialo komeli. <sup>21</sup> M̄ia maka rivu ka jau kala tibe na, bior nalo ajum̄a amila sibi ga na. Aberenio ruei ka bogo napano verenio kamiu kuvitua m̄arabo, kuvitum̄a kuvatove, mia nalo tovulu duelimo va veri [40] nei aviako ea kamiu, nalo auebin kumeruaku na. Nalo na aberkario ruei ea Atua ka mia atuvan sinaniano vija munuiano rivano-o mia verenio aial ka auebinio bisi, ana nalo nei naruei ajum̄a aju rorea kamiu ruei, ka verenio jau kajamo ka mia kuva tove bereio.”

<sup>22</sup> Ana toro na toru nei naio ber ka Pol kumerano nene, berinavo “Bo ga, mia kiniou never kaso memedu, mia jau koverial re van toro tai bereio ka kobinimeĩ koberial vite nei ban kiniou ruei. Mo siva toru, jau komijikia kava vonuo bereio naruei.”

#### *Amila Pol ban ea parinio tubo tai na Romo ea vio Sisiria*

<sup>23-24</sup> Mo toro na toru na kulo na mira kialo nei naio bio kiano tomu juo, naio ber jibe nei, berinavo “Vite nalo na tivelinio ka toro nei Pol, abinimeĩ jikili laka. Vonganei, mia kiniou neila naio riva toa kiado parinio tubo Veliks jum̄ano, napano naio jo rove yako Sisiria. Kamjuo, kuvila batitig



taara tai na tomu na mira na kiado, ka kuvisirag kuku vatitig rivu ka Pol, kuvuru naio rivatove. Kamiu kumijikia kuvuru tomu na mira toromomou ve juo [200], vija duelimo va aluo [70] napano avar parinio bue kulorinio, vija toromomou ve juo [200] bereio napano abar mira nalo na uteute. Kuvidu Pol kanano parinio bue kulorinio tai bunu ka naio mijikia totano eaio. Kiniou nejidom ka kamiu kuvituvan banei bogiano, ka mñerenio koveri [9] bogo napano vio melijo rui.”

<sup>25</sup> Naruei toro na toru nei naio jiri mñesi tai ka adukario rivan vijalo, naio jirio jibe nei, berenio:

<sup>26</sup> “Mesi nei, kiniou Klotias Lisias, napano nebitaia biedu banso, Parinio Tubo Veliks, napano jau kobe toro na toru na vio Romo napano jau kobitkar kiado buruñara tanobuku nei.

<sup>27</sup> Kiniou najaaro toru ka nevitavo vijaso bereio ea mñesi nei.

Toro napano aburio biedu banso na, kiano tukunu nene jibe nei: beamu, kulo Ju nalo na vio nei abokar naio, vaataro ka auebinio. Avona karina, nemijogial ka napano naio jo yetano ka kiado vitikariano na Romo, naruei kumemi nubatove, ana nuburular naio den kulo Ju nalo nei jumalo.

<sup>28</sup> Naruei kiniou nejidom nejikia ka venia naruei naio be burupati na vite nei, naruei noburu naio batove ea kialo komeli na toru.

<sup>29</sup> Ea bogo na, kiniou nemial ka napano naio maka rila titai napano rimemedu ka mia auebinio ðeli na adu vironiano rivanio, mia nemial jibe kanio nalo ajunña amila baravo naliko ka tivelinio na tuboiano na nalotuano na kanalo ga.

<sup>30</sup> Avona karina, iliano tai binimej bokar kiniou, ber aberio rui, amileal mñarabo rui ka ala vonio bereio ka auebin riuñaro. Mia kiniou nemial bo ka neilla naio riviedu soðeli ga, mia neber bunu ka nalo napano tiniel jerio, neber monoka nalo aviedu averial ea miramo vite nalo napano ajidom atibure naio rivorio.”

<sup>31</sup> Naruei tomu na mira nalo amila jibe ka napano kialo toro na toru nei berenio, naruei bogiano ana aburu Pol, mia buruñara taara nei ajuvan vio Yerusalemo, aba abokar vio Antipatris. <sup>32</sup> Naruei kavijo nene, tomu na mira nalo na amiel ka jaalo ga abavin bereio Yerusalemo, mia nalo napano abar parinio bue mñarauo, naliko

kia Pol vo, aban ea kialo mñarabo abano lie abatove Sisiria.

<sup>33</sup> Mia bogo napano abinimej aboru ea vio nene, amidu mñesi nei ban parinio tubo nei naruei, iorou kanio ana aburu Pol ba ajuvan naio joa jumano. <sup>34</sup> Naruei parinio tubo nei naio buluku mñesi nei bisi, ana naio bika den Pol, ber naio be toro na tanobuku na vabe. Ana Pol naio berenio naio be toro na vio yako Silisia ga, <sup>35</sup> ana parinio tubo nei ber bereio, ber “Mo bo ga, kito monoka rotu rorea ga nalo napano mia amei ail vanso, naruei bogo napano ver amei, mia kiniou novurulo ea nailivatitigiano kitoliko.” Mia naio ber ka kiano tomu nalo na mira, ber “Toro nei naio mijikia to vija kito beamu vo ea yimo moruo nei, Parinio tubo Erot kiano, ninei kito rojua vonganei, mia kamiu kuvisir-arago kuku vatitig rivu ka naio ea vio na.”

## 24

*Kulo Ju nalo abinimej ka ail van Pol ea Veliks mirano*

<sup>1</sup> Mo Pol naio jo jibe na-o, bokar bogoti jumo barlaka, ana iorou kanio ana Parinio toro lu na vio Yerusalemo neibano Ananias naio binimej rove nei Sisiria, naio naliko navurimñaraboiano dolu nalo tealu na kulo Ju nalo kialo, bija toro tai na kialo tuboiano, ka mia naio ril kanalo, siano Tetalas. Naruei nalo nei aba amial Parinio Tubo Veliks ka averial vite nalo napano ajidom ka ail rivan Pol rivorio. <sup>2</sup> Mo nalo abio Pol binimej joomo bunu, ana Veliks naio jian bogo ban Tetalas ka mijikia rivetavo ea kanalo iliano.

Mia naio mil ban parinio tubo nei naio berinavo “Parinio Tubo Veliks, kumemi numisaaro toru laka ka nuvitumolu ea miramo banei, bior ka napano numialio ka napano jau kojomña kobitkar kumemi bo laka. Jikario ea bogo napano jau kobokar iñauano nei, binimej bokar vonganei, ki-amo masouano naio mila turñaro novo joa buruvenuto nei, a jau kojomña komila vite vou nalo telabo ka rijai iñauano na vio nei. <sup>3</sup> Tibe na, kumemi nuberenio kenememi buruñara sivaiano banso ka napano damñariga jau kojomña komila batitig kumemi bo laka ea vio nei jibe na. <sup>4</sup> Mia jau, kobe kanamo iñauano telabo, maka rivu ka kumemi nuvala lelasan ka kenememi iliano nalo ve telabo laka, mia kiniou najidom ka novika denso kovijuku rivu ka kumemi, keiagaga ka kenememi iliano telisu tai napano bulati ga.

<sup>5</sup> “Mia ea tivelinio na toro nei, kumemi numialio jibe ka pariparinio kirisikili kija. Naio jomña miel janea kulo Ju nalo ea buruvenuto dolu nalo, a ea vio nonovio

napano naio ban eaio, mia naio mila tomu nalo aburuburevurelo a amila baravo. A naio be navurim̄araboiano tai na taara na tomu nalo neibano, napano aberenio naio miyotuba ea vio Nasarete, napano p̄eli naio be nalotvano dolu tai koviobo, p̄eli na ver makanio, mia nalo ajum̄a amila baravo ga na. <sup>6-7</sup> Ana bogo napano toro nei naio binimei jo Yerusalemo, naio mila kirivova-o mia naio jidom rila bulag tolu na yimo lu na kenememi nei, tenene na kumemi nubano nubokario. <sup>8</sup> Mia ver jau kovika den naio ga, mia komijikia kojog ka vite nalo nan̄a nuberenio nalo abe riano ga.”

<sup>9</sup> Ana bogo napano naio joñ̄a milili jibe na, ana kulo Ju dolu nalo ajum̄a aḗlilivilig pariparilo, aju aberverenio aberinavo “Nina naruei, jibe na naruei, be riano ga na.”

### *Pol berdoḗelo*

<sup>10</sup> Ana iorou kanio, parinio tubo nei naio bitikar Pol ana jian bogo banio ka naio mijikia river kiano verdoḗeiano. Naruei Pol naio berinavo “Parinio Tubo Veliks, jibe ka napano jau kejbure kumemi ea buruvnuo nei ka yuka telabo abarlaka ruei, mia najaaro ga ka notumolu notukamu ea miramo ka nodu kanaku verdoḗeiano. <sup>11</sup> Mia kiniou nejidom never kaso ga, ka nabavin yako Yerusalemo maka vesiou leleio. Ver jau kovika vatitigio ga den tomu nalo, mia jau keleal ka kiniou naban ea vio na ka ga nava novolkouo ea Atua Kunuano Lu, maka rivokar bogoti ve duelimo ba veri [14] vo. <sup>12</sup> Mia bogo napano nojia vio na, mia maka aial ka napano kiniou nemila vite tai. Maka nala siniabu vija toro tai, a maka neilili van tomu tai neverenio nalo amila vite tai. Ea Atua Kunuano Lu, p̄eli na ea yimo nalo na volkouano nalo, p̄eli na ea vio be na ea komeli, mia maka nala titai leleio. <sup>13</sup> Mia vite nalo napano nalo aberii kaso vonganei na, ka kiniou nemila jibe na jibe na, nina be iliano na kanalo taara ga na, mia nalo maka aver vite tai ka rikurukar kialo iliano vanso, ka rila kanalo iliano nei rive riano.

<sup>14</sup> “Mia vite takurano ga kiniou nemijikia najamo kanio, nemijikia never kaso neverenio, nao, kiniou nemila nina. Vite na, napano kiniou nojñ̄a najakii Marabo Vou nei, napano n̄a aberenio nalotvano dolu. Mia maka tibe na, bior ea m̄arabo na, kumemi numitu nubolkouo ka Atua takurano ga, nina Atua na korobimemi tormoruo nalo kanalo, numitu numonea ga vite nalo napano kenememi tuboiano berenio p̄eli napano kenememi naverialiano nalo abivitauiaio. <sup>15</sup> Mia jakii vite

nalo na, mia kiniou nojo ga ban Atua, be verare ga ka napano nalo bunu aju abitikuku kanio, ka mia naio rila tomu nalo nonovio ameul bereio ea nam̄ariano, nina nalo napano amemedu ea mirano, a nalo napano maka amemedu ea mirano. <sup>16</sup> Naruei bior kiniou nemijikia ka mia Atua rila tibe na, mia maka nosidomii ka mia nela re bajago na bova tai leleio. Mia bogo nonovio ga, nemila vonvon toru laka ka mia vite tai ve telisu tul re kiniou bogo tai, river ka nemila bova ea Atua mirano p̄eli na tomu nalo miralo.

<sup>17</sup> “Mia yuka tealo barlaka ruei, mia nojñ̄a naban ea buruvnuo dolu nalo, mia karina, vonganei ga, ana nebinimei bereio ea vio Yerusalemo. Mia tomu nalo na laka yako ajuvanini ijaiano tai ka rijai kenememi tomu nalo na vio Yerusalemo, ana na kiniou nabar ijaiano nei nebinimei, nabar banlo, a nejidom nava nala sida bunu ea Atua Kunuano Lu. <sup>18</sup> Ana bogo na n̄a kiniou nojia Yimo Lu, nemila sida na meravoano bisi, ana na nalo na abinimei amial kiniou. Ka bogo na, maka bunu ve toro dolu tai atu rivija kiniou, mia maka ve iliano p̄eli na utubaiano leleio, mia iorou kanio, ana kulo Ju nalo tealo na vio Esia abinimei, ana nalo naruei ajikar siniabu nei. <sup>19</sup> Mia nalo napano abe burupati na vite nei, ver asidomii ka kiniou namila vite tai bova, mia bo kanio ver nalo bunu atu rivija kito ea vio nei banei ka averialio kaso, mia maka neialo. <sup>20</sup> Ver p̄eli, mia bo ka jau kalavonio ka kovika den nalo dolu napano aju na, ka bogo napano aburu kiniou naba nabavin ea kanalo komeli, mia amileal kiniou nemila venia. ? Kiniou nemila vite venia na maka rimemedu, p̄eli na neber iliano venia na maka rivu? Nejidomii-o, maka lele garuei. <sup>21</sup> Mia iliano takurano ga na kiniou neberenio banlo, neber jibe nei, neberinavo: Kiniou nemial jibe ka kamiu kumisidom kuvil rivan kiniou banei, rivior ga kanaku moneano nei, ka bogo napano toro m̄aro, karina mia naio mijikia rimeul bereio. Naruei kiniou neber iliano na, karina mila ana nalo ga ajum̄a amila siniabu kalo toru bereio.”

<sup>22</sup> Ana Parinio Tubo Veliks nei, naio mijikia kija ruei vite telabo ea tivelinio na Marabo Vou nei, mia bogo napano naio mial ka siniabu neibano, kulo Ju naliko Pol amila bior vite nei, naruei naio jetavoko iliano ga, berinavo “Bo, mia kito rotava vio nei beamu vo. Mia kiniou notororea ga toro na toru na kulo na mira nalo kanalo Lisias tu mave Yerusalemo rimeii, ana mia nemijikia nojog vatitig kiano veriiano

tukamu vo, avona bisi, ana nejev kanaku natibureano van kamiu.”<sup>23</sup> Mo naio ber ka kiano tomu na mira nalo ka avokar Pol vo, nalo atukuku kanio, mia naio berenio nalo ala sikili laka re rivanio, monoka ajamo ka naio rieliel kija ga, a averbure re kiano bilbilu nalo ka amei aiadu kanio avitikario.

*Pol berii Yesu ban Veliks naljuo kouano*

<sup>24</sup> Mia Parinio Tubo Veliks nei, kouano be tira re Ju tai, siano Trusila, mia naljuo nei ajidom atukunu kija naliko Pol vo. Mia legiano tealo barlaka ruei, bisi na abe juo abinimei ea vio na Pol joaio, ana aburu Pol binimei, naruei Pol mil bijalo, naio berii kiano moneano na ea Kristo Yesu.<sup>25</sup> Mia Pol juvan iliano telabo lie vo ban naljuo, naio maka rialerinio ealo leleio, mia berii jumabe ka napano toro monoka rila bajago na memedu, a ka napano toro monoka telan vuu vatitig ka kiano meuliano, mia berii bunu tibureano napano Atua kanano ka mia rimei ea legiano na maaro. Naruei bogo napano Veliks mijog iliano nalo nei, naio mijog jibe ka julu m̄lelea kiano jidomiano, mila naio merou kija, mo naio ber ka Pol, berinavo “Mo bo, bare ga vo. Jau kava joomo nei bereio vo, mia ver kiniu neleal kanaku bogo tai, mia neiila toru riviedu kaso bereio.”<sup>26</sup> Mia bogo napano Veliks naio mijog iliano nalo nei, mia naio be kiano jidomiano va tai bunu, napano naio jidomii berinavo mia Pol sian puruveru na toru tai rivan naina, ka rila ka naio river Pol naio mijikia taluvo bereio. Naruei kiano jidomiano nei mila naio jom̄ia miila toru ka Pol julaka ga, a naio jo jukunu va telabo bijaio.<sup>27</sup> Mia naio jom̄ia milala jibe na banbano-o bokar yuka juo, ana na naio bisi ea kanano iñauano nei. Mia naio maka rijamo ka Pol ka taluvo bereio ea vio napano naio joaio, bior naio jom̄ia jidomii ka rila kulo Ju nalo asaara ka naio.

Mo iorou kanio, ana na toro dolo tai binimei midu Veliks nene jeleigio, napano siano Posias Vestas.

## 25

*Pol berenio Sisa ga monoka tibure naio*

<sup>1</sup> Ana parinio tubo vou nei Vestas, naio binimei yako Sisiria, binimei ka rivitkar kanano tanobuku nei, mia iorou ka napano bogoti tolu ga barlaka, ana naio mial ka monoka riva rivitii vio mave yako Yerusalemo.<sup>2</sup> Ana bogo napano naio bokar vio nei, ana bior naliko tomu na tortoru nalo na kulo lu nalo, bija tomu dolo na tortoru na kulo Ju nalo, ana aberii niegeniege Pol banio. A nalo ajututua ka naio,<sup>3</sup> aberenio ver naio jidom rila tena novo tai vanlo, nalo ajidom naio riila Pol

rimei bereio ealo, napano amijikia avuru riva komeli ail vanio. Aber jibe na, mia nalo aju ajidomii luklukua ruei ka ver Pol rimei, mia nalo ava atu rorea naio yako, ka mia auebin ga naio riñaro ea ñarabo iviso viovare.<sup>4</sup> Ana Vestas naio berinavo “Bo ga, mia vesiou re ga ana kiniou bunu navan bereio yako Sisiria, ea vio napano ajum̄ia abokar toro nene joaio.<sup>5</sup> Tibe na, mia kamiu tomu na tortoru tealo, kumijikia kuvitakisor kiniou ravatove, ka mia reial tum̄abe. Ver toro na mila vite nalo tai napano maka rimemedu, mia romijikia rala iliano ea bogo nene ga.”

<sup>6</sup> Naruei Vestas jo naliko yako Yerusalemo maka rivokar bogoti ve duelimo ba veri [14], ana naio batove bereio yako Sisiria, naliko nalo nei tealo. Ana ea legiano dolo nene, ana naio ba jotano ea kanano vio na tibureano, ana berinavo ava avuru Pol rimei.<sup>7</sup> Mia bogo napano Pol binimei joomo, ana kulo Ju na vio Yerusalemo napano ajakisor Vestas abinimei, ajikili aju, ana ajum̄ia aberial burum̄ara vite va nalo telabo napano aber Pol naio jom̄ia milaio, mia kanalo iliano nalo nei maka atu sikili leleio.<sup>8</sup> Mia bogo napano Pol naio jidom ka sian kiano verdoŕeiano, naio jekorov bulati ga berinavo “Kiniou maka nala titai leleio, napano nemilakorov tuboiano na kulo Ju nalo kanalo, a maka nala niegeniege Yimo Lu na vio Yerusalemo, a maka nalakorov leleio bunu tuboiano na parinio tubo na vio Romo nei, Sisa kiano.”

<sup>9</sup> Mia Vestas nei, naio jom̄ia jidomii ka rila kulo Ju nalo ajog rivu ka naio, ana naio jidom ka rilavonio ka rila tibe ka napano nalo aber kanio, ana naio bika den Pol, berinavo “?Jum̄abe, ŕeli bo ka mia kiniou novuruso rava komeli yako ga Yerusalemo, ana mia jau kotumolu kotukamu ea miraku bereio ea vio na?”

<sup>10</sup> Ana Pol berdoŕe, berinavo “Vonganei, ea vio nei, kiniou nojumolu nojukamu nojua miramo, jau toro natibureano na tuboiano na Sisa na vio Romo ruei. Vere-nio vite tai napano ka mia kala van kiniou, vio nei naruei naio memedu ga ka jau komijikia kalaiio. ?Mia kiniou navavin mave yako Yerusalemo bereio ka vaio? Jau kobitilubar ruei ka napano tilelinio na ea kulo Ju nalo, maka kialo iliano tai ea kiniou tu sikili leleio.<sup>11</sup> Mia ver jau komial kiniou nemila titai bova napano memedu ka mia monoka ñararo riviorio, nina naio bo ga na, maka notom̄a nalavonio ka novuro denio. Mia ver nalo na, maka kanalo iliano tai bereio ka mijikia tumolu tu sikili, mia maka rimemedu leleio ka jau keiila kiniou navan bereio ea jum̄alo ka ala vaio napano ajidom van kiniou.

Vonganei, jibe ka napano kiniou nemijikia nalaiio, jibe ka nojtano ka vitikariano na vio Romo, mia kiniou neber vatitig kaso, kiniou nejidom ka Parinio Tubo Sisa na vio Romo, naio ga monoka tibure kiniou.”

<sup>12</sup> Mia iliano nei mila Vestas ba mil naliko kiano vuroniano nalo beamu vo, avona bisi, ana binimej bereio, berinavo “Jau koberenio ruei kober kojidom Sisa ga tibureso. Mia kiniou neberenio bo ga na, parinio tubo nene, naio nei naruei napano mia jau kotumolu kotukamu ea mirano.”

*Vestas jukunui Pol ban tubo dolu na toru nei Akripa*

<sup>13</sup> Ana iorou kanio, bogoti tealó barlaka bereio, ana tubo dolu tai binimej yako Sisiria. Naio siano nei, Akripa Juo, mia binimej naljuo kuviviniene nei Benisi. Naljuo amijog ka Vestas jikar vonga kiano iñauano napano be parinio tubo na tanobuku nei, naruei nalo ajidom amei aiadu ka naio. <sup>14</sup> Mia naljuo ajua vio nei bano-o, mia bogo telabo ajumia ajukunu naliko Vestas nene, mia bogoti tai ana Vestas naio jukunu banlo ea tivelinio na Pol. Naio ber ka naljuo, berinavo “Kiniou be toro tai joa kiaku yimo nalakoiano, napano joa Veliks jumano beamu ruei, beamu ka napano kiniou nebinimej ea vio nei. <sup>15</sup> Ana iorou ka napano nebinimej, ana nabavin mave yako Yerusalemo, ana tomu na tortoru na kulo lu nalo, bija navuriñaraboiano dolu na kulo Ju nalo, abinimej aberii toro nei ka kiniou, ajidom ka kiniou neverial kiano tibureano tai kanio. <sup>16</sup> Mia kiniou neber vatitigio kalo, neberinavo kiniou maka leleio nejikia nala tibe na ga, mia monoka novuru tivelinio ve juo amei vio takurano beamu vo, ana nalo napano amila veriiano, monoka averialio ea mirano toro napano amila veriiano kanio, a monoka nodu bogo van toro nei ka naio bunu rudu kanano verdopeiano. Kiniou neberii kalo neberinavo bajago na tuboiano na vio Romo na kenememi jibe na naruei.

<sup>17</sup> “Tibe na, nemei nei bereio ea vio nei, ana kulo Ju nalo atumuló den Yerusalemo amei ka kumemi nuvila iliano. Mia bogo napano nemijikia ka nalo abinimej abokar vio nei ka vio be kijeve, maka netii lilian bogo mia kavijog ga, nabano nojtano ea vio na tibureano, ana nabio toro neibano Pol binimej joomo. <sup>18</sup> Mia bogo napano kulo Ju nalo ajumolu ka averial vite nalo na toro nei, nejidomii neberiana mia nojog aver burumara vite va tai napano aberenio naio milaiio, mia nina maka leleio. <sup>19</sup> Nalo aber ga vite sesa nalo ea tivelinio na kanalo nalotvano ga, napanoaju amila baravo kanio naliko toro nei.

Nina ea tivelinio na kanalo bajago morou ga nalo, a ea tivelinio ka toro tai, siano Yesu, napano naio mñaro ruei, mia Pol naio jomña berenio naio meul bereio. <sup>20</sup> Mia nalo ajumia aberii vite nalo napano kiniou maka nejikiaio, tenene na maka nejikia ka mia nala venia naruei, ana nebika denio verenio naio sidom ka rivan bereio mave yako Yerusalemo, ka nalo ala kanalo iliano ea vio na ga. <sup>21</sup> Mia karina, toro nei naio ber pñeli ga, mia rivan re tibe na, naruei naio jumolu ber naio jidomii ka Parinio Tubo Sisa ga naio tibureio. Kanano iliano nei mila ana nobokar naio joa vio nei kianaio, ka kiniou neleal mñarabo tai ka mia neila rivan yako Romo, ka mia Sisa rivitii vite nei.”

<sup>22</sup> Ana Akripa ber ka Vestas, berinavo “Mo kiniou bunu tinieku jii laka ka ver nemijikia nojog kija toro na kanano iliano.”

Ana Vestas berinavo “Bo ga, beni ga, na mia kamjuo kuvitukunu.”

*Vestas buru Pol binimej ka Akripa riagago ka naio*

<sup>23</sup> Mia kavijog, amila vite nonovio ju vatitigio ea kanalo burumara yimo na vioriano tai, amila jibe ka burumara titai. Ana tubo na toru nei Akripa naljuo kuviviniene nei Benisi, naljuo abinimej napano amiofovualo novo batitig ruei, mia abinimej joomo napano tomu na tortoru na kulo na mira nalo bija tomu na tortoru dolu naloaju amiel iorou kalo. Ana amila vite nonovio ka naljuo nei jibe ka napano mña amila ea bogo na tortoru nalo na jibe nei. Amila bano-o bisi, ana Vestas berenio avuru Pol rimej joomo. <sup>24</sup> Ana aburio binimej, ana Vestas jian kiano iliano, berinavo “A Parinio Tubo Akripa, bija tomu dolu na tortoru nalo napano roju nei banej, nina be toro napano kulo Ju nalo abinimej amil ban kiniou biorio. Yako Yerusalemo, a ea vio nei, nalo abinimej abika jikili den kiniou aberinavo netiburio,aju amil telabo aberinavo toro nei, maka rimemedu ka naio rimeul riva lie vo, mia nalo ajidom ka naio monoka rimñaro soñeli ga. <sup>25</sup> Naruei kiniou nebitii vite nei bano-o, mia maka neial titai ka mia rimemedu ka naio monoka rimñaro riviorio. Avona bisi, ana toro nei naio bunu bika parinio tubo na toru na vio Romo, berinavo naio ga tibure naio, ana vonganei nojomña nebitio ka mia monoka neila naio rivan ga ea Sisa jurñano naruei. <sup>26</sup> Mia monoka nevitauia mñesi tai rivan vija toro nei ea kiado parinio tubo na, mia kiniou maka nejikia vatitigio bunu ka mia nevitauia venia tua mñesi nei. Tenene naruei, kiniou najaaro ka noburu naio biedu jikili jukamu ea miramo, tubo

na toru Akripa, bija kamiu tomu dolu na tortoru nalo na, ka rovitií kanano iliano nalo nei bereio, ka p̄eli mia kamiu kumijikia kuvija kiniou ka mia nevivitauia venia tua m̄esi nei. <sup>27</sup>!Maka rivu ka kiniou neila toro nei rivan ea natibureano na toru, napano maka neverial vatitigio ka iliano vaio napano milaio ana nemiila naio bano!”

## 26

*Pol mil ban Parinio Tubo Akripa ea mirano*

<sup>1</sup> Ana Akripa berii ka Pol, berinavo “Mo, kiniou nejian bogo banso naruei ka kotukunu kaso ea tivelinio na vite nalo na.”

Ana Pol naio buku juñano jibe na, ana jikar kiano iliano naruei, ka sian verdopeiano na vite nalo nene. <sup>2</sup> Naruei naio berii jibe nei, ber “Parinio Tubo Akripa, kiniou nemial bo laka ka napano nemijikia notumolu banei ea miramo, ka mia nalavonio ka neverdope iliano nalo napano kulo Ju nalo amila ban kiniou. <sup>3</sup> Neber iliano na bior jau naruei, jau komijikia batitig ruei kanado bajago nalo kito kulo Ju, a jau komijikia batitig bunu ruei vite nalo napano bogo nonovio kiado tomu nalo ajunña amila baravo kalo biorio, a napano ajunña aburuburevurelo bunu biorio. Naruei kiniou nebika denso ka jau tiniem ser re kiniou, bior mia kanaku tukunuano naio tokol vite ve telabo tibe na naruei, a ve tebievi kija bunu.

<sup>4</sup> “Kiaku tukunuano naio jikar jibe nei, kanio kiniou, jikar ea bogo napano nebe kiritete kia ga vo, nojo dañariga kumemi liko kulo Ju nalo ga, nina ea kiaku vio, mia iorou kanio, ana yako Yerusalemo bunu. Naruei nalo amijikia batitig kiaku bajago nalo re nua ruei, a amijikia ka bogo napano nebe toro m̄eaku kia ga vo, <sup>5</sup> mia nebijurukar taara na Varisis nalo, napano nalo naruei abokar m̄elea kiado tuboiano jovulu taara dolo nalo. Naruei ver nalo asaaru ka nalo bunu atumolu atukamu ea miramo, mia nalo amijikia averialio vanso, ka vite nalo nei napano nojonña neberenio nalo abe riano ga nonovio.

<sup>6</sup> “?Naruei bior vaio ana nalo tiniel jer kiniou bereio? Nina bior kiniou noju jikili dañariga ea verikariano tai napano Atua mila bija korobido nalo nua ruei, napano naio berenio mia naio rila tomu nalo napano añarm̄aro mia nalo amemeul bereio. <sup>7</sup> Verikariano nene, kiado yati nalo due- limo ba juo [12] bunu nalo ajunña abolkouo legiano a bogiano ka amijikia avokario. !Parinio tubo, jau kealio vo! Vite nei

Atua berkario ban kulo Ju nalo ruei, ana vonganei kulo Ju nalo nei ajidom ail van kiniou bereio bior kiniou nomoneaio. <sup>8</sup> ? Kiniou maka nejikia, mia bior vaio naruei ana tomu nalo ajunña aber Atua naio maka rijikia rila toro napano m̄aro ruei rimeul bereio?

<sup>9</sup> “Be riano, beamu nua, kiniou bunu ne- jibe na, maka namonea vite nalo na. Kin- iou tinieku jer toru nalo napano amonea Yesu re Nasarete, a nemial monoka nalavio sikili ka rila sio nei ribisi ga. <sup>10</sup> Naruei ea vio Yerusalemo, nojonña nemila vite telabo jibe na. Tomu na tortoru nalo na kulo lu nalo amijamo kanio ban kiniou, ana na- bano nemila telabo ka namoneano lu nalo nei aban ea nalakoiano, ana bogo napano ajiburelo ka monoka añaro, kiniou nojo joomo eaio. <sup>11</sup> A kiniou nojonña najanea yimo nalo na volkouano, bogo nonovio ga nojonña nemila kikilo, a nojoma nomila vonvonlo, nojonña nomila vonvonlo ka aiolua Yesu siano. Mia nojonña nemila jibe na banbano-o napano nebitunu m̄ele, naruei nemijil dedade ealo abeve teraku- rano janea buruvenuo dolo nalo, karina, kiniou naban kalo bereio ea komeli nalo napano aba ajualo.”

*Pol berii juñabe napano Yesu miyotuba ka naio*

<sup>12</sup> Naruei Pol naio jonña jukunu ban kia, berinavo “Ana bogo tai, kiniou nabatove Tamaskas ka nala tibe na van nalo napano ajua vio na. Tomu na tortoru nalo na kulo lu nalo, nalo amila kiniou nabatove, a amidu m̄esi tai ban kiniou ka mia ne- mijikia nala tibe na. <sup>13</sup> Naruei kumemi numitu numiel nubatove, ka m̄erenio jo memedu, nemial burunñara yulu tai merera ea vio mave, napano merera jovulu m̄erenio, naruei yulu nei mijegili memedu vio napano kumemi numituaio. <sup>14</sup> Naruei miamoiano nei naio toru jibe na naruei, mila ana kumemi numitibirbili ea borotano, ana iorou kanio nomijog joono tai, mil ban kiniou jel iliano re Ipru ga, berinavo ‘!Sol o, Sol o! ?Bior vaio ana jau kojonna komila kiki kiniou jibe ka napano kojonna komila na? Jau kojonna jaamo je bereio kiniou jibe na, mia milaio ana jaamo mijalele laka.’

<sup>15</sup> “Naruei kiniou nebika denio, neberi- navo ‘?Ana Tubo, jau kobe kei?’

“Naruei Tubo mil ban kiniou berenio, berinavo ‘Yesu napano jau kojonna komila bova kanio, ninei be kiniou nene naruei. <sup>16</sup> Mia jau kotumolu bereio bior ka na- pano mia jau koiñau kanaku. Kiniou nemiyotuba kaso jibe na bior vite na naruei. Banei kovitilubar kiniou ka mia

kover kiniou kei, a iorou, mia keial kiniou notonña noyotuba kaso ea vite ve telabo ea legiano nalo na ju binimei kia iorou. Vite nalo napano nejilloglog kaso banei nei, naio naruei mia jau kava koverialio van tomu nalo. <sup>17</sup> Mia jau kava koverialio ka kulo Ju, a ka nalo dolu napano maka ave kulo Ju, ana mia keial ka nalo na, mia ala rivova kaso, mia niukniuku rivieso re, kiniou noyotuba kaso ea bogo nalo na jibe na, nalarurso.

“Nina naruei, kiniou nemiilasoa ka kavan ealo, <sup>18</sup> ka kovetavo ea miralo nalo, ka koviliglo ataluvo den melijokouo napano ajaiao, amei ea miamoiano, a ka atuvan moroano na Simaro kiano tobo, mia amei ka Atua ga. Naruei ka bogo napano aviekar kiniou tibe na, mia Atua rivie kokoalo ka kialo kariano nalo, a mia rivijurukarlo ea kiano taara na kulo lu nalo kialo.”

*Pol berii kiano iñauano*

<sup>19</sup> Ana Pol naio mil kia navo, berinavo “Nina naruei, Tubo Akripa, bogo napano kiniou nemial burumñara vite napano jaluvo ea vio mave binimei ea kiniou, maka bunu nejikia nala titai bereio, mia nonomonea ga Tubo kiano iliano ga. <sup>20</sup> Ana na-bano Tamaskas jukamu, naruei nemioliolu ban tomu nalo, nebereio monoka aviliglo rivan ea Atua, a kialo meuliano nalo monoka avu bereio aviniu, rimemedu ka viligiano nei. Ana iorou kanio, nabavin bereio ea vio Yerusalemo, nemioliolu jibe na bereio banlo, karina nabano nemila jibe na ea komeli dolu nalo ea tanobuku na vio Yutea, a karina, naban janea vio reraio nalo napano maka ave kulo Ju nalo kanalo, nomidu iliano nene ga banlo. <sup>21</sup> Naruei bior kiaku iñauano nei ga, mila ana kulo Ju nalo abinimei abokar kiniou joomo ea Atua kiano Yimo Lu, ana ajidom auebin kiniou nañaro rivorio.

<sup>22</sup> “Mia binimei bokar banei, ijaiano napano binimei ea Atua jo bija kiniou dañariga, a vonganei nemijikia notumolu notua miremiu kamiu tomu na tortoru nalo, a kamiu kulo dolu nalo ga bunu, a be kiaku bogo ka nemijikia neil van kamiu. Venia napano Mosis naliko nave-rialiano nalo aberiio nuanua ruei, aberinavo mia tibe na mia tibe na, vite na ga kiniou nojonña neberialio ban kamiu vonganei. <sup>23</sup> Nina naio jibe na, napano Naverikariano, na bogo napano mia naio rimeii riyotuba, mia tomu nalo monoka ala rivova ka naio, mia iorou, mia naio naruei ve toro na meul ve moti den ñariano bereio. A kiano tumoluano nene bereio den nañariano, mia vite na naruei rive

ñarabo ka rivar yulu na ioruriano rimeii rimiamo ea tomu nalo nonovio, kulo Ju nalo a nalo napano maka ave kulo Ju.”

*Pol jidom monoka amonea Yesu tibe ka naio*

<sup>24</sup> Naruei bogo napano Pol joña jian kiano verdopeiano jibe na, Vestas jumolu jekorov kanano iliano nalo, mil toru, berinavo “!Pol, jau komiavovu ga na! Jau kojidom ka jau kove masou ka jikiaiano doldolu nalo, naruei miliao pariparimo banbano-o ña miavovu garuei.”

<sup>25</sup> Ana Pol berinavo “Kiniou nabame-neaso, Parinio Tubo Vestas, mia monoka never kaso ka paripariku naio bo ga. Kiaku iliano nalo napano nojonña neberialio ea vio nei, abe burupati na ilirianiano napano abe riano laka garuei. <sup>26</sup> Vite nalo napano nojonña nojukunu kanio, nemijikia batitigio bo ka Tubo Akripa naio mijikia ruei, abinimei bokar kiano vitiiano, nina naruei mila ana maka nemerou ka neverialio ea mirano. Vite nalo nei, maka ayotuba ea vio na telisu ga tai napano toro maka rijikia vo, mia tomu nonovio amijikia ruei, ajaña aberiio va telabo bunu. <sup>27</sup> ?Mia Tubo Akripa, venia naruei naio be kiamo jidomiano riano ea vite nalo nei? ?Kiniou nemial ka jau bunu, komonea iliano nalo na nave-rialiano nalo re nua, a?”

<sup>28</sup> Naruei Akripa ber ka Pol, berenio “!Ee, makanio! ?Peli jau komil ea bogo kiri bulati ga, jau koberianña komijikia kovuru kiniou bunu neviedu neve Kristo kiano, na?”

<sup>29</sup> Ana Pol berdope, berinavo “Ee, kiniou maka nejikia, neil bogo ve bulati ga ñeli na ve tebievi, mia vite takurano ga nobolkouo ka mia Atua rila banei, nejidom ka jau, kamliko nalo dolu na, napano kumitunña kumiagago ka kiaku iliano, nejidom ka mia kamiu kumei kuvitibe ka kiniou. Maka never ka mia kamiu kuvar marimieni nalo na tibe ka napano nabario, mia neberenio bo ka kamiu kumei kuvitibe ka kiniou, napano nemijeve Yesu Kristo ea kiaku iviso, nebinimei nebe toro vou ea naio.”

<sup>30</sup> Mo Tubo Akripa naio jetavoko iliano ea vio na, ana naio naljuo Vestas, bija Benisi, naliko tomu dolu nalo na tortoru napano ajaña ajutano mave naliko, nalo ajumormolu, abava tavio bereio. <sup>31</sup> Ana bogo napano abava tavio bisii na, ajaña aberverii kalo aberinavo “Toro na maka rila titai rivova lelelo, napano rimemedu ka mia naio riñaro ñeli na mia rivar vironiano rivorio.”

<sup>32</sup> Ana Akripa ber ka Vestas, berinavo “! Ver toro na river re Sisa ga tibure naio, mia naio mijikia riva tavio ga tibe na ruei!”

## 27

### *Aburu Pol ajuvan vio Sisiria ka ava Romo*

<sup>1</sup> Ana ea bogo na, kiniou Luka, kiniou bunu nojo bija Pol ea vio Sisiria, ana neberenio kiniou bunu navan vija naio Romo. Naruei bogo napano tomu na tor-toru nalo amial ka bogo na ka mia nuvano, aburular Pol naliko nalo dolu napano aju joomo ea nalakoiano, amidulo jua toro na toru na mira tai jumano. Toro na, naio siano Julias, a naio be navurim̄araboiano na taara na tomu nalo na mira nei napano abiolo ka “Taara na Okastas.” <sup>2</sup> Naruei naio buru kumemi nubano, nubajog koyou ea tei, naruei nalo amileal uako tai na vio Atramitiam ana nubavin eao. Ana ea bogo na, Arestakas na vio Tesalonaika na tanobuku na Masetonia, naio bunu kumemliko. Ana kumemi numidu uako nene nubano, napano m̄arabo nene ka mia riva sel ea bulu yaniniobi nalo na tanobuku na vio Esia.

<sup>3</sup> Ana ea kavijo, kumemi nubinimei nubokar vio nei Saiton, ana ea vio na, Julias mila bo ka Pol toru laka, napano naio mijamo ka bauro ka rial kiano bilbilu nalo, a naio mijamo ka nalo amijai Pol ka vite nalo tai ka kiano m̄arabo. <sup>4</sup> Naruei kumemi numituvan vio nei bereio, nuburo ea tei banbano-o, ana numitupe jegi ka bogo na, mila ana bogo napano nubokar uleule na vio Saipras, mia numisel ea taakano tivelinio, tivelinio bano. <sup>5</sup> Naruei nubar korovio burum̄ara tei neibano jo tavio ea tanobuku juo na vio Sisia bija vio Pamvilia, naruei nuburo nubinimei nubokar komeli na Maera, ea tano-buku na vio Laesia. <sup>6</sup> Ana uako nei naio miyon kumemi ea vio na, naruei toro na mira nei Julias naio ba jirag m̄arabo dolu. Ana naio mileal uako tai na vio Aleksadria napano naio jo ban ea buruvenuo napano kumemi numisidom ka nuvan ea na, Italia, ana naio mila kumemi nuban ea uako nene kija.

<sup>7</sup> Ana kumemi nubatavio bereio ea tei, mia jegi bova ga, mila ana nuburo melmelumu ga nubano-o nubokar legiano nalo tai, naruei numila vio toru, numi-aveve ka jegi jibe na ga ba bokar jelati na vio Nitas, mia jegi juko kumemi batitigio garuei. Naruei nubarijililg, numi-akar jelati dolu na vio Salmone ea uleule na vio Krit, ana numisel ea taakano tei melumu. <sup>8</sup> Kumemi numiaveve ga uleule

nene, numiturna numitakii nubano-o napano jegi jorna mue kumemi bova kia ga vo, ana nubano-o nubokar bulu yaniniobi tai napano abio kanio “Bulu Yaniniobi na Maraiu,” vaataro ka komeli na vio Lasea.

<sup>9</sup> Ana kumemi numitua kija vio na telisu, mia nalo amial ka bova laka naruei, bior jegi jorna mila jibe na ka kumemi, mia numitua m̄arabo kirisiou ruei, mia m̄arabo tebievi jo keano vo, a vonganei, be bogo na jegi bija burum̄ara niavo ruei. Bogo nonovio ga ajurna aberenio bogo kirivova nei jorna jikario ea siberio na Jokoluolu Na Viekoano, mia vonganei, jokoluolu nene barlaka ruei. Naruei Pol naio mijog bova ka vite na, naio ber vatitigio banlo, berinavo <sup>10</sup> “Tom na tomoruo nalo, kiniou nemijog lubar ka ver ravano, mia rivova laka, mia vite nalo nonovio avavakovio ga. Kiniou nemial jibe ka mia uako nei naio mijikia rimadudu ga vija sano vite nalo, a kito bunu, kiado meuliano nalo amijikia avavakovio ea tei.”

<sup>11</sup> Mia toro na mira nei naio maka riagago ka Pol, mia naio miagago ka toro napano jilanivu ka uako, bija nana boru na uako nei. Mia naljuo aberinavo “Peli ga, mia rivu ga na, mia kito ravan ga, <sup>12</sup> bior kito maka rejikia rotua vio nei rivano-o rivokar napano rotua bogo na bo bereio.” Naruei nalo aberio, ana nalo telabo amial bo ka kumemi nuvituvan vio nei, aber kumemi nuvuro ga ka nuva nuvokar bulu yaniniobi dolu tai, siano Viniks, ea uleule nei kia ga vo, napano amialio ka aber naio naruei bo ka nuvituaio, rivokar bogo na burum̄ara jegi na niavo nei tubabinio.

### *Burum̄ara jegi tai miuvu titig searialo abano*

<sup>13</sup> Naruei bogo napano amial ka napano jegi biligio, be jegi na saut naio jumolu kija naruei, amialio ana aberenio bo naruei, ana nalo ajidom aber jegi na naruei mia naio riuvu kumemi nuvan ea bulu yaniniobi napano numisidomio ka mia nuvan eao. Naruei nalo aburu veru binimei mave, ana na nuburo nubano, numisel veve vio uro ga. <sup>14</sup> Mia maka vesiou, ana kumemi numiilo ka burum̄ara jegi uro tai naio jumolu binimei miuvu kumemi. <sup>15</sup> Jeg nei miuvuvu toru jibe na, naruei maka bunu nuvijikia nuvuro ka napano numidu jegi nei, mia nalo abilig ga uako ana ajuvanio, amijamo ka ga jegi nei jorna miuvu lilian kumemi nuba tavio ga, naruei jegi nei jorna miuvu titig kumemi nubano jibe na. <sup>16</sup> Ana na kumemi nuburo nubano, numitoluku vonio kija ga ea uleule sesa tai, siano Kaoda, mila naruei ea vio na ga kumemi numinau bijon ka uauako nene bano-o, ana aburu lario binimei mave.

<sup>17</sup> Naruei nalo ajumña amerou aber tibe mña mia uako nei naio rivuruboñe na, ana nalo aburu teli na tortoru nalo ajel yetano ka uako, ana na amiorkar kanio ka rivokar vatitigio.

Ana amial ka napano jegi jonña miuvu titian kumemi nubano dolu ka ga, ana nalo amerou ka aju aban vaataro kanio baraañña nalo na vio Saitis, vaataro ka vio Lipia, naruei nalo aburu bereio mñaaja. Naruei jegi miuvu titian kumemi nubano numitovulu vio nei, ana na vio melijo, mia kumemi nuburo nunu ga jibe na nubano.

<sup>18</sup> Ana ea kavijo, ana jegi jonña miuvu biloulo kia ga vo, a tei jonña buku bilivilig kumemi, naruei nalo ajikar ka abuku bulavulag togogo nalo banvan ea tei. <sup>19</sup> Naruei ea legiano dolu nene bereio, vio bova kia ga vo, ana nalo abano ami-jubar bulag teli nalo a mñaaja nalo a vite nalo na jibe na, abuku lo abanvan ea tei bunu. <sup>20</sup> Jibe na kanio legiano telabo bereio, napano mia vio yauo na mave naio kiri bobogio ga jo, maka nuvial mñarivitano a maka nuvial mirano mñerenio. Kumemi numial ka napano numitu kokouo ea jegi tai nei napano mia maka bunu ve toro tai sidonii ka river mia numeul.

<sup>21</sup> Mia tomu nalo na uako nei maka bunu asinan legiano telabo rui, nalo amijog bova toru laka, naruei Pol naio binime mialo, ana ber kalo, berinavo "Tomu nalo, verenio kami kuviagago batitig ka kinio nanua rui ka bogo napano kito roju kia ga yako Krit, mia burumñara jogvaiano a burumñara laluviano nei maka rijikia rivokar kito. <sup>22</sup> Ana vonganei, mia kinio never titai van kami bereio, mia kami kuvijikia kuvijog rivu eao. Neberial ban kami, ka mia kiado uako nei mia naio rimadudu navo, mia maka kito tai leleio napano mia rivakovio. <sup>23</sup> Kinio nemijikia vite nei bior ka napano bogiano ga, nemial kiaku Atua napano nojonña nobolkouo ka naio, nemial miila kiano nailiano tai binime maluvo ka kinio. Nailiano nei binime jumolu ju vaataro ka kinio, <sup>24</sup> ana naio berinavo 'Pol, komerou re. Mia jau monoka kavano-o kovoru Romo, monoka kotumolu kotua mirano Sisa kia ga navo, ana nemijikia never kaso, ka nalo napano ajua uako na kamliko kialo meuliano, Atua jidom rijamo kanio vanso ga ka mia nalo ameul ga, nalo tai rivakovio re.' <sup>25</sup> Naina naruei, tomu nalo, kami kuvijog rivova re bereio, kinio nebiekar mñelea Atua ka mia tibe ka ga napano kiano nailiano berialio ban kinio. <sup>26</sup> Mia vite takurano ga, mia kito monoka rovilig kiado uako riva sel uro ea uleule na telisu tai."

<sup>27</sup> Mia jegi nei jonña miuvu titig lelan kumemi nubano kia nalo, bokar sude juo rui napano numiturña nuburo janea burumñara tei na Metetireniano nei. Naruei ka bogiano tai, tomu nalo na uako nei abitulubar ka kumemi numitu nubinime vaataro ka uleule tai kovio tai. <sup>28</sup> Naruei ajuvarvan teli batove, abuluku bululuoiano na tei bano-o bokario meta duelimo va veri [40], karina, aju kija ga telisu, karina amila bereio, abulukuio aber meta duelimo va rolu [30]. <sup>29</sup> Naruei nalo amerou ka mia nuvuro nuva nuvijivi ea burumñara puruveru nalo tai ñeli na venia, naruei nalo ajuvan veru na teremi veri iorou ea bareno uako, ana na nalo ajumña abolkouo ka veru teremi nalo nei monoka avokar kumemi, a ka viorijeni monoka rime soñeli.

<sup>30</sup> Ana tomu nalo na uako aberio, aberenio mia ala sibilili kumemi dolu nalo, ka mia ala vonio ka adu uauako nei ga avuro avauo eao. Naruei nalo amila sibilili kumemi, aberinavo "Oi, mia kumemi nuvidu von veru temi nei rivan yako beamu vo, ka nuvial vonio ka rivurukar kiado buruako." Naruei nalo ajuvarvan uauako batove ea tei.

<sup>31</sup> Ana Pol bitilubar, ana ber ka tomu na mira nalo, berinavo "Ver kami kuvisidom ka kami kumeul, nalo na monoka kuverburelo ka atu vija kito ea uako ga." <sup>32</sup> Naruei na mira nalo nei amijogio, ajumolu vaarakurano ga abano aje kokorov teli nalo na uauako nei, ana naio mialalo den uako bano.

<sup>33</sup> Naruei vaataro ka viorijeni mermeravo, ana Pol jidom asen titai, ana ber kalo berinavo "Ei, binime bokar banei, be sude juo naruei napano kito rojuo bogo na bova nei, maka rosinan batitigio rivu. <sup>34</sup> Ana ho ka banei, kito rosinan vatitigio kija rivu bereio, kanio niabedo nalo amijikia amei sikili bereio, tibe na ana mia kito romijikia romeul. Tibe ka napano neberenio rui, mia maka lele kiri vijudo tai rijikia rivakovio, mia kito rovinu rovu ga."

<sup>35</sup> Naruei iorou ka napano naio berii vite nei bisi, naio ba midu joko tai, naruei bolkouo ea miralo, ber siva ban Atua biorio, karina burekokorovio jonña jenio. <sup>36</sup> Ana bogo napano nalo dolu amialio ka napano Pol jonña jinan jibe na, nalo bunu amonea ka be riano, mia nalo avu ga, naruei nalo bunu ajaaro ka asinan bereio, ana ajinan. <sup>37</sup> Mia kumemi nonovio napano numitua uako nei, kumemi nubokar toromomou juo duelimo va aluo ba ari [276]. <sup>38</sup> Mia bogo napano abiniu ajinan bisi, amialio bo ka ala uako rimelala lie vo, naruei nalo abar bulag mñaruiti nalo napano jibe ka



sememi sinaniano, abukuvukulo banvano ea tei.

*Uako ba ijel tavio ga, ana amijeljelio ga abauro*

<sup>39</sup> Naruei telikiti napano viomijeni kario, ana kumemi numial vio uro jo vaataro ga ruei, mia maka nuvijikia vio be nei. Ana amial bulu yaniniobi tai jo, a be bayono novo uro, ana na nalo aberiio, aberinavo mia ala vonio ka ala kenememi uako rivuro rivauro ea vio nene. <sup>40</sup> Naruei nalo aje bulag teli nalo na veru terem nalo, ajuvanlo ajubo ea tei, a nalo amijubar bulag teli nalo napano amior kakario ka vuu na uako, ana aburu m̄aaja sesa na buruako, ka mia jegi riuvu kumemi nuva nuvia yono.

<sup>41</sup> Kumemi numitu nuburo bano-o, naruei numiilo ka uako ba miakar belia ga burum̄ara yonovoro tai napano tei buru bijiilo ju vio takurano yetano. Buruako na uako miakar bayono nene, naruei naio birakar jo jikili batitigio jo, maka bunu rijikia rikulkulu leleio. Naruei burum̄ara niatuva nalo ajumormolu abinimei amidon boʻve baren uako garuei.

<sup>42</sup> Mia na mira nalo ajum̄a aberii ruei, ka vere vite tai tibe nei mia auebinvinlo ga, nalakoiano nalo napano m̄a aju kuku kalo, ver makanio ʻpeli mia nalo tai ala vonio ka aviako avatove ea tei, ajelio ava uro, mia avuro kilkil. <sup>43</sup> Mia kialo toro na toru naio berburelo ka nalo ala re, bior napano naio jidom ka Pol naio monoka rimeul ga. Mia naio ber ka kumemi nubiniu, berinavo “Mo, kito napano romijikia romijeliou, kito rotukamu, ratabulu ea tei ana reia vonio ka rovoru uro. <sup>44</sup> Ana kito napano maka rejikia reia, mia kito ravar m̄abulu, ʻpeli na venia napano romijikia releallo ea uako nei ka romijikia romonmonea mave eaio, ana kito iorou rava uro.” Naruei ea m̄arabo nei ga, kumemi nonovio nubano-o nuboruvoru uro ea vio nei, napano kumemi nonovio numeul bo ga, maka kumemi tai rivakovio.

## 28

*Pol nalo ajua uleule na Molta*

<sup>1</sup> Mia bogo napano kumemi nubiniu nubinimei numitu batitig uro bo ruei, ana na tomu nalo na vio nei abinimei amial kumemi, ana aber ka kumemi aberenio vio nei naio be uleule tai, siano Molta. <sup>2</sup> Naruei nalo amila batitig kumemi bo laka, nalo abijuku bo ka kumemi mia. Ea bogo na, yuo jom̄a bovo, naruei nalo amial ka napano kumemi numijog niavo toru laka, ana nalo ajovokar sebi, mia abitikar vatitig kumemi jibe na. <sup>3</sup> Ana na Pol naio ba miabu bagaro na yeto tai, naio jidom

rivukuio rivan ea sebi, ana bogo napano naio bar jakou ea sebi, mia kiri maro sesa tai mijukukar jo bure yeto nalo nene, mia naio mijog sebi mijegio bitunu, naruei naio mijujojuo den yeto nalo nei, mia m̄enkakar naio ea Pol jum̄ano, mia jerio. <sup>4</sup> Mia bogo napano tomu nalo na vio nei amial maro na m̄a jer binvin tomu jom̄a jakilele ea Pol jum̄ano jibe na, ana nalo amijuvaluva melumu ga ealo, aberinavo “!Kealio, toro na yimo nalakoiano nei, ʻpeli naio be toro tai na m̄a muemue tomu dolu nalo telabo ruei! Tei jidom rila bin naio rim̄aro, mia naio buro kilkil ga, mia vonganei, mia maro na rila ka naio rimemedu na.”

<sup>5</sup> Mia Pol ʻpilglar bere maro nei den jum̄ano ban ea sebi, mia naio maka rijog titai, jum̄ano maka rijalele leleio. <sup>6</sup> Mia nalo aju abitivitio, aberiam̄a mia niabeno nonovio monoka aturobi ve tortoru, ʻpeli na ver maka ana mia monoka naio rijoru rim̄aro ga, mia nalo aju rorea jibe na, banbano-o mia amial ka napano maro neibano maka ruebin naio leleio. Mia bogo napano amialio ka Pol naio bo ga, nalo ajidomii be dolu naruei, aberinavo ʻpeli Pol naio be atua tai kovio.

<sup>7</sup> Ana vio neibano kumemi nubauro eaio, nina naio vaataro ka tubo na uleule nei kiano tiniavio, siano be Puplias. Ana naio buru kumemi nuban ea kiano vonuo, mia bitikar vatitig kumemi ka bogoti tolu, napano numitua jum̄ano. <sup>8</sup> Ana bogo napano numitu kumemliko nalo na, tubo nei karam̄ano tormoruo naio jomon ea m̄ano jogu, naio mieyulu, napano niabene bitunu, a barbulo bunu. Ana Pol naio ba mial tormoruo nei, ana midu jum̄ano joaio, bolkouo kanio, mila naio binimei bo bereio. <sup>9</sup> Mia bogo napano tomu dolu nalo amijogio ka napano Pol mila vite nei jibe na ka tormoruo nei, nalo bunu napano amie abinimei, naruei kanalo mieiano nalo ajaluvo. <sup>10</sup> Naruei nalo ajaoro toru ka vite nalo nei, naruei ajum̄a abar kurano ka vite telabo ban kumemi. Ana kumemi numitua uleule nei bano-o bokar siberio tolu, ana bogo napano mia kumemi numitaluvo bereio, mia nalo abar sinaniano telabo a ijaiano nalo abinimei, abar jua kenememi uako dolu ka rijai kumemi ea kenememi m̄arabo bereio.

*Pol nalo abano-o aboru Romo*

<sup>11</sup> Mo uako dolu na mia kumemi nuvisel ea naio be uako tai na Aleksadria kanano napano naio bunu jo kirisiou ea uleule nei, naio jo rorea ga ka bogo na jegi nei rivarlaka kario. Mia uako nene, ajisia kanio “Kasto a Polakis,” napano sio juo nei be tena atua juo na kanalo napano naljuo abe savoro, napano aje tavoru nene

nalo jua buruako na uako nei. <sup>12</sup> Ana numituvan vio, nuban nuboru ea vio tai bereio, siano Sairakius, numitua vio na bogoti tolu. <sup>13</sup> Karina nuburu veru bereio, numisel tivelinio taakano nuburo jibe na bano-o nuboru Rejamo. Mia numitua vio na bogoti takurano bisi, karina jegi saut novo tai miuvuvu, naruei nuburo m̄sasou ka bogoti juo, mia kumemi nuboru ea bulu yaniniobi na vio Puteol. <sup>14</sup> Ana na kumemi numitabulu den uako ea vio na naruei, ana numileal namoneano nalo tealo, ana aburu kumemi nuban numitu kumemilikolo ka bogoti aluo [7]. Ana iorou ka nina, numial ka kenememi burum̄ara ieliano nei vaataro ka ribisi naruei, numitu nubinimei vaataro rui ka burum̄ara komeli na yetemeriba nei, Romo.

<sup>15</sup> Naruei namoneano nalo napanoaju Romo, iliano bano-o bokarlo ka numitu numiel nubinimei rove ealo, naruei amielko m̄arabo ka kumemi. Nalo abinimei koalabo laka, nalo tealo abinimeiaju rorea kumemi ea komeli nei napano burum̄ara yimo na v̄ilv̄iliano na Apias kanano naio joaio, a tealo abinimei lie vo bereio, abinimei nam̄ariga-o abokar komeli na yimo tolu na valauo nalo ajuao. Ana bogo napano Pol mial ka napano naloaju rorea jibe na, naio jaaro toru laka, a naio ber siva ban Atua ka napano vite nei mila ana naio mijog bo, mila ana mijog be p̄irinio bereio. <sup>16</sup> Ana bogo napano kumemi numiel nubinimei nuboru Romo, nalo maka adu Pol toa nalakoiano, mia amijamo ka naio ka mijikia rileal yimo tai ka naio toaio, mia nalo amidu toro na vitikariano tai jo bijaio.

*Pol naio jo Romo ka yuka juo*

<sup>17</sup> Ana Pol naio jo Romo bogoti tolu bisi, ana miila toru ba ban kulo Ju nalo kialo navurim̄araboiano nalo napano ajua vio nei, ana bogo napano abinimei vio takurano, Pol jukunu banlo. Naio ber kalo, berinavo “Banalo, kiaku tukunvano jibe nei: kiniou nebinimei ea vio nei bior ka yuka nanua beamu, kiniou nojo Yerusalemo, ana kiado tomu na tortoru nalo na vio na abuku kiniou naban ea nalakoiano, karina amidu kiniou nojoa natibureano nalo na vio Romo jum̄alo napano abitikar kiado buruvenuo. Ea tivelinio na kiniou, maka nala vite tai ka kiado tomu nalo, a maka nala titai napano maka rimemedu ea kanado bajago p̄eli na ea korobido nalo kanalo iliano nalo, mia nalo amila jibe na ka kiniou dam̄ariga. <sup>18</sup> Ana bogo napano natibureano nalo na vio Romo abitii batitigio vite nei, bisi ana nalo ajidom ka kiniou nava tavio bereio ga, bior maka aial vite tai napano rimemedu

ka mia asian vironiano van kiniou riviorio, ka river kiniou monoka nam̄aro. <sup>19</sup> Mia karina, nalo na navurim̄araboiano na kiado kulo Ju nalo amil vaarakurano bereio biorio, mia naio ba bova ga vo. Nalo amila jibe na, naruei ana kiniou nemial ka maka bunu ve kiaku vio tai naruei ka mia nemijikia nesel eaio, mia m̄arabo takurano ga nemijikia nesel eaio, naruei kiniou neberial ka nejidom ka Parinio Tubo Sisa na Romo ga, naio ga tibure kiniou. Maka notor̄na nesidomii ka novuru nalo na ea kiado buruvenuo avan ea burum̄ara komeli na vio nei, p̄eli ga, mia bior ka napano amila jikili laka ban kiniou jibe na, tenene na mila ana neberenio nalo monoka avuru kiniou nemei ea vio nei ea vio Romo. <sup>20</sup> Tenene na kiniou nojoa vio nei naruei, ana nejidom kamiu monoka kuvijikia vite nalo nei, ana nebio ka rotu vio takurano tibe na ka nemijikia notukunu van kamiu kano. Kiniou nejidom ka monoka kuvijikia ka m̄arimieni nalo neiaju amior kiniou jibe nei, nina maka rivior kiaku vovaiano tai, nina bior ga Naverikariano na kanado, naio napano kito kulo Israel nalo nonovio roberenio ka roju ga ban naio.”

<sup>21</sup> Naruei navurim̄araboiano nalo na kulo Ju nalo nei napanoaju Romo nalo aber ka Pol aberinavo “Vite nalo na napano jau kojom̄a koberenio, mia kumemi nubitovitonia. Kumemi maka nuval m̄esi tai napano tōna riverii jau napano kotaluvo Yerusalemo komei ea kumemi, a namoneano tealo napano ajumolu eaio abinimei, mia maka averii jau van kumemi ka jau komila jibe na jibe na. <sup>22</sup> Mia kumemi numijog kiamo iliano nalo, naruei numisidom ka nuvijog kija bere vo kanamo jidomiano nalo p̄eli na kanamo moneano, bior ka napano be riano, kumemi numitum̄a numijog kijakija ga ka tivelinio ka nalotvano vou nei, mia numijog ga ka tomu nalo ajur̄na aber niegeniege janea vio nonovio.”

<sup>23</sup> Ana nalo aji bogo tai ka mia amei aial Pol bereio ea vio nei napano naio joaio. Ana iorou kano, bogo napano nalo abinimei, abinimei nalo miroano mia miroano, naruei nalo ajum̄a amiajago ka Pol, ka napano jikar kavijo ga bano-o bokar m̄erenio batove mia naio jom̄a mil banlo. Naio berial banlo ka jum̄abe ana toro mijikia ba jouro ea navenatuboiano na Atua kanano, a naio jom̄a berlogloglog jum̄abe ka napano tuboiano nalo na Mosis kanano, bija naverialiano nalo re nua kanalo iliano nalo, nalo amila meravo bo ka Yesu naruei, naio be kiado Naverikari-

ano, ka napano nalo bunu ajuña aju rorea naio ka mia rimei rilarrulo. <sup>24</sup> Naruei nalo tealo amijog Pol kiano iliano jibe ka be riano, mia nalo tealo maka amoneaio. <sup>25</sup> Vite nei naruei mila ana nalo ajua taara juo kanio, ajuña ajidom bijovijonio-o, deio ga, aberenio bo ka abisi ga, ava vonuo beamu vo. Ana Pol naio ber vite tai maariano banlo, berinavo “Ei, kiniou nemial ka napano Niununo Lu ber riano laka ga na, ka napano nanua, naio ber iliano tai ban korobido nalo, ka napano naverialiano Aisea naio berial banlo. Naio berinavo

<sup>26</sup> *Jau kavan ea kanado tomu nalo nei, koverial vanlo tibe nei, kover*  
*“Mia kamiu kuvijogio-o mia kuvijog kulu re bogo tai,*  
*mia kamiu kuvialio-o mia kuvial kulu re bogo tai,*

<sup>27</sup> *bior kamiu kumitibe ka tomu nalo napano kanalo jidomiano nalo amarmaro ruei,*  
*jibe ka ajiko burutilinielo,*  
*ḗeli napano miralo kiri bono ga ju.*

*Mia verenio nalo ala re tibe na,*  
*ḗeli mia miralo nalo avitulubario,*  
*a burutilinielo nalo ajoglubario,*  
*a kialo jidomiano nalo amijikia avokar jikiaiano ruei,*  
*tibe na amijikia aviliglo amei ka kiniou ka mia nalarurlo.”’ Ais 6:9,10*

<sup>28-29</sup> Mo vonganei, neberii ka kamiu, neberinavo kamiu monoka kuvijikia ka Atua kanano Ioruriano naio jo miadu ba tavio ba bokar ruei nalo napano maka ave kulo Ju, nalo naruei ajuña amijogio a mia nalo nene naruei ajogkario.”

Naruei bogo napano Pol berial kiano iliano na maaro nei banlo bisi, ana na nalo ajumormolu abava tavio, napano mia nalo aju tiniel jer tanealo kar iliano nei.

<sup>30</sup> Ana Pol naio joa vio na jibe na ka yuka juo, a naio ga joña bulu kunuano, naio jo bitikar naio. A ver toro kei napano binimei mial naio, mia Pol jaaro ka rivurukar naio rivan ea kunuano, <sup>31</sup> ana jibe na, na naio joña mioliolu ka Atua kanano navenatuboiano bogo nonovio ban tomu nalo nonovio napano naio milealo. A naio joña berlogloglo ka Tubo Yesu Kristo, ka napano mia maka bunu ve toro tai ka ril van naio riviorio, ḗeli na riverbure naio ka mia rila re bunu.

## Mesi Napano Pol Bivitauiāio Ban Namoneano Lu Nalo Na ROMO Verialiano Moti

### *Tukunuano bulati na niosi nei*

Pol bivitauiā mēsi nei ka rila vatitig kiano m̄arabo, napano jidom riva rial namoneano nalo na Romo. Ea kiano jidomiano, naio jidom ka riṁāu bogo ve bulati vija tomu na moneano nalo na vio nei, ana iorou mia nalo aija naio, ka naio rijikia riva voru Spen. Naio mijikia vatitigio bo ver toro rimonea Yesu Kristo, a rimeī ve kiano toro napano takisor vatitig kiano bajago ea kiano meuliano, toro na mia rimemedu ea Atua mirano. Naruei bior vite na, naio bivitauiā mēsi nei ka riverial bajago na moneano nei van tomu na moneano nalo yako Romo. Niosi nei bokar burupati Pol kiano jidomiano ea marabo napano toro rijikia monmonea Kristo.

Beamu, naio ber ilivorvoriano ban tomu nalo na yimo lu na Romo, a berial banlo ka naio jo bolukouo kalo. Ana kario, naio berial burupati jidomiano na mēsi nei napano bernavo “Ioluano vou nei jo berial Atua kiano bajago ka rila tomu nalo ave tomu memedu ea mirano. Bajago nei jo maluvo ea kito ea moneano, jikario ea kiano tiiano rivano-o rivokar juluvati nene.” (1:17)

Ea mēsi nei, Pol judu ka berii kiano burupati jidomiano nei. Naio ber ka tomu nalo be iakurano napano abe yati na Israel, p̄eli maka ave yati na Isreal, mia abe veverarei ga, aju yetan ka moroano na kariano. Mia toro mijika ga rimeī memedu ea Atua mirano, ver naio rimonea Yesu Kristo. Vite dōlu, Pol berii meuliano na napano toro to riasol vatitigio ea Kristo, bija meuliano vou nene napano toro binimeī be memedu ea Atua mirano. Toro napano monea Kristo, naio joa tuṁāro bija Atua, a Atua kiano Niununo mila napano naio be teau, moroano na kariano bija m̄ariano maka bunu vokar naio. Mia jikario ea mirano jimo [5] ba bokar mirano arolo [8], Pol berial bior vaio Atua jian tuboiano ban kiano tomu nalo, a berii bajago napano Atua kiano Niununo jo miṁāu ea tomu nalo kialo meuliano napano amonmonea Kristo.

Mia naio judu kia ka berii bajago napano taara na kulo Israel, a nalo napano maka ave taara na Israel, amijikia avuron ea verikariano nei napano Atua mila be tomu nalo na yetemeriba kialo ka atakiio. Bogo

na naio jidom rila nonovio kiano iliano, naio berinavo bajago na napano taara na Israel nalo abilig taakalo ka Yesu, naio be togio na Atua Kiano Verikariano napano naio tinienmiia tomu nalo na yetemeriba, naruei miila Yesu binimeī, ka toro napano rimonea naio, naio mijikia rimeī rive toro memedu ea Atua mirano.

Mia Pol monea ka taara nalo na Israel, mia maka ajikia avilig taakalo bogo nonovio ka Yesu. Ea togio maariano na mēsi nei Pol berii bajago napano memedu ka tomu na moneano nalo atakiio ea kialo meuliano, a mave liei, naio berii bajago na toro monoka tinien riia toro dōlu. Naio berii bajago napano toro monoka takiio ea Atua kiano iṁāuano, a bajago napano tomu na moneano monoka ala van parinio tubo a van toro dōlu. Mia naio berii bajago napano toro na moneano monoka sidomiio vatitig ka rilabulag re toro dōlu kiano jidomiano. Ea kiano juluvati mēsi nei, naio ber iliano nalo na ber kiano ilivorvoriano bija kiano bilbilu nalo, ba ban kialo bilbilu dōlu nalo, a berenio iliano nalo na aiaia Atua.

### *Torogio nalo na niosi nei*

Iliano moti bija burupati jidomiano na mēsi nei 1:1—17

Tomu nalo adu meuliano vou napano Atua jianio 1:18—3:20

Atua kiano m̄arabo ka rilarur toro 3:21—4:25

Toro kiano meuliano vou napano miasol ea Kristo 5:1—8:39

Atua kiano verikariano ban taara nalo na Israel 9:1—11:36

Bajago novo napano namoneano monoka takiio 12:1—15:13

Iliano maariano 15:14—16:27

### *Iliano moti*

<sup>1</sup> Bilbilu nalo na Romo:

Kiniou Pol neber kavijo bo p̄eli bogiano bo ban kamui ea Yesu Kristo siano, na nebe kiano toro na iṁāuano, nebe atevi nei na Atua bio kiniou, naio bijauia kiniou ka noiṁāu ka neverial kiano Ioluano Vou.

<sup>2</sup> Ioluano Vou nene, naio ju joomo ea iliano nalo na vivitauiāno lu nalo na Atua kanano ruei, nina ea verialiano nalo na napano kanano naverialiano nalo aberialio nua nua binimeī. <sup>3</sup> Buruṁāra vite napano Ioluano Vou nei naio berialio, naio be Yesu Kristo kiado Tubo, napano naio be Atua kenerinio napano naio miila naio miyotuba ka kito ea yetemeriba nei. Naina naruei napano ea tivelinio na yati na m̄aratavo na kanano, kito romijikia roverinavo naio moluo ea yati na tormoru Parinio Tubo Teviti memedu. <sup>4</sup> Mia

ea tivelinio na kanano niununo, naio be lu laka, naio miyotuba memedu ea Atua kanano yati ga. Amuebin naio m̄aro, ana ea kiano buruñara moroano, Atua mila naio jumolu meul bo bereio, naruei romijikia rovitilubario batitig ka be riano, kiado Tubo nene naio be Atua kenerinio memedu.

<sup>5</sup> Naio naruei bitirilar kiniou ne-be atevi, a miila kiniou ka nava noioliolu van taara dolu na tomu nalo napano maka ave Ju, ka nalo bunu amijikia amonea Atua, ana amijikia amonmonea kanano iliano nalo. Inñauano na jibe nei naio be ijaiano novo tai napano Tubo naio jian ban kiniou, naruei najaaro ka nala ka siano rivavin.

<sup>6</sup> Mia vonganei, kiniou nojo nomila inñauano nei ea kamiu, bior ka napano kamiu bunu siemi joa vio na, kamiu bunu kamliko nalo dolu nei napano Atua biolo ka amei ave Yesu Kristo kiano tomu nalo.

<sup>7</sup> Kamiu bunu tomu nalo napano naio tinien jii kamiu toru, napano naio bitiri bulag kamiu kube kanano namoneano lu nalo ea buruñara komeli nei Romo, naina naruei najaaro ka nebitautia m̄esi nei biedu ban kamiu.

Nebivitauiia jibe nei, nobolkouo ka tiniesese a tum̄aro na karam̄ado Atua vija kiado tubo Yesu Kristo kanalo, naio to ve tomoruo ea kenemiu meuliano nalo veve terakurano.

*Pol jidom toru ka riva rimaluvo ka nalo na Romo*

<sup>8</sup> Beamu ka neverial vite tealo rivan kamiu, kiniou nobolkouo ea Yesu Kristo siano, neber siva toru ban kanado Atua bior kamiu. Nojidom nela tibe na, bior napano vonganei, iliano nalo ea tivelinio na kenemiu bajago novo nalo, napano kuvitumolu kuvitu sikili ea moneano ea Kristo, naio jo ban ea vio miroano ruei.

<sup>9</sup> Tenei naruei mila kiniou najaaro toru, bior napano kirisio ruei nojo nomim̄au Atua kanano bija kanaku meuliano momou, nomim̄auka neverial Ioluano Vou napano berio kenerinio. A naio mijikia ruei ka napano nojo tinieku maio ka kamiu ea kanaku volkouano dam̄ariga, <sup>10</sup> a nojo nobika den naio bunu ka river memedu ea kiano jidomiano ga, mia naio rila kiaku m̄arabo ka nomijikia namaluvo ka neadu ka kamiu. <sup>11</sup> Nojidom laka ka nevedu neial kamiu, ka verenio nemijikia nejev ijaiano tealo na moroano na Niununo Lu juvan ban kamiu ka rila kuvisikili lie vo, mia naio rivu laka. <sup>12</sup> Kiniou nomonea ka kiaku viekouoiano naio mijikia tunukakar kamiu, a nojidom nomei ka kenemiu viekouoiano mijikia tunukakar kiniou bunu, a

tibe na kito roju romija bitiraviran bo ea kito bereio.

<sup>13</sup> Banalo, nojidom kamiu kuvijikia ka va telabo ruei kiniou nemila vio jikili ka nevedu kean kamiu, mia dam̄ariga m̄arabo bisaro ea vite tealo, mila na maka nevedu vo. Mia nojidom toru ka nevedu, ka kanaku inñauano mijikia rivar m̄arati tai bunu ea kamiu napano kumonea ruei, jibe na napano bar ruei ea nalo napano maka ave Ju ea vio dolu nalo.

<sup>14</sup> Inñauano napano joa jum̄aku naio jibe nei, berinavo monoka noioliolu ea kiado tomu nalo memedu kulo Ju, a tomu dolu bunu, a monoka noioliolu ea tomu nalo napano amijikia vite ruei a nalo napano maka ajikia vite vo, <sup>15</sup> naina naruei mila na nojidom nevedu neverial Ioluano Vou van kamiu ea buruñara komeli na kenemiu nei, Romo.

<sup>16</sup> Ioluano Vou nei, naio be m̄arabo takurano ga napano Atua kanano moroano jo mir̄au eao ka ridu ioruriano riyotuba ea tomu nalo, mila na maka noimou leleio ka neverialio bogo nonovio. Ioluano nei naio miyotuba ea kito kulo Ju beamu, karina naio ba tavio ea nalo napano maka ave kulo Ju, naruei toro kei napano rimoneaio, mia rileal meuliano eao.

<sup>17</sup> Ioluano novo nei, naio be kiado m̄arabo ka remijikia romei memedu ea Atua mirano bereio, ka maka bunu ro-vokar vironiano na kiado kariano nalo, mia bo romijikia ka monoka retikar vija viekouoiano, a mia rala nonovio rivija viekouoiano, bior napano naio jibe ka iliano moruo tai napano Naverialiano Abakuku berenio, berinavo

“Toro napano ver ga naio rivarkar tiniene ea Atua,

mia Atua rila naio rime rimemedu rive riano,

a nina ga naruei naio be m̄arabo na ajev meuliano.”

<sup>18</sup> Marabo na aje meuliano naio jo, mia veribinio bija vovaiano abujo laka ea tomu nalo na maka ave Ju reraio ea yetemeriba nei, mila nalo aju aberbure m̄elea Atua kiano ilirianiano, ana jibe na kito romialio ka napano Atua naio joa vio mave, kiano siniabu monoka riyotuba rilalo ajikia. <sup>19</sup> Naio jo berloglog kiano bajago vu nalo amiyotuba medave ea mirano tomu nalo ruei, naruei bo ka abitulubario, mia maka asidom ajikia. <sup>20</sup> Be riano ka Atua naio maka ve kulorinio, a toro maka rijikia rial naio, mia jikar ea tiiano na yetemeriba binime bokar vonganei, tomu nalo aju amial kiano bajago novo nalo, ana amijikia avitulubario ka naio be Atua riano.

Ver aial kiano tiiano nalo ga, maka bunu ajikila avika aver ka naio be kenia. <sup>21</sup> Ver makanio, amijikia ka Atua naio jo, mia maka lele asidom ala kialo jidomiano rivatove ka naio, maka lele asidom aver siva van naio rivior kiano tovu ealo. Nalo maka asidomial titai, banbano kialo jidomiano nalo bujo ka melijokouo batitigio. <sup>22</sup> Nalo be tinielo ka aber abe masou, mia nalo abano aba vovu batitigio, <sup>23</sup> a nalo maka bunu alotu ka Atua napano naio maka rijikia riñario bogo tai. Nalo maka asidom naio, mia amirñauka tavoru napano midu mirano toro ðeli mirano menu ðeli mirano temeul nalo jibe niobi ðeli venia, ana nalo be tinielo bo ka alotu ka tenalo nei naruei.

<sup>24</sup> Bogo na amila jibe na, Atua naio binimej tinien maro laka ea kialo veribinio nalo nei, naruei naio juvanlo ka avan bo kanio vija sidomvaiano venia napano tinielo jiio. Ea bogo nei naruei kito realeal ka napano tomu nalo aju amila bajago na imouiano ea mokotenalo nalo, <sup>25</sup> mia naina monoka tibe na, bior napano abar bulag Atua kanano ilirianiano, amidu sibiano ju keano, a maka bunu alotu ka Atua napano bo ka aiaia siano lu damñariga, mia abatove ga ka vite nalo napano naio jiilo.

<sup>26</sup> Nalo abilig dabu lelan vite nonovio na jibe na, mia Atua maka bunu riverburelo, mia juvanlo aba amila pariparilo ea kialo sidomiano va nalo. Jibe ka tire nalo maka bunu avan vija suñano nalo, mia aban bija tire nalo bereio, <sup>27</sup> a suñano nalo bunu, nalo maka bunu asidom aver bo ka asoro ka tira, tibe ka napano Atua naio berenio berinavo bo ka alaio, mia nalo ajidom suñano ga, aju aban bija nalo bereio ea bajago napano romimouo ka roverio. Inñauano nalo na jibe nei maka amemedu leleio, mia nalo napano ajurña amilaio, ea kialo meuliano nalo ga, aial vironiano napano memedu ka toro napano mila jibe na monoka rivario.

<sup>28</sup> Tomu kinkin na jibe na, maka aialerinio ea Atua ea kialo meuliano nalo, maka asidom titai kanio, ana Atua maka tokovio kalo, mia nalo juvanlo ka kialo sidomsearioiano nalo aburulo aba amidu momou ea bajago va. <sup>29</sup> Amila jibe na banbano komial kialo meuliano binimej bujo ka bajago nonovio na lakorov tuboiano, bija vovaiano nalo, jokoluolu nalo, bija sidomvaiano ea kulo dolu nalo. Amijoku, amuebinvin tomu nalo añarmñaro, abilvilialo, amila sibi, ajerni ka kulo dolu nalo, aberveriilo, <sup>30</sup> ajian merano kanalo iliano nalo, a ea tivelinio na Atua, nalo maka asidomialio ga. A bija bajago nalo na bova nei, parilo kirisikili laka, abarvar

kalo, amil vevavin, amila verikariano bior inñauano vou na vovaiano napano nua makanio, mia bogo napano kialo tormoruo nalo amil banlo, amilkuei ga. <sup>31</sup> Tomu nalo na, romijikia roverinavo nalo maka aje masouano, maka adukar vatitig kialo verikariano nalo, maka ave tinievuiano rivu, maka tiniel riia toro leleio.

<sup>32</sup> Nalo amijikia vatitig bo Atua kiano iliano ruei, amijikia ka Atua naio berkar riñariano ban tomu nalo na jibe na, mia maka atovonio. Nalo aju ajidel dolu ka amila jibe na, mia mave ka nina, aju ajaaro lie vo ver amial kialo bilbilu dolu nalo aju amila bova jibe nei bijalo.

## 2

### *Atua naio takurano tibure tomu nalo*

<sup>1</sup> Jibe na, ver jau toro Ju tai napano kojo komial vovaiano nalo na kulo dolu nei kialo, mia jau kosidomii tuñabe kanio? Peli jau kosidomii ka jau kobo, nalo abova, mia maka leleio, vovaiano na joaso be verare ga, mia maka bunu kojikia kover titai. Jau kobe toro na tibure kulo dolu na, a kojo kojibureso bereio kar napano jau kojo komila tena javukia napano kojo kojibure dolu nalo kanio. <sup>2</sup> Mia jibe napano kito romijikia, Atua naio rije vironiano van tomu nonovio napano amila bova jibe na be verare ga.

<sup>3</sup> Peli jau tai napano kojo kojidom ka jau kobo bior napano kojo komil ban toro napano mila korovio tuboiano, a jau bunu kojo komila korov, mia bova jau kojo kojidom ka vironiano na mia Atua sianio mia maka rijikia rivakarso. <sup>4</sup> Peli kojo kojidom ka Atua naio tiniene bo laka, tinien miia toro, a kiano jidomiano tebievi, ana kober ðeli maka rijikia rila titai kaso?

Ee, Atua naio bo laka jibe ka napano kojo koberenio, mia kiano tiniememiano maka rijamo kaso ka kala du ka kalakorov tuboiano, mia naio ga rivurso koviligso kataluvo ea kariano nalo napano kojoaio.

<sup>5</sup> Ana jau, maka kosidom koviligso leleio, jau pariparimo jikili ga bano, ana jibe na kojo komila ka kojo komivon kakar kiamo vironiano nalo banbano bokar bogo napano mia Atua kiano tiniemimiano tibure memedu tomu nalo. <sup>6</sup> Ea bogo nei naruei mia naio rivar bulag van tomu nalo kivo ga tavukia venia napano nalo aju amilaio.

<sup>7</sup> Jibe na, tomu teal, nalo ajurmaro ga, nalo aju ajudu bogo nonovio ka amila bajago na bo napano mijikia rila sialo rivu ea Atua mirano, a mijikia rilalo avokar mermerano na vio mave. Venia na mia Atua sian vanlo, naio be meuliano napano maka rijikia ribisi.

<sup>8</sup> Mia tealo, tomu na baravoiano, nalo maka amonea ilirianiano, a nalo aju yetano ka moroano na vovaiano. Venia napano Atua mia sian vanlo, nina vironiano napano riyotuba ea kiano buruñara tiniemimiano ga. <sup>9</sup> Mia bogokouo bija jogvaiano rimei rivokar tomu nalo nonovio napano amila bova, jikar ea nalo napano Atua bijauia bulaglo beamu, nina Ju nalo, ba bokar tomu nalo na vio dolu napano maka ave Ju.

<sup>10</sup> Ana nalo napano kialo meuliano bo, mia avokar Atua kiano ilivuiano novnovo nalo, sialo nalo mia atu rivu vijaio, kiano tumaro to vijalo. A nina bunu tikar ea nalo napano abe Ju, ba bokar tomu nalo na maka ave Ju, <sup>11</sup> bior ka napano Atua naio maka rivitii tomu nalo ve dolu, a naio mila memedu bare abiniu.

<sup>12</sup> Kulo Ju nalo aju yetano ka tuboiano napano Atua jian banlo ruei, ana verver amila korov tuboiano nene, mia Atua rije vironiano vanlo. A tomu nalo na maka ave Ju, nalo maka avokar tuboiano nene, mia ŗeli nalo maka ajikia venia napano tuboiano naio berenio, a ver nalo amila bova, mia aŕarmaro. Jibe na, kariano joa kito robiniu robe verare ga, a mia Atua monoka tibure kito rovinuu. <sup>13</sup> Tomu nalo na amemedu ea Atua mirano, maka nalo napano amijikia ga venia napano tuboiano berenio, mia nalo napano Atua jaaro ka rivurlo, nina mia nalo napano kialo meuliano jakii vatitig bo venia napano tuboiano berenio. <sup>14</sup> Tomu tealo maka ave Ju, maka ajikia Atua kiano tuboiano, mia bekurano, kialo meuliano bo bano-o, kialo bajago jibe ka ga napano verver Atua kiano tuboiano jo bijalo ruei. <sup>15</sup> Nalo jibe ga napano venia na tuboiano jo beriio, naio joa kialo iviso ruei. Jibe na, bogo napano amijog iliano nalo reraio aberinavo jau kavan na, ŗeli jau kavan nei, kialo jidomiano novo jo ber vatitigio kalo venia na bo a venia na bova.

<sup>16</sup> Jibe napano ioluanu napano nojo nomioliolu kano berenio, bogoti na toru nei naio jo binimei, a ea bogo na, mia Atua sian van Yesu Kristo ka rivitii veve tomu nalo kialo jidomiano nalo, riva rivokar venia na amilavano joa kialo iviso, mia naio tibure tenalo napano amilaio, ba bokar naio napano aber ŗeli toro tai maka rijikiao.

#### *Kulo Ju nalo bija Atua kiano tuboiano*

<sup>17</sup> Nemialio bo ka noil lie bereio ea tivelinio na vite nalo napano kito kulo Ju roju reberenio. Kito roju reberii jumabe napano kito naruei rajakii Atua kiano tuboiano, reberiania kito naruei Atua jidom lie kito, ana mila napano kiado

jidomiano bavavin laka. <sup>18</sup> Kito roju rober ka kito romijikia vite bo ea Atua kiano tuboiano, mila roberiania kito ga romijikia vatitig Atua bija kiano tinieliano, kito ga romijikia vatitig vite nalo napano be riano a memedu bo. <sup>19</sup> Kito roju rober kito kulo Ju ga naruei bo ka kito rovuru marabo ka nalo napano maka ave Ju, kar napano rober nalo abe merebono napano maka ajikia marabo. Kito roberiania kito ga kito robe yulu ka nalo napano ajua melijokouo, <sup>20</sup> kito ga bo ka rala toro rimemedu napano milaluv marabo, kito ga romemedu ka roverloglog vatitig nalo napano ajibe kiritete nalo, maka ajikia vite.

Mo nojidom never ea vio nei, bo ka napano robitilubar ka Atua kiano tuboiano bujolou ea jikiaiano novo a ilirianiano novo nonovio ruei, mia maka rivu ka rotu rosidomii ka rover kiado ga. <sup>21</sup> A titai bereio na bova lie vo mave kano, kito rosikili ka roverloglog kulo dolu nalo, mie nemiial jibe maka rotu roverloglog vatitig kito bereio. Verver koto koioiolu ka toro ka rivina re, a bo ka jau koje kobina kia ga vo? <sup>22</sup> Jau na koju koberloglog ka toro monoka rila re siakaiano, ka venia jau bunu komilaio? A jau na kober ka tavoru napano nalo dolu amirnaukanio, nalo abova laka, jau kober be riano na, mia jau bunu, ŗeli jau koje kobina ka niogo vite nalo na abar joa kialo vio lu nalo, ina?

<sup>23</sup> Ea vio nei, monoka kito rover aua ve toru laka, bior kito tomu nalo napano rabarvar ka napano romidu Atua kiano tuboiano, mia roju romila niegeniege kiado Atua sian lu bereio, ka napano roju romila kokorov kiano tuboiano nalo na. <sup>24</sup> Iliano Lu naio berenio kiado bajago naruei, berenio jibe na, ber "Kamii tomu nalo na Atua kiano, kenemiu sibiano mila na tomu dolu nalo aju amilkue bova ea siano."

#### *Toro napano be toro Ju riano*

<sup>25</sup> Jau kober ka apakuveuso ruei, ana kobe Ju tai riano, nina bo laka. A tena mijaso verver ga jau koje komonea Atua kiano tuboiano. A ver jau kolakorov tuboiano na, jau kobe Ju ka iakurano ga, jau kobova ea Atua jibe ga nalo napano maka abakuveulo. <sup>26</sup> A ŗeli toro tai naio maka tibe ka kulo Ju nalo napano apakuveuo, naio maka apakuveuo ga, a ver toro na rimonea vatitig tuboiano nalo, ea Atua kiano vitiano naio binimei bare ka toro Ju ruei. <sup>27</sup> Toro Ju naio apakuveuo ruei a midu tuboiano, a ver naio maka rijogkario, naio monoka rivitikar vatitigio, ver makanio, Atua rivukular naio vatitig, mia rivuru toro dolu na maka avakuveuo ana napano mijogkar kiano tuboiano.

<sup>28</sup> Nina ka ea Atua kiano vitiano, nina be Ju riano, maka nana be Ju ea kuluniabene ga. A pakuveu napano Atua bitio be riano, maka nana tavio ea toro niabene ga. <sup>29</sup> Toro na Atua kiano riano, maka nana bokar ga vivitauiano lu nalo ka juñano, a naio be toro napano Niununo Lu jo miñau ea kiano iviso, napano kiano meuliano mijulu kon bo. Toro na jibe na, ðeli tomu nalo maka asidomiio ka naio be toro tai, mia Atua naio jaaro laka kanio.

### 3

#### *Tonovo na bo laka na joa Ju nalo*

<sup>1</sup> Kiniou nojorña nemil jibe nei, ðeli vikadeniano tai miyotuba, bika jibe nei, ber “Verver toro Ju be verare ga ka tomu dolu nalo, jibe ka na koje koberiio, ka venia na sio na Ju naio bo, roberiaña ka nina naio be titai? Roju romila pakuveu ea kito, ka romei rove kulo Ju riano, a ðeli na ka iakurano ga?”

<sup>2</sup> Vikadeniano na naio memedu, a neber-doþeio jibe nei neber, Makanio, robarkar sio na Ju, naio be buruñara tolu tai napano mila bo laka ka kito. Bajulukuti vabe bereio na tomu nalo napano Atua midu kiano iliano lu joa juñalo nalo? Maka nalo dolu tanea vio, mia kito kulo Ju nalo ga. <sup>3</sup> Be riano ka kiado tomu tealo nalo maka amonmonea Atua kiano iliano nalo nei, naruei vikadeniano naio jo ber jibe nei, ðeli mia Atua maka bunu riilivu ka kito tibe napano naio berkar ka rilao? A makanio, maka tibe na. Be iakurano napano tealo nalo maka avokar vatitig Atua kiano iliano, mia Atua maka rijikia leleio tuvan bogo tai kiano verikariano na ban kito. <sup>4</sup> Peli kito tomu nalo romila sibi bogo nonovio, a Atua naio be riano bogo nonovio jo, jibe na napano Parinio Tubo Teviti naio ber ea Niosi na Iouano nalo, napano ber

*Mia nalo aialio napano jau kobe riano ga ka kanamo iliano nalo ka kotiburelo,  
a mia nalo ajidom atibureso bereio, mia jau komemedu ga koje. Iouano 51:4*

<sup>5</sup> Kiado tokoriano nalo bova ga, a titai napano bo kija, tokoriano nalo na amila meravo ea tomu nalo miralo ka Atua kiano tuboiano nalo napano juko vio ka tokoriano nalo na, nalo amemedu mia amemedu. Kiniou neber jibe na, ðeli mia kelvovu nalo tai atumolu averinavo “A verver kiado tokoriano nalo amila tenalo na bo nei, ka venia Atua tinien jer kito jidom sian vironiano van kito bereio riviorio?” Mia makanio, nina toro kiano jidomiano ga, <sup>6</sup> maka tibe na leleio! Verver Atua naio maka tibure kito kulo Ju, ðeli maka rivu ka naio tibure kulo dolu napano

maka ave Ju, mia makanio, naio memedu a naio takurano ga be natibureano.

<sup>7</sup> Vikadeniano dolu jibe nei mijikia rimej bereio, napano naio ber jibe nei, berinavo “Beamu neber nomonea Atua, mia iorou maka neiyago ka naio, naruei jibe nojo nemila sibi ga. Mia kiaku sibiano na jo berialio ka Atua kiano iliano ga be riano, a jibe na jo rila siano ka rivavin. Ana ver tibe na, ka venia naio jidom to tibure kiniou kia na vo ka nobova?” <sup>8</sup> A mia tomu nalo dolu aviligvilig iliano kinkin nalo tibe na riva vova lie vo, nalo aver “Verver bajago va berialio ka Atua kiano iliano be riano, bo ka kito rotu raladu bogo nonovio ka rala kariano ve miroano, ka rila Atua kiano iliano ve riano lie vo.” Nalo tealo beber nojo nomioliolu ka jibe nei, a nina be sibiano ga, a nalo na napano aju aber, mia nalo avar vironiano rimemedu ka kialo iliano va nalo nene.

<sup>9</sup> Kiniou nejidom navan bere ea tena roju roberio, na rober toro na bar sio na Ju, mia tumñabe ka naio? Peli tomu tealo be kialo vikadeniano ka mia bo lie ka naio jovulu toro napano maka rivar sio na jibe na, ðeli makanio? Bo ga, kiaku verdoþeiano, neber maka tibe na. Jibe ka napano neber ruei, kulo Ju nalo bija kulo Kiriki, abiniu aju yetano ka moroano na kariano bare ga. <sup>10</sup> A jibe ka iliano nalo na niosi lu aberenio,

*Maka lele toro tai na kiano meuliano memedu.*

<sup>11</sup> *Makanio, maka toro tai na bitilubar mñarabo,  
maka tai na jo milavio jikili ka rial Atua ea kiano meuliano.*

<sup>12</sup> *Tomu nalo ajitete den mñarabo na memedu,  
nalo abano bova laka,  
maka lele tai na miñau memedu bo. Iouano 14:1-3*

<sup>13</sup> *Kialo iliano nalo bova, jibe tanunu na jono,  
buruminalo aju amimñauka sibiano nalo,  
ililelaniano nalo aju amiyotuba ea kuluniolo nalo, jibe ka maro va naio jerbin toro. Iouano 5:9*

<sup>14</sup> *Riano ga, niolo ju bujo ka ilikakarioano va bija ilijaleleiano nalo ga. Iouano 10:7*

<sup>15</sup> *Jaalo nalo aju abarlo ajikiti jan ea vio ka ala burukija riou,*

<sup>16</sup> *kanalo ieliano nalo aba amila bulag vite nonovio, amila tomu nalo amijog bova.*

<sup>17</sup> *Maka asidom asidomii ka mñarabo tai na tumñaro jo, Ais 59:7,8*

<sup>18</sup> *miralo maka leleio abitilubar ka Atua naio jo bitikarlo. Iouano 36:1*



<sup>19</sup> Ee, iliano nalo na amiyotuba ea Atua kiano tuboiano, a kito romijikia ka venia napano Atua kiano tuboiano berenio, naio jo jiloglog kito kulo Ju. Kito roju yetano ka tuboiano na, a toro na bitilubar venia na tuboiano na berenio, naio maka bunu iliano ka verenio, naio mijikia ka yetemeriba reraio amila kokorovio, monoka aviniu ka avar vironiano kanio. <sup>20</sup> Maka toro tai rijogkar ka tuboiano na Atua kanano rivare ka naio rimemedu ka Atua mirano, a tuboiano na mila na abiniu amijikia vatitig ka kariano joalo.

<sup>21</sup> Jibe ka, m̄arabo na monmoneano ea tuboiano, maka toro tai rijikia takii rivanvano-o rimei rimemedu ea Atua mirano, a nina mila na Atua mial bo ka naio mila vatitig m̄arabo vou dolu tai napano romijikia ratakiio.

Marabo vou dolu na naio bo laka, bior napano maka ve kiano tuboiano nalo napano mia toro monoka rijogkarlo. Marabo na, ilivivitauiano lu moruo nalo bija naveialiano nalo kialo iliano, nalo aberiio ruei tertelisu beamu nua, a vonganei Atua berialio ka kito ruei.

<sup>22</sup> A m̄arabo nene jibe nei: naio be m̄arabo na moneano. Jibe na, toro kei napano biekoou ea Yesu Kristo, mia Atua rila naio rimemedu ea naio mirano kario. Marabo na maka ve tena tomu tealo ga, a tena tomu nonovio, <sup>23</sup> ka napano abiniu amila kariano, maka tai na kiano meuliano rimemedu rivokar jeleig meuliano novo napano Atua jidomio.

<sup>24</sup> Mia bo ga, bior Kristo Yesu naio bulu bulag kito ruei, mila na Atua rila kito romemedu ea mirano, jibe ka jidomiano tai napano naio jian ban kito, binimej ea kiano tinieseseiano ga. <sup>25</sup> Naio bulu bulag kito ka napano Atua bitirilar naio jibe ka sida napano kiano burukija miou ka sekou bulag kiado kariano nalo kito napano romonea naio.

A jum̄abe ka tomu nalo na jikar yuka nalo re nua binimej, bogo na Yesu maka rimei vo? Maka reialio napano Atua rije vironiano vanlo ka kialo kariano nalo, ana p̄eli be jidomiano ka p̄eli Atua mije vironiano na kariano na tomu tealo ga, a tomu tealo maka rije vironiano na kialo kariano? Mia makanio, nina maka river tibe na. Bogobe nua ruei, na Atua jo mila kiano jidomiano tebievi ga, a jo jokoko vio ka kiano tiniememiano, a naio mila jibe na ba bokar bogo na Yesu m̄aro ka kialo kariano na re nua bunu. <sup>26</sup> Jibe na, Atua berloglogial ka kito vonganei ka naio miñau memedu bogo nonovio ga, mila na

toro kei napano balea ga Yesu, mia naio meravo rivu ea mirano.

<sup>27</sup> Ver tibe na, mia kito romijikia ravavar ka kito kar venia bereio? Maka titai, bior venia mila kito robo bija Atua bereio? Maka bajago na bo na jogkariano na kiano tuboiano napano rojidomii ka romila, mia maka leleio, bulapati nene, kiado moneano ea Yesu ga. <sup>28</sup> Kenememi iolioluano aber jibe nei vonganei, ka toro rimei rimemedu ea Atua mirano, joa ga naio kiano viekoouiano ea Kristo. Naio maka rijikia balea kiano iñauano novo nalo, napano naio rijogkar rivu tuboiano nalo nonovio na kulo Ju nalo kialo bogo nonovio, kar napano maka toro tai rijikia rila tibe na.

<sup>29</sup> Jibe na, romial napano Atua maka ve kiado Atua ga kulo Ju nalo, a be Atua na kulo dolu nalo bunu. <sup>30</sup> Ee, Atua naio takurano ga, a be tomu nonovio kanalo, a verver toro Ju, naio mijikia rimei rimemedu ea Atua mirano verenio ga riviekouo eaio, a p̄eli verver toro napano maka ve Ju, naio bunu mijikia rimei rimemedu ea Atua mirano verenio ga riviekouo ea naio.

<sup>31</sup> Ana iliano nalo na maka river ka bajago na viekoouiano ea Yesu rivuku bulag Atua kiano tuboiano moruo napano ju, ka naio maka bunu kiano iñauano ka rilaio. Naio maka river tibe na, naio ber ka bogo napano roju romonea Yesu, roju rabamenea vatitig tenalo napano tuboiano nei naio berenio, roju romilaio be riano.

## 4

*Epraamo barkoro yeturu jiloglog m̄arabo na viekoouiano ka kito*

<sup>1</sup> Roju roberii jibe ka bajago na viekoouiano ea Kristo naio ga be m̄arabo na robokar iouriano, a jum̄abe ka korobido nalo re nua, jibe korobido na toru nei ea kiado yati na tormoruo Epraamo? <sup>2</sup> Naio mila iñauano novo telabo napano Atua jaaro kanio, a iñauano nalo nene na maka ala naio rimemedu ea Atua mirano. Verver naio rimei rimemedu kar kiano iñauano, p̄eli naio mijikia rivarvar ka naio bereio, mia maka tibe na. Maka toro tai napano mijikia rivarvar ea Atua mirano bior iñauano napano naio milaio, <sup>3</sup> a viekoouiano ga mijikia rila toro rimemedu vija Atua, jibe ka napano Epraamo kiano tukunuano naio berenio ea Niosi na Tiano, napano berenio

*Epraamo naio biekoouo jikili ea Atua kiano verikariano nalo,  
ana Atua jaaro, midu Epraamo kiano viekoouiano na,*

*mila naio binimeí memedu bo ea mirano kario. Jen 15:6*

<sup>4</sup> Kosidomii vonio, ver toro na mirñauka veru, bogo na siberio burukorovio naio monoka rivar kiano veru. A kito rover re ka veru nei naio be jidomiano tai napano kiano toro na toru jian ban miyotuba ea tinieno vu, mia veru nei, toro na mirñau nei naio mirñau jikili kanio, nina naio memedu ka rivar ve kiano.

<sup>5</sup> A tivelinio ka toro rimeí rimemedu ea Atua mirano, naio maka ve titai tibe veru napano romijikia roirñaukanio, napano romijikia rover tibe titai napano kito ga romijeivio be kiado. Kito, kiado irñauano nalo abova ga, tenena monoka ravalea Atua, napano naio ga mijikia rivar bulag vovaiano ea kiado meuliano. Verver ga ravalea naio, mia naio rila kito romemedu ea mirano.

<sup>6</sup> Tormoruo Burubati Parinio Tubo Teviti naio mijikia tena nua ruei, mia kiano iouano tai berii juñabe mia rivu laka ka toro napano maka rivalea kiano irñauano nalo bereio, mia balea ga Atua ka mia naio saaro ka rila naio rimemedu ea mirano. Iouano nene ber jibe nei, ber

<sup>7</sup> *Toro na Atua biekokoa kiano vovaiano nalo, napano miolkon bulag kiano kariano nalo, naio be ilivuiano tai napano mia bo laka kanio.*

<sup>8</sup> *Toro napano Atua mial naio jibe ka napano maka bunu miamiamo tai toaio, napano monoka rivakar vironiano kanio, mia naio mijikia rijog rivu mia rijog rivu. Iouano 32:1,2*

<sup>9</sup> Ana nalo napano amijikia ajog rivu jibe napano iouano nei berenio, nalo kei na? Ilivuiano nei, mia maka rijikia rimeí ea tomu na apakuveulo ga, jibe kito kulo Ju ga, a mia rimeí bunu ea nalo na maka ave pakuveulo. Nina meravo bo, bior jibe ka napano roberii, Epraamo binimeí memedu ea Atua mirano, maka ka napano naio be pakuveu ga, a binimeí memedu ea Atua mirano ka napano ga naio baleaio jikili.

<sup>10</sup> A kito romijikia tena juñabe? A Atua naio ber Epraamo naio memedu ea mirano ea bogo vabe? Naio berenio ea bogo napano Epraamo naio be pakuveu ruei, ðeli berenio ea bogo napano naio maka ve pakuveu vo? Verver ravan bereio ea kiano tukunuano, mia reial ka Atua ber mia Epraamo memedu ea mirano bogo na naio maka ve pakuveu vo.

<sup>11</sup> Jibe na, Epraamo kiano viekouo-iano ea Atua, naina ga mila naio memedu ea mirano. Ea bogo neibano, naio maka ve pakuveu vo, a iorou, Atua jian pakuveu ban naio jibe kijokijo tai napano berial ka viekouoiano ea Atua ga be rñarabo ka toro rimeí memedu rivijaio.

Epraamo naio be toro na beamu napano jibe nei, ana tomu telabo abinimeí iorou napano maka ave pakuveulo ga, a nalo amonea Atua ana Atua mialo jibe amemedu ea mirano kanio. Nalo maka amoluo memedu ea Epraamo kiano torogio, mia vonganei nalo aju amial naio jibe naio be korobilo tai bunu, <sup>12</sup> be verare ka naina be korobilo napano aju amila pakuveu kalo.

Beamu kito kulo Ju nalo roberiañna toro napano be pakuveu jibe tormoruo Epraamo, be riano ka miyotuba ea kiano torogio. Mia vonganei, jidomiano vou tai moluo napano jibe nei, berinavo toro napano mijikia river ka Epraamo be korobinio riano, nina toro napano naio biekouo ea Atua be verare ka Epraamo naio biekouo ea Atua, bogo napano maka rive pakuveu vo.

*Toro kiano viekouoiano mila Atua kiano verikariano binimeí be riano*

<sup>13</sup> Nua nua beamu Atua berkar ban Epraamo ka mia kiano ilivuiano nalo amaluvo ea naio vija kiano torogio nalo, avan ea tomu nalo na yetemeriba reraio. Ana ka venia Atua jaaro ka rila verikariano nei van Epraamo? Maka ka napano Epraamo mijogkar vatitig kiano tuboiano, bior ka bogo napano Atua mila verikariano na, maka tuboiano to vo, bogo na Atua jian tuboiano ban Mosis naio jo koalavo kia ga. Jibe na, romijikia rover ka Epraamo kiano viekouoiano ga mila naio memedu ea Atua mirano, ana Atua jaaro ka sian verikariano novo nei rivanio. <sup>14</sup> Verver verikariano na ve tomu nalo na aju amijogkar tuboiano ga, mia rila ka toro napano moneaio, rimoneaio ka kurano, mia rila ana Atua kiano verikariano sikili re tu. <sup>15</sup> Mia bereio, titai dolu mila meravo ka kito berenio Atua kiano verikariano novo nalo maka ajikia amaluvo ea bajago na jogkariano ea tuboiano. Nina bior ka bogo napano tuboiano jo, bajago na lakoroviano na tuboiano monoka riyotuba, a iorou kanio, monoka vironiano tai kanio, ka napano maka toro tai napano jilimebi ka rilakorovio tuboiano bogo tai.

<sup>16</sup> Jibe na, tuboiano maka rijikia rijai kito ka kiado vovaiano nalo amei memedu ea Atua mirano, mia Atua kiano tinieseiano laka ea kito ana naio ga milaio. Naio

mial ka roju ban naio, ka rabalea naio ga, ana naio mila robokar kiano verikariano nalo na bo. Nina maka Ju nalo ga napano tuboiano binime ealo beamu ruei, a tomu dolu nalo bunu napano amiasolo. Nalo abe tomu na vio ninio, a ver abar bajago na amonea Atua bare ka Epraamo monea naio, naina jibe napano nalo bunu amiyotuba ea kiano torogio. Mia bunu, kito robinu ea taara na namoneano nalo ea yetemeriba reraio roju romial naio jibe korobido na toru.

<sup>17</sup> A nina memedu ga ka venia napano Atua berkar ka Epraamo nua ruei, napano berkanio berinavo

*“Kiniou nebitiri larso, jau kobe burupati na torogio na tomu nalo na venuo miroano.” Jen 17:5*

Bogo napano Atua berkar jibe nei ban Epraamo, Epraamo maka rimemebiju, a bokar vatitigio bo, kar napano naio mijikia ka Atua nei napano mil banio, naio be Atua napano mijikia rila venia napano n̄aro rime rimeul, mijikia tii venia napano maka to, rimaluvo. <sup>18</sup> Be riano, Atua ber titai kanio napano jikili laka ka rimoneaio, bior berkar ka naio, berinavo

*“Kiamo torogio nalo mia ave miroano mia ave miroano laka ea yetemeriba nei.” Jen 15:5*

A bogo na Epraamo mijogio, naio mon-eaio jikili ka mia monoka tibe na ga naruei. <sup>19</sup> Ea bogo nei, naio mijikia ka naio bija koano tira Sera, kialo m̄erenio vaatara ka rijoru naruei, napano kiano yuka bokar toromomou [100], a koano tira maka lele rivar tete kija vo, mia kiano viekouoiano maka leleio rijoru.

<sup>20</sup> Naio maka sidomial titai mia kiano jidomiano jua ga venia napano Atua berkario. Kiano viekouoiano jo binimei jikili lie, a bogo nonovio jo miaia Atua a ber siva toru kanio ka venia napano mia rilaio. <sup>21</sup> Naio maka lele sidomii bogo tai river p̄eli Atua maka rivare ka rimauka takii kiano verikariano, <sup>22</sup> a kiano bajago na viekouoiano nei naruei mila na Iliano Lu berial naio bereio, berinavo Epraamo biekoou ea Atua, naruei Atua berial ka naio memedu bo ea mirano.

<sup>23</sup> Ana iliano nei berial Epraamo naio takurano ga, <sup>24-25</sup> mia bo ka rodu tibe iliano tai napano berii kito nonovio, kar napano kito bunu romonea Atua ka mia naio rila kito romei romemedu ea mirano tibe napano naio mila ka Epraamo. Kito romonea ka naio naruei napano miila Yesu binime ka rivokar m̄ariano kar kiado kariano nalo, a romonea ka Atua naruei midular Yesu den nam̄ariano ka rila rimeravo rivu ka kito romerevu bereio bija naio na ruei.

## 5

*Kito romerevu bija Atua bereio ruei, remil tum̄aro a saariano*

<sup>1</sup> Bo ga, vonganei naio meravo bo ban kito ka tenalo napano mila kito romerevu bereio bija Atua, naio be kiado viekouoiano ea venia napano Yesu mila ka rijai kito. A bogo napano romijikia ka romerevu bija Atua jibe na, mila napano romial ka tum̄aro jo iviso ka kito bija naio, <sup>2</sup> a mila napano roju bo joomo ea kiano tinieseseiano bogo nonovio. Jibe na naruei, kiado jidomiano jikili ka iorou, mia monoka rove togio joomo ea Atua kiano mermerano, mia rasaaro laka.

<sup>3</sup> Mia maka rasaaro ga ka meuliano novo nei napano mia rime iorou, mila rasaaro bunu ka bogokouo napano roju robiviuo vonganei. Peli romijog bova, mia rasaaro ga ka napano romijikia ka jogvaiano mijikia rila jidomiano rive tebievi lie, <sup>4</sup> a jidomiano tebievi rila bajago rime rivu laka lie ea Atua mirano, a bajago nei bo rila baleano ea Atua rime lie vo, <sup>5</sup> a baleano ea Atua rila kiado jidomiano maka rijikia rijoru leleio kar titai bogo tai. Nina bior ka Niununo Lu napano naio jian ban kito, bogo nonovio jo mison vatitig Atua kiano burum̄ara tinietiano ba joomo ea kito banbano-o kito robujo vatitig eaio.

<sup>6</sup> Romijikia ka Atua naio tinien jii kito laka jibe na naruei bior napano nua, romijoru ea p̄ili tai napano maka rejikia rala titai bereio ka rijai kito, mia memedu ka kiano bogo napano naio bijauialario, naio miila Kristo binimei n̄aro kar kito tomu va nalo.

<sup>7</sup> Ea kito, maka roial m̄elea napano toro tai mijikia rijamo ka kiano meuliano ka rilarur toro dolu kiano meuliano, p̄eli bogo terakurano ga toro tai mijikia rijamo ka kiano meuliano ka rilarur toro tai napano aberiam̄a naio bo laka, mia tena naruei Yesu mila ka kito nonovio napano kito tomu va nalo ga. <sup>8</sup> Atua kiano tinietiano toru laka jibe na naruei, kar bogo napano kito tomu na kariano nalo roju parido jikili kia ga, Kristo binime n̄aro kar kito. <sup>9</sup> Kiano burukija miou jekon kito romeravo ruei, ana robinime romemedu ea Atua mirano a mila napano maka bunu titai toa kito napano naio mia ridu vironiano van kito kanio. <sup>10</sup> Nua, bogo napano kito robe Atua kiano uolu kia ga, kenerinio kiano m̄ariano mila kiado merevuiano bija naio, a vonganei, kar napano romila bilbilu bo bija Atua ruei, mia kenerinio kiano meuliano mila kito bunu romeul to to dar̄ariga. <sup>11</sup> Jibe na naruei, kito rajaaro laka napano Atua bitirilr kiado Tubo Yesu Kristo, kar napano naio rila kiado m̄arabo

na merevuiano vija naio, rotu vio takurano vijaio bereio.

*Atam mila m̄ariano binimeī, Kristo jian meuliano*

<sup>12</sup> M̄ia tenalo juo nei m̄ariano bija meuliano, naljuo abinimeī ea yetemeriba jum̄abe? Toro na beamu ea yetemeriba naina Atam, a naio be toro na beamu napano mila kariano, a mila vironiano na kariano, jibe m̄ariano, monoka rimaluvo ea yetemeriba. M̄ia tomu nalo napano abinimeī iorou, nalo bunu abokar kariano, a m̄ariano bokar nalo abiniu bunu.

<sup>13</sup> Beamu nua, ea Mosis kiano bogo, Atua maka sian tuboiano vo, mia be iakurano napano maka tuboiano, bajago na kariano jo ruei. Jibe na naruei, Atua maka tiburelo ka bogo na ka nalo amila kokorov kiano tuboiano, kar napano ea bogo na, tuboiano makan vo, mia kialo kariano nalo naruei mila na monoka avar vironiano na m̄ariano navo. <sup>14</sup> Romijikia ka jibe na, bior napano jikar ea bogo na Atam, binimeī bokar Mosis kiano bogo, maka tuboiano, mia tomu naloaju am̄arm̄aroga, kar vironiano na kariano jo ruei ea yetemeriba. Peli tealomila bova jibe Atam milaio, p̄eli amila todolu nalo, mia ea Atua kiano vitiiano, kialo vovaiano nalo nene abiniu abe kariano be verare ga.

Jibe na ga, romial ka venia napano toro takurano na ga Atam milaio, bokar tomu nonovio kialo meuliano ea yetemeriba, jibe ka ga venia napano Kristo naio takurano mila iorou, naio bunu bokar kiado meuliano robiniu napano romoneaio.

<sup>15</sup> M̄ia iñauano novo na Atua milaio napano maluvo ea kiano tinieseseiano naio bo laka, mijikia tovulu iñauano va napano Atam milaio napano maluvo ea kiano kariano. Atam kiano kariano naio takurano mila tomu nalo monoka am̄arm̄aroga, mia Yesu Kristo kiano tinievuiano naio takurano mila kito romemedu ea Atua mirano. Tenei jibe jidomiano vu tai napano kito romidu ga jibe na ga. <sup>16</sup> Atam kiano kariano na maka rila titai rivu leleio, mia jidomiano nei naio bo laka ka kito. Atua jibure toro takurano nei kiano kariano, naio ber ka kiano vironiano rivan ea tomu nonovio, a iorou, Atua mial jidomiano napano Yesu jian ban kito, napano bulu bulag kiado kariano nalo, ana berenio ka kito romemedu bo ea mirano bereio.

<sup>17</sup> Be riano napano toro takurano kiano kariano ga, nina Atam, mila nam̄ariano jo juvulu kito, napano mia mijikia rivar bulag tomu nonovio kialo meuliano. Mia iorou, toro dolu kiano tinievuiano, nina Yesu Kristo, jian jidomiano novo nei ban

kito napano vonganei, romemedu ea mirano Atua, a rojuvulu m̄ariano ruei, a mia iorou robokar meuliano novo vija naio. <sup>18</sup> Ver tibe na, berial ka kariano takurano neibano Atam kiano midu tomu nonovio ajua vironiano, mia iorou, Yesu kiano iñauano memeduo tai mijikia rivuru bulag nonovlo den vironiano nene a ridulo atua meuliano napano maka rijikia ribisi bogo tai. <sup>19</sup> M̄ia ber bereio ga, toro takurano parinio jikili, maka riagago ka Atua, ana mila tomu nonovio abe tomu na amila kariano, mia iorou, toro dolu miagago ka venia napano Atua berenio ka naio, ana m̄aro ea m̄akolkolo mila ka kito ve miroano romei romemedu rivu ea Atua mirano.

<sup>20</sup> Nua, Atua jian tuboiano ban Mosis, mia tuboiano nene jo berial ka tomu nalo ka kialo kariano nalo ju bujo laka. Mia bogo napano kariano naloaju abinimeī miroano lie bogo nonovio, Atua bulu ban lie vo, mila napano kiano tinieseseiano binimeī toru lie vo. <sup>21</sup> Beamu, kariano buru m̄ariano binimeī, mia m̄ariano nene na naio jo mila kariano jo juvulu bogo nonovio. M̄ia iorou, Atua mila kiado m̄arabo ka romei memedu ea mirano, mia nina mila ka vonganei kiano tinieseseiano naio juvuluio, kar napano jo mila ka kito rovinu napano romonea Tubo Yesu Kristo, mia rovokar meuliano napano maka rijikia ribisi.

## 6

*Bo laka ka kito robisi ka kariano, kito romeul vija Kristo*

<sup>1</sup> Jibe ka napano neber vonga, kito robe tomu nalo na romila kariano, mia Atua tinien jii kito biekokoa kito. Ana ka nina, bo ka kiado meuliano vonganei mia tum̄abe? Peli tomu tealomila abe mia bo ka rotudu ka rola kariano ve miroano, ka rila mia Atua kiano tinieseseiano bunu to rimeī lie bereio ka naio todoka riviekokoa kiado kariano nalo nei? <sup>2</sup> Mia makanio, maka rijikia tibe na leleio! Kito romijikia rover ka tivelinio na sidomiano va na laiano na kariano, kito rojibe tanunu, monoka robisi ka naio na ruei, bo ka rotu re rolaio.

<sup>3</sup> Kosidomii vonio bogo napano abaruei ea kito ka rove takurano vija Kristo Yesu. Ea bogo na, venia napano maluvo ea kito bare ga ka venia napano maluvo ea naio nua ruei. Jibe beamu, naio m̄aro bior kiado kariano, a vonganei, bogo napano abaruei ea kito, kiado meuliano moruo na kariano bunu naio monoka rim̄aro. <sup>4</sup> Beamu, nalo atuvan mokotenano mon

luku ea vio na m̄ariano, a vonganei, bogo napano abaruei ea kito, monoka rotuvan bajago na kiado kariano nalo, a bo ka robisi vatitigio eaio. Mia beamu bunu, Atua mila in̄auano na iloiano napano mila Kristo meul bereio, a vonganei, bogo napano abaruei ea kito, rojumolu bereio ka roiel ea meuliano vou tai.

<sup>5</sup> Jibe na, kito robe takurano bija Kristo ruei kar napano naio juvan kiano meuliano ea yetemeriba nei naio m̄iaro, a kito bunu monoka rotuvan kiado meuliano moruo nalo. A romijikia be riano ka mia rove takurano vija naio bereio navo, kar napano naio midu bereio meuliano vou tai, a mia kito bunu rodu kiado meuliano vou.

<sup>6</sup> Mia kito monoka rosidomii bogo nonovio, ka bajago na laiano na kariano napano romoluo bijaio, jibe napano ajuku kakario joa m̄akolkolo bija Kristo. Tibe na, naio mila na maka bunu rala kariano nalo napano mokotenado ajidom ala, a kariano maka rijikia rive boru ea kiado meuliano jibe ka napano kito tomu nalo na kiano in̄auano ga. <sup>7</sup> Bo laka kito rom̄aro ka kariano ruei, mia moroano na sidomiano na laiano na kariano monoka ribisi ea kito, bior rojibe ka tanunu napano sidomiano va na kariano maka rijikia rila titai ka kito leleio. <sup>8</sup> Be riano ka beamu, jibe ka napano rom̄aro bija Kristo ruei, ana vonganei, kiado moneano jikili ka mia rotu romeuil vija naio rivano.

<sup>9</sup> Kito romijikia ka bogo napano Atua mila Kristo meul bereio den nam̄ariano, mila ka Kristo mia meul rivanvano-o mia maka rijikia leleio rim̄aro bogo tai bereio, m̄ariano kiano moroano maka rijikia rivokar naio bogo tai. <sup>10</sup> Kiano m̄ariano nua na, naio be m̄ariano tai na rivar bulag vironiano nonovio na kariano, a kiano meuliano vonganei, naio be meuliano tai napano ka ridular Atua siano, <sup>11</sup> a mia monoka tibe na ga ea kito. Monoka rosidomii ka kito bunu bo ka robisi vatitig ka bajago na kariano, a dam̄ariga monoka rodular Atua siano to mave ea meuliano vou nei napano rojuaiio bija Kristo Yesu.

<sup>12</sup> Jibe ka, kiaku iliano na temi tai ea vio nei jibe nei, ber kamiu kuvituvan re jidomiano na laiano na kariano rime tibe ka moroano na jikili tai napano to rive boru ka kamiu. Ver makanio, mokotene-miu nalo, napano nalo be tena yetemeriba nei ga, mia nalo atu aiagago ga ka sidom vovaiano na bajago napano kito tomu nalo romoluo bijaio. <sup>13</sup> A mia ver tibe na, maka rimemedu, kar torogio nalo na mokotenado, maka rivu ka amei tibe tenalo na in̄auano napano vovaiano miñau bija ka rila kiano bajago va nalo. Beamu,

kito jibe tanunu nalo, napano meuliano na Niununo maka toa kito leleio, mia vonganei Atua mila kito romeul bereio, ana monoka rodu kiado meuliano vou nei ea naio bereio ka naio rivuru ka rila kiano in̄auano. Jibe na, mia torogio na mokotenado nalo amei tibe vite nalo na in̄auano napano Atua miñau bija ka rila kiano bajago memeduano nalo.

<sup>14</sup> Nua, roju yetano ka tuboiano napano Atua jian ban Mosis, bija kiano vironiano nalo, mia romilavio ka rojogkar bano-o mia maka leleio, maka rovare ka rovokar ioruriano eaio. Jibe na naruei, Atua tinien jii kito a vonganei jo mijai kito ka jidomiano na laiano na kariano maka bunu rijikia vurudidig kito leleio.

*Kariano maka bunu vurudidig kito, mia kito tomu nalo na in̄auano na bajago memeduano*

<sup>15</sup> Neber vonga ruei ka kito maka rotu yetano ka tuboiano napano Atua jian ban Mosis kar rojev ioruriano eaio, mia nomerou ka p̄eli tomu nalo tealdo adu kiaku iliano nei riva rivova. Peli ajidomiio aberiam̄a, O, Pol jo ber ka kito maka rotu yetano ka tuboiano, mia vonganei romijikia rala venia na bova napano rojidom rola, naina bo ga na, mia Atua tinien tii kito viekokoa kito. Mia makanio, maka never tibe na leleio. <sup>16</sup> Kamiu monoka tiniemiu maio ka bogo napano toro tai ju yetano ka tubo tai, naio monoka takii tubo nene kiano iliano a monoka rime tibe kiano toro na in̄auano. A jibe na ga bunu ea kiado meuliano. Verver sidomiano va to rive boru ka kiamo meuliano, mia jau monoka kala kariano nalo napano naio jidom ka kalaio. A verver kiamo tubo naio be Atua, mia koto koin̄auka kiano in̄auano novo nalo. Marabo juo nei, tai mia rila jau vija Atua kuvitibure kamiu to tobo to, ana dolu nene mia rilaso komemedu rivu vija naio.

<sup>17</sup> Beamu, kamiu bunu kube tomu nalo na in̄auano na yetano ea moroano na kenemiu sidomiano va ga, mia siva toru ban Atua napano neberloglog kamiu, ana kamiu kumidu dam̄ariga vatitigio ea kenemiu jidomiano, kumitakiiio vatitig ea kenemiu meuliano. <sup>18</sup> Jibe na, kamiu kuvitaluvo den tubu va nei re nua, maka bunu kuve kiano tomu na in̄auano, mia vonganei kube tomu na Atua kiano in̄auano napano kumitur̄ia kumila tenalo na memedu jibe napano naio jidomio. <sup>19</sup> Nemijikia ka verloglogiano nalo nei ajikili kija kar napano toro kiano jidomiano maka tibe Atua kiano jidomiano, nina naruei mila na nemijai kamiu nemil ea kijokijo napano berii tomu nalo na

yetemeriba nei ga, jibe tubo nalo bija kialo tomu na inġauano nalo.

A kamiu monoka kuvitilubar vatitig ni-oti iliano nalo nei, ka beamu, jidomiano na laiano na vovaiano naio toru laka ea kamiu, napano ju miyuku kiki ea torogio na mokotenemiu nalo amila kariano nalo napano kirivova mia kirivova, mia vonganei maka bunu tibe na. Vonganei, jidomiano na laiano na bajago na memeduano monoka ve toru ea kamiu, napano mijikia rila ka kenemiu meuliano rimeġ ve lu mia ve lu.

<sup>20</sup> Bogo napano kumitibe ka tomu na amimġauka kariano ga, moroano na jidomiano na laiano na bajago memeduano maka rijikia riġau ea kamiu, <sup>21</sup> ana kamiu kumila inġauano va nalo. A tenalo na, maka rijai kenemiu meuliano nalo leleio, a nalo amidu kamiu kumitua nġarabo na nġariano memedu, mia vonganei, ver kuvitu kuvisidomiġo bereio, kuvimov laka ka venia napano kumilaio. <sup>22</sup> Mia vonganei, Atua naio midular kamiu den bajago na sidomiano na laiano na kariano neġbano, kubinimeġ jibe naio kiano tomu na inġauano nalo, mila napano bo laka ea kenemiu meuliano napano kubinimeġ kube lu bo ruei, a vonganei kuvitua nġarabo na meuliano na maka rijikia ribisi.

<sup>23</sup> Vuluiano napano kariano rila ka toro rijeġvio, naio be nġariano napano maka rijikia ribisi, mia kiado Tubo Yesu Kristo mila napano robokar meuliano na maka rijikia ribisi, napano maka rovulio, a naio be jidomiano tai napano Atua jianio ban kito jibe na ga.

## 7

*Kito namoneano nalo rotu re reseltano ka Tuboiano*

<sup>1</sup> Bilbilu nalo, nemijikia napano kamiu kumijikia vatitig tuboiano nalo ea kenemiu buruvenuto, a mia neberii tenalo tai ea tivelinio na tuboiano nalo nei napano mijikia rijai kiado jidomiano nalo ea tivelinio na Atua kiano tuboiano napano roju reberio.

Tenalo na jibe nei, ka ea tuboiano, bogo napano kito roju romeul kia ga vo, monoka romoneaio, a ver roġiaro, maka bunu rotu reseltano kanio. <sup>2</sup> Kosidomii vonio bajago na toro buru tira, naljuo ajoro. Ver tira tai, bogo napano koano meul kia ga jo, tuboiano jikili ka tira nei monoka to vatitig tulaka vija koano suġano nene. A bogo napano ver toro nġaro, tuboiano maka bunu riverii titai ka tivelinio na tira neġbano, ka naio monoka to tibe na koano na toro nei kia ga vo. <sup>3</sup> Jibe na, ver tira nene, koano suġano meul kia ga ana naio

ba bina ka toro dolu, mia tuboiano ber ka naio mila siakaiano. A ver koano suġano nġaro den naio ruei, tuboiano maka bunu sikili tu ka river titai vanio. Naio mijikia riva soro ka toro dolu tai bereio bo ga na, mia maka siakaiano na.

<sup>4</sup> Bo ga, bilbilu nalo, jidomiano na jibe ka kijokijo tai ga ka verial van kito ea tivelinio na tomu nalo vija tuboiano napano Atua jian ban Mosis. Nua, tomu nalo aju ajeltano ka tuboiano na, napano monoka amonea naio ka avokar ioruriano, mia vonganei, tuboiano nene naio nġaro den kito namoneano nalo. Vonganei kito maka bunu rotu roseltano ka tuboiano, a romijikia rava rotu roseltano ka toro dolu, nina Kristo napano naio nġaro kar kito. Atua burumeul ea naio bereio, mia rila ka kito tarati nene nalo mia rovar nġarati nalo na bo bo laka napano naio jidomio.

<sup>5</sup> Beamu, bogo napano roju rojeltano ka bajago va kiano moroano napano abar kito bijaio, kiado sidomiano va nalo amimġau ea mokotenado, amila romila kariano telabo. A bogo napano romijikia ka Atua kiano tuboiano naio jo juko vio ka kariano nalo nei, ber ka kola re nina, kola re nina, tenena mila kiado sidomiano va nalo abavavin lie. Jibe na naruei, tuboiano na verbureiano na bajago va nei ju mila ka kito rovova lie, a midu kito roju nġarabo na nġariano memedu. <sup>6</sup> Tuboiano na bokar jikili kito jibe na, mila robinimeġ robe tomu nalo na inġauano kurano na tuboiano moruo nalo napano abivitauialo nalo miroano aju. Mia vonganei, roġiaro vatitigio ea nġarabo nene, rojaluvo denio, ana robinimeġ robe tomu na inġauano kurano ka nġarabo vou novo nei Niununo Lu kiano.

<sup>7</sup> Ana kamiu kumisidomii juġnabe ka kiaku iliano nei, napano neber Mosis kiano tuboiano ju mila kiado sidomiano va nalo abinimeġ abavavin lie? Peli kamiu kuvitu kuvisidomii ka jibe nei kiniou nojo neber ka Atua kiano tuboiano bova?

Mia makanio, maka never tibe na, kar napano tuboiano kiano inġauano novo ka rilaio. Verver maka tuboiano, mia maka rejikijika ka navurikoroviano na tuboiano naio juġnabe. Jibe tuboiano ber jikili berinavo "Tiniem tii re tomu dolu kialo saba" a ver tuboiano maka riverenio, mia maka rejikia tinietitiano naio be venia, pġeli tinietitiano naio be bajago na bova juġnabe. <sup>8</sup> Riano ga, bogo napano tuboiano juko vio ka tinietitiano nei, vonganei ana jidomiano na lakoroviano na tuboiano jumolu mial vio tai ka sel eaio, mila tinietitiano nalo abinimeġ telabo joomo ea kito. Jibe na, tuboiano kiano inġauano ju, ka ver maka tuboiano, mia maka rejikia

rovitilubar bajago va na laiano na kariano napano abar kito bijaio.

<sup>9</sup> Jibe beamu, maka nejikia tuboiano, ana maka nosidomialio, noju jibe na ga. Mia iorou kanio, nebitilubar ka tuboiano ber ka "Jau tiniemo tii re tomu dolu kialo saba," ana vonganei nobitilubar naruei ka nojo nomila korovio tuboiano, <sup>10</sup> a nobitilubar ka monoka novar vironiano riviorio, nãriaro.

Jibe na, bajago na moneano ea tuboiano naio maka ve nãrabo na vokariano na meuliano, mia tuboiano binimej jibe nãrabo na nãriano na kanado ruei. <sup>11</sup> Beamu, roberiarãa tuboiano naio be nãrabo na meuliano, a nina kiado jidomiano va na laiano na kariano napano mila lelan kito ga, mila rosidomii tibe na. Mia maka tibe na, ka napano romila korovio tuboiano nene, ana midu kito rojoo nãrabo na nãriano ruei. <sup>12</sup> Naina naruei inãuano napano tuboiano jo milaio, a maka never ka bova, kar tuboiano nei be lu mia be lu, a kiano iliano nalo amemedu a abo.

<sup>13</sup> Ana pëli mia tealo avika vikadeniano, averinavo ver be riano ka tuboiano be tonovo tai, a jumãbe jo mila tomu nalo monoka avokar vironiano na nãriano? A makanio, maka never ka tuboiano na mila kito monoka rañaro, mia kiado jidomiano va na lakoroviano na tuboiano nei, naio ga milaio. Iliano na tuboiano nalo abo, mia bogo na kiniou nemila kariano, kiniou ga nojo nomidu kiniou nojua nãrabo na nãriano. Verver maka tuboiano nei, mia maka rejikia ka kariano naio be venia, a mia maka rejikia venia na bo a venia na bova. A bogo napano tuboiano jikili ju, mila meravo bo ka kito ka bajago na laiano na kariano napano jua kito, bova mia bova.

*Tivelinio juo amila siniabu joomo ea tomu nalo kialo jidomiano*

<sup>14</sup> Jibe napano neber, Mosis kiano tuboiano be lu laka, maluvo ea Atua kiano Niununo, a nemial napano kiaku bajago maka lele ve lu, nojo nominau jakii kiaku sidomiano va nalo ga. <sup>15</sup> Tenalo na bova napano nojo nomilaio, maka nejikia vatitigio nojo nomila jumãbe, pëli nemila kario venia, bior tenalo novo napano nojidom nala, maka noto nalaio, mia tenalo na bova napano maka nosidom nalaio, naina naruei nojo nemilaio.

<sup>16</sup> Naina naruei neber ka Atua kiano tuboiano bo, kar napano monoka tuboiano tai to ka tokovio ka kiaku vovaiano nalo na, napano jibe ka neberio ruei, maka nosidom nalaio, a nojo nomilaio

ga. <sup>17</sup> Jibe na ga naruei, maka kiniou napano nosidomii ka nala vovaiano nalo nei, mia bajago na sidomiano na laiano na kariano napano jo minãu toru ea kiaku meuliano, naio naruei jo milaio. <sup>18</sup> Mia kiaku bajago na sidomiano na laiano na kariano na, maka neial ka naio rila tonovo tai vo na joa kiaku meuliano. Bogo telabo kiaku sidomiano naio ber monoka nala saba memedu, a iorou kanio, maka bunu nalaio.

<sup>19</sup> Naina naruei jibe nãria nojo nebernio: maka noto nala tonovo nalo napano nojidom nalaio, a vovaiano nalo napano maka nosidom nalaio, tenalo na naruei nojo nomilaio. <sup>20</sup> A verver noto nala vovaiano nalo napano maka nosidom ka nalaio, naina berenio ka kiniou maka nala rivu na, todolu tai jo miyuku ea kiniou ka nalaio, naina bajago na laiano na kariano napano joa kiaku meuliano.

<sup>21</sup> Bajago na laiano na kariano neibano, nemialio jibe tuboiano na jikili tai bereio napano jo minãu ea kiniou. Pëli bogo tealo nojidom nala tonovo tai, mia jidomiano va jo vaataro ga, milavon ka rivuru kiniou navan vova bereio. <sup>22</sup> Bogo telabo, ea kiaku jidomiano kiniou takurano, nojo nojidomii vite nalo na Atua berenio, a nemial kiano iliano nalo abo laka, <sup>23</sup> a nomijog ea kiniou jibe iliano dolu tai bereio naio bunu jo mil. Nina bajago na kariano, napano jo miyukyuku kiniou ka noto neseltano ka moroano na kiaku sidomiano va nalo. Jibe napano kiaku sidomiano va nalo nei, ajua mokotenaku, aju amila burunãara mira bija kiaku sidomiano novo nalo napano nalo ajua kiaku jidomiano.

<sup>24</sup> Tomnei, sidomiano novo bija bajago va, naljuo aju amila baravo ka naljuo ea kiniou jibe na, kiniou nomijog bova, nemial kiado meuliano ea yetemeriba na vokariano na nãriano nei jikili laka.

A mia kei naruei mia mijikia rijai kito, kei mia mijikia rivar bulag kito den jogvaiano nei? <sup>25</sup> Kiado meuliano jikili kija, kar napano ea tivelinio tai, kiado jidomiano jidom rimonea Atua kiano tuboiano, a ea tivelinio dolu nene, bajago na laiano na kariano jo minãu ea mokotenado.

A riano ga, siva toru ban Atua, kar napano naio mila Yesu Kristo kiado Tubo binimej, napano mia rijai kito, ridular kito den jogvaiano neibano, a rilalur kito.

## 8

*Meuliano novo bija Niununo Lu*

<sup>1</sup> Kristo Yesu binimej ka rilurur kito, naruei mila ka kito napano kiado meuliano jo bo bija naio ruei, mia Atua maka leleio rijikia ridu vironiano van kito bogo tai.

<sup>2</sup> Nina kar napano beamu, kito rojua meuliano va tai napano bajago na kariano bavavin a napano berkar m̄ariano ban kito, a iorou, Yesu Kristo midu kito rajaluvo meuliano na, midu kito rojua m̄arabo vou dolu tai napano romijikia rovokar meuliano nabo napano Niununo Lu jiano.

<sup>3</sup> Tomu nalo amila vio ka amonea vatitig Atua kiano tuboiano ka avokar ioruriano eaio, a maka ajikia ala kar toro parinio kirisikili laka. A venia napano maka ajikia alaio, Atua naruei milaio. Naio miila kenerinio Yesu binimej ea yetemeriba, mila mokotenano a kiano meuliano, be verare ka kito tomu na kariano. Mia Yesu binimej mijamo ka mokotenano a kiano meuliano nei jibe sida tai ka uelar vironiano na kiado kariano. <sup>4</sup> Vironiano na kiado lakoroviano na tuboiano, naio ga bario, mila kito romemedu ruei ea Atua kiano vitiiano, naruei maka bunu roiel ea bajago napano kariano jo buru didig lelan kito, a romijikia roiel ea bajago napano Niununo Lu jo buru vuru kito ga eaio.

<sup>5</sup> Toro na jo miel jakii bajago na kariano napano abar naio bijaio, kiano jidomiano jo bujo ka sidomiano va nalo na yetemeriba nei, mia toro napano jo miel jakii Niununo Lu, kiano jidomiano jo bujo ka tonovnovno nalo napano Atua jidomio. <sup>6</sup> Sidomiano laka bajago va nalo na yetemeriba nei, naio be m̄arabo na m̄ariano, a sidomiano laka bajago novo nalo na Niununo, naio be m̄arabo na tum̄aro, be m̄arabo na meuliano. <sup>7</sup> Toro napano kiano jidomiano jidom bajago na sidomiano na laiano na kariano, naio be Atua kiano uolu memedu. Peli naio maka sidom rivatove ka Atua kiano tuboiano leleio, p̄eli ver makanio, p̄eli naio jidom rivatove kano, mia bior naio bano-o bova laka ruei banbano-o ana maka bunu rijikia rivatove ka naio, a mia naio be toro na jibe na naruei. <sup>8</sup> Nalo napano amiel ajakii bajago na kariano napano abarolo bijaio jibe na, maka ajikia ala titai napano mia Atua rijikia risaaro ka nalo kano.

<sup>9</sup> Mia jau napano Atua kiano Niununo joaso, jau maka koiel ea bajago na kariano napano abariso bijaio, mia monoka koto koiel ea Niununo nei kiano mo-roano napano Kristo jian banso. Mia verver toro tai naio jo napano Niununo nei maka toaio, toro nene maka ve Atua

kiano. <sup>10</sup> Bajago va na yetemeriba nei naio mila ka mia mokotenado riviniu monoka rim̄aro bogo tai, a kito napano Kristo joa kito, naio mila kito romemedu ea Atua mirano ruei, naruei mia niunudo ameul toboto. <sup>11</sup> Atua Niununo napano mila Yesu meul bereio den nam̄ariano, nina naruei Niununo napano joa kito ruei, a mia rila vatitig tibe na ea kito bunu. Bekurano napano mokotenado rim̄aro, ana Atua kiano Niununo napano joa kito mia rila kito romeul bereio.

<sup>12</sup> Bilbilu nalo, Atua mila bo laka ban kito jibe nei, mila jibe napano kiado burum̄ara jabue joa naio vonganei. Tibe na, bo rodumiran tonovo tai rivanio, mia bova ver rotu reiel ratakii bereio kiado bajago na sidomiano va na kariano. <sup>13</sup> Bajago na kariano naio be m̄arabo na rovokar m̄ariano, mia toro napano jidom riel takii m̄arabo na meuliano, naio monoka tuvan Niununo rim̄au ea naio, rijai ka te bulag sidomiano va na laiano na kariano den kiano meuliano.

<sup>14</sup> Mia kito napano romonea Atua Niununo joono jibe na, kito naruei robe Atua kenerinio riano. <sup>15</sup> Nina bior napano Atua Niununo maka rila kito romei tibe ka tomu nalo na amim̄au Atua kanano kurano ga, a naio mila jibe na napano Atua bar bulag kito, robe kenerinio nalo. Jibe na, monoka romerou ka re Atua, a bogo napano roil vanio, romijikia rovio naio tibe karam̄ado, rover "Teta." <sup>16</sup> Kito robio naio jibe na memedu ga na, kar napano Atua kiano Niununo jo berloglog kito ana niunudo bunu mijikia ka be riano, kito Atua kenerinio nalo.

<sup>17</sup> Vonganei kar napano robe Atua kenerinio jibe na, iliviuano novo nalo napano Atua bar ju rorea kenerinio memedu nei Kristo, mia kito kenerinio dolu nalo bunu, mia kito ravar rotiburevure vija naio. Be riano ka mia monoka ravar bunu jogvaiano tibe napano naio bario, a ver riasaaro ga, mia Atua rila rivu van kito ve verare ka naio mila bo ban Kristo.

*Mia rivu laka rivan Atua kiano tomu riano nalo*

<sup>18</sup> Banei, ea yetemeriba nei, roju robinua bogokouo telabo nalo nei, mia ver kiado jidomiano jo dam̄ariga ea mermerano napano mia rimaluvo iorou, nemijikia never ka ea kiaku vitiiano, jogvaiano nalo na vonganei, nalo ajibe tena iakurano ga. <sup>19</sup> Jogvaiano nalo nei aju abokar tenalo nonovio napano Atua jiio, vonganei tenalo nonovio aju rorea, ajidom m̄elea ka bogo maaro rimej, ka Atua riverial vonga ka kenerinio riano



nalo abe kei. <sup>20</sup> Beamu, jogvaiano maka to, kar napano Atua jii tenalo nonovio bo, mia iorou, nalo aju abinimei aminunu, aburu kokorovio, abova jibe na banbano-o napano tenalo nonovio maka bunu airñau rivu tibe napano naio jidomio. Naio mijamo ka tibe nei ea yetemeriba nei, ka rila ka mia tomu nalo monoka kialo jidomiano ve takurano ka monoka avalea naio ga. <sup>21</sup> Jidomiano na mia monoka toa kenerinio nalo, napano nalo monoka amonea ka mia saba nalo maka ajikia atu rivova tibe na bogo nonovio. Nalo monoka tiniel maio ka bogo tai, mia naio rila saba nonovio napano naio jii amei rivu bereio, nalo abokar kiano mermerano, jibe ga napano mia kito kenerinio nalo nei bunu rotu rovokario.

<sup>22</sup> Mia vonganei, kito roju romial yetemeriba nei kiana, napano jikar ka nua binimei, saba nalo napano ajuao aju ami-jog bova jibe ga na tira tai jidom rivar kenerinio. <sup>23</sup> A be verare ga ka kito napano robokar Niununo Lu, napano naio jibe jidomiano tai na beamu napano Atua jian ban kito ka rila rosidomii ka mia jidomiano na toru mia rimei iorou navo. Kito bunu, tegiano jua kiado iviso kia ga vo, a romijikia ka mia kito rotu rojog rivova rivano-o vokar bogo napano Atua ridu bulag kito den yetemeriba. Rojodom nina laka, kar napano rojibe ka tete nalo napano naio bar bulagio ga, a ea bogo na, mia rojog rivu vatitig jumñabe kenerinio riano nalo, napano rova rotu vija naio ea kiano vio memedu.

<sup>24</sup> Tenene na naruei naio milarur kito kario, a jikar ka bogo na binimei roju romonea jikili ka kiano verikariano napano ber mia naio rila rivu van kito tibe na. Roju romonea jikili eaio bior napano maka reialio vo, a bogo na ver maluvo, mia maka rejikia rover romonea ka mia tumñabe, kar napano jibe na ruei. <sup>25</sup> A maka reial tenalo na vo, naruei monoka romoneaio sikili ka mia tibe na, a monoka rala kiado jidomiano rivetebievi ka rotu rorea vanvano-o mirado rialio garuei.

<sup>26</sup> Bogo napano roju rorea jibe na, bogo tai tiniedo mñaro ðeli roburu didig, mia bogo nonovio Niununo Lu jo mijia kito. Bogo tai, rojodom robolkouo kar jogvaiano nalo, a romijog bova laka ana romil vonio, maka rejikia reial iliano memedu ka rever. A ea bogo na Niununo Lu mijikia rimei, ridu kiado vio ana naio ga bolokouo kanado ka tegiano nalo napano aberial kiado jidomiano nalo napano iliano nalo maka avare ka averenio. <sup>27</sup> Ea bogo jibe na, Atua mijikia tenalo nonovio napano ajua kiado

iviso kito kiano namoneano lu nalo, a mijikia napano Niununo jo bolokouo kano kito, napano jo ber tenalo memedu ga ea venia napano joa Atua kiano jidomiano ruei.

<sup>28</sup> Ana ea bogokouo nalo napano robiniua, ea tenalo venia napano mia rimaluvo ea kito, romijikia ka mia Atua rila ka ea juluvati nene, mia rivu ga van kito napano tiniedo jii naio. Naio mila jibe na kar napano naio bijauia bulag kito beamu ruei ka naio mijikia rimñauka kiano imñauo novo nalo ea kiado meuliano. <sup>29</sup> Naio mijikia vatitig kito nua beamu binimei, jiloglog bulag vatitig kiado mñarabo kirisiou ruei, mia rila ka kiado meuliano rivar kijokijo na kenerinio nei Yesu. Jibe na, kito kurauo a kuviviniedo nalo ea mñaratavo takurano, napano Yesu naio be motoru ka kito.

<sup>30</sup> Nina naruei imñauo novo napano Atua mila ban tomu nalo napano naio jiloglog bulagio ka ave kiano mñaratavo. Naio biolo ka amei eaio, naio mila abe merevuiano bijaia, a mila ka mia avokar kiano mermerano ea bogoti napano mia rimei.

#### *Atua kiano tinietiano novo*

<sup>31</sup> Tenalo na amila meravo ka Atua to vija kito, jo mila bo ban kito, a jibe na mia kito rover venia bereio? Verver Atua jidom ridular kito, mia kei mijikia rila kito rojoru bereio? <sup>32</sup> Kito romial ka Atua tinien jii laka ka kito banbano-o mijamo ka auebin kenerinio memedu kar kito, ana ver jaaro ka rila buruñara tonovo nei ban kito jibe nei, mia jaaro bunu ka sian tenalo dolu novnovo nalo rivan kito. <sup>33</sup> A nina Atua naio jo mila ka kito ruei. Naio bijauia bulag kito ka rove kiano ruei, mia kei bereio mia river ka kito maka ravare ka roytuba ea mirano? Atua naruei jo berial ka kito romemedu bija naio ruei, <sup>34</sup> ana kei bereio mia river ka kito monoka ravar vironiano kar kiado kariano nalo?

Maka toro tai, kar napano Naverikariano Yesu mila vite nonovio nalo ruei. Naio mñaro kar kito, iorou meul bereio den namñariano, karina bano bereio jotano ea kiano vio lu mave bija Atua, a vonganei jo berial kito ban Atua ka Atua naio viekokoa kito. <sup>35</sup> Kristo tinien jii mñeala laka kito jibe na, venia naruei mia mijikia vuru bulag kito den kiano tinietiano nei bereio? Maka titai.

Bogo tealó, imñauo nalo temi ka kito, ðeli tomu nalo amila bova ka kito. Bogo tealó, kito robokar bogokouo, ðeli maka sado sinaniano, ðeli maka ve kiado kulunñarauo. Bogo tealó, kito romerou kar

kiado meuliano, ĉeli rojen iobogu na mira, a makanio, bogo nonovio ga Kristo tinien jii kito a kiado meuliano jo bo ea ĵurĵano. <sup>36</sup> Nina jibe na Parinio Tubo Teviti berenio beamu, ea bogo napano naio bunu bar bogokouo, napano ber

*“Siamo joa kumemi, ana nalo aju ajidom auebinvin kumemi nuĵarĵaro bogo nonovio ga,*

*nalo amial kumemi jibe nunu nalo napano aĵil bulaglo ka ativi bulag tiljolo.”*  
*Iouano 44:22*

<sup>37</sup> Tenalo kinkin na jibe nei nalo amijikia amaluvo ea kito, mia be iakurano ga. Ea tenalo nonovio na jibe na, Kristo kiano tinietiano joa kito, ana kito roĵu loa, roĵu roĵovulu danariga. <sup>38</sup> Nemijikia never memedu van kamiu bereio, ka maka titai leleio napano mijikia rila ka Atua maka bunu rijikia tinien tii kito. Verver romeul ĉeli romarĵaro, verver nailiano nalo atu vija kito ĉeli siĵaro nalo atu amei ka kito, verver kito roviniua tenalo napano aju amidu vio vonganei ĉeli roviniua tenalo na napano mia adu vio ea bogoti nalo napano amei, <sup>39</sup> a verver moroano novo nalo ea vio mave nalo atu vija kito ĉeli moroano va na vio yetano nalo atukovio ka kito, a maka leleio titai napano Atua jii napano mijikia vurular kiano tinietiano den kito. Kristo Yesu kiado Tubo midu Atua kiano tinietiano joa kiado meuliano ruei, ana mia to toboto.

## 9

*Pol mijog bova napano kulo Ju nalo maka asidom amonea ka Yesu naio be kialo Naverikariano*

<sup>1</sup> Bilbilu nalo, vonganei nojidom noverii ea tivelinio napano kito kulo Ju, rober ka kito robe Atua kiano tomu nalo, mia kito miroano maka asidom Yesu. Mia tuĵabe ka nalo na? Bo ga, kiniou maka nejikia nola sibi, monoka noverial ka kamiu jidomiano novo nalo tai napano Niununo Lu jian ban kiniou ea tivelinio nei ruei, <sup>2</sup> mia be riano, iliano nalo na, nalo amila ka kiaku aua a kiaku jogvaiano toru laka, naio maka rivatove leleio.

<sup>3</sup> Nina kario napano vonganei, kiaku meuliano miasol bo bija Kristo ruei, a nemial jibe yati dolu nalo na Ju napano robe burukija takurano, kialo meuliano maka riasol rivu vija naio vo. Verver nemijikia nodular kiniou bereio ka nalo amijikia amei adu jeleku, mia nasaaro ga, mia maka rijikia tibe na.

<sup>4</sup> Kosidomii von tenalo na bo napano Atua mila ruei ka kito kulo Ju, napano nalo jibe nei:

kito naruei napano Atua bijauia koro-bido yati na Israel nalo ka ave kiano tomu nalo,

kito naruei napano Atua berialio ka naio bijauia bulag kito jibe kenerinio nalo, kito naruei napano Atua midu yulu na kiano mermerano buruii kiado tomu nalo ea vio kurano nua,

kito naruei napano Atua jo mila virakar-iano nalo bija kiado tormoruo nalo, kito naruei napano Atua midu kiano tuboiano joa kito,

kito naruei napano buruĵara Atua kunuano na lotuano jo bija kito, kito naruei napano Atua berkar ilivuiano telabo ban kito,

<sup>5</sup> kito naruei napano kito rovio tormoruo lu re nua jibe Epraamo, Aisak, a Yakovo, ka nalo abe korobido,

a mave ka tenalo na, kito naruei napano Yesu maluvo ea kiado yati, naio miyotuba ea yetemeriba nei jibe napano naio be toro, mia naio bunu be Naverikariano, napano naio be Atua napano be tubo ea vio reraio, napano bo ka roiaia naio bogo nonovio rivano-o maka ribisi.

Nina naruei tenalo na bo napano Atua mila ban kito kiano tomu nalo, mia kito telabo amial jibe titai kurano ga.

<sup>6</sup> Nina nalo napano maka aiasol rivu vija Kristo, a ĉeli tomu tealoo nalo aber ĉeli vite nene mila ka verikariano napano Atua jian beamu maka bunu riyotuba tibe napano naio berenio, bior ka naio berkar ber mia kiano ilivuiano toa tomu nonovio na yati na Ju nalo. Mia maka tibe na, bior todolu tai, napano ban jibe na, ka nalo napano amiyotuba ea Yakovo kiano yati, napano robio ka kulo Israel, maka nalo aviniu napano Atua ber ka nalo ave kiano tomu nalo riano.

<sup>7</sup> Peli romijikia rover iliano na ea ĵarabo dolu bereio, ka rover ka nalo napano aber ka Epraamo naio be korobilo, maka nalo aviniu napano rover ka amiyotuba ea kiano yati na bo naruei. Iliano tai napano joa Vivitauiano Lu nalo naio ber jibe nei ruei, napano Atua mil ban Epraamo ea tivelinio na kenerinio juo na Ismael bija Aisak, a naio ber

Kiamo yati nalo memedu mia nalo amoluo ea kenerimo nei Aisak ga.

<sup>8</sup> Ana iliano na jo ber kalo napano Atua mial ka aju joomo ea taara na Epraamo kenerinio nalo a memedu, nalo kenia? Maka tomu nalo aviniu napano amoluo ea yati nalo na kiritete nalo dolu napano naio bario, a naio be nalo napano amoluo ea kiritete nei Aisak kiano yati napano Atua bijauiaio, naio berkar ka mia kiano ilivuiano nalo atualo.

<sup>9</sup> Kito romijikia ka naio jibe na, kario napano beamu, Epraamo be kenerinio bija kialo tira na in̄auano na Aka, mia tete na maka naio napano Atua ber ka mia Epraamo kiano yati nalo memedu ayotuba eao. Mia Atua berkar vatitig ka Epraamo bereio, berinavo "Epraamo, mia kiniou nala kamjuo koamo na Sarai ka yuka yako, ea bogo tibe nei ga, mia naio rivar kenemiu kiritete sun̄iano tai." Mia iorou, tibe ga napano Atua berkario, a Epraamo kenerinio nene Aisak, naio naruei yati memedu napano kito kulo Ju romoluo eao.

<sup>10</sup> A kito romial napano bogo napano Aisak nene naio toru, naio be kenerinio, a jibe na bereio. Koano Repeka bar savoro juo nei Yakovo bija Isau, <sup>11</sup> a bogo napano naljuo maka amoluo vo, Atua berialio venia napano naio berkario ka naljuo. Naio maka sidonii ka rila takii kialo in̄auano ka ala rivu p̄eli rivova, a naio mila jakii ga kiano jidomiano.

<sup>12</sup> Naruei bogo napano naljuo amoluo, Isau moluo beamu, a Yakovo moluo iorou kano, a Atua ber ka kenielo, berinavo

*"Naio napano moluo iorou mia naio maka riagago ka naio napano moluo beamu, a naio napano moluo beamu, naio monoka riagago ka naio napano moluo iorou."* Jen 25:23

Jibe na, maka takii kiado bajago moruo, mia mila meravo ka Atua bitirilal toro maka takii toro kiano jidomiano, a jakii venia napano Atua berkario ga.

<sup>13</sup> A vite na meravo laka ea tivelinio na savoro juo na, kar napano iliano dolu tai joa Vivitauiano Lu ruei, napano Atua berialio ber

*"Kiniou nomidu Isau na napano moluo beamu, jo yetano, mia nomidu Yakovo na napano moluo iorou, jo mave."* Malakai 1:2,3

<sup>14</sup> Bo ga, Atua berial kiano jidomiano meravo bo jibe na, naruei mia kito rover venia bereio? Mia romijikia rover ka Atua kiano bajago na bova, mila maka rimemedu ea tivelinio na tomjuo nei? Mia makanio, maka rejikia roil niegeniege Atua tibe na.

<sup>15</sup> Nina jibe kiano iliano dolu tai bereio napano naio ber ka Mosis nua, napano berinavo

*"Kiniou nebe Atua, mia joa kiniou ka nemijikia tinieku riiao toro kei napano nojidom ka tinieku riiao."* Eks 33:19

<sup>16</sup> Jibe na, Atua jo bijauia kiano tomu nalo maka rivior napano nalo ga naruei aber ka naio monoka rivijauialo, a maka kar napano nalo amila vio ka ala tenalo napano p̄eli naio jaaro kalo kario, a naio

bijauia tomu nalo jakii ga kiano tinieriiiano ea nalo napano aju amijog bova.

<sup>17</sup> Atua kiano bajago na, napano mila ka toro takii ga kiano jidomiano, romial naio mila bunu ka Parinio Tubo Vero na Ijivi, ea Mosis kiano bogo nua. Vero na naio be toro tai napano naio tinien jer Atua kiano tomu nalo, mia Atua bijauialar naio bunu ka rila kiano in̄auano tai, jibe napano Vivitauiano Lu berenio, napano Atua mil ban Vero, ber

*"Kiniou nomidu larso ka kovar moroano ea kiamo buruvenuo. Mia nemijamo kaso ka kovarvar ka kiamo moroano beamu vo, mia nela ka mia jau koialio ga napano kiaku moroano lie laka ka kiamo moroano, a kiniou nojidom ka tomu nalo na vio nonovio mia ajikia ka moroano nonovio joa kiniou."* Eks 9:16

<sup>18</sup> Jibe na, kito romial napano toro napano Atua jidom tinien sesei ka naio, mia monoka tibe na, mia ver toro tai napano jibe Vero nei napano Atua jidom rila kiano jidomiano sikili, mia tibe na bunu.

*Atua kiano tiniemimiano bija kiano tinieseseiano*

<sup>19</sup> Kiniou neber jibe nei, mia monoka jidomiano tai vavin napano mia toro mijikia vika tibe nei, river "Ver tomu tealu, Atua ve tiniesesei rivano, a tomu dolu tealu, naio jo milalo napano kialo jidomiano jikili, mia tuniabe naruei? Verver Atua naio ga naruei jo mila ka kito romei rivu p̄eli rova rovova, ana maka rivu ka naio to tibure kito bereio. A ver Atua jidom rila ka kito takii kiano sidomiano, mia maka rejikia rotuko vio kano ka rila re."

<sup>20</sup> A mia kiniou noverdope ka iliano nalo na, kiniou neber: Koig, makanio, jau kobe toro ga, jau kobe titai napano Atua jiao, mia jau kola vonio re ka kodukian kiamo iliano mave ka naio bereio. Naio jibe ka napano toro tai jo mir̄auka baju na tano nalo. Bogo na naio mir̄auka baju na tano tai karina, ana baju nei maka rijikia tumolu ril vanio bereio riverinavo "E, kar venia jau komir̄au kirivova ka kiniou jibe na?"

<sup>21</sup> Mia maka rijikia tibe na, bior naio napano mir̄auka baju na tano, joa naio ga ka rim̄auka takii kiano jidomiano. Ver naio ridu kulati tano tai, naio mijikia rim̄auka baju na tano ve juo kano. Takurano, naio be baju novo na jokoluolu, a dolu, naio be baju na vonuo ga.

<sup>22</sup> Ana Atua bunu mir̄au jibe nei, a naio bunu be kiano tenalo juo napano jidom riliao. Naio jidom rila tomu nalo avitilubar napano naio tinien jer kialo kariano nalo, banbano-o mia mijikia rije vatitig vironiano vanlo vija kiano moroano

na toru. Bogobe ruei, naio mila kiano jidomiano ealo tebievi, a vonganei joa naio ka rila rivanlo venia napano naio jidom rilaio.

<sup>23</sup> A todolu napano naio jidom ka rive-rialio, naina kiano bajago novo nalo napano naio jidom rila ka kito napano naio be tiniesese ka kito. Nina jibe napano nua beamu ruei, naio mila vatitigio kiano ilivuiano novo nalo, a vonganei mirāauka kito jibe basidobidobi na misonlo ban eaio.

<sup>24</sup> Naio mila bo ka kito jibe na bior napano kito naruei napano naio bio kito, napano kito tealo romiyotuba ea yati na Ju nalo, a tealo romiyotuba ea yati na nalo napano maka ave Ju.

<sup>25</sup> A bajago na jibe ka Atua kiano iliano tai napano Osea Naverialiano berialio ea kiano niosi, napano Atua ber jibe nei, berinavo

*“Taara na tomu nalo, napano beamu maka ave kiaku, a vonganei, kiniou nobiolo ka kiaku tomu nalo.”*

*Venuo napano beamu maka tinieku maio kanio, vonganei neber no-jidomio laka.”* Osea 2:23

<sup>26</sup> A bogo tai bereio, Osea berial Atua kiano iliano dolu napano ber

*“Beamu, neber ka tomu nalo ea vio nei ka nalo maka ave kanaku tomu, a vonganei, mia ajog napanoaju abiolo ka nalo abe keneriku, kiniou Atua na moroano, kiniou Atua napano nemeul.”* Osea 1:10

<sup>27</sup> A iliano dolu tai ber jibe nei bunu, napano joa niosi napano Naverialiano Aisea bivitauia. Ea vio na, naio mijog bova bior tomu na Israel, ber

*“Taara na tomu nalo na Israel kialo yati miroano, nalo miroano mia miroano, nalo a jibe kurukuti yono napano toro maka rijikia rivulukuiio. Mia aua toru, nalo telisu ga napano mia Atua rilarurlo.”*

<sup>28</sup> A ea bogo na tibureiano, mia naio rije vironiano van tomu nalo na yetemeriba, mia naio rila nalo na maka kialo moneano tai ka ajikia.” Ais 10:22,23

<sup>29</sup> A nina jibe ga iliano dolu tai napano Aisea bivitauia beamu ruei, napano berii bogo na tibureiano napano mia rimei, napano ver Atua maka tinien riia toro, mia tomu nonovio amarrāaro. Iliano na ber jibe nei, ber

*“Atua binimei bija kiano tomu na mira nalo, vaataro ruebinvin kito nonovio. Ver maka tinien riia kenerido tealo, mia tuvanlo atu, mia kiado yati ribisi vatitigio.”*

*Vaataro naio rila ka kito ve verare ka venia napano mila ka tomu va nalo ea vio na tortoru juo nei nua, Sotomo bija Komora, karina iorou mila ka kiado tomu ve telisu amijikia atu ameul kia ga.”* Ais 1:9

<sup>30</sup> Bo ga, iliano nalo na aber jibe nei, aber nalo napano maka ave Ju, nalo maka ala vonio ka atakii Atua kiano tuboiano ka amei amemedu ea mirano, a iorou, bogo napano nalo amonea Yesu, Atua mila vonga nalo ka amei memedu ea mirano.

<sup>31</sup> A kulo Ju nalo, amila vonio jikili ka amonea tuboiano ka rila amemedu ea Atua mirano, a nalo abijukudeio ga, ana mia rivova vanlo. <sup>32</sup> Kiniou neber bova ka nalo na jibe na, nina kar napano amila vonio jikili ka amei amemedu ea Atua mirano, a nalo ajel ea mñarabo dolu, aba ajibirbil vatitig eaio. Nalo ajel ea mñarabo napano ajidomiiio aber kialo ināuano novo nalo amijikia alalo rivu vija Atua, mia maka tibe na. Kito monoka rosikili rotua ga venia napano Yesu milaio, nina naruei be kiado mñarabo na romei rovu vija Atua bereio.

<sup>33</sup> Iliano tai joa niosi na Aisea bereio, napano Atua berial jamerijiano tai, napano berii burupati puruveru tai, ana puruveru nene be Yesu, jibe Naverikariano napano Atua miila naio binimei. Iliano nene beriio jibe napano tomu tealo maka asidom puruveru nene, mia tealo amoneaio, ana naio ber jibe nei, berinavo

*“Kamii kubitii batitigio!  
Nojo nebitirilar puruveru novo tai na yimo burupati, nina mave ea burusuku na Saion ea kiaku tomu nalo kialo burumāara komeli na Yerusalemo.”*

*Puruveru nene jikili bo, ana mia tomu ve telabo asidomio re, nalo jaalo je puruveru nene bano amijorjoru janea vio.*

*Mia tomu nalo napano amonea puruveru nene, naloaju jikili eaio, mia nala rivu laka kalo.”* Ais 8:14, 28:16

## 10

*Yesu ga mijikia rila kito romemedu ea Atua mirano*

<sup>1</sup> Bilbilu nalo, kiniou nomijog bova napano kiaku yati nalo memedu, jibe kulo Ju nalo, maka amonea ga. A kiniou nojidom laka ka nalo monoka avokar ioruriano, nina naruei kiniou nojo nobolkouo jikili ban Atua kalo.

<sup>2</sup> Naloaju amila vonio laka ka asira-rag ka Atua ea kialo meuliano, a neber beriano, nalo maka ajikia mñarabo, mia maka ajikia aleal naio.

<sup>3</sup> Nina bior napano nalo aju ajakii kialo jidomiano ga, a nalo maka asidom atakii m̄arabo napano Atua miñaukanio ka toro rijikia rimei rimemedu ea mirano bereio.

<sup>4</sup> Nalo aju ajikili ka aber ka ajogkar tuboiano, naio ga be m̄arabo, mia m̄arabo nene bova ruei, kar napano kito robiniu romila korovio tuboiano nalo. Marabo napano kito rober ka romemedu bija Atua bior napano romijogkar tuboiano, Kristo juko ruei, a naio miñauka kiado m̄arabo vou tai. A vonganei, ver romonea ka Kristo bar bulag kiado kariano nalo, naruei Atua mijikia rila kito romei romemedu ea mirano.

<sup>5</sup> Ver kito rala korov re tuboiano, mia rivu ga, romijikia romemedu ea Atua mirano, bior napano ga romijogkar tuboiano, kar napano Mosis berenio iliano tai ea tivelinio nei ruei, berinavo

*“Toro napano jakii vatitig bo tenalo napano tuboiano nei berenio, mia mijikia rivokar meuliano.”* Lev 18:5

Mia maka toro tai napano kiano meuliano bo jibe napano Mosis berenio, ana maka rejikia rovakar meuliano sel ea tonovo nalo napano romilaio.

<sup>6</sup> Ka rila tibe na, naio jikili laka, a ver romonea ga Kristo romijikia romei romemedu ea Atua mirano, a nina maka titai napano jikili. Jibe iliano tai napano Mosis berenio, napano berenio

*Maka rivu ka kamiu kuvisidomii ka tenei naio jikili laka, ana kuvitu kuvivika kuver kei mia rila m̄arabo beamu ka kamiu riva mave ea tiniabene?* Tiut 30:12

Vikadeniano nei berenio ka kei mijikia riva rivokar tiniabene rivuru Kristo rimei yetano ea vio nei ka rilarrur kito, a jidomiano jibe nei naio maka rimemedu.

<sup>7</sup> Peli nalo avika vikadeniano dolu tai napano joa iliano Lu, napano ber

*A kei mijikia rivatove riva rivokar vio na tomu na am̄arm̄aro a rimei bereio?* Tiut 30:13

Vikadeniano na ber ka nalo ajidom ka Kristo naio m̄aro ea m̄akolkolo, ana nalo aber p̄eli maka toro tai rijikia riva ridular naio ea vio na bereio ka rijikia rimei rilarrur kito, a mia romijikia ka iliano nalo na maka rimemedu. Kito romijikia vatitig ka Kristo jaluvo ea tiniabene batove ea yetemeriba ruei, a iorou ka napano naio m̄aro, naio jumolu meul bereio a ban ea tiniabene ruei.

<sup>8</sup> Jibe na, kito romijikia rosian verdopeiano na vikadeniano nalo na, rover iliano dolu tai napano Mosis ber nua, napano berinavo

*Atua kiano iliano ban kito kulorinio naio jo bija kito ruei. Jua jum̄ado ruei, ana romijikia rodu toa niado, romijikia rodu vatitigio toa kiado jidomiano.* Tiut 30:14

A Atua kiano iliano napano iliano nene berenio, nina Ioluano Vou napano kumemi numitu numiololu kanio, napano berialio ka tomu nalo monoka amonea Yesu Kristo.

<sup>9</sup> A jau kei napano komonea Yesu Kristo ea kiamo iviso, kober ka Atua mila naio meul bereio ea m̄ariano, a kojaaro ka koverialio ea vio reraio ka jau komidu Yesu jibe kiamo Tubo, mia jau kovokar meuliano. <sup>10</sup> Nina bior napano toro na biekouo ea kiano iviso ka Yesu meul bereio ea m̄ariano, a berialio ea vio reraio ka Yesu be kiano Tubo, mia Atua sian re bunu vironiano van naio kar kiano kariano nalo, mia rilarrur naio.

<sup>11</sup> Nina jibe iliano tai ea Vivitauiano Lu re nua, napano jibe ka napano berenio napano romonea Kristo, napano berinavo

*Toro napano monea naio, naio maka rijikia rijog kiano jidomiano rijoru bogo tai.* Ais 28:6

<sup>12</sup> Mia toro napano monea ka naio be Ju, p̄eli maka rive Ju, mia Tubo naio takurano be kialo tubo abiniu, mila bo kalo abiniu ga napano ajegi banio naio.

<sup>13</sup> Nina jibe iliano tai napano Naverialiano Joel nua bivitauia, napano berinavo

*“Toro kei napano bio Tubo siano, mia rilarrur naio.”* Joel 2:32

<sup>14</sup> Be riano, kulo Ju miroano maka avio van Kristo ka rilarrurlo, a jum̄abe jibe na? Nina bior napano maka ajikia avio naio verver maka amonea naio, a maka ajikia amonea naio verver maka leleio ajog siano vo, a maka ajikia ajog siano verver maka toro tai rioliolu ka vanlo.

<sup>15</sup> A maka jikia toro riva rioliolu verver Atua maka riilaio ka rivano, a verver naio jaaro ka rivano, mia tibe na napano Vivitauiano Lu berenio ruei, napano ber

*“Siva toru ka Atua napano kiano naverialiano nalo, romijog jaalo aju amijubariva ea kialo m̄arabo ninio nalo ka avanvan tanea vio vija kiano Ioluano Vou.”* Ais 52:7

<sup>16</sup> Nina naruei iliano napano tom tealo aberenio, a nemijikia never makanio, Atua jo miila kiano naverialiano nalo abanvan ruei, mia aua toru napano Ju nalo miroano maka asidom ajogio ga. Nina jakii iliano tai ea Vivitauiano Lu bereio, napano Naverialiano Aisea jegi ban Atua, ber

*“O Tubo, kumemi numitu numiololu ka kiamo iliano banbano-o, mia jibe napano maka toro tai rive tinieno ka rijogio.”* Ais 53:1

17 A banei kumemi jibe nei naruei, numitu numiololu ka Yesu Kristo banlo, a bogo napano kumemi numitu numiololu, tealo amijog, a bogo napano amijog, tealo amonea.

*Kar vaio jau komiololu ban kulo Ju nalo napano abuluku Vivitauiano Lu nalo ruei?*

18 Nina naruei kiniou nojo nomioliolu ban Ju nalo, a vikadeniano tai mijikia rimeie mave ea vio nei, ber ĩeli kojo komiololu banlo kar napano kojidomii ka nalo maka ajog venia napano Vivitauiano Lu nalo aberenio? Vonganei mia neverdoĥeio never, makanio, Atua kiano iliano bokarlo kirisiou ruei. Nalo abiniu amijikia bare ga napano nalo abiniu aju abiti mĕrenio a siberio bija mĕarvitano nalo, jibe napano iliano tai ea Niosi na Iouano berenio, berinavo

*“Tomu nonovio na yetemeriba amial tenalo na ea vio yauo mave, a nalo abitulbario ka Atua jo,*

*ba bokar tomu nalo reraio napano aju koalabo, nalo bunu abitulbar ka kiano moroano toru laka.” Iouano 19:4*

19 Jibe na, kulo Ju nalo abitulbar tenalo miroano ruei, a mia titai bova, nalo aber ĩeli Atua jidom rilarrurlo nalo ga.

Nalo maka avitulbar ka Ioluano Vou be tomu nonovio kialo, kar napano Atua jidom rilarrurlo bunu tomu dolu nalo napano maka ave Ju. Mia bo ka avitulbar vite nei, bior kialo naverialiano moruo juo aberiio nua ruei ea Vivitauiano Lu, aber mia tibe nei. Mosis be motoru, napano berial iliano tai napano Atua ber ka kulo Israel, napano ber

*“Kamii kubitii bova ka nalo napano maka ave Ju, jibe napano abe iakurano ga, a mia kamii kuvijoku ka ilivuiano nalo napano mia kiniou nala kalo.*

*Kamii kuber nalo maka ajikia ala titai na bo leleio, a mia kamii tiniemiu serlo bogo napano kuvial napano kiniou nelarrurlo bunu.” Tiut 32:21*

20 A juo nene kanio, naio be Naverialiano Aisea, naio bunu jumolu berial memedu Atua kiano iliano dolu tai ban korobido nalo kulo Ju miralo, napano Atua berii nalo napano maka ave Ju, berinavo

*“Beamu, nalo maka asirarag ka kiniou, a iorou, mia nalo amijev kiniou, nua maka avika kiniou, a mia iorou, ajidom ka nava noyotuba keanlo.” Ais 65:1*

21 A Aisea bivitauialar Atua kiano iliano dolu tai bereio, napano Atua berii nalo na abe Ju, berinavo

*“Tomu nalo na aju maka amonmonea kiniou, nalo aju abukular kiniou bogo nonovio.*

*Kirisiou ruei kiniou nebetavo ka juĕaku kalo, nojidom nalo amei bereio kean kiniou, mia maka garuei.” Ais 65:2*

## 11

*Kulo Ju nalo maka asidom Yesu, mia Atua maka vilig taakano kalo*

<sup>1</sup> Vikadeniano dolu tai jo, nina ea tivelinio na kulo Ju nalo, ka bogo na nalo maka amonmonea Atua, naio bunu jumolu, bilig taakano kalo, ĩeli makanio?

Nemijikia never makanio, naio maka rila tibe na, bior napano kiniou nebe toro Israel nojo, kiniou bunu napano tormoruo Epraamo be korobiku, a kiniou nomiyotuba ea tormoruo Beniamen kiano yati, a nemijikia bo ka kiniou tai napano Atua maka rivukular kiniou.

<sup>2</sup> Jibe na, nemijikia never makanio, Atua maka rivukular kito tomu nalo napano bijauia bulag kito robe kiano. Bo ka rosidomii iliano tai na Vivitauiano Lu nalo re nua ruei, ea bogo na Naverialiano Elaija. Ea bogo na, Elaija mijog bova laka ka veribinio na Atua kiano tomu nalo kialo, naruei naio mil rĕnĕi ban Atua, ber

<sup>3</sup> *Tubo, kiamo naverialiano nalo, kiamo tomu nalo aju amuebinvinlo, a kiamo vio lu nalo, aju aburu kokorovio, a ba bova laka, nemial jibe kiniou ga takurano nojo nabameneaso,*

*a vonganei kiniou bunu, aju ajusosor kiniou ka adular kiaku meuliano. 1 Par Tubo 19:1*

<sup>4</sup> Mia ea bogo nene, Atua berdoĥe naio, ber

*Makanio Elaija, maka jau ga ve takurano. Jau maka kojikia, a ea vio nei kiaku tomu nalo menu aluo [7,000] aju napano abo jibe so, napano maka alotu ka tavoru sibiŕibi na Baal. 1 Par Tubo 19:18*

<sup>5</sup> A vonganei, ea kiado bogo, be verare ga jibe na ga. Tomu telabo maka amonea, a kito naruei roju, kito robe bagaro telisu tai na Ju nalo, napano Atua be tiniememi ka kito, bijauia bulag kito, ana kito romonea naio. <sup>6</sup> A bo romijikia vatitig ka Atua bijauia bulag kito kar venia, bior ĩeli tealo nalo aber ĩeli naio bijauia bulag kito bior napano romilala iĕauano novnovo nalo miroano napano naio jaaro kanio. A makanio, bior napano ver tibe na, ver ĩeli ka Atua kiano tiniememiano maka rila titai leleio. A Atua maka bijauia bulag kito kar napano romila tonovo nalo

miroano, a naio bijauia bulag kito ea kiano tiniememiano ban kito ga.

<sup>7</sup> Kito romijikia ka kito kulo Ju nalo, robiniu roju rojirag kiado m̄arabo ka romei rimemedu vija Atua, a kito telisu ga romialio. Ana ver tibe na, mia tuniabe ka nalo dolu na?

Nina berenio ka nalo miroano napano nalo pariparilo jikili laka, ana nalo maka aial m̄arabo nene vo.

<sup>8</sup> Iliano tai ea Vivitauiano Lu berenio nalo jibe nei, ber  
*“Atua juvanlo aju bija kialo vovuiano, Ais 29:10*

*ana binime i bokar banei, nalo jibe napano be miralo, a maka ajikia avitilubar vite, be tilinielo, a maka ajikia ajog lubar vite.” Tiut 29:4*

<sup>9</sup> A jibe ka bunu Parinio tubo Teviti kiano iliano tai re nua, bogo na naio jidom Atua ridular kiano uolu nalo kialo moroano napano aju ajusosor naio. Ea bogo nene, naio bika den Atua, ber

*“Tubo, kiaku uolu nalo nei nalo aju amijog bo bogo nonovio ea kialo burum̄ara jokoluolu nalo,*

*a nebika denso ka kola kialo jogvuiano nei rime i tibe vite tai napano mila bulag vatitiglo, senlo bere, mila ka nalo maka ajikia avitilubar ka kialo uolu nalo aju vaataro kalo ga.*

<sup>10</sup> *Bo ka jau kolalo tibe miralo rime i ribono, ka nalo maka ajikia avitilubar vite, a jau kola napano kialo uolu nalo ayukyukulo ka aim̄au kurano, nalo avar vite nalo na temi ea taakalo.” Iouano 69:22,23*

<sup>11</sup> Ana ea tivelinio na Ju nalo, Atua maka rivuku bulaglo, be riano, nalo abano bova kija. A kialo vovaiano na mila Atua milarur tomu nalo na maka ave Ju, a bogo napano Ju nalo amialio napano Atua tineni miia bunu nalo dolu na, amialio kirivova, amijoku kalo, ana mila amila vonio ka nalo bunu monoka amei rimemedu vija Atua bereio.

<sup>12</sup> Ana nina berenio ka kulo Ju kialo bajago, napano maka amonea Yesu, naina mila m̄arabo na Atua kiano viekokoano a kiano ioruriano mijikia rime i rivokar tomu nalo na maka ave Ju. A ver Ju nalo bunu amonea, nalo amonea vanvan rivokar napano Atua berenio, mia mijikia rila napano kiano ilivuiano nalo amei ve toru lie.

<sup>13</sup> Bo ga, vonganei nojidom nesian iliano ve telisu ea tivelinio na kamiu napano maka kuve Ju. Kiniou nebe atevi napano Atua bitirilal kiniou ka navan reraio ka neverial kiano Ioluanu Vou van kamiu, a nina im̄auano tai napano nojo nomila von

vatitig ka nalaio, bior napano namial bo laka.

<sup>14</sup> Nina bior napano nemial ka bogo napano nomioliolu ka ban kamiu napano maka kuve Ju, kamiu kumitu kumonea, a mila napano kumemi kulo Ju nalo tealo ajidom ka nalo bunu monoka atu joomo, ana nalo bunu amoneaio.

<sup>15</sup> Nua, Atua bilig dabu naio ka kulo Ju, a nina mila vonganei naio bitii nalo napano maka ave Ju, jidom ka rila kialo m̄arabo ka ajikia amei ave merevu vija naio bereio. A ver Ju nalo aviliglo a nalo bunu amei bereio ea Atua, mia rivu mia rivu, bior napano vonganei nalo ajibe tanunu, a ver amonea Yesu, mia atibe ka napano abinime i ameul bereio.

<sup>16</sup> Mia kiniou never jamerijiano tai ea vio nei ea tivelinio na m̄ariesi moti nalo napano roju robario ban ea yimo na volkouano, rober siva ka Atua biorio, romioa rive lu. Mia bogo napano rojian m̄ariesi moti ban Atua, mila na m̄ariesi dolu nonovio napano maka rosiano, nalo bunu abe lu, abe Atua kiano. Ana kulo Ju kialo tormoru nalo ajibe m̄ariesi moti nalo napano aban ea Atua kunuano beamu, a nina mila ka Ju dolu nalo napano abinime i iorou, nalo bunu ave Atua kiano. A bereio, tormoru nalo nei ajibe burupati iesi tai napano ju miluo joomo ea Atua kiano tiniavio, a verenio burupati ve Atua kiano, mia jaati nalo napano amei iorou, nalo bunu ave Atua kiano.

<sup>17</sup> Ver tibe na, burupati na bija jaati nalo aberenio ga Atua kiano tomu nalo, jibe Ju nalo. Mia iorou, Atua mial jaati tealo abova, naruei burekokorovlo, a ba je vatitig iesi dolu tai jerati nalo napano jo ga yeturu, ana midu binime i, je vatitiglo a miasol lo aba vio takurano ea burupati napano jo jouro ea tiniavio, nalo amidu jeleig jerati dolu nalo napano burekorovlo ruei. Jerati dolu nalo napano abinime i amijurukar burupati nei, naio berenio kamiu nalo napano kamiu maka kuve Ju. Kamiu maka kuviyotuba ea burupati na Atua kiano tomu nalo memedu, a naio jidom ka kamiu bunu monoka kuvijurukar vija nalo joomo ea kiano tiniavio, ka kamiu nonovio kuvokar kiano ioruriano nalo.

*Nalo napano maka ave Ju, maka ajikia avarkalo ka Atua burulo*

<sup>18</sup> Jibe na, kamiu napano maka kuve Ju, monoka kuvarvar re napano Atua miasol kamiu bija kiano tomu nalo, bior napano maka kuve burupati, a kube jerati nalo ga napano Atua miasol kamiu ea burupati nei napano jo beamu ruei. Jerati nalo maka ala burupati meul, a burupati naruei jo mila jerati nalo ameul.

<sup>19</sup> Bereio, maka rivu kamiu kuvisidomii ka kamiu kubo, naruei kuver O, Atua jidom rñelea kumemi, ana bure kokorov jerati tealo na burupati neibano ka rila kumemi nuvijikia nuviasolio.

<sup>20</sup> Be riano napano Atua burkokorov jerati tealo, a mila ga ban Ju nalo napano maka amonea Yesu, a be riano napano naio jidom kamiu kuviadol, a nina maka rivior napano kumila vite novo nalo tai, a bior napano kumitu jikili ea kenemiu viek-ouoiano ea naio. Jibe na, kamiu kuvarvar ka re napano kubinimei jibe Atua kiano tomu nalo, a monoka kuviturmaro ka kuvisidomii vatitig vite novo nei napano Atua mila ban kamiu. A kamiu monoka kuvitakar vatitigio bunu, <sup>21</sup> bior jibe napano Atua buku bulag jerati moruo nalo nene, napano kiano tomu nalo na maka amonea, mia naio mijikia rivuku bulag kamiu bunu jerati vou nalo be verare ga, ver maka kuvitu kuvar m̄ariesi novo nalo.

<sup>22</sup> Jibe na, ea vio nene romial tivelinio be juo na Atua kiano bajago. Ea tivelinio takurano nene, kiano tiniemimiano jikili napano jikili ea nalo napano ajibiribil, napano maka atu sikili ea naio, tibe kulo Ju nalo. Mia tivelinio dolu nene, naio tinien vuui laka ea nalo napano maka ave Ju, nina nalo napano ajaaro kanio aaju ajakii vatitig naio. Mia nalo bunu, ver nalo atu re sikili, naio mijikia telarlo bereio den burupati novo nei napano aju amiasol eaio.

<sup>23</sup> Nina naio mila ka kulo Ju nalo ruei. Nalo maka amonmonea, ana je bulaglo, a ver aviliglo, amijikia amei bereio ana Atua mijikia riasol vatitiglo ea burupati bereio tibe kiano tomu nalo riano.

<sup>24</sup> Naio mila jibe na ka kamiu napano maka kuve Ju nalo, bior napano kamiu jibe jaati iesi na yeturu, a naio buru kamiu kubinimei, miasol kamiu ea burupati napano joa kiano tiniavio, ana kumijurukar bija ilivuiano nalo napano naio jidom sian van kiano tomu nalo. A ver mila ka kamiu ruei, mia mijikia rila bunu ka Ju nalo napano naio je bulaglo, bior ka naio jaaro ka riasol vatitiglo bereio ea burupati nene napano amiasol vatitigio eaio beamu ruei.

*Atua jidom ka kulo Ju nalo avokar ioruriano*

<sup>25</sup> Bilbilu nalo, kiniou nojidom neverial van kamiu napano maka kuve Ju nalo, ka monoka kuvitilubar ka Atua maka rivukular kiano tomu nalo nei kulo Ju.

Be riano ka nalo aju pariparilo jikili keano a maka asidom amonmonea, ana naio juvanlo kija ga beamu, a jo mila ka kamiu napano maka kuve Ju nalo kumijikia kumonmonea, kumijikia kumei

ve miroano joomo riva vokar bagaro na toru napano Atua jidomio. Vite na jibe vite luku tai napano tomu nalo maka ajikiaio beamu, a vonganei Atua mila meravo. Mia kamiu monoka kuvijikia vite nei, bior bova ka kamiu kuvarvar ka kamiu kuveriamia Atua jidom kamiu ga, naio maka bunu saaro ka Ju nalo.

<sup>26</sup> Maka tibe na, a mia naio rilaurlo kean navo, tibe iliano tai ea Vivitauiano Lu, napano berio jibe nei, ber

*“Toro na rilaur kito Atua kiano tomu nalo, mia riyotuba ea kiado vio ga, ea kiado komeli na toru Yerusalemo mave ea burusuku nei Saion.*

*Kito Yakovo kiano yati, kito kulo Ju napano kiado vovaiano nalo telabo laka, a naio naruei mia rimei rivar bulagio nonov kiado vironiano, rila kito rovu bereio.” Ais 59:20,21*

<sup>27</sup> Iliano dolu tai ea Vivitauiano Lu berialio Atua kiano verikariano tai ea tivelinio na bunu, napano ber jibe nei, ber

*“Kiaku verikariano ealo ju ruei, ka mia navar bulag kialo kariano denlo, noviekokoalo aviniu.” Ais 27:9*

<sup>28</sup> Bogo napano Ioluanu Vou maluvo ea Ju nalo, nalo maka asidomio, ana ea tivelinio tai nina bo, bior napano rila ka kamiu napano maka kuve Ju, Atua midu bogo ka kamiu kija ka kumoneaio. A ea tivelinio dolu nene, nina bova bunu, bior ka mila na Ju nalo abinimei jibe na abe Atua kiano uolu nalo bereio. A Atua maka rijikia rivitiilo ka ave kiano uolu dam̄ariga, naio monoka tinien riialo bereio, bior naio maka rijikia tinieni ribobogia verikariano novo nalo napano naio mila ban korobilo moruo nalo na kiano tomu nalo nei, kulo Ju nalo.

<sup>29</sup> Atua berkar ilivuiano nalo banlo ruei, a naio bio nalo na abe kiano ruei, a mia maka jikia tibukua bereio kiano jidomiano bogo tai.

<sup>30</sup> Jibe na, naio mir̄au ea kito jibe nei. Beamu, kamiu napano maka kuve Ju, kamiu maka kumonmonea Atua, a bogo napano kumemi Ju kumemi maka numonmonea Ioluanu Vou, nina mila kiano m̄arabo ka tinien riia kamiu.

<sup>31</sup> A bogo napano naio tinien miia kamiu jibe na, mila napano kumemi numonmonea Ioluanu Vou, ana mia naio mijikia tinien riia kumemi bereio.

<sup>32</sup> Nina naruei Atua kiano jidomiano jibe na naruei. Beamu, naio mijamo ka kito robinu roiel ea m̄arabo na maka rosidom rojog kiano iliano, mia rila ka naio rijikia tinien riia kito, rijikia rivuru kito nonovio ka romei rove kanano.

<sup>33</sup> Bilbilu nalo, Atua kiano ilivuiano nalo ea kito tortoru laka! Kiano masouano



nalo a kiano jikiaiano nalo abavavin mave! Kiano jidomiano nalo bululuo tanea, a kiano bajago nalo abo julaka! <sup>34</sup> Jibe napano iliano tai ea Vivitauiano Lu berenio

*“Maka lele toro tai napano vare ka rivakar venia napano joa Atua kiano jidomiano, maka lele toro tai napano mijikia sian iliano na ijaiano van Atua.*

<sup>35</sup> *A maka lele toro tai napano mila bo ban Atua bare napano rijikia rila Atua saaro ka ridu kiano ilivuiano novo nalo vano, tibe napano naio jo jian ban kito.”* Jop 41:11

<sup>36</sup> Mia kiniou neiasol iliano na, neber: Kiado Atua, naio takurano be burupati na vite nonovio, naio takurano be moroano na vite nonovio, naio takurano be juluvati na vite nonovio, ana bo ka kito rovinu roiaia naio to toboto.

## 12

*Bajago novo na toro napano monea*

<sup>1</sup> Bilbilu nalo, jibe ka Atua tinien miia vatitig kamiu, mila bo laka ka kamiu, nojidom novika sikili van kamiu ka monoka kuvijamo ka kenemiu meuliano momou van naio. Kamiu monoka kuve lu rivu, tibe napano kumioa mokotenemiu ban naio jibe sida tai napano kumidu banio. Naio maka sida tai na jibe temeul tai napano amuebin m̄aro, a naio be sida tai napano meul, a mia Atua mijikia saaro laka kanio. Nina naruei bajago novo na ala lotuano van Atua napano memedu ka kuvilaio.

<sup>2</sup> A kamiu kuvijamo ka re vovaiano na yetemeriba nalo nei avuru kamiu kuvitakii kiano bajago nalo, a bogo nonovio, monoka kuvijamo ka Atua rila kenemiu jidomiano to rimej rive terivou bereio. Tibe na, mia kenemiu bajago mijikia riviligio, mijikia rimej rivu bogo nonovio, a mia kamiu kumijikia kuviel kuvitakii Atua kiano tinieiano, napano bo, kirinovo, a memedu mia memedu julaka.

<sup>3</sup> Kiniou neberial iliano nalo na ka kamiu bior napano Atua ve tiniesese ka kiniou, bijauialar kiniou midu in̄auano nei naruei joa juñaku. Mia nojidom never vite tai bereio ka kamiu, napano bova kuvitu kumila kenemiu jidomiano bavin laka. Kito rola kiano in̄auano nalo tum̄abe, a kiado jidomiano monoka rimemedu, monoka to yetano ga.

<sup>4</sup> Kito maka rojikia rosidomii ka robo lie ka dolu nalo, bior napano rojibe mokoteno toro takurano ga, napano be yati nalo nene a yati nalo nene, be kialo in̄auano terakurano ka alaio.

<sup>5</sup> Jibe kito miroano, mia Kristo midu kito robinu robinimej robe takurano, ana jibe napano kiniou nojo banso, jau kojo ban kiniou.

<sup>6</sup> Atua be kiano tinieseseiano ka kito, mijamo ka jikiaiano dolu nalo ban kito, napano jibe jidomiano nalo na naio jian bulagio ban kito ka kito roin̄au vijaio. A kito terakurano monoka rosikili ka roin̄au vija venia napano naio jian ban kito. Jibe nei

ver Atua rijamo kaso ka rive kiamo ka koverial iliano napano naio jian banso, ana monoka kolaio vija moneano ve toru ka kiano iliano nei be riano laka,

<sup>7</sup> ĩeli ver rive kiamo ka koin̄au ea yimo lu, monoka kolaio vija kiamo moroano momou,

ĩeli ver rive kiamo ka koverloglog tomu nalo ka Atua kiano iliano, monoka kovarso vatitig ka kolaio,

<sup>8</sup> ĩeli ver rive kiamo ka kotunukakar tomu nalo kialo jidomiano, monoka kosidomii ve temi ka kolaio,

ĩeli ver rive kiamo ka kosian jidomiano nalo ka ijaiano, monoka kovario ve miroano,

ĩeli ver rive kiamo ka kovuru m̄arabo ka Atua kiano in̄auano, monoka koyovo re,

ĩeli ver rive kiamo ka keija nalo napano ajua bogokouo, monoka kosaaro ka kolaio.

<sup>9</sup> Ana ninei naruei bajago novo dolu nalo na mia kuvilaio:

kenemiu tinietiano ea tomu dolu nalo monoka rive riano,

monoka kuvitaluvo ea bajago va nalo, monoka kuvakar vatitig rivu bajago novo nalo,

<sup>10</sup> monoka kuve tinieimiu titi ea kamiu tibe kube torogio takurano,

monoka kuvila vio sikili ka kuvial ka kei naruei mijikia rila bajago na vame-neano rivan lie,

<sup>11</sup> monoka kuvijamo re ka kenemiu jidomiano sikili na laiano na tonovo nalo rivakovio bereio den kamiu,

monoka kuvila ka sebi na Niununo Lu to meul rivu ea kamiu,

monoka kuvin̄au Tubo kiano tulaka,

<sup>12</sup> monoka kuvisaaro ka Atua kiano verikariano nalo napano kenemiu jidomiano balea naio ka mia naio rila rivu ka kamiu tibe ga napano naio berenio,

bogo napano kubiniua jogvaiano, monoka kuvila kenemiu jidomiano rive tebievi,

monoka kubolkouo tulaka,  
<sup>13</sup> bogo napano namoneano dolu nalo maka ve kialo tenalo tai, monoka kuvisaaro ka kuvisian saba vanlo, a monoka kuvisaaro ka kuvitikar tomu dolu nalo ea kunuemi.

<sup>14</sup> A nina naruei vite nalo tealo napano monoka kuvisidomiio ka kuviniñaukanio van tomu dolu nalo:

ver tealo aju amila niegeniege kamiu kar napano kumonea Yesu, monoka kuvila rivu kalo. Kuvil re rivova vanlo, a kuvika Atua ka rilivu kalo,

<sup>15</sup> ver tealo amijog bo kar vite novo tai, kamiu bun u monoka kuvisaaro vijalo, ver tealo aju ajegi bior vite tai, kamiu bunu monoka kuviteg vijalo,

<sup>16</sup> ver kamiu kuvija kulo dolu nalo, kamiu monoka kuvitu vatitig vijalo, napano ve kenemi jidomiano ve takurano ga,

ver kuviniñau vija kulo dolu nalo, kuvidu re kamiu kuvitu mave kalo kuver kamiu kubo, a kamiu kuvisaaro ka inñauano na tertelisu nalo a kuvisaaro ka kuviasol vija tomu nalo na tertelisu, ver kuvila titai nalo, a kuvisidomi re ka kube masou, a kuvila kenemi jidomiano to yetano,

<sup>17</sup> ver tomu tai ala rivova ka kamiu, a kuvila meran re rivova vanlo, a bogo nonovio monoka kuvisidomi ka kuvila vite nonovio napano mia tomu nalo amijikia avitilubario ka bo a memedu,

<sup>18</sup> a ver kenemi vite va tai jo iviso ka kamiu bija tomu dolu nalo, monoka kuvila vite nonovio napano ajua jumemi ka ridu tumaro to bereio ea kamiu kuviniu.

<sup>19</sup> Bilbilu nalo, tinioku jii kamiu laka, naruei nojo neber tenalo nei ban kamiu. Tealo lie ajibe nei, berinavo

ver tomu tealo ala rivova ka kamiu, kuvila vonio re ka kuvije vironiano vanlo. Kumijikia kuvituvan rivan Atua ka naio tiburelo iorou, bior napano iliano tai joa Vivitauiano Lu ruei, napano Atua berenio ber

“Kiniou naruei mia nesian vironiano van tomu nalo, kiniou naruei mia nodu kean van nalo napano amila bova.” *Tiut 32:35*

<sup>20</sup> ver be kenemi uolu nalo aju, kamiu monoka kuvila rivu kalo, jibe napano iliano dolu tai ea Vivitauiano Lu berenio, napano ber

“Ver kiamo uolu jjerio, kodu sinaniano rivanio, ver midou jerio, kodu uei rivanio.

*Verver kola tibe na, mia jau kola naio rimou laka ka kiano bajago va, rivano ðeli naio jaaro ka rila bilbilu rivu vijaso bereio.” Ilimasou 25:21,22*

<sup>21</sup> Takiiano na tenalo nei, kiniou neber jibe nei ka kamiu, neber kamiu kuvijamo ka re bajago va tovulu kamiu, a monoka kuvitovulu bajago va vija ga kenemi bajago novo nalo.

## 13

*Namoneano nalo monoka avatove ka parinio tubo nalo napano Atua bitiri bulaglo*

<sup>1</sup> Vonganei kiniou nojidom naver iliano nalo tai ea tivelinio na navuriñaraboiano nalo. Kito romijikia ka Atua naio jo mave laka, naio be Tubo ka vite nonovio, a naio naruei bitiri bulag parinio tubo dolu nalo napano aju, a midu moroano banlo. Jibe na, kito namoneano nalo robinu monoka ravatove ka parinio tubo nalo nene, monoka romonmonealo.

<sup>2</sup> Tomu nalo napano ver aju amila vonio ka atukovio ka parinio tubo nalo, nalo aju ajukovio ka tena Atua bitirilario, a mia Atua mijamo ka parinio tubo nalo amijikia asian vironiano vanlo kario.

<sup>3</sup> Parinio tubo nalo, Atua maka vitiri bulaglo ka ala tomu novo nalo ka amerou, a naio bitiri bulaglo kar nalo napano aju amila kokorov tuboiano. Nalo na naruei monoka amerou, bior napano ver parinio tubo nalo avokarlo mia asian vironiano vanlo. A ver jau kosidom ka komerou ka re parinio tubo nalo, mia monoka kola memedu ga ka venia napano tomu na tortoru aberenio, naruei mia nalo maka ala rivova kaso, mia ajaaro kaso.

<sup>4</sup> Atua midu bulaglo ajibe kiano tomu na inñauano nalo, ka ala inñauano novo ka avitikar tomu nalo, a ver jau kojidom kola pariparimo, monoka kovitikar vatitigio, bior napano aju abar nia bunu, a maka atu avar kurano. Atua bitiri bulaglo, midu joa juñalo ka asian vironiano van nalo napano amila bova.

<sup>5</sup> Jibe na, bo ka kito ravatove ka parinio tubo nalo, bior bova ka rola rivova ana nalo aje vironiano van kito. A nemijikia ka kiado jidomiano jo bitilubario ruei bunu ka bo laka ver roju romila vite nalo memedu ga julaka.

<sup>6</sup> Jakii iliano nalo nei, memedu ka rosaaro ka rovulu takis napano monoka rosian van parinio tubo, bior ka bogo napano parinio tubo mila ka kiano inñauano, jo mila inñauano napano Atua jian banio ka rinñaukanio.

<sup>7</sup> Jibe na, monoka rola vite nonovio napano memedu ka rolaio. Ver takis tai ea tivelinio na veru napano roju robario, ĩeli veru kinkin nalo napano monoka rovukuio ka vite nalo, kito monoka rovuluio. A nalo napano abar inăauano nalo na tortoru ĩeli abar sio na tortoru joomo ea parinio tubo nalo, memedu ka kito rovatove kalo, monoka rosaaro ka rovame-nealo.

*Namoneano nalo monoka ala rivu ka tomu dolu nalo*

<sup>8</sup> Todolu tai, naina ea tivelinio na jabue nalo na tomu nalo aju amilaio. Ver komila jabue ea toro tai, jau monoka kodukian ka vanio rimemedu ga ka venia napano kam juo kuberkario. A bo jau tiniemo maio ka bunu ka kiamo jabue tai joa Atua bunu, bior ka napano naio jian titai banso naio toru laka ruei. Tenena naio be tintetiiano, ana monoka koto kovar keano vatitigio van tomu dolu nalo. Jau monoka tiniemo tii nalo napano aju vaataro kaso, kar toro napano jo mila jibe na, naio jibe napano naio monmonea nonovio Atua kiano tuboiano nalo garuei.

<sup>9</sup> Iliano dolu nalo miroano ju joomo ea tuboiano, jibe nalo na aber jibe nei, aber jau kola re siakaiano, a jau kouebin re toro rinăaro, a jau kovina re, a jau tiniemo tii re tenalo na toro dolu kiano, a iliano dolu nalo na jibe nei. A iliano nalo na tuboiano nonovio, aju yetano ka burupati tuboiano na toru tai, napano naio ber jibe nei, berinavo: Jau monoka tiniemo tii toro dolu napano jo vaataro kaso, kala rivu ka naio jibe napano kojo komila kaso bereio.

<sup>10</sup> Toro napano ver naio tinien jii toro dolu be riano, mia naio maka leleio rijikia rila titai napano bova kanio. Jibe na, bajago na tintetiiano na toro naio mijikia rila ka jibe napano komonmonea nonovio iliano na tuboiano berenio.

<sup>11</sup> Kito monoka rola bajago novo nalo na, bior vonganei bogo jo bano. Monoka rovitilubar ka vaataro ka bogo na monoka rotumolu vatitigio, romonmelio re bereio. Bogo na kito romonmonea vonga beamu, rober ĩeli mia Atua rilarrur bulag kito ea yetemeriba nei kirisiou kia ga vo, a vonganei, binimeia vaataro ruei.

<sup>12</sup> Kiniou nemijikia never tibe nei, never bogiano vaataro ka ribisi, legiano jo binimei, ana bo ka robisi ka bajago va nalo na melijokouo, a monoka ravar tenalo na bajago vu na miamoiano, ka romijikia ravan ka rola mira kean tenalo na bova.

<sup>13</sup> Kiado meuliano monoka rimemedu vatitig, tibe napano kito tomu nalo napano roju romieliel ea legiano, a mia monoka

rotuvan bajago va nalo. Kito rola re bunu jokoluolu kinkin nalo napano abujo ka saariano nalo na yetemeriba a tomu nalo amun uei banbano amilaluv pariparilo. Kito rotu re rola ka tomu nalo vija tire nalo atu avuruvurulo tanea vio a atu ala bajago na be soro nalo. Kito rotu re rola baravo, a rotu re roiasol ea jokuano nalo.

<sup>14</sup> Kito monoka rotuvan bajago va napano romiyotuba bijaio, a rosidomii re bunu ka rotakii kiano sidomiano nalo, a jibe na roju romiya kiado kuluăarauo meravo bo ea tomu nalo miralo, monoka roya bajago na memedu nalo na Tubo Yesu Kristo ea kiado meuliano, ka tomu nalo aialio ka kito kanano tomu nalo be riano.

## 14

*Bo ka namoneano nalo atu re ail niege-niegelo bereio ka tenalo na tertelisu ga*

<sup>1</sup> Bilbilu nalo, nojidom ka kamiu kuvi-jikia ka kiniou nomijog ruei ka iliano na toru tai joa kamiu vonganei.

Jibe tealo, kialo jidomiano telabo ea tenalo tealo, aber ĩeli bo ka ala ĩeli bova ka ala, mia nalo amerou ka verver alaio, ĩeli mia Atua maka bunu saaro kalo.

Kiniou nojidom never ka nalo jibe nei, nomial nalo jibe maka atu sikili vo, mia bogo na nalo aju bija kito, kito monoka rala vonio re reilkuei laka kalo, mia rosaaro ka rovululo.

<sup>2</sup> Jibe na, tomu tealo amijikia asen non sinaniano ninio vija bunu sunbue nalo, mia tomu tealo ajidomii aber Atua jidom ka monoka aveli ka sinaniano tealo, ĩeli aveli ka sunbue.

<sup>3</sup> Vonganei nojidom never ka kamiu, verver jau tai napano kojen sunbue, jau kovitiiu rivova re ka toro dolu napano naio bel kanio, a ver jau tai napano jau kobel ka sunbue, jau kotibure re naio napano jo jenio, kober mia Atua ridu vironiano van naio kario. Atua naio jaaro ka kamiu nonovio, mia kamiu bunu monoka ku-visasaaro ka kamiu.

<sup>4</sup> Namoneano nalo abiniu aju abitii Atua ga ka naio be kialo tubo, ka naio ga mijikia river kalo ve terakurano ka nalo ala nina ĩeli nalo ala re ninei. Ana jibe na, maka rivu kito ga rotu rotibure kito bereio. Atua mial napano kiano tomu tealo nalo ajen sunbue, a tealo maka asen sunbue, mia naio jaaro ga ka nalo abiniu, kar napano naio mijikia ka mia Tubo Yesu mijikia to rijailo bogo nonovio ka asikil atu sikili ea naio.

<sup>5</sup> Mia nina naio bare ka bunu ea tivelinio na bogoti nalo. Tomu tealo nalo amidu bogoti tai ka be kialo bogoti lu, a tomu tealo

nalo amial bogoti nonovio aber abiniu abe verare ga. Nina bo ga, mia kito rovinu ve terakurano monoka rala kiado jidomiano, a resikili rotuaio, a mia royuku re toro dolu ka takisor kiado jidomiano.

<sup>6</sup> Toro na jikili ka ridu bogoti tai tibe kiano bogoti lu, naio mila kar napano jidom ridular Atua siano eaio. Toro na jaaro ka sen tenalo ninio, naio jo ber siva ban Atua kario, ana jibe na, bogo na jinano, jo midular naio siano. Toro na mila naio bel ka sinaniano tealoo, naio bunu jo mila ka ridular Atua siano, a naio bunu jo ber siva ka Atua ka sinaniano dolu nalo na jo jenio.

<sup>7</sup> Kito monoka rosidomii ka maka kito tai napano rijikia toa yetemeriba nei tibe naio takurano ga, ka rila tenalo nonovio tibe ga napano naio takurano jidomio, a maka kito tai napano ver rimaro, mia nina kiano tena naio takurano.

<sup>8</sup> Maka tibe na, bior ver romeul, kito romeul ka rodular Tubo siano, a ver romaro, romaro ka rodular siano. Jibe na, tenalo na kito romilaio, monoka rolaio vija jidomiano napano maka rala kiado sidomiano, mia robe Atua kanano, mia ratakii kiano sidomiano.

<sup>9</sup> Nina kar napano nua na, iorou ka Kristo m̃aro, naio jumolu meul bereio, mia nina mila naio binimej be Tubo ka nalo na am̃arm̃aro a be Tubo ka nalo na ameul, mia bogo nonovio monoka rotutano ka kiano sidomiano.

<sup>10</sup> Mia jibe na, bogo na namoneano tai jo mila tenalo jakii Ju nalo kialo bajago moruo, a naio jo jibure namoneano dolu napano maka to rilaio, nina bova laka. A bunu, bogo na namoneano tai maka rila tena jibe na, mia naio jo bitii va ea tai napano milaio, napano naio jibe kurvano tai joomo ea Atua kiano bajulukuti, nina be bajago na imouiano tai na.

Kito rotu rotiburevure re kito, kar napano mia kito rovinu rosikili rotu kamu ka Atua mirano na vo, a naio naruei mia rivitii veve vatitig venia napano kito robinu romilaio.

<sup>11</sup> Tena joa Vivitauiano Lu nalo ruei, napano Atua mil, berenio

*Kiniou nemeul nei nojo, mia nemijikia never memedu ka bogo na rimej napano mia tomu nonovio anietano kamu ka miraku,*

*a mia tomu nonovio averial ka kiniou takurano nebe Atua. Ais 45:23*

<sup>12</sup> Tibe na, mia kito rovinu monoka remej kamu ka Atua mirano, a mia monoka reverii veve terakurano veriiano nalo na

tenalo napano roju romilaio, a naio naruei mia rivitii veveio.

*Jau monoka kala re kiamo bilbilu dolu, kiano viekouoiano rijoru*

<sup>13</sup> Jakii jidomiano nalo nei, kito monoka rotu re rovitii laka kito bereio ka roverii venia na toro dolu milaio, rober bo p̃eli bova. Mia venia na kito namoneano nalo monoka rosidomii ka rala ea kito bereio, mia jibe nei, monoka rala re titai napano p̃eli rila namoneano dolu tai rijikia rila luvu m̃arabo p̃eli rijikia rivuru naio riva rijoru ea kariano.

<sup>14</sup> Jibe verver kiniou nosidomii ea kinio, nemijikia never ka nojo noju jikili vatitig bija Tubo Yesu, ana nomonea jikili ka maka titai napano monoka reveli kanio, maka resenio. Mia ver namoneano tai rivar jidomiano ka sinaniano tai maka rimemedu ka naio senio, nina bo ga, mia nioti nene ber monoka rivel vatitigio kanio, a kito kulo dolu nalo monoka rojamo ka naio takii kiano jidomiano na.

<sup>15</sup> Ana verver jau kojidomii ka sinaniano nalo abo ka asenio, komijikia koto kalala ga, mia ver kurvano dolu naio bel kanio, jau kala vonio re ka naio bunu monoka senio. Ver maka, mia komijikia kola bulag vatitig kiano jidomiano, a nina maka bajago novo tai na kito tomu nalo napano tiniedo titii kito ka rolaio. Jau monoka tiniem maiio ka Kristo m̃aro ka rila kiado meuliano rivu, mia maka rivu rotuvan jidomiano tertelisu nalo tivelinio na sinaniano nalo amei ve tena tortoru nalo napano atu ala bulag kiado meuliano bereio.

<sup>16</sup> A bereio, ver vite tai napano jau komialio ka bo ga ka kolaio, nina bo ga, mia maka rivu ka koto kolaio ana rila bulag namoneano dolu kiano jidomiano, rivanvano-o rila tomu dolu ail niegeniege kito namoneano nalo siado rivorio. <sup>17</sup> Ea vio na roberenio ka iliano nalo na tivelinio na ka mia romijikia romunu venia p̃eli rosen venia, p̃eli monoka roveli ka uei p̃eli sinaniano vabe, mia monoka tiniedo bobogia re ka nina maka ve tena toru tai joomo ea Atua kiano navenatuboiano na. Mia kiano tenalo na tortoru, naina rala bajago novo ea meuliano napano memedu, a rotua tum̃aro vija tomu dolu nalo, a rovakar jogvuiano napano Niununo Lu jo jiano.

<sup>18</sup> A bogo napano rodu tenalo na rimej ve toru ea kiado jidomiano, romila im̃auano memedu napano Kristo jidomio, ana mia Atua risaaro laka ka kito rivorio, a mia tomu dolu nalo aialio ka bo laka.

<sup>19</sup> Jibe na, bogo nonovio kito rovinui monoka rala vonio sikili ka roimāuka bajago novo nalo napano amijikia adu tumāro toa kito namoneano nalo, a napano aijaja kito ka rovinui kiado jidomiano rimeiri rimeruo vatitigio.

<sup>20</sup> Sinaniano naio jibe titai kurano, mia maka rivu ka rola naio rimeiri ve tena tai mia rila bulag bereio imāuano novo napano Atua milaio ea namoneano dolu nalo kialo meuliano rui. Kiniou neber jibe na, ka sinaniano nonovio ga bo a memedu ka asenio, mia bova ver jau kosen vite tai ana toro dolu rialo a rila naio rijoru, naio rila tena napano naio ber pēli maka rimemedu ka naio rilai.

<sup>21</sup> Mia bajago novo na rola tibe na, ka mia kosen re sunbue, pēli mia komunu re mārjumēlū, pēli mia maka kala todolu tai bereio, ver bogo napano kuruamo rialo, mijikia rila bulag naio, mijikia rila naio rijoru.

<sup>22</sup> Tibe na, ver jau kiamo jidomiano nalo tai ea tivelinio na vite nalo tertelisu napano kojidomii kober bo ka alaio pēli kojidomii kober bova ka alaio, naio bo, mia jau kovakar vatitigio rivu atu ve kamjuo Atua ga, jau kavan re koiolio lu ka tanea vio. Toro napano mila ga vite napano naio mijikia ka memedu ka rilai, mia Atua jaaro kano, a naio maka rijog rivova ka naio rila vite va tai.

<sup>23</sup> Verver toro na mā jidom veve juo ea tivelinio na venia napano mijikia senio, mia jenio kia ga rui, mia Atua risaaro kano re. Nina bior toro na be kiano jidomiano rui ka pēli maka rimemedu ea Atua mirano ka alaio, be iakurano, naio milaio. Tibe na, naio mila kariano rui na, bior naio maka rināu vija jikiaiāno ea venia napano bo pēli bova ea Atua kiano vitiano.

## 15

*Kamiu kuvila von ka kuvijuku rivu van kamiu bereio*

<sup>1</sup> Kito miroano roju jikili ea Kristo ga, a maka rotua jidomiano ve juo ea tivelinio na vite tertelisu napano namoneano dolu aju amila baravo kano. Mia kito jibe nei monoka rotu re rala venia ga napano rojidom ka ralaio, mia monoka rola kiado jidomiano rive tebievi rivu ka namoneano nalo dolu napano ajidomii ka maka ajikia ala vite tai napano rojidomii rober bo ka ralaio.

<sup>2</sup> Kito robiniu, monoka rosidomii namoneano nalo dolu napano aju vaatāro ka kito, a monoka rola venia napano nalo ajidomii aber bo, ka nalo asaaro kano, a ka rijai kialo meuliano vija Tubo.

<sup>3</sup> Ver kito rosidomii Kristo, naio joa yetemeriba maka rila venia napano naio jidom ka rilai, mia naio binuia bogokouo telabo, amila ka naio jibe napano iliano tai ea Niosi na Iouano nalo berenio, napano toro tai mil ban Atua, berinavo

*Iliano va nalo napano abuku banso, abuku bunu bare ea kiniou. Iouano 69:9*

<sup>4</sup> Iliano nalo jibe na napano ajua Vivitauiano Lu re nua, abivitauiāka averloglog vatitig kito napano robinimeiri iorou, mia rovlukuio amijikia ala kiado jidomiano sikili vatitigio ka kito bunu romijikia ka rovar dolu bogokouo nalo. Iliano nalo nei atunukakar kito, nalo ala kito rojikia vatitig ka mia monoka rotovulu vite nonovio napano Atua berkario.

<sup>5</sup> Jibe na, kiniou nojo nobolkouo ban Atua ka kamiū, kar naio naruei be burupati na jidomiano tebievi, naio naruei mijikia tunukakar toro kiano meuliano. Nebika ka naio rila ka kamiū kuvitu kuvitakii Kristo Yesu kiano bajago, kuvitu rivu vio takurano vija bajago na viro-niano, <sup>6</sup> napano kenemiu jidomiano ve takurano ga, a kenemiu iliano ve takurano ga, naruei kumijikia kuviaia vatitig Atua, napano kiado Tubo Yesu Kristo karamāno.

<sup>7</sup> Jibe na, kamiū kulo Ju bija kamiū napano maka ave Ju, bogo napano kumitu kubinimeiri vio takurano, a kumisaaro ka kumil vorvoru kamiū nonovio kubinimeiri jouro, jibe napano Kristo jaaro ka rilivorvora kito. Bogo napano kumila jibe na, naio be mārabo tai bereio ka adular Atua siano.

<sup>8</sup> Mia bo ka rola tibe na, bior napano Kristo binimeiri ea yetemeriba, maka rila imāuano rivan kulo Ju nalo ga, mia mila bunu ban nalo napano maka ave Ju.

Jibe ea tivelinio na kulo Ju, naio mila nonovio vite napano Atua kiano Iliano Lu nalo aberenio, mila napano verikariano nalo napano Atua mila ban Ju nalo kialo bajulukuti, nalo amolmouo abe riano.

<sup>9</sup> Mia ea tivelinio na nalo napano maka ave Ju, naio berial Atua kiano tiniese-seiano banlo, mila ka nalo aiaia naio, bare ga ka iliano na Vivitauiano Lu nalo aberenio. Nana beamu kito jua Niosi na Iouano nalo, ber

*“Kiniou nojo iviso ka valauo nalo, nemiaia siamo, mia kiniou nolotuso ka iouano lu nalo.” Iouano 18:49*

<sup>10</sup> Mia dolu, ea Niosi na Tuboiano nalo, berinavo

*Kamiū valauo nalo, kamiū kuvijurukar vija Atua kiano tomu nalo memedu*

*nei kulo Ju, ka mia kuviniu ku-  
visaaro!  
32:43*

<sup>11</sup> A tai bereio ea Niosi na Iouano nalo bereio, berinavo

*Kamiu napano maka kuve Ju, kuvidular  
Atua siano mave,  
kamiu tomu nalo dedade, kuviaia naio.  
Iouano 117:1*

<sup>12</sup> A tai na maaro miyotuba ea Niosi na Aisea, naio berii Ju nalo kialo Naverikariano, ber mia naio tukamu bunu ka nalo napano maka ave Ju. Naruei iliano nene ber jibe nei, berinavo

*Mia tormoruo Jese kiano torogio tai rimoluo,*

*napano mia Atua ridu naio to mave rive  
tubo ka nalo dolu nei napano maka  
ave Ju,*

*naruei mia nalo avalea ea naio ka naio rije  
Atua kiano ilivuiano rimaluvo ealo.  
Ais 11:10*

<sup>13</sup> Naruei nobolkouo bior kamiu bereio ban Atua, napano romijikia ravalea ea kanano verikariano nalo, nebika ka kamiu kuvitu kumonmonea naio rivanvano-o kanano saariano nalo a kanano tumaro rime'i rivujo rivu ea kenemiu meuliano nalo, rila napano Niununo Lu kiano moroano mijikia riniau tanea kamiu ka rila ka kuvitu kuvalea kiano verikariano nalo, jo binime'i toru lie riva rivan tibe na.

*Pol berii banlo ea tivelinio na kiano  
in'auano ban nalo na maka ave Ju*

<sup>14</sup> Bilbilu nalo, maka nosidomii veve ka kamiu, mia nemijikia vatitig kamiu, kenemiu iviso bo laka, kumijikia vatitig vite nalo miroano ruei, a kubare ka kuvijikia kuverloglog kamiu bereio ea Atua kanano iliano novo nalo.

<sup>15</sup> Jibe na, ðeli kamiu kuvilo kija ka mēsi nei, kumial ka nojumolu neberial vite telabo ban kamiu jikili kija, a nebereio bereio vite tealo napano ðeli kamiu kumisidomii kuber kumijikia ruei. Mia nemialio monoka nala tibe na, kar napano Atua midu jikiaiano na laiano na in'auano nei joa jun'aku, jibe jidomiano kirinovo tai, <sup>16</sup> ka nomei tibe Yesu Kristo kiano toro na in'auano ka noverial Atua kiano Ioluanu Vou ka nalo napano maka ave Ju. Nomila in'auano na, nojibe toro lu tai napano nominau joomo ea Atua kunuano Lu, nomila nalo napano maka ave Ju abinime'i abe lu vatitig, nomioalo ea Niununo Lu siano, ka amijikia amei tibe ijaiano novo tai napano ban ea Atua napano mia naio saaro ka vatitigio.

<sup>17</sup> Tibe na, kumemi juo Kristo Yesu nuvitu nuviniau vio takurano, a nemijikia

nasaaro laka ka kiniou bunu nemijikia nala Atua kiano in'auano togio.

<sup>18</sup> Maka neil varvarka vovu, mia nemijikia never ka nabarvarka laka ka venia napano Kristo miñauka miopdulu ea kiniou, bior vonganei, kumemi juo numidu nalo napano maka ave Ju nalo abinime'i vaataro ka Atua, aju abatove kanio. Kiniou neberial iliano nalo, kiniou nemila in'auano miroano, <sup>19</sup> Atua mila vremesiano kinkin nalo, a Niununo Lu kiano moroano miñau, ana mila na Kristo kiano Ioluanu Vou ba reraio novonio ea vio miroano, jikario Yerusalemo ban yako, mijaka ba boru ea tanobuku na toru Lirikam.

<sup>20</sup> Mia nemialio ka maka rivare vo, kiaku jidomiano tai jikili joa kiniou ka monoka navan lie vo. Mia maka nosidomii ka navan ea vio napano Kristo siano bokario ruei, bior napano maka nosidom neiasol in'auano napano nalo dolu ajikar ruei, mia nojidom navan ea vio napano tomu nalo maka ajikia naio vo.

<sup>21</sup> Nina jibe iliano tai napano naverialiano Aisea ber beamu, napano berii Naverikariano, berinavo

*"Nalo napano tomu maka averial naio  
ka nalo vo, mia nalo avitilubarario  
vonga,*

*nalo napano maka lele ajog siano, mia  
nalo ajoglubarario."* Ais 52:15

*Pol jii vatitigio ka riva riyotuba ea nalo  
napano Romo*

<sup>22</sup> Jibe napano nober ruei, bogo miroano nojidom nevedu ea kamiu na Romo, mia nojo nomila in'auano ea vio dolu, a todolu nalo miroano banbano-o maka bunu neial bogo tai kanio vo.

<sup>23</sup> Mia vonganei, nemial jibe kiaku in'auano ea tanobuku nalo na Esia biniu ruei, a jidomiano napano joa kiniou yuka miroano ruei, ka nojidom nevedu noyotuba kean kamiu kija, nojidom ka ðeli mia rime'i rivu naruei. <sup>24</sup> Nojo nomila vatitig ka nataluvo den vio nei nava nejaka yako ea buruvenuo napano Speni, naruei nojidomii ka mia nesel ea kamiu, ka romijikia rotu vio takurano ka ravar bogo novo vija kito kija beamu.

Mia maka nejikia noto vesiou tibe napano nojidomio, mia ver kamiu kuvijikia kuvila vite tealo ka rijai kiniou ka kiaku m'arabo, mia netikar nodu kiaku m'arabo bereio nataluvo navano.

<sup>25</sup> Mia nina maka vonganei ga, bior napano beamu monoka nava nesel Yerusalemo, kar napano kiaku kiri in'auano tai ka nala ka Atua kiano namoneano nalo napano ajua vio na beamu.

<sup>26</sup> Nalo ajua bogokouo tai vonganei napano nalo miroano abe taliñasa, maka ave kialo vite, naruei taara na namoneano nalo na vio nalo nei na Masetonia a Kris, nalo amijogio, ana nalo ga amidu jidomiano nei aberinavo bo ka avuku veru tai ka rijailo.

<sup>27</sup> Nina vite novo tai napano amila jakii kialo jidomiano ga, mia nemial jibe naio be tena memedu tai ka nalo monoka ala bunu. Nalo na maka ave Ju, mia ea kialo meuliano bija Tubo, nalo abar Atua kiano ilivuiano miroano miopdulu ea kulo Ju nalo ban ealo, ana bogo napano Ju nalo na abiniua bogokouo bereio, bo ka nalo napano maka ave Ju adu kiano kija vanlo, aijalo ka tenalo tai napano maka ve kialo.

<sup>28</sup> Mia veru nei napano nalo amila bijii, nalo abar jua juñaku ka kiniou navario navano, ana bogo napano naba nabar ju vatitig ea nalo na Yerusalemo ruei, mia nataluvo bereio ka nemei nesel ea kamiu na Romo, karina mia nejaka nava Speni.

<sup>29</sup> Mia nomijog ruei ka bogo napano neyotuba kean kamiu, mia rivu mia rivu ka kito nonovio, mia nevedu vija Kristo kiano ilivuiano novo ve miroano ka neverii van kamiu.

<sup>30</sup> Bilbilu nalo, nojidom nevika sikili van kamiu ea kiado Tubo Yesu Kristo siano, ka kamiu kumitu tiniemiu maio ka kiniou ea kenemiu volkouano. Nemijikia ka kamiu kubujo ea tinietiano napano Niununo Lu jianio, ana bo ka kubolkouo sikili ka kiniou, kuviasol kenemiu volkouano vija kiaku volkouano napano nemila vonio jikili ka nobolkouo julaka kanio.

<sup>31</sup> Bogo napano nava novokar tanobuku nei Yutea ka nava Yerusalemo, telabo napano maka asaaro ka amonea Ioluano Vou nei aju, ana maka nejikia ka mia nalo ajidom ka ala tumabe ka kiniou, mia neber bo ka kamiu ka kubolkouo van Atua ka tukovio ka kialo jidomiano va nalo ea kiniou. Mia monoka kubolkouo bunu ka namoneano lu nalo napano aju Yerusalemo, mia nalo asaaro ka avar veru ve telisu napano mia kiniou nesianio vanlo.

<sup>32</sup> Ana verver vite nonovio memedu tibe Atua kiano tinieiano, mia kiniou nemijikia neyotuba ka kamiu vija burumara kiaku tiniesaareiano a mia nemijikia noto rivu vija kamiu, nojlimebi ve telisu beamu.

<sup>33</sup> Mia kiniou bunu nojo nobolkouo ka kamiu, ka mia kiado Atua, burupati na tumaro, to vija kamiu rivanvano-o maka rijikia ribisi.

## 16

*Pol berial vite tealo ban namoneano nalo na Romo*

<sup>1</sup> Bilbilu nalo, nojidom netetavoko kiaku mēsi ea iliano nalo tai ea tivelinio ka kamiu nalo tealo. Ea tivelinio na kuviviniedo nei Vipi, napano naio naruei ridu mēsi nene riviedu ea kamiu, nejidom kuvijikia ka naio be ijaiano novo tai ea taara na namoneano nalo na ea komeli na Kenkria, <sup>2</sup> naruei bo ka kamiu kuvisaaro ka kuver iliano vorvorua vanio, kuvuru naio tibe kuviviniemiu tai ea tivelinio na Tubo kiano torogio, jibe napano memedu ka kito namoneano nalo monoka ralaio van kito. Bo ka kamiu kuvijai naio ka venia napano mia juñano bulati kanio, ka napano naio be tira tai napano be bilbilu novo ea kumemi miroano, miija vatitig kumemi.

<sup>3</sup> Nejidom bunu ka kamiu kuver kiaku kavijo bo a bogiano bo rivan tira novo dolu nene Priska, rivija koano suñano Akuila, napano kumemi nube tomu na iñauveiano ea Kristo Yesu kiano iñauano. <sup>4</sup> Riano ga na, bogo tai nua na, kiniou nojoa juluvati na marioano, ana naljuo amila napano vaataro ala luvu kialo meuliano ka amei alarur kiniou, mia nojo nober sivaiano laka biorio. A maka kiniou ve takurano ga, mia taara na namoneano dolu nalo na tanobuku nei nalo bunu aber sivaiano kalo bior venia napano amila nei.

<sup>5</sup> Mia kavijo bo a bogiano bo napano nober ka naljuo, nojidom nover bunu van ea nalo dolu napano aju joomo ea taara na namoneano na tertelisu napano aju abiviuo vio takurano ea naljuo kunualo.

Mia neber jibe nei bunu ka nalo nene, jibe kiaku bilbilu novo nei Epanetas, napano naio be moti na ea burumara tanobuku na Esia napano monea Kristo, <sup>6</sup> mia Mere, napano naio mila iñauano novo nalo miroano iviso ea kamiu, <sup>7</sup> mia naljuo dolu na kiaku vio nene, Adronikas naio Junia, napano nua na kumemi nubiniu numitua tetavokoiano vaarakurano. Atevi juo nei, naljuo amonea Yesu nua ruei, beamu ka kiniou, a abar sio novo laka ea atevi dolu nalo miralo.

<sup>8</sup> Tealo bereio, nina Ampliatas, napano Tubo mila ka kumemi ve juo nuve bilbilu novo, <sup>9</sup> a Upanas, napano numiñau vio takurano bija naio ea Kristo kiano Ioluano Vou, a kuruaku novo nei Stakis, <sup>10</sup> a Apelesi, napano be iakurano ka juboluboiano toru binimei ea naio, mia naio jikili ju kirisikili ea Kristo.

Mia bunu, neber kavijo bo a bogiano bo ban Aristobiulas kiano mfaratavo nalo,

<sup>11</sup> a toro dolu na kiaku vio nei Erodi-ano, a namoneano nalo na Narsisas kiano m̄aratavo, <sup>12</sup> a tira juo novo na amin̄au Tubo kiano na, Traevina bija kuluene Traevosa, a kuviviniedo dolu nei bunu Pesis napano tiniedo jii naio toru, a naio mila Tubo kiano in̄auano toru laka ruei, <sup>13</sup> a Ruvus, navurim̄araboiano na Tubo kiano in̄auano, bija kenieno napano naio bijuku ban kiniou jibe napano nebe kenerinio.

<sup>14</sup> Mia tealo bunu bereio, nina Asinkritas, Vlekon, Emesi, Patropas, a Emas, bija bunu kuruado dolu nalo napano aju bijalo, <sup>15</sup> a bereio maka tinieku bobogia Vilolokas, Juliano, Nereas bija kuviniene, a Olimpas, bija namoneano lu dolu nalo napano amila lotuano vio takurano bijalo.

<sup>16</sup> Kiniou nejaaro ka nebiviuo kamiu nonovio ea kiaku m̄esi nei, a kamiu bunu monoka kuvorvorua vatitig van kamiu bogo nonovio, kuverial kenemiu tinietiano van kamiu, tibe kamiu kumiom babibiniomiu ea tinievuiano. Mia bunu, taara nalo na Kristo kiano namoneano nalo ea tanobuku nalo nei aberial ka nalo aju ajidomii kamiu ea kialo volkouano nalo.

<sup>17</sup> Bilbilu nalo, nebika jikili ban kamiu bereio ka monoka kuvitigar vatitig ka nalo napano aju ajikar baravoiano nalo, p̄eli aju amila namoneano nalo abeve terakurano, a aju amilkue ka verloglogiano nalo napano kumijevio. Mia bogo napano kuvitigar vatitiglo, kuvitu re kuva vaataro kalo. <sup>18</sup> Nina bior tomu nalo kinkin na jibe na, nalo maka atu ala kiado Tubo Kristo kiano in̄auano, mia nalo aju amila jakii ga kialo sidomiano va nalo. Nalo amijikia averial vite nalo na bo mia bo ve miroano, mia be seseiano ga na, a nalo aju ajubolbo vatitig tomu nalo kialo jidomiano napano nalo maka ve kialo jikiaiano rivu.

<sup>19</sup> Tomu nonovio amijikia vatitig ruei ka kumitum̄a kumijogkar vatitig Atua kiano iliano, a naina mila kiniou nejaaro laka, mia monoka kuvitu kuvitigar vatitigio. Ea tivelinio na vite nalo napano abo, kamiu monoka kuvilala m̄asosouaio, mia ea tivelinio na vite nalo napano abova, ve re leleio soro nene tai toa kamiu.

<sup>20</sup> Mia verver kuvila tibe na, mia kiado Atua na tun̄aro naio be kiano m̄arabo ka rila Sir̄aro to yetano ka jaamiu ka kuvila tanea vatitig naio. Mia kiaku volkouano ka mia kiado Tubo Yesu Kristo kiano tiniese- seiano to vija kamiu.

<sup>21</sup> Bilbilu nei Timoti, napano kumemi juo numitu numim̄au vio takurano, naio berenio kavijo bo p̄eli bogiano bo ban

kamiu, a nalo tolu nei na kiaku vio, Lusias, Jasoni bija Sosipata, nalo bunu aberenio.

<sup>22</sup> Kiniou napano nobokar vovojulu, nobovitaualar m̄esi nei Pol kiano na ban kamiu, siaku Tesias, a kiniou bunu nejidom neverenio ka nejaaro laka ka nebiviuo kamiu ea m̄esi nei, ea Tubo siano.

<sup>23-24</sup> Bo ga, kiniou Pol nei naruei nebivita- uia nei, mia vaataro nala nonovio kiaku m̄esi naruei, mia kavijo bo a bogiano bo jo biedu binimej ea nalo tolu nei, Kaias, napano nojoa kunuano, napano lotuano na vio na nalo aju abinimej vio takurano ea kunuano, bija Erastas, napano naio be navitikariano na veru na komeli nene, bija kuruado nei Kotas.

<sup>25</sup> Vonganei ea kiaku iliano maariano, nejidom nedular bereio ilivuiano nonovio nalo van Atua. Nobolkouo ka mia naio ridu iliano nalo na Ioluano Vou, vija verloglogiano nalo novo napano aberii Yesu Kristo napano nejian ban kamiu ruei, ridu vatitig tua kenemiu meuliano nalo, ka kuvijikia kuvitu sikili ea bogoti napano ju binimej. Ilirianiano novo nalo na, tomu nalo maka ajikiaio ea yuka miroano napano barlaka ruei, mia vonganei ga Atua berialio ka kito. <sup>26</sup> Beamu, tomu nalo abuluku naverialiano nalo kialo iliano nalo, nalo maka ajikia ka ilirianiano nalo nene aju joomo ealo, mia vonganei, kumemi nuberialio meravo, kito robinu romijikia rojoglubario. A Atua, jibe naio jo nua a mia to toboto, naio berialio Ioluano Vou nei monoka rivan ea tomu nalo na buruvenuo nonovio, ka nalo bunu ajikia ajogio, ajikia amonmoneaio.

<sup>27</sup> Naio ga takurano be Atua, naio ga takurano be burupati na masouano, a naio ga takurano napano Yesu Kristo mila kiado m̄arabo ka rolotu naio, ravano-o maka rijikia ribisi bogo tai.



## Mesi Moti Napano Pol Bivitauiaio Ban Namoneano Lu Nalo Na KORIN Verialiano Moti

*Tukunuano bulati na niosi nei*

Mesi moti napano Pol jirio ba ban namoneano nalo na Korin, naio jirio bior napano be vite va nalo jumormolu ea namoneano nalo kialo meuliano ea vio na, a naio juvan mēsi nene ban ka rijailo. Yimo lu na Korin, Pol naruei jikario.

Korin be buruñara komeli tai na tomu nalo na Kris kialo, a be bulu komeli na tanobuku nei Akaia, napano jo yetano ka Romo. Be tomu miroano na venuo doldolu nalo ea vio na, a naio be vio tai napano tomu nalo amijikia vatitigio ea tivelinio na vioruru, a ea tivelinio na kialo bajago moruo nalo. Tomu nalo na yetemeriba amijikia vatitig tomu nalo na vio na bior kialo bajago va nalo a bior kialo lotuano napano aju amilotu ka atua miroano doldolu nalo.

Vite burtumoruo nalo napano Pol berio ea mēsi nei jibenei:

jo berii vite va napano tomu nalo na yimo lu aju beve terakurano,

jo berii vite va nei napano nalo aju amila bova bija tira,

jo beridoŕe kialo vikadeniano nalo ea tivelinio na soriano,

jo berii tivelinio na siniano napano toro jo jiano ban tavoro nalo. Mia naio berii m̄arabo memedu ka atakio ea lotuano ea yimo lu,

jo berii moroano nalo napano Niununo Lu jian ban yimo lu,

a jo berii bajago nene na napano toro mijikia meul bereio.

Pol berial ka naio mijikia vatitig kialo vite va nalo bija kialo vikadeniano nalo, a berial ka Yesu kiano ioluano vou ga jian veridoŕeiano banlo.

Ea mirano duelimo ba tolu [13] naio berii bajago na tiniedo titii Atua vija tomu nalo laka, nina bajago na bo laka ka Atua kiano tomu nalo atakio. Yati nei tomu nalo amijika vatitigio, jovulu torogio nalo na niosi nei.

*Torogio nalo na niosi nei*

Iliano moti 1:1-9

Tomu nalo ea yimo lu abeve terakurano 1:10—4:21

Bajago va bija tira, a meuliano na m̄aratavo 5:1—7:14

Namoneano nalo bija tomu nalo napano maka ajikia Atua 8:1—11:1

Namoneano nalo kialo m̄arabo nalo na atakio ka alotu 11:2—14:40

Yesu meul bereio, a tomu nalo napano amonea naio amijikia ameul bereio 15:1-58

Veru na asian va van namoneano nalo na Yutea 16:1-4

Iliano maariano 16:5-24

*Pol jo Eveso, naio berenio vorvoruano ban tomu nalo na Korin*

<sup>1</sup> Bilbilu nalo na Korin, kiniou napano nebivitauia mēsi nei biedu ban kamiu, kiniou Pol, napano Atua jidom ka nemei neve Kristo Yesu kenerinio kiano atevi tai, ana naio bio kiniou, bitirilal kiniou ka navakar im̄auano tibe na.

Kiniou noja vio nei bija kiado bilbilu nei Sostinis, ana kumemi juo nuberenio kavijo bo ŕeli bogiano bo ban kamiu nonovio, <sup>2</sup> ea Atua kiano namoneano nalo ea buruñara komeli na Korin. Kamiu na naruei Atua bio kamiu ka kumei kuviasol vija kiano namoneano lu dolu nalo, napano vio reraio ea vio nonovio nalo aju amilotu naio napano mila kito robe lu vatitig bo rui, nina Yesu Kristo napano naio be kito nonovio kiado Tubo.

<sup>3</sup> Kumemi juo kenememi volkouano ka Tubo Yesu Kristo kiano tiniememiano a karam̄ado Atua kiano tuñaroiانو atu vija kamiu.

*Pol berenio siva ka Atua kar tomu nalo na Korin kialo viekouoiano*

<sup>4</sup> Nemial jibe ka bogo na kube Kristo Yesu kiano tomu nalo, Atua kiano tiniememiano jo mir̄auo toru ea kenemiu meuliano, ana bogo nonovio nojo neber siva laka kano.

<sup>5</sup> Kamiu kumitu kubinimei bo laka ea tivelinio na verialiano na Ioluano Vou, ana kumitu kubinimei mave ea tivelinio na kenemiu jikiaiano, a ea tivelinio na bajago novo nonovio dolu. <sup>6</sup> Bogo napano nemial tena, nemialio jibe napano kiaku im̄auano nalo re nua na, napano neberloglog Kristo ka kamiu, vonganei naio jo bar m̄arati toru.

<sup>7</sup> Jidomiano nalo a moroano nalo napano Niununo Lu no jo jiano, maka tai napano maka kuvokario vo, ana kumitu kumim̄au bijalo bo laka, bior napano kumitu kumisirarag ka kiado Tubo Yesu Kristo mijikia riyotuba bereio ea vio yetano nei.

<sup>8</sup> Naio maka riyotuba vo, mia jo miija kito julaka ka rotu sikili rivano-o rivokar legiano maaro nene, mia bogo napano

rotua Atua mirano naio mila napano maka tokoriano toa kito.

<sup>9</sup> Atua berkar ruei ka riviekokoa kito, mia romijikia rovarkar tiniedo rivu ea kiano iliano nei, bior napano naio bio kito, midu kito miasol kito robe bilbilu novo nalo bija kenerinio, kiado Tubo Yesu Kristo.

*Namoneano nalo aju aburuburevurelo laka*

<sup>10</sup> Kiaku m̄aratavo, Yesu Kristo kiado Tubo kiano terati nalo, kiniou nojidom nevika sikili van kamiu ea siano, ka kamiu kuvila von ka kuvila kamiu ka kumei ve takurano bereio. Bova napano kumitu kuburuburevure kamiu, mia kenemiu jidomiano a kenemiu iliano monoka ve takurano ga.

<sup>11</sup> Neber iliano nalo na, kar nalo napano aju kea ea toro nei Kloee kiano vio nalo abinimee aberial ban kiniou ka siniabu nalo aju iviso kean kamiu, kuruaku nalo a kuvivinioku nalo.

<sup>12</sup> Nomijog napano kamiu terakurano kumitu kuber kenemiu bagaro nalo. Peli tai berinavo "O, kiniou natakisor Pol," p̄eli dolu river "O, kiniou Apolos kiano," p̄eli tai bereio, river "O kiniou neiasol Kevas kiano bagaro." Ana tealo bereio nalo abitirilar kialo bagaro dolu na tertelisu nalo, abuku bulag dolu nalo, aberenio "O, kumemi ga nube tomu na Kristo kiano riano."

<sup>13</sup> ? Ei, venia na kamiu kumila jibe na? Peli bo ka rotivirivi Kristo ea niati, ratankanio ea kenemiu bagaro na tertelisu nalo tibe na? Peli tealo ajidomii aber nalo abe kiniou Pol kiaki, tibe napano aber kiniou naruei napano najakilele ea m̄akolkolo ka nalarurlo? Peli tealo tinielo bobogia napano abaruei ealo ea Yesu siano, mia nalo ajidomii aber abaruei ealo ea siaku?

<sup>14-16</sup> Jibe na, nemial bo ga ka nanua na kiniou nala re varueiano ea kamiu tai leleio, p̄eli naljuo nei Krispas naio Kaias ga, a riano, tinieku bobogia, nabaruei bunu ea Stevanas bija nalo na ea kiano m̄aratavo, a maka bunu nosidomkar vonganei ka nalo na ga p̄eli ta bunu bereio. Kiniou neber jibe na bior napano ver nala varueiano ea kamiu ve va moroano, p̄eli nalo atumolu atu ail vevavin ka garuei, atu averinavo "I O, kumemi naruei, Pol baruei ea kumemi ea siano!"

<sup>17</sup> Jibe na bova na, bior napano Kristo maka tuvan kiniou nemei navaruei ea tomu nalo, mia miila kiniou nebinimee ka noioliolu ka kiano Ioluano Vou vanlo. A bogo napano nojo nomioliolu jibe na, maka nala vija moroano na masouano na

yetemeriba nei, mia nemila bija moroano na Kristo kiano m̄akolkolo.

*Kristo berial Atua kiano masouano a kiano moroano*

<sup>18</sup> Ana tomu nalo napano aju ajakii m̄arabo na vakovioiano, amijog iliano na, Kristo kiano m̄akolkolo, jibe titai na vovuiano ealo, mia kito napano roju rajakii m̄arabo na meuliano, romijog iliano na, Kristo kiano m̄akolkolo, jibe Atua kiano moroano ka rilalur kito.

<sup>19</sup> Nina jibe iliano tai ea Vivitauiano Lu, napano Atua berenio jibe nei, berinavo *Mia kiniou nouedom masouano den nalo napano ajidomii aber abe masou, mia notuko vio ka jikiaiano ea nalo napano ajidomii aber amijikia vite. Ais 29:14*

<sup>20</sup> A iliano na be riano laka, bior napano robittii yetemeriba, romijikia rovika tibe nei, rever: ? Kiano tomu na masouano nalo, nalo be? Tomu nalo napano amilakakar vatitig jikiaiano nalo napano ajua niosi nalo, nalo be? ? Tomu nalo napano amijikia aberii jidomiano dolu nalo napano aju jeliviv vonganei, nalo be? Romial jibe maka atu na, a romial jibe Atua mila masouano na yetemeriba nei binimee jibe tena vovuiano tai bereio rui.

<sup>21</sup> Atua ga naio be masou, a ea kiano masouano, naio mila ka masouano na yetemeriba nei maka rijikia rila toro rijikia naio. Mia naio mial bo lie ka rila napano kenememi ioluano nalo napano tomu nalo aju ajidomii aber be vovu ga, mijikia rilalur toro kiano meuliano napano monaio.

<sup>22</sup> Kulo Ju miroano maka asidom amonea, aju aberenio ver nuvila aial vremesiano nalo, mia atikar ka amoneaio, a kulo Krik miroano maka asidom amoneaio, aju aberenio ver nuvil rimemedu ea kialo jikiaiano moruo nalo, mia nalo atikar ka amoneaio, <sup>23</sup> mia maka nuvitu nuvila tibe na kalo. Kumemi numitu numioliolu ka Yesu ga banlo, nuber naio m̄aro ea m̄akolkolo kar kialo kariano nalo, mio iliano na, kulo Ju nalo aber maka ajikia amoneaio, a kulo Krik nalo, aber nina iliano vovu ga na.

<sup>24</sup> Mia ea tivelinio na nalo napano Atua biolo ka ave kiano, jibe kito, napano kito tealo kulo Ju a kito tealo kulo Krik, maka tibe na. Kito rosidomii re ka reial kijokijo dolu, bior napano robitilubar Atua kiano moroano ea Kristo kiano infaiano rui, a rosidomii re ka rotakii jikiaiano dolu, bior napano robitilubar Atua kiano masouano ea Kristo kiano m̄arabo na rilalur kito.

<sup>25</sup> Tomu dolu nalo amial ka Atua mijamo ka Kristo m̄aro ea m̄akolkolo, ajidomii aber Atua melukluku ga, mia makanio, tenei berial kiano moroano napano jikili lie loa toro kiano moroano. Nalo amial tenei, ajidomii aber Atua miavovu ga, mia makanio, naio berial kiano masouano napano bo laka loa toro kiano masouano.

<sup>26</sup> Kuruaku a kuvivinioku nalo, kuvila von ka kuvimidomii ver kamiu jibe venia na, napano Atua bio kamiu be kanano? Maka kito ve miroano napano ea tivelinio na vitiano na yetemeriba robe masou, p̄eli kito tomu na be p̄irido, p̄eli kito tomu na tortoru.

<sup>27</sup> Yetemeriba nei ber kito romiavovu, mia Atua buru kito, ana miñau jel ea kito, jo bar bulag masouano na yetemeriba. Yetemeriba nei ber kito romilukluku, mia Atua buru kito, ana miñau jel ea kito, jo miladom sikiliano na yetemeriba.

<sup>28</sup> Yetemeriba nei ber kito robe tomu kurano napano roju yetano ga, mia Atua buru kito, ana ea miñau jel kito, jo muedom tenalo na burutomoluo napano aju, mila tenalo na abinimei be kurano.

<sup>29</sup> Jibe na, maka toro tai leleio napano mijikia ridular naio toa Atua mirano, river naio be masou, p̄eli naio jikili, p̄eli naio be toro tai, <sup>30</sup> mia Atua ga be burupati na kiado meuliano vou bija Kristo Yesu. Naio naruei miila Yesu binimei jiloglog m̄arabo ban kito, ana Yesu bulu bulag kito mila romemedu ea mirano, robinimei robe kiano tomu lu.

<sup>31</sup> Ana bior tenalo na, romial ka iliano tai ea Vivitauiano Lu be riano laka, napano berenio jibe nei, ber

*Toro napano jidom rive m̄arou, naio mijikia rive m̄arou ga ea venia Tubo milaka naio.*  
Jeremaia 9:24

## 2

*Pol mioliolu ka Yesu kiano m̄akolkolo ea Niununo Lu kiano moroano*

<sup>1</sup> Bilbilu nalo, nua na kamiu maka kuvijikia Atua kiano iliano nalo, mia kiniou nebinimei neberialio ban kamiu. A jibe na napano kumialio, bogo napano nebinimei nomila, maka nola napano navarvar ka iliano terebievi nalo p̄eli toro kiano masouano nalo.

<sup>2</sup> Nemila kiaku jidomiano jikili ka bogo napano nojo iviso kean kamiu, mia maka nosidomii tenalo dolu leleio, a mia noioliolu ga ka Yesu Kristo, vija kiano m̄ariano ea m̄akolkolo.

<sup>3</sup> Nojo bija kamiu, nomijog ka nemelmeluku laka, nojo nomerou, nojo nomemebiju, <sup>4</sup> a kiaku iliano a kiaku

tukunuano nalo maka avujo leleio ka masouano p̄eli toro kiano jikiaiano. Mia ea bogo na, kumijog napano kiaku iliano nalo abujolou ka moroano na Niununo Lu, <sup>5</sup> ana mila na kenemiu viekouoiano maka sikili tua toro kiano ilimasouano, mia jikili jua Atua kiano moroano.

*Atua kiano masouano*

<sup>6</sup> Be riano napano kiaku iliano maka rivujo ka ilimasosouano na yetemeriba nei, p̄eli jikiaiano ninio nalo napano tomu na tortoru na yetemeriba nei ajaaro kanio, mia naio bo ga, bior napano yetemeriba nei bija kiano tomu na tortoru mia ava añaro ga. Mia kamiu napano kenemiu jidomiano meruo bo, kubitilubar napano kiaku iliano bujo vatitig ka Atua kiano masouano nalo.

<sup>7</sup> Kiano masouano na, naio midu vatitigio bo ju beamu karina jii yetemeriba nei, mia masouano na juluku ju vatitigio banbano-o, mia tomu nalo maka ajikia leleio, a vonganei ana maluvo ea kito medave jibe ilivuiano na toru tai napano Atua jianio ka rila rivu ka kito.

<sup>8</sup> Ana kiano masouano na maluvo ea kito ea m̄arabo napano Yesu binimei milarur kito, mia tomu na tortoru na yetemeriba nei maka avitilubar tenei, ana amidu Yesu, napano naio be Tubo na toru na mermerano na tiniabene, ajilan naio jaklele ea m̄akolkolo m̄aro.

<sup>9</sup> Tomu nalo maka avitilubar Atua kiano jidomiano tibe na, naio jibe Vivitauiano Lu tai, napano berenio jibe nei, berinavo

*Tenalo na bo napano toro mirano maka lele rialio, p̄eli maka lele toro tiliniene rijogio, p̄eli toro kiano iviso maka lele sidomiio,*

*mia tenalo na naruei Atua mila vatitigio ju ka kiano tomu nalo napano tiniel jii naio.*  
Ais 64:4

<sup>10</sup> A kito, romijikia ilivuiano nalo na, bior napano Atua Niununo napano bitilubar tenene nonovio, a mijikia Atua kiano jidomiano lukluku nonovio, naio berialio ban kito.

<sup>11</sup> Jibe ka ga kito kulorinio, napano toro dolu maka rijikia venia joa kiado jidomiano, mia niunudo ga mijikia vatitigio bo, mia be verare bunu ka Atua. Kito maka rejikia venia na jua kiano jidomiano, mia Niununo mijikia, ana berialio ka kito.

<sup>12</sup> Maka niununo tai na yetemeriba nei ga napano riverialio ka kito, mia Niununo Lu nei napano jaluvo den Atua binimei, naio naruei mila kito robitilubar vatitig jidomiano nonovio nalo napano Atua jo jian ban kito.

<sup>13</sup> Tibe na, bo ka kuvitilubar bunu ka kenememi iliano nalo napano abinime i ea kamiu, maka ea toro kiano masouano, mia Atua kiano Niununo ga berloglog ka kito. Jibe na, numitu numidu Niununo Lu nei kiano ilirianiano nalo, ana numisian ban kamiu napano Niununo nene joa kenemiu meuliano ruei. <sup>14</sup> Toro napano Niununo maka toa kiano meuliano, naio maka rijikia rivitilubar tenalo na Niununo, naio jibe joa kia ga melijokouo, ana maka rivokar leleio moroano nalo napano Niununo jiano. <sup>15</sup> Toro napano Niununo joaio, mia mijikia rivitilubar vatitig vite nonovio, mia toro napano Niununo maka toaio, naio maka rijikia rivitilubar vatitig venia joa toro kiano meuliano napano Niununo joa naio. <sup>16</sup> Iliano Lu berenio jibe nei, ber *Maka toro tai leleio napano naio mijikia venia joa Atua kiano jidomiano, maka toro tai leleio napano mijikia verloglog vite van Atua.* Ais 40:13

Iliano nei be riano laka, mia ea kito napano Niununo joa kito, romijev Kristo kiano jidomiano ruei.

### 3

*Bova ver baravoiano jo iviso kean namoneano nalo*

<sup>1</sup> Ea bogo napano nojo bija kamiu nua na, nojidom neil vatitig vija kamiu, tibe napano kamiu tomu nalo napano Atua kanano Niununo joa kenemiu meuliano ruei, mia makanio. Namial ka maka kuvare vo, ana mila nemil ban kamiu jibe ka kamiu tomu nalo na yetemeriba kia ga vo, napano ea tivelinio na kenemiu meuliano bija Kristo, ajibe kiritete nalo kia ga vo.

<sup>2</sup> Jibe na, nabagan kamiu ka yu ga, maka nejikia nesian sinaniano na jikili van kamiu, bior napano maka kuvare. Mia bokar banei, nemial jibe maka kuvare vo, <sup>3</sup> bior napano bajago miroano na yetemeribaaju iviso kean kamiu kia ga. Peli kamiu maka kuvitilubar, mia bogo napano jokuano a baravoiano ju kean kamiu, ber p̄eli kumitua melijokouo kea ga vo, kenemiu bajago ajibe toro ga kiano bajago.

<sup>4</sup> Meravo laka ka kamiu jibe na, bior napano kumitu kuburu vurevure kamiu kea ga. Kamiu tealo kumitu kuberii kiniou, kuberinavo "O, kumemi numisidom Pol, kumemi nuvitakisor naio," a kamiu tealoaju aber bilbilu navagadeano nei Apolos, aberenio "O, kumemi numisidom Apolos, kumemi nuvitakisor naio," mia jidomiano

kinkin jibe na naio be toro kiano jidomiano ga.

<sup>5</sup> Verver kuvisidom kuververi kumemi juo Apolos siememi, bo ka kuvisidomiuo vatitig ka kumemi juo nube toro na jur̄nabe? Kumemi juo nube Tubo kiano toro ga, ka nuvila iñauano napano naio midu joa jumememi, ka rila ka kamiu kuvijikia kumonea naio. <sup>6</sup> Ea tivelinio na iñauano nei, kiniou naruei napano nemebija kurukuti, a Apolos naruei napano naio se toti nene, mia Atua ga napano mila burupati binime toru bar marati. <sup>7</sup> Naruei monoka rovitilubar ka toro napano mebija kurukuti a naio napano se toti nene, naljuo maka leleio ala titai na toru, mia naio napano mila burupati binime toru bar r̄narati, naio naruei mila titai na toru. <sup>8</sup> Mia kumemi juo, napano tai mebija kurukuti, a tai se toti nene, kumemi juo numiñau be verare ga, a mia kumemi juo nuvivej kenememi jidomiano rimemedu ka kenememi iñauano. <sup>9</sup> Maka tibe napano kumemi tai naio bo, tai naio bova, mia kumemi juo nube tomu na iñauano vei na Atua kiano, a kamiu jibe boratano napano kumemi juo numitu numiñau eao.

Peli kijokijo dolu tai nene bereio, nemi-jikia never ka kamiu jibe yimo tai napano Atua naio jo miñaukanio.

<sup>10</sup> Atua mije jikiaiano novo ban kiniou, ana nomiñau jibe toro tai napano bari nai ka iñauano, nomiñauka burupati yimo novo tai nene napano jikili bo ju. Mia iorou, maka kiniou napano nevitirilar yimo toa burupati neibano, mia bilbilu dolu nei binime jo miija ka riñauka yimo. A kamiu tealo dolu bereio kumijikia kuvijija ka kuvimiñauka yimo toa burupati neibano, mia toro napano mila jibe na monoka vitikar vatitig kiano bajago na iñauano. <sup>11</sup> Naio monoka rila von re ka ridu burupati dolu tai bereio, bior napano kiniou nomidu burupati na memedu ruei ju, napano naio be Yesu Kristo. <sup>12</sup> A bogo napano amiñauka yimo mave ea burupati yimo nene, p̄eli tealo amiñauka niogo p̄eli veriniogo p̄eli veru jikili, p̄eli tealo amiñauka iesi p̄eli surukiario p̄eli m̄aburi. <sup>13</sup> Mia iorou, sebi na legiano maaro rila von sisen veve kialo iñauano nalo, rila iñauano napano nalo amiñaukaio, rimaluvo ea vio medave. <sup>14</sup> Ver sebi rivokar yimo napano toro tai bitirilar joa burupati neibano, ana ver maka rijikia sisen lele ga, yimo jikili ju bo ga ju, mia toro nene rijev jidomiano novo tai. <sup>15</sup> A ver toro dolu tai, sebi sisen nonovio kiano iñauano, mia toro nene milaluvu nono vite. Vaataro mia sebi mijikia sisen bin naio toro na iñauano

nene bunu, ana ħeli milarur naio buro den sebi nei, milarur kiano meuliano.

<sup>16</sup> A kamiu monoka kuvitilubar ka yimo neibano napano abitirililar joa burupati nene, naio be kamiu namoneano nalo, a jibe yimo na volkouano lu tai na Atua kanano, napano kiano Niununo jo joa joomo eaio. <sup>17</sup> Atua kunuano na volkouano nene, naio be kamiu ga, a ver toro tai jidom rila bulag yimo nene, mia Atua rivelar naio garuei, bior napano kiano yimo na volkouano nene be lu laka.

<sup>18</sup> Monoka kuvidu venia napano nojo neberenio nei, maka rivu ka kuvisisidomii kuver be titai iakurano ga. Ver kamiu tai ber naio be masou bo ea jikiaiano nalo na yetemeriba nei, bo lie ka naio tuvan jidomiano sibusibiano nalo na atu. Ea tivelinio na jikiaiano nalo na yetemeriba nei, naio monoka rila naio tibe toro vovu tai ga, ana ver rila tibe na, mia naio mijikia ve masou vatitig ea Atua kiano jikiaiano. <sup>19</sup> Ea Iliano Lu, kito romial iliano tai napano jiloglog ber masouano na yetemeriba nei jibe vite vovu tai ea mirano Atua, napano berinavo jibe nei, ber

*Nalo napano ajidomii aber abe masou bo ea yetemeriba nei, ajidomii aber amijikia vite, mia ea Atua mirano, nalo abe vovu ga, naio bitilubar vatitiglo ruei.* Jop 5:13

<sup>20</sup> A iliano dolu tai bereio jibe nei, napano berenio

*Tubo bitilubar vatitig kulo masouano na yetemeriba nei kialo jidomiano, ber nalo abe kurano ga.* Iouano 94:11

<sup>21</sup> Tibe na, monoka rove n̄arou re ka jidomiano nalo na yetemeriba. Nalo maka ajikia ala vite tai rivu ka kamiu leleio, bior napano Atua jian nonovio kiano ilivuiano novo ban kamiu ruei.

<sup>22</sup> Kiniou Pol bija Apolos a Kevas, kumemi numila iñauano novo ban kamiu ruei, a vonganei yetemeriba nei joa jumemiu. Peli kumeul ħeli kuñarñaro, ħeli kumitu vonganei ħeli kuvitu ea bogoti napano ju ka rimej, mia vite nonovio be kenemiu ruei, <sup>23</sup> a kamiu kube Kristo kiano, a Kristo naio be Atua kiano.

## 4

*Pol bija Apolos kialo iñauano, jibe Yesu kiano atevi nalo*

<sup>1</sup> Tibe na, kamiu kuvidu re kumemi nuvitu mave, mia bo ka kuvitii kumemi tibe tomu nalo na Kristo kiano iñauano ga, napano naio bar Atua kiano ililukuano nalo ban kumemi, ka nuverialio ka nalo napano maka ajikiaio.

<sup>2</sup> A vite tortoru napano jua kene-memi jidomiano, kumemi numijikia ka monoka nuviekar vatitig ea iñauano nei napano kenememi toro na toru midu jua jumememi.

<sup>3</sup> Maka nosidomii r̄lelea ka ħeli kamiu kumisidomii juñabe ea kiniou, ħeli tomu nalo atibure kiniou tuñabe, a kiniou bunu maka noto nevititii kiniou bereio ka kiniou jibe na ħeli jibe nei.

<sup>4</sup> Ee, ħeli nebitii ka nomiañu bo ga, mia nina kiaku jidomiano na ga na. Kiaku jidomiano na maka rijikia rila kiniou ka nomemedu, mia Tubo ga naio be toro mededu ka tibure kiniou.

<sup>5</sup> Tibe na, kito rala soħeli re ka rotibure toro dolu, mia monoka rotu rorea Tubo ka rimej bereio ea kiano legiano nene na tibureiano. Ea bogo na, mia naio rivar vite nalo napano ajuluku ea melijokouo, rila amalmaluvo ea mermerano, a mia naio rivar jidomiano nalo napano ajuluku ea toro kiano iviso, rila amalmaluvo ea mirano vio. Mia Atua rivititii vite nalo na, ana mia sian iliano van tomu nalo rimemedu ka venia napano naio mialio ea kialo meuliano.

<sup>6</sup> Bilbilu nalo, iliano nalo napano nojo neber ruei na, nojo neberii laka kumemi juo Apolos ga, ana nemila jibe na bior napano nojidom neverloglog vatitig kamiu, ka kuvitii re ve dolu ea kenemiu naverloglogiano nalo. Kamiu tealoo abe n̄arou bior naverloglogiano ea kialo burukuti, a nalo aju abitii bova ea naverloglogiano na nalo dolu kialo, mia maka rimemedu tibe na.

<sup>7</sup> Kamiu kubiniu kube verare ga, maka kuvu lie tovulu nalo dolu, a ver vite tai na bo joa kamiu, maka kamiu napano kumim̄aukanio. Atua ga mijevio ban kamiu jibe jidomiano tai, ana tibe na bo ka kuvil re n̄arou riviorio bereio.

<sup>8</sup> Ee, nemijikia ka kumitu kuber ħeli kube sanibaiano ka vite novo nalo na Atua kiano ruei, a kumijog bo, kuber ħeli kamiu kube kiano tomu na tortoru ea yetemeriba nei ruei, napano kubuku kumemi numitu iorou laka. Ver be riano ka kubinimej jibe ka Atua kiano parinio tubo nalo ea yetemeriba nei, bo lie vo, mia neber ħeli maka tibe na.

Ana ver bogo tai tibe na, ħeli maka kamiu ga na, mia Atua rial ka kumemi juo bunu nubare ka nuvitutano mave vija kamiu ka rotilan vuu ka kiano tomu nalo.

<sup>9</sup> Ana vonganei, kumemi atevi nalo maka nuvitua vio novo na jibe na. Jibe napano Atua midu kumemi numitutano maariano laka, napano tomu nalo na yetemeriba bija

agelo nalo bunu abiti niege kumemi, jibe napano kumemi nube verare ga ka tomu na bova nalo napano amijev vironiano na m̄ariano banlo.

<sup>10</sup> Numitu nubamenea Kristo, numila kiano in̄aauano, ana kulo dolu nalo amial kumemi jibe vovu kija ga, ana aju aberii kamiu aber kube masou vatitig ea Kristo kiano meuliano. Nalo abitii ka kumemi niabememi mave, ana aberenio kamiu be ĩirimiu. Nalo amilkuei ka kumemi, ana amidu kamiu kumitu mave.

<sup>11</sup> Kumemi maka tibe kamiu leleio, bior napano jikar nua binimei bokar vonganei jjer kumemi, midoujer kumemi, maka kenememi kulum̄arauo novo tai, numitu nubiniua bogokouo nalo, maka kunuememi novo nalo ka nuvituao, <sup>12</sup> a numitu numeul ea in̄aauano na jumememi ga. Tomu nalo amiolua kumemi, ana numilivu kalo ga. Nalo amila bulag kumemi, mia numituvan ga. <sup>13</sup> Nalo amil bova ea siememi, ana numila von ka nuvila bilbilu rivu vijalo ga. Numila bo jibe na, mia nalo amila kumemi jibe niamiamo tai ga na yetemeriba nei. Be riano, binimei bokar vonganei nalo amial kumemi jibe kurano ga.

*Pol bika ka nalo aue jaano*

<sup>14</sup> Bo ga, maka never iliano nalo na ka rila kamiu kuvimou, bior kumitibe ka keneriku nalo, napano tinieku jii kamiu laka, ana nojidom neverloglog vatitig kamiu.

<sup>15</sup> Nemijikia ka tomu na tortoru nalo miroano napano abitikar kamiu a ami-jai kenemiu moneano ea Kristo, ana bo tiniemiu maio ka kiniou takurano ga jibe karamemiu. Kiniou nebe moti na nomidu Kristo kiano Ioluanu Vou binimei ea kamiu, ana kiniou nojibe karamemiu ea kenemiu meuliano bija naio.

<sup>16</sup> Jibe na, nemialio memedu ka noil van kamiu, nejikili ka kamiu ka kuvila von kuvue jaaku kija beamu.

<sup>17</sup> Jidomiano na naruei mila nojidom noiila Timoti riviedu ea kamiu. Nemial jibe Tubo juvan naio ban kiniou jibe keneriku tai ga, bior napano naio biekuo julaka ea in̄aauano nalo a tinieku jii naio laka. Naruei bogo napano mia naio rimaluvo kean kamiu, nojidom ka naio rila kamiu kuvisidomii vatitig bereio kiaku bajago nalo na nemiel najakisor Kristo, jibe napano nojo neberloglog ka tomu nalo ea taara na nalotuano nalo napano nojo nejeliviv ealo.

<sup>18</sup> Kiniou nemijikia ka bogo napano kumial ka maka bunu namaluvo kean kamiu,

kamiu tealo amila von ka adulo atu mave ruei.

<sup>19</sup> Mia bo ga, bior napano ver Tubo rijamo ka van kiniou, mia namaluvo kean kamiu vesiou re. Ea bogo na naruei, mia maka nosidom nojog nalo na kialo iliano, ana mia nojidom neial ka kialo moroano ka ala in̄aauano jikili juñabe.

<sup>20</sup> Nina bior napano toro kiano iliano maka ve titai ea Atua kiano nave-natuboiano, mia Niununo kiano moroano naruei naio be vite na toru.

<sup>21</sup> Bo ga, nojidom ka kamiu kuvisi-domii vatitig beamu, ver bogo napano namaluvo kean kamiu, mia tuñabe? Ver kuvisidom, nemijikia neviedu vija iliano kouo nalo na baravoiano van kamiu, mia bo ka kuvidu kenemiu jidomiano totano beamu vo, naruei mia nemijikia neviedu vija iliano na melokloko nalo ga, ea bajago na tinietiano.

## 5

*Bajago va ea taara na nalotuano*

<sup>1</sup> Iliano binimei bokar tilinieku ber vite tai jo iviso ka kamiu napano kiriniagiago laka. Nalo aber kamiu tai, karam̄ano ba joro ka tira dolu tai, ana iorou, toro na bina ka karam̄ano koano tira neibano binimei jo bijaio. Be riano na, tomu na melijokouo maka ajikia ala bajago na, mia juñabe kamiu namoneano nalo tai jom̄a milαιο?

<sup>2</sup> Kamiu namoneano nalo kumitu kumidular kamiu, kuber kumitu kumir̄au bo, mia juñabe kumitu kumituvan bajago na jibe na jo ba iviso kean kamiu? Bo ka kuvijog rivova ka vite nei, a bo ka kuvukular toro na den kenemiu taara na nalotuano.

<sup>3</sup> Ee, be riano napano vonganei kiniou nojo ea vio nei koalabo den kamiu, ana ea niunuku nomijog jibe nojo bija kamiu ga. Jibe na, ea Tubo Yesu siano, noberial toro na kiano tibureiano tai jibe napano nojo nejikili noju ea miremiu.

<sup>4</sup> Jibe na, bogo napano kamiu kubinimei vio takurano bereio, monoka kuvitii ka jibe niunuku jo bija kamiu, a monoka kuvijikia ka Tubo Yesu bunu jo bija kiano moroano, <sup>5</sup> naruei monoka kuvukular toro na den taara na nalotuano. Naio monoka taluvo bereio, rivan bereio ea yetemeriba ea Siñaro juñano, ana bo ka bajago na kariano nalo na yetemeriba ala naio rijog rivova rivano-o, ĩeli iorou mia naio rimei bereio, ka Tubo saaro ka rilarur niununo ea bogoti na maaro.

<sup>6</sup> Bilbilu nalo, maka rivu napano kumitu kube n̄arou laka ka kamiu, kuber kumeravo, bior napano niamiamo nei jo keano

vo ea kamiu. Kamiu kumijikia ruei ka isi telisu ga, mia mijikia rila joko nonovio nalo riyuku.

<sup>7</sup> Tibe na, bo ka kuvar bulag isi na bova nei napano jua kamiu, ka kamiu nonovio kumijikia kumei kumeravo vatitig bereio. Kito monoka rosidomii jibe ka ga napano kulo moruo nalo aju amila sida ka nunu kenerinio ka avar bulag kialo kariano, vonganei Kristo binimej m̄aro ea m̄akolkolo ka kiado kariano, ana maka rivu ka niamiamo toa kito kia ga vo.

<sup>8</sup> Ana bogo napano kulo moruo nalo amila sida kario, be jokoluolu nene, ana kito bunu namoneano nalo be kiado jokoluolu. Mia maka rivu rotua jokoluolu na, resen joko tai napano isi moruo tai joaio. Iliano nei berii bova ka kariano bija bajago va na meuliano moruo aju kea ea kito, bior joomo ea meuliano na taara na nalotuano, vite nonovio monoka rimeravo rivu, rive riano rivu, a ve lu rivu.

<sup>9</sup> Kiaku iliano tai ban kamiu jibe nei ruei. Ea m̄esi dolu na napano nebitauia biedu ban kamiu nua, neberial ban kamiu monoka kuvitu re vio takurano vija tomu nalo napano aju amila bajago va, p̄eli aju aburovuro janea vio ka tire nalo.

<sup>10</sup> Ana p̄eli kamiu tealo kumijog belea kiaku iliano nei, bior maka never tivelinio na tomu nalo napano maka amonea. Ea nalo, miroano aju amila siakaiano, miroano abe buruviti, miroano abe navinauano, a miroano aju amilotu ka kialo tavoru nalo, mia ver rosidom ka rotu laka kalo, p̄eli monoka rotuvan yetemeriba nei ga, bior napano kito nonovio rojua yetemeriba, a roju robiviuo tomu p̄ilipili nalo na jibe nei bogo nonovio.

<sup>11</sup> Maka notuko vio ka nina, napano roju robiviuo tomu p̄ilipili nalo jibe nei ea kiado ieliano nalo, mia venia napano nojidom neverii, nojidom never ka ver toro tai to napano rivu ka naio be namoneano riano tai, mia kuvialio napano ea kiano meuliano naio jo mila siakaiano, p̄eli jo be buruviti julaka, p̄eli jo milotu ka tavoru nalo, p̄eli jo mioluolu, p̄eli jo munu uei, p̄eli jo bina. Toro na jibe na naruei mia kuvila vite tai re leleio vija naio, kuvan re vaataro kanio, kuvisinin re vijaio.

<sup>12</sup> Tibe na, ea tivelinio na nalo napano aju tavio ea taara na nalotuano, maka ve kiado ka rotibure kialo meuliano nalo, mia ea tivelinio na nalo napano aju joomo ea taara na nalotuano, monoka rovitii vatitiglo. Ver tealo aju amila kariano na kirivova jibe napano neberii, monoka rotiburelo, a monoka rala vite tai kalo.

<sup>13</sup> Atua ga mia tibure nalo napano maka atu joomo ea taara na nalotuano lu,

*mia ea tivelinio na toro na napano jo mila bajago va iviso kean kamiu, kamiu ga naruei monoka kuvukular naio rivano. Tiut 17:7*

## 6

*Bajago novo ka ala vatitig baravoiano*

<sup>1</sup> Kiniou nomijog bunu aber bogo tai, kuruado tai ea taara na nalotuano naio mila baravo bija dolu tai, naruei naio jumolu buru dolu napano na ban ea komeli na toru ka ail vanio. Kiniou nemial ka vite na maka rimemedu leleio, bior napano maka rivu ka tomu nalo napano amonea Atua ava asikil atua mirano tomu na tortoru nalo napano maka amonea Atua, ka tomu na tortoru nene atiburelo.

<sup>2</sup> Bogo napano namoneano nalo be kialo baravo, bo ka namoneano dolu nalo ga ala vatitiglo, bior napano monoka rosidomii ka kito namoneano nalo naruei napano mia rotibure tomu nalo na yetemeriba ea legiano na maaro. Ana ver kito na naruei napano mia rala im̄auano ve toru tibe nei, p̄eli mia kamiu kubare ka kuvila vatitig kenemiu baravoiano na tertelisu nalo ea kamiu bereio.

<sup>3</sup> Mia Atua jii kito roju ka rotibure agelo nalo na tiniabene, ana bogo napano namoneano nalo dolu amil bior vite nalo na yetemeriba nei, jur̄abe? Kamiu kumial ka jikili laka, maka kuvijikia kuvila vatitiglo?

<sup>4</sup> Makanio, monoka kuvilaio na. Ver makanio, p̄eli kamiu kuber p̄eli bo kamiu namoneano nalo kubar kenemiu iliano nalo jua tomu dolu jur̄alo napano maka atu amei ea taara na nalotuano?

<sup>5</sup> Kiniou nemil jikili kija jibe na bior napano nojidom nala kamiu kuvimou kija! Ee, nomiilo laka ka nemialio ka jibe napano maka lele kamiu tai napano be masou, napano mijikia rila vatitig kenemiu baravoiano nalo na.

<sup>6</sup> Peli nina naruei mila kuruado tai ea taara na nalotuano jumolu buru dolu nene ban ea komeli, naruei jo berial kiano vovaiano nalo ea mirano tomu na tortoru nalo na komeli na, napano maka amonea Atua?

<sup>7</sup> Kiniou nojo nemil ban kamiu jibe nei ea tivelinio na m̄arabo napano monoka kuvitakio ka kuvila vatitig baravoiano nalo napano aju iviso kean kamiu, mia bo lie bunu ver maka bunu baravoiano nalo na tu. Baravoiano nalo na ju jibe na, berenio ka Sir̄aro jo jovulu kamiu ruei. Peli maka kuvijikia vo, ka ver kuruado tai mila bova banso, p̄eli bina ka kiamo titai, kotovonio re, kotuvan ga, bior kiano kariano na ga.

<sup>8</sup> Ana ver kotumolu kojidom kovuru toro na ea komeli labo ka adu vironiano vanio, jau naruei jau bunu koje komila bova bereio ban kuruamo.

<sup>9</sup> Monoka kuvisidomii ka nalo napano kialo meuliano maka rimemedu, mia maka ajikia aial Atua kiano nave-natuboiانو riyotuba keanlo. Maka rivu ka kuvila von tibe na napano maka kuvijikia vite na kiana vo, bior kumijikia ruei ka Atua maka saaro leleio ka nalo napanoaju amiel vuru ninio vio, ħeli nalo napano amilotu ka atua sibisibi nalo, ħeli nalo napano amila siakaanalo, ħeli nalo napanoaju aĥilvili ka mokotenalo, ħeli suĥano napano ju bano bija suĥano bereio, ħeli tira napano ju bano bija tira bereio <sup>10</sup> ħeli nalo napano abina ga, ħeli nalo napano maka atu atan ka vite rivan toro dolu, ħeli nalo napanoaju amunu uei, ħeli nalo napanoaju amioluolu, ħeli nalo napanoaju amiĥau kotkoti.

<sup>11</sup> Riano ga, beamu na kamiu tealoo ajibe na ruei, mia siva toru napano Niununo Lu jekon kamiu kumeravo, mila kube lu, a kiado Tubo Yesu Kristo mila kitoromemedu vatitig bereio ea Atua mirano.

#### *Mokotenado monoka rimeravo vatitig*

<sup>12</sup> Kiniou neberial bajago va nalo na, napano maka rivu ka ralaio, mia tomu tealoo maka asidom ajikiaio. Nalo aber jibe nei, aberinavo "Ee, kiaku meuliano nei, kiniou nemijikia nala venia napano kiniou nojidom nalaio."

Mia neverdoĥelo, never "Ee, ħeli kiamo meuliano, mia kovitikario, bior vite telabo napano kojidom kalaio, nalo amijikia ala kiamo meuliano rivova laka. Mia vite telabo napano kojidom ka atua kiamo meuliano, kober mia komijikia kotelan vuu liliglo, mia maka leleio, mia koial napano vite nalo na naruei mia atelan vuu lilig kiamo meuliano bereio."

<sup>13</sup> Tealoo bereio napano ajidom ka ala venia napano ajidom ea mokotenalo,aju aber iliano dolu tai, aber "Sinaniano, naio be tena maboku, a maboku, naio be tena sinaniano."

Ee, be riano, mia kuvitikar vatitig bereio, bior napano mia Atua rila tenaloo juo nei riva rivakovio navo. Jibe na, Tubo ĥian mokotenado ban kito, ana kito monoka resian mokotenado rivan bereio van naio. Mokotenado tena riĥauka kiano iĥauano, mia maka ve tena rivan tanea ninio vio.

<sup>14</sup> Ver kito rojamo ka mokotenado rila iĥauano novo nalo ga, mia ea bogoti na maaro Atua mijikia vitirilar mokotenado bereio, jibe napano naio bitirilar Tubo

Yesu mokotenano garuei, ea kiano buruĥara moroano.

<sup>15</sup> Kito monoka tiniedo maio kanio ka mokotenado nalo ajibe niati nalo na Kristo mokotenano. Ana ĥuĥabe, bo ka niati na Kristo mokotenano tai riva riasol vija tira tai na ĥarabo bereio? Maka rijikia tibe na leleio!

<sup>16</sup> Iliano Lu berenio jibe nei, ber "Mia suĥano a tira, abe juo abinimei takurano," ana suĥano napano ban bija tira na ĥarabo, mila napano mokotenano binimei takurano bija tira nei mokotenano.

<sup>17</sup> Maka rivu ka toro tai rila tibe na, mia monoka roiasol kito vija Tubo, napano niunudo binimei takurano bija niununo.

<sup>18</sup> Monoka rovitikar vatitig ka kariano va nalo napano tomu nalo amijikia ala vija mokotenalo, ea tivelinio na suĥano bija tira. Kariano dolu nalo napano aĥuĥa amilaio,aju amila bova ban toro dolu mokotenano, ana toro napano mila kariano bija tira, jo mila bova ban mokotenano naio takurano bereio.

<sup>19</sup> Kito tiniedo bobogia re, moko-tenado jibe yimo lu tai na volkouano napano bujolou ka Niununo Lu napano Atua midu ju joomo ea kito. Mia mokotenado na, maka ve kiado, <sup>20</sup> mia be Atua kiano, bior napano naio bulular kiado meuliano ruei ea Yesu kiano ĥariano. Jibe na, monoka roĥau vija mokotenado ka rala ga vite nalo napano aturĥa adular siano.

## 7

### *Soriano*

<sup>1</sup> Bo ga, vonganei mia neverial jidomiano tealoo ea nina napano kamiu kubika den kiniou ea tivelinio na soriano, ber bo ka rosoro, ħeli bo ka rotu ga tibe na? Bo ga, mia never tibe nei. Verver toro tai jo jidom ka soro re, nina bo ga na, maka ve titai.

<sup>2</sup> Mia bior napano romial ka juku-jukuano ĥikili, a siakiano telabo, ħeli bo lie ver tomu nonovio nalo ave koaloo nalo.

<sup>3</sup> Jibe na, bogo napano suĥano jidom riva vaataro ka koano tira, koano tira monoka saaro kanio, a bogo napano tira jidom riva vaataro ka koano suĥano, koano suĥano monoka saaro kanio.

<sup>4</sup> Tira napano joro maka ĥikia river mokotenano be kanano naio takurano, mia koano suĥano mijikia river be kiano bunu. Mia suĥano napano joro maka rijikia rivere mokotenano be kanano naio takurano, mia koano tira mijikia river be kiano bunu.

<sup>5</sup> Jibe na, tai monoka tukovio re ka dolu rimeie re vaataro kanio.



Ee, ƣeli bogo tai ave juo averiio, ajamo ka mia atuvanlo, abe juo maka amon vio takurano ea bogo ve telisu, ka rila amijikia abolkouo sikili rivior vite tai beamu, a nina naio bo ga. Mia iorou, ave juo monoka asaaro ka amei vio takurano bereio, bior napano ver makanio, ƣeli Siŋaro bitilubar napano tai melukluku, maka bunu rijikia rivokar naio, ana mila mijoru ea jukujukuano ea vio tai.

<sup>6</sup> Vite nalo na napano nojo neberenio, maka never tibe tuboiano tai na jikili, ka tomu nalo monoka asoro, ƣeli monoka asoro re, mia nejian von jidomiano tealo ka ijaiano ga.

<sup>7</sup> Ver tomu nonovio amijikia atu tibe kiniou, napano maka nosoro, nojo jibe na ga, ƣeli mia bo mia bo, mia nemijikia ka tena joa ga jidomiano napano Atua jian ban kito terakurano.

<sup>8</sup> Nojidom never iliano tai van nalo napano aju ga jibe na, jibe nalo napano maka asoro vo, bija taanou nalo. Kiniou nemial jibe ver kamiu kumijikia kuvitu tibe na ga, jibe napano kiniou bunu nojo nomilaio, mia rivu mia rivu. <sup>9</sup> Ana ver tealo aialio aver makanio, mia sikili laka ka nalo ka avokarlo tulaka tibe na bogo nonovio, mia bo ga na, bo lie ka aleal tai napano amijikia asoro kanio. Maka rivu ka jukujukuano to serlo rivano-o atu ajog rivova tulaka.

<sup>10</sup> Iliano dolu tai napano nojidom neverenio, naio rivan ea nalo napano ajoro rui, napano maka kiaku jidomiano tai ga, mia iliano tai napano Tubo jian jibe iliano tai na jikili ban kito. Naio ber jibe nei, ber tira monoka rivuro den re koano suŋano. <sup>11</sup> A ver bogo tai tira tai juvan koano suŋano, jaluvo denio bereio, naio monoka rivan re soro bereio, mia monoka to ga tibe na. A ver ƣeli, bo ka naio vija koano suŋano ave juo ala merevuiano vanlo, atu vio takurano bereio. Mia suŋano nalo bunu, monoka ajil bulag re koalo tira nalo.

<sup>12</sup> Bo ga, mia neverial vite dolu nalo tai. Nalo maka atibe ka Tubo kiano tuboiano tai, mia nalo ajibe kiaku jidomiano tealo ka rijai kamiu.

Vite na beamu, nina ea tivelinio na napano toro tai bija tira tai, naljuo ajoro, ana toro neibano naio monea Yesu mia koano tira naio maka rimoneaio. Mia ver tira nei jaaro ga ka nalo ve juo atu vio takurano, maka rivu ka toro neibano sidomii ka rivukular koano tira nei. <sup>13</sup> Mia bare ka bunu ver toro tai bija tira tai, naljuo ajoro, ana tira neibano monea Yesu mia koano suŋano maka rimoneaio. Verver suŋano neibano jaaro ga ka nalo

ve juo atu vio takurano, maka rivu ka tira neibano sidomii ka rivukular koano suŋano neibano. <sup>14</sup> Nina bior napano naljuo tai napano monea naio mijikia rila vite novo tai ea napano maka rimoneaio, a bajago novo nei mijikia rila kialo soriano ave juo rimei rivu laka tibe tomu juo kialo soriano napano nalo abe juo amoneaio. A bunu, naljuo tai kialo napano monea naio mijikia rila vite novo tai ea kenerilo abe juo, bior napano naio mijikia ridu vatitig kenerilo ave juo atu ea mŋarabo na meuliano lu, nalo ailuo joomo ea taara novo tai tibe kiritete dolu nalo napano karamŋalo bija kenielo nalo abe juo amonea. <sup>15</sup> Mia ea tivelinio na naljuo nei napano tai monmonea mia tinene maka monmonea, ver naio napano maka monmonea jidom tuvan koano napano monmonea, kito namoneano dolu nalo monoka rojamo ka tibe na ga. Ver napano maka monmonea maka bunu sidom napano monmonea, maka rojikia rola von ka royuku napano monmonea ka to vija koano neibano napano juvan naio, bior napano Atua jidom ka rotua meuliano tai napano bujo bija bajago na tuŋaro.

<sup>16</sup> Jau tira napano komonmonea, ƣeli jau suŋano napano komonmonea, ƣeli kojidomii kober jau komijikia kotuvulu koamo napano maka monmonea, mia makanio, jau maka kojikia vatitig ka mia tuŋabe, bior ƣeli jau maka kojikia kotuvulu naio leleio.

*Kito monoka rotu riŋaro vatitig ea meuliano napano Atua midu rojuao*

<sup>17</sup> Mia venia ga napano monoka rolaio, kito nonovio monoka rotii vatitig kiado meuliano veve terakurano to rivu ea vio na napano Tubo jii kito rojua eaio rui, ƣeli monoka rotu roieliel ga ea mŋarabo napano Atua bio kito ka roiel eaio. Nina naruei be iliano tai napano nojo nojii ea kiado yimo lu nalo. <sup>18</sup> Iliano nei nioti nene ber vio vabe kojua beamu komonea, monoka kosaaro ka kotoa kea ga bogo napano komonmonea. Tibe na, verver tealo abe Ju, a aju ajakii kialo bajago moruo nalo, jibe pakuveu ƣeli venia bereio, naio bo ga, kiniou maka never ka bogo napano amonmonea nalo monoka ajulu bajago moruo nalo napano aju ajakii. Mia be verare bunu ka nalo napano maka ave Ju, napano maka ala pakuveu a nalo aju ajakii kialo bajago moruo dolu nalo. Ea tivelinio na nalo bunu maka never ka bogo napano nalo amonmonea nalo monoka ajulu kialo bajago moruo nalo nei. <sup>19</sup> Toro jakii bajago moruo venia, jibe abe pakuveu ƣeli maka ave pakuveu, naio maka ve tena toru tai ea

Atua kiano vitiiano, mia Atua jidom ga ka rotakii kiano tuboiano nalo. <sup>20</sup> Nina naruei neber ka bogo na jau komonmonea, jau kotornaro ga ea vio nei napano kojoaio bogo na maka komonmonea vo. <sup>21</sup> Jibe, ver beamu jau kojo komiñau kurano toro tai kiano, karina komonmonea, nina bogo na, monoka kosaaro ka koto koiñau kurano tibe na ga. Mia be riano, ver bogo tai koleal ka be kiamo bogo ka kotaluvo den iñauano kurano nei, nina bunu bo ka kobisi kanio. <sup>22</sup> Verver jau komiñau kurano ea toro tai, monoka kosidomkar ka bogo napano Tubo bioso, naio miija larso jiiso vatitig joomo ea kiano mñaratavo memedu. Mia ea tivelinio dolu nene, ver maka koiñau kurano toro tai kiano, jau kojo vatitig jibe na ga, jau bunu monoka tiniemo maio ka bogo napano Kristo bioso, monoka komei tibe kiano toro tai na miñau kurano, kala nonovio kiano iñauano. <sup>23</sup> Nina bior napano Kristo bulu bulag kito ka vite toru tai, jibe kiano burukija, ka kito rove kiano, ana monoka rovitilubario ka memedu ka roimñau kiano kurano ga, maka rivu ka roimñau kurano toro dolu kiano ðeli roju yetano ka toro dolu kiano jidomiano napano romiñau kiano.

<sup>24</sup> Naina naruei bilbilu nalo, vio napano jau kojoa bogo napano maka kojikia Atua vo, vio na naruei mia monoka kotoaio kia ga, mia vonganei napano jau komonmonea naruei, mia Atua jo bogo nonovio bijaso bunu ea vio na.

*Vikadeniano ea tivelinio na nalo napano maka asoro vo, vija taanou nalo*

<sup>25</sup> Bo ga, kiniou nojidom nesian iliano ve telisu van kamiu ea tivelinio na nalo napano maka asoro vo. Iliano nene, maka nejikia never ka naio be Tubo kiano tuboiano tai napano naio ber ka kinio, mia iliano nene jibe kiaku jidomiano tai ga. Mia kamiu kumijikia ruei ka Tubo mijukubo ban kiniou, jian masouano nalo ban kiniou napano kumijikia kubalea vatitigio eaio, mia bo ka kuvisidomii ve temi ea kiaku iliano nalo nei.

<sup>26</sup> Vonganei, kito rojua bogo va tai napano roju robiniua laka vite kouo eaio, mia bo ka never bereio iliano nei napano kiniou nober beamu mave, nober bo ka kito rotu riñaro ga ea meuliano vaio napano rojuaio ruei. <sup>27</sup> Tibe na, ver jau toro tai napano kojoro ruei bija tira tai, jau koto riñaro tibe na, kosidomii re ka kotuvanio. Verver jau toro tai napano maka ve koamo vo, jau bunu koto riñaro tibe na ga, kosidomii re ka kosoro ka tai.

<sup>28</sup> Mia verver kosidomii kober makanio, kojidom mñelea ka kosoro vija tira tai, maka

nover bova, a verver tira mñeaku tai soro vija toro tai, nina bunu maka tibe kiano kariano tai, nina bo ga na. Mia nalo napano ajidom ka asoro, nalo monoka avitilubar ka mia kialo meuliano maka melumu, mia nalo aviniua bogokouo ve telabo ea yetemeriba nei, a verver kotakii kiaku iliano, ka kosoro re, mia nasaaro laka.

<sup>29</sup> Bilbilu nalo, kiniou neber jibe nei bior napano bogo bulati ga ju ka Tubo rimei bereio, mia maka tomu ve telabo ka ala kiano iñauano. Tibe na, bo lie verver tomu nalo napano abe koalo nalo ala tibe maka asoro, mia nalo amijikia ala Tubo kiano iñauano ve telabo. <sup>30</sup> A bunu, nalo napanoaju ajegi bior vite tai, bo ka nalo tinielo bobogia vite nene napano naloaju ajegio, a nalo napanoaju amijog bo ea jogvuiano na yetemeriba, bo ka asidomii re bunu. Nalo bunu napanoaju amimñau bior veru, bo ka nalo ala napano jumalo beteauo ga. <sup>31</sup> Nalo napano amila iñauano dolu na yetemeriba nei, bo ka nalo ala tibe napano maka ve kialo vite nalo toaio, bior napano yetemeriba nei bija kiano vite nonovio nalo jo ban ka rivakovio garuei.

<sup>32</sup> Kiniou neber iliano nalo nei ka kamiu bior napano nojo nojidomii laka ka kamiu, maka nosidom ka vite ve telabo napano kenemiu jidomiano jo jidom laka kanio bogo nonovio. Toro napano maka ve koano, naio mijikia sidomii ve temi ea Tubo kiano iñauano bogo nonovio ga, ber mia naio rimñauka tumabe napano mia Tubo risaaro kanio. <sup>33</sup> Mia toro napano be koano, naio jo jidomii ka vite nalo na yetemeriba, ka monoka rila tibe venia napano mia koano saaro kanio, <sup>34</sup> a mijikia rila ka kiano jidomiano beveve juo. Mia tira mñeaku ðeli tira kulovu napano maka ve koano, naio bunu kiano jidomiano mijikia sikili vatitig ka rila Tubo kiano iñauano nalo, a kiano ieliano bija kiano meuliano mijikia ve lu vatitigio laka. Mia tira napano be koano, kiano jidomiano monoka toa iñauano nalo na yetemeriba nei, tibe napano monoka rimñauka vite nalo na rila koano rijogio rivu.

<sup>35</sup> Kiaku iliano nalo nei, maka nosidom notuko vio ka kamiu ka vite ninio napano kamiu kumisidom kuvilaio, mia neber ka rila von ka rijai kenemiu meuliano. Nojidom ga ka vite nonovio na lotuano riva rivu, a nojidom ka kito namoneano nalo ravan re tanea vio, mia rovitii ga Tubo naio ve takurano.

<sup>36</sup> Kito tealoo amila napano amila ko koalo tai, mia nalo aber ðeli bo ka nalo atu vesiou tibe na ga beamu, nalo maka asidomii ka asoro bior napano ajidom ala Tubo kiano iñauano. Mia ver tai rial ka jo

jidomii laka ka tira nei napano aberkoio be kiano, a jidom laka kanio banbano-o maka rijikia rivakar naio, nina bo kanio ga ka ala naljuo asoro. Nina bo ga na, naio maka ve kariano tai leleio. <sup>37</sup> Mia ver tai rila kiano jidomiano rivu napano jikili ka naio jidom ka naio vija tira neibano aberkoio ka naio, ka nalo ve juo atu tibe na ga beamu, a ver naio bitilubar ka naio mijikia vokar vatitig naio, nina naio mila bo laka ver naio maka soro vija koano nei. <sup>38</sup> Jibe na, naio napano joro von ka koano nei napano aberkoio ka naio, naio mila vite novo tai, mia nina napano jo jibe na, maka rila soriano vija tira nei napano aberkoio ka naio, naio mila bo lie mia bo laka. <sup>39</sup> Ea tivelinio na nalo napano ajoro rui, nalo monoka atuvanlo re. Tira napano joro rui monoka to rivu vija koano sumāno napano koano nene meul jo kia ga. Mia verver toro neibano rimāro, tira neibano mijikia soro bereio, a naio mijikia soro ka toro kei napano jidomio, mia monoka tai napano monmonea bunu Tubo. <sup>40</sup> Jibe napano neber, naio mijikia soro, mia nemial jibe mia bo lie ka naio ŗeli mia kiano saariano ve toru lie ver naio soro re bereio ga. Nina be kiaku jidomiano ga, mia neber ŗeli Atua kiano Niununo naruei jian jidomiano masosauano nalo nene ban kiniou, ana bo ka kamiu kuvisidomii vatitig kanio.

## 8

*Jumābe ka sunbue nalo napano amue ka ala lotuano van tavoru nalo?*

<sup>1</sup> Vonganei kiniou nojidom neverdoŗe kenemiu vikadeniano ea tivelinio na sunbue nalo napano tomu nalo na maka amonmonea amila sida kanio ban kialo tavoru nalo. Kamiu kumitu kubika kuber bo ka kito namoneano nalo rosen sunbue nalo na, ŗeli na makanio.

Bo ga, mia kiaku verdoŗeiano beriio tenalo juo nei, bajago na jikiaiano, a bajago na tinietiiano. Ea tivelinio na jikiaiano, tomu telabo napano aberenio aber amijikia vatitig verdoŗeiano na kenemiu vikadeniano nei, a nalo amijikia avarvar kalo kija napano ajidomii aber nalo amijikia vite. Bajago na jikiaiano mijikia rila toro ridu kiano jidomiano to mave, mia bajago na tinietiiano maka tibe na, naio jo miija vatitig toro kiano meuliano ga.

<sup>2</sup> Toro napano jidomii laka ber naio bokar bajago novo na jikiaiano, naio maka rijikia vatitig Atua vo jibe napano naio bo ka rijikiaio.

<sup>3</sup> A toro napano bokar vatitig bajago na tinietiiano, nina naruei napano Atua bitilubar vatitig naio.

<sup>4</sup> Bo ga, nina naruei kiaku iliano juo bereio ea tivelinio na sunbue nalo napano amila sida kanio ban tavoru nalo. Nana be moti ber jibe nei, ber kito romijikia vatitig ka tavoru nalo na abe toto ga, ana maka ave toto ka vite na be riano tai leleio. A juo nene jibe nei, ber kiado Atua naio takurano ga be riano ju. <sup>5</sup> Tomu naloaju aberii kialo atua dolu nalo ŗeli kialo tubo dolu nalo, aberinavo ajua tiniabene ŗeli ea yetemeriba nei, a naloaju aberiilo jibe nalo miroanoaju, <sup>6</sup> mia ea kito, romijikia vatitig ka Atua takurano ga jo. Nina naruei Atua karamādo, napano naio be burupati ka vite nonovio, napano kito robe kiano. A Tubo takurano ga ju, nina naruei Yesu Kristo, napano naio jii vite nonovio, napano kito romeul eaio.

<sup>7</sup> Nina naruei jikiaiano novo napano kito miroano namoneano nalo robokario rui, mia titai bova, kito tealoka ajikia vatitig vite nalo nei vo. Nalo nene, beamu laka nalo bunuaju amilotu ka tavoru nalo, ana binimei bokar banei, jikili kanilo ka avitilubar ka nina be vite na sibiano ga. Jibe na, bogo napano tomu nalo aborosebi bija sunbue nalo napano amila rui sida kanio ka tavoru nalo, kito romijikia rosenio tibe napano maka ve titai ga, mia kito dolu nalo neibano, bogo na asenio, ajenio bija jidomiano ka sunbue nei be tena tavoru nalo, ana kar niabelo ŗili kanio bereio, amijog jibe amila vite tai napano maka rimemedu ea Atua mirano.

<sup>8</sup> Mia monoka rojikia ka sinariano maka ve vite tai napano mijikia rila Atua rial ka robo ŗeli robova. Ver rosen re sunbue na, maka river ka robo ea kiano vitiiano, ŗeli ver rosenio, maka river ka robova.

<sup>9</sup> Joa ga kito ka rojidom rosenio ŗelina maka rosidom rosenio, mia maka rivu rala vite tai napano namoneano dolu asidomii aver maka rimemedu ka alaio. Peli kito romijikia rala vite na rivu ga, mia maka rivu ka naio rialio napano romilaio, ana rila bulag kiano jidomiano.

<sup>10</sup> Jibe tivelinio na sunbue nalo neibano, ŗeli ea kiamo jidomiano, komialio ka bo ga ka asenio, ana jau komijikia kala tibe maka ve titai. Mia ver bogo tai koto vija tomu nalo napano abolkouo ka tavoru nalo, a nalo asian sunbue vāso a jau kosenio vijalo, mia tumābe ver namoneano dolu tai rialso. Peli naio tai napano berkar ka naio bel ka sunbue nalo nene, mia bogo napano mialso ka koje kejenio, mia naio riverenio "E, toro na be taara na nalotuanalo tai napano mijikia vatitig vite, mia naio jo jen sunbue nalo na ga. Tibe na, bo ka kiniou bunu nosenio." Mia ber jibe na, mila naio bunu jenio mia iorou mia mijikia

rijog rivova laka bior napano ber ĩeli naio mila buruńara kariano tai.

<sup>11</sup> Nina berenio ka jau kojo kojakii kiamo jikiaiano novo, kobitilubario ka komijikia kala vite na. Mia monoka tiniemo maio ka toro dolu na, napano naio be kuruamo tai napano Kristo ĩaro ka rilarur kiano meuliano, bior naio merou laka ka rilaio. Tibe na, ver naio rial napano bogo tai komilaio, mia mijikia rila ka napano komila bulag kiano viekouoiano novo.

<sup>12</sup> Ver tibe na, mia Atua rialso tibe jau naruei komila kariano ea kuruamo nene, bior napano komila naio mila vite tai napano ea kiano jidomiano kirivova ka rilaio. Nina naio bova, jibe ka napano jau komila kariano ea ga Kristo.

<sup>13</sup> Bior vite nei, nomila kiaku ji-domiano tai, ka ver kiaku bajago ka nosen sunbue nene naio be titai napano mila bulag kuruaku kiano viekouoiano, mia notuvanio ga. Mia notokolio re bunu, bior napano maka nosidom ka mia nola kuruaku rijoru.

## 9

### *Pol berii kiano bajago na ińauano*

<sup>1</sup> Bilbilu nalo, nojidom never ka kamiu ka kiniou maka noto yetano ka toro dolu kiano jidomiano, mia nojo nomirńau jakii venia napano nemijikia ka memedu ka nalaio. Kiniou atevi tai napano nomial Yesu Kristo kiado Tubo ka miraku, a kamiu naruei ajibe ĩarati na kiano ińauano napano nomilaio.

<sup>2</sup> Nemijikia ka tomu tealó maka asidom avitilubar kiniou ka nebe atevi tai, mia kamiu maka kuvitibe na. Vonganei, kenemiu meuliano ju vatitig bija Tubo ruei, mia vite na mila kamiu kubitilubar ka nomirńau ea kamiu jibe kiano atevi riano tai.

<sup>3</sup> Mia ea nalo napano ajidom atibure kiniou ka nemila bova jibe na jibe na, kiaku verdoĩeiano nalo aju.

<sup>4</sup> Nemijikia ka nalo aberenio ka aju abitkar kumemi bano-o tinielo ĩaro, mia ĩurńabe? Nalo abitkar nalo dolu ruei nua na, ana maka ail tibe na, ana bogo na napano nebinimeĭ, ajikar ka amildie. Peli aber mia ver kumemi nuvidu re sinaniano ĩeli munuiano mia numijikia numeul tibe na ga ka nuvila ińauano ea nalo?

<sup>5</sup> Mia nalo amil ea kumemi tealó napano ajoro ruei, nalo abika aber bior vaio koalo nalo bunu abinimeĭ aju ajakisor kumemi? Mia kei berenio ka nina naio kirivova? Atevi nalo dolu napano abinimeĭ beamu, bija Tubo kuruano nalo, bija Kevas, bogo napano amieliel ka ińauano jibe na, koalo

tire nalo aju ajakigsorlo, mia ea bogo na, tomu nalo nei maka aildielo.

<sup>6</sup> Mia bereio, nalo ajidom atuko vio ka kumemi ka monoka nuvinńau re rivior veru ka nuvulu kenememi vite nalo. Ver kumemi juo Barnabas nuvinńau re mia bo ga, mia bior vaio na aju aber jibe nei ban kumemi juo ga, mia maka aver ka nalo dolu?

<sup>7</sup> Kuvila von kuvisidomii tomu na mira nalo na venuo tai. Bogo na aba amila mira, mia kei jo bulu kialo vite nalo? Nalo ga abuluio, ĩeli kialo parinio venuo naio bululo?

Mia kuvila von kuvisidomii nalo napano amebija sinaniano ea tiniavio. Verver nalo asinan ea tiniavio nene, maka toro tai napano mia ril vanlo riviorio.

A bunu, ĩurńabe ka toro napano jo bagan temeul nalo? Peli naio maka leleio sen sunbue nene nalo?

<sup>8</sup> Kiniou neber vite nalo na ka rila kamiu kuvitilubario ka toro tai rila ińauano tai, bo kanio nalo napano mirńau kialo nalo monoka avitkar vatitig naio. Mia kiniou neber jibe nei, maka riyotuba ea kiniou kulorinio kiaku jidomiano, mia kiado tuboiano lu naio jo berenio jibe na bunu.

<sup>9</sup> Iliano tai ju joomo ea Mosis kiano tuboiano ruei, napano ber jibe nei, berinavo

*Bogo napano kiamo bue ĩarauo jo miel jelviv mave ea kiamo boboseru nalo, ka vita bulag kurukuti nalo nene, jau monoka koiadikar re niono, mia monoka kotuvan naio sinano kija riel rivano.*  
*Tiut 25:4*

Ana bogo napano Atua ber iliano nei, naio maka to tinien maio ka temeul nalo, <sup>10</sup> mia naio jidomii kito napano romirńau, ka nalo napano romirńau kialo, nalo monoka avitkar vatitig kito. Toro napano mirńau ea tano, memedu ka naio sidomii ka bogo tai mia naio sen venia napano jo mebijaió, a toro napano ban ea tiniavio ka rivar sinaniano rimeĭ, memedu ka naio bunu sidomii ka mia ajev ve telisu rivanio.

<sup>11</sup> Mia tivelinio na kenememi ińauano ea kamiu, kumemi numebija kurukuti novo ruei ea kenemiu meuliano, mia bo ka kamiu kuvisaaro ka kuvitkar kumemi a kuvitanka vija kumemi ilivuiano nalo tealó napano Atua bario jua jumemiu.

<sup>12</sup> Kamiu kumitu kumiija tomu dolu nalo ruei jibe na, mia bo ka kuvisaaro lie ka kuvila ea kumemi napano numila bo laka ka kamiu nua ruei.

Ee, bo ka kuvila tibe na ka kumemi, mia bokario vonganei maka nuvitu nuver leleio van kamiu nuver monoka kuvilaio.

Kumemi numerou ka ver nuverialio tibe na, mia kenemiu jidomiano rivova kean kumemi, mia ver ʔeli tukovio ka m̄arabo na Ioluano Vou rimei ea kamiu. Tibe na, kumemi nuvil re bunu, a ver numijog bova ka kamiu maka kuvitkar kumemi, nina bo ga na.

<sup>13</sup> Mia bo ka kamiu kuvisidomii bunu ka ea Atua Kunuano Lu, nalo napano amiñau joomo eaio, bija nasidaiano nalo, aju ajen tenalo nei, a aju ameul ea vite nalo napano tomu nalo aju ajianio jibe jidomiano nalo ban Atua.

<sup>14</sup> Mia Tubo berial jibe na ga bunu ea tivelinio na kiano tomu nalo napano aju amioliolu ka Ioluano Vou. Nalo bunu, memedu ka amijikia ameul ea jidomiano nalo napano tomu nalo neibano amijog Ioluano Vou nene aju ajianio.

<sup>15</sup> Bo ga, kiniou naruei kiniou tai kalo na jibe na, mia jikar nua binimei maka leleio never ka tomu nalo monoka asian venia rivan kiniou, ʔeli monoka ala tuñabe ka kiniou. Mia nojo neberii vite nalo nei ea m̄esi nei, maka rivior ka nojidom novika vite tealo den kamiu. Maka nosidom ka kuvitkar von ka kuvisian vite nalo van kiniou, mia kamiu kube m̄arou kuber kamiu naruei kubagan kiniou, mia nojidom ka nomijikia noto nove m̄arou ka Atua ga jo bitikar kiniou bogo nonovio. Bogo napano nemijikia ka kiaku meuliano joa juñano ga, nojo nomijog bo laka, a verenio naio re napano jo bitikar kiniou, ʔeli mia nojog ka bo ka ga nañaro.

<sup>16</sup> Neber ka nebe m̄arou ka napano naio bitikar kiniou jibe na bogo napano nojo nomoliolu ka kiano Ioluano Vou, mia ea tivelinio na kiniou, be riano ga na ka maka vite tai leleio napano nemijikia neve m̄arou kano. Maka nejkia nosidomii ve-vavin ea siaku bereio never kiniou naruei nebe naiolioluano na Ioluano Vou, bior napano Atua naruei bitirilar kiniou, mia nemial jibe monoka nala ga. Ver bogo tai novuro nala re bunu, mia rivova laka rivan kiniou na.

<sup>17</sup> Maka noto nala iñauano na rivior kiaku jidomiano tai ga, maka kiniou ga neber bo ka nala ka Atua saaro ka kinion, ʔeli naio rijikia sian jidomiano van kiniou riviorio. Maka tibe na, mia Atua ga naio berialio, midu joa juñaku, mia monoka monomea, monoka nala tibe na ga.

<sup>18</sup> A jibe na, neber ʔeli mia kiniou nodu re jidomiano tai riviorio, mia nina bo ga, bior ka Atua jo mila todolu tai napano jibe vuluiano novo tai ban kiniou ruei. Vite na, naio be buruñara jogvuiano na nabar bogo napano nojo nomoliolu ka Ioluano

Vou ban ea tomu nalo, napano nomila kurano ga jibe na banlo. Peli nemijikia never bo ka ajian vite ban kiniou bior, ʔeli avitkar vatitig kiniou bogo napano nojo nomilaio, mia maka nosidom nina, nojidom napano amijikia avokario tibe na ga, maka ve titai leleio napano tukovio kalo.

*Pol be nakuraniano na tomu nalo jibe naiolioluano novo tai na Atua kiano*

<sup>19</sup> Jidomiano jibe nei naruei joa kiniou, a mila nojo nomirñau ea bajago tai napano mia nevisivisi vatitigio van kamiu vonganei.

Jibe nei, maka noimñau toro tai kiano, a maka toro tai napano ve kiaku boru, mia nojo namila kiniou nebinimei jibe nakuraniano ga na kulo dolu kialo, ka rila nemijikia novokar nalo ve telabo amei amonea.

<sup>20</sup> Ea tivelinio na Ju nalo, nojo namila kiniou nebinimei jibe toro Ju novo tai, ka rila na nemijikia novuru nalo tealo amei.

Ea tivelinio na nalo napano maka ave Ju, mia ajakii Mosis kiano tuboiano, nojo nomila kiniou nebinimei jibe tai napano jakii tuboiano nei bunu. Maka neial ka noto yetano ka tuboiano nene, mia najaaro ka nabamenea tuboiano nene jibe na, ka nomijikia novokar nalo na napano ajidom atu yetano kano.

<sup>21</sup> Ea tivelinio na nalo dolu napano maka ave Ju, napano maka atakii Mosis kiano tuboiano, nojo nomila kiniou nebe takurano bijalo. Maka never ka nomila kor Atua kiano tuboiano moruo, makanio, mia bogo napano nojo bijalo, nojo najakii Kristo kiano tuboiano vou ka rila ajikia aleal meuliano.

<sup>22</sup> Ea tivelinio na nalo napano nemialo ka maka atu sikili rivu, maka neil sikili vanlo, mia nomila jibe kiniou bunu bijalo, nojo nemijialo, ka ʔeli nemijikia novurulo. Jibe na, nojo najakii m̄arabo nonovio ka nala vite nonovio napano nemijikia nala van tomu nonovio, ka rila rivano-o mia nemijikia nalarur nalo tealo amei amonea Yesu.

<sup>23</sup> Nemila jibe na, maka nala rivior kiniou ga, ʔeli rivior vite dolu ninio, mia nomila bior ga nojidom ka Ioluano Vou monoka rivar m̄arati ea tomu nalo kialo meuliano, a bogo napano neial ilivuiano nalo napano Ioluano Vou rila kalo, nojog rivu mia nojog rivu.

<sup>24</sup> Kuvisidomii von bogo napano tomu na tikitiano aju ajikiti bijalo. Ea bogo na, nalo nonovio monoka ala von ka atuvanono ka atikiti avano, mia ve vio kalo amijikia amei atukamu beamu, atuvulu nalo dolu? Ve

takurano ga mijikia rivuku nalo dolu, tikitit riva tuvululo rijev jidomiano riviorio. Mia tibe na, kamiu nonovio monoka kuvisikili ka Tubo kiano ināuano, monoka kuvila von ka kuvitikitit kuvan ka kuva kuvijev kenemiu jidomiano.

<sup>25</sup> Tomu na sereiano aju amila von kirisikili, aju amilakakar vatitigio bogo nonovio, a nalo aju Abel ka vite nonovio napano pēli amijikia ala mokotenalo sikili re vatitig. Nalo aju amila jibe na bior kialo jidomiano jikili ka ajidom atuvulu ka ajev jidomiano. Mia bogo na ajilan maniegieg ea tomu na sereiano nalo nei, bogo bulati ga maniegieg neibano bova bereio, mia maniegieg napano bo ka rola vonio roimāu sikili ka atilano ea kito, naio naruei jo jobo jo.

<sup>26</sup> Jibe na ga, nojo nomimāu jibe na naruei ea Tubo kiano ināuano napano nojo nomilaio. Maka noto netikitit kurano tanea vio, a maka noto nesere ga, <sup>27</sup> mia nojo nobokar kiniou, nojo nojilavuu vatitig ka mokotenaku bogo nonovio, bior napano bova nojo nomiololu vatitig ban tomu dolu nalo, neber nalo jibe nei jibe nei, mia iorou kiniou naruei nolaluvu mārabo pēli maka navare ka nala nonovio vatitig tikititiano napano nojo nejikititio.

## 10

*Nalo napano aber amemedu, amijikia alaluvu mārabo, jibe ju nalo korobilo nalo*

<sup>1</sup> Bilbilu nalo, bo ka kito tiniedo maio ka venia napano korobido nalo amilaio. Nina ea bogo napano tormoruo Mosis burulo ajaluvo den Ijivi, ajakisor melijo na napano jo ban beamu kalo, banbano burulo abarkor burumāra tei nei napano betavo kalo.

<sup>2</sup> Nalo abiniua bogokouo nalo nene, mia Mosis burulo abar dulo, a nalo abinimej jibe kiano tomu riano.

<sup>3</sup> Yuka miroano aju amiel ea vio yauo, nalo nonovio ajen sinaniano na napano Atua jian banlo, <sup>4</sup> a bogo midoujerlo, Atua mila uei miyotuba ea bulukuveru ga, ka amunuio. Ea bogo na, jibe napano Kristo ga jo bijalo, jo bitikar vatitiglo ea vite nonovio.

<sup>5</sup> Atua mila bo banlo jibe na banbano, mia maka asidom atu sikili ea naio. Nalo abilig taakalo kanio, naruei naio maka bunu rijamo kalo ava joomo ea vio napano naio berkario banlo, naruei mila amārmāro garuei janea vio ea vio yauo ga.

<sup>6</sup> Mia kito banei, maka rivu ka parido sikili tibe korobido nalo nei, mia ver rosidomii vatitig rivu ka venia na maluvo ealo, romijikia rolakakar vatitig vite eaio.

<sup>7</sup> Tibe na, monoka rodu re vite dolu to tukamu ka Atua ea kiado meuliano, jibe tavoru tai napano romilotu kanio, jibe napano korobido nalo nei amilaio. Iliano tai napano berii kialo bajago ea bogo na, berinavo

*Nalo maka asidomii vite dolu, ajidom ga ala jokoluolu, bija munuiano na toro-gtano, a asiraragii tira ea voluano, nina ga.* Eks 32:6

<sup>8</sup> Nalo aber ka naina naruei meuliano novo, mia monoka tiniedo bobogia re bogoti nene napano Atua mila maro va nalo abinimej ajer tomu nalo a tire nalo napano amila siakaiano, mia ea bogoti tai ga menu duelimo valuo ba tolu [23,000] kalo amārmāro vaarakurano, jibe kialo vironiano na jikili tai. Jibe na kito monoka rovitikar vatitigio, maka rivu ka kito tealu atu avan tanea vio tibe na.

<sup>9</sup> Toro na be mārrou, mila kariano jibe na, a beriamā bo ga na, naio jo julū mēlea Tubo. Mia Tubo rila vite tai kanio, mia toro na ritabujo, maro rimej kanio jibe nalo dolu neibano.

<sup>10</sup> Mia maka rivu ka rosermii ka Atua, jibe napano aju amilaio nua, ea korobido nalo kialo bogo. Ea bogo na, Atua miila nailiano tai na verikariano na mārario binimej ealo, muebinivinlo.

<sup>11</sup> Romial napano aju amila kariano jibe na, a romial ka vironiano nalo amal-maluvo ealo jibe na, naio be vite tai na rilabon kito. Abivitaui bulag tukunuano nene nua beamu, mia romijikia ralakakar vite eaio banei, ea bogo maaro nalo napano rojuao.

<sup>12</sup> Jibe na, ver toro tai jo jidom veve naio ve takurano kiano meuliano bereio, a beriamā naio jo jikili ju kirisikili vatitig ruei, bo ka naio vitikar vatitigio, bior maka rivu ka bogo tai naio rila vite va tai, ana rijoru.

<sup>13</sup> Kumial jukujukuano nalo binimej, mia kumemebiju re laka. Maka kamiu ga napano kubiniua jukujukuano nalo nei, mia aju amaluvo ea tomu nonovio kialo meuliano. Mia kumijikia kuvalea Atua, bior napano mia naio maka rilaso ka koviniua jukujukuano napano maka kovare ka kotuvuluio, mia bogo napano jukujukuano rimej rila vonso, mia naio riverial kiano mārabo tai kaso ka kosikili koviniua jukujukuano nalo na, rivano-o kotaluvo den kiano moroano.

<sup>14</sup> Kiaku bilbilu novo nalo, monoka kuvan re vaataro leleio ea bajago na napano tomu nalo aju amilotu ka tavoru sibusibi nalo. <sup>15</sup> Nemijikia ka kube tomu nalo napano kumijikia vite, mia bogo napano nomil kirimemedu ban kamiu jibe nei,

nomonea ka kumijikia kuvitii vatitig venia napano nojo neberenio.

<sup>16</sup> Neber iliano nei bior napano bogo na komiasolso bija tomu nalo napano aju amilotu ka tavoru tai, jibe ka napano jau bunu kojo komilotu kanio rui.

Nina be verare ga ka tivelinio na kito napano romonea Kristo. Ea bogo na sinaniano lu, robolkouo ka munuiano lu, romidu, a nina jibe ka roberialio ka romiasol bagaro na tomu nalo napano kiano burukija miou karlo. A iorou, rovurekokorov joko lu, romidu, a nina jibe ka napano ro-bija nalo napano amila bulag mokotenano napano jaklele mave ea mākolkolo.

<sup>17</sup> Nina be riano ka kito nonovio napano roju robinime i vio takurano ea sinaniano lu nei, bior ka robinime i jibe bajago takurano, a rojen ga joko takurano nei.

<sup>18</sup> A jibe na bunu ea kulo Israel, bogo napano amue kialo sida nalo. Tealo maka ala sida, mia ajaaro ka asen sunbue na sida nalo nei napano nalo dolu amilaio, naruei mila jibe na napano abe bagaro takurano ga amila lotuano jibe na ban Atua.

<sup>19</sup> Bo ga, iliano nalo na berenio venia? Nojo neberii tavoru nalo bija sida nalo nei, mia maka neverenio ea kiaku jidomiano ka vite nalo nei abe riano, pēli abo.

<sup>20</sup> Maka tibe na leleio, mia bo ka nala meravo van kamiu ka nalo napano aju amila lotuano kinkin nalo jibe na, maka amonea Kristo, a sida nalo napano aju amilaio, maka atu ala van Atua napano be riano, mia aju amila ban ea siñaro nalo ga. Tibe na, maka rivu ka kuva vaataro kalo napano aju amilaio, bior napano maka nosidom ka kuviasol vija siñaro nalo.

<sup>21</sup> Jau napano kojo kojotano ea Tubo kiano barobaro lu, kojo komunu ea kiano baja lu, a kojinan ea kiano sinaniano lu, maka kojikia kova kototano ea siñaro nalo kialo barobaro ka kodu kialo munuiano a sinaniano.

<sup>22</sup> Toro napano naio mila jibe na jo julu Tubo, mijikia rila Tubo rijokua laka, tinien ser naio. Peli na toro nene beriañā ber ver Tubo tinien jer naio jibe na, maka ve vite tai na, bior ka naio kirisikili lie loa Tubo? Maka nesidom ver tibe na.

*Namoneano nalo monoka ala re vite napano mijikia rila namoneano dolu nalo ajog rīvova*

<sup>23</sup> Iliano tai jo, napano tomu miroano aju aberenio, aber toro mijikia rila venia ga napano naio jidomio. Peli iliano na be riano, mia vite nalo tai ju ka nemijikia nalaio, mia maka nosidom ga nalaio, bior ka kiaku vitiano, nalo maka atu aija

kinioi ka kiaku meuliano, a maka atu aija tomu nalo kialo meuliano nalo napano aju vaataro kean kinioi.

<sup>24</sup> Neber jibe nei bior napano maka rivu ka toro to sidomii naio ve taku-rano ga, mia naio monoka sidomii bunu tomu nalo napano naio jo vaataro keanlo.

<sup>25</sup> Bo ga, vonganei mia neber tenalo tai ea tivelinio na sunbue na temeul nalo napano amila sida rui kanio ka kialo tavoru sibusibi. Verver avar sunbue nene amei, avar tu vija sunbue dolu nalo ka aṽilvili kanio, romijikia rovulu ka resenio nina bo ga. Nina bior napano maka rotu rovitilubar ka sunbue nalo nei ajumabe, nuber sunbue vabe na amila sida kanio, pēli sunbue vabe na maka ala sida kanio, mia rosidomio mēlea re, rovika re vikadeniano, rovulu ga. <sup>26</sup> Rodu, rosenio, bior nina jibe ka iliano tai napano ber jibe nei, berinavo

*yetemeriba nei, bija vite nonovio napano ajuaio, abe kei kiano? Abe kiado Tubo kiano ga. Iouano 24:1*

<sup>27</sup> A ver toro tai napano maka rimonea rivioso ka kova kosinan ea kunuano, pēli komerou ka kovano, kojo kober pēli avar sinaniano tai vanso napano amila rui lotuano kanio ban kialo tavoru nalo. Mia makanio, ver koto kosidomii ka kovano, kavano ga, a koto kovivika re vikadeniano tibe na, kodu ga venia napano ajianio banso.

<sup>28</sup> Mia, vite tai ga, ver jau kova koto yako rui, a namoneano dolu tai to, naruei pēli naio riverialio vanso tibe na, river, Kuruaku, sunbue na, kito juo monoka rovel kanio, bior napano nomijikia ka amila rui sida kanio ban kialo tavoru nalo. Ver naio river tibe na vanso, naina naruei mia jau bunu kosenio re.

<sup>29</sup> Ee, ea tivelinio na kiamo jido-miano, kojaaro ka kosen ga, mia ea tivelinio na kuruamo dolu nei napano ber vite na kaso, hova ka naio, naruei bo ka kotokol re bunu, bior verenio makanio, mia jau kola vite tai napano kiano jidomiano maka rimemedu kanio leleio.

Mia ver jau ga takurano, a maka toro tai riverial vite tai vanso tibe na, jau komijikia ka kola venia napano komijikia ka memedu kaso ka kolaio.

Naina naruei kiaku jidomiano jibe na ka vio na. Kinioi neber pēli maka rimemedu ka toro dolu kiano jidomiano ga jo miyuku kinioi ka monoka nala nina pēli nala re ninei.

<sup>30</sup> Ver sinaniano kinkin vaio, mia nemi-alio ka ver beamu, nobolkouo kanio, mia nemijikia nosenio rivu ga. Maka rivu ka

toro dolu tinien seri kiniou ka nojo nejen sunbue tai napano neber siva ban Atua bior ruei.

<sup>31</sup> Bo ga, nina berenio jibe nei, ber verver kito rosen titai, ħeli romunu titai, ħeli vaio bereio napano romijikia ralaio, mia monoka ralaio nonovio ea bajago tai na ridular Atua siano. <sup>32</sup> Kirivova ver kamiu kuvila titai napano mia rila bulag kulo Ju nalo kialo jidomiano, ħeli kulo Kris nalo, ħeli kiado namoneano dolu nalo, <sup>33</sup> mia bo ka kuvila von ka kuvila tibe na kiniou nojo nemilaio kalo. Ea vite nonovio napano nojo nemilaio, maka nala von ka nala ka rivu van kiniou, mia namila von ka nala rivu vanlo, ka rila ka ħeli nalo tealo amijikia avokar ioruriano.

## 11

<sup>1</sup> Ee, bilbilu nalo, jibe ka napano kiniou nojo nomila von ka neiel noue Kristo jaano, bo ka kamiu kuvila von kija ka kuviel kuvue jaaku.

*Tomu nalo kialo bajago novo bogo na aban ea lotuano*

<sup>2</sup> Bilbilu nalo, nomijog ka kumitu kumisidomii kia ga iñauano nalo napano nomimauka ban kamiu, a kumitu kubakar batitig bajago nalo na iñauano nei napano neberloglog ka kamiu. <sup>3</sup> Mia ea vite nalo nei, nalo tai jo keano napano nojidom ka kamiu monoka kuvijikia vatitigio, napano berii toro bija tira, napano naljuo kialo iñauano maka rive verare. Jibe ka napano Atua karaanado naio be parinio ka Kristo, a Kristo naio be parinio ka toro, naruei suñano be parinio ka koano tira.

<sup>4</sup> Mia jakii kiado bajago, ver toro tai rivolkouo, ħeli ril ea mirano namoneano nalo, naio monoka riya re batubatu joa parinio. Verver riyai, romial naio jibe vovu tai napano maka rijikia rila bajago na vameneano. <sup>5</sup> Mia ea tire nalo naio be dolu. Verver tira tai bolkouo, ħeli ril ea namoneano nalo miralo, romialio rober bo naio jovuko parinio ka batubatu ħeli kulunñarauo tai tibe na. Verver sovoko re vatitig parinio tibe na, naio bunu mila bova, romial naio be verare ga ver ve boromo ga, to sikili tu ea mirano tomu nalo.

<sup>6</sup> Ver tira tai parinio sikili, maka sidom sovoko parinio tibe na, bo ka kamiu kuver kano ka taĥig kon parinio ga tukamu, ana karina mijikia sikili tu ka rivolkouo joomo ea lotuano. Ana mia naio monoka rimou laka ka rila tibe na, bior maka rivu ka tira rivuron vijinio ve bulavulati laka, ħeli taĥig vijinio ve boromo. A verenio ve vite na imouiano ka tira jibe na, bo ka tire

nalo asaaro ka avokar kiado bajago na vameneano, nalo monoka asovoko parilo tibe na, bogo na abinimei ka avolkouo ea lotuano.

<sup>7</sup> Mia ka venia tomu nalo maka asovoko parilo? Nina bior Atua jo mave, a naio be boru ruei, mia mila suñano jibe nei, bitirilar suñano mila naio loa ka tira. Jibe na naruei suñano monoka re rilavan parinio, mia tira monoka sovoko parinio.

<sup>8</sup> Romijikia ka suñano monoka to mave tibe na, bior napano Atua jii suñano beamu, karina jii tira den merikono tai na mokotenano suñano, mia maka tii suñano den tira, <sup>9</sup> a naio jii tira ka rijai suñano, maka tii suñano ka mia rijai tira.

<sup>10</sup> Tibe na, tira monoka sovoko parinio, ka verialio ka naio bamenea koano. Mia bogo na naio mila jibe na, nailiano nalo na tiniabene amialio, a mila abitulubario ka jibe ka tira jaaro ka vatove ka koano, mia nalo bunu monoka asaaro ka avatove ka kialo toro na toru, napano Atua. <sup>11</sup> Ierinio napano tira monoka rivatove ka suñano tibe na, mia nina maka riverenio ka naljuo maka ave verare. Kito napano roju joomo ea bagaro na Tubo, romijikia ruei ka tira maka rijikia to naio ve takurano, a suñano maka rijikia to naio ve takurano, mia naljuo monoka atu aiñau vei ka aijajalo ve verare ga. <sup>12</sup> Beamu laka, ea tiiano, tira moti moluo ea suñano mokotenano, mia iorou ka naina, tomu nonovio aju amolmoluo ea tira mokotenano bokar banei, mia romijikia ka burupati riano nene, napano vite nonovio malmaluvo eaio, naio be Atua ga.

<sup>13</sup> Peli tealo maka asaaro ka kiaku iliano, napano neber bo ka tira napano bolkouo monoka sovoko parinio, mia kamiu kuvila von ka kuvisidomii vatitig kano. Ea kenemiu vittiano, kubitii ka tira napano maka sovoko parinio, memedu ka naio tumolu rivolkouo van Atua? Maka leleio, ea kiado bajago maka lele rimemedu. <sup>14</sup> Ea kiado meuliano na yetemeriba nei, meravo vatitigio ka kito ruei, ber bogo napano suñano juvan vijinio terebievi laka, maka rivu laka ka naio. <sup>15</sup> Mia bogo napano tira juvan vijinio terebievi kirinovo, bo laka ka naio, a vijinio na terebievi nei, Atua jian ban naio jibe ka vite tai ka riovvua vu mokotenano.

<sup>16</sup> Mia jibe napano neberenio, namoneano tealo aju amil laka, maka asaaro ka jidomiano nene napano ber ka tira napano jidom rivolkouo monoka sovoko parinio. Bo ga, kiaku iliano jibe na, ber kumemi naverloglogiano nalo, nuberloglog jibe nei ga, maka nuvisaaro ka ba-



jago dolu, a Atua kiano bagaro na lotuano pīlīpīli dolu nalo, nalo bunu aberenio jibe na.

*Marabo na memedu ka ala sinaniano lu*

<sup>17</sup> Vite tai bereio jo kia napano nojidom never jidomiano tealo ka van kamiū. A maka rivu ga, bior napano maka ve vite tai napano nemijikia nodular kamiū riviorio, mia be vite tai napano monoka noil van kamiū riviorio. Nina ea tivelinio na bogo na lotuano, napano bo ka tibe na vite tai napano rijai kenemiu meuliano, mia kumila tibe na binimeī be burupati jaleleano tai bereio. <sup>18</sup> Neber jibe na bior napano nomijog rui aber bogo napano kamiū namoneano nalo kuburon vio takurano, maka kuve takurano, mia vuruburevureiano jo binimeī judu iviso kean kamiū. Ver iliano nalo nei be sibiano, bo, mia makanio, nemialio jibe monoka be riano ga. <sup>19</sup> Mia maka nejikia ka vaio kumisidom kuvila tibe na? Peli tai jidom tovulu tai, tai jidom tovulu tai tibe na? Peli kojidom kotuvuluio, ka mia tomu nalo aver jau naruei kobe riano, pēli jau naruei Atua jo bijaso?

<sup>20</sup> Mia ea tivelinio na sinaniano lu, nomi-jog aberenio nina bunu kumitu kumila bova. Bogo napano kuburon vio takurano ka kuvila sinaniano lu nei, maka bunu kuvila ka kuvisidomiikar kiado Tubo, mia kumila jibe semiu sinaniano dolu nalo. <sup>21</sup> Verenio tai rimeī rijog vitu, mia tumolu riyuku jumano rivar joko ve telabo naruei dolu nalo ve re salo, pēli dolu rimunu mārjumēlmēlu ve toru! <sup>22</sup> Peli maka ve kenemiu yimo na vorosebiano, ana kubinimeī ea lotuano ka kuvisinan eaiō? Peli kamiū kumila jibe na bior napano kumitu kumisidomii kurano ea Atua kiano yimo na lotuano, pēli kumitu kumisidomii kurano ea namoneano bilbilu dolu nalo? Maka nejikia mia never venia ka kamiū rivior vite nei, a mia neber ga maka nasaroo kanio leleio.

<sup>23</sup> Marabo na memedu ka ala sinaniano lu, Tubo naruei ber ka kiniou, a iorou, kiniou naruei nojuvan biedu ban kamiū. Bano jibe nei, ber Tubo Yesu, ea kiano bogiano maaro na, napano Jutas jiveluku naiō eaiō, naiō midu joko nei, <sup>24</sup> ana bolkouo ber siva biorio, burekokorovio, ana berenio “Ninei naruei be mokotenaku, napano nomijamo bior kamiū. A kamiū monoka kuvisen joko tibe na tulaka, tibe vite tai ka kuvisidomii kiniou.” <sup>25</sup> A iorou, bogo napano ajenio bano-o bisi, naiō midu baja na mārjumēlmēlu, mila jibe nene bereio, ber kalo berinavo “Baja nei, naiō be kiaku burukija, napano mila Atua kiano verikariano vou napano mila bija toro

jikili ju. A bogo nonovio napano kamiū kuvidu baja nei tibe na, neber bo, kamiū monoka kuvisidomial kiniou.”

<sup>26</sup> Bilbilu nalo, naina naruei Tubo kiano iliano ea tivelinio na, a mila ver bogo napano rosen joko vija rodu baja tibe nei, roju romila sidomkariano na kiano māriano, a mia kito monoka rotu rala tibe na vokar bogo napano naiō rimaluvo kean kito bereio.

<sup>27</sup> Tibe na, ka rodu Tubo sano joko nei, vija māno baja nene, naiō be vite tai napano be lu laka. Ver toro tai ridu ea bajago tai napano maka rimemedu, toro na mila kirivova, mila bulag vijauano na mokotenano Tubo bija kiano burukija, jibe ka naiō ga muebin naiō. <sup>28</sup> Tibe na, bogo na ala sinaniano lu nei, monoka rovitii vatitig kiado meuliano veve terakurano, karina, rodu joko vija baja nene. <sup>29</sup> Mia bogo na rodu, monoka rovitilubarario ka vite nei, nioti nene toru jo, napano berial ka kiado Tubo mijamo ka kiano meuliano bior kito. Naruei, ver toro tai senio, ana maka sidomii ve temi ka kito nonovio robe toro takurano ea Kristo, midu ka iakurano ga, a mia naiō rialio napano rivova lie ka naiō. <sup>30</sup> Vite na naruei jo mila kamiū rui, napano miroano ka kamiū amelmeluku pēli amie, ba bokar napano tealo amārmaro. <sup>31</sup> Mia ver rotu rovitii vatitig kiado meuliano bogo nonovio, mia Atua sian re vironiano van kito tibe nei. <sup>32</sup> Mia kito napano Atua mila ka kito jibe nei, maka rodu tibe vironiano tai, rodu tibe jidomiano tai napano Atua mila ka rilabon kito, ka sian bogo van kito ka ea bogo maaro, mia avukular kito re rovan vija tomu dolu nalo na yetemeriba napano mia avan ea vio na jogvaiano.

<sup>33</sup> Bilbilu novo nalo, naina naruei kiaku iliano ea tivelinio na ala sinaniano lu. Bogo kumei vio takurano tibe na, mia kuvila ea bajago novo. Ve re tai napano rila von ka ridu soḡeli ka senio ve toru beamu, mia kuvitu rimāro ga, kar bogo napano aviniu atu, kamiū kuvilaio. <sup>34</sup> Toro napano jijerio ana jidom laka sinaniano, bo ka tobo ga vonuo, sinan vatitig ea kiano vio. A monoka kuvitakii kiaku iliano ea tivelinio nei, ver pēli, bogo na mia kumei vio takurano, mia maka lele vite tai rivu van kamiū.

Vite nalo dolu ju ka neverialio van kamiū, mia rotukunu kalo bogo na namaluvo kean kamiū.

## 12

*Moroano nalo napano Niununo Lu jianio jibe jidomiano tai*

<sup>1</sup> Bo ga kuruaku a kuvivinioku nalo, kiniou nojidom neverii moroano nalo napano Niununo Lu mijikia sianio van kito namoneano nalo jibe jidomiano tai. Ea tivelinio na, maka rivu kamiu kuve taboso, mia nojidom ka monoka kuvijikia vatitig kija kalo. <sup>2</sup> Beamu, bo ka kuvisidomii nua ea bogo na maka kumonmonea vo. Ea bogo na, moroano nalo na niununo dolu nalo aju amiñau ea kamiu, aburu kenemiu jidomiano ba be vovu vatitig ka kuvilotu ka tavoru nalo ninio napano maka ajikia ail. <sup>3</sup> Nina naruei niununo kinkin nalo napano amijikia ala toro ril rivova ka Yesu, riolua siano, mia Atua kiano Niununo Lu maka rijikia sian iliano na jibe na. A niununo nalo na, maka ajikia ala toro river iliano novo, verial Yesu be Tubo riano, mia toro napano ber jibe na, romijikia ka Niununo Lu jo miñau ea naio, bar iliano nei banio.

<sup>4</sup> Jibe na, bogo napano romial moroano novo nalo napano namoneano nalo amijikia aiñau vijaio, romijikia ka jibe jidomiano nalo napano Niununo Lu jianio banlo. Moroano telabo ka ala iñauano aju, mia Atua kiano Niununo naio takurano be burupati ka nonovio. <sup>5</sup> Jibe ka ga napano bajago telabo ka ala iñauano aju, mia kiado Tubo naio takurano be parinio ka nonovio, <sup>6</sup> a jidomiano novo telabo ka ala iñauano aju, mia Atua naio takurano jo mila abavavin ea kito nonovio. <sup>7</sup> Jibe ka, ea tivelinio na moroano nalo napano Niununo Lu jianio, namoneano nalo amijikia ajevio beve dolu, jakii venia ga napano Atua bitii ka mia riija lie taara na namoneano nalo.

<sup>8</sup> Ea tai, Niununo jian iliano nalo napano abe masou laka. Ea tai, jian navitilubariano novo nalo. <sup>9</sup> Ea tai, jian viekouoiano toru. Ea tai, jian napano mijikia milarur namieiano nalo. <sup>10</sup> Ea tai, jian napano mijikia miñauka vremesiano nalo. Ea tai, jian verialiano na vite nalo na ju ka rimeí. Ea tai, jian napano mijikia rijidig bulag simño nalo. Ea tai, jian napano mijikia rijeve ka iliano dolu. Ea tai, jian napano mijikia billig iliano nalo napano amijeveio ka iliano dolu. <sup>11</sup> Nina naruei ijaiano nalo napano Niununo Lu naio takurano ga mijikia ridu toa toro kiano meuliano, jo jian bulagio ban kito terakurano jakii ga venia napano naio jidomio.

<sup>12</sup> Namoneano nalo abar ijaiano nalo beve dolu jibe na, jibe ka napano mokotenado nalo be tarati dolu nalo miroano. Terati dolu nalo na, amiasolo aju amiñau vei ea mokotenano takurano ga, a jibe ka bunu joomo ea taara na namoneano nalo,

napano ajibe ka terati nalo ea Kristo mokotenano. <sup>13</sup> Peli kito kulo Ju ðeli kito kulo Krik, ðeli kito tortoru ðeli roju romiñau kurano toro na toru tai kiano, mia Atua kiano Niununo midu kito nonovio, mila kito rabaruei ka romei rove terati na Kristo mokotenano, a Niununo na naruei napano naio takurano ga joa kiado meuliano nalo beve terakurano.

<sup>14</sup> Bo ka kito rosidomii lie ea kijo-kijo nei napano roju roberioi, rober kito namoneano nalo rojibe Kristo mokotenano. Naruei ea tivelinio na mokotenado, romijikia ka terati nalo miroano. <sup>15</sup> Tibe na, maka rimemedu ka terati tai, tibe jaano, rijog rivova, tumolu riverinavo "O, kiniou jaano ga, kiniou maka noiñau rivu tibe napano juñano miñau. Peli maka bunu rivu ka neve terati na mokotenano." Mia makanio, jaado maka rijikia river tibe na, bior naio be terati na toru ea mokotenado ruei. <sup>16</sup> Mia maka rimemedu ka tiliniedo rijog rivova, tumolu riverinavo "O, kiniou tilinieno ga, kiniou maka nejikia nevitií vite tibe napano mirano milaió, ðeli maka navare ka noto noiasol ea mokotenano." Mia makanio, tiliniedo maka ver tibe na, bior napano naio, kiano iñauano novo napano mila ka mokotenado jo ruei. <sup>17</sup> Nina bior napano verver mokotenado rive mirano ga, mia maka rejikia rojog lubar vite, a ver mokotenado rive tilinieno ga, mia maka rejikia rojugunu vite. <sup>18</sup> Mia ea mokotenado, Atua mila jakii kiano jidomiano, bar vatitigio nonovio terati nene ajua vio nalo nene memedu terakurano, ka ala kialo iñauano memedu veve terakurano. <sup>19</sup> Ver terati mokotenado nalo avinui averaverarei ga, mia kito maka rejikia rovitii tibe ka na mokotenano jibe ka takurano ga, <sup>20</sup> mia terati dolu nalo abinui monoka aiasol vio takurano ka ve mokotenano toro. <sup>21</sup> Mirado maka rijikia ril rivova van juñado, river "O, maka bunu nosidomso," a pariparido maka rijikia rijil jaado, river "O, maka bunu tinioku tiso." <sup>22</sup> Maka leleio tibe na, a! Terati mokotenado tealo amelmeloko laka, mia romijikia ka aju amila buruñara iñauano. <sup>23</sup> Terati dolu na mokotenado nalo, rosidomii re rever abo juñabe, mia rotu rovitikar vatitiglo. Terati dolu tealo na mokotenado, maka rosidom toro dolu rialio, naruei rojidom temi ka roiako vatitiglo. <sup>24</sup> A terati dolu na mokotenado, abo ka tomu nalo amijikia aialio, naruei maka roiakolo. Jibe ka, romial ka Atua bar vatitig terati nonovio memedu ga, a midu jidomiano tai joa kito ka napano bekurano terati tealo amelmeloko, ðeli

maka ala iñauano ve toru, mia rosidomii ve temi kalo a rovitikarlo rivu. <sup>25</sup> A nina mila napano terati nalo nonovio maka ail niegelo, mia aju bo ga, aju amijajalo bereio bogo nonovio. <sup>26</sup> Ver terati na mokotenado tai rijog rivoa ka vite tai, terati nonovio dolu nalo monoka ajog rivoa vija naio, a ver aijalar terati tai, mila bo banio, terati dolu nonovio amijikia ajog rivu vijaio.

<sup>27</sup> Naruei iliano nalo nei aberenio jibe nei, aber kito naruei namoneano nalo, rojibe ka Kristo mokotenano, a kito terakurano robe kiano terati nalo nene. <sup>28</sup> A Atua bitiri bulag kito terati nalo na Kristo mokotenano, ka rola iñauano nalo na lotuano. Na beamu, Atua bitiri bulag tealó abe navagadeano, na juo nene tealó abe atevi, na tolu nene, tealó abe naverloglogiano, a iorou kanio, nalo napano amimñauka vremesiano, ðeli amilarur mieiano nalo, ðeli abitkar iñauano ea lotuano, ðeli amijev iliano dolu nalo, jibe na. <sup>29</sup> Naruei, ea taara na namoneano nalo, kito romialio napano abiniu abe atevi? Peli abiniu abe naverialiano? Peli abiniu abe naverloglogiano? Peli abiniu amimñauka vremesiano? Maka leleio tibe na. <sup>30</sup> A abiniu amijikia ala rur mieiano nalo? Peli abiniu amijikia ail ka iliano dolu nalo, ðeli avilig iliano dolu nalo? <sup>31</sup> Maka leleio tibe na, mia bo ka tomu nonovio asaaro ka avokar burumñara moroano vabe napano Niununo mijikia sianio vanlo.

A ea moroano nalo na, tai jo napano monoka rimei ve moti ea kiado meuliano nonovio, napano bo lie laka ka nalo dolu, napano kiniou nojidom noverio van kamiu, nina bajago na tinietiano.

## 13

### *Tinietiano*

<sup>1</sup> Tinietiano, naio be vite tai napano monoka ve vite moti ea kiado meuliano. Peli nemijikia neil sel kulo dolu kialo iliano, ðeli nemijikia neil ka agelo nalo kialo iliano, nina bo, mia ver kiniou tinieku tii re tomu nalo, mila napano kiaku iliano nonovio ajibe ka ði tai napano amue vovu, miolu kurano ga. <sup>2</sup> Peli burumñara moroano joa kiniou ka neverial Atua kiano iliano, ðeli na nemijikia vatitig vite telabo napano tomu dolu nalo maka ajikiaio, ðeli na kiaku viekouoiano toru laka bare ka nobolkouo ka tenalo na tortoru mia amaluvo, vite nalo na abo laka, a ver tinieku tii re tomu nalo, nebe iakurano ga. <sup>3</sup> Peli nejian kiaku saba nonovio ban talimñasa nalo, ver ðeli noju jikili banbano-o amisebi mokotenaku bior napano nebe Kristo kiano toro, nina bunu bo, mia ver

maka tinieku titii tomu nalo, nemila ka iakurano ga.

<sup>4</sup> Naruei burumñara vite nei, bajago na tinietiano, naio jumabe? Jidomiano nene tebievi, a be tinievuiano. Naio maka rijokua, naio maka rivarvarka, a naio maka to ridular naio bereio. <sup>5</sup> Kiano bajago kirinovo, naio maka rive viti, maka tinien mimi soðeli, a maka rivokar jidomiano va vesiou. <sup>6</sup> Naio maka sidom vite va, mia jaaro ka vite novo. <sup>7</sup> Tinietiano naio jikili ju julaka, tinietiano naio be riano julaka, tinietiano naio tinienekar julaka, a tinietiano naio juvulu julaka. <sup>8</sup> Tinietiano maka tinien maro leleio bogo tai.

Be riano laka, moroano dolu nalo, jibe verialiano nalo, ðeli iliano na ka iliano dolu nalo, ðeli jikiaiano nalo, mia nalo maka ajikia atu tulaka, mia tinietiano ga naio jo julaka ga, naio maka rijikia ribisi bogo tai. <sup>9</sup> Ea kiado bogo, aju aberial Atua kiano iliano nalo, a aju aberloglog jikiaiano nalo jibe nei, mia venia napano aju amila banei, be torogtorogio nene ga, maka rivokar kiano vujoano leleio. <sup>10</sup> Vite nalo nei abe tana vonganei ga, a ea bogo napano mia Atua rila vite nalo rimei rivu nonovio, vite dolu nalo nei mia abisi, mia tinietiano ga mia to.

<sup>11</sup> Nina be verare ga ka kiado meuliano. Bogo napano robe kiritete kia ga, kiado iliano bija kiado jidomiano bar kiritete kiano bajago. Mia bogo na robinime tortoru, maka bunu rotibe ka kiritete, kiado bajago meruo vatitigio. Naruei kiado meuliano bija Niununo Lu monoka tibe na bunu.

<sup>12</sup> A naio be verare bunu ka mermerobi nalo napano roju robittii mirado eaio. Bogo tealó, ver mermerobi nei miagiago ðeli be mñadati, mia maka rejikia rovitilubar vatitig mirado eaio. Mia bogo napano Atua rila vite nonovio rimei rivu, mia romijikia rovitilubar vatitig vite nonovio, a mia roial Atua mirano rimemedu ka mirado ga. Mia bunu ea tivelinio na kiado jikiaiano, vonganei romijikia telisu ga, mia ka bogo na ju ka rimei, mia Atua rila kito rojikia vatitig naio, vija vite dolu nonovio, ve verare ka ga naio mijikia vatitig kito nua rui binime bokar banei. <sup>13</sup> Tibe na, vite dolu nalo mia abisi, mia vite tolu ga amijikia atu tulaka, nina naviekouoiano, baleaiano, a tinietiano. Mia ea vite tolu nei, nana napano toru laka kalo, naina neberenio maariano na, naio be tinietiano.

## 14

*Pol jo berii bereio moroano nalo na Niununo Lu, jibe napano amil jel iliano dolu*

*nalo*

<sup>1</sup> Naruei bior napano tinietiano naio burumñara vite laka jibe na, kamiu monoka kuviduio to ve vite moti ea kenemiu meuliano. Mia bija nina, monoka kuvidu kenemiu jidomiano toa moroano nalo napano Niununo Lu jonña jianio, kamiu kuvisaaro ka kuvakarło. Mia ea moroano nalo nei, tai napano bo laka, nina napano toro berial Atua kiano iliano nalo.

<sup>2</sup> Ver toro tai tumolu verial iliano jel iliano dolu tai napano Niununo Lu jianio banio, ðeli bo ka naio, mia jibe ka napano jo mil ban Atua ga, maka to ril ka tomu dolu nalo ajikia ajog lubar naio. Peli jo berial burumñara iliano nalo napano Niununo Lu jian banio, mia iliano nalo na ajuluku ka kito, maka rejikia rovokarlo.

<sup>3</sup> Mia ver toro tai riverial Atua kiano iliano nalo van kito, ril van kito sel ea kiado iliano, kiano iliano novo nalo nei amijikia ala kito rosikili, amijikia adular kiado jidomiano, amijikia adururu kiado iviso. <sup>4</sup> Jibe na, toro napano mil jel iliano dolu napano Niununo Lu jian banio, jo bagan naio takurano ga, mia toro napano berial Atua kiano iliano napano tomu nalo amijoglubario, naio jo bagan lotuano nonovio.

<sup>5</sup> Ee, kiniou najaaro ver kamiu kuvil sel iliano dolu jibe na, mia nemialio ka bo lie ver kuvitu kuverial Atua kiano iliano van kulo dolu nalo. Naio napano jo berial Atua kiano iliano nalo, kiano inñauano bo lie loa ka napano jo mijev jel iliano dolu. Nina bior naio napano jo mil jel iliano dolu, kiano inñauano maka jikia rivar mñarati ea kulo dolu kialo meuliano. Kiano inñauano maka rijikia vagan lotuano ver maka tai napano jo bilig kiano iliano nalo ka kulo dolu nalo ajikia ajoglubario.

<sup>6</sup> Bilbilu nalo, kuvisidomii vonio ver kiniou, bogo nojo nebinimeie ea kamiu nojo nomioliolu ban kamiu jel iliano dolu tai napano Niununo Lu jianio ban kiniou. Tibe na, mia kiaku iliano nalo maka ajikia aija kamiu leleio. Mia bogo na nemil ban kamiu jel iliano napano kumijoglubario, mila na venia napano nejiano ban kamiu, jibe vite vou tai napano Atua berloglog ka kiniou, ðeli jikiaiano tai, ðeli verialiano tai na Atua kiano iliano, ðeli verloglogiano tai, mia mijikia rijai vatitig kenemiu meuliano.

<sup>7</sup> Nina jibe ka ði mñarau tai, ver kiano terati jooa nalo avova, mia bogo na aserei kanio, maka rojikia rojog lubar vatitig iou venia napano ajerei kanio. <sup>8</sup> Peli ver tubo tai jidom rue ði, mia ði minunu, maka jikia riolu mñlea, mia tomu nalo maka ajikia ajoglubario ka tubo mue ði bior vaio. <sup>9</sup> Mia jibe ka ga na lotuano na kenemiu yako bunu. Ver toro tai jo ber iliano nalo jel

iliano dolu tai napano tomu nalo maka ajikiaio, mia maka ajikia avokar niati tai leleio ea venia napano naio jidom river kalo. Kiano iliano mia riva kovio ea vio yauo ga.

<sup>10</sup> Jibe napano romijikia, iliano miroano ju janea yetemeriba, a kialo iliano nalo abe niotiaju. <sup>11</sup> Mia ver nava kovio tai, maka nejikia kialo iliano, nejibe ka valauo kalo ea vio nei, a nalo ajibe ka valauo ea kiniou bunu. <sup>12</sup> Ana iliano nei be nioti ban kamiu napano kumitu kumila vio jikili ka moroano nalo na Niununo Lu ainñauo iviso ea kamiu. A nioti nene jibe nei, ber kamiu kuvila re napano kubeve terakurano kuvitu kubavavini ea kamiu ga, mia monoka kuvilavio sikili ka kamiu nonovio kuvitu kuvidular lotuano rimeie sikili vatitig nonio. <sup>13</sup> Tibe na, ver kamiu tai mijikia ril sel iliano dolu tai napano Niununo Lu jianio ban naio, bo ka rivolkouo van Atua ka sian moroano van naio ka vilig kiano iliano nalo nei avan ea kenemiu iliano. <sup>14</sup> Kiniou neber jibe na bior ver noto nobolkouo sel iliano dolu tai tibe na, nemial jibe ka nojo nobolkouo ea niunuku ga, mia joomo ea kiaku jidomiano, maka nejikia venia napano nojo neberenio.

<sup>15</sup> Ver tibe na, mia bo ka rala tumabe? Ea kiaku vitiano, bo ka rala ea tivelinio ve juo. Ver kiniou noto nobolkouo, ðeli noto noiou, mia bo ka nala ea iliano napano miyotuba ea niunuku, a bo ka nala bunu ea iliano napano miyotuba ea kiaku jidomiano. <sup>16</sup> Ver makanio, ðeli kojo kobolkouo jel iliano napano maluvo ea niunumo, kojo kober siva ka Atua bior vite tealo, mia toro dolu napano maka rijev moroano ka rijoglubar iliano nei, mia naio maka jikia rijikiaio, mia maka jikia riverenio "jibe na ga naruei" ea kiamo volkouano. <sup>17</sup> Peli kojo kobolkouo jibe na, kojo kober vite novo miroano, mia kiamo volkouano na maka jikia rijai kiamo bilbilu kiano jidomiano leleio.

<sup>18</sup> Kiniou najaaro laka ka Atua jian moroano ban kiniou ka noil ea iliano napano Niununo Lu jianio, neber siva laka kanio, a nemial jibe nemila toru jovulu laka kamiu nonovio. <sup>19</sup> Mia kiniou nojo nemila ea bogo napano nojo kiniou takurano ga, maka noto nala ea mirano tomu nalo ea bogo na lotuano. Ea kiaku vitiano, verver never iliano na telisu tai ga sel iliano napano tomu nalo amijikiaio, napano mijikia verloglog kialo meuliano, nina kirinovo laka jovulu napano nejian iliano telabo jel iliano dolu napano maka ajikia ajoglubario.

<sup>20</sup> Bilbilu nalo, neber bo ka kamiu kuvila von kuvisidomii vatitig ea vite nalo nei, kuvisidomii re bunu tibe kiritete. Be riano

ka ea tivelinio na bajago va nalo, bo ka kuvitibe kiritete nalo, napano maka ajikia vite ve telabo kanio. Mia ea tivelinio na bajago novo nalo, kenemiu jidomiano monoka meruo vatitigio. <sup>21</sup> Iliano tai joa Vivitauiano Moruo, berial iliano tai napano Atua ber jibe nei, berinavo

*Mia novuru tomu nalo napano abinimei ea venuo dolu nalo, napano ail sel iliano dolu, neiilalo avan ka averial kiaku iliano van kiaku tomu nalo.*

*Mia kiaku tomu nalo pariparilo kirisikili laka, mia maka ajikia aiagago ka kiaku iliano napano valauro nalo nei averialio kalo.* *Atis 28:11-12*

<sup>22</sup> Ea iliano na, romial ka Atua berialio ka moroano na ail ka iliano dolu napano Niununo Lu jianio, ka vaio? Moroano na, maka van kito na romonea rui, mia ka rijai nalo napano maka amonea vo. Bogo napano ajogio, avitilubario ka berialio. Mia moroano nei ka riverial Atua kiano iliano, rijai laka ka kito napano romonea rui, ka romijikia rojoglubario meravo bo. Mia moroano na maka jikia rijai laka nalo napano maka amonea vo, bior napano maka asidom aiagago ka Atua kiano ilirianiano.

<sup>23</sup> Tibe na, bogo na kumei vio takurano ka kuvila lotuano, maka rivu ka kuvitu kuvil laka sel iliano dolu nalo napano Niununo Lu jianio ban kami. Ver bogo tai tibe na, ver tai napano maka jikia vatitig vite nei, ðeli maka rimonea, ver rimej joomo ea kenemiu lotuano, mia naio rial tumabe? Mia monoka sidomii ver kami nonovio kumiavovu garuei. <sup>24</sup> A ver rimej joomo, rial ka kami kumitu kuberial Atua kiano iliano jel iliano tai napano kami nonovio kumijikiaio, mia riagago ka kenemiu iliano novo nalo, naruei mijikia rikuru tinieno, mijikia rila naio rivitilubar kiano kariano. <sup>25</sup> A bogo napano naio riagago rivano-o, mia rijog ka Atua kiano iliano bokar kiano meuliano, bar dolu ea vite nalo napano milaviano ajua kiano jidomiano, a mia rila naio rijog rivova, rinie tano rilotu van Atua, riverialio riverinavo berialio ga, Atua jo iviso ka kami.

*Monoka kuvimau vija moroano nalo na Niununo Lu ea bajago na memedu*

<sup>26</sup> Jakii iliano nalo nei ea tivelinio na moroano nalo napano Niununo Lu jianio, mia kami kuvila tumabe ka bogo nalo na kenemiu lotuano? Bogo na kumei vio takurano, bo ka kuvitiburevure imauano nalo nene ea kami. Tibe ka, tai sian iouano, tai sian verloglogiano, tai sian jidomiano vou napano Atua berialio ban naio, tai sian iliano sel iliano dolu napano Niununo jianio ban naio, a dolu tai rijikia

vilig iliano nei ka tomu nonovio ajikia nioti nene. A vite nonovio napano kumila jibe na, monoka vagan vatitig namoneano nalo kialo meuliano napano aju na.

<sup>27</sup> Naruei jibe na napano neberenio, ver ea bogo na, tai jidom sian iliano tai sel iliano dolu tai napano Niununo Lu jianio banio, nina bo ga na. Ver juo ðeli tolu tibe na, bo ga na bunu, mia monoka tuvulu re ve tolu. Mia ail re ve vaarakurano, mia adu bogo vanlo, tai tukamu, karina tai bereio, tibe na. Mia bunu, bogo napano tai ril bisi, toro dolu tai monoka vilig kiano iliano, ka tomu nonovio ajikiaio. <sup>28</sup> Mia ver asidom ka ail sel iliano dolu tibe na, mia maka tai to napano be kiano moroano ka verial nioti na iliano nei, mia ail re bunu sel iliano dolu nalo nei tibe na ea tomu nalo miralo. Mia toro na jibe na torriaro ga, a mijikia ril sel iliano kinkin nei joomo ea niununo ga, napano Atua ga mijikia rijoglubario ave juo.

<sup>29</sup> Ea tivelinio na nalo napano aberial Atua kiano iliano, bo ka nalo ve juo ðeli ve tolu ga ail. Mia bogo napano asian bulag kialo iliano nalo karina, bo ka namoneano dolu nalo aver kialo jidomiano kanio. <sup>30</sup> Ver tai to rioliolu jaka, ana Atua jilogloglar jidomiano vou tai ban namoneano dolu tai napano jotano jo, nina jo mil monoka ribisi beamu ka ridu bogo van dolu na. <sup>31</sup> Tibe na, kami nonovio kumijikia kuvar bogo ka kuberial Atua kiano iliano, napano tai berial tai, karina tai berial tai, jibe na. A mia iliano nalo na amijikia adular tomu nonovio kialo jidomiano, a tomu nonovio amijikia alakakar vite novo ealo.

<sup>32</sup> Iliano novo tai jo, napano memedu ka nalo na abokar moroano nalo nei napano Niununo Lu jianio. Iliano na ber jibe nei, ber Niununo napano jian iliano ban toro, naio maka tutua toro na, mia monoka takii toro nei kiano masouano, napano mia verial iliano nei. <sup>33</sup> Iliano nei ber ka kito monoka roimau ea bajago novo na jibe napano Atua jidomio, bior napano naio maka rimau ðilipili vija kiano moroano nalo, mia jo mimauka vite nonovio memedu ea bajago na tumaro.

Mia bo ka kami kuvitu kuvila tibe ka napano taara dolu na namoneano lu nalo ajumia amilaio, <sup>34</sup> napano ea bogo na lotuano, amila ka tire nalo atu tumaro ga. Maka ajamo ka tire nalo atumolu ka aver iliano ea sumano nalo miralo, bior napano jibe ka tuboiano moruo berenio, tire nalo monoka atu mave re atuvulu sumano nalo. <sup>35</sup> Ver tire nalo ajidom ajikia vite, maka rivu ka avika vikadeniano ve miroano ðeli averial kialo jidomiano nalo ve miroano joomo ea lotuano, mia bogo

napano ava vonuo karina, amijikia avika von den koalo nalo.

<sup>36</sup> Naina naruei kiaku iliano tealo van kamiu, a maka rivu kamiu tealo aber ĩeli neber maka rimemedu. Maka kamiu napano Atua kiano iliano lu biedu ea kamiu jukamu, a maka kamiu ga napano kuvijevo. <sup>37</sup> Ver kamiu tai ber ĩeli naio be toro na verial Atua kiano iliano, ĩeli naio be toro napano jidomii jo jakii ĩarabo na Niununo Lu mila meravo banio, naio bo, mia ver jibe na be riano, mia naio monoka rivitilubar ka vite nalo napano nojiri kakario ban kamiu, abe Tubo kiano ilirianiano. <sup>38</sup> Mia ver naio maka vitilubar ka kiaku tirikariano nalo abe Tubo kiano ilirianiano, mia kamiu kuvijamo ka re riĩau vija kamiu.

<sup>39</sup> Bo ga, kamiu monoka kuvisidomii vatitig kiaku iliano nalo, ka kuvisikili ka kuvijev moroano ka kuverial Tubo kiano iliano, mia ver tealo amijev moroano ka ail sel iliano dolu napano Niununo Lu jian banlo, monoka kuvituko vio re ka nalo kuver ala re. <sup>40</sup> Mia ver ala nina, ĩeli venia bereio, mia monoka ala vite nonovio takii ĩarabo napano bo a memedu.

## 15

### *Jikili ju bere den ĩariano*

<sup>1</sup> Bilbilu nalo, kiniou nojidom noverii bereio Ioluano Vou nei napano nebinimej nomioliolu ka ban kamiu ruei, napano kumijevo, kumitu kumitua kirisikili eaio, ka rila tiniemiu bobogia re. <sup>2</sup> Ioluano Vou nei naruei napano ver kuvitu kuvokar sikili rivu kia ga, naio to rila kamiu kuvokar kenemiu ioruriano. Mia ver maka bunu kuvokar sikili ve verare ka venia napano nomioliolu ka ban kamiu, ĩeli ver kuvilig van ve dolu, nioti nene ber kumonmonea beamu na ka iakurano ga.

<sup>3</sup> Ioluano Vou nei napano ajian ban kiniou nua beamu, naina naruei nemijevo, neberialio ban kamiu. Kiano iliano na tortoru nalo aberii Kristo, napano naio mila be verare ga ka Tirikariano Moruo berialio nua ruei ka mia naio rilajo, bogo napano naio maka rimej vo. Ban jibe nei, ber Kristo, naio ĩaro bior kito kar kiado kariano nalo, <sup>4</sup> karina amidu naio joa buluvae, mia iorou ka kiano bogoti tolu nene naio jumolu meul bereio, <sup>5</sup> a iorou ka naina naio miyotuba beamu kean Kevas mirano, karina, miyotuba bereio kean nalo duelimo ba juo [12] miralo. <sup>6</sup> Kar iorou ka naina, bogo tai naio miyotuba bereio kean taara tai na namoneano nalo

miralo, jovulu toromomou jimo [500], napano miroano ka nalo ameul kia bokar banei, mia tealo aĩarĩaro ruei. <sup>7</sup> Bisi na, naio miyotuba bereio kean Yemesi mirano, karina miyotuba kean atevi nalo miralo, <sup>8</sup> a iorou ka nina ban bereio ea vio mave. Kiniou maka noto ka bogo na, mia siva toru napano kario, Tubo miyotuba vaarakurano bereio, napano naina maariano laka, miyotuba kean miraku. <sup>9</sup> Maka nememedu ka naio rila tibe na van kiniou, bior napano ea atevi nalo nonovio, kiniou nojo yetano kano, a maka navare ka sio na leleio, bior napano nua, kiniou naruei nojo nomijil nalo na taara na Atua kiano namoneano nalo. <sup>10</sup> Mia Atua be tiniememi toru ban kiniou, bitirilal kiniou ea vio nei napano nojoao vonganei, a naio be tiniememi ka kiniou jibe na bior titai, bior napano nela kiano iĩauano telabo na tortoru. Ee, ĩeli nemijikia never ka nemila iĩauano nalo jovulu nalo dolu nonovio, mia maka kiniou napano nomiĩau, mia Atua kiano tiniememiano nei naruei napano joa kiniou, naio naruei mila iĩauano jel ea kiaku meuliano. <sup>11</sup> Mia maka noto nosidomii laka never nomiĩau juĩabe, ĩeli atevi dolu nalo amiĩau juĩabe, mia vite na toru na jibe na, ka kumemi numioliolu ka Ioluano Vou ban kamiu, a kamiu kumoneaio.

<sup>12</sup> Naruei bogo napano numioliolu ka ban kamiu jibe na, nuberialio meravov vatitig nuber Kristo, naio ĩaro, mia karina meul bereio. A bior napano numila jibe na, nomiilo toru ka nomijog ka kamiu tealo aju aberver bogo napano aĩarĩaro, ativin kito, a mia aĩaro bo garuei, maka rojikia romeul bereio bogo tai. <sup>13</sup> Jidomiano na maka rimemedu, bior napano ver atu aver ka maka toro tai rijikia tumolu bereio, nioti nene berinavo Kristo bunu maka tumolu bereio. Mia maka leleio, Atua bitirilal naio meul bereio ruei. <sup>14</sup> Ver naio vitirilal re Kristo, rila na numitu numioliolu ka Kristo ban kamiu ka kurano, a kamiu bunu, kumonea naio ka kurano ga. <sup>15</sup> A ver tibe na, rila na bogo napano numioliolu ban kamiu nuber Atua bitirilal Kristo meul bereio, ĩeli numila sibi toru ea Atua siano, ĩeli numitu nuberloglog kamiu ka vite tai napano maka ve riano. <sup>16</sup> Ver be riano ka toro napano ĩaro maka rijikia rimeul bereio, nioti nene ber ka Kristo bunu maka rijikia rimeul bereio. <sup>17</sup> A ver Kristo riĩaro to kia ga tibe na vo, nioti nene ber kenemiu viekouoiano be kurano, a berenio ka kenemiu kariano nalo aju keano ea

kamiu. <sup>18</sup> A bunu, ver Kristo rimeul re bereio den nañariano tibe nei, nioti nene ka kiado bilbilu nalo napano amonea mia añañario rui, aban ea vio kouo rui, bior napano maka toro tai napano rijikia rilarló. <sup>19</sup> A verver kiado moneano ea Kristo mijikia rijai kito ea yetemeriba nei ga, mia maka rijikia rijai kito ka bogo napano romañario eaio. Ver Kristo maka rijikia rilarlur kito ea bogo napano romañario ea yetemeriba nei, mia rivova lie van kito, mia tiniedo riia kar kito mia tiniedo riia kar kito.

<sup>20</sup> Mia makanio, maka tibe na leleio. Nemijikia never rimemedu ka be riano, Atua mila Kristo meul bereio den nañariano, a bitirlar naio jibe m̄ariesi moti na namoneano nalo nonovio, napano ver ava kovio bogo tai mia Atua mijikia rilalo bunu ameul bereio den nañariano. <sup>21</sup> Nua ea tikariano, toro moti nei Atam buru nañariano binimeí ea yetemeriba, mia vonganei, toro dolu nei Kristo mila meuliano bereio den nañariano binimeí. <sup>22</sup> Jakii venia napano Atam milaio, tomu nonovio na yetemeriba monoka añañario, mia jakii venia napano Kristo milaio, tomu nonovio na yetemeriba amijikia aleal meuliano. <sup>23</sup> Mia vite nonovio be kialo bogo memedu, bior napano Kristo be moti ka jumolu den nañariano, mia kito namoneano nalo, mia rotu vo rivano-o vokar bogo na naio rimeí bereio, naruei mia kito bunu rotumolu den nañariano. <sup>24-25</sup> A kario ka ninei, mia naio rivar bulag niununo va bija siñaro nalo na yetemeriba, a mia naio ve takurano rive parinio tubo ka vite nonovio rivano-o tovulu moroano va dolu nalo, atu yetano ka jaano. Kario mia naio sian nono nave-natuboiانو na vite nonovio rivan bere Atua karam̄iano. <sup>26</sup> A ea uolu nalo napano Kristo mia tuvululo ea bogo na, nina napano naio tuvulu maariano, nina vite nei na nañariano, bija kiano moroano va nalo. <sup>27</sup> Kristo monoka tuvulu nañariano nei, bior napano iliano na beamu mave ber jibe na rui, ber mia Atua ridu vite nonovio atu yetano ka naio. Naruei iliano nei maka river ka Atua ridu naio bereio to yetano ka Kristo, mia berii vite dolu nalo, napano mia Kristo tuvulu nonovlo. <sup>28</sup> Mia bogo napano Atua ridu vite nonovio atutano ka Kristo tibe na, mia Kristo, tibe Atua kenerinio, ridu naio takurano bereio totano ka Atua, ana mia rila ka Atua naio ve takurano ve Atua ka vite nonovio.

<sup>29</sup> Navan ea bere iliano nei napano beriio ber ver kito rañañario, mia iorou rotumolu bereio. Ana tealo napano amonea jibe nei, aju ajidomii laka kialo bilbilu nalo napano maka lele avaruei ealo ana

añañario. Nalo aju aber ðeli nalo nei maka ajikia ajev meuliano, mila na nalo abaruei bereio ea kialo bilbilu nalo na sialo, napano añañario rui. Aju amila jibe na bior napano ga amonea jikili ka kito rañañario, mia rotumolu bereio.

<sup>30</sup> Mia be verare bunu ka kumemi. Ver kuvisidomii vonio ka venia numitu nubiviuo bogokouo nalo bogo nonovio, numitu nubar jogvaiano jibe na bior ga romonea jikili ka toro na ñaro, mia mijikia rimeul bereio den nañariano. <sup>31</sup> Ee bilbilu nalo, kumemi numitu numiñau jibe na, nemijikia never memedu never kiniou nomijog jibe ka nojo nojuvan kiaku meuliano bior kamiu bogoti nonovio ga. Mia naina bo ga na, bior napano najaaro mia najaaro ka meuliano na kubokario bija kiado Tubo Yesu Kristo. <sup>32</sup> Mia bogo napano nojoa komeli na Eveso, veribinio nalo na vio nei ajibe ka kuli deden nalo, aju amiaboluo ka kiniou banbano-o, ana bior vaio nojo nojoko vio kalo? Nojo nomila jibe na, maka nejev vite na bo tai leleio na meuliano na yetemeriba nei, mia nojo nomila bior napano nojo nojidomii meuliano nei napano rimeí iorou.

Ver meuliano nei re, bo lie kito rotibe ka kulo dolu nalo ninio napano maka amonmonea, ana aju aber jibe nei, aberinavo "Banei, kito rola jokoluolu, rosidomii re vite tai, bior napano beni, kei mijikia? Ver romañario, nina bisi naruei, mia maka rejikia vite tai!"

<sup>33</sup> Mia kamiu monoka kuvitakii re jidomiano vovu nalo tibe na, ver makanio, mia iliano dolu nei rimeí rive riano ea kamiu, napano ber jibe nei, ber "Jau koiel vija bilbilu va nalo, mia kialo vovaiانو rila niegeniege kiamo bajago novo." <sup>34</sup> Kamiu monoka kuve masou, a monoka kuvituvan kenemiu kariano nalo. Neber jibe nei, ðeli kuberiaña nemila niegeniege siemiu, mia monoka never ga, bior napano kamiu tealo maka ajikia vattig Atua kiano m̄arabo na memedu nalo leleio.

<sup>35</sup> Mia ea tivelinio na meuliano bereio den nañariano nei, mia tealo abika jibe nei, aber "Mia ala tomu nañariano nalo atumolu bereio tuñabe?" Peli mia avika tibe nei aver "Nalo napano añañario kirisio rui, mia atumolu bereio vija mokotenalo nalo na juñabe bereio?" <sup>36</sup> Mia vikadeniano nalo na jibe nei, abe toro kiano vikadeniano napano maka jikila vite. Ver rosidomii kurukuti likiliki nalo napano roju romebijaio, mia rojev verdoþeiano nene. Bogo napano jau komebija kurukuti na vite tai ban ea borotano, komijikia rui ka mia kurukuti nene monoka rimirunuo, monoka riñario, mia iorou, mia toti vou

mijikia moluo eaio. <sup>37</sup> Vite napano komebijaio, naio be kurukuti tai ga napano mia toa borotano, mia vite napano mia rimoluo rive terivou bereio, naio be todolu tai. <sup>38</sup> Jibe napano koje komebija kurukuti kinkin nalo, naruei Atua mila abe kialo toti vou kinkin nalo, <sup>39</sup> a beberare bunu ka tenalo napano ameul, napano mokotenalo nalo abe ve dolu kalo. Sunbue dolu tai joa toro mokotenano, a temeul nalo na tano, na tei, ħeli na vio yauo, nalo abe kialo sunbue kinkin nalo. <sup>40</sup> Ana temeul nalo nei, mokotenalo kinkin nalo abe dolu laka ka mokotenano vite kinkin napano aju tiniabene, <sup>41</sup> jibe mĕrenio, a siberio, a mĕrvitano nalo. Ea nalo tolu nei, tai mirano dolu ka tai, a be verare bunu ka tivelinio na mĕrvitano nalo, napano tai, mirano dolu ka tai.

<sup>42</sup> Mia vite nalo nei nonovio, romial ka Atua mila abeve dolu laka, a tena jibe kijokijo tai na mokotenado vou, napano kito napano raĕarnĕaro, napano romijikia rodu bogo ka rotumolu romeul bereio. Mokotenado rivan ea bulukuĕili na borotano, tibe kurukuti tai napano amebijaio, napano monoka rimirunu, mia iorou, mokotenado vou napano riyotuba, mia maka rijikia rimeĕ rivova bogo tai. <sup>43</sup> Mokotenado napano ban ea borotano, romialio bova, a buru kokorovio, ana mokotenado vou napano riyotuba iorou, mia roialio kirinovo, jikili vatitigio. <sup>44</sup> Vite napano van ea borotano, naio be terati na kito ea tivelinio na mokotenado ga, mia vite napano riyotuba iorou, naio be terati na kito ea tivelinio na niunudo. <sup>45</sup> A bunu, romijikia rosidomii toro moti nei napano Atua jiio, napano be Atam, bija Atam na maariano napano midu joa yetemeriba, napano be Kristo. Iliano tai berenio ber Atam, Atua jii naio binimeĕ bija mokotenano tai napano meul, ana Kristo, Atua miila naio binimeĕ bija niununo tai napano be burupati na meuliano.

<sup>46</sup> Jakii nina, romial ka vite na tivelinio na mokotenano, binimeĕ beamu, mia vite na tivelinio na niununo, binimeĕ maariano. <sup>47</sup> Toro na beamu nei Atam, Atua mijilar naio ea borotano na yetemeriba nei, mia toro juo nene nei Kristo, Atua milalar naio ea vio mave binimeĕ. <sup>48</sup> Naruei kito tomu dolu nalo, kito napano robe na yetemeriba nei, romidu toro moti na yetemeriba nei kiano bajago, mia kito napano robe na vio mave, romidu nana binimeĕ ea vio mave kiano bajago. <sup>49</sup> A kito napano romonea, beamu romidu toro na yetemeriba nei mirano, mia vonganei, romidu toro na vio mave mirano. <sup>50</sup> Bilbilu

nalo, tenalo napano maluvo ea yetemeriba ga, jibe ka mokotenado, maka rijikia riva joomo ea Atua kiano navenatuboiانو mave, a teneĕ napano mia rivakovio, maka jikia riva rivokar vio napano mia to toto to.

<sup>51</sup> Ana mia tuĕabe ka namoneano nalo napano ameul kia ea bogo napano Kristo rimeĕ bereio? Vite na, tomu miroano maka ajikiaio, ana mia kiniou neberii memedu ban kamiu. Ee, be riano ka kito namoneano tealo mia raĕarnĕaro re ea yetemeriba nei, mia ea bogo na, vaarakurano ga, tibe vio bijio, niabedo viligio. <sup>52</sup> Jibe ka napano rojetavoko mirado bogo bulati kirisoĕeli ga, mia rotabujo ka vaarakurano ga simeduo rivio, a mia namoneano nalo napano aĕarnĕaro ruei mia atarabujo ameul bereio vija mokotenalo vou, a kito bunu napano romeul kia ea bogo na, mokotenado bunu rive terivou. <sup>53</sup> Mokotenado moruo monoka riviligio tibe na, bior napano tena borotano monoka rimeĕ rive tena vio mave, a tena mĕriano monoka rimeĕ rive tena mia rimeul tulaka. <sup>54</sup> Mia bogo napano kito rojev mokotenado vou tibe na, mia rila iliano tai na Vivitauiano Moruo rimeĕ rive riano laka, napano berinavo

*“Meuliano na Atua kiano moroano bar bulag moroano na mĕriano nalo.”*  
Ais 25:8

<sup>55</sup> Ea bogo na, mia kito reielkuei vite nei mĕriano, rover tibe nei, rover

*“Mariano, jau kojidom koto mave, mia vonganei kiamo sebi mĕro garuei. Kiamo mĕrbutoto ka tulu kumemi jo be vonganei?”*  
Osea 13:14

<sup>56</sup> Mia kito roil tibe na bior ka tuboiano napano jo, naio jian moroano ban bajago na kariano joomo ea kiado meuliano, napano mila na robinimeĕ jibe tomu na lakokorov tuboiano, a bajago na kiado kariano nei jian moroano ban mĕriano na jibe mĕrbutoto napano mijikia tulu kito raĕarnĕaro. <sup>57</sup> Mia siva toru ka Atua, bior napano naio mila kiado Tubo Yesu Kristo napano mije lo moroano na tuboiano a moroano na kariano a moroano na mĕriano, mila robokar meuliano nei napano maka rijikia ribisi bogo tai.

<sup>58</sup> Bilbilu novo nalo, bior napano Atua mila kirinovo ban kito jibe nei, kamiu kuvitu sikili, kuvikuluku re tanea vio, a kuvikar rivu ka kuvinĕau Tubo kiano vija kenemiu moroano momou. A bogo na kumitu kumila jibe na, bo ka kuvitu kuvisidomii ka kenemiu inĕauano nei maka tena iakurano, ana mia monoka rivar mĕrarti tibe napano Tubo naio jidomio.



## 16

*Veru na asuvanio van namoneano nalo na vio Yerusalemo*

<sup>1</sup> Kiniou nojidom nesian iliano tealo van kamiu ea tivelinio na kuvarbijio veru na ka rijai tomu na moneano nalo na Yerusalemo, napano abiviuo bogokouo, abe taliñasa laka ea bogo nei. Nejian iliano jibe na ban lotuano nalo reraio ea tanobuku nei Kalesia ruei, mia vonganei nojidom neverial ka kamiu bunu. <sup>2</sup> Nojidom never tibe nei, ka kuvitu re ga tibe na kario kuvisuvan veru bogo napano noyotuba kean kamiu, mia nojidom ka tikar vonganei, ea bogoti moti na sude nonovio, kamiu veve terakurano monoka kuvar torogio ve telisu na venia napano kumijeivio, a monoka kuvar vatitigio tu. <sup>3</sup> Mia bogo napano nevedu, mia rotikar ka rovarvar veru nalo nene rimei vio takurano, a mia kuvitan ea kamiu tealo ka avar jidomiano nei riva Yerusalemo. A mia kiniou novivitaui mesi nalo tai ka avario riva van namoneano nalo na yako, ka verial kamiu vanlo. <sup>4</sup> Maka nejikia vo mia bo ka kiniou vijalo ðeli makanio, mia neial vonio tena iorou.

*Pol kiano m̄arabo*

<sup>5</sup> Bo ga, kiaku m̄arabo jibe nei, ber kiniou nojidom nesel ea tanobuku nei Masetonia beamu, a karina mia noyotuba kean kamiu. <sup>6</sup> Maka nejikia vatitig vo ka mia noto vija kamiu rivokar bogo vaio, ana nojo nojidomii ka noto vija kamiu ea bogo na niavo napano ju ka rimei, a kario ka nina, kumijikia kuvitii kiniou bereio ea kiaku m̄arabo, ka navan ea vio vabe bereio na navan eaio. <sup>7</sup> Maka nosidom nesel ea kamiu vonganei napano naba Masetonia, bior tibe na mia noto bogo ve telisu laka, ana mia navan yako beamu, karina nevedu, bior ver Tubo rijamo, nojidom ka noto vija kamiu vesiou kija. <sup>8</sup> Vonganei nojo Eveso, a mia noto kea ea vio na navo, rivokar bogo na Jokoluulu na Marayuvi Vou ribisi. <sup>9</sup> Be bogo dulu miroano laka kija ga ka nala iñauano novo ea vio nei vo, a vite tai bunu, mia uolu nalo miroano ajua vio nei, mia maka nejikia mia netaluvo den vio nei nagi.

<sup>10</sup> Ver kamiu kuvial napano Timoti riyotuba kean kamiu, neber bo, kamiu kuvijuku rivu ka naio, kuvila rijog rivu ka to vija kamiu, bior napano naio jo mila Tubo kiano iñauano, beverarei ka na nojo nemilaio. <sup>11</sup> Kamiu kuvituvan re ka tomu tealo avitii rivova ka naio, ana mia kuvitikar vatitig naio ea bajago na tum̄aro,

karina kuvidu naio toa kiano m̄arabo ka naio mijikia rimei ea kiniou rivu, bior napano nojo rorea naio bija kuruado dolu nalo ka asel ea vio nei.

<sup>12</sup> Ea tivelinio na kuruado nei Apolos, nebika kirisikili ban naio ka takisor kuruado dolu nalo nei ayotuba kean kamiu, mia kiano jidomiano kirisikili ka nina maka kiano bogo rimemedu ka rimei. Ana verver ve kiano bogo, ðeli mia naio riviedu vonga iorou.

<sup>13</sup> Bilbilu nalo, vaataro ka kiaku iliano ribisi, mia nojidom nover ka kamiu ka kuvitikar vatitig kamiu, kuvitu sikili vatitigio ea kiado moneano, kumemebiju re ka vite ninio, a kuvisikili. <sup>14</sup> A vite nonovio napano kumilaio, monoka kuvilaio ea bajago na tintetiiano.

<sup>15</sup> Bo ka kamiu kuvitilubar Stevanas nei vija kiano torogio nalo, vija iñauano napano aju amilaio. Ea tomu nonovio nalo ea kenemiu tanobuku nei Akaia, nalo na naruei napano abe moti ka amonmonea. Mia karina, iorou ka amonea, aju amila iñauano novo laka, aju amija namoneano nalo toru binimei bokar banei. <sup>16</sup> Tomu novnovo nalo jibe nei, bo ka kuvitiri bulaglo ka avuru m̄arabo ka kamiu, a bo ka kuvatove bunu ka tomu dolu nalo napano kumiñau vei bijalo. <sup>17</sup> Stevanas nei jel ea vio nei ruei, naio binimei bija Vojunatas naljuo Akaikas, a nejaaro toru ka nalo tolu. Nalo aju amija vatitig kiniou ka vite telabo, beverare ga ka napano kamiu bunu kumijikia kuvila ver kamiu kuvitua vio nei. <sup>18</sup> Nalo tolu nei amila bo ban kamiu ruei, mia bogo na abinimei ea vio nei amila kiniou bunu nomijog bo laka, amidular kiaku jidomiano. Bo ka kamiu kuver siva ve toru vanlo bior kialo iñauano jibe na.

<sup>19</sup> Lotuano nalo reraio ea tanobuku na Esia, aberinavo aju ajidomii kamiu laka. A kiado bilbilu juo nei, Akuila naio koano Prisila, bija taara na lotuano na ea kunualo, nalo aber kavijo bo ðeli bogiano bo ban kamiu ea Tubo siano. <sup>20</sup> Kiado bilbilu nalo ea vio nei ajaaro ka aviviuo kamiu ea mesi nei, a kamiu bunu, bogo nonovio napano kuviviuo kamiu, bo ka kuvitu kuvanjumemiu van kamiu a kuviniomo babibiniomiu, ka kuvisaaro ka kamiu vija jidomiano novo.

<sup>21</sup> Mia jikar ea vio na telisu nei, kiniou Pol nojo nobokar vovojulu nojo nobivitau ka nesian kiaku iliano maariano van kamiu. <sup>22</sup> Kamiu monoka tiniemiu tii Tubo ve riano, ver makanio, toro napano maka tinien tiio, verikariano na m̄ariano joa naio. Nojo nobolkouo jibe nei, neber Tubo

Yesu, neber bo jau komei soḻeli, <sup>23</sup> a nojo nobolkouo bior kamiu bunu, ka Tubo Yesu kiano tiniememiano to vija kamiu. <sup>24</sup> A jibe bogo nonovio, nemijikia never ea Kristo Yesu siano ka kiaku tinietiano ban kamiu toru laka ju.

Kiaku m̄esi maaro ga ea vio nei,  
Kiniou, Pol.

## **Mesi Juo Napano Pol Bivitauiaio Ban Namoneano Lu Nalo Na KORIN Verialiano Moti**

*Tukunuano bulati na niosi nei*

Mesi juo nene nei napano Pol jirio ba ban namoneano nalo na Korin, naio jirio ea bogo napano binua bogokouo bija namoneano nalo ea yimo lu yako Korin, napano nalo tealo tiniel jer naio laka, ana amilkuei keano naio. Mia Pol berloglog kalo ka naio jo jidom jikili ka rila vatitig vovaiano nei, ka rila mia naio vija nalo amijikia ave bilbilu vatitig bereio. Mia iorou, bogo napano abe bilbilu vatitig bereio naio berial banlo napano naio jaaro mia jaaro.

Ea mēsi nei togio beamu, Pol berii bior vaio naruei naio mil jikili laka banlo ea mēsi tai napano bivitauia ba banlo. Mia naio ber kalo napano naio jaaro laka ka mijog napano nalo amijog kiano iliano, ana abilig kialo jidomiano ka kialo kari-ano, a amila vatitig vovaiano nei napano joalo, mia abe bilbilu vatitig bija naio bereio. Mia iorou, naio ber kalo, ber monoka asuvan veru ka asian van kialo namoneano bilbilu nalo na Judia napano nalo maka ve kialo saba.

Ea mēsi nei togio maariano, Pol milkuei jikili ban tomu tai na Korin napano aber ka nalo abe atevi riano mia nalo aju amila bulag namoneano nalo na vio na bija kialo verloglogiano napano maka rimemedu. Nalo aju aber ka Pol maka ve atevi riano, mia naio mil kirsikili ka tukovio kalo, a berial ka naio be Yesu kiano atevi riano.

*Torogio nalo na niosi nei*

Iliano moti 1:1-11

Pol bija namoneano nalo na Korin 1:12—7:16

Veru napano ka riva van namoneano nalo na Judia 8:1—9:15

Pol berialio ka naio be atevi riano 10:1—13:10

Iliano maariano 13:11-14

*Iliano moti*

<sup>1</sup> Bilbilu nalo, kiniou Pol bija kuruado nei Timoti, kumemi juo numisaaro ka nubiviuo vija kamii bereio ea mēsi nei, nina kamii ea Atua kiano yimo lu, ea komeli na toru na Korin, bija kamii namoneano lu dolu nalo napano kumitu janea vio ea buruñara tanobuku nei na Kris.

Ea kiano verikariano, Atua bitirilar kin-iou Pol ka nemei tibe Yesu Kristo kiano atevi tai, mia vite telabo ka noverialio van kamii ea mēsi nei, mia beamu ka nina, <sup>2</sup> neber jibe nei ka kiaku volkouno ka mia karamādo Atua bija Tubo Yesu Kristo, naljuo atuvan kialo tiniememiano a tumāroano toa kamii nonovio.

*Pol ber siva ban Atua bior kiano tinie-vuiano*

<sup>3</sup> Kiniou nojidom noilivu laka van kiado Atua nei napano naio be kiado Tubo Yesu Kristo karamāno, a naio be teta novo tai napano be burupati na bajago na tintietiano, a naio be Atua novo napano bujo ka bajago na ililūpūpiano. <sup>4</sup> Bogo ninio napano kito robiviuo bogokouo, Atua jo mililūpūpū vatitig kito, ana mila kito rojikili bereio. A kario, romijikia rodu bajago na ililūpūpiano napano naio mila ka kito, rolaio kija van kiado bilbilu dolu nalo napano aju abiviuo kialo bogokouo nalo, rojalo tibe na.

<sup>5</sup> Be riano laka ka bogo telabo roju robar jogvaiano nalo beberare ka Kristo bario, mia naio mila na romijikia rovar bunu kiano ililūpūpiano novnovo nalo. <sup>6</sup> Mia bogo napano nubiviuo bogokouo nalo, numijamo ka ga, ka rila ka kamii kumijikia kuvijog rivu a kuvijikia kuvijev meuliano. Mia bogo na numialio ka Atua mililūpūpū kumemi, naio bunu bo laka, bior napano mila ka numijikia nuvililūpūpū kamii bereio, a numijikia nuvija kamii ka kamii kuvila kenemiu jidomiano ve tebievi ka kuvijikia kuvar dulu vovaiano nalo napano kamii bunu kuvijikia kuviviuo. <sup>7</sup> Kumemi numisidomii venia napano kubar dulu rui, mila na ea tivelinio na kamii, kenememi jidomiano maka rimemebiju leleio, ka mia kamii tumābe. Nina bior napano numijikia vatitig rui ka bekurano napano monoka kuviviuo jogvaiano veverare ka napano kumemi nubiviuo, a mia kuvijikia kuvokar buruñara ililūpūpiano ea Atua bunu, veverare ka napano nubokario rui.

<sup>8</sup> Peli kamii maka kuvijoglubar vatitig vo buruñara bogokouo nalo napano kumemi nubinua bogo napano numitu numiñau janea tanobuku na toru nei Esia, mia nemijikia never ka bova mia bova laka. Vite nalo terem laka ka kumemi, maka nuvare kalo, banbano numisidomii nuber nina naruei monoka nuvial juluvati na kiado meuliano vonganei. <sup>9</sup> Ee be riano, numijog jibe napano ver toro na toru na komeli tai berial ka mia auebinvin kumemi, mia numialio ka bo laka, bior

napano numial ruei ka maka nuvijikia nuvituvan kumemi ga bereio ka mia nuvisikili tumābe. Ea bogo na, numitu numidu kenememi meuliano joa Atua jumiano ga, nubalea naio bior napano naio ga takurano be Atua napano mijikia rila to napano m̄aro binimei meul bereio. <sup>10</sup> A numonea naio jibe na, numial ka be riano, naio milarur kumemi, a vonganei kenememi jidomiano jikili vatitig ka naio mijikia rilarrur kumemi bereio, maka rive vaarakurano ga, a mia naio to rila bogo nonovio.

<sup>11</sup> A kamiu monoka kuvija kumemi napano kuvisidomii kumemi bogo nonovio ea kenemiu volkouano nalo. Tibe na, bogo napano mia Atua rijog volkouano miroano nei, ana mia rilivu ka kumemi vatitig, rilarrur kumemi den bogokouo nalo nei bereio, a mia kamiu ve miroano kuver siva laka vanio bior venia napano mia naio rila van kumemi.

*Pol bervisivisii vatitig vite na mila naio maka bunu rimei riel ealo*

<sup>12</sup> Kumemi nubar jogvaiano nalo jibe nei, mia vite tai napano jo mila numijog bo laka ea kumemi. Nina jidomiano tai napano joa kumemi napano ber jibe nei, ber ea tivelinio na kenememi bajago kamu ea miremiu, a kamu ea tomu dolu nalo na yetemeriba nei miralo, kumemi numila vite nonovio be lu vatitig, a kenememi meuliano be riano vatitig, jibe napano Atua jidomio. Maka numimāu vija jidomiano na yetemeriba nei, mia numimāu bija Atua kiano tiniememiano. <sup>13</sup> Vite nonovio napano nubivitauiio ban kamiu ea kenememi m̄esi nalo nei, nina vite nalo napano numijikia ka kamiu kuvijikia kuvulukuio, a numijikia ka kamiu kuvijikia kuvuluku lubario. Ana ver vite nalo tai napano kumitu kumijikia beve torogio ga, nejidom ea bogoti nalo napano ju binimei, mia kamiu monoka kuvila von kuvijog vatitig nonovio. <sup>14</sup> Verver tibe na, bogo napano kito nonovio rotu vio takurano ea bogoti na toru nei napano Tubo Yesu rimei bereio, mia kamiu kuvisaaro laka ka kumemi, a mia kumemi nuvisaaro laka ka kamiu.

<sup>15</sup> Mia bior napano nomijikia vatitigio ka jidomiano novo na jibe na ju iviso ka kito ruei, nojidom laka ka bogo napano nojo ka navan ea tanobuku na Masetonia, mia nomei ka namaluvo kean kamiu. <sup>16</sup> Riano, nojo nojidomio ka nesel ea kamiu ea bogo ve va juo ruei, beamu ea bogo napano nojo nabano Masetonia, a juo nene ea bogo napano nojo nebinimei bereio, napano neberiana mia kamiu kuvitii kiniou noto

vatitig ea kiaku m̄arabo ka navan yako Yutea, mia be deio. Nojidom nola rivu ka kamiu tibe na, mia tibe napano kumijikia ruei, maka bunu nejikia nalaio.

<sup>17</sup> Mia nejidom ka kamiu monoka kuvijikia vatitig ka bogo napano nojo nojidomii ka nevidu kean kamiu, naio be vite tai napano nojidom laka ka nalaio, napano kiaku jidomiano jikili laka kanio. Naio maka ve vite tai napano nobitoviton eaio, napano nojo nojidomio ka navan p̄eli mia navan re. Makanio, kiniou maka netibe tomu ninio napano maka kojikia komonmonea kialo iliano, <sup>18</sup> mia jibe napano kumijikia kumituvan ga Atua kiano iliano, kumijikia kumituvan ga bunu kenememi iliano. Kenememi "Ee" maka verenio "Makanio" p̄eli "tibe na kovio," <sup>19</sup> mia bogo numitu nuberenio "Ee" be "Ee" ga. Kumemi monoka nuve riano tibe na, rila ka nuveverare ka Atua kenerinio Yesu Kristo, nina napano kumemi tolu Silvanus a Timoti, nubinimei numiololu ka ban kamiu nua ruei. Ea bogo na nuberial ka kiano iliano nalo abe riano bogo nonovio, bior "Ee" kiano be "Ee" bo garuei, <sup>20</sup> a verikariano nonovio napano Atua berialio ruei ea tivelinio na Yesu, maka tai napano rimei tibe sibiano, mia abiniu abe riano. Vite na naruei mila na bogo napano roju robolkouo ban Atua, ea kiano tikariano banbano-o bokar napano rober "Mm," kito rotu rola ea Yesu Kristo siano. <sup>21</sup> Kristo na naruei napano numiololu ka ban kamiu, a Atua ga bitiri bulag kumemi ka nuvila kiano imāuano. A bija naina, Atua mila kumemi bija kamiu, kito robiniu robinimei vio takurano ea naio. <sup>22</sup> Atua bijauia kito ka robe kiano, naruei naio jian Niununo ju joomo ea kito, jibe verikariano tai ka mia kitoliko naio ea bogo nonovio napano ju ka rimei.

<sup>23</sup> Kiado Atua nei be riano bogo nonovio, a naio mijikia rijai iliano nei napano nojidom noverialio van kamiu. Jibe napano beamu neberio ruei ka mia noyotuba kean kamiu yako Korin, mia karina maka nevidu, a p̄eli kumisidomii niegeniege kiniou biorio. Mia nojidom noverial van kamiu ka naio maka rivior kiaku vite tai, mia bior kamiu ga, ka napano nemijikia ver nevidu, mia monoka neil sikili van kamiu rivior kenemiu bajago tealō. Mia maka nosidom ka mia nola kamiu kuvijog rivova, naina naruei mila na maka bunu nevidu. <sup>24</sup> Kiniou nemil ban kamiu jibe na, neber bo ka kuvisidomii re kuver nuvisidom nuvitu loa kamiu, ka nuvidu tuboiano loa kenemiu moneano. Maka tibe na, mia kumemi numisidom roimiau

vio takurano ga, ka rila kamiu kuvijikia kuvijog rivu bogo nonovio, kuvisikili kuvitu sikili rivu ea kenemiu viekouoiano.

## 2

<sup>1</sup> Jibe na napano neberenio, nua na nebinimei beamu, tenalo tai napano monoka noil van kamiu riviorio, napano mila kamiu kumijog bova. Mia vonganei maka nosidom noviedu nala kamiu kuvijog rivova ve vaarakurano bereio, a jidomiano na naruei mila maka neviedu noyotuba kean kamiu na vo. <sup>2</sup> Ver neviedu neil van kamiu, nala kamiu kuvijog rivova, mia kiniou bunu monoka nojog rivova, ana bogo napano kito roviniu rojog rivova tibe na, mia maka bunu tai napano mijiklia rijai tai ka rijog rivu bereio. <sup>3</sup> Jidomiano na naruei neberialio ea mēsi tinene na napano nemijiano biedu beamu ruei. Kiniou nojidom ka kuvila von vovaiano nalo na rimemedu beamu ka rila ka verver bogo napano neviedu, mia maka bunu tenalo tai tu iviso kean kamiu napano mia monoka nojog rivova ka kamiu riviorio. Ana ver kamiu kuvila kenemiu iñauano rimemedu, mia nemijikia neviedu neialio napano kubinimei bo bereio ruei, mia tibe na, nasaaro laka, a mia kiaku saariano nene rila kenemiu saariano bunu rive toru laka.

<sup>4</sup> Neber jibe na bior napano bogo na nebitau biedu ban kamiu nua na, nomijog bova laka garuei. Nomijog jibe kiaku iviso vaataro vuru kokorovio, a jogumiraku aju ajibiribil. Iliano na jikirkili nalo napano neber ka kamiu ea mēsi nei, maka nala rivior napano nojidom ka nala kamiu bunu kuvijog rivova, mia nojidom nala ka kamiu kuvitilubar ka kiniou nojo tinieku jii laka kamiu bogo nonovio.

<sup>5</sup> Naruei jibe napano kito nonovio romijikia, toro tai jo iviso ka kamiu napano naio mila burumāra jaleleano nei. Nojidom never ka jaleleano napano naio milao, mila kiniou nomijogio bova, mia maka kiniou ga, mila kamiu miroano kumijog bova bunu. Mia maka nosidom never ka kamiu monoka kuvijev vironiano laka van naio bereio, <sup>6</sup> bior napano nemijikia ka kamiu nonovio kumil ban naio ruei. <sup>7</sup> Kamiu kumil ban naio bare bo naruei, mia vonganei be kenemiu bogo ka kamiu kuviekokoao, tiniemiu riia naio bereio. Ver makanio, mia naio rijog rivova laka bereio, rivano-o rivova ka naio. <sup>8</sup> Ee, nejikili ka nebika den kamiu jibe na, ka kamiu kuvila meravo rivu van naio ka kamiu tiniemiu jii naio keano vo.

<sup>9</sup> Kiniou nejirii mēsi dolu nei nua na, nojidom nevitii veveio ka mia kamiu kumisaaro ka kumonea kiaku iliano nalo napano juaio, pēli makanio. <sup>10</sup> Bogo napano neber bo ka kuviekokoao toro tai, nomonea ka mia kuvilaio, a nana napano kubiekokoao, kiniou bunu nebiekokoao. A maka nejikia, pēli naio mila vite nalo tai bova kean kiniou bunu, mia kiniou najaaro ka noverial ea Kristo mirano ka nebiekokoao naio, a tibe na, rijai kamiu bunu ka kuvisaaro ka kuviekokoao toro dolu. <sup>11</sup> Kito monoka rovitikar vatitig bior napano romijikia ruei Simāro kiano jidomiano va nalo ka rila bulag kito, ana ver rotu roviekokoao kito bogo nonovio, mia naio maka rijikia tuvulu kito leleio.

*Pol berii kiano mārabo ka rivan yako Troas bija Masetonia*

<sup>12</sup> Ana bogo napano maka bunu neviedu kean kamiu yako Korin, naba nomioliolu ka Kristo kiano Ioluano Vou ea komeli na Troas, a ea vio na, nemial jibe mārataravo betavo bo ban kiniou ka nala Tubo kiano iñauano. <sup>13</sup> Ana vite va tai ea bogo na, nojidomiio ka mia neial kuruaku nei Taitas ea vio nene, mia naio maka to. Ana kiaku jidomiano jidom dede laka ka naio, mila na maka vesiou nojuvan nalo nei, nojoa kiaku mārabo bereio nemijaka ea tanobuku na Masetonia.

<sup>14</sup> Kiaku ieliano ban jibe nei naruei, mia siva toru ban Atua, bior napano bogo nonovio naio ji Kristo ju ka vuriñarabo ka kito. Beamu, kito robe kiano uolu ga, mia naio buru bulag kito ruei, ana rotakisor naio ravan ea vio nonovio, ana bogo na tomu nalo aial kito, mia avitilubario ka Kristo naio be kiado Tubo. Peli nemijikia never tibe na, kito rojibe ka bonotanunu novo tai napano amisebi, napano jo miou janea vio reraio, ana bogo na tomu nalo amijugunio, mia amijugun lubario ka Kristo jo moluo ealo. <sup>15</sup> Atua mila bonoti nene ban ea tomu nonovio, ba bokar nalo napano aju aban ea mārabo na ioruriano, a ba bokar nalo napano aju aban ea mārabo na nakovioiano. <sup>16</sup> Ana ea nalo napano aju aba kovio, bonoti nene bova jibe vite tai na māraro jooon, mia ea nalo napano aju amijev meuliano, naio jibe bonoti novo na tanunu na meuliano.

Nina naruei romial ka iñauano na nimitu numilaio, naio be iñauano na toru tai, bior numioliolu ka Atua kiano iliano napano rijikia rila ka toro rijev meuliano pēli rijev mārano. <sup>17</sup> Verialiano tealo dolu maka asidomiio ve temi ka iñauano nei, nalo aju amioliolu ka Atua kiano iliano amila von ka ajev veru eaio ga, mia

kumemi maka tibe na. Atua bitiri bulag kumemi, a nimiriaŋu ea vio medave kamu ea mirano, nuberloglog Kristo kiano iliriano nalo, ban tomu dolu nalo maluvo ea moroano napano naio jian ban kumemi.

### 3

*Kumemi nube tomu na nuvila inŋauano na verikariano vou*

<sup>1</sup> Kiniu neberii kenememi inŋauano na toru mave nei, maka rivu ka kuver ŋeli numitu numil nŋarou jibe naverloglogiano sibilibiano dolu nalo nei. Nalo na abinimei ea kamiu bija nŋesi nalo napano aberiilo ana aber ka monoka kuvivitau ea nŋesi nalo tealo bereio ka averii kialo inŋauano, napano amijikia avario avano. Mia ver kumemi nuvisidom nuvan ea vio dolu tai, maka nuvisidom nŋesi ninio tai na jibe na ka verial kumemi. <sup>2</sup> Ver toro tai jidom rijikia ka kumemi juŋabe, bo ka rimei rial nŋarati na kenememi inŋauano ea kenemiu meuliano nalo ga. Kamiu na jibe nŋesi tai ruei, napano Kristo ga bivitauia berial kenememi inŋauano. Tomu dolu nalo amijikia amei avulukuio, ka ajikiaio venia napano naio jirio ea kenememi iviso nalo. <sup>3</sup> Mia aial kamiu jibe kamiu nŋesi tai napano Kristo jianio, a kumemi nubario binimei, a mia ajikia avitilubarario ka be riano, numila inŋauano ea kamiu bo laka. Mia nŋesi nei maka nŋesi napano uei na vovojulu jirio ea nŋati niosi, mia be nŋesi napano Atua kiano Niununo jirio ea toro kiano iviso.

<sup>4</sup> Jibe na, kiaku iliano nalo nei maka ave ilimoruoiano, mia kumemi numijikia nuvil tibe na bior napano Kristo ga naio mila napano nubalea ga Atua toru laka. <sup>5</sup> Verver kumemi ga, mia maka nuvijikia nuver ka nubare ka nuvila vite tai, bior napano vite nonovio na numilaio, Atua ga mila na nubare ka nuvilaio. <sup>6</sup> Naio naruei jian moroano a jikiaiano ban kumemi, mila kumemi nubinimei nube tomu nalo na kiano inŋauano ea tivelinio na verikariano vou napano naio mila bija kito tomu nalo na yetemeriba. Verikariano na beamu, ajiri bulag kiano iliano nalo ea niosi lu nalo na Mosis kiano tuboiano, mia iliano nalo nene amijija kija kito telisu mia maka rivare. Nalo abo, mia venia napano amilaio, amilaio meravo ga kito tomu nalo na lakoroviano na tuboiano, napano mia monoka roviviuo nŋariano riviorio. Mia verikariano vou, kiano iliano nalo amaluvo ea Niununo Lu, a Niununo nene naruei mila kito romijikia rojev ioruriano.

<sup>7</sup> Marabo moruo re nua nene, napano aje kiano tuboiano nalo ea subaveru nalo, naio jo berkar nŋariano ga ban kito, mia be

vite lu tai laka. Bogo napano Mosis ba bar subaveru nalo nei, Atua kiano mermerano binimei eaio, ana bogo napano bar veru nalo nei ban tomu nalo na Israel, moroano na mermerano nei jo bavatove ruei, mia nalo maka ajikia avitii mirano bior napano merera mia merera kilkil laka. <sup>8</sup> Jibe na, ver Atua kiano mermerano miriaŋu kirisikili ea bogo napano aberial nŋarabo na avokar nŋariano, mia rimiaŋu tumiabe ea bogo napano mia averial nŋarabo na avokar meuliano? <sup>9</sup> Mia Atua kiano mermerano monoka rimiaŋu ve toru laka garuei ea bogo na, a kito roju romial ruei napano miamoiano na nŋarabo vou jo merera janea vio, jo juvulu miamoiano na nŋarabo moruo nei napano jo batove ruei. <sup>10</sup> Ee, miamoiano na nŋarabo moruo nei merera vatitig nua, mia vonganei, romialio ka kiano miamoiano jibe ka maka bunu merera vatitig leleio, bior miamoiano na nŋarabo vou mijedulu, jo merera toru laka ea vio nalo. <sup>11</sup> Miamoiano napano jo batove nei, be riano ka naio binimei beamu, binimei bija kiano buruŋara mermerano. Mia vonganei, miamoiano vou napano binimei vonga iorou, mia naio to tulaka, a kiano mermerano toru laka garuei.

<sup>12</sup> Ver kito rosidomii nina, mia rila kido jidomiano sikili vatitig, a romerou re ka rala Tubo kiano miamoiano rimerera ea vio reraio. <sup>13</sup> Mia rosidomii bunu tormoruo Mosis, napano bavin ea burusuku, ana Atua binimei vaataro kanio, mila mirano merera laka. Mia maka rivu ka rotibe ka naio, bior bogo napano naio batove binimei bereio ea tomu nalo na Israel, naio jovuko mirano bija kulunŋarauo ka aialio re, vano-o rivokar bogo na kiano miamoiano to rivatove rivano-o ribisi. <sup>14</sup> Ea bogo na, makalele aial miamoiano nene, bior napano pariparilo kirisikili laka, mia romial bokar banei, ajibe na kia bunu. Nalo aju abuluku iliano nalo na niosi moruo napano aju, mia jibe napano kulunŋarauo nene jo keano, jo joko kialo jidomiano. Mia ver amonea Kristo ga, mia naio mijikia ridular kulunŋarauo nene ka ajikia avitilubar kiano miamoiano vou. <sup>15</sup> Bogo napano abuluku Mosis kiano Tuboiano, jibe napano vite tai jo jetavoko pariparilo, <sup>16</sup> mia bogo napano toro tai binimei ea Kristo, amidular vite na napano joko kiano jidomiano, ana naio mijikia rivitilubar vite. Jibe ga iliano na Vivitauiano Lu nalo napano berii tormoruo Mosis nene, berinavo "Bogo napano Mosis bilig naio bitikar Tubo, kulunŋarauo nene jaluvo den naio bereio." <sup>17</sup> Ana bogo napano iliano nei ber ka Mosis bilig naio bitikar Tubo, iliano nei Tubo jo ber ka nina napano Atua kiano Niununo Lu. A

kito romijikia ka vio vabe Atua kiano Niununo joaio, tomu nalo amijikia ataluvo den moroano na vovaiano, ana amijikia ajev meuliano.

<sup>18</sup> Jibe na, kito nonovio napano romonea ruei, maka bunu kuluñarauo tai to toko mirado, mia roju robitii memedu buruñara Atua kiano mermerano. A bogo napano roju robitiio, Atua kiano mermerano nene jo binimej bujovujo ea kito bano napano robinimej jibe mermerobi ka merera bulag kiano miamoiano van tomu dolu nalo. Mia miamoiano nene maka taluvo den kiado meuliano, miyotuba den kiado Tubo, napano naio be Niununo na napano joa kito.

#### 4

*Pol naliko atevi nalo amioliolu ka miamoiano na Ioluanu Vou*

<sup>1</sup> Kumemi numitu numerera bulag Atua kiano miamoiano jibe na, naio be kenememi inñauano na toru tai ka nuvijja tomu dolu nalo. Atua kiano iviso bujo ka tiniervuiano, a naio naruei jian inñauano nei ban kumemi, a bogo napano numisidomii nina, mila na maka lele tiniememi maro ka nuvilao. <sup>2</sup> A bogo napano numiñau, numitu numiñau memedu bo bogo nonovio. Tomu tealo amijikia amiñau lukluk bena ga na amila sibusibiano ga ka avuru tomu nalo kialo jidomiano, a amijikia bunu aviligvilig Atua kiano iliano riva rive dolu, mia kumemi maka nuvila bajago kinkin nalo na jibe na. Kumemi numijikia ver bogo na numitu numiñau, numitu numila ea Atua mirano, ana monoka nuvila vatitigio. Tomu nalo dolu bunu aju abitivitii kenememi inñauano, a aju amijog bo kanio, bior napano aju abitulubario ka numitu nuberial Atua kiano ilirianiano nonovio nalo me-medu ga.

<sup>3</sup> Kumemi numioliolu jibe nei, maka toro tai napano mijikia river ka naio maka rijikia rijogkar Ioluanu Vou napano numitu nuberialio. Mia ver tai river ka maka meravo ka naio, nina maka tai napano jo barlaka ka legiano, mia monoka tai napano jo barlaka ka melijokouo ga, napano monoka ve vite tai ka toko kiano jidomiano, jibe kuluñarauo neibano roberii ruei. <sup>4</sup> Ea tivelinio na nalo napano maka amonea vo, tubu va na yetemeriba nei naio jetavoko kialo jidomiano ruei, naio milalo jibe abe merebono, bior napano naio maka sidom ka avitii buruñara miamoiano na Kristo kiano Ioluanu Vou. Kristo nene kiano mermerano merera laka, bior napano naio bar mirano Atua ga memedu. <sup>5</sup> Kumemi numitu numioliolu ka nina naruei, ninei Yesu Kristo, kiado Tubo. Maka nuvitu

nuvidular kumemi ka kamiu bereio, mia kumemi tomu na inñauano na kenemiu ga, ka nuvioliolu ka Yesu van kamiu ka kuvijikiaio.

<sup>6</sup> A vite nonovio nei be Atua kiano inñauano ga. Ea tiiano, Atua ber jibe nei, berinavo "Mia miamoiano rimej mereralii melijokouo napano jo," a jo mila jibe na kea ban kito. Nina ga Atua nei napano jo mirñau vonganei, mila kiano miamoiano merera ba joomo nonio ea kito, mila robakar miamoiano nei napano jo merera binimej den Kristo mirano, napano miyotuba nonovio ea Atua kiano mermerano napano joaio.

<sup>7</sup> Jikiaiano nalo na miamoiano na Atua kiano mermerano joa kito jibe na, be vite novo tai napano be lu laka. Ea kumemi napano numila Tubo kiano inñauano, numial jibe kumemi nube vite kurano tai ga, a maka nuvare ka kiano tolu novo nalo nei ajua kumemi, mia Atua naio bo, jo misonio ea kenememi meuliano julaka. A nina mila ka ver bogo tai nuviñauka vite tealo na bo, ana mia nuvitilubar ga ka moroano ve toru ka nuviñauka vite nalo nei maka moroano tai na yetemeriba nei napano maluvo den kumemi, mia be moroano tai na tiniabene napano maluvo den Atua ga.

<sup>8</sup> Naruei numitu numiñau bija moroano nene mijai kumemi toru, bior napano numitu nubiviuo bogokouo telabo, ana maka nuvitibirbil vo. Vite telabo amila kumemi numisidomii vonvon laka, mia kenememi jidomiano maka riva kovio. <sup>9</sup> Tomu telabo amila bulag vatitig kumemi, mia Atua bitikar kumemi julaka. Kumemi nubar jaleleano nalo, mia maka ajikia aue bulag kumemi, nemeul kia vo. <sup>10</sup> Be riano, bogokouo ban kumemi jibe na naruei, rivano-o jogvaiano na mñariano nalo ajua mokotenememi nalo jibe napano Yesu bario ea kiano mñariano. Mia kumemi numituvanio ga, bior napano ver Yesu kiano mñariano joa kumemi, mia kiano meuliano toa kumemi bunu. <sup>11</sup> Kumemi numiñau Yesu kiano jibe na, mila na bogo napano numitu nemeul ea yetemeriba nei, mia bogo nonovio numitua ga juluvati mñariano, ana mia mila ka kamiu bunu kumijikia kuvitii ka Yesu kiano meuliano jo malmaluvo toru ea mokotenememi na mñariano nalo. <sup>12</sup> Be riano numitu nuban ka nuvokar kenememi mñariano, mia numila jibe na ka kamiu kuvijikia kuva kuvokar kenemiu meuliano.

<sup>13</sup> Iliano tai joa Niosi na Iouano Lu nalo, napano toro tai mil, ber

*"Kiniou nomonea ruei, naruei mila na kiniou nemijikia neverial iliano," Sam 116:10*

a numialio jibe niununo na vie-kouoiano napano joa toro na, vonganei binimej toru ea kumemi bunu. Kumemi numitibe ka naio ga, napano kumemi bunu numonea, a vite venia napano numonmoneaio, nina naruei numijikia nuverialio. <sup>14</sup> Mia maka numerou ka nuverial leleio, bior napano numijikia vatitig ka kiado Atua napano mila Tubo Yesu meul bereio den nañariano, mia naio mila kumemi bunu numeul bereio jibe Yesu, a mia kamiu bunu kumeul bereio tibe kumemi, ana mia naio rivuru kito nonovio ravan rotu vijaio. <sup>15</sup> Ee, kumemi nubardulu bogokouo telabo jibe na, mia bo ga, bior napano naio be kenememi mñarabo tai ka nuvijikia nuvija kamiu. Kumemi numisidom ga ka Atua kiano tiniememiano monoka to rivanvano-o tulaka ea tomu nalo ea vio nonovio, ka rila aiaia Atua bogu nonovio, atu aver siva ka naio rivano-o rila kiano mermerano to rimej ve toru lie.

<sup>16</sup> Jidomiano novnovo nalo nei mila buriakurano napano bova ban kumemi jumñabe, mia numitu jikili bo ga numitu. Ea tivelinio na mokotenememi, jo binimej be kulu moruo, jo binimej burukokorovio, mia tivelinio na niunumemi, Atua jo mila binimej be terivou, jikili vatitigio ea bogoti nonovio ga. <sup>17</sup> Bogo kouo tertelisu nalo na yetemeriba nei nalo abe tena bogo bulati ga, miaaju amila kito roju vatitig ka ravar dula ka rotua mermerano na tiniabene, napano toru laka, bo laka juvulu loa, napano mia roju rojog riva kano to toboto. <sup>18</sup> Vonganei kiado jidomiano maka toa vite nalo napano mirado jo bitikario, mia kiado jidomiano toa vite nalo napano mirado maka rijikia rialio, kano napano vite na mirado mijikia rialio, nalo abe tena ga bogo bulati ea yetemeriba nei, mia vite na mirado maka rijikia rialio, nalo abe tena tu dañariga ea vio mave.

## 5

### *Kiado vio ea vio mave*

<sup>1</sup> Kito romijikia ruei ka mokotenado ea yetemeriba nei, maka rijikia to tulaka. Naio jibe tabobo tai na telisu napano roju rojuluku eaio, napano mia bogo tai monoka monñavu garuei, ðeli tomu dola nalo amijikia ameij aue bulagio. Mia romijikia bunu ka kunuado dola tai na jikili toru jo, napano maka airñaukano ea vio yetemeriba nei, mia Atua ga mila vatitigio ju be kiado ea vio mave, ana iorou romijikia rava rotuaio. <sup>2</sup> Yetemeriba nei jibe vio na tegiano ga, a rajaaro ga ka rataluvo denio, rojidom rava rotoluku ea kunuado na mave. <sup>3</sup> A bogo napano

mia rava rotuaio, mia maka bunu rojog ka maka ve kunuado tai, mia roialio navo ka kiado vio memedu jo.

<sup>4</sup> Ee, mokotenado jibe tabobo tai napano rojuluku eaio ea yetemeriba nei, be riano ga, bogo napano roju jibe na roju rejermñi julaka bior jidomiano kokouro nalo na bogokouo nalo napano roju rabarduluio. Peli bova ka ameij auebinvin bulag mokotenado, mia jidomiano tai monoka toa kito ka ver alaio, bo ga na, bior napano bo laka ka rotaluvo den tabobo nene, rava rotua yimo novo tai beamu. Monoka rovitilubar ka bo laka mokotenano na mñariano nei ribisi, ana mia mokotenano vou tai na meuliano mijikia rimej ridu jeleigio. <sup>5</sup> Bogobe ruei, Atua jo mirñau ka rila vatitig kito ka ravan ea kiano vio tibe na naruei. Naio midu Niununo joa kito ka rila rosidomial tulaka ka kiano verikariano ka rila tibe na ka kito mia rimej ve riano ga.

<sup>6</sup> Kito roju rojidomial nina, mila na bogo nonovio ga kito rojikili. Romijikia ka vonganei, roju romila kiado vonuo ea tabobo nene, napano be mokotenado, mia maka rotua kiado vonuo novo na vija Tubo vo. <sup>7</sup> Tibe na, bogo napano roju kia ea yetemeriba nei, monoka rola von re roju rotua venia napano mirado ga mijikia rialio, mia monoka roju sikili ea viekouoiano. <sup>8</sup> A ea tivelinio na kumemi, numitu kirisikili vatitig kea ka nuvitua yetemeriba nei ka nuvila kiano irñauano, mia nubitii ka bo lie bunu ver nuvijikia nuvituvan mokotenememi na yetemeriba nei, nuva nuvitua kenememi vonuo memedu vija Tubo. <sup>9</sup> Jibe na, ver kito rotua yetemeriba nei, ðeli roju mave, mia tulaka monoka rola von ka rola venia napano mia naio saaro kano. <sup>10</sup> Monoka rosidomial ka bogo napano Kristo riva totano mave ea kiano jobaro lu na tibureiano, mia kito ve terakurano monoka rava rosikili rotua mirano. Naruei ea bogo na, mia naio ga rila ka mia riva van kito, ðeli riva van kito, takii ga venia napano roju romilaio bogo na roju mokotenado na yetemeriba nei.

### *Kristo mila kiado merevuiano bija Atua*

<sup>11</sup> Bogo napano tiniememi maio ka Kristo tibure tomu nalo, numerou, a numial jibe bo ka nuvirñau sikili ka nuvuru tomu nalo ka avakovio re. Atua bitilubar batitig bajago na kenememi irñauano nalo nei, a neber ðeli kamiu bunu kubitilubar ka numirñau jibe na ga napano naio jaaro kano. <sup>12</sup> Kiniou nojo neberii vite nalo nei, maka nala rivior napano nojidom ka kamiu kuvidular kumemi bereio, mia bo



ka kuvijikia kuvisaaro ka venia napano numitu nubereno. Ver kubakar vatitig kenememi iliano nalo, mia rila na iliano nalo nene amijikia atua kamiu, ana mia kumijikia kuverdoŝe nalo napano aju aber ŝeli abo rui. Mia nalo aju amil vavavin ealo ka venia napano aju amilaio ea tomu nalo miralo, mia maka tiniel maio ka venia na ju joomo ea kialo meuliano.

<sup>13</sup> Nemijikia ka bogo napano neber iliano nene, mia ve tealo napano atu vija kamiu napano monoka aver nomiaovovu, mia nina bo ga na. Ver be riano ka numiavovu, numiavovu bior napano numila Atua kiano iŝauno nalo mĕlea, mia ver numitu parimememi bo ga, parimememi bo ga bior napano tiniememi maio ka kamiu, ana kamiu monoka kuviagago ka kumemi. <sup>14</sup> Vite takurano ga jo jilanvuu ka kenememi meuliano ka nuvila Kristo kiano iŝauno novo nalo, naina kiano tintietiano. Kumemi numonea jikili ka kiano mĕriano naio takurano mijikia rilurur kiado meuliano nonovio, ver ŝeli, mia kito nonovio monoka romĕrĕmĕro ga, mia maka kito tai na rijikia rimeul. <sup>15</sup> A naio mĕro kar kito nonovio jibe na, naio jidom ka kito napano romonea naio a roju romeuĕl kea ea yetemeriba nei, maka bunu romiŝau kiado ga, mia romiŝau kiano napano naio mĕro ka rilurur kiado meuliano nalo, karina Atua bitirilur naio bereio.

<sup>16</sup> Jibe na, bo ka rovitii re bunu tomu nalo takii jidomiano na yetemeriba nei. Beamu, bogo napano Kristo joa yetemeriba nei, tomu nalo aju abitii naio jakii jidomiano na yetemeriba nei, ana vonganei, rovitii re bunu naio tibe na, a maka rivu rotu rovitii tomu dolu nalo takii jidomiano na yetemeriba nei bunu. <sup>17</sup> Nina bior napano toro kei napano ver rimonea Kristo, naio rimeĕl tibe toro terivou tai garueĕl. Kiano meuliano moruo na re nua ba kovio, a vonganei, kiano meuliano vou maluvo rui. <sup>18</sup> Atua ga rila ka romijikia rovilig kiado meuliano tibe na, bior napano naio miila Kristo binimeĕl ea yetemeriba ka rila kiado mĕrabo ka romeĕl bereio ea naio, a jidom ka kito monoka rovuru tomu dolu nalo bunu ameĕl eaio. <sup>19</sup> Jibe na, Atua miŝau jel ea Kristo ka rivuru tomu nalo na yetemeriba ameĕl ka ave takurano vija naio bereio, napano maka bunu sidomii ka sian vironiano vanlo bior kialo kariano. A bija nina, naio jidom ridu kiano iliano toa juŝado, ka rodu rivan ea kulo dolu nalo ka nalo bunu ameĕl bere eaio. <sup>20</sup> Vite na narueĕl mila na kumemi nubinimeĕl nube Kristo kiano tomu nalo ka nuvar Atua kiano iliano

rivano. Tibe na, bogo napano nuberial iliano ban kamiu, jibe napano Atua ga jo mil, ana numisidom laka ka nuvika sikili van kamiu nonovio bereio nuber bo, ea Kristo siano, kamiu monoka kumeĕl bereio eaio. <sup>21</sup> Naio narueĕl tinen miila laka kito, ana midu kenerinio nei Kristo, napano maka leleio rila kariano, miila naio binimeĕl jibe toro na bar kiado kariano nonovio robiniu. Atua mila jibe na ban naio ka rila kito tomu na romila kariano, romijikia romeĕl rove tomu memedu nalo ea Atua mirano.

## 6

*Meuliano jikili ban Atua kiano nairĕauno*

<sup>1</sup> Kumemi numiŝau jibe tomu nalo na amiŝau vei bija Atua, a numijikia juŝabe ka naio be tinievu laka ban kito robiniu. Tibe na, numisidom nuvika sikili van kamiu, ka kiano tinievu novo napano binimeĕl ea kamiu, maka rivu ka rimeĕl kurano ga. Kamiu monoka kuviduio, a monoka kuvituvan rila kiano iŝauno ea kenemiu meuliano. <sup>2</sup> Iliano tai napano joa Niosi Moruo ber jibe na rui, napano Atua ber jibe nei, berinavo.

*Memedu ea bogo napano bo ka kamiu, kinioĕl nomiaĕgago ka kenemiu tegiano nalo,*

*a memedu ka bogoti na ioruriano, kiniou nemeĕl neiĕa kamiu. Ais 49:8*

Narueĕl ea kenememi vitiano, numijikia nuverial ka vonganei be kenemiu bogo memedu narueĕl, vonganei narueĕl be bogoti na kenemiu ioruriano.

<sup>3</sup> Ea tivelinio na kenememi iŝauno, numitu numila von kirisikili ka nuviŝau kanio rimemedu tulaka, ka nuvituko mĕrabo re ka tomu ninio napano ajidom ameĕl. Maka nuvisidom ka kulo dolu aver ka numila vite tai kirivova, ŝeli numilaluvu iŝauno tai kovio. <sup>4</sup> Numitu numila vite nonovio ga ka riverial ka numitu numiŝau memedu jibe tomu novo nalo na Atua kiano iŝauno, narueĕl numitu numijamo ka nuviviuo vite ve miroano. Numitu nubakar kumemi ka nuvar dulu ka nuvila nono vatitig iŝauno nalo, kumemi nubinua jaleleano nalo, bogokouo nalo, a jogvaiano nalo.

<sup>5</sup> Nalo ajumolu amilkueĕl kumemi, a abitiv kumemi, a abuku kumemi ea nalakoiano. Bogo miroano, numiŝau mia numiŝau, maka numonmelio rivu, a maka simemi sinaniano rivu.

<sup>6</sup> Bova laka ka kumemi jibe na, mia numitu numiŝau memedu ga, a numitu numiŝau bija jikiaiano, bija jidomiano na

tebievi, a bija tinievuiano. Tomu nalo amial ka kenememi meuliano bujo ka Niununo Lu, a kenememi bajago bujo ka tinietiano na be riano, <sup>7</sup> napano nuberial iliano nalo napano maka ave sibiano, napano numiñau ea Atua kiano moroano, a napano ea jumememi nalo, ea vameruo a vamali, nubokar vite nalo na mira ka rila memeduano tovulu nonio vovaiano. <sup>8</sup> Tomu tealo amidular kumemi, a tealo amidu kumemi numitu yetano garuei, tealo aberii vatitig kumemi, a tealo aberii kumemi bova laka, mia kumemi maka nuvisidomialio, nuban ga. Maka nuvila sibilili toro tai, mia aju amial kumemi jibe maka nuve riano leleio. <sup>9</sup> Nalo amijikia vatitig kumemi ruei mia aju amila jibe maka asidom ajikia kumemi lele. Kumemi numeul vatitig bo numitu keano, mia aju ajidom ver numiñaruar garuei.

Nina naruei jo ban jibe na ea kumemi vonganei, mia be iakurano napano nubar vironiano nalo, maka ajikia adular kea kenememi meuliano. <sup>10</sup> Be iakurano napano jogvaiano nalo abujo laka, mia kenememi iviso jaaro julaka ga. Be iakurano napano bogo nonovio jumememi beteauo, mia numitu numila tomu dolu nalo abar vite miroano. A be iakurano napano maka ve kenememi titai, mia nubitii ka vite nonovio be kenememi ga.

<sup>11</sup> Bilbilu nalo na Korin, kumemi maka jidomiano va tai bere ea kamiu napano numila luku ju. Nuberial nonovio jidomiano ban kamiu ruei, a tiniememi maio ka kamiu laka. <sup>12</sup> Maka numila vite tai napano mia ðeli tukovio ka kiado bilbilu novo, a ver tukovio ea vio tai, nina bior napano kamiu ga kubakakar jidomiano va tealo ea kumemi aju. <sup>13</sup> A ver tibe na, kinioi monoka noil van kamiu tibe keneriku nalo ga naruei. Nojidom novika den kamiu tibe nei, neber bo, kamiu kuvilavan re bunu kenemiu jidomiano luklukuano tai bereio, mia kuvila von ka kuvila kenemiu iviso rivetavo ka kumemi.

*Kuvitikar vatitig ka nalo napano maka amonmonea*

<sup>14</sup> Kinioi nojidom never ka kamiu mia kuvitu re kuvila von ka kumei ve takurano vija nalo napano maka amonmonea. Bo ka kuvisidomii kario ka bajago na memedu bija bajago na kariano, naljuo maka ajikia amei avuron vio takurano, a legiano maka jikia rila bilbilu vija melijokouo. <sup>15</sup> Kristo maka rijikia rive kiano jidomiano tai vija Simñaro, a toro napano monmonea maka lele kiano vite tai vija toro napano maka monmonea. <sup>16</sup> Tavoru sibisibi nalo maka ajikia atu joomo ea Atua kunuano Lu bogo

tai, a iliano nei be nioti nene bior napano Kunuano Lu naio maka ve yimo tai ga, mia naio be kito, Atua na meul kiano namoneano nalo. Nina jakii ga kiano iliano tealo, napano naio berenio jibe nei, berinavo

*“Kinioi mia notoalo, ka mia natiel iviso kalo.*

*Kinioi mia neve kialo Atua, mia amei ave kiaku torogio nalo rimemedu. Lev 26:12*

<sup>17</sup> *Jibe na, jibe kialo Tubo, neber ka kiaku nalo nei ka monoka ataluvo den nalo dolu.*

*Monoka atiburei nalo den tomu va nalo.*

*Monoka amei aveli vatitig, a monoka atu re vaataro ka niamiamo nalo, tibe na mia nemijikia nojamo kalo ka amei atu vija kinioi.*

<sup>18</sup> *Mia kinioi, jibe Atua Soði, nemijikia never kalo never*

*“Kamiu kumei ka neve karamemiu, a ka kamiu kuve keneriku nalo rimemedu.”*

## 7

<sup>1</sup> Bilbilu nalo, naina naruei Atua kiano verikariano novo nalo napano ber ka mia rivuru kito tibe kiano mñaratavo nalo. Naio mila jibe na ka kito bo laka, ana bo ka kito ravatove ka naio tulaka, a monoka rolakon niamiamo ea kiado meuliano. Kariano tealo romila ea mokotenado, a tealo romila joomo ea kiado iviso ga, ana monoka ro-bisi kalo nonovio, a monoka romei roveli vatitig mia roveli vatitig, tibe napano naio jidomio.

*Pol jaaro laka ka Atua miñau ealo*

<sup>2</sup> Kinioi nojidom nevika bereio den kamiu ka tiniemiu ser re kumemi, mia kuvidu kenememi vio tai ea kenemiu iviso nalo, ka nemijikia never vite tealo van kamiu bereio. Bo ka kuvila tibe na, bior napano maka kamiu tai napano numila bova kanio, ðeli numila bulagio, ðeli nubilivilig lelar naio. <sup>3</sup> Ana bogo na neber iliano nalo na, ðeli kamiu kuberialña nojo nojidomii va ea kamiu, ðeli nojidom neil niegeniege kamiu, mia maka tibe na leleio. Makanio, jibe ga napano neber ka kamiu ruei, nuber kumitua kenememi iviso ruei, a roju robinime takurano riva rivokar napano jibe rojua meuliano takurano ga, ka verenio tai riviviuo mñariano, mia rojoj jibe robiniu romñararo. <sup>4</sup> Ee, nemijikia never tibe nei never kinioi nojo ban kamiu toru laka mia toru laka, nobe mñarou laka ka kamiu, a bogo napano nojidomii kenemiu iñauano novo nalo, aju amijakar

laka kiaku jidomiano. Be riano napano nobiviuo jaleleano laka, ana kumitu kumila ban kiniou napano jogvuiano a saariano bujo laka ea kiaku iviso.

<sup>5</sup> A jibe na ga bunu nanua na, bogo napano nubano numoluo ea tanobuku na Masetonia. Ea vio na, nubiniua bereio baravoiano nalo na jikirikili, mila na numerou kija, a mokotenememi maka bogo ka jilimebi leleio. <sup>6</sup> A kiado Atua be Atua na dupilipili nalo napano amijog kirivova ea kialo iviso, ana naio tinien maio ka kumemi, mila bilbilu novo nei Taitas maluvo kean kumemi, a bogo napano numial naio bereio, numijog bo laka. <sup>7</sup> A bogo napano naio jukunu ban kumemi, naio berial tonovno nalo napano kumilaio, mikurukar kumemi toru laka. Naio berii jumabe napano naio bunu, bogo napano maluvo kean kamiu, mileal vite miroano ea kamiu napano mikurukar naio, a be-realio ka kamiu kumila merevuiano bior kenemiu iliano nalo nanua na, napano vonganei, kubilig kenemiu jidomiano, kumitu kumisikili ea tivelinio na kiniou. Berialio ka kumisidom laka monoka noviedu neadu ka kamiu, mia banalo, bogo napano nomijog nina nomijog bo mia nomijog bo.

<sup>8</sup> Bogo napano nobivitauia mēsi dolu nei biedu kean kamiu, nejuvan bano ana maka vesiou nojidomiikar bereio, nojidom ver notuvanio re ga. Nina bior napano nemijikia ka kiaku iliano nalo ajikirkili, mia monoka ala kamiu kuvijog rivova kija. A bogo napano nomijog Taitas kiano veriiano, nomialio ka be riano, kiaku mēsi mila bulag kenemiu jidomiano nalo. Ana nina tena bogo bulati ga, iorou kamiu kuvilig kamiu bereio, ana mila na tinieku jaaro bereio napano nejuvan mēsi neibano biedu. <sup>9</sup> Jibe maka neverenio ka nejaaro napano mēsi neibano mila kamiu kumijog bova, mia nejaaro ga napano jogvaiano nei mila kamiu kubilig kamiu. A kenemiu jogvaiano nei, maka kumemi napano nuvilaio rimaluvo kean kamiu, mia Atua naruei milaio maluvo. <sup>10</sup> Tibe na, jogvaiano nei naio be jogvaiano novo tai napano binimei mave, napano mila toro bilig naio ka rijikia rijev ioruriano. Mia jogvaiano dolu, napano jogvaiano na yetemeriba nei, naio be jogvaiano va tai napano mia rila toro rijog rivova ga riva rivokar māriano. <sup>11</sup> Kamiu bunu kuvijikia kuvitilubar ka jogvaiano napano Atua jianio maluvo kean kamiu, naio mila imāuano novo tai. Mila kamiu kumisidomii temi laka ea kenemiu meuliano, a kumila vonvon laka ka kuvila siemiu amei rivu bereio. Beamu, tiniemiu mimi napano aberii vovaiano napano jo

iviso kean kamiu, a bogo napano nomil ban kamiu biorio, kumial von mārabo ana kumerou. Kamiu ga kuvitumormolu kuvil van kamiu bereio, a kuvisian vironiano van nalo napano amila bova, ka vovaiano tai re bunu toa kamiu.

<sup>12</sup> Nojidom never ka mēsi neibano, nejuvanio bior napano nojidom noil van naljuo napano amila bova, a tinieku miia bunu tormoruo nei napano naljuo amila bulag laka naio. Nejuvanio bunu bior napano nojidom ka monoka kuvitilubar ka be riano, kamiu tiniemiu jii kumemi, ana bogo napano nuvil van kamiu ea Atua siano, kamiu kuvisaaro ka kuvamenea venia napano nuberenio. <sup>13</sup> Bogo napano Taitas binimei berial ban kumemi ka kumila jibe na ruei, mijalar kenememi jidomiano toru laka.

Kumemi numisaaro laka ka nina ruei, mia bogo napano Taitas jukunu lie ka ban kumemi, berii jumabe ka kumila bo laka kanio, numisaaro lie vo garuei. Naio berii napano jo bija kamiu, kumiija naio, a kumila naio jaaro laka bereio. <sup>14</sup> Kiniou neberii kamiu ban naio beamu ruei, neber ka nabarvar ka kiniou laka ka kenemiu bajago novo nalo, mia bogo napano naio maluvo kean kamiu, naio milealio ka maka nala sibi, mia neber be riano ga. Jibe nanua, nojo neber vite na be riano ga ban kamiu bogo nonovio, a vonganei kumila napano kiaku iliano ban Taitas ea tivelinio na kamiu binimei be riano vatitig bunu. <sup>15</sup> Naio maka rijikia tiniene bobogia ka bogo napano naio biedu, kamiu kumerou laka a kumemebiju, mia bogo napano naio mil ban kamiu, kumiagago kanio, kubatove vatitig ka kiano iliano. Kenemiu bajago novo jibe na mila ka bogoti na naio binimei bereio, jo jidomii laka ka kamiu bogo nonovio ga. <sup>16</sup> A ea tivelinio na kiniou, neber ga ka kiniou najaaro mia najaaro, a vonga nei nemial jibe ka mia nemijikia notuvan kamiu vatitig ea vite ninio ea bogo ninio ga.

## 8

### *Bo kanio asian jidomiano*

<sup>1</sup> Bilbilu nalo na Korin, kumemi numisidom kamiu kuvijog ioluano na vite novo tai napano jo malmaluvo ea yimo lu nalo na burumāra tanobuku na Masetonia, napano Atua jo mirāu ea kiano tiniememiano. <sup>2</sup> Ea vio na, nalo abar dulu kija bogokouo nalo napano vite miroano amila von niegelo, a ba bokar napano maka bunu ve kialo vite tai, mia nalo na, maka lele abisi ka asaaro ga ka venia napano abiniuaio. Jumālo yauo ga,

mia numiilo laka ka bogo napano amijog ka namoneano dolu nalo na Yerusalem abiniua bogokouo bunu, ana tiniel miialo a jibe ka jumalo nalo na abinimej abuj vatitig bija vite nalo na ajianio jibe kialo jidomiano tai ban kulo dolu nalo nei.<sup>3</sup> Maka toro tai napano river ka monoka ala tibe na, mia nalo ga aberii ka alaio, a nomijikia vatitig ka ajian vite nonovio napano amijikia asianio, bano-o napano tealoo ajian jovulu venia napano amijikia asianio.<sup>4</sup> A bogo napano abar bulag nonovio kario, abar jua jumememi, nalo ajikili ka nuvial marabo tai ka nuvituvan jidomiano nei rivano, bior napano aber ka ver ve bogo tai ka ajikia aija namoneano lu dolu nalo tibe na bereio, mia rive vite novo tai laka kalo, na-pano mia asaaro laka kanio.<sup>5</sup> Nalo abo laka, bior napano beamu nalo amidu momou kialo meuliano jibe jidomiano tai ba ban Tubo, amiduloaju yetano ka kenememi iliano, ana iorou, amidu vite venia napano be kialo jibe jidomiano tai binimej ka namoneano dolu nalo. Nalo amila bo lie jovulu venia napano kumemi numisidomii ka mia alaio, a be riano, amilaio memedu ga ka Atua kiano tinieiano.

<sup>6</sup> Ana bogo napano numial ka tomu dolu nalo na Masetonia amila jibe na, nuber ŕeli bo ka nuviila Taitas rimej bereio ea kamii, ka rikurkar kamii ka kuvila tibe na bunu. Numijikia ka bogo napano naio binimej nua, naio jo mil ban kamii, a kumitakar ka kuvila inŕauano novo na tinievuiano na naruej, mia bo ka naio rimej rila nonovio vatitig vija kamii.<sup>7</sup> Numial napano inŕauano dolu nalo, kumitu kumilaio vatitig ruej, napano kenemiu viekouoiano toru laka, kumitu kuberial ilirianiano bo laka, kumijikia vite miroano ruej, kumitu kubarvar vatitig kamii ka inŕauano, a kumitu tiniemiuji kumemi namoneano dolu nalo toru laka. Kamii kumila inŕauano nalo na ba jovulu venia napano numisidomii nuber bare ka kuvilaio, ana bo kuvila tibe na bunu ea tivelinio na inŕauano na asian jidomiano nene.

<sup>8</sup> Kiniou neber jibe na, mia iliano na naio maka tibe ka tuboiano tai napano mia monoka atakiio. Vite na joa ga kamii, ŕeli bo ka noverii nalo dolu tealoo van kamii tibe na, neverial vite novo nalo napano amilaio ruej. A bogo napano mia kuvijogio, mia rila kamii kuvitii kija kamii bereio, kuver kenemiu tinietiiano toru bunu, beberare ka nana kanalo, ŕeli na makanio?<sup>9</sup> A bo ka rosidomii bogo nonovio Yesu Kristo kiado Tubo kanano burumara tinieemiano, napano beamu, naio jibe ka be kiano vite nonovio, ana

tinien maio ka kito ea yetemeriba, naio binimej jibe napano maka ve kiano titai, ka rila romijikia romej tibe napano be kiado vite nonovio.<sup>10</sup> Bo ga, nina naruej kiaku jidomiano tai ea tivelinio na. Kiniou neber ga ka nemial jibe ka vite na, kumisidom kuvilaio ka yuka na barlaka ruej, a kumitakar ka kuvilaio, mia bo lie ka kuvitumolu bereio ka kuvila nonio vatitigio.<sup>11</sup> Bogobe ruej, kenemiu jidomiano ka kuvila tibe na naio jikili batitig bo, mia vonganei bo ka kuvisikili vatitig ka kuvinŕaukanio, a ka kuvinŕaukanio rivoru ea juluvati napano kamii kubare kanio.<sup>12</sup> Atua maka river ka monoka reje jidomiano todovul venia napano joa jumado ka rosian, mia jidom ga ka rosaaro ka roija toro dolu, a reje jidomiano rimemedu ea venia napano rabare ka rosianio.

<sup>13</sup> Ana bogo napano nobika kamii ka kuvisaaro ka ijaiano tibe na, maka nosidomii ka nala ka mia inŕauano rimej ve temi ka kamii mia rimej rimonmaio ga ka kulo dolu nalo.<sup>14</sup> Kiniou nojo nojidomii ga bo ka kito nonovio roveverare ga. Ea bogo na, kenemiu vite miroano, mia nalo maka kialo tai, mia tibe na, bo ka kenemiu vite torogio riva rila ka nalo ve kialo vite nalo ve telisu, a ŕeli bogo tai ver kamii kuvokar jogvaiano ea yuka nalo napano ju ka rimej, kialo vite torogio mijikia rimej rila ka kamii kenemiu ve telisu. Bogo napano roju romijaijai kito jibe na bo, mila na kito nonovio roju beberare,<sup>15</sup> a mia tibe iliano tai na Niosi Moruo napano ber jibe nei, berinavo

*“Toro napano bar sinaniano miroano binimej,  
naio jenio ba binii koko, mia iorou kanio  
maka bunu sano sinaniano tai to,  
a nina napano ba bar sinaniano telisu  
ga, napano mialio ka bare ga,  
mia maka jumano ve bulati ka vite tai.”  
Eks 16:18*

*Mia Taitas rivan bereio Korin*

<sup>16</sup> Beamu ruej binimej, nojo nojidomii laka kamii, a vonganei, neber siva laka ban Atua ka naio mila ban Taitas ka vonganei, jidomiano na jikili novo tai joa naio ruej, ka naio monoka riviedu rijai kamii.<sup>17</sup> Ana bogo napano kumemi nubika naio ka riviedu riyotuba kean kamii, naio jaaro ga, bior napano jidomiano tai ka rila tibe na joa naio ruej.<sup>18</sup> A maka naio ga ve takurano, mia nuviila kumemi dolu tai rimej vija naio, napano be kuruado tai napano namoneano lu nalo ea vio miroano amijikia vatitig naio, bior napano naio be toro na bo tai na mioliolu ka Ioluano Vou.<sup>19</sup> Namoneano lu nalo ajaaro ka kiano inŕauano, ana nalo abijaualar

naio ka to riel seliviv vija kumemi ea kiado tanobuku nalo, bogo napano numitu nubar biji veru na jidomiano nei napano ka rijai namoneano nalo ea vio Yerusalemo. Kumemi numila inĉauano nei bior napano tiniemeri jילו laka, a bogo napano mia avokar jidomiano nei mia aילו vatitig ka bajago novo na iĉaiano napano rolaio vanlo, mia adular Tubo siano rivavin. <sup>20</sup> A numisaaro laka ka kuruado dolu nei jakisor kumemi, bior napano naio mijikia rijai kumemi ka vitar veru na toru nei napano aju ajuvanbijio. Numisidom nuvtikar kanio takii kiano mĉarabo novo nalo ga, maka nuvisidom nuvijog iliano ninio rimei iorou. <sup>21</sup> Numisidom nuvila inĉauano nei tibe napano mia rimemedu vatitig ka Tubo kiano vitiano, a mia rimemedu vatitig ka tomu dolu nalo kialo vitiano bunu.

<sup>22</sup> Ana ea tivelinio na Taitas naljuo nei, mia nuvilla kuruado dolu tai bereio rimei ka rial kamiu. Naio bunu be toro tai napano nubar vite miroano ajua juĉano rui, a numila von naio jibe na bano-o numialio ka naio biekuo vatitig ea vite nonovio. Naio be toro na bo tai ka rinĉau, a bogo napano kiniou noĉo neberii kenemiu bajago novo nalo banio, naio monea kamiu laka ka ver rimei kija rinĉau vija kamiu mia rivu laka. <sup>23</sup> Tibe na, ea tivelinio na kiaku bilbilu novo nei Taitas, kamiu monoka kuvitii naio kuver kumemi juo naruei numinĉau vio takurano ka nuvijia kamiu, a ea tivelinio na kuruado juo dolu napano mia amei vija naio, monoka kuvitiilo kuver nalo abinimei ka kamiu ea namoneano lu dolu nalo na tanobuku nei sialo, a abinimei ea Kristo siano napano kialo meuliano jo berial kiano bajago novo nalo. <sup>24</sup> Naruei noĉidom nover ka kamiu ka bogo napano nalo nei amei ayotuba kean kamiu, kenemiu meuliano nalo monoka atu averial bunu kenemiu bajago novo nalo. Kiniou noĉo nomioliolu kamiu ka nalo rui, ana bo ka mia avitilubar vatitig ka miralo ka kiniou neber be riano ga, ka kenemiu tinietiano toru laka, a mia ajikia asian veriiano novo tai napano riverii kamiu riva van namoneano lu dolu nalo.

## 9

*Jidomiano na iĉaiano ban namoneano dolu nalo*

<sup>1</sup> Kiniou nebitauia bulag iliano miroano rui ea tivelinio na iĉaiano na veru napano roju robarbijio ka rijai Atua kiano namoneano dolu nalo nei, a neber ĉeli kamiu kumitu kumisidomii vite nalo na kia ga vo. <sup>2</sup> Nemijikia vatitig rui ka kumisaaro ka kuviasol ea inĉauano na

abarvar veru na iĉaiano nei bior napano ka yuka na barlaka rui, kumitu kumila bijii vite ka kuvijev kiano veru ve telisu. A bogo napano naban ea tanobuku nei Masetonia neberii kamiu banlo, neber kamiu kulo Akaia, kumitikario rui, a bogo napano amijogio jibe na mikurlo kija, mila na kialo jidomiano ajevijo ka nalo monoka asikil lie ka ala kialo togio. <sup>3</sup> Noĉo neberii kamiu ban tomu dolu nalo rui, neber kamiu kuminĉau bo jibe nei jibe na, ana ver maka kuvilaio, mia kirivoga! Naina naruei mila kiniou noĉidom neiila kuruado tolu nei ka aviedu avitii vatitig kamiu, bior napano neber banlo neber monoka kuvarvar veru nalo nei rui, naruei amijikia amei alealio ka jibe napano neberenio ĉeli na makan vo. <sup>4</sup> Ver makan vo, monoka kuvila soĉeli ka kuvilaio, bior napano vaataro mia kiniou bunu noviedu, a mia noviedu vija tomu tealo na Masetonia, napano neberii kamiu banlo rui. Naruei ver nuviedu a aialio ka napano maka kuvila vite rivu vo, mia ve buruĉara imouiano van kiniou, a van kamiu bunu, mia nalo monoka averii kiniou nomila soĉeli laka ka nomiaia kamiu banlo. <sup>5</sup> Nina naruei nemialio ka monoka nevika Taitas nalo ka aviedu beamu ka kiniou, ana amijikia ainĉau vija kamiu ka kuvarvar veru nalo napano kuberkarjo ka kuvarjo, kuvarbijii vatitigio tu, ana kario nume nuvar nuvano. Kiniou neber jibe nei, ana kamiu kuvisidomii re kuver noĉo nomiyuku kamiu ka monoka kuvar jidomiano nene. Iĉaiano na jidomiano jibe nei, naio be vite tai napano kube tinievuiano, mia kenemiu jidomiano ga asaaro ka alaio.

*Ilivuiano nalo na bajago na asian vite*

<sup>6</sup> Mia iliano tai napano nemijikia never sikili van kamiu jibe nei, ber toro napano mebijio telisu, mia naio rivar ve telisu, mia toro napano mebijio toru, mia naio rivar ve toru. <sup>7</sup> Ea tivelinio na reĉe jidomiano van toro dolu, kito terakurano monoka rosian venia ga napano kiado jidomiano berkario ka ralaio, mia maka rivu ka kosian napano maka kosaaro ka kosiano, ĉeli kosian bior napano toro dolu miyukuso ka monoka kosiano. Atua maka sidom nina, mia naio jidom laka toro napano jian vite miyotuba ea tinievuiano a ea kiano jidomiano naio takurano. <sup>8</sup> Naruei ver jau tai napano koĉo koĉian jidomiano bano, jau kosidomial re kanio, bior napano Atua mijikia sian kean jidomiano novo nalo amei easo, ve miroano mia ve miroano. Naio mijikia rila napano bogo nonovio ga kovar vare ea vite nonovio napano koĉidomio, a mave ka naina vare ka kosian bereio ka iĉaiano na

iñauano novo dolu nalo. <sup>9</sup> Nina jibe iliano tai na Niosi na Iouano Lu nalo, napano berii Atua kanano tinievuiano, berinavo.

*Naio jo jijian bulag jidomiano novo nalo ban tomu nalo napano jumalo beteauo,*

*kiano bajago novo aju julaka. Iouano 112:9*

<sup>10</sup> A Atua, naio naruei napano jian kurukti ka romebija ea borotano, a naio naruei napano mila kurukuti bar m̄arati ka roim̄auka sinaniano eaio, a jibe nei, mia naio jian venia napano kumisidom ka kuvim̄au eaio, a mia rila kenemiu saba nalo amei ve miroano, a mia rila ka kenemiu iñauano nalo rimemedu ka avar m̄arati ve miroano. <sup>11</sup> Mia naio rivitilubar vatitig kenemiu bajago novo nene, napano bogo nonovio kumisaaro ka kuvisian vite, naruei mia naio sian kean meran vite ve miroano rimei van kamii, a bogo napano nuvar kenemiu ijaiano rivan ea nalo dolu nei, mia rila napano kito nonovio rosian sivaiano tai na toru van Atua bior ilivuiiano novnovo nalo napano naio jo jianio binime i ban kito. <sup>12</sup> Jidomiano nene napano mia kuvituvanio rivano, mia rijai ve toru namoneano lu dolu nalo nei napano aju abiniua bogokouo, a mia rila aiaia Atua ve toru bunu, aver siva laka vanio. <sup>13</sup> Mia aiaia Atua tibe na bior napano mia aialio ka kamii maka kuvitu kuvioliolu ka Kristo kanano Ioluano Vou ga, mia kumitu kumijogkar bunu ka venia napano naio berii, a mia aial ka jidomiano napano kumijiano bano toru laka, napano mia mijikia rijai nalo ve toru a rijai nalo dolu bunu. Naruei bogo napano amialio vite juo nei, mia abitilubar von bunu ka kenemiu iñauano jo berialio ka kenemiu viekouoiano kirisikili vatitig ga a be riano jo. <sup>14</sup> Mia nalo aial napano Atua kiano tiniememiano bujo lou laka ea kenemiu iviso jibe na, naruei mia tiniel maio ka kamii bano-o, mia tiniel miia kamii, mia aju abolkouo ka kamii julaka.

<sup>15</sup> Bo ka aver siva ka kamii bior kenemiu jidomiano novo na jibe na, mia bo bunu ka kito nonovio rover siva laka van Atua tulaka bior jidomiano novnovo napano naio jianio ban kito, napano kenerinio nei, Yesu Kristo.

## 10

*Pol berdoŋe nalo napano amil niege kiano iñauano*

<sup>1</sup> Bilbilu nalo, kamii kumijikia ka kinioiu nei Pol ga nojo nobivita u bieu, mia nojidom kamii kuvijev kiaku iliano ea bajago na beberare ka Kristo kiano bajago, napano naio be tur̄iaro bo a melokloko

bo. Naina naruei bajago napano nojo nomila von ka nala van kamii nua, mia nemijikia ka tomu tai napano aju amilkue kinioiu biorio. Nalo aju aber bogo napano nojo bija kamii, kinioiu nomelmeloko laka, a nomerou ka noil, mia nalo aber bogo napano nobivita uia m̄esi bieu, nomila kinioiu jibe toro tai napano nomijikia nomil jikili, bior napano ga nojo koalabo den kamii. <sup>2</sup> Nina bo ga na, mia kamii monoka kuvijikia ka bogo napano namaluvo kean kamii, ver neial ka bo noil sikili, nomijikia nala ga. Mia vite na naruei nojidom never ka kamii, a neber bo ban kamii, nebika jikili den kamii ka kuvila von vovaiano nalo nei amei rivu kija, bogo napano maka nomaluvo kean kamii vo. Ver tibe na, bogo napano neviadu, mia ve re vite tai napano monoka noil sikili rivorio, ana ver makanio, maka nomerou ka novuku iliano tealo napano jikirkili mia jikirkili van nalo napano aju joomo ea vovaiano nalo nei, a napano aju amil niegeniege kumemi, aber ka kumemi numitu numim̄au jakii jidomiano na yetemeriba ga.

<sup>3</sup> Ee, kito nonovio rojua yetemeriba nei, mia kumemi maka nuvitu nuvitakii kiano bajago. A be riano, numitu numila mira tai ea yetemeriba nei, mia mira nene maka na vio na. <sup>4</sup> Kumemi numitu numiasol ea mira tai napano moroano nalo na vio na jogvaiano, a tenalo na mira napano numitu nubokario, nalo maka tena yetemeriba nei, mia numitu numila mira ea moroano na Niununo Lu napano mijikia riolkon bulag vio na jikirkili nonovio napano vite va nalo aju ajuluku eaio. <sup>5</sup> Ver nalo aver ilivovaiano nalo die Tubo kiano iñauano, mia kumemi numijikia nuvituvulu lo ga. Ver abe m̄arou, amila von ka atukovio ka kanano iñauano, mia kumemi numijikia nuvar dulu ka nuvila tomu nalo ajikia naio ea kialo meuliano. Ver nalo atunolu vija kialo jidomiano va nalo, mia kumemi numijikia nuvilig tomu nalo nei amei napano kialo jidomiano rimei sikili ka atakisor Kristo ga. <sup>6</sup> Numijikia nuvila tibe na ka kamii rivano-o kuvilig kamii, kuvijamo ka kuvidu kamii kuvitu yetano ka Tubo kiano iliano, a iorou mia nuvila rivan ea vio dolu nalo napano tomu nalo na jukujukuano ajaio.

<sup>7</sup> Naruei ea tivelinio na toro nei napano be burupati na jaleleano nei, ŋeli kamii kumitu kuberiaña vite nonovio bo ga, bior napano toro nei naio ber be namoneano tai. Mia neber bo ka kamii kuvitii re ea kuluniabene ga, kuvila von ka kuvitii vatitigio ea vite napano be riano napano joa miremiu ruei. Naio

ber ka be namoneano, mia bo ga, mia naio jo mila bova, a bo ka naio rivitii vatitigio kiano meuliano bereio. Kumitu kumisidom kuviagago ka naio kia ga, mia jurñabe, kiniou bunu nebe namoneano, ana bior vaio maka kuvisidom kuviagago ka kiniou? <sup>8</sup> Kiniou neber jibe na, ðeli mia kamiu tealo ailkue ka kiniou bereio, averinavo kiniou nojidom notovulu lie ga, mia maka tibe na. Peli be riano ka bogo tealo nebe m̃arou laka, ðeli nojo noberii laka ka kumemi naruei numitu nubitkar kamiu, mia maka nala titai rivova napano monoka noimou riviorio. Kiniou nojo neberii jibe na bior napano Tubo ga midu kamiu kumitua jumememi nua ruei ka nuvila kenemiu meuliano rivija naio rimeii mave. Ver kamiu kuberka kumemi numitu numil ban kamiu ka nuvila bulag kenemiu meuliano bereio, maka tibe na leleio. <sup>9</sup> A ver kamiu kuberiaña kiniou nebe toro na tiniemimiano napano nojo nobivitauia ea m̃esi nalo biedu ka rila kamiu monoka kumerou ka kiniou, nina bunu maka rimemedu.

<sup>10</sup> Kiniou nomijikia ka tealo aju aberii kiniou jibe na ruei, aberinavo "O Pol na, kiano m̃esi nalo abujo ka iliano na teremi nalo napano ajikili laka, mia ver koial naio, jibe toro ninio tai na melukluku ga, a ver kojog naio mil, melala ga." <sup>11</sup> Mia nojidom never ka nalo na never bo ka avitulubario ka venia napano nojo nobivitauia bulag ea m̃esi, bogo napano maka nuvitu vija kamiu, naio bare ga ka venia napano mia nuvitu nuvila ea miremiu, bogo napano numitu bija kamiu. <sup>12</sup> Neber jibe nei, mia maka nosidom never m̃elea vite ka ridular siememi bereio. Maka nosidom ka nomei tibe tomu dolu nalo, napano aju abe m̃arou laka ka averial kialo vite novo nalo bereio. Tomu kinkin nalo nei aju abitii veve kialo bilbilu nalo, ðeli aju abitii veve tomu dolu nalo, ana aber ðeli nalo abo lie ajovulu lo, mia nina be im̃auano tai na vovuiano ga, bior napano ðeli nalo nonovio na abova beverare ga.

<sup>13</sup> Tibe na, mia neverii re laka ka kumemi riva lie laka, mia monoka noverii vite tealo van kamiu napano amemedu ka im̃auano nalo napano Atua midu joa jumememi, a joomo eaio, ba bokar vite tealo ea tivelinio na vitikariano na kamiu napano kumemi numitu numilaio. <sup>14</sup> Kumemi maka nuvisidom ka nuva laka ka nuvila von ka nuvitu mave ka kamiu, mia memedu ka numial ka numijikia nuvisian iliano tealo napano monoka kuvatove kanio, bior napano monoka tiniemiu ribobogia re ka kumemi naruei nube moti ka numidu Kristo kiano Ioluanu Vou binimeii lilian bokar kamiu. <sup>15</sup> Ver tealo

dolu nalo abinimeii ruei ea kamiu beamu, mia maka nuvisidomii ka nuvisirarago ka kamiu ðeli ka nuvisian iliano van kamiu tibe nei. Mia kar napano numitkar im̃auano bija kamiu, monoka nuva lie vija kamiu. Numisidom ga ka kenemiu viekouoiano to riluo bogo nonovio, a numisidom laka ver tanobuku na vio na kenememi im̃auano mijikia rimeii ve toru lie, maka ea kenemiu vio ga, <sup>16</sup> a mia kumemi nuvisaaro m̃elea ver kuvijikia kuvija kumemi ka rila ka kito rava lie roioliolu ka Ioluanu Vou ea venuo dolu nalo tivelinio ka kenemiu ban lie, ka ravan roteþe viomoruo ea vio nalo napano tomu dolu nalo maka avan aioliolu eaio vo. Tibe na, ver bogo kito roverii im̃auano nalo napano mia rola ea vio nalo na, mia maka ajikia averii niegeniege kito ka roju rabarvar kito ka m̃arati napano miyotuba ea toro dolu kiano tiniavio! Ea bogo na, mia amijikia ka roju roberii m̃arati napano miyotuba ea kiado tiniavio napano kito ga roba romebijaio.

<sup>17</sup> Jidomiano nalo nei abo laka, ana bova ver robe m̃arou ka vite tai napano romilaio, bior napano Niosi Lu berenio ruei, berinavo

*Toro napano jidom ve m̃arou ka vite tai, monoka ve m̃arou ka venia ga napano Atua milaio.* Jer 9:24

<sup>18</sup> A bova kito roiaia kito bereio, bior toro na bo be riano, maka nina napano naio bereio ga ber ka naio bo, ana naio be naina napano Atua ga ber ka naio bo.

## 11

*Tomu na Korin ajakisor atevi sibiriano nalo*

<sup>1</sup> Peli kamiu kubuluku iliano tealo napano nobivitauia ruei, kuber ðeli nomil vovu, mia nojidom kuvila kenemiu jidomiano rive terebievi kija van kiniou, ana mia nala von never tealo lie bereio. <sup>2</sup> Monoka never iliano nalo nei bior napano bogo nonovio nojo nojidomii laka ka kamiu. Mia never tibe nei, never nemial kamiu jibe kube kiaku niatira novo tai, napano neberkarikoio ka risoro ka koano napano Kristo. Nomijog jibe nomijukua vatitig ka kamiu, nojidom novitkar vatitig kamiu ka kuve riano ea verikariano nei, a nina jibe bunu Atua, napano naio mijukua vatitig ka kito, maka sidom ka rotuvan naio rava iorou bereio. <sup>3</sup> Mia kiniou bunu nomerou kija ver toro dolu rimeii rivuru kenemiu jidomiano riva ve dolu bereio. Jibe nua na, maro nei binimeii mila sibilili tira nei Iv, mila vonvon vatitig naio mila mijorou ea kariano, naruei maka nosidom leleio

ka bogo tai kamiu kuve riano re bunu ea Kristo, tiniemi tii vatitig re bunu naio ga ve takurano.

<sup>4</sup> Neber jibe na bior napano nobitilubar pariparimiu kija rui. Bogo napano verialiano tai binimei berii Yesu dolu tai napano maka Yesu na kito romiololu kano, a vonganei ga kamiu kumoneaio. A bogo napano niununo dolu tai maluvo ea kamiu napano maka Niununo na Atua jiano, kamiu kuviako kirisopeli ka kuvuiduo. Peli bogo na mia Ioluanu Vou dolu tai rimalmaluvo ea kamiu, nemijikia ka mia kuvisaaro ka kuvijogkar naio tibe na ga. <sup>5</sup> Atevi dolu nalo aju amila sibi vatitig ban kamiu ka vite nalo nei, mia nemial ka kumitu kumisidomii mave laka kalo. Kamiu kumila jibe napano nalo ga abe atevi na kiado yetemeriba nei, a kumitu kumidu kiniou nojo yetano, naruei maka nosidomii ka nina naio memedu. <sup>6</sup> Ee, nemijikia ka tomu tealo aber ka kiniou maka nejikia noioliolu rivu laka, ana nemijikia ka maka tai napano mijikia vite laka lie ka kiniou, mia neberiana kamiu kubitilubar vite na rui, bior jo maluvo binimei meravo bo ea infauno nonovio napano nomiŋaukanio ea miremiu.

<sup>7</sup> Kiniou nemijikia ka ea tivelinio na abarvar veru nei, tomu tealo maka asaaro kano leleio, mia maka nejikia bior vaio jibe na. Peli nalo aberiana nobika veru nei ka ve kiaku ga? Mia makano, bior bogo napano nebinimei nomioliolu ka Atua kiano Ioluanu Vou ban kamiu, maka lele never ka kamiu kuvisian vite tai van kiniou. Nomidu kiniou nojo yetano garuei, ka nemijikia nodu bulag kamiu rivavin, mia peli kamiu tealo tiniemiu jer kiniou ka nomila jibe na? Peli kuber kiniou namila bova ka maka novika vite ninio den kamiu ea bogo na? <sup>8</sup> Nemijikia never rimemedu van kamiu ka bogo na, namoneano dolu nalo aju ajian jidomiano binimei ka aija kiniou, a nojo nojen veru nene ga bogo napano nomiŋau ea kamiu. Mia maka nala vite novo tai vanlo ea bogo na, naruei nomijog jibe ka nobena ka kialo veru ga. <sup>9</sup> A bogo napano nojo bija kamiu, juŋaku bulati o-o, mia kuruaku nalo juo na abinimei Masetonia abitilubario napano nojo nemije jaleano jibe na, ana abitkar vatitig kiniou. Maka lele nemei neteg van kam tai rivior vite tai, a neberkar ka mia maka lele nejikia nala niegeniege kamiu napano nomiyuku kamiu ka monoka kuvila tibe nei peli tibe na van kiniou.

<sup>10</sup> Neberkar jibe nei bior napano tinieku m̄aro ka tomu nalo aju amil niegeniege

aber ka jijer kiniou bior kialo veru, a mia neverial kiaku verikariano nei ea vio nonovio nalo ea tanobuku na Akaia. Maka lele nomerou, bior neber kar ea Kristo siano napano kiano ilirianiano joa kiniou ka mia nala garuei. <sup>11</sup> Naruei bogo napano neber jibe na, peli tomu tealo mia aver ka kiniou nojidom nala niegeniege siemi ga, peli aber ka maka tinieku tii kamiu, mia maka tibe na leleio. Atua mijikia vatitigio ka tinieku jii kamiu toru laka. <sup>12</sup> Mia monoka nosikili ga ka verikariano napano nojo neberio, mia monoka nala ga, bior napano nojidom nouein nalo dolu nei kialo sebi napano aju abarvar kalo janea vio jibe na. Nalo aju amila von ka aber ban kamiu aber nalo amirŋau vio takurano bija kumemi, aju amila infauno napano bare ga ka nana numitu numilaio, mia maka tibe na.

<sup>13</sup> Tomu nalo na jibe na, abe atevi sibi-biano nalo ga, amirŋau maka rimemedu leleio, mia aju amila vonvon kamiu namoneano nalo, jibe abar Kristo kiano atevi riano nalo miralo. <sup>14</sup> Mia monoka roilo re napano amila jibe na, bior ka kialo toro na toru nei napano Siŋaro, naio bunu jo mila jibe na rui. Naio mijikia rila ka nailiano novo tai na yulu, <sup>15</sup> naruei romialio ka tomu nalo na kiano infauno abilivilig tomu nalo bunu, amila lo jibe tomu nalo na infauno na bajago memedu. Mia bogo na, romijikia ka mia avano ga abisi ea vio napano memedu ga ka kialo infauno va nalo.

<sup>16</sup> Mia jibe na napano neberenio rui, maka nosidom ka noil tibe na ana mila na tealo aber ka nomiovovu, mia ver asidom averenio, kuvituvanlo averenio. Mia ver tibe na, bo ka ala ka kiniou tibe napano amila ka vovu nalo, ka atukovio re ka kiniou beamu, mia atuvan kiniou ka never venia napano nojidom neverenio. <sup>17</sup> Bogo napano nojo noberii kenememi infauno, ver nojo nomil m̄arou laka kano, rila ka be riano ka nojo nomil vovu ga na, a mia Tubo saaro re kano. <sup>18</sup> Maka rivu roil m̄arou laka, mia kiniou maka netibe ka kulo dolu nalo napano aju amil m̄arou ea kialo vite nalo na yetemeriba nei, bior napano ver noil m̄arou, nojo neberii vite novo nalo ga. <sup>19</sup> A nomialio napano kamiu kumitu tiniemiu jii tomu dolu nalo napano kuber peli abe vovu, bior napano kubitiilo abe dolu, nalo maka avokar masouano rivu nei napano kumisidomii kuber kuvitoaio. Mia ver kuvisidomii kuver kiniou bunu nomiovovu, bior vaio kamiu maka kuvijikia kuvila kenemi jidomiano ve tebievi kija ea kiniou bunu?



<sup>20</sup> Kiniou nomial ka kamiu kumitu-  
van ban atevi sibisibiano dolu nalo nei  
ka ala vite va ve miroano van kamiu.  
Amila jibe ka kamiu kialo tomu nalo na  
iñauano, nalo amila niegeniege kamiu,  
abar kenemiu saba nalo, amidulo aju mave  
ka kamiu, a ver asidom amijikia ajuba  
miremiu. Kamiu kumitu kumituvanlo  
amila jibe na, mia jurñabe? Bogo napano  
neber iliano tai ga, bior vaio maka ku-  
visidom kuvijog leleio? <sup>21</sup> Peli bo kanio  
ver kiniou bunu nojo ga nomila bajago  
ninio nalo jibe nei ban kamiu, ðeli mia  
rila kamiu kuvisaaro ga ka kiniou? Mia  
aua, ðeli nomelukluku laka, maka navare  
ka nala nina na.

Bo ga, nober iliano na, nomijikia ka  
tomu tealo mia aver ka nojo nomil vovu  
bereio. Mia nejidom never ka verver  
atevi dolu nalo nei ajidomii aber amijikia  
ailivarvar bior napano aber vite tealo ea  
tivelinio na nalo abo, mia kiniou bunu  
nomijikia noilivarvar ka vite nalo na.  
<sup>22</sup> Ver atu adu bulaglo mave ka abe Ipru,  
mia kiniou bunu nobe Ipru. Ver avitiri  
bulaglo aver nalo abe tomu na tanobuku  
na Israel, mia kiniou bunu tena vio na.  
Ver adulo atu mave bior napano aber  
ka nalo memedu ka Epraamo kanano  
taara, mia kiniou bunu nobe taara nene.  
<sup>23</sup> A mia novika vikadeniano van kamiu  
vonganei, neber nalo na amirñau Kristo  
kiano ba bokar iñauano napano kiniou  
nomirñaukanio? Makanio, neber ðeli kin-  
iou nomila bo lie loa ka nalo. Maka rivu  
noto noverii kiniou bereio tibe na, mia  
pariparimiu kirisikili laka mila na kiniou  
bunu vaataro paripariku rive vovu, ana  
nojumolu nomil jibe na. Mia vite na be  
riano laka, napano nomila iñauano na  
tortoru nalo loa kalo, tomu na tortoru  
abuku kiniou ea nalakoiano va miroano  
jovulu lo, abitiv kiniou va vio maka nejikia  
novolukuio, a bogo miroano bunu napano  
ka mia namaro ga. <sup>24</sup> Kiniou nemijikia ka  
va jimo ruei, tomu na tortoru na kulo Ju  
nalo abitiv kiniou napano ea va teraku-  
rano ea va jimo nei, teli jaburu ea niabeku  
va duelimo va rolu ba koveri [39]. Maka  
ajamo ka alaio riva rivokar va duelimo va  
veri [40], bior verver makanio, nina tena  
mãariano ga. <sup>25</sup> Mia va rolu amue kiniou  
ka iesi nalo, a bogo tai bereio ajuba kiniou  
banbano-o vaataro ka namaro. Va rolu  
ruei nojoa tei uako madudu, a ea bogo nalo  
na tai, nojo nemialolo ea tei bogiano mo-  
mou tai a legiano momou bereio. <sup>26</sup> Kiaku  
ieliano nalo terebievi miroano laka, a ea  
bogo nalo na nobinua bogokouo telabo na  
mãariano. Uei nalo na bolu nalo vaataro

ka adular kiniou, tomu na amue van toro  
amijil kiniou, kiaku tomu nalo ga jibe Ju  
nalo amilkuei kiniou, a nalo napano maka  
ave Ju amila bulag kiniou bunu. Kiniou  
naban ea vio vabe, jibe ea komeli, ðeli  
yeturu, ðeli ea tei, mia nubinua bogokouo,  
a bogo nonovio, kuruado sibisibiano nalo  
nei aju amilkuei kiniou. <sup>27</sup> Bogo nonovio  
nabano bija iñauano kouo a bogokouo,  
napano maka nejikia nomonmelio, na-  
pano midoujer laka kiniou a jijer kiniou  
napano sinaniano maka leleio, a naban  
napano maka noial vio na notoluku eaio  
ka buruñara vio menini. <sup>28</sup> A mave  
ka bogokouo nalo nei, bogo nonovio ga  
nojo nojidomii laka ka kiaku iñauano  
bija namoneano lu nalo, napano jibe vite  
tai napano teremi mia teremi ka kiaku  
meuliano. <sup>29</sup> A nojo nojidomii kamiu  
laka bunu, napano ver neial ka kamiu  
namoneano tai rime melmeluku, mia mila  
napano tinioku m̃aro laka garuei, a ver  
nojog ka tai mijoru ea kariano, mia rila  
napano tinioku mijalele laka.

<sup>30</sup> Naina naruei vovaiano ninio nalo  
napano nojo nobinuaio, a nomialio ka  
nomelmeluku laka ka nola Tubo kiano  
iñauano, a maka nola vite novo tai ka  
noilivarvar kanio, mila na noilivarvar ka  
bogokouo nalo nei napano nebinuaio. <sup>31</sup> A  
kiado Atua, napano naio be Yesu Tubo  
karamãano, napano mia roiaia siano to  
toboto naio, mijikia ka maka nala sibi, vite  
nalo na napano nojo neberenio abe riano  
nonovio ga.

<sup>32</sup> A jogvaiano toru dolu tai bereio na-  
pano nobinuaio, napano maka noverio  
mave ea vio nei, nina ea bogo napano  
naban ea komeli na toru nei Damaskas.  
Ea bogo na, parinio tubo na tanobuku  
nei naio be toro nei Aretas, a kiano toro  
na toru napano bitirilar naio ka vitikar  
komeli nei, jidom rivakar kiniou, naruei  
miila kiano menumia nalo aba ajuko mo-  
rouo nonovio na vio na ka maka nejikia  
novuro. <sup>33</sup> Vaataro ka avokar kiniou,  
mia bilbilu tealo amijia kiniou amiduvan  
kiniou joomo ea burumãara basaro tai,  
ana amiorkar teli eaio ajikili aju mave  
ea burumãara basio na vio na, ajuar-  
vanio melmelumu tavio ka basio, batove  
bokar yetano ana nomoluo den basaro nei  
noburo denlo nabano.

## 12

*Vite nalo napano Pol bitii ea  
monovovuano*

<sup>1</sup> Bo ga, nemial ka ver nojo noberii  
kiniou jibe nei kia ga vo, mia maka

nejikia nevilig kenemiu jidomiano rimeiri rivu ka kiniou bereio, mia bo ga na, nomijog jibe nojidom neiasol iliano bereio ka neverii vite nalo napano nemialio a vite nalo napano Tubo jiloglogio ka kiniou ea monovovvano nalo. <sup>2</sup> A mia nojukunu ka Kristo kiano toro tai beamu, napano nomijikia vatitig naio, napano yuka duelimo ba veri [14] barlaka ruei bokar vonganei, naio jo mia jabujo ka aburu naio ba miyotuba mave ea vio soři tai mave. Maka nejikia ka naio ban bija mokotenano nonovio řeli ga mijikiaio. <sup>3</sup> Buriakurano napano ver naio rivan ea mokotenano řeli rivan ea niununo ga, nomijikia ka be riano, toro na ba mijaka bitii joomo ea kiado vonuo novo ea vio na. <sup>4</sup> Naio mijog vite miroano napano maka ka averialio bereio, napano maka bunu iliano nalo na yetemeriba nei tai napano vare ka averiio.

<sup>5</sup> Naruei bogo napano neberii toro nei, řeli kumiilo, kuber ka toro nei, be riano ga na, nina toro tai na. Mia řunabe, ver never ka maka toro dolu, mia nojo noberii kiniou ga, řeli mia kamiu kuver von ka nina maka vite tai ga na? Tibe na, nomial ka ver nojidom noil řnelea ka vite na tortoru tealu van kamiu, bo ka neverii ea toro dolu siano ga, ka kuvisaaro ka kumoneaio, mia ea siaku, noverii vonvon kiaku vite nalo na tertelisu ga. <sup>6</sup> A mia ver nojidom noil řnarou ka vite na tortoru nalo napano nomilaio, mia toro tai re rijikia river ka kiniou nojo nomil vovu, bior vite nalo abiniu abe riano. Mia maka nosidom noil laka ka vite nalo na tibe na, bior napano bova nomila von ka nala kamiu kuvidu kiniou noto mave rivior vite tealu napano maka kuvialio kija a maka kuvijogio kija, mia kiniou ga nojo noberii. Kiniou nojidom ka kuvitu kuvitii kiniou ea iřnauno venia napano kumial nomilaio ka kamiu, a ea iliano venia napano neberio ka kamiu.

<sup>7</sup> A nemial jibe Atua bunu maka sidom ka kiaku jidomiano rimeiri to mave laka ea monovovvano nalo a vite nalo napano naio jo berialio ban kiniou, ana naio jian jaleleano tai joa mokotenaku napano nomijog jibe nionoti molu tai napano Siřaro jo julu kiniou bijaio julaka, napano jo mila mokotenaku mijalele, a jo mila kiaku jidomiano jo ga yetano. <sup>8</sup> Kiniou nebika den Tubo ka ridular vite nei den mokotenaku, ana maka rilaio, kario valuo nene nobolkouo ka naio biorio, kario varolu nene bereio, mia maka garuei, <sup>9</sup> naruei naio mil ban kiniou ga, ber jibe nei ber "Mia kiaku tinietiano ga bare ka rivokar vatitigso, bior napano kiaku moroano mijikia řiřau ve toru lie bogo napano řiřau rivija kiamo meluklukuano."

Iliano nei naruei mila na kiniou nojaaro ka noverii kiniou lie bereio, mia noverii kiaku meluklukuano nalo ga, ka rila na Kristo kiano moroano mijikia řiřau lie ve toru ea kiniou, jibe napano naio berenio. <sup>10</sup> Tibe na, ka rila na siano rimeiri ve toru lie, nomijamo ga ka neber nojaaro ka meluklukuano nalo ajua mokotenaku, řeli ka avitii kiniou rivova, řeli nobinua bogokouo nalo, řeli amila bulag kiniou, řeli nubardulu jaleleano nalo, bior napano nomijikia ka bogo na nomelmeluku, Kristo naruei mia rila kiniou nesikili.

<sup>11</sup> Banalo! Nojidomii iliano nalo napano neber bulagio ban kamiu ea vio nei, nomialio ka be riano, nojo nomil jibe nomiaovovu laka. Kamiu kuviekokoa kiniou, mia bo ka kuviti-lubar bunu ka kamiu naruei kumila kiniou jibe na. Neber řeli mia kamiu naruei kuvitu kuverii vatitig kiniou, napano kumisaaro ka vite novnovo nalo napano nomila ban kamiu ruei, mia makanio, kumitu kuberii niegeniege kiniou ga. Nemijikia ka kiniou nebe iakurano ga, mia neber řeli maka nobova loa atevi sibiribiano dolu nalo, naruei bior vaio kamiu kumitu kumiaia laka nalo?

<sup>12</sup> Bo ka kuvisidomii bereio vite nalo napano nomilaio iviso kean kamiu, napano aberialio ka kiniou naruei robe atevi riano. Bogo nonovio ga, kiaku jidomiano tebievi bo ka noiriřau melmelumu vija kamiu, a nomila kamiu amial vresiano nalo, bija vite nalo na iloiano, bija kijokijo nalo na Atua kiano moroano. <sup>13</sup> Nemila vite nonovio ban kamiu bo laka, beverare ga ka venia napano nomila ban namoneano lu dolu nalo, naruei maka ail muriiio, mia kamiu kumil muriiio. Vite tai ga napano nomilaio banlo, a maka nala van kamiu, maka nevika ka kuvitu kuvitakar kiniou řeli kuvijai kiniou, jibe napano nalo amila ruei, mia řeli ea vio na naruei nomila bova? Ver tibe na, kamiu kuviekokoa kiniou, bior napano řeli ver kiniou novika vite ve miroano ruei den kamiu mia kamiu, kuvisaaro ga ka kiniou naruei?

<sup>14</sup> Bo ga, vonganei naruei nojo ka noviedu noial kamiu bereio, napano varolu nene naruei. Kiniou neberkar ka mia nola re buririřauno van kamiu, bior napano maka noviedu ka kenemiu vite nalo na aija kiniou, mia nevedu ka kiniou naruei neiija kamiu. Nina jibe teta nalo a nena nalo bija kialo kiritete nalo, napano maka kiritete likiliki nalo kialo iřnauno ka avitakar kialo tormoru nalo, mia tomoru nalo naruei monoka avitakar vatitig kialo kiritete nalo. <sup>15</sup> Naruei jibe na, kiniou najaaro ga ka nesian kiaku vite nonovio, vija kiaku meuliano bunu, ka

rijai kamiu. Nemijikia nala tibe na bior napano tinioku jii kamiu laka, mia nomi-jog kirivova bior napano nominal ka bogo napano kiaku tinietiano ea kamiu jo bavin lie, mia kenemiu tinietiano ea kiniou jo batove ga. <sup>16</sup> Kiniou neber jibe na bior napano nomijog kenemiu iliano dolu tai ruei. Kamiu kubitilubar ka bogo napano nojo bija kamiu, maka nala burimauano ka kamiu ka kuvitikar kiniou, a maka nesen kenemiu veru leleio, mia jidomiano tai joa kamiu kia ga. Kuber kiniou nebe masou vatitig ka bajago nalo na ala sibilili toro, naruei kumitu kuber nojo nomila lukua m̄arabo tai ka nola sibilili kamiu bior kenemiu togogo nalo. <sup>17</sup> Mia maka tibe na leleio. Kamiu kuvila von kuvisidomii vatitig ka nalo napano nojo nomilalo ka aviedu kean kamiu. Kumial napano amila niegeniege kamiu ka vite tai, p̄eli abar kenemiu vite nalo tealo be kiaku? Neber p̄eli makanio. <sup>18</sup> A jum̄abe bunu bogo napano nojikili ka Taitas ka naio naliko kuruado dolu nei, naljuo monoka ayotuba kean kamiu? Kumialio ka amila sibilisi ka kamiu ka kenemiu veru tealo? Maka leleio, bior napano kumemi jibe taara takurano ga, napano Niununo takurano ga joa kumemi, a kumemi numitu numitakii m̄arabo tai na im̄auano ga, napano maka leleio nuvisidomii ka nuvila Tubo kiano im̄auano ka nuvar saba ve kenememi.

*Pol jidomii laka ka bogo napano riva Korin mia tum̄abe?*

<sup>19</sup> Kiniou nojo noberii kiaku im̄auano jibe na, p̄eli kamiu kuber p̄eli nojo nomila von ka nodular siaku mave ea miremiu ka rila kamiu kuvisidomii re rivova ka kiniou. Mia makanio, maka noto tinioku maio ka kiniou, mia nojo tinioku maio ga ka kamiu, a iliano nalo napano neberio, neberenio jibe Kristo kiano toro tai, ea Atua mirano, ka rijai kenemiu meuliano nalo. <sup>20</sup> Neber iliano nalo nei bior napano nomerou laka ka maka rivu kiniou namaluvo kean kamiu, ana noial ka kamiu kumitu ea vio tai napano maka rivu leleio ea kiaku jidomiano, a nomerou bunu ka maka rivova ka kamiu maka kuvisidom kiniou. Ver tibe na mijikia rila ka kito rala baravo ka kito, p̄eli rosidomii rivova kean kito, p̄eli tiniedo seri kito, p̄eli rosidomii re toro dolu mia rosidomii kito ga veve terakurano bereio. Ea bogo na jibe na toro mijikia rioliolu, mijikia ril ea toro dolu, mijikia ril varvar, a mijikia rila yotubaiano laka. Ver rivan tibe na, bova ga ruei. <sup>21</sup> A nomerou laka bunu ka bogo napano noviedu bereio ea kamiu na mia nominal napano kiaku im̄auano nalo ea kamiu ajibirbil vatitig garuei. Ver tibe na, mia

rila noimou laka ea Atua, rila kiniou nojog ka naio burudobi kiniou toru ea miremiu. Mia nominal ka mia monoka tibe na ga, bior napano burum̄ara kariano napano kamiu tealoaju amilaio, naio be bajago va tai na siakaiano napano amila korov tuboiano na Atua midu jo ka toro a tira monoka atakio, a nalo maka aviliglo kanio leleio, a kuvitu kuvituvanlo ga ka nalo atu alaio rivano.

## 13

*Iliano maaro na rilabonlo*

<sup>1</sup> Bilbilu nalo, jibe napano neberenio, nina naruei ieliano varolu napano mia nala ka nevedu ea kamiu, a p̄eli mia bogo varolu na monoka noil van kamiu ka jaleleano nei. Nina mila kiniou nojidomii iliano tai ea Vivitauiano Lu nalo napano berenio jibe nei, ber

*“Bogo napano amil ban toro tai ea komeli ka kariano tai,*

*monoka ve juo p̄eli ve tolu napano amijikia averial kiano kariano, ka rila avitii ve riano.”* Tiut 19:15

<sup>2</sup> Kiniou nojidomiiar nina bior ka bogo na nomaluvo kean kamiu ea bogo valuo nene nua na, nomil ban kenemiu tom juo napano amila kariano nei, naina naruei bogo moti napano nomil banlo jibe na. A vonganei nojo nomil valuo nene bereio ea m̄esi nei, a ver nomei noil bereio, nina mila varolu nene. A kiniou nojidom never ka nalo nei, vija nalo dolu napanoaju tivelinio na nalo, ver nomei noil bereio, nina mia tinioku tii re lo, mia notiburelo ka vironiano na jikili tai. <sup>3</sup> Kamiu kumitu kuber bo ka kiniou noverial kija kiniou ka be riano ka Kristo jo mil riano ea kiaku iliano nalo, ana ver kamiu kuvisidom tibe na, bo ka kamiu kumei kuviagago ka kiniou ea bogo na, naruei mia kamiu kuvialio. Mia kuvitii ka bogo napano Kristo jidom rila kiano im̄auano ea kamiu, naio maka lele melmeluku, a mia mijikia rin̄iau vija kiano moroano nonovio. <sup>4</sup> Bogo napano ajukar naio m̄aro ea m̄akolkolo, romial ka mokotenano binime melukluku garuei, mia bogo napano naio jumolu meul bereio, naio bujo vatitig ka Atua kiano moroano nonovio. A kumemi numelmeluku bunu javukia naio, mia bogo na numila kiano im̄auano ka rijai kamiu, numitu numim̄iau bija moroano napano Atua mijamo ka ban kumemi.

<sup>5</sup> Kiniou nojidom nover bunu ka nominal napano kumitu kumitibure kiniou laka, ana jum̄abe, kamiu maka kuvijikia kuvitibure kija kamiu bereio, ka kenemiu viekouoiano jo jikili vatitig kiano p̄eli

juṁabe? Kuvitii vatitig kamiu, kumitu kubitilubar ka Yesu Kristo jo miṁau ea kenemiu meuliano kiano, ṗeli makanio? Vere-  
nio makanio, ṗeli tealo ajua meuliano napano Tubo maka leleio toaio, a nalo maka ave namoneano napano abe riano. <sup>6</sup> A ver bogo tai kuvisidom kuvitii veve kenememi meuliano bunu, mia bo ga, a nojidom laka ka mia kuvitilubar ka Tubo jo miṁau ea kenememi meuliano, naruei maka nuvila luvu niati nene tai. <sup>7</sup> A kumemi numitu nubolkouo ban Atua ka riṁau ea kenemiu meuliano ka kamiu bunu maka kuvilaluvu vite tai. Ver kamiu tibe na, mia mijikia rila siememi rivu bunu, bior napano kumemi naruei nuberloglog kamiu, mia kumemi maka nubolkouo ka kamiu bior siememi ga. Ver tomu nalo aial ka kumemi numiṁau bova juṁabe, nina naio bo ga, mia kenememi jidomiano na toru, numisidom ka kamiu monoka kuvitu kuvila rimemedu bogo nonovio. <sup>8</sup> A kumemi bunu, numisidom ka kenememi iṁauano nonovio bunu monoka memedu ga ea Tubo kiano ilirianiano, maka nuvisidom nuvila vite tai napano riuedom kiano ilirianiano nei bereio. <sup>9</sup> Kumemi numitu numiṁau kiano ga, naruei ver bogo tai rila numei numelmeluku, numisaaro ga, bior napano numijikia ka bogo napano numelmeluku, a kamiu kumitu kubinimei jikili. Numitu nubolkouo bior nina ga, ka mia kuvitu kumei rivu lie bogo nonovio. <sup>10</sup> Jidomiano nei naruei mila nobivitauiā miesi nei biedu ban kamiu vonganei ea bogo na nojo koalabo den kamiu kia ga. Kiniou nojidom kamiu kuvijogkario, a ver kuvilaio, mia bogo na noviedu, noil sikili re bunu van kamiu. Tubo midu kamiu kumitua juṁaku ka novitika kamiu, maka ka rila bulag kamiu, mia ka rila kamiu kuvavin mave. A ver noviedu a noial juṁabe, mia monoka nala sikili van kamiu ka venia ga memedu ka nalaio.

*Pol berenio bogiano bo kalo*

<sup>11</sup> Bilbilu nalo, nebinimei ea kiaku iliano maaro naruei, nober bogiano bo ga ban kamiu. Neber bo, kamiu kuvila von ka kuvila kenemiu māarabo rivu vatitigio. Kumonea vatitigio ea vite nalo napano nobika den kamiu. Kamiu nonovio kuberakar jidomiano novo tai ga. Kuvitu bo ga ea bajago na tuṁaro, naruei mia Atua na tiniememiano a tuṁaroiano to vija kamiu. <sup>12</sup> Bogo napano kumitu kubiviuo kamiu, kuvan jumemiu vatitig van kamiu, kuviniom babibiniomiu ea saariano lu. <sup>13</sup> Namoneano lu nalo na vio nei aber kialo bogiano bo binimei ban kamiu bunu.

<sup>14</sup> Naruei kiaku volkouano ka mia kiado Tubo Yesu Kristo kiano tiniememiano, bija

Atua kiano tinietiiano, bija voroniano na Niununo Lu, atu vija kamiu nonovio.  
Kiniou, Pol.

## Mesi Napano Pol Bivitauiaio Ban Namoneano Lu Nalo Na KALESIA Verialiano Moti

*Tukunuano bulati na niosi nei*

Kalesia, naio be tanobuku tai napano jo yetano ka Parinio Tubo na Romo, a joa venuo nei napano banei siano Teki.

Ea bogo na napano Yesu kiano tomu nalo ajikar ka aba aberiel ioluano vou nei, tomu telabo na maka ave kulo Israel, ajaaro toru laka kanio. Mia tomu tealoaju, napano ea kialo jidomiano, nalo aberinavo ver toro sidom rimei ve namoneano riano, naio monoka rimonea tuboiano napano Atua jianio ban Mosis. Naruei Pol milkuei kirsikili kean jidomiano na, berinavo bajago na maka rimemedu leleio. Naio berinavo ver toro sidom rivokar meuliano ea Kristo, burupati vite nei, naio monoka rimonea Kristo. Ea bajago na ga, tomu nalo amijikia amei memedu ea Atua mirano.

Mia ea yimo lu nalo na tanobuku nei Kalesia, tomu tealo abinimei,aju amilkuei Pol, nalo aberinavo ver toro jidom rimei rimemedu ea Atua mirano, naio monoka takisor Mosis kiano tuboiano nalo.

Mesi nei Pol jirio ba ban tomu nalo napanoaju ajakisor verloglogiano va nalo nei, ka rivurulo amei bereio ea moneano napano be riano a ea bajago napano memedu. Ea kiano tikariano na mēsi nei, naio berial ka naio be kiano meruoiano ka tomu nalo avio naio, ka Yesu Kristo kiano atevi. Naio judu berinavo tomu nalo maka adu meruoiano van naio ka naio rimei ve atevi, Atua naruei bitirilar naio, bio naio ka verial ioluano vou van tomu nalo napano maka ave taara na Israel. Mia naio jokia milkuei keano verloglogiano va nei, berinavo toro kiano moneano ga mijikia rila naio rimei memedu ea Atua mirano. Ea mirano nalo maariano na mēsi nei Pol berial ka bajago novo napano namoneano nalo ajunfa amilaio, miyotuba ea bajago napano toro tinien jii kuruano a kuvivinieno nalo, bior napano naio monea Kristo.

*Torogio nalo na niosi nei*

Iliano moti 1:1-10

Pol be kiano meruoiano bior napano naio be atevi tai 1:11—2:21

Atua jo miija kito ea kiano tinievuiano 3:1—4:31

Tomu nalo na moneano abinimei bo, mia ināuano jo kiaga 5:1—6:10

Iliano maariano 6:11-18

*Pol jikar kiano iliano banlo*

<sup>1-2</sup> Kiniou Pol nebitautaua mēsi nei biedu ban bagaro na moneano nalo ea tanobuku na vio Kalesia, mia kumemiliko kuruado nalo na vio nei, kumemi nubika den kamiu ka kamiu kumitu bo ga, pēli na kumitu junfabe? Kiniou nei naruei napano Yesu Kristo naljuo Atua karamādo, napano naio bitirilar Yesu bereio ea namāriano, naljuo nei abitirilar kiniou nebe atevi, jibe na ana mia maka ve toro napano bio kiniou, pēli na bitirilar kiniou jibe nei. Nao, mia monokanio kamiu kuviagago ka iliano nalo napano mia kiniou never ka kamiu.

<sup>3</sup> Nejidom mēlea ka mia Atua karamādo naljuo Tubo Yesu Kristo, nalo ve juo amidu tiniememiano bija tumāroiano ban kamiu.

<sup>4</sup> Nao, Yesu Kristo naio mila memedu ga jibe ka napano Atua karamādo jidomio, ka napano naio rijamo ka mia naio rimāro ka rila bulag kiado kariano nalo, ka mia naio mijikia rivuru bulag kito den bajago na bova na bogo nei napano kito rojuoio vonganei. <sup>5</sup> Mia tibe na, bo ka kito rodular Atua siano rivavin medave tulaka, rivano-o mia ribisi deio, ee mia tibe na.

*Ioluano Vou takurano ga*

<sup>6</sup> Kiniou nomiilo toru ka kamiu, napano Atua bio kamiu, a Kristo mila bo laka ban kamiu ruei, ana mia maka vesiou ga ana kuburo den Atua bereio ana kubokar iliano tai napano jibe ka Ioluano Vou dolu tai bereio. <sup>7</sup> Mia maka rijikia ve Ioluano Vou dolu bereio, mia be ga ioluano takurano ga na jo. Kiniou neberii jibe na, bior nomijog ka tomu tai ajunfa amila bilivilig kenemiu iviso nalo ka mia, nalo ajidom avilig Ioluano Vou na Kristo kiano rimei ve dolu. <sup>8</sup> Ana verenio kito tai, pēli na nailiano na vio mave, pēli na toro kei bereio, naio river lua lilianiano tai napano maka riveverare vija nana kumemi nuber lua ban kamiu nanua ruei, memedu ga ka toro nene avukuio rivan ea jeleig vio na jogvaiano. <sup>9</sup> Nao, neber iliano nei vaarakurano bereio ban kamiu, ka verenio toro tai kei napano rioliolu ka iliano tai napano be dolu ka ioluano napano kamiu kumiduio jukamu ruei, mia toro na aviron naio rivova laka ea sebi.

<sup>10</sup> ? Nemijikia ka tomu tai aber nieg-niege kiniou, aber nejidom ga tomu nalo ajog rivu ka kanaku iliano, mia kamiu kumijog kanaku iliano napano jikili nei junfabe? Peli mia, tomu tai tiniei ser kiniou kovioho! Mia bo ga, bior venia napano nojidomio, kiniou nejidom ga ka Atua naio saaro ka kanaku iliano, ka napano ver kiniou noto never lua ga ka mia tomu nalo aiaia kiniou kanio, jibe na maka bunu neve Kristo kiano toro na ināuano ve riano.

*Pol berii ka napano Atua bio naio*

<sup>11</sup> Kuruaku nalo a kuvivinioku nalo, monoka neverii rimeravo van kamiu, ka Ioluano Vou na nojomā neberii luaio, naio maka ve iliano tai napano toro ga to tikario. <sup>12</sup> Kiniou maka nejevio den toro tai, a maka toro tai riverloglog kiniou kanio, mia Yesu Kristo ga, naio jiloglog Ioluano Vou nei meravo ban kiniou.

<sup>13</sup> Nina jibe ka napano kamiu kumi-jog rui, ka beamu kanaku meuliano jumabe, ka bogo napano nojo joomo ea kenememi nalotvano kumemi kulo Ju. Ka bogo na kiniou tinioku jer bagaro na namoneano nalo na Yesu kiano toru laka bogo nonovio, ana nemijil lo nemila lelanlo napano mia maka leleio bunu tinioku riialo, bior nejidom ka mia namoneano nalo ta re bunu to. <sup>14</sup> Ka bogo na, najakii vatitig bajago na nalotvano napano kenememi kulo Ju, juvulu tomu dolu nalo na kumemiliko kenememi terati takurano ga, mia kiniou nabokar jikili iliano moruo nalo napano korobimemi nalo kanalo, napano tomu nalo aju ajakii binimej batove bokar banei.

<sup>15</sup> Kiniou nojomā nemila jibe na bano-o mia maka nejikia ka Atua naio berkar kiniou rui, bogo na maka nomoluo vo. Naruei ea ga kiano tiniememiano, naio bio kiniou ka neve kanano, a ea kiano jidomiano novo <sup>16</sup> naio miila kenerinio Yesu, maluvo ka kiniou ka nemijikia novitilubarario, ka nava noioliolu kanio van nalo napano maka ave kulo Ju. Ka bogo na, maka nava neial kulo dolu nalo ka mia novokar jikiaiano tai denlo tivelinio ka Ioluano Vou nei. <sup>17</sup> A maka navavin Yerusalemo bunu ka neial atevi nalo napano nalo abe atevi jukamu ka kiniou, ka nevika denlo, ka mia kiniou neioliolu ka venia, pelina kiniou neverial iliano tumabe? Makanio, maka nava nevika tibe na, bior Kristo naio mila vite nonovio meravo ban kiniou rui. Ka bogo na, najaluvo sopeli ga, naban yako laka ea buruvenuo na vio Arapia, mia iorou kanio ana nebinimej bereio, nemijaka garuei naban ea komeli na vio Tamaskas. <sup>18</sup> Karina iorou kanio napano yuka tolu barlaka bano, naruei ka bogo na ga, ana nabavin bereio Yerusalemo naba nemiadu ka Pitere, mia maka noto vija naio vesiou, nojo bogoti duelimo ba jimo [15] ga. <sup>19</sup> Mia ka bogo na maka neial atevi dolu nalo bunu, mia takurano ga na nemialio, nina kialo navurimaraboiano napano Yemesi ga, napano naio be kiado Tubo kurvano. <sup>20</sup> Nina naruei mia venia napano nojo neberii ka

kamiu naio be riano. Kiniou maka nala sibi, Atua naio mijikiaio.

<sup>21</sup> Tenene na naruei, nojo Yerusalemo jibe na maka bogo vesiou leleio. Ana karina nejeliviv ea vio nalo napano ea tanobuku juo napano Siria bija Silisia, <sup>22</sup> mila na ka bogo na, namoneano nalo na tanobuku dolu na mave ea vio Yutea, bija kiano komeli labo napano Yerusalemo, nalo na maka ajikia vatitig kiniou vo. <sup>23</sup> Nalo amijog ga vaio napano tomu nalo aju aberenio, aber "Toro nanua jomā mijil lelan kito vururua na, vonganei naio jomā mioliolu jikili ka kiado moneano nanua naio jomā milavio jikili ka ruedomio." <sup>24</sup> Ana bior vite na, nalo aju amidular Atua toru kario napano naio jo bilig kiaku meuliano jibe nei.

**2***Atevi dolu nalo abirokar naliko Pol*

<sup>1-2</sup> Bogo na yuka duelimo ba veri [14] barlaka bano, ana Atua jiloglog ka kiniou ber monoka navavin ea vio Yerusalemo bereio. Nomijog Atua mil jibe na ana kiniou Barnabas nubano, mia noburukar Taitas bunu binimej bija kumemi.

Kumemi nuboru Yerusalemo, ana numitutano ea vioriano tai napano kumemi liko ga tomu na tukamuanu na tumāro ga abinimej joomo eaio. Ea vioriano nei, neber bisivisii iliano nalo napano mā nojo nomioliolu kanio ban tomu nalo na maka ave kulo Ju. Neber bisivisii vatitig vite nalo nonovio nei napano nojomā nemilaio banlo, bior maka nesidom ka aver kiniou nemimāro maka rimemedu, ka mia nalo aitava re ea kanaku imāuano binimej bokar bogo nei, mila ana kanaku imāuano rimej ve iakurano bereio. <sup>3</sup> ? Beamu neberiamā mia nalo ail sikili ka kiniou, ka mia never tomu nalo na maka ave kulo Ju, monoka nalo bunu ava joomo, mia vioriano nei naio ber venia? Tivelinio ka kiaku bilbilu nei Taitas, naio maka ve toro Ju tai, naio be toro na vio Kris tai, napano naio maka riva joomo, mia maka nalo atutua naio ka aver naio monoka riva joomo. <sup>4</sup> Ea vioriano nei naio beve terakurano napano nalo ajidom ka Taitas riva joomo, ana mia namial nalo nei jibe ka napano aberenio nalo abe kurvado, mia nalo amila sibi ga. Nalo na abinimej joomo ea vioriano kar ga ajidom atuluku ga avitivii kumemi ga. Ajidom avitivitii kumemi tibe na bior nalo maka asaaro ka napano numitu nuberloglog ka kumemi numijurukar bija Yesu Kristo rui, ana na bajago moruo re nua maka bunu avokario

m̄lelea kumemi, mia kumemi nubisi kalo. Mia nalo nei maka asaaro ka kenememi iliano nalo, mia ajidom ala ka napano ka tuboiano na nalotvano na kulo Ju nalo kanalo monokanio rivokar kito novovio sikili dan̄ariga. <sup>5</sup> Mia kumemi numisidom nuvakar vatitig ilirianiano na Ioluano Vou, ka mia kamiu kumijikia kuvakario rimemedu ga, naruei nuburburelo, ana maka nuvijamo kalo leleio, napano aju ajidom ayuku kinimemi iliano rivatove.

<sup>6</sup> Ea vioriano nene, tomu nalo tai napano aberenio nalo abe navurim̄araboiano nalo, mia kiniou maka neial lerinio ealo ver abe tomu na tortoru nalo p̄eli na maka ave tomu na tortoru. Nina buriakurano ga na, bior Atua naio maka lele tovon sio nalo na jibe na. Mia navurim̄araboiano nalo na, maka lele averloglog kiniou ka vite vou tai leleio ka noioliolu kanio. <sup>7-8</sup> Makanio, maka tibe na. Nalo abitulubar ka Atua, ea ga kiano sikiliano, naio bitirilr kiniou ka mia neve atevi tai, ka mia neverial ioluano vou nei van nalo na maka ave kulo Ju nalo, jibe kanio napano ea kiano moroano bunu napano naio bitirilr Pitere ruei, ka naio bunu rive atevi tai ka naio riverial Lilianiano Vou van nalo napano abe kulo Ju nalo. <sup>9</sup> Naruei Yemesi naio Pitere a Jone, napano tomu nalo aberenio ka nalo ve tolu nei abe kialo navurim̄araboiano, nalo abitulubar ka Atua midu im̄auano maraiu nei joa jur̄naku ea kiano tiniememiano. Ana nalo tolu nei abinimej aban̄ur̄falo kumemliko Barnabas, jibe ka napano kumemi nube taara takurano kumemliko nalo, mia nubiniu numijamo ka nuvitibure im̄auano nalo, jibe ka napano mia kumemi ve juo nuva nuviololu ea vio nalo na tomu nalo napano maka ave kulo Ju, a mia nalo avan aioliolu ea kulo Ju nalo kialo vio. <sup>10</sup> Mia nalo na amijev iliano takurano ga ban kumemi juo, aber monoka kumemi juo tiniememi rimaio ka kanalo talir̄nasa nalo yako Yerusalemo, ka mia nuvijailo, mia nina be itai napano nejidomii bogbe ruei ka mia neīm̄aukanio tibena.

### *Pol berbure Pitere jikili*

<sup>11</sup> Iorou ka nina, kiniou nabatove bereio, naba nojoa komeli napano Antioko, naruei ka bogo na Pitere naio malivo ka kumemi ea vio na, ana kiniou nejikil noju kamu ea namoneano nalo miralo, neberbure naio, bior meravo batitig ka vaio napano naio mila maka memedu. <sup>12</sup> Beamu, Pitere naio mila memedu ga, kanio napano naio jo jinan ga naliko kuruado nalo napano nalo maka ave kulo Ju, mia iorou kanio, Yemesi miila kiano tomu tai abinimej Yerusalemo, ana nalo amil ban Pitere, nalo ajur̄na aber

jibe nei aberinavo "Nalo napano maka ave kulo Ju, nalo bunu monoka avakuveulo, ver p̄eli, mia Atua maka rijikia rilarrurlo." Iliano nei maka takii vaio napano vioriano na toru nei berenio beamu, mia mila lelan Pitere kiano jidomiano, mila nalo merou, ana kario naio maka bunu saaro ka sinan vio takurano naliko namoneano nalo na napano maka avakuveulo. <sup>13</sup> Mia maka Pitere naio ve takurano, mia kuruado dolu nalo na vio na, napano nalo abe kulo Ju, binimej bokar Barnabas bunu, nalo na ajakisor Pitere ea jidomiano na merouano nei.

<sup>14</sup> Mia bogo napano nemial napano nalo aju amiel jibe na ea m̄arabo tai napano maka rimemedu tibe ka napano Lilianiano Vou naio berenio, nemil jikili ban Pitere ea nalo na miralo, neber jibe nei, neberenio "Pitere, be riano ka napano jau kobe toro re Ju, mia bo laka napano beamu ruei, jau kojo kojaaro ka nalo napano maka ave kulo Ju kialo bajago ruei, napano jau kojinan vio takurano kamliko ruei. ?Mia jur̄nabe naruei, ana jau kojidomii kotutua bereio nalo ka monoka atakii kiado bajago kulo Ju, napano jau kober nalo monoka avakuveulo?"

### *Kei napano verenio rimonea Yesu, Atua rilarrur naio*

<sup>15</sup> A ka bogo na, kiniou neber vatitig ka nalo jibe na neberinavo "Kito romiyotuba ea bajulukuti na kulo Ju, kito maka ve kulo dolu nalo, tibe ka nalo napano kulo Ju nalo aju ajidomii aber nalo amiagiago ga." <sup>16</sup> Makanio, kito robe kulo Ju memedu nei, mia vonganei, kito romijikia ruei, ka toro maka rijikia rimemedu vija Atua, napano naio jo mijogkar vatitig ga Mosis kanano tuboiano. Toro napano monea Yesu Kristo, naio ga mijikia rimemedu rivija Atua. Jidomiano nei naruei mila kito kulo Ju kito monoka romonea Yesu ga bunu, ka kito romemedu vija Atua. Kamiu monoka kuvijikia vatitig iliano napano Atua kiano iliano lu berenio, napano berinavo maka toro tai leleio napano rimemedu vija Atua bior naio jakii batitig tuboiano na.

<sup>17</sup> Mia kito kulo Ju nalo, kito roju rojidomii roberian̄a tuboiano nei mila kito romemedu kitoliko Atua ruei na, mia maka tibe na. Mia verenio be riano ka kito kulo Ju bunu, monoka romonea ga Yesu Kristo bunu ka romemedu kitoliko Atua, neber p̄eli tomu tealo amijog bova ka iliano nei. Peli nalo alavon ka aver iliano na mila ana kito kulo Ju robinimej robe tomu na kariano beberare ga tomu nalo napano maka ave kulo Ju. ?Ana p̄eli nalo amila von ka aver bunu ka tibe na, nina sano nene

berenio Kristo nei naruei mila kito kulo Ju robinimej robe tomu na kariano ga? Mia makanio, nina maka tibe na leleio garuei. <sup>18</sup> Nina bior nanua, kiniou nojoma nomue dodom bajago moruo na tuboiano na ruei, mia verenio vonganei nevitirilar bereio bajago na takiano na tuboiano moruo na, napano neberenio monoka ravakuveu a monoka rala tibe na tibe na ka romemedu vija Atua, nina mila ka beamu na, kiniou bunu nebe toro na nemilakorov tuboiano ruei. <sup>19</sup> Ee, tuboiano na naio jidom rila ka kiniou namaro, mia vonganei tuboiano na naio javukia tasinaro tai ga ea kiniou, kiniou nebisi eaio ruei. Kiniou nojuvan tuboiano na ruei, kanio kanaku meuliano toa ga Atua. <sup>20</sup> A vonganei, maka bunu ve kiniou napano nojo nemeul, mia Kristo naio jo meul ea kiniou, mia kanaku meuliano na vonganei, naio moluo bior napano nomonea Atua Kenerinio, napano naio tinien mia kiniou toru laka, naio mijamo ka kiano meuliano, naio mario kar kiniou. <sup>21</sup> Ea bajago na, romial Atua kiano tiniememiano toru laka, naruei maka nejikia nala kiano tiniememiano nei rimej rive vite kurano ga tai, bior ver toro mijikia rimej memedu vija Atua bior ga naio mijogkar tuboiano, nana jibe na jibe Kristo naio mario kar iakurano ga.

### 3

#### *Kulo Kalesia amilaluvu m̄arabo*

<sup>1</sup> Kiniou nemial kamiu kulo Kalesia jibe ka pariparimiu amiauvovu ga. ?Peli tomu nalo tai amila mali ea kamiu bo, tenene kamiu kubano kumilaluvu m̄arabo? Neberial meravo ea miremiu ruei, ka jumabe ana Yesu Kristo naio mario ea m̄akolkolo, mia vonganei kamiu kuba kube dolu bereio. <sup>2</sup> Kiniou nejidom nevika vikadeniano tai van kamiu beamu vo. Vikadeniano nene jibe nei “?Kamiu nanua kumijev Niununo Lu ruei, kumijevio kar vaio? ?Kumijevio bior kumonea Mosis kiano tuboiano nalo na?” Makanio, kamiu kumijevio kar ga kumijog Ioluano Vou ana kumitu kumoneaio. <sup>3</sup> ?Kamiu kubitikar kenemiu meuli-ano vou bija Kristo ea moroano na Atua kiano Niununo Lu, mia vonganei ana kumisidom ka kuvila nonovio ea kenemiu moroano ga? Maka leleio, kamiu kumiauvovu tanea ga ruei. <sup>4,5</sup> Ea kenemiu meuliano vou nene, vite novo telabo amaluvu ka kamiu ruei, jibe ka napano Atua mijev kanano Niununo Lu ban kamiu, mia naio jo mila jamerijano nalo ea miremiu, mia jumabe, peli kamiu maka kuvitilubar vo ka vite nalo na abinimej ea kamiu kar venia? Monoka

kuvijikia vatitig ka Atua mila jibe na, maka rivior kumitakii tuboiano, mia kar ga beamu kamiu kumijog Ioluano Vou, mia bogo napano kumijogio ana kumoneaio.

*?Vaio naio bo? ?Tuboiano, peli viek-ouoiano ea Kristo?*

<sup>6</sup> Kamiu kuvisidomii von tormoruo Epraamo napano Atua kiano Iliano Lu berii naio, ber

*“Bior ka napano naio barkar tinieno ea Atua, ana na naio binimej memedu bija Atua.”*  
Jen 15:6

<sup>7</sup> Mia tomu nalo na abinimej iorou napano abarkar tinielo ea Atua jibe na, nalo abe tormoruo Epraamo kiano bajulukuti nalo memedu. <sup>8</sup> Bior Atua kiano Iliano Lu berial Ioluano Vou nei nuanua laka ruei, napano naio berii Epraamo berenio

*“Ea jau mia Atua rilivu ka yati na tomu nalo nonovio na vio yetemeriba nei.”*

Takii iliano nei, Iliano Lu berkario bunu ruei berinavo mia Atua to rila nalo na maka ave Ju mia amemedu naliko, verenio avarkar tinielo ea naio. <sup>9</sup> Ana na nalo napano abarkar tinielo ea Atua jibe na, mia naio jo milivu kalo vonganei, jibe kanio napano naio milivu ka tormoruo Epraamo re nua, ka naio barkar tinieno eaio.

<sup>10</sup> Mia nalo napano aju ajidom kavulio ka amijikia avokar meuliano bior amila von ka amonea tuboiano nalo, nalo na ajutan ka vironiano tai ruei, bior maka toro tai napano naio ridukar vatitig tuboiano nalo nei riviniu, ana Atua kiano iliano lu berenio,

*“Tomu nalo napano maka amonea vite nalo nonovio napano ajua niosi na tuboiano, mia nalo monokanio avokar vironiano.”*

<sup>11</sup> Tenene na meravo vatitig ban kito ka napano maka toro rijikia rimej rimemedu vija Atua kar ga naio monea tuboiano na, mia jibe ka Atua kiano Iliano Lu berenio, napano berinavo

*“Toro napano memedu bija Atua kar ga barkar tiniene ea Atua, naio ga mijikia rimeul.”*

<sup>12</sup> Iliano nei naruei naio berii bajago na viekouoiano, mia romijikia reial bajago na viekouoiano nei vija bajago na moneano na tuboiano, naljuo maka aveverare leleio. Nina bior bajago na moneano na tuboiano, naio jumolu jua nivelinio vite nalo napano toro ga mijikia miraukanio, jibe ka napano Iliano Lu berenio berinavo

*“Toro napano mila saba nalo nonovio napano tuboiano berenio, mia naio mijikia rivokar meuliano eaio.”*



<sup>13</sup> Mia maka ve kito tai napano rila novio vite nalo napano tuboiano bere-  
nio, ana tuboiano berkar vironiano bija  
m̄ariano ban kito robinu. Mia Kristo  
naruei naio binime buru bulag kito ruei  
den tibureiano nene, mijamo ka naio midu  
jeledo, ana naio ba jotan yetano kanio.  
Nina jibe ka napano Iliano Lu berenio,  
napano berinavo

*“Toro napano amiorkario jaklele ea iesi  
mave ka riñaro, amiorkar naio bior  
napano naio jotano yetano ka Atua  
kiano tibureiano.”*

<sup>14</sup> Kristo naio mijamo ka naio jibe na, ka  
tomu nalo napano maka ave kulo Ju, nalo  
amijikia avokar bunu ka ilivuiano nalo  
napano Atua berkario ban Epraamo, ana  
vite nei mila ana vonganei, kito napano ro-  
biekouo ea Kristo, romijikia rejev Niununo  
Lu napano Atua berkario ka mia rije van  
tomu nalo.

*Atua kiano verikariano binime  
jukamu, tuboiano binime iorou*

<sup>15</sup> Kuruaku nalo a kuvivinioku nalo, mia  
kiniou neverii tukunu tai ea kiado me-  
liano ga napano sano nene vaataro ka ga  
ea Atua kiano verikariano ban Epraamo.  
Verenio toro tai riverial kiano ilimaariano  
river bogo napano naio mia riñaro, mia  
kanano saba nalo monoka atibe nei atibe  
nei, naruei naio rila m̄esi tai ka river  
verikariano nei ka mia ver naio maro,  
mia toro dolu maka rijikia rudular kanano  
iliano, a maka rijikia tusolio. <sup>16</sup> Ana  
Atua mila kiano verikariano ea Epraamo,  
bija kiano bajulukuti. Iliano nei maka  
river ga ea tomu nalo napano ea kiano  
bajulukuti nalo, napano naio ber toro  
takurano ga, mia toro nene naruei naio be  
Kristo. <sup>17</sup> Kanaku iliano ea vio nei sano  
nene jibe nei. Beamu Atua birakar kialo  
virakariano nei jikili, naruei iorou kanio  
yuka duelimo toromomou veri duelimo va  
rolu [430] barlaka na tuboiano na Mosis  
kanano naio maluvo. Mia tuboiano nei  
naio maka rijikia rila korov verikariano  
nei, a maka rijikia riolkon bulag Atua  
kiano iliano. <sup>18</sup> Verenio ramijikia ravokar  
Atua kiano ilivuiano kar ga roju rajakii  
tuboiano napano naio binime iorou, nina  
jibe ka ber Atua kiano verikariano na jo  
jukamu naio bekurano ga. Mia romial  
Epraamo bokar Atua kiano ilivuiano nalo  
bior ga naio bokar Atua kiano verikariano  
bo, maka rivior tuboiano.

*Tuboiano naio be kiano iñauano jo*

<sup>19</sup> Bo ga, ana ðeli vikadeniano tai jo,  
napano berinavo “? Jibe na, Atua jian  
Mosis kiano tuboiano na kar vaio ðeli bior  
vaio?” Boga, kiniou neverenio ka kamiu

voniganei, ber Atua naio mijeduka bereio  
tuboiano nei mave ea kiano virakariano,  
ka rijai kito tomu nalo ka rovitilubar kiado  
kariano. Atua naio midu tuboiano nei ka  
tumolu tu rivano-o rivokar bogo napano  
toro napano naio be yati na Epraamo  
kiano bajulukuti, napano Atua berkario,  
rimoluo ea kito.

Mia romial napano tuboiano be kiano  
iñauano novo tai jo, mia kito monoka  
rosidomiikar tuboiano nei, ver bogo naio  
rimaluvo, naio rimee ea nailiano nalo  
tukamu, karina ajianio ban toro tai, naina  
be Mosis, ana naio bario binimee ban  
tomu nalo. Mia bogo napano Atua mila  
virokariano na bija Epraamo, nina maka  
tibe na. <sup>20</sup> Bogo na naliuo nei aju vio  
takurano, maka nailiano tai ðeli toro dolu  
tai napano jo iviso ka naljuo ka rivar  
iliano, mia Atua naio takurano ga berial  
kiano verikariano memedu ea Epraamo  
mirano.

<sup>21</sup> A nina maka river ka tuboiano  
rilavio ka riverbure Atua kiano verikar-  
iano, makanio. Ver Atua naio mijikia  
sian tuboiano dolu tai bereio napano ver  
kito rojogkar nonovio, ana mijikia rila  
kito romeul, ðeli naio jian tuboiano nene  
ban kito ruei ka romijikia romemedu vija  
naio naruei. <sup>22</sup> Mia maka titai tibe na,  
bior Iliano Lu naio berenio ruei ber kito  
nonovio rojutano ka moroano na kariano,  
kito roju romila korov tuboiano ga. Mia  
Atua kiano ilivuiano nalo napano berkar  
ka mia sianio, nalo amijikia amaluvo ea  
kito bior napano ga kito rabarkar tiniedo  
ea Yesu Kristo.

*Bogo na ravarkar tiniedo ea Kristo naio  
miyotuba ruei*

<sup>23</sup> Nanua ruei, binimee bokar vonganei  
napano romijikia rabarkar tiniedo ea  
Kristo, Mosis kiano tuboiano na naio joñã  
miadikar m̄elea kito, jibe ka napano rojua  
yimo na lakoiano ruei. <sup>24</sup> Tuboiano na  
naio jibe kanio jo bitikar kito, jibe kanio  
kiado naverloglogiano tai, binimee bokar  
bogo napano Kristo naio binimee, ka ea  
bogo na, romijikia ravarkar tiniedo ea  
naio ana romijikia romei romemedu vija  
Atua. <sup>25</sup> Mia vonganei, tuboiano na maka  
bunu rivitikar kito, bior bogo na napano  
ravarkar tiniedo ea Kristo miyotuba ruei.

*Kamiu nonovio kube takurano ea Kristo  
naruei*

<sup>26</sup> Ana bior napano kamiu kubarkar  
tiniemiu ea Kristo Yesu, kamiu nonovio  
kamliko naio kube Atua kenerinio nalo.  
<sup>27</sup> Abaruei ea kamiu ruei, ana kubinimee  
kube takurano bija naio, jibe kanio na-  
pano kumijev ko bajago novo nalo napano

Kristo kiano ea kamiu jibe kanio kumiya kuluniabemiu ko mokotenemiu. <sup>28</sup> Mia kamiu nonovio kubinimej kube takurano ga ea Kristo Yesu, mia jibe na naruei, kamiu nonovio kube veverare. Bokanio kito monoka rotiburevure re tomu nalo, rover ninei be toro Ju, mia nina be toro dolu ga, ħeli na rover ninei naio be toro na toru, mia nina be toro na iñauano ga, ħeli na rover ninei be toro na iñauano ga, ħeli na rover nina be toro na iñauano ga, ħeli na rover nina be surñano, ana ninei be tira ga. Mia bajago na monoka toa re bunu kamiu. <sup>29</sup> Mia bior kamiu kube Kristo kanano jibe na, kamiu naruei kube Epraamo kiano bajulukuti memedu, mia tibe na, ilivuiano nalo napano Atua naio berkario ka Epraamo kanano bajulukuti nalo, mia kamiu naruei kuvarilo.

#### 4

##### *Kito robe Atua kenerinio nalo*

<sup>1</sup> Naruei mia neil ta bunu vo ea bajago na kito ka nevisivisii lie vo ea tivelinio ka tuboiano na. Verenio toro tai, ana naio riñaro, mia kenerinio mijikia rivar kiano saba nalo. Mia ver kiritete nene naio telisu kia ga vo, mia naio maka rijikia rivitikar saba nalo nei. Mia jibe ka naio be karamñano kanano toro na iñauano ga, <sup>2</sup> ka mia naio monoka totano ka kulo dolu nalo ga juñalo, jibe ka karamñano dolu nalo, rivano-o rivokar bogo memedu napano karamñano berialio nua ruei ka mijikia rivitikar saba nalo na. <sup>3</sup> Ea kito naio jibe na bunu, napano beamu, rojibe ka kiritete nalo, napano kiado jidomiano jutano ka siñaro nalo na jukamu ea vio yetemeriba nei. <sup>4</sup> Mia binimej bokar bogo nene memedu, Atua miila kenerinio binimej, napano tira tai bario, naio moluo ea vio yetemeriba nei, a napano naio moluo yetano ka kulo Ju nalo kialo tuboiano. <sup>5</sup> Naio moluo yetano ka tuboiano na, naio miluo eaio, ka naio mijikia rivuru bulag kito napano rojutano ka tuboiano nei naruei, ka mia Atua rivuru bulag kito romei rove kenerinio nalo.

<sup>6</sup> Mia vonganei, jibe napano robe kenerinio nalo, naio juvan kenerinio kiano Niu-nuno binimej ea kiado iviso, napano naio mila na kito romijikia rovio Atua, rover "Teta, Teta." <sup>7</sup> Bior vite na, kamiu maka bunu kuve tomu na iñauano nalo ga, mia kamiu kube Atua kenerinio nalo riano, napano mia naio sian van kamiu vite novo nalo, napano naio berkar berinavo mia kenerinio nalo avario.

##### *Pol tinien miia kulo Kalesia*

<sup>8</sup> Nua na, ka bogo napano kamiu maka kuvijikia Atua vo, kumitutano ka moroano na siñaro nalo napano maka ave atua leleio, <sup>9</sup> mia vonganei, kumijikia Atua ruei, ħelina bo ka never tibe na, never vonganei, Atua mijikia kamiu. Mia kiniou nejidom nevika den kamiu, nenerinavo "Kar vaio ana kumisidom kuva iorou bereio ea siñaro nalo nanua na, napano maka ve kanalo moroano tai, a napano maka ajikia avijuku rivu ka kamiu bogo tai? Kar vaio ana kumisidom kuvitutano ka kialo moroano bereio? <sup>10</sup> Juñabe ana kamiu kumitu kumisidomikar kanalo legiano lu nalo, a kanalo siberio lu nalo, a kanalo bogo lu nalo, a kanalo yuka lu nalo jibe na? Kamiu kuberiaña mia Atua saaro ka kamiu kario?" <sup>11</sup> Tomnei, kiniou nemerou ka kamiu toru bior kamiu? !Nemialio jibe ka nomiñau toru laka ka kurano!

<sup>12-13</sup> Kuruaku nalo a kuvivinioku nalo, nanua beamu kamiu maka kuvitutan ka tuboiano, ana na ka bogo napano nobinimej nojo bija kamiu, nomila kiniou bunu najavukia ga kamiu. Mia vonganei, nomi-jogio ka napano kumisidom ka kuvan bere ea bajago na tuboiano bereio, tenena nebika jikili den kamiu ka kumei tibe ka kiniou bereio ga, napano kiniou maka bunu nototan yetano ka tuboiano. Kamiu kuvvisidomii vonio bogo napano nomio-liolu beamu ban kamiu, napano kiaku mieiano ga mila napano be kiaku bogo ka noto vija kamiu, mia bekurano ka nemie ka bogo na, kamiu maka kuvila kiniou nojog rivova. <sup>14</sup> Makanio, mia kanaku mieiano nei mila lelan kamiu toru laka, mia maka kuvijog rivova ka kiniou, maka kuvvisidom va ea kiniou, makanio, kuburu kiniou naban ea kunuemiu, jibe ka napano ver kiniou nebe nailiano tai na Atua kanano, ħelina nejibe napano nebe Yesu Kristo ga. <sup>15</sup> Nanua kumisaaro mñelea ka kiniou, nominal jibe kanio napano ver kumijikia kuvila, ħeli kumisaaro ka kuvurular miremiu ka riverei ka miraku ka rijai kiniou, mia juñabe vonganei? <sup>16</sup> Peli vongane, kanaku ilirianiano nalo nei, nalo amila kiniou nebinimej jibe ka kenemiu bilbilu va tai bereio. ?Mia venia na?

<sup>17</sup> Kulo dolu nalo na napano nomijog aber aju kamliko vonganei, nalo na aju abilvilig Kristo kiano Ioluano Vou, nalo na aju abijurukar kamiu ka ave bilbilu rivu kamliko, mia kamiu kuvvisidom soĥi ealo, mia nina be tena aju kubijukubin kamiu ga, bior ajidom ga ka avuru bulag kamiu den kiniou. <sup>18</sup> Mia maka never tibe na ka mia kiniou ga ve takurano nomijikia noto

vija kamiu, ħeli na kiniou ve takurano ga ka kito rove bilbilu vatitig rivu, bior bajago na bilbilu vu rivija toro dolu naio bo bogo nonovio, mia bo ga verenio ka ga rila vite na bo.

<sup>19</sup> Keneriku nalo, kiniou nejavukia tira tai napano mabono mijalele ka naio rivar tete, napano nojo nomijog bova toru ka kamiu, ka kamiu kuvijev Kristo vija kiano bajago na bo nalo ea kenemiu meuliano nalo. <sup>20</sup> Riano, ver nomijikia noto kitoliko vonganei, mia nojog rivu laka. Verenio tibe na, mia nevilig kanaku iliano rivatove kija ve telisu, mia vonganei napano nojo laka ka kamiu jibe nei, maka bunu nejikia ka kamiu juñabe naruei.

### *Viginiano na Ekara naio Sera*

<sup>21</sup> Nalo na kamiu napano ajidom ka kito monoka rodukar kiado tuboiano rimemedu vija Atua, nejidom ka nalo averdoĥe kanaku vikadeniano tai, ka “? Tuboiano nei napano ajunã aberiio, nalo aju amijoglubar venia na tuboiano nei jomã berenio, ħelina maka ajoglubario?”

<sup>22</sup> Iliano Lu nei berii tormoruo Epraamo, napano naio be kenerinio tete sumãno juo, napano tinene, tira na Ekara, napano miñau ea koano, naio bario jukamu, mia tinene, koano memedu, napano Sera, naio bario iorou. <sup>23</sup> Nana napano moluo iorou, naio be Aisak, naio moluo bior Atua berkario, mia dolu napano moluo beamu, napano Ismael, naio moluo jibe na ga. <sup>24-25</sup> Naruei mia romijikia reial viginiano nei jibe kanio jamerijiano tai, napano tira juo nei, a jibe ka verikariano napano Atua milaio.

Tira nei Ekara naio jibe ka virakariano napano Atua milaio ea burusuku na toru na Sinai, nina ea buruvenuo na Arapia, vio na naruei napano Atua jian tuboiano ban Mosis eaio. Ekara nene, naio be tira na iñauano ga, mia kenerinio nalo, nalo bunu abe tomu na iñauano ga. Tenene na Ekara naio bunu jibe kanio komeli labo na Yerusalemo, napano tomu nalo nene abokar tuboiano nene nalo jikili, mia nalo abe tomu na iñauano ga bunu, bior nalo ajutan ka tuboiano nene naruei.

<sup>26</sup> Mia tira dolu nene naio be Sera, napano naio maka toro rivokar naio kanano iñauano naio ga jo, mia nina javukia Yerusalemo dolu napano naio be Yerusalemo na mave. Sera kenerinio nalo, nalo bunu maka toro na toru tai rivokarlo ka iñauano mia nalo bunu aju ga jibe na, tenene na milaio ana na Sera nene jibe ka be keniedo napano rabarkar tiniedo ea Kristo. <sup>27</sup> Iliano Lu naio ber vite nalo nei kija rui, berenio

*“Tira nei napano beamu jau maka kejikia kavar tete bogo tai, jau kajog rivu, kasaaro, koioi.*

*Jau na koamo naio juvanso, vonganei kenerimo nalo amei ve telabo, tovulu nalo na tira nana koano jo bija ga naio julaka bario.”*  
Ais 54:1

<sup>28</sup> Iliano nei javukia napano Atua berkar berinavo mia kenerinio nalo ve miroano, a kamiu kuruaku nalo a kuvivinioku nalo, kito naruei kito robe tete nalo na Atua kiano verikariano nei, jibe kanio kiano verikariano re nua mila Sera nene bar kenerinio nei napano Aisak. <sup>29</sup> Ana bogo na Aisak nene moluo, tete dolu nei Ismael napano naio moluo ga jibe na, mia naio jo mila titig kiritete napano Aisak, napano naio moluo ea Atua kiano Niununo Lu. Mia binimei bokar banei, kito romial tomu nalo ajunã amila bajago na jibe na kia ga vo. <sup>30</sup> ?Mia Iliano Lu naio berenio venia? Naio berenio Atua mil ban Epraamo, berenio “Jau monoka kovukular nana napano be tira na iñauano ga, naljuo kenerinio, bior kenerinio nei maka rimemedu ka mia rijikia rivar kanamo saba tai. Saba nalo na mia riviniu rivan ea kiritete na tira napano naio jo ga jibe na, napano be koamo memedu.”

<sup>31</sup> Nao, banalo, Atua naio ber jibe nei, ana kiniou neber ka kamiu naruei neber kito maka rove kenerinio tira na iñauano na, napano rojutan ka Mosis kanano tuboiano mia ħeli ga, mia kito robe kenerinio tira napano jo ga jibe nei, jibe ka napano romonea Yesu, a vite nalo napano Atua berkar ban kenerinio nalo memedu, mia nei naruei mia kito rovokario.

## 5

### *Yesu buru bulag namoneano nalo rui*

<sup>1</sup> Bogo napano Kristo buru bulag kito, naio mila jibe na ka mia rataluvo na mia rataluvo batitig garuei, maka ka mia ravan bereio ka rovan rotutan ka tuboiano napano Mosis kiano bereio. Tibena, kamiu monoka kuvitu sikili, ka nalo atutua re kamiu ka kumei tibe tomu nalo na iñauano bereio, napano tuboiano nei riadikar vatitig kamiu sikili bereio.

<sup>2</sup> Kamiu kuviagago vatitig ka iliano napano kiniou Pol nojo nober ka kamiu. Verenio kamiu kuvijamo ka nalo avututua kamiu napano monoka kuvakuveu, mia iñauano napano Kristo miñaukanio rui naio maka rijikia rijai kamiu leleio. <sup>3</sup> Ee, tenene napano neber bereio iliano na jikili nei ka kamiu, ka toro napano verenio naio rijamo ka naio rivakuveu, naio jo midu naio jo yetan ka tuboiano nei bereio, a mia toro napano naio jotan ka tuboiano

nei jibe ka naio monoka rivitigar vatitig ka rijogkar vite nonovio napano tuboiano nei berenio, ver ĩelina mia rije vironiano. <sup>4</sup> Kamiu tealo napano kumituńa kumila vio ka kumononea tuboiano na ga ruei, ka kamiu kumemedu vija Atua kanio, kamiu na kumitu kumite bulag kamiu ruei den Kristo, kamiu kubilig takaamiu ka Atua kanano tinievuiano ruei. <sup>5</sup> Mia kito roju rojidom ĩlelea laka ka mia Atua naio rila kito romemedu rivu vija naio, bior ga napano kito rabarkar ga tiniedo ea naio, ana Niununo Lu jo mijai kito romonea jikili ka bogo napano roju rorea kia ga vo, mia Atua monoka rila tibe na van kito. <sup>6</sup> Bogo napano robinimei takurano kitoliko Kristo Yesu jibe na, bekurano ka toro be pakuveu, ĩeli maka rive pakuveu mia tena burutomoruo loa laka nina be kiado viek-ouoiano ea Kristo, napano viek-ouoiano nei naruei naio mila kito rojidom Atua a bija toro dolu nalo bunu.

<sup>7-8</sup> Beamu kiniou nemial kamiu kumitiki bo laka, ana vonganei, maka bunu tibe na. Atua naio bio kamiu beamu ruei, ana nejidom nevika ka keinia toro napano naio berbure ĩarabo ka kamiu bereio, mila ana maka bunu kumonea ilirianiano? !Kiniou nemijikia maka ve Atua na! <sup>9</sup> Verloglogiano na bova napano naio ĩija mila lelan kenemiu jidomiano, naio jibe ka iliano tai napano berinavo "Soromi tai napano naio kiritelisu ga ana naio mijikia mila lelan niamoiu reraio amijea." <sup>10</sup> Ana jibe kanio kamiu kamliki kiniou kito robe takurano ea Atua, kiniou nojo nomonea kamiu jikili kiano vo ka mia kiado jidomiano ve takurano ga, ka kito monoka rovtua ve namoneano nalo napano maka ave kulo Ju, ka monoka nalo ave pakuveu. Mia nojo nabarkar tinieku jikili ea kamiu bunu ka toro napano naio jorńa mila lelan kamiu jibe na, bekurano ka naio be toro kei mia Atua rudu vironiano vanio.

<sup>11</sup> Kuruaku nalo a kuvivinioku nalo, be iliano nalo tai napano ber ka kiniou bunu, najo ĩa nomiolu kia ga vo neber namoneano nalo monoka ave pakuveu bunu ka mia Atua naio mijikia rilarurlo, mia iliano na naio maka rive riano. Verenio kiniou noto noioliolu tibe na, mia tomu nalo napano aju kamiliko nalo asaaro ka kiniou ga na. Ana kamiu kuvial, nalo aju tiniel jer kiniou kia navo, bior kanaku ilivisivisiano na ĩakolkolo napano Kristo kanano, naio jo miolkon bulag kanalo verloglogiano nalo. <sup>12</sup> Kiniou nojo nojidom ka tomu nalo napano ajuńa amila bilvilig kamiu, a mila tiniemiu memebiju kanio

ajidomii toru ka monoka kuve pakuveu, bo ka nalo adu iobogu ana nalo ga ativi kalo bereio ka mia ala niegeniegelo.

<sup>13</sup> Mia kamiu kanaku bilbilu nalo, Atua naio buru bulag kamiu ruei, riano ga ka maka bunu kuvitan ka Mosis kiano tuboiano na. Mia kamiu kuvisirarago vatitig rivu, mia kuvisidomii re bunu ka kuver "Bo na, kiniou najaluvo ruei den tuboiano nei ruei, kiniou ga naruei. Ana kiniou nemijikia nala vite nonovio nalo napano kanaku jidomiano naio jidomio." Kamiu kuver re bunu tibe na, ana mia monoka bajago na kenemiu tinievuiano naio monoka rila kamiu kuvisaaro ka kuvijajia toro dolu bunu. <sup>14</sup> Bajago na jibe na jakii iliano tai na tuboiano, napano naio barko vatitig iliano dolu nalo na tuboiano, napano naio berenio "Mia kosidomii tomu nalo napano aju vaatara kaso, jau kovijuku rivu kalo rive verare kanio napano jau kojidomiiso." <sup>15</sup> Mia vere kamiu kuvitumńa kuvilivil ea kamiu, a kuvitumńa kuviser niegeniege kamiu tibe ka tededen nalo, mia monoka kuvitigar vatitig kamiu rivu, kenemiu bajago na jibe na naio mijikia rila lelan kamiu nonovio bereio.

#### *Bajago na Niununo Lu a bajago na toro*

<sup>16</sup> Kiniou nejidom never iliano nei van kamiu. Kamiu na monoka Niununo Lu tukamu ka kamiu, a kamiu kuvitu re kuvitakii bajago moruo na kenemiu ga napano kumuluo bijaio. <sup>17</sup> Bior bajago napano romoluo bijaio, naio miilkue ka bajago na Niununo Lu kiano, a nana napano na Niununo Lu nene, naio maka saaro leleio ka nana napano kito romoluo bijaio. Vite nei naruei jibe ka napano bajago juo nei, abe juo ajuńa amila baravo ka naljuo. Tenene na jibe na ver Niununo Lu jo jukamu ka kamiu, maka bunu kuvijikia kuvila ga vaio napano kenemiu jidomiano milavio kanio. <sup>18</sup> Mia monoka tiniemiu ribobogia re bunu ka ver Niununo Lu to tukamu ka kamiu, mia kamiu maka bunu kuvitutan ka tuboiano nei.

<sup>19</sup> Inńauano nalo na bajago na tomu nalo amoluo bijaio naio meravo ga. Inńauano nalo nene, ajibe ka tomu nalo amila nasiakiano, nalo amila vite nalo na imouiano, a bajago na kiriniagiago nalo, <sup>20</sup> bija volkouano na tavoru, a bija navarsemeiano. Bereio, be navilviliano, tukurukuano, jokuaano, tiniemimiano, buruvitianio, vuru vurevureiano, ilidieiano kean tomu nalo, <sup>21</sup> na tinietukuniano, a bija nalo nei be namunu ĩlelea uei, bija namaduano, bija vite dolu nalo na jibe nei. Naruei nomidu tiniemaiano bereio ban kamiu, javukia napano neberii ka kamiu

nua ruei, ka kamiu kuvitikar kamiu, bior toro napano mā jo mila bajago nalo na, mia naio maka lele rijikia toa Atua kanano navenatuboiano bogo tai.

<sup>22</sup> Naruei kurukuti napano Niununo Lu mila miluo ea toro kanano meuliano jibe nei: tintetiiano, nasaarioano, tumāroano, jidomiano tebieviano, natinievuiano, nanovoiano, niabetitiano, navatoveiano, a natelan vuuiano. <sup>23</sup> Bajago nalo na abo laka, mia maka iliano tai pēli na tuboiano tai napano riverbure kamiu ka kuvila re vite nalo nei. <sup>24</sup> Ana bajago napano romoluo bijaio, bija kiano nasidom vovaiano nalo, rojukukakarolo ea mākololo ruei. Nina kito nalo napano robe Kristo kanano, kito rojuvan saba nalo na ruei.

<sup>25</sup> Bior kito romeul ea Niununo Lu mia bo ka kito reiel ea kiano bajago na bo bunu. <sup>26</sup> Maka rivu ka kito rotumā ravarvar ka kito, pēli na kito ga rotumā rotulutulu kito, pēli na rojoku ka kito.

## 6

*Kamiu nonovio monokanio kuvijajai kamiu*

<sup>1</sup> Kiaku bilbilu nalo, averenio kamiu tai rijoru ea kariano mia bo ka kamiu napano Atua kiano Niununo Lu joa kamiu, kamiu monoka kuvijai naio ka kuvuriri naio bereio. Mia monoka kuvil māsosou ga vanio tibe ka tiniemiū miiaio, mia monoka kuvitikar vatitig kamiu bunu ka mia vite napano kumila vatitig toro dolu kanio naio rimei re bunu ka rilavon kamiu bereio. <sup>2</sup> Monoka kamiu kuvijajai kamiu tibe na naruei, ka kuvar bitiraviran toro dolu kiano bagaro nalo napano teremi. Tibe na, ana kamiu kumitu kumonea venia napano Kristo kiano tuboiano naio berenio. <sup>3</sup> Ana mia kamiu kuvarvar ka re kamiu tibe ka toro tai napano naio jo jidom naio ga ber “Kiniou riano, kiniou nebe toro tai.” Ver tibe na, toro nene naio jo mijubolibolili naio bereio, bior naio maka rivitilubar ka naio be toro kurano ga. <sup>4-5</sup> Mia kamiu monoka kuvive terakurano kuvitii veve kenemiū iñauano nalo napano kumiñaukanio. Ver tibe na, toro tai maka rijikia rilavon ka rivitii veve von kanano iñauano nalo abo loa tomu dolu nalo kialo ana monoka naio rivitii veve ga naio ga kanano iñauano. Ver kiano iñauano bo mia naio mijikia saaro ga kar kiano iñauano novo nei. Bior tomu nonovio maka ave verare, bior nalo kialo vite dedade nalo napano teremi napano abario ea kialo meuliano.

<sup>6</sup> Kamiu napano ajumā aberiloglog kamiu ka iliano na moneano, mia ver bogo

tai kamiu kuvileal vite na kiritavaso tai, bo ka mia kuvio kanio kamliko kenemiū naverloglogiano nalo.

<sup>7</sup> Mo ana kamiu kuvitikario, ka kuvila sibilili re kamiu bereio. Jau maka kejikia kala dovorovon Atua. Mariesi vaio napano komebija ea kanamo tiniavio, māratu nene ga napano mia jau kesenio. <sup>8</sup> Mia toro napano mebija kanano bajago napano naio moluo bijaio jibe ka kurukuti tai ea kanano meuliano, mia naio rivar kurukuti tai napano menunū bova ga ea kanano bajago nene, be na maariano, ana ver naio rimebija bajago na Niununo Lu ea kiano meuliano, Niununo Lu naio mijikia rivar sinaniano novo nalo napano meruo bo ea naio, be meuliano kiano maka rijikia ribisi deio. <sup>9</sup> Ana mia kito romijikia ravar sinaniano novo nalo rimemedu ka bogo na marimeuano nene, ver rotuvan re iñauano. Tibe na ana mia kito tiniedo rimāro re ka rala bajago novo nalo na bo, <sup>10</sup> ana mia monoka rovijuku rivu ka tomu nalo bogo nonovio, ana monoka tiniedo vu rivu lie vo van nalo napano robe māratavo takurano kitoliko ea Kristo.

*Pol kanano iliano na maaro banlo*

<sup>11</sup> Mo, mia kiniou nevitauia kanaku iliñaariano nalo ka jumāku ga, tenene nei mia kumijikia kuvial kanaku māratu iliano nalo ave tomormoruo tibe nei. <sup>12</sup> Nejidom never ka nalo napano ajidom avututua kamiu ka kuve pakuveu, nina jibe ka nalo ajidom avarvar kalo ga rivior vite na kuluniabene toro ga. Ana nalo ajidom ala tibe na kar vite takurano ga, napano amila von ka atuvan ioluioluiuo napano Kristo kanano mākololo ga mijikia rilarur kito. Iliano na nalo maka asidomio, bior nalo amerou ka napano ver aioliolu ka Lilianiano nabo ka Yesu kiano māriano rimemedu tibe na, mia kulo dolu nalo ajil lo. <sup>13</sup> Nalo napano ajidom ka kamiu monoka kuve pakuveu, nalo ajidom tibe na bunu ka mia amijikia ail vevan ka aver nalo ajudovulu kamiu ruei, ka nalo aburu kamiu kubano iorou bereio jeltan ka kulo Ju nalo kialo tuboiano. Mia kamiu kuvitii vatitig, bior napano nalo na bunu maka atu adukar vite nalo nonovio napano tuboiano naio jo berenio.

<sup>14</sup> Naruei ea kiniou, maka bunu ve titai ka nesidom navarvar ka kiniou kanio, mia kiado Tubo Yesu Kristo kiano mākololo ga napano nabarvar kiniou kanio, bior kiano māriano mila bajago nalo na vio yetemeriba nei nalo abinimei jibe ka vite nalo napano añarñaro ga ea kiniou ruei, ana mila kiniou bunu nebinimei nejibe ka toro na māro tai ea bajago na tibolboiano nalo na vio yetemeriba nei ruei.

<sup>15</sup> Ka toro tai rimei rimemedu vija Atua, bekurano ka toro nene be pakuveu p̄eli na maka rive pakuveu, ana ver Atua naio tii toro nene rimei rive toro vou bereio tukamu vo, karina toro nene naio mijikia rimei rimemedu vija naio. <sup>16</sup> Naruei kiniou nobolkouo ka nalo napano mia adukar iliano nei, napano mia amei ave Atua kiano kulo Israel nalo garuei rimemedu, neberenio mia Atua kiano tum̄aroano a natinieiano to vijalo.

<sup>17</sup> Ninei naruei be kanaku iliano. Mia kiniou maka nesidom ka napano toro tai rila yebekavo ka kiniou tibe na bereio, bior kiniou nabar niajebijo kar Kristo ea mokotenaku ruei, jibe ka napano ajuba kiniou a abitiv kiniou.

<sup>18</sup> Nao kuruaku nalo a kuvivinioku nalo, kiniou nobolkouo ka mia kiado Tubo Yesu Kristo kiano tiniememiano naio to rivija niunumi nalo nonovio,

Mm tenene na.

**Mesi Napano Pol Bivitauiiao  
Ban  
Namoneano Lu Nalo Na  
EVESO  
Verialiano Moti**

*Tukunu bulati na niosi nei*

Burupati jidomiano napano Pol berio ea mēsi nei napano naio jirio ba ban namoneano nalo na Evesas, nina iliano na mirano takurano togio duelimo (1:10) napano berii Atua kiano tiiano. Naio berinavo Atua jidom ka vite nalo napano naio jiilo, mia amei vio takurano. Naio jidom ka vite nalo na tiniabene a na yetemeriba mia amei aiasol lo ea Kristo, napano naio jibe ka be parinio ka vite nalo nonovio. Mia Pol berii buruñara Atua kiano tiiano, napano tiiano nene be tomu nalo na vio nonovio ka nalo aiasol vatitigio ea voroniano ve takurano ga, a amijikia ala tibena ver amonea Yesu Kristo. Mia naio ber vatitigio bo ban Atua kiano tomu nalo ka averial tiiano nene ea kialo meuliano.

Ea mēsi nei togio na beamu, Pol berii m̄arabo napano Atua Karmado mila ka tomu nalo amei ve takurano. Naio berii bajago nei napano Atua bijauia bulag kiano tomu nalo, a berii napano ea Yesu Kristo Atua Kererinio, Atua nai biekokoa kanano tomu nalo, ana barbulag kialo kareano nalo, milalo amilala. Mia naio berii bunu napano Atua jian Niununo Lu ban kiano tomu nalo, ka averial napano naio mia sian vite nalo vanlo, tibe napano naio berkario ka rilao. Ea mēsi nei togio juo [2] nene, Pol ber ka tomu nalo ka mia avuluku mēsi nene, ka nalo monoka averial ka abe takurano bija Kristo, ea bajago na mia amijikia aiasol vatitig vija namoneano dolu nalo.

Pol berii jamerijiano nalo, ka verial bajago na Atua kiano tomu naloaju amiasol vatitig ea Kristo. Naio berinavo yimo lu naio jibe mokotenado napano Kristo be parinio kanio, a jibe yimo napano Kristo be martea novo na sudu nene, a jibe tira napano Kristo be koano. Atua tinien miia laka tomu nalo na yetemeriba, a tomu nalo amial tinietiiano nei ea Kristo. Atua kiano buruñara tinietiiano nei julu Pol kiano jidomiano, naruei naio berial kiano moneano ea mēsi nei. Mesi nei berial Kristo kiano bajago napano naio tinien miia kito, m̄aro ka rivulu bulag kito, a jo miija kito ea kiano tinieseseiano ka kito romemedu vatitig ea Atua mirano.

*Torogio nalo na niosi nei*

Iliano moti 1:1—2

Kristo bija kiano yimo lu 1:3—3:21

Meuliano vou ea Kristo 4:1—6:20

Iliano maariano 6:21-24

*Pol jikar kiano iliano banlo*

<sup>1</sup> Kiniu Pol, napano Atua naio bitirilar kiniu ka neve kiano toro tai napano nojorña ber bulag Ioluano Vou nei, napano nebe Kristo Yesu kiano atevi, kiniu nejirii mēsi nei viedu ban kamiu namoneano nalo na komeli labo na vio Eveso, napano kamiu na kubiekou ea Kristo Yesu.

<sup>2</sup> Kiniu nobolkouo ka kamiu ka mia tiniememiano a tuñaro na Atua karamado kiano a na kiado Tubo Yesu Kristo, to vija kamiu bunu.

*Atua milivu ka kito ea Kristo*

<sup>3</sup> Bo kanio kito reiaia Atua, napano naio be Atua ka kiado Tubo Yesu Kristo, a napano naio be karamano bunu, bior kito napano robe takurano bija Kristo, Atua naio mila vatitig kito bo laka ka ilivuiano novo nalo ea vio mave. <sup>4</sup> Nina jibe bogo na vio yetano nei naio makanio vo, ana Atua naio berko kito ruei kan romei rove takurano kiteaku Kristo, ka rove kanano, a kan kiado meuliano naio rimeravo rivu ea mirano, napano mia maka niamiamo tai toaio. <sup>5</sup> Beamu laka, bior kiano buruñara tinietiiano, ana Atua naio midu kito roju kanio mia naio riviobulag kito rove kenerinio nalo ea Yesu Kristo. Vite na, Atua naio mila memedu ka nana naio mialio ber bo ka mia naio rilao, a naio jaaro toru bunu ka rilao. <sup>6</sup> !Reiaia Atua rivior kiano buruñara tiniememiano nei, a ka kiano ijaiano novo nei na naio jian kurano ga kanio ban kito, miyotuba ea kenerinio na naio jidom m̄elea naio!

<sup>7</sup> Ja na kenerinio naio miou, mia kario vite na kito napano robe takurano kitoliko Kristo nene, ana Atua naio buru bulag kito, napano naio biekokoa kiado kariano nalo. !Riano ga, Atua kanano tiniememiano ka kito naio toru laka, ba lie vo! <sup>8</sup> Atua naio be masou laka, mia naio bitilubar vite nonovio, <sup>9</sup> ana naio jaaro ka rijamo ka kito rejikia kiano jidomiano tai napano beamu naio be navigiviano tai ka kito. Naio mila jidomiano nene binimei meravo batitig bo ka kito, a kiano jidomiano ka rimauka vite novo nalo ve telabo ea Kristo ga. <sup>10</sup> Ea jidomiano nei naruei, mia Atua naio riasol vatitig vite nalo napano naio jiilo atu vio ve takurano, nina ea vio mave a ea vio yetano, nalo amei yetano ka Kristo, a mia Atua naio rimauka batitig vite nonovio rimemedu ka kiano jidomiano,

rivano-o rila nono batitig rivu ea bogo nene rimemedu.

<sup>11</sup> Vite nalo nonovio monoka amal-maluvo rimemedu ga ka na Atua naio jidomkakar ka rilao. Mia jakii kiano jidomiano nei nanua beamu, naio berkar berinavo kumemi kulo Israel ka kumemi nuve kiano, ka kumemi nuve takurano kumemi liko Kristo. <sup>12</sup> Kumemi nei naruei, Atua bitiri bulag kumemi ka mia nuvitu tukamu ka mia nuvidu kenememi jidomiano to sikili ea Kristo, tenene na, bo ka kumemi monoka nuviaia Atua bogo nonovio, bior naio bo laka.

<sup>13</sup> Mia kamiu kulo dolu nalo bunu, napano kamiu maka kuve kulo Ju nalo, kamiu kumijog iliano riano nei ruei, napano be Ioluanu Vou napano kubokar kenemiu ioruriano eaio. Kamiu kumonea Kristo ruei, ana kubinimej kube Atua kiano tomu nalo ruei. Ana bior kamiu kube kiano, Atua naio midu tovo na vite na monea kamiu, napano naio jian Niununo Lu ban kamiu, jibe ka napano naio berkario. <sup>14</sup> Ana Niununo Lu nene, naio jibe ka Atua kiano verikariano togio na jukamu nene ban kito, ka mia kito rejikia vatitigio ka mave ka Niununo napano, kito rovokar nono jajuriano na be kiado, nina ea bogo na mia Atua naio rivuru bulag tomu nalo avan eaio, nina nalo ga napano naio bul bulaglo ruei abe kiano. !Kito reiaia Atua, bior naio bo laka!

#### *Pol kiano volkouano*

<sup>15-16</sup> Bior ka vite nalo na, bogo nonovio, ea kanaku volkouano, kiniou nojo nojidomial kamiu, a nojo nober siva toru ban Atua bior kamiu. Bajago na, nejikar ea bogo napano nomijog ka kamiu kumonea jikili Yesu, kiado Tubo, a kumisidomii toru namoneano lu dolu nalo, naruei binimej bokar banei, kiniou nojo nobolkouo jibe na. <sup>17</sup> Bogo nonovio na nojomia nobolkouo ban Atua, napano naio be Atua ka Yesu Kristo kiado Tubo, a napano naio be karamiado na mermerano na toru, nojo nobika denio ka naio rudu Niununo na masouano a Niununo na verialiano van kamiu, ka kuvijikia Atua ve toru lie vo.

<sup>18</sup> Ana na nojomia nobika denio ka naio rivetavo ea kenemiu jidomiano, ka mia kuvitilubar kiano yulu, a ka kuvijikia vite nalo napano Atua naio bio kamiu kanio, a ka kenemiu jidomiano naio monoka sikili lie vo ka mia kuvokar vite nalo na. Vite nalo napano, naio be kenemiu jajuriano, jibe ka vite na bo telabo napano Atua mila batitig ju, ka ve namoneano lu nalo kanalo. <sup>19</sup> A vija naio bunu,

kamiu monoka kuvitilubar a monoka kuvijikia batitig kanano buruñara moroano na toru, napano naio jo mirñau ea kiado meuliano napano romonea naio. <sup>20</sup> Nina buruñara moroano nene kia ga navo napano Atua naio mirñau eaio, bogo napano naio bitirilar Kristo naio meul bereio den narñariano, karina, naio buru naio ba midu naio jotano ea vameruo na naio ea vio mave. <sup>21</sup> Moroano nene, naio mave loa ka moroano dolu nalo, a vite dolu nalo na jikirkili, a tomu na tortoru dolu nalo, a navurimñaraboiano dolu nalo na mave. Mia Kristo siano naio jo mave laka laka loa sio dolu nalo, maka ea vio yetano nei ga, mia ea yetemeriba dolu bunu na mia rimej. <sup>22</sup> Atua naio midu vite nalo nonovio aju yetano ka Kristo jaano, a naio bitirilar Kristo ea tumñaro lu na kiano, ka mia naio ve parinio ka saba nonovio. <sup>23</sup> Mia kiano tumñaro lu nei, naio jibe ka tati na Kristo, napano bujo batitig ka Kristo, napano naio bujo batitig ea saba nalo ea vio nonovio.

## 2

#### *Vonganei kito romeul ea Kristo*

<sup>1</sup> Nanua beamu, jibe ka kamiu kuñarmñaro ga bior kenemiu vovaiano nalo a kenemiu kariano nalo, <sup>2</sup> naruei ea bogo na, kamiu kumiel ea bajago va nalo na yetano nei. Beamu, kamiu kumitakisor tubo na moroano nalo na vio yauo, kumonmonea naio ga, napano naio be niununo napano jo mila kiano imñauano ea nalo napano mña maka amonmonea Atua. <sup>3</sup> A nanua beamu, kumemi kulo Israel nalo bunu, kumemi nubega ka kulo dolu nalo, napano numitumña numiel jakii ga kenememi tinietiano nalo na bajago va na toro ga. Kumemi bunu, numitumña numila ga vite nalo napano kenememi jidomiano jidomio, vite nalo napano mña numijog bo kanio. Bior saba nalo na, numitavukia tomu dolu nalo na, napano Atua tinien ser kumemi bunu, rivan rivano bisi ana mia naio maka rijikia rila vite tai ea kumemi nei, ana monoka sian vironiano van kumemi bunu.

<sup>4</sup> Mia Atua, kiano tiniememiano a kiano jidomiano naio toru laka ban kito, <sup>5</sup> ana bogo na naruei jibe ka napano ramñarmñaro ruei kar kiado vovaiano nalo, mia naio mila kito romeul bereio kitoliko Kristo. Be riano ga, Atua naio milarur kito ea ga kiano tiniememiano. <sup>6</sup> Ana jibe ka kito romeul kitoliko Kristo, mia Atua naio bitirilar kito bija naio bunu, a naio midu kito rojutano bija naio ea vio mave.



<sup>7</sup> Atua naio mila jibe na bior bogoti nalo napano ju ka rimeí, mia tomu nalo amijikia avitilubar kiano tiniememiano nei naio toru laka, naio jidom kito jibe na miyotuba ea Kristo Yesu. <sup>8</sup> Atua naio milarur kamiu ea ga kiano tiniememiano, bior kamiu kubarkar tiniemiu ea naio. Vite na maka rimaluvo ea kenemiu iñauano novo tai, makanio, mia Atua ga naio jian kurano ka ga ban kamiu. <sup>9</sup> A vite na maka ve vite tai napano mia toro mijikia riñau riviorio, bior ver tibe na mia ravarvar kito kanio, reil vevavin rover “O kiniou, kiniou ga nemilarur kiniou ea kiaku iñauano.” <sup>10</sup> Mia kito rajavukia tonovo tai napano Atua miñaukanio bo laka, ka napano naio ji kito robinimeí robe kulo vou nalo ea Kristo Yesu, a Atua naio mila jibe na ka mia kito bunu rala kiano iñauano novo nalo, napano naio bijauialo kar beamu ruei, ka kito roinñaukanilo ea kiado meuliano nalo.

*Kito robe takurano ea Kristo*

<sup>11</sup> Mia kamiu monoka tiniemiu rimaio ka bogo na kumuluo, kamiu maka kuve Atua kiano tomu nalo tavukia kulo Ju nalo, kamiu kube kulo dolu nalo ga. Kanio tena, kulo Ju, nalo napano aber nalo abe kulo lu, bior nalo abokar pakuveu jikili, amiyotel ea kamiu, aberenio “Kulu momou” ea kamiu. Mia pakuveu na, naio be vite kurano ga tai ea kuluniabene toro ga. <sup>12</sup> Mo, ana nanua beamu, kamiu kumitibe na ruei. Kamiu tiniemiu ribobogia re nanua, kumitu koalabo ka Kristo, kumitu tavio ka taara na kulo Israel nalo, a kube valauo ga, mia maka kuvijikia kuvokar vite nalo napano Atua naio berkario ban kiano tomu nalo. Kamiu kumitua vio yetano nei, kube iakurano ga liki, a maka kuvijikia Atua leleio. <sup>13</sup> Mia kamiu, napano beamu kumitu koalabo, mia vonganei kubinimeí vaataro ruei ea Kristo kiano burukija, vonganei ana kube takurano kamliko naio.

<sup>14</sup> Kristo naio be kiado tumāroano, naruei naio mila kiado taara juo nei abinimeí abe takurano. Beamu kumemi kulo Ju bija kamiu tomu dolu nalo, rojuñña tiniedo jer kito bogo nonovio, jibe ka buruññara tagvoru tai jibure kito, mia Kristo naio mila bulag vite nei ea kiano namāriano. <sup>15</sup> Naio berbure kulo Ju nalo kialo tuboiano bija yati nene nalo, naio mila jibe na ka mia rila kiado taara juo nei amei ve toro takurano ea naio, tibe kanio naljuo amei ave vite vou tai. Jibe na naruei, Kristo naio mila tumāroo bija kito. <sup>16</sup> Ea kiano māriano napano ea mākolokolo, naio muekorov kiado tiniemimiano, ana naio burubiron kiado taara juo nei abinimeí abe tomu takurano, ana naio mila robokar

juññado bereio kitoliko Atua, mila kito robe merevu bereio bija naio. <sup>17</sup> Mo, ea bajago na naruei, Kristo naio binimeí, berial Ioluanu Vou na tumāro nei ban tomu nalo, nina kamiu napano maka kuve kulo Ju, napano kumitu koalabo ka Atua, bija kumemi bunu kulo Ju nalo napano numitu vaataro ruei. <sup>18</sup> Ana bior vite nalo nei napano Kristo naio mila ruei, vonganei kito nonovio robe kiado māarabo tai ea Niununo tai ga, ka romei ea karamādo mirano.

<sup>19</sup> Jibe na, ana kamiu maka bunu kuve valauo, a maka bunu kuve toro na maka ve kiano vio tai, makanio. Mia vonganei kamiu kube mātatoko bija namoneano lu dolu nalo ea Atua kiano vio, ana kumitua kiano māarato. <sup>20</sup> Kamiu kumitavukia māartea na yimo tai, napano atevi nalo a kulo naverialiano nalo, nalo ajibe ka māartea na sudu na yimo nene. A ea yimo nei, Yesu Kristo naio jibe ka māartea siyovo napano kirisikili bo napano ju iviso, <sup>21</sup> napano naio jo bokar jikili batitig māartea dolu nalo nei. Naio bokarolo naruei, ana nalo ajumolu aju jikili, ana na yimo nei naio jo binimeí jibe ka Atua kiano yimo lu tai. <sup>22</sup> Atua naio jo miñauka kamiu jibe na naruei, ka ea Kristo kamiu tomu namoneano riano nalo, kamiu kuvitua kumei kuvitibe ka yimo tai, napano naio mijikia riva to joomo bogo nonovio eaio ea kiano Niununo.

### 3

*Pol naio jo mila iñauano na Tubo kiano banlo ruei*

<sup>1</sup> Mia ka vite nalo napano neberenio ruei, kiniou Pol, nojo nobolkouo ban Atua bior kamiu. Mia vonganei nojoa yimo na tetavokoiano, bior nojoñña nemila iñauano napano Kristo Yesu kiano ban nalo napano maka ave kulo Ju, jibe ka kamiu, mia nojoñña nobolkouo kia ga vo ka kamiu ban Atua. <sup>2</sup> ?Peli kamiu kubitilubar ruei ka nojoñña nomīñau jibe na kar kamiu, pēli na makanio? Iñauano na kiaku ka rijai kamiu, Atua naio jianio ban kiniou ea kiano tiniememiano, <sup>3</sup> ana naio jibe ka kiano jidomiano tai napano beamu naio bigiviano, avona kario ana naio jiloglogio ka kiniou.

A vite na kiniou nejiriio ruei, <sup>4</sup> a ver kamiu kuvulukiuo, mia kumijikia kuvokar kiaku jikiaiano tivelinio nene ea jidomiano na Atua kiano, napano vonganei naio jo binimeí malmaluvo meravo ea Kristo. <sup>5</sup> Ea terati nalo na beamu, tomu nalo maka ajikia vite nalo na jibe ka vonganei, napano Atua naio jiloglogio vonganei ban

atevi lu nalo bija kiano naverialiano nalo maluvo ea Niununo Lu. <sup>6</sup> Mia iliano napano binimei meravo nei jibe na naruei, napano naio ber jibe na berinavo, kulo dolu nalo bunu naliko kulo Ju nalo, abe juo abokar Atua kiano ilivuiano nalo, napano ajibe ka torogio na tati takurano ga, a ka Atua kiano naverikariano nalo abe kialo bitiravirano abe juo. Saba novo nalo na amaluvo bior Kristo Yesu kiano Ioluanu Vou.

<sup>7</sup> Mia Atua naio mila kiniou nobe atevi na iñauano na Ioluanu Vou nei, a iñauano nei naio be ijaiano novo tati napano Atua jianio ban kiniou, napano kiano moroano nene naio jo miñau maluvo ea kiniou. <sup>8</sup> Kiniou kiritavaso loa namoneano lu dolu nalo, mia najaaro toru laka napano ea tiniamemiano napano Atua kiano, naio mije monea jumaku ka kiniou noioliolu ka Ioluanu Vou nei van nalo napano maka ave kulo Ju. Jibe na naruei, na kiniou neber lualua banlo vite novo nalo napano be Kristo kiano, napano mia maka ajikia avulukui, <sup>9</sup> mia nojo nejilloglog bunu banlo jumabe napano Atua naio mila kiano jidomiano nei maluvo. Jikario ea bogo napano Atua naio ji saba nonovio, binimei bokar bogo nalo napano abarlaka ban ruei, Atua naio bigiviano kiano jidomiano nei jo. <sup>10</sup> Ana ea kiado bogo nei naruei, Atua mila nailiano nalo bija moroano nalo napano vio mave, amijikia avitilubar kiano masouano dolu nalo ea vite nalo napano naio miñaukanio ea Yesu kiano nalotuanu. <sup>11</sup> Saba nalo na, amemedu ga ka Atua kiano jidomiano, napano naio joña jidomii kakarlo beamu, ka bogo na vio yetano nei naio makanio vo, a naio mila saba nalo nei amalmaluvo ruei binimei ea Kristo Yesu, kiado Tubo. <sup>12</sup> Mia bior kito rabarkar tiniedo ea Kristo, a robe takurano kitoliko naio, naruei romijikia romei rotumolu rotukamu ea Atua mirano, a maka rejikia romemebiju, a kiado iviso sikili ea naio ka mia naio saaro ka kito. <sup>13</sup> Tenene na, kiniou nojo nobika jikili den kami, nober bo ka kamiu tiniemiu rijoru re rivatove bogo tai, napano kumijog bova toru ea kiniou ea jaleleano nalo napano nojña nabokario bior kamiu ea yimo na tetavokoiano nei, napano ajuña amilavon kiniou toru. Saba nalo nei, nalo abe tena rijai kamiu ka mia kuvokar mermerano na Atua kiano.

#### *Pol kiano volkouano*

<sup>14</sup> Jibe na, bior vite nalo napano nojña neberenio, na kiniou neminie, nobolkouo ka kamiu ban Karañado, <sup>15</sup> napano naio be Karañado riano garuei memedu, a napano karañalo dolu nalo na ñaratavo

nalo na ea vio mave a ea vio yetano, nalo ajuña abar kialo bajago novo a sialo novo nalo ea naio ga.

<sup>16</sup> Kiniou nojña nobika den Atua, napano kiano mermerano naio toru laka, ka mia naio rudu kiano moroano toa kenemiu iviso nalo riyotuba ea ga kiano Niununo, ka kenemiu iviso nalo atumolu atu sikili vatitig dañariga. <sup>17</sup> Nojo nobolkouo bunu ka mia Kristo naio to kamliko dañariga bogo nonovio ea kenemiu iviso nalo rimei ea kenemiu viekouoiano nalo, a nobolkouo ka kamiu bunu bajago na jidomiano, naio rimei tibe ka burupati na kenemiu meuliano nalo. <sup>18</sup> Jibe na, ana kamiu kamliko namoneano lu dolu nalo, mia kamiu kuvare ka mia kuvijikia kuvitilubar buruñara jidomiano na toru napano Yesu kiano, ðeli jagati, ðeli tebievi, ðeli vaviniano, ðeli na bululuoiano nene tumabe. <sup>19</sup> Riano ga na, kiano tinietiano nene naio toru, mia maka garuei, kito maka rejikia rover romijikia batitig naio ruei. Mia bekurano, kiniou nobolkouo ga ka mia kamiu kumijikia kuvial kiano jidomiano nene ea kenemiu meuliano nalo, rivano-o mia Atua kiano bajago novo nalo, a kiano meuliano novo, avujolou batitig ea kamiu.

<sup>20</sup> Mia vonganei, kito reiaia Atua, bior ea kiano buruñara moroano napano jo miñau ea kiado iviso nalo, naio mijikia riñau tovalu venia napano romijikia rovika denio, ðeli venia na mia romijikia rosidomii. <sup>21</sup> Mia vonganei, Atua kiano lotuano reraio aiaia naio rivior Kristo Yesu, vonganei, a bunu ea terati nalo nonovio napano ea bogo nalo na aju abinimei, rivano-o mia ribisi deio. Mm.

## 4

### *Kito rojibe ka tati takurano ea Kristo*

<sup>1</sup> Jibe ka kiniou nojoa yimo na tetavokoiano, bior kiado Tubo kiano iñauano, nejikili ka kamiu, ka kenemiu meuliano nalo monoka rimemedu ka bajago nalo napano Atua naio bio kamiu kanio, mia kamiu kuviel eaio. <sup>2</sup> Tibe na ana mia kamiu kuvatove ga ka kamiu, a kumelumumu ga bogo nonovio. A kenemiu jidomiano monoka rimelokloko ka kamiu, napano mia tiniemiu rimimi soðeli re van kamiu. Nina naruei naio be bajago na tinietiano. <sup>3</sup> Kamiu kuvilavio sikili ka kuvokar batitig tumaro nei napano riasol kamiu, tibe na ana kumijikia kuvitakar batitig burukutiano napano Niununo Lu naio jo jianio ban kamiu. <sup>4</sup> Kamiu kumitibe ka tati takurano ga, a be Niununo takurano ga bunu joa kamiu, mo ea bajago nene, be verikariano takurano ga napano kenemiu

jidomiano naio mijikia tu sikili eaio, napano Atua bio kamiu biorio. <sup>5</sup> Ana Tubo Yesu takurano ga, a kiado moneano ea naio be takurano ga, a varueiano bunu be takurano ga, <sup>6</sup> a Atua takurano ga napano jo, napano naio be kulorinio nonovio karamalo, a naio mije tuboiano ka vite nonovio, a naio mila kiano inŋauano miy-otuba ea vio nonovio, a naio joa kulorinio nonovio kialo meuliano.

<sup>7</sup> Mia ea kito nonovio robeve terakurano, Kristo jian ijaiano dedade nalo ban kito ea kiado meuliano, napano nalo kirinovo laka, memedu ka kiano tiniememiano napano toru nei. <sup>8</sup> Nina javukia napano Iliano Lu berenio nanua ruei, berinavo

*“Bogo napano naio jo bavini ea vio mave na bavini laka,*

*naio burukar kiano uolu nalo napano naio jovululo ruei, nalo iorou ka naio, a naio jian ijaiano ban tomu nalo napano abe kiano.”* Iouano 68:18

<sup>9</sup> ?Mia iliano napano berenio berinavo “naio bavini,” naio berii venia? Iliano na naio berenio beamu, naio batove laka ruei, napano naio binime i ea vio yetano nei, naio batove ea kiano vio bululuo nene nalo. <sup>10</sup> Mia toro napano beamu naio binime yetano, toro nene kia ga na vo napano mia iorou kano ana naio bavini laka mave, a bereio, naio bavini ie bereio vo, ka naio mijikia rison batitigio rivujo vio nalo na Atua naio mila vatitigio aju. <sup>11</sup> Mia naio naruei toro nene kia ga na vo napano naio jorŋa jian ijaiano ban kiano tomu nalo, napano tealo, naio bitiri lualua nalo abe atevi, a tealo, naio bitiri lualua nalo abe naverialiano, a tealo, naio bitiri lualua nalo abe naeliano ea Iouano Vou, a dolu nalo, naio bitiri lualua nalo abe tomu navitikariano na namoneano nalo, a tealo, ka averlogloglo. <sup>12</sup> Kristo naio mila jibe na ka mia namoneano lu nalo amijikia ala kiano inŋauano, ka taara na namoneano nalo na vio yetano nei, napano ajavukia tati na naio, mijikia riluo lie vo a rime i sikili lie vo. <sup>13</sup> Tibe na, ana mia kito nonovio romijikia romei ve takurano ga ea kiado viekouoiano ea Atua kenerinio, a romei rove takurano ga bunu ka robitilubar batitig naio ea kiado meuliano nalo. Tena naruei, ana romijikia rotu romei rotibe ka toro na naio meruo, riva rivokar napano mia romeruo tibe ka Kristo, napano mia romei rove toro na toru riano tibe ka naio.

<sup>14</sup> Tibe na, mia kito rotibe ka re bunu kiritete, napano naverloglogiano dolu nalo na tomu na sibiano nalo aburu kiado jidomiano aba be dolu, kialo jukujukuano

nalo abilvilig kito, jibe ka napano jegi nalo jorŋa miuvuvu kito, ŋeli na tei jorŋa buku bilvilig kito janea vio reraio, makanio. <sup>15</sup> A kito monoka rovokar ilirianiano ea bajago na tintetiano, a ea kiado m̄arabo nonovio nalo, monoka reiluo ka mia romei rove Kristo kiano tomu nalo, napano naio be parinio ka bagaro na namoneano nalo na kiano. <sup>16</sup> Mia kito rojibe ka torogio nalo na tati na naio, napano naio jo mila torogio nalo nei abinime i abe takurano ga ea naio, ka kiano meribuku nalo atu aiasosol vatitig torogio nalo nei van ea pariparinio. Mia bogo na torogio na tati nei nalo atakii vatitig kialo inŋauano nalo rimemedu, mia nalo aturŋa tinielo tiilo bereio, mia tati nene naio mijikia riluo, mijikia rime i sikili lie vo.

*Meuliano vou ea Kristo*

<sup>17</sup> Ea kiado Tubo siano, nejikili ka kamiu bereio, ka kamiu kuvitikar kamiu, mia kuvitakii re bunu bajago napano nalo na maka amonea Atua. Nalo na, kialo jidomiano kirivova ruei, a be madati ruei, <sup>18</sup> a joa melijokouo ga. Tenene na, nalo aju koalabo laka den meuliano napano Atua naio jiano, bior pariparilo kirisikili laka, jibe kano puruveru, maka ajikia ajoglubar vite. <sup>19</sup> Tinielo maka bunu rijikia rimou ka kialo vovaiano nalo, naruei nalo ajidel dolu ga ea siakaiano, a bajago nalo na kiriniagiago, napano maka asidomialio leleio.

<sup>20</sup> Mia ea Kristo, maka averloglog kamiu ka bajago na jibe na tai leleio, makanio. <sup>21</sup> Mia aberii kiano saba novo nalo telabo ban kamiu ruei, napano kamiu kumitakisorio, mia aberloglog vatitig kamiu ka ilirianiano nei napano jua Yesu. <sup>22</sup> Tenene na, kamiu monoka kuvilar bajago moruo na kumoluo bijaio. Bajago na naio jorŋa mila kenemiu meuliano re beamu above, mia nanua, kenemiu sidomvoviano nalo na bajago nene, nalo ajurŋa amiju bolbo lili kamiu, a nalo aju amila lelan kenemiu meuliano nalo toru toru laka. <sup>23</sup> Mia vonganei, kenemiu iviso nalo a kenemiu jidomiano nalo monoka amei ave terivou nonovio, <sup>24</sup> ana mia kamiu monoka kuviya bajago vou nalo na kenemiu meuliano vou ea Yesu napano Atua naio jiio ea kamiu, javukia kiano, ka mia tomu nalo amijikia aialio ka naio memedu riano, a be lu.

<sup>25</sup> Tibe na, ana sibiano re bunu, bior kito robe torogio na tati na Kristo, monoka rove riano ga van kiado na vaataro nalo bogo nonovio.

<sup>26</sup> Mia ver bogo tai tiniemiu rimimi, mia kuvila re ka tiniemimiano na rivuru kamiu kuvan ea kariano, mia kenemiu

tiniesereiano monoka rivatove beamu vo, karina mřeneno rijoru. <sup>27</sup> Mia kamiu monoka kuvijamo ka re buluvio van Siřnaro ka rimei rilaso kovova laka.

<sup>28</sup> Toro napano beamu naio be toro na vinuano, naio monoka tuvan vinuano. Naio monoka riřnau mřele ka juřnau ea bajago na memedu, ana mia naio mijikia rivitikar naio, a rijai talimřasa nalo bunu.

<sup>29</sup> Ea kenemiu iliano nalo, kamiu kuve re ilimenunuano, mia kuverenio iliano nalo napano mia rijikia riijalar kialo jidomiano nalo, ka nalo amijog kenemiu iliano nalo, napano josonu bare, a memedu bo, a ka rijailo. <sup>30</sup> Kamiu kuvila re Niununo Lu riumou, a rijog rivova, ea kenemiu ilivovaiano nalo, bior Niununo Lu napano, Atua midu joa kamiu jibe ka kiano tovo, napano naio berial berinavo kamiu kube kiano, a ka riverial bunu, ka mia naio rivuru bulag kamiu ea bogo na tagařiano. <sup>31</sup> Mo tibe na na, bo ka tiniemiu rimimi re bunu, ala re bunu siniabu, a tiniemiu ajea re bunu. Kamiu kuvituvan bajago na řeřeiano, a bajago na ilivovaiano, a bajago na bilbilu vaiano.

<sup>32</sup> Mia kamiu kuvijuku rivu ka kamiu, tiniemiu rimelokoko van kamiu, a kamiu kuviekokoa kamiu tavukia napano Atua naio biekokoa kamiu maluvo ea Kristo.

## 5

### *Kamiu kuviel ea miamoiano*

<sup>1</sup> Bior kamiu kube Atua kenerinio novo nalo, kamiu kuvilavon ka kuvur nonovio kiano bajago. <sup>2</sup> Monoka kuviel ea jidomiano, tibe ka napano Kristo naio jidom kamiu, ana naio mijamo ka kiano meuliano kar kamiu, jibe ka bonotanunu novo tai ban Atua, a sida tai napano Atua naio jaaro kanio.

<sup>3</sup> Bior kamiu kube Atua kiano namoneano lu nalo, maka rimemedu leleio ka bogo tai saba nalo tai amalmaluvo ea kamiu tibe ka siakaiano, řeli vite na imouiano, řeli na bajago na sidonii vite ta bunu, mia vite nalo na maka ve tena kuva kuvitumřa kuvil sosol kanio. <sup>4</sup> Maka rimemedu ka kamiu kuver ilivovuiano nalo řeli iliniagiagoano nalo, řeli iliserevaiano nalo. Memedu ka kamiu kuvitumřa kuver siva ga van Atua. <sup>5</sup> Kiniou nejidom never rimeravo van kamiu, ka nalo napano ajumřa amila siakaiano, a nalo napano ajumřa amila vite nalo na imouiano, a nalo napano ajumřa ajidom aiobua saba ta bunu ta bunu bogo nonovio, nalo na mia ava kovio. Toro napano naio jidom melea saba bogo nonovio, naio jibe ka toro napano milotu ka atua dolu nalo. Kamiu

kumijikia kumonea iliano nei ruei, napano berinavo nalo napano ajumřa abokar bajago va, mia maka leleio ajikia ava jouro ea navenatuboiano napano Kristo naio Atua kanalo.

<sup>6</sup> Kamiu kuvijamo re ka tomu nalo avuru kamiu kuvan ea mřarabo dolu nalo, napano nalo amijubolbolili kamiu ea kanalo iliseiseiano nalo. Vite nalo nei naruei, mila ana Atua tinien jerlo ruei, jibe ka napano nalo maka amonmonea naio ruei, ana na mia naio rudu vironiano vanlo. <sup>7</sup> Mia kamiu kuva kuve re taara ve takurano leleio vija tomu nalo na jibe na.

<sup>8</sup> Nanua beamu, ana kamiu kube tomu nalo na melijokouo ga, mia vonganei, napano kumitua kiado Tubo, kamiu kumitua kiano miamoiano bunu. Tibe na, monoka kuviel tulaka ga tibe ka kamiu kube tomu na miamoiano nene nei ruei, <sup>9</sup> bior ea miamoiano nei, mia naio mijikia rila kenemiu meuliano rivu, rimemedu, a naio rive riano, ana mia naio rijikia rivar mřarati novo nalo ve telabo. <sup>10</sup> Kamiu monoka kuvilavio sikili ka kuvileal bajago vaio napano kiado Tubo naio jaaro kanio.

<sup>11</sup> Mia kamiu liko re tomu nalo na amila vite nalo na bova, napano abe imřauano kurano na melijokouo ga. Mia bo verenio kamiu kuvar saba nalo nene amei ea miamoiano. <sup>12</sup> Kito romimou kija ga ka rover vite nalo napano mřa aba amila luklukuiaio, <sup>13</sup> mia bogo napano Atua naio rivetavo ka vite nalo nonovio amei ea miamoiano, mia miamoiano nei naio rila bajago nalo nei amalmaluvo. <sup>14</sup> Mia bogo na miamoiano mila vite nalo amalmaluvo medave jibe na, vite nene nalo bunu amijikia amei tibe ka miamoiano. Vite nei javukia iou napano berii jibe nei, berenio

“Jau napano komonmelio ruei, ketevijo, kotumulolu ea namřariano, komeul bereio,

ana mia Kristo naio rimereraliso.”

<sup>15</sup> Bior tena ana kamiu monoka kuvitikar vatitig kamiu rivu, ka mia kamiu kuviel tumřabe. Mia kuvitibe ka re nalo na maka ve pariparilo, mia kuvila bajago nalo na tomu nalo na abe masou bo. <sup>16</sup> Kamiu monoka kuvisel ea buluvio nonovio napano kuvilealio, ka kuvila imřauano na bo ea, bior kito rojua bogo na vovaiano nei. <sup>17</sup> Mia kamiu kuviaovovu re, ana monoka kuvilavon ka kuvijikia vite nalo napano kiado Tubo naio jidom kamiu ka kuvilaio. <sup>18</sup> Mia kamiu kumunu re bunu mřarjumeľmřelu rivano-o mia mřa kuvilalava pariparimiu, ka bajago na naio mijikia rila bulag kenemiu meuliano vodolu bereio. Mia kamiu monoka kuvujo ga ka Niununo

Lu. <sup>19</sup> Bo ka kamiu kuvitukunu van kamiu ea iliano nalo napano ea Niosi na Iouano Nalo, vija iouano lu nalo, a iou navameneano van kiado Atua, mia kamiu monokanio kuviou ka iouano lu nalo nene, ka kuvamenea kiado Tubo, ea kenemiu iviso vodolu. <sup>20</sup> Mia bior vite nonovio, tulaka ga kamiu kuvitunãa kuver siva van Atua karamãado, ea kiado Tubo Yesu Kristo siano.

### *Bajago na soriano*

<sup>21</sup> Kamiu nalo napano abe namone-ano, surãano nalo a tire nalo, kamiu monoka kuvatove ka kamiu, tibe ka ga napano kamiu kubatove ka Kristo.

<sup>22</sup> Kamiu tire nalo napano kumisoro, monoka kuvatove ka kouemiu nalo, tibe kanio napano kamiu kubatove ka kiado Tubo, <sup>23</sup> bior ka surãano naio be parinio ka koano, jibe ka Kristo naio be parinio ka kiano nalotvano napano kiano, napano be tati na naio napano naio milarurio. <sup>24</sup> Bior vite na, tire nalo monoka avatove ka koalo nalo ea vite nonovio, tibe ka Yesu kiano nalotvano jo batove ka naio.

<sup>25</sup> Mia kamiu surãano nalo napano kumisoro, monoka kamiu kuvisidom m̃lea kouemiu nalo, tibe ka napano Kristo naio jidom m̃lea kiano nalotvano, ana naio mijamo ka kiano meuliano biorio. <sup>26</sup> Naio mila kiano nalotvano meravo, a naio je ka uei a ka kiano iliano, naruei naio miokoio ban Atua. <sup>27</sup> Kristo naio mila jibe na, ka naio mijikia rivuru kiano nalotvano nei rimee ea naio, napano naio rive lu mia rive lu batitigio to, tibe ka niatira sesa napano naio ju rorea ka mia soro, naio meravo bo, maka vite tai rila niegeniege naio, a amiovovua batitig naio bo mia bo. <sup>28</sup> Ea bajago nene ga, toro monoka to sidom m̃lea koano, naio rivitikar batitigio tibe ka napano naio jo bitikar vatitig niabene. Surãano napano jidom m̃lea koano, naio jo jidom m̃le naio bereio. <sup>29</sup> Maka toro tai to rivitii va kanio taniabene, ðeli na rila lelanio bereio, mia tomu nalo aju abagan batitiglo, a aju abitikar vatitig taniabele nalo. Nina jibe kanio napano Kristo mila ban kiano nalotvano, <sup>30</sup> mia kito romijikia batitig vite nei, bior kito robe torogio na kanano taniabene nalo. <sup>31</sup> Iliano Lu naio beriio bunu ruei napano surãano bija koano, naljuo abe taniabele takurano ga, napano naio berenio, berinavo "Bior vite na, mia surãano naio tuvan karamãano naio kenieno, riva rivijuru kar koano. Naruei mia nalo ve juo amei tibe ka taniabene takurano ga."

<sup>32</sup> Iliano Lu nei, be iliano na temi tai joaio, napano beamu naio be navigivani-ano ga tai, mia vonganei, nemijikia ka iliano nei naio jo berial Kristo bija kiano nalotvano. <sup>33</sup> Mia kamiu kuvisidomii re iliano nei kuver naio maka to riverii kamiu bunu, makanio, naio jo berenio na. Riano ga, kamiu surãano nalo nonovio, monoka kuvisidom m̃lea kouemiu nalo, tibe ka na kamiu kumisidom kamiu ga, a kamiu tire nalo nonovio, monoka kuvatove ka kouemiu nalo.

## 6

### *Bajago na kiritete nalo naliko karamãalo nalo a kenielo nalo*

<sup>1</sup> Kiritete nalo, kamiu kube nataki na Tubo kanano, kamiu kumonea karamemiu bija koniomiu nalo, vite nei naruei naio memedu ka kamiu kuvilaio. <sup>2</sup> Tuboiano tai ea Iliano Lu napano Atua kiano naio berenio jibe nei, napano naio berinavo,

"Kamiu kuvatove ka karamemiu a koniomiu nalo,"

mia nina naio be natuboiano jukamu napano be verikariano mave ea naio, napano naio berinavo,

<sup>3</sup> "Verenio kamiu kuvila tibe na,

mia vite nalo na kenemiu meuliano nalo amijikia avuro rivu, a mia kenemiu meuliano nalo ea borotano nei ve tebievi." *Tiut 5:16*

<sup>4</sup> Kamiu karamãalo nalo a kenielo nalo, tiniemiu riviludie re kenerimiu nalo tulaka, rivano-o mia ajikia tiniel ser kamiu bereio. Mia kamiu monoka kuvisavoriri batitiglo rimemedu rivu, kuverlogloglo, a kuvisiloglog vanlo m̃arabo nalo na kiado moneano ea Kristo.

### *Bajago na tomu na iñauano, naliko kialo tubo nalo*

<sup>5</sup> Kamiu tomu na iñauano, kamiu kuvitovon ka kenemiu tubo nalo na vio yetano nei, tibe ka napano kumerou kalo, a kuvatove kalo, mia monoka kuvila tibe na ea kenemiu iviso momou nalo, tibe kanio kamiu kumitu kumirãau Kristo kiano. <sup>6</sup> Maka rivu ka kamiu kuvitu kuvila tibe na ea bogo napano ga nalo aju kamliko, ka mia kuvilavon na kuvilalo asaaro ka kamiu, mia monoka bogo nonovio kuvila vite nalo napano Atua naio jidomio, vija kenemiu iviso rianiano nalo, tibe ka napano kube Kristo kiano tomu na iñauano nalo. <sup>7</sup> Monoka kuvisaaro ka kenemiu iñauano, mia bo ka kuvila re bunu iñauano na tavukia napano kumirãau toro kanano ga, mia kuvila tibe ka kumirãau kiado Tubo kanano. <sup>8</sup> Kamiu

kuvisidomii von, toro tai naio be tubo, ĉeli na naio be toro na iñauano ga tai, be kurano, mia Atua sian meran bereio van rimemedu ka kiano iñauano novo nalo.

<sup>9</sup> Mia kamiu tubo nalo na tomu na iñauano nalo kanalo, kamiu bunu kuvila rimemedu van kenemiu tomu na kenemiu iñauano nalo, mia kuvil re ka tiniesereiano tulaka vanlo. Monoka kuvitu tiniemiu rimaio ka kamliko nalo, kubiniu kenemiu Tubo takurano ga, napano joa vio mave, a napano naio jom̃a mila be verare ga ban tomu nalo.

*Kito roju romila mira ka Siñaro*

<sup>10</sup> Vaataro kanio nala nonovio kiaku iliano naruei, mia nejidom never ka kamiu, ka kamiu kuvilavio sikili ka mia kuvisikili ea kiado Tubo, vija kiano burum̃ara moroano na toru nene. <sup>11</sup> Kamiu kuviya kuluniabemiu kouo nalo na mira napano Atua jiano ban kamiu, ka mia kuvijikia kuvitu sikili, a ka kuvituko vio ka buruniavo nalo napano Siñaro kiano, vija kiano juboluboiano va nalo napano naio jom̃a mijukujuku kamiu kanio. <sup>12</sup> Nalo napano m̃a kito roju romila mira kalo, ea kiado meuliano, nalo maka ave kulorinio. Mia roju romila mira ka moroano dolu nalo, a siñaro nalo kialo tomu na tortoru nalo, a kialo tubo nalo napano abe burupati na melijokouo na vio yetano nei vonganei, ana rojum̃a romila mira die semei va nalo na telabo napanoaju janea vio. <sup>13</sup> Mo bo kanio kamiu kuviya vatitig saba nonovio nalo na tena mira na Atua nei kiano naruei, mia bogo nonovio ga a ea legiano nonovio ga napano Siñaro naio rime ka rila mira ka kito, mia romijikia rala mira ka uolu nalo na, rivano-o mia rotovululo, rivano-o riviniu, mia kito rotumolu rotu sikili kia na vo rotu.

<sup>14</sup> Bogo napano kamiu kumitumolu ka kuvila mira tibe na, kenemiu vite na mira nalo ajibe nei naruei. Kulubue napano kuburukario ea m̃ariĉimiu nalo, nina jibe kanio napano kubokar bajago na ilirianiano. Kuluniabemiu kouo napano juko vio ka mokotenemiu nalo ka buruniavo, nina jibe kanio kubokar bajago na memeduoano ea kenemiu meuliano vodolu nalo. <sup>15</sup> Kulubue na toru tena ieliano na jaamiu, nina jibe ka kumitu vatitig ka kuva kuverial Ioluano Vou na tum̃aroano.

<sup>16</sup> Burum̃ara selap napano kumidukario ka kuvituko vio ka buruniavo nalo na Siñaro kiano, napano sebi bilvili ealo, nina jibe ka kenemiu viekouoiano na jikili ea Atua.

<sup>17</sup> Basaro na mira na pariparimiu, nina javukia ioruriano napano Atua jiano ban

kamiu, a iobogu na mira na Niununo Lu napano kubokario, nina naio javukia Atua kiano Iliano Lu.

<sup>18</sup> A vija vite nalo na, kamiu monoka kubolkouo bunu, monoka kuvika den Atua ka rijai kamiu. Bogo nonovio ga, monoka kuvitur̃a kubolkouo ea moroano na Niununo Lu, mia kuvitu tiniemiu rimaio ka namoneano lu dolu nalo tulaka ea kenemiu volkouano nalo, napano mia miremiu nalo ve temi re bogo tai.

<sup>19</sup> A bereio, monoka kubolkouo rivior kiniau bunu, ka mia Atua naio sian bogo na iliano van kiniau, ka nesidomdeio re ka mia neverial Ioluano Vou na Kristo kiano, napano beamu, naio joluku ka tomu nalo, mia vonganei, mia nesikili ka neverialio vanlo. <sup>20</sup> Kiniou nobe toro na berial iliano na Ioluano Vou nei, mia nojoa yimo natetavokoiano, mia monoka kubolkouo ka mia kiniau nesidomdeio re kanio mia neverial Ioluano Vou nei ea vio nei, tibe napano memedu ga ka nalaio.

*Pol kiano iliano na maaro*

<sup>21</sup> Kiniou nejidom ka kamiu kuvi-jikia kanaku lilianiano nalo, naruei ka tena nemiila kiado bilbilu novo nei, Tikikas, biedu ea kamiu. Naio jom̃a be niabene ea iñauano nalo na kiado Tubo kiano ea vio na, <sup>22</sup> ana mia naio riverial van kamiu ka kumemi numitu jum̃abe, ka mia kumijikia kuvijog rivu ea kumemi bereio.

<sup>23</sup> Ana tum̃aroano, a jidomiano, a viekouoiano binime den Atua Karam̃ado a Yesu Kristo kiado Tubo,aju bija kito a namoneano nalo nonovio. <sup>24</sup> A tiniamemiano napano Atua kiano naio toa kamiu, a ea kito bunu, napano kito nonovio rosidom m̃lea kiado Tubo Yesu Kristo, napano mia kito rosidom naio rivano-o ribisi deio.

Kiniou, Pol.

## Mesi Napano Pol Bivitauiiao Ban Namoneano Lu Nalo Na VILIPAE Verialiano Moti

*Tukunuano bulati na niosi nei*

Pol jiri mēsi nei ba ban yimo lu na Vilipae napano abe tomu moti na Yurop napano Pol mioliolu banlo, ana abinimeī abe namoneano. Vilipae na buruvenuo na toru tai na tanobuku na Masetonia napano jo yetano ka Parinio Tubo na Romo nua. Pol jiri mēsi nei ea bogo tai napano naio joa nalakoiano, a ea bogo nene namoneano tealo napano aju amilkuei keano naio. Mia naio mijog bova bunu ka kialo verloglogiano sibisibiano napano jo joomo ea yimo lu na Vilipae. Mia mēsi nei berial ka Pol moneakar Atua, a jaaro mia jaaro, ana kito romijikia ka naio mila jibena bior napano naio monea Yesu Kristo kirsikili.

Pol bivitaui mēsi nei ka river sivaiano van namoneano nalo na Vilipae napano ajunā amija naio ka kiano sidomiano nalo. Nalo na ajunā ajuvan veru tealo ba ban naio ka rijai naio. Mia naio jiri mēsi nei ba banlo, ka ridular kialo jidomiano, ka atu amonea Yesu Kristo sikili. Naio mila jibena bior napano maka rivu ka ajog napano naio joa nalakolano, naruei mia ajog rivova laka riviorio. Naio ber kalo ka monoka ala kialo jidomiano vatove, jibe Yesu Kristo kiano jidomiano. Maka rivu atu ave mārou, a atu asidomii nalo ga. Naio ber kalo ber meuliano vou nei napano amijeivio ea Yesu Kristo, naio be vite napano Atua jian ga banlo ea kiano tinieseseiano, a abokario ga ea kialo moneano. Maka avokario rivior napano amonea tuboiano na kulo Israel kialo, makanio, abokario bior napano amonea Yesu Kristo. Pol jidom ka namoneano nalo na Vilipae monoka avokar Kristo kiano bajago. Naio berinavo nalo napano amiasol vatitig ea Yesu Kristo amijev tumāro na be riano a aju ajaaro bogo nonovio, bior napano Atua ga jian tumāro nei banlo, a mila lo ajaaro.

Vite burtumoruo tai napano Pol berio ea mēsi nei, nina napano namoneano nalo monoka aiasol vatitig ea Kristo, a napano monoka asaaro, a napano kialo jidomiano bija kialo moneano monoka atu sikili ea naio bogo nonovio. Mesi nei berial ban kito napano Pol tinienmīia laka namoneano nalo na yimo lu na Vilipae.

*Torogio nalo na niosi nei*

Iliano moti 1:1-11

Vite nalo napano aju amaluvo ea Pol 1:12-26

Namoneano nalo kialo meuliano monoka takii Kristo kiano meuliano 1:27—2:18

Pol mila tiiano ka riila Timoti rivan ea tomu nalo na Vilipae a riila Epavrotaitas rivan berei vonuo 2:19-30

Namoneano nalo na Vilipae monoka avitakar vatitig ka kialo uolu nalo 3:1—4:9

Pol bija kiano bilbilu nalo na Vilipae 4:10-20

Iliano maariano 4:21-23

*Iliano na be moti*

<sup>1</sup> Mesi nei, tomu juo namā amimāu kurano ga Yesu Kristo kanano, naina be kumemi juo kiniou Pol bija Timoti, kumemi juo nubivitaui biedu ban kamiū, napano kamiū kumitua komeli na vio Vilipae, nina kamiū namā kenemiu meuliano naio jo bo bija Kristo, jibe ka kamiū kube namoneano lu nalo, bija kenemiu navagadeano nalo a kenemiu ijaiano nalo.

<sup>2</sup> Kumemi juo numisaaro ka nuviviuo kamiū bereio ea mēsi nei, ea Atua karamādo siano, a ea kanado Tubo Yesu Kristo siano, a kumemi juo nubika nalo abe juo ka mia adu tiniememiano vija tumāroano toa kamiū vonganei.

*Pol kanano volkouano biorlo*

<sup>3-4</sup> Kiniou nojorā tinieku maio ka kamiū julaka ga ea kanaku volkouano nalo, a najaaro toru ka notorā nobolkouo ka kamiū van kiado Atua, a ka naver siva ve toru vanio ka kamiū. <sup>5</sup> Nojo tinieku maio ka kenemiu vitikariano nalo ea kiniou, bija bunu kiado imāuano vei nalo na loluano Vou na bo, jikario ea bogo na kiniou nejikar kanaku imāuano ea kamiū, binimeī bokar vonganei, mia nober siva toru biorio. <sup>6</sup> Kiniou nomonea ka Toro na Toru, na naio jikar kanano imāuano na bo tai ea kamiū ruei, mia naio mijikia rimāu rivanvano-o rila nonovio battigio riviniu ea bogo na maaro, nina ea Yesu Kristo kanano burumāra legiano nene. <sup>7</sup> Tibe na naruei ana kamiū kuvialio ka kiniou nojo nojidomii kamiū toru, mia nomialio ka nina naio memedu ga, bior kito raba jouro vio takurano ea Atua kanano tiniememiano ruei, naruei kamiū kitoliko ruei ea vite miroano, ea bogo na bo a bogo na bova. Vonganei, kiniou nobokar batitig kamiū kumitu jouro ea kiniou, naruei mila na vonganei na nojoa nalakoiano, naio javukia na kam liko kiniou. Mia ver avuru kiniou nava komeli ka ail van kiniou rivior

Ioluano Vou na bo na nojomã neberialio, mia kam bunu kuvitu vija kiniou keano vo. <sup>8</sup> Naina be riano na, mia Atua naio mijikia bunu ka nejidom toru ka neial miremiu nalo bereio. Aue, kiniou tinioku jii kamiu na toru ea tinietiano nonovio na Yesu Kristo kanano. <sup>9</sup> Kiaku volkouano na ka kamiu naio jibe nei, neberinavo kenemiu tinietiano mia naio monoka to riluo danãariga, mia ver jikiaiano na bo a mãsosouano a vitii veveiano bunu nalo atua kamiu, nalo mijikia rijai kenemiu tinietiano nei rimei ve toru lie vo. <sup>10</sup> Mia ver kamiu kuvitibe na, mia kumijikia kuvitu kuvidu ga bajago nonovio na naio bo laka, a kuvituvan nana naio bova, ana mia kenemiu meuliano mijikia to rimeravo rivu, mia ve re titai na naio toa kamiu ea Legiano na Kristo kanano na jo binimei. <sup>11</sup> Ana mia kenemiu meuliano nalo amijikia avar na medeuano m̃arati nene napano Yesu Kristo naio jian biedu, na naio jibe ka m̃arabo tai naãa kito romijikia rovamenea Atua kania, a napano Atua bunu naio rimerera kania.

*Pol naio joa nalakoiano mia naio miãau Tubo kanano*

<sup>12</sup> Kuruaku nalo a kuvivinioku nalo, kiniou nojidom neverial vite nei van kamiu, ka bogo va nalo na amiyotuba ka kiniou, nalo maka atokovio ka kanaku iãauano, makania. Mia aju amijai toru ka rila Ioluano Vou na bo nei rivian lie ea vio telabo dolu nalo. <sup>13</sup> Ea tivelinio na vio nei na kiniou nojoaio, neialio ka tomu na mira nalo amijog Ioluano Vou na bo nei ruei, a naio ba bokar nalo na mira na ea yimo na parinio tubo Sisa kunuano, bija tomu dolu nalo bunu. Vonganei, nalo nei abitulubario ruei ka nojomã nabar m̃arimieni nei bior Kristo ga. <sup>14</sup> Mia kiniou najaaro toru bunu ka nemial ka bogo na abokar kiniou ea nalakoiano jibe na, mia vite nei naio maka rila namoneano dolu nalo na vio nei amerou, mia mila nalo aju ajumolu ajikili lie vo ea Tubo, mia nalo aju ajidel dolu ka ga aberial Atua kanano iliano.

<sup>15</sup> Nalo amioliolu ka Atua kanano iliano, naio be vite novo tai, mia vite tai ga, kiniou nemijikia ka nalo tealu amioliolu ka Naverikariano Kristo ea jidomiano na bo, mia tealu amioliolu kania ea jidomiano na jokuano a ea jidomiano na varvariano. <sup>16</sup> Nalo naãa amiãau bo, nalo abitulubar ka kiniou nojoa nalakoiano nei bior ka na neminãau ea Ioluano Vou na bo, naruei tinielo miãa kiniou a tinielo miãa nalo na maka ajogio vo, naruei amioliolu bija jidomiano na bo. <sup>17</sup> Mia nalo dolu na, amioliolu ka Kristo mia maka ave riano ga,

abe m̃arou m̃ele, naruei ajidom ka ala ka nalo na kija avavin. Jidomiano na bova na jibe na naio joalo, naruei bogo na amial ka amior batitig kiniou ka m̃arimieni nene na nojoa vio nei, mia amial ka vonganei kanalo bogo na ala bulag niegeniege vatitig siaku ea mirano tomu nalo, ka ala sialo rimei rivavin. <sup>18</sup> Mia kei naio mijikia, vede naina maka ve vite tai. Vede kanalo jidomiano na bo ga ãeli nana bova, ãeli na abe riano, ãeli na amila sibi, mia vite na toru, Kristo siano naio monoka riva rivatavio lie vo danãariga.

*Pol berinavo naio rimeul vede na riãaro, mia jidom Yesu ga*

<sup>19</sup> Naina naruei, bogo na kiniou nomijog ka siano jo batavio ruei, najaaro toru, a ver bogo tai nojog ka kanano iãauano naio jo jidel dolu bo kiano vo, mia nojog rivu lie vo eao. Vonganei nojoa vio tai na namial jibe ka amidu kiniou nojoa juluvatã na naãariano, mia maka ve kanaku m̃arabo na nemijikia nataluvo den bereio, mia bogo na nomijog ka kanano iãauano jo baviv jibe na, miãalar kanaku jidomiano bereio, mila na nabarkar tinioku lie ea kenemiu ilivolkouano nalo, bija iãaiano nalo na Niunuro na Tubo Yesu Kristo kanano, ka mia rivu van kiniou keano na vo. <sup>20</sup> Tibe na, vonganei kiniou nojomã nomonea jikili ka ala venia ka kiniou, mia maka ajikia ala kiniou nala titai na maka rimemedu, ãeli never iliano tai napano karina mia noimou kania ea Atua mirano bereio. Ver kiniou nemeul ãeli na namaro, mia maka notovon, ana tibe ka bogo nonovio, nejidom ga ka nesikili ka Kristo siano naio mijikia rivavin lie vo, ea venia na mia riyotuba ka kiniou ãeli na ea mokotenaku.

<sup>21</sup> Venia na joa kiniou naio jibe nei, berinavo ver kiniou nemeul, mia Kristo kiano meuliano na bo naio to vija kiniou, mia ver kiniou naãaro, nava noto vija naio, naio bo lie vo bereio. <sup>22</sup> Ver kanaku ka nemeul ea yetemeriba nei keano vo, naina nioti nene ber be kanaku iãauano novo keano vo ka mia naio rijikia rivar sano m̃arati na bo nene. Tibe na, namial jibe ka ver kiniou noto, mia rivu ga, mia nemial bunu ka ver navano, naio bunu bo. Naruei maka bunu nejikia ka mia rivu lie ka navan ea na vabe. <sup>23</sup> Kirisikili laka ka neviti veve kanaku m̃arabo juo ka nevijauia tinene, bior ea tivelinio nene, tinioku jii toru ka kiniou nemijikia notuvan yetemeriba nei, ka nava noto vija Kristo, naio rivu laka keano vo, <sup>24</sup> mia nemial bunu jibe ka monoka noto kija bereio ea vio nei keano vo, ka neiija kamiu lie vo.



<sup>25</sup> Jidomiano na jibe na naio jo jikili vatitigio ea kiniou ruei, mila na vonganei nemial jibe nemijikia neverikar van kamiu ka mia noto vija kamiu bereio kija vo, ka rila na kuvijikia kuvijog rivu ve toru ea kenemiu viekouoiano ea Kristo Yesu, ka mia kumijikia kuvan lie vija naio. <sup>26</sup> Tibe na, ver bogo tai nemijikia noyotuba ka kamiu, nomonea ka mia naio rila ka kamiu kuvisaaro lie ea Kristo, a mia naio rivu laka van kamiu, rila ka mia kenemiu saba ta bunu lie vo bereio ka kuver siva van naio, a ka kuvamenea naio riviorio.

*Kito monoka raiasosol kito, rove takurano ea mira die uolu nalo*

<sup>27</sup> Mia kito maka rejikia rimemedu vo ka mia tumabe ka kiniou, naruei nojidom ka mia kuvisidomial re kiniou, mia kuvisidomial ga kamiu. Kuviel ea m̄arabo na bo naio memedu ka kamiu tomu na Ioluano Vou na bo na Kristo. Vede nemijikia noyotuba ka kamiu, p̄eli na maka nejikia neviudu, mia bo ka lilianiano naio bokar burutilinieku ber kumitum̄a kumitu jikili bo, ka niunumi nalo be takurano, kenemiu jidomiano takurano ga ka kuvitumolu kuvitu vio takurano ga, kuvila vio sikili ka namoneano na Ioluano Vou na bo naio monoka tovulu. <sup>28</sup> Mia kamiu kumerou re, tiniemiu ribobogia venia na vede mia uolu nalo ala van kamiu. Ver nojog ka na kamiu kumitu kumila jibe na, mia rivu mia rivu, bior ka mia naio be kijokijo na Atua rivan uolu nalo ka riuedomlo, a ve kijokijo na Atua rivan kamiu ka mia naio rilarur kamiu. <sup>29</sup> Nao-o, mia kamiu monoka kuvila mira ka uolu nalo na jibe na, bior ka bogo na Kristo buru kamiu abe kanano, naio maka ka kumonea ga, mia ka kuvijikia kuvar jogvaiano rivior naio bunu. <sup>30</sup> Naio monoka tibe na, bior vonganei kito rojuña rabarbitiran burum̄ara mira na nanua kumial ka na kiniou nabario, a napano p̄eli kumitu kumijog ka nojo nabar keano vo.

## 2

*Bajago na bo napano rola van kito*

<sup>1</sup> Kiniou nojidom ka kamiu kuvisidomii von kanado meuli-ano na bo kitoliko Kristo. Kanano bajago naio jo miijalar kanado jidomiano, a! Kanano tinierruru naio mila kito romijog bo laka, a! Niununo naio mila kito roju bo bija kito, a! Ana naio mila melmeloko a tinieiano naio bujo ea kito, a! <sup>2</sup> Naruei bior naio mila bo laka ban kito jibe na ruei, nejidom notusol iliano, nebika den kamiu ka kuvan lie vo. Neber bo ka kamiu, kuvijamo ka kenemiu bajago na rivan kamiu, mia naio rive verare ka

Kristo kanano bajago na rivan kamiu. A mia kamiu tiniemiu titii kamiu naio rive verare ka na naio tinien jii kamiu, a mia kenemiu iliano vija kenemiu jidomiano ve takurano. Ver neial ka kuvila tibe na, mia nojog rivu, nasaaru mia nasaaro. <sup>3</sup> Tibe na, mia kito roim̄au re bunu ea bajago na ve vitiano, mia rala re bunu vite vija jidomiano vevavin nalo, mia romomavo, rala kito rotutano, reial kulo dolu nalo avu loa ka kito. <sup>4</sup> Kito rosidomial re ga kito, vija venia na be kanado, mia rosidomial kulo dolu nalo bunu, vija venia na be kanalo. <sup>5</sup> Bo ka jidomiano na bo a bajago na bo naio toa kito tulaka, rivior naina nam̄a kito romial ea Kristo Yesu ruei, napano bo mia bo.

<sup>6</sup> Naio jibe ka na iouano nei na naio ber, napano berinavo,

Naio be tovorovo na Atua, jibe ka nono Atua,

mia naio maka sikili ka rivare ka naio tulaka.

<sup>7</sup> Naio juvan kanano mermerano joa vio mave,

naio binimej jibe ka vite batoravavo tai ga,

naio miyotuba ea yetemeriba nei be kulorinio,

binimej jibe ka toro na im̄auano tai na maka ve siano.

<sup>8</sup> Toro na vio mave naio binimej be toro na yetemeriba,

naio mila naio batove, naio jotano yetano ka sidomiano na Atua kanano,

banbano-o na naio bokar m̄ariano ea m̄akolkolo.

<sup>9</sup> Naio monmonea Atua, naruei Atua bitirilar naio bereio,

mila kanano sio naio bavin loa laka lie ka sio dolu nalo nonovio.

<sup>10</sup> Nalo na vio mave, nalo na yetemeriba, a nalo na vio yetano, mia aviniu avatove ka sio nei,

mia anie ka naio

<sup>11</sup> mia niolo nalo nonovio avamenea Atua Teta, averial ea miralo, aver ka Yesu Kristo naio takurano be Tubo.

<sup>12</sup> Banalo, ea vio nei romialio jibe ka nam̄a Yesu naio monmonea karam̄ano, a kamiu bunu, nanua kiniou namial jibe ka kumitu kumonea naio bo bunu ruei, bo mia bo. Mia maka kumila ga ka bogo na kiniou nojo bija kamiu, mia vonganei, maka bunu noto vija kamiu, maka bunu neial ka kamiu juñabe naruei, mia nojidom ka kuvitu kuvisikili dolu ga ka rila rivano-o rivu lie tibe na.

Kamiu kubokar ioruriano ruei, tibe na naio maka rivu ka kuvitutano kule vi-jaio, mia monoka kuvisidomii rivu laka ea naio. Monoka kuvitilubar vatitig buruñara inñauano novo nañia Atua naio mila, naruei monoka kuvirñauka kija ka inñauano novnovo nalo na meuliano vou nañia naio jian ban kamiu. <sup>13</sup> Mia kiniou nomonea ka romijikia ralaio, bior ka Atua ga na naio jo mirñau ea kiado meuliano terakurano, naio jo miija batitig kito ka rila kanado sidomiano nalo ajaaro ka rila kanano sidomiano, mia naio rila kito ravare ka rala tenene.

<sup>14</sup> Tibe na, venia nañia naio joa juñamo ka mia kala, jau kala ka mia keil murñii re, ðeli kover re bunu iliano tai riviorio. <sup>15</sup> Mia kito roju iviso ka tomu nalo nañia amilaluvu mñarabo, kanalo jidomiano nalo abe dolu, mia monoka roinñauka kanado inñauano nalo avu a rimemedu. Kito robe Atua kenerinio nalo nañia bo ka ve re niamiamo toa kito, mia monoka rotibe ka yulu na mereralii mñarabo ka tomu nalo na yetemeriba nei. <sup>16</sup> Kamiu kuvar batitig iliano na meuliano rivanlo, rivan rivano-o rivokar buruñara legiano na mia Kristo rimeĩ bereio. Tibe na, mia nemijikia neial ka netikiti kule re, mia nemijikia neve mñarou ka kamiu, na nasaaro ka kamiu tibe ka abe buruñara mñarati na kanaku inñauano. <sup>17</sup> Vede mia naio rivanoo rivokar na mia kanaku burukija monoka riou rivior kamiu, mia ve tibe na, nemialio bo-o ga. Neber jibe na bior ka nemial jibe ka na mña kamiu kubarkar tiniemiu ea Yesu, kumila kamiu jibe ka jokoluolu tai ban naio ruei, mia bo ka mia kiniou bunu nasaaro ka najamo ka kiaku meuliano rivior Tubo kanano inñauano. <sup>18</sup> Naina naruei neber ka mia nasaaro ka tibe na, mia naio bo ka kamiu bunu kuvisaaro kanio, bior ver Atua naio saaro ka nemijikia nalaluvu kiaku meuliano rivior toro dolu, naio be tena bo laka tai neibano naio mila ka kiniou.

*Pol naio jidom rila Timoti rivan keanlo*

<sup>19</sup> Kiniou nojidom neverial van kamiu bunu ka ea tivelinio na kuruado nei Timoti, kanaku jidomiano naio jikili ea Tubo Yesu ka mia vesiou re, mia nemijikia neiila naio riviedu ea kamiu. Tinieku jii toru ka naio mijikia riviedu rial kamiu, karina mia naio rivar kenemiu iliano rimeĩ bereio van kiniou ea vio nei, nina ka mia rila nejog rivu ve toru laka. <sup>20</sup> Nemialio ka maka bunu ve toro dolu tai toa vio nei napano naio bo jibe ka naio ka mia nemijikia neiila riviedu kean kamiu. Be kiano jidomiano takurano bija kiniou, naruei nemijikia ka ver naio to vija kamiu, nabarkar tinieku

ea naio ka mia naio to sidomii ve toru ka rila rivu lie van kamiu tulaka. <sup>21</sup> Nalo dolu aju keano, mia nalo maka atavukia naio. Kiniou nobitilubar nalo ruei, ka venia napano naio toru ea kanalo jidomiano, nina vite nalo nañia be kanalo ga, mia vite nalo na be Kristo kanano, ajidom be iakurano ga, maka atu asidomii naio ve temi. <sup>22</sup> Mia Timoti kito romijikia vatitig ka naio bo laka. Kumijikia ruei juñabe ka napano kumemi juo numirñau burukuti vio takurano ea loluano Vou na bo banbano-o na mña kiniou namial naio jibe keneriku, naio bio kiniou tata. <sup>23</sup> Jibe na, namial naio be toro na memedu ka neiila naio riviedu kean kamiu, mia maka rijikia riviedu vo. Nojidom ka neial von ka mia turñabe ka kiniou ea vio nei beamu vo, ana naio mijikia riviedu riverial van kamiu. <sup>24</sup> Verenio mia rimeĩ rivu ka kiniou ea vio nei, nemijikia never ka mia naio re ga ve takurano napano mia riviedu riyotuba ka kamiu, mia nodu joa kanaku volkouano, nomonmonea Atua ka mia vesiou re ana mia kumijikia kuvial miraku bunu neyotuba ka kamiu.

*Pol naio mial bo ka Epavrotaitas naio rivan bereio ealo*

<sup>25</sup> Vite dolu tai bereio ka neverial van kamiu, ka kuruado nei Epavrotaitas naio mie toru laka banbano-o na namial jibe bo ka neiila riviedu bereio rial kamiu beamu vo. Kumiila binimeĩ tibe ka kenemiu ijaiano tai ban kiniou, naruei numirñau burukuti bo, numisikili numitu vio takurano na bo mia bo ea mira. <sup>26</sup> Mia vite takurano ga mieiano nei bokar naio milalelan naio batitigio, mila jidom toru ka riviedu vonuo ea kamiu bereio. Mia bogo na naio mijog ka lilian na kiano mieiano nei bokar burutiliniemiu ruei, mila na mijog bova kija, tiniene ka jidom rial kamiu. <sup>27</sup> Riano ga, mieiano nei mila naio bova banbano-o kumemi numial ka mia tovulio, mia Atua tinien miia naio, naruei naio maka mñaro. Mia nojo nojidomii ka maka Atua tinien rii naio ga, mia naio tinien miia kiniou bunu, bior ver naio mñaro mia sikili laka van kiniou, mia naio rijedu ka buruñara jogvaiano mave ka jogvaiano na mña kiniou nojo nabar ruei. <sup>28</sup> Mia bogo na mña naio jo mie jo bija kiniou ea vio nei kia ga vo, nojorñia nojidom biroviron toru ka naio. Tenena nojidom nober bo ka neiila naio riviedu rial kamiu bereio vo, mia nomonea ka mia kamiu bunu kuvisaaro ve toru ka kuvial mira bereio. <sup>29</sup> Kiniou nojidom ka kamiu kuvila kanano ilivorvoruano ea Tubo siano, kuvitkar vatitig naio tibe ka na kubitilubar naio bija inñauano nalo na mña naio mirñaukanio ea vio nei. Tomu

nalo na jibe na, bo ka rovitii veve batitiglo rivu, ħeli kito rotovonlo, <sup>30</sup> bior ka ĩa nalo amila Kristo kanano ĩmauano naio bo laka. Epavrotaitas naio jibe na naruei, napano jidomii ĩlelea ĩmauano nei, mila na maka bunu sidomial kanano meuliano, vaataro ka ĩriĩaro. Naio mila jibe na bior ka naio jidom ka monoka tiniene ka rila venia na ĩa kamiu kumidu joa ĩuĩano. Kamiu maka kuvijikia kumei kuvija kiniou, mia kumiila naio ju jeleig kamiu, binimeĩ ĩriĩau bija kiniou. Naina naruei kuvuru naio kuvila rur naio.

### 3

*Kiniou nejidom nejikia vatitig Kristo lie vo vija kanano moroano*

<sup>1</sup> Mo kuruaku nalo a kuvivinieku nalo, nejidom netikar ka netetavoko kanaku iliano naruei. Iliano na maaro tai na naio bo ka never ka kamiu naio jibe nei, berinavo kamiu kuvisaaro tulaka ea meuliano na bo napano Tubo naio jian ban kamiu ruei.

Vede iliano nene neber ka kamiu bogo telabo ruei, mia tiniemi ser re kiniou, maka nasidom rivova ka never vite na bo van kamiu ve vatelabo. Naio bo ga ka kiniou, mia nejidom jibe ka naio mijikia rijai kamiu ve burutomoruo bunu.

<sup>2</sup> Mia be iliano vou tai na tinieku maio kanio ka never ka kamiu naio jibe nei, berinavo monoka kuvitikar batitig nalo na ĩa aju amioliolu ĩlele ka pakuveuano. Nina kario aju ajikili aberinavo pakuveuano nei naruei, naio ga be ĩarabo ka toro mijikia riasol Atua kanano ĩraratavo, mia nina maka ve riano. Kiniou maka lele nasaaro kalo, namial lo jibe ka aju abior janea vio jibe ka kuli deden nalo ga.

<sup>3</sup> Venia napano kito rojuaoi, naio maka tibe na leleio. Kito maka rotu rovitii venia naĩa joa kuluniabedo riverinavo naina naruei naio mila kito robo ea Atua mirano, kar kito roju romilotu ka naio ea niunudo, mia rajaaro julaka ka tiniedo rimaio ka Kristo Yesu ga naio mila batitig kanado ĩarabo. <sup>1</sup> Ver nalo atuĩa asidom aver ka pakuveuano naio mila Atua jaaro ka kulorinio, mia monoka rover roverinavo naina be kanalo tena mokotenalo ga, mia nana be riano nene, naio nei naruei kito rojuaoi, napano rojuĩa reje bulag bajago a jidomiano na bova nalo den kanado meuliano!

<sup>4</sup> Mia ver nalo atu sikili averinavo mia Atua naio saaro ka kito ea venia ga na ĩa joa kito, vede kiniou nemijikia neverial kanaku mia naio rivu tovulu kanalo bereio. <sup>5</sup> Ver never bulag kanaku tukunu, mia kuvialio ka abiniu nono naio jakii

ga venia napano bajago na memedu a tuboiano aju aber aberinavo naio bo laka. Vite na jukamu, ea kanaku yati nalo, nomiyotuba memedu ea buruĩara yati na kulo Israel, nebe jameul na memedu ea yati na tormoruo buo na Beniamen. Teta naio nena naljuo abe kulo Ju, mila na kiniou bunu nebe Ju riano. Ta bunu, kiniou nomiyotuba bokar sude takurano nene amila pakuveu ea kiniou. A dolu, ea tivelinio na kulo Ju kanalo tuboiano, kiniou nebinimeĩ toru, nebe Varisis nene, nojorĩa neberloglog ka kulo dolu. <sup>6</sup> Mia beamu, ea tivelinio na ikurukar nalotuno na kulo Ju sikili, kiniou naruei kiniou loa ka nalo nonovio, nojo namila namoneano nalo amijikia. A na maariano nene na nemijikia neverenio, ea tivelinio na bajago kirimemedu, maka ve iliano na tuboiano tai na kulo Ju kanalo leleio napano namila korovio ħeli na namilaluvio.

<sup>7</sup> Mo vite nalo nene, amila na amial kiniou bo laka, amidu kiniou nojo mave laka. Mia bogo na Kristo bio kiniou, maka bunu neial vite nalo na never ave tena bo tai ea kiniou, namial abe tena vakovio ga, naruei nojuvan nonovlo aju, najakisor naio. <sup>8</sup> Nao-o, nemijikia never tibe nei naruei, neverinavo nojo namial vite dolu nalo nonovio abe tena vakovio ga, mia nojidom ga ka nejikia vatitig Kristo Yesu tibe ka tubo na kanaku meuliano, riva lie tibe na. Vite takurano na ga na namial naio bo, napano bo lie vo jovulu vite dolu nalo nonovio, naruei naina ga nojidomio. Kiniou nojidom toru ka novokar naio ea kanaku meuliano, mia namilaluv kanaku saba dolu nalo nonovio bior ruei, mia naio bo ga, kiniou namial vite nalo na jibe soro ga ea kiniou.

<sup>9</sup> ! Ver kanaku meuliano naio mijikia riasol vatitig ea kanano meuliano mia rivu mia rivu! Nina, kiniou takurano maka nejikia noĩmau kanio, bior ka ver nomonmonea tuboiano, mia tuboiano naio maka jikia rila ka navare ka nememedu ea Atua mirano. Mia kanado ĩarabo dolu ka rovokar memeduo nei naio jo. Nene be viekouoiano ea Kristo, a naio be ĩarabo na memeduo takurano napano Atua ga naio betavo ea ban kito napano romonea kenerinio.

<sup>10</sup> ! Ver namijikia nejikia vatitig naio ga rivu, vija Atua kanano buruĩara moroano napano mila naio meul bereio den ĩariano, mia naio rivu mia! Kiniou na jaaro ka navar burovuron jogaĩano na ĩa naio bario, mia ver kiniou nejikia rivare ka mia naĩaro ea ĩariano tai na jibe ka kanano ĩariano, mia naial rivu laka

van kiniou. <sup>11</sup> Vite kouo venia na jibe na na mia monoka noiopdulu eaio, rivu ga, mia monoka nala venia nañña nemijikia ka rila ka novokar meuliano vou ka notumolu bereio den mñariano.

*Vite na mña rojuñña romilaili von dañariga*

<sup>12</sup> Kiniou nojoñña neberii kiniou bereio jibe na, mia maka nosidom ka kuverinavo be tinieku ka nojo neber ka kiniou nebinimeí nobo nonovio, ðeli na nobokar buruka ruei. Kiniou bunu kiniou maka vo, mia bior nemijikia ka Kristo Yesu naio buru kiniou ruei nebe kanano, mia nojo nojidom nalaii dañariga bogo nonovio ka mia novokar vio tai napano mia naio mijikia saaro kanio. <sup>13</sup> Mo kuruaku nalo a kuvivinieku nalo, monoka never vatitig van kamiú ka namial kiniou jibe ka maka novokar vio nene vo, mia be imñauano tai ga na naio joa kanaku jidomiano julaka, ka mia monoka tinieku ribobogia venia napano naio ju iorou ka kiniou, a monoka nesikili dañariga dolu ka notovulu venia napano jo kamu ka miraku. <sup>14</sup> Vite nei na mña nojoñña nejikili kanio, naio jibe nei, berinavo kanaku meuliano naio jo bo bija Kristo Yesu dañariga, rivanvano- o na mia kiniou bunu tai na mia nojog vioano novo na bo na Atua kanano nei na mia naio river ka kiniou, riverinavo “! Mo, jau komei mave koto vija kiniou naruei!” Vite na naio jibe ka jidomiano na sereano tai na mña amidu batitig naio jo ana na kito rojuñña rojikiti biorio, ka rotovulu ve kanado. <sup>15</sup> Ver kito tealo, kanado jidomiano naio meruo ruei, bo ka rotumña roimñau tibe na naruei, ðeli na ver ea vite tealo, mia kito tealo kialo jidomiano maka rimeruo tibe na vo, kiniou nomonea ka mia Atua naio rila vite nalo na ameravo rivu vanlo. Vede ea vite telabo na maka romei rivu ea vo, mia naio rijai kito kanio na vo. <sup>16</sup> Mia kito monoka rovakar batitig naina napano robinimeí robo eaio ruei, kanio maka rivu ka rojoru retitiravolar denio bereio.

*Kuvitakii jaaku*

<sup>17</sup> Kuruaku nalo a kuvivinieku nalo, neber bo ka kamiú ka kuviasosol vatitig kamiú, ka kuvilavon kuviel takii jaaku ea mñarabo na kanaku meuliano. Ver kuvitilubar ka kamiú tealo ajumña amila bo jibe na ruei, mo kamiú dolu nalo kija, kuviel takii jaalo. <sup>18</sup> Kiniou neberial iliano na ban kamiú va telabo ruei, mia vonganeí neverial ve varakura bereio napano nomijog kirivova laka, jogumiraku na jo jibirbili. Nina kario nojo nemial kam tealo

napano abar sio ka abe namoneano nalo, mia kanalo meuliano nalo naio jiloglog berinavo nalo abe Kristo kiano uolu nalo ga vija sano mñakolkolo nene. <sup>19</sup> Kanado uolu nalo nei, vite na amilotu kanio, naio be mabolo ga. Kanalo vovaiano nalo bo ka aimou kanio, mia abarvar kalo laka. Vite na mña bujovujo ea kanalo jidomiano nalo, abe tena yetemeriba nei, mia kanalo jukuti, naio avakovio rivova.

<sup>20</sup> Mia kito maka rove tomu na vio yetemeriba nei, kiado buruvenuo memedu, naina tiniabene mave. Toro na toru na vio na, nina be Tubo Yesu Kristo, kanado Ioruriano, mia rojua yetemeriba nei, roju rorea keano, a roju rojirarago kuku ka mia naio rimeí bere vesiou re rivior kito. <sup>21</sup> Mia bogo na ver naio rimeí, mia rimñau vija kanano burumñara moroano napano bare ka rila vite nonovio atu yetano ka kanano tuboiano, naruei naio mia rivilig kito. Vonganeí, roju bija kuluniabedo moruo nalo na yetemeriba nei, napano amenunu, aburu kokorovio, abe tena mñariano ga, mia naio sian kuluniabedo vou tai, na naio bo jibe ka niabene, napano naio meravo, naio merera, naio jikili, naio jobo to tobo to.

**4**

<sup>1</sup> Ver tibe na, kuruaku nalo a kuvivinieku nalo, bo ka kamiú kuvitumolu kuvitu sikili tibe na ea kanado Tubo. Neber jibe na bior ka tinieku jii kamiú, nojidom kamiú toru, kamiú kumila kiniou najaaro laka, nabarvar toru ka kamiú, tenene na nojidom ka mia rivu van kamiú tulaka.

*Iliano tai na tomu nalo tai kanalo*

<sup>2</sup> Kiniou nomijog bova ka namialio ka monoka neil ve telisu van kanado tira juo nei, Yuotia naio Sintike. Naljuo ajumña abilvilii ealo toru laka, tenene na neber ka kamiú ka nojidom ka naljuo monoka ala kanalo jidomiano rivatove, rimeí ve takurano ea kanado Tubo. <sup>3</sup> Tira juo nei, nanua numimñau vio takurano kumemi liko bo laka, bija bunu tom nei Kleman a tomu na imñauano dolu nalo, na numimñau jikili bior loluano Vou na bo banbano-o na nubiniu nube jidomiano takurano ga. Kiniou nemijikia ka tomu na imñauano nalo nene sialo abiniu abivitaui bulagio jua niosi na meuliano ruei, mia bogo na be vuruvureiano jo iviso kalo bereio, nomijog bova toru. Jibe na, kanaku vikadeniano tai biedu banso, kanaku bilbilu na robe juo robe tomu na romimñau vio takurano nua ruei binimeí. Nebika denso ka jau naruei kajai tira juo nei ka amei ave bilbilu na bo bereio.

*Iliano nalo na tunukakariano*

<sup>4</sup> Naruei kanaku iliano tai van kam nonovio bereio, neberinavo kamiu kuvisaaro ea Tubo, kuvisaaro ea naio tulaka. <sup>5</sup> Bogo na m̄a kamiu kubiniua bogokouo, kumelumu, kuvila ka tomu nalo ajikia ka avitilubarario ka kenemiu jidomiano naio tebievi bo. Kuvisidomii von tulaka ka vesiou re ga mia Tubo rime i bereio. <sup>6</sup> Kamiu kuvila re kenemiu jidomiano rivova tulaka ea vite nalo, mia ea vite venia na mia naio riyotuba ea kenemiu meuliano, kuver siva van Atua rivorio. Kamiu kuverial ka naio vite venia na jumemiu bulati kanio, kubolkouo kanio, kuviteg vanio rivorio, a nina monoka kuvila vija jidomiano na sivaiano tulaka.

<sup>7</sup> Naruei ver kamiu kuvidu vite nonovio toa juñano tibe na, mia kuvial ka na mia Atua rudu kanano tuñaro loa kamiu, naio rijai kamiu. Kanano tuñaro nene naio burutomoruo laka, mijikia rila rivu laka van kito tovalu venia nañia romijikia rosidomio, rivanvano-o rila napano mia rivokar vatitig kanado iviso ðeli kiado jidomiano naio to sikili ea Tubo Yesu.

<sup>8</sup> Kuruaku nalo a kuvivinieku nalo, vede vaatara ka nala nonovio kanaku iliano van kamiu naruei, mia nojidom notunukakar kamiu ka kuvila kenemiu jidomiano naio rivujo ga ea vite nalo nañia Atua naio jidomii. Vite venia na be riano, ðeli vite venia na naio loa, ðeli vite venia na naio memedu, ðeli vite venia na naio meravo bo, ðeli vite venia na naio kirinovo, ðeli vite venia na naio be navijukuvuiano, ðeli vite venia na naio ka aiaia, ðeli vite dolu venia na naio bo, naina naruei be vite kinkin nalo naruei napano bo ka atua kanado jidomiano tulaka. <sup>9</sup> Naina naruei be bajago nalo na nojorñia namila vio jikili ka naverloglog ka kamiu, ðeli kuvokar den kiniou, ðeli mave ka nina, kamiu kuvial ea kanaku meuliano. Naruei ver kamiu kuvial ka be riano ka bajago na bo nalo nene tealo na ajua kanaku meuliano, neber bo ka kamiu neberinavo kamiu bunu kuvije batitiglo amonea kenemiu meuliano nalo. Mia ver kuvila tibe na nomonea ka mia kanado Atua na tuñaro mia naio to vija kamiu, rijai kamiu.

*Siva ka ijaiano*

<sup>10</sup> Kiniou nojidom never ka kamiu never buruñara saariano na ea kiniou, ka kirisio kija maka naial vite tai, mia nobokar ijaiano telisu nei ga kamiu kumituvan binime i. Nomonea ka kamiu kumitu tiniemiu maio ka kiniou, mia nemijikia ka maka ve kenemiu m̄arabo ka kuvila vite rime i rivokar kiniou ea vio nei. Mia bogo na

nemial ijaiano nei binime i vonga, namial jibe ka na kenemiu jidomiano na ijaiano na ea kanaku iñauano naio meul vatitig bereio, nabamenea Atua biorio. <sup>11</sup> Kiniou neber jibe na, mia maka ve tena noto nala vukuleleano ka maka ve kanaku titai, bior vite na namila kakario mugaruei, ka vite venia na mia riyotuba ka kiniou, ðeli na kiniou noto tuñabe, mia nasaaro ga. <sup>12</sup> Kiniou noto tano ðeli noto mave, siseri kiniou ðeli na saku sinaniano ve telabo, juñaku ve teau ðeli juñaku rivujo, kiniou nomiovo dulu ea vite nalo nonovio ruei. Bogo na bova vede bogo nabo mia Atua kanano m̄arabo ka noiopdulu ea naio bo jo, mia naio berloglog kiniou kanio, mila na namila kakar vite nalo na ea naio ruei. <sup>13</sup> Tibe na, vonganei namial jibe nemijikia notovulu vite nonovio napano mijikia rime i ea kiniou, naina ea buruñara moroano na Kristo naio jo mila nejikili eaio.

<sup>14</sup> Kiniou nojidom neverinavo kamiu kulo Vilipae, kumisidomii ka kuvijai kiniou ea kanaku bogokouo tibe na, kamiu kumijuku bo toru laka. <sup>15</sup> Jibe ka napano kamiu kubitilubarario ruei, ka bogo na nejikar nemiel bior Ioluanu Vou nei, bogo na najaluvo ea vio Masitonia nabano, maka ve lotuano tai napano naio rijai kiniou leleio, mia kamiu ga. Nejian vite nalo na telabo banlo, mia maka nalo tai napano naio ve tiniene ka sian vite rime i ka rijai kiniou ea kanaku m̄arabo ðeli na kanaku iñauano. <sup>16</sup> Mia kamiu kubo laka, kumitu kumijai kiniou ea bogo na juñaku bulati, kumiturnia kumituvan ijaiano binime i ban kiniou va telabo kija, bano-o bokar bogo na naba nojo nomiñau laka yako Tesalonaika. <sup>17</sup> Nojorñia nemil jibe na, maka ka noto nosidom navar ijaiano tulaka, mia bior ka nojidom neial ka lotuano nalo atu aija Tubo kanano iñauano. Naina bior napano ver kuvila rivu van toro dolu tibe na, ana kenemiu bajago novo nene mia naio rivar marati nene rila vite nonovio rivu lie van kamiu bunu. <sup>18</sup> Tibe na, neber siva toru laka ka ijaiano nalo nañia kamiu kumiila Epavrotaitas naio bar binime i, nobokar nonovio ruei. Ijaiano nalo na binime i, naio ba loa ka napano nojidom, ana nemial ka vonganei naio bo laka ban kiniou. Kenemiu ijaiano nalo nei, ajibe ka bonotanunu tai napano naio be sano bonoti nene bo laka, ajibe ka jokoluolu tai na m̄a kumisian ban Atua napano naio mial bo laka, naio jaaro toru kanio. <sup>19</sup> Mia nemijikia ka ver jumemiu rive bulati bogo tai, mia kanaku Atua naio rivitii ea kamiu tulaka, bior ka Kristo Yesu naio mila ruei

Atua kanano mermerano na mave nalo burutomoruo laka. <sup>20</sup> Tibe na, mia rotu rodular karamādo Atua siano tulaka, mia ravamenea naio rivan rivano-o mia maka rijikia ribisi bogo tai, Mm.

*Iliano namāro*

<sup>21</sup> Kuver lilian kanaku iliano nei van namoneano lu nalo namā aju na, a kuverial vanlo ka nojo tinieku maio ka nalo bogo nonovio. A kuruaku a kuviviniuku dolu nalo namā aju bija kiniou ea vio nei, nalo bunu ajidom aver kavijo bo vede na bogiano bo van kamiu. <sup>22</sup> Nalo ta bunu ka atuvan iliano tibe na van kamiu, naina be namoneano lu nalo abiniu ea vio nei, bija bunu nalo namā amirāu parinio tubo nei Sisa kanano ea kunuano na toru. <sup>23</sup> Kanaku volkouano, ka Tubo Yesu Kristo kanano tiniememiano naio toa niunumi nalo, naio to iviso ka kamiu bogo nonovio.

Kiniou, Pol.

## Mesi Napano Pol Bivitauiiao Ban Namoneano Lu Nalo Na KOLOSIA Verialiano Moti

*Tukunuane bulati na niosi nei*

Kolosi be bulukomeli tai na tanobuku nei Esia napano nua jo nuayetano ka Parinio Tubo na Romo, ea venuo nei napano banei siano Teki. Bulukomeli nei jo tevelinio yetano na Evesas ea tivelinio na ban kamu kean kito. Mesi napano Pol jirio ba ban namoneano nalo na Kolosa, naio juvan ba ban tomu nalo na yimo lu na vio na. Paul nai maka tikario yimo lu na vio Kolosi, mia vio na joa ga tanobuku na vaataro ka Evesas napano be burupati bulukomeli na tanobuku nene, ana Pol naio jo miñau ea vio na bogo nonovio. Mia bogo napano Pol jo Evesas, naio jo miila kiano tomu nalo abanvan ka averial ioluano vou ea vio nalo ea tanobuku nei, a Kolosi be vio nalo nene tai. Naruei bior vite na, naio mialio ka be kiano iñauano ka vitikar nalo na Kolosi bunu.

Pol mijog verioiano ka be naverloglogiano nalo na yimo lu ajua vio nei napanoaju aber ilisibisibiano nalo aaju aberinavo tomu nalo monoka alotu kanio tomu tortoru a vija siñaro nalo kialo navuruñaraboiano nalo, ka ajikia ajikia vatitig Atua, a ka ajikia avokar meuliano napano bujo vatitig ka vite nonovio. Mia atu averloglog tomu nalo ka monoka atakii tuboiano moruo ea tivelinio na sinaniano, a vite tealo bereio, a monoka ave pakuveu.

Naruei Pol jiri mēsi nei ka rilikuei keano jidomiano va nalo nei, a berial kalo Yesu Kristo kiano ilirianiano nalo. Burupati jidomiano napano naio berenio jibenei, ber Yesu Kristo mijikia sian meuliano van kito napano bujo vatitig ka vite nonovio, a verloglogiano dolu nalo nei ber Yesu Kristo naio mijikia ridu meuliano van kito napano robujo vatitig ka vite nonovio, a verloglogiano dolu nalo amijikia avurbulag tomu nalo den meuliano nene. Kristo miñau Atua kiano ka rila yetemerba nei, a naio miñau Atua kiano ka rivuru tomu nalo amei bereio ea naio. Toro monoka riasol ea Kristo ka rijikia rijeve meuliano, a maka bunu mñarabo dolu tai bereio. Iorou Pol berial banlo vite nalo na amijikia ajevio ea kialo meuliano bior napano amonea Yesu a amiasol vatitig eaio.

Bo kito romjikia ka toro nei Tikikas, napano Pol jian mēsi nei banio ka ridu riva

van namoneano nalo na Kolosi, naio be toro nene kiaga napano ban bija Onesimas, buru bereio naio ban ea kiano vio. Onesimas, naio be toro na iñauano kurano tai, a naio be toro nene kiaga napano Pol berio ea kiano mēsi napano juvan ba ban Vailimon a bika den Vailimon ka viekokoa naio.

*Torogio nalo na niosi nei*

Iliano moti 1:1-8

Kristo kiano bajago, bija kiano iñauano 1:9—2:19

Meuliano vou ea Kristo 2:20—4:6

Iliano maariano 4:7-18

*Pol jikar kiano iliano banlo*

<sup>1-2</sup> Kiniou Pol, kiniou nebe atevi napano Kristo Yesu kiano, napano Atua naio bitiri lar kiniou, najaaro ka neviviuo kamiu ea mēsi nei, napano nejirio biedu ban kamiu namoneano lu nalo na Kolosa, napano kamiu kuruaku nalo a kuvivinioku nalo ea Kristo, napano kumitu jikili eaio.

Kumemi juo Timoti, napano naio jo bija kiniou, nubolkouo ka mia Atua karañado kanano tinievuano a tunñaroano to vija kamiu.

*Pol naio berenio siva ban Atua kar nalo*

<sup>3</sup> Bogo nonovio ea kenememi volkouano, kumemi juo nuber siva bior kamiu ea Atua, Yesu Kristo kanado Tubo karañano.

<sup>4</sup> Nina bior kumemi juo numisaaro toru ka kamiu, bior lilianiano bokar kumemi ber kamiu kumitu kubiekouo jikili ea Yesu Kristo, a kumitu tiniemiu jii namoneano dolu nalo. <sup>5</sup> Bajago novo na jo maluvo ea kenemiu meuliano bior kumitu kumisidomii mēlea ka kumijikia kuvokar saba novo nalo napano Atua bar vatitigloaju tiniabene ka ve kenemiu. Saba nalo na jibe na, kumijog Ioluano Vou berenio rui. <sup>6</sup> Mia Ioluano Vou nei biedu ban kamiu rui, a vonganei, jo ba tavio keano vo ea vio dolu na yetemeriba. Naio jo ba tavio jibe na, naruei jo miluo a bar mñarati novo nalo, jibe ka napano mila ea kamiu, jikario ea bogo napano kumijog beamu, napano kubitulubar ka Atua kiano tiniememiano ea kito burutomoruo a beriano laka. <sup>7</sup> Vite nalo na, Epavras naio berloglogio ka kamiu rui, ea bogo napano naio midu jelememi biedu berial ioluano vou nei ka kamiu na be moti. Naio be toro tai napano numiñau biju vio takurano, a naio biekouo vatitig ea Kristo kiano iñauano novo nalo. Kumemi numisidom naio toru, <sup>8</sup> mia vonganei, naio binime bereio ea kumemi rui, jian veriiano novo tai ban kumemi, napano berii buruñara

tinietiano napano Niununo Lu midu joa kenemiu meuliano nalo.

<sup>9</sup> Kanio tena, bogo napano kumemi juo numijog Epavras kiano iliano, kumemi juo numitu nubolkouo ka kamiu julaka ga binimeï bokar vonganei, a numitumña nubika den Atua ka Niununo naio sian m̄sasouano a jikiaiano vu van kamiu, ka mia kumijikia kuvijikia nonovio Atua kanano tineiiano nalo. <sup>10</sup> Tibe na ana mia kumijikia kuviel rimemedu ea m̄rarabo napano bo ka tomu nalo na Tubo kanano amiel eaio, a mia kumijikia kuvilaio ka mia naio rijikia saaro m̄lele ea kenemiu bajago nonovio nalo. A mia bo ka kurukuti na bo mijikia rimaluvo ea kenemiu meuliano nalo a ea kenemiu im̄auano nalo bunu, a mia kenemiu jikiaiano ea Atua mijikia riva ve toru lie vo. <sup>11</sup> Kumemi juo nubolkouo ka mia Atua kanano moroano na toru rila kamiu kuvokar moroano bunu, ka mia kumijikia kuvitumolu kuvitu sikili ea bogokouo, a mia kenemiu iviso nalo amijikia ave tebievi, a asaaro ga ka bogo nalo na tibe na. <sup>12</sup> Monoka rover siva van Karam̄ado, napano naio mila kito bunu, kitoliko namoneano lu dolu nalo, romijikia ravar kiano jajum̄ano, jouro ea kiano navenatuboiano na miamoiano, <sup>13</sup> bior naio buru bulag kito ruei den moroano na melijokouo, naio mijian bulag batitig kito raban ea navenatuboiano na kenerinio kiano, napano tinien jii naio bo laka. <sup>14</sup> Nao-o, Atua naio buru bulag kito ruei, napano naio biekokoa kito bior kanado kariano nalo.

*Kristo naio be parinio ka vio nonovio yauo*

<sup>15</sup> Nina be kenerinio na, naio be Kristo nene, napano naio be tovorovo tai napano romijikia reialio, ka Atua napano maka rojikia roialio, napano naio be motoru ka vite nonovio nalo na Atua jiilo.

<sup>16</sup> Ea Kristo nene, Atua naio jii vite nonovio, na vio mave a na vio yetano, napano romijikia reialio p̄eli na nana maka rejikia reialio, bija vite nalo napano abe natuboiano ea vio yauo, jibe ka parinio tubo nalo, moroano nalo, a tomu na tortoru nalo, a nailliano nalo.

Atua jii vite nonovio ea Kristo, a Atua jii vite nonovio be Kristo kanano.

<sup>17</sup> Kristo naio jo ruei jukamu ea vite dolu nalo nonovio, mia naio bar batitig saba nalo nene ajum̄ña amin̄auo bo ea jelelo memedu.

<sup>18</sup> Kristo naio be burupati na meuliano na torogio nalo na kiano nalotuanu,

a naio be parinio ka lotuano nene jibe ka lotuano nene tibe mokotenano.

Naio be toro na jukamu ka nalo na ameul bereio ea m̄ariano, ana jibe na mila ka vonganei naio jo mave lie vo loa vite dolu nalo nonovio.

<sup>19</sup> Kristo naio jo mave laka jibe na, bior Atua naio mijamo ka kiano mermerano joaio, javukia meuliano a moroano na kanano joaio.

<sup>20</sup> Ea Kristo nene kia ga vo, Atua bar bereio vite nalo na vio mave bija na vio yetano abinimeï eaio.

Ana na naio mila nonovio yauo amijikia ave merevuiano rivija naio bereio, nina ea Kristo kiano burukija napano miou ea m̄akolkolo.

*Kamiu kuve merevuiano bereio kamliko Atua*

<sup>21</sup> Nanua beamu, kamiu kube valauo ga, a kumitu koalabo ka Atua, a kube kiano uolu, bior jidomiano va nalo a bajago va nalo na kenemiu. <sup>22</sup> Mia vonganei, napano Kristo binimeï jibe ka kito, kiano m̄ariano mila kito robe merevuiano kitoliko Atua bereio. Atua naio mila jibe na, ka mia naio mijikia rivuru kamiu kumeï keano naio napano kuve lu batitig rivu, kumeravo vatitig rivu, a napano maka niamiamo va tai toa kamiu leleio. <sup>23</sup> Mia nina naio mijikia tibe na, verenio ga kamiu kuvitumolu kuvitu sikili kia ga vo ea Kristo, a ver kumonea naio kia ga. Bo verenio kamiu kumeluluku re ka kuvokar sikili moneano na Atua kiano verikariano nalo, monoka kumonea ka mia naio monoka sian vite nalo van kamiu napano kumijogio ruei ea Ioluanu Vou nei, napano tomu nalo na vio yetano nalo ajum̄ña amijogio ruei, a napano kiniou Pol nebe toro na mioliolu kanio.

*Pol naio m̄im̄auo jikili bior ka namoneano nalo*

<sup>24</sup> Vonganei kiniou nojo nomijog jaleleano ea mokotenaku bior kamiu, mia najaaro ga kanio. Nina jibe ka napano nojo nomim̄auo nonovio kanio ea jogvaiano na mokotenaku nalo, napano Kristo ber lua ka mia navario, jibe ka ga napano naio bario ruei, ka najai taara na namoneano nalo ka atu sikili. <sup>25</sup> Atua bitiri lar kiniou ka mia nemeï neve toro na im̄auano tai na bagaro na moneano nalo, mia vonganei nemijikia najai kamiu ea im̄auano napano Atua naio miduio joa jum̄ñaku, nina ka neverial iliano na kiano van tomu nalo ka mia ajikia nonovio eaio. <sup>26</sup> Kiano iliano



nene nei, jibe ka iliano tai re bogo be nua, joluku ga ea tormoruo nalo, napano nalo maka ajikia leleio, mia vonganei Atua mila meravo ban kiano namoneano lu nalo. <sup>27</sup> Kiano jidomiano ka rila tibe na naruei, berinavo iliano na napano kiano tomu nalo, kulo Ju, maka ajoglubario, mia naio riverial kiano vite novo nalo, napano abo laka, ea nalo napano maka ave kulo Ju. ?Mo ana ilulukluano nei naio ber venia? Naio ber jibe na naruei, berinavo Kristo naio mijikia toa kenemiu iviso nalo, ana kamiu kumijikia kumonea kuver mia Kristo mijikia rila kamiu kuvitusol ea meuliano novo na Atua kiano ea vio mave.

<sup>28</sup> Kumemi juo numitu numiololu ka Kristo nene ban tomu nalo, a numitu numil banlo nuber nalo monoka avitkarlo rivu, ana numitu nuberlogloglo ka masouano nalo. A ver tomu tai napano kialo jidomiano a kialo moneano rimei rimeruo vatitigio, amijikia amei atumolu atu kumemi liko ea Atua mirano. <sup>29</sup> Kiniou nojo nobukudeli bijonio bior vite na, mia bogo nonovio nojorña nemirñau ea moroano na toru napano Kristo naio jo misonio ban ea kiniou.

## 2

### *Monoka kumonea Kristo sikili*

<sup>1</sup> Nao-o, javukia na kiniou neberenio, ka napano nobu-kudeli toru bior kamiu, a bior nalo na vio Leotesia bija tomu dolu nalo bunu napano maka aial miraku kija bogo tai vo. <sup>2</sup> Nejidom ka nala kialo jidomiano nalo atu sikili, a ka kialo tinietiiano mijikia rila aiasol kialo iviso nalo amei ve takurano ga. Nejidom mñelea ka mia avokar burunñara ilirianiano na vite luku nei napano beamu nalo maka ajikiaio, napano naio be Kristo memedu, naruei mia kialo jidomiano nalo maka rijikia to veve juo. <sup>3</sup> Nina bior ea Kristo, tomu nalo amijikia aleal vite novo nalo na Atua kiano masouano a jikiaiano, napano naio bar vanio jua Kristo.

<sup>4</sup> Kiniou nojo neber iliano na ban kamiu, ka mia tomu nalo tai re ave niosesei van kamiu rivano-o avuru kenemiu jidomiano riva rive dolu, ea kialo masouano lubolubo nalo. <sup>5</sup> Nemil jibe nei bior kanaku jidomiano joa kamiu jikili dañariga. Bekurano ka mokotenaku jo koalabo ka kamiu, mia kanaku iviso naio jo miasol kamiu dañariga ruei. Mia najaaro toru ka kamiu bunu, napano nomijog ka maka kuve dedade ga, mia kubiekouo jikili buronio dañariga ea Kristo.

### *Kiado meuliano monoka sikili tu ea Kristo*

<sup>6</sup> Jibe na, bior kito romidu Kristo Yesu be kanado Tubo ruei, bogo nonovio mia reiel dañariga ea naio ga, <sup>7</sup> mia naio monoka tibe ka ðelikiti na kanado meuliano, ðeli na yimo na kanado meuliano, monoka sikili tu mave ea naio. Tibe na ana na kiado viekouoiano ea Kristo naio mijikia rimei sikili lie bogo nonovio, tavukia napano aberloglog kito kanio ruei. Mia bogo nonovio, kito monoka rotu rover siva vanio. <sup>8</sup> Kamiu monoka mia kuvitkar rivu, ka mia tomu tai re amei ka mia aiadikar kamiu ka iliano nalo na jelea masouano na toro ga kanano, ðeli ka verloglogiano nalo napano abujo ka masouano na yetemeriba nei ga. Ilikuraniano nalo na be tena sibiano ga, a nalo aju amaluvo ea tomu nalo kialo jidomiano moruo, a maluvo ea tivelinio na simaro nalo a semei nalo, nalo mia maka amaluvo ea Kristo.

### *Kristo naio be parinio ka vite nalo nonovio*

<sup>9</sup> Atua naio midu kiano meuliano a moroano nonovio nalo ajua mokotenano toro nei Kristo, <sup>10</sup> napano naio be parinio ka vite nonovio, a naio loa ka moroano dolu nalo. Ana ea bajago nene, Atua midu kiano tonovo nalo napano kiano ajua kenemiu meuliano nalo, kamiu napano kumitua Kristo. <sup>11</sup> Mia bior kamiu kumitua Kristo, naio je bulag bajago va nalo a jidomiano va nalo den kamiu, jibe ka naio mila pakuveu ea kamiu, mia maka never pakuveu na tomu nalo ajurña amilaio, nojo neber pakuveu dolu tai napano Kristo naio milaio, jibe ka napano naio jo bar bulag vovaiano den kenemiu meuliano nalo. <sup>12</sup> Naruei ka bogo napano abar uei ea kamiu, jibe ka ga napano Atua jivinko kamiu kamliko Kristo, a ka naio mila kamiu bunu kumeul bereio kamliko Kristo, nina bior kamiu kubarkar tiniemiu ea Atua kanano burunñara moroano napano naio mila Kristo meul bereio ea nañariano. <sup>13</sup> Ana kamiu na, beamu Atua naio mial kamiu jibe ka kenemiu kariano nalo amila kamiu kuñaro ruei. Maka kamiu kuve pakuveu tavukia kulo Ju nalo, mia Atua mial kamiu jibe ka kenemiu meuliano maka rive pakuveu bunu, jibe ka napano kenemiu meuliano maka rijulukon vatitigio vo, a bajago va nalo aju kiano ea kamiu vo. Mia vonganei, napano kamiu kumijuru kamiu bija Kristo, Atua jian meuliano vou ban kamiu ruei. Kito robokar meuliano vou nei bior Atua biekokoa nono kito bior kiado kariano nalo, <sup>14</sup> a naio miolkon bulag ruei kanado jabue nalo.

Beamu, jabue nalo nei ajua niosi napano Atua kanano tuboiano nalo napano kirisikili ajuao, napano amiadikakar kito mēle, mia Atua naio bar bulag vite nalo na bija niosi nene ruei, jibe ka napano naio jukkakar nonovio ea m̄akolkolo naliko Kristo, ana na maka bunu ve jabue nalo nene. <sup>15</sup> Ea m̄akolkolo nei, Kristo jovulu vite jikili dolu nalo, naio mila kokorov siñaro nalo kialo buriu kouo nalo, jibe ka napano naio jovulu nalo ea burumara mira tai, naruei naio mila kiano uolu nalo nene abinimeī abe iakurano ea mirado kito tomu nalo, ka mia rosidomii yebekavo re bunu mave ealo.

*Kristo naio be parinio ka kamiū*

<sup>16</sup> Tibe na, ana mia kamiū kuvijamo re ka toro tai riverbure kamiū river kuvisen re tena p̄eli na kumunu re tena. Mia kamiū kuvijamo re ka toro tai riyuku kamiū ka kuvitakii kialo bajago moruo nalo ea tivelinio na vite nalo tibe legiano lu nalo na yuka, p̄eli na ea tivelinio na jokoluolu na siberio vou, p̄eli na ea tivelinio na bogoti aluo. <sup>17</sup> Tuboiano nalo na jibe na, tomu nalo aber ka ala vonio ka aleal m̄arabo na memedu, mia nalo ajavukia ga vamelu na vite na maka rimaluvo vo, mia burupati riano na vite nonovio nene, naio be Kristo ga. <sup>18</sup> Be tomu tealo ajidomii aber nalo abo loa kamiū, bior nalo ajum̄a amial vite telabo ea kanalo monvoviano nalo, ana nalo ajidomii aber ka amijikia lie vo tivelinio na nailiano nalo. Mia nalo ajidom aber nalo abo, ajum̄a amialkialo jidomiano nalo, jotano dobi, jovulu kulo dolu nalo, mia maka leleio, nalo na ajibe ka sieso. Nalo ajum̄a abarvar ga ka kanalo iliano nalo, napano nalo ga ajum̄a aberii nalo mēle bereio, mia kialo jidomiano nalo bujo ka varvariano ga bija jidomiano kurano dolu nalo, banbano-o bokar napano nalo ajum̄a amialalo bereio. Jibe na mia kamiū kuvijamo ka re nalo na atibure kamiū aver kamiū maka kuvokar vite nalo napano ajua ruei, <sup>19</sup> bior nalo na ajuvan Kristo ruei, nalo maka bunu avokar vatitig naio sikili rivu napano naio be parinio kalo. Mia Kristo naio jo bitikar batitig ga nalo napano ajibe ka niabene torogio nalo, a naio jo baganlo, jo jelanvuu batitig ka burubuku nalo a kiano vaiu nalo, naruei tati nei naio mijikia rim̄au rivu a mijikia riluo rivu tibe ka napano Atua naio jidomio.

*Kuvijev meuliano vou ea Kristo*

<sup>20</sup> Kiniou nemijikia Kiniou nemijikia never ka jibe ka Kristo naio m̄aro nanua ruei, kamiū bunu kum̄aro bija naio, mila napano ea tivelinio na bajago va, kum̄aro

eaio ruei, mia maka rimemedu ka bajago va ritokol kenemiu meuliano bereio. Mia Kristo naio buru bulag kamiū ruei bunu den moroano nalo na jukamu na vio yetano nei, bija siñaro nene nalo. Jibe na naruei ana na nejidom nevika den kamiū, ka: ?Jum̄abe kamiū kumitu kumiel kia ga jibe kamiū kube na vio yetano nei kia ga vo? ?A ka venia ana kamiū kumitum̄a kumonmonea tuboiano moruo napano aberloglogio ka kamiū nua, napano aberenio <sup>21</sup> "Kamiū kuvokar re vite na," p̄eli na "Kamiū kuviniomo von re tena," p̄eli na "Kamiū kovitokol re vite na?" <sup>22-23</sup> Naruei be riano ka napano tomu nalo amijog iliano nalo nei, ana na nalo ajidom aber tuboiano nalo na jibe na abe masou bo, mia tuboiano nalo na amiyotuba ea toro ga, maka ave Kristo kiano verloglogiano. Aberiio vite nalo na vio yetano nei ga, jibe kano sinaniano, p̄eli vite na munuiano, mia vite nalo na maka ajikia ajai kamiū, a maka ajikia ala bulag kenemiu meuliano bunu, bior bogo napano komiduo p̄eli na komilaiio, karina abiniuviniu bereio ruei.

Peli tomu nalo abitiri bulag tuboiano nalo nei ka ala von ka ala im̄auano novo nalo tai, napano aberenio toro monoka rivolkouo tibe na p̄eli tibe nei, a napano aberenio ka toro monoka rilavon ka rila kiano jidomiano vatove tibe na p̄eli tibe nei, a napano aberenio toro monoka rilavon ka telanivuu batitig ka tiniabene tibe na p̄eli tibe nei ka vite nalo napano jikili ka naio.

Mia kiniou neberii ka kamiū, ka tuboiano nalo na jibe na, maka leleio ve kanalo moroano ka tokovio ka jidomiano na bova nalo a bajago na bova nalo napano mia ajua toro kanano iviso.

### 3

*Meuliano napano naio meravo a be lu bo*

<sup>1</sup> Kamiū na Atua naio bitiri bulag kamiū kumeul bereio ea nam̄ariano bija Kristo, ana tibe na monoka kuvilavio sikili ka kuvan ka vite nalo na vio mave ga, ea vio napano Kristo naio jotano tivelinio vameruo ea Atua. <sup>2</sup> Monokanio mia kuvisidomkar vite nalo na vio na ga, mia kuvisidomi re bunu vite nalo na vio yetano nei, <sup>3</sup> bior jibe ka napano kamiū kum̄aro ruei ea naio. Vonganei kenemiu meuliano vou joluku bija Kristo ea Atua, <sup>4</sup> bior ka Kristo naio naruei be burupati na kiado meuliano vonganei, mia iorou kano, bogo napano mia naio riyotuba ea tomu nalo

miralo, mia kito bunu royotuba vija naio ea kanano burum̃ara mermerano.

*Kenemiu meuliano moruo naio monoka ribisi*

<sup>5</sup> Monoka kamiu kuvuekon bulag bajago nalo na vio yetano den kenemiu meuliano nalo, jibe kanio nasiakaiano, vite nalo na imouiano, nasidomvaiano, natitii kariano nalo, a natitiiano. Bajago nalo na bova, a natitiiano jibe na, naio jibe ka napano toro mila saba nalo na naio jidom m̃ealeo abinimej jibe ka kanano atua dolu nalo. <sup>6</sup> Bior bajago nalo nei naruei Atua tiniene mimi m̃ele, ana kanano natibureano jo binimej ea nalo napano maka amonmonea naio. <sup>7</sup> Beamu kenemiu meuliano jibe na naruei, napano kamiu kumituṃa kumieli ea bajago nalo na, <sup>8</sup> mia vonganei, be bogo na kuvituvan bajago nalo na, be bogo na abisi ea kenemiu meuliano nalo. Tibe na, ana mia tiniemiu rimimi re, a kuvilvilea re toro dolu, a kuvitu re m̃a kuve nabilbiluvaiano van kamiu. Mia kamiu kuvil die re a kuvitu re m̃a kuvila nailimuṃiano va ka toro dolu, a kuvila re iliniamiamoiano na nalo. <sup>9</sup> Mia kuvituṃa kuvila sibilili re kamiu bunu, nina bior kubielar ruei kenemiu bajago moruo napano kumoluo bijaio, <sup>10</sup> mia kuvidu bajago vou tai ea kamiu tibe ka meuliano vou tai napano Atua naio jiio ea kamiu. Mia bogo nonovio, Atua jo mila meuliano na binimej be terivou bereio, ka rila kamiu kuvijikia naio ve riano, a ka rila kumei lie vo tibe ka kube kanano natovorovoiano na naio. <sup>11</sup> Bior vite nalo na, kito maka bunu rejikia retiburevure tomu nalo, ka mia rover tealo abe kulo ju, mia tealo abe tomu na vio dolu nalo ga, ṃeli na tealo abe navakuveuiano, mia tealo maka atibe na, ṃeli tomu tealo abe tubo, a tealo abe tomu na im̃auano na tubo kiano ga. A maka rejikia rover tom tealo roverinavo aberloglog batitiglo tenene na amijikia vite, a nalo tealo abe kulo yeturu ga napano maka ajikia vite. Mia be burum̃ara vite tai ga napano mia romijikia rovitii toro kanio, rober naio rimonea Kristo ṃeli maka rimoneaio, bior Kristo naio joa vite nonovio a ea tomu nalo nonovio.

*Kamiu kuviya meuliano vou nei ea kamiu*

<sup>12</sup> Mm, jibe ka napano Atua naio jidom m̃elea kamiu, ana naio bijauia bulag kamiu ka kuve kanano kulo lu nalo, monoka kuviya bajago vou nei ea kamiu tibe ka napano naio jidomio. Bajago vou

nei jibe ka vite nalo nei ajua kenemiu meuliano, javukia tiniieiano ban toro, tiniievuiano, navatoveiano, namom̃avoiano a namelumulumuano. <sup>13</sup> Kamiu monoka kuvitu re tiniemiu rivavavin soṃeli ka kamiu, mia bogo napano verenio kamiu ve juo nene ala titai iviso bure naljuo nei, mia naljuo nei monokanio avieviekokoalo ave juo. Kamiu monoka kuvieviekokoa kamiu, ea bajago na ga m̃a kiado Tubo naio jom̃a biekokoa kito. <sup>14</sup> Mia vija bajago dolu novo nalo na napano monoka kuviyaio ea kamiu, mia monoka kuviya bunu tinietiano ea kamiu, bior tinietiano naio mijikia rivitirasol batitig bajago novo nalo na mia aim̃au bijuviju rivu, ka mia amei ave takurano. <sup>15</sup> Mia tum̃aro napano Kristo jiano naio mijikia rivitar kenemiu iviso nalo, bior Atua naio bio burovuron kamiu kanio mia kumei ve takurano, napano mia kuviniu kuvijurukar rivu vija naio ea tati ve takurano napano naio be parinio kanio, ka mia tum̃aro neibano naio mijikia to vija kamiu. Ana bogo nonovio kamiu kuver siva ka vite nonovio nalo.

<sup>16</sup> Mia bogo nonovio Kristo kanano iliano novo nalo monoka ameul ea kenemiu iviso nalo, bior kiano iliano nalo abo tanea. Kamiu monoka kuvitu kuverloglog kamiu ka naio, mia kamiu ga kuvitu kuvuriri kamiu bereio ea kenemiu m̃asosouano novo nalo. Bo ka kuvitu kuvio van Atua ea Iouano nalo, a iouano lu nalo, a iou nalo na vameneano ban Atua, ka napano ea bogo na kumituṃa kumiou jibe na, mia kenemiu iviso nalo avujo lou ka sivaiano vanio. <sup>17</sup> Mia vite nonovio napano kumilaio, mia iliano nonovio napano kuberenio, mia monokanio kuvilaio ea Yesu kanado Tubo siano, mia bogo nonovio monoka kuver siva sel ea naio van Atua karaṃado.

*Tomu nalo kialo meuliano vou*

<sup>18</sup> Kamiu tire nalo na m̃a kumisoro, monoka kuvatove ga ka kouemiu nalo, tibe na kanio mia rimemedu ka tira napano naio be namoneano naio milaio.

<sup>19</sup> Mia kamiu sum̃ano nalo na m̃a kumisoro, monoka tiniemiu rii tanea kouemiu nalo, mia kuvila re kenemiu bajago nalo ajea m̃ele vanlo bogo nonovio.

<sup>20</sup> Kamiu kalse nalo, monokanio mia kuvijogkar karamemiu a konomiu nalo, bior kanado Tubo naio jaaro ka bajago na.

<sup>21</sup> Mia kamiu teta nalo a nena nalo mia tiniemiu nalo avilulu re van kenerimiu nalo tulaka, bior ver kuvila tibe na, ala lelanlo, ala kialo lodomiano nalo atibirbilli.

*Tube nalo a kialo tomu na imāuano nalo*

<sup>22</sup> Kamiu tomu nalo na mā kumiñau tubo nalo kanalo, ea bogo nonovio monoka kuvidu kenemiu tomu na tortoru nalo nei niolo. Mia kuvila re tibe na ga ea bogo napano nalo aju bija kamiu, ka mia kuvilavon ka mia nalo asaaro ka kamiu, mia bogo nonovio monoka kuviñauka mia kenemiu jidomiano nalo ave riano batitigio, tavukia napano ea imāuano na kumitu kumitovon kanado Tube julaka. <sup>23</sup> Ea imāuano vaio napano kumituñia kumiñaukanio, monoka kuvilaio napano mia kuvisaaro kanio, tavukia napano kumituñia kumiñau Tube kanano, mia ka re tomu nalo ga. <sup>24</sup> Bo ka mia tiniemiu rimaio ka Tube nei naruei mia naio sian kiano jajuriano van kamiu, tibe kanio kenemiu vuliano, bior toro na toru riano napano kumiñau eaio, naio be Tube Kristo. <sup>25</sup> Mia toro napano naio jorña mila maka rimemedu, mia naio rivar meran bereio rimemedu takii kanano vijuku vo-vaiano nalo, bior Atua naio bitii tomu nalo nonovio kanalo imāuano ga memedu.

#### 4

<sup>1</sup> Mia kamiu tomu nalo na tortoru, kamiu bunu monoka kuvila rimemedu rivu van tomu nalo napano mā aju amiñau kenemiu, bior kamiu bunu kenemiu Tube na toru tai joa vio mave napano mia naio tibure kenemiu bajago nalo.

*Pol berloglog nalo*

<sup>2</sup> Kamiu kuvisikili ka volkouano bogo nonovio, mia monoka kubolkouo napano mia kuvisidomii vatitig vite nalo ka kuv-ereno ea volkouano, a ka mia kenemiu iviso river sivaiano van Atua. <sup>3</sup> Kiniou nejidom bunu ka monoka kubolkouo ka kumemi, ka mia Atua naio rivetavo ea m̄arabo ka numijikia nuviololu ka vite novo nei napano beamu naio joluku, napano Kristo kiano iliano, napano vonganei nojoa nalakoiano biorio. <sup>4</sup> Neber bo, nejidom bunu ka kubolkouo ka mia nemijikia neil rivu, ka mia rila iliano nalo nei rimeravo, rimemedu tibe ka ga na mia monokanio nalaio. <sup>5</sup> Ea bajago nalo na mā kumituñia kumilaio ea tomu nalo miralo napano maka amonea Kristo, monoka kuve masou rivu ka kuvitakii kenemiu buluvio nalo, ka mia kuvurulo amei ea Kristo. <sup>6</sup> Monoka kuvil rivu vijalo, ea iliano nalo napano ga be nallitinevuiano a ajese bo, ana mia ajog rivu ka iliano nalo nene, a monoka kuvijikia m̄arabo ka

kuvisian verdoŕeiano vanlo napano avika vikadeniano ninio ea tivelinio na kenemiu viekouoiano.

*Pol miila tomu juo aban keanlo*

<sup>7-8</sup> Kuruado novo nei Tikikas napano naio jo bija kiniou, mia neilla naio rudu m̄esi nei riviedu kean kamiu ka naio riverial ka kumemi numitu jumabe, ka kumijikia kuvijog rivu. Kiniou najaaro toru ka kuruado nei, ka napano bogo nonovio naio jikili ka mijai kiniou ea Tube kanano imāuano. <sup>9</sup> Mia kuruado dolu nei napano kiado bilbilu novo nei Onesimas, mia naio bunu takisor Tikikas riviedu kean kamiu. Onesimas, naio be kamiu tai na kenemiu vio, a naio bunu jorña monea Kristo. Mia naljuo averial van kamiu vite nalo napano amalmaluvo ea vio nei.

*Pol kanano ilimaariano banlo*

<sup>10-11</sup> Arestakas napano naio joa yimo na nalakoiano bija kiniou, a toro napano Mak napano naio be Barnabas kuruano, a Jisas napano abio naio ka Jastas, nalo tolu aberinavo aju ajidomial kamiu toru. Mak nei, kubokar iliano ea tivelinio ka naio ruei, ka ver naio riviedu sel ea kenemiu vio mia monoka kuvisaaro ka kuvuru naio tusol kamiu.

Ea kulo Israel nalo napano amonea Kristo ruei, nalo tolu nei ga naliko kiniou kumemi numiñauka imāuano nalo na Atua kanano navenatuboiano, mia nalo tolu nei nalo ajidel ka amijai kiniou toru laka ea bogo na jikirikili nalo.

<sup>12</sup> Epavras nei napano naio bunu be kamiu tai, naio be toro vu tai na miñau Kristo Yesu kanano, a naio bunu berenio kavijo bo a bogiano bo ban kamiu, berenio bogo nonovio naio jorña bolkouo jikili dañariga bior kamiu, ka kumijikia kuvitu sikili, ka kumeruo rivu tibe ka siyovo ea Kristo, a ka kuvitu sikili ka kuvila ga vite nalo napano Atua naio jidomio. <sup>13</sup> Kiniou nejidom never rimemedu ka kamiu ka toro neibano Epavras jo miñau jikili laka bior kamiu, a kulo Leotesia a kulo Ierapolisi bunu. <sup>14</sup> Kiado bilbilu novo nei, nakulekuleano nei Luka, bija kuruado dolu nei Timas, naljuo bunu aju aberenio naljuo aju ajidomii bijon kamiu toru laka.

<sup>15</sup> Kiniou nejidom kamiu kuvisian lilian kanaku iliano riva van kuruado a kuviviniedo nalo napano ajua Leotesia, vija tira napano Nemeva naliko bagaro na namoneano nalo napano aju abior ea kunuano, ka kiniou nojo nejidomiilo toru laka. <sup>16</sup> A mia bogoti napano kamiu

3:22 Eves 6:5-8 3:25 Eves 6:9 4:1 Eves 6:9, 5:16

4:5 Eves 5:16 4:7-8 Imāu 20:4; 2Timo 4:12 4:9

Vailli 1:10-12 4:10-11 Imāu 19:29, 27:2; Vailli 1:24, Imāu 12:12,25, 13:13, 15:37-39 4:12 Kolo 1:7; Vailli 1:23

4:14 2Timo 4:11; Vailli 1:24, 2Timo 4:10; Vailli 1:24

kuvuluku kanaku m̄esi nei ribisi, ana neber bo, kamiu kuvituvan rivan ea kulo Leotesia, ka mia avulukuio van bagaro na namoneano nalo ea vio na, a kamiu monoka kuvuluku kanaku m̄esi dolu bunu napano nalo na vio Leotesia atuvan rimei rivan kamiu. <sup>17</sup> Mia kanaku iliano tai ba ban Akipas, neberenio "Jau kovitkar vatitig rivu im̄auano napano Tubo miduio joa jum̄amo, koiṁauka nonovio batitig garuei."

<sup>18</sup> Mia vonganei, kiniou nodular vovojulu den toro nam̄a jo bivitauia m̄esi, naruei kiniou Pol nejirii kanaku iliano na maaro biedu ban kamiu ka jum̄aku ga, neber kavijo bo p̄eli na bogiano bo ban kamiu. Kamiu tiniemi ribobogia re marimieni nalo na amiadikar kiniou kanio, mia Atua kanano tiniamemiano naio to vija kamiu nonovio.

Kiniou, Pol.

**Mesi Moti Napano Pol  
Bivitauiaio  
Ban Namoneano Lu Nalo Na  
TESALONAIKA  
Verialiano Moti**

*Tukunuano bulati na niosi nei*

Bulukomeli nei Tesalonaika be parinio komeli na tanobuku na Masetonia, napano jo yetano ka Parinio Tubo na Romo nua. Bogo na Pol jalivo yako Vilipae, naio ban yako Tesalonaika berial ioluano vou ea vio na, naruei yimo lu jikario ea vio na. Mia iorou maka vesiou, taara na Israel tealo amilkuei naio. Nalo amijalukua naio bior napano amial ka tomu miroano na maka ave taara na Israel, napano beamu aju amiagago ka kialo ver-loglogiano nalo, amijog ioluano vou napano Pol berialio, ana amonea Yesu.

Naruei taara nalo na Israel nei tiniel jer Pol, a amijulario ea vio nei, ana naio ban ea bulukomeli nei Berea. Iorou, naio ba boru yetano Korin, naio mijog verioiano na namoneano nalo na Tesalonaika ea kiano bilbilu Timoti, napano jo miñau bija naio.

Naruei Pol jiri mēsi nei beamu ba ban namoneano nalo na Tesalonaika ka ridular kialo jidomiano, a ka verial van namoneano nalo na vio na ka naio jo jidomiilo, a Atua jo bijalo. Naio ber siva ban Atua bior napano mijog ka aju amonea Atua kirisikili, a aju tiniel miia tomu nalo, a ber kalo ka asidomii bereio kiano bajago novo ea bogo na Atua jo bijalo.

Mia naio berdoŕe kialo vikadeniano nalo napano abika denio, aber mia Yesu rimeii bereio tuñabe. Nalo ajidom aialio ka toro napano m̄aro beamu be Yesu maka rimeii bereio vou, mia mijikia rivokar meuliano napano maka rijikia bisi, ŕelina makano. Mia ajidom ajikia ka mia Yesu rimeii bereio ea bogo vaio. Mia Pol ber vatitigio banlo, ber monoka airñau jaka, ka kialo jidomiano ju jurmario, a ka aburu kialo jidomiano ju jikili ea Yesu ka atur-orea naio vano-o naio mia rimeii bereio.

*Torogio nalo na niosi nei*

Iliano moti 1:1

Pol jaaro kalo bija ber sivaiano ban Atua bior nalo 1:2—3:13

Pol berlogloglo ka Namoneano kiano bajago 4:1-12

Pol berlogloglo ka mia Kristo rimeii bereio 4:13—5:11

Pol mila nonovio kiano verloglogiano 5:12-22

Iliano maariano 5:23-28

*Iliano na be moti*

<sup>1</sup> Kiniou Pol bija Sailas a Timoti, kumemi tolu numisaaro laka ka nuvivitauia niosi nei riviedu ea kamiu taara na namoneano na ea komeli na Tesalonaika. Kumemi numonea ka kenemiu meuliano nalo aju vatitig ea karam̄ado Atua bija kiado Tubo Yesu Kristo, naruei kumemi nubolkouo ka tiniememiano a tuñarioano to vija kamiu nonovio.

*Pol nalo ajaaro bior viekouoiano novo na kulo Tesalonaika nalo kialo*

<sup>2</sup> Nao, bogo nonovio kumemi numitu nubolkouo ban Teta Atua, monoka nuver siva van naio rivior kamiu. <sup>3</sup> Kumemi numitu tiniememi maio ka kamiu ea kenememi volkouano jibe nei, maka nuvijikia tiniememi ribobogia kenemiu moneano, napano kumiñau jikili jakiiio, a napano kenemiu tinietiiano, jo miyoyotuba ea kenemiu bajago novo nalo, a napano kenemiu jidomiano tebievi, naio mila kamiu kumitu jikili batitig ea kiado Tubo Yesu Kristo.

<sup>4</sup> Banalo, kumemi numijikia ruei ka Atua naio maka tinientii ga kamiu, a naio bijauia bulag kamiu bunu ka kamiu kuve kanano riano, <sup>5</sup> bior bogo napano kumemi numiololu nuber lilianiano vou na bo ka kamiu, naio maka tibe toro kiano iliano kurano, a naio binimeii ea kamiu jibe iliano na temi tai na jikili. Sikiliano na Niununo Lu kiano joaio, a naio julio kenemiu iviso rivanvano-o kamiu kumoneaio.

Kumijikia kenememi bajago nalo bogo na numitu bija kamiu, numijog bin laka ka nuviñauka saba nalo riviniu nina numijikia nuviñaukanio ka rijikia rijai kamiu ka kumonea, <sup>6</sup> a iorou, kamiu kuvijevio, kumei tibe ka kenememi natakisoriano nalo, a maka ve tena ga kenememi, mia kumei kuve Tubo kiano natakisoriano nalo. Bekurano ka ver nalo dolu amila burum̄ara jaleleano ban kamiu a ajian bogokouo laka ban kamiu ka bogo nei, a mia kumila borvorua ka ioluano, naruei Niununo Lu midu kiano burum̄ara saariano joa kamiu. <sup>7</sup> Ea kenemiu bajago novo nalo na, maka kumisidomii vovaiiano nalo, kuvitu kamu ka kuburu m̄arabo ka namoneano dolu nalo ea tanobuku na Masetonia a Kris. <sup>8</sup> Tubo kiano lilianiano vou nabo naio jo jaluvo ea kamiu bano, maka ea vio juo nei ga, a ea vio dolu nalo na laka bunu, mila tomu nalo amijog kenemiu viekouoiano ea Atua ruei.

Nina naio bo laka, a vonganei jibe ka ea vio be na nuvan ea bereio, a maka bunu kenememi titai ka nuvijikia nuver kalo,

bior ka napano iliano nonovio biedu ea kamiu ruei ba bokar nalo ruei. <sup>9</sup> Kumemi maka bunu nuvitukunu rivan kulo dolu nalo na, mia nalo ajukunu binimej ban kumemi bereio, ajukunu jum̄abe ka napano kamiu na vio Tesalonaika kuburu kumemi numitu bija kamiu, a jum̄abe na kubilig kamiu, kubuku bulag kenemiu tavoru nalo na m̄ar̄m̄aro, kumei tibe tomu nalo na Atua na meul riano kiano. <sup>10</sup> A bija nina, naloaju ajukunu bunu napano kumitu jikili, kuvitu rorea Atua kenerinio nei, Yesu. Naio riyotuba ka kito bereio, bior napano Atua bitiri lario meul bereio ea nam̄ariano ruei, a mia naio riila riyotuba bogo ve valuo nene, ka naio toko kito ka bogo na tibureiano.

## 2

*Pol jukunu ka kiano iñauano, bogo napano jo Tesalonaika*

<sup>1</sup> Banalo, kumemi numijog iliano tai aber numiñau kirivova, mia be tinieku ka kutibilubar ka kenememi yaduiano ea kamiu bar m̄arati moroano na bo. <sup>2</sup> Beamu laka, bogo na numitu numiñau Vilipai, naloaju amil bova jibe na ka kumemi ruei,aju amila bulag laka kumemi, a jibe na kumijikia ruei, bogo na numiyotuba ea kamiu, naloamil ea kumemi laka bereio bunu. A numial ka Atua naio jo mija kumemi, naruei maka bunu numerou ka vovaiano, numiñau dolu ka ga ka nuverial kiano lilianiano vou nei van kamiu. <sup>3</sup> Kumemi numiololu ban kamiu, a nemijikia never ka kiano iliano nalo maka tibe tomu nalo tai naaju aber. Nalo maka ayotuba ea kenememi labeleiano tai ga, p̄eli ea kenememi jidomiano va tai, a naio maka ve titai na kumemi nuvilavon nuvatete ka kamiu, maka leleio.

<sup>4</sup> Maka lele tibe na, a ea bogo nei, kumemi numitibe ka tomu nalo na Atua bitiri bulag kumemi, naio midu kiano lilianiano vou na joa jumememi, ana nubinimej nuberial kiano iliano riano ban kamiu. Kumemi maka nuviñau ka tomu nalo aial kumemi tum̄abe, a numisidom ga ka Atua rijikia saaro ka venia na numila, bior naio ga mijikia rivitii venia na joa kiado iviso terakurano. <sup>5</sup> Kamiu kumijikia batitigio ka maka numei ka nuvuku iliseiano p̄eli na ilivevaviniano ka kamiu, a Atua mijikia batitigio bunu ka maka tiniememi ka kenemiu saba nalo, p̄eli nuvila sibilili kamiu kanio. <sup>6</sup> A ea bogo na bunu, maka lele kenememi jidomiano tai ka rila kamiu p̄eli tomu dolu nalo kuvidular siememi mave.

<sup>7</sup> Be riano ka kumemi numaluvo ea kamiu jibe naiagagoano na Kristo kiano, na p̄eli memedu ga ka kuvila saba ve miroano ka kuvitikar kumemi, a maka numisidomial saba nalo na. Nubinimej numidomdom ga, numila ka kamiu jibe nena tai bagan kenerinio domdomu. <sup>8</sup> Kumemi numisaaro m̄ele ka kamiu jibe na, numisidom m̄ele ka nuververial Atua kiano lilianiano vou na ka kamiu, a numijog numisidom m̄elea kamiu, barbano numitum̄a numijamo ka kenememi meuliano ka nuvijai kenemiu meuliano nalo.

<sup>9</sup> Banalo, neber jibe na maka nala-sibi, bior kumijikia jum̄abe numinonou ka iñauano nalo na jikili ka jumememi ka bogo na. Kumemi numiñau legiano a bogiano, ka rila bogo na kumemi nuvitu vija kamiu ka nuviololu ka lilianiano vou na Atua kiano, maka numila ve temi van kamiu. Kumemi ga numitum̄a nubitikar kumemi, maka bunu kam tai bereio vitikar kumemi leleio.

<sup>10</sup> Kumemi numisidomii ka ea miremiu, a ea Atua mirano, numijikia nuverial ka ea bogo na numitu iviso ka kamiu na moneano nalo, maka lele titai rivova ka kumemi kenememi meuliano memedu ga, a be lu vatitigio. <sup>11</sup> Peli kamiu kumitu kumisidomii kia ga, napano numila ka kamiu jibe teta tai napano jo mila batitig laka ka rijai vatitig kenerinio nalo kialo meuliano. <sup>12</sup> Kumemi numila kenemiu iviso nalo melumu bo, nubar iliano nalo na ilivituniano ban kamiu, a numidular kenemiu jidomiano bavin ka monoka kuvila kenemiu meuliano rimej rimemedu rivu ea kiado Atua kiano bajago, na naio naruei bio kamiu ka kumei jouro ea miamoiano na bo ea kiano navenatubioiano.

<sup>13</sup> Titai dolu bunu nubersiva ban Atua bogo nonovio biorio, naina kenemiu bajago na bogo na lilianiano miyotuba ea kamiu. Kumijog, a maka lele kuvukulario ka kuver toro ga kiano iliano, a kumitu kubitii kuber be riano, be Atua kiano iliano memedu. Mia kamiu na kumonea, kubetavo ea kenemiu iviso ka mia naio to riñau ea kenemiu meuliano rivokar banei.

<sup>14</sup> Kuruaku a kuvivinienu nalo, nemijikia ka iorou ka kumonea, maka vesiou tomu nalo na kenemiu vio bereio ga ajumolu amila bova ban kamiu, kubiviu bogokouo laka. Jibe na bova, a ea vio nei kuvitu kuviel ea m̄arabo na ga moneano na Yesu Kristo kiano nalo na ea Atua kiano yimo lu nalo na ea tanobuku na Yutea nalo amiel ea nua ruei. Nalo bunu, bogo na amoneaio, ana kulo Ju naloaju amila bulaglo toru laka! <sup>15</sup> A bajago na, Ju

nalo aju amila nua ruei binime. Beamu, maka asidom naverialiano nalo, a iorou, nalo naruei amila amuebin kiado Tubo Yesu n̄aro, a nalo bunu ga na aju amijil kumemi bogo miroano ruei. Saba nalo na aju amila na, Atua maka tiniene saaro kalo leleio, ka nalo aju amilkuei bogo nonovio ga. <sup>16</sup> Kumemi numitu numiololu ka lilianiano vou na ban tomu nalo dolu na maka ave Ju, be iakurano ka be bogo ka ajikia ala vatitigio kialo meuliano, a Ju nalo nene aju amila vonvon ka atukovio ga ka kumemi, maka asidom ka nuverial kalo.

Kialo bajago va nei misonson bavin laka bija kialo kariano na amila nua ruei binime, mila vonganei kialo vovaiano bavin jovulu laka. Amila jibe na banbano-o maka asidomial titai, a remijikia ka Atua kiano tiniemimiano bujo jo binime kalo ruei.

*Pol jidomii toru laka ka rial lo ve vaarakurano bereio*

<sup>17</sup> Banalo, kumemi numisidom nuverial ka kami, numituvan kami bogo nua ga na, nubano teliki ga, nuber aua toru ka kami, numisidom nuval miremiu bereio. Be riano ka robeve terakurano ka mokotenado, a ea kiado iviso, kito roju robe takurano ga. <sup>18</sup> Kumemi numitu jibe nei, numisidom ka nuval n̄arabo ka nuvedu nuval kami bereio, a kiniou Pol nojo nomilavon vatelabo laka, mia toro va nei Sīmaro, naio jo jokoko vio julaka ga. <sup>19</sup> Ana ka venia numisidom laka ka nuval bereio kami? Nina ka kei bereio numijikia nuvar tiniememi ealo? Kei bereio na mijikia rila kumemi nuvisaaro? Kei bereio nalo abe n̄arati na bo na kenememi in̄auano, napano nuvijog rivu kano ea bogo na kiado Tubo Yesu riyotuba bereio? Maka toro dolu tai, mia kami na ga! <sup>20</sup> Be riano, kami jibe ka kenememi jidomiano na sereano novo tai napano numitovulio, kubinime jibe burum̄ara burupati na jogvuiano na meuliano na kenememi.

### 3

*Pol beriio jum̄abe miila Timoti ba miyotuba kalo beamu ruei*

<sup>1</sup> Kumemi numitu tiniememi maio ka kami jibe nei banbano, numial jibe maka, kumemi tai monoka riviedu riyotuba ka kami bereio. Ana nuber mia monoka kumemi juo Sailas numitu Atenisi beamu vo, <sup>2</sup> mia Timoti mijikia riviedu bereio ea kami. Kuruado nene, kumemi numin̄au Atua kiano vio takurano bija naio, ka rila lilianiano vou na Kristo kiano rivanvano-o

tavio, ana namial jibe naio be toro na bo tai ka riyotuba ea kami. Namijikia ka mia naio mijikia riilikakar kami, a mia mijikia rijai kami ka kenemiu moneano to sikili bogo nonovio, <sup>3</sup> ka mia maka kuvijikia kumermerou laka ka bogokouo nalo na kumitu kubiviuo. Bogo kouo nalo jibe na, remijikia batitig ka abe togio tai na kiado meuliano kito namoneano nalo na maka rejikia rataluvo denio.

<sup>4</sup> A verver kumitu tiniemiu maio ka kia ga vo, kumijikia bogo na kumemi numitu bija kami, numitu nuberial bogo nonovio ka kami nuber numial ruei ka mia vesiou re, ana mia monoka ala vova ka kito. A vonganei, tenalo nei miyotuba jibe na ga ruei, na kami naruei kumitu kubokar toru laka.

<sup>5</sup> Nina naruei mila nomijog ka maka nejikia noto tibe na ga, a monoka nala titai ka nojog iliano tai river kumitu jum̄abe. Kiniou nemerou kija ka toro va na rila vonvon toro nei, p̄eli naio mial kiano n̄arabo tai ka rila kami kuvijoru ruei, mia nojidom nojog kami kumitu jikili kia ga vo p̄eli na jum̄abe, bior maka rivu ka kenememi in̄auano novo nalo napano ea kami rime rive iakurano bereio. Jibe na naruei, nomiila Timoti biedu.

*Timoti binime bereio ea Pol bija veriano novo nalo na ea tivelinio na kulo Tesalonaika nalo*

<sup>6</sup> Timoti biedu mial kami, a vonganei ga naio binime bokar kumemi. Bogo na binime, bar iliano nalo na bo laka, berial jum̄abe kenemiu moneano bija bajago na tinietiano na kenemiu jo kia ga toru, ju bo ga ju, ana mila tinieku jaaro toru laka. Naio midu kenemiu iliano binime ban kumemi, ka kumitu tiniemiu maio ka kumemi julaka, a kumisidom m̄ele ka kuvial mirememi bereio, jibe ka ga kumemi numisidom nuval miremiu. <sup>7</sup> Mia be iakurano ka numitu numijog jaleleano laka ea vio nei ka tenalo na bova amila ka kumemi, mia bogo na numijog lilianiano na kenemiu moneano kuruememi nalo, numijog jibe midular kenememi jidomiano bereio. <sup>8</sup> Kumemi numijog ka kumitu jikili bija Tubo, ana mila jibe na numijog jibe nemeul vatitigio bereio.

<sup>9</sup> Bogo na numitu nubolkouo ka kami, numial jibe maka kumemi nuvila titai na bo laka ka kami, a kami naruei kumitu kumila tena bo tai ka kumemi, bior kumila kumemi nubar jogvuiano ea kenememi iviso, banbano kumemi maka bunu iliano vare ka nuver siva van Atua kano. <sup>10</sup> Naruei mila numitu numisidom laka ka nubolkouo legiano a bogiano, ka



verver nuvijikia nuvial kamiu bereio ga, ver vio tai na kenemiu moneano mijoru eaio kija ga, nina mia numisaaro laka ka nuvijija ka rimei to sikili vatitigio bogo nonovio.

<sup>11</sup> Nina naruei be tena nojo nobolkouo jikili kanio vonganei, ka mia karamādo Teta Atua bija kiado Tubo Yesu, nalo avetavo ea m̄arabo ka kumemi ka numei bereio nuvial kamiu. <sup>12</sup> Bano bokar bogo na, nojo nobolkouo ban Tubo, nebika ka mia naio rila kenemiu tinietiano to riluo rivan tibe nei, rison vatitig kenemiu meuliano rivanvano-o rivoakar bunu tomu nalo dolu, rimei ve toru laka rive verare ka kenememi tinietiano ea kamiu.

<sup>13</sup> A bija nina, nobolkouo ka mia naio ridu jidomiano tai na bo a jikili vatitig ea kamiu, ka kuvijikia kuvokar vatitig kenemiu meuliano nalo vanvano vokar bogo na kiado Tubo Yesu riyotuba vija kiano kulo lu nalo, ana bogo na mia kuvijikia kuvisikili kuvitu ea Atua Karamādo mirano na kamiu kumeravo rivu, kube lu vatitigio ga kumitu.

## 4

### *Bajago na meuliano napano Atua naio jidomio*

<sup>1</sup> Banalo, bogo na numitu bija kamiu, kumemi nuberloglog vatitig kamiu jum̄abe ka kuvילו lie ea bajago na meuliano na Atua naio jidomio, a numitu numijog kumila kija ruei, naio bo laka. A ea Tubo Yesu siano, nubika numisikili den kamiu ka kuvitu van re, kuvitu kuvijedu ka rila rivan lie bogo nonovio. <sup>2</sup> Tubo Yesu midu kiano verloglogiano nalo joa jumememi ka nuverial ka kamiu, mia kumijikia batitiglo ruei. Tibe na, bo ka kuvitakiio.

<sup>3</sup> Bo ga, ninei naruei saba tealo napano Atua jidom kiano tomu nalo monoka alaio. Kiado meuliano monoka ve lu rivu, jibe monoka rala re bajago na bova ea tivelinio na sum̄ano bija tira. <sup>4</sup> Kito nonovio monoka retakisor vatitig m̄arabo na memedu na soriano, ka toro rijikia to vija koano tira memedu ea bajago na meravo bo, na maka rijikia rila bulag nalo ve juo sialo bereio. <sup>5</sup> Jibe na, bova ka toro soro soḡeli, jakiiio kiano tinietiano jikili ea tira ga, bior nina naio be bajago tai na tomu nalo na melijokouo ga, napano maka ajikia Atua leleio.

<sup>6</sup> Verenio tomu nalo naaju amila bajago na bo laka bogo nonovio ea vio nei, mia bo laka, ka mia nalo maka avina ala bulag re saba novo na kurualo kialo. Kamiu monoka kuvitilubar vio na, ka Atua jo midu vironiano bogo nonovio ban tomu

nalo na amijoru ea kariano kinkin nalo jibe nei, jibe na nuberial ban kamiu bija iliano tiniemaiano na jikili ruei.

<sup>7</sup> Kuvilavon ka kuvisidomii ninei vonio. Bogo na Atua rivio kito ka rove kiano tomu nalo, naio maka la ka kiado meuliano rimei rivujo ka bajago nalo na maka rimeravo, a naio mila ka kiado meuliano rimei rivujo ka bajago nalo na be lu vatitigio. <sup>8</sup> Tibe na, toro napano maka tinien saaro ka verloglogiano nalo nei, naio monoka rivitilubarario ka maka toro kiano iliano ga na naio jo bukular, a naio jo bukular Atua kiano iliano ga na, nina napano midu kiano Niununo joa kito, napano naio be Niununo napano be Lu.

<sup>9</sup> Titai bereio napano nojidom neveriio ka kamiu, kito namoneano nalo kiado bajago, napano monoka rosidom kito tibe na robe m̄aratavo takurano ga. Tena kumijikia vatitigio ruei, maka tena ka nevivitauia bulagio bereio van kamiu, bior Atua naio berloglog kito robinuu ruei ber nina naio be tena bo tai na bo kirinovo laka. <sup>10</sup> Nemijikia ka kumitu kumila jibe na ruei ka namoneano nalo na Masetonia bo laka, a nojidom never bereio, ka kuvokar vatitig bajago na bo nei, kuvila rimei ve toru lie iviso ka kamiu.

<sup>11</sup> Vonganei nojidom nevivitauia saba nalo tealo bereio na bo ka kuvisikili ka kuvilaio. Na beamu, jau katanea re vio, jau koto melumu ga dan̄ariga. Juo nene, koyuku re sunumo rivan ea re toro dolu kiano burusio, a kovitii ga kiamo meuliano. A tai bereio, koyovo re, a koīm̄auka kiamo in̄auano na joa jum̄amo sikili rivu, tibe ka na nuberial ka kamiu nanua ruei. <sup>12</sup> Verver kala tibe na ea kiamo meuliano bogo nonovio, mia nalo dolu napano maka amonea, nalo amijikia avitii vatitigso, avitilubarario napano maka nalo dolu ka abitikarso, mia jau ga koīm̄a kobitakar vatitigso.

### *Tubo kiano liliuano*

<sup>13</sup> Mia banalo, nemial bo ka kuvijikia kija saba nalo tealo ea tivelinio na nalo na kito na amonmelio ruei, jibe abano kovio ea yetemeriba. Tomu nalo telabo na maka ave namoneano, amerou laka ka m̄ariano, aber ḡeli tomu nalo abano kovio mia rivova laka ka nalo, ana mila ka bogo na nalo tai bakovio, nalo ajegi toru kanio.

<sup>14</sup> A kito maka tibe na, bior romonea ka iorou ka Yesu naio m̄aro ea m̄akolkolo, naio jumolu meul bereio, a ea bajago na naruei, kito na romonea bunu ka nalo na abinimei takurano bija naio ām̄ar̄m̄aro, mia Atua naio rilalo amei ave takurano

vija naio ameul bereio, a mia amei bereio vijai.

<sup>15</sup> Nemijikia never riano ka kamiu, ka iliano tai na Tubo ga naio berenio nua, kito na roju remeul kia ga riovokar bogo na naio mia rimei bereio, kito maka rejikia ravavin beamu ka nalo na abano kovio ruei. <sup>16</sup> Makanio, a venia mia rimoluo ea bogo na jibe na. Mia parinio nailiano na tiniabene rivio souo vija verialiano tai na toru, a mia Atua kiano simeđu riolu, a mia kiado Tubo taluvo ea tiniabene mave rivatove nei. Naio rivatove, mia namoneano nalo na aňarňaro aju, mia atumormolu bereio beamu. <sup>17</sup> Iorou ana mia kito na remeul roju kia ea vio yetano, mia naio rivuru kito bunu ravavin mave vija nalo roviniu, ravan bure melijo nalo na mave ea tiniabene, ravan roviviuo kiado Tubo mave ea vio yauo. Rovan tibe nei, a mia rotu vija naio maka rijikia ribisi bogo tai.

<sup>18</sup> Verikariano na bo laka, mia bo ka kito rotu rejaja kito bogo nonovio ea jidomiano novo nalo nei.

## 5

*Kito monoka rotevijo rotu batitigio, vesiou re ga naio rimei*

<sup>1</sup> Banalo, nemijikia ka tomu miroano nalo ajidom ajikia ka saba nalo nei mia riyotuba ea bogoti vabe, ŗeli ea bogo venia. A nina maka kiaku ka novivitau kanio van kamiu na, <sup>2</sup> bior kumijikia ruei ka tena maka toro kiano ka rijikiaio. Mia tibe ka ga toro na vinauano mila kiano iňauano bogiano. Naio maka rijikia verial beamu bogo venia ana mia naio riyotuba!

<sup>3</sup> Vede naio rimei ea bogo tai na tomu nalo aju aberver kalo, aberinavo "O, vonganai be bogo na tuňaro ruei" ŗeli aber "O, vonganai rojua bogo tai na bo!" Nalo maka ajikia, ana tenei jibe tira tai na vaarakurano ga mijog ka mia kenerinio rimoluo naruei. Mia bogo na naio rimei bereio mia tibe ka ga, napano tomu nalo amiilo kanio, maka asidomiio, mia buruňara bogo na jaleleano riyotuba kalo, nina maka ajikia avuro den leleio.

<sup>4</sup> A kamiu bilbilu nalo, maka bunu kuvitua melijokouo, a ver bogo na toru nei riyotuba, neber ŗeli nalo kuvijikia kuviiilo kanio re, jibe ka naio be toro na vinauano tai binimei ka kenemiu saba nalo. <sup>5</sup> Kito maka bunu rove tomu na melijokouo na bogiano, a rove tomu na miamoiano na legiano ruei. <sup>6</sup> Tibe na naruei, mia kiado jidomiano ritevijo vatitigio rivu bogo nonovio, rovokar vatitig rivu kiado meuliano, ka rotibe ka re tomu

nalo dolu na melijokouo. <sup>7</sup> Iňauano nalo na aju amiiňaukanio, aju amun uei amun banbano-o muelo, karina aju ga amonmonmelio ga, <sup>8</sup> a kito na miamoiano, monoka rala kiano iňauano rimemedu. Mia kito rala kiado meuliano rimemedu rivu, mia reiako niabedo ea bajago na viekouoiano a bajago na tinietiano, a rosovko parido ea moneano na jikili, ber ka mia Atua monoka rilarur kito.

<sup>9</sup> Nina maka rivu ka kiado jidomiano veve juo ka mia Atua rilarur kito, ŗeli mia rilarur re kito, bior ka maka kiano jidomiano ka kiano moneano nalo mia avokar vironiano, a naio bijauia kito ruei ka rovokar ioruriano napano Tubo Yesu Kristo naio jovulu be kiado. <sup>10</sup> Naio ŗaro kar kito, mila ka ver bogo na naio rimei bereio, be iakurano napano romonmelio, jibe na rabakovio ruei, ŗeli rotu rotevijo, tibe na romeul keano roju, a kiado meuliano mia to vatitigio vija naio bogo nonovio.

<sup>11</sup> Iliano nalo na naruei bo ka kuvitu kuverver ka ridular kenemiu jidomiano mave, kuvitu kuvijaja kamiu ka kuviiňauka kenemiu moneano rimei sikili rivu, tibe napano nemijikia ka kumituňa kumila ruei.

*Iliano na maaro*

<sup>12</sup> Banalo, nojidom nevika kamiu bunu ka kuvisikili kuvitilubar vatitig nalo na amiiňau ŗele ka iňauano na Tubo kiano iviso ka kamiu. Nina bior napano naio midulo aju ka aje tuboiano van kamiu, averloglog kamiu. Kamiu monoka kuvamenealo rivu, <sup>13</sup> a kuvidulo atu mave ea kenemiu jidomiano, tiniemiu tiilo, ka iňauano na nalo aju amiiňaukanio. A bunu, kuvitu re kuvila baravo, a monoka tiniemiu memi ka kamiu bogo nonovio.

<sup>14</sup> Nebika jikili ban kamiu kuruaku nalo a kuvivinieku nalo, verver kamiu tai amiyovo, bo ka kuvil vanlo ka avarlo kija. Ver kamiu tai amerou, kuvil vanlo ka rila nalo atu asikil. Ver kamiu tai niabelo mave, kuvil vanlo ka rijaiilo. A ea nalo abiniu, kuvila ka kenemiu jidomiano rive tebievi vatitigio rivu.

<sup>15</sup> Kamiu kuvisikili ka kuvila ka ver toro tai rila vova ka kamiu, mia kuvila kean re bunu vanio. Kito monoka resikili ka rala ka rove tiniememi vatitig ka kito, a rove tiniememi vatitig ka tomu nalo dolu bunu.

<sup>16</sup> Bekurano ka venia na mijikia riyotuba ka kito, a monoka rasaaro bogo nonovio, <sup>17</sup> robolkouo bogo nonovio, <sup>18</sup> rover siva ka Atua bogo nonovio. Nina naruei kiano sidomiano ka kito roiiňaukanio, ea tivelinio na kito robe Yesu Kristo kiano.

<sup>19</sup> Bereio, verver sebi na Niununo na Atua kiano jo bilvili bo ea vio tai, mia kuvuebin re riñaro, <sup>20</sup> a verver toro tai jo berial verialiano nalo, mia kuviyotel ea re naio, <sup>21</sup> a kuvitititii veve saba nalo riviniu vatitigio rivu. Vite na bo, kuvokar sikili, <sup>22</sup> a vite na bova, kuvituvanio.

<sup>23</sup> Ana nobolkouo ka Atua ga, napano be Atua na tumaro, rila kenemiu iviso vija jidomiano a meuliano bunu rive lu mia rive lu vatitigio. Nojidom laka ka bogo na kiado Tubo Yesu Kristo rimei bereio, mia niunomiu, tiniemiu, vija mokotene-miu nonovio maka lele kiri soro tai toalo. <sup>24</sup> Naio napano bio bulag kami, naio be viekouoiano riano, a mia naio riñauka tibe na ga rivano.

<sup>25</sup> Tena maariano na neverial ka kami bilbilu nalo, nebika ka kami tiniemiu ribobogia re kumemi ea kenemiu volkouano nalo. <sup>26</sup> Kuver kavijo bo a bogiano bo ka namoneano lu nalo dolu na aju, <sup>27</sup> a ea Tubo siano, never niosi nei, kami kuvuluku bulagio ea miralo.

<sup>28</sup> Kiado Tubo Yesu Kristo kiano tiniememiano jo bija kami.

Kiniou, Pol.

**Mesi Juo Napano Pol  
Bivitauiaio  
Ban Namoneano Lu Nalo Na  
TESALONAIKA  
Verialiano Moti**

*Tukunu bulati na niosi nei*

Tomu nalo na yimo lu na Tesalonaika ajua jaleleiano bior amijog iliano telabo, aber Yesu binimei bereio ruei, a maka ajikia ka iliano vabe naruei na be riano. Ana Pol jiri kiano mēsi juo nene ba ban namoneano nalo na Tesalonaika ka verial ilirianiano vanlo. Naio berinavo Yesu mia rimei bereio, mia beamu bajago va nalo monoka rimei rivova laka yetano ka tuboiano na toro tai napano mia rimaluvo, napano siano “Toro na lakorov Tuboiano,” a naio mia rilikuei ka Yesu.

Pol berial meravo ber tomu nalo napano abuluku mēsi nei monoka atu sikili ea kialo moneano, ver vaio p̄eli mia ajevio jaleleiano ve telabo, a ajog rivova laka. Mia naio berinavo monoka aiñau sikili tulaka ka ajevio. Vite nalo napano maka ajevio ea kialo meuliano, jibe napano naio bija tomu nalo na amiñau bija naio aju amilaio, a monoka ala ga iñauano novo nalo.

*Torogio nalo na niosi nei*

Iliano moti 1:1-2

Pol jaaro kalo bija naio miaia lo 1:3-12

Pol berloglog tomu nalo ka Yesu mia rimei bereio tuñabe 2:1—17

Pol berlogloglo ka namoneano kiano bajago 3:1-15

Iliano maariano 3:16-18

*Iliano na be moti*

<sup>1</sup> Taara na namoneano nalo na karamñado Atua kiano a kiado Tubo Yesu Kristo, napano kumitua komeli na Tesalonaika, kumemi tolu Pol, Sailas a Timoti, kumemi numisaaro toru laka ka nuviviuo kamiu ea niosi nei. <sup>2</sup> Tinie memiano a tuñaroano na karamñado Atua kiano bija kiado Tubo Yesu Kristo to vija kamiu.

*Pol jikar kiano vivitauiano bija volkuano ka ver sivaiano*

<sup>3</sup> Titai napano bo ka nuvila bogo nonovio, monoka nuver siva ka Atua ka kamiu nalo na kenememi bilbilu nalo. A vonganēi, kumemi numisaaro toru ka nuvila tibe nei, bior kumemi numijog lilianiano nalo na kenemiu, aber kenemiu moneano binimei bavin laka bogo nonovio, a kamiu tomu nalo binui aju

tinielo jiilo bavin toru lie. <sup>4</sup> Nina bo laka, ana bogo na numitu numiselviv ea taara nalo dolu na Atua kiano namoneano, numitu numiaia kamiu toru banlo. Kumemi numitu nubisivisii banlo ka kumitu kubar bajago nalo na jikili na uolu nalo kialo, a kumitu kumidu ruru bogokouo tai na mila bulag kamiu laka, a kamiu kuvikulkul re, kenemiu moneano rijoru leleio re.

<sup>5</sup> Bogo na kumitu jikili jibe na, ana numial ka bogo na Atua bijauia ga kamiu naio miñauka memedu battitigio, bior mijikia ka kamiu kube tomu nalo napano maka kuvijikia kuvijoru. Vonganeī, naio mijikia ruei ka kamiu kumitu kubar jogvaiano nalo bior kiano navenatuboiano, a iorou, mia naio vititii kamiu ka kubare ka kuva joomo eaio.

<sup>6</sup> Naio, bogo nonovio naio miñauka memedu ga, a mia naio rila meran vovaiano van nalo na aju amila bova ban kamiu. <sup>7</sup> Nalo amila kamiu kumitu kubar bogokouo laka, a mia naio rila ribisi, mia naio rijai kamiu yako, a rijai bunu kumemi ea vio nei napano kumemi bunu numitu nubinua saba tealu. Bogo na reial ka buruñara sebi vilivili ea vio yauo, remijikia ka mila mñarabo na Atua kiano ka riila Tubo Yesu taluvo ea tiniabene rimei ea yetemeriba, vija kiano nailiano nalo na jikili, ka mia naio rivuru bulag kito den jaleleano nalo na yetemeriba. <sup>8</sup> Naio riyotuba, mia naio tibure nalo na maka asidom ajikia Atua, maka asidom ajogkar Ioluano Vou na kiado Tubo Yesu kiano.

<sup>9</sup> Kialo vironiano na mia nalo avario, mia nalo ava kovio bo garuei, mia nalo atukovio kalo maka ajikia atu vija Tubo bogo tai ea vio novo napano kiano mo-roano miñaukanio bo jo ruei. <sup>10</sup> Ea bogoti napano mia naio rimaluvo, mia kiano tomu lu nalo aiaia naio ve toru laka, mia nalo na amonea naio aial naio tibe naio bo bo laka, a mia kamiu bunu vijalo, kuvitakisor naio. Kumijikia kuvila tibe na bior kumonea kenememi Ioluano nalo, mia nalo dolu napano na, mia maka ajikia atakisor naio leleio.

<sup>11</sup> Kumemi numitu numisidomii saba nalo na banbano-o, ana mila numisikili vatitigio bo ka nubolkouo bogo nonovio bior kamiu. Numitu nubika den kiado Atua ka riijaja kamiu, kubare ka meuliano lu nei napano naio bio kamiu kanio. Nubolkouo ka kenemiu verkariano novo nalo napano kumitu kumisidomii ka kuvitakio, bija iñauano nalo na bo napano kenemiu viekouoiano mijikia rila, mia Atua riñau ea kiano sikilianio ka mia

monoka avar m̄arati. <sup>12</sup> Numitu nubolkouo jibe na ka kamiu kuviaia kiado Tubo Yesu siano rimeia ve toru bure kamiu, a ka kuviluo lie vija kiano bajago nalo na bo. Ver kumijikia kuvila tibe na rivan rivano-o rive vare ka tiniememiano novo napano Atua kiado Tubo kiano, nina be Yesu Kristo, mia rivu mia rivu.

## 2

*Toro va na, Uolu na tuboiano, mia rimeia*

<sup>1</sup> Kiniou nojidom neverii bereio Tubo kiano liliuiano bereio, bijaio jum̄abe ka mia rivuru kito rotu vija naio. Banalo, ea vio nei, nojidom never tibe nei, <sup>2</sup> mia niukuuku rivie re kamiu laka, kumerou re. Nemijikia ka iliano tai jo jeliviv ber tomu tai aju aberial ruei p̄eli aju amioliolu ka legiano na Tubo kiano liliuiano maluvo ruei, a nalo dolu aberverial aber kumemi naverloglogiano nalo naruei nuberial tena ea kenememi niosi tai ruei. A kamiu kumonmonea re iliano nalo na, <sup>3</sup> kuvijamo kalo re ala sibilili kamiu tibe na.

Venia na nalo aju aber, maka jikia tibe na leleio, bior buruñara naili-dieiano van Atua monoka rimeia mave beamu vo. Mia iorou kanio toro va na rivakovio nei, napano abio ka Uolu na Tuboiano, naio bunu monoka riyotuba medave. <sup>4</sup> Toro na naio bova laka, naio jo mil die tenalo na bo, a naio jo midu naio jo mave ka tenalo abiniu na Atua siano joalo bija tenalo lu dolu na tomu nalo ajovon vatitigio. Mia naio rila tibe na rivan rivano-o, naio ga takurano ridular naio bereio toa vio lu joomo ea Atua kunuano, naio riverial naio river naio be Atua ruei. Mia bogo na naio rila tibe na, nina bogo na naruei mia romijikia roytuba ea legiano na maero.

<sup>5</sup> Ver kumitu tiniemiumaio kia ga vo ka bogo na nojo bija kamiu, nojo neberial vite nei va miroano ban kamiu ruei. <sup>6</sup> A jakii venia na nebisivisii vonganei, kumijikia kuvitilubar ka toro na, kiano bogo memedu ka riyotuba jo, a nalo aju koko vio ka naio bior kiano bogo nene na makam vo.

<sup>7</sup> Mia be iakurano ka Uolu na tuboiano na naio maka riyotuba vo, a kiano sikiliano jojom̄a miñau lukuluku kiano bajago va nalo ea vio yetemeriba nei ruei. Naio maka rijikia riyotuba medave ea kiano sikiliano nonovio vo, ka Niununo Lu joko vio ka naio, a bogo na Niununo Lu taluvo bereio rivano, <sup>8</sup> mia naio tumolu vija kiano sikiliano nonovio. Mia naio rila mira rivan riva vaataro ka tovulio, a iorou Tubo Yesu mia rimaluvo, mia jegi na kiano iliano naio riyuvu lar toro va nei ve vaarakurano, mia

mia-moiano na toru na binimeia bija, rijilar toro nene riva kovio ea melijokouo.

<sup>9</sup> Bogo napano Uolu na Tuboiano nene maluvo, mia naio riñau vija Siñaro kiano sikiliano, a mia naio rila vremesiano nalo vija tovo nalo vija vite nalo na ilioiano, a abe sibiano nalo ga. <sup>10</sup> Mia naio rila tibe na bior jidom rijukujuku tomu nalo nei kialo jidomiano, ka nalo avakovio. A mia naio rila bunu bajago va na ajikia avurudom kialo jidomiano ve dolu, bior nalo abe tomu na maka asidom Atua kiano ilirianiano, nalo maka asidomii leleio ka mia naio rijikia rivuru meul ealo.

<sup>11</sup> Ana bogo na Atua mial kialo jidomiano jikili jibe na, mia naio tuvanlo ga, mia naio mijamo ka ga buruñara sibiano nalo ka tovulu kialo jidomiano tibe nei ga, mia amonea vatitig sibiano nalo na. <sup>12</sup> Ana iorou, mia naio tiburelo memedu garuei, ber abe tomu na maka amonea kiano ilirianiano, mia venia na ajaaro kanio, naio be bajago va nalo nam̄a aju amila ruei.

*Kamiu kuvitu sikili vatitigio rivu bogo nonovio*

<sup>13</sup> Vite tai napano monoka nuvila bogo nonovio, kumemi monoka nuver siva ka Tubo Atua rivior kamiu kuviniu kuruememi a kuviviniememi nalo, napano naio jidom kamiu toru laka. Jikar nua ruei, naio bijauia bulag kamiu ka mia kuve m̄arati moti ka kumonea kiano ilirianiano, a Niununo miñau ea kenemiu meuliano, kumei kumeravo ea mirano, ana mia naio rijikia rilalarur kamiu.

<sup>14</sup> Naio bio kamiu ea lilianiano vou na napano kumemi numidu binimeia, bior ka naio jidom ka kamiu bunu kuviasol miamoiano na toru ka ridular kiado Tubo Yesu Kristo siano mave. <sup>15</sup> Jibe na banalo, maka rivu ka kam tai rila luvuio. Monoka kuvitu sikili vatitig bogo nonovio, a monoka kuvokar vatitigio verloglogiano na nuberial ban kamiu ruei ea kenememi iliano nalo p̄eli ea niosi nalo nei.

<sup>16</sup> Karañado Atua tiniene jii kito, kiano tiniememiano ka kito midular kiado jidomiano ea kiano verikariano tai na bo, ka kito rotu rivu vija naio bogo nonovio maka rijikia ribisi bogo tai. Ana nobolkouo ka naio, ka mia kenerinio, kiado Tubo Yesu Kristo, <sup>17</sup> naio tunukakar kenemiu iviso, rila kamiu kuvisikili vatitigio rivu ea iliano nonovio nalo na bo a im̄auano nonovio nalo na bo laka.

## 3

*Pol bika ka abolkouo ka naio*

<sup>1</sup> Kulou nalo, beamu ka navokar juluvati na kiaku iliano nojidom nevika den kamiu nonovio ka kamiu tinierniu bobogia re kumemi ea kenemiu volkouano nalo, ka nuvijikia nuvirñau sikili lie, ka Tubo kiano iliano rijikia rivanvano-o tavio soĤeli ea vio nalo. Verver tibe na, mia tomu nalo bunu amijikia ajog kiano ilirianiano, amijikia adular siano, jibe na ga kamiu kumila bogo na naio miyotuba ea kamiu beamu nua. <sup>2</sup> A bogo na kubolkouo, bo ka tiniemiumaio ka bunu ka maka tomu nonovio na amonea, a tomu va nalo tai na kialo jidomiano dolu, ana kubolkouo ka Atua tokovio vatitig ka kumemi ka nalo ajikia re atokol kumemi.

<sup>3</sup> Remijikia ka remijikia ravarkar tiniedo ea Tubo bogo nonovio, ana be iakurano Ĥeli Parinio Toro Va na naio jidom rila venia ka kito, a nomonea ka Tubo mia rila kito resikili vatitigio rivu, mia vitikar kito rivu laka. <sup>4</sup> Be tinieku ka mia naio saaro ve toru ka rijai kamiu tibe na, bior tenalo na kumemi nuberial ka kamiu, nomonea ka kamiu kumitu kumila ruei, a nomonea ka mia kuvitu kuvila tulaka ea bogoti nalo na ju ka rimei. <sup>5</sup> Kamiu kumila jibe na bo laka, mia kiaku volkouano ka mia Kristo kiado Tubo tukamu ka kamiu riva rivokar na kenemiu jidomiano rimei rive tebievi riano tibe ka kiano, a na kenemiu iviso rivujo ea Atua kiano tintetiiano.

*Iliano na tivelinio na yoviano a bajago napano aju kurano janea vio*

<sup>6</sup> Banalo, ea Tubo Yesu Kristo siano nojidom neverial ka kamiu ka ver kuruado tai maka rinñau vatitig Ĥeli naio maka takii verloglogiano nalo na kumemi numisian, bo ka kuvitu koalabo kija ka naio. Tomu na yoviano na jibe na, kamiu kuvan re vaataro kalo, <sup>7</sup> bior bogo na kumemi numitu iviso ka kamiu, maka numitu kurano tibe na. Kumemi nuberial mñarabo na bo ka kamiu, a kumijikia vatitig ka bo ka kuvitakiio. <sup>8</sup> Bogo na verver numidu sinaniano tai, a kumemi nubul ga, bior napano numirñau legiano a bogiano ka nubar veru ve teliki ka nubul venia na numisidom. Kumemi numinonou jibe nei ka rila nuvila re buru inñauano van kamiu ka kuvitikar kumemi. <sup>9</sup> Peli memedu ga ka monoka kuvitikar kumemi ve teliki, a numisikili ka nuvitikar kumemi ga, ka nuverloglog kamiu ka bajago tai na bo nina kuvijikia kuvitakiio. <sup>10</sup> Bogo na numitu bija kamiu, kumijog numitu nuberial tenei ruei, jibe ka kenememi tuboiano tai, napano numisian bunu ban kamiu, ver toro na maka sidom rinñau, mia naio maka rijikia sinano.

<sup>11</sup> Nemil jibe nei bior iliano telisu tai binimej bokar tilinieku ber kam tealo maka ala titai leleio, aju kurano ga jibe na, mia aju amilkue laka ka tenalo na tomu dolu nalo aju amirñaukanio. <sup>12</sup> Kenememi iliano ban nalo na jibe na ban jibe na, ber kamiu maka bunu tena kuvitan ea vio tibe na, kuvilavon ka kuviturmaro ga ve telisu beamu, a kuvisikili ka kuvila inñauano kija vare ka kuvokar semiu sinaniano na kumisen ka bogoti bogo nonovio. <sup>13</sup> Ana iliano ban kamiu kuruememi nalo a kuviviniememi nalo abiniu, ver maka kito tai na river ka naio rijog tinieno mñaro ka inñauano novo nalo na ju ka roirñaukanio.

<sup>14</sup> Kumemi nuber saba nalo miroano ea niosi nei, ana ver toro tai maka tiniene saaro kanio, bo ka kuvitilubar toro na. Mia kuvitu re kuvila vonvon ka kuvirñau vija toro na beamu, ka rila naio rimou ve telisu, naio rivitilubar kiano beleiano. <sup>15</sup> A mia kuvila re titai vanio tibe kenemiu uolu tai, a kuvila bon naio tibe na ka naio rimei rive kuruemiu novo tai.

*Iliano na maaro*

<sup>16</sup> Kiaku iliano na maaro, nobolkouo ka mia Tubo na tunñaro rudu kiano tunñaro to vija kamiu ea kenemiu mñarabo nalo riviniu, nobolkouo ka naio rivija kamiu kuviniu bogo nonovio.

<sup>17</sup> Vio nei telisu yetano nei mia keial ka kiniou ga nobivitauia iliano nalo ka jumñaku. Nojidom ka nala tibe nei ea kiaku niosi nalo ka kuvitu kuvitilubar jumñaku ka kiniou naruei nojuvan niosi nei biedu. Naio naruei kiaku vivitauiano jo, beriiio:

<sup>18</sup> Kiado Tubo Yesu Kristo kiano tiniememiano jo bija kamiu nonovio.

Kiniou, Pol.

## Mesi Moti Napano Pol Bivitauiāo Ban TIMOTI Verialiano Moti

*Tukunu bulati na niosi nei*

Timoti, naio be namoneano vou tai napano naio tena komeli nei Listra. Kenieno tena taara na Israel a karmano be toro Kris. Timoti be Pol kiano bilbilu tai napano jo ban bija naio ea vio nalo na jo ban ea ka verial kiado Tubo Yesu Kristo kiano ioluano vou. Pol jiri mēsi nei ea bogo napano naio ba joa tanobuku na Masetonia, a Timoti jo yako Evesas.

Pol jiri mēsi nei ban Timoti berkanio ka vitikar ka verloglogiano sisisibi nalo napano amijikia amei joomo ea yimo lu. Verloglogiano sisisibi nei miyotuba ea jidomiano ga tai napano berinavo vite nonovio ea yetemeriba abova nonio. Tomu nalo na aberloglog tomu nalo ea iliano na sisisibiano nalo, aberinavo toro mijikia rivokar meuliano, verver ga naio mijikia verbulag kialo ililukuano nalo, a ajuvan sinaniano tealo a ajen sinaniano tealo ga napano memedu ka asenio, a mia naio maka soro, a vite tealo dolu jibena bereio.

Mia ea mēsi nei Pol berii bajago novo nalo napano namoneano nalo amijikia atakio ka ala lotuano, a ka avitikar yimo lu. Mia naio ber bajago novo nalo napano navurumāraboiano na yimo lu nalo a namoneano dolu nalo monoka atakio. Mia vite maariano napano Pol berenio, naio ber ka Timoti ber naio monoka rimeii ve toro novo tai na Yesu Kristo kiano iñauano. Naio berial bajago napano naio monoka toa naio bogo na naio to rivija taara dolu ninio na namoneano nalo napano naio to verlogloglo.

*Tukunu nalo na niosi nei*

Iliano moti 1:1-2

Verloglogiano ea tivelinio na yimo lu bija kialo navurumāraboiano nalo 1:3—3:16

Iliano nalo na ijaiano ban Timoti ea kiano iñauano 4:1—6:21

*Iliano na be moti*

<sup>1</sup> Nao Timoti, kiniou atevi Pol nei nebitauiā ea mēsi nei biedu banso, napano Atua na Ioruriano na kiado bija Kristo Yesu kiado siraragkuiano abitirilar kiniou ka noiñau ka Ioluano Vou na bo. <sup>2</sup> Kiniou najaaro toru ka nevitavo easo bereio ea vio na, bior nabano nemialso jibe ka napano jau kobe keneriku riano tai joomo ea

māratavo na viekouoiano na kiado. Nojo nobolkouo biorso, ka Atua karamiādo, bija Kristo Yesu Tubo na kiado, mia nalo aje tiniememiano, a tiniēiano, a tumāro na kanalo to rivijaso.

*Kotokovio von ka verloglogiano na sisisibiano nalo*

<sup>3</sup> Kiniou nojidom neverial bereio vanso vite nei napano kito roberio beamu, bogo napano nojo bijaso yako Eveso, beamu ka napano nojo najaluvo ka navan ea Masetonia. Ka bogo na, roju remial ka napano veribinio tealo aju, romijikia batitiglo, tenene na neberinavo bo ka jau koto ga ea vio na beamu vo, ka kalavon ka koverburelo. Vite na naruei nojidom neverial vanso bereio, ka kotoa vio na beamu vo, bior napano nalo na, ajunā aberloglog vite nalo napano maka amemedu ga. <sup>4</sup> Bogo nonovio kialo jidomiano nalo ju bujo ka kialo tukunu moruo nalo, a aju tinielo jii ka averii ga torogio na kialo buo nalo re nuanua laka, mia bo ka atuvan vite nalo na tu. Iliano kinkin nalo na jibe na ju mila tomu nalo kialo jidomiano beve juo bereio, a maka ajikia aijalo leleio ka avokar meuliano na bo napano Atua naio jidom, napano romijikia rovokar ea moneano ea naio ga.

<sup>5</sup> Tibe na bo ka kito roverburelo, ka rila na mia kiado tomu nalo, kialo iviso mijikia rimeravo rivu, kialo jidomiano mijikia memedu rivu, a kialo viekouoiano ve riano to, bior napano ver tibe na, mia bajago novo na tintietii kito naio mijikia rimeii rive toru laka bure kito bereio.

<sup>6</sup> Mia vonganei naio bova, bior napano nalo na vio na tai, ajitiravo ajaluvo den mārabo na bo nei, amiel ban ea mārabo na ilivovuiano nalo. <sup>7</sup> Nalo abarvar kalo, a ajidom ka amei ave naverloglogiano na tuboiano lu, mia aju aber bulavulag sano iliano nalo na jikili nene, a maka ajikia vatitig rivu venia napano nalo ga bereio ajunā aberenio, maka ajikia aver bisivisii vatitigio leleio.

*Atua kiano tuboiano naio be tena venia?*

<sup>8</sup> Nalo na aju amila baravo ka Atua kiano tuboiano, mia kito romijikia ka tuboiano, ver kito ralaio rimemedu, naio be kiano burumāra iñauano nene. <sup>9</sup> Kito monoka rejikia ka tuboiano, maka avitirilar ka rijai tomu nalo napano amemedu ruei, mia ka rila kulo dolu nalo amemedu, tibe ka nalo namā amila korovio, bija nalo napano maka asidom aiagago kanio. Nalo na be nalo napano maka tiniel tii Atua, napano amila vite nalo napano naio maka

sidomio, napano ajidom be iakurano ea vite lu nalo, napano pariparilo kirisikili ga, a napano amuebinvin karañalo bija kenielo, ðeli na amuebinvin tomu dolu nalo. <sup>10</sup> Bija nalo nei, abe nalo narña amila siakiano, bija narña surñano buru surñano bereio ðeli tira buru tira bereio, bija nalo tai napano abina ka kiritete ka aivilvil kanio rivano, a nalo na tena sibiano, bija bunu nalo napano aju amilavan kanalo beleano va nalo. Tuboiano nei naruei be kanalo, bija nalo napano ajunña amila bajago dolu nalo na bova na jibe na, bior napano nalo abijukudie toru laka ka kiado verloglogiano na bo. <sup>11</sup> Nalo maka atakii leleio lilianiano novo napano kiado Atua lu novo kiano, napano naio mije monea kiniou ka neverial van kamiu.

*Yesu kiano tiniememiano ban Pol*

<sup>12</sup> Inñauano nei naio joa juñaku ka nala, mia nojidom never burumñara siva van Kristo Yesu kiado Tubo. Naio naruei bitii kiaku meuliano, mialio ka nemijikia nebiekouo ea inñauano nei, naruei naio bitirilar kiniou ka nalaiio, mia monoka neverial ka naio ga jo mije moroano ban kiniou damñariga ka neiñauka tavukia napano naio jidomio. <sup>13</sup> Beamu, kiniou nebe toro tai napano ña nojo nomiuluolu niegeniegeio ea sio lu nei Yesu, a nojo nomila lelan naio toru, napano nojo nomila bova laka ea namoneano nalo na kanano, napano memedu ga ka naio rije mau van kiniou riviorio. Mia makanio, naio bitilubarario ka nojorña nemiel ea meli-jokouo ga, maka nomonea naio, maka nejikia vite venia napano ña nojo nemila, naruei naio mila bo laka, be tiniememiano ka kiniou.

<sup>14</sup> Jibe na, nemial ka napano kiado Atua naio mije kanano tiniememiano novo ban kiniou burutomoruo laka, mison kanaku meuliano ka viekouoiano a tinietiano napano be kiado robiniu napano robe takurano bija Yesu Kristo.

<sup>15</sup> A iliano tai jo, napano romijikia ravarkar tiniedo eao, napano bo ka aviniu ajev ea kialo meuliano, napano ber jibe nei, berinavo

Kristo Yesu naio batove yetano ea yetemeriba nei ka rilarur nakariano na vabe kiano meuliano.

Mia ea tomu nalo na ña amila kariano jibe na, nemial jibe ka kiniou nebe natukamuano kalo, kiniou nobova loa ka nalo abiniu, <sup>16</sup> mia siva ban Atua napano tinien miiia kiniou. Nemial jibe ka maka nememedu ka naio viekokoia kiniou tibe na, napano nebe natukamuano na tomu na kariano nalo. Mia naio mila jibe na

ka kiniou, ka mia tomu nalo amijikia avitilubarario ka Yesu Kristo, kiano jidomiano tebievi laka ka naio rijikia tinien riia tomu nalo na bova. Naruei bogo napano nalo na aju ka amei iorou aialio ka napano Atua naio jaaro ka rivuru kiniou tibe na, mia rila nalo avitilubarario ka nalo bunu amijikia amonea naio ka avokar meuliano napano maka ve jukuti nene.

<sup>17</sup> Nojidomial kanano bajago novo nei mila nemiaia naio, neberinavo naio be parinio Tubo ka bogo nalo re nua, a naio meul jobo jo. Naio joa vio nonovio mia toro maka rijikia rialio, naio takurano ga be Atua a maka dolu tai bereio. Tibe na, bo ka ravatove ka naio, rodular siano rivano-o rijikia re ribisi bogo tai, mm.

*Jau kotu sikili kojorjoru re*

<sup>18</sup> Timoti, nojo nemialso jibe kobe keneriku, a nojo nojidomial verialiano napano aberiiso beamu kiana, napano aberialso ban kiniou. Amila nebitilubarso ka jau kobe toro tai napano nemijikia navar tiniuku easo. Tibe na, iliano tealoo na teremi ðeli verloglogiano tealoo na tortoru ju, napano nojidom nesian moneaso. Iliano nalo na mia amijikia ala jau kesikili ñele ea mira lu na Atua napano rojuña romila, <sup>19</sup> bior napano mia aijaso ka kavakar vatitig bajago na viekouoiano, a amijikia ala napano kanamo jidomiano mijikia meravo tulaka.

Tomu tealoo, jibe ka aju ajelan vuu ka uako, naruei kialo jidomiano na bo berial kalo ber ñarabo ninei, mia nalo maka asidom aiagago ka naio, ana amilaluvio, kanalo viekouoiano riva rivavin ea barañña tai. <sup>20</sup> Peli komijikia tomu juo nei Aemeneas bija Aleksada, naruei kiniou neber aua ka neverial ka tomu juo nei ajibe na ruel. Amila bova banbano, maka asidom aiagago, ana nobuku bulaglo aban bereio ea Simñaro juñano, ana vede naljuo abitilubarario kiana vo ka atu re bunu ala bulag lu na Kristo siano tavukia napano ajunña amila.

## 2

*Verloglogiano tealoo ea tivelinio na amila lotuano*

<sup>1</sup> Mo, kiniou neverial naverloglog-iano nalo nei naruei. Na be moti, nojunu kakar kamiu ka ea bogo na volkouano nalo, monoka aver siva van Atua riviorlo dolu nalo, a monoka kuvolkouo sikili rivior nalo, a monoka kuvika sikili den Atua ka rijailo. <sup>2</sup> Nina monoka kuvila bunu ea tivelinio na tomu nalo na tortoru, jibe ka parinio tubo nalo bija navurimñaraboiano



nalo napano aju mave ka kito, bior napano ver nalo aināu rivu, mia rivu lie van kito. Mia romijikia rotua meuliano nabo, napano momavo a tumāro joaio, a romijikia rala ināuano lu nonovio na Atua kanano, e bajago novo jibe ka napano naio jidomio. <sup>3</sup> Bajago nalo na jibe na abo laka, naio be bajago napano Atua na ioruriano na kiado naio jaaro ka vitio ka mirano, <sup>4</sup> bior napano naio jidom ka tomu nonovio avokār kiano ioruriano, naio jidom ka tomu nonovio ajikia kiano ilirianiano. <sup>5</sup> Maka ve mārabo dolu, bior napano naio takurano ga be Atua naio jo, a toro takurano ga naio mijikia rila kiado merevuiano rivija naio, nina be Kristo Yesu, <sup>6</sup> napano naio binime be toro, karna naio mijamo ka kiano meuliano bereio, midu jeleig kito, bul bulag tomu nonovio na yetemeriba den toro na bova jumāno.

Ināuano nei napano Yesu naio mirāukanio, naio mila Atua kanano verikariano nalo na beamu abinime abe riano, amaluvo ea bogo nene memedu, <sup>7</sup> naruei naio mijoru ea kiniou naruei ka neverial van tomu nalo. Vede teale be tinielo ka nojo nemila sibi, mia makanio, neber be riano ga. Abitirilal kiniou jibe toro tai na bar iliano pēli na atevi tai, ka neverloglog taara na tomu nalo ea bajago na viekouoiano a ea mārabo na ilirianiano.

<sup>8</sup> Bior jidomiano nalo na, nojidom ka tomu nalo monoka atu abolkouo tulaka ea vio nonovio, a bogo napano atumolu ka avolkouo monoka ave lu rivu, napano tiniemimiano maka toalo, siniabu maka to iviso ka nalo rivija tomu dolu.

#### *Tire nalo kialo bajago*

<sup>9</sup> Ea tivelinio na tire nalo, kiniou nojidom ka bogo napano amei joomo ea yimo na lotuano, bo ka nalo ayovovu vatitigio ve kirinovo, mia maka rivu ka ava loa, monoka rivare ga ea vio lu napano aju aba joomo eaio. Maka nosidom ka ala mēlea vijulo veve dolu nalo, pēli na atelan mēlea niogo nalo tanea niabelo nalo, a maka rivu ka avarvarlo mēle ea kulunārauo napano abululo ka burunāra puruveru. <sup>10</sup> Vite takurano ga naio mijikia riovovualo rivu laka, nina be kanalo ināuano novo nalo, napano amemedu ga ea tira kiano meuliano napano milotu ka Atua. <sup>11</sup> Tire nalo monoka avatove rivu, atu melumu ka aiagago ka verloglogiano nalo napano aju aberialio ban tomu nalo.

<sup>12</sup> Maka noto najamo ka tire nalo averloglog suñano nalo, pēli na aje tuboiano mave loa nalo, mia monoka atu melumu ga. <sup>13</sup> Nina naio memedu ga, bior napano Atua jii toro na jukamu be Atam, karina

tira nei Iv, <sup>14</sup> a maka ve Atam napano Simāro mijukubin naio, mia be Iv, naio be moti napano milakorov tuboiano.

<sup>15</sup> Simāro mijukubin Iv, mia Atua tinien miia tira nalo keiano vo, jian ināuano novo tai banlo, ka avar kiritete vou nalo amoluo ea yetemeriba nei. Ana ver tira tai, naio ve kiano viekouoiano, kiano bajago rivujo ka tinietiano, kiano meuliano rive lu vatitigio, a kiano jidomiano to tano, mia Atua naio risaaro ka rilarurio.

### 3

#### *Navurimāraboiano nalo na tumāro*

<sup>1</sup> Ver toro tai, jidomiano tai toaio ka tinieno ka rudu sio na navurimāraboiano, naio bo na, bior be riano, naio be ināuano novo tai laka nei napano naio jo jidomiiio ka rila. Naruei kanado navurimāraboiano nalo, mia kiniou neverial ka nalo monoka ave toro na jumābe.

<sup>2</sup> Vite na jukamu, navurimāra-boiano naio monoka ve toro tai napano maka ve vite tai na bova toa kiano meuliano. Mia naio monoka rivuru tira ve takurano ga, a rive riano tu laka vijajo.

Mia naio monoka telan vuu vatitig ka kiano bajago nalo, mia naio monoka ve masou, mia tomu nalo monoka aialerinio eaio, mia naio saaro ka rivitikar toro dolu ea kunuano, a mia monoka naio rijikia vatitig bajago na verloglogiano.

<sup>3</sup> Bija vite nalo na, monoka ve toro napano maka toñā munu uei mēlea mijorjoru tatei,

mia naio maka toñā tukuruku, mia kiano jidomiano tebievi, mia kiano iviso melokloko. Naio monoka rila siniabu re, mia monoka tinientii mēlea re puruveru.

<sup>4</sup> Mia tai bunu jibe nei, monoka rive tubo vatitig ka kiano vonuo, napano kenerinio nalo aialerinio eaio, avatove kaio ea vite nonovio, <sup>5</sup> bior napano ver toro tai tibe na rijikia re rivitikar vatitig kiano vonuo, tumābe mia rijikia rivitikar vatitig Atua kiano tumāro?

<sup>6</sup> Mia toro nene monoka rimeruo ve teliki, tibe ka naio rudu Kristo ea kiano meuliano jiuo kija teliki ruei, ver makanio mia parinio rime rivujo ka mārrouano, rila naio rilaluvu mārabo, rijoru ea bulukuḗli napano Simāro naio mijoru ban ea beamu.

<sup>7</sup> Mia navurimāraboiano na tumāro nalo monoka ave tomu napano tomu nonovio, riva rivokar nalo napano maka ave namoneano, nalo aberinavo

nalo abe tomu na amemedu, bior napano Siñaro naio jo mila vio jikili ka rijukubinlo, naio jidom rila napano tomu nalo na be tinielo ka vovaiano tai joalo.

<sup>8</sup> Ninei be navuriñaraboiano nalo, mia vonganei navan tivelinio ka ijaiano nalo. Toro napano naio bokar iñauano na ijaiano,

mia kiano jidomiano monoka rivamenea rivu,

mia naio be toro na ber iliano na memedu ga, mia maka to ve minano ve juo.

Mia naio monoka to re rimunu ñarjunñelñelu bogo nonovio,

mia monoka naio sidom ñelea re vite nalo,

<sup>9</sup> a mia naio monoka rivokar sikili ga bajago na viekouoiano ea kanano iviso, jovulio napano tomu dolu nalo abokario.

<sup>10</sup> Mia toro napano ka mia naio rivokar iñauano na ijaiano, monoka avitilubar naio rivu, alavon naio beamu vo, mia ver naio riñau rivu, kiano bajago bare ka iñauano nei, mo amijikia adu siano ka riñau.

<sup>11</sup> Mia ijaiano koano bunu, kiano jidomiano nalo monoka rimelumu rivu, a monoka to re ña ilisosol ñele rivan kulo dolu nalo, mia monoka ve tira na mijikia telan vuu vatitigio ka kiano bajago nalo, a monoka viekouo ea iñauano nonovio.

<sup>12</sup> Mia ijaiano nalo monoka avuru tira ve takurano ga, a ave riano tu laka vijaijo, mia monoka ave tomu nañã amijikia avuru ñarabo rivu ka kenerilo nalo, a amijikia avitigar vatitig kialo vonuo.

<sup>13</sup> Mia ijaiano nalo nañã abarlo vatitig bo ka kialo iñauano mia aialio ka napano tomu nalo asaaro ve toru kalo, a mia ajog tibe ka Kristo Yesu naio jo mijailo ka mia amerou re ka atumulou atu sikili ea kialo iñauano nei.

*Buruñara jidomiano lukuano na kiado moneano jo*

<sup>14</sup> Timoti, nojidom noviedu nealso vesiou re ka noverial vite nalo na rivanso, mia nomial jibe ka bede ga, monoka novivitauia ga rivanso beamu vo. <sup>15</sup> Vede vite tealo abokar kiniou ea vio nei kiana vo, mia nejidom ka jau monoka kovokar soñeli verloglogiano nalo nei, ka kojikia vatitig rivu bajago nalo napano amemedu ka alaio joomo ea ñaratavo lu na Tubo kanano. Maratavo lu nei, be Atua napano meul kiano namoneano nalo, napano avokar sikili kiano ilirianiano tulaka, tibe

ka burupati ivoniano na yimo tai naio bokar jikili ñartea nalo nene. <sup>16</sup> Nao, kiado lotuano naio jikili juaio ea moneano tai napano naio jibe ka vite na lukuano tai napano bululuo bo, naio temi batitigio laka. Kito roju roberial kiado moneano na jibe na, roberinavo

Yesu, naio be Atua napano miyotuba ea yetemeriba nei ea mokotenano toro, Niununo kiano moroano miñau toru ea naio, a nailiano nalo aju bijaio, aberial naio ba bokar taara dolu na tomu nalo, mila na amonmonea naio janea vio reraio ea yetemeriba, karina Atua buru naio bavin bereio ea kiano buruñara mermerano ea vio mave.

## 4

*Kovitkarso ka naverloglogiano nalo na juboluboiano*

<sup>1</sup> Niununo Lu naio berial iliano tai naio meravo laka, napano naio berinavo ea bogo nalo na maaro, mia nalo tealo kalo nañã amonea beamu rui, mia nalo aia-gago ka niununo nalo na juboluboiano, mia atakisor siñaro nalo kialo verloglogiano, ana rila avuro avan ea meuliano na maka memedu. <sup>2</sup> Verloglogiano nalo na kiri niagiago tibe na, mia amalmaluvo ea tomu na jubolubo na ña be tinielo ka aber amijikia vite, mia kialo jidomiano nalo kiri bobogio jibe ka vovojulu. <sup>3</sup> Vite tealo napano mia averenio naio jibe nei, ka toro maka bunu rijikia soro, a mia ala veliano lu ve telabo ea sinaniano novo nalo napano Atua naio jiilo be sado ka romijikia rasaaro ka rejevio. Bior kito napano romonea a romijikia vite napano be riano, kito roju rejen julaka, roju reber siva ban naio biorio.

<sup>4</sup> Naina bior napano vite nonovio nañã Atua jiilo, maka rejikia rover naio bova, mia romial ka naio bo mia bo. Maka ve vite tai napano robitisaia naio, mia rajaaro ka rejev vite nonovio, rover siva van Atua rivior. <sup>5</sup> Ana bogo napano romila jibe na, mila na napano vite nalo nei abinimei abe lu. Atua kiano iliano bija kiado volkouano mila ameravo rui.

<sup>6</sup> Verloglogiano nalo na, ver jau koverial naio rimeravo rivu van namoneano nalo, naio jibe ka napano jau koberialso ka jau toro novo tai a toro na viekouoiano na iñauano Naverikariano Yesu. Tlikiti napano amial ka napano jau komiñau jibe na, mia ajikia ka kobinimei mave rui jibe ka toro tai napano naio meruo bo ea ilirianiano nalo na kiado viekouoiano. Mia avitilubarso ka napano jau bunu kojo kajakii vatitig verloglogiano novo nalo nei

napano kojo koberial banlo, naruei mia nalo asaaro ve toru.

<sup>7</sup> Ea tivelinio na tukunu moruo vovuiano nalo na beamu, napano aberii vite dedade nalo, maka ve kanamo vite tai toalo. Jau kotuvanlo atu bo, mia monoka kalakakarso kosikili rivu ea meuliano lu.

<sup>8</sup> Tomu nalo tinielo jii ka alakakar niabelo asikil, mia nina naio bo ka tivelinio tealo, mia bogo napano jau kojo komilakakarso kosikili rivu ea meuliano lu, naio mia rila rivu lie vo ea tivelinio nonovio. Ea tivelinio na meuliano na banei, meuliano lu naio mijikia rijaiso, a ea tivelinio na meuliano vou napano naio jo binimeiorou, mia meuliano lu naio rila kiamo m̄arabo ka kojikia kava jouro eaio.

<sup>9-10</sup> Vite na kito roju robukudeli toru, romila bijon toru biorio, bior napano romije kiado jidomiano monea Atua na meuliano naio takurano ga, napano naio be ioruriano na tomu nalo abiniu, jibe nalo napano amoneaio. Iliano nei naio be riano toru ga, komijikia komonea naio ka tiniemo momou.

<sup>11</sup> Kanaku iliano nalo nei napano nojo neber ka jau nei, naina naruei vite nalo napano jau monoka koverloglog ka kulo dolu nalo, kesikili kalo ka monoka ajogkario.

<sup>12</sup> Ver tomu tealo atu avitso rivova bior napano jau kobe m̄eaku ga, mia komerou re, koim̄au p̄ilinio ga. Lerinio jau kobe m̄eaku ga, mia jibe ka napano kojo komila, monoka kesiloglog m̄arabo ka namoneano dolu nalo. Mia bo ka aue jaamo, napano koberloglog vatitiglo bo ea meuliano kirinovo, ea tivelinio na iliano, ea tivelinio na bajago novo, a ea tivelinio na tinietiiano, viekouoiano, a meravoiano.

<sup>13</sup> Rivan rivakar napano ver kiniou nemijikia namaluvo ka jau, kovakar sikili bogo na lotuano nalo. Kovuluku bulag iliano lu ea tomu nalo miralo, koioliolu, koverloglogio vanlo.

<sup>14</sup> Jau tiniemo bobogia re moroano lu nañia Atua jian banso ea bogo napano taara na vurim̄araboiano nalo amioa parimo. Naverialiano tai ka bogo na, kiano iliano naio berial moroano nei be kanamo, naruei monoka kesikili ka koim̄au vija.

<sup>15</sup> Jau monoka koto kalakakarso ea in̄auno napano mijoru joa jur̄iamo, monoka kalavio sikili tulaka ka kalaiio, naruei mia tomu nalo aviniu amijikia avitulubario ka kojo kabano lie bija Atua ea kiamo meuliano.

<sup>16</sup> Monoka kovitikar vatitigso rivu, a jau bunu monoka katakii batitig verloglogiano nalo nañia kojo kejian ban tomu dolu nalo. Ver jau kovakar rivu, mia kala napano jau kamlika nalo napano ajum̄a amiagago ka jau, kam nonovio kuvijikia kuvokar ioruriano.

## 5

### *Bajago na bo ka ala van namoneano nalo*

<sup>1</sup> Timoti, ver jau keial tormoruo tai rila vite tai na maka rimemedu, jau keil siniabu re rivanio. Jau komelokloko ga van naio, kala vanio tibe ka napano naio be karam̄amo. Bo ka kala tibe na van nalo dolu bunu. Keial m̄eaku nalo atibe ka napano abe kuruamo, <sup>2</sup> keial tiramoruo nalo atibe ka napano abe koniomo, a keial niatira nalo atibe ka napano abe kuviviniomo. Ver jau kala tibe na, mia kanamo jidomiano rimeravo rivu dam̄ariga.

### *Taanou nalo*

<sup>3</sup> Ea tivelinio na taanou nalo, kito na tum̄aro monoka roviao vatitigio vanlo, monoka rovitikar rivu nalo napano jau abe terakurano ga, maka ve koalo tai ka rijailo. <sup>4</sup> Mia ver taanou tai kenerinio nalo atu, p̄eli na kum̄abinio nalo, mia nalo na naruei monoka avitikar naio. Ea m̄arabo na, amijikia ala meran van naio vitikariano novo nalo a ijaiano napano naio mila banlo ea yuka nalo napano barlaka ruei. Nalo monoka avitulubario ka nina be in̄auno na memedu tai, p̄eli vite lu tai, ka ala van tai kalo napano memedu ka kialo m̄aratavo ga, a naio be bajago na bo tai napano Atua tiniene jii toru.

<sup>5</sup> Taanou napano maka toro dolu tai rivitikar naio, napano nalo am̄arm̄aro nonio den naio banbano naio takurano ga jo, monoka naio jo bar tiniene ea Atua naio ga takurano. Naio mijikia to tiniene rimaio ka Atua legiano a bogiano ka rivolkouo riviano naio ka rivitii naio rivior vite venia napano naio jidom. <sup>6</sup> Mia ver taanou tai ver naio to sidonii ga ka seseiano na meuliano na yetemeriba nei, naio tibe ka napano naio m̄aro den Tubo rui, javukia ga koano m̄aro den naio beamu ruei.

<sup>7</sup> Nomijog ka kamiu namoneano nalo kumitu kumisidonii ka kuvila m̄arabo tai ka rijai taanou nalo. Nina bo laka, mia nomerou ka vede tealo avilvil ealo riviorio, mia nojidom nesian iliano nalo tai van kamiu ea tivelinio nei beamu vo.

<sup>8</sup> Iliano na beamu, naio ber jibe na, berinavo ver namoneano nalo tai naio maka to vitikar batitig nalo na ea kiano yati, na toru nene, naio maka vitikar vatitig nalo na ea kanano m̄aratavo memedu, toro na naio jibe ka napano naio maka ve toro tai na ve Kristo kiano. Naio kirivova laka, a kiniou nemial naio jibe ka naio bova laka jovulu nalo napano maka amonmonea vo.

<sup>9</sup> Mo juo nene, ea tivelinio na taanou nalo, naio jibe nei. Taara na taanou nalo napano mia tum̄aro naio rivitikar, taanou napano jidom ka siano riva joomo,

monoka be tiramoruo ga, jibe ka napano kiano yuka jikar ka bakar duelimo va ari [60] jo bavin.

Dolu nene, be tire napano mijoro vaarakurano ga, buru suñano takurano ga, a be riano tu laka bijaio. <sup>10</sup> Bereio, naio monoka ve tira napano tomu nalo abitilubarario ka naio mila inñauano nalo bo laka, napano naio mia berloglog batitig kenerinio nalo, naio be tai napano naio jaaro ka rivitikar rivu toro dolu ea kunuano. Tilikiti napano namoneano lu dolu nalo abinimei amiadu ka naio, naio jekon jaalo, a naio jo bitiri bulag nalo napano amijoru ea jogvaiano tedade nalo. Tiramoruo taanou napano naio miñau jikili ea inñauano novo nalo na jibe na, naio naruei siano mijikia riva jouro.

<sup>11</sup> Mia ver taanou tealu atu napano maka ave tiramoruo vo, bo ka jau kodu re sialo vo. Naina bior napano amijikia averikar van Kristo ka mia atu tibe na ga vija naio rivokar jukuti na kialo meuliano, mia karina, maka vesiou, vede sidomiano na soriano binimei jikili laka bereio, naruei mia aילו ka taanou nei naio jumolu buru suñano tai bereio. <sup>12</sup> Ver naio rila tibe na mia aial rivova kanio, bior napano naio milaluv kiano verikariano, naio mila korovio bereio. <sup>13</sup> Mo bija naina, mia taanou mñeaku nalo na amijikia aivo, ðeli maka atu ala inñauano na bo, mia aju amidu nono vio jeliviv, ajumña amalmaluvo ea tomu nalo kunualo, a mave ka nina ajumña amil ea kulo dolu nalo, ajumña amiyuku sunulo ban ea vite napano maka ve kanalo iliano naio to joomo eaio.

<sup>14</sup> Naruei ea kiaku vitiiano, kiniou neber ka taanou napano nalo abe niatira kia ga vo, naio bo laka ka rajamo ka nalo asoro bereio ga, bo ka nalo avar kiritete, avitikar kialo vonuo nalo, naruei mia ve re titai napano tomu nalo amijikia atu ail rivova kalo riviorio. <sup>15</sup> Kiniou neber nina bior napano nalo tealu amilaluv mñarabo ruei, aju ajakii mñarabo na mñariano napano aban kean Simñaro.

<sup>16</sup> Tibe na, ver kito tai naio ve namoneano tai, mia taanou tai joa kanano mñaratavo, naio ga monoka rijai batigio. Ver naio rila, mia tumñaro naio rila bijon re naio bunu, mia naio mijikia rivitii ga taanou dolu nalo napano maka ve toro tai ka rijailo.

*Navurimñaraboiano nalo na tumñaro kialo veru*

<sup>17-18</sup> Ea tivelinio na ijaiano teliki napano rojurña rejian ban kiado navurimñaraboiano nalo, kiniou neberii ban ea iliano juo na Iliano Lu. Tai berii

bue mñarauo nalo napano roburulo amiel jeliviv mave ea bagaro na boboseru ka riviebove bulag kurukuti nene. Iliano na naio ber jibe nei berinavo

*Jau koyorko re kanamo bue mñarauo niono napano naio jo biebove bulag kanamo boboseru, jau kajamo ka naio sen ve tertelisu rivano. Tiut 25:4*

A iliano juo nene ber jibe nei

*Toro napano naio miñau, memedu ka naio rial titai rimei ea jumñano rivior. Luka 10:7*

Tibe na, bo ka kito rala bunu van navurimñaraboiano na tumñaro. A nalo napano mña amimñau bo, a amimñau jikili ka amiololu ka Ioluano Vou na bo a ka aberloglog tomu nalo, bo ka nalo avar ve toru likiliki, rivav ve valuo.

<sup>19</sup> Ver toro tai rimei riverial navurimñaraboiano tai, ver naio mila vite tai na bova napano monoka ail van naio ea komeli riviorio, iliano na toro takurano ga kanano naio maka rivare ka ver ala tibe na. Iliano na jibe na, monoka tomu ve juo ðeli ve tolu ka aikurukario, naruei amijikia adu rivav komeli. <sup>20</sup> Mia ver navurimñaraboiano tai naio to rimonmon rila kariano, mia jau monoka koverbure naio sikili ea taara na namoneano nalo miralo, naruei bogo napano navurimñaraboiano dolu nalo aialio, merouano rivokar vatitiglo ka maka rivu ka nalo bunu ajoru tibe na.

<sup>21</sup> Kito juo remijikia ka Atua bija Kristo Yesu bija nailiano lu nalo na kanalo ajumña amial kito, naruei ea miralo kiniou neber ka jau ka kovokar vatitig kanaku iliano nalo na. A neber bunu ka bogo napano jau kojo komila vite nalo nei, jau kovitii re tomu nalo aveve dolu, mia monoka kala rive verare ga ka nalo aviniu.

<sup>22</sup> Majjigidulu tealu jibe nei, berinavo jau kala soðeli re ka koyoa toro ka rimei ve navurimñaraboiano, mia kovitii kiano meuliano rivu beamu vo. Maka rivu ka mia kavan re vaataro ka kariano napano toro dolu naio jomña mila, mia koto kuku ka kanamo iviso naio rimeravo, ve lu damñariga.

<sup>23</sup> Javukia napano nojo nomijog, nemijikia ka jau kojorña komiemie tertelisu, naruei never ka jau komijikia kovelikar re na munuano na mñarjumlñelu. Jau koto komunu uei re ga, mia kalavon ka komunu mñarjumlñelu ve tertelisu bogo tai, naruei vede naio mijikia rijai mabomo.

<sup>24</sup> Tai bunu jibe nei, berinavo tomu tealu, amila napano kialo kariano naio joa mirado medavo ga, naruei robitilubar ka

mia avar vironiano riviorio. Mia tomu dolu nalo, amila napano kialo kariano naio joluku vatitigio jo, mia karina, naio bunu mia rimaluvo ea vio meravo iorou.

<sup>25</sup> A iñauano novo nalo bunu ajibe na. Tealo ajua mirado kirimeravo bo, a tealo, ajoluku vatitigio bo, maka rejikia. Mia naio napano joluku jo, naio maka rijikia toluku bo kanio, mia naio bunu monoka rimaluvo ea mirano tomu nalo miralo.

## 6

*Tomu nalo naña amirñau kurano ga toro tai kanano*

<sup>1</sup> Nobivitu naruei ea tivelinio na kanado tomu nalo napano aju napano maka ve kanalo titai, danjariga ajua toro na toru tai ka aimñau kanano kurano ga.

Meuliano na jibe na naio jikili, naio jibe ka napano vite na temi tai naio jorimaro ga ea taakalo, mia monoka aserni re ka kialo toro na toru, monoka aial naio tibe ka memedu ka avatove kanio. Ver ala tibe na, mia kialo toro na toru maka rijikia rivitii vova ea Atua siano napano joalo.

<sup>2</sup> Kiniou nemijikia ka tomu tealo napano amirñau kurano ga jibe na, kialo tomu na tortoru bunu amonmonea. Jibe na, toro na iñauano bija toro na toru naljuo abe kurualo ea Kristo, mia nina naio maka riverenio toro na iñauano naio mijikia sereserei ka toro na toru kiano iñauano. Peli monoka aimñau rivu lie vo tibe na, monoka asaaro ka ajia toro naña aju amirñau kanano, bior napano naio be tai ea kialo taara na namoneano javukialo, a naio bunu be tai napano monoka tinielo tiio.

### *Verloglogiano lubolubo*

Naina naruei be verloglogiano tai ka mia kotuvan rivan nalo dolu, napano mia monoka kotunukarlo ka mia atakii vatitigio rivu.

<sup>3</sup> Toro napano naio berloglog jakii jidomiano dolu, naio juvan iliano novo nalo na kiado Tubo Yesu Kristo, kiano iliano maka vare bija verloglogiano napano mijikia ridu toro kiano bajago binimej jibe ka Atua kiano bajago.

<sup>4</sup> Toro napano naio jakii kiano jidomiano ba be dolu jibe na, kito romial naio, naio barka naio, naio parinio toru laka, mia naio maka rijikia titai leleio. Mia naio mila jibe ka toro tai na jidom nñelea baravoiano nalo, bija bajago kilkil, mia maka tonovo tai rimaluvo ea vio nene. Mia bajago na bova nalo amalmaluvo ea naio, jibe ka jokuano, jupe iliano, ilidieiano, bija jidomiano sorosoro na bova ka tomu dolu nalo.

<sup>5</sup> Tomu nalo napano amila nina aju abilvil

ealo janea vio, napano jidomiano napano bo a iliano napano be riano naio maka bunu toalo leleio. A abano bova kitkiti lie vo, bior napano aju ajidom verver aiasol tunñaro naio be mñarabo na bo ka avuru veru. <sup>6</sup> Mia maka tibe na, bior napano toro na kanano bajago naio bo jibe ka Atua kanano, a naio jaaro ga ka venia napano Atua jian banio ea kiano meuliano, toro na naruei naio buru vite novo tai napano naio bo laka ruei.

<sup>7</sup> Bogo na kito romiyotuba ea yetemeriba nei, niabedo yauo ga robinimej, juñado be teau ga, mia rotuvan bereio vare ga, maka ve titai napano romijikia ravarkario ravano. <sup>8</sup> Mia bogo napano roju romeul ea yetemeriba nei, ver realeal siniano ve teliki vija kulumñarauo ve teliki rotukuloko kito, nina naio bare ruei, romijikia rasaaro ga, rojidom venia bereio?

<sup>9</sup> Mia nalo napano ajidom mñelea vite nalo, ajidom ka ave sanibaiano, vede nalo maka avitilubarario, mia ajua vio na jubolubioiano ruei, Simñaro naio jo bokarlo ea kiano jukujukuano nalo ruei.

Mia sidomsearioiani nalo napano amila lelan toro kiano meuliano amei ve telabo ealo, rivanvano adulto avan rivova laka, mia alaluv vite nonovio, a ava amadudu ea vio na vakovioiano.

<sup>10</sup> Nao, bajago na sidom mñelea puruveru naio be burupati tai napano bajago va kinkin dolu nonovio mijikia maluvo eao. Sidom mñelea ka rivar veru ve telabo naio jen kito tealo kialo iviso, a naio burulo amiel tertelisu abano, naruei amiilo napano amolmoluo nonovio den mñarabo na viekouoiano ruei. Karina, abar jaleleano miroano biorio, a mila jogvaiano nalo bokarlo, naruei abitilubarario vonga, ajidomial bereio mia bova ga.

### *Bajago na bo*

<sup>11</sup> Mia Timoti, jau kojibe ka Atua kiano toro tai riano, mia monoka kovilig taakamo ka jubolubioiano nonovio na jibe na. Venia napano naio bo ka jau kodu toa meriniamo tulaka, naio be bajago na memeduano, bajago napano toro naio rimej rivu tibe Atua, bajago na viekouoiano, bajago na tinietiano, bajago na vokar vatitig iñauano, a bajago na melumuiano.

<sup>12</sup> Jau monoka kotumolu kotu sikili ea mira lu na kanado moneano. Tiniemo bobogia re bogo napano kojumolu ea namoneano nalo telabo miralo, napano koberial kanamo verikariano novo na beamu nei. Atua naio bioso ka kodu meuliano nei napano maka rijikia ribisi, ana naio jian banso ea bogo nene, naruei monoka

kovokar sikili rivu rivan rivano-o mia rijoru den re bereio juñiamo. <sup>13</sup> Atua naio be burupati na meuliano na vite nonovio, a Kristo Yesu, tilikiti napano abur naio ba ban toro na toru nei Pontas Pailat, mia naio maka rimerou, naio jikili ka ga berial kiano verbulagiano novo, naruei jibe ka napano kito juo rojua naljuo miralo, nojidom nesian burumñara iliano dolu tai vanso.

<sup>14</sup> Kiniou neber jibe na, nejikili kaso ka jau monoka kovokar sikili vatitig Atua kiano iliano nalo, napano maka ve kanamo niamiamo tai ñeli na kanamo beleano tai, riva vokar napano kiado Tubo Yesu Kristo naio riyotuba bereio. <sup>15</sup> Kiano yotubaiano na, mia naio riyotuba ka kito ea kiano bogo nene rimemedu, tibe ka napano Parinio Tubo Lu na mave naio jidom, bior napano Parinio Tubo Lu nene, naio takurano ga be tubo ka tubo kinkin nalo, naio be yoro na toru ka tomu na tortoru nonovio. <sup>16</sup> Naio takurano ga meul jo jobo jo nanariga, napano naio jo joomo ea kiano burumñara mermerano napano joko naio ka toro rijikia re riva vaataro kanio, napano maka lele toro rial naio vo, a maka lele toro rijikia rial naio bogo tai. Kiado Atua nene, kito ravatove ka naio, a bo ka navenatuboiانو ka vite nonovio na be kanano naio takurano ga, rivan rivano-o rijikia re ribisi bogo tai.

*Namoneano nalo napano be kialo saba miroano*

<sup>17</sup> Be riano napano kito tealó, kialo veru nalo miroano, juñalo nalo bujovujo vatitig ka saba nalo. Nina naio bo ga, mia jau monoka koverlogloglo sikili ka avarvarlo ñele re, ave ñarou re kalo bereio riviorio. A maka rivu ka avarkar tinielo ea ga kialo veru nene, napano vede bogo tai aiilo, aial riva kovio nonovio, mia monoka avarkar tinielo ea ga Atua. Naio ga be burupati na tonovo nalo nene, naio jo bar ijaiano toru ga amalmaluvo ka kito, miroano laka, ka ajai kito rasaaro ñele ea kiado meuliano.

<sup>18</sup> Nalo napano juñalo bujo ka veru, kialo meuliano naio monoka rivujo vatitigio ka inñauano novo na aju amila bijaio. Maka asidomii ve toru ka monoka avokar vatitig veru nei na be kialo ga, mia bo ka asaaro ka avio ka van toro dolu napano kiano maka vare. <sup>19</sup> Verenio ajian ba jibe na, mia Atua mila napano aju amiyobijii kialo ilivuiانو mave, jibe ka napano aju abitiri kunualo novo tai ju ka bogo na rimeí. Ea ñarabo na, aju aba amiyotuba ka avokar meuliano na be riano.

*Iliano na maaro*

<sup>20</sup> Nao Timoti, kovokar vatitig rivu iliano novo nonovio napano neber biedu banso,

napano nomidu joa juñiamo ka kesian rivan lie vo.

Jau kava joomo re ea iliano nalo napano maka ajikia aija kanamo meuliano vija Atua. Tomu telabo aberloglog ka jikiaiano na yetemeriba ga, karina aberinavo kiado moneano, bija Atua kiano iliano lu, vite nalo napano maka ave riano ajuao. Mia kialo jikiaiano na naio naruei maka rive riano ga, naio jubon lili kialo jidomiano bereio.

<sup>21</sup> Tealo abokar vatitig masouano na yetemeriba nei, aju amioliolu vatitig janea vio, mia be vite tai ga, amilaluv ñarabo na moneano napano amilaluv batitigio.

Kanaku iliano bisi ea vio na, naruei jibe ka bogo nonovio, kiniou nobolkouo ka Atua kiano tiniemiano naio to vijaso.

Kiniou, Pol.

## Mesi Juo Napano Pol Bivitauiāo Ban TIMOTI Verialiano Moti

### *Tunukuano bulati na niosi nei*

Mesi juo nene napano Pol jirio ba ban Timoti naio bujo ka iliano novo nalo ka rijai Timoti napano naio be kiano bilbilu mēaka napano jo mijai naio. Buruñara jidomiano ea mēsi nei, Pol ber ka Timoti ka sikili tu sikil ka riverial Yesu Kristo kiano ioluano vou. Mia naio ber kanio, ber naio monoka rivakar sikili verloglogiano riano na ioluano vou nei, vija Verikariano Moruo. Naio ber ka Timoti ka to rila iñauiano nei bogo nonovio ka verloglog tomu nalo, bija riñau ka rivur tomu nalo amei, be iakurano ga aver aiili rivova ka naio bija iñauiano na yimo lu na nai jo milato.

Pol jidom Timoti ka rivan re riasol iliano vovu nalo bija baravoiano nalo na maka ajikia ala vite novo tai leleio, mia be tena rilabulag tomu nalo ga.

Ea mēsi nei bunu Pol ber ban Timoti taki bajago novo na kiano meuliano. Nine Pol kiano bajago na moneano a kiano bajago napano kiano jidomiano tebievi, a kiano bajago na tiniemmīa tomu nalo, a kiano bajago napano naio bardulu bogokouo nalo na tomu nalo amila naio mijog kirvova laka ea mokotenano, mia naio jokea berial ga Yesu Kristo kiano ioluano vou.

### *Torogio nalo na niosi nei*

Iliano moti 1:1-2

Pol miaia Atua bior Timoti bija mil ka verloglog naio 1:3—2:13

Pol jian ilikakariano ban Timoti 2:14—4:5

Pol berii naio bija kiano iñauano 4:6-18

Pol kiano iliano maariano 4:19-22

### *Iliano moti*

<sup>1</sup> Koig keneriku Timoti, kiniou Pol nojo nebivitauiā mēsi nei biedu banso, napano jibe ka Atua kiano sidomiano, naio bitirilār rui kiniou nebinimeī nebe atevi na Kristo Yesu kiano. Kristo Yesu nene naio be bulapāti na meuliano nene napano Atua berkar ka nalo napano amonea naio.

<sup>2</sup> Timoti, kiaku volkouano ka mia karamādo Atua a Yesu Kristo kiado Tubo, naljuo adu buruñara tiniememiano, tinieiiāna a tumāroano to vijaso damāriga.

### *Iliano na sivaiano ban Atua*

<sup>3</sup> Jibe na napano korobiku nalo amila nua rui binimeī, kiniou nojorñā nomila Atua kiano iñauano damāriga, nojorñā nomilotu ka naio ea kiaku iviso momou. Ana ea legiano a bogiano, ea aura na volkouano nalo, nojo tinieku maio kaso, nojo neber siva toru laka banio kaso. <sup>4</sup> Nojo nojidomii jogumiramo nalo na jogvaiano, ana mila na nojidom mēlea ka monoka neviēdu namaluvo kaso bereio. Ver nejikia neial bereio miramo ga, mia kiaku iviso saaro mia saaro! <sup>5</sup> Nojo nejidomii bunu kiano viekouoiano riano, napano joa korobimora napano tiramuro Loes, karina joa koniomo na Yunis, a jibe napano nebitilubario rui, vonganei mia joaso.

<sup>6</sup> Naina naruei nojo nojidomii bunu ijaiano napano Atua mije banso bogo napano nomidu juñaku joa pariparimo ka nomioakoso. Nojidom never kaso mia kola re sebi na ijaiano nei rivatove, a mia jau monoka kala vilivili vatitigio rivu damāriga. <sup>7</sup> Monoka tiniemo rimaio ka Niununo napano Atua jian ban kito, naio maka ve Niununo na morouano na kulorinio, a naio be Niununo na meroano, be Niununo na tiniememiano, a be Niununo na mila kulorinio naio rila vatitig kiano meuliano rimeī memedu.

<sup>8</sup> Verver be riano ka Niununo nei naio joa kiano meuliano, jau koimou leleio re ka koverial Tubo kiano Ioluano van tomu nalo, a koimou re ka koverial kalo ka be riano, ka jau kobe kiaku bilbilu novo tai. Nalo abuku kiniou ea yimo na tetavokoiano bior kiano iñauano, mia koimou re ka kiniou kanio. Vite na mia kala, mia jau monoka tiniemo saaro vija kiniou rivior jogvaiano na Ioluano Vou, rivanvano o rivokar venia na Atua kiano moroano milaso kobe verare ka koimāukanio. <sup>9</sup> Atua, naio milarur kitojuo rui, a bio kitojuo ka reiel ea kiano mārabo na meuliano lu, mia bogo nonovio naio mijikia rijai kito. Nina maka bior ka kitojuo romiñau kiano bo pēli kitojuo romila venia, mia naio mila miyotuba ea kiano jidomiano bija kiano tiniememiano novo ban kito. Kiano tiniememiano na, naio mila vatitigio jo bija Kristo Yesu beamu rui, nua ea bogo na tikariano na kito tomu nalo na yetemeriba. <sup>10</sup> Mia tiniememiano nene jo jibe na banbano bokar vonganei kia navo, napano naio binimeī miyotuba ea yetemeriba, maluvo ea mirado jelea kiado naioruriano Kristo Yesu. Naio binimeī ea yetemeriba, naio mila nonovio moroano na mārano binimeī be tekurano tai, a kiano Ioluano Vou mila napano bogo na rojua yetemeriba kia navo, remijikia rejev

meuliano na bo. A mila ka iorou, ana mia romijikia rava jouro bunu ea meuliano na mia maka rijikia ribisi bogo tai.

<sup>11</sup> Ioluano nene, naio nei naruei napano Atua bitirilar kiniou nebe kiano naveriliano, nebe kiano atevi, nebe kiano naverloglogiano. <sup>12</sup> Kiaku inĉauano nei naruei mila na kiniou nojo nabar bogo nalo napano jikirkili joomo ea yimo na teta-vokoiano nei kanio, mia naio bo ga, naio maka ve titai ea kiniou. Maka noimou, bior nemijikia ka naina nomoneaio, naio be riano, a kiaku moneano ea naio jikili vatitigio ka venia na nomidu joa jumĉano, mia naio bokar vatitigio vokar bogoti na maaro.

<sup>13</sup> Tibe nei Timoti, kiniou nojidom never kaso ka jau monoka katakii vatitig mĉarabo na iliano na memedu nalo na nejian banso, monoka kesikili kotu sikili ea Yesu Kristo bogo nonovio, a monoka kodu vatitig kiano tiniĉiano to rivujo ea kiamo meuliano. <sup>14</sup> Niununo Lu naio jo bujolou vatitig ea kiado iviso, mia kotuvan re ilivuiano nalo na naio midu jo vatitig ea kiamo meuliano ruei, a koto kovitkar vatitigio.

#### *Pol berii Onesiporas*

<sup>15</sup> Kiniou nemijikia ka jau komijog ruei liliano tai na bova, napano namoneano nalo na tanobuku na toru ea vio Esia, nalo abilig taakalo ka kiniou ruei, a bija nalo na abe kiado bilbilu nalo, Paekelus bija Emoĉenis.

<sup>16</sup> Mia kuruado novo nei Onesiporas, naio mila bo laka. Be iakurano ka nalo amiorkar kiniou ka mĉarimieni nalo na lakoiano nei, mia naio maka rimou ka rimei riyotuba ka kiniou, naio bitikar kiniou ea saba nalo miroano, ana nobolkouo ban Tubo ka naio rilivu ka naio rive toru rivija kiano bajulukuti nalo. <sup>17</sup> Naio binime miyotuba Romo nei, maka vesiou lele vo mia naio milavio ka rial kiniou, banbano na naio binime bokar kiniou ea vio nene. <sup>18</sup> Ana naio jo mila tenalo na bo ban kiniou bereio ea vio Romo nei, jibe ka ga napano naio mijai vatitig kiniou beamu ruei ka bogo napano nojo Eveso nua kia ga vo, jibe ka napano kumijikia vatitigio ruei. Naio bo ka kiniou jibe na, namonea ka mia Atua naio tinien tii naio ka bogoti maaro.

## 2

*Yesu kiano toro na mira naio monoka rivar jogvaiano*

<sup>1</sup> Keneriku Timoti, nojidom never kaso, bo ka kodu tiniememiano na Kristo Yesu kiano ve toru ea kiamo meuliano, a mia komijikia kosikili vatitig ka kotu bogo nonovio. <sup>2</sup> Bogo telabo ruei jau komiagago

ka kiaku iliano nalo na nojorĉa nober ea mirano tomu nalo, ana vonganei monoka keial tomu nalo tai na nalo abe viekariano ka inĉauano, kavara iliano nalo nei rivanlo, a iorou, ana nalo bunu amijikia averloglog lilian riva rivan tomu dolu nalo. <sup>3</sup> Kito tomu nalo na mira na Kristo Yesu kanano, mia kito rove terakurano, kanado bogo napano monoka rovivuo vija bogokouo to. Mia ver vonganei kiamo bogo, jau kajamo ka ga tibe ka togio na kiamo inĉauano tai.

<sup>4</sup> Kalavon ka kosidomii vatitig tomu na mira. Kialo inĉauano ka aue kialo toro na toru kiano uolu kanano moroano rivatove ga, mia maka atu aiasol lo ea inĉauano ninio nalo tibe napano tomu dolu naloaju amila.

<sup>5</sup> A kalavon ka kosidomii bunu mĉeaku nalo napano amila tikitiano. Nalo amilavon jikili ka atovulu, ka avokar kialo iĉaiano tai, mia ver nalo amilakorov tuboiano, mia avuku bulaglo, maka ajikia avokar titai leleio.

<sup>6</sup> Mia kosidomii bunu tomu nalo na aminĉauka tiniavio. Toro na mirĉau jikili mebijio toru, nina naruei toro napano bo ka naio rivar siniano eao.

<sup>7</sup> Saba nalo na kiniou nojorĉa neberenio, verver jau kosidomii vatitigio rivu kalo, mia Tubo riĉaso ka kovokar kiano masouano nalo na bo a kiano jikĉaiano nalo eao.

*Bo ka namoneano nalo asidomii Yesu tulaka*

<sup>8</sup> Ana nana monoka jau kosidomii loa kanio bogo nonovio, naio be Yesu Kristo. Naio miyotuba ea vio yetemeriba, miyotuba ea Tormoruo Parinio Tubo Teviti kiano yati, a iorou, amuebinio, karina naio meul bereio, jibe napano Ioluano Vou berenio. Nina Ioluano Vou napano nojo nomioliolu kanio, <sup>9</sup> a nina Ioluano Vou na nobokar jogvaiano toru kario ea vio na, nina mila na vonganei amiorkar niabeku nalo ka mĉarimieni nalo, jibe ka kiniou nebe toro tai na bova na lakoroviano na tuboiano nalo. Mia be titai napano tomu nalo maka ajikia aiorkario, naio be Atua kiano iliano lu, ka naio jo kia jaluvo ba maka ajikia atukovio kanio.

<sup>10</sup> Kiniou nojo tiniĉu miia toru tomu nalo napano Atua bijauia bulaglo, ka nalalo amei avokar meuliano selia Kristo Yesu. A jidomiano nei naruei mila na bogokouo ninio na nojo naban ea, nina nojo nobokar kiniou jikili ga ka noto nala vite nonovio, ka nalo bunu ajikia avokar mermerano na vio mave na maka rijikia ribisi bogo tai.



<sup>11</sup> Iouano tai berii tenei, kiano iliano nalo be riano laka, napano ber jibe nei, berinavo

“Verver ravan ea m̄ariano vija naio, mia romeul vija naio.

<sup>12</sup> Verver rotu sikili ea bogokouo, mia roje tuboiano vija naio.

Verver rovilig taakado ka naio, mia naio tuvan kito,

<sup>13</sup> a verver ralaluv kito rojoru, mia naio to rivokar kito sikili to, bior naio midular kito be kiano, ana naio maka rijikia rila sibi, naiomaka rijikia rivuklar kito bereio.”

*Toro na bo ka rim̄au Atua kiano monoka rivokar sikili ilirianiano*

<sup>14</sup> Namoneano nalo napano aju, monoka koto koverlogloglo ka nalo tinielo ribobogia re tenalo nei. A jau monoka keil sikili vanlo ea Atua siano, ka mia nalo avilvil ea re bunu lo. Nalo aju tinielo jerlo ka nioti na iliano nalo jibe ka na nalo aju amila, maka atu ala titai na bo, a maka atu aija lele nalo dolu na aju amiagago.

<sup>15</sup> Venia nalo na n̄a jau komijikia kala tibe ka toro na bo tai na im̄au-ano na Atua kiano, monoka kala nonovio aviniu ka rivu laka ea kiano siraragiano. Verver koiṁau rivu tibe na naruei, ana mia maka kejikia koimou ka m̄arati na kiamo im̄auano bario, a komijikia komei kove toro tai na naverloglogiano na ilirianiano na Atua kanano van tomu nalo, rimemedu a rivu.

<sup>16</sup> Kovitikar vatitig rivu ka ilukurani-ano na tomu nalo ajuṁa aberverenio janea vio. Iliano nalo na jibe na maka ve tena toa namoneano nalo kialo jidomiano, bior amijikia avurulo avan lie vo ea bajago nalo napano Atua naio maka sidomiio. Bo ka kavan re vaataro ka tomu nalo na ajuṁa amila jibe na, <sup>17</sup> bior kialo iliano nalo na jibe na, naio jibe ka menko va tai, napano jo jer toro mokotenano maka rijikia rimei rivu bogo tai.

Nemial jibe monoka never ka tomjuo nei Aemeneas bija Vaelitas, naljuo jibe na kija ruei, <sup>18</sup> bior nalo ajaluvo den m̄arabo na ilirianiano ruei, aju amioliolu ka kialo namoneano tai napano maka rive riano leleio. Nalo aju aber ka bogo maaro na yetemeriba, mia meuliano bereio den maariano to re bunu, bior ea kialo jidomiano, aber p̄eli Atua naio jo mila ruei, nina ea bogo na naio im̄au ea kiado meuliano. Mia bogo na aju amioliolu ka kialo sibiano nei, nalo aju amila niegeniege tomu nalo miroano kialo moneano, mila na kialo jidomiano beve juo bereio. <sup>19</sup> A jau bunu

monoka komemebiju re, bior yimo napano Atua naio jo im̄aukanio, kiano bulapati burupati nalo ajikili aju jikili bo aju. Iliano nalo na ea Atua kiano Vivitauiano Lu aju, mia naljuo na memedu ka tivelinio napano nalo na ajuvan kito nei. Tai naio ber jibe nei, berinavo

Atua naio mijikia vatitigio kei nalo napano abe kiano,

mo juo nene, ber jibe nei, ber

Toro na midu Tubo ea kiano meuliano, naio monoka tuvan bajago va nalo na m̄arabo na laiano na kariano kanano.

<sup>20</sup> Kalavon ka kosidomii tomu na saba toru kialo yimo nalo na tortoru. Joomo ea yimo nalo nene, remijikia reial baju na sinaniano nalo, napano tealoo, amim̄au kalo ea niogo p̄eli puruveru na miuvu, a tealoo, amim̄au kalo ea borotano p̄eli ea iesi ga. Nalo na amial lo bo, aju abio ka sinaniano ban ea kialo burum̄ara jokoluulu nalo, a nalo dolu, aju ajinan janea vio ga. <sup>21</sup> Mia kito tomu nalo jibe na ga. Toro na mila kiano meuliano meravo bo, a be lu, a maka rim̄auka im̄auano na bova, mia kiano toro na toru rudu naio ka rim̄auka kiano im̄auano ve telabo napano bo ea mirano tomu nalo.

<sup>22</sup> Verver kosidom ka jau kotibe na, monoka kotokovio ka tiniekariano nalo na jikili a tinieliano nalo na bova napano m̄eaku nalo kialo jidomiano mijikia rivujo kanio. Jau monoka kalavio sikili ka kiamo meuliano rivujo ka memeduano, a viekouoiano, a tinietiano, a tum̄aro, mia tibe na mia rivu laka vanso vija nalo dolu napano kenemiu jidomiano takurano, napano kumitu kubolkouo ka Tubo ka kiano ijaiano.

<sup>23</sup> Bogo telabo, tomu nalo amijikia ala baravo ka nalo ka kialo vite vovuiano p̄eli kialo jidomiano kinkin nalo, jibe ka maka ajikia vite. Bogo tai baravoiano nalo nei amijikia ava avokar napano nalo atuktuklo, ava dedade bereio, ana mia bo laka ka jau kava joomo re ea iliano nalo na jibe na. <sup>24</sup> Toro na im̄au kiado Tubo kiano im̄auano, naio monoka ve re toro na rila baravo ka toro dolu, mia monoka rivijuku rivu kalo, monoka rijikia m̄arabo nalo na verlogloglo riva melmelumu. Naio monoka re tinieno mimi soṁeli, a kiano jidomiano ve tebievi rivu kalo.

<sup>25</sup> Peli bogo tai mia nalo tealoo tinielo ail die naio, ana ver nalo rilavio ka rila kialo jidomiano to rimemedu, mia naio rimelumu rivanlo ga. Ea m̄arabo na naruei p̄eli mia Atua mijikia rudu bogo ve telisu kalo ka avilig kialo jidomiano bereio,

amijikia avokar kiano ilirianiano. <sup>26</sup> Nalo napano jibe nei, Siñaro jo bokarlo jikili ruei, naio jo mikurlo ka ala venia na naio jidom, ana ver amijikia avokar bereio kialo jikiaiano na bo, mia amijikia avuro den kiano saba a kiano sibiano nalo.

### 3

*Bajago nalo na parilo jikili ka bogo na maaro*

<sup>1</sup> Timoti, monoka tiniedo bobogia re ka ea bogo maaro nalo na, mia monoka bogokouo ve miroano ayotuba. <sup>2</sup> Mia monoka tibe na ga, bior ka bogo na mia tomu nalo kialo bajago riva rivoa lie vo. Ea bogo na, mia nalo tibe nei:

mia ave tomu na asidomii nalo ga bereio  
mia asidomii ve toru ka veru  
mia avarvar kalo a ave m̄arou  
mia ave tomu na baravo  
mia maka ajikia ajogkar iliano na koro-  
bido nalo kialo

mia maka ajikia aver siva ka vite tai  
mia ajidomii be iakurano ga ka vite nalo  
na be lu

<sup>3</sup> mia maka tiniel tii tomu nalo dolu  
mia parilo jikili laka  
mia amioluolu a amil bova ka vite nalo  
na bo

mia tiniel jer tomu nalo, atukulo  
mia maka asidom tenalo na bo

<sup>4</sup> mia ala sibilili kialo bilbilu nalo  
mia maka asidomial ka titai  
mia ajidomii ka aber nalo ga abo  
mia maka tiniel tii Atua, a tiniel jii  
meuliano novo venia na ajidomio,

<sup>5</sup> a verver alavon ka avokar kija  
iñauano nalo na tertelisu na Yimo  
Lu, nina ea kuluniabelo ga, bior ka  
napano kialo meuliano berial ruei ka  
moneano ea Atua, kiano moroano ri-  
ano na maka toalo leleio.

Nina naruei bajago nalo na tomu na bogoti na maaro kialo, a monoka koto rava vaatara re kalo.

<sup>6</sup> Kiniou neber aua laka bunu ka tire nalo napano naverloglogiano nalo na sibiano nei aju ajeliviv ea kunualo. Tire nalo nene, tealu aju abar temiano na kialo kariano ruei, a tealu, jidomiano dolu nalo na jualo, mila mia bogo na tomu nalo abinimei bina ga jibe na, tire nalo nene tiniel m̄aro laka, maka kialo moroano ka tokovio kalo. <sup>7</sup> Venia na tomu nalo nei aberiio, mia nalo amonea ga vonganei, a aju amila jibe na banbano mia maka lele avokar jikiaiano na bo na Atua kiano ilirianiano.

<sup>8</sup> Tomu nalo na aju abinimei nei, kiniou nemial lo ajibe ka uolu na ilirianiano mededu, jibe tormoru Mosis kiano bogo

re nua, napano naljuo nei Sanesi bija Sampres, abinimei aberloglog niegeniege tomu nalo miroano kialo jidomiano. Iñauano na naruei tomu nalo na aju amila kia navo, napano kialo jidomiano bilig ba bova, maka bunu avokar kiado viekouoiano, a ajaluvo aban ea dolu. <sup>9</sup> Venia napano nalo amila, naio bova laka, mia bogo na avar vironiano nene mia riyotuba bogo tai navo, tibe ka na miyotuba ka naljuo na neber vonganei. Bogo tai, nalo aiilo ka kialo sibiano nalo riyotuba ea vio medave, mia tomu nalo avitulubario.

*Pol kiano bajago novo nalo*

<sup>10</sup> Timoti, roju vio takurano bogo be ruei, mia nemijikia ka jau kobitukua vatitig kiniou. Jau komijikia kiniou jibe na, napano: komijikia vatitig venia na nojorña neberloglog ka tomu nalo

komijikia vatitig kiaku bajago  
komijikia vatitig venia na nojidom ka noim̄auka ea kiaku meuliano  
komial ka kiaku viekouoiano ea Kristo  
naio toru jum̄abe

komijikia ka kiaku jidomiano tebievi  
komial ka tinieku jii toru tomu dolu nalo  
komijikia ka bogokouo na vabe na binime  
i ea kiniou, mia nejikili noju ga

<sup>11</sup> komijikia vatitig vovaiano nalo na kiaku uolu nalo amila ban kiniou, jibe ka ea komeli tolu na tortoru nei Antioko, Aekoniam, bija Listra ana komijikia niabe jalele na nabar ea jum̄alo ea bogo nene.

Jogvaiano nalo nei ajikili laka, mia nobokar kiniou ga banbano nemial ka Tubo naio binimei burular kiniou den bogo na jogvaiano nalo nei nonovio.

<sup>12</sup> Nao, kito nonovio nalo napano rojidom Kristo Yesu ka toa kito, p̄eli roje meuliano na bo vija naio, monoka rejikia ka mia ravar jogvaiano ea kulo dolu nalo. <sup>13</sup> Nina naio bo ga, mia jogvaiano dolu na jo na bova, nina napano tomu nalo na kirivova bija tomu nalo na sibiano mia avario. Vonganei aju amila bova laka ruei, a mia ala rivoa tibe na rivan riva rivoa lie vo, rivan riva rivoa nonovio.

<sup>14</sup> Mia jau Timoti, koin̄au ga vija jikiaiano nalo na bo napano kobokar ruei, a koin̄au rivan tibe na vija moneano nalo nabo napano kejikili koju jikili vatitigio eaio ruei. Tiniemo bobogu ea re ka kumemi kei napano nuberloglogso, <sup>15</sup> jikar ea bogo napano jau telisu kia ga vo ea kanamo vonuo, binimei bokar banei, mia mila na komijikia vatitig Niosi Lu, na naio berloglog m̄arabo na ioruriano na tomu nalo napano amonea Kristo Yesu.

<sup>16</sup> Vivitauiano Lu nalo nei, Atua Niununo joalo, mia amijikia aija kito ve toru laka. Nalo averloglog vatitig kito rivu, alabon kiado jidomiano, ala vatitig kiado bajago, a ala kiado meuliano rime rimemedu rivu, <sup>17</sup> rivanvano-o mia kiti Atua kiano tomu nalo romei rovu a reve verare ka rala kiano inġauano novo nalo.

## 4

### *Pol mila ilivutiniano ban Timoti*

<sup>1</sup> Timoti, jibe ka kitojuo rojua Atua mirano, a ea Kristo Yesu siano, nebika denso ka jau kovar vatitig tenalo tai na nojidom nover kaso. Kitojuo remijikia ka be kiado Tubo, mia naio tibure nalo na aġarġaro rui vija nalo na ameul, a kitojuo roju rojidom temi laka ka kiano liliuano bereio, vija kiano navenatuboiانو napano mia naio rivitiri lario, naruei mia monoka kojog vatitig iliano nei rivu.

<sup>2</sup> Venia na ka jau kala naio jibe nei: bogo nonovio monoka jau koioliolu ka Iliano Lu. Verver bogo rivu ħeli bogo rivoa, mia monoka kesikili kotu ka koverialio. Monoka kalavon ka kovuru tomu nalo, monoka kovururiri nalo napano aban ea mġarabo dolu, a monoka kotunukakar nalo napano amonea.

Mia bogo na kala inġauano nalo na, bogo nonovio kiamo jidomiano monoka rive tebievi rivu, mia maka lele kejikia tiniemo riġaro ka koverlogloglo. <sup>3</sup> Bogo nalo aju abinimei ka mia tomu nalo maka asidom ka ajog verloglogiano nalo nabo, a mia tilinielo rivilulu bior jidomiano doldolu nalo, a mia atu avuru naverloglogiano ve miroano ka ħeli mia amijikia aver tenalo na bo kalo ka ajog rivu kanio. <sup>4</sup> Mia nalo atuvan jog kariano na ilirianiano, a mia alaluvuo mġarabo, ava atakisor tukunuano nalo na tomu nalo ga aminġaukanio.

<sup>5</sup> Mia jau monoka tibe na re, a kala kiamo jidomiano to melumu ga, kovokarso ea bogokouo, kala kiamo inġauano ka koioliolu ka Ioluano Vou, a koiġau takii venia na Atua bioso ka koiġaukanio.

### *Pol mial vaataro ka auebin naio riġaro naruei*

<sup>6</sup> Ea tivelinio na kiniou, nomijog jibe vonganee nebinimeġ vaataro ea juluvati, nebinimeġ ea vio tai na mia monoka nala sida ka kiaku meuliano rivior Ioluano Vou, nemial jibe kiaku bogo ka notuvan vio na naio jo binimeġ kiana rui. <sup>7</sup> Mia naio bo ga, ka nemijikia ka kiniou nojo nemila mira, nejikili vatitig bo; kiniou nejikiti,

nejovulu nono bo; a kiniou nobokar mon-eano, maka notuvan bogo tai.

<sup>8</sup> Tomu na memedu nalo na Tubo kiano mia nalo avokar batubatu lu, a be tinieku ka kiaku naio midu vatitigio jo mave rui, ka mia rudu van kiniou ea legiano na maaro.

Ea bogo na, naio tibure tomu nalo rive memedu, a mia naio sian jidomiano van kito roviniu napano kiado jidomiano naio jikili ka rasirarago kuku ka kiano rimeiduluano.

### *Iliano na maaro*

<sup>9</sup> Timoti, kiniou nojidom laka ka kalavio sikili ka kalasoħeli komeġ kean kiniou ea vio nei. <sup>10</sup> Kiniou nojidomso laka, kuruado nei Dimas, vite nalo na vio yetemeriba abur kiano jidomiano banbano buro ba Tesalonaika. Ea kiado dolu nalo, Kresens bunu jaluvo ba Kalesia, a Taitas maka bunu to vija kiniou, naio ba Telmasia. <sup>11</sup> Bilbilu tai ga naio jo bija kiniou vonganee, nina be Luka. Ana verver jau komijikia kealal Mak, mia kovuruio rimeġ vijaso, bior nemial ka naio jo miġa kiniou toru ea inġauano na Tubo kiano napano nojidom nala. <sup>12</sup> Tikikas, kiniou nemila naio ba Eveso rui.

<sup>13</sup> Mia never kiaku tenalo tai, ver bogo na komeġ ea vio nei, mia jau kovarlo amee. Kiaku kulukoti na niavo, nabar ju bija Karpas bogo na nojo Troas, a kiaku niosi nalo bunu a kiaku mġesi nalo, saba nalo na nojidom verver jau kavarlo amee.

<sup>14</sup> Jau komijikia toro na miġauka tano ħili marau nei Aleksada, naio mila iliano bova telabo laka ban kiniou. Mia Tubo ga naio rivitii ka rila venia ka naio, <sup>15</sup> a monoka neverial ka kojikia ka naio jo mil die toru kiado Ioluano Vou, vonganee monoka kovitkar vatitigso ka naio.

<sup>16</sup> Tomu nalo na tortoru na vio Romo nalo amila vioriano ka kiniou ea komeli vaarakurano rui. Ea bogo na, bilbilu dolu nalo abiniu aburovuro, maka lele tai rimeġ to ka tivelinio na kiniou. Mia nina bo ga, bo verver Atua naio rila siniabu re kalo rivior. <sup>17</sup> Ea bogo na, Tubo naio takurano bija kiniou, mia nomijog jibe naio midu moroano toru ban kiniou, ana nejikili ka neberial vite nonovio na Ioluano Vou ea tomu nalo miralo, mila taara na nalo napano maka amonea Atua amijog. Ea bogo na, be riano, kiniou nojo joomo ea niono laeon rui, mia naio midular kiniou denio bereio.

<sup>18</sup> Maka nejikia mia noviniua venia na bova bereio, mia nomidu kiniou nojao

Tubo jumano, ka naio mia rilarrur kiniou ka noto vija naio ea kiano vio na bo mave ea tiniabene, a bogo nonovio mia kiniou neje bereio kanano mermerano vanio, rivano-o mia maka rijikia ribisi bogo tai. Mm.

<sup>19</sup> Vite tealo bereio ka never, aua kover kavijo bo p̄eli bogiano bo ka tira nei Prisila bija koano Akuila, a bunu van nalo na Onesiporas kiano torogio nalo. <sup>20</sup> Erastas naio maka bunu rimei ea vio nei, naio jo Korin ga, a bogo na kumemi numitu nubinimei, nuboru Maelitas, ana Trovimas naio mie, nojuvan naio jobo ea vio na.

<sup>21</sup> Timoti, nojidom laka vonganei ka jau komei soḡeli ea vio nei, bior bogo na niavo jo binimei vaataro.

Nalo na vio nei aberinavo neverial kaso ka nalo aju tinielo maio kaso laka, nina Yubulus, Putensa, Linas, Klotia, bija bilbilu nalo dolu.

<sup>22</sup> Namaaro ea vio na, neber Tubo to vija niunumo, kiano tiniememiano to vija kamiu kuviniu.

Kiniou, Pol.

## Mesi Napano Pol Bivitauiario Ban Taitas Verialiano Moti

*Tukunuano bulati na niosi nei*

Taitas, naio be toro mēaku tai napano maka ve taara na Israel, mia naio binime be namoneano, naruei jo jakisor Pol ka rijai naio ka iñauano na aberial Yesu Kristo kiano ioluano vou. Pol midu Taitas joa uleule nei Krit ka vitikar iñauano na yimo lu ea vio na, a naio bivitauiario mēsi nei ba ban naio ka verii vite tolu.

Nana be moti, Pol ber ban Taitas ka sidomkar bajago na navuri-māraboiario nalo na yimo lu monoka atakiio. Naio ber jibena, bior ka tomu miroano na Krit, kialo bajago bija kialo meuliano maka rimemedu. Mia juo nene Pol berial mārabo ban Taitas napano naio monoka takiio ka verloglog tomu nalo ea taara dolu nalo joomo ea yimo lu. Nina tormoruo nalo a tiramoruo nalo a mēaku nalo bija naināuano kurano nalo. Mia naio berinavo tiramoruo nalo monoka averloglog tira mēaku nalo.

Mia maariano nene, Pol berial ban Taitas verloglogiano nalo napano naio monoka sian van tomu nalo, napano memedu ka namoneano nalo atakiio. Nalo monoka atu rivu vija tomu dolu nalo, a monoka ave bilbilu vatitig vijalo napano maka atu ala baravo, bija tomu na yimo lu nalo monoka ave re terakurano.

*Torogio nalo na niosi nei*

Iliano moti 1:1-4

Navurimāraboiario nalo na yimo lu 1:5-16

Taara dolu nalo kialo iñauano joomo ea yimo lu 2:1-15

Iliano na verloglog tomu nalo 3:1-11

Iliano maariano 3:12-15

*Pol ber ilivorvoruano ban Taitas*

<sup>1</sup> Keneriku Taitas, kiniou Pol, najaaro laka ka nebiviuoso bereio ea mēsi nei, ea Atua siano, napano nebe toro na kiano iñauano, a ea Yesu Kristo siano, napano nebe kiano atevi.

Nojoa vio nei, nojo nomimāu kia ga vo bija tomu nalo napano Atua bijauia bulaglo ruei abe kiano, kar napano nojidom ka kialo viekouoiano rimei sikili lie, a kialo jikiaiario ea ilirianiano rimei ve toru lie vo. Verver tibe na, mia kialo bajago mijikia rimei memedu tibe ka bajago na Atua kiano tomu lu dolu nalo, <sup>2</sup> a mia

amijikia avokar meuliano napano maka rijikia ribisi bogo tai.

Kiado jidomiano ju jikili ruei ka mia kito rovakar meuliano na, kar napano Atua berkar nua beamu ka mia naio rila tibe na, a romijikia ka naio maka leleio rila sibi bogo tai. <sup>3</sup> Naio be kiado Atua na Ioruriano, ana bogo napano naio mial ka kiano bogo memedu, naio midu kiano iliano maluvo ka rila kiado mārabo na meuliano, a vonganei midu joa kiniou ka nava noioliolu tanea vio.

<sup>4</sup> Ana Taitas, nina naruei kiaku mēsi banso. Nemialso jibe jau kobe keneriku memedu napano kitojuo kiado viekouoiano ve takurano ga, mia kiaku volkouano karso naio ban jibe nei, ka Atua karamādo bija kiado Kristo Yesu na Ioruriano kialo tiniememiano a tuñiaroano to vijaso.

*Taitas kiano iñauano ea venuo nei Krit*

<sup>5</sup> Nebivitaui biedu, nojidom nala iliano vitunu vanto ea iñauano napano kojo komila ea Krit kia ga vo. Beamu laka, kitojuo naruei robe moti ka romidu ioluano binime ea vio nei, a bogo napano najaluvo, iñauano na togio toru jo kiano vo, ana nomiduso kojo ka kala iñauano nalo rimei rivu lie beamu.

Jibe napano neber kaso ea bogo na, nojidom koselviv ea komeli nalo, koiova tomu tealo ka nalo amei ave navurimāraboiario lu.

<sup>6</sup> Nalo na, monoka ave tomu napano maka tokoriano tai toa kialo meuliano, monoka asoro ka koalo tira ve takurano ga, napano abe riano tulaka bijaio, a keneriku nalo, nalo bunu monoka amonea Yesu, maka lele rimemedu kito reial parilo nalo sikili, pēli atu atupe kialo tormoruo juo kialo iliano. <sup>7</sup> Monoka tibe na bior napano tomu na tortoru na tuñiaro, abe tomu na vitikariano na Atua kiano iñauano lu, ana nalo monoka ave tomu na memedu. Nalo asidomii re ka aver nalo abe toro tai, nalo monoka tinielo mimi soḡeli re, nalo monoka amun mēlea re uei na jikili, nalo ave re toro na tukurukuano, a nalo monoka asidom mēlea re saba, maka leleio.

<sup>8</sup> A ver tibe na, mia navurimāra-boiano kiano meuliano naio monoka mia tuñiabe? Bo ka naio vitikar valauo nalo ea kunuano, bija bajago novo nalo dolu na jibe nei. Bo ka naio rivuru vatitig iñauano nalo, naio be masou laka, kiano jidomiano meravo bo, a naio jilanvuu bo ka kiano meuliano. <sup>9</sup> Ilirianiano nalo napano aberloglog ka naio, naio monoka rivakario sikili rivu, ka

rila ka naio kija mijikia riverloglog lilie kano rivano.

*Kuvitikar ka namoneano sibiriano nalo*

Tomu tealo aber ĉeli kiado moneano be sibi, mia kiado verloglogiano novo nalo mijikia rila kialo iliano nalo maka rijikia sikili tu rivu leleio.

<sup>10</sup> Tomu telabo nalo aju napano maka asidom ajog kito, ana aju amil miroano laka, ana aju amila dede ga ka avuru tomu dolu kialo jidomiano rive dolu. Ea Krit na, kitojuo rajaaro toru ka tomu miroano na Ju napano roburulo abinimejabe Yesu kiano tomu nalo, mia vonganei nalo dolu nei ajidom ka avurulo avan rivova bereio. <sup>11</sup> Jibe na, bo ka titai tokovio ka niolo, napano nalo aju amila bulag nono ĉaratavo tealo ruei. Nalo aju aberloglog tenalo napano maka amemedu ka averio, a nalo aju amila dede ga laka ka alajo, maka rivior jidomiano novo, a kar jidomiano va nei ga ka ĉeli nalo ajikia avar veru ve telisu kario.

<sup>12</sup> Ver ĉeli tomu nalo na Krit, kialo bajago jibe nei ga, bior toro tai ka rivivitu ea tukunuano re nua, napano naio be toro tai na kialo vio memedu, bogo tai naio berilo, berinavo

Tomu na Krit nalo abe tomu na sibiano, nalo abova jovulu kiribue, nalo abe tomu na yoviano, nalo abe tomu na ajidomii mabolo ga.

<sup>13</sup> Toro nene, kiano iliano na jikili kija, a nemial jibe ĉeli be riano ga na, ana bo ver koil sikili vanlo, ver ĉeli, mia kialo moneano maka leleio rijikia rimej rimemedu rivu bogo tai. <sup>14</sup> Vonganei, nalo aju abokar jikili kulo Ju re beamu kialo tukunuano moruo nalo, a nalo aju ajaaro ka tomu tortoru dolu nalo kialo iliano napano nalo aju abukular ilirianiano, a kar venia nalo maka asidom amonmonea Atua kiano iliano lu novo nalo napano roju rejian banlo?

<sup>15</sup> Toro napano kiano jidomiano meravo bo laka, tenalo napano miagiago maka rijikia rila kiano jidomiano rimej riagiago, mia saba nonovio meravo bo ka naio. Ana toro napano maka rimonmonea, napano kiano jidomiano miagiago, ĉeli titai meravo, mia maka rila kiano jidomiano rimej meravo, mia maka bunu titai napano meravo bo ka naio. Nina bior napano kiano jidomiano a kiano iviso nalo aba abova ruei.

<sup>16</sup> Tomu nalo napano nojo nebitauia nei, nalo aju aberial ka nalo amijikia Atua, a kialo inĉauano nalo na amila meravo ban kito ka nalo maka ajikia leleio. Kialo iviso

minunu a mijalele, parilo kirisikili laka, nalo maka avare ka ala inĉauano novo tai leleio.

**2**

*Verloglogiano novo mila bajago novo miyotuba*

<sup>1</sup> A Taitas, nemijikia ka mia kotibe na re, a mia monoka koto koverial kalo iliano nalo napano amemedu ka verloglogiano na memedu nalo.

<sup>2</sup> Iliano tealo na resian van tormoruo nalo jibe nei, ber nalo monoka aikulkul re atu sikili ĉariga, a bo ka asidomii ve temi ka kialo meuliano, bija kialo jidomiano ve masou vatitigio. Ea tivelinio na amonea Yesu, ea tivelinio na tinietii toro dolu, a ea tivelinio na sikili tu ea inĉauano, monoka avujo ka bajago na memedu bogo novio.

<sup>3</sup> Tiramoruo nalo bunu kialo iliano tealo jibe nei ju, ber monoka avujo ka bajago na abatove ka Atua, nalo maka atu ail vova tanea vio van nalo dolu, a jidomiano ka amun uei na jikili maka rivakar ĉealeo. Inĉauano napano bo ka ala naio tibe na, monoka averloglog ka nalo dolu tenalo venia na bo ka aimĉauano. <sup>4</sup> Toru ea telikiti na tira ĉeaku nalo napano ajoĉoro vonga, nalo monoka averloglogo ka ĉarabo vu nalo ka asidom vatitig koalo nalo vija kenerilo nalo. <sup>5</sup> Tiramoruo nalo nei, kialo jidomiano nalo monoka ave masou, kialo meuliano nalo monoka rimeravo, monoka avitikar vatitig kunualo nalo, kialo iviso abe tinielemi, a nalo aju abatove ka koalo nalo. Verver nalo ala tenalo nei, mia tomu nalo avitulubar ka Atua kiano iliano napano berial ĉarabo novo nalo nei, naio be vivitauiano lu tai napano bo laka.

<sup>6</sup> Ea bajago nei kia ga vo, nojidom ka kosikili ka tete ĉeaku nalo, ka monoka atilanvuu vatitig ka kialo meuliano. <sup>7</sup> Bo ver bogo nalo aialso, nalo aial napano kojo komieliel beamu ka nalo ea ĉarabo na meuliano napano bo, napano bujo ka inĉauano novo nalo, ana nalo amijikia aue jaamo ea jaalo.

Venia napano koverloglog ka nalo, monoka toa kiamo meuliano ruei, a monoka amijikia avitulubar ka jau bunu kojo kojidomii temi bereio eaio.

<sup>8</sup> Venia napano amijog ka kojo koberial, monoka iliano nalo napano mia nalo maka ajikia ail vango bereio kario. Ver tibe na, tomu nalo napano aserrii ka kito, mia nalo alavon ka atukovio ka kito, ana mia nalo ava ave vovu ga, mia maka bunu kialo iliano nalo napano mijikia sikili tu.

<sup>9</sup> Ea tivelinio na nalo napano aminĉau kurano toro na toru kiano, monoka kala ajikia vatitigio ka nalo monoka avatove

ka naio, a nalo monoka asikil ka ala napano naio mijikia saaro ka inãuano napano amila be kiano. Nalo maka ajikia ailkuei van naio bereio, <sup>10</sup> a maka rivu nalo asidomii ka amijikia avina van kiano tenalo tertelisu tai rive kialo. Nalo monoka ave riano vu laka, ka ala napano kialo toro na toru mijikia rimonmonealo ka kiano tenalo nonovio. Bogo napano namoneano nalo aimãu memedu rivu tibe na, amijikia ala kiado verloglogiano ea telikiti na kiado Atua na Ioruriano binimeí mave toru laka ea kulo dolu nalo kialo vitiiانو.

<sup>11</sup> Bo ka tomu nalo avitilubar kiado mon-eano, bior napano Atua naio be tiniememi ea yetemeriba nei, jian ioruriano maluvo ea taara nalo na tomu nonovio nalo.

<sup>12</sup> Naruei kito napano robakario, ro-bitilubario napano Atua jo berloglog kito ka kiado meuliano, ka monoka rotuvan bajago va na tomu napano maka ajikia naio, a monoka rovilig taakado ka sidom vovai-ano nalo na yetemeriba nei. Yetemeriba nei naruei naio be vio napano romeul ro-juao, a kiado meuliano monoka melumu rivu, monoka memedu, monoka rivare ka Atua kiano tomu nalo. <sup>13</sup> Monoka rotu tibe na ga, monoka rotu rorea ga bogo na bo napano kiado jidomiano joaio, napano kiado burumãara Atua, kiado Naioruriano Yesu Kristo mia maluvo eaio, bija kiano burumãara miamoiano. <sup>14</sup> Naio naruei napano mijamo ka kiano burukija miou kar kito, buru bulag kito den moroano na vovai-ano, jekon kito romeravo robinimeí robe taara lu tai ka rovar ka kito ka inãuano novo nalo jibe napano naio jidomio.

<sup>15</sup> Iliano nalo na naruei mia koto koveri-alio. Toro napano bo ka atunukakar naio, jau kotunukakario, a toro napano bo ka ail van naio, jau koil vanio. Bogo nonovio jau koimãu vija moroano a sikiliano, a jau kotuvan re ka ailkueso ðeli asidomii iakurano easo.

### 3

*Bajagvuiano na toro napano naio monea Yesu Kristo*

<sup>1</sup> Bo jau koverloglog namoneano nalo ka asidomii bogo nonovio bajagvuiano ka alaio. Ea tilikiti na tubo nalo kialo, bija kialo tomu na tortoru nalo, napano aju, nalo monoka avamenealo, amonealo, a asaaro ka ala kialo inãuano novo nonovio. <sup>2</sup> Mia jau monoka koverlogloglo bunu, ka nalo na, nalo maka ka atu averii niege-niegele bereio, a maka rivu ka ava jouro ea baravoiano nalo. A bajago napano nalo monoka ala ka toro dolu naio jibe nei, ka

nalo monoka amelumu, nalo ala re bajago napano ajikili, a monoka ala burumãara vameneano bogo nonovio.

<sup>3</sup> Iliano nalo jibe na abe kiado robinui, kar napano maka nalo dolu ga, ana beamu nua, kito bunu roja meuliano va. Kito romila vovu ban Atua, a kito romila parido jikili ka naio. Bajago va buru bova kito banbano-o robinimeí robe toro na jo yetano ka moroano na sidomivaiano nalo a saariano va na yetemeriba. Ea bogo na, sado sinaniano na bogoti bogo nonovio naio be tiniemimiano bija tiniëkakariano nalo. Kiado iviso jermii tomu dolu nalo, a mave kano, roju rejerrãi kito bereio.

<sup>4</sup> Kito roja meuliano va jibe nei banbano-o, a iorou, Atua kiado Naioruriano, kiano tinievuiano a tinietiiانو novo maluvo ea kito, <sup>5</sup> naio milarur riano ga kito. Naio milarur kito jibe nei, maka kar kiado inãuano tealo na memedu napano ðeli kito romilaio, mia bior ga kiano tiniememiano lu ea kito.

Naio tinien miia kito, ana naio jekon kito, mia Niununo Lu mila kito romoluo bereio ea meuliano vuvu. <sup>6</sup> Yesu Kristo kiado Ioruriano kiano burukija miou jovuko kito.

<sup>7</sup> Naina naruei mãarabo na kiano tiniememiano, kito robinimeí romemedu bo ruei ea mirano. Mia maka naina ga, mia mave kano, naio mila kito robinimeí robe kenerinio nalo, napano mia romijikia rovar buron kiano jajuãano napano mia jian ban kito, naina meuliano napano maka rijikia ribisi.

<sup>8</sup> Siva toru kano, iliano nalo na be riano laka.

#### *Pol junukakar Taitas*

Nojidom ka jau kosikili ka Atua kiano namoneano nalo ka nalo avokar vatitig iliano nalo nei, a monoka nalo alavon sikili bogo nonovio ka avokar inãuano novo nalo, napano amemedu, a napano amijikia aija kulo dolu nalo. <sup>9</sup> Bogo tai aju aberver iliano kurano nalo napano maka ajikia aija toro kiano meuliano, jibe napano aju amila baravo vovu ea jidomiano nalo napano maka ve sinaniano tai toaio, ðeli aju amila baravo kar korobilo kialo saba nalo napano abokar vatitig sialo ju. Bogo tai aju amiolualo, banbano-o bokar napano kialo jidomiano mijikia tiburevure bunu ea iliano nalo napano Atua kiano tuboiano berenio. Mia bo ka kover ka namoneano nalo ka avuron re lo vija iliano nalo na jibe nei.

<sup>10</sup> Ver toro tai to riasosolio, jo juþe iliano bogo nonovio, amijikia ail vanio ea bogo tai, ver makanio bogo ve valuo, a ver naio

maka sidomial, jo mila duio ka mila, bo ka nalo avior re bunu vija naio ea tenalo tai.

<sup>11</sup> Kito romijikia tomu nalo jibe na ruei, ka kialo meuliano nalo bilig bova, a kialo jidomiano nalo bujo ka kariano. Maka kito napano rober ka naio bova, mia kiano inĉauano nalo ga berial kiano vovaiano ea mirado robiniu.

*Iliano maariano nalo*

<sup>12</sup> Taitas, nojidom noverenio kaso ka ver jau keial napano neiila tomjuo nei Atemas a Tijikas nalo tinene rimaluvo easo, ea bogo na naruei jau komijikia kataluvo ea vio na, komila vio jikili ka komei keial kiniou ea Nikopolis. Nina bior napano maka ve sio, mia nataluvo den vio nei, nojidom nava notoa vio na riva rivokar bogo na niavo rivar laka ruei.

<sup>13</sup> Naljuo dolu nei napano aju bijaso vonganei, naina toro na tuboiano neibano Sinas, bija Apolos, mia kolavon ka naljuo amijikia adu kialo mĉarabo ave juo bereio ve sio re, ka avan lie ea vio dolu nalo. Aua, jau kojai naljuo ka vaio napano jumĉalo bulati kanio.

<sup>14</sup> Joaso bunu ka kotunukakar kiado tomu nalo tibe napano neber vonga, nalo monoka alavon sikili ka avar imĉauano novo nalo. Verver tibe na, bogo napano titai na iloiano, a nalo be kialo vite nalo ruei napano mijikia riijailo, a mila bunu napano kialo meuliano mijikia rivar mĉarati lie vo tibe napano Atua jidomio.

<sup>15</sup> Nalo napano aju bija kiniou vonganei aberenio kavijo bo pĉeli bogiano bo banso. A bilbilu nalo napano aju bijaso napano aju ajidomii kumemi ka kito rovinu ea taara na kiado moneano ve takurano, aua kover kalo ka kumemi bunu numitu numisidomiilo.

Kiaku volkouano ka mia Atua kiano tiniememiano to vija kamiu kuviniu tulaka.

Kiniou, Pol.



## Mesi Napano Pol Bivitauiiao Ban VAILIMON Verialiano Moti

*Tukunuano bulati na niosi nei*

Vailimon naio be namoneano tai, napano tomu miroano ajidom naio be toro tai na yimo lu na rove Kolosi, a naio be tubo na naimāuano tai na siano Onesimas. Onesimas buro nua den kiano tubo Vailimon, ba jo yako Romo, bururvenuo na Pol joa nalakoiano eaio na naio biviuo Pol, a bogo na naio binime be namoneano. Pol jiri mēsi tai ba ban Vailimon, bika naio ka monoka rivuru Onesimas rivan bere to vija naio bereio. Pol ber ban Vailimon, ber vonigane be Onesimas binime be namoneano ruel, mia bo ka naio tinien ser re naio, mia viekoko naio a rivuru bere naio ka ve kiano naimāuano kurano bereio. A mia naio ve re ga naimāuano kurano, rime ve kuruano riano tai bior napano naljuo amiasol ea Yesu Kristo.

*Torogio nalo na niosi nei*

Iliano moti 1-3

Pol miaia Vailimon bior kiano imāuano 4-7

Pol bika kirisikili ban Vailimon ka rivuru bereio Onesimas 8-22

Iliano maariano 23-25

*Pol jikar kiano iliano ban Vailimon*

<sup>1</sup> Kiniu Pol, nojorña nejirii mēsi nei biedu banso, Vailimon. Vongane kiniu nojoa komeli labo na vio Romo, mia bior nojorña nemila imāuano napano Yesu Kristo kiano, tenene na nalo amila kiniu nojoa yimo na tetavokoiano ea vio nei. Kuruado nei Timoti naio jo bija kiniu ea vio nei, naruei kumemi juo nuber kavijo bo ŗeli na bogiano bo banso, napano kito tolu romimāu ea ga Tubo takurano ga, <sup>2</sup> a kumemi juo kenememi iliano nei jibe nei naio rivan bunu kuvivinedo na, Niavia, a van bunu toro na kiado bagaro na, Akipas, napano naio be toro kou na mira na Tubo kiano imāuano, bija bagaro na namoneano dolu nalo napano ajurña abior ea kunuamo.

<sup>3</sup> Naruei kumemi juo nubolkouo ka mia Atua Karamādo, a kiado Tubo Yesu Kristo, nalo ve juo adu kialo tiniememiano a tumāroano to vija kamiu ea vio napano kumituaio.

*Vailimon kiano tinietiano a viek-ouoiano toru laka*

<sup>4</sup> Kuruaku Vailimon, bogo napano nojorña nejidomialsol ea kanaku ilivol-kouano nalo, bogo nonovio nojorña nober siva damariga ban Atua biorso. <sup>5</sup> Nina bior nomijog ruel ka napano ajurña aberii kanamo bajago novo, napano kanamo viekouoiano ea Tubo Yesu naio jikili vatitigio bo, a kanamo tinietiano ban namoneano nalo bunu, naio toru laka. <sup>6</sup> Ana nojorña nobolkouo kaso ka bogo napano kojorña kobiovio bulag kiamo viekouoiano ban kulo dolu nalo, mia rila nalo ajikia ve telabo lie vo ilivuiano novo nalo napano romijevio, napano romidu Kristo ea kiado meuliano. <sup>7</sup> Nao, Vailimon, kanamo tinietiano novo na naio jorña mila namoneano lu nalo, kialo iviso amijog bo-o mia, mia bogo napano nomijog vite nei mila kiniu nomijog bo bereio, a mila najaaro toru kanio.

*Pol balea Vailimon ka naio rivuru bereio kiano toro na imāuano nei Onesimas*

<sup>8</sup> Nao Vailimon, kiniu nejidom novika titai denso. Ea bururñara imāuano na Kristo kiano napano nojorña nemilaio, ŗeli memedu ga ka mia kiniu never batitig ga ka jau ka mia jau kala tibe na tibe na, <sup>9</sup> mia takii bajago na tinietiano, maka nesidom neil sikili tibe na vanso. Vongane nebinime nebe tormoruo ruel, nojoa yimo na tetavokoiano bior Yesu Kristo, naruei nejidom nevika denso ga, verenio jau kajaaro ka kajamo ka vite napano ver nevika denso.

<sup>10</sup> Mia toro tai joa vio na, ka bogo napano nojoa yimo na tetavokoiano jibe na naruei ana nobur toro nene binime ea Kristo, mia vongane nojo nemial naio jibe ka keneriku tai. Toro nene, Onesimas ga, napano beamu naio be toro napano jorña mimāu kanamo, karina naio buro binime ea vio nei. <sup>11</sup> Nao, toro nene, siano nioti nene be "Rila imāuano na bo," mia nemial jibe ka nanua beamu, naio maka torña rimāu batitig kanamo rivu laka. Mia vongane, napano kiano meuliano mijulio ruel, mia kiniu nomonmonea naio ka mia naio mijikia rila imāuano novo nalo ka mia rijaso, a naio mijikia rila imāuano ka mia rijai kiniu bunu.

<sup>12</sup> Mo, vongane nejidom neiila bereio Onesimas riviedu rialso bereio naruei, jibe ka nomidular kiaku meuliano togio ga nemila biedu banso. <sup>13</sup> Najaaro ver naio toa vio nei vija kiniu ga, ka rijai kiniu ea bogokouo nei, napano kiniu nojoa yimo na tetavokoiano bior Ioluano Vou, mia ver naio rila tibe na, javukia napano naio midu jelemo, naio mila imāuano tai napano memedu ka mia jau kala van

kiniou. <sup>14</sup> Mia maka rivu ka mia nesikili kanio ka mia naio to vija kiniou tibe na, bior jau maka kejikia. Nejidom ka vere jau kala iñauano novo tai tibe na van kiniou, mia nina maka bior notutuaso kanio, mia bior kanamo jidomiano novo a kanamo tinievuiano ga. Venia napano mia Onesimas naio rilao, ve kanamo ga ka mia jau koverialio.

<sup>15</sup> Riano ga ka napano Onesimas naio buro denso, ana mia kei rijikia, ðeli Atua ga mila naio jaluvo denso ka bogo na bulati tai jibe na, ka vere naio riviedu easo bereio, mia naio ve kiamo bo kanio naruei, rivano-o mia to toboto. <sup>16</sup> Nina bior vonganei, mia naio riviedu easo bereio maka bunu tibe ka toro na kiamo iñauano ga, mia naio riviedu bereio tibe kanio kuruamo tai ea Yesu, napano jibe na naruei naio bo laka. Tinieku jii naio toru ruei, jibe ka kuruaku tai, ana nomonmonea ka mia jau tiniemo tii naio riva lie riva lie vo laka, bior naio be kanamo toro ruei, ana mave kanio, vonganei naio binime be kuruamo bunu.

<sup>17</sup> Vite na naruei nojoñña nobika denso. Ver jau komial nejibe ka kuruamo, a ka robe juo robe tomu na romila iñauano takurano ga, nejidom ka mia kovuru bereio Onesimas riviedu easo, rive ver-are ga ka napano ver neviedu easo, mia jau kasaaro ve toru laka ka mia kovuru kiniou neviedu ea kunuamo. <sup>18</sup> Mia vero Onesimas bina ka kiamo titai, ðeli na naio mila bulag kiamo vite tai, ðeli na vaio, mia kiniou ga nevitii vite nalo nene.

<sup>19</sup> Iliano nei kiniou Pol nei nojoñña nejiriio ka juññaku ga, javukia kana-ku verikariano tai banso, ka ver kosidomii, mia kiniou novulu bulag nonovio kiano jabue denso. Mia ðeli jau kotoñña kosidomii ve dolu kia ga ka jau bunu be kiamo jabue tai napano toru joa kiniou, napano be kanamo meuliano vodolu, bior kiniou nemilaso kobokar meuliano nei ea bogo napano nomioliolu ka Ioluano Vou banso. <sup>20</sup> Tibe na, ana mia nejidom ka jau kala iñauano novo na rivau kiniou napano nojoñña nebika denso ea Tubo siano. Kuruaku liki, ver kala tibe na, mia nojog rivu ve toru laka bereio ea kiaku iviso, napano Kristo kiano meuliano novo naio joñña miñau ea kiado meuliano nalo jibe na.

<sup>21</sup> Maka nemerou ka netiri iliano nalo nei vanto tibe na, bior nemijikia batitig ruei ka napano mia kala takii napano nebika denso. Nao, nemijikia bunu ka ðeli

mia kala rivu lie bunu, rivano-o mia tovulu kanaku vitiiano.

<sup>22</sup> A nejidom nevika vite dolu tai denso bunu, ka neber bo kaso ka kala batitig kiaku vajoomo tai ea kunuamo, bior kiniou nebe kiaku jidomiano kouo tai ka vesiou re, mia Atua naio rijamo ka neviedu ea kamiu bereio, javukia napano kumituñña kubika denio ea kenemiu volkouano nalo.

*Pol kiano iliano maaro ban Vailimon*

<sup>23</sup> Epavras nei, napano naio bunu kumemi juo numitua yimo na tetavokoiano ea vio nei bior Yesu Kristo, naio berenio Atua riilivu ka jau. <sup>24</sup> Ana nalo dolu na, Mak a Arestakas a Timas a Luka, napano nalo ajunña amijai kiniou toru ea iñauano, nalo bunu aber ajunña tinielo maio kaso ea kanalo volkouano nalo.

<sup>25</sup> Mia vonganei, kanaku volkouano jibe nei, ber tiniememiano napano Tubo Yesu Kristo kanano, naio toa kenemiu iviso nalo nonovio.

Kinieu, Pol.

## Mesi Napano Ban Namoneano Nalo Na ABE KULO JU Verialiano Moti

### *Tukunuano bulati na niosi nei*

Toro napano jiri mēsi nei, naio jirio ba ban taara tai na namoneano nalo napano aju abiniua bogokouo ea kialo meuliano, bior napano tomu nalo na maka ave namoneano aju amilkueilo. Bajago nei napano tomu nalo na aju amilkuei ealo laka mila na nalo amial jikili, a vaataro atuvan kialo moneano ea Yesu Kristo. Naruei toro nei ber kalo ber monoka asikil atu sikili ea kialo moneano nene. Naio ber kalo ber Yesu Kristo ga naio be toro napano jloglog Atua ban kito. A ka verial vite nei, naio berii vite tolu.

Vite na be moti, Yesu be Atua Kenerinio riano, a mia naio to bogo nonovio rivano maka rijikia ribisi. Mia be riano laka napano be Atua Kenerinio, mia naio mila kakar nioniag na bajago nei napano naio monea Atua, ea vite nalo na amila mijog bova eaio. Naruei bior napano naio be Atua Kenerinio, naio jo loa liei naverialiano nalo, a agelo nalo, bija bunu Mosis.

Vite juo nene, Atua berial ruei ka Yesu, naio be Parinio toro lu napano mia to o-o maka rijikia ribisi. Naio be Parinio Toro Lu napano loa laka ka toro lu nalo re nua.

Mia vite tolu nene, ea Yesu kiano iñauano napano naio be Parinio Tubo naio m̄aro ka rilalar tomu nalo, bar bulag kialo kariano nalo milalo maka bunu amerou, a jian meuliano napano maka rijikia ribisi banlo. Sida nalo re nua abe kijokijo ga na sida napano Yesu Kristo milaio.

Ea mirano duelimo ba tai [11] toro na jiri mēsi nei, naio berii tomu tealo na Verikariano Moruo napano amonea Atua kirisikili. Mia naio ber ka tomu nalo napano bivitauia mēsi nei ba banlo, ber boka atakii kialo kijokijo nei, ka ajikia atu sikili bogo nonovio. Mia ea mirano duelimo ba juo [12], naio ber banlo, ber monoka asikil atu sikili ea kialo moneano, rivano-o rivokar juluvati na kialo meuliano. Mia bogo nonovio monoka aviti Yesu, ka amijikia avardulo bogokouo nalo, napano nalo aju abokario ea tomu nalo na aju amila jikili laka banlo. Mia ka rila nonovio kiano iliano, naio mil vatitig ban kiano tomu nalo, berkakar banlo ka monoka avitikar vatitig kialo meuliano.

### *Torogio nalo na niosi nei*

Iliano moti, Kristo berial Atua ban kito 1:1-3

Kristo loa laka ka agelo nalo 1:4—2:18

Kristo loa laka ka Mosis naio Yosua 3:1—4:13

Kristo loa laka ka parinio toro lu nalo 4:14—7:28

Verikariano vou loa laka ka verikariano moruo 8:1—9:28

Sida napano Kristo mila loa laka ka sida re nua nalo 10:1-31

Bajago na moneano bo laka 11:1—12:29

Iliano nalo napano ka rila tomu nalo asikil atu sikili, bija iliano maariano 13:1-25

### *Yesu naio loa laka ka naverialiano nalo*

<sup>1</sup> Bilbilu Ju nalo, beamu beamu laka binime, ea m̄arabo telabo a ea bajago kinkin nene nalo, Atua na naio joma berial kiano iliano vatelabo ban kiado tormoruo nalo, binime ea kiano naverialiano nalo. <sup>2</sup> Mia vonigane, ea legiano na maaro nalo na kito rojua nei, naio mil ban kito jel ea kenerinio memedu Yesu. Kenerinio nene naruei napano beamu, ea tiiano na yetemeriba nei, Atua miñau eaio, ana na nalojuo ajii bogo nalo a vio nonovio, avona iorou kanio ana na Atua naio bitirilalar kenerinio nei, naio mije vite nonovio monea juñano be parinio kalo. <sup>3</sup> Kenerinio nene nei, Atua kiano mermerano mereralii kiano meuliano, jibe ka napano naio bar nonovio Atua mirano-o mia memedu garuei, naio be tovorovo na Atua kiano bajago. A moroano na kiano iliano naio jikili laka, naio ga bokar masosoua vite nonovio nalo na yetemeriba nei bija vio dolu nalo bunu aju bo. A bereio, naio naruei mijamo ka naio binime milakon nono kiado kariano nalo binu, mia bogo na mila nonovio kiano iñauano na yetemeriba nei, ana naio bavin bereio tiniabene, ba jotano tivelinio vameruo na karam̄ano juñano, napano be Barago na tiniabene.

### *Yesu naio loa laka ka nailiano nalo*

<sup>4</sup> Yesu jotano jibe na, naio toru mave loa ka nailiano nalo napano m̄a aju, bior siano na midu bior kiano iñauano naio bo laka loa sialo. <sup>5</sup> Verver kito reial ea vivitauiano lu nalo, iliano miroano napano ju na m̄a aberenio Atua mila kenerinio naio loa lie vo ka nailiano nalo. Ea iliano nalo nei tai kalo, Atua mil ban kiano Naverikariano, naio berinavo

*"Jau na, kintiou namial jibe ka banei jau kobinime kobe keneriku riano, a kintiou nebe karam̄ano riano."* Iouano 2:7

A tai bereio jibe na bunu, naio berinavo

*"Mia kiniou nemei neve karamāno, a mia naio rive keneriku."* 2Sam 7:14  
 Iliano juo nei, Atua maka lele river ka kiano nailiano nalo nei tai, river naio be kenerinio lu, mia ber ka Yesu ga. <sup>6</sup> Ana be iliano tai bereio, na naio berii bogo na Atua jidom riila kenerinio motoru nene rime ea yetemeriba nei, ana na naio berenio

*"Mo bo ka nailiano nonovio alotu ka naio."* Tiut 32:43

<sup>7</sup> Mo tivelinio ka nailiano nalo, nalo amila iñauano na bo telabo, naruei Iliano Lu berii berenio

*"Atua kiano nailiano nalo, abar kiano iliano, ajibe ka jegi, amirāu Atua kanano, ajibe ka sebi."* Iouano 104:4

<sup>8</sup> Mia bogo na Iliano Lu ber Atua kenerinio, ber naio loa laka ka nailiano nalo, berii jibena ka naio bevirare ka Atua, bio naio ka Atua. Berii naio berinavo

*"Atua o, kanamo vio lu na mā kojo tanea mia naio ritobo to. Nasitogo na kiano navenatuboiano, na bajago memedu."*

<sup>9</sup> Jau kajaaro mēle ka bajago na bo, mia maka kosidom keial bajago na kirivova, naruei na kanamo Atua Soḻi midu larso kojo mave kojo loa ka kanamo bilbilu nalo,

*naio mila burumāra saariano banso jibe ka amiovovuaso batitig ka bonotanunu maraiu tai."* Iouano 45:6-7

<sup>10</sup> Ana ea iliano tai bereio, romial ka napano Atua Soḻi bio kenerinio berenio Tubo, a naio berii vite nalo na mā naio milalo, berinavo

*"Tubo, jau na naruei jau kobitirilar burupati na yetemeriba, jumāmo ga miñauka vio iauo mave."*

<sup>11</sup> Vite nalo nei, mia amdagdago, rivanvano-o mia avavakovio, mia jau kotobo koto.

<sup>12</sup> Tavukia mādayebe moruo tai, mia jau kojukilo a keyabulaglo, a tavukia kanamo māda kulumārauo tai, mia jau kovarvar bulaglo,

*ana mia jau koto kove terivou damariga, mia kanamo yuka nalo mia ribisi re bogo tai."* Iouano 102:25-27

<sup>13</sup> Mia bereio, Atua kiano iliano dolu tai naio jo, napano maka leleio river ka kiano nailiano tai, mia naio berka kenerinio naio takurano ga, naio berinavo

*"Jau koto tano ea jumaku tivelinio vameruo, jau koto tibena, rivanvano-o mia nala kiamo uolu nalo amei atavukia mādayebe tai na mā kovijankon jaamo eaio."* Iouano 110:1

<sup>14</sup> Naina naruei be iliano na maaro ea tivelinio nei, na mā berii jumābe ka Atua kiano nailiano nalo na airñau kanano ga, nalo abe niununo nalo na mā abar kanano iliano, a nalo na ka mā ajai kito na mā rojev ioruriano, mia be toro tai jo napano naio loa lievo kalo, nina naio be Kenerinio Lu na Yesu, napano Atua mil maariano ban kito eaio.

## 2

*Ioluano Vou na bo na Yesu kanano naio loa lie ka Mosis kiano tuboiano moruo*

<sup>1</sup> Ver tibena, iliano riano novo nalo na Ioluano Vou na bo na mā kito rojumā romijogio ruei, mia monoka rosidomii vetemii lievo kalo, monoka rovokarlo sikili rivu, ver ḻeli na, mia vier rivuru kito reielalo denlo bereio. <sup>2</sup> Tivelinio na tuboiano moruo re nua, nailiano nalo ga amidu binime, mia iliano nene nalo amemedu ga bo, a ajikili. Nalakokoroviano na iliano nene nonovio, a jog volvoliano nonovio nene, sano mauo nene memedu jo ruei.

<sup>3</sup> Mia voniganei, Ioluano Vou na bo na terivou naio binime bokar kito ruei, mia naio toru lie loa ka Tuboiano moruo na beamu. Jibena, ver kito rosidomii kurano ea māarabo na kiado ioruriano napano joaio, mia maka rejikia rovuro den kanano vironiano leleio. Kanado Tubo nene naruei naio mila Ioluano Vou na bo naio miyotuba jukamu, mia nalo na mā amijog naio ka mā berialio ea tilinielo nalo, nalo kija aberial sosolio binime boru ea kito, amila meravo ka be riano.

<sup>4</sup> Mia Atua bunu miija iliano nei, napano mā mila vremesiano ninio nalo, a vite na vameneano nalo, a iñauano nalo na kiano moroano, mia mave ka nina, naio biovio ka bulagio Niununo Lu kiano ijaiano nalo ban kito kei napano naio jidom rudu vanio. Ana na kito romial vite nalo nei ana romijikia ka Ioluano Vou na bo na Yesu Kristo kiano naio be iliano tai napano bo-o laka loa ka tuboiano moruo na kito kulo Ju kiado.

*Yesu be tubo ka yetemeriba na mia rime naivo*

<sup>5</sup> Kito romijikia ka Yesu naio loa lie ka nailiano nalo bior ea tivelinio na yetemeriba na to rime keano, mia Atua rudu re kiano nailiano nalo ka ave tubo eaio, mia naio rudu totano yetano ka kenerinio. <sup>6</sup> Vite na niosi moruo berenio bunu, ea Barago Teviti kiano iliano tai napano berka Atua, naio berinavo

*"?Vite novo venia na joa toro, mila na jau kojidomii mielea naio jibe na?"*

*?Pelina venia mila na jau kojomā komiyotuba ka kulorinio kenerinio?"*

<sup>7</sup> *Beamu, jau komidu naio jotano ka nailiano nalo, mia nina naio be tena bogo bulati ga, mia vonigane, jau kobitirilar naio bereio ruei, jau komidu naio joa vio na loa laka tai mave bija kiano buruñara mermerano a kiano m̄arouano,*

<sup>8</sup> *jau kabar vite nonovio ajutano ka kiano moroano.”* *Iouano 8:4-6*

Mia bogo na Atua mila kiano toro be parinio ka vite nonovio, mila na maka ve t̄itai leleio napano naio maka rive tubo kalo. Naio mila ka mia tibena, mia binime, bokar vongane, mia maka reial ka mirado vo ka vite nonovio nalo na yetemeriba nei naio rivokar jeleigio na Atua naio jidomii kano. <sup>9</sup> Mia vite nalo naio makanio vo, mia dam̄ariga kito rotu resirarago ka Yesu, napano Atua bitirilar naio loa laka. Beamu, Atua naio tinien miia kito toru laka, ana na naio miila Yesu naio batove telisu ka bogo tai ga, mila naio batove yetano ka nailiano nalo, ana mila naio jen tanea jogvaiano napano m̄aro ka kito nonovio, mia iorou kano, ana naio bitirilar naio bereio, miyovovua batitig naio bo bija mermerano na vio mave.

*Yesu naio be kiado ioruriano, naio be kiado parinio toro lu*

<sup>10</sup> Atua kiano bajago na iñauano na ka naio rilarur kito naio memedu, bior naio jii vite nonovio, a vite nonovio be kiano, naruei naio jidom ka mia naio tovulu meran bereio buruñara taara na kenerinio nalo ataluvo den yetemeriba nei, amei ave kiano bereio. Naio jidom ka rila tibena, mia ka riñauka tibena naio kirisikili laka, naruei naio mial m̄arabo tai ga ka rilaio, naio jibenei: be Yesu kiano m̄arabo na jogvaiano, napano mia Atua mila naio binime be toro, naio be toro na m̄a je dulu m̄arabo ka tovulu kiado ioruriano. <sup>11</sup> Yesu naio mijikia tukamu ka kito tibena bior naio na m̄a milakon kito romeravo, mila na naio jaaro ka rial kito tibe ka robe m̄aratavo takurano ga kitoliko naio. <sup>12</sup> Kiano iliano tolu ban Atua ber jibenei. Tai joa niosi na Iouano, naio ber jibenei, naio berinavo

*“Mia kiniou naverial siamo na bo van kuruaku nalo, mia kiniou navame-neaso tukamu ka kulorinio nalo.”* *Iouano 22:22*

<sup>13</sup> Mia dolu nene naio berial ka Yesu naio monea Atua jibeka na kito romonea naio, be iliano na joa naverialiano Aisea, naio berinavo

*“Kiniou nei, kanaku monmoneano nomidu joa naio.”* *Ais 8:17*

Mia nana maariano, iliano tai bereio ea Aisea, naio ber Yesu bija kuruano nalo, naio berinavo

*“Ninei be kiniou nene nei nojo nei kumemliko Atua kenerinio dolu nalo napano naio barlo ajua jurñaku.”* *Ais 8:18*

<sup>14</sup> Mia kito robiniu robe Atua kenerinio nalo kia nei, kito robiniu robe kulorinio, bija niabedo a kiado burukija, mia ka Yesu rime, rive kuruado be riano, naio binime, ea yetemeriba nei, midu niabene a kiano burukija jibe ka kito ga. Tibena, mia bogo na naio mijamo ka bereio, naio m̄aro bior kito, naruei kiano m̄ariano nei naio muelar moroano na parinio tubo na kirisikili na m̄ariano kiano, nina be Siñaro. <sup>15</sup> Naio muelar Siñaro kiano moroano, ana naio mijubar bulag teli nalo na merouano na m̄ariano na amiorakakar tanea niegeniege kito, napano mila kito romijog bova biorio ea kiado meuliano momou. <sup>16</sup> Riano ga na, Yesu kiano iñauano novo na ijaiano nene, naio maka rila rivan nailiano nalo na vio mave, mia naio mila ban kito tomu na yetemeriba nei. Iliano telabo na m̄a aber vite na jibena, aberinavo

*“Naio jom̄a mijja batitig tormoruo Epraamo kiano bajulukuti nalo.”* *Ais 41:8-9*

<sup>17</sup> Naina naruei be Atua kiano jidom-iano naio jibenei. Naio mial bo ka mia Yesu naio rime, tibe, ka kito kuruano nalo ea vite nonovio, rivanvano-o mia mijikia rijikia vatitig kito rivu, naio mijikia tinien r̄ia kito. Ana mia kito ravarkar tiniedo ea naio, ka mia naio riviekou ea iñauano na mia naio rila van Atua rivior kanado kariano nalo, napano naio mila kiado merevuiano bija Atua, jibeka naio be kiado parinio toro lu. <sup>18</sup> Naio mial buruñara lavoniano na miyotuba ka kiano meuliano, naio mijog bova bano-o na naio jovulio, mila naruei naio mijikia rijai vatitig kito bereio rivu ka bogo na lavoniano naio binime, jikili bunu ka kito.

### 3

*Yesu naio loa laka ka tormoruo Mosis*

<sup>1</sup> Kuruaku a kuvinioku lu nalo, na m̄a kami kumonea vioano na mave ruei, kiniou neber ruei ka kami ka Yesu naio mijikia rijai vatitig kito rivu, mia naruei nejikili ka kami, nejidom na ver bo ka kuvilavon ka kuvisidomial naio lie vo, tibe, ka naio be atevi a naio be parinio toro lu na kanado moneano. <sup>2</sup> Ralavon ka revitii vatitig Yesu naljuo tormoruo Mosis re nua nei. Tormoruo Mosis re nua, naio bieko laka ea kiano iñauano ea Atua kiano m̄aratavo, a Yesu bunu

naio biekouo laka ea kiano iñauano, na mña Atua bitirililar naio ka rilaiio. <sup>3</sup> Nalo abe juo abiekouo ea iñauano, mia Atua bitirililar Yesu naio loa lie laka ka Mosis, bior naio jibeka na Mosis naio jo joomo ea Atua kunuano naio jomña mila kiano iñauano sesa nalo eaio, mia iñauano na toru ka avitirililar yimo nei, Yesu naio takurano mimñaukanio. <sup>4</sup> Yimo nonovio, monoka ve toro tai na ka mña riimñaukanio, ana Yesu nene naruei naio mimñauka Atua kunuano, mia Atua naio be parinio ka iñauano na ga. <sup>5</sup> Jibena, Mosis naio be toro na iñauano, na kirimomedu bo ea kiano iñauano nonovio na jouro ea Atua kiano mñaratavo, rivanvano-o rivokar ka na mña naio be toro na mña berverial Atua kiano iliano nalo na burutomormoru na mña ajumña aberial lilianlo binimej bokar voniganej, <sup>6</sup> mia Kristo naio mila lievo, bior ka naio biekouo ka rivitkar iñauano na burutomoluo nonovio ea yimo nei, jibeka na naio be kenerinio motoru kar garuei ka naio be napano boru na yimo nene.

? Ana yimo nei naio jomña ber venia, ðelina ber kei? Naio jo ber kito ga, bior ka na ver romerou re, a ver rajaa-ro ka kiano verikariano nalo, rovokar vatitig rivu kiado verikario ealo, mia kito rove kiano mñaratavo lu memedu.

*Yesu naio loa ka Mosis, a kito monoka romonea van lievo tuvulu nalo na Mosis jukamu kalo*

<sup>7</sup> Be iliano tai joa vivitauiano lu, napano naio be iliano na Niununo Lu ka labon kito, napano naio ber jibenei, naio berinavo “Banei, ver kamiu kuvijog jooon,

<sup>8</sup> *maka rivu ka kenemiu jidomiano rimej sikili bereio, tavukia na kenemiu tormoruo nalo amilaio.*

*Beamu ea vio iauo, ajua bogo tai na lavoniano toru laka,aju banbano-o karina ajumolu amila pariparilo bereio.*

<sup>9</sup> *Naruei Atua mial lo, ana naio ber jibenei, berinavo.*

*Ea kialo ieliano ka yuka duelimo va ver [40] nei, damñariga kiniou nojo bijalo, amial kanaku ijaiano novo na banlo, mia kialo bajago nalo naaju amilavon kiniou laka.*

<sup>10</sup> *Kialo veribinio nei naio mila tinieku bilulu mñele, ana namial jibe makanio, nalo na julaka ga ajumña aburvuru dedade ealo ajanea vio ajumña ajaluvo den kiaku mñarabo na memedu nalo.*

<sup>11</sup> *Tinieku mñaro ka nalo na jibe na ruej, tinieku kiri seri tanealo, naruei nojumolu namila verikariano tai, neberinavo buruvenuo na jilimebiano novo*

*na kiniou namila batitigio bo jo kalo, mia maka ajikia ava jouro ea bereio.” Iouano 95:7-11*

<sup>12</sup> Kuruaku nalo bija kuviviniekunalo, bior vite nalo na mia bo ka mia kamiu kuvititar kamiu rivu. Maka rivu ka mia kamiu tai, jidomiano na bova toa naio, ðeli kiano iviso rimonea re bunu, ka mia rila naio rivan bereio taluvo den meuliano nabo na Atua na meul kiano. <sup>13</sup> Maka rosidom ka mia kito tai rijoru tibena, naruei monoka rotunukakar kito damñariga ka legiano nonovio, ka mia ve re tai ka kito napano bajago na kariano atumña atubolbolili lelan naio rivano-o mia rimenini nonovio. Iliano na mave na ber “Banei, ver kamiu kuvijog jooon Atua,” mia naio be iliano na beamu tai, mia naio ju jikili kia ga vo, jooon naio jomña bio kiaga vo, kito rojuva legiano nalo na jogvaiano kiaga vo. <sup>14</sup> Bokanio kito rovokar vatitig sikili kiado moneano ea naio tavukia ga na mña rojuña romonmonea jukamu, bo ka kito rotu sikili rivanvano-o rivokar jukuti. Ana vere rotumña ralala ga tibena, mia kitoliko Kristo, kito tomu nalo na mña ravar bitiran Atua kiano mermerano novo nalo rivija naio. <sup>15</sup> Rian ga na, iliano lu na mave naio ber jibenei ber maka rivu ka kenemiu jidomiano rimej sikili bereio, tavukia nanua mña kenemiu tormoruo nalo amilaio ea kialo bogo na lavoniano beamu ea vio iauo, napano ajumolu bereio amillie Mosis.

<sup>16</sup> ? Mo nalo na mña amila parilo jikili jibena, nalo abe kenia? Nalo na mña amila jibena, nalo na mña beamu ajaaro ka mña amidu Atua jooon ruej, abatove ka kialo tor na toru Mosis, naio jukamu kalo ajaluvo den Ijivi. Naio jukamu kalo abatavio, mia maka vesiuo, ana amillie naio bereio.

<sup>17</sup> ? Mia nalo na mña amilavon Atua, ajaljulu tinieni ka yuka duelimo va veri [40] nei ea kialo burutili mñarabo nei, banbano-o na naio tinien jerlo toru, nalo nene kiaga nei vo, a? Ee nalo na mña amila jibe nei, nina nalo kiaga nene kiana vo na, napano naio milarurlo, mia iorou kanio ana ajumña amila kariano damñariga ea mirano, mia iorou kanio ana naio milalo napano amñarñaro ga, salo buriu nalo abe dedade ea vio iauo.

<sup>18</sup> ? A nalo na mña naio berkar ber mia nalo ajikia lele re ka mia ava jouro ea kiano buruvenuo novo na jilimebiano napano naio mila batitigio be kanalo, nalo abe tomu na ajumñabe? Nalo na maka ajikia avano, nina nalo na mña amila pariparilo, a nalo na mña maka adu niono.

<sup>19</sup> ? Mia venia na mila napano maka ajikia ava jouro ea vio novo na jilimebiano

nene? Maka ajikia avano, bior maka amonea kar Atua, maka avarkar tinielo ea naio.

#### 4

*Jilimebiano lu na Atua kanano tomu nalo kialo*

<sup>1</sup> Naruei beamu, Atua naio mila batitig kiado tormoruo nalo kanalo vio novo na jilimebiano tai, mia voniganeai naio mila batitig ber ga bunu kiado jilimebiano lu tai ruei jibe na. Verikariano na jilimebiano na naio meul batitig bo jo kiana vo, naruei maka rivu ka kito rotibe ka kiado tormoruo nalo nei, napano amilaluvu kialo jilimebiano nene, nalo miroano maka ava jouro eaio. Peli bo ka kito rotu rovitii vatitig kito rivu, maka rivu ka rotu ga o-o mia kito tealo nalo bunu alaluvu kialo bogu, avitiilo ka maka ajikia avokar kialo jilimebiano. <sup>2</sup> Nina bior kito rabare ga ka kiado tormoruo nalo nei, ka lilianiano na bo na Atua kiano binimej bokar kito, javukia napano bokarlo, mia nalo amila jibe ka amijogio, mia maka ajedu moneano mave kanio. Nalo maka aje batitig rimon ea kialo meuliano, naruei iliano nei maka rivar n̄arati ealo. <sup>3</sup> Naruei ea tivelinio na nalo na maka amonea naio jibe na ana na Atua mil jikili ruei, naio berenio iliano na kiniou nebitaia mave vaarakurano garuei. Iliano nene naio berinavo

*“Nalo na amila n̄a tinieku jerlo toru laka, naruei neberkar ka mia ajikia re avokar kanaku jilimebiano nei.”*  
*Iouano 95:11*

Mia kito na ga kito romonea naio riano, jilimebiano nei naruei naio be kiado, ka rava jouro eaio.

Atua kiano jilimebiano nene, naio mila batitig bogobe ruei jo be kiado, bior ka bogu na tiiano, naio miñauo ea legiano ari nei o-o binu, <sup>4</sup> ana jibe ka Iliano Lu naio ber kovio tai navo, ka legiano aluo, mia naio mijilimebi ka kiano iñauano nalo, maka bunu riñaukalo bereio.

<sup>5</sup> Ana vite takurano bereio, be iliano na mave naio berii Atua ka naio berinavo mia tomu tealo ajikia re avokar kanano jilimebiano, <sup>6</sup> ana na iliano nei mila kirimeravo ka monoka ve tomu nalo na vio dolu tai bereio na mia Atua naio rijamo kalo ava jouro eaio. Nalo na beamu, amijog Atua kiano lilianiano vou na bo, bija buruvenuo na berkario ka ve kialo, mia maka atu sikili, maka amonmonea, mia nalo amilaluvu tanea garuei, maka ava jouro eaio. <sup>7</sup> Mia kiado jilimebiano jo kiano vo, a Atua jekar legiano nene memedu ka mia rovokario, bior yuka miroano barlaka ruei, avona bisi, ana na parinio tubo Teviti naio berial

iliano nalo na aju mave ruei, napano naio ber jibe nei, berinavo

*“Banei, ver kamiu kovijog jooono, maka rivu ka kenemiu jidomiano nalo amei sikili bereio.”*  
*Iouano 95:7,8*

Bo ka rovitilubar ka “banei” napano naio berenio ea vio nene nainei naruei kito rojua nei ruei, napano Atua jekar ka ber bogu nene memedu ka rovokar ioururiano eaio.

<sup>8</sup> Kuvisidomii von tormoruo Yosua nei nua. Naio jukamu ka kiado tormoruo nalo nei togio abano jouro ea buruvenuo novo napano Atua berkario, a ver naina naruei naio be Atua kiano jilimebiano na amijeivio ruei, mia Atua maka bunu rijikia riverii bogu dolu tai bereio ka Teviti, ka river be legiano na va jouroiano ea kiano jilimebiano. <sup>9</sup> Ana makanio, naio jom̄a ber be jilimebiano lu tai naio jo keano be kiano tomu nalo kanalo, <sup>10</sup> mia ver kei na riva jouro eaio, mia rivu mia rivu ka naio, naio mijikia rijil mebi ka kiano iñauano nonovio, tavukia na Atua naio mijilimebi ka kanano.

<sup>11</sup> Ver tibena, bo ka kito resikili ka ravokar jilimebiano lu novo na, maka rivu ka mia kito tai bunu rimonmonea re Atua, ka mia rilaluvuio.

*Atua kiano Iliano na bo laka*

<sup>12</sup> Kito rojutano ka Atua kiano iliano, bior kiano iliano naio meul, naio jom̄a miñauo jikili laka, naio mijikia julu dulu toro kiano meuliano, naio mali laka jovulu iobogu na mira napano mali ea ikiti be juo. Atua kiano iliano naio mijikia ri-ovodulu riva joomo ea kito, riva tibure venia napano joa kiado jidomiano, p̄eli vitii venia napano joa niunudo. <sup>13</sup> Nao, naina mia rivitii kiado meuliano, mirano joa vite nonovio, maka kito tai napano mijikia toluku ka naio.

*Yesu be kiado parinio toro lu*

<sup>14</sup> Atua mijikia vite nonovio ea tivelinio na kito, mia siva ga kanio ka napano kenerinio, kiado parinio toro lu na toru na Yesu, naio juvan vio nei naio mijaka ban ea kiano vio mave niogovu, naio ba mila merevuiano ban Atua kar kito bereio. Mo bior naio jom̄a mila batitig kito bo bija Atua jibe na, mia bo ka rovokar sikili kiano moneano, bo ka rotuvan re naio bogu tai leleio. <sup>15</sup> Kiado parinio toro lu nei, naio maka ve tai na n̄a maka rijikialubar kiado mijikikiano, mia naio mijikia vatitig ka kito maka n̄a rotumolu rotu sikili laka. Naio tinien miia kito, mia naio rijai kito, bior beamu naio bunu, juboluboiano nalo abinimej kirisikili laka ban naio ka tivelinio nonovio, jibe ka ga napano n̄a ajum̄a abinimej ea kito. Naio javukia ga

kito, mia vite takurano ga, juboluboiano maka rivuru nae rijoru ea kariano leleio kija garuei. <sup>16</sup> Jibena, ana kito romial ka napano robe kiado m̄arabo naruei napano romijikia ralavon ka rojian kija kito romei vaataro ka Atua kanano jobaro lu, napano be burupati na tiniememiano. Kito romerou re bunu, rasaaro ga ka romei ea Atua, ana na mia rovokar kiano tinieiano ea kiado meuliano, rovitio ka kiano tinievuiano naio mijai kito ea bogokouo vaio na rojoaio.

## 5

*Yesu be parinio toro lu na m̄a tinien miia ea toro*

<sup>1</sup> Nalo nam̄a abokar in̄auano na parinio toro lu, abitiri bulaglo den kulo lu dolu nalo ka ain̄au tibena naruei. Parinio toro lu naio be toro tai na mia tumolu to iviso ka tomu nalo a Atua, ka mia sian ijaiano nalo p̄elina sida nalo na kialo riva naio, ka naio mijikia riviekokoa kialo kariano nalo. <sup>2</sup> Parinio kulo lu nei naio bitilubar batitig bo ka na m̄a tomu nalo am̄in̄au bova, ajun̄a amiel belbele amilaluvu m̄arabo, bior naio bunu be sunbue, mijikia jik̄ia, naruei naio mijikia tinien miia tomu dolu nalo riano, mijikia melokloko vanlo. <sup>3</sup> Naio a javukia ga tomu dolu nalo, naruei bogo na m̄a mila jokoluolu nalo, monoka rila, maka ka tomu nalo ga kialo kariano, mia bior kiano kariano bunu. <sup>4</sup> Bior vite na, maka rivu ka tor tai ga rivijauia naio bereio ka naio river bo ka naio rimei rive parinio toro lu, makanio, mia Atua ga mijikia rivijauialar toro na mia mijikia rudu sio na toru na jibena, jibeka naio bijauialar tormoruo Erono re nua naio be kiado parinio toro lu na be moti garuei.

<sup>5</sup> Ana tivelinio na Kristo kanano naio jibena bunu. Naio be kiado parinio toro lu na toru, mia maka rivevavinia naio ka river naio jibena, mia Atua ga bitirilar naio. Atua kiano iliano na m̄a ber jibena naio jikili jua vivitauiano lu moruo nalo re nua, napano tai ber jibe nei, naio berinavo *“Jau na, kiniou nemial jibeka banei jau kobinimei kobe keneriku riano, a kiniou nebe karam̄amo riano.”* Iouano 2:7

<sup>6</sup> Mia dolu naio ber jibe nei ber

*“Kiniou nomiduso koje javukia tormoruo Melkeseteki, jau kobe parinio toro lu na maariano na ea kiano bajulukuti, ka na mia jau kovokar in̄auano nei rivan mia ribisi deio.”* Iouano 110:4

<sup>7</sup> Atua midu in̄auano nei ban Yesu, naruei romial ka bogo na kiano meuliano

na ea yetemeriba nei, naio milaiio ruei. Dam̄ariga naio jom̄a jidom yetemeriba nei toru laka, naruei naio jegi ban Atua, sano jogumirano miou biorio. Naio jom̄a biekouo jikili ea Atua ka ver kiano meuliano rivakovio, mia Atua rila naio rimeul bereio, naruei naio jikili lie ka m̄a bolkouo bior kito ban naio.

Ana na Atua naio tinien miia, bitii kiano bajago novo na namelumuanu a navatoveiano na Yesu kiano, ana na mijog kiano viiano. <sup>8</sup> Be riano ka Yesu be Atua kenerinio ruei, mia Atua naio mijamo ka jogvaiano na jikili nalo amiyotuba kanio, jidom ka riverloglog Yesu ka rivokar vatitig rivu bajago na monmoneano ea kiano meuliano. <sup>9-10</sup> Naio batove ka karam̄ano kanano sidomiano nalo abiniu, bano-o na mila nomovio in̄auano na Atua midu banio, mila na Atua bitirilar naio javukia tormoruo Melkeseteki. Jibena, Yesu binimei be Atua kiano parinio toro lu, binimei be burupati na meuliano na maka rijikia ribisi, na kiado robiniu napano romijogkar naio.

*Bo ka romei romeruo rivu ea Kristo*

<sup>11</sup> Naruei sio nei Melkeseteki, naio be kiano tukunu moruo na bo naloaju, napano amijikia ala rimeravo rivu van kamiu jum̄abe ka tete na bija kanano in̄auano. Kirisikili ka avisivisii rivan kamiu, bior be bogo tai napano m̄a butiliniemiu nalo abonvono kija. Mia ver kamiu kuvilavon ka kuvijoglubarbario, <sup>12</sup> mia rivu, bior kamiu kumonea bogbe ruei, mia memedu ka kumei kuve naverloglogiano na iliano lu na Atua kanano ruei. Ana makanio, kumitu jibena ga, ka mia averloglog ka kamiu bereio, tikar bereio ea burupati na iliano nalo na kiano.

!Riano ga na, kamiu na ka mia kuvisen siniano na jikili ruei, mia jibeka napano kumitun̄a kumisidom kumunu yu kia ga vo! <sup>13</sup> Kulo be na m̄a ajun̄a ajidom amunu yu jibena kia ga vo, nalo abe kiritete kia ga vo, tenene na maka ajikia ave masou rivu ka iliano na m̄arabo na memedu, <sup>14</sup> mia nalo na m̄a ajun̄a ajen siniano nalo na kirisikili, na ameruo bo ruei. Nalo na ajibe nei, kialo jidomiano nalo am̄in̄au bo bano-o abitii lubarbar vite nalo nonovio, naruei amiluo abinimei abo bokar nana abitilubar vatitig vite venia nalo na bo a vite venia nalo na bova.

## 6

*Bo ka rovitikar vatitig kito ka rava iorou re bunu*



<sup>1</sup> Bior jidomiano nalo na, mia bo ka kito rotuvan bajago na kiritete naio to, rava lie rivija Kristo kiano verloglogiano na jikirkili jibe na, napano amemedu ka jidomiano nana mermeruo bo. Kito robilig kito den inġauano va nalo na mġariano ruei, kito robokar viekouoiano ea Atua ruei, ana maka rivu ka rotuġa rajajalao bereio. Naio jibe ka na romilakon jeleig yimo ruei, mia be bogo na rotu rovitirilar tu sikili naruei. <sup>2</sup> Ajiloglog kito ruei ka varueiano, a ajokol pariparido ruei, romonea ruei ka mia rotumolu bereio den mġariano, a romijikia ruei ka tibureiano tai jo bija kiano vironiano napano mia tomu na bova mia avokar rivano-o mia rijikia re ribisi bogo tai. Mia vite nalo na kito romiovo dulu ealo ruei, mia maka rivu ka rotuġa rataki jaado ka mġa reseliviv ea vite nene daġariga, mia bo ka rotu rava lie vo vija kiado Tubo. <sup>3</sup> Vite na kirisikili, mia ver Atua naio rijamo ka ga rivan kito, mia romijikia ga ka roimġaukanio. <sup>4</sup> Nao, mia kito monoka ralavon ka rotu rava lie vo rivija naio daġariga, mia tuġabe ka nalo na amijoru, aban bereio ruei? Nalo na beamu amiel bo ea miamoiano, a ajunġa ajinan ea tiniavio na vio mave ruei, a Niununo Lu binimei ealo bunu, mia bogo na mġa aban bova bereio jibe na, mia maka bunu ajikia aviliglo amei bereio ea meuliano na bo. <sup>5</sup> Atua kiano Iliano Lu naio miija batitiglo bo ea kialo meuliano, ana abokar kija moroano na navenatuboiانو napano jo binimei, <sup>6</sup> mia bogo na mġa abilig bereio taakalo, amila pariparilo jibe na, mia tuġabe ana ajikia amei bereio rivu? Makanio, mia rivova laka vanlo, bior ajunġa amila jibe ka napano ajukukakar Atua kenerinio mave ea mġakolkolo bereio, ka juġalo nalo, tibe ka napano ajunġa amidular naio ea tomu nalo miralo ka aiolua searia siano bereio.

<sup>7</sup> Kuvisidomii von ninei. Borotano na mġa jo munu yuo narġa jibirbili julaka eaio, mia naio bar mġarati miroano ka nalo napano aimġau eaio, ana mia Atua jaaro toru kanio, kiano ilivuiانو joaio. <sup>8</sup> Mia borotano na na maka rivar tena bo, bar ga soro na bova, naio jibe ka napano aberkar mġariano ga banio, mia maka ajikia ala tena bo tai eaio, mia aisebio ga. <sup>9</sup> Be riano laka banalo, iliano nalo na jibe na ajikili laka, mia tivelinio ka kamiu, maka rosidomii ka kumitibena. Peli ga, kiniou nabarkar tinieku ea kamiu, ka mġarati na bo nalo na meuliano vou ajunġa amiluo bo ea kenemiu meuliano kia navo. <sup>10</sup> Kiniou nomonea Atua ka mia naio tiniene ribobogia re kenemiu inġauano na bo nalo ka mia naio sidomii ve iakurano re ea kenemiu bajago na bo na tinietiano

a auaiانو ka na kumila banio, ka bogo na mġa kumijai kiano namoneano lu dolo nalo. Kamiu kumirġau bo jibe na mila na Atua jaaro toru laka kanio, mia naio bunu rila rimemedu a rivu ka kamiu. <sup>11</sup> Tibe na, ana mia nojdom notunukakar kamiu bereio, ka kamiu kuvan re bunu, kuvisikili ka kuva lie vo rivano-o rivokar jukuti nene, ka mia monoka kuvokar vatitig vite nonovio na mġa kenemiu jidomiano joaio. <sup>12</sup> Kamiu kuviovo re, niabemiu rimelukluku re, mia kuvirġau sikili rivare ka kiado tormoruovo novo nalo nanua mġa abokar masosou inġauano nalo, napano kialo jidomiano nalo terebievi bano-o na abokar vite nonovio na Atua berkario beamu ruei banlo.

#### *Atua kiano verikariano be riano laka*

<sup>13</sup> Verikariano tai na jibe na, Atua mila ban Epraamo, napano naio berkar jikili banio ea tivelinio na yati nalo na mia ayotuba eaio. Maka ve sio dolo napano Atua naio mijikia river ka rila kiano verikariano nei naio sikili, bior siano naio loa laka ka sio dolo nalo, naruei Atua berkar ea siano bereio, naio berinavo

<sup>14</sup> "Kiniou Atua, kiniou neilivu kaso ve toru, ka mia nala kiamo bajulukuti amei ve miroano laka ea yetemeriba nei."

<sup>15</sup> Mia vaataro ka Epraamo rimonea re iliano nei, mia naio mial ka napano Atua mila kiano verikariano nei jikili bo laka, mia be kurano Epraamo bokar bogokouo miroano, mia naio maka tuvan verikariano nei, naio bokario bo bano-o na naio jikar ka bokar venia na mġa Atua berkar banio.

<sup>16</sup> Ka tivelinio na bajago na ala verikariano jikili, tomu nalo ajunġa aberii tor lu tai siano pġelina vite lu tai. Mia bogo na tomu dolo amijogio, monoka amonea ga, maka bunu ajikia ail muġii ka bereio, bior sio na aber naio mila iliano nene tu sikili. <sup>17</sup> ?Mia juġabe ka Atua? Naio bunu tinien jii ka rila kiano iliano ea kito sikili rivu, ka mia romonmonea, maka rejikia rovitovonia naio kanio. Kito rojibe ka kiritete nalo na mia ravar kiano jajunġano, naruei naio jidom ka rejikia rive riano ka kiano jidomiano na bo ka kito naio maka rijikia ribisi bogo tai, naruei naio milakar verikariano nei ban kito naio jikili bo laka. <sup>18</sup> Atua kiano verikariano ka kito jibe na naio bo, naio jikili ruei, bior naio maka rila sibi bogo tai, kiano iliano maka rijikia rive dolo bogo tai, mia mave ka kiano verikariano, berkar bija siano lu bereio. Ana vite juo nei, kiano verikariano bija siano, naljuo aminġau biju ka rila kito rotumolu rotu sikili ea kiano iliano.

Kito roboero den vio na bova nanua m̃a rojujua mugaruei, rojuñia rojiravo vio na tolukuano, naruei Atua kiano verikariano na bo nalo amila kiado jidomiano rimeiri rive tebievi rivu. Tibena mia kito romijikia rava rovokar vatitig rivu vio novo nei napano Atua naio mila batitigio bo midu jo kamu ea mirado.

<sup>19</sup> Mia kiado moneano kouo nene, napano rober ka mia Yesu rilarrur kito, naio be jidomiano tai napano jibe ka veru na m̃a bokar batitig uako jo. Mia naio rivokar vatitig kiado meuliano rivu, ka mia ve re titai napano mia rijikia rivurular kito bereio, rivano-o rivokar bogo na kito rava resel iorou ka buruñara jagidago joomo ea vio lu napano be Lu laka. Ea Vio na, mia rotumolu rotua Atua mirano rimemedu, mia kiado jidomiano mijikia sikili rivu kianavo ka mia rivu ga van kito. <sup>20</sup> Nina bior Yesu naio jukamu ka kito ban ea vio lu nene rui, naio ba mila kiano iñauano jibe ka parinio toro lu na kiado, ka rila kiado merevuiano rivija Atua.

Jibe ka na m̃a kito roberio beamu rui, naio javukia parinio tor lu na maariano na yati na tormoruo toro lu na Melkeseteki, naruei naio bulu bulag nono kiado kariano nalo rui, ana mia rimonmon bo ka kiano iñauano na kar kito rivano-o mia maka rijikia ribisi bogo tai.

## 7

*Melkeseteki re beamu naio loa laka ka toro lu dolu nalo*

<sup>1</sup> ?Ana tormoruo Melkeseteki nene, naio be kei, a sano tukunuano nene juñabe? Niosi na Tikariano berii naio, berenio naio jo ka bogo na tormoruo Epraamo re nua, na naio be parinio tubo ka komeli lu moruo na Salemo, mia naio be toro lu na toru na Atua kiano. Ana ka bogo tai, ana tormoruo Epraamo ba mila mira ka kiano uolu nalo, ka parinio tubo dolu nalo, karina naio jo binime bereio, ana naio biviuo naljuo Melkeseteki mia naio batove kano, ana Melkeseteki mialio, ana milivu kano. <sup>2</sup> Ana Epraamo mije ijaiano banio, duelimo jaluvo den tormomou ea vite nonovio nalo na naio mijevilo ea mira, napano naio joña bar ban bere ea kiano vio. Mia buruñara toro lu nei naio be toro tai, na jibe ka siano juo nei aberenio. Siano na na jukamu nene, be Melkeseteki, nioti nene ber "Parinio tubo na memedu," ana, siano juo nene naio ber jibe nei ber "Parinio tubo na tuñaro," bior naio be parinio tubo na komeli na Salemo, napano nioti nene ber tuñaro. <sup>3</sup> Kema na, kiano tukunuano naio be dolu, bior ka maka romijog ka napano m̃a aberenio ka

kiano tormoruo juo nei ajum̃abe, ðelina korobinio nalo yati re be. Maka averenio ka kiano meuliano naio jikar jel juñabe, a tukunuano na kiano m̃ariano maka tai. ! Jibe napano naio maka riñaro kulio, mia naio joña bokar dolu ka ga kiano iñauano vo! Jibe na naio jibe ka Atua kenerinio, napano naio be kiado toro lu riva vano-o mia ribisi re bogo tai. <sup>4</sup> Bior vite nalo na, romial ea Atua kiano iliano moruo, ka napano sio nei Melkeseteki naio be sio tai na loa laka, banbano-o na korobido tormoruo Epraamo, na m̃a ajidom soþeia naio rui, naio bunu batove kano, naio jian ijaiano banio ea togio na vite nalo na barlo ea bogo na jovulu mira.

<sup>5</sup> Mia bajago na asian ijaiano na, naio be bajago tai na m̃a tuboiano berenio berinavo kulo Israel monoka ala tulaka. Nalo na abe tomu lu na kanalo yati na Livai, monoka ava avitikar vatitig, monoka asian duelimo taluvo den tormomou na kanalo saba nalo nonovio vanlo, bior nalo ajibe ka m̃aratavo takurano ga, abe bajulukuti na Epraamo. <sup>6</sup> Mia Melkeseteki nene, naio maka ve m̃aratavo na Epraamo, mia tormoruo Epraamo naio bitilubar ka naio be toro lu tai, ana naio bio ka togio na ijaiano banio. Tormoruo Epraamo nei naruei naña Atua berkar tonovo nalo banio, mia naio batove ka Melkeseteki.

Mia bogo na Melkeseteki bokar ijaiano nei, naio jaaro milivu ka Epraamo, a nina naio mila kirimeravo ban kito ka naio loa lie kano, <sup>7</sup> bior toro na bare ka rilivu ka toro dolu, naio monoka loa lie ka toro nene. <sup>8</sup> Mo na Melkeseteki naliko kulo lu dolu nalo nei, nalo nonovio abokar ijaiano na bevirare ga, mia abe dolu ka titai. Vite na jibe na, aber kulo lu nalo abokar kanalo, iorou kano ana am̃arm̃aro, mia Melkeseteki naio bokar kiano, aberinavo naio jo bano-o na maka riñaro kulio. <sup>9</sup> Mo na jibe ka napano Melkeseteki naio loa lie ka tormoruo Epraamo, naio loa lie bunu ka sio dolu na tortoru napano Livai. Be riano ka na Livai naio be korobido moti garuei na yati na kulo lu memedu, mia naio bunu mijotuba ea yati na Epraamo, ana bogo na Epraamo naio batove ka Melkeseteki, naio jian ijaiano banio, jibeka ga na m̃a Livai bunu batove ka Melkeseteki jian ijaiano banio. <sup>10</sup> Vite na jibe na javukia bogo na Epraamo biviuo Melkeseteki, mila banio, Livai naio maka riyotuba ea korobinio nei navo, mia jibe ka napano naio bunu milailo.

*Yesu maka moluo ea yati na kulo lu nalo, mia moluo ea yati vou tai*

<sup>11</sup> Ana iliano nalo na mave nei aberial buruñara vite tai. Amila kirimeravo ka

na Atua midular bajulukuti na kulo lu na Livai nalo, naio bitirililar bajulukuti dolu tai na kulo lu nalo, midu jo jeleig naio. Tormoru Erono bunu naio bitirililar iñauano na bajulukuti na kulo lu nalo, a Mosis naio bar kiano tuboiano miyotuba, mia ver Atua rial ka vite juo nei bevirare ka rila kito romemedu rivu vija naio, mia naio tuvan tobo. Mia makanio, naio mijebukua, naio miila parinio toro lu vou tai miyotuba ka kito, napano naio be bajulukuti na tormoru dolu nei Melkeseteki. <sup>12</sup> Ana bior Atua bitirililar parinio toro lu vou nei, memedu bunu ka ver rivitirililar kiano tuboiano nene. <sup>13</sup> Naio monoka tibe na, bior vio nei naio berii kiado Tubo, napano naio miyotuba ea yati tai napano maka lele tai ka nalo sikili tu ea boda ka rila toro lu kiano iñauano. <sup>14</sup> Yati napano Yesu naio miyotuba eaio, romijikia ka naio be yati na Yuta, ana bogo na Mosis berial sio na bajulukuti na tomu lu nalo, naio maka riverial leleio sio na Yuta.

<sup>15</sup> Mia Yesu, be yati dolu na toro lu jo napano naio miyotuba eaio, naina naruei be Melkeseteki kiano bajulukuti nene napano rojuña roberenio. Vite na naruei mila na romial ka Yesu maka tavukia kulo lu dolu nalo, mia naio jibe ka Melkeseteki garuei. <sup>16</sup> Nalo dolu nei, abinimei abe kulo lu bior ka ga ajakii jameul na kiano bajulukuti, jibe ka na tuboiano moruo naio berenio, mia Yesu naio binimei be kiado parinio toro lu ea buruñara moroano na kiano meuliano nei na maka ajikia ala lelanio, napano mia naio to tobo to. <sup>17</sup> Kito romijikia ka mia naio toboto tibe na, bior Atua kiano iliano naio berenio ruei, napano naio berinavo

*“Kiniou nomiduso koje jibe ka tormoru Melkeseteki, jau kobe toro lu na maariano ea kiano bajulukuti, ka na mia kovokar iñauano rivano-o mia maka rijikia ribisi.” Iouano 110:4*

<sup>18</sup> Ea vio na, binimei meravo bo ban kito ka Atua biebukua ñarabo na kiano iñauano. Marabo moruo, na be Mosis kiano tuboiano re beamu, napano jumolu ju bogo be ruei, mia javukia napano maka rijevo moroano tai ka mia rila vite novo tai van kito. <sup>19</sup> Naio bijuku deio ka rila kito romei romemedu, tenene na Atua juvan ñarabo moruo nene jobo garuei, ana mila jidomiano vou tai binimei medave, midu jeleigio. Marabo vou nei naruei romijikia romonea sikili ka naio be ñarabo na be riano, napano mia naio mijikia rivuru ñarabo ka kito ka mia romei vaataro ka Atua.

<sup>20</sup> Ana ñarabo vou nei, Atua kanano verikariano tai naio mila jumolu ju jikili

ju. Kulo lu dolu nalo re beamu, bogo na ajokol parilo, amioakolo ka kialo iñauano nalo, maka ve verikariano tai tibe na. <sup>21</sup> Mia bogo na Atua bitirililar Yesu be kiado parinio toro lu, naio milakar bija kiano verikariano na jikili tai. Javukia napano iliano tai ea niosu lu na iouano naio berenio, napano naio berinavo

*“Atua soñi naio berkar ruei, mia naio maka rijikia river bukua kanano iliano bereio, naio berinavo*

*‘Jau mia kovokar iñauano na parinio toro lu na kanaku tomu nalo, rivano-o mia jau kobisi ka re bogo tai.’” Iouano 110:4*

<sup>22</sup> Mia Yesu naio bokar batitig kiano iñauano jibe na, be kijokijo na verikariano vou na Atua kanano bija kito, napano naio bo lie vo loa ka nana beamu, a naio be tikariano na vite dolu nalo na Atua berkario ban kito, mia na rila nonovio ea kito iorou.

<sup>23</sup> Kulo lu nalo na beamu nalo miroano, bior nalo tai miñau bano-o bakovio, ana na dolu midu juñano, miñau banbanoo, naio bunu bakovio, nalo amila jibe na naruei. Nalo maka ajikia avokar tobo to, <sup>24</sup> mia Yesu, naio be na toboto ñamiriga, mia naio ga ve takurano na mia rivokar kiano iñauano tibe ka kiado parinio toro lu rivanvano-o mia rimebi re bogo tai. <sup>25</sup> Jibe na naio jo ñamiriga ea Atua mirano, naio jo bolkouo ñamiriga banio ka kito, mila na kito na voniganei, ñelina kito tomu na romei iorou, mia naio naruei mijikia rilarun nono kito na ñia rejlela naio robinimei vaataro ka Atua.

*Yesu naio be parinio toro lu kar garuei*

<sup>26</sup> Kito rajaaro toru ka na Atua mial bo ka tuvan parinio toro lu tai na naio bo laka jibe na rimebi rivior kito. Naio be toro tai na be lu laka, napano maka vijukubeleano tai rimonea naio leleio, naio meravono nonovio, kiano bajago naio maka tibe ka tomu na ña amila kariano leleio, siano jo mave loa laka ka vite nonovio nalo na tiniabenei. <sup>27</sup> Mia kulo lu dolu nalo nei, nalo monoka atuña ala sida na meravoiانو tulaka ea legiano nonovio. Beamu, monoka ala rivior kialo kariano nalo bereio, ana iorou, amijikia ala rivior kariano na tomu dolu nalo kanalo, mia Yesu naio maka tibe na. Naio mila sida na meravoiانو na kariano na yetemeriba nei reraio ve vaarakurano ga, nina, ka bogo na naio mila jokoluolu ka mokotenano bereio kar kito. <sup>28</sup> Be riano ka tuboiano moruo binimei beamu, mia kiano parinio kulo lu be kulorinio ga, melokloko ga, mia verikariano vou na binimei iorou, kiano

parinio toro lu naio memedu damariga, be Yesu Atua kenerinio.

## 8

*Virakariano vou: Im̄auano na parinio toro lu kanano naio bo lie vo*

<sup>1</sup> Naruei verloglogiano nalo nei aber vite telabo ea tivelinio na parinio toro lu nalo. Mia burum̄ara burupati iliano tai na naio jo, napano temi bo ka rosidomii ve temi eaio, napano berenio kiado parinio toro lu novo tai jo ruei. Naio be Yesu na naio ban bere mave tiniabenei, naruei toro na toru na vio mave naio midu naio jotano tivelinio na jum̄ano meruo. <sup>2</sup> Naio joa vio na, naio mila kiano im̄auano lu, javukia napano parinio toro lu nalo re beamu amila lotuano joomo ea yimo lu panpano nei ea vio yauo. Mia vio na lotuano nei, tomu nalo ga amim̄aukanio, mia kiado parinio toro lu Yesu, naio jom̄a mim̄au joomo ea vio na lotuano na bo laka, nana be riano, napano Atua ga mim̄aukanio. <sup>3</sup> Mia parinio kulo lu dolu nalo nei, kialo im̄auano nalo, napano damariga abitribulaglo ana m̄a ajum̄a ajan ijaiano ban Atua, a napano m̄a amila sida banio, mia bo ka rovika rover kiado toro lu nei, p̄eli naio bunu midu ijaiano ban Atua, mila sida kano? <sup>4</sup> Verver yetemeriba nei ga, mia naio maka aial naio tibe toro lu tai, bior naio maka riyotuba ea yati na Livai, na m̄a tuboiano mije moroano banlo ga ka amijikia asian ijaiano rivan Atua. Jibe na, kiado parinio toro lu nene naio jom̄a mim̄au ea vio lu na mave ga.

<sup>5</sup> Vio lu na yetemeriba nei, bija im̄auano na na m̄a amim̄au kalo eaio, naio javukia melukuti nene ga, p̄elina kijokijo ga, mia na na ea vio mave, naio be telerinio nene. Atua bunu ber jibe na ga, tilikiti na naio berlubarbario ban Mosi, naio berkanio ber mia tum̄abe ka mia naio rim̄auka yimo panpano lu nei, naio berinavo mia naio monoka rim̄auka takii tiiano nene rimemedu ka na m̄a naio mialio bogo napano naio bavini ea burusuku. <sup>6</sup> Mo jibe na na kito romial ka Yesu kiado parinio toro lu naio be riano, a kanano im̄auano nonovio nalo abo lie vo. Naio jotano iviso ka kito bija Atua, naio mim̄auka virakariano vou tai ea kito bija naio napano bo lie vo, napano jikili jua Atua kanano verikariano napano abo lie vo, o-oa na nalo romial naio jo mave mila im̄auano tai ea vio lu napano naio bo lie laka. <sup>7</sup> Verver virakariano na beamu naio rivu kia ga vo, mia ve re bunu tinene bereio, mia makanio, milaio ana na Atua bitirilar virakariano vou bija kito napano naio bo bo laka garuei.

*Virakariano vou: Atua naio berkario beamu ruei*

<sup>8</sup> Virakariano na jukamu, Atua naio jo mial ka maka rim̄au rivu, ana naio maka rivare vo ea kiano jidomiano, mila na naio berkar na na terivou dolu bereio. Naio berial jibe nei ea iliano tai nanua jian ban naverialiano Jeremaia ka naio riverialio. Ea iliano nene, Atua berkar jibe nei, berinavo

*“Kamii kuvije tiliniemiu vatitig rivu. Kiniou nojidom never ka kamii ka bogo tai jo binimei kiana, ka mia kiniou nala virakariano vou tai vija kamii kanaku tomu nalo, kamii na kube bajulukuti na Yuta bija bajulukuti na Israel.*

<sup>9</sup> *Mia virakariano nei naio rivevirare re ka nanua namila kar bija korobimiu nalo re nua. Virakariano moruo nene, nina ea bogo na kiniou tinieku mialo, kiniou noburu bulaglo den bogokouo ea vio Ijivi, mia iorou kano, ana maka bunu asidomial virakariano nene, a maka bunu amonmoneaio, mila na kiniou bunu nobilig taakaku kalo.*

<sup>10</sup> *Mia vonganei, kiniou nevitirilar virakariano vou tai vija kenemiu bajulukuti nalo bereio. Ea virakariano nene, mia kiniou nala tibe nei: mia nevitiri bulag vatitig kiaku tuboiano nalo tua kialo jidomiano nalo, mia nevitituaia kanaku iliano nalo tua kialo iviso nalo, mia nemei neve kialo Atua riano, mia nalo na amei ave taara na kanaku tomu nalo.*

<sup>11</sup> *Ka tilikiti na, mia alavon re bunu ka m̄a aververlogloglo bereio, ka na mia tai river ka kiano bilbilu riverinavo ‘E, m̄arabo naio nei,’ p̄elina tai river ka kuruano, riverinavo ‘Atua, naio jibene jibene.’*

*Makanio, mia ala re bunu tibe na, bior mia aviniu ajikia vatitig kiniou ea kialo meuliano nalo aviniu koko, tika ea nalo na tertelisu laka, riva rivokar kialo tomu na tortoru nalo.*

<sup>12</sup> *Kiniou neberkar ka kialo vovaiano nalo, mia nevie kokoalo ga, a kialo kariano nalo, mia nosidomial re bunu.*

*Naina naruei be kanaku virakariano vou bija kanaku tomu nalo.” Jeremaia 31:31-34*

<sup>13</sup> Ana ea kanano iliano nene nei, Atua berii virakariano vou nei, mila kito robitilubar ka naio jo mial virakariano na beamu nei naio be termoruo ruei. Mia jidomiano tai na jo ber vite na m̄a Atua

ber be termoruo ruei, vonganei jo batove lilie ka mia riviniuviniu nonovio.

## 9

*Virakariano vou: Kiano jeleig na lotuano naio bo lie vo*

<sup>1</sup> Mia kito romijikia ruei bo ka virakariano moruo, naio be kiano m̄arabo nalo ka rila kanano lotuano eaio, a be bunu vio tai na rila kanano lotuano nei eaio, napano joa ga yetemeriba nei. <sup>2</sup> Vio na lotuano nene, be kiano yimo panpano lu nene, napano aburuko ka burum̄ara jagidago eaio, a amuebure togio juo. Ea togio, na abio ka Vio Lu, be burupati na yulu tai jum̄ano aluo, bija barobaro na joko duelimo ba juo napano abio ka "Joko na asiloglog ka Atua."

<sup>3</sup> Ana iorou ka jagidago nei, togio na bano ba yesobi nene, naina abio ka vio Lu na be Lu Laka. <sup>4</sup> Joomo ea Vio nei, naio be boda na bonotanunu na m̄a amim̄auka niogo, bija basidobidobi na tuboiano nei. Basidobidobi nei, abijan niogo ea kulukuti, vajoomo a tavio bunu, mia vajoomo nene, be vite tolu napano abar batitiglo ajuio. Nana jukamu, naio be baju na niogo tai napano niati sinaniano na vio iauo na abio ka mana naio joaio, a vite juo nene, naio be tormoruo Erono kiano nasitogo napano toti barboveio nua, a vite na maariano naio be puruveru na mierivin juo napano Atua bivitauia kiano tuboiano ealo. <sup>5</sup> Ana mave ea basidobidobi na tuboiano nei, naio be sikmirano, napano abio ka vio na totaniano na Atua kanano tinieiano. A be tovorovo na nailliano juo ajumolu aju mave eaio, napano sibialo amiaveveko tivelvelinio vio na m̄a Atua kiano mermerano jom̄a batove eaio. Naruei vio lu na lotuano na virakariano termoruo nene naio be vite novo nalo nei naruei, mia maka rejikia rover vite ve miroano bere vo ea tivelinio na nalo. Mia vite takurano ga na roverenio, ka vio na lotuano nene, vija kiano saba nalo, nina amim̄auka ga ea tenalo na yetemeriba, naio maka rijikia tobo to kanio ga, naio maka rivu tibe ka vio na lotuano na virakariano vou.

*Virakariano vou: Jokoluolu nene naio bo lie vo*

<sup>6</sup> Vite nalo na mave nei, naina naruei vite nalo na m̄a abar batitiglo aju joomo ea yimo panpano lu na beamu nei, mia bogo na kulo lu nalo aba joomo, amim̄au bijalo. Mia dam̄ariga, ajum̄a aba joomo ea ga vio lu na jukamu nene, <sup>7</sup> ana ea vio lu juo nene, na be vio na mia be lu laka, kulo lu nalo maka leleio ava joomo eaio. Vio nei, toro takurano ga mijikia ba joomo eaio, nina be kialo parinio toro lu, a naio

maka m̄a to riva joomo tulaka, mijikia ban vaarakurano ga ka yuka takurano. Ana bogo na m̄a ver naio bano, maka rijikia riva jum̄ano yauo ga tibe na, mia monoka takii m̄arabo nene. Beamu ka naio rivano, monoka ala jokoluolu ka temeul tai, ka mia naio monoka rivar basidobidobi tai na burukija nene riva joomo tibe ka ijaiano tai, naina ea tivelinio na kiano kariano, a bija tomu nalo kanalo. <sup>8</sup> Mia bogo na ajum̄a amila jibe na, javukia kijokijo na Niununo Lu napano mila meravo ban kito ka bogo na ver yimo panpano lu naio tumolu tu kia ga vo, mia kito tomu ninio kito ve re kiado m̄arabo tai leleio ka ravan rovokar vio na m̄a Atua naio joaio. <sup>9</sup> Panpano na yimo lu nei, bija sano jagidago nene napano jakilele jo joomo, a sano vite nalo, abe tena vio beamu ruei, mia aber burum̄ara titai ban kito banei. Amila kito robitilubar ka ijaiano nalo na m̄a kulo lu nalo ajajian ban Atua a jokoluolu nalo na m̄a ajum̄a amilaio, nalo abo ga, mia vite nalo nei maka ajikia ala tomu nalo ajog ka kialo iviso meravo reraio ea vitiiano na Atua kiano. <sup>10</sup> Amila vite nalo na, bija venia napano tuboiano sesa nalo aberenio ea tivelinio na m̄arabo na amim̄auka sinaniano bija munuiano, a ea tivelinio na bajago na sekoniano na saba. Mia vite nalo na naio be tena vio tavio ea toro niabene ga, mia maka atokol toro kiano iviso p̄eli kiano jidomiano. Mia kiado tormoruo nalo ajum̄a abokar bajago nalo jibene bano-o, abe navokariano nalo ga rivano-o rivokar bogo na Atua mila kiado m̄arabo vou, napano naio be kiano virakariano vou napano maluvo ruei.

*Yesu kiano burukija naio jekon batitig kito ruei*

<sup>11</sup> Mo bogo na Kristo miyotuba, naio binimej jibe ka kiado parinio toro lu, napano naio maka ve tena bajago moruo, mia naio be tena m̄arabo vou, ka rila napano romijikia rovokar ilivuiano na kirinovo nalo na Atua bar batitiglo bo aju. Naio maka riva rim̄au joomo ea yimo panpano lu na beamu, mia naio mim̄au ea tai napano bo lie vo, a loa lie vo. Vio lu napano naio jom̄a mila im̄auano eaio, maka ve toro jum̄ano napano milaio, mia maka toa yetemeriba nei, mia naio joa vio medave kamu ea Atua mirano mave. <sup>12</sup> Ana bogo na Kristo ba joomo ea vio lu nei, naio banbano bokar vio nana be lu mia be lu laka kanio, mia naio ba vaarakurano ga, maka ka mia naio riva ve vaarakurano bereio. Ana bogo na naio ba joomo, burukija na bario naio maka ve burukija na nani, p̄elina burukija na kirikiti bue m̄arauo, mia be kiano burukija ga napano

miou ea ñakolkolo. Naruei kiano burukija nei naio joa Atua mirano jibe na, naio bokar vulbulagiano na kiado kariano ka ritoboto. <sup>13</sup> Monoka tibe na, bior ea bajago moruo, ka ver toro tai mila titai na bova, ana amidu burukija na mariano ðelina bue ñarauo, bija buluñaroro na kirikiti bue ñarauo napano amisebio, amidu ban ea vio lu. Ana ea bogo na, ajidom aber ka ijaiano na jibe na mijikia rila toro neibano naio rimeravo bereio ea Atua mirano. <sup>14</sup> Mo na ver burukija na temeul ga mijikia rila tibe na, mia Kristo kiano burukija naio mijikia rila riva lie vo ve toru laka. Kristo naio be toro lu tai, naio meravo nonovio, maka ve niajebijo tai toaio, naruei naio mijamo ka kiano meuliano ka Niununo Lu mijikia rudu van Atua tibe ka ijaiano tai, ana naio binimej be kiado naioruriano. Tibena na mia burukija na Kristo mijikia rila tiniedo rimeravo, rivurular kito den kiado inñauano na ñariano nalo rivitiri bulag kito, ka romila Atua na meul kiano inñauano.

*Yesu kiano ja mila verikariano vou jikili ju jikili*

<sup>15</sup> Ana bior Yesu mila inñauano na bo nalo jibe na, romijikia reial naio, naio be toro na ña bar tenalo novo na virakar-iano vou nalo amaluvo ka kito. Nina naio milaiio ea kiano ñariano, napano be ñariano tai napano bular meuliano nonovio na tomu nalo na lakokoroviano na tuboiano na virakariano na beamu. Ana bior naio bulbulag kito jibe na, mila na kito kei napano Atua bio ka kito, romijikia rovokar kiado jajuñado neibano mia maka rijikia ribisi bogo tai. <sup>16</sup> Ver Yesu riñaro re, mia kito maka rejikia rovokar kiado jajuñado nene, mia bogo napano be riano ka naio ñaro, verikariano nonovio na virakariano nei binimej jibe ka Yesu kiano iliano na maaro, naruei vite nonovio binimej ea juñado. <sup>17</sup> Bior ver toro tai riverkar vite tai tibe na naio kiano iliano na maaro, ka bogo na naio meul kia ga vo, ajumña abokar batitigio bo kanano verikariano nei jo, mia maka alaiio tibekovio kanio bano-o bokar bogo na ver naio riñaro, ana mia alaiio. <sup>18</sup> Naio jibe ka ga ea virakariano na beamu na Atua mila bunu, napano burukija na jokoluolu miou, ana na iliano nalo na virakariano na atumolu atu.

<sup>19</sup> Tena Mosis bunu mila, napano Atua jian tuboiano banio mave ea burusuku, ana naio batove berial iliano nonovio na kanano ban tomu nalo, ana ka bogo na naio berialio bisi, naio muebinvin sida nalo, ka rila ka iliano nalo na tuboiano nei ameul, atumolu atu. Amuebinvin kirikiti

bue marauo bija nani nalo, naruei naio midu kija kialo burukija telisu, mion kija uei telisu ban ea, ana midu jaiesi tai na telisu, abio ka isop, bija vijinio sipsip na bilvil, ana budomio ban ea burukija nene, bukio tertelisu mave ea niosi na tuboiano nene, a bukio bunu ea tomu nalo, karina naio berial banlo, naio berinavo

<sup>20</sup> *“Naina naruei be burukija na temeul napano naio ñaro ka rila Atua kiano tuboiano rimeul. Naruei kito rotovo- nio, kito romonmoneaio.” Eks 24:8*

<sup>21</sup> Ana jibe ka napano ðiligvilig burukija nei ealo, naio ðiligvilig bunu tertelisu ea yimo panpano nei, bija vite nalo naaju joomo eaio napano ña abar amila kialo lotuano bijaio. <sup>22</sup> Marabo na inñauano na tuboiano moruo nei naio jibe na naruei, napano mia vaataro ka vite nonovio na ña amiañauo bijaio, monoka aplingvilig burukija eaio ðañariga ka rilalo ave lu. Nina jiloglog burumara titai na rivan kito, ka ver burukija riou re, viekokoano na kariano maka tai.

*Virakariano vou: Jokoluolu nene naio bar bulag nonovio kariano na yetemeriba*

<sup>23</sup> Tibe na, vite nalo na ña kulo lu nalo amiañauo bijaio, bogo nonovio monoka ala bunu rimeravo ea ñarabo sesa nalo nene. Mia yimo panpano lu nene, bija sano tenene nalo, nalo abe tena yetemeriba nei ga, ana juñabe ka vio lu nana be riano, napano Atua joaio ea vio mave? ?Naio bunu monoka ve jokoluolu tai na viekokoano na naio? Nao, naio bunu monoka burukija riou ka rila kiano saba nalo riviniu rive lu, vija bunu nalo na ñaaju aban eaio. Mia jokoluolu na vio lu na tiniabene naio maka tibe ka temeul nalo na ña amila jokoluolu kalo ea vio lu na yetemeriba nei, naio be jokoluolu tai na toru lie vo, a bo lie vo laka. <sup>24</sup> Ana burukija na jokoluolu nei naio joa Atua mirano ruei, bior kiado parinio toro lu Kristo naio ban ea vio lu nei ruei, napano maka ve vio lu na tomu nalo ga amiañaukanio, mia be vio lu na be riano, nina ea vio mave tiniabene.

<sup>25</sup> Mia bogo na mila kiano jokoluolu jibe na, naio maka tavukia nalo na ña parinio kulo lu dolu nalo amilaio. Nalo amila jokoluolu ka burukija na temeul nalo, mia naio mila jokoluolu ka kiano burukija bereio. Mia nalo, aba amila ea vio lu vaarakurano ga ka yuka nonovio, monoka mia ala tibena rivan ðañariga, ana naio mirñau ka nonovio vaarakurano ka bogo tai na ga, bisi, ana maka ka mia amiañauo ka bereio. <sup>26</sup> Ver Yesu monoka torña rila kiano jokoluolu tulaka rivior kariano nalo na ña tomu nalo ajumon ka ña amilaio, nina jibe

ka ber jikar ea tikariano na yetemeriba binimej bokar vonganei, naio jo jaklele ea n̄akolkolo ga, naio mijog bova ka napano kiano burukija jon̄a miou bogo nonovio ga.

Mia ea tiiano na Atua bitirilar naio maka tibe na. Naio mial jukuti na bogo nei rojua voniganei naio binimej lilie vaataro, ana na mila napano Yesu binimej miyotuba ka kito maka vesiou. Naio maluvo ka kito naruei naio mila jokoluolu ka nono kiano meuliano, mijil lar bajago na kariano. <sup>27</sup> Ea tivelinio na kito tomu nalo, Atua mila ka kito romeul ea yetemeriba, karina rava kovio denio karina romeul bereio ka ravan ea tibureiano, <sup>28</sup> mia ea tivelinio na Kristo, naio jibe na bunu. Naio binimej miyotuba ea yetemeriba nei, karina mila jokoluolu ka naio ka rivar vironiano na kiado kariano nalo, karina mia riyotuba bereio ve valuo nene, maka ka mia rivulu bulag kariano bereio, mia ka rivuru bulag kito den vironiano na kariano na kiado, na n̄a rabarkar tiniedo eaio, rojidom ka mia naio rimej rilarur kito.

## 10

### *Jokoluolu na Yesu kanano naio bo laka*

<sup>1</sup> Kito rosidomii von bereio tuboiano moruo na Mosis kanano. Naio ber saba novo nalo tealo tai, ana mia naio maka riverial nonovio ilivuiانو novo nalo na n̄a Atua naio jidom ka Kristo rila riyotuba ka kito, mila na tuboiano nei naio jibe ka vaiunu ga, maka ve niosunbue riano nene. Tuboiano moruo nei naio jon̄a beve torogio mugaruei jibe na, naio jiloglog ka kanano jokoluolu nalo, napano n̄a ajun̄a amilaio ka yuka nonovio, maka avare, maka ajikia ala rimeravo vatitigio rivu nonovio nalo na n̄a amila lotuano bijaio. <sup>2</sup> Aver tibe na, mia nalo nan̄a amila lotuano jibena, ŷeli mia nalo amei ameravo nonovio ruei na, ajog re bunu ka kariano joalo, ka na mia asidomii re bunu ka mia ala jokoluolu, mia makanio, amonmon ga amila jibe na. <sup>3</sup> Jokoluolu nalo na monoka ala ka ajog ka nalo maka ve kariano tai, mia makanio, yuka nonovio amialio ka napano jokoluolu nalo nei amila nalo ajidomial bereio vovaiانو nalo na kanal, ana amijog ealo ka niamiamo na kariano jo kia ealo vo napano ba bova lie vo. <sup>4</sup> Ajun̄a amijog jibe na bior kialo jidomiano tai jo, aber burukija na buruolu bue marauo ŷelina burukija na nani naio mijikia sekon bulag kialo kariano tum̄abe? Vite na, ajidom bitovitonia toru laka kanio, ban bano-o na abitidieio, kialo kariano jo keano vo.

<sup>5</sup> Ana bior tenalo na, bogo na Kristo riyotuba ka kito ea yetemeriba nei, naio berial kiano n̄arabo vou naruei. Naio midu iliano tai napano joa niosi na Iouano Lu, naio ber ka karaniانو Atua, naio berinavo

*“Jau maka bunu kosidom jokoluolu nalo a ijaiano nalo, mia jau komim̄auka batitig mokotenaku ka najamo ka vanso.*

<sup>6</sup> *Vite nalo na n̄aaju amisebio jijenio ba biniuviniu, jau komial bova ga, a ijaiano nalo na meravoiano na kariano, maka lele tiniem tiio.*

<sup>7</sup> *Karina, kiniou nojumolu neberial batitig banso, neber ‘Atua, kiniou najaaro ka nala kanamo sidomiano, nina ga kiniu nebinimej biorio, nina tibe ka ga napano Niosi Moruo naio berenio ber mia kiniou nalaio.’” Iouano 40:6-8*

<sup>8</sup> Mo bo ka kito rovitii vatitig rivu iliano na Kristo berenio nei. Vite na jukamu napano naio berenio, ber napano jokoluolu nalo bija ijaiano doldolu nalo na n̄a ajun̄a amilaio, be kurano ka na n̄a tuboiano naio berenio ber monoka alaio, mia Atua naio maka tom̄a rijog rivu kalo, mia naio maka bunu sidom ka mia alaio. <sup>9</sup> Karina, vite juo na n̄a Kristo berenio, berinavo naio mijamo ka naio naruei, ka naio rimej rila Atua kiano sidomiano.

Ea vio na, romial napano n̄arabo na jukamu na n̄a amila jokoluolu bior kariano, Atua midu lario ruei, kanano n̄arabo juo nene, naio jakii. <sup>10</sup> Ea n̄arabo vou nei naruei, Kristo naio mila jibe ka na Atua kiano sidomiano naio berenio, naio jian nonovio mokotenano, ana mila napano kito robinimej romeravo a robe lu ea Atua mirano, naio jo jibe na dam̄ariga.

### *Jokoluolu na Yesu kiano naio toboto*

<sup>11</sup> Kulo lu nalo na n̄a ajun̄a amim̄au ea bajago moruo, monoka ve tealo na n̄a legiano nonovio ga atumolu atua Vio Lu. Nalo ajun̄a amila jokoluolu sesa nalo dam̄ariga, napano abe vevirare ga bogo nonovio. Jokoluolu nalo nei ajun̄a amila bior kariano na tomu nalo ajun̄a amilaio, mia maka lele ajikia avare ka avar bulag bajago na kariano den tomu nalo kialo meuliano.

<sup>12</sup> Mia kiado parinio toro lu nei Kristo, kiano jokoluolu naio maka tibe na. Naio mila jokoluolu ka kiri vite takurano ga bior kariano nalo nonovio, mia naio mila vaarakurano ga, ana bogo napano mila bisi, ana naio ba jotano mave ea tivelinio vameruo na Atua. <sup>13</sup> Atua naio mial Yesu ka mila jibena, berenio ber mia rivar Yesu

kiano uolu nalo, rudulo atutano ka naio tibe ka yebe tai napano bijankon jaano eaio.

<sup>14</sup> Maka ver iñauano dolu tibe na ka Yesu monoka rila, bior ka napano naio jian ijaiano ruei, kiano burukija mila kito romeravo, vonganei robo ea Atua mirano ruei, rivanvano-o mia ribisi deio.

<sup>15</sup> Niununo Lu bunu naio miasol iliano ban kito ea vio na, ea iliano tai nanua binimeiea naverialiano Jeremaia. Ea iliano nene Atua naio ber jibe nei berinavo

<sup>16</sup> *“Ana vonganei mia kiniou nevitirilar virakariano vou tai vija kanaku tomu nalo bereio.  
Ea virakariano nei, mia nala tibe nei. Mia nodu vatitigio kanaku tuboiano nalo atoa kanalo jidomiano nalo, mia nevitautia kanaku iliano nalo toa kanalo iviso nalo.” Jeremaia 31:33*

<sup>17</sup> Atua naio ber jibe nei, ana ba lie telisu ga naio miasol bereio, naio ber jibe nei berinavo

*“Mia kialo kariano nalo, vija kialo vovaiano nalo, mia nosidomialo re bunu.” Jeremaia 31:34*

<sup>18</sup> Iliano nei naio berial buruñara viekokoano napano Atua naio mila ban kito ruei, ana ver tibe na, ve re ijaiano dolu bereio napano romijikia resian ka rivokar viekokoano rivior kiado kariano ðelina kiado vovaiano nalo, bior ka napano Atua naio mila batitigio bo ruei.

*Kito romerou re ka rava vaataro kean Atua*

<sup>19</sup> Kuruaku nalo a kuvivineku nalo, jibe ka na ña iliano nalo nei aberenio, Yesu kiano burukija betavo ea kiado ñarabo ruei, naruei bo ka romerou re ga, mia resel ea naio rava joomo ea Vio Lu napano Atua joaio. <sup>20</sup> Beamu, buruñara jagidago na jaklele ko kanado ñarabo, mia Yesu mokotenano naio buruñe, jagidago nei bunu buruñe niati juo, naruei naio betavo ka kito rava joomo. Vonganei kito rojua ñarabo novo nei naruei, napano be ñarabo vou tai, a be ñarabo na ban kar meuliano.

<sup>21</sup> Naruei Yesu naio mila kiado ñarabo ba joomo ea vio lu jibe nei, naio binimeiea kiado buruñara toro lu, napano bitikar kito nonovio ea ñaratavo na Atua kanano.

<sup>22</sup> Kiano burukija naio milakon niamiamo na bova napano ju joomo ea kito, kiano uei na meravo novo naio jekon niabedo binimeiea meravo nonovio, ana maka bunu roimou, mia romijikia rava joomo. Romijikia rava vaataro kean Atua napano kiado iviso be riano, rotu sikili laka ea naio rober mia naio rivuku bulag kito re, ka na mia naio rila vorvoruano van kito ga.

<sup>23</sup> Kito romijikia romonmonea rivu vatitig ka mia Atua rila rivu tibe na van kito, bior

damñariga, naio joña mila memedu ga ea venia napano ña naio berkario. Kito maka bunu rosidom dede kanio, mia robokar batitig iñauano na ka roverial van kulo dolu nalo vite novo nei na ña naio milaio ban kito. <sup>24</sup> Ana ea tivelinio ka kito bereio, bo ka rotu rosidomii vatitig rivu, roseravo ñarabo na tutuliano na kiado jidomiano nalo ka tiniedo tii kito rivu lie, a ka ralala iñauano novnovo nalo van kito rivan lie tibe na. <sup>25</sup> Maka rivu ka kito rotuvan bajago na reiasosol vatitig kito rivu, tavukia na tealo ajunña amila ruei, mia bo ka na kito rotuñia rotunukakar kito tulaka damñariga. Bajago novo nalo nei monoka rotuñia rala van kito damñariga, ana ver bogo tai kito reial ka bogokouo na legiano na maaro atu vaataro, bo ka rovu ka kito tibe na damñariga lie vo.

*Kito rosidomii kurano re ka Atua kiano tibureano*

<sup>26</sup> Bo ka kito rovika vikadeniano ea tivelinio na kito napano robokar jikiaiano nalo na ilirianiano ruei. Rovika tibe na, rover ver kito rotovon re, rotumolu rotuñia rala tanea kariano lie, mia tumñabe ka kito? Sano verdoþeiano nene, naio jibe nei, ka kariano nalo na jibe na, maka bunu ve jokoluolu tai napano mijikia rivar bulagio bereio. <sup>27</sup> Venia napano ga jo, nina Atua kiano verikariano ka mia sian vironiano na jikili riviorio, vija buruñara jeleiþ sebi napano mia sisen nonovio kiano uolu nalo. Naina be vite na merouano toru laka na. <sup>28</sup> Ea tuboiano morou na Mosis kanano beamu, ver toro tai rila korov iliano nei tai, mia tomu ve juo þelina ve tolu bereio avirokarlo ka be riano, ka toro na mila jibe na jibe na, mia ve re bunu ñarabo na tinieiano bereio, mia toro nene mia atelar kiano meuliano ve vaarakurano ga. <sup>29</sup> Ver ala tibe na ka toro na mila korov Mosis kiano tuboiano, mia tumñabe ka toro na bilig taakano ka Atua kenerinio? Mia kanano vironiano naio ve burutomoluo laka na, bior naio mila lelan burukija na virakariano vou napano beamu mila naio meravo ruei ea Atua mirano. Mia Niununo na tiniememiano naio rijog rivova ka bajago na mia naio tinien ser ñlelea toro na ña mila. <sup>30</sup> Mia monoka naio rudu vironiano nene bior Atua naio berkario jibe na ruei. Kiano iliano lu tai naio joa niosi na tuboiano morou, napano naio ber jibe nei, naio berinavo

*“Ka tibureiano na kariano, be kanaku kiniou ga takurano.*

*Nesian meran sikili mia sikili rivior kialo vovaiano nalo.” Tiut 32:35*



Ana ea vio nene kia ga vo iliano dolu naio ber jibe nei bereio, naio berinavo

*“Mia Atua sofi naio tibure kanano tomu nalo.”* Tiut 32:36

<sup>31</sup> Kito monoka rovitikar vatitig rivu, bior toro na nã milala kariano, ka bogo na adu naio toa Atua jumãano ka rivitii naio, naina maka ve tena telisu tai, mia naio be tena merouano memedu.

*Bo rotu sikili ka roviniua venia na mia rijikia rimaluvo iorou*

<sup>32</sup> Kito maka rejikia ka mia tumãabe ea legiano nalo na aju abinimei, mia bo ka rotu rosidomial m̃arabo novnovo nalo na nã Atua mijaja kito kanio ea legiano nalo napano abarlaka ban ruei. Bogo na kito romiyotuba ea miamoiano nanua beamu na, maka vesiou ana romidu bogo na jikili laka, napano aju amila kirivova ban kito napano romonea Yesu. <sup>33</sup> Bogoti tealo, kamu ea tomu nalo miralo, abuku iliano na bova ban kito, bogo tealo aifele tanea kito ea bajago va nalo napano kirivova-o mia kirivova. Ana bogo tealo, maka rivan kito mia amila ban kanado bilbilu nalo, ana robano rejikili roju bijalo, romijailo.

<sup>34</sup> Kito tealo, abukulo aban ea yimo na lakoiano, ana tiniedo mialo toru laka, roju raba romilavon ka rejailo ka ravar bulag kanalo burumãara jogvaiano napano aju abiniua ea vio nene. Ana bogo tealo bereio, nalo na m̃a ajerni ka kito abinimei kar kiado saba nalo, ka avar bulavulag lelan kito, be burumãara laluvuiano ea kito laka. Ana ka bogo na, mia tiniedo serlo re, rajamo ka ga, bior be saariano tai napano joa kito, ka vite nalo na abar bulagio abe tena yetemeriba nei ga, mia kanado tonovnovovo nalo napano abo laka aju, napano maka ajikia avakovio bogo tai, mia ave kiado bo kano.

<sup>35</sup> Naina naruei burumãara kanado vulaviano napano mia Atua naio sian van kito, ana bior ka ijaiano novo nei naio jokamu ea mirado, maka rivu ka ralaluv bereio burumãara jikiaiano riano napano joa kito ruei, <sup>36</sup> mia monoka rotu sikili damãariga ea Atua. Kiado jidomiano monoka ve tebievi rivu ka rotu rala naio kiano sidomiano nalo, ka mia romijikia rovokar vite nalo na nã naio berkario ban kito. <sup>37</sup> Ana bogo na ka rovokario, p̃eli mia ve sio re ga na mia naio riyotuba ka kito, tavukia na Atua kanano iliano tai napano naverialiano Abakuku naio berialio, napano naio berinavo

*“Bogo ve telisu kija bereio, ve sio re ga na, mia toro na toru nei napano ka mia*

*rimei naio maka rijikia tuliliei va lie vo, ana mia naio riyotuba.*

<sup>38</sup> *Ka bogo na, kanaku tomu na memedu nalo mia amijikia ameul rivu ga, bior ka na nã amonmonea kinioi,*

*mia ver neial nato tai kalo na maka asidom kinioi, vurudidig naio, mia kanaku iviso risaaro re ka naio leleio.”* Apakuk 2:3-4

<sup>39</sup> Ana naina maka ve kito nei. Kiniou Maka ve tinieku ka kito ka kito tomu kinkin na nã romerou ka Atua. Nalo na m̃a aburu didiglo jibe na, mia monoka ava kovio mia kito, tomu na nã roju jikili ea naio, mia monoka ravokar meuliano.

## 11

*?Viekouoiano naio be venia?*

<sup>1</sup> ?Kiado viekouoiano nei, mia roverenio naio be vite venia? Romijikia roverenio naio be bajago na romonmonea vatitig Atua rivu sikili, ka naio mijikia rila kiado jidomiano riluo rivu ea naio ga, mia mijikia rila kiado moneano tu sikili ka rover vite nalo na nã maka rejikia realio, abe riano aju. <sup>2</sup> Viekouoiano naio be burumãara vite laka ea Atua kiano vitiano. Jikario ea kanado tormoruo nalo na beamu binimei, nina be m̃arabo takurano ga napano Atua mila ka naio rijikia saaro ka tomu nalo. <sup>3</sup> Bajago na viekouoiano nene naio naruei mila kito robitilubar ka be riano, Atua kanano iliano ga naio jii vite nonovio, a naio mila kanado yetemeriba miyotuba. Kiano moroano naruei midu vite napano toro maka rijikia rialio, m̃imãauka vite nonovio na nã roju robitii joaio.

<sup>4</sup> Bo ka kito rosidomial korobido nalo tealo, ka jumãabe nalo bunu abalea Atua bogo na beamu.

Nalo tai be tormoruo Epel. Ea kiano viekouoiano ea Atua, naio milotu ban naio ka ijaiano tai napano memedu, ana Atua jaaro ka rijeivio, naio mial bo loa ka ijaiano na kuruanu Ken naio jiano. Mia Ken tinieno mimi, ana naio muetamãaria kuruanu nene, mia Epel kiano bajago bo na viekouoiano ea Atua, mila Atua mial naio be toro na memedu tai, mia vite nei mijikia rija kito rimei rivokar banei keana vo.

<sup>5</sup> Tormoruo dolu, naio be Inok. Ea kanano viekouoiano ea Atua, naio maka rivokar m̃ariano. Naio be tormoruo laka ana Atua ga naio binimei burulario jaluvo den yetemeriba nei, naio bavin mave, ana ajiravo naio mia maka alealio. Atua mila jibe na ka naio bior jibe ka na nã aju aber, ka bogo na naio joa yetemeriba nei, naio be toro novo tai na nã Atua naio jaaro toru

laka kanio. <sup>6</sup> Be riano, ver viekouoiano ea Atua naio toa re kito, maka rejikia rala ka na mia Atua naio saaro ka kito. Toro kei napano naio jidom rijikia Atua ea kiano meuliano, jidom rimej vaataro ka naio, monoka riviekouo sikili ea naio tibe na. Naio monoka rimonmonea ka be riano laka, Atua naio jo, a monoka rivarkar tinieno eaio ka mia naio rila rivu laka van nalo na m̃a ajum̃a abitikar naio.

<sup>7</sup> Tormoruo tai bereio naio be Noa. Ea kiano viekouoiano ea Atua, naio mila venia na m̃a naio berkario. Atua berial burum̃ara ueimiya nei banio, ana bogo na Noa naio maka rial kijokijo na tenei tai leleio vo, mia naio mila ga venia napano Atua naio ber kanio, mim̃auka burum̃ara kanalo uako ka sano m̃aratavo nene amijikia ameul eaio.

Noa kiano viekouoiano na ea Atua mlarur nalo nene, mia mila bunu burum̃ara vironiano maluvo ka nalo dolu nonovio ea yetemeriba nei, bior nalo maka amonea. Mia Noa be nalo tai ea taara nei na m̃a amonea Atua, ana Atua milalo amemedu ea mirano.

<sup>8</sup> Dolu, naio be tormoruo Epraamo. Ea kanano viekouoiano ea Atua, naio monea naio batitig bo, naio jumolu den vio nanua naio joaio, naio ban ea vio dolu tai, napano Atua berkario ka mia rudu vanio. Naio jo miel ban ea vio nene, maka rijikia ka naio jo ba be na, mia bior Atua bio naio, naio ban ga. <sup>9</sup> Naio miel banbano-o mia bogo na naio miyotuba keanio, mia naio javukia ga valauo tai, mia buruvenuo nei naruei napano Atua berkario ban naio. Ana naio jom̃a buru kunuano panpano ea vio nene, naio joaio naliko kanano m̃aratavo nalo, jibe ka kenerinio nalo napano Aisak nalo bija kumabinio sesa nalo, napano Yakovo nalo, napano nalo bunu aborkar borotano nei nanua m̃a Atua naio jian banlo ka ve kanalo tobo to. <sup>10</sup> Ana Epraamo naio boru ea vio nene, naio joaio, mia naio maka rim̃auka m̃ano yimo na toru tai, naio jom̃a mon ea ga yimo panpano nei ga. Naio ga bior ka napano naio monmonea ka maka ve kiano vonuo riano vo, mia naio jo ga jibe na, ka mia riva jouro ea burum̃ara komeli na Atua kanano, napano Atua naio bitirilario a mim̃aukanio bija kanano burupati na jikili napano mia maka ajikia avurukorov bereio bogo tai.

<sup>11</sup> Tai bereio, naio be tiramoruo Sera. Ea kiano viekouoiano ea Atua, naio be m̃abono ka kenerinio motoru neibano Aisak. Beamu, naio maka rijikia rivar kiritete banbano-o binimej be tiramoruo, mia naio biekoju jikili ea Atua ka mia Atua rive riano ea kanano verikariano van naio vija kanano tormoruo Epraamo,

ka mia naljuo avar kenerilo tai. <sup>12</sup> Mia tormoruo Epraamo nene bunu, jibe ka m̃nerenio batove ruei, mia kiritete neibano naio bario mila na kanano m̃aratavo nalo binimej telabo. Karina abar sosolilo batove binimej jibe na banbano-o na kanano yati nalo abinimej miroano javukia m̃arvitano nalo na vio iauro, maka bunu ajikia avulukulo ajavukia kurukuti yono na koyou ea tei. <sup>13</sup> Mia tormoruo nalo nonovio nei na m̃a amonmonea Atua jibe na, mia Atua naio berkar tonovno nalo banlo, mia nalo amijev togio telisu ga, mia am̃ar̃m̃aro ajaluvo den yetemeriba nei. Mia nalo amijikia ka mia Atua rijej togio ga vanlo, mia sian nonovio togio na toru nene vanlo iorou, naruei naio mila abitulubar ka nalo abe valauo ga ea vio nene. <sup>14</sup> Vio yetemeriba nei naio maka ve kialo vio rimemedu, mia kialo jidomiano jua kialo vonuo riano tai. <sup>15</sup> Ana ver vio neibano ajum̃a ajidomii m̃elea, naio be buruvenuo nei napano beamu ajuvanio abinimej, ver nalo asidom, amijikia avarp̃iliglo avan ea naio bereio ga. <sup>16</sup> Ana makanio, mia nalo maka atu tinielo rimaio ka naio bereio, nalo ajum̃a ajidomii ka mia avokar vio dolu tai napano naio bo laka, ajidom vonuo na vio mave ga. Atua naio mila batitig kanalo komeli novo nene ruei, ana naio tinien jiilo toru ka rijog ka na mia atum̃a averenio ka naio be kialo Atua riano, a napano ajum̃a aber kiano vonuo, naio be kialo vonuo dam̃ariga. <sup>17</sup> Ana ea tivelinio na tormoruo nalo nei keana vo, kito rover tormoruo Epraamo bereio, naina ea lavoniano kouo napano naio biniauio. Ea kanano viekouoiano ea Atua, naio mijamo ka kenerinio takuranolar ga nei Aisak, naio mijamo ka mia rila jokoluulu ka naio bereio. Naina be Aisak nene nanua beamu, Atua naio berkar jikili ban karam̃ano, naio berinavo

<sup>18</sup> *“Riyotuba ea kenerimo na mia kanamo bajulukuti nalo amei ve miroano.”*  
Jen 21:12

<sup>19</sup> Ana ka bogo napano Aisak vaataro ka naio rim̃aro, Epraamo naio maka vitovtonia ea Atua kanano verikariano nei, mia naio jo monmonea ga ka ver naio monoka ruebin kenerinio nene rim̃aro, mia Atua mijikia rila naio rimeul bereio. Ana Atua mial kiano viekouoiano ea naio be riano jibe na, ana Aisak naio maka bunu m̃aro, mia karam̃ano naio mial ka napano Atua mila kenerinio kiano meuliano ban ea jum̃ano bereio.

<sup>20</sup> Mo be tormoruo nene tai bereio, naio be Epraamo kenerinio Aisak. Ea kiano viekouoiano ea Atua, naio jian kiano iliano na maaro ban kenerinio juo nei Yakovo naio Isau, naio monmonea ka mia iorou

ana mia ilivuiano rimei ea naljuo tibe ka ga napano naio berkario banlo.

<sup>21</sup> Ana Yakovo nei bunu naio jibe na. Ea kiano viekouoiano ea Atua, mia naio barkar tiniene ea naio ka mia naio rila rivu van kiano bajulukuti nalo na mia amei iorou. Naio bar kenerinio nei Yoseve, ana Yoseve nene naio bar kenerinio nalo juo. Ana ka bogo titai, bogo napano vaataro ka korobilo tormoruo Yakovo nene rivakovio, mia naio jumolu ka kiano nasitogo naio jurubanini ka parinio naio milotu ka Atua, ana naio berial kanano verikariano na ilivuiano ban kurnabinio sesa nalo abiniu.

<sup>22</sup> Karamalo tormoruo nei Yoseve, naio bunu bo ka rosidomial naio. Ea kiano viekouoiano ea Atua, naio monmonea jikili ka mia Atua tuvan re kulo Israel atubo ea vio Ijivi, mia naio rivuru bulaglo avan bereio ea kialo buruvenuo rimemedu. Naio berial jibe na, ana bogo napano kiano meuliano vaataro ka ribisi, naio ber bunu ber, ver naio rimaro mia ativin re naio to Ijivi, mia monoka adu riva ativin toa kanalo vio.

<sup>23</sup> Tai bereio be tormoruo Mosis, kanano tormoruo juo nene. Ea kanalo viekouoiano ea Atua, naljuo maka amerou ka parinio tubo Vero kanano tuboiano na kirisikili nei, mia bogo na naljuo nene kenerilo Mosis naio moluo, amial naio kirinovo tai vo, ana maka ajamo ka naio ka auebinio, mia amidu van batitig naio jo banbano-o bokar siberio tolu.

<sup>24</sup> Ana Mosis nene, naio bunu, bogo napano naio miluo bavin naio toru ruei, naio bunu be toro na moneano. Ea kiano viekouoiano ea Atua, naio maka sidomii melea ka sio novo na amidu banio jibe ka parinio tubo Vero kenerinio vevinio kenerinio, <sup>25</sup> mia naio jidomii temi laka ka kiano bajulukuti dolo nalo, tomu nalo na abe Atua kanano m̄aratavo. Naio juva vonuo na tor na toru kanano, bija yetemeriba nei kiano bajago nene nalo, napano kanano saariano nene naio be tena banej ga, ana naio ba miasol kanano tomu nalo, ea meuliano na bogokouo napano m̄a kulo Ijivi nalo ajum̄a amila banlo.

<sup>26</sup> Ea bogo na, naio jon̄a bitikuku ilivuiano nalo napano rijikia rimaluvo kanio, ea bogo na jo binimej iorou. Naio bitii ka ver naio jo bar jogvaiano bijalo bior Naverikariano kiano in̄auano, naio bo loa ka naio rivar kanano tonovno nalo ea kiano meuliano na monmaio ea tor na toru na Ijivi kunuano. <sup>27</sup> Ea kiano viekouoiano ea Atua, naio maka rimerou ka venia napano parinio tubo Vero mijikia rila vanio, mia juvan vio Ijivi, jibe ka napano Atua ber kanio. Naio maka bitikar Atua mirano, mia naio jon̄a monmonea ka ga jibe ka napano naio jon̄a bitikar

naio ka mirano memedu ga. <sup>28</sup> Bereio bunu, ea kiano viekouoiano ea Atua naio bokar batitig m̄arabo na ioruriano napano Atua ber kanio, ana naio mila kiano tomu nalo aṗiligvilig burukija na nunu ea kialo m̄aratavo, ana bogo napano Atua naio miila kiano nailiano na m̄ariano binimej ka rudu vironiano van Vero, naio bar laka jel mave ka kialo vonuo nalo, mia naio ba muebinvin nonovio kiritete motoru ea vonuo nonovio na ea vio Ijivi.

<sup>29</sup> Ana iorou ka naina kulo Israel nalo aburo den Vero, amiel aba abokar tei napano be Teimia. Ea kialo viekouoiano ea Atua, abarkor aba tivelinio ea burum̄ara tei nei, amiel aba jibe ka ga na m̄a amiel ea borotano ga. Mia nalo na Ijiviaju abinimej iorou kalo, naruei nalo amilavon ka aiel avarkor tibe na bunu, mia burum̄ara tei nei naio binimej miasol bereio, miladomdomlo an̄ar̄m̄aro nonovio. <sup>30</sup> Ana bogo napano kulo Israel nalo amiel aba lie vo, aba aboru ea burum̄ara komeli na vio Jeriko, bija kiano kulo na mira nalo napanoaju jouro ea kanano burum̄ara tagvoru napano burutomormoruo napano amivon be puruveru jeliviv. Ana ea kialo viekouoiano ea Atua, kulo Israel nalo amiel abulan jaalo jeliviv ea komeli nei ba bokar bogoti ari, banbano-o bogoti aluo nene, amialio ka napano Atua mila tagvoru nalo nei ajibirbili vaarakurano. <sup>31</sup> Ana na jouro ea komeli nene, be tira tai napano juo, napano beamu naio be tira na m̄arabo, siano be Reavo. Beamu tomu juo na Israel amilalo ka ava aviti venalulua kulo Jeriko kialo vio, nalo abano ajaloku jouro Jeriko, ana bogo napano ajaiao, tira nei milavanlo ajua kunuano, naio miija tomu juo nei toru. Mia nalo, aba amila ea vio lu vaarakurano ga ka yuka nonovio, monoka mia ala tibena rivan dam̄ariga, ana naio miṁau ka nonovio vaarakurano ka bogo tai na ga, bisi, ana maka ka mia aiṁau ka bereio.

<sup>32</sup> Naina naruei be kiado tormoruo tealo napano abe burupati toro na viekouoiano re nua. Mia romijikia rava lie vo, bior ka sio miroano ju keano vo, javukia tormoruo nalo nei Kition, Barak, Samson, Javta, bija parinio tubo Teviti bunu a Samuel bija naverialiano dolo nalo, mia namial jibe ka bare beamu vo, maka bunu ve bogo na rovitauia bulag kialo tukunuano nalo riviniu riveve terakurano. <sup>33</sup> Be riano keana, ver romijikia rojog tukunuano nalo nei ga, nalo bo mia bo. Ea kialo viekouoiano na ea Atua kiado tormoruo nalo amila burum̄ara vite nalo telabo. Reialio ka napano amila mira, ajovulu buruvenuo dolo na jikili, amila napano tomu na vio ga nalo monoka aiṁau takii tuboiano

memedu, mia ajikili ka avokar venia napano amijikia ka Atua naio berkario banlo. Kulo dolu nalo abukulo aban ea bulukuŝili na laion ka aserlo, mia maka ajikia aserlo. <sup>34</sup> Mia abukulo aban ea burumŕara kenieno sebi na, ana mia maka rijikia sisenlo leleio. Bogo tai ana abiniua iobogu na mira, mia aburo denio bo ga, mia bogo tealu uolu nalo amila kikilo banbano-o na kialo moroano batove, vaataro ka ribisi. Ana iorou kanio, ana amial ka napano abavin bereio, abinimej jikili laka, naruei amila mira ka kialo uolu na ea buruvenuo dolu nalo, banbano-o na ajovulu lo, amijil bulaglo aban bereio.

<sup>35</sup> Nalo tealu kalo amŕarmŕaro ea bogokouo nei, naruei koalo nalo ajumŕa ajiglo toru, mia amiilo ka napano Atua jian bereio niunulo banlo, bar bulaglo ameu bereio. Nalo tealu bereio, uolu nalo amila jaleleano telabo ea mokotenalo, a amilavonlo ka ver aber maka bunu amonea ga Atua, mia nalo atuvanlo avan bereio. Mia verver nalo aber kaaju amonmonea, mia ala kilkil ealo liei vo.

Mia ea bogo na, Atua kiano tomu nalo aberver ver nalo ala sikili liei kalo, mia bo ga, mia nalo maka ajikia atuvan kialo Tubo. Nalo tinielo maio ga ka bogo na mia naio rilalo asikil atu bereio, nalo ajidom asikil atua mirano napano asaaro, a nalo aimou re bunu kanio. <sup>36</sup> Nalo tealu amiorakarulo ana abitivlo ea vio medave kamu ea tomu nalo na mŕa aju amilkuei kalo mŕelei. Mia nalo tealu, bogo na amiorkarulo, nina ea mŕarmieni na terem, naruei abukulo bijaio ban ea nalakoiano. <sup>37</sup> Tai bereio, ajubabinvinlo ka puruveru, a tealu abijikorov mokotenalo beve juo ka so, a tealu ajebinvinlo ka iobogu na mira. Nalo napano ver maka amŕaro, nalo bunu vite nonovio kirisikili banlo. Nalo maka ve kialo titai, jumŕalo bulati laka, naruei amijulu bulag kulukuti nani ŕelina nunu bunu ka mia mila niabele bitunu, mia vite nonovio bova ga banlo julaka ga, mia tomu dolu nalo maka aialerinio ealo, amila lelanlo toru laka. <sup>38</sup> Nalo na maka ve kialo vonuo, maka ve kialo vio na mia avan eaio, naruei amiel janea vio nalo na be teauo ŕelina ea burusuku, aju janea buluvai nalo.

Nina be tomu na viekouoiano nalo, nalo ajibe na naruei. Yetemeriba nei naio bijuku bova toru kalo, jibe ka napano romijikia roverenio roverinavo yetemeriba nei naio maka bunu rivare ka kulo novo nalo na jibe nei atuaio, tomu nalo nei bo ka atua ga kanalo vonuo na jo mave. <sup>39</sup> Romial ka nalo nonovio napano roberilo ruei, abiniua bogokouo telabo laka mia maka

ajoru, aju jikili damŕariga, mila kito robitii kialo viekouoiano ea Atua naio burutomoruo, a be riano. Nalo abe tomu na virakariano moruo na beamu ga, ana ajumŕa amijog Atua kanano verikariano novo nalo, ka mia naio rila mŕarabo na ka mia ajikia avokar meuliano napano maka ve jukuti nene tai, mia maka aial mŕarati na verikariano nene maluvo keanlo.

<sup>40</sup> Mia Atua naio jo bitii boka rila mŕarabo vou tai van kito. Mia naio miila Yesu binimej mila kiano imŕauano bisi, mila na nalo na beamu nei, bija kito, kito nonovio robar mŕarati na Atua kanano verikariano nei ea mŕarabo takurano ga a ea bogo takurano ga.

## 12

*Rovitii Yesu ga, ka naio jikili juvulu bogokouo nalo*

<sup>1</sup> Mia nalo nonovio napano roberilo ruei, nalo ajibe ka burupati tormoruo nalo na burumŕara viekouoiano, napano be kialo burumŕara taara na ajumolu ajumŕa amial kito, naruei ajumŕa abitii kanado viekouoiano ka kito rejikiti jumŕabe. Vite venia na mŕa monko kiado mŕarabo, monoka rovukulario, a kariano nalo na mŕa abivikakar tanea kito, monoka ravar bulaglo, ka mia ve ŕirido ka retikiti ea burutuli mŕarabo na tebievi na jokamu ea mirado, ka na jidomiano na tuviano maka toa kito leleio, mia kiado jidomiano ve tebievi ga rivu.

*Sirarago ka Yesu ga*

<sup>2</sup> Kito rovuku mirado ea Yesu sikili, napano mŕa jikili ju ea juluvati mŕarabo iako. Naio be burupati mŕarabo na viekouoiano, a naio be jukuti nene, mia bogo na tinielo maio ka naio, mia naio rije moroano van kito. Romijikia rosidomii jumŕabe ka bogo na mŕa naio jomŕa bar niabejalele nalo a mijog kirivova mave ea mŕakolkolo, naio jidom bea ga ka bogokouo na naio jo binuao. Naio midu kiano jidomiano jo jikili ea burumŕara saariano napano jokamu ea mameriniano, rivanoo mia naio tovuilo, napano vonganei naio jomŕa jotano ea Atua jumŕano vameruo, ea kanano vio lu napano loa laka tiniabene.

<sup>3</sup> Mia bo ka rotu tiniedo rimaio ka Yesu, ea bogo na tomu na bova nalo nei ajumŕa ajuba naio ka iliano na bova nalo, a tinielo jer mŕelea naio jibe na, mia naio mijamo ka naio ga ba bokar jukuti nene. Jibe na, kito bunu bo ka tinielo rimŕaro re soŕeli ka imŕauano, maka rejikia romerou, maka rosidomii ka mia rovuro ka venia napano monoka ralaiio. <sup>4</sup> Peli roberianŕa romijog bova ka mŕa romila mira ka bajago na bova bare, tiniedo mŕaro, mia kito maka rovakar

vo venia naña Yesu milaiio, maka rotuko vio ka kariano-o mia sado burukija riiou lele niabedo kario. <sup>5</sup> Mia bo bunu ka maka tiniedo ribobogia iliano na tunukakariano na karamādo Atua naio ber ka kito, na naio bio kito jibe ka robe kenerinio, napano naio berinavo

*“Keneriku, ver kiniou neial rivu ka jog-vaiano tai rimei rivokarso, mia jau keiakurano ea re,*

*ĵeli na ver bogo tai neial ka monoka nodu vironiano vanso, mia kanamo jidomiano rijoru re,*

*bior kanaku bajago na mia mā nover-loglogso kanio naio jibe na naruei.*

<sup>6</sup> *Ver nalo na mā kiniou tinieku ĵiilo, bogo tealo monoka nalalo ajog rivova, a nalo na mā nebe karamālo, mia bogo tealo monoka nevitivilo.” Ilimasou 3:11-12*

<sup>7</sup> Tibe na, ver bogo tai jau keial ka jibe nei banso, mia monoka kodu ga tibe ka mārabo tai napano Atua naio jidom ka mia riverloglogso kanio, naio jidom rivuririi kanamo meuliano. Kito nonovio na mā robe teta, roju mā romila jibe na ka kenerido nalo, naruei ver Atua rial kito tibe ka kenerinio, naio monoka rila tibe na ka kito bunu. <sup>8</sup> Tena be kiado ka mia kito rovinu rovoĵar, mia ver rila re ka kito tai, tibe na mia naio rial toro na tibe ka maka bunu memedu ka ve kenerinio, mia be tete nalo na karamālo toro dolu na kovio tai bereio. <sup>9</sup> Mia beamu, kito robinu, bogo na karamāno aĵurña amila vironiano ban kito, maka rosidomio, be riano, voniganei robitilubario ka nalo amemedu ga, mia mila na rabamenealo loa laka. Tibe na ana bo ka ravatove ka niunudo na naio be karamālo, rasaaro ka venia na naio mila miyotuba ka kito, bior naina naruei be mārabo na meuliano.

<sup>10</sup> Karamādo nalo aĵurña amije vironiano ban kito ka yuka nalo na mā robe kiritete kia ga vo, amila jibe na ka ajidom aber mia rivu kalo bereio, mia bogo na Atua midu vironiano ban kito, naio mila ka mia rivu lie van kito vo, ka mia kito bunu roĵikia rovoĵar kiano meuliano lu. <sup>11</sup> Vironiano naio be titai na ka bogo na ravario, mia naio maka sese leleio, naio mijeja laka. Mia iorou kanio, ver kito rajamo ka naio riverloglog vatitig rivu kiado meuliano, mia naio rivar sano mārati na bo, napano bajago na melumiano vija tuĵaroano, vija bajago na be lu a memeduano. <sup>12</sup> Tibe na, be kurano ka venia na mā kubiniualo, mia kamiu kuvila von ka kuvila tavukia na mā naverialiano Aisea naio ber beamu ruei, na mā naio berinavo

*“Kuvitiri bulag jumemiu na mā melukluku jaklele, kuvilalo aikulkulu bereio,*

*a sudu jaamiu na mā aju amemebiju na, kuvilalo asikil bereio.” Ais 35:3*

<sup>13</sup> Jibe na, kamiu bunu kuvila kenemiu mārabo nalo amemedu rivu, ana kenemiu jaba nalo napano amiel jakio, mia jaalo riva rivova lie re, mia amijikia amei asikil bereio.

<sup>14</sup> Vite juo na mā rataĵi ka rovoĵar tulaka atibe na. Tai, naio bajago na bilbilu na bo vija kulo dolu nalo, a tinene, naio be bajago na meuliano lu na mā toro monoka toaio ver naio jidom rial Atua na loa laka mirano. <sup>15</sup> Ana monoka kuvināuka ināuano mēle ka mia ve re kamiu tai tikiti mia rijoru rimebi ea mārabo togio, napano maka rivokar Atua kanano tiniemiano vo. Kuvitkar vatitig bunu rivu ka kiri pati na mijeja tai na telisu ga rimei re ka rivijurukar kiamo iviso. Verver makanio, bisi mia riluo rivar mārati na bova nalo ve telabo ea kiamo meuliano, a napano ni-amiamo nene rila niegeniege namoneano lu dolu nalo kanalo meuliano na bo nalo.

<sup>16</sup> Monoka ve re bajago va na suĵano vija tira rimonea kamiu, a monoka ve re bajago na tiniel ribobogia batitig Atua, tibe ka Isau re nua naio milaiio. Isau nene, Atua bi-jauialario be motoru na karamāno ka mia mijikia rivar nonovio kiano jajurĵano, mia ka bogo tai ana naio ĵijero, mijugun bonoti vaatei na bo, napano kurano maratoru Yakovo naio jonio, ana naio ĵilivililar ka Atua kanano tiiano na kiano meuliano, berika kurano ber “Ei kodu vaatei nei van kiniou voniganei ga, a teta jajurĵano napano kanaku, mia nesian vanso.”

<sup>17</sup> Ana jibe ka kito romijikia ruei, ka iorou kanio ana Isau naio berenio mia rivar bereio kiano jajurĵano nene, mia aberbureio ga, bior ka naio ĵilivililaro ka ruei. Mia naio mijog bova o-o jidom riviligio, jeĵi mia kiride ga. Naio jidomii bereio, ber ver naio rila re ga, ana bo, mia voniganei bano bisi.

*Sinai burusuku na yetemeriba, bija Saion burusuku na tiniabene*

<sup>18</sup> Bo ka kito rosidomii ve telisu kija bereio ka tivelinio na tuboiano moruo na beamu vo, rivija Ioluanu Vou na bo na Yesu kanano napano binimeĵi voniganei. Vite juo nei abe dolu laka garuei, mia vite nei kito romijikia rovitilubar ea salo burusuku nene ve juo.

Burusuku na tuboiano moruo, nina naio be burusuku Sinai, napano ea yetemeriba nei ga. Kiado tormoruo Ju nalo amijikia amialio ka miralo, naruei amial ka naio be buruĵara jeleĵio vio na miroano, napano

sebi joaio, a be bolu nene napano vio nene kiri bobogio ga, bija kiano suku nalo napano melijokouo jovukoio jo, mia jegi tai napano joma miuvuvu jan eaio. <sup>19</sup> Mia kiano burumãara pasimeduo miaga m̃leia, mia amijog jooon tai mil napano kiri temi kar ga jo, mila amerou mia amerou m̃a ajegi aber mia naio river re bunu titai vanlo. <sup>20</sup> Nalo amial ka vio nene be lu laka, ajerako jikili mia kirisikili, ka temeul venia namãa ban vaataro ka burusuku nei, tokol luvlulu ga, mia monoka atubabinio ka rimãaro. <sup>21</sup> Mia tormoruo Mosis naio mial vite nalo nene, mia naio bunu merou, naio berinavo "Lerinio, kiniou nememebiju ka namãaro."

<sup>22</sup> Naina naruei be burusuku lu na tuboiano moruo re beamu, mia vonganei kito maka bunu m̃a ravan eaio, robin-imej ea burusuku lu na Ioluano Vou na bo burusuku Saion nei. Naina jo tini-abene, napano be burumãara bulukomeli na Atua na meul kanano naio joaio, naio be Yerusalemou vou na vio mave. Naio bujo magmago ka nailiano nalo, miroano mia miroano napano maka ajikia avulukulo, napano abitiri bijilo aju janea vio ka ala iouano na saariano. <sup>23</sup> Mia iviso kalo, kito taara na namoneano lu nalo rotu vio takurano, napano rojibe Atua kenerinio motoru nalo, napano romidu jajumãano ruei. A bija kito bunu, niununo na kanado m̃ariano nalo aju, nina nalo napano amemedu bo ruei ea yetemeriba nei, ana bogo na m̃a amãaro, abur bulaglo aba aboru ea jukuti na m̃arabo na ioruriano, napano aju bo ea vio nei. Mia toro na tibureiano tai bunu naio jomãa jotano mave ea vio nene, nina be Atua na vite nonovio. <sup>24</sup> A bija vite dolu na bo nene nalo napano ajua kiado burusuku lu na Ioluano Vou na bo nei, mia romijikia reial Yesu, vija kiano burukija na miou, napano m̃a aþiligvilig ea kiado iviso nalo ka rila romeravo. Kiano burukija nei, naio maka tibe ka burukija na tormoruo Epel re beamu, na m̃a ajumãa aber naio be burukija na m̃a wenãaren toro, aber bunu be burukija na riuemeran na bova, mia Yesu kiano naio be burukija na milarur toro a naio be burukija na viekokoano. Yesu mila tanea keana, ka naio jikili ju iviso ka Atua bija toro, naio mila virakariano vou ka tom juo nei ju jikili bo, naio milalo aju burukuti bo bereio.

### *Iagago Vatitig ka Atua jooon*

<sup>25</sup> Tuboiano moruo re beamu, naio jibe ka ililaboniano tai napano miyotuba ea yetemeriba nei, a ioluano vou na bo, naio jibe ka ililaboniano tai na miyotuba ea vio tiniabene. Nalo na m̃a abilig taakalo

ka tuboiano moruo, maka ajikia avuro ka kialo vironiano leleio, naruei ver tibe na, mia tumãabe ka nalo na m̃a abilig taakalo ka ioluano na bo? Mia nalo avuro kulu kija re na. Tibe na, mia bo ka raigago vatitig ka Atua jooon, bo kito roduio. <sup>26</sup> Ka bogo na m̃a Atua mil ban nalo nanua na, kiano iliano kiritemi tanea naio mila borotano mikulkulu, avona bisi, ana kiano verikariano tai naio berenio bavini lie ka naio bereio, naio berinavo

*"Bogo tai bereio mia kiniou noikulkulu vatitig ka vio nalo, maka yetemeriba nei ga, mia vija rera garuei mave vaarakurano."*  
Akai 2:6

<sup>27</sup> Mia iliano na ea vio nei na ber "Vaarakurano bereio," naio ber titenia. Naio berenio Atua mikulkulu ka vio vaarakurano ruei, ana kiano jidomiano jikili ka mia rikulkulu vitii bereio saba nalo. Ka legiano na maaro mia naio rijagdag boveio ka yetemeriba nei, vija vite nalo nonovio na m̃a jiilo ajuaio, naruei mia vite na m̃a maka rijikia rijagdag boveio kano mia naio tumolu tu sikili tubo tu. <sup>28</sup> Titai ga naio mijikia tu sikili tubo tu jibe nei, naina be kiado Atua kiano navenatuboiano nene, a siva toru laka ka na m̃a naio midu kiado meuliano jo bo joomo eaio. Bo ka bogo nonovio rodu lotuano na bo tai vanio ka mia naio mijikia saaro kano, mia robitilubar ka naio be lu laka, a rotovon naio. <sup>29</sup> Bior kanado Atua naio be sebi napano jumãano nalo amijikia asisen nonovio vite nalo rivano-o riviniu kokoio.

## 13

### *Bajago nalo na m̃a Atua naio jaaro kano*

<sup>1</sup> Iliano tealo bereio ka rijai kamiu ajibe nei. Bo ka kamiu kuvitumãa tiniemi rii kamiu danãariga, tibe ka na m̃a kamiu kube m̃aratavo takurano ga bija Kristo. <sup>2</sup> Mia kamiu tiniemi rii re kamiu ga, mia tiniemi rii bunu valauo nalo, kuvisaaro ka kuvitkarlo ea kenemi vonuo nalo. Bo ka kuvila tibe na, bior ka na m̃a bogo tealo, maka ajikia, mia valauo nalo na m̃a kumitu kubitkarlo, nalo abe Atua kanano nailiano nalo. <sup>3</sup> Kuvisidomial nalo na m̃a ajua nalakoiano, kuvar bitiran kanalo jogvaiano nalo, na tavukia ga napano abuku kamiu bunu kumitu bijalo. Mia kamiu tiniemi ribogialo re bunu nalo na m̃a kulo dolu nalo amila lelanlo, bior ka kito robinu rojua via yetemeriba nei ga, monoka rajai kito ka ravar bitiran bogokouo nalo namãa robinuãaio. <sup>4</sup> Bo ka rovinu rovitig vatitig bajago na soriano naio be kirinovo tai a be vite lu, ana bior vite

na, maka rivu ka niamiano tai rimei rila niegeniege jogu novo napano aboeio ban naljuo neibano ajoro, bior napano aberkar ka mia nalo avuru re bunu dolu. Mia Atua rije tibureiano van nalo na m̄a amiel janea vio, jibe nalo napano ajoro amila siakaiano p̄elina m̄eiau bija niatira amila siakiano. <sup>5</sup> Kuvitkar vatitig ka kodu re veru naio to tukamu ka kanamo meuliano. Bo ka mia kala jau kasaaro ga ka venia na telisu napano naio joa jum̄amo ruei, bior verikariano na Atua kanano napano naio joŋa ber jibe na, berinavo

*“Mia kiniou notuvanso re bogo tai, maka nejikia novilig taakaku kaso.” Tiut 31:6*

<sup>6</sup> Ana bogo na m̄a tiniedo maio ka nina, naio mije moroano ban kito bereio, ka romijikia roverial iliano na niosi na Iouano, na binimei be kiado iliano, roberinavo

*“Toro na miija batitig kiniou naio be Atua soŋi ga naruei,*

*mia kiniou nomerou re bunu,*

*toro dolu naio mijikia rila venia na vova van kiniou bereio?” Iouano 118:6*

<sup>7</sup> Vite dolu, bo ka kamiu kuvitu tiniemi rimaio ka kenemiu navurim̄araboiano nalo, napano ajukamu ka aberial Atua kanano iliano beamu ban kamiu. Kuvilavon ka kuvitii vatitig m̄arati napano naio miyotuba ea kialo bajago novo na kialo meuliano, a kuvilaii kialo moneano na jikili ea kenemiu meuliano nalo. <sup>8</sup> Nalo amonmonea bo, ana kito bunu romijikia romonea, bior Tubo Yesu Kristo naio rive dolu re bogo tai, naio bare ga ka naniovo, a banei, a beni bunu rivano-o mia maka rijikia ribisi.

<sup>9</sup> Bo ka rover bunu ka kamiu, ka kuvitkar vatitig kamiu rivu, ka iliano dedade nalo a verloglogiano vovu nalo amei re avuru bulag kamiu den burusio na bo neibano kumituaio ruei. Tomu tealo ajidomii m̄elei ka jokoluolu lu nalo, bija salo bajago lu likiliki nalo, mia m̄arabo nalo na amim̄auka sinaniano nalo nei maka ajikia ajai kialo meuliano nalo. Vite takurano ga na naio mijikia rila kiado iviso nalo sikili rivu vatitig, nina be Atua kiano tiniememiano na bo ban kito. <sup>10</sup> Sinaniano nalo tai na jibe na, nina be sunbue na jokoluolu napano kulo lu nalo ajum̄a abuku jua boda. Abolkouo kanio, amila im̄auano bisi ana iorou kanio ana ajen jibe ka salo sinaniano nalo. Kulo lu nalo nei nalo ameul ea sinaniano na boda nei, mia kito na m̄a romonea Yesu, maka rotum̄a rosinan ea boda nene, mia be kiado boda dolu tai na naio jo, napano romeul ea jokoluolu napano abuku joaio, napano

kulo lu nalo maka avitilubarario, mia maka ajikia asinan eaio. <sup>11</sup> Nalo ajum̄a amila kialo jokoluolu nalo nene, naruei tai naio be dolu kija, jibe ka napano jidom rila tovorovo na Yesu kiano m̄ariano. Jokoluolu nene naio na m̄a aberenio be ijaiano na viekokoano rivior kariano, naruei bogo napano parinio toro lu mila nina, naio maka rudu momon temeul niabene riva joomo ea vio na be lu laka, mia naio bar ga burukija nene ba jua boda nene. Mia niabene temeul nei, abar ba tavio ea komeli bereio, ana amisebio. <sup>12</sup> Nina jibe ka ga na m̄a Yesu milaio, napano naio bunu amidu naio ba tavio ea burusio na komeli, amila naio mijog bova banbano-o na kanano burukija miou dabo nonovio, napano maka riou kurano, mia miou ka rila kito kiano tomu nalo romei rove lu rivu kamu ea Atua mirano. <sup>13</sup> Ana bior Yesu naio jaaro ka rila tibe na rivior kito, kito bunu monoka rasaaro ka ravavin vija naio ea vonuo tavio, napano tomu nalo ajum̄a abitiidie kito jibe ka na m̄a ajum̄a abitidie naio, mia kito ravar jogvaiano jibe ka na m̄a naio bario bunu. <sup>14</sup> Verver rivova van kito ea yetemeriba nei tibe na, mo bo ga, bior maka rotum̄a rosidomii ka mia rotua komeli tai ea vio nei napano jo julaka ga, mia rojum̄a romidu kiado jidomiano joa kiado vonuo memedu ea komeli vou napano roju raban ka keana.

<sup>15</sup> Jibe na, bo ka rosidomial ka Yesu, naio bijuku bo laka ban kito, naio betavo ea kiado m̄arabo, mia rodular Atua siano tulaka kanio. Rala re sida ka temeul nalo vanio, tibe nalo re nua, ana iliano nalo na amiyotuba ea niodo ka rudular naio ajibe ka m̄arati tai napano jesei bo laka banio. <sup>16</sup> Ana kito tiniedo ribobogia re ka rala im̄auano na bo nalo, bior nalo ajibe ka sida napano romijikia ravar van Atua. Mia tai napano naio jo jaaro toru kanio naio jibe ka ver kito rala rivu dam̄ariga van kulo dolu nalo, rasaaro ratan ka kiado saba nalo vijalo.

<sup>17</sup> Vite ta bunu bereio, na naio bo ka kito monoka romonmonea kiado navurim̄araboiano nalo, a monoka rasaaro ka rotutano ka kanalo iliano nalo. Naloaju amila vio jikili ka abitkar batitig kito bo, bior kanalo tomu na tortoru nalo na mave kalo ajum̄a abitii kialo im̄auano nalo a kialo bajago nalo bunu. Verver kiado navurim̄araboiano nalo, kialo jidomiano nalo am̄arm̄aro, ana mia im̄auano nonovio rivova, mia ver romonmonea nalo rivu, ana mia rila im̄auano ve temi laka re vanlo. Mia asaaro kanio ana mia rivu lie bunu rivan kito tomu na im̄auano nonovio.

<sup>18</sup> Bo ga, ana vaataro ka iliano nonovio riviniuviniu naruei, mia kumemi numisidom nuvika bunu den kamiu ka kuvisidomial kumemi ka kenemiu volkouano nalo, rivior vio na kirisikili nei na m̃a kumemi numituaio voniganei. Kumemi maka nuvial kar ka torokoriano naio joa kumemi, mia kenememi jidomiano naio meravo bo ga, ana numitum̃a numisikili ga numitua bajago na bo napano memedu ea tomu nalo miralo. <sup>19</sup> Mia kiniou nojidom laka ka kuvolkouo ka ala iliano nalo nei amemedu vatitig soḡeli, ka mia nejikia notumolu den vio nei neviedu kean kamiu rivesiou re. <sup>20</sup> Kiniou nojom̃a nobolkouo ka kamiu bunu, ka mia Atua rijai kamiu. Naio be Atua na tum̃aro, a be Atua na tinien miia kito kiano nunu nalo, naruei naio miila kiado Tubo Yesu naio binimei ea yetemeriba nei, naio binimei be kiado toro na toru na bitikar nunu nalo, kiano burukija naio miou ka rivitirilar virakariano vou nei napano mia naio to toboto. Naio be Atua nene kiaga vo bunu napano Yesu mijamo ka kiano meuliano banio, naruei naio burulario den m̃ariano, bitirilario meul bereio. <sup>21</sup> Ana kiniou nabarkar tinieku ea naio ka mia naio sian vite novnovo nalo riviniu napano kamiu kuvisidom ka kuvila kanano im̃auano ea yetemeriba nei tibe ka na naio jidomio. Naio jo mir̃iau ea kanado meuliano nalo beve terakurano ea ga Yesu Kristo, ana naio jo mir̃iuka batitig kanado bajago binimei jibe ka na naio jaaro kanio, ana mia kito reiaia naio ve toru laka riviorio, rivanvano-o na mia rijikia re ribisi, Mm.

<sup>22</sup> Kanaku m̃aratavo nalo na ea Kristo, nebitauia m̃esi nei biedu ban kamiu, be kurano ka maka ve tebievi laka, mia ver kuvial tum̃abe ana mia tiniemiu ser m̃elea re kiniou, mia kuvidu tibe ka kanaku iliano na ijaiano ka rijai kamiu ga. <sup>23</sup> Kiniou nojidom neverial van kamiu ka kuvijog ka kuruado nei Timoti, amijamo ka naio batavio bereio ruei den nalakoiano, ḡeli mia naio rimei sel ea vio nei vesiou re ga, mia kumemi ve juo nuviedu ka nuviadu ka kamiu. <sup>24</sup> Kumemi numisidom ka kuverial van kenemiu navurim̃araboiano nalo, vija Atua kanano tomu dolu nalo, ka kumemi numitum̃a nubika ka nalo ajum̃abe na, aju bo ḡelina jum̃abe, a nalo na vio Italia napano m̃a ajua vio nei nalo ajidom aver bogiano bo van kamiu bunu. <sup>25</sup> Kanaku iliano na maaro ea vio nei naruei, neberinavo mia Atua kanano tiniememiano novo a kanano tinievuiano naio to vija kamiu nonovio.



## Mesi Napano YEMESI Naio Bivitauiāio Verialiano Moti

### *Tukunuano bulati na niosi nei*

Yemesi kiano mēsi, naio bar iliano novo nalo napano ka verloglog Atua kiano tomu nalo napano aju beve terakurano ea vio nalo ea yetemeriba nei. Yemesi ber jamerjiano miroano ka rijai tomu nalo, ka ajev jidomiano a jikaiano novo bunu. Ea mēsi nei naio berii vite miroano napano namoneano nalo monoka asidomkario a monoka alaio. Naio berinavo napano be taliñasa, naio monoka saaro bogu na Atua midular naio binimeī mave, a namoneano napano be sanibaiano, naio monoka saaro bogu na Atua midu naio jo yetano. Naio berii bajago novo napano toro monoka rilaio, a naio berinavo namoneano moneano bija iñauano monoka ava vio takurano. Naio berinavo toro napano jo mila bajago novo nalo ka rijai tomu dolu nalo, mia kanano moneano jikili. Mia Yemesi berii vite nalo na amila vonvon toro, a naio berinavo toro napano vite nalo abinimeī amila vonvonio jo ana naio bokar bajago memedu, naio mijikia rijog rivu. Mia naio berii bajago napano namoneano monoka re rila ea niono ka river vite va nalo, mia naio monoka rila ka rilaia Atua. Mia naio berii masouano napano Atua jianio, a bajago napano tomu nalo aju amila baravo, a bajago napano tomu nalo abe mārrou laka, a bajago napano toro kiano jidomiano tebievi, a berii volkouano napano be kiano veridopeiano.

Vite burtumoruo napano Yemesi beriiio ea mēsi nei, nina iñauano bija moneano, napano naljuo monoka avior biju ea namoneano nalo ka amijikia ala vite ka atakii Atua kiano jidomiano.

### *Torogio nalo na niosi nei*

Iliano moti 1:1

Bajago na moneano bija na māsouano 1:2-8

Taliñasa nalo bija sanibaiano nalo 1:9-11

Vite nalo na lavonvoniano na toro kiano moneano 1:12-18

Toro monoka rijog Atua kiano iliano vija monoka rila vite nalo napano iliano nei berenio 1:19-27

Iliano na tukovio ka toro napano bitii va ka toro dolu 2:1-13

Moneano bija iñauano novo 2:14-26

Namoneano monoka vitikar vatitig ka kiano iliano 3:1-18

Namoneano bija bajago nalo na yetemerba 4:1—5:6

Vite dolu nalo napano Yemesi berenio 5:7-20

### *Iliano na be moti*

<sup>1</sup> Kiniou Yemesi, kiniou nobe toro na mña nemila Atua kiano iñauano, a kiado Tubo Yesu Kristo kanano, napano nejirii mēsi nei biedu ban kamiu, napano mña kube bajulukuti duelimo ba juo [12] na Israel, napano mña kumitua taara dedade nalo ea vio yetemeriba nei. ?Kiniou nebika neber juñabe, kamiu kumitu bo ga pñeli na kumitu juñabe?

### *Viekouoiano bija māsouano*

<sup>2</sup> Kuruaku nalo a kuvivinioku nalo, mia bogu na vite na lavonvoniano nalo amei ea kamiu ka alavon kamiu, mia kumijikia kuvial lo tibe ka vite na jogvuiano ga. <sup>3</sup> Nina jibe ka kamiu kumijikia, ver bogu nani vite milavon kenemiu viekouoiano, mia kumitu jikili damariga, nina rila kenemiu viekouoiano sikili lie vo ka mia kuvitumolu kuvitu bogu nonovio. <sup>4</sup> Mia bogu na mña kamiu kumitumolu kumitu jikili jibe na, nina mijikia rila kenemiu meuliano rimemedu rivu vatitigio, a rimeruo vatitigio, mia rivujo ka vite maraiu nonovio na abo, mia maka bajago novo tai na mia naio toa re.

<sup>5</sup> Mia ver kamiu tai napano naio river kiano māsouano telisu ga mia monoka naio rivika den Atua ea kanano volkouano, ana mia Atua mijikia sian vanio. Bior ea Atua, kanano bajago maka rivitisa ea toro napano jorña bika vite nalo denio, naio jo jian ijaiano novo julaka ban tomu nalo ea kiano tinievuiano. <sup>6</sup> Mia ver bogu na mña toro naio jorña bika vite na jibe na ea kanano volkouano, monoka naio rimonea sikili, ka mia naio sidomii dede re bereio, bior toro na kiano jidomiano jibe na naio jibe ka tei napano mña bieveluo, napano mña jegi jorña jubon titigio janea vio reraio ga. <sup>7-8</sup> Toro na jibe na, kanano jidomiano beve juo, a kanano bajago nalo maka ajikia avu ga. Toro na jibe na maka rijikia sidom river mia naio rivokar tonovo tai ea Tubo.

### *Tomu na mña abe taliñasa a tomu na sanibaiano*

<sup>9</sup> Kuruado nalo tealu, abe taliñasa, maka ve kialo saba, mia nalo amijikia avarvarlo mēle bior Atua naio midular kialo jidomiano abavin mave. <sup>10</sup> A kuruado tealu bunu, nalo kialo saba toru, mia bo ka nalo avarvarlo mēle bunu, nina

bior Atua mila kialo jidomiano ajutano ga. Amijikia asaaro tibe na bior abitilubar ka toro na be kanano saba toru, naio javukia niaiesi napano be tena bogo bulati ga. <sup>11</sup> Bogo napano m̄renio bavin, naio bitunu m̄le, mia naio tunu niaiesi nalo nei mia amekekeu, atibirbil, naruei niabene na bo avakovio. Mia ea bajago nene kia ga vo, ea bogo napano tomu na saba nalo ajum̄a amin̄auka abarbiji kanaloro veru nalo kia ga vo, mia nalo ajoru avakovio.

*Vite nalo napano m̄a amila lili kito*

<sup>12</sup> Toro napano jumolu ju jikili ea nalavonvoniano nalo napano abinimeieaio, ilivuiانو joaio, bior ka bogo napano naio jovulu vite nalo nei ruei, mia Atua riyovovua vatitig naio ka ijaiano na bo laka, nina be meuliano napano Atua naio berkar ban kito ruei, ka kito napano tiniedojii naio toru. <sup>13</sup> Ver nalavonvoniano nalo nei amei ea kamii, ana nalo ajukujuku kamii, mia kamii kuver re "Uerei, najukujukuano nei amaluvo ea Atua." Mia maka kuvijikia kuver tibe na, bior maka vite tai naio mijikia rijukujuku Atua, a bajago na milavonvon toro, nina maka ve kiano bajago. <sup>14</sup> Najukujukuano nalo nei abinimeie jikili ea toro ea ga bogo na ga kanano sidomvovaiانو ga mijubolbolili naio ana buru naio bano. <sup>15</sup> Karina sidomvovaiانو nei naio riluo rimeie ve toru ana naio rivar kenerinio vijuku vovaiانو, karina bogo napano vijuku vovaiانو naio bunu riluo rimeie ve toru, mia naio bunu rivar kenerinio be m̄riانو.

<sup>16</sup> Kuruaku novo nalo, bo ka kamii kuvitakar kamii rivu ka kuvijamo ka re tomu nalo amei ka ajubolbolili kamii. <sup>17</sup> Monoka kuvijikia ka vite novo nalo nonovio a ijaiano maraii nonovio nalo, ajumolu den vio mave abinimeie ea kito. Ajumolu den Atua napano m̄a jo jii yulu nalo nam̄a aju mave niabene, a yulu nalo nei, amijikia ajum̄a amijiaianilo julaka. Atua kiano bajago maka lele rivilig ve dolu bogo tai, bior naio maka lele rijikia riverenio rivilig taakanu ka kito bogo tai leleio, ka mia tuvan kito ea melijokouo. <sup>18</sup> Nineie be Atua nene ga napano ea kiano jidomiano ga, naio mila kito robinimeie robe kenerinio, bior kito romonea kiano ilirianiano, ka kito rojibe ka m̄ariesi na be moti garuei jukamu ka tomu telabo napano mia nalo amonea Kristo iorou.

*Kito monoka romonmonea Atua kanano iliano*

<sup>19</sup> Kuruaku a kuvivinioku novo nalo, mia kamii tiniemiu ribobogia re iliano nei, ka tomu nonovio monoka ala soḡeli ka aiagago ka tomu nonovio monoka ala soḡeli ka aiagago kano, ana monoka aviju

kiki ka aili. Ana ala soḡeli re ka tinielo rimimi, <sup>20</sup> bior toro kiano tiniemimiano maka rijikia rila bajago na Atua kanano rimaluvo leleio. <sup>21</sup> Ver tibe na, kamii monoka kuvuku bulag bajago va nalo a in̄auano va nalo den kenemiu meuliano, a monoka kuvidu kenemiu jidomiano ritotano yetano ka Iliano Lu napano naio mijikia rivurumeul ea kamii, napano Atua mebija kar ea kenemiu iviso nalo ruei.

<sup>22</sup> Kamii monoka kuvila vaio napano Iliano Lu na naio berenio, maka rivu ka kuvitu kuvijubolbolili bereio kamii ga a kamii napano kumitu kumiagago kurano ga ka Iliano Lu nei, karina maka kuvila vite nalo napano naio berenio. <sup>23</sup> Nina javukia toro tai napano naio joḡa bitii mirano ea mermerobi, <sup>24</sup> mia bogo napano naio barlaka bano, ka bogo bulati ga, mia naio tinienu bobogia bereio mirano jum̄abe. <sup>25</sup> Mia toro napano naio joḡa bitii veve vatitig va joomo ea tuboiano novo nei napano mijikia rivuru bulag kito den kariانو nalo, a naio riagago vatitig ka mia naio riagago re ga ka mia tinienu ribobogia, mia naio rimonmonea a naio riim̄aukanio, toro na naruei mia Atua riilivu ka naio ea kanano in̄auano nonovio.

<sup>26</sup> Verver toro tai river naio be toro na moneano napano memedu, mia naio telanivuu vatitig re ka buruminano, naio joḡa mijubolbolili naio ga bereio, mo kanano moneano be iakurano ga. <sup>27</sup> Ana bajago na moneano na memedu bo, a napano be riano bo ea Atua mirano, jibe nei: mia jau keiel selivivi ka keija kirikiou nalo a taanou nalo ka keijalo ea kialo meuliano kouo nalo, a kovokar kouo rivu kiano meuliano, ka napano niamiano nalo a bajago na kiri niagiago nalo na vio yetemeriba atokol lelanso re.

## 2

*Kamii Kuvitisaia Re Tomu Nalo*

<sup>1</sup> Kuruaku nalo a kuvivinioku nalo, jibe ka napano kamii kumonmonea kiado Tubo Yesu Kristo, napano naio be Tubo na mermerano, mia kamii kuvitisaia re tomu tealu ka ave dolu, napano kuvila rivu ga ka tealu, a kuvila rivova ka nalo tealu. <sup>2</sup> Jibe ka ver tomu ve juo amei joomo ea kenemiu yimo na volkouano, tinene naio be kiano saba telabo napano kiano kuluniabene minieg bo a naio miya ḡejelinio na m̄arjukujum̄alo napano amim̄aukanio ea niogo joa m̄arjukum̄ano, a tinene naio be talim̄asa, napano m̄ano kuluniabene buruboḡeio, mia kamii kuvila re ve dolu ka naljuo nei. <sup>3</sup> Maka rivu ver kamii kuviaia nana naio miya kuluniabene maraii mia

kuvudu naio toa vio napano bo laka be sudoyu ana kuver kanio kuver "Barago, ninei be jelemo na bo nei, kumerni numisidom nuver bo kaso kototano ea vio nei," mia kanio dolu nene ana mia kuver kanio ga kuver "Mia jau kotumolu kotu iorou yako, aver maka ana jau koto tano yetano ga." <sup>4</sup> Bogo napano kumitumia kumila bajago na jibe na, kumitu kubitii tomu tealo abova a tomu tealo abo, nina bior ga vite napano nalo amiyaio, mia vitiano na kenemiu na maka lele riyotuba ea jidomiano na bo.

<sup>5</sup> Kuruaku nalo, kuviagago ka kiniou. Tomu nalo na yetemeriba nei napano abe talimasa, mia Atua naio buru bulagio abe kanano, ka rila nalo ave kialo saba novo nalo ea tivelinio na kialo moneano. Ana Atua mila jibe na bunu ka nalo amijikia ava jouro ea kialo jajumalo napano Atua kiano tuboiano berkar ruei ban nalo napano tiniel jii naio. <sup>6-7</sup> Mia kamii kumitumia kubitii tomu na jumalo yauo napano abe talimasa ajibe ka tena miagiago ga tai. Mia kamii kuvisidomii vonio. "Kulo be nalo na mia aju amijil kamii vururu napano mia aju abur kamii kuba komeli? "A bunu kei nalo napano ajumia amiolua kamii ea sio novo na tortoru napano mia Atua midu joa kamii? Nina maka ve tomu nalo napano jumalo beteauo abe talimasa, mia nina tomu nalo napano be kialo saba telabo.

<sup>8</sup> Kenemiu m̄arabo napano memedu ka kuvitakii ea vio nei naio jibe ka burupati tuboiano na Atua kanano navenatuboiano naio berenio, napano berinavo "Mia kovijuku rivu van tomu nalo napano mia aju vaatoro kaso, rive verare ka napano jau kojom̄a kojidomiiso." <sup>9</sup> Mia ver kamii kuvitaisa ga tomu nalo ave dolu tibe na, nina kumila kariano ga na, mia Atua kanano tuboiano naio tibure kamii river kamii kube tomu na mia amila kokorov tuboiano. <sup>10</sup> Bior toro napano mila korov iliano takurano ga ea tuboiano nei, naio mila kariano ea Atua kiano vitiano, jibe ka napano naio mila korov novovio iliano nalo ea tuboiano binu kokoio. <sup>11</sup> Bior Atua naio berenio berinavo "Mia kamii kuvila re siakaiano," nina Atua nene kia ga navo napano naio berenio berinavo "Mia kamii kuvuebin re toro." Ver maka kuvila siakaiano mia kumue toro, mia kube tomu napano mia amila kokorov tuboiano ruei.

<sup>12</sup> Ea bogo na tibureiano, mia Atua naio ridu re vironiano van kamii, tibe ka napano mia naio rudu van tomu na bova nalo, mia naio rivuru bulag kamii den vironiano nei ga. Ka vite nei naruei, kenemiu iliano nalo, a kenemiu im̄auano nalo, monoka tibe ka napano maka kuvila

vite tai napano memedu ka kuvar vironiano rivorio. <sup>13</sup> Nina bior Atua tinien miia kamii, a kanano tinieiano nene, mia riolkon bulag tibureano napano memedu ka mia kuvokario. Mia bogo napano mia Atua tibure tomu nalo napano maka tiniel riia toro dolu, mia naio bunu maka rijikia tinien riia nalo.

#### *Viekouoiano bija im̄auano novo nalo*

<sup>14</sup> ?Kuruaku nalo jumabe, ver toro tai tomia river naio biekoou ea Kristo, karina naio maka rila bajago nalo napano abo? ? Mia kanano viekouoiano nene naio mijikia rilarur naio? !Peli ga! Nina maka lele titai napano bo rijikia riyotuba ea toro na kiano viekouoiano libolibo na jibe na. <sup>15</sup> ? Mia jumabe bunu ver ve kuruado tai a kuviviniedo tai napano nalo abe talimasa ka kuluniabelo a amijubavio ka sinaniano? <sup>16</sup> ? Ve re kamii tai ril siniabu vanlo riverinavo "Atua riilivu ka kamii, ka mia niavo sen re kamii, a siser re kamii," mia naio maka sian vite tai lele vanlo ka rijailo, nina jibe na na bo peli maka rivu? Peli ga, kiano iliano napano jibe naio mil kurano ga. <sup>17</sup> Kanado viekouoiano naio jibe nei naruei, ver naio ga ve takurano to, a ve re im̄auano nalo na bo tai to jiva naio, viekouoiano nei naio rimaro ga.

<sup>18</sup> Peli mia tomu tai ajog iliano nei, ana mia alavon ka averdopeio averenio "Bo ga, mia naio maka tibe na. Naio jibe ka ga napano tomu tealo, abe tomu na viekouoiano, a tomu tealo, abe tomu na amila im̄auano novo nalo." Mia kinio neverdopeio neverinavo "Ver kinio neverdopeio neverinavo kober jau kobe toro na viekouoiano ga, tibe na mia maka nejikia neial kijokijo tai ka river kanamo viekouoiano naio be riano. Mia ver komial napano kinio nojomia nemila bajago vu nalo, nina mijikia rila rimeravo vanto ka kiaku viekouoiano be riano." <sup>19</sup> Nao, nemijikia ka jau komonea ka napano be Atua takurano ga naio jo, nina bo laka. Ana neber kaso, neberinavo simaro nalo bunu amonea jibe na, a nalo ajumia amemebiju toru kanio. <sup>20</sup> Javukia napano rojumia roberenio, toro napano naio jom̄a ber be kiano viekouoiano, mia naio maka rila bajago nalo na memedu, kiano viekouoiano naio be tena iakurano ga, toro na jibe na naio miavovu ga na. ?Mia kamii kumisidom ka nalavon never vite nei rime rimeravo vatitig? <sup>21</sup> Boga kamii kuvisidomii von korobido na nanua Epraamo. ?Atua naio mila Epraamo memedu bija naio jumabe? Nina bior Epraamo midu kenerinio Aisak, naio miorikario ea boda, naruei naio mijamo ka risebi kenerinio Aisak ve sida van Atua.

22 Kamiu kuvialio, ea vio nei romial ka Epraamo kanano viekouoi-ano, a kanano in̄auano nalo na m̄a mim̄aukanio, vite juo nei am̄in̄au biju vio takurano ga. Kanano in̄auano, mila ana kiano viekouoiano be riano mia be riano batitigio. <sup>23</sup> Naruei vite nei naio mila ana Iliano Lu nei naio be riano bunu, napano naio berinavo “Epraamo naio biekoou ea Atua, a kar vite na ana Atua mila Epraamo naio binimej memedu bija naio.” Mo vonganei, rojuña robio Epraamo kia ga vo roberenio naio be Atua kiano bilbilu. <sup>24</sup> Bior vite nalo na, romijikia ka releal ka Atua naio mila toro memedu bija naio bior kiano bajago novo na kanano meuliano bunu, a maka ka ga kiano viekouoiano ga.

<sup>25</sup> Mo kamiu kuvisidomii von Reavo nei, na nanua beamu naio be tira na joña jaano jeregii ga ea m̄arabo. ?Mia Atua mila naio memedu bija naio juñabe? Nina bior naio bitikar batitig tomu juo na vio Israel nei, napano naljuo abinimej benalukluku ga ka avitilubarbar vio Jeriko. Naio buru van tomu juo nei ea kunuano, avona bisi ana iorou ana naio jiloglog m̄arabo dolu ka naljuo ka amijikia avuro avan bereio.

<sup>26</sup> Mo bo ga, jibe ka napano tati na toro napano maka niununo toaio, naio m̄aro, viekouoiano bunu, napano maka ve bajago novo nalo aim̄au biju vio takurano vijajo, naio bunu m̄aro.

### 3

*Monoka kito retelanvuu vatitig ka buruminado*

<sup>1</sup> Nao kuruaku nalo a kuvivinioku nalo, maka rivu ka kamiu ve telabo kuvilavon ka kuvokar in̄auano tavukia naverloglogiano ea yimo nalotuvano, bior jibe ka napano kumijikia, ea bogo na tibu-reiano, mia Atua naio tibure kumemi naverloglogiano nalo sikili laka. <sup>2</sup> Ver toro tai maka lele rilaluvu kanano iliano bogo tai, toro na naio bo mia bo, naio mijikia telanvuu vatitig ka kiano meuliano momou. Mia p̄eli ga, kito nonovio roju romila kokoro kanado iliano julaka ga. <sup>3</sup> Bo ka rosidomii m̄aributoto napano romidu joa bue kulorinio niono. Bogo napano romidu joaio, romijikia romila bue kulorinio nei monmonea kito, mia romijikia robilig kiano buruñara tati nei ban ea vio napano rojidom naio rivan eaio. <sup>4</sup> Mia kito tiniedo rimaio ka uako bunu, bekurano ka naio kiritemi laka, a p̄eli na jegi na toru jo jidom riuvio a jubon titigio bano, mia sano vuu nene kiritavasu ga, ana mijikia rila buruñara uako nei rivan ea vio na vabe na toro napano bokar vuu naio jidom ka rivan eaio. <sup>5</sup> Buruminado nalo ajibe na naruei,

napano nalo abe vite na kiritavasu nalo ga, mia amijikia amil vevavin m̄ele laka.

Kamiu kuvisidomii von, ka napano morogo na sebi kiri tavasu ga, mia naio mijikia sisen iesi nalo napano tomomoruo ea buruñara vio yeturu. <sup>6</sup> Naio, be riano, buruminado javukia sebi tai. Buruminado nei naio be torogio na mokotenado napano vite va nalo nonovio na yetemeriba nalo abujo magmago vatitig eaio, mia kanano vovaiano nalo ajum̄a amila lelan kanado meuliano momou garuei. Mene nei naio jo mijev sebi ea vio na jogvaiano, ana naio jo mila sebi nei naio bilvili janea nonovio kanado m̄arabo na meuliano nalo. <sup>7</sup> Mia romial napano toro naio mijikia milaluñiluñi tededen nalo amon̄avo, jibe ka temeul nalo napano yeturu, menu nalo, maro nalo, a niado nalo, <sup>8</sup> mia maka toro tai rijikia rila buruminano to dam̄ariga. Buruminado nalo abova laka, mia maka rejikia roverbureo, a kanalo iliano nalo ajavukia maro semei napano mijikia muebin toro. <sup>9</sup> Kito rojuña romil ka buruminado romilivu ka Atua Lu napano naio be karan̄ado, mia iorou kanio ana romil kanio bereio ka romiolua kulo dolu nalo, napano maka rosidomial ka Atua naio jiilo jibe ka tovorovo na naio. <sup>10</sup> Naruei ea niodo takurano ga, rojuña romil bo a rojuña romil bova bunu. Kuruaku nalo, vite nei naio be vovu laka. <sup>11</sup> Maka bulukuei tai ga to napano ea bulukuei ve takurano ga mia uei vija tei nalo ve juo amoluo eaio. <sup>12</sup> Mia jibe na bunu napano buruviki maka rijikia rivar m̄arolivi, a telikrevi maka rijikia rivar m̄arati buruviki. Jau maka jejikia kava kovioviou uei ea buluniogovu.

*Masouano novo napano Atua jianio*

<sup>13</sup> Ver kamiu tealoo napano nalo abe masou, a nalo amijikia batitig vite, bo ka mia nalo ala vite nei rimaluvo rimeravo rivu, tavukia kanalo meuliano, monoka naio rimemedu, kialo jidomiano, monoka naio totano, a kialo bajago monoka rimeruo rivu. <sup>14</sup> Mia ver kuvitur̄a kuvisidomii kuver kube masou, mia kenemiu iviso nalo abujovujo ka jokvano, bija varvariano bunu, jibe na kumitur̄a kumila sibi ga. Kamiu kuvil vevavin re bunu ka masouano libolibo na kenemiu, bior nina maka lele ve bajago na masouano na leleio. <sup>15</sup> Nina naio maka ve masouano na mave, mia naio be masouano na yetemeriba nei ga, a naio be tomu va ga kialo, a naio be masouano na miyotuba ea Setano memedu. <sup>16</sup> Bior bogo napano tomu nalo ajum̄a amijoku, a abarvar kalo, mia ka vite nonovio maka bunu ajikia aiasol rivu, naruei bajago va nalo ajum̄a amaluvo.

17 Mia toro napano mije masouano na mave, kanano bajago naio be dolu. Loa ka vite dolu nalo, kanano meuliano meravo batitig, mia naio be bunu toro tunjaroano, a naio be toro namelumulumuano naio bijuku bo ka kulo dolu nalo. A bunu be toro naio na tinien miia toro dolu. Naio be bunu toro na bar mjarati na bo ea kiano meuliano, a maka naio rivitisa ea tomu dolu nalo, mia kanano jidomiano maka veve juo. 18 Toro na jibe na, vite nonovio ea kiano meuliano naio memedu bo laka, mia javukia bunu rivan tomu nalo nonovio napano abe tomu na tunjaroano, napano aminjau ea bajago na tunjaro.

#### 4

*Toro napano jidom rila bilbilu vu vija yetemeriba*

1 ?Mo ver tunjaro nei naio toa re kamiu, mia kuvitunja kuvila mira ka kamiu ga, a kuvitunja kuvilivili ea kamiu, mia venia naruei naio be burupati nene? Nina naio miyotuba ea kenemiu sidomiano nalo, napano ajunja amila ana kumitunja kumijau mele ka kuvilavon ka mia kuvijog rivu ka vite nonovio na yetemeriba nei. 2 Mia kumisidom melea vite nalo napano ma aju yetemeriba nei, mia maka kuvijikia kuvokarlo. Tenene na, milαιο ana kumisidom kuvue toro riviorio. A kamiu kumitunja tiniemiu jii melea toro dolu kanano saba nalo, mia maka kuvijikia kuvarilo bunu, tenene na milαιο ana kubilivili ea kamiu a kumila mira biorio. Kamiu maka kuvokar vite nalo nei tealo napano kumisidomii, bior maka kuvika den Atua. 3 Mia bogo tealo napano kubika den Atua, mia ka bogo na maka kuvar bunu, a nina bior kubika belea ga. Kamiu kumitu kubianog ga ka rila ka kenemiu sidomiano nalo amijikia avar venia napano ajidomio ka mia ajog rivu kanio.

4 Kamiu kumitavukia tomu nalo napano maka avijuku rivu ka koalo nalo, javukia napano maka bunu kuvijuku rivu ka kenemiu Atua, napano maka bunu kuver riano vanio. Toro napano naio jidom ka rila bilbilu rivija yetemeriba nei a rivija kanano bajago nalo, naio jonja mila bilbilu va naljuo Atua, jibe ka naio be Atua kanano uolu ruei. 5 Iliano riano tai napano joa Iliano Lu naio berenio "Niunudo napano Atua midu joa kito naio jo jidom ka riel bele bogo nonovio ea kiano sidomiano va nalo." Mia nina maka ve iliano kurano na, 6 mia Atua naio jonja mijai kito toru ea kiano tiniememiano ka mia rotibe na re bunu. Nina jibe ka napano Iliano Lu naio berenio berinavo

"Atua naio juko vio ka navarvariano mia naio tinien jii toro napano kanano jidomiano batove." 7 Bior vite na, monoka kamiu kuvidu kamiu totano yetano ka Atua junjaro. Monoka kuverbure Setano ana mia naio rivuro den kamiu. 8 Monoka kuvitu lie rimei vaataro ka Atua ka naio to lie riviedu vaataro ka kamiu, a kamiu kulo va nalo, mia kuvisekon jumemiu nalo, a kamiu napano kenemiu jidomiano beve juo, monoka kuvila kenemiu iviso nalo ameravo rivu. 9 Vonganei be kenemiu bogo na tiniemiu riia kamiu rivior kenemiu kariano nalo, napano kumijog bova kanio, napano kumitunja kumiaga ka tegiano. Bo ka kuvila kenemiu vitaliano rimei ea kenemiu tegiano, a kenemiu saariano rimei ea kenemiu tinieiano. 10 Ana monoka kuvila kenemiu jidomiano rivatove ea Atua mirano napano mave laka, naruei mia naio rivitirilar kamiu.

*Kamiu kuvitibure re kuruemiu nalo*

11 Kuruaku nalo a kuvivinioku nalo, maka rivu ka kuvitunja kuver niegeniege kamiu a kuvitiburevure re kamiu bereio. Bajago na, Atua kanano tuboiano naio berbure ruei, naruei toro napano naio jo mila jibe na ka kuruanio naio jo mila niegeniege tuboiano nei bunu, a naio jo jiburevure tuboiano nei ber naio bova. Mia bogo napano kumitu kubitii tuboiano nei kuber naio bova jibe na, kumitu kumidular kamiu jo mave loa naio, maka bunu kuvitu yetano ka naio. 12 Atua nene naio ga mijikia rivurumeul ea toro a mijikia rila toro rivakovio, naio ga takurano memedu ka naio sian tuboiano to a tibure toro. 2 Mia kamiu kuberianja kamiu kube Atua ka mia kuvitiburevure kuruemiu nalo tibe na?

*Kamiu kuvitikar vatitig kamiu rivu, kuvarvar ka re kamiu*

13 Mia kamiu tealo amijikia aver "Banei peli na beni nalo mia kumemi nuvan ea mjaromeli dolu tai. Naruei ea vio na mia nuvitu yuka vodolu, mia nuvinjauka injauano napano mia nuvokar puruveru ve telabo." Mia kamiu kuviagago ka kiniou. 14 Kamiu maka lele kuvijikia venia napano mijikia riyotuba ka kenemiu meuliano beni. Kenemiu meuliano javukia mavo na burusuku napano naio miyotuba ka bogo bulati ga mia iorou kanio ana naio ba kovio bereio. 15 Iliano na memedu ka mia kamiu kuver, kuver tibe nei "Ver Atua napano jo mave laka naio sidom tibe na, mia numijikia numeul nuvitu kija bere vo, ana mia numijikia nuvila tibe na nuvila tibe na." 16 Mia maka kamiu kumitunja kumil vevavin ga a kuvarvar ka kamiu kurano laka, mia nina bova ga na. 17 Toro napano naio mijikia batitig vite novo nalo

napano memedu ka mia naio rila, mia naio maka rilaio, naio jorña mila kiano kariano ga na.

## 5

*Kamiu kuvitikar kamiu rivu, kamiu napano kube tomu na saba*

<sup>1</sup> Tomu na saba toru, bo ka kamiu bunu kuviagago ka kiniou. Bo ka kamiu kuviaga ka nategiano ka bogo na jikili nalo napano ajumña abinimei ka mia avokar kamiu. <sup>2</sup> Ea Atua mirano, naio jorña mial kenemiu saba novo nalo jibe ka amenunu ruei, a kenemiu kulumarauo novo nalo bunu jibe ka sivinia nalo ajer dudulilo ruei. <sup>3</sup> Ana kenemiu veru nalo bunu, ajibe ka abijauialo ruei, bija mokotenemiu bunu abijauialar lo ruei, jibe ka sebi jijenio, mia nina mila meravo ber kamiu kumiñau bova bija kenemiu puruveru nalo. Kito rojua legiano na maaro nalo, mia kamiu kumitu kubiobijii kenemiu puruveru nalo bavín lie vo. <sup>4</sup> Tomu na iñauano amiñau ruei ea kenemiu tiniavio nalo, mia kamiu maka kuvulu lo. Mia kanalo vuliano napano kubokario ju, jibe ka napano miaga jikili ka berial ka kamiu kumituñia kumila saba nalo na bova. Tomu na iñauano nei bunu ajumña ajegi, mia kanalo tegiano bano-o bokar Atua na sikiliano tilinieno. <sup>5</sup> Ea vio yetemeriba nei kenemiu meuliano monmaio ga, kumijikia kuvul ga vite nonovio napano kumisidomiilo ka kuvijog rivu kanio. Kamiu kumisen sinaniano novo nalo bogo nonovio, mia kiniou neber ka kamiu, kamiu kumitibe ka temeul nalo napano tomu nalo abaganilo bano ña amijabojabo kirinovo, ana temeul nalo nei amijog bo, mia maka ajikia ka bogo na mia auelo jo binimeí vaatáro. <sup>6</sup> Kamiu kumituñia kubitisa ea nalo napano abe talimñasa, jumñalo yauo, kumisian tibureiano nalo napano kiri sikilikili banlo, bekurano ga ka ver nalo amemedu ga. Kamiu kumila kikilo mia kumuebinvinlo añarnaró garuei. Vite nalo na, kamiu kumila ban nalo napano maka ajikia averbure kamiu leleio.

*Kamiu monoka kumelumu ga*

<sup>7</sup> Kuruaku nalo, kamiu monoka kuvitu melumu ga ka mia kuvitu rorea kiado Tubo-o mia naio rimeí bereio. Nina javukia toro na tiniavio napano naio jo melumu rorea bogo napano memedu ka mia naio rila iñauano ea kiano tiniavio, a ka yuo rimeí rivovo eaio, a ka naio rivar sinaniano na meruo eaio. <sup>8</sup> Ana kamiu monoka kumelumu ga tibe na bunu naruei ka kuvitu rorea kiado Tubo naio

rimeí bereio. Mia kenemiu jidomiano naio monoka tu sikili, bior mia naio rimeí bere vesiuo re ga na.

<sup>9</sup> Kuruaku nalo, mia kamiu kuvil mumii re van kamiu tulaka, ka mia Atua naio tibure re kamiu rivorio. Bior naio be toro na tibureiano nene, a jibe ka naio jumolu ju ea ñaratavo ka mia naio rimeí joomo.

<sup>10</sup> Kuruaku nalo, bo ka kito tiniedo rimaio ka Atua kiano naverialiano nalo re nua. Nalo aberloglog ñarabo napano bo tai ka kito, ka bogo napano tomu nalo amila kikilo nalo amelumu ga, a kanalo jidomiano nalo maka rijoru. <sup>11</sup> Naloaju jikili bano-o ana nalo ajovulu vite nalo nei, ana tenene na kito romial ka Atua naio milivu kalo toru laka. Toro nei Jov naio bunu ga be nalo tai napano naio ju jikili ea bogo na jikili jibe na, mia romijikia ruei vite novo nalo napano Atua naio mila banio iorou kanio. Nina riano, Atua naio be tiniememi toru ka tomu nalo a tinien miialo toru laka.

*Bajago napano aber iliano napano be riano*

<sup>12</sup> Kuruaku nalo a kuvivinioku nalo, mave ka vite dolu nalo, bogo napano kuberkar ea vite tai, ñeli na kuber iliano na toru tai, mia kamiu kuvijekakar re rivija mave siano, yetemeriba nei siano, ñeli na vite dolu siano kanio rila ana kenemiu iliano sikili. Verenio kamiu kuver “Mo” mia monoka kamiu kuver “Mo” ga. Mia ver kuver “Makanio” mia monoka kuver “Makanio” ga. Ver kenemiu iliano be riano bo jibe na, mia Atua naio maka rijikia tibure kamiu rivorio.

*Volkouano napano be verdoñeiano nene miyotuba eaio*

<sup>13</sup> Ver kamiu tai napano naio mijog bova ka vite tai, bo ka naio rivolkouo, a ver kamiu tai naio saaro, bo ka naio riilivu ka Atua ea iouano. <sup>14</sup> A ver kamiu tai rimie, nina memedu ka naio rivio navagadeano na lotuano ka amei aialo, naruei mia nalo amijikia abolkouo kanio, a amijikia aion titikivaka ve telisu ea parinio ea kiado Tubo siano. <sup>15</sup> Ana bior ñaaju jikili ea kialo Atua, ana abolkouo koio bija viekouoiano, mia Atua rilarur toro na mieiano nei, rila naio rivu bereio. Ana ver mieiano na ña bokario toro na bior kiano kariano tai, ana ver toro nene naio river bulag kariano nene, mia Atua naio riviekokoa naio ka kariano na bunu.

<sup>16</sup> Bior vite na, bo ka kuvitu kuver bulavulag kenemiu kariano nalo van kamiu, mia bo ka kuvitu kubolkouo ka kamiu, ka mia Atua naio rila kamiu kuvu

bereio. Bogo na toro na memedu naio bolkouo jikili, kanano volkouano naio mijikia rivar m̄arati ve telabo. <sup>17</sup> Elaija naio be toro tai jibe ka kito ga, mia naio bolkouo jikili ka mia yuo rivovo re, naruei ka yuka tolu a togio bereio [3½] maka yuo tai leleio ea kiano vio. <sup>18</sup> Ana iorou kanio ana naio bolkouo bereio, ana yuo bovo bereio, ana tiniavio nalo abar sinaniano bereio.

*Rovuru nalo napano amielibele amei bereio*

<sup>19</sup> Kuruaku a kuvivinioku nalo, ver kamiu tai jaluvo den nailirianiano, karina kamiu tai ba burio binimei bereio, nina naio be iñauano novo tanea. <sup>20</sup> Monoka kuvisidomii kario, ver toro tai bilig toro va tai jaluvo den m̄arabo na bova binimei bereio ea m̄arabo na memedu, naio milarur toro na bova neibano kiano meuliano, ana na mia toro na bova nei maka rijikia rivakovio. Ana ea bajago na, toro dolu nei naio mila jibe na ka mia Atua mijikia rivuku bulag nonovio kariano na toro na bova nei kiano.

Kiniou, Yemesi.

## **Mesi Moti Na PITERE Naio Bivitauiaio Verialiano Moti**

### *Tukunuano bulati na niosi nei*

Pitere kiano mēsi moti, naio bivitau ba ban tomu nalo napano abe namoneano ruei, napano naio biolo, ber “Atua kiano tomu nalo, napano naio ga bijauia bulaglo.” Nalo neneaju beve terakurano janea vio jibe valauo ga ea tanobuku nalo ea vio nei napano banei binimeibe buruvenuo nei Teki. Buruñara jidomiano ka mēsi nei ka ridular namoneano nalo kialo jidomiano napano tomu naloaju amila kirisikili laka banlo, a napano abiniua bogokouo nalo bior ka amonea Yesu. Naio ber banlo ka asidomii ioluano vou nei, napano Yesu Kristo ñaro kar kito, a meul bereio, a mia naio rimeibe bereio ka rivuru kiano tomu nalo. Jidomiano nei mijikia rija kialo jidomiano ka ajikia asikil atu sikili, a kialo moneano mijikia to sikili ea Yesu Kristo. Mia bior ka vite na, bogo na ver avakar bogokouo, ana tomu nalo mia ala sikili vanilo, amijikia asikil atu dañariga, kialo jidomiano maka rijikia rijoru, be iakurano ver ala rivova vanilo. A ver ala tibe na, mia berial ka amonea riano Yesu, a mia avokar vite novnovo nalo nei napano Atua bar vatitig bu jua tiniabene, ber kiano tomu nalo kialo, ea “Bogoti nene napano Yesu Kristo mia rimaluvo eaio.” Bija iliano nalo na ka ridu bulag kialo jidomiano, naio ber kirisikili banlo bunu, ber monoka ala kialo meuliano rimemedu rivu, bior napano abe Kristo kiano tomu nalo.

### *Torogio nalo na niosi nei*

Iliano moti 1:1-2

Marabo napano Atua midu ka rilarur kanano tomu nalo 1:3-12

Namoneano kanano meuliano monoka ve lu 1:13—2:12

Namoneano nalo kialo inñauano bogo na ajua jaleleiano 2:13—4:19

Namoneano kiano jidomiano monoka to rimelumu 5:1-11

Iliano maariano 5:12-14

### *Iliano na be moti*

<sup>1</sup> Banalo, kiniou Pitere neber kavijo bo a bogiano bo ban kamiu ea Yesu Kristo siano, napano nebe kanano ateui.

Mesi nei biedu ban kamiu Atua kanano tomu nalo, napano nanua kumitua kenemiuvio na Yerusalemo, a karina amijil dedade ea kamiu banbano vonganei kube valauo ga kumitu janea vio ea tanobuku

nalo na tortoru nei Pontas, Kalesia, Kapatosia, Esia, bija Pitinia. <sup>2</sup> Kamiu kumijog bova biorio, mia nojidom neverial van kamiu, ka karañado Atua naio mijikia ñarabo nonovio na kenemiu meuliano na beamu beamu ruei. Naio bijauia bulag kamiu beamu ruei, naruei Niununo naio miñiau ea kamiu, mia kuvijogkar Yesu Kristo kuvidu naio ea kenemiu iviso, kiano burukija jekon kamiu kumeravo, a naruei kubinimeibe kube kanano kulo lu nalo tai.

Kanaku volkouano ka mia naio rudu tiniememiano a tuñaroano na kanano atu ajai kamiu ve toru lie dañariga.

### *Ioruriano napano ña namoneano nalo abokario*

<sup>3</sup> Bo ka kito rosidomii juñabe ka napano Atua na Yesu Kristo kiado Tubo karañano, naio mila bo laka ban kito. Kito romiaia naio toru laka, bior napano naio tinien miia kito, mila kito romoluo rebe terivou bereio jouro ea kiano ñaratavo. Naruei jibe ka napano naio mila kenerinio Yesu Kristo naio meul bereio den nañariano, romijikia rejikia vatitig ka vite napano naio jukamu kean kito, maka bunu rive nañariano, mia naio be nameuliano napano maka ribisi bogo tai. <sup>4</sup> Nina naio javukia Atua kanano jajurano novo napano mia ravario iorou. Naio mila batitig ju ruei, naio bar batitig ju mave tiniabene, napano mia maka rijikia rimenuu, a maka rijikia rimeibe rivova, maka rijikia riva kovio bereio bogo tai. <sup>5</sup> Vite nei kito maka rovokar vo, mia romonea Atua ka mia kanano moroano toko batitig kito, rivokar vatitig kito rivan riva rivokar legiano na maaro. Ana ka bogo na, mia naio rivetavo ea mirano kulo dolu nalo ka rilarur kito.

<sup>6</sup> Nemijikia ka vonganei, kamiu kumitu kubar vite teremi na jogvaiano nalo ea juboluboiano napano ña kubokario, a ñeli jo jibe ga na bunu ea bogo tealo napano naio rimeibe kia navo. Mia jidomiano nalo napano neberenio ruei na, naio bo ka rila kamiu kuvisaaro, kenemiu iviso nalo ajog rivu bereio. <sup>7</sup> Juboluboiano nalo na, abinimeibe ga ala kenemiu viekouoiano ate-vijo kija, amei asikil lie. Nina naio jibe ka vite nalo tai javukia niogo, ka napano ver asidom rimeibe rimeravo rivu, monoka ajie ea sebi ka sisen bulag niamiamo napano joaio, ñeli na rojie tilibuemia ka meravo a memedu, mia kito bunu rabare kanio. Juboluboiano nalo nei napano robokario, ajavukia sebi tai ka sisen kon kiado viekouoiano rimeravo rivu, a sikili rivu. Ver bogo napano Yesu Kristo riyotuba bereio, naio rial kiado viekouoiano rimeravo rivu tibe na, naruei mia kito nonovio romijikia



rasasaaro-o mia, romijikia rovitii vatitig kito, rojog rivu laka.

<sup>8</sup> Nojo neberii Yesu na, tinieku maio bereio ka nanua, nojo bija naio, nemijikia batitig naio, mia kamiu makanio. Be riano ka napano kamiu maka kuvija naio nua, bekurano, vonganeei tiniemiu jii naio toru laka, a maka lele kuvial naio ka miremiu leleio, mia kuvitu kumonea naio jikili bo, a kenemiu iviso nalo ajaaro kanio ka buruñara saariano tai napano toru laka, iliano maka rive verare ka riverii vatitigio. <sup>9</sup> Kenemiu saariano nei, naio be m̄arati novo tai ea kenemiu moneano napano kuvijikia kuvisenio vonganeei, mia maka ve nina ga, bior bija naio, ea bogo napano jo binime, mia kuvijikia kuvisen tai napano jesei lie vo, nina ioruriano na kenemiu meuliano.

<sup>10</sup> Vite na napano roberio, ioruriano na tom nalo kanalo meuliano, naio be vite tai napano m̄a naverialiano nalo re nua amila vio jikili ka ajikia. Amijikia vatitig Atua kanano verikariano, ka mia naio tinien rii avarano tomu nalo, ka mia rilarurlo, a atu averial tibe na. <sup>11</sup> Ajuñia aberenio, mia maka ajikia batitig ka mia naio riñauka tuñabe, ðeli mia naio riñauka ea bogo na vabe. Amijog ga ka napano Niununo na Naverikariano na kanano naio jo betavo ea banlo ka beamu, mia nalo ala kiki naio ve toru, mia iorou, ilivuiiano novo nalo amijikia amalmaluvo, mia ajikia re ka mia Naverikariano naio ve toro na juñabe, ðeli naio be kenia. <sup>12</sup> Beamu be tinielo ka naio be toro na toru tai ea kialo bogo ga, avona iorou, abutilubar ka vite nalo nei napano aju aberialio, maka ve kialo bogo, mia ka ve kiado na iorou. Naruei kamiu bunu kubutilubar ka vite nalo nanua m̄a naverialiano nalo ajuñia aberialio beamu binime, nina naruei abinimee abe riano ea iliano nalo na Ioluanu Vou nabo napano kumemi numiololu ka ban kamiu ea Niununo Lu na mave kanano moroano ruei.

Mia maka ve naverialiano nalo ga, mia nailiano nalo bunu ajdom ajikia vite nalo nei, mia makanio, maka ve kialo ka ajikia. Tenalo nei amalmaluvo vonga meravo ea kiado bogo ga.

*Kito monoka rove lu rivu bogo nonovio*

<sup>13</sup> Naruei bior napano Yesu Kristo miyotuba ea yetemeriba monolog kiado bogo, kito naruei monoka rala vatitig kiado jidomiano ka resikili vatitig ka rala kanano iñauano. Monoka rotilan vuu vatitig ka kiado meuliano, a rosidomial re yetemeriba nei, mia rosidomkar ga ilivatitigiano na bo napano rejikia rovokar ka bogo na mia Yesu rimee riyotuba ea yetemeriba nei ve vaarakurano bereio. <sup>14</sup> Mia monoka

romei rotibe ka kiritete novo nalo na m̄a aju amonea batitig karañalo nalo, a mia sidomiano va na kulo vovu kialo, maka rivu ka rajamo kalo ka ave tubo ka kiado meuliano tibe ka va beamu, ea bogo na maka rojikia vite tai leleio.

<sup>15</sup> Karañado, naio naruei bio kito, mia monoka rovitilubar ka naio napano jidom romei vaataro kean naio, naio be lu laka, naruei kito bunu monoka rove lu vatitig ea m̄arabo nonovio nalo na kiado meuliano. <sup>16</sup> Atua kanano iliano tai ea kanano Tuboiano moruo naio ber jibe nei ruei, naio berinavo

*Kiniou nebe lu, kamiu monoka kuve lu bunu. Lev 11:44,45*

<sup>17</sup> Ana bereio, Karañado, vatelabo rojuñia robio ban naio ka rijai kito, mia monoka rovitilubar ka naio jo bitii veve tom nalo memedu ga ka kialo iñauano beve terakurano, naruei monoka reiel ea yetemeriba nei napano kiado jidomiano rivatove ka naio, romerou kanio. Naio midu kito rojua vio nei ka bogo telisu ga, rojibe ka valauo nalo ga eaio, mia monoka tiniedo rimaio ka karina, mia rava rotumolu rotu ea mirano rimedeo.

<sup>18</sup> Nanua beamu, kiado kulo moruo nalo maka ajikia Atua, tenena ajian lilian kanalo meuliano na meljokouo batove ba bokar bogo na Yesu Kristo naio binimee buru bulag kito denio. A jibe ka napano kumijikia, naio mila jibe nei, maka rivulu bulag kito ka tena yetemeriba tibe ka puruveru ðeli niogo ðeli vite venia bereio tibe na napano mia mijikia rivakovio. <sup>19</sup> Maka leleio, naio bul bulag kito ka kanano burukija lu memedu, bior ka napano naio jian kiano meuliano jo jeleig kito, mijamo ka naio javukia kirikiti nunu solbouo tai napano maka ve niajebijo eaio ka ala jokoluolu kanio.

<sup>20</sup> Atua naio bijauia Yesu ka rijai kito tibena nanua beamu ruei. Beamu ka bogo na naio jii yetemeriba, mia naio bokar kenerinio nei bija naio jibe na ba tinien miia kito laka, naruei naio miila naio miyotuba vonganeei ga ea legiano nalo na maariano nei. <sup>21</sup> Naio miyotuba, naruei ea kanano m̄ariano naio betavo ea kiado m̄arabo ka rovan bereio ea Atua naio bo laka. Mia bogo napano romial ka Atua mila naio meul bereio, midu naio jo mave bijaio ea kiano mermerano, kito be tiniedo ka Atua nei naruei, bo ka romonea naio, resikili rotuaio, a ravarkar tiniedo eaio.

<sup>22</sup> Jikario ea vio nei naruei kamiu kumonea ilirianiano na Atua kanano, a kenemiu meuliano jo binimee memedu bo, a kumitu tiniemiumaio lie vo ka kuruemiu dolu nalo. Mia kamiu kuveve re torogio ea

naio, monoka kuvila vio sikili ka tiniemi-  
uriia kaniu kuviniu ea kenemiu iviso nalo  
ka rimei ve toru lie laka.

<sup>23</sup> Kaniu kumoluo kube terivou bereio,  
kumidu meuliano vou tai ruei, mia nina  
maka tibe nena nalo abar tete. Kiado  
meuliano vou nei, naio miyotuba ea Atua  
ka iliano ga, iliano napano meul, iliano  
napano mia rijikia re rivakovio bogo tai.  
<sup>24</sup> Kulorinio kiano meuliano maka rijikia  
to vesiou, bior ka napano miluo bo javukia  
m̄aiesi, mijikia rimei ve novo laka tibe  
niaiesi, mia iorou kanio m̄aiesi nei mijikia  
rijeli, a niati mijikia tibiribili. <sup>25</sup> Mia vite  
tai ga naio mijikia tobo to, nina be Tubo  
kiano iliano.

A iliano nei naruei, naio ga napano  
numiololu ka ban kaniu jikar nua ruei  
binimei bokar banei.

## 2

<sup>1</sup> Naruei bior ka napano iliano vou na  
bo bokar kaniu ruei, monoka kuvituvan  
bajago na bova nalo. Iviso va nalo,  
sibiano nalo, kariano luklukuano nalo,  
jokuano nalo, ililelaniano nalo, bajago  
nalo na jibe na monoka kuvila bulaglo  
den kenemiu meuliano nalo. <sup>2</sup> Jibe ka  
napano tete domdomu ajidom m̄lelea m̄nalo  
yu ka amijikia ameu eaio, kaniu bunu  
monoka kuvisikili ka kuvakar sinaniano a  
munuano novo napano mijikia rila niun-  
umiu riluo rimei rimeruo rivu, rimemedu  
ka bajago na tomu nalo napano Atua  
milarurlo. <sup>3</sup> Kaniu kuvisen vonvon Tubo  
sano sinaniano telisu ruei, a ver kumisen  
kumijog bo, bo ka kuvisen bogo nonovio,  
mia mabomiu rivujo vatitig damariga eaio.

*Yesu naio be burupati puruveru na  
tagvoru napano meul*

<sup>4</sup> Atua naio jidom rivitirilar yimo lu  
tai, naruei naio bijaiular puruveru tai  
napano naio meul tena tagvoru na yimo  
nei, napano naio mial bo laka, nina be  
Yesu. A kulo dolu nalo maka asidom naio,  
abukulario, mia kito tiniedo jii naio toru,  
rotakio. <sup>5</sup> Naruei Atua naio buru kito, naio  
bitiri bulag kito mave ea puruveru nene,  
naio miasosol kito jibe ka puruveru nalo  
napano ameu ea kanano yimo lu nene.  
Naio mial kito jibe ka taara na kulo lu nalo  
ka roim̄au kanano, napano romijikia ravar  
novo nalo van naio napano mia naio saoro  
kalo, napano romijikia resian vanio rivior  
im̄auano ga napano Yesu Kristo naio mila  
ruei. <sup>6</sup> A javukia ga iliano tai joa niosi na  
tormoruo naverialiano Aisea kanano nua  
ruei, napano Atua naio ber berinavo  
*Kaniu kubitulbar ruei p̄eli makanio?*

*Kiniou nemijaiular puruveru na bo  
tai tena tagvoru na kunuaku ruei,  
napano tiniekujii naio toru.*

*Mia nevitiri naio memedu ea kanaku komeli  
lu na, Saion.*

*Toro kei napano rivitirilar kanano meu-  
liano ea naio, mia naio rijikia re  
rijoru rimei rivova bogo tai. Ais  
28:16*

<sup>7</sup> Mia kito na m̄na romonea puruveru nene,  
rober naio bo laka ea kanado vittiano,  
mia tealo maka asidom, abukular naio ga  
bano. Mia iliano dolu tai na Atua kanano  
ea tivelinio nei joa Niosi na Iouano nalo,  
napano naio berinavo

*Bekurano ka napano tomu nalo na  
amim̄auka yimo aberenio puruveru  
nei naio bova, abukulario,*

*mia kiniou nomidu puruveru nene, ne-  
mila naio be burupati puruveru na  
tagvoru na kunuaku yimo lu. Ais  
8:14*

<sup>8</sup> A ea Niosi na Aisea bereio, be Atua  
kanano iliano tai naio berii puruveru nei  
keano vo, naio ber jibe nei, berinavo

*Puruveru nei, mia tom ve telabo jaalo nalo  
ser baŕeia naio, rila aiel vovu.*

*Naio be puruveru tai napano mia rila  
tom nalo na yetemeriba nei atibirbil.  
Ais 8:14*

Ver revika venia milalo na ajibirbil jibe na,  
nina bior ga maka amonea ilirianiano nei  
napano amijogio, a mia atibirbil avatove  
laka ea vio na vakovioiano napano naio jo  
mon kalo.

<sup>9</sup> Mia tibena re van kito, bior napano  
robe taara takurano napano Atua naio  
bitirilaro, robe taara takurano na parinio  
kulo lu tai na rovitikar kiano vio, roju  
jouro ea kanano buruvenuo lu, robe tom  
nalo na kanano m̄aratavo memedu. Kito  
naruei napano robe tomu na memedu nalo  
ka ravamenea naio, ka roverial kanano  
tinienovioiano na mila ban kito, napano  
naio buru bulag kito den melijokouo, ana  
jii kito roju kiano miamoiano na bo  
laka. <sup>10</sup> Beamu nua robe tomu p̄ilip̄ili, mia  
vonganei robinime i robe taara takurano  
na Atua kanano. Beamu nua kito maka  
rovokar kanano lup̄ilup̄iano, mia vonganei  
kiano lup̄ilup̄iano naio bujolou ea kanado  
meuliano.

<sup>11</sup> Banalo, ver tibe na, bo ka kaniu  
kuvitilubar ka yetemeriba nei naio maka  
ve kiado vonuo rimemedu. Kito rojibe ka  
tomu na vio dolu nalo, rojibe ka valauo  
nalo ga, naruei monoka rotuvan bajago  
natiniekakariano nalo na yetemeriba nei  
kanano, bior ka napano kanano vova-  
iano nalo abe uolu memedu ka niunudo.

12 Dañariga roju iviso ka nalo napano māa maka asidom amonmonea, ka napano māa aju abijukudie kito, mia bogo napano rojua miralo, kanado meuliano monoka rivu mia rivu. Ver tibe na, mia amijikia avitilubario ka venia na mā rojuña romila naio memedu, mia nalo bunu ver amonmonea, mia amijikia avija ka kito, rovinu ravamenea Atua ea bogo na mia naio riyotuba ka kito bereio.

*Bajago novo na namoneano nalo bogo na ajua yetemeriba nei*

13 Jibe ka kito robe namoneano nalo ea Tubo ruei, kiado bajago, bogo napano rojua yetemeriba nei naio monoka rimemedu ea naio siano na mā roju romiolu kanio.

Namoneano nalo monoka atovon tomu na tortoru nalo napano abitiri bulaglo ka avitakar vatitig tomu nalo. Vede tubo nalo, pēli navuriñaraboiano na tortoru nalo, 14 pēli na parinio tubo nalo, mia kito monoka rovitilubarlo ka Atua naruei naio mije monea juñalo ka atibure tomu nalo, ka asian vironiano van na mā mila maka rimemedu, a ka aiaia na mā mirñau bo. 15 Atua naio jidom ka kanano tomu nalo monoka ala rivu, bior ka napano ver rotu rala tibe na tulaka, mia tomu nalo na mā maka ajikia vite, napano ajurña abuku iliano vovu die kito, mia ajikia re bunu ka aver titai leleio.

16 Ka tivelinio, be riano ka kito romijikia romila venia ga na mā kito rojidom, mia ka tivelinio nene, toro na mā be namoneano naio maka rijikia sidom mēlea tibe na. Vede naio jidom ka river tibe na, ver O, vite na naio joa kiniou ga na, kiniou nemijikia nala vite va venia napano kanaku jidomiano ga naio jidom. Mia maka tibe na leleio, bior ka napano monoka rovitilubar ka kito namoneano nalo robe tomu na aminñau Atua kanano, mia monoka rala venia ga na mā naio jidomio. 17 Namoneano nalo monoka atovon kulo dolu nalo, monoka tiniel tii kurualo dolu nalo a kuvivinielo nalo na ea Atua kanano mñaratavo. Monoka amerou ka Atua, avameneao, a monoka avatove bunu ka kialo tubo nalo.

18 Ea taara na namoneano nalo, tealo abe tom na tortoru kanalo, ka airñau kanalo kurano ga. A kanalo tomu na tortoru tealo amijuku bo, mia tealo ajikili laka, naruei bekurano ka napano toro na toru bijuku bo pēli bijuku bova jibe na, mia toro na mirñau kanano monoka tovon naio rivu. 19 Bogo tealo, vede toro na inñauano naio mirñau bo ga, mia kanano marauo naio mijikia rila siniabu vova kanio, naio mijikia rila vova kanio dolu ga. Toro nei mia

naio rijog rivova rivior kanano marauo kanano bajago napano maka rimemedu, mia bo laka ka naio river bare ka rijamo ka ga, napano kanano iviso jo bar tiniene ea Atua ga, ana mia naio rijikia rijoglubar ka napano Atua jo bija naio ka riijaio. 20 Mia ver toro na inñauano mila vite na bova telabo, pēli mia kanano toro na toru monoka river asian vironiano vanio. Mia ver bogo napano aje vironiano van toro nei, ana naio jo buru ga, mia kito rover re ka naio jo buru bior ka napano naio be toro novo tai, mia romijikia ka naio maka ril bior ka napano naio bitilubar kiano vovaiano.

Mia ver jau kotoñña kala ga vite nalo na bo tibe ka napano Atua naio jidom, naruei nalo ajumolu amila siniabu kaso, ajan vironiano na kirisikili tai banso biorio, ana jau koto buru ga, nina naruei bajago na bo nanña Atua naio tinien jii mēlea laka.

21 Vite na napano toro na bo naio mijog bova bior ka napano amila bova kanio, naio monoka ve yati tai na kiado meuliano na mā Kristo bio kito robinime i eao, bior ka napano beamu naio jibe na ruei ban naio. Naio maka rila titai, ana amila naio bar jogvaiano laka, mia naio mijamo ka ga, bior kito. Naruei jibe ka mñarabo na mā kiado Tubo naio miel ban ea beamu ruei, mia kito roue jaano iorou kanio.

22 Iliano Lu moruo berii naio beamu ruei, napano ber jibe nei, berinavo

*Naio maka lele rila kariano bogo tai,*

*iliano na sibiano maka lele riyotuba ea niono.*  
Ais 53:9

23 A jibe ka bunu napano kito romijikia, bogo na mā abuku iliano na bova nalo banio, naio maka bimerano, a bogo na amue niegeniege niabeno, mia maka naio river titai leleio vanlo. Naio jo buru ga, naio midu vite nonovio joa Teta Atua juñano napano dañariga kanano tiburiano nalo memedu batitig bo ga.

24 Bogo napano Yesu naio jaklele ea mñakolkolo, vironiano na kanado kariano nonovio mijoru ea niabene, a kiano mñarano mila na bajago na lakariano naio mñarano den kito, mila napano bajago na mila memedu naio meul bo naio joa kiado meuliano. Ierinio, kiano niabejalele nalo amila kiado niabejalele nalo amije ioruriano na bo.

25 Beamu, kito roju romiel vovu jibe ka nunu nalo napano mā amilaluvu kanalo mñarabo, mia vonganei toro na mā bitikar nunu naio mileal kito bereio ruei, vonganei robinime i ber roju batitig bija naio napano jukuku ka kiado meuliano.

## 3

*Nalo na mā ajoro ruei monoka atovon koalo nalo*

<sup>1</sup> Jibe ka napano kito namoneano nalo monoka rotovon parinio tubo na buruvenuo, kito na mā rojoro monoka rotovon bunu koado nalo.

Nemil beamu ban kamiu tire nalo, ka kamiu monoka kuvitovon vatitig kouemiu nalo. Vede tira tai koano naio maka rimonmonea iliano lu, naio maka sidom rijog kanano tira nei verii kanio, mia ver kanano tira rila rivu ka naio damariga, ŷeli mia mijikia rivuru naio bunu rimeiri ve namoneano tai. <sup>2</sup> Iliano telabo maka rijikia tovulu toro nei, mia bogo napano naio bitii vatitig koano kiano bajago lu na tovoniano na meuliano nei, mia naio saaro ka rimonea.

<sup>3</sup> Tire nalo, bo ka kuvitilubar ka burupati na yovovuano na kenemiu, maka rivior na mā kuvijukon vijumiu tibe na tibe na, ŷeli na mā kumive yomu niogo nalo, ŷeli na mā kuviya kulumarauo nalo na bo. <sup>4</sup> Vite na, naio maka rivior napano mā kumiyovovua batitig niabemiu nalo jibe na, mia venia na mā mila kamiu kumadigdig bo riano, naio be bajago na bo na joomo ea kamiu. Nao, kenemiu tiniememiano a kenemiu iviso na melumu, nina naruei naio be kenemiu novonovoiano riano, a mia nina naio maka rijikia rimeiri ve terimoruo bogo tai, naina naruei be bajago napano Atua naio mial bo laka.

<sup>5</sup> Korobido tire nalo re nua, nalo bunu kanalo bajago jibe na ga. Nalo abarkar tinielo ea Atua, naruei amonea ka naio ga mijikia riijaalo ka amei ave novo laka ea mirano a ea mirano na kulo dolu nalo. Bogo napano koalo nalo bunu amial ka napano kanalo tire nalo nei abatove batitig jibe na, nalo amial bo laka. <sup>6</sup> Tira tai napano naio jomā mila jibe na, naio be tiramoruo Sera, napano naio jaaro ka tovon batitig koano tormoruo Epraamo, banbano naio jo bio ka naio be kiano tubo. Tiramoruo Sera nene, roju romial naio jibe ka kiado nena novo tai, naruei kamiu tire nalo re banei, ver kamiu kuvitu kuvila memedu van kouemiu nalo, tibe ka napano naio milai, kamiu kumei kuvitibe ka kenerinio niatira nalo memedu. Vede tealo amerou ka ver ala tibe na van koalo nalo aver mia tunābe ka nalo, mia makanio, kamiu monoka kuvatove kalo tibe ka na mā Atua naio jidomio.

<sup>7</sup> Mia iliano rimeiri ka kamiu sumāno nalo, ber ka kamiu monoka kuvisidom bukua kouemiu tire nalo ve toru. Vere

toro tai toa kanano vonuo vija koano, naio monoka rivitilubar ka naio be sumāno, naio jikili bo, mia koano naio be tira, maka sikili laka tibe ka naio. Naio monoka tinieno maio tulaka ka Atua naio jian meuliano novo maka van sumāno ve takurano ga, mia naio jian banlo abe juo, sumāno bija tira abe veverare ga.

Mia ver toro tai rila re sikili mēle van koano tira, mia kanano jidomiano rivatove kanio, melmeloko rivu vanio, mia naljuo kialo volkouano nalo maka ajikia ava avoru ea mārabo togio ga, mia amijikia ajaka ava avoru ea vio na mā Atua naio jojoaio.

*Kamiu monoka kuvatove ka kamiu ka kenemiu jidomiano nalo mia amei ave takurano*

<sup>8</sup> Iliano na maaro tai ea tivelinio na, kiniou neber bo ka kamiu kuvidu jidomiano nalo napano neberenio mave ruei. Kamiu kuviniu, monoka kuvila vio sikili bogo nonovio ka kuvitu batitig vija kamiu napano kenemiu jidomiano ve takurano ga. Kamiu tiniemiu riiaia kamiu, kamiu tiniemiu titi kamiu tibe ka kube mārataravo takurano ga, kuvijuku rivu, kuvidu kamiu kuvitutano ka kamiu bereio. <sup>9</sup> Nana mā mila lelanso, mia jau kovimerano re vanio, a nana mā mioluaso, mia jau koyolua merano re naio. Venia napano vede rimeiri easo, mia koto kesian merano ilivuiiano na bo ga rivanio. Bajago na bo jibe na naruei napano Atua naio bio kito biorio, ka rala tibe na damariga, a ver resian ilivuiiano rivan toro dolu, mia Atua naio rudu kanano ilivuiiano toa kiado meuliano. <sup>10</sup> Verikariano na Atua kanano na jibe na naio joa Niosi na Iouano nalo ruei, napano naio ber jibe nei, berinavo

*Toro na mā tinien jii ka toa yetemeriba nei rivu, ŷeli naio jidom ka kiano meuliano mia rivuro rivu, ve tebievi, naio monoka riverbure ilivovaiiano nalo amei re amolmoluo ea niono, monoka rivitakar vatitig ka naio tomā rilasibi re.*

<sup>11</sup> Naio monoka rituvan na bova, rila na bo ga.

*Naio monoka ritakisora tumāro, monoka rilavio sikili tulaka ka rivuru rimeiri vaataro ka iviso na tomu nalo.*

<sup>12</sup> Tubo mirano naio jo bamere jikili vatitig ea toro na mā jo mila vite memedu, naio jo mije tiliniene ka volkouano na tomu nalo na bo jibe na.

*Mia tomu nalo napano mā aju amimāuka vovaiiano, mirano jikili*

*ealo, bilig taakano kalo. Iouano  
34:12-16*

*Bogo na mā amila bova ban Atua  
kanano tomu nalo na bo*

<sup>13</sup> Ver kito rotu rala vio sikili mēle ka rala vite nonovio naio rivu mia rivu, mia rover re ka mia tomu tai amijikia ala siniabu ka kito riviorio. <sup>14</sup> Mia vede bogo tai aial kito roju romila bo jibe ka napano Atua naio jidomio, naruei romiilo ka napano ajumolu amila bova ban kito biorio. Ana ver tibe na, monoka reial jogvaiano nei naio maka ve vite tai, naio be ilivuiano tai ga napano Atua naio mije ban kito. Romijikia rosidomial iliano tai na niosi na tormoruo naverialiano Aisea, napano naio ber jibe nei, naio berinavo

*Atua kanano toro, jau komemebiju re,  
jau monoka komerou ka re venia na  
mā tomu nalo na yetemeriba amijikia  
amerou kario. Aesaea 8:12*

<sup>15</sup> Iliano na ber ka mia kito romerou re, mia venia napano mia monoka rala, ea kiado iviso, monoka rodu Kristo naio loa vite nonovio, naio takurano be kiado tubo. A bogo nonovio monoka rotu batitig rivu, jibe ka napano ver vikadeniano tai rimej rivika ka bior vaio romonea, a bior vaio ana rabar tiniedo ea Yesu, naruei monoka rejikia vatitig tumābe mia romijikia resian verdopeiano na bo rivano. <sup>16</sup> Mo bogo napano verdopeiano bano, naio monoka rivan vija bajago na melumuiano, a nana tovoniano na toro. Nalo na mā tinielo jii ka mā ala lelan Kristo kiano namoneano nalo, amijikia avuku iliano na bova ve miroano rimej ea kamiu, mia kuvitakar, maka rivu ka kuvuku bereio iliano na bova nalo rivan ealo bereio. Ver kuvila tibe na, mia iorou kumijikia kuvimou ve toru laka ea ilisikiliano nalo na kenemiu bereio, mia ver kumelokloko ga kalo, mia nalo naruei monoka aimou rivior kanalo iliano nalo na jilkirkili mā na.

<sup>17</sup> Ver Atua kanano sidomiano naio rijamo ka bogo tai jogvaiano naio mijikia riyotuba ka kito, mia maka rivu ka jogvaiano nei naio rimaluvo rivior vite tealo na bova na mā kito ga romilaio. Mia bo lie ver jogvaiano nei naio riyotuba ka kito rivior ga iñauano novo nalo na mā kito roju romilaio. <sup>18</sup> Kamiu tiniemiu maio ka Kristo, napano naio jibe na. Naio be toro na memedu laka tai, mia naio mijog jaleleano burutomoruo laka bior tomu nalo napano maka amemedu. Kariano na kito tomu nalo na yetemeriba kiado telabo laka, mia ea kanano māriano takurano nei, naio mila vite nonovio bo ruei ka rila ka ve kiado mārabo ka mijikia rivuru kito rava

vaataro ka Teta Atua. Amila lelan Yesu niabene jibe na bano naio māraro garuei, mia bo laka ka napano iorou, naio binimej meul bereio ea moroano na Atua Niununo.

<sup>19</sup> Beamu ka naio meul bereio jibe na, napano naio joa vio na māriano kia ga vo, moroano na Niununo na Atua kanano nei binimej bujo magmago eaio, mila na naio ba mioliolu memedu ban niununo dolu nalo napano ajua vio nei, ka vonganei naruei Atua naio jovululo ruei, ana Simāro naio bijukude garuei. <sup>20</sup> Niununo nalo nei, naio be tomu nalo na mā maka asidom amonmonea Atua, ajavukia nalo na ea bogo na tormoruo Noa re nua. Ea bogo na, Atua naio jororealo ka aviliglo, naio midu bogo tebievi banlo. Aju jibe na, bano na Noa naio jo miñauka burumāra kanano uako nei banbano, mia maka asidomio ga, naruei bogo napano ueimiya jovukolo nalo amadudu. Nalo miroano aba kovio ka bogo na, mia tomu telisu ga amije ioruriano joomo ea uako, nina be Noa nalo arolu ga.

<sup>21</sup> Naruei burumāra uei nei napano burulo ameul ea kialo uako nei, naio be nioti venia ban kito banej? Naio mila kito rojidomii uei dolu, uei na kanado ioruriano, naina be uei na mā amila varueiano ea kito eaio. Uei na varueiano nei, naio maka ka rila ka niabedo rimeravo, mia naio jekar vatitig kito ka Atua biekokoa kariano nalo na kiado, naruei kito maka bunu roimou ea naio riviorio.

Varueiano naio midu kiado meuliano jo bo bija Atua jibe na, mia bo ka kito rosidomii bunu ka kei naio mila kiano mārabo jibe na? Yesu Kristo ga na naio milaio, binimej ea kanano tumoluano bereio den namāriano. <sup>22</sup> Mia iorou ka nina, naio bavin bereio ea vio mave, naio ba jo jotano mave bija Atua ea jumāno tivelinio vameruo nene, napano nailiano nalo, kulo kouo nalo na tortoru, bija moroano nalo, abiniu ajutano ka kanano navenatuboiano.

## 4

*Atua kanano sidomiano naio to tukamu  
ka kiado meuliano*

<sup>1</sup> Jibe ka na neberenio ruei, Kristo naio mijamo ka naio bar jogvaiano miroano ea mokotenano, mia kito bunu monoka rala kiado jidomiano riveverare ga. Toro na mā naio rijog vova ea mokotenano, monoka naio river re river bova, bior ka bogo napano naio miyotuba ea jogvaiano jibe na, mijikia rila naio sikili lie vo ka naio ribisi vija bajago na kariano nalo. <sup>2</sup> Toro na jibe

na, naio maka bunu todū ka kanano meuliano na yetemeriba nei, napano tiniēiano va nalo na bajago na tomu, nalo ve toru laka ea kiano jidomiano, mia naio jidom ga vite na memedu nalo na mā Atua naio jidomio. <sup>3</sup> Burumāra togio na kanado meuliano, kito romila kule laka bogo be rui napano roju rejeliviv bija bilbilu nalo nei na mā maka amonmonea. Kitoliko nalo ea meuliano va napano bujo ka veribinio nalo, najiliano na tire nalo, namunuiano na uei ba parilo jeliviv, tinielo mimi a ajukuruku, amila utebaiano janea vio bokar viomijeni, amila korov tuboiano, bija amila lotuano ea tavoru sibusibiano nalo.

<sup>4</sup> Nina kiado meuliano na beamu na, mia vonganei bilbilu nalo na maka bunu ajikia ka kito roju jumābe. Amial ka napano maka bunu ga rosidom ka ratakisorlo ka ravan rovudomdom kiado meuliano ea kialo bulumirano bulukinia, mia maka asaaro leleio, mila na tinielo jer kito toru laka. <sup>5</sup> Mia kito rosidom dede re, tomu kinkin nalo na jibe na mia atumolu kia navo kamu ka Atua mirano, napano mia naio tibure tomu nalo na ameul vija bunu nalo napano amāramāro beamu rui. Mia monoka nalo averial kialo veriiano vanio, naruei ea bogo nei, mia avitilubar kanalo torokoriano nalo. <sup>6</sup> Mia tibe na re van namoneano nalo. Vede tomu nalo na yetemeriba atiburelo asian vironiano na yetemeriba van mokotenalō, mijikia riva rivokar napano mia alaluvu kialo meuliano, mia bogo na napano atumolu ea mirano Atua, mia naio sian ijaiano na meuliano rivan niunulo. Mia meuliano nei naruei naio be burumāra vite na mā mila kito roju romiololu ka Ioluano Vou na bo ban tomu nalo.

*Bajago na namoneano nalo kanalo ka bogo na maaro vaatara ka rimei*

<sup>7</sup> Kiniou nojidom never tibe nei, ka vonganei vaatara ka kito rovokar jukuti na vite nonovio. Ea bogo na jibe na, namoneano nalo monoka atumolu batitig rivu ka napano kialo jidomiano nalo ameravo rivu, ka amelukuku re ka volkouano. <sup>8</sup> A mave ea vite nonovio dolu nalo, monoka tinielo titiulo bereio ve toru laka, bior ka napano bogo na tiniedo jii toro tai, mila na romijikia robiekokoa kiano kariano monmaio ga. Iliano tai naio ber jibe na rui, berinavo kariano toru laka, mia tinetiiano naio mijikia rivariko nonovlo.

<sup>9</sup> Vite dolu, namoneano nalo monoka asaaro ga ka avitiikarlo bereio ea kunualo nalo. <sup>10</sup> A bunu, nalo veve terakurano monoka ajikia vatitig veve moroano a

jikiaiano nalo napano Niununo jian banlo, a monoka amāru rivu vija ka rijai batitig kanalo bilbilu dolu nalo. Ver aviekouo rivu, amijikia ala ka napano mia tiniememiano novo na Atua kanano riyotuba kalo. <sup>11</sup> Toro napano jikiaiano na iliano joa naio, naio monoka ril rivu tibe ka napano Atua kanano iliano na memedu ga naio jo moluo ea niono. Toro napano jikiaiano na ijaiano na imāuano joa naio, naio monoka rila rivu vija sikiliano nonovio napano Atua jian banio. Ver bogo nonovio rala vite nonovio rivu laka tibe na, mia tomu nalo amijikia avamenea Atua ve toru rivorio, avamenea naio ka Yesu Kristo siano, napano mermerano nalo a moroano nalo abe kanano ga rivan riva ribisi re bogo tai.

*Jogvaiano na nalo na mā amonea*

<sup>12</sup> Banalo, nemijikia ka vonganei kamiu kumitu kubiniua bogo tai na jaleleano napano naio mila kamiu kumijog bova toru. Mia nejidom never ka kamiu, ka kuviilo mēle re kano, maka kuvial vite na tibe vite tai napano be tiniemiu ka kuver maka rijikia riyotuba ka kamiu bogo tai. <sup>13</sup> Mia venia ka ala, kuvisaaro ga ka napano kuvijikia kuvitu burukuti vija Kristo ea jogvaiano nalo na kanano. Ver tibe na, mia iorou kano ve burumāra kenemiu saariano, napano kuvijikia kuvitu burukuti vija naio bereio ea bogo napano naio rimaluvo vija kanano mermerano. <sup>14</sup> Ver dolu nalo amijikia ka Kristo siano joaso, mia amijikia avuku ioluoliano va amei easo, mia kosidomii mēle re kano. Mia burumāra ilivuiano na Atua kanano naio toaso ga, bior Niununo na mermerano na Atua na mave naio jo joa kanano meuliano.

<sup>15</sup> Ver ala vironiano tai pēli jogvaiano tai rimei easo, maka rivu ver ala rivior napano jau kobe toro tai na mue toro, pēli kobe toro na vinauano tai, pēli kobe toro na mila korov tuboiano, pēli kobe toro tai na mila jaleleano. <sup>16</sup> Mia ver ala rivior napano ga amijikia ka komonmonea Kristo, mia kala re tibe ka na jau komimou, mia monoka kovamenea Atua napano naio mialso kabare ka Yesu Kristo siano naio toaso.

<sup>17</sup> Vonganei bogo na tibureiano naio jikar rui, a mia riva rivokar na moti Atua kanano mārataravo. A romial ka napano naio mijikia rijamo ka bogokouo tealō amaluvo ea meuliano na kenerinio nalo kanalo, mia ver naio rila tibe na van nalo napano amonea, maka rejikia ka mia tumābe ka nalo napano maka asidom amonmonea kiano Ioluano Vou? <sup>18</sup> Nina naio javukia iliano tai na niosi moruo na

Ilimasouano nalo na mña naio berenio jibe nei, naio berinavo

*Toro na ajidomii aber naio memedu ruei, be vite jikili tai ka Atua mijikia rilarur naio.*

*Mia ver tibe na, kuvilavon kuvisidomii nalo na mña maka asidom Atua, abe tomu na kariano ga. Mia tumabe kalo?*  
*Ilimasou 11:31*

<sup>19</sup> Mo, ea vio nei never iliano telisu tai van kamii napano Atua mijamo ka jogvaiano maluvo ka kamii. Neber kamii kuvitu bogo nonovio ka kuvila rivu van tomu nalo nonovio, a kamii kuvidu kenemiu meuliano toa Atua jumano. Naio naruei be Atua na jii vite nonovio, naio be Atua na biekoou laka, naio be Atua napano romijikia rovarkar tiniedo rivu ea naio damariga.

## 5

*Iliano ba ban navurim̄araboiano nalo*

<sup>1</sup> Mo vonganei nojidom neverial jidomiano tealo rivan kamii navigadeano nalo na lotuano. Kiniou be tiniuku ka nabare ka neil van kamii tibe nei, bior kiniou bunu nebe navigadeano tai, a mave ka naina, nobe nalo tai na mña numial Kristo ka mirememi bogo na naio bar jogvaiano nalo mave ea m̄akolkolo. A nemijikia batig bo ka kiniou bunu nove tai napano mia noto jouro ea mermerano nalo napano mia amolmolou iorou, tenene na nemial bo ka nesian iliano nalo nei ka rijai kamii.

<sup>2</sup> Nebika jikili ban kamii jibe na, ka kuvitkar rivu taara na nunu nalo napano Atua barloaju yetano ea vitikariano na kenemiu. Nina be burunara in̄auano tai na, mia riano, maka rivu ka ver kuvitu kuvila napano kenemiu iviso maka sidom rilai. Mia bo ka kuvilaiio vija jidomiano na saariano, jibe ka na Atua naio jidomio. Mia in̄auano venia na mña kuvila, maka kuvila rivior ga ijaiano telisu tai napano vede kuvijikia kuvario, mia monoka kuvila rivior ga jidomiano tai joa kamii ber bo laka ka ala in̄auano nalo na rijai tomu dolu nalo. <sup>3</sup> A nalo napano mña ajua jumemiu ka kuvitkarlo, kuvila re ka kuvitu kuvilavon kuve boru na jikili vanlo, mia monoka kuvitukamu rivu kalo, kuvisiloglog m̄arabo vanlo, ka mia amijikia aue jaamiu. <sup>4</sup> Ver kamii kuvim̄au rivu tibe na rivano, mia parinio toro na bitikar Atua kanano nunu nalo mia naio saoro rivior kamii. Bogo na mia naio riyotuba bereio, mia naio rivitiri bulag kamii tibe ka kiano parinio tubo nalo, mia naio riyovovua vatitig kamii

napano mia kiano burunara miamoiano na kiano mermerano mermeralii kamii napano maka rijikia rivatove bogo tai.

*Iliano ba ban kulo dolu nalo*

<sup>5</sup> Vonganei iliano biedu ban kamii m̄eaku nalo. Nebika jikili den kamii ka monoka kumisaaro ka kuvatove ka tormoruo nalo vija kenemiu navurim̄araboiano nalo. Iliano na jibe na kamii kuviniu monoka kuviduio, bior ka napano naio bo ka bogo nonovio monoka rola bajago na vatoveano van kito. Naina jibe ka iliano tai napano Niosi na Ilimasouano naio ber nua ruei, napano berinavo

*Atua naio berbure bajago na m̄arouano, mia naio miija bajago na vatoveano.*  
*Ilimasou 3:34*

<sup>6</sup> Tibe na, bo ka kito rala kiado jidomiano totano ka Atua bogo nonovio. Rodu kito rotua jumano, naruei ea kanano moroano mia naio mijikia vitiri bulag kito bereio bogo tai. <sup>7</sup> Kito ravar kiado bagaro nalo tua taakano, bior napano naio jidom kito toru laka, naio jaaro ka rijai kito.

*Kuvitokovio ka Sim̄aro*

<sup>8</sup> Kiniou nojidom never bunu iliano tai ka rilabon kamii, ka monoka kuvitkar vatitig kamii, monoka kuvitilubar m̄arabo kija. Kiado uolu nei Sim̄aro, naio jom̄a jeliviv ea kito damariga, naio javukia burunara temeul deden tai napano jijer naio toru kar namoneano nalo ka tumolu ser niadualo. <sup>9</sup> Mia kamii kuvijamo ka re naio ka rila tibe na, monoka kuviekouo sikili ea kenemiu viekouoiano ka kuvitoko vio vatitig ka naio. A maka ve kamii ga napano naio jom̄a milavon kamii, mia kumijikia ruei ka kiado bilbilu dolu nalo miroano naaju jeliviv ea yetemeriba, a jogvaiano naloaju amiyotuba ealo bunu, naruei bo ka kito roviniu rotumolu rotu sikili ka Sim̄aro naio tovulu re kito tai.

<sup>10</sup> Erinio ka napano kamii kumitu kumijog jaleleano kija ea bogo na, mia kanado Atua na tiniememiano nonovio mia rijai kamii. Naio naruei napano bijauia bulag kamii ruei ka mia kamliko Kristo joomo ea kiano mermerano, mia naio naruei napano mia ridururu kamii vonganei. Mia kumemebiju re bunu, mia kuvikulkul re, ana ea kiano moroano, mia kuvijikia kuvitumolu vatitig bereio.

<sup>11</sup> Tibe na, kito rovamenea kiado Atua, bior ka napano kanano moroano naio jo jovulu nono vite nalo, a mia naio to tovulu vanvan rijikia re bisi bogo tai, tibe na naruei.

*Iliano na maaro*

<sup>12</sup> Kiniou nojoa vio nei bija kuruado novo nei Sailas, nojo nabalea naio ka vite miroano, a naio naruei mija kiniou bivitauia kar bulag kenemiu mēsi nei. Nemijikia ka mēsi nei naio bulati laka, neber vite telisu ga, mia venia napano naio joa vio nei, nemijikia ka naio berial bajago novo nalo na tiniememiano na Atua kiano be riano, napano naio memedu ka kamiu ea vio napano kumituaio vonganei. Tibe na, kuvulukuio, kuvidu ka rijai kenemiu jidomiano, kuvitu sikili eaio danāriga.

<sup>13</sup> Nalo namoneano nalo na vio nei Romo, bija bunu Mak, napano nobur naio jibe ka keneriku ruei, aber kavijo bo pēli bogiano bo ban kamiu. Numitua vio na, numial bova kija, numijog jibe napano numitua burumāra komeli va na beamu nei napano abio ka Bapilon. Mia naio bo ga, bior napano numijikia ka Atua bijauia bulag kumemi ruei, nubija kamiu, kito rove kanano.

<sup>14</sup> Kanaku iliano maaro ga ea vio nei, neber bogo na kamiu kubinimei vio takurano, kuvila vorvoruano bo van kamiu, kuviniomniom kamiu tibe napano tiniemiu jijii kamiu.

A kanaku volkouano, ber tumāroano novo na Yesu Kristo kanano naio jo bija kamiu kubiniu napano kube kanano.

Kiniou, Pitere.



## **Mesi Juo Na PITERE Naio Bivitauiāio Verialiano Moti**

*Tukunuano bulati na niosi nei*

Pitere kiano mēsi juo nene, Pitere bivitauiā ba ban namoneano nalo ea kiano bogo. Ea bogo na naverloglogiano nalo aju, napano kialo verloglogiano nalo maka rimemedu, a tomu nalo napano ajakisorlo aju ajibirbili ea kariano. Naruei Pitere berkakar ban namoneano nalo nei ka monoka avitakar vatitig ka tomu nalo na jibenei aviligviliglo re.

Mia ka atukovio ka bajago va nei, toro monoka rijikia vatitig Atua, a monoka rijamo ka Yesu Kristo, napano be kiado Tubo, rimei to tukamu ea kiado meuliano. Namoneano nalo ea bogo na, ajog ioluano vou ea tomu nalo napano amial Yesu ka miralo, a napano amijog kiano iliano, bogo na naio jo berloglog tomu nalo.

Pitere bivitauiā mēsi nei ka ridu bulag namoneano nalo kialo jidomiano, bior napano ea bogo na, naverloglogiano nalo nei napano kialo verloglogiano maka rimemedu, aju aberial aber Yesu mia maka rijikia rimei bereio. Mia Pitere berinavo Yesu maka rimei vo bior napano Atua "maka sidom toro tai rivakovio. Naio jidom rudu bogo rivan tomu nalo nonovio ka amijikia aviliglo." (3:9) A mia naio monoka rimei bereio vesiou re.

*Torogio nalo na niosi nei*

Iliano moti 1:1-2

Namoneano nalo kialo meuliano 1:3-21  
Naverloglogiano nalo bija kialo verloglogiano na maka memedu 2:1-22  
Yesu mia rimei bereio 3:1-18

*Iliano na be moti*

<sup>1</sup> Mesi nei, kiniou Saimon Pitere nebivitauiā, jibe ka nebe Yesu Kristo kiano naimāuano, a nebe kiano atevi. Nojo nebivitauiā biedu ban kamiū napano kubokar viekouoiano ea naio bo laka, be verare ga ka kumemi nanua, nubakar beamu rui. Naio naruei be Atua a be ioruriano na kiado robinu, naio jo mila memedu bo ban kito danāriga. <sup>2</sup> Jibe na, nojidomial kamiū, kanaku volkouano ka mia kuvijikia vatitig Atua kiado Tubo napano Yesu na riva lie tibe na, vanvan rila napano kiano tiniememiano a tumāroano to rivujo ve toru ea kenemiū meuliano nalo.

*Yesu bio kito ka rove kiano*

<sup>3</sup> Yesu naio bijuku bo laka ban kito, napano ea moroano na mermerano a tinievuiano na kanano, naio bio kito ka rejikia vatitig naio tibe na. A bogo napano romijikia vatitig naio, naio ga rila vite nonovio ea kanano moroano lu nene ka rila Atua kanano meuliano a kanano bajago lu avujo lou ea kito. <sup>4</sup> Yesu naio mila ka napano roju robokar ijaiano novo nalo nei napano kirinovo laka, romial ka jakii memedu ga kiano verikariano nalo. A ea māarabo nene, romial ka napano naio mila kiado meuliano jo miasol meuliano lu na Atua kiano, a naio jo jian ban kito ka rovuro den niamiamo na sidomvovaiāno nalo na yetemeriba nei.

<sup>5</sup> Bior vite na, kamiū monoka kuvukdeli ka rila kenemiū meuliano rimei rivu lie tibe na. Ea viekouoiano napano naio joa kamiū rui, bo ka kuvijedu ka tinievuiano bereio. Ea tinievuiano nei, bo ka kuvijedu ka jikiaiano a masosouano. <sup>6</sup> Ea jikiaiano a masosouano nei, bo ka kuvijedu ka telanvuiano, a ea telanvuiano nei, bo ka kuvijedu ka jidomiano na tebievi, a ea jidomiano na tebievi nei, bo ka kuvijedu ka bajago lu. <sup>7</sup> Ea bajago lu nei, bo ka kuvijedu ka sidomiano, a ea sidomiano nei, bo ka kuvijedu ka tinietiano.

<sup>8</sup> Bajago novo nalo nei, ver atua kamiū, a ver atu ailuo lie danāriga, mia kenemiū meuliano mijikia rivar māarati ve miroano napano ajesei laka. Peli kamiū kumijikia kiado Tubo Yesu Kristo rui, mia ver bajago nalo nei atua re kamiū, mia kamiū maka kuvijikia kuvila kanano imāuano na bo tai leleio. <sup>9</sup> Toro na jibe na, mirano miunu, maka rijikia rivitilubar vite, a kanano jidomiano bulati ga. Naio tiniene bobogia vatitig ka ajekon bulag kiano kariano moruo nalo, a maka bunu tinien rimaio ka naio joa meuliano vou tai rui.

<sup>10</sup> Kiaku bilbilu nalo, maka rivu ka toro tibe na, mia nejikili ka kamiū kuvete terakurano monoka kuvukdeli danāriga ka kuvila imāuano nalo na bo ka riverial ka Yesu naio bio kamiū ka kuvete kanano, naio maka ve tena sibiano tai, a maka ve tena sereseiano ga tai, mia naio be tena riano tai. <sup>11</sup> Ver kamiū kuvitu kuvila tibe na, mia kuvijikia re kuvijoru bogo tai, a māratavo na riva joomo ea Yesu Kristo kiano navenatuboiāno napano naio be Tubo a Ioruriano na kiado, mia naio rivetavo ea batig van kamiū. Mia ala vorvoruano na bo van kamiū ka kuva kuvitu vija naio to toboto.

<sup>12</sup> Kiniou nemijikia ka iliano nalo nei, maka rive terivou van kamiū, bior kumitu kubokar batig bogo tebievi kija rui. Mia maka nejikia notuvan ka napano monoka

noto neververial ilirianiano nalo nei rivan kamiu ve vatelabo bogo nonovio. <sup>13</sup> Nina naio be imāuano na kanaku meuliano, ka neila kamiu ka tiniemiu ribobogia re, a nemijikia ka napano mia monoka nala tibe na riva rivokar jukuti na kanaku meuliano. <sup>14</sup> Tubo Yesu Kristo naio berial ban kiniou ruei ber rivesiou re, mia notuvan niabeku nei navano, <sup>15</sup> mia beamu ka nina, nojidom nevitauia bulag vite nonovio batitig ruei tu. Tibe na, ver navano, mia m̄arabo naio jo ka kuvijikia kuvisidomiikar iliano nalo nei dan̄ariga.

*Pitere kiano iliano bija atevi dolu nalo be riano*

<sup>16</sup> Kumemi atevi nalo nuberloglog kamiu ka kiado tubo Yesu Kristo mia naio rimeī bereio vija kanano buruñara moroano. Tealo aberii verloglogiano nalo nene, aberinavo nina be iliano nalo na jidomiano na tomu nalo ga, p̄eli na aberinavo nina javukia tukununo moruo re nua nalo, mia kumemi numijikia nuver memedu nuver maka tibe na, bior napano Yesu kanano moroano naio be vite na be riano napano kumemi numial ka mirememi ruei. <sup>17</sup> Nanua na, kumemi numitu bija naio memedu ka bogo na napano Atua Teta jian mermerano nalo na vio mave ajuāio, abamenea naio, napano kanano iliano tai jaluvo mave batove, berii naio berinavo

“Nina naio be keneriku memedu napano tinieku jii naio toru laka, napano najaro toru ka naio.”

<sup>18</sup> Kumemi naruei numijog jooon na vio mave naio berial iliano nei, nina ea bogo na m̄a kumemi numitu bija Tubo mave ea burusuku lu napano na.

<sup>19</sup> Ana bior vite nalo nei napano numial p̄eli numijog, numijikia vatitig bo napano meravo bo ea kenememi jidomiano, ka nina be vite memedu nalo napano naverialiano moruo nalo na beamu aberialio. Kanalo iliano nalo ajibe ka yulu na bo tai ka merera ea vio na bobogio napano rojuāio, naruei bo ka rotu rovlukuio a roduio. Tibe na mia vetavo ea m̄arabo van kito riva rivokar bogo na legiano vou naio riyotuba ka kito, a Mejegi na kavijo rivavin rijivi ea kiado vio yauo ka rimererali kiado jidomiano.

<sup>20</sup> Mia kiniou nojidom never vite tai bereio ea tivelinio na verialiano nalo na naverialiano moruo nalo kialo, napano abivitauiā joa niosi lu. Naio jibe nei, berinavo verialiano nalo nei, toro maka rijikia tumolu riverial river naio ga takurano mijikia vatitig nioti nene nalo. <sup>21</sup> Nina bior napano verialiano nalo nei, maka lele

amaluvo den toro kiano jidomiano, mia Atua kiano Niununo naio m̄im̄au ea tomu nalo, naio jukamu kalo ka averial Atua kanano verialiano.

## 2

*Naverloglogiano na jukujukuano nalo*

<sup>1</sup> Mia jibe ka na m̄a kito romijikia, ea bogo na naverialiano na bo nalo na beamu nei, bogo tealo naverialiano sibusibi nalo bunu ajuāia amalmaluvo ea mirano Atua kanano tomu nalo. A mia mijikia tibe na ga van kito banei bunu, napano bogo tai, p̄eli mia naverloglogiano sibusibi nalo amijikia ayotuba. A naverloglogiano na jibe na, mia avar parinio verloglogiano napano maka rive riano amei, mia amijikia averinavo amonea Tubo na vio mave, ka aver naio milarurlo, mia kialo verloglogiano nalo ajuāia amildie naio bereio. Verloglogiano nalo nei amijikia ala lelan namoneano nalo kialo viekouoiano, mia verloglogiano sibusibi nalo nei maka ajikia avitilubar ka kanalo vironiano naio jo binimeī soḡeli biorlo ruei. <sup>2</sup> Nalo abova laka, a romimouo ka roverii venia na m̄a nalo ajuāia amilaio. Nalo aju aberenio aberinavo abe namoneano, mia amila ka bogo napano tomu dolu nalo abitilubar kialo bajago, ajuāia amiyotel toru ea kiado m̄arabo na ilirianiano. <sup>3</sup> Tomu nalo na sibiano nei, ajidom vite nalo toru, naruei amijikia avuku iliseseiano ve miroano van kamiu. Mia alavon ajukubin kamiu ea tukununo nalo napano abujo ka vite nalo napano maka rive riano. Mia naio bo ga, Atua naio maka to rimonmelio. Naio jibu-relo, naio mila batitig kanalo vironiano jororealo bogbe ruei ju.

<sup>4</sup> Bo ka kito rovitilubar Atua kiano bajago na tibure tomu a na milarur toro ea meuliano na nanua beamu. Moti, kuvilavon ka kuvisidomial Atua kiano nailiano nalo na beamu, napano tealo ajumolu amilavon ka atu loa naio. Naio maka riverenio maka ve titai, mia naio jumolu buk bulaglo vaarakurano abatove ea bulu joomo nalo na melijokouo ea sebi na lakoiano, ka atua vio na riva rivokar buruñara legiano na tibureiano na maariano.

<sup>5</sup> A kuvisidomii bunu tomu nalo na beamu nua laka nei, nina ea tormoruo Noa kiano bogo. Bogo napano naio joñia mio-liolu ka Atua kanano bajago na memedu banlo, mia parilo jikili laka, maka asidom leleio ga. Naruei Atua mila buruñara ueimiya binimeī buru bulaglo, mia Noa ga bija kanano m̄aratavo aluo, naio milarurlo.

<sup>6</sup> A bereio, kuvisidomial buruñara komeli juo na Sotomo bija Komora. Atua mial kialo vovaiano nalo naruei naio misebikolo abe burumaroro ga naruei, a nina naio betavo ea venia na mia naio rila ka nalo nonovio napano ajua meuliano na bova.

<sup>7</sup> A na maariano ka rosidomial nalo nanua beamu, nina toro nei Lot. Naio be toro na memedu tai, a naio jo mijog bova dañariga ea bajago na kiriniagiago nalo na tomu na ña amila korov tuboiano, napano naio jo iviso kalo. <sup>8</sup> Legiano nonovio ga naio jo mial kanalo meuliano va nalo, a naio jo mijog kanalo ioluoliano nalo, mia Atua naio mila juñabe? Naio mijie mauo ban kulo va nalo nei, mia naio milarur meuliano na kanano toro na bo nei, Lot.

<sup>9</sup> Naruei ver kito rosidomii vatitig ka nalo na, mia releal Atua kiano bajago tai, napano jibe nei. Naio mijikia batitig juñabe ka rivuku bulag kiano tomu nalo na bo ataluvo den lavoniano nalo, a naio mijikia rivokar sikili tomu na bova ka avar kanalo vironiano nalo. Mia naio rila avar ve tertelisu vonganei beamu vo, mia ea legiano na tibureiano mia avokar nonovio nana ju nene.

<sup>10</sup> Iliano nei ba ban tomu nonovio, mia jokol batitig nalo napano aju ajakii sidomvovaiano nalo na bajago na kariano napano amoluo bijaio, a jokol bunu nalo napano maka asidom aiagago, parilo jikili laka. Tomu kinkin na jibe na abe ñarou ka kialo veribinio nei, a parilo toru laka ea kanalo vovaiano nalo, banbano maka bunu amerou ka vite tai, mia aju amil niegeniege Atua kanano kulo soñi nalo.

<sup>11</sup> Nailiano nalo na vio mave ajikili lie loa tomu nalo na, mia amijikia ka aju jukamu ea Atua mirano ea vio mave, mia amerou ñele ka ail niegeniege tomu nalo na, mia nalo na maka atibe nei, maka aial lerinio. <sup>12</sup> Vite miroano napano kito romial ka abe lu ñeli abe soñi ñele, mia tomu nalo na maka avitulubar leleio, aju amila lelan tolu nalo na. Kialo bajago nalo ajibe na, mila na ajibe ka temeul deden nalo ga, napano amila pariparilo ga, mia maka ala tonovo tai. Aju amiel janea vio jibe na banbano tomu nalo amilivi kalo amuebinvinlo, a mia tibe ga na bunu ban tomu nalo nei ga, aillo ga ka aial kanalo ñariano.

<sup>13</sup> Tomu nalo na jibe na, ajidom ka ala kialo jokoluolu nalo na parilo selivivi ea vio nonovio legiano ga, a ea bogo na kuvila sinaniano lu nalo na kenemiu, nalo amei atu jouro napano kialo jidomiano nalo rivujo ka jogvuiano na kialo vovaiano nalo ga. Nalo ajibe ka tukei nalo ñeli menko nalo napano amila lelan mokotenemiu

novo nalo, mia maka asidomial leleio ka kialo vovaiano nalo mia ala nalo bereio ajog rivova ñelea iorou.

<sup>14</sup> Miralo nalo bujo ka tira ka ala siakiano, a ajunña ajidom asen kariano nalo rivan rivano maka niabelo mave bogo tai kanio. Ba loa, ajunña abur kamiu dolu nalo napano amijikiki aban bijalo, a abe tomu na aberlogloglo bunu bereio ka ñarabo nalo na tinietii ñelea vite nalo. Ierinio, nalo na abe taara tai napano Atua kanano siniabu na jikili mia naio riakonlo vatitig n avo!

<sup>15</sup> Ajuvan ñarabo na memedu ruei aba ajunña ajajakisor ñarabo na tertelisu nalo na ña romijikia rover ka be ñarabo nalo na toro nei Palam Peor kanano, napano Iliano Lu berii naio jibe toro tai nanua beamu be naverialiano tai, mia ba tinien jii ñelea ka sen ñariesi nalo na vovaiano. <sup>16</sup> Mia kolvare ga, naio miilo manenea ka napano Atua miila togki na telisu tai mil ban naio bior kanano vovaiano nalo. Togki nalo maka ajikia ail, mia ninei naio mil jel ea toro joono, buriri kija kiano bajago vovu nalo nei.

<sup>17</sup> Tomu na bova nalo na ña nojo neberilo na, nemijikia never bunu ka nalo ajibe ka bulumirano uei napano naio jabo ruei, napano toro na ña midoujer naio maka rijikia rialeal uei eaio. Peli nalo ajibe ka mavo ñeli vio melijokolo napano rojaaro kanio, reberianña yuo rivovo, mia makanio, jegi miuvu bulagio bano. Mia tomu nalo na, kanalo vio na memedu tai napano be burumelijo laka jo kia na vo, nina ea vio na jogvaiano. <sup>18</sup> Mia monoka avar vironiano tibe na, bior ka napano niolo bujo ka sibiano nalo a ilivevaviniano nalo, napano jo buru ñelea tomu dolu nalo kialo jidomiano. Tomu dolu nalo nei, aburo den yetemeriba vonga abinimei jouro maka vesiou, mia vonganei tomu na bova nalo nei ajunña aber Iliano nalo na vaganiano na tinieiano va na bajago na kariano napano joalo, mila binimei burutomoruo lie vo, naruei ea ñarabo na aju aburvuru bulaglo bereio.

<sup>19</sup> Kanalo meuliano jo yetano ka moroano na toro na toru nalaiano na kariano kanano ruei, ana juñabe ajunña amila sibilili tomu nalo ka aver atakisorlo, mia aleal meuliano na bo? Maka rijikia tibe na, bior napano moroano na juñabe naio jo be tubo ka kanamo meuliano, mia jau kobe kanano toro na inñauano kiana, javukia nalo na, napano vonganei abinimei ajibe ka tomu na inñauano na moroano na kariano kanano ruei.

<sup>20</sup> Ver be riano ka amileal Tubo Yesu Kristo kiado Ioruriano ea kialo meuliano

nalo, abitulubar ka napano bajago na yetemeriba nalo ajuṁña amila lelanlo, mila aburo den naio abinimei, nina naio bo laka. Mia ver bogo telisu ga na naruei aban bereio ea kialo meuliano napano ajaluvo denio ga abinimei, nina naruei bova lie laka. <sup>21</sup> Ver maka lele ajikia bajago na ṁarabo na memedu p̄eli bo kija ve telisu banlo, mia bogo napano amijikia batitigio bo ruei, amiel ea kija bogo bulati, kar na iorou kanio abar p̄iliglo aban bereio, naina bova laka. Atua kanano iliano lu nalo na ṁa ajian banlo, beamu ruei ajaaro ka adu ea kialo meuliano, mia vonganei aju abilig taakalo ka naio bereio.

<sup>22</sup> Tomu nalo na jibe na, iliano juo naio jo beriilo napano tai, naio ber jibe nei, berinavo

*“Kuli ga naio mijikia ba jen bereio sano juloiano,” Ilimasou 26:11*

a juo nene naio ber jibe nei, berinavo

*“Ver jau kesekon batig kanamo bue, mia naio monoka rijaka riva rija jokolke ea bulukinia bereio.”*

### 3

*Tube kiano bogo na toru ka naio rime*  
*bereto*

<sup>1</sup> Banalo, jibe ka napano kamiu kubitulubar ruei, nina naio be kanaku ṁesi juo nene nei na biedu ban kamiu. Venia napano joa kanaku jidomiano ka nevivitauia buron ṁesi juo nalo nei, nojidom neverial iliano novo tealo napano mia amijikia avavavin ea kenemiu jidomiano tulaka ka rijai kenemiu meuliano nalo. <sup>2</sup> Nojidom never bo ka kamiu kuvitu tiniemiu maio daṁariga ka iliano nalo na naverialiano lu nalo re nua, bija bunu tuboiano vou napano kiado Tube Naioruriano naio jian ban kumemi kenemiu atevi nalo, ka kumemi nuver lilian van kamiu.

<sup>3</sup> Titai na be moti ka napano nojidom nover naio jibe nei, ber kamiu monoka kuvijikia ka ea bogo na maaro nalo, mia tomu na amiyotel ea Atua kiano iṁauano amijikia amaluvo. Tomu nene kanalo bajago nalo, ajuṁña ajidom venia ga napano nalo tinielo jito, mia aju amiakurano ea toro dolu kanano jidomiano. <sup>4</sup> Vite tai napano mia amijikia atu avital ea kito rivior, naio be tivelinio na tubo kanano iliano napano naio berenio mia naio rime

Kumemi maka numial vite tai leleio kija vo, p̄eli kamiu ga kumialio?”

<sup>5</sup> Telikiti na ṁa aber iliano na, maka asidom tiniel rimaio ka napano Atua kiano verikariano nalo abe riano daṁariga, a kanano iliano be kiano buruṁara moroano eaio. Javukia bogo na tiiano na yetemeriba, kanano iliano ga mila vio tiniabene jo, a mila yetemeriba bija borotano nene nalo a tei nene nalo. <sup>6</sup> Mia iorou ka nina, kanano iliano bereio naio mila buruṁara ueimiya jovuko yetemeriba nei bereio, napano burukon vatitig vite nonovio napano ajuao ka bogo na. <sup>7</sup> A kanano iliano nene naio jo miṁṁau vonganei kiana, naio jo bokar vatitig vio tiniabene a borotano na yetemeriba, ka atu rivan riva vokar bogo na nene na toru ea legiano na tibureiano mia naio rime ka sisen bulag meuliano na tomu nalo na ṁa maka asidom Atua ea kanalo meuliano. Nina naruei be moroano na Atua kanano iliano, mia tomu nalo nei maka asidom ajikia.

<sup>8</sup> Mo bilbilu nalo, ea tivelinio na verikariano na Tubo kiano bogo na rime ea bereio, bo ka kito tiniedo ribobogia re ka Atua naio maka vuluku yuka nalo p̄eli legiano nalo tibe ka kito. Ea Atua kanano vitiiano, yuka menu takurano bija legiano tai abe veverare ga. <sup>9</sup> Peli tomu tealo be tinielo ka aber Atua jo jii liliano laka ka rila venia na naio berkario, mia naio maka tibe na. Naio maka rivijuku kiki, mia jo mila kiano jidomiano ba tebievi laka, bior napano maka sidom toro tai rivakovio. Naio jidom rudu bogo rivan tomu nalo nonovio ka amijikia aviliglo.

<sup>10</sup> Be riano, bogo tai mia buruṁara legiano na Tubo kiano riyotuba ea yetemeriba. Mia rime tavukia toro na bina, napano yetemeriba maka rijikia ka naio jo binimei, mia riilo ka ga napano binimei bokar vio ruei. Ea bogo na, ea vio yauo nalo na tiniabene asaraburuburu tavukia tubaalo, ana avakovio nonovio, a mia sebi sisen vite nonovio rivan riva vokar napano yetemeriba vija vite nonovio napano aju naio, abisi.

<sup>11</sup> Naruei bior napano yetemeriba nei mia naio rime kurano tibe na, kiniou nojidom nevika den kamiu, ka bogo napano kuvitu kea eaio, bo ka kuve tomu nalo na juṁabe, a bo ka kamiu kuve lu p̄eli kuvimṁau Atua kanano turṁabe? <sup>12</sup> Kamiu monoka kuvisaaro ka legiano na rime, a ver kamiu kuvu, a kuvitu kuvimṁau sikili, mia kuvijikia kuvila riyotuba soṁeli.

Bogo napano naio rime, mia sebi rivilvili ea vio mave, sisen kokoa nonovio,

mia naio sisen vite nonovio na yetemeriba riiou bulagio. <sup>13</sup> Mia kito rotumolu rotu sikili ea kiano verikariano, napano naio berenio berinavo ve kiado vonuo vou tai, nina vio mave vou a yetemeriba vou, napano naio be burupati vio na bajago na memedu nonovio.

<sup>14</sup> Bilbilu nalo, nina naruei roju rorea naio ka rimei rivuru kito ravan ea vio nene, mia bogo napano maka rovokar vo, monoka ralavon ka rove lu, rotu romeravo, a rotua tumiāro.

<sup>15</sup> Be riano ka Tubo naio maka rimei vo, mia kito ve tiniedo re ka naio bova, monoka rasaaro ka napano naio midu bogo ban kito ka rovilig kito, a jian buluvio ban bilbilu dolu nalo bunu ka amijikia avokar ioruriano. Jidomiano na, kuruado novo nei Pol naio bunu ber ka kamiū ea mēsi tai beamu ruei, napano bivitauia bija masouano na bo nalo napano Atua jo jian banio. <sup>16</sup> Mia nina iliano nene kia ga napano naio jo jian ea kanano mēsi dolu nalo, bogo napano ver naio berii liliuano bereio na Tubo kanano.

Kiano mēsi nene nalo kirinovo laka, mia bogo tai kiano verloglogiano nalo teremi kija, mila na iliano tealo napano naio bivitauiaio, tomu tai maka ajikia avuluku vatitigio. A bogo tai, tomu nalo napano maka ve parilo rivu, pēli napano maka ajikia vite nalo, abuluku abilivilig kiano verloglogiano ba be dolu bereio, javukia na mīa aju amila ea iliano dolu nalo telabo ea Vivitauiano Lu nalo na. Mia bogo napano amila jibe na, mia ve re toro dolu napano mia naio rijog eaio, naio mila nalo ga aju aban ea mīarabo na laluvuiano.

<sup>17</sup> Kanaku bilbilu nalo, bior vite nalo na kiniou nojo tinieku maio ka kamiū julaka. Nemijikia ka kumijikia batitig vite nalo nei ruei, tenene na nojidom nesian iliano na jikili van kamiū bereio, ka monoka kuvitīkar batitigio. Kuvijamo ka re jidomiano na sibiano na tomu nalo napano maka atakii Atua kanano tuboiano ka mia amei avuru bulag kamiū bereio. Maka rivu ka kuvijoru bereio den vio na bo napano kumitua jikili eaio ruei.

<sup>18</sup> Kanaku iliano na maaro, ber kamiū kumiluo kumei kumeruo bo ea bajago na bo nalo na tinie-memiano a masouano na Tubo Yesu Kristo kanado Ioruriano kanano. Ana kito rejian meran mermerano van naio, vonganei, a ea bogo nalo napano aju abinime, rivan riva ribisi deio, Mm.

Kiniou, Pitere.

## **Mesi Moti Na JONE Naio Bivitauiaio Verialiano Moti**

*Tukunuano bulati na niosi nei*

Jone kiano mēsi moti, naio be kiano buruñara jidomiano juo. Nana beamu, ka ridu bulag namoneano nalo kialo jidomiano napano abuluku mēsi nei, ka bogo nonovio atu aiasol lo vatitig ka kialo jidomiano ve takurano ga, a ka aiasol lo vatitig vija Atua, a kenerinio Yesu Kristo.

Mia juo nene ka ilikakarulo ka atakisore naverloglogiano nalo napano kialo verloglogiano nalo maka rimemedu, bior napano naverloglogiano nalo nei amijikia ala bulag yimo lu ea kialo ilisibiano nalo, ana mia namoneano nalo maka bunu ajikia aiasol lo vatitig ea jidomiano ve takurano ga.

Naverloglogiano nalo na aju aberloglog tomu nalo, aber bajago va nalo amaluvo bior napano tomu nalo ajuo yetemeriba, a aju amila vite nalo na yetemeriba nei, a vite na berial ka Yesu, napano Atua kenerinio, naio maka ve toro kario tibe kito. Nalo aju aberinavo ver Atua rilarur toro, toro nene mia maka bunu rijikia tinien maio ka meuliano na yetemenba nei bereio, a buru iakurano ver toro jibe na rila kariano ðeli rila re kariano, a buru iakurano ver naio tinienmiia toro dolu ðeli maka tinien riiaio, mia vite nalo na barei ga. Jone bivitauia mēsi nei, berial meravo napano Yesu Kristo be toro kario jibe kito. Mia naio ber kirisikili ber tomu nalo napano amonea Yesu, a tinielo Atua, nalo monoka tinielo titiilo bunu.

*Torogio nalo na niosi nei*

Iliano moti 1:1-4

Miamoiano bija meljokouo 1:5—2:29

Atua kenerinio nalo bija Siñaro kenerinio nalo 3:1-24

Niununo na burupati ilirianiano bija niununo na burupati ilisibisibiano 4:1-6

Toro kiano bajago na tinien jii toro 4:7-21

Bajago na moneano na mijikia tuvulu tulaka 5:1-21

*Toro na berial Atua kiano meuliano ban kito naio jo binime rui ea yetemeriba nei*

<sup>1</sup> Vite tai, re nua ea bogo na tiiano, mia vonganei ga na kiniou nomijog, a nemial ka miraku, nobitii batitig bo banbano-o na nojokol ka juñaku, vite nene siano

jibe nei berinavo Burupati Meuliano na Maka Rijikia ribisi bogo tai, mo tenene na kiniou nejidom novivitauiiao van kamiu. <sup>2</sup> Tenei, na nanua kito maka rejikia naio, naio jo ga naljuo Atua Teta o-o, mia vonganei ana miyotuba medave ea mirado ea yetemeriba nei rui, naruei kumemi miroano numialio, ana numituñia nuberialio ka tomu nalo. <sup>3</sup> Numijog memedu ka burutiliniememi, a numialio memedu ka mirememi, naruei numisidom nuverial ka kamiu ka mia kamiu bunu kuvijikia kumoneaio. Ver kamiu kumonea, mia kuvijikia kumei ve takurano rivija kumemi, tibe ka kumemi nube takurano bija Atua teta a bija kenerinio Yesu Kristo rui. <sup>4</sup> Tena mila buruñara saariano joa kumemi dañariga nei, a ver kamiu kuvidukar batitig iliano nei na ña nojidom nover ka kamiu ea mēsi nei, mia buruñara saariano nei toa kamiu bunu, ana mia rila kito rovinu rojog rivu ve toru laka.

*Atua naio be burubati na miamoiano*

<sup>5</sup> Iliano na Atua kenerinio midu ban kumemi, ber monoka kumemi nuverial ka tomu dolu nalo, naio jibe nei berinavo. Atua naio be burupati na miamoiano, maka lele kiri melijokouo tai ritoaio. <sup>6</sup> Tibe na, ana ver kito rotuñia roverial ka kito robe takurano bija Atua, mia rojuñia romila bajago na melijokouo keano vo, nina rojuñia romila sibi ga na, kito maka rotuñia rala tena be riano. <sup>7</sup> Mia ver rotuñia reiel dañariga ea miamoiano na ña Atua naio joaio, mia naio rila ka rotua natinie takuraniano na bo tulaka vija kito, ana mia reial ka kenerinio Yesu, kiano burukija naio mijikia to sekon kito romeravo ka kiado kariano nalo.

*Ieliano ea miamoiano na Atua kiano: Monoka rotuvan nonovio bajago na kariano*

<sup>8</sup> Toro na ña jo mila bonua, ka ber maka ve na bova tai toa kiano meuliano, kiano iliano nei naio maka rive riano leleio, naio jonña mila sibilili naio bereio. <sup>9</sup> Mia ver kito roverial ga kiado kariano nalo, mia Atua naio riviekokoa kito, mia naio rivar bulag kiado vovaiano nalo den kito, rila kito romeravo. Naio ga mila batitig ñarabo ka mia naio rila tibe na rui, a romijikia ravarkar tiniedo ea naio ka mia naio rila van kito rivare ga napano naio berkario. <sup>10</sup> Mia ver kito rotuñia rala bonua, roverinavo kito tibe na ña rala kariano tai, nina jibe ka rober Atua naio be sibiano ga, a romila jibe ka napano kanano ilirianiano novo, maka bunu rodu to vatitig ea kiado meuliano leleio.

## 2

<sup>1</sup> Keneriku nalo, nojidom novivitauiā iliano nalo nei van kamiū ka riija kamiū ka kuvitilubar ka bo ka mia kamiū monoka kuvila re bunu kariano bereio. Mia ver bogo tai, toro tai rila tena bova tai, kito monoka tiniedo rimaio ka Yesu Kristo naio ju rorea ju, jibe ka toro lu tai ka rivar kiado iliano. Naio kiri memedu, a naio meravo, ka mia naio mijikia riva sikili tua Atua Teta mirano rimemedu, ka mijikia rivika denio ka naio tinien riia kito, a riviekokoa kito. <sup>2</sup> A m̄arabo na ka mia Atua riviekokoa kito naio jibe nei, nina be Yesu ga na, bior naina be jokoluolu ka mia rivar bulag kiado kariano nalo, kito tomu nalo nonovio na yetemeriba nei.

*Ka reiel ea Atua kiano miamoiano: monoka romonmonea kanano tuboiano nalo*

<sup>3</sup> A ver toro tai rivika tibe nei, riverinavo: ?Kiniou maka najikia, kiniou nojo nomijikia batitig Atua, p̄eli na maka noto nojikia batitig naio rivu? ?Kiniou nobe kanano, p̄eli na maka nove kanano? Ver tibe na, bo ka rovika den naio bereio, roverinavo: ?Jum̄abe, jau kjojm̄a komonmonea kanano iliano nalo, p̄eli na maka kotojm̄a komonmoneaio? <sup>4</sup> Nina bior ver toro tai naio riverenio river naio mijikia batitig Atua, a naio be kanano, mia naio maka tojm̄a rila vite nalo na m̄a Atua kanano tuboiano nalo aberenio, toro na naio maka to river riano na, naio mila sibi ga na. <sup>5</sup> Mia toro na m̄a jo monmonea batitig Atua kanano iliano nalo bo, naio jo berial ka naio jom̄a tinien jii naio riano, tinien jii naio jo binimeī lie vo bogo nonovio. Naruei ea m̄arabo nalo na jibe na naruei, kito romijikia rejikia batitig ka kito robe Atua kanano riano. <sup>6</sup> Toro na ber naio be Yesu kanano, mia kito monoka rejikia reial ka naio miaia Yesu ea kiano meuliano.

<sup>7</sup> Banalo, ea tivelinio tai, tuboiano na m̄a nojo nobivitauiā ban kamiū naio maka ve iliano na terivou na vonganei ga na, mia naio be iliano tai na beamu mugaruei, naio be Atua kanano iliano na m̄a kumijogio mugaruei. <sup>8</sup> Mia ea tivelinio dolu nene, be riano bunu, ka tuboiano nei, naio jibe ka naio be terivou laka ban kito, bior rojum̄a romial kanano miamoiano naio jo mila melijokouo naio jom̄a buru didig naio bano, ana naio jo buru yulu riano binimeī ruei. Naio jibe ka ga ea Yesu kiano meuliano ruei, a vonganei naio jo binimeī jibe na bunu ea kiado meuliano nalo, ana naio jo mila kito robitilubar ka iliano vou nei naio riano mugaruei.

<sup>9</sup> A verver toro tai naio tojm̄a river naio jom̄a miel ea miamoiano ruei, mia romial ka naio jom̄a jerm̄i ka kuruano, jom̄a mila bova kanio, toro na naio jo keano vo ea melijokouo. <sup>10</sup> Mia toro na tinien jii kuruano, mila bo kanio julaka, toro na naio jo miel ea miamoiano ruei, naio maka bunu riel vovu ea melijokouo mia naio to rijoru re bereio bogo tai. <sup>11</sup> Mia naio na m̄a jo jerm̄i ka kuruano, naio maka tibe na. Naio jo keano vo ea melijokouo, melijokouo mila jibe ka mirano miunu, naruei naio jom̄a miel vovu ea vio bobogio dam̄ariga, naio maka rijikia rivitilubar batitig kiano m̄arabo, naio maka rijikia riva na mia riagago sel eaio.

*Ka reiel ea Atua kiano miamoiano: maka rejikia tiniedo tii yetemeriba nei*

<sup>12</sup> Kamiū keneriku nalo, kamiū kanaku solbouo nalo ea kiado moneano, kiniou nojom̄a nobivitauiā iliano nalo nei biedu ban kamiū bior kamiū naruei napano Atua karam̄ado naio biekokoa kenemiu kariano nalo kar Yesu Kristo siano, mila kumijikia naio.

<sup>13</sup> Kenemiu kulovu nalo, kiniou nojo nobivitauiā iliano nei ban kamiū bior kamiū naruei kumijikia batitig naio lie ruei, napano naio meul jo beamu mugaruei, beamu ka tiiano na yetemeriba nei.

<sup>14</sup> Kenemiu m̄eaku nalo, kiniou nojom̄a nobivitauiā iliano nalo nei ban kamiū bior kamiū naruei na m̄a kumisikili bo, kamiū kumidu batitig Atua kanano iliano joa kenemiu meuliano ruei, a kumitovulu toro na kirivova na ruei.

<sup>15</sup> Kiniou nojidom never tibe nei ka kamiū nonovio, ka mia tiniemiu tii m̄eala re yetemeriba nei, bija kanano saba nalo. Toro na m̄a tibena, naio maka rijikia tinientii vatitig karam̄ado. <sup>16</sup> Naina bior saba nalo na yetemeriba nei, p̄eli na kiano bajago nene nalo, abe kiri dolu, maka atibe ka saba nalo na karam̄ado Atua kanano vija kiano bajago nene nalo. Vite nalo na yetemeriba nei nalo ajibe nei, abe burupati na nasidom m̄eala vite nalo, abe burupati na m̄a abur mirado, a abe burupati na varvariano na kiado meuliano nalo.

<sup>17</sup> Yetemeriba nei, vija kanano saba nene nalo na m̄a tomu nalo ajum̄a ajidom m̄eala julaka, naio jo barlaka ban ka mia rivakovio ga mia toro na m̄a jo mila memedu ka Atua kanano sidomiano, naio to tobo to.

*Ka reiel ea Atua kiano miamoiano: monoka rovitikar rivu uolu nalo*

<sup>18</sup> Keneriku nalo, vonganei kito rojua bogo maariano nei ruei, mia jibe ka na m̄a kumijog ruei, toro napano siano Jerm̄iii

ka Kristo, naio mijikia riyotuba ea bogo nene. Maka reial naio vo, ana kito rojkar ka romial sermiano sesa ea Yesu nalo telabo ruei, naruei mila na robitilubario ka mia vesiou re, mia legiano na maaro rimeĩ. <sup>19</sup> Uolu nalo na m̃a nojõña noberiilo na, kamiu kumijikia kiana. Beamu, nalo aju bija kito iviso ka kito, mia iorou ana ajumolu, ajuvan kito aburo den kito bereio. Vonganei, robitilubar batitiglo, ka nalo maka amei ve takurano rivu vija kito, bior ver maka, mia atu rivu vija kito kia navo. <sup>20</sup> Mia kamiu na m̃a kumitu bo kia navo, Toro Lu Kristo naio mioako kamiu ruei, naruei kamiu kubitilubar kanano ilirianiano, mia maka kuvijikia kuvitaluvo den naio bereio. <sup>21</sup> Kamiu kuver re ka kiniou nojidom neil van kamiu rivior jidomiano tai na berinavo kamiu maka kuvijikia vite, bior naio maka tibe na. Kiniou nomial ka kamiu kumijikia kuvitii veve masosoua ilirianiano a iliano na be sibiano mugaruei, kumijikia batitig ruei ka ilisibiano maka rijikia riyotuba ea ilirianiano, naruei kiniou nojidom neil van kamiu ka notunukakar kamiu ga.

<sup>22</sup> ?Ana venia naruei be ilisibiano na m̃a dolu nalo na m̃a ajunã aberialio? Naina be iliano namã berenio jibe nei, ber Yesu naio maka ve Naverikariano na Atua miila naio binimeĩ ka rilarur yetemeriba nei. Iliano nei naio be iliano na toro na siano Jerniũ ka Kristo ga, a toro na m̃a ber iliano nei jibe na, naio jomã miitava ea Atua Teta, a jomã miitava ea kenerinio. <sup>23</sup> Toro na m̃a bilig taakano ka Atua kenerinio, Atua maka rijikia toa naio, mia toro na m̃a berial batitig bo ka ber naio midu Atua kenerinio ea kiano meuliano, mia Atua bunu rimonmon ga to vija naio damãariga.

<sup>24</sup> Ioluano Vou na bo nanua kamiu kumijog be moti ruei beamu, naina naruei be iliano na bo a be riano, naruei bo ka kuvidu batitigto to rivu ea kenemiu meuliano. A ver tibe na, mia kenemiu meuliano mijikia to rivu vija Atua a kenerinio bogo nonovio, <sup>25</sup> naina naruei kumijikia kuvokar meuliano na m̃a naio berkario ka mia sian van kito, na mia maka rijikia ribisi bogo tai.

<sup>26</sup> Naina ga nojidom nover ka kamiu ea tivelinio ka nalo na m̃a aju amila sibilili kamiu, napano ajidom avuru kamiu kuvan ve dolu bereio. <sup>27</sup> Kristo naio mioako kamiu ruei, a Niununo Lu na kumijevio ruei ka bogo na naio jo kia ga kamliko vo. Naio mijikia riverloglog kamiu ka saba nonovio na be riano a memedu, mo kamiu kuvilavon re ka kuvisirago toro dolu ka riverloglog kamiu ka saba tai bereio. Mia kamiu kuvilavon ga tibe ka na Niununo Lu

naio berloglog ka kamiu ruei, na m̃a naio ber bo ka na kamiu kuvidu batitig kenemiu meuliano to rivu ea Kristo tulaka.

<sup>28</sup> Naina naruei, keneriku nalo. Verenio kiado meuliano naio to rivu ea Kristo namãariga, mia maka rejikia rojog rivova ka bogo na ver mia naio riyotuba ka kito bereio. Mia ver maka, mia ve burumãara kenieno imouiano, mia rosidom rodu van mirado ka bogo na raial naio to rimeĩ. <sup>29</sup> Kito romijikia ka Kristo, kiano bajago nonovio naio bo a kirimemedu tanea, naruei toro na naio bunu jibe na, romijikia rover ka kema na bunu naio be Atua kenerinio javukia Kristo.

### 3

#### *Kito robe Atua kenerinio*

<sup>1</sup> Kamiu kuvisidomii von tinietiano na Atua Teta kanano na ban kito tomu na bova. Naio tinien jii kito toru laka-o mia, banbano-o na mila ban kito jibe ka na kito romial kito robe kenerinio nalo ga. Mia maka ve kito ga na ramial kito jibe na, bior naio bunu, naio buru kito robinimeĩ jouro ea kiano m̃aratavo ruei, jibe ka kenerinio nalo memedu ga. Nalo dolu nalo na yetemeriba nei nalo maka ajikia batitig karamãado vo, jibe ka na m̃a kito romijikia naio, naruei vite na mila na nalo maka ajikia kito bunu, ka kito robe kenerinio nalo. <sup>2</sup> Kanaku bilbilu nalo, romijikia rover vonganei kito robe Atua kenerinio nalo, mia maka rejikia vo, ka iorou kanio, mia naio rila kito romei rove vaio ga bereio. Mia be titai ga romjikia batitiglo. Bogo na Tubo Yesu Kristo rimeĩ bereio, mia rovitikar naio ka mirado rimemedu, mia rovitilubar naio garui memedu, mo bogo na reial naio tibena, mia romei rotibe ka naio ga. <sup>3</sup> Naruei toro na sidom ka mia naio tai na mia rimeĩ tibe ka Tubo Yesu tibe na, naio monoka to rivokar vatitig rivu kiano meuliano rimeravo a rive lu, tavukia Yesu ga.

*Kito Atua kenerinio nalo: monoka rotuvan bajago na kirivova*

<sup>4</sup> Toro na m̃a mila kariano, naio jomã mila korov Atua kanano tuboiano, bior burupati na bajago va, naio be bajago na maka sidom rimonmonea tuboiano. <sup>5</sup> Mia bogo na Yesu naio binimeĩ ea yetemeriba nei, naio binimeĩ napano maka kariano toa naio leleio, naruei naio binimeĩ ka rivar bulag kiado kariano nalo. <sup>6</sup> Tibe na, toro na m̃a kiano meuliano jo bo ea Yesu, mia ve re bunu kariano tai toaio, mia naio rivijuku rivova re bunu. Mia toro na m̃a kariano joa naio julaka, naio



maka rivitii Yesu vo, naio maka rijikiaio vo. <sup>7</sup> Kanku kiritete sesa nalo, maka rivu ka mia nalo ala sibilili kamiu. Toro na ver kiano meuliano bo, naio be tor memedu javukia Kristo. <sup>8</sup> Toro na kanano meuliano bova, naio be Simiāro kiano toro, na naio be burupati na kariano ea yetemeriba nei jikar ea kiano tiano binimei bokar vonganei. Bajago va na Simiāro nei kiano naio mila na Atua kenerinio miyotuba ea yetemeriba nei, ka ruekon bulag kanano iñauano na bova nalo a ka rila kanano burumāra moroano naio ribisi. <sup>9</sup> Toro na jo jouro ea Atua kanano māratavo, mia naio rila re bunu kariano, bior Atua kiano meuliano joaio ruei. Naio be Atua kenerinio, naruei monoka naio rivar karamāno kiano bajago na bo nei, ana naio maka bunu rijikia rila na bova. <sup>10</sup> Ea mārabo nei naruei kito romijikia ka rovitilubar batitig ga kei na be Atua kenerinio, a kei naio be Simiāro kenerinio. Toro na maka rila rimemedu p̄eli na toro na maka tinien tii kiano māratavo, toro na jibe na naio maka ve Atua kenerinio leleio.

*Kito Atua kenerinio nalo: Monoka romonmonea tuboiano na tinietii toro dolu*

<sup>11</sup> Ioluanu navr̄ia kamiu kumitur̄ia kumijog mugaruei jikar ea burupati binimei, naio jibe nei, na m̄a naio berenio ber kito monoka tiniedo titii kito rivu bogo nonovio ga. <sup>12</sup> Kuvisidomii Simiāro kanano toro na nanua beamu na, Ken, na naio maka tinien tii batitig kuruano kar garuei Epel, naio muebinio m̄aro. Maka rivu ka kito rala tibe na, mia bo ka rosidomii ka venia na naio mila jibe na? Nina bior kanano iñauano nalo, Atua mialio abova ga, mia kuruano kanano, nalo amemedu bo, mia Atua naio jaaro kanio, tenene na mila na Ken mijoku m̄ele ka kuruano nei Epel, naio tinien jerio, ana naio muebinio m̄aro.

<sup>13</sup> Kiaku bilbilu nalo, bajago bova na jibe na, tomu nalo ajum̄a amilala mugaruei binimei bokar banei, naruei maka rejikia rejilo ver reial ka nalo amijoku ka kito bunu, a ajerr̄i ka kito bior Atua kiano iñauano novo nalo na ver romiñaukanio. <sup>14</sup> M̄a kito na m̄a kito maka m̄a reserr̄i ka toro, mia tiniedo tii kiado māratavo nalo rivu, nina be mārabo na mila meravo ka rojuvan m̄ariano, robinimei ea meuliano ruei. M̄a toro na tinietiano maka toa naio, naio jo keano ea m̄ariano vo. <sup>15</sup> Toro na m̄a jerr̄i ka kiano māratavo tai, naio jibe ka toro na muebin toro m̄aro ruei, a jibe ka na romijikia ruei, ka toro na m̄a muemue toro, meuliano na maka ve jukuti nene naio maka toa naio leleio.

<sup>16</sup> Peli kito tai naio jom̄a bika ber, ana tena m̄a ajum̄a aber, tinietiano, na naio be tena jur̄abe? Mo kito romijikia tinietiano na be riano jibe na: Yesu Kristo mijamo ka momou kiano meuliano bior kito, a ver tinietiano na toa kito, mia kito bunu rajamo ka kiado meuliano rivior kuruado nalo. <sup>17</sup> Toro tai, naio jur̄ano bujo ka saba novnovo nalo, mia kuruano tai naio maka ve kiano saba tai, naio jur̄ano bulati liki. Mia naio bitilubar kia ka kuruano nei jibe na, mia naio mila kiano iviso jikili lie vo kanio, naio maka sidom riijaio, Toro na jibe na, Atua kanano tinietiano maka toa naio leleio.

<sup>18</sup> Kanku tete nalo, kiado tinie-tiano naio monoka ve re iliano ga. Tinietiano na be riano, naio maka ve tena ververenio ga, mia be tena roim̄aukanio a ve tena ralaio. <sup>19</sup> Ana ver kiado tinietiano rivokar batitig jeleigio nene tibe na, naio mila mārabo na rejikia ka Atua kanano iliano naio bar mārati ea kiado meuliano. Ana tibe na, romijikia rojog rivu ga ka rava vaataro ka Atua, romerou ka naio re bunu. <sup>20</sup> M̄a bogo tai ana mia romerou ka naio, bior kiado jidomiano ga tibure kito bereio, rila na rotum̄a rosidomial bere kanado vovaiano, mia Atua naio mijikia nonovlo biniu ruei, a kiano viekokoano naio buru tomoruo laka, naio bar bulaglo den kito ruei. <sup>21</sup> Banalo, a ver tiniedo nalo ameravo rivu, mia nalo maka ajikia atibure kito bereio, rila na maka lele romerou ka romei rotumolu rotua Atua ka rovika vite den naio. <sup>22</sup> Ver romonmonea naio, a rotum̄a rala tena naio ga jidomio, mia romijikia rovokar vite venia na m̄a robika denio. <sup>23</sup> Atua kanano tuboiano ea kito naio jibe nei, ka ber: kito monoka romonea kenerinio Yesu Kristo siano, amonoka tiniedo titii kito bogo nonovio, tibe ka na naio ber ka kito. <sup>24</sup> Toro na m̄a naio monmonea Atua kiano tuboiano, naio joa Atua, mia Atua naio joa kanano iviso. ?M̄a romijikia rejikia ka naio joa kiado iviso jur̄abe? Tena, Niununo na naio jian ban kito, naio mila romijogtubar ka vite nei be riano laka.

## 4

*Kito Atua kenerinio nalo: monoka ravititar uolu nalo na Kristo kanano a bajago nalo na yetemeriba*

<sup>1</sup> Banalo, ver toro tai ver Niununo Lu joa naio, mila na naio jom̄a berial kanano iliano, bo ka kamiu kuvitii veve vatitig niununo neibano joaio, be riano ka be Atua kanano, p̄eli na maka ve Atua kanano. Kito monoka rovitii vatitig rivu, bior be

naverialiano sibusibi miroano aju aban janea yetemeriba nei ruei. <sup>2</sup> ? Ana mia kito romijikia rovitii niununo na tuniabe? Romijikia rovitilubar Atua Niununo bior naio jonña berial ber Yesu Kristo naio binime be toro, naio binime miyotuba ea yetemeriba nei. <sup>3</sup> Mia ver niununo tai tonña river re tibe na, niununo na naio maka ve Atua kanano. Niununo na jibe na naio miyotuba ea uolu na Kristo kanano, na mña kamiu kumijog mugaruei ka naio jo binime, ðeli naio joa yetemeriba vonganei ruei. <sup>4</sup> Mia keneriku nalo, mia kamiu kumerou ka re naverialiano sibusibi nalo na, bior kumitu tivelinio ka Atua, kumijikia kuvituvul ga. Be riano ka mugaruei, naina joa kamiu naio jikili lie loa ka na naio jo yetemeriba nei. <sup>5</sup> Tomu na sibiano na, nalo abe tomu na yetemeriba nei, a iliano nalo nanña aju aberenio amolmoluo ea jidomiano na yetemeriba nei, a kulo dolu nalo na yetemeriba nalo ajomña amia-gago kalo. <sup>6</sup> Mia kito namoneano nalo, kito maka rove tomu na yetemeriba nei, robe Atua kanano. Toro na naio mijikia batitig Atua, naio jaaro ka riagago ka kito, ana na nana naio maka ve Atua kanano, naio maka sidom riagago ka kito. Ea mñarabo nalo na naruei romijikia rovitii lubar ka niununo na iliano na be riano, a niununo na ilisibiano.

### *Bajago na tinietiano*

<sup>7</sup> Banalo, bo ka kito tiniedo riia ea kito tulaka ga, bior ka tinietiano naio be Atua kanano bajago. Toro na tinien jii toro, naio be Atua kenerinio, naio bar bajago na Atua kanano memedu, a naio mijikia batitig Atua bo ea kiano meuliano. <sup>8</sup> Toro na mña maka tinien tii toro, naio maka rijikia Atua vo, bior ka Atua naio be burupati na tinietiano. <sup>9</sup> ? Ana kito romial Atua kanano burumñara tinietiano nene ea bogo na vabe? Kito romial kiano tinietiano nene ka bogo na naio miila kenerinio takurano mñanono garuei naio binime ea yetemeriba nei, ka mia rila ka mia kito romeul. <sup>10</sup> Naina naruei be tinietiano na naio be riano laka. Naio maka na mña kito tiniedo jii Atua, mia nina na naio tinien jii kito, banbano-o na mijamo ka kenerinio binime mila sida ka rila merevuiano ka kanado kariano nalo.

<sup>11</sup> Banalo, jibe ka nanña Atua naio tinien jii kito, naio bijuku bo ka kito julaka, bo ka kito bunu monoka tiniedo titii kito tulaka, rovijuku rivu ka kito. <sup>12</sup> Toro maka lele rial Atua, mia ver rotumña tiniedo titii mñelea kito, mia rial ka na Atua naio joa kiado iviso, a bajago na kanano tinietiano mia

naio to rime ve toru lie vo tulaka ea kanado iviso momou nalo.

<sup>13</sup> Kito romijikia ka Atua naio joa kiado iviso, a kito roju bo ea kanano iviso, bior naio jian Niununo memedu ban kito, ka rila ka rojoglubar ka tenei be riano. <sup>14</sup> Ana robitilubar bunu ka be riano ga ka Atua Teta naio miila kenerinio nene naio binime ka rive ioruriano na yetemeriba nei, jibe ka na romial ruei ka mirado a bunu ka na mña rojurña roberial janea vio nonovio. <sup>15</sup> Toro na mña jo berial ber Yesu naio be Atua kenerinio memedu, Atua joa kanano iviso, a naio joa Atua kanano iviso bunu. <sup>16</sup> Kito ramijikia rejikia vatitig ka Atua naio tinien jii kito, bior ka romijikia rojog batitig ea kiado meuliano nalo, mia kito romijikia romonea kanano iliano na mña naio berial ban kito.

Atua naio be burupati na tinietiano, mia toro na bajago na tinietiano binime mison batitig kiano iviso, naio joa Atua kanano iviso, ana Atua bunu joa kiano iviso. <sup>17</sup> Atua naio jidom rila bajago na tinietiano to rime ve toru lie tulaka ea kanado meuliano, ka rila ka kiado bajago na yetemeriba nei na tavukia Kristo kanano na nanua na. Naruei ver kanado bajago naio rime rivu tibe na, mia naio rivu laka rivan kito, bior ka mia kito romerou re a roimou re ka legiano na tibureiano na naio jo binime. <sup>18</sup> A ver toro tai rimerou, naina bior naio mial kanano vironiano tai jo binime, mia naio maka rijoglubar ka na mña Atua kiano tinietiano naio mila batitig kanano meuliano ruei. Mia bajago na tinietiano na bo naio mijikia rijil deven merouano na burutomoruo nei, rivanvano-o ribisi.

<sup>19</sup> Verenio kito rotumña tiniedo tii toro dolu, naina bior Atua naio tinien jii kito beamu ruei. <sup>20</sup> Toro na mña jo ber naio tinien jii Atua, mia naio jo kia ga mña jermii ka kanano mñaratavo tai, naio jonña milasibi ga. A ver naio maka tonña tinien tii kiano mñaratavo neibano naio mial ka legiano nonovio ga, naio maka rijikia tinien tii Atua na naio maka lele rial kija naio. <sup>21</sup> Kristo kiano tuboiano napano ban kito naio jibe nei, ber toro na mña jidom ka naio be toro na mña tinien tii Atua, naio monoka tinien tii vatitig bunu kanano mñaratavo.

## 5

<sup>1</sup> Mia toro napano naio monea ka Yesu naio be Navarikariano, toro na naio be Atua kenerinio riano. Ana verenio Atua kenerinio nei naio riverenio riverinavo naio tinien jii Atua kiano Teta, ana na naio monoka tinien tii Atua kenerinio dolu

nalo bunu. <sup>2</sup> ? Mia naio rijikia ka naio tinien jii batitig nalo tumabe? Verenio naio tinien tii Atua, a naio rimonmonea kanano tuboiano nalo, mia naio rial ka na mña naio jomña tinien jii Atua kenerinio nalo memedu ga. <sup>3</sup> Bajago na tiniedo tii Atua naio jibe nei: kito robokar batig kiano iliano. Kanano tuboiano nalo maka ave temi laka van kito ka ralaio, <sup>4</sup> bior kito rabe kiritete nalo namña romiyotuba ea Atua, mia ver kito rotumolu rotu sikili ea kiado viekouoiano, kito robe tomu na ratovulu yetemeriba nei ruei. <sup>5</sup> Kiniou nebika den kamiu bereio: ?Toro na mia tovulu yetemeriba nei, naio be kei? ?Naina ga napano naio jumolu jo jikili ber ka Yesu naina be Atua kenerinio memedu.

<sup>6-8</sup> ? Mia jumabe ka kito romijikia ka Yesu naio be Atua kenerinio? Tomu tolu aberial iliano nei ban kito: tai naio be Niununo Lu, tai naio be uei, a tai naio be burukija, a nalo tolu nene, aberial jibe ka iliano takurano ga. Uei naio berenio bajago na Yesu Kristo kiano, ka napano naio miyotuba yetemeriba nei jibe ka venia, a naio bokar varueiano jumabe, mia romijikia rovitilubarario ka naio be Atua kenerinio. Mia maka naina ga, mia burukija bunu naio ber bajago na Yesu kanano bereio, napano naio m̄aro jumabe, mia romijikia rovitilubarario ka naio be riano. Ana mave ka naio bereio, Niununo Lu, napano kanano iliano naio be riano julaka, naio berialio kiri meravo ban tomu nalo re nua ea miralo bunu ruei. <sup>9</sup> Mia iliano nalo namña Niununo Lu berialio nalo temi laka, tibe na monoka romoneaio, bior naina naio maka ve kulorinio kanano iliano, mia naio be Atua kiano ilivervisivisiano, ka naio mial kenerinio jibe venia. <sup>10</sup> Toro na mña monea Atua kenerinio riano, mia iliano nalo nei aju jikili bo-o ea kiano jidomiano napano naio maka sidom dedeio ka bereio, mia toro na maka rimonea Atua kenerinio, naio maka rimonea vite napano Atua ber bisivisii ban kenerinio, naio jibe ka napano naio mial Atua, ber naio mila sibi ga. <sup>11</sup> Ana iliano napano mia kito monoka rotumolu rotu sikili ea bogo nonovio, naio jibe nei, ber: Atua naio jian meuliano napano maka ve jukuti nene ban kito, ana burupati na meuliano nene miyotuba ea kenerinio ga. <sup>12</sup> Toro na mña Atua kenerinio joa kanano meuliano, naio bokar meuliano ruei, mia naina Atua kenerinio maka toa kanano meuliano, naio maka rivokar meuliano nene vo.

<sup>13</sup> Kiniou nojo nebivitauiam rñesi nei biedu ban kamiu na na mña kamiu kumonea Atua kenerinio siano ruei, ka rijai kamiu ka kenemiu jidomiano veve juo re, mia ka kuvijikia rivu ka kubokar meuliano napano maka ve jukuti nene. <sup>14</sup> Bogo na maka tiniedo veve juo, romijikia rotumolu rotu sikili ea naio, naruei vite venia na rovika den naio rimemedu ka kiano sidomiano, mia naio rijog kito. <sup>15</sup> Naruei ver kito romijikia batitig ka naio mijog kito ruei, romijikia rejikia vatitig bunu ka vite napano kito robika denio, robokar ruei.

<sup>16</sup> Ver kito real kuruado tai napano naio jomña mila kariano, napano kar-iano nene maka ve toru laka, maka ka toro rim̄aro rivorio, p̄eli ka rivuru bulag tomu den Kristo bereio, romijikia robolkouo van naio, ana mia Atua mijikia jaamo ka naio to joomo ea meuliano ga. Mia maka kiniou never bo ka kito robolkouo ka toro na mña mila burum̄ara kariano bova, bior ka napano kariano tealo abe tena m̄ariano ga, ana ver toro tai rila, mia maka rejikia rever titai bereio. <sup>17</sup> Vite nonovio na amila bova naio be kariano, mia kariano tealo ga abe tena m̄ariano, mia tealo maka ave tena m̄ariano.

<sup>18</sup> Mia kito romijikia ruei ka toro napano naio binime be Atua kenerinio ruei, p̄eli kariano na maka ve tena m̄ariano p̄eli be tena m̄ariano, maka ka mia naio rila bereio. Mia toro na jibe na monoka naio rivitikar batitig naio, naio rivel ea vatitig kiano meuliano, naruei Toro na Bova nei naio maka rijikia rila bulag naio bereio. <sup>19</sup> Yetemeriba momou nei naio jotano ka moroano na Toro na Bova nei kanano, mia kito namoneano nalo, romijikia ka robe Atua kanano ga. <sup>20</sup> Kito romijikia ka Atua kenerinio naio binime, naio jian vitilubariano ban kito ka mia rejikia Atua napano naio be riano, ana kito rojua ga naio naruei, vija kenerinio nene nei, Yesu Kristo. Kanado Atua nei naio be riano, mia meuliano na naio jian ban kito naio maka ve jukuti nene.

<sup>21</sup> Keneriku nalo: Kamiu kuvitikar vatitig kamiu rivu, mia kuvilotu ka Atua nei naio takurano ga tulaka, kuvijamo ka re tavoru dolu nalo amei ka adu jeleig naio ea kenemiu jidomiano nalo.

Kiniou, Jone.

*Iliano na maaro: Meuliano na maka ve jukuti nene*

## Mesi Juo Na JONE Naio Bivitauiaio Verialiano Moti

### *Tukunuano bulati na niosi nei*

Jone kiano mēsi juo nene, naio bio bere naio ber naio be "Navagadeano," ana naio bivitauia ba ban "tira tai na Atua bijauialar naio" a bija "kenerinio nalo", mia romijikia ka naio berenio ga "yimo lu bija kiano namoneano nalo." Mesi nei ber kalo ka nalo tinielo titiilo, a berkakar banlo ka monoka avitikar vatitigio, ka naverloglogiano nalo na kialo verloglogiano maka rimemedu amei re ala bulaglo ka kialo verloglogiano sisisibi nalo.

### *Torogio nalo na niosi nei*

Iliano moti 1-3

Namoneano nalo monoka tinielo tii tomu nalo 4-6

Iliano na ilikakariano ban namoneano nalo 7-11

Iliano maariano 12-13

### *Iliano na be moti*

<sup>1</sup> Kiniou tormoruo navagadeano, nebivitauia mēsi nei biedu banso, javukia tira tai napano Atua bitirilarso, a ea kenerimo lu nalo. Kiniou najaaro toru laka ka neviviuo kamiu ea mēsi nei, bior ka kiniou tinieku jii kamiu toru laka, mia maka kiniou ga ve takurano, mia namoneano dolu nalo bunu nalo aju tinielo maio ka kamiu damāriga. <sup>2</sup> Kito roju tiniedo titii kito jibe na bior Atua kiano ilirianiano naio joa kanado meuliano ruei, a mia naio toa kito rivano-o na maka rijikia ribisi bogo tai.

<sup>3</sup> Kiniou nobolkouo ka kamiu, ka tiniememiano, tinieiano, a turūaroano binime i den Atua karamādo, vija Yesu Kristo na naio kenerinio, a joa kito, mila na bajago na ilirianiano a tinietiiano naio jo binime burutomoruo lie ban kito damāriga.

### *Takii bajago na tinietiiano damāriga*

<sup>4</sup> Kiniou nejidom neverial vanso, ka namial kenerimo tealo ea vio nei ruei, mia najaaro toru laka ka nemial ka nalo aju amiel ea bajago na ilirianiano bo laka, javukia na Teta naio ber ka kito. <sup>5</sup> Nena, kiniou nemial tenei, naruei nojidom notunukakar kamiu bereio, ka kumonmonea kanano tuboiano nei napano robokario nua ea burupati nene ruei. Tibe na, maka never vite vou tai van kamiu, neberial iliano tealo ga, ka kito monoka tiniedo titii

kito damāriga. <sup>6</sup> Ver kito rosidom rala tibe na, mārabo nene naio jibe nei: monoka romonmonea Atua kanano iliano. Ana kanano burumāra tuboiano napano naio jo beamu ruei binime i bokar vonganei, romijog naio ber jibe nei ber: kito monoka reiel damāriga ea bajago na tinietiiano.

<sup>7</sup> Tomu na juboluboiano miroano, aju aban ea vio yetemeriba nei ruei ka avilig tomu nalo kanalo jidomiano. Nalo ajumā aberinavo Yesu naio be toro tai ga jibe ka kito, maka ajidom ka tomu nalo amonmonea ka Yesu naio be Naverikariano na naio binime i ea Atua ka rilurur kito. Tomu nalo na jibe na, abe tomu na mā amilavon tomu, a nalo abe tomu nalo na Kristo kiano uolu kanano. <sup>8</sup> Tibe na, ana mia kamiu monoka kuvitikar vatitig kamiu rivu ka iliano kinkin nalo na jibe na, ka mia kuvilaluvu re bereio meuliano na bo napano numila vio jikili ka ban kamiu. Monoka kuvitumolu kuvitu sikili damāriga, ka na mia kumijikia kuvokar momou ijaiano novo nonovio na kenemiu iorou. <sup>9</sup> Toro na tumolu, riviako loa rivatavio den burusio, rimonea re bunu verloglogiano nalo na Kristo, naio maka bunu ve Atua kanano. Mia toro na jo bo damāriga jouro ea ilirianiano na kiado, Atua Teta bija kenerinio ajoa naio.

<sup>10</sup> A vere kamiu kuvial ka nalo tai rime i riyotuba kean kamiu, mia naio maka tomā riverenio iliano nalo na memedu takii kanado, kamiu kuvilalar naio rivan bereio. Kamiu kuvuru re naio riva joomo ea kunuemiu, a kuviluku re naio to vija kamiu, <sup>11</sup> ver pēli, na kuvitu kuvijakar naio ka rila kanano ināuano na bova nei rivavin na.

### *Iliano na maaro*

<sup>12</sup> Iliano miroano na jo ka neverenio, mia maka nosidom nodu toa mēsi. Mia nalavon ka nevedu ga neial kamiu ka mia rejikia reil vatitig van kito ea mirado ga. Ver naio tibe na mia naio rivu laka, mia rila kito nonovio romijikia rojog rivu ve toru laka.

<sup>13</sup> A kuluemo dolu na, napano Atua bitirilar naio jibe ka jau, a kenerinio nalo bunu ajua vio na, ajumā aberenio aberinavo Atua milivu ka kamiu.

Peli naina ga na kiniou nejidom neverenio, iliano bisi ga ea vio na.

## Mesi Tolu Na JONE Naio Bivitauiāio Verialiano Moti

*Tukumuano bulati na niosi nei*

Jone kiano mēsi tolu nene, naio bio bere naio ber naio be “Navagadeano” ana naio bivitauiāio ban toro tai, siano Kaeas, napano be navurumāraboiano tai ea yimo lu. Naio miaia Kaeas bior napano naio jo mijai namoneano nalo, a berkakar banio ka takisor re bajago na toro va tai napano siano Diotreves.

*Torogio nalo na niosi nei*

Iliano moti 1-4

Navagadeano miaia Kaias 5-8

Navagadeano milkuei ka Tiotrivis 9-10

Navagadeano jaaro ka Dimitrius kiano bajago 11-12

Iliano maariano 13-15

*Iliano na be moti*

<sup>1</sup> Kiniou tormoruo navagadeano, nebivitauiāio mēsi nei ka riviedu vanso, kuruaku Kaias. Peli kito tealo ajumā amiliaso kija, mia kiniou nojidom nover kaso never kin-iou najaaro toru ka neviviuoso ea mēsi nei, bior kiniou tinieku jiiso toru, jakii bajago novo na ilirianiano na Tubo kanano.

<sup>2</sup> Kanaku bibilu novo, nemijikia ka jau kojomā komijog bo damāriga napano kanamo meuliano naio jo bo ea Atua jumāno ruei, mia nojomā nobolkouo kaso julaka, ka kanamo iñauano nalo atu aiel rivu, a ka ve re mieiano tai ka rila bulag mokotenamo. <sup>3</sup> Vonganei maka vesiou laka vo, ana kuruado nalo tealo abinime-i aboru ea vio nei, ana nalo ajukunu ban kiniou jumābe ka jau kojomā kajakii Tubo kanano ilirianiano, a jau kojomā komila kanano iñauano novo nalo banbano-o na tomu nalo abitulubar ka kanamo meuliano naio memedu riano ga. Kanalo veriiano nei naio mila tinieku jaaro-o mia jaaro toru laka. <sup>4</sup> Maka ve todolu tai napano mia mijikia rila kiniou nojog rivu tibe nei, mia bogo na ga nomijog ka keneriku nalo aju ajumolu aju jikili ea Tubo kanano ilirianiano, naina naruei namial bo laka.

*Kaias naio be toro tai na mā amijikia ka abarkar tinielo ea naio*

<sup>5</sup> Kiaku bilbilu na bo, siva toru banso ka iñauano nalo na mā jau komila ka mijai nalo na mā aju amial bija Ioluano Vou na bo, na abiedu aboru ea kamii. Nalo abiedu jibe ka na nalo abe valauo

ga, naruei tealo maka asidom avitarkarlo, mia jau komijuku bo toru laka banlo.

<sup>6</sup> Nalo abinime-i aberialio ea mirano namonea nalo na lotuano na vio na ruei, aju ajukunu ka kanamo iñauano na bo na kanamo tinietiiano. Naruei tomu ta bunu abiedu bereio aju kamliko vonganei, naruei nebika denso ka jau kajailo bunu. Ana vere ala nonovio iñauano ribisi, mia bo ka ver kamii kuvitii kiri titai ve telisu ka riijailo ea kanalo mārabo, tibe ka na memedu ka ala van toro na mila Atua kanano iñauano. <sup>7</sup> Nalo na, amiel bior vite na ga, ana bogo na mā aju aba amioliolu ban nalo na mā maka amonea vo, nalo maka atu asidom ka nalo na monoka avitarkarlo ka vite tai, bior nalo maka ave namoneano vo. <sup>8</sup> Mia kito namoneano nalo, tenei joa kito ka rajailo. Bo ka kito rotunukakarlo, a roikurkarlo, ka rila ka mia kito bunu reiasol vijalo, kito nonovio robe tomu na romiñau vei ka Tubo kanano ilirianiano.

*Tiotrivis naio bitikar lotuano maka rimemedu*

<sup>9</sup> Peli jau komijikia ka kiniou nebivitauiāio mēsi tai bior vite na ban namoneano nalo ea lotuano ruei, mia Tiotrivis nei, napano naio jidom ka naio rive tubo kalo, naio maka rivitulubar kiniou, naio maka sidom riiagago ka kanaku iliano, naio jokovio ka Tubo kanano iñauano napano mā kumemi numitu numila. <sup>10</sup> Naio jomā mil mēle, a jomā ber iliano telabo na bova ii kumemi, naio mila sibi niegeniege kumemi toru laka. A maka ve iliano na bova ga, mia be iñauano na bova bunu, bior bogo na mā Atua kanano tomu nalo amiyoyotuba ka kamii, naio maka sidomlo, naio ber avan bereio ga. Mia mave ka naina, bogo na kam tealo ka kamii, kubitikar nalo, kumijailo ka ala iñauano na abinime-i kario, mia kema nei naio jumolu buk bulag kamii den lotuano bunu. Vite nalo nei na mā naio jo mila nei naio maka rimemedu na, mia bogo na kiniou neviedu nomiyotuba kean kamii, mia rovinii rava vio takurano ka roverii ka mia rala venia van naio. <sup>11</sup> Kanaku bilbilu, nojidom never kaso ka kema nei mila kirivova kaso mia maka rivu ka rila jau bunu, jau kala rivova van naio bereio. Monoka kito rovijauia re bajago na bova ga, mia bo ka rovijauia bajago na bo. Toro na mā mila bo ban toro dolu, naio be Atua kiano toro riano, mia toro na mā mila bova ban toro dolu, naio maka rial Atua vo, naio jo koalabo kia ga vo.

*Dimitrias naio be toro na bo laka tai*

<sup>12</sup> Mia Dimitrias nei, naio mia riijaso. Tomu nalo tinielo ea naio, nalo aberenio aberinavo naio mirñau bo laka, mia Atua kanano iliano naio jonña berii bajago na joa kanano meuliano, berinavo abo laka. Mia kiniou bunu nemial naio be toro na bo tai, ana nemijikia ka jau komonmonea kanaku iliano, ka monoka never ve riano ga vanso.

*Iliano na maaro*

<sup>13</sup> Vite miroano na ka never kaso aju kiano vo, mia maka nosidom nevitauia toa nñesi vonganei. <sup>14</sup> Mia nojidom ka mia nevedu neial kamiu rivesiou re, naruei mia romijikia rovitii mirado, reil van kito.

<sup>15</sup> Tumñaro to vija jau Kanado bilbilu nalo na ea vio nalo nei aberen aberinavo Atua milivu kaso. Aiou koig, jau kover ka kanado bilbilu nalo aviniu na nña kumitu na, ka mia Atua riilivu bunu ka kamiu.

Peli naina ga na kiniou nojidom novere-  
nio, iliano bisi ea ga vio na.

## Mesi Napano JUT Bivitauiaio Verialiano Moti

*Tukunuano bulati na niosi nei*

Jut kiano mēsi, naio jirio ea bogo na naiolioliano miroano bija naverloglogiano naloaju, napano aberinavo amonea Yesu, kialo verloglogiano maka memedu mia. Naruei bior vite nei naio milikakar namoneano nalo, ka monoka avitakar vatitigio ka tomu nalo na jibena ala sibilililo re. Mesi bulati nei, kiano jidomiano vaataro varei ka Pitere kiano mēsi juo nene, napano ber namoneano nalo monoka avokar sikili bajago nei na moneano napano Atua jian banlo, na mia to tobo rivano-o maka rijikia ribisi.

*Torogio nalo na niosi nei*

Iliano moti 1-2

Bajago bija verloglogiano na Naverloglogiano nalo napano maka rimemedu, vija vironiano napano mia avokario 3-16

Iilaboniano na Moneano nalo 17-23

Iliano maariano 23-25

*Iliano na be moti*

<sup>1</sup> Kiniou Jut, nebe toro na mā nemīāu Yesu Kristo kanano, a nebe Yemesi kuruano, kiniou nebitauia mēsi nei biedu. Nojuvan binime ban kamiū, tomu nalo na mā Atua karamiādo naio bio kamiū ruei kube kanano, napano naio tinien jii kamiū toru, ka napano kumitutano ka Yesu Kristo kanano vitūkariano novo. <sup>2</sup> Kanaku volkouano ber tinieiano, tumāroano a tinietiano amei avujo lou ea kamiū, atu amei ve toru lie damāriga.

*Mesi nei naio ka tivelinio na nalo na mā abilig niegeniege Atua kanano iliano*

<sup>3</sup> Banalo, beamu kiniou nejidom nevitauia mēsi tai van kamiū ka neverial jidomiano tealo ea tivelinio na ioruriano novo na mā kito nonovio robokario, mia vonganē ga iliano tai binime bokar kinioū jelea kamiū, naruei namial ka monoka nevitauia vite dolu naruei.

Kiniou nomijog jibe vite tealo abova kija, tenena nejidom never ka kamiū ka kuvitumolu kuvitu sikili, kuvisikili ka pīrimiu rivalo ka kuvokar vatitig kiado moneano. Kiado moneano nene, Atua naio jian binime ban namoneano lu re nua vaarakurano ruei, naruei maka ve tena aje bukua mā asol dolu tai mave kanio

bereio. <sup>4</sup> Ana vite na mā nomijog, namial jibe ka tomu nalo na mā abinime aijsul ka kamiū, nalo amijejubukua kiado moneano ruei. Nalo na, maka amemedu ka atusol kamiū, abinime bena ga, maka asel ea morou, mia vonganē aju bija kamiū ruei. Nalo na abe uolu na kanado lotuano, nalo maka asidom Yesu Kristo napano naio takurano be toro na toru, a naio be kanado Tubo. Atua berenio berinavo, ea kanano tiniememiano, naio jaaro ka riviekokoa kito ka kanado kariano nalo, mia nalo nei abilig kiano iliano bereio, aju aberinavo ver tibe na, amijikia ala kariano venia napano ajidom, naio maka ve titai na, mia Atua riviekokoa nalo ga na. Iliano na kiriniagiago laka, mia nalo na mā ajurā aberenio, Iliano Lu berkar kanalo vironiano beamu ruei.

*Tomu na bova nei monoka aje vironiano*

<sup>5</sup> Bo ka kamiū kuvisidomii von nalo tealo na mā amila kirivova jibe na, naruei Atua mije batitig kanalo vironiano banlo. Tukunuano nalo na aberloglog batitig kamiū kanio ruei, mia pēli tiniemiu bobogia ruei, ana mia never bereio van kamiū.

Nana be moti nene, naio be kulo Israel nalo napano mā amīāu kurano ga Ijivi beamu. Atua naio milarur burumāra taara nei, naio buru bulaglo ea vio Ijivi, mia karina nalo miroano abilig taakalo kanio, mia naio mue bulaglo ga amārmāro.

<sup>6</sup> Ana juo nene, naio be nailiano nalo na mā ajua vio mave beamu. Atua midulo ajua vio novo tai na naio loa laka ruei, mia nalo maka asidom, ajidom ka atua jeleigio bereio, ana mila na naio miorkakarlo ka mārīmieni nalo napano maka ajikia ataluvo denlo bogo tai. Naio mila batitig jelelo dolu tai ea burumelijo, naio buk bulaglo aba ajuaio banbano bokar bogo na burumāra vironiano na legiano na maaro.

<sup>7</sup> Mia tolu nene, naio be kulo Sotomo, bija kulo Komora, bija tomu nalo na komeli dolu nalo na vaataro kalo. Nalo bunu ajavukia nailiano nalo na, kanalo jidomiano nalo bavavin laka. Nalo maka atakii bajago na memedu na mā Atua naio midu joa kito, mia ajurā amila napano surāno nalo ga aju abur surāno bereio, ana sidomiano kiriniagiago nalo na jibe nei naio bavavin toru ealo bogo nonovio. Mia monoka rosidomii vatitig rivu ka venia napano naio miyotuba ka nalo. Burumāra sebi na jijenlo, naruei aju abokar vironiano vo ea sebi dolu napano maka rijikia rivatove bogo tai.

*Tomu va nalo nei nalo aban kirivova tanea*

<sup>8</sup> Ana tomu na bova nalo na abinimej aju kamliko na, nalo na bunu aju amila kariano na jibe na. Nalo mña aju amial vite na bova nalo ea kanalo monovovuano, mia venia na mña amialio, ajidom aimaukanio. Nalo amila vite na bova nalo ka niabelo, nalo abukular ga iliano na toro na mña jidom ril vanlo, ajumña abital bova ea moroano novo dolu nalo na mña maka rejikia reialio. <sup>9</sup> Mia moroano dolu nei naio maka ve tena royotel rivijaio. Mia remijikia reial ka napano parinio nailiano Maikel, bogo na mña jo mila baravo bija Simaro ka ber kei ka naljuo nei mia rudu Mosis mokotenano, mia naio maka ril vova vanio. Vede tiniedo ka mia memedu ka river iliano na jikirkili ŕeli na iliano siniabu nalo, mia maka riverenio, berenio ga ber "Atua na loa laka mia naio ril vanso navo."

<sup>10</sup> Mia tomu nalo nei, amil kirivova a amil siniabu ea vite nonovio ga. Vite na mña amijikia ŕeli na mña maka ajikia, mia aberiio kirivova ga. Jikiaiano na mña nalo amijev, naio be verare ga ka jikiaiano na temeul, ka napano vite venia narña naio mijog ka rila, bo ŕeli na bova, mia naio mila ga. Bajago bova nalo narña ajumña amila, naio mila kanalo verloglogiano nalo abe tena sibiano ga, maka amemedu, maka ajikia atumolu leleio.

*Tomu va nei nalo amila niegeniege imauano nalo na lotuano*

<sup>11</sup> Nalo ajurña amiel ea mñarabo na mñariano nei napano Ken re nua naio miel eaio, bior napano naio jerrñi ka kurvano. Ana tomu na bova nei, amidulo ajua vio va nei napano Naverialiano Pelama na beamu naio midu naio joaio, bior ka napano naio ber iliano napano maka rimemedu ka rijev puruveru eaio, naruei kanano iliano nei mila Atua kanano tomu nalo aba amilotu ka atua dolu. Mo tai bereio, amijoru abatove abakovio ea ŕili na borotano nei napano Kora re beamu ba bakovio eaio. Nina ea bogo na borotano napano naio jo jikili jua naio buruŕe, bior naio mil die navurimñaraboiano napano Atua naio bitirilario.

<sup>12</sup> Bogo na kamiu kubinimej vio takurano ka kuvila sinaniano na tinietakuraniano nalo, mia tomu nalo na, nalo aju jibe ka barañña tai napano naio joluku yetano ea tei, napano ver uako tai va vaatara laka kanio mia riva rivavin eaio. Nalo amila bulag ga semiu sinaniano nalo, napano ajen mñelea janea vio reraio, amun ba amilaluvu pariparilo, amila uetubaiano toru laka, a maka asidomial toro dolu, maka aialerinio ea titai.

Tomu na jibe na nalo ajibe ka melijo na mña jegi midulo miuvio barlaka ga bano, naio maka sian yuo ea kiado tiniavio nalo. Nalo ajavukia buruiesi tai napano ajelar menu nu naio jo, bior napano naio maka rivar mñarati. <sup>13</sup> Nalo ajibe ka tei napano naio jo mikulkulu toru, karina naio jo buk niamnig bija soro nalo abavin ea vio medave. Ajavukia mñarvitano nalo na mña aburo ea buluniogovu yauo mave, napano aju bogo bulati ga karina aba kovio bereio, aban ho kovio ea burumñara melijokouo ea vio na bobogio.

*Naverialiano nei Inok re nua naio joñña berii ruei tomu nalo na jibe na*

<sup>14</sup> Kuvisidomii von naverialiano tai bunu na tormoruo Inok re nua nua laka, napano naio be togio na terati aluo napano amoluo ea Atam. Naio berii tomu nalo na jibe na naruei, napano ber jibe na, ber "¡Kamii kuvitkarlo! Mia Atua na loa laka naio rimej rivija taarñaka na nailiano lu nalo na kanano, <sup>15</sup> ka atibure kulo va nalo na amila kariano napano maka amonmonea naio. Mia sian vironiano vanlo rivior imauano va nalo na kanalo veribinio, a bior kanalo ilisiniabu va napano abuku ea mirano."

<sup>16</sup> Nalo na na mña abinimej aju bija kamiu, iliano na naio memedu ga ka nalo, bior ka napano abe tomu na vukuleleano, abe tomu na mña ajidom nalo ga, a abe tomu na mña amil vevavin ka iliano nalo na tortoru. Mia ver nalo asidom ka avokar vite tai ea kamiu, monoka kuvitkar vatitiglo, bior abe tomu na niosesei, a abe tomu na ilinovoiano bunu.

*Naiagagoano nalo bunu ajumña aberii tomu nalo na jibe na*

<sup>17</sup> Mia kamiu, kanaku bilbilu nalo, bo ka kamiu kuvitumña kuvisidom bunu venia napano mña naiagagoano nalo na Tubo Yesu Kristo kanano ajumña aberenio ka mia riyotuba iorou. <sup>18</sup> Nalo ajumña aber ka kito aberinavo "Ea bogo na maaro, mia tomu nalo ayotel rivova ea imauano na Tubo kanano rivija kanano tomu nalo. Mia ala pariparilo, mia ala ga venia napano kanalo sidomiano va nalo ajidom." <sup>19</sup> Tomu nalo na jibe na ajumña aber aberinavo kanalo taara ga naio bo, aberinavo nalo ga amirñau ea Niununo, mia kinio nejidom neverial van kamiu ka nalo amirñau ea ga jidomiano na yetemeriba nei ga, Niununo Lu naio maka toalo leleio.

*Iliano na tunukakar namoneano riano nalo*

<sup>20</sup> Mia kamiu, kanaku bilbilu nalo, bo ka kenemiu imauano nalo ea kanado



moneano lu naio jo bavin lie dañariga. Monoka kubolkouo dañariga ka moroano na Niununo Lu. <sup>21</sup> Kuvidu vatitig kamiu to dañariga yetano ka Atua kanano tini-etiano, kuvitu melumu ka kuvisirarago ka Tubo Yesu Kristo ga, rivan napano naio, ea kanano tinieiano, rivuru bulag kamiu kvan ea meuliano napano maka ve jukuti nene.

<sup>22</sup> Toro na mña jo tiniene beve juo, kuvija naio ka kanano jidomiano rimei sikili rivu bereio. <sup>23</sup> Telabo na jibe na ajumña ajua tivelinio ka bulukusebi, vaataro ka atibirbil ea rui, mia kuvila soĝeli ka kuvuru bulaglo, kuvilrurlo. Bo ka tiniemiu riiu tomu nalo, mia tealo napano abova laka mia kumerou kija kalo. Kariano nalo a ni-amiamo va nalo na kanalo naio jokol kialo meuliano momou a mila bulag kanalo bajago nonovio, a jua niabelo reraio, mia monoka kuvja kalo, kuve bilbilu re vijalo.

*Iliano na maaro: Volkouano na vame-nea Atua*

<sup>24</sup> Kito ravamenea Atua, ka napano naio mijikia rivokar batitig kito ka mia rojoru re, rivan rivano-o naio rivuru kito rava rotumolu rotu ea kanano mermerano lu, napano kanado meuliano naio meravo bo ea mirano, mia rovokar buruñara jogvuiano.

<sup>25</sup> Kumemi nubameneaso Atua, napano jau ga takurano kobe naioruriano. Numidular siamo, bior moroano, sikiliano, a tuboiano abe kanamo ga. Numiaiaso maluvo jelea Yesu Kristo Tubo na kene-memi, jikar ea bogo nalo na beamu rui binimej bokar vonganei, rivan rivano-o to tobo to, mm.

Kiniou, Jut.

## NAVISIŔEIANO Napano Jone Mialio Ana Bivitauialario Verialiano Moti

### *Tukunu bulati na niosi nei*

Niosi nei, vite nalo na Kristo bisiŕeio ban Jone, napano siano na bulati nene “Navisiŕeiano,” Jone bivitauiaio. Naio berii visiano nalo napano Yesu berialio ban naio. Naio bivitauia ka bogo napano tomu na Romo amila kirisikili laka ban namoneano nalo, aaju amuebivinto, bior ka amonea Yesu Kristo. Jone bivitauia niosi nei ka ridular kialo jidomiano nalo, ka asikil atu sikili ea bogokouo nei.

Ea niosi nei, be visiano nalo na Yesu berialio ban Jone. Naio berii jamerijiano nalo ka namoneano nalo ea bogo na amijikia ajoglubar nioniag nalo nene. Mia tomu dolu nalo maka ajikia avokar nioniag nene. Kialo burupati jidomiano na jamerjiano nei jibenei. Yesu Kristo, naio be Atua Soŕi, a be kiado Tubo, a ea jumano, Atua mia vudobi vatitig Simaro vija kiano uolu dolu nalo. Bogo na naio rila nonovio imauano nei, mia naio sian vuliano van kiano tomu nalo napano ajikili aju kirisikili ea kialo moneano. Mia naio rivurulo ava atu vija naio ea tiniabene vou bija ea yetemeriba vou napano naio mila vatitigio rui aju.

### *Torogio nalo na niosi nei*

Iliano moti 1:1-8

Visiano moti bija mēsi nalo napano ban ea yimo lu aluo 1:9—3:11

Niosi napano be lu ka toro visio bija niajebijo aluo 4:1—8:1

Simeduo nalo aluo 8:1—11:19

Mermu bija temeul juo napano naljuo abova 12:1—13:18

Visiano dolu nalo napano Jone mialio 14:1—15:8

Dise aluo napano abujo ka Atua kiano tiniamimiano 16:1-21

Atua mila bulag bulukomeli nei Babilon a juvulu temeul nei napano bova, a naiolioliano simsibi, bija Simaro 17:1—20:10

Atua jibure tomu nalo ea legiano maaro 20:11-15

Tiniabene vou bija yetemeriba vou, bija Yerusalemo vou 21:1—22:5

Iliano maariano 22:6-21

### *Verivisivisiano na niosi nei*

<sup>1</sup> Niosi na be visiŕeiano ka venia napano mia naio riyotuba ea legiano nalo napano mia amei navo. Atua naio jidom ka kanano tomu na imauano nalo na yetemeriba monoka ameravo rivu ka vite nalo nene, naruei, jian jikiaiano nene ban Yesu Kristo, karina Yesu naio miila kiano nailiano tai miyotuba ka kanano toro na imauano nei Jone, naio mila vite nalo nene amiyotuba ka naio ea kanano visiŕeiano tai.

<sup>2</sup> Jone naio mial nailiano nene bisi, naruei naio bitilubar ka naina be Atua kanano iliano riano, be iliano na be riano tai memedu ka aver visivisii venia napano mia Yesu Kristo naio rimauka iorou, mila na naio bivitauia bulagio vatitig bo jua niosi nei vite nonovio napano naio mialio, ka kito na iorou romijikia rovlukuio.

<sup>3</sup> Naruei toro kei napano mia naio rivulu iliano nalo na verialiano nei, ŕeli mije tilieno kanio, mije vatitigio joa kanano iviso, mia Atua kanano iliviuano ve burutomoruo toa kiano meuliano, bior ka napano burumara legiano nene naio jo binimee vaatara laka naruei.

### *Jone jikar kiano verialiano na kiano moneano ea iliano na iliviuano ban Atua*

<sup>4</sup> Kiniou Jone, nebitauia bulag iliano nalo nei ka riviedu rivan kamiu taara aluo na namoneano nalo napano kumitua komeli nalo na ea tanobuku na toru na vio nei Esia. Kiniou najarao ka neviviuo kamiu ea siano napano naio jo beamu beamu laka, a naio jo vonganei, a mia naio to toboto. Nojomā nobolkouo vonganei ka kamiu ka burumara tiniememiano vija tumarano toa kenemiu meuliano tulaka, napano mia rijikia rimaluvo ka kamiu den kiado Atua nei vija kanano niununo aluo napano ajumolu ajukamu ka kiano jobaro, <sup>5</sup> a mijikia rimaluvo ka kamiu den Yesu Kristo bunu, naina napano naio biekouo banbano mia kiano burukija miou, karina naina be moti napano naio jumolu meul bereio, napano vonganei naio be burumara parinio tubo ka parinio tubo nalo na yetemeriba.

Riano, Yesu Kristo nene napano naio tinien miia kito toru, banbano mijamo ka kanano burukija miou ka rivulu bulag kito den vironiano na kiado kariano nalo, <sup>6</sup> naruei naio bitiri bulag kito ka romei rove marataro ve takurano ea yati na kanano tubo sesa nalo, a ka naio bijauia bulag kito ka rajai naio rotibe ka tomu lu na karamano kanano imauano nalo, naio ga be Atua Soŕi.

Yesu mila bo ban kito toru jibe na ana bo ka reilivu ka siano, rodular naio to medave

laka, rivan rivan mia maka rijikia ribisi bogo tai, tibe na.

<sup>7</sup> Kamiu kuvititi vatitig rivu! Naio naruei jonña mijian burevure melijo nalo na mave, naio riyotuba rimei. Mia kito nonovio reial naio ka mirado memedu, a vija bunu nalo nanua rña ajukukakar naio ea mñakolkolo, nalo bunu avitilubar naio bereio. A mia ve burumñara jogvaiano a tegiano riyotuba ea tomu nalo na yetemeriba, tinielo rimaio ka venia napano amila ban naio ea bogo nanua beamu. Mia monoka tibe ga na, neber "Ee" ban naio kanio.

<sup>8</sup> Bo ka kito rovatove ka Tubo Atua, Atua Soþi na moroano, naio napano jo beamu, naio jo banei, a mia naio tobo to, napano kiano ilitemiano tai naio ber jibe nei, berinavo

"Kiniou nei nebe burupati, kiniou nei nebe juluvati!"

*Jone mial kijokijo na Yesu*

<sup>9</sup> Kiaku bilbilu nalo, kiniou Jone nebe kuruemiu tormoru, napano neberial vite nalo nei ban kamiu. Nojidom neverial van kamiu bior kito naruei napano robe Yesu kiano, ktio naruei rojutano ka kiano tuboiano, kito naruei rojuñña rabar bitiran jogvaiano na bogokouo nei, ana kito naruei rojuñña rojamñikar kito bija jidomiano na tebievi.

Mo kanaku tukunuano naio ban jibe nei, berenio nua beamu kiniou nojomña neberial Atua kanano iliano, nojo nomioliolu ka Yesu Kristo banbano na kulo Romo amiþe vironiano ban kiniou, amila kiniou nebinimeþi nomiñau kurano ea uleule na telisu nei, siano Patimos. <sup>10</sup> Naruei ea Legiano Lu tai nojo jibe na ana nomijog jibe Niununo binimeþi ea kiniou, nomijog jooa tai ju iorou ka kiniou, mil burutomoluo jibe ka pasimeduo miolu, mil ber jibe nei, berinavo:

<sup>11</sup> "Venia napano mia jau kealio, keial kovivitaui bulagio rivan ea niosi tai, karina jau kotuvan rivan tanea lotuano nalo na tanobuku na vio Esia, ka ajikia avulukuio.

Lotuano nalo na, nalo aluo, be Eveso, Simena, Pekamam, Taitera, Satisi, Vilatelvia bija Leotesia."

<sup>12</sup> Jooa na mil ban kiniou jibe na ana nejidom neial kenia, nabarþilig kiniou nemial burupati na yulu nalo ga aju, napano aminñauka niogo ea nalo aluo. <sup>13</sup> Burubati yulu nalo nene ajumolu aju jibe na, karina iviso kanio nemial toro tai jumolu jikili ju, napano naio jibe ka naio napano aber Kulorinio Kenerinio. Naio miya burutili soto tai, bija miya kulurñarau napano

amiyako ka niogo, ajelan barkor iarene. <sup>14</sup> Vijinio miuvu mia miuvu, jibe ka vijinio nunu bija mavo, mia tiamirano merera jibe ka minano sebi. <sup>15</sup> Jaano kirisikili bo, javukia mñarbutoto napano amijie ea sebi ka rila sikili rivu, mia bogo napano naio mil, jooo miolu jibe ka tei napano jaburu ea barañña. <sup>16</sup> Naio jumolu jikili ju jibe ka napano ea juñño meruo naio bokar mñarvitano aluo, mia iobogu na mira tai napano naio mali ea ikit tivelinio juo naio jo moluo ea niono. Mirano bunu, riano, naio merera, mia merera naio javukia mñerenio napano naio jikili mia jikili.

<sup>17</sup> Nemial toro nene jibe na, tomnei, mila kiniou jibe ka nañño garuei, nomijoru yetano ea jaano. Mia naio jian juñño meruo binimeþi jokol kiniou, naio berinavo "Jau komerou re ka kiniou, kiniou nei nebe natikariano mia nebe najuluvatiano.

<sup>18</sup> Naio napano be burupati na meuliano be kiniou nei, bior napano kiniou nemeul, karina nañño, karina nemeul bereio, nemeul to toboto.

Kiniou nei naruei napano vulariano na mñariano a vulariano na bulukusebi kirivova nei na tomu na mñariano, nalo aju juñaku.

<sup>19</sup> Mia jau komerou re, jau kotovon re, kovivitaui bulagio vatitig ga venia na jau kojonña komialio, napano tealo abe tena vonganei, bija tealo abe tena bogo nalo na amei na vo.

<sup>20</sup> Mia kiniou never titai vanso beamu vo, ka tivelinio na mñarvitano aluo nanua jau komialio joa juñaku, bija burupati yulu aluo na rña aminñaukalo ea niogo na.

Vite nalo nei ajavukia jikiaiano tai napano naio joluku, mia nioti nene jibe nei, ber mñarvitano aluo nalo nei napano, abe nailiano aluo na mia avitakar lotuano aluo nalo nei, a burupati yulu aluo, naina be lotuano aluo nene neibano."

## 2

*Mesi nalo naina ban lotuano aluo*

<sup>1</sup> Naruei Yesu mil dolu kia ga ban kiniou, naio berinavo "Vonganei mia kiniou neverial venia napano mia jau komijikia kovivitaui riva rivan lotuano aluo aveve terakurano."

*Mesi na jukamu, riva rivan lotuano na vio Eveso, lotuano napano maka ve tinietiiano toaio*

"Beamu, jau kovivitaui mñesi tai riva rivan nailiano na lotuano na komeli na vio Eveso, jau kovivitaui tibe nei, koverinavo

'Iliano napano biedu ban kamiu binimej den naio napano bokar m̄arvitano aluo ka jum̄ano meruo, napano jo miel jeliŕiv iviso ka burupati yulu aluo nei.

<sup>2</sup> "Naio berial ka kamiu jibe nei, berialo "Kiniou nemijikia kamiu ruei, bior nemial kenemiu im̄auano novo nalo, nemial ka napano kumila vio toru, nemial ka napano kumitutua kamiu bija jidomiano na tebievi naio bo bo laka. Kiniou nemial bunu bo laka jibe napano kamiu maka kuvijamo ka tomu na bova amei ala niegeniege kamiu, bior tealo, bogo napano amiyotuba ka kamiu, ana aberinavo nalo abe atevi nalo, mia kamiu kuvial vonlo, kuvijikia vatitiglo rivu, ana mia kamiu kuvileal lo ka nalo amijubolbolili kamiu ga.

<sup>3</sup> "Bior siaku ga napano kamiu kumiduio, naruei kubiniua bogokouo, a amila bova ban kamiu, mia nemijikia ka maka kuvituvan kiniou vo, kumitum̄a kubokar jikili bo kia ga vo, mia jidomiano napano ber tiniemiu m̄aro laka, ŕeli na kamiu kumijog kuber bare, nina naio maka toa kamiu leleio.

<sup>4</sup> "Kenemiu bajago nalo nei kiri-novo laka, a be riano, vite tai jo napano kumitum̄a kumila napano maka nasaaro lele kano, mia bo ka neverialio van kamiu memedu. Naio jibe nei, ber burum̄ara tinietiano napano naio joa kamiu be moti, vonganei naio binimej melukluku laka, maka bunu tavukia beamu. <sup>5</sup> Kuvisidomii bereio von ea burum̄ara bajago na tinietiano novo na beamu, napano tiniemiu jii kiniou toru, a tiniemiu jii kamiu ga toru bija kulo dolu nalo. Ea bogo na naio bo mia bo, mia vonganei, naio batove mia batove laka. Mia bo ga, mia monoka kuvilig kamiu ga, a monoka kuvan bereio ea vio novo nei nanua kumitua beamu. Mia ver kuvilig re kamiu, nemijikia never mia neyotuba ka kamiu, navar bulag burupati yulu na ju merera iviso ka kamiu vonganei.

<sup>6</sup> "Riano, nina be burum̄ara tena bova tai na kenemiu napano neber vonga, mia nojidom neverial van kamiu bunu ka kumitum̄a kumila burum̄ara vite novo tai bunu, napano nejaaro toru kano. Vite nene napano kumitum̄a kumijuku die nalo nei napano ajum̄a amila vite dolu vovu nalo, napano toro nei Nikolas naio miololu kano be moti. Abova ga, a kiniou bunu maka nosidom leleio.

<sup>7</sup> "Toro napano be tiliniene, bo ka naio rijoglubar venia napano Atua kanano Niununo Lu naio jo berialio ban taara na namoneano nalo. Toro napano naio tu sikili rivanvano tuvulu na bova, mia

nemijikia najamo ka naio ka mijikia riva to jouro rimemedu ea tiniavio novo na Atua kanano, naio riva to sen m̄arati iesi na buruiesi na meuliano." "

*Mesi juo nene, riva rivan lotuano na Simena, lotuano napano m̄a tomu nene nalo ajum̄a ajerm̄i kalo*

<sup>8</sup> "Jau monoka kovivitaui m̄esi tai riva rivan nailliano na lotuano na komeli na vio Simena, kover tibe nei, koverinavo 'Iliano na napano biedu ban kamiu binimej den naio napano be moti a ve na maariano, napano amuebin m̄aro, kar na meul bereio.

<sup>9</sup> "Naio berial ban kamiu jibe nei, berialo "Kiniou nemijikia vatitig bogokouo nalo napano m̄a kumitum̄a kubiniua, a nemijikia ka jumemiu nalo abeteau. Mia nojidom ka monoka kuvijikia ka maka kuve talim̄asa, nalo kube na sanibaiano laka! Riano ga, nemijikia ka nalo nei napano ajum̄a aber abe kulo Ju, nalo ajum̄a abuku iliano nalo na bova miroano laka ban kamiu, mia maka kuvisidomialio, nemial nalo maka atibe ka Ju nalo leleio, makanio, nalo ajakisor Sim̄aro memedu.

<sup>10</sup> "Mia be riano, ŕeli mia vesiou re kamiu tealo monoka avar burum̄ara jogviano nalo rivior napano kumonea kiniou, mia kumerou re. Peli Sim̄aro naio mijikia rila ka mia avuku kam tealo avan ea nalakoiano, ka naio to rila vonvon kamiu, mia nemijikia never ka mia naio rijikia rila lelan kamiu ea jogvaiano nalo riva rivokar legiano ve duelimo ga. Ver tibe na, monoka kuvitu sikili riva rivokar bogo na mia adular kenemiu jegi, mia ver kuvijoru re ea bogo na, mia bogo na koviyotuba kean kiniou, mia nesian burum̄ara ijaiano van kamiu, nina be batubatu niogo na meuliano.

<sup>11</sup> "Toro napano be tiliniene, bo ka naio rijoglubar venia napano Niununo na Atua kanano naio jom̄a berialio ban taara na namoneano nalo. Toro napano jovulu bajago va ea meuliano nei, mia naio riyotuba ea re m̄ariano juo napano mia naio rimej iorou." "

*Mesi tolu nene, riva rivan lotuano na Pekamam, lotuano napano mijamo ka verloglogtano va nalo abinimej jouro eaio*

<sup>12</sup> "Tai bunu bereio, jau monoka kovivitaui m̄esi tai riva rivan nailliano na lotuano na komeli na vio Pekamam, kover tibe nei, koverinavo 'Iliano napano biedu ban kamiu naio binimej den naio napano jo mudu iobogu na mira napano mali ea ikiti be juo.

13 “Naio berial ban kamiu jibe nei, naio berinavo “Nemijikia vattig bo ka vio napano kamiu kumituaio, naio be tanobuku tai iviso memedu ea vio napano Siñaro naio jo be tubo eaio! Kanano vio nalo aju janea kamiu, mia kamiu kubokar siaku jikili bo dañariga. Beamu, jouro ea kenemiu komeli na, þeli romijikia rover komeli na Siñaro kanano, amuebin kuruemiu nanua Antipas, naruei ajikili ka kamiu monoka kuvituvan kenemiu moneano ea kiniou. Mia makanio, jibe ka napano naio biekuo ea kiniou bokar mñariano, kamiu bunu, maka kam tai aburo den kiniou.

14 ““Nina naio be tivelinio na bo nene, mia be saba tai nojidom neverial van kamiu bunu. Vite na be moti, jouro ea kenemiu taara, be tomu tealo aju napano ajunña ajakii jidomiano tai napano be verare ka Naverialiano Pelama re nua. Ver kamiu tiniemiu maio kanio, naio naruei napano berii mñarabo tai ban Parak, naruei maka vesiou ana Parak kija buru naio bano berio ban kulo Israel nalo, mila na maka vesiou, ana ajikar ka ajen sinaniano lu napano kulo dolu nalo amila jokoluolu kanio ban kanaloravoru nalo, ana nalo ajunña ajidel ka amila siakiano. Aju amila kariano jibe na naruei, mia jakii iliano napano amijog ruei, nalo aber naina bo ga.

15 ““Mia juo nene, be ta bunu na-pano kumijamo kalo aju jouro ea kenemiu taara na namoneano nalo. Nina nalo napano ajunña ajakii verloglogiano vovu dolu nalo nei, napano toro nei Nikolas naio jorña mioliolu kanio beamu.

16 ““Tibe na, monoka kuvilig kenemiu jidomiano taluvo den vovaiano nene! Ver makan, mia noyotuba ka kamiu vesiou re, ana mia iliano napano mia riyotuba ea nioku never kalo ea bogo na, mia naio tavukia iobogu na mira tai napano naio tekkiti rilalo ajikia.

17 ““Toro napano be tiliene, bo naio rijoglubar venia napano Niununo na Atua kanano naio jorña berial ban taara na namoneano nalo. Naio napano bare ka tovulu na bova, mia naio ve kiano ijaiano novo, mia nesian sinaniano tai vanio, tavukia sinaniano napano kulo Ju nalo ajenio ea vio yauo, mia nina be sinaniano tai napano maka toro tai rialio vo. A mia nodu puruveru na mivu tai vanio, napano aje sio vou tai joaio, napano naio riduio, naio ga mia rijikia nioti riano nene.””

*Mesi veri nene, riva rivan lotuano na Taitera, lotuano na mijamo ka bajago na bova jo jouro eaio*

18 “Tai bunu bereio, jau monoka koviviatuia mñesi tai riva rivan nailiano na lotuano na komeli na vio Taitera, kover tibe nei, koverinavo ‘Iliano nei napano biedu ban kamiu naio binime den Kulorinio Kenerinio, napano mirano merera bilvili javukia menano sebi, a jaano kirisikili jibe ka butoto.

19 ““Naio berial ban kamiu jibe nei, berinavo “Kiniou nemijikia vattig bo kenemiu inñauano nalo, kenemiu tinietiano bija viekouoiano, a kenemiu inñauano kouo nalo a jidomiano na tebievi na kenemiu, a mave lie kanio nomijikia vattig bo ka kumiturnia kumila ba lie vongane, jovulu nanua mña kumiturnia kumilala beamu.

20 ““Nina be tivelinio na bo nene, mia be vite tai na monoka kiniou never rimeravo van kamiu. Nina be tivelinio na tira va nei Jesebel, napano kubitilubar kanano vovaiano nalo, mia kumijamo ka naio jidel dolu ka ga kiano inñauano vovu nalo napano naio jorña milala. Naio berenio naio be tira na verialiano tai, a þeli, kamiu kumonea naio, mia naio mila sibilili ga kamiu. Ea kanano verloglogiano, naio jo buru tomu na kanaku inñauano aba be dolu laka, napano vongane amijoru ea siakiano, ajunña ajen sinaniano na tavoru nalo kanaloravoru, a ajidom aber bajago nalo na naio bo ga. 21 Kiniou nodu bogo ban tira nei ka naio tinieno maio ka bereio, rivilig naio taluvo den niamiamo na mña milaio, mia naio maka sidomio. 22 Mo, kiaku jidomiano naio jo ruei, ka mia nala naio rimon ea jog tai na mieiano na jikirkili nalo, a mia nala nalo napano mña amila siakaiano bijaio, ver aviliglo re ka kanano bajago na bova, mia nalo bunu ajog rivova ve toru laka.

23 ““Tira nei mia ve re kenerinio tai meul, mia kanaku siniabu tokol nonovlo aviniu. Naruei bogo napano nalo na taara na namoneano nalo aial vite nei, mia avitilubar ka kiniou naruei, kanaku vitiano jo jeligiv bakar venia napano jo joa toro kanano iviso, a jikia leal venia na joa kiano jidomiano. A mia avitilubar bunu ka kiniou naruei, nojo nejian meran ban tomu nalo, memedu ga ka bajago na vite nalo napano ajunña amila ea kialo meuliano nalo.

24 ““Naruei ea tivelinio na kamiu nalo dolu na ea vio Taitera, nemijikia ka maka kuvitakii verloglogiano nalo na tira nei kanano. Naio milavon ka buku iliseiseiano nalo ban kamiu, ka ber mia naio rivetavo ea jidomiano lukuluku nalo napano abe teremi bo van kamiu, mia kamiu kubitilubar ka Siñaro ga naio ga be burupati

na iliano nalo nene. Mia kiniou never re bunu kiri titai ve dolu van kamiu, <sup>25</sup> mia neber ga ka kamiu kuvokar sikili iliriani-ano nei napano kubakar ruei, kuvituvan re rivan rivano, mia kiniou nemei bereio.

<sup>26</sup> “Naio napano juvulu na vovaiano, naio rila ga takii kiaku tinieiano riva rivokar juluvati na bogo nei, mia kiniou nesian buruñara ijaiano vanio. Mia najamo ka vanio ka rije tuboiano ea venuo nalo, <sup>27</sup> tibe ka napano niosi na iouano naio beriio, napano naio ber

*Naio mia rije tuboiano ka tomu nalo, napano kanano iesi napano na bokar ka juñano, naio be marbutoto na kirisikili tai,*

*a nalo napano parilo jikili, mia naio rivukulo avan ea borotano, avurukokorov aveve niati tavukia tanoþili na amimaukanio ea borotano.* Iouano 2:9

“Moroano na rila tibe nei, Teta naio mijamo ka ban kiniou ruei, naruei mia najamo ka rivan toro na be kanaku. <sup>28</sup> A maka naina ga, mia toro nene, mia nodu marivitano napano Mejegi toa juñano.

<sup>29</sup> “Toro napano be tiliniene, bo ka naio rijoglubar venia napano Niununo na Atua kanano naio jo berial ban taara na namoneano nalo.”

### 3

*Mesi jumo nene, riva rivan lotuano na Satisi, lotuano napano joñia monmelio kurano dañariga*

<sup>1</sup> “Mo jau monoka kovivitauiia mēsi tai riva van nailiano na lotuano na komeli na vio Satisi, kover tibe nei, koverinavo ‘Iliano nei biedu ban kamiu naio binimei den naio napano bitikar niununo aluo na Atua kanano bija marivitano aluo napano kiano.

“Naio berial ban kamiu jibe nei, naio berinavo “Kiniou nemijikia batitig kenemiu inñauano nalo. Tomu nalo ajuñia amiaia kamiu mele janea vio, aberinavo kamiu kube lotuano tai napano meul bo, mia makanio, kiniou nemijikia batitig ka napano kamiu kuñarmāro ga kumitu. <sup>2</sup> Vonganei be kenemiu bogo na kuvite-vijo kija. Kenemiu inñauano nalo, nemilealio ka Atua kiano vitiano, kamiu maka kumila nonovio rivinivu rivu, mia maka kuvila rimemedu leleio. Kenemiu sebi maka riva kovio vo, mia naio jo ban vaataro ka riñaro dobi nonovio, mia bior vite na, neber vatitig bo ban kamiu neberinavo monoka kuvila vatitig rivu ka mia naio rimej sikili lie bereio.

<sup>3</sup> “Tibe na, monoka kuvisidomial bereio iliano novo nalo napano ñia kumijogio a napano kumijevio ruei. Kumonmonealo bo dañariga, a kuvilig kenemiu meuliano rimej bereio, bior ver kuvite-vijo re, mia nemijikia never vatitig rivu van kamiu ka mia nemijikia namaluvo ka kamiu tavukia toro na vinauano tai, napano mia kuvijikia lele re. <sup>4</sup> Beriano, nemijikia ka kamiu maka ñarati ve telabo na vio Satisi aju bo ga, napano maka aia niegeniege ñalo kuluñarauo tavukia nalo dolu. Nalo ameravo bare bo ruei, ka na mia aia kuluñarauo na miuvu, aiel rivija kiniou nuvan ea kiaku vonuo. <sup>5</sup> Toro kei napano jovulu vovaiano, naio bunu mia ayovovua vatitig naio rivu ka kuluñarauo na miuvu jibe na. Mia naio siano, maka nejikia noiolkon bulag den niosi na meuliano bogo tai, mia kiniou nesiloglog naio ka karamaku rivija kanano nailiano nalo, never, kema na naio be kanaku toro tai riano.

<sup>6</sup> “Toro na be tiliniene, bo ka naio rijoglubar venia napano Atua kanano Niununo joñia ber bulavulag ban taara ninio na namoneano nalo.”

*Mesi ari nene, riva rivan lotuano na Vilatelveia, lotuano napano bogo novo ka rila inñauano jukamu ka mirano*

<sup>7</sup> “Bereio, jau monoka kovivitauiia mēsi tai riva van nailiano na lotuano na komeli na vio Vilatelveia, jau kover tibe nei, koverinavo ‘Iliano na napano biedu ban kamiu, naio binimej den naio napano be lu, a naio be riano, napano naio naruei naio midu vukariano na vetavoiano na maratavo napano Parinio Tubo Teviti re nua kiano. Venia napano naio betavo eaio, maka toro tai rijikia tetavoko bereio, a venia napano naio jetavokoio, maka toro tai rijikia rivetavo ea bereio.

<sup>8</sup> “Naio berial ban kamiu jibe nei, naio berinavo “Kiniou nemijikia batitig kenemiu inñauano nalo ruei. Naruei monoka kuvitii vatitig, nebetavo ea maratavo tai ban kamiu napano maka toro tai rijikia tetavoko bereio. Kiniou nemijikia ka kenemiu moroano naio telisu ga, mia najaaoro toru ka napano kumitumia kubokar vatitig kanaku iliano, a maka kuvila lelan siaku napano joa kamiu. <sup>9</sup> Nalo napano ajakisor Siñaro, aju aba vio takurano ka avitirilar kialo taara, ana nalo ajuñia aber nalo abe kulo Ju memedu, mia maka tibe na, nalo amila sibi ga na. Mia iorou kanio mia nala nalo nei amei anie yetano ka jaamiu ka avitilubar ka kiaku jidomiano maka toalo, joa kamiu ga.

<sup>10</sup> ““Kiniou neber ka kamiu nua rui neberinavo monoka kuvitu sikili vija jidomiano na tebievi tulaka, naruei nemial jibe kubokar vatitig kanaku iliano nei. Bior vite na naruei, nemijikia neverikar van kamiu never buruñara jogvaiano na mia rimei ea yetemeriba nei, ka rilavon nalo napano ajaiao, ana mia kiniou notokovio batitig ka kamiu kanio, mia vite na naio maka rijikia tokol kamiu.”

<sup>11</sup> ““Vesiuo re, kiniou nemei ka kamiu bereio. Venia napano kumitunña kumituta mugaruei, monoka kuvokar sikili rivuoa ka kiniou nomaluvo, ana mia kamiu kumijikia kuvijev kenemiu ijaiano, mia maka toro dolu rijikia rivarlar kenemiu batubatu niogo den parimiu. <sup>12</sup> Toro napano jovulu jukujukuano nonovio riva rivokar bogo na nemei, mia novuru naio rimei tibe marteia na toru tai joomo ea yimo lu na Atua kiano, mia toro nene to joomo ea toboto. Mia netekar sio nalo napano mia netiri eao, tibe sio na kiado Atua kiano, bija bija sio na kiano komeli na toru, naina Yerusalemo novo, napano naio jo batove ea vio mave binime napano kiado Atua kanano, a bija nalo napano, mia nevitauia siaku vou toa naio bunu.

<sup>13</sup> ““Toro napano be tiliniene, bo ka naio rijoglubar venia napano Atua kiano Niununo naio jonña berialio ban taara ninio na namoneano nalo.””

*Mesi aluo nene, riva rivan lotuano na Leotesia, lotuano napano ba bova ruei, maka sidomial vite tai*

<sup>14</sup> ““Na maaro, jau monoka kovivitaui mñesi tai riva van nailiano na lotuano na komeli na vio Leotesia, kover tibe nei, koverinavo ‘Iliano napano biedu ban kamiu naio binime den naio napano naio be parinio ka vite nonovio, napano naio ga mijikia river “Tibe na.” Naio bieko be riano ea Atua va vokar napano kiano burukija riou, a naio rive tubo ka yetemeriba nonovio napano Atua naio jiio.

<sup>15</sup> ““Naio berial ka kamiu jibe nei, naio berinavo “Kiniou nemijikia batitig bo kenemiu inñauano nalo, mia nebitilubar ka kenemiu jidomiano nalo ea kiniou maka rimenini laka, a maka rivitunu rivare. Bo laka ka ver jau kosidom komenini, mo jau komenini bo kanio, þeli na ver jau kosidom kovitunu, jau monoka kovitunu vatitig rivu, mia naina napano kenemiu iviso beve torogio ga jibe na, bajago na kiniou maka nosidom leleio. <sup>16</sup> Mia bior kamiu naruei kumisidom kumenini, a kumisidom kuvitunu tibe na, kiniou nojo ruei ka novule bulag kamiu den nioku. <sup>17</sup> Kamiu kumitunña kuberinavo kubiobijii

saba novo nalo miroano na be kenemiu, tenene na kamiu be tiniemiu ka kuber maka toro tai napano rijikia sian vite tai van kamiu, bior be kenemiu telabo ruei. Mia makanio, ea kanaku vitiano naio maka tibe na. Kamiu maka kuvijikia kuvitilubar kamiu, mia kamiu maka ve kenemiu vite novo nalo leleio, kube kulo kurano ga, kube merebono, a niabemiu yauo ga kumitu.

<sup>18</sup> ““Mo kiniou neber ka kamiu, ka bo ka kumei bereio ea kiniou, kumei kuvar niogo nei napano sebi jijenkon niamiamo nene ruei, ka kumijikia kuvakar vite novo tai ea jumemiu. Bo ka kumei kuvar kulurñarauo na miuvu bo, ka kuvisalvoko kamiu, ka mia kuvimou re bunu, a bo kumei kuvar varñesi na kuvia ea miremiu, a na mia kumijikia kuvial vite bereio.

<sup>19</sup> ““Toro kei napano tinieku jii naio, monoka neil vanio ka nala kanano meuliano rimemedu, tibe na, kuvidu kiaku iliano nei rivu, ka mia kuvilig kamiu. <sup>20</sup> Kamiu kuviniagago vatitig rivu! Kiniou nejikili noju neminia tavo na kanamo meuliano. Jau napano kojog jooku bio, kovetavo ka kiniou, mia nemei joomo ka kito ve juo rotukunu, kito ve juo rosinan vio takurano.

<sup>21</sup> ““Naio napano ju jikili ba jovulu na bova, mia najamo ka naio rijikia totano biju vija kiniou ea jobaro lu na kanaku, javukia ga napano kiniou bunu nojuvulu kanaku uolu, a na iorou kanio karañaku buru kiniou nojotano biju bija naio ea jobaro lu na kanano.

<sup>22</sup> ““Toro napano be tiliniene, bo ka naio rijoglubar venia napano Niununo na Atua kanano naio jo berial ban taara na namoneano nalo.””

## 4

*Vio mave na Atua kanano ea tiniabene*

<sup>1</sup> Iorou ka napano kiniou nemial vite nalo nei, nemial bereio mñaratavo tai ka ava joomo ea vio mave naio juvavo jo ea miraku. Ana nomijog bereio jooa na mil ban kiniou beamu, naio mil burutomoruo javukia pasimeduo, ana naio ber ka kiniou, berinavo “Jau komei mave nei beamu vo, mia kiniou nelaso keial vite nalo napano mia amaluvo iorou.”

<sup>2</sup> Naio ber jibe nei, ana vaarakurano ga, nomijog jibe ka Atua niununo midular niunuku, naio midu kiniou nojo mave tiniabene, naruei nejerarago ban ea buruñara jobaro lu tai napano jokamu ka miraku, napano toro na toru tai naio jotano eao. <sup>3</sup> Nemial naio jibe ka napano naio merera, naio bar yovovuano na veru

maraiu nalo, a kanano yulu nene jeliviv eaio javukia subovivi tai.

<sup>4</sup> Buruŕara jobaro lu nei naio jo iviso, a jobaro dolu nalo bunu ajelivivi eaio, nobulukulo bokar duelimo valuo ba veri [24]. Ea nalo abeve terakurano, toro tai jotano ealo, mila nalo bunu abe duelimo valuo ba veri [24], napano nalo na abe navagadeano nalo na tiniabene. Nalo na amiya kuluraruao na miuvu laka, abar batubatu niogo jua pariparilo. <sup>5</sup> Nojo nejiraravo jibe na, nomiilo bunu ka napano vijaniano naio miyotuba iviso ea vio lu nei, bija bunu buruŕara uetubaiano na tubaalo naio jorŕa jara. Kamu ea mirano, yulu aluo amiuvu, napano nalo abe Atua kanano niununu aluo nene, <sup>6</sup> a nalo ajumoluaju ea vodobi tai, banbano laka jibe tei, naio mieg meravo bo javukia mermerobi.

Ana iviso ka vio nene bereio, tom meul veriaju, napano ea kamu kalo a iorou kalo, abe miralo nalo vio bujo laka, a naloaju vaataro,aju jeliviv ea buruŕara jobaro lu.

<sup>7</sup> Toro meul na jukamu nene naio javukia laeon, tinene naio javukia bue ŕararuao buruolu, tolu nene naio bar kulorinio mirano ga, mo nana maariano naio javukia bebekumo. <sup>8</sup> Nalo abiniu, be sibialo ari, napano miralo jovukoio vatitig bo sibialo bunu, ba bokar yetano kalo.

Nalo nei kanalo inŕauano, legiano bogiano, maka ajlimeibi bogotai, ajurŕa aberial daŕariga jibe nei aber, "Atua na moroano na mave, naio jo beamu, naio jo vonganei, naio mia to toboto. Naio be lu mia be lu, naio be lu laka."

<sup>9</sup> Ea iliano nalo na jibe na, naloaju amidular naio siano napano naio jotano iviso kalo ea vio lu,aju abatove kanio, ajurŕa aber siva banio ka napano naio meul toboto. Bogo napano ajurŕa aberenio, <sup>10</sup> navagadeano nalo bunu abatove kanio, amilotu ka naio napano mia naio maka rijikia rimaro bogotai. Ana kario, abar bulag kanalo batubatu niogo nalo den pariparilo, abar jutano ea jaano, aberinavo

<sup>11</sup> "Tubo kenememi Atua, memedu ka mermerano, vatoveano vija moroano nonovio aje vansom, ve kanamo jau ve takurano ga. Jau naruei koji vite nonovio, ea kanamo jidomiano ga abokar kanalo meuliano."

## 5

*Niosi napano amijukuio, bija nunu na telisu, napano naljuoaju tiniabene*

<sup>1</sup> Karina kiniou nemial bereio toro na toru nanua jotano mave ea vio lu, ka napano midukar vite tai ka jumano meruo, naio be niosi tai, napano abivitauia tivelinio be jua karina amijukuio, karina abukario bija sano vukariano aluo nene.

<sup>2</sup> Naruei nomijog nailiano na toru tai miaga jouo, naio bika ber "Toro kei naio bare ka rilakorov vukariano nalo nei? Be toro tai napano naio jo mijikia vetavo ea niosi nei ŕeli na makanio?"

<sup>3</sup> Naio to tibena vano, vedeio, maka ve toro tai na tiniabene ŕeli na yetemeriba, ŕeli na yetano ka yete-meriba, napano naio mijikia rivetavo ea niosi nei, maka tai napano rivare ka sirarago joomo eaio. <sup>4</sup> Nemial jibena naruei nomijog bova, nejeji mia nejeji, napano maka toro tai rijikia rila.

<sup>5</sup> Naruei navagadeano nalo tai mil ban kiniou, naio berinavo "Ei, jau keteg re bunu! Koialio, laeon yako napano miyotuba ka tomu nalo na Yuta, naina napano abio ka yati na Teviti, naio jovul vite nonovio ruei. Naio naruei mia rilakorov vukariano aluo nei, naio naruei mia rive-tavo ea niosi neibano."

<sup>6</sup> Naruei nejirarago bano, mia maka rive laeon, mia nemial kiritete solbouo na nunu tai jumolu jikili ju iviso ka toro meul veri bija navagadeano nalo, kamu ea vio lu nei. Naio be nunu na telisu ga, mia kiano pasimeduo aluo na jikili, bija mirano aluo ajua parinio. Naio jikili ju jibe na, naio jibe ka amila sida ka naio ruei, mia naio meul bo ga jo.

<sup>7</sup> Ana naio miel binimei, midular niosi nei den toro na toru nei jumano meruo, napano naio jotano mave ea buruŕara jobaro lu. <sup>8</sup> Naio midu ruei, ana toro meul veri nei bija navagadeano duelimo valuo ba veri [24] amijoru ea jaano. Nalo be kialo niorrago nalo janealo a be kialo baju niogo nalo, napano abujo magmago ka maatei napano ajonio, mia bonoti tanunu nene napano jo bavin, naio be volkuano nalo na namoneano lu nalo kanalo. <sup>9-10</sup> Mo nalo amijev iouano vou tai napano ban jibe nei, berinavo

"Amila sida kaso, naruei ea kanamo burukija jau kobulu bulag tomu nalo abe Atua kanamo, napano amoluo ea taara nonovio na tomu nalo, ea iliano doldolu nalo nonovio, ea uleule nonovio nalo na tortoru, a ea uleule na tertelisu nalo bunu.



Jau komiasosol lo abinimei abe taara takurano ajutano ka parinio tubo takurano ga,

nalo abinimei abe kulo lu na Atua kanano iñauano, ka napano mia ave tubo ka yetemeriba nei.

Mo bior ka napano jau komila jibe na, memedu ka jau ga ve takurano naruei kodu niosi nei, ka kelelar vukariano nalo nene, ana kovetavo eaio."

<sup>11</sup> Nojo nejirarago jibe na ana nomijog nailiano nalo amiou, nalo miroano mia miroano mia miroano, nalo jovulu taamāka [1,000,000] bano na jibe na. Aju ajeliviviko jobaro lu bija tomu na ameul bija navagadeano nalo nei, <sup>12</sup> ana aju amiou jouo, aber jibe nei, aberinavo "Nunu domudomu, napano amila sida ka naio,

naio ga takurano bo mia bo.

Moroano nonovio, tovuiano nonovio, masuano nonovio, sikiliano nonovio, vameneano nonovio, mermerano nonovio, miaiano nonovio, memedu ga ka ala rivan naio ga ve takurano."

<sup>13</sup> Iorou ka nina, nomijog bereio ka napano temeul nalo nonovio bunu amiou, nina be temeul nalo napano aju mave ea tiniabene, bija nalo napano ajua yetemeriba, þeli ea borotano, þeli ea tei, kanalo iouano naio ber jibe nei, berinavo "Miaiano, vameneano, mermerano bija moroano riva van Toro na Toru napano jotano mave ea jobaro lu, bija bunu nunu solbouo, rivan rivano-o to tobo to."

<sup>14</sup> Ana tom meul veri nei aberial "Jibe na, mm" kar iliano nalo nei, ana navagadeano nalo amijoru, aminie, amilotu kalo abe juo.

## 6

*Vukariano aluo na niosi napano amijuku*

*Vukariano na beamu: Toro na toru na bajago na mila mira, napano naio midu bue kulorinio na miuvu*

<sup>1</sup> Kiniou nojo najirarago bano, ana nemial ka napano kirikiti nunu naio milakorov vukariano na be moti na niosi nei. Naio mila kario ana temeul veri nei nalo tai naio miaga ka jooon jibe ka tubaalo, naio berinavo "Komei!"

<sup>2</sup> Vaarakurano ga bue kulorinio tai napano miuvu jikili jua miraku. Ana nemial toro tai jotano mave eaio, naio midu viu, ana nalo amidu parinio tubo kanano batubatu joa parinio, ana naio midu kanano bue kulorinio nene, jikiti batavio javukia

toro na mira tai ban ka tovulu kanano uolu nalo.

*Vukariano juo nene: Toro na toru na bajago na toro muebin toro, napano naio midu bue kulorinio na bilvili*

<sup>3</sup> Karina, nunu solbouo milakorov vukariano juo nene. Naio mila kario naruei nomijog temeul juo nene naio bio, naio bunu berenio berinavo "Komei!"

<sup>4</sup> Vaarakurano ga bue kulorinio dolu tai binimei, napano naio bilvili. Toro napano joaio, amijamo ka ban naio ka riva ridular tuñaro napano jo yetemeriba nei, ka mia tomu nalo atuñā auebinvinlo añarñaro. A amidu buruñara iobogu na mira joa juñano, naruei naio bunu batavio bano.

*Vukariano tolu nene: Toro na toru na bajago na vitu ea yetemeriba nei, napano naio midu bue kulorinio na bobogio*

<sup>5</sup> Karina, nunu solbouo naio mila korov vukariano tolu nene. Naio mila kario ana nomijog temeul tolu nene naio bio, naio bunu berenio berinavo "Komei!"

Vaarakurano ga bue kulorinio dolu tai jumolu jua miraku, naio bobogio. Toro napano naio miduio, midukar skel tai ka juñano, ka naio rivitii tomu nalo na yetemeriba nei salo sinaniano nalo.

<sup>6</sup> Ana nomijog iliano tai maluvo iviso kean temeul veri [4] nei, naio berinavo "Jau kavano, amijamo ka banso ka jau komijikia kala ka mia vitu toa vio nonovio, ka napano mia monoka avulu ve buruñara veru ve toru mia sinaniano ve telisu ga. Mia maka kejikia kalalelan burupati buruolivi napano ñā aminñauka titikivaka ea ñarati nene, a maka kejikia kalalelan burupati telikrevi napano aminñauka ñarjuñelñelū eaio." Nalo aber jibe na, ana naio bunu jikiti bano.

*Vukariano veri nene: Toro na toru na bajago na ñariano, napano naio midu bue kulorinio napano niabene be yevei*

<sup>7</sup> Bisi na, nunu solbouo naio mila korov vukariano veri nene. Naio mila kario ana nomijog temeul veri nene naio bio, naio bunu berenio berinavo "Komei!"

<sup>8</sup> Vaarakurano ga nominal bue kulorinio tai napano niabene be yevei, jikili joa miraku. Toro na miduio, ajisia ka sio na Mariano, mia naio, kanano bilbilu tai naio jo miel bija naio, napano sidano, abio ka Bulukuti Sebi. Ana naljuo nei, amijamo ka amijikia ala rivoa van tomu ve miroano ea yetemeriba nei, ea iobogu na mira, þeli ea vitu, þeli ea mieiano, þeli ea temeul nalo. Jibe ka, ver tomu veri ajua yetemeriba nei, tolu nene amijikia atu rivu ga, mia veri nene kalo, nalo amijikia ala naio rijikia tibe na.

*Vukariano jimo nene: Namoneano nalo na mā abiekouo batitig bo ba amuebinvinlo aŕmārnāro*

<sup>9</sup> Karina, nunu solbouo naio mila korov vukariano jimo nene. Naio mila kario naruei nemial boda, bija niununo miroano na tomu nalo amivon ea burupati nene. Naina be nalo napano mā amuebinvinlo bior napano aju jikili ka ajogkar Atua kanano iliano, a aju jikili ka mā aberial ka nalo amonea Yesu. <sup>10</sup> Nalo nene, nemial aju ajegi ban Atua ka buruŕara jooa, aberinavo "Aue Tubo na vite nonovio, jau kobe lu a jau kobe riano, aiao jau kovitilubar kenememi burukija nei. Nagi ana mia jau kala mirano van tomu na bova nei nanua mā amila bova jibe nei?" <sup>11</sup> Nalo aber jibe nei, ana ajan kulukoti na miuvu banlo ka ayaio, ana mia aber kalo ka vite nei napano abikanio naio maka vo. Nalo aberinavo atu kija ve telisu beamu vo, bior kanalo bilbilu tealo napano nalo aju kia vo, bija bunu kurualo a kuvivinielo dolu nalo, napano mia nalo bunu monoka auebinvinlo aŕmārnāro bior napano amonea, ana ver bogo na amei ve miroano avare ka Atua kiano jidomiano, mia naio rila venia napano abikanio.

*Vukariano ari nene: Legiano na maaro*

<sup>12</sup> Naruei, kiniou nemial ka nunu solbouo naio milakorov vukariano ari nene. Naio mila kario, ana vaarakurano ga mīi mikulkulu, a maka vesiou ŕerenio binimej bobogio napano bobogio nonovio, a siberio naio binimej bilvili jibe burukija, <sup>13</sup> a ŕarvitano nalo napano aju mave buluniogovu ajibir-bili abatove ea borotano, javukia ga ŕariesi nalo na buruesi tai na meruo, bogo na buruŕara jegi mikulkulu ka jaati nene. <sup>14</sup> Karina, amila bulunio-govu javukia yebe napano amijukuio amidu bano, a burusuku nonovio a uleule nonovio ajaraluvo den jelelo.

<sup>15</sup> Ana bogo na tomu nalo amial vite nalo nei, amerou toru mia amerou toru. Parinio tubo na yetemeriba, tomu na tor-toru, tomu na ajukamu ka tomu na mira nalo, sanibaiano nalo, tomu na ŕirilo jikili, naliko bunu kialo tomu na iŕnauno nalo, naliko kulo dolu nalo reraio, nalo abiniu abijauia buluvae nalo, aban ka vio nalo na mave ea suku napano mia ala vio sikili ka atuluku eao. <sup>16</sup> Bogo na abokar vio nalo nene, mia miroano jo binimej toru lie, ana nalo abio ban puruveru bija suku nalo, aberinavo "Aio-o, kamiu kuvijoru kuvisovko vatitig kumemi, ka siraragiano na naio napano jotano mave ea vio lu naio rijikia re rivokar kumemi, a ka nunu

solbouo kiano siniabu naio rijikia re rila lelan kumemi. <sup>17</sup> Legiano toru nei na naljuo kanalo siniabuiano binimej ruei, a kei naio mijikia tumolu rimeul ka bogo na? Makanio, vonganei mia naio rivova laka van kito roviniu."

## 7

*Atua naio bijauia buruŕara taara na tomu nalo tai na abe kanano*

<sup>1</sup> Iorou ka vite nalo nei, nemial ka napano nailiano veri ajumolu ajua sudu veri na yetemeriba, aju ajukovio ka jegi veri napano mā ajuŕa amiuuvuvu ea yetemeriba, ka rila na jegi nalo nei ajikia re bunu aiuvuvu ea tei, ŕeli ea borotano, ŕeli na mave ea buruesi. <sup>2</sup> Karina, nemial nailiano dolu bereio, naio binimej bija tena aue tovo napano Atua na meul kanano ea kiano tomu nalo, mia naio jaluvo ea tivelinio na jegi uro binimej. Naio mijikia ka nailiano nalo veri nei, nalo abar moroano ka amijikia ala lelan borotano a amijikia ala lelan tei bunu, ana naio bio ŕele banlo, berburelo ka ala re bunu titai. <sup>3</sup> Naio ber jibe nei, naio berinavo "Ee to, kamiu kuvila bulag re tei ŕeli borotano ŕeli buruesi nalo, rivin riva rivokar bogo napano rodu tovo tai toa ea meriniano tomu na memedu nalo napano abe kiado Atua kanano."

<sup>4-8</sup> Ka bogo nei naruei nejikar nomijog ka napano aberial memedu kanalo mirano napano ajekarlo. Nalo na amoluo ea yati duelimo ba juo [12] na Israel, nalo abe yati nalo napano mā abar korobilo nalo sialo, naina be Yuta, Rupen, Gat, Asa, Naptali, Manase, Simion, Livai, Isaka, Sepiulan, Yoseve, a Beniamen. Naruei ea yati nalo nei abiniu, tai bokar tomu nalo menu duelimo ba juo [12,000] amoluo ea naio, mila na nalo abiniu abokar menu toromomou duelimo va veri ba veri [144,000].

*Buruŕara tiniobi dolu napano amiya kulurārauo na miuvu*

<sup>9</sup> Ana iorou kano, nejiraravo ba naruei kamu ka miraku be buruŕara tiniobi na tomu nalo, napano nalo miroano mia miroano, maka ajikia avulukulo, napano nalo na amiyotuba ea yati dolu nalo. Nalo naruei abe tomu na buruvenuto dolu nalo, bija kialo iliano kinkin nalo, naruei abinimej ajumolu ajukamu ea buruŕara jobaro lu, napano nunu solbouo naio joaio. Nalo amiya kulurārauo novo na miuvu abiniu, a abar ŕati buruŕal, <sup>10</sup> ana aju abio toru, aberinavo

"Kiado Atua jotano ea kiano jobaro lu, naio ga, bija nunu solbouo,

naljuo abe burupati na ioruriano na kanado.”

<sup>11</sup> Ana bija nalo na, nailiano nalo bunu ajumolu aju jelviv ea jobaro lu, ana amijil bunu navagadeano nalo bija temeul veri, ana nalo bunu aminie abamenea kamu ka jobaro lu, amilotu ka Atua, <sup>12</sup> aberinavo “Nao, be riano!

Ilivuiano nonovio, a miamoiano, a masouano, a sivaiano, a vameneano, a sikiliano, a moroano, nalo nonovio abe kanado Atua kanano naio takurano ga, mia tibe na toboto.

Ilivuiano ban Atua!”

<sup>13</sup> Ana ka bogo na, navagadeano tai naio bika den kiniou, berinavo “Buruñara tiniobi nei napano amiya tena miuvu na, a jau komijikia abe kei nalo na, a jau komijikia ka nalo aju be abinimei na?”

<sup>14</sup> Ana kiniou neberinavo “Ii, maka nejikia, mia jau kobe toro na toru tai na vio nei, þeli jau komijikia kovio?”

Ana naio berdoþe berinavo “Ierinio, nalo na naruei napano amiieldulu ea bogo na buruñara jogvaiano nene. Mia kulunñarauo nalo na ñia amiya na, ajekon ka burukija na nunu solbouo nei, naruei abinimei amiuvu bo jibe ka na komialio na. <sup>15</sup> Nalo naruei, kialo iñauano jibe nei, ber

‘Nalo ajukamu ea jobaro lu na Atua kanano,

legiano a bogiano ana amiuñau kanano joomo ea kunuano lu,

a naio napano jotano mave nei, naio mia rivitkarlo.

<sup>16</sup> Mia maka bunu ajikia siserlo bereio,

a mia ajog re midou bereio,

ñerenio maka rijikia rila bulaglo,

buruñara sebi mia tunu re bunu lo,

<sup>17</sup> bior nunu solbouo napano naio jo iviso ea vio lu nene mave,

mia naio rivaganlo,

rivuru ñarabo kalo avan ea burupati uei na meuliano,

ana mia Atua naio riolkon nono jogu-miraló den miralo.”

## 8

*Vukariano aluo nene: Vio be tuñaro nonovio*

<sup>1</sup> Iorou ka naina, nemial ka napano nunu solbouo mila korov vukariano aluo nene. Naio mila kario, ana vaarakurano ga vite nonovio na tiniabene maka bunu rila malioano tai, vio nonovio melumu bo jibe na banbano bokar aura togio.

*Simeduo aluo nalo*

<sup>2</sup> Maka vesiou ga, nemial nailiano aluo napano nalo ajumña ajumolu kamu ea Atua mirano ka ala kanano iñauano, a ajian sime duo aluo banlo, abar janealo.

*Basidobidobi na ñaatei napano amiuñaukanio ea niogo*

<sup>3</sup> Ana iorou kanio, ana nailiano dolu tai naio binimei. Naio midu basidobidobi na ñaatei, napano amiuñaukanio ea niogo, a bar binimei ju kean boda, napano naio bunu amiuñaukanio ea niogo, a napano naio jokamu ea jobaro lu. Naruei abar ñaatei miroano banio ka risebilo ea boda ka rila bonotanunu rivu, a nalo ajian bunu volkouano na namoneano lu nalo kialo banio, ka rivar tumave ea boda tibe ka ijaiano tai. <sup>4</sup> Mia bogo napano sebi jo jijen ñaatei nene, bonoti nene bija volkouano nalo na kulo lu kanalo, ajaraluvo den nailiano juñano, aba abokar vio mave ea Atua mirano.

<sup>5</sup> Karina, nailiano nene bar vovosebi tealó napano jua boda, mison ba joomo ea basidobidobi na ñaatei nei, ana naio buku ba tove yetemeriba. Ana bogo na vite nei jokol yetemeriba, naio mila napano tubaalo jaara janea vio nonovio nalo, bija uetubaiano javukia bulukusebi bija vio bijaano, a ñii mikulkulu bunu.

*Simeduo na beamu miolu: Yuo bija burukija*

<sup>6</sup> Ana nailiano aluo napano abar sime duo aluo nei, amila batitiglo ka aiuvlo.

<sup>7</sup> Nailiano na beamu naio miuvu kanano sime duo, naruei mila na yuo napano jikili jibe kurukuveru, bija burukija napano mi-aja jibe ka sebi, abinimei amue vio reraio ea yetemeriba. Amila vio jibe na ban bano-o sebi jijen yetemeriba tivelinio, bija sano buruiesi nene nalo, bija bunu vite nonovio napano ña aju amiluo eaio.

*Simeduo juo nene miolu: Burusuku na sebi*

<sup>8</sup> Ana iorou kanio nailiano juo naio miuvu kiano sime duo. Nina mila napano buruñara kenieno burusuku tai, napano sebi jo moluo eaio, abuku batove ea tei. Naio mijuba tei jibe na, ana tei togio binimei jibe ka burukija, <sup>9</sup> ana sano temeul nalo añarñaro, a uako nalo na ña ajumña aburo ea buruñara vio reraio nei, nalo amadudu.

*Simeduo tolu nene miolu: Marvitano napano joñã buro ea vio yauo*

<sup>10</sup> Karina, nailiano tolu nene miuvu kiano sime duo. Naio ga mila napano buruñara ñarvitano tai, napano sebi joñã bovago eaio merera javukia yulu, naio

moluo den vio yauo, naio buro binimej bokar yetemeriba. Ana kanano sebi ba jokol uei nalo napano amieraro a burupati na uei nalo. <sup>11</sup> Marvitano nene, siano abio ka Uei Mijea, naruei naio mila ana uei na vio nonovio abinimej amijea, ana tomu nalo maka ajikia amunio, mia midou jerlo banbano ba aŕnarŕaro.

*Simeduo veri nene miolu: Melijokouo*

<sup>12</sup> Bisi na, nailiano veri nene naio miuvu kiano simeduo. Naina mila ana ŕerenio tivelinio binimej bobogio, a siberio tivelinio maka bunu rimiamo, a ŕarvitano nalo miroano maka bunu aialo. Naina mila ana legiano binimej bulati laka, a maka vio rimiamo bunu, mila ana be melijokouo reraio ea yetemeriba.

<sup>13</sup> Nojomŕa nejiraravo bano, ana nemial bebekumo tai jonŕa mier mave, naio jo miaga janea vio, berinavo "Vio bova ruei, mia kuluniabene kia ga navo. Nailiano tolu aju kia, ana kanalo simeduo nalo ajikili laka. Kamiu na yetemeriba, kamiu kuvitikar, burumŕara jogvaiano naio jo maluvo!"

## 9

*Simeduo jimo nene miolu: Bulukuŕili na batove laka, na be moti ka jogvaiano na jikili na ve varolu*

<sup>1</sup> Bisi na, nailiano jimo naio miuvu kiano simeduo. Naina mila ana ŕarvitano dolu tai moluo ea vio yauo naio bijulu batove ea yetemeriba. Marvitano nene amidu vulariano tai banio, naina be vulariano na rivetavo ea bulukuŕili napano ba bokar sebi yetano. <sup>2</sup> Bogo napano naio mijaglar sikmirano bulukuŕili nei, iou juru bavŕin jo molmoluo eaio, javukia iou na burumŕara sebi, naruei naio bavŕin miduko vio reraio ea vio yauo, miduko ŕerenio mirano, mila vio bobogio bereio. <sup>3</sup> Mia bogo na iou jo miduko vio jibe na, surubu nalo amolmoluo den iou aba tove ea borotano, mia maka bunu ave surubu, mia abinimej ajibe buruolu nalo na tortoru. <sup>4</sup> Aberburelo ka atokol re buruiesi nalo ŕeli na sinaniano ŕeli na vite nalo napano ajumŕa amiluo ea yetemeriba, mia amijamo kalo ka amijikia ala lelan tomu nalo na yetemeriba napano maka avar tovo ea mamerinialo napano Atua midu joa kanano tomu na memedu nalo. <sup>5</sup> Mo buruolu nalo nei, maka ajamo kalo ka ajikia auebinvin tomu aŕnarŕaro, mia amijamo kalo ga ka amijikia aikitkitilo rivanvano-o rivokar siberio ve jimo. Ana bogo napano mia atumŕa ala tibe na rivanvano, tomu nalo ajog niabele nalo ajalele reraio. <sup>6</sup> Ka bogo na, ve telabo averinavo bo ka aŕnarŕaro ga, mia amijikia asiravo ŕarabo na aŕnarŕaro eaio, mia ŕarariano

naio maka sidomlo, mia tuvanlo atu tibe na ga.

<sup>7</sup> Ana surubu nalo nei, bogo na nebiti batitiglo, nalo ajavukia bue kulorinio napano tomu na mira nalo ŕa abarlo. Amiyako pariparilo bija batubatu na abieko ka niogo, ana bogo napano nebiti vatitig miralo, nemiilo ka napano ajibe ka toro ga. <sup>8</sup> Mia vijulo aburon javukia tira vijinio, mia ŕarjuvulo javukia kuli kialo parinio tubo ŕarjuvono memedu. <sup>9</sup> Amilako baerelo ka butoto, a bogo na ŕa amier janea vio, sibialo nalo amalmalio, ajavukia bue kulorinio nalo napano aburu rukuruku aburo aban ka ala mira. <sup>10</sup> Mia surubu nalo nei be bulajielo joalo, bija vite na be niononoti ka ŕa julu tomu nalo joaio, napano mia amijikia atulu kulorinio kanio riva rivokar siberio ve jimo. <sup>11</sup> Nalo abe kanalo parinio tubo tai, naina be nailiano tai, mia maka ve Atua kanano nailiano, mia be nailiano napano naio bitikar ŕararavo na bulukusebi. Toro nene siano jel ea Ipru, abio ka Abatono, a ea Krik, abio ka Apolion, napano sio juo nei nioti nene be toro na mila bulag saba.

<sup>12</sup> Naina naruei surubu nene nalo, napano naio be moti ea jogvaiano tolu na jikili nei. Mia nemial ka napano naio ba bar laka ruei, juo nene ju kiano vo.

*Simeduo ari nene miolu: Naio be nailiano na ŕa mue tomu, napano naio be juo nene ea jogvaiano tolu na jikili*

<sup>13</sup> Bisi na, nailiano ari naio miuvu kiano simeduo, ana nomijog iliano tai maluvo ea sudu veri na boda lu napano amirŕaukanio ea niogo napano naio joa vio lu ea Atua mirano. <sup>14</sup> Iliano nene mil ban nailiano nei, ber jibe nei berinavo "Nailiano veri nalo napano aju amior vatitig nalo ajua vio na uei napano mieraro napano abio ka Yuvretis, vonganei naruei be bogo na jau kova kotuvanlo avava tavio bereio."

<sup>15</sup> Nailiano nalo nei, nalo abokar vatitig nalo jibe na ba bokar aura nene memedu ea legiano nene memedu ea siberio nene memedu napano amijikia ataluvo bereio ka ava ala kanalo iŕauano nalo. Ana nailiano dolu naio ba juvanlo, mila na ajaluvo, aban janea buruvenuto nalo ka amue tomu nalo vaataro ka rivokar tomu na yetemeriba togio.

<sup>16</sup> Nalo aban bija kanalo tomu na mira nalo napano abar kanalo bue kulorinio na mira, ana nomijog napano aberialo kanalo mirano bokario taamŕaka toromomou juo [200,000,000]. <sup>17</sup> Ana bogo napano nebitii bue kulorinio nalo nei bija tomu napano ŕa ajutano mave ealo, nemial napano butoto vite na amidu joko baerelo, amiyovovua bo abilvili javukia sebi, abe si

javukia buluniogovu, a amijelea javukia mïerenio. Kanalo bue kulorinio nalo abe dolu, napano pariparilo bar kuli kialo parinio tubo, mia bogo napano aburu jegi nemial be sebi a iou a vijinio bulusebi amiyotuba ea niolo. <sup>18</sup> Vite tolu nei naruei, sebi a iou a vijinio bulusebi, amila na vaataro ka tomu nalo na yetemeriba togio rivakovio ka bogo na. <sup>19</sup> Moroano na bue kulorinio nalo nei ajoa venia napano miyotuba ea niolo, a ajoa bulajielo bunu, bior bulajielo mijukonkon jibe ka mïaro, a javukia parinio mïaro joa juluvati jielo napano naio jian buruñara jaleleano ban tomu nalo.

<sup>20</sup> Jogvaiano nalo nei ajikili laka jibe na, mia tomu nalo togio toru, nina nalo napano mïa ameul kiano vo, maka asidom-alio. Maka lele aviliglo ka kialo imïauano va nalo napano juñalo ga jo miñaukanio, mia aju ajidel dolu ga ka amilotu ka sirñaro nalo, a ajurñia abolkouo ka tavoru nalo na kanalo atua nalo, napano maka ajikia asirarago, napano maka ajikia ajoglubar vite, napano maka ajikia aiel, napano toro ga miñau kalo ea niogo þeli ea veru na miuvu þeli ea butoto þeli ea puruveru þeli ea iesi. <sup>21</sup> A bija nina, maka aviliglo leleio ka kialo bajago na mïa amuebinvin toro, þeli semei nalo, þeli amijuku bova ka tira, þeli kialo vinauano nalo, na mïa aju amila.

## 10

*Nailiano tai midu niosi telisu napano mïa amijuku batove*

<sup>1</sup> Karina nemial ka napano nailiano dolu tai na be þirinio juvan vio mave batove. Naio miya melijo jibe ka napano kanano kulumarauo, a sibovivi tai jeliviv ea parinio, bija mirano na naio jibe ka mïerenio, a jaano be juo ajavukia buruñara mïartea mia abe sebi. <sup>2</sup> Mo nemial ka napano naio midukar niosi na telisu tai, napano naio bisi dea kamu kanio ea juñano nalo. Ana naio midu jaano meruo biekar ka tei, mo jaano mali naio biekar ka borotano. <sup>3</sup> Naio jumolu jibe na ju, naruei naio juvan buruñara iagaiano tai napano naio jibe ka laeon, mia bogo na naio mila, tubaalo nalo amiolu meran binimeï, amil ban naio ea kanalo saburuburiano nalo. <sup>4</sup> Bogo napano tubaalo nalo ajaraburuburu jibe na, ana nojidom nevivitauia bulag kanalo iliano nalo, naruei vaataro ka kiniou netikar nala, ana iliano dolu tai juvan vio mave binimeï ea kiniou, naio berinavo “Jau kotovo, jau kovivitauia bulag re kanalo iliano nalo na. Vite nalo napano mïa aju aberenio, nalo maka ave tena tomu nalo amijikia ajikia.”

<sup>5</sup> Iliano nalo na jibe nei, mia nailiano nei nua nemial naio biekar tei a borotano, naio jian juñano meruo bavin mave. <sup>6</sup> Ana naio ber kanano iliano na jikili tai, naio berkar ea naio napano meul jo jobo jo siano, napano mïa naio jii vio mave bija venia na mïa ajaiao, bija yetemeriba nei bija venia na mïa ajaiao, bija tei, bija venia na mïa ajaiao. Iliano na kanano naio ban jibe nei, naio berinavo “Vonganei naruei maka bunu ve bogo na kotororea! <sup>7</sup> Vaataro ka bogo na nailiano aluo nene rimeï riuvu kiano simeđuo, mia ver naio rila bisi, mia Atua kanano jidomiano vini-vaiano nalo aviniu ayotuba medave, vite nonovio amalmaluvo tavukia ga napano naio berial beamu ban naverialiano nalo nanua mïa ajurñia amirñau kanano.”

<sup>8</sup> Naio ber jibe na ana kiniou bunu nomijog iliano dolu tai jel mave binimeï ban kiniou, naio berinavo “Niosi telisu nei napano betavo joa nailiano nei juñano napano naio jumolu jua tei a borotano, kova kodu beamu.”

<sup>9</sup> Mia naban vaataro ka nailiano nei, nebika niosi telisu nei denio. Mia naio mijamo ka ga ban kiniou, berinavo “Bo ga, komijikia koduio. Ver koduio, monoka kosenio. Mia nemijikia never kaso ver bogo napano mia kosenio, mia kojog ka seseiano nene rivu ea niomo, avona bisi, mia jau kojog rijeja ea mabomo.”

<sup>10</sup> Ana kiniou nomidu nejenio, mia naio jesei bo ea nioku. Mia nojiomo dodomu ruei, mia jibe ka ga napano naio berenio, napano vite nene mila maboku bova laka.

<sup>11</sup> Karina, iliano binimeï ban kiniou vaarakurano bereio, berinavo “Tibe ga na naruei, bior ka napano verialiano dolu jo napano mia monoka kava koverialio bereio, napano aberii taara þiliþili nalo, buruvenuo nalo, tomu na iliano kinkin nalo, a parinio tubo nalo napano mïa ajaia yetemeriba nei.”

## 11

*Tomu juo na amijakar Atua kiano iliano*

<sup>1</sup> Ana ea bogo na amidu javiniu tai joa juñaku, aber ka mia nava nejeteli ea vio nalo vijaio. Aberinavo “Jau kavan ea Atua kunuano Yimo Lu, kejeteli ea vatitigio burutomoruoe juñabe, a kejeteli ea boda napano mïa jo joomo eiao, a kovuluku tomu nalo na mïa aju amilotu ea vio na, abokar vio. <sup>2</sup> Mia buruñara tanobuku napano jotavio kanio, nina mia kejeteli ea re, bior naio be vio togio na Yimo Lu napano tomu nalo napano maka ave Ju mia nalo aduio. Valauo nalo nei mia amei atovulu buruñara komeli lu nene Yerusalemo, mia

nalo amei jouro aiel tanea vio nene tibe ka kialo vio, mia nina aiṁaukanio riva vokar siberio ve duelimo va veri ba juo ga [42].<sup>3</sup> Mia bogo na atua vio na, mia tomu juo napano aju jikili ea ilirianiano na kanaku ayotuba. Mia naljuo aya ṁadabake ga tibe ka kialo kulurṁarauo, mia nalo averial kanaku iliano ea tikariano na siberio nalo na riva rivokar juluvati nene, napano legiano nalo nene abokar menu takurano toromomou juo duelimo va ari [1,260]."

<sup>4</sup> Tom juo nene, iliano lu na Atua kanano beriilo nua ruei, naina napano berii berinavo be burupati buruolivi juo naio ju, ṗeli napano berii be ṁartea na kadel juo, napano abe juo ajumolu aju kamu ka kiado Atua mirano nei napano naio be tubo ka yetemeriba reraio. <sup>5</sup> A verenio bogo tai toro tai rilavon ka rila vite na bova tai ka naljuo nei, mia sebi mijikia riyotuba ea niolo, mia rijikia rila niadua kanalo uolu nalo. Naina naruei be ṁarabo na ver toro jidom ruebin naljuo, mia naio ga naruei sen kanano ṁariano bereio. <sup>6</sup> Naljuo nei be kialo buruṁara moroano, ka napano amijikia averbure vio yauo mave ka mia yuo rivovo re rimonologog bogo napano ajumṁa aberial Atua kanano iliano, a mia amijikia ala uei nalo amei ve burukija, a amijikia ala ka napano jaleleano kinkin ṗeli bogokouo rime i rila lelan yetemeriba ea bogo na vabe ga napano naljuo ajumṁa ajidom ka alai.

<sup>7</sup> Naruei naljuo nei, mia averial Atua kiano iliano riva vokar bogo napano naljuo aiṁau tibe na ribisi. Ana ea bogo na naruei, mia buruṁara temeul na bova napano naio jotano joomo ea bulukusebi naio riyotuba rime i ka naljuo, a mia kanano moroano tovulu naljuo, ruebinvinlo ave juo. <sup>8</sup> Mia avuku salo tasiṁaro nalo amon ea ṁarabo iviso ea buruṁara komeli nei napano be komeli nene kia ga vo napano kialo Tubo, naio bunu ajukukakar naio ṁaro ea ṁakolkolo eaio, ea bajago na ililukukuano, bogo tai aber komeli nei siano abio ka komeli moruo na bova na Sotomo ṗeli vio Ijivi. <sup>9</sup> Mokotenalo be juo aju amon tavio jibe na, mia taara na tomu nalo ve miroano, ṗeli na yati nalo, ṗeli ea iliano nalo, ṗeli ea uleule nalo, amei ka aial naljuo, a mia averbure ka mia ativin re naljuo-oa bogoti ve tolu togio. <sup>10</sup> Mia bogo na ṁa aju abitii mokotenalo be juo banbano na, mia amiyotel ealo toru a abital niegeniegelo. Mia nalo atu asidomii jogvaiano nalo napano naverialiano juo na ṁa aju amila binime i ka tomu nalo na yetemeriba, ana mia nalo asaaro mia asaaro ka napano tomu juo nei aṁarṁaro

ruei, mia ala buruṁara jokoluolu a mia aje jidomiano vanlo bereio rivorio.

<sup>11</sup> Ana iorou ka bogoti tolu togio nei barlaka kario, mia maka ativinlo ave juo vo ana amilo ka napano jegi na meuliano tai jaluvo den Atua binime i jokol tasiṁaro juo nei, mila naljuo ajumolu bereio ajikili aju. Bogo na tomu nalo amialio, amerou mia amerou, <sup>12</sup> a maka vesiou, amijog buruṁara iliano tai jaluvo ea vio mave binime i mil banlo abe juo, naio berinavo "Mo, kam ve juo kumijikia kumei mave naruei." Naruei vaarakurano ga abe juo abavin amiduburevure melijo ba aboru mave, napano kanalo uolu nalo nei ajikili aju vovu garuei abitvitiilo bano mia maka bunu ajikia aver titai.

<sup>13</sup> A monloglog bogo na, borotano mikulkulu toru, mila napano komeli tivelinio, yimo nonovio ajibirbili aburu kokorovio naruei, a tomu nalo napano aṁarṁaro ea ṁii mikulkulu nei abokar menu aluo [7,000]. Nalo na ameul aju bo ga amial vite nei amerou tanea, ana amial aber bo ka ailivu ka Atua na mave rivior kanano buruṁara moroano nei napano abitlubario.

<sup>14</sup> Mii mikulkulu nei mila be buruṁara jogvaiano juo nene naio bar laka ruei, mia tolu nene naio maka vo, naio mia rime i vesiou re.

*Simeduo aluo nene miolu: Bogo na tibureiano, napano naio maariano ka jogvaiano tolu na jikirkili*

<sup>15</sup> Bisi na, nailiano aluo naio miuvu kanano simeduo. Nina mila napano jono miroano aber bulavulag buruṁara iliano nalo na mave, amilivu ka Atua, aber jibe nei

"Vonganei naruei vio nonovio napano beamu aju yetano ka tubo va na yetemeriba nei, aju yetano ka Tubo Atua na kanado, naio bija Naverikariano na kanano.

A mia naio rive Parinio tubo riva rijikia ribisi deo."

<sup>16</sup> A bija nalo, nalo navagadeano due- limo valuo ba veri [24] nene bunu, napano ajumṁa ajutano ea kanalo jobaro nalo, aminie tano kamu ka Atua mirano, amilotu kanio, <sup>17</sup> aberinavo

"O Atua Soṗi na moroano na mave, jau nanua kojo beamu, jau na mia koto vonganei, jau napano mia koto bogo na mia jo rime i.

Kumemi nuber siva toru banso bior komidu bereio kanamo moroano na toru ruei, vonganei naruei koju jikili ea kanamo tuboiano.

<sup>18</sup> Beamu, buruvenuo nalo na yetemeriba ajerni kaso, mia vonganei be kanamo bogo na koverial kanamo siniabu vanlo.

Vonganei be bogo napano mia jau kotibure tomu na mario, a mia jau kala lelan tomu nalo nanua ma amila lelan kanamo yetemeriba nei.

Ana kanamo tomu na iriauano nalo, naverialiano nalo, bija kanamo namoneano lu nalo, a nalo napano ma aju abatove ka siamo, mia avar kanalo ijaiano novo nalo ea bogo na, bekurano ka napano abe tomu na tortoru pli abe tomu na tertelisu ga ea kanamo iriauano."

<sup>19</sup> Ana ea bogo na abetavo ka Atua kunuano Yimo Lu na mave ea siraragiano na tomu nalo kialo, mia amial basidobidobi lu na tuboiano lu naio ju. Mo vaarakurano ga, vio binime mkekeano bior Atua kanano moroano naio jo, napano vio bijiio bija tubaalo joma jaara, vio malmalio, miu mikulkulu, a burumara kenieno kurukuti yuo aes tai mijoru.

## 12

*Tira tai kirinovo bija burumara kenieno niobi tai*

<sup>1</sup> Kiniou nojoma nebitii vite nalo na mave kia ga vo, ana nemial burumara kijokijo tai napano naio be tena iloiano. Nina be tira tai, napano naio midu merenio, miako ka naio jibe kanano kulmarauo, a naio jumolu ju mave ea siberio, a kanano batubatu na parinio, marvitano duelimo ba juo [12] juaio. <sup>2</sup> Tira nene naio jo be maono, ana naio mijog bova jo miaga souo, bior be kiano bogo rui, vaatara ka rivar kenerinio.

<sup>3</sup> Nojo nebiti naio kia ga ana burumara temeul dolu tai miyotuba mave, napano be tena meruano laka. Nina be burumara kenieno niobi tai, naio bilvili, be parinio aluo napano abar batubatu na parinio tubo nalo kanalo, tai bar tai, tai bar tai, be bunu salo pasimeduo jua pariparilo nalo nene, binu be duelimo [10]. <sup>4</sup> Mia vaarakurano ga tenei pillig jieno mikulkulu jibe na, muebulag marvitano miroano ea vio yauo, buku lo aban ea vio nonovio na yetemeriba. Ana tena bova neibano naio binime ju kamu ka tira nei mirano, kiano jidomiano jororea rui ka ver tira neibano naio rivar kenerinio, mia vaarakurano ga naio serbin senio.

<sup>5</sup> Naio jo jibe na bano na tira neibano naio bar kenerinio, bar be sumano. Ana Atua naio jidom ka kiritete nei rime ve parinio tubo na rivokar butoto ka jumano

ka rive tubo ka tomu nalo na yetemeriba, ana bogo napano temeul na kirivova nei naio maka rivokar kiritete nei vo, mia amidular den vaarakurano garuei, amidu bavin ban Atua mave ea burumara kanano jobaro. <sup>6</sup> Mia tira nei naio merou, naio buro ba joluku ea vio yauo, ea vio tai napano Atua mila batitig be kanano, mia ba juluku ea vio nene, ajirag naio ka bogoti telabo, bokar menu takurano toromomou juo duelimo va ari [1,260].

<sup>7</sup> Mia ka bogo na, be burumara mira tai maluvo ea vio mave. Parinio nailiano napano Maekel bija kiano nailiano nalo, amila mira kean burumara kenieno niobi napano, mia naio bunu naliko kiano nailiano nalo amila mira jikili bunu keanlo.

<sup>8</sup> Nalo amila mira jibe na bano-o, bokar bogo na niobi nei kanano moroano batove, naruei naio naliko kiano nailiano nalo ajibirbili abatove. Naruei amila bulaglo laka, amije vironiano banlo, abar bulag jelelo na ea vio mave denlo. <sup>9</sup> Mo burumara kenieno niobi nei, abukulario den vio mave vaarakurano, naio batove ea yetemeriba, naio bija kanano nailiano nalo nei.

Naruei ea bogo na mia kiniou nebitilubar ka burumara kenieno niobi nene naina ga napano beamu nuanua laka naio midu maro mirano, naio be toro na ma napano abio ka Simaro, pli Setano, napano vonganei ea kiado bogo, naio kia ga navo, naio joma buru yetemeriba reraio ba milaluvu marabo julaka.

<sup>10</sup> Mia iorou, nomijog burumara jooa tai bio toru janea vio mave, naio berinavo "Vonganei naruei Atua kiano ioruriano naio jumolu,

Atua kiano sikiliano naio jodovulio,

Atua kiano navenatuboiano naio miyotuba,

moroano na kanano Naveri-kariano naio jo loa laka ka vite nonovio.

Vonganei naruei toro na bova nei napano ma joma mil die maratavo nalo na be Yesu kiano, naio bisi rui.

Legiano a bogiano naio jumolu jukamu ka Atua mirano naio milavon ka verbulag ga tomu nalo kialo kariano nalo,

ana vonganei naruei, abukular naio rui.

<sup>11</sup> Namoneano nalo miroano maka bunu asidomial kanalo meuliano,

nalo maka amerou ka mariano,

mia aju jikili darariga ba bokar bogo na ajovulu toro na bova neibano,

ana venia napano abokar ka jumalo ka ala mira vijaio, naio be burukija na

Nunu Solbouo ga, bija iliano nalo na averial kanalo moneano ea Yesu.

<sup>12</sup> Ajodovulu toro na bova neibano, mila na vonganei mave bija nalo nonovio napano ajuao, amijikia asaaro mia asaaro,

mia nalo napano m̃a aju yetemeriba ŕeli ea tei, mia ajog rivova, a monoka amerou,

bior SiŃaro naio batove jo iviso kalo bija tiniene bujo ka siniabu, bior ka naio mijikia ka kiano bogo telisu ga, vaataro ka riviniu, naruei mila naio be deden lie vo.”

<sup>13</sup> Ninei be iliano napano toro tai berialio ea vio mave, karina kiniou nemial ka buruŃara kenieno niobi neibano naio bitilubar ka napano abukular naio batove ea yetemeriba, mila na kiano siniabu bavin lie vo, naio berkar jikili ka mia naio monoka rivokar tira nei navo, napano naio bar kenerinio suŃano ruei. <sup>14</sup> Naio ba milavio ka tira nei, mia naio milo ka ajian sibiano juo ban tira nei, javukia sibiano buruŃara bebekumo, ka naio rijikia rier rivuro riva toluku ea vio tai ea vio yauo napano amila batitig ka abitkar naio eaio. Naio ba jibe na, naruei buruŃara kenieno niobi neibano naio maka rijikia rivokar naio ea vio nene, mia aberinavo mia naio monoka toa vio nene bogo vetebievi kija, napano ve yuka takurano, karina yuka ve juo, karina ve togio bereio.

<sup>15</sup> Vonganei niobi naio mial tira nei jo mier bano, mijikia ka naio maka rijikia rila titai, naruei mila siniabu lie vo, jumolu mijuluo ka buruŃara ueimiya ka rivurular tira nei van vudodom naio.

<sup>16</sup> BuruŃara uei nei naio jo mieraro bano, vaataro ka rivokar tira nene, mia amiilo ka napano vaarakurano ga, yetemeriba tinien miia tira nei, naio miija naio ka napano borotano buruŕe, naio betavo jibe buruŃara niono tai, ana naio jinio mo uei napano niobi mijuluo bulagio jaluvo ea niono. <sup>17</sup> Niobi mialio, vonganei kiano siniabu binime bova laka, mia naio juvan tira jo, naio berinavo mia naio rivan ka kenerinio nalo ga, nina tomu nalo na m̃a aju ajakii tuboiano na Atua kanano, jibe ka nalo na m̃a aju abokar jikili Yesu kanano iliano nalo.

<sup>18</sup> Naio ber jibe na, ana batavio bija kanano buruŃara siniabu, ban ka rila mira die nalo dolu nei.

### 13

*Temeul va na be moti, napano miyotuba ea tei, niobi mije moroano banio*

<sup>1</sup> BuruŃara niobi nei miel ba jumolu juu tei tivelinio ju. Ana maka vesiou, nemial temeul tai jaluvo den tei binime ka naio. Vite meul nei be parinio aluo, pasimeduo nene nalo bokar duelimo, a ea simeduo beve terakurano be batubatu lu na parinio tubo kanano naio jo jaklele ealo. Ana ea merinialo beve terakurano, abivitauia sio tai jualo, napano ioluoliano ka lalalan tolu na Atua kanano. <sup>2</sup> Vite meul nene nemial be dolu laka, napano naio jibe ka jidom tibe laeon kija, bior niono jibe kuli kialo parinio tubo memedu, mia jaano veri jibe ka temeul deden dolu javukia bea. Naruei naio binime jikili jukamu ka niobi, ana niobi mije sikiliano banio, mila naio be parinio tubo ea kiano tanobuku nalo, juvan moroano nonovio banio.

<sup>3</sup> Mia nebiti vatitig vite meul nei bija kanano pariparinio nalo, nemial napano kanano parinio tai bar niajebijo tai napano toru laka. Bogo napano naio bar menko nene, ka naio riŃaro ga riviorio, mia tomu nalo na yetemeriba amillo ka amieliel ka binime bo, ana mila nalo abilig kialo jidomiano amonea toro meul nei naruei, aju ajakisorio.

<sup>4</sup> Jibe na, tinielo vite meul nei, ana bogo napano amial ka napano niobi mije moroano banio ka rimei sikili batitigio, ajaaro toru, amilotu ka niobi, a amilotu ka toro meul nei napano naio jo jukamu kalo. Aju aber jibe nei, aberinavo “Kei naio mijikia tovulu kanado toro meul ea mira bogo tai? Vonganei maka toro dolu sikili batig tibe naio.”

<sup>5</sup> Mia bogo napano vite meul naio binime jikili batig bo jibe na, naio jikar ka mila kiano vovaiano nalo. Naio jo juvan kanano ilivevaviniano, jo mioluolu janea vio, a jo miŃau bija kanano moroano va, a mila ba bokar siberio duelimo va veri ba juo [42], nina yuka tolu togio [3½]. <sup>6</sup> Ka bogo na, naio jo mil niegeniege Atua, naio jo miolua siano, a naio jo buku iliano nalo na bova ka mave a ea kulo lu napano ajuao. <sup>7</sup> Sikiliano na amije ban naio bare ka naio rila sebi rivan ea namoneano lu nalo, riva rijikia tovulu lo, a moroano na m̃a naio jo miduio, bare ka naio rije tuboiano ea taara ninio nalo, tomu nalo, iliano nalo, vija uleule nalo. <sup>8</sup> Naio mijikia rive tubo tibe na rivano-o rivan nalo nonovio na yetemeriba mia avatove ka naio, mia nalo tealo maka avatove kanio, a nina be nalo ga napano jikar ea tikariano na yetemeriba, sialo abivitauia ju joomo ea niosi na meuliano na nunu solbouo nanua amuebin riaro.



<sup>9</sup> Jau napano mña komijog iliano nalo nei, ver be tiliniemo bo jo, bo jau koia-gago vatitig rivu. <sup>10</sup> Namoneano napano mia avina ka naio ea kanano buruvenuo riva riñau kanalo, naio monoka rivan ga na. Mia nana mia atektorov burujono ka iobogu na mira, riano, mia iobogu na mira monoka tekotorov burujono ga. Ver ve bogokouo tai tibe na, mia namoneano lu nalo monoka atumolu atu sikili rivija jidomiano na tebievi, monoka aviekouo rivanvano-o avar duluio avokar juluvati nene.

*Temeul va juo nene, napano naio miy-otuba ea borotano*

<sup>11</sup> Ana iorou nemial temeul dolu na bova tai, mia naio mijivi mave ea borotano binime. Naio pasimeduo nene juo ga, jo ga jibe ka nunu solbouo tai, mia bogo napano naio mil, joono javukia niobi nanua beamu.

<sup>12</sup> Ana temeul na be moti naio mijamo ka juo nene miñau bija kanano sikiliano a kanano moroano novio, ana naio miñau banbano-o mila napano yetemeriba bija kanano tomu novio aju amilotu ka temeul na be moti, naio napano bar menko na mriano napano amieliel kanio. <sup>13</sup> Ana juo nene naio jo miñauka jameri-jiano na tortoru bija vite na iloiano nalo, banbano-o naio miñauka tai napano mila sebi jaluvo ea vio mave binime yetano ea yetemeriba ea tomu nalo miralo napano aju abitiio. <sup>14</sup> Naruei ea kijokijo nalo nei napano naio jo mila ea siano temeul na be moti, naio joña mila sibilili tomu nalo na yetemeriba, naio burulo aba amiavovu laka.

Naio berial kalo berinavo ate tavo-ru na temeul na be moti, napano iobogu na mira jeio mia naio meul bereio jo. <sup>15</sup> Ana aminaukano bisi, ana amidu moroano ban temeul juo nene ka naio rila tavoru nei mijikia rivuru jegi, a mijikia ril, a amije moroano ban naio ka rijikia ruetañaria toro kei napano naio maka saaro ka rivatore ka rilotu ka tavoru nei.

<sup>16</sup> Mo bija nina, naio jikili ka aviniu monoka aue toto tai tualo, ea juñalo meruo ver makano ana ea mamerinialo. Tomu na tertelisu bija tomu na tortoru, tomu nalo na mña abe talirñasa a tomu nalo na abe sanibaiano, tomu nalo na imñauano, bija kialo boru nalo, aviniu avar toto nei. <sup>17</sup> Ver makano, maka ajikia avulu vite ea yimo na viliiviliano, a maka ajikia aviliivilo ka titai rivan toro dolu.

Toto napano amue jualo, naio miyotuba ea siano temeul nei, naio jibe ka mirano na kanano sio.

<sup>18</sup> Jau napano mia kovuluku niosi nei, monoka kove masou rivu ka vio na. Ver komijikia kovitulubar vatitig rivu vite nalo nei, mia komijikia koleal merano na tomu nalo sialo, mia amijedu merano na temeul nei siano, amileal bokar toromomou ari duelimo va ari ba ari, þeli jibe napano tomu tealu aberenio, ari ari ari [666].

## 14

*Nunu Solbouo bija tomu nalo menu toromomou takurano duelimo va veri ba veri [144,000]*

<sup>1</sup> Bogo tai bereio nejirarago bano, nemial burusuku na Saion naio jo kamu ka kin-iou, a mave ea jumoti levlevi ana nemial nunu solbouo naio jumolu ju, naio naliko burumñara tiniobi na tomu nalo na kanano tai. Nalo abivitauia siano bija karamñano Atua siano joa merinialo, nalo miroano laka, merano ba bokar menu toromomou takurano duelimo va veri ba veri [144,000].

<sup>2</sup> Ana burumñara malmalioano tai miy-otuba ea vio mave, jovulu malmalioano na tei moñavu ea barañia þeli malmalioano na tubaalo. Ana nemiagago napano be malmalioano na þi mñarau nalo napano ajumña amueio, <sup>3</sup> a nalo ajumolu aju kamu ka vio lu, kamu ka temeul veri nei bija navagadeano nalo, ajumña amiuo ka iouano vou tai. Kulo dolu nalo miroano tinielo jii iouano nene toru, nalo ajidom aiou ka bunu, mia nalo maka ajikia ala kakario. Nalo ga napano amijikia amiuo kanio, nina be tiniobi na menu toromomou takurano duelimo va veri ba veri [144,000], napano abulu bulaglo den yetemeriba. <sup>4</sup> Nalo nei naruei napano maka lele avijuku vova ka tira bogo tai. Nalo abokar vatitig kanalo meuliano meravo bo julaka, a ajumña ajakisor Nunu Solbouo ban ea vio na vabe napano naio ban eaio. Tomu telabo aju, mia nalo nei naruei abulu bulaglo ajaluvo den dolu nalo, mia amila lo abinime jibe jidomiano tai ea mñaries na be moti ba ban Atua bija Nunu Solbouo.

<sup>5</sup> Nalo nei maka lele sibiano riyotuba ea niolo, maka ve vite na bova tai toa kialo meuliano.

*Nailiano nalo tolu*

<sup>6</sup> Ana ka bogo na, nemial nailiano dolu tai joña mier janea vio mave. Ajan iliano vou na bo nei napano maka rijikia rivakovio bogo tai banio, ka naio rijikia riva rioliolu tanea tomu nalo napano mña ajua yetemeriba, ka riva rivokar venuo novio, taara na tomu nalo novio a iliano ninio nalo.

<sup>7</sup> Naio jo berial janea vio bija burumñara joono, naio berinavo

“Kamiu kuvatove ka Atua, kividular vavin siano, bior napano aura na naio tibure yetemeriba nei naio maluvo ruei.

Kamiu kuvilotu ka naio napano naio jii tiniabene, yetemeriba, a tei, bija burupati uei nalo.”

<sup>8</sup> Ana iorou ka nina, nailiano juo nene tai naio jakisor binimej napano jom̃a bio jibe nei, berinavo

“Komeli kirivova na toru nei Bapilon naio mijoru ruei!

Naio ba midu atua na maka rive riano, ana buru tomu dolu miroano amivovu bija naio, nalo ajavukia tomu nalo na ña parilo jeliviv ga.

Mia vonganei, buruñara komeli nei naio binimej bova ruei bija kanano tavoru nalo.”

<sup>9</sup> Ana bogo tai bereio, nailiano tolu nene naio jakisor naljuo binimej, berial medave berinavo

“Tomu ve telabo anie tano ka alotu van temeul va rivija kanano tavoru, mia nalo ve telabo ajamo ka atirikar kanano toto toa mamerinalo ŕeli ea juñalo.

<sup>10</sup> Toro na jibe na, buruveru na bitunu ea bulukupil na mia sisen mokotenano ea nailiano lu nalo miralo, bija ea Nunu Solbouo mirano.

<sup>11</sup> Bonoti va na kanalo jogvaiano mia naio to rimaluvo dam̃ariga ea sebi nei napano maka rijikia rim̃aro bogo tai. Nalo napano amilotu ka temeul va nene, aturbanini ka kiano tavoru, vija nalo napano abar toto na siano ea niabelo, nalo maka ajikia avokar vio na jilimebiano na bo, mia atomon ga aial jogvaiano legiano bogiano dam̃ariga rivano.”

<sup>12</sup> Vironiano nene napano nailiano naio jo berenio naio kirisikili laka, ana mila na kito namoneano lu nalo monoka rotumolu rotu sikili vija kiado jidomiano na tebievi, a monoka romonea tuboiano nalo na Atua kanano, a monoka rotu rove riano van Yesu bogo nonovio. <sup>13</sup> Ana kiniou nomijog iliano tai juvan vio mave, berinavo “Ninei be iliano tai ka jau kovivitaia bulagio. Naio ber, tikar vonganei rivano, nalo na mia am̃arñaro, napano kialo meuliano naio jo bo ea Tubo juñano ruei, mia nalo avar ilivuiano ve toru.”

Ilano nei bisi, ana nomijog Niununo mijamo kanio, berinavo “Nao, nalo na mia kialo iñauano novo nalo amei mave vijalo, a vonganei, mie am̃au re bunu, mia nalo aje kialo jilimebiano na bo.”

*Nailiano tolu nalo aba abar sinaniano napano meruo ea yetemeriba nei*

<sup>14</sup> Ana nemial bereio, ana melijo na miuvu tai naio jukamu ka kiniou, ana nemileal toro tai, jibe ka Kulorinio Kenerinio, naio jom̃a jotano mave ea melijo nene. Naio jotano jo bija parinio tubo kanano batubatu tai ea parinio, napano amir̃auka ea niogo, a ea juñano naio midukar taŕig iobogu tai napano mali laka ka te bulag jirati m̃arati sinaniano. <sup>15</sup> Ana nailiano dolu tai naio miyotuba ea yimo lu, naio bio ban naio napano jotano mave ea melijo nei, berinavo “Mo, jau kotumolu, kodu kanamo iobogu, kava ketikar iñauano. Sinaniano nalo napanoaju yetemeriba nei ameruo ruei, vonganei naruei be bogo na kova kete bijjilo.” <sup>16</sup> Mia naio napano jotano mave ea melijo naio jumolu, buku kiano iobogu janea vio yetemeriba, naio je sinaniano nalo napano amermeruoaju.

<sup>17</sup> Ana nailiano tai bereio miyotuba ea yimo lu na mave ea tiniabene, napano naio bunu midu taŕig iobogu tai, napano mali bo bunu. <sup>18</sup> Ana nailiano tai bunu binimej bereio, nina be naio na ña bitikar bulukuti sebi, naruei naio jel ea boda binimej bio ban dolu neibano naio midukar iobogu neibano, naio berinavo “Mo, jau bunu, be bogo na kava kala kanamo naruei. Jau kodu kanamo iobogu kava keselivivi ea tilikrevi selivivi ea yetemeriba, ketebijii m̃arati nalo napano ameruo ruei ajakleleaju.”

<sup>19</sup> Naruei nailiano nei mijogio, juvan kiano iobogu ban yetemeriba, ba miobijii m̃arati krevi na yetemeriba, naio bukulo ea vio na abupi bulag vati nalo napanoaju tavio ka komeli. <sup>20</sup> Mia Atua kiano siniabu mila niegeniegelo, budig vatitiglo banbano ña burukija miyotuba, miou miou binimej toru jibe ueimia, naio mison buruvenuo nonovio, bululuo bokar kulorinio burujono, banbano-o jibe na mia miralo bulati.

## 15

*Nailiano aluo bija bogo va aluo, napano na maariano*

<sup>1</sup> Kiniou nojo nebitivitii vite nalo na mave ea tiniabene kia ga vo, mia maka vesiou nemial buruñara kijokijo dolu tai napano naio be vite na iloiano laka. Nina be nailiano aluo, napano abar bogo va aluo nalo nei napano na maariano. Nalo abe na maariano jibe na bior ver napano avar laka ruei, naina naruei mia rila Atua kiano buruñara siniabu ribisi ea vio nonovio. <sup>2</sup> Ana nemial buruñara vodobi tai, banbano jibe ka tei, mia nina naio sebi joaio, a naio merera javukia mermerobi.

Ana ea tivelinio na vio nene, nemial tomu nalo miroano ajumoluaju, a nalo nei, nina tomu nalo aviniu napano ajodovulu toro deden, ajovulu kanano moroano, ajovulu sikiliano na mirano na toto napano joaio, napano toro nene midu jibe ka kiano sio maraiu tai.

Tomu nalo na ajovulio, ajumoluaju bija kialo ŕii m̄arauo nalo napano Atua bar banlo,<sup>3</sup> mia nalo ajur̄ia ajerei kanio, amijev kialo iouano tai, nina be iouano na toro na miŕiau Atua kanano Naverialiano Mosis, mia vonganei naio binime i napano abio aber iouano na Nunu Solbouo. Iouano nei naio jel jibe nei berinavo

“Aire Teta Atua na moroano, kanamo iŕiauano nalo abe tomormoruo laka, a bo laka.

Jau kobe parinio tubo ka bogo nonovio, kanamo bajago nalo amemedu a abe riano.

<sup>4</sup> Jau kobe tubo, maka ve toro tai napano rijikia rimerou re kaso, maka toro tai napano rijikia rivatove re ka siamo.

Jau takurano ga kobe lu riano, mia taara na tomu nalo monoka amei anie tano alotu vanso,

bior vonganei, vite na memedu nalo napano komilalo, nalo amoluo abinime i meravo bo ea tomu nalo na yetemeriba miralo.”

<sup>5</sup> Karina, nejirarago ba joomo bereio ea vio mave, ana nemial ka abetavea m̄aratavo nalo na yimo lu. Nemial jibe ka tabobo panpano napano beamu amidu lilian ea vio yauo, napano abar batitig Atua kiano tuboiano juaio. <sup>6</sup> Abetavea kario, ana nailiano aluo nalo amiyotuba denio. Nalo amiya kulun̄arauo na teremi nei napano ameravo bo, amerera, ajelan kialo kulubue napano amir̄iau kalo ea niogo kario ea baerelo. Ana amiel abinime i, bija bogo va aluo nei napano ajur̄ia abario.

<sup>7</sup> Abinime i ajumoluaju ana temeul veri nei tai naio jian basidobidobi niogo aluo banlo, tai midu takurano, tai midu takurano, abujovujo ka siniabu na Atua kanano nei napano naio jo jobo jo.

<sup>8</sup> Nalo abario bisi, ana bior napano burun̄ara miamoiano na Atua kanano moroano joa yimo lu nei, vio na sebi binime i bujo laka, mila napano maka toro rijikia riva joomo eaio. Narue i jo jibe na ga banbano bokar napano bogo va aluo na nailiano aluo nalo nei kanalo abiniuviniu kokoio.

## 16

*Basidobidobi aluo napano abujo mag-mago ka Atua kiano siniabu*

<sup>1</sup> Ana nomijog iliano na jikili tai miyotuba ea vio mave ba ban nailiano aluo nalo nei, berinavo “Vonganei, be bogo na kamiu kuvim̄auka kenemiu naruei. Kamiu kuviyon bulag veve terakurano basidobidobi nalo na kenemiu Atua kanano siniabu rivan ea yetemeriba.”

<sup>2</sup> Naio berenio bisi, ana nailiano na be moti naio ba miyon bulag kiano basidobidobi ban ea borotano, mia sano uei nene mieraro ba mila menko va nalo amiyoyotuba ea tomu nalo napano toto na temeul va joa niabelo, napano m̄a amilotu ka kanano tavoru, mila na amijog napano niabelo mijalele m̄elea.

<sup>3</sup> Bisi na nailiano juo nene naio miyon bulag kanano basidobidobi ban ea tei, ana sano uei nene miou ba mila tei binime i be burukija jibe ka toro na m̄aro kanano, ana temeul nalo napano ajaio am̄ar̄iaro nonovio.

<sup>4</sup> Karina nailiano tolu nene naio miyon bulag kanano basidobidobi ban ea uei napano mieraro bija burupati uei nalo, ana sano uei nene naio miou ba mila nalo bunu abinime i abe burukija garuei.

<sup>5</sup> Narue i nomijog iliano tai binime i den nailiano napano naio jo be boru ka uei nalo na yetemeriba, berinavo

“Jau napano beamu kojo, mia jau koto banei, jau kobe nana be lu, kanamo vironiano nalo nei ajikili m̄ele, mia kanamo tibureiano naio memedu ga.

<sup>6</sup> Be riano ka tomu nalo na yetemeriba, amuebinvin kanamo kulo lu nalo, amila burukija na kanamo naverialiano nalo amiou, ana jau kojor̄ia komila meran banlo memedu ga,

napano m̄alo uei nalo abe burukija ga.”

<sup>7</sup> Ana iliano dolu tai bunu miyotuba ea boda, berinavo “Atua Soŕi Na Mave, be riano laka, kanamo tibureiano nalo amemedu, abe riano laka.”

<sup>8</sup> Bisi na, nailiano veri nene naio miyon bulag kiano basidobidobi ban ea m̄erenio, ana sano uei nene mila m̄erenio binime i jikili lie vo, naio mijikia tunu tomu nalo na yetemeriba niabelo tibe ka sebi. <sup>9</sup> Ana mia ajog vio rivitunu mia rivitunu, ana mia m̄erenio tunulo rivan rivano-o mia atu aiolua niegeniege Atua siano. Amijikia ka naio jor̄ia juvan vironiano nalo nei binime i, amijikia ka naio mijikia verbure ver naio sidom, mia maka lele asidom aviliglo kanio, aber nalo maka ajikia avatove ka naio ŕeli ailivu ka siano bogo tai.

<sup>10</sup> Bisi na, nailiano jumo nene naio miyon bulag kanano basidobidobi ban ea jobaro soŕi na temeul va nei, ana sano

uei nene naio mieraro ban ea tanobuku reraio ea kanano navenatuboiانو, mila vio bobogio laka. Tomu nalo amijog bova ka vironiano nalo nei, nalo ajer minalo banbano, <sup>11</sup> mia amiolua niegeniege Atua na mave bior niabele bivitunu bija kialo menko lu nalo, na ajumŕa amilakokoa ga, bior maka asidom ka aviliglo ea kanalo bajago moruo nalo.

<sup>12</sup> Bisi na, nailiano ari nene naio miyon bulag kanano basidobidobi ban ea burumŕara uei napano rŕa mieraro na, siano Yuvretis, ana sano uei nene mila uei nei binime jabo nonovio. Nina mila napano parinio tubo nalo na buruvenuo nalo ea tivelinio na rŕerenio mijivi eaio, be kialo rŕarabo ka avarkor vio amei vija kanalo tomu na mira nalo.

<sup>13</sup> Ana nemial niununo va tolu napano ajavukia niobi na uei, napano nalo tai miyotuba ea burumŕara niobi niono, a nalo tai miyotuba ea niono temeul na kirivova nei, a nalo tai miyotuba ea niono naverialiano lubolubo. <sup>14</sup> Nalo tolu nei, abe niununo na siŕŕaro tolu napano ajumŕa amimŕauka kijokijo nalo, ajumŕa aba ajeliviv ea parinio tubo na buruvenuo nalo na yetemeriba, aburulo abinime vi takurano ka ala batitig vite nalo rivior burumŕara mira napano mia naio tumolu ea burumŕara legiano na maaro napano Atua Soŕi naio berkario ruei. Atua naio beriio legiano nei ruei ea kanano iliano tai, napano naio berinavo

<sup>15</sup> “Kamiu kuvitikar, mia kiniou nemei vina ga ea kamiu, mia kuviilo ka kiniou tibe ka napano ver toro na vinauano tai rimeŕi.

Toro na ver mison vatitig kiano saba nalo, ju rorea ruei ju jevijo kia vo joreea kiniou ka kumemi ve juo nuvano, mia rivu laka van naio.

Ana mia nalo dolu aillo ga, atikiti moŕŕa tanea vio, avar burumŕara imouiano ka bogo nene.”

<sup>16</sup> Naruei nemial ka napano bogo na mira na legiano na maaro naio miyotuba, ana niununo nalo aburu burovuron parinio tubo nalo na yetemeriba nei aba vio takurano, nina ea vio na napano iliano na Ipru berii jibe nei ber Amŕaketen.

<sup>17</sup> Bisi na, nailiano aluo nene naio kija miyon bulag kiano basidobidobi, mia naio miyon bulagio ba janea vio vio yauo mave. Ana iliano tai miyotuba ea jobaro lu joomo ea yimo lu na mave ka bogo na, naio miaga mave berinavo

“Vonganei naruei be bogo na juluvati vite nonovio ribisi.”

<sup>18</sup> Ana vaarakurano ga vio jikar viobijan janea vio, bija tubaalo ajumŕa ajaara, abe vioano nalo a malioano nalo. A bija nina, mŕii mikulkulu toru, memebiju ba bova laka jibe ka napano toro maka rial kija ea tikariano na yetemeriba binime bokar banei. <sup>19</sup> Ana mŕii mikulkulu bakuŕe borotano, mila komeli nalo na buruvenuo nalo na jeliviv ea yetemeriba ajibirbili abavatove, ana na mila napano burumŕara komeli nei Bapilon bakuboŕe ea niati tolu.

Atua jidomkar vio nene, bija kanano vovaiano nalo, ana naio mila naio mijikia memedu ka kiano bajago nalo napano naio jomŕa milaio, mila naio munu ea baja napano bujo ka rŕarjunŕelŕelu na moroano na kanano siniabu. <sup>20</sup> Ana bija mŕii nei, uleule sesa nalo aburo janea vio aba kovio, a burusuku nalo nanua beamu ajumulu aju, maka bunu aial lo. <sup>21</sup> Kurukuti yuo aes nalo na mave ea vio yauo ajibirbil ajavukia puruveru na tortoru, ajuba vinvin tomu nalo napano rŕa ajua yetemeriba nei. Amijog bova toru biorio, amial ka napano jaleleano nei naio jikili laka, banbano ajumŕa abuku iliniegeniegeiano ban Atua.

## 17

### *Tira va jotano mave ea temeul va*

<sup>1-2</sup> Ana ka bogo na nailiano tai binime, nina be nailiano aluo tai napano aju abar basidobidobi aluo. Binime kuku ka kiniou, berial berinavo “Jau katakisor kiniou. Mia nesiloglogso ka burumŕara komeli va nei Bapilon, napano naio joa vio nei napano burumŕara uei nalo napano rŕa amieraro ajuao. Komeli nei naio jomŕa miŕŕau bova, naio javukia tira na rŕarabo ga. Naio javukia napano parinio tubo nalo na buruvenuo dolu nalo ajumŕa aba amila siakaiano bija naio, a jibe ka napano rŕano rŕarjunŕelŕelu bilig tomu nalo na yetemeriba aba amiavovu tanea garuei. Mia jau komei, ka mia nalaso keial venia napano mia rimaluvo kanio ea bogo napano mia rivar kiano vironiano rimemedu.”

<sup>3</sup> Mo nailiano nene naio binime midular niunuku, midu kiniou nojoa vio yauo tai. Ana nemial tira tai naio jotano mave ea buruolu deden tai. Temeul nei naio bilvili mia bilvili reraio, naio be parinio aluo a pasimeduo nene nalo bokar duelimo, a niabeno reraio abivitaia sio va nalo ka ail niegeniege Atua. <sup>4</sup> Ana tira nene, naio miovo bo laka, ea kulumŕarauo nalo na be si a abilvili, mia naio jelan ea niabene nonovio ka yomu, a ŕejelinio na

tiliniene, a niogo nalo, a vermiromu nalo na be buruñara veru nene, a basabebe nalo. Naio midukar baja niogo tai ka jumano, mia baja nei naio bujo ga ka kanano niamiamo nalo bija kanano siakiano nalo. <sup>5</sup> Karina abivitauia iliano tai joa mameriniano, naio be ililuklukuano tai. Iliano nei naio javukia sio tai, napano ber jibe nei, berinavo

“Bapilon napano burutomoruo,  
be kenieno tira nalo na mñarabo,  
be burupati bajago na niamiamo na yetemeriba.”

<sup>6</sup> Nojomña nebitii tira nene, nebitilubar ka napano parinio jeliviv, a maka rivior ka napano naio munu mñarjurnelñelu, mia bior naio joñña munu burukija na moneano lu nalo, nina nalo napano mña amuebinvinlo bior ka na mña ajakisor Yesu. Nemial tira nei jibe na, nomijog niabeku þili mia!

<sup>7</sup> Ana nailiano naio mil ban kiniou, berinavo “Ei, venia na milaso komiilo mñele jibe na? Jau koto vo, mia kiniou never bisivisii batitigio navo. Tira na, bija buruolu na naio jotano eaio, napano parinio aluo nalo a sano pasimeduo duelimo, vite nalo nei nioti nene nalo aju, a mia nalaso kovitulubarlo.

<sup>8</sup> “Buruolu na komialio, naio jo beamu, mia maka bunu to vonganei. Ana ka bogo tai napano jo binimei, mia naio riyotuba rimei mave bereio den bulukuþili napano joaio vonganei, mia rivan ka riñaro ea kanano vironiano. Ana ea bogo na, tomu nalo na yetemeriba napano aju keano vo, mia aial buruolu nene. Nina be nalo napano jikar ea tikariano na yetemeriba, sialo maka to joomo ea niosi na meuliano. Mia bogo na aial naio, mia aiilo ve toru, bior amijikia ka naio jo beamu nua, karina maka bunu to bogo kirisioi laka, karina, naio miyotuba bereio. <sup>9</sup> Ana toro napano be masuo bo, mia naio mijikia rivitulubar rivu nioti na vite nalo napano mia neverenio.

“Moti nene, naio be sano parinio aluo. Nioti nene, naio ber komeli tai napano tira nei naio jo be tubo eaio, napano be sano suku aluo ajuai. A suku nalo nei, naio be sano nioti nene nalo bunu, berinavo be parinio tubo aluo na tortoru aju. <sup>10</sup> Bokar banei, parinio tubo jimo nene nalo abisi ruei, a be tai na naio jumolu ju vonganei. Tai bereio napano maka riyotuba vo naio jo keano, a bogo na rimei, mia monoka naio to vesioi kija vo.

<sup>11</sup> “Buruolu nei bunu napano beamu naio jo mia vonganei naio maka bunu to, beamu naio bunu be parinio tubo aluo nei

tai. Naio be nalo tai ruei, mia naio rimei bereio tibe parinio tubo arolu nene. Naio be toro na toru jibe na, mia bekurano, bior mia iorou naio bunu mia ribisi, naio riva rivar kanano vironiano na jikili.

<sup>12</sup> “Vite dolu ka aver bisivisio, nina be pasimeduo duelimo nene. Sano nioti nene nalo, naio be parinio tubo duelimo bereio. Nalo na maka atumolu vo ka ave tubo ea kanalo tanobuku ve terakurano, mia nalo ala kanalo iñauano ea bogo napano mia buruolu neibano tumolu. Mia ave tubo ea yetemeriba vija naio, mia nina naio be bogo na kiri bulati tai, tibe aura ve takurano ga.

<sup>13</sup> “Nalo duelimo nei, nalo maka ajikia ala kanalo iñauano nalo, mia nalo abe tena aiñau buruolu nei ga kanano, ka kanalo moroano rijai naio, ka rila naio rimei ve toru lie vo. <sup>14</sup> Mia nalo nonovio na amei vio takurano ka alavon ka ala mira ka Nunu Solbouo, ana mia maka ajikia atovuluio. Makanio, mia naio tovulu nalo bior napano naio ga be tubo loa ka tubo nalo, naio ga be parinio tubo loa ka parinio tubo nalo, a kanano tomu novo nalo, nina nalo napano naio biolo, naio bijauia bulaglo, a nalo abiekouo ea naio.

<sup>15</sup> “Vite dolu ka aver bisivisio, naio be uei nalo a tei nalo napano komial tira va nei naio joñña jotano mave ealo. Salo nioti nene nalo, naio be tomu nalo na mña ajua yetemeriba, bija taara nalo, a buruvenuo nalo, a iliano nalo.

<sup>16</sup> “Ana iorou kanio, buruolu nei bija sano pasimeduo duelimo, mia asidom re bunu tira va nei. Mia atumolu ala naio rimei vova laka, napano mia aya bulag mñano kulumñarauo nalo denio mia naio rivar moña ea mirano tomu nalo, mia nalo asen sano sunbue na niabene rivan mia avuku sano buriu nalo rivan ea sebi sisenio.

<sup>17</sup> “Ea mñarabo nei naruei na mia ala van tira nei, kito romial memedu ga ka vironiano napano Atua berialio ea kanano iliano nua, ber naio jidom ka tira nei monoka rivario. Naio ga midu joa kanalo jidomiano bija buruolu, ka ala ka naio tibe na.”

<sup>18</sup> Naruei nailiano nei mila nonovio kanano iliano ea bogo nei, berinavo “Nina naruei verivisivisiano na tira nei, napano naio be buruñara bulukomeli napano be tubo ka parinio tubo dolu nalo na yetemeriba.”

## 18

*Bulukomeli va nei Bapilon naio mijoru*

<sup>1</sup> Bisi na, nemial nailiano dolu tai jaluvo ea vio mave naio binimeŕi yetano. Naio be nailiano na Atua kanano na jikili tai, binimeŕi bija buruŕara moroano, a kiano mereraiano midulli yetemeriba. <sup>2</sup> Naio miaga mŕerera ka buruŕara jooŕo, berial "Buruŕara bulukomeli Bapilon nei mijoru ruei.

Vonganei, vio nene binimeŕi be vonuo tai na siŕaro nalo kanalo, a vio na niununo va nalo ajuluku eaio.

Menu kinkin nalo na ŕa amirŕauka bajago na miagiago va, nalo bunu ajurŕa amirŕauka ŕŕalo niuku nalo eaio.

<sup>3</sup> Naio ba midu atua nalo napano maka ave riano, a naio buru tomu dolu nalo abe vovu bija naio, ajibe ka tomu nalo na ŕa pariparilo jeliviv ka uei.

Jibe ka napano naio buru parinio tubo na buruvenuto dolu nalo, aba amila siakaiano bija naio, a tomu nalo napano ŕa amirŕau buor veru jeliviv ea yetemeriba, amijev veru va miroano ea ŕasautogo va na bulukomeli nei, banbano na abinimeŕi abe sanibaiano laka."

<sup>4</sup> Nailiano nei naio mil jibe na bisi, ana nomijog iliano dolu tai jaluvo ea vio mave naio binimeŕi ber jibe nei, berinavo

"Aire kiaku tomu nalo,

bo ka kamiu kuvuro soŕeli kuvitaluvo den vio nei,

ver ŕeli mia kuvila bitiran kiano kariano vija naio,

ver ŕeli mia kuvidu bitiran bunu kiano vironiano nalo.

<sup>5</sup> Kiano kariano nalo amivonlo ba bokar mave, mia Atua maka rijikŕia tinien ribobogia bogo va naio napano naio mila korov kiano tuboiano nalo.

<sup>6</sup> Bo ka asian meran jogvaiano van naio tibe ka napano ŕa naio jian ban dolu nalo,

bo ka avulu meran naio rive valuo ka venia napano naio mila ruei.

Uei na mijea napano naio mila tomu dolu nalo amunuio, bo ka aion rivan ea kiano baja rivujo batitig.

<sup>7</sup> Beamu, kanano jogvuiano ea kiano meuliano monmaio naio toru laka, mia naio sibuku rimeŕi ve jogvaiano ea niabelejalele nalo bija tegiano nalo.

Mia nina naio maka na vo, bior napano naio jomŕa mila kiano jidomiano be ŕarou laka keano, naio jo berii naio, berinavo

'O, kiniou nebe tira parinio tubo jibe nei, nojotan batitig nojo nei. Vite nonovio binimeŕi bo laka ban kiniou,

ana mia netibe re leleio taanou tai napano maka ve kiano vite, mia maka nejikŕia neteg rivior jogvaiano.'

<sup>8</sup> Mia naio, ea legiano tai napano jo binimeŕi, mia jaleleano nonovio ala tanea naio vaarakurano. Mia ve ŕariano, vija tegiano, vija vituiano, a mia sebi sisen vatitig naio.

Naio maka to sidomial, mia Tubo Atua napano mia naio tibure naio, kiano moroano toru laka."

<sup>9</sup> Ana nailiano nei ber jibe nei, berinavo "Parinio tubo nalo na buruvenuto dolu jeliviv ea yetemeriba napano ajurŕa aba amilotu ka atua nalo na buruŕara bulukomeli nei, mia avitulubario ka napano mijoru ruei. Nalo naruei ajibe ka napano aba amila siakaiano bijaio, aba abijurukario ea kanano meuliano na bo banbano, maka asidomial titai.

"Mia bogo napano naio mijoru, sebi jo jijenio sano iou nalo bavavin, naina naruei mia ajog rivova kano ve toru, mia ateg riviorio. <sup>10</sup> Mia aial vironiano napano mia naio to rivario, mia rilalo bunu atikar ka amemebiju. Mia nalo atumolu atu koalabo denio, avitivitiiio, averinavo

'Uerei Bapilon, buruŕara bulukomeli na moroano,

kumemi tiniememi miiaso toru.

Riano ga jau kojo bo bano-o, mia ka aura takurano ga nei ana jau komial kanamo jukuti, komijoru, jau kobisi mia kobisi."

<sup>11</sup> Mo bija nalo na, tomu nalo na yimo na vŕilvŕiliano nalo jeliviv ea yetemeriba mia ateg ajog rivova, bior ka napano mia ve re bunu tomu tai ka avulu kialo saba.

<sup>12</sup> Beamu, amison kanalo uako nalo bija togogo na bo, jibe ka vite nalo na ŕa amirŕaukalo ea niogo ŕeli na ea verumera, bija vermiromu napano buruŕara veru kano, bija basabebe nalo, a kulurŕarou mkekeano napano salo niabele nalo bo, a iesi bonotanunu, a vite nalo napano amirŕau kalo ea ŕarjuvono bue ŕararou na eleven, ŕeli ea iesi nalo, butoto nalo, a puruveru nalo, mia vonganei, kanalo iŕaiano nalo ka veru mia ameŕi ajuba vio nonovio.

<sup>13</sup> Mo ea bogo na, mia tomu nalo avulu re bunu vite nalo na amirŕauka salo siniano, jibe ka ŕaiesi nalo, ŕeli na ŕarsili nalo, ŕeli na niago na bilulu, yevi bija kon, bija bunu vite na munuiano jibe ŕarjuŕmelŕelu. Mia tomu nalo ajikŕia re bunu avulu vite nalo na jibe ka ŕaatei a titikivaka na ŕarolivi, ŕeli na vite nalo na ŕa ajurŕa aburu veru ealo beamu, javukŕia

bue m̄arauo, þeli na nunu, þeli na bue kulorinio bija kanano rukuruku nam̄a jo burio. Tealo nanua beamu ajum̄a abulvulu ka tomu nalo na m̄a amim̄au kurano ga ea boru nalo, mia maka bunu ajikia alaio, bior ka bogo napano burum̄ara bulukomeli nei naio mijoru, mia ve re bunu im̄auano tai, mia toro maka bunu rijikia rialeal veru ka rivitikar kanano meuliano.

<sup>14</sup> Ka bogo na naruei, mia averii vio na, averinavo

“Jau kojidom ka jau kovar m̄ariesi na tortoru ve telabo, mia maka rimeruo vatitig vo naio jibirbili rui.

Beamu, jau kobe sanibaiano laka, kiamo saba nonovio kirinovo laka, mia vonganei binu bakovio nonovio, mia toro maka bunu rijikia rial tena bo tai easo bereio leleio.”

<sup>15</sup> A tomu na m̄a aþilvili ka vite nalo, napano m̄a aburu veru nalo telabo bior rui, mia atu laka ga asirarago vano mia amerou ka vironiano na mia burum̄ara bulukomeli nei naio to riduio. Mia ajog rivova rivorio, <sup>16</sup> mia nalo ateg ve toru, averinavo

“Aiou kenememi burum̄ara bulukomeli nei, aua toru banso.

Nanua jau kojom̄a komiovovu bo ka kulum̄arauo novo nalo, jau kobar yomu niogo a þejelenio niogo janea niabemo,

mia vonganei jau kobe deio rui, kiamo sebi m̄aro.

<sup>17</sup> Jum̄abe kanamo burum̄ara sanibaiano mijikia binu kokoa ea aura takurano ga jibe na?”

A be natelanvuuiانو nalo na uako nalo nanua beamu ajum̄a abarvar togogo nalo, bija kialo naim̄auano nalo, bija nalo napanoaju amieliel ea uako þeli abar veru ea tei, nalo bunuaju koalabo ajirarago ban ea vio nene. <sup>18</sup> Bogo na iou na sebi napano jom̄a miduko vio, jo bavini ea vio yauo, mia atum̄a aververii vio nene, averinavo

“Riano ga, bulukomeli na be vio tai na, tai re bunu tibe naio ea yetemeriba nei.”

<sup>19</sup> Tinielo maio ka jibe na, mila amijog bova, abisivisii burumaroro ea pariparilo, ajegi, aberinavo

“Aiou, kenememi burum̄ara bulukomeli nei, aua toru banso.

Jau kobuju ka veru, mia kumemi numim̄au ea uako nalo na kenememi, nubarvar kanamo togogo nalo, banbano kumemi bunu numileal veru, mia vonganei bova ga.

Ea bogo tai na bulati ga nei, mia jau komei kove vio na vakovioiano ga.”

<sup>20</sup> Ana bior napano burum̄ara vio va nei naio mijoru jibe na, iliano tai miyotuba mave, berinavo

“Ea vio mave, burum̄ara saariano a jogvuiano.

Kamiu namoneano lu nalo, a atevi nalo, a Atua kiano naverialiano nalo, kamiu kumijikia kuvilivu ka naio ve toru, bior ka napano naio jibure tira va nei rui, jian meran ban naio bior vovaiano nalo nanua m̄a mila ban kamiu beamu.”

<sup>21</sup> Ana ea bogo na, nailiano tai binime bitirilar burum̄ara puruveru tai, naio midular loa ka parinio, ana naio bukuio mijoru mue tei, madudu bakovio. Karina, nailiano nei naio ber jibe nei, berinavo

“Naina naruei burum̄ara bulukomeli va nei Babilon,

mia avukular naio rivan laka tibe na, mia ala naio rijoru ka mia rijikia re tumulo bereio bogo tai.

<sup>22</sup> A jau Babilon, iliano biedu banso jibe nei, ber

iouano nalo na vameleviu bija þi m̄arauo nalo, mia toro rijog re to easo bereio,

tomu nalo na aim̄auka im̄auano nalo, mia ve re tai to easo bogo tai, a malioano nalo na abiji ka siniano ve re bunu.

<sup>23</sup> Miamoiano na yulu nalo ajegli re kanamo vio nalo bereio,

mia jau kojog re ilimerevuiano na m̄eaku bija tira napano naljuo ajoro vonga.

Tomu na amim̄auka kanamo veru, maka dolu tai ea yetemeriba nei tavukialo, a moroano na kanamo semei nalo a kanamo sibiano nalo amilaso koburu buruvenuo dolu kialo jidomiano ba be vovu laka.”

<sup>24</sup> Naina naruei kito romial ka napano Babilon nei naio be vio tai napano be burupati vovaiano toru mugaruei. A naverialiano kei, vede namoneano lu þeli toro dolu napano amuebinvinlo bior nalo abe Atua kanano, mia salo burukija miou ea borotano na bulukomeli nei naruei, naina naruei mila napano Atua kiano tibureiano a kiano vironiano mijoru ea naio jikili laka tanea.

## 19

*Burum̄ara saariano mave bior tini-abene naio jovulu vite nonovio*

<sup>1</sup> Iorou ka nina, nomijog ka napano tinioi toru ea vio mave abio toru, aberinavo “Siva ban kanado Atua!

Ioruriano, mermerano a moroano abe kanano naio takurano ga.

<sup>2</sup> Kiano tibureiano biniu abe riano a amemedu laka.

Buruḗara kenieno tira va na tire nalo na m̄arabo nei, kiano siakiano nalo amila yetemeriba binimeḗ miagiago laka, ana vonganei Atua jibure naio biorio ruei.

Naio jian buruḗara vironiano tai banio bior burukija na kanano tomu na iḗauano nalo napano mieraro.”

<sup>3</sup> Ajuḗa abio jibe nei, ana ajusol lo bereio, aberinavo

“Siva ban Atua! Sebi joḗa jijen soro nalo nene ruei, mia iou nene naio rivavin rijikia bisi re.”

<sup>4</sup> Mia navagadeano duelimo valuo ba veri [24] bija temeul veri nalo anie yetano kamu ka Atua mirano, napano naio joḗa jotano mave ea kanano jobaro lu, naruei amilotu kanio. Amiaga, aberinavo “Bo laka! A siva toru banio!”

<sup>5</sup> A iliano tai miyotuba ea jobaro lu bunu, napano naio ber jibe nei, berinavo “Kamiiu tomu na Atua kanano iḗauano, kamiiu tomu na tortoru nalo a tomu nalo reraio,

kamiiu nonovio napano kubatove ka naio, vonganei bogo memedu ka kuvilivu ka siano.”

<sup>6</sup> Naruei nomijog bereio tiniobi toru neibano, kanalo niagaiano mila malioano jibe tei moḗavu, jibe tubaalo. Nalo aber “Siva ban naio!

Kiado Tubo Atua Soḗi naio jovulu vite nonovio ruei!

<sup>7</sup> Kito reiaia ea naio, rejalar siano, rasaaro kanio.

Vonganei be bogo novo na rala jokoluolu na soriano na nunu solbouo naruei.

Koano naio miyovovua naio batitigio jo ruei,

<sup>8</sup> amija vatitig naio ka kuluḗarauo vou nalo na bo, amiuvu akirinovo nalo.”

Ana kuluḗarauo novo na mivu nei napano nunu solbouo koano naio miyaio, naio be sano nioti nene jo, naio berenio iḗauano novo nalo napano namoneano lu nalo na Atua kanano amila ruei.

<sup>9</sup> Ana nailiano napano ju bija kiniou ea bogo na mil ban kiniou, berinavo

“Mia kiniou never iliano tai vanso kovivitaia kar toa kanamo niosi na. Iliano nene jibe nei, ber toro napano mia avio ka naio tusol lo ka sinaniano na jokoluolu na soriano na nunu solbouo, mia naio rijog rivu mia rivu laka.”

Ana naio jusol iliano nei bereio, berinavo

“Naina naruei be Atua kanano ilirianiano napano be riano laka.”

<sup>10</sup> Mia nomijog naio mil jibe na ban kiniou, neminie tano kanio, nojidom nolotu vanio, mia naio berbureio. Naio berinavo “To, jau kala re tibe na van kiniou! Jau monoka kolotu van Atua naio ve takurano ga. Kiniou nebe toro na kanano iḗauano ga, nejibeso ga, nejibe bunu kuruamo dolu nalo napano ḗa aju jikili ea Yesu kanano ilirianiano. A bo laka ka napano kamiiu kumituḗa kumila jibe na, bior ka napano burupati nioti na visiḗpeiano nonovio na be riano napano aberial beamu binimeḗ, naio be Yesu ga na, bija kanano ilirianiano napano kamiiu kumituḗa kubokar jikili.”

*Toro na ḗirinio jikili napano naio midu bue kulorinio na mivu*

<sup>11</sup> Mia ka bogo na vio mave betavo ban kiniou, nejiraravo ba joomo, nemial bue kulorinio na mivu naio jumolu ju, a toro kouo tai jotano mave eaio. Naio naruei napano mila mira die vovaiano, ana bogo napano mila kiano tibureiano, naio miḗau memedu ga. Toro nene, abio siano ka Parinio Tubo Viekouoiano na Riano, <sup>12</sup> ana naio siano be dolu tai bunu abivitaia joaio napano maka ve toro tai rijikia sano nioti, naio ga takurano mijikia. Mirano naio merera jibe ka sebi napano ḗa bilvili, a ea parinio naio miya batubatu na parinio tubo. <sup>13</sup> Naio miya bunu kanano kulukoti tebievi napano ajekon ka burukija ka rila ve kalkal eaio, a siano dolu tai bereio, abio ka naio jibe nei, aber Atua kanano Iliano Lu.

<sup>14</sup> Ana ea bogo na, taara nalo na tomu na mira na mave, a miyovovua ka kuluḗarauo na miyovuvu nalo bo, a abar kialo bue kulorinio nalo na amiuuvuvu, aba tavio ajakisor kialo navuriḗaraboiano nei abano. <sup>15</sup> Naio burulo abano, kiano iliano jo moluo ea niono javukia iobogu na mira tai na mal ea ikiti be juo, ka napano mia tekitkiti venuo nalo na yetemeriba ajoru. Iorou ka napano naio jovululo, mia naio tumolu ve tubo kalo, a kiano nia napano naio midukar ka juḗano, naio be butoto na temi tai. Vironiano na jikili be venia napano Atua Soḗi kiano siniabu naio midu jo ka mia tomu nalo avario, mia toro na toru nei naruei naio mia rivar riyotuba.

<sup>16</sup> A naio be siano dolu tai kia ga vo, napano abivitaia joa kiano kulukoti a jaano, be

“Parinio tubo na parinio tubo nalo,

Toro na toru na tomu na tortoru nalo.”

<sup>17</sup> Bisi na, nemial nailiano tai naio jumolu ju napano ḗerenio mijegliio, naio bio ka menu nalo napano ḗa aju amier



reraio mave. Naio biolo, berinavo "Oi, kamiu kuviniu kumei vio takurano ea Atua kanano buruñara jokoluolu nei.<sup>18</sup> Kamiu menu nalo na ña kumisen sunbue, mia airñauka semiu sinaniano tai rive ver-are ka kamiu vesiuo re, napano naio be tasimñaro nalo na Atua kanano uolu nalo. Parinio tubo nalo, tomu na tortoru na mira, tomu na þirilo jikili, bue kulorinio na mira nalo bija nalo napano ajuñia abarlo, bija tomu nalo dedade napano abe tomu na tortoru þeli abe tomu na tertelisu na irñauano ga, nalo na abiniu ajumolu ka ala mira ka Atua, ana naio jovululo milalo añarmñaro janea vio."

<sup>19</sup> Ana nemial temeul va nei, bija parinio tubo nalo na yetemeriba, bija kanalo taara na mira, nalo abinimei amidu buronlo vio takurano. Amila batitiglo ka ala mira ka naio napano midu bue kulorinio na miuvu nei bija kanano tomu na mira nalo.

<sup>20</sup> Ana aberinavo ala mira naruei, ana tomu na bova nalo nei amiilo ka napano nalo na Atua kanano ajumolu vaarakurano aba abokar kilkil ea navurimñaraboiano juo na kanalo, naina be temeul va na bija naverialiano lubolubo napano naio be toro na miija naio ka semei a vite na iloiano nalo. Beamu, naio joña mirñauka vite nalo nei, mila sibilili tanea tomu nalo napano naio buru kialo jidomiano ba amijamo ana amue toto na temeul va nei joa mamerinialo, aba amilotu vovu ka kiano tavoru.

Mia nalo abokar vatitig navurimñaraboiano juo na taara va nei, ana abukulo abe juo aban ea bulukuti sebi napano naio joña jum.

<sup>21</sup> A dolu nalo na kanalo, maka ala mira vo amiilo ka napano iobogu na mira tai miyotuba ea naio napano midu bue kulorinio niono, mia iobogu nene ban jibe nei ban jibe na je kitkitilo añarmñaro janea vio. Mo jakii venia napano nemialio, menu nalo na ña ajen sunbue abinimei amijede boþe salo tasimñaro nalo nei, ajenlo banbano mabolo jouo.

## 20

*Amiorkar Simñaro nei jo bokar yuka menu takurano [1,000]*

<sup>1</sup> Ana kiniu nemial nailiano tai jaluvo den vio mave binimei yetano, naio midukar vulariano tai ka juñano, napano vulariano nene be tena mñaratavo na bulukuþili na mñariano napano naio batove maka ve togio nene, a bija vulariano nei, bar bunu mñarimieni na jikili tai. <sup>2</sup> Ana naio ban memedu ka buruñara kenieno niobi nei, napano be maro moruo nei

Simñaro Setano, naio ba bokar batitigio jikili bo, miorikar vatitigio bo ka mñarimieni, berkar ber mia to tibe na rivokar yuka menu ve takurano [1,000]. <sup>3</sup> Ana midu naio bija sano mñarimieni bukuio ban ea buruñara bulukuþili nei napano batove bululuo laka, ana jetavoko, bukar naio jobo, ka toro kirivova nei naio rijikia re bunu rijukujuku tomu nalo na buruvenuo nalo, riva rivokar napano mia yuka menu takurano nei naio ribisi. Ana kanano moroano maka rijikia riviniu nonovio vo, bior mia iorou, ea bogo tai na ve kiri bulati ga, mia mijikia riyotuba ka rila parinio ve vaarakurano bereio.

<sup>4</sup> Ana nemial vio lu nalo, bija nalo napano ña ajutano mave ealo, nalo na napano abijauia bulaglo rui ka amijikia atibure tomu nalo. A bija nalo nene, nemial niununo nalo na tomu nalo vio bujo aju, nina nalo nanua beamu ajuña amioliolu ka Yesu bija iliano lu na Atua kanano, mia aje kokorov burujolo biorio. Nalo na maka alotu ka temeul va nei, maka anie tano ka kiano boda, a maka avar kanano toto ea mamerinialo þeli na ea juñalo, mia Atua naio jaaro kalo, milalo ameul bereio ka amijikia atumolu atu vija Kristo ka aje tuboiano ea vio nonovio riva vokar jukuti na yuka menu takurano nei.

<sup>5</sup> Nina napano ameul bereio jibe na, naio be bogo moti na tomu nalo ameul bereio den namñariano, mia nalo nei ga abokario. Nalo dolu napano añaro aju kia vo ea bogo nene, nalo amijev kanalo meuliano bereio ea valuo nene, nina bogo napano yuka menu takurano binu. <sup>6</sup> Atua kiano iliviano na bo toalo napano ameul moti bereio den namñariano, napano kanalo meuliano be lu vatitig bo. Mariano juo nene maka rijikia tokol lo leleio, mia nalo airñau tibe ka Atua kanano kulo lu nalo, ave tomu lu na Kristo kanano, mia naio rivitiri bulaglo ka aje tuboiano ea vio nalo vija naio ea yuka menu takurano nei.

### *Simñaro, kanano jukuti*

<sup>7</sup> Ana bogo napano yuka menu takurano nei bisi, mia Simñaro naio mijikia moluo bereio ea nalakoiano nanua naio juai. <sup>8</sup> Ka bogo nene, mia naio rivan tanea vio nonovio ea buruvenuo nalo na yetemeriba ka rila sibilili tomu nalo bereio, a mia rivuru buron taara juo na tortoru nei amei vio takurano, nina be tomu na Koko bija tomu na Makoko, ka amei vio takurano bereio ka ala mira ka tomu nalo na Atua kanano. Mia bogo na taara juo nei abinimei vio takurano, nalo vio bujo mia vio bujo, jibe ka kurukuti yono na bayono.

<sup>9</sup> Nalo ajibijilo jibe ka tomu na mira nalo, abulan jaalo abarkor yetemeriba abinimeŕi aboru Yerusalemo, vio nei napano Atua jaaro toru kanio, napano naio be vio na mŕa kanano tomu nalo ajujuaio mugaruei. Mia nalo ajeliviviko baŕitig bo buruŕara komeli nei, aberinavo ajidom atikar mira naruei. Mia vaarakurano ga, amiilo ka napano be buruŕara kenieno sebi tai jaluvo den tiniabene binimeŕi karlo, naio jijenlo banbano abiniuviniu. <sup>10</sup> Mo Siŕnaro, naio napano mŕa mila sibilililo beamu ruei, abuku naio ban ea buruŕara bulukuti sebi napano joŕmŕa jaraburuburu, ninei sebi napano abuku temeul va nei bija naveri-aliano sibisibiano abe juo ajuaio ruei. Mia nalo tolu nei mia ajog jogvaiano ea vio nei legiano bogiano, rivan riva to tobo to.

*Nalo napano maka amonea kanalo tibureiano na maaro*

<sup>11</sup> Naruei nemial buruŕara vio tai nati-bureano na tomu nalo, napano miuvu mia miuvu, naliko buruŕara tubo na tibure tomu nalo naio joŕmŕa jotano eaio. Kanano mermerano mison vatitig vio reraio, mila na yetemeriba a vio yauo ave juo aburo aba kovio. <sup>12</sup> Mia nemial buruŕara taara na tomu nalo tai, nina be nalo nanua beamu aŕnŕarŕa ruei ea yetemeriba, tomu na tortoru naliko kulo dolu nalo reraio. Naruei nalo amiyotuba ea vio nei ka atumolu atu kamu ka mirano na tubo na toru na tibure tomu nalo. Nemial niosi tealó abisidea kalo aju, ana aba amidu tai bereio binimeŕi, naina abio ka Niosi na Meuliano, mia abisidea ka naio bunu. Mia abitio amileal venia napano abivitauiŕa joa niosi nalo nei tivelinio na maariano nalo nei, mia abeve terakurano aburu kialo vironiano jakii niosi nalo nei. <sup>13</sup> Mia bija tomu na mŕariano nalo nei, nalo napano aŕnŕarŕa ajua tei, a nalo napano mŕa aŕnŕarŕa aba ajua vio na jogvaiano ruei, nalo abiniu abinimeŕi bereio ka atiburelo memedu ka kialo iŕnŕauno.

<sup>14</sup> Naruei ajibure tomu na mŕariano nei abanbano biniu, karina ajumolu abar vite juo nei mŕariano, bija bunu vio na jogvaiano nei, naruei abuku lo abe juo aba joomo ea buruŕara bulukuti sebi nei. Ana mŕariano na tomu nalo amijeŕv ea vio na, nina abio ka mŕariano juo nene. <sup>15</sup> Mia toro kei napano maka alealio siano toa Niosi na Meuliano nei, naio naruei avuku naio bunu rivatove ea buruŕara bulukuti sebi nei.

## 21

*Bulukomeli Yerusalemo vou nene*

<sup>1</sup> Ana iorou ka naina, nemial vio mave vou bija yetemeriba vou amiyotuba, bior vio mave moruo bija yetemeriba moruo bija sano borotano a tei nene nalo, aba kovio nonovio ruei. <sup>2</sup> A nemial komeli lu novo nei, Yerusalemo vou, jaluvo ea Atua ea vio mave binimeŕi yetano ea yetemeriba. Nemial ka napano amiyovovuo bo, jibe ka tira tai napano miyovovuo kirinovo laka binimeŕi ka aiven riva rivan koano suŕnaro ka soro kanio.

<sup>3</sup> Mo ka bogo na kiniou nomijog iliano na bo tai juvan vio mave, berial jibe nei, berinavo

“Vonganei, Atua jidom to vija tomu nalo na yetemeriba, jidom rila kanano vonuo toalo. Mia nalo amei ave tomu nalo na kanano, bior ka napano mia naio to vijalo toboto, naio rimeŕi ve kialo Atua riano.

<sup>4</sup> Jogumiralo nonovio, mia naio riolkon bulagio, mia mŕariano ŕeli tegiano, ŕeli jaleleano, ŕeli jogvaiano atu re bunu, bior bogo moruo na beamu naio bar laka ruei bano.”

<sup>5</sup> Iliano nei bisi, ana toro lu na mŕa jo jotano mave naio berial, berinavo

“Nao be riano laka kiana! Mia kiniou nala vite nonovio rimeŕi ve terivou bereio!”

A jusol bereio berial memedu ban kiniou, berinavo

“Naina naruei mia kiniou never iliano tai vanso napano naio be riano bo, napano jau komijikia komon-moneaio rivu, mia bo jau kovivitauiŕa kario.”

<sup>6</sup> Ana naio mil du kia ga, berinavo

“Kiaku iŕnŕauno nonovio, nemila nonovio biniu ruei!

Kiniou nebe motoru a nebe natumaariano, kiniou natikariano a najuluvatiano.

Toro na mŕa midou jerio, mia noviov mŕano uei tai ea burupati uei na meuliano, nesian van naio rimunuio tibe na ga.

<sup>7</sup> Toro na mŕa binia bogokouo ea kiano meuliano, naio tu sikili riva tovulu na vovaiano, mia naio rivokar ilivuiŕano nalo tibe ka kiano jajuŕiano. Mia kiniou noto neve kiano Atua riano, mia nodu naio rimeŕi ve keneriku.

<sup>8</sup> Mia tomu na vovaiano nalo, nalo bunu mia avokar kialo jajuŕiano tai. Nina be tomu nalo na mŕa maka atu sikili ea kiniou, napano maka amonea, napano kialo bajago naio kirivova laka, amuebinvin tomu, abijuku

bova ka tira þeli suñano, abar se-mej, amilotu ka tavoru, a abe tomu na sibiano.

Nalo nei naruei mia ava avokar mñariano juo nene, nina ea kialo vio nene rimemedu ea bulukusebi napano bonoti kirivova, a naio maka rijikia ribisi.”

<sup>9</sup> Iliano nei bisi, ana nailiano nalo nei nua tai kalo, nanua mña abar basidobidobi aluo na jogvaiano aluo na maariano na yetemeriba, naio binimej bio kiniou. Naio berinavo “Jau komei beamu vo, mia nalaso jau keial tira na soriano, nina be Nunu Solbouo koano.” <sup>10</sup> Naio burular kin-iou naban ea niunuku ga ana kumemi juo nuba nuboru mave ea buruñara burusuku tai. Numisikili numitua vio nene ana naio jiloglog buruñara komeli lu nei Yerusalemo ban kiniou, nemialio bereio ka napano naio jo jaluvo ea Atua mave tiniabene naio jo binimej yetano.

<sup>11</sup> Naio jo batove jibe na, naio jo bujo ka Atua kanano mermerano, mila naio merera laka, javukia mermerobi napano mkekeano meravo bo laka. <sup>12</sup> Mia kanano tagvoru jumolu jeliviv eaio, bavin laka, a mñaratavo na tortoru duelimo ba juo [12] juaio, napano abe terakurano be kialo nailiano aju abitkar vatitiglo. A mñaratavo nalo nene be terakurano be sio jualo, napano be siano yati duelimo ba juo na Israel, <sup>13</sup> napano mñaratavo tolu ju ba tivelinio not, tolu ba tivelinio saut, tolu ba tivelinio wes, tolu ba tivelinio is. <sup>14</sup> A buruñara tagvoru nei jumolu ju ea buruñara mñarte duelimo ba juo na kanano, be sialo abivitaualo beve terakurano, napano sio nalo nei abe atevi duelimo ba juo [12] na Nunu Solbouo.

<sup>15</sup> Naruei nailiano napano naio jomña jukunu bija kiniou nei, midu burutili toto tai tena niogo ea juñano, ka riva rijeteli ea komeli nene naio toru juñabe, vija tagvoru nene, a sano mñaratavo nene nalo. <sup>16</sup> Burusio na komeli nei, tivelinio veri nene terebievi abe verare ga, ana nailiano naio ba mijeteli ealo, jovulu sadu taanñaka juo, þeli kilometa menu juo [2,000]. A mijeteli ea jikar yetano bavin bokar jumoti levlevi, naio be verare ga bereio ka tivelinio ver nene. <sup>17</sup> Naruei naio ba mial tagvoru, naio mijeteli ea meroroliano nene, naio buluku battitig meta nene nalo, jovulu tijaano duelimo va ari [60] garuei. <sup>18</sup> A tagvoru nene nalo, maka alailo ka puruveru þiliþili ga nalo, mia amirñau kalo ka puruveru tai napano naio mkekeano na bo laka, a komeli, torogio nonovio nene nalo amirñau kalo ka niogo ga, meravo nono bo laka, naio mieg bo mia bo laka. <sup>19</sup> A mñarte tortoru

nalo na tagvoru, nalo buno amiyovovua vatitiglo bija puruveru novo nalo, napano tai amiyovovua nonovio ka puruveru tai napano mkekeano nene jibe nei, tai amiyovovua nonovio ka puruveru tai napano mkekeano nene jibe nei, banbano mila nonovio mñarte duelimo ba juo nene. A puruveru duelimo ba juo nei sialo, ajibe nei. Na jukamu, siano saspas, juo nene naio sapaia, tolu nene naio kalseton, veri nene naio be emrol, <sup>20</sup> jimo nene naio be satonik, ari nene naio be kaneleon, aluo nene naio be krisolaet, arolu nene naio be berol, koveri nene naio be topas, duelimo nene naio be krisopres, duelimo ba tai nene naio be sasin, a na maariano be duelimo ba juo naio be ametis.

<sup>21</sup> A mñaratavo nalo, mia abeve terakurano abe burutomoru basabebe takurano ga. A nemial buruñara mñarabo na komeli nene buno, napano naio abijuru ka niogo nonovio, naio kirinovo mia kirinovo tanea.

<sup>22</sup> Mia vite tai napano nomiilo kanio, be tinieku ka mia neial buruñara yimo lu tai to iviso ea bulukomeli lu nei, mia nebitio mia maka nealal tai. Vio nei maka ve yimo na jibe na, bior Atua Soþi na moroano, bija Nunu Solbouo, tomu nalo amilotu kalo ea vio nonovio damñariga. <sup>23</sup> A nemileal ka napano komeli nei maka ve mñerenio a siberio amerera eaio, bior napano Nunu Solbouo naio jibe sano yulu nene, Atua kiano miamoiano mila vio nonovio be buruñara mereraiano jo damñariga. <sup>24</sup> Buruvenuo dolu nalo mia aiel ea buruñara mereraiano nei napano miyotuba denio, a vite nonovio venia napano tubo nalo na tortoru na buruvenuo dolu nalo amijeivio, mia avarlo rimej asian riva Yerusalemo vou nei, tibe ka kialo jidomiano tai. <sup>25</sup> Vio nei mia ve re melijokouo rimej eaio bogo tai, mila na sano mñaratavo na tortoru nalo amijikia atumña avetavo damñariga, <sup>26</sup> a miamoiano a vite novo nalo na buruvenuo dolu mia atu amei joomo eaio damñariga.

<sup>27</sup> Mia tivelinio ka vite nalo napano maka ameravo rivu laka, mia ve re tai rijikia riva jouro ea vio nei bogo tai, mia toro kei napano naio mila imauano tai napano be tena imouiano þeli be tena sibiano, mia naio buno rijikia re riva jouro eaio. Nalo na ka ava jouro, nalo na ga napano sialo, Nunu Solbouo bivitauia ruei ju joomo ea kanano niosi na meuliano ruei.

## 22

### *Parinio uei na meuliano*

<sup>1</sup> Karina, nailiano jiloglog parinio uei na meuliano ka kiniou. Nemial napano be uei novo nene, naio meravo mia meravo,

naio jo miero miyotuba jikar ea vio lu na Atua napano Nunu Solbouo juao. <sup>2</sup> Uei nene naio miero bano, yano nene miero memedu jel iviso bure buruŕara mŕarabo na komeli na Yerusalemo vou. Uei na meuliano nei naio miero jibe nei bano, a be burupati iesi na meuliano nalo na ajumolu aju tivelinio be juo na uei neibano. Buruesi nalo nene abo laka, bior napano aju ajako ea siberio nonovio ga, duelimo ba juo [12] ka yuka takurano. A mŕati nalo bunu, abo laka, bior amijikia aieliel batig ka mieiano nalo na tomu nalo na buruvenuo na yetemeriba nei.

<sup>3</sup> Tibe na, mia Siŕaro kanano bajago va nalo, napano jidom rila bulag vuruo vite nonovio, mia nalo atua re komeli nei leleio. Nunu Solbouo joa Atua kiano vio lu ea vio nene, a vio bujo ka kanano tomu nalo na ŕa kanalo iŕauano, aju amilotu ka naio daŕariga. <sup>4</sup> Nalo aju vaataro kano, a ajirikakar siano jua mamerinalo. <sup>5</sup> Ea vio na, melijokouo re, viorijen rivu bogo nonovio, mia maka ve yulu na yulu tai ŕeli yulu na mŕerenio. Makanio, mia Tubo Atua ga naio be burupati na yulu, napano midulii vio na, mia naio buru kiano tomu nalo nene, naio bitiri bulaglo abe tubo na tortoru ka aje tuboiano ka vite nonovio nalo.

#### *Yesu kanano bogo na rimej bereio*

<sup>6</sup> Ana nailiano nei naio mil ban kiniou, berinavo "Vite nalo na ŕa komial jo ŕeli komijoglo, amemedu laka, mia iorou amei ave riano nonovio. Buruŕara kiado Tubo, naina be Atua nanua ŕa naverialiano na beamu amimŕau ea moroano na Niununo, naio miila kumemi kanano nailiano nalo numiyotuba kaso ka nuvisi vite nalo nei vanto. Naio mila jibe na bior napano naio jidom ka kanano tomu nalo monoka ajkia vite nalo napano mia ayotuba vesiou re."

<sup>7</sup> Mia Yesu kiano iliano ea vio nei ban kiano tomu nalo, naio jel jibe nei, berinavo "Kamii kuvitkar! Mia vesiou re, mia kiniou nemei noyotuba ka kamii bereio. Toro napano bokar vatitig iliano na visipeiano nalo na kanaku niosi nei, mia rivu laka van naio, mia naio mijikia rijog rivu ve toru."

#### *Jone kanano iliano na maoro*

<sup>8</sup> Kiniou na ŕa nemial vite nalo nei, nomijog iliano nalo nei, kiniou tormoruo Jone. A bogo napano nemial nonovio bisi, nomijorua tano neminie kamu ka nailiano nei jaano napano naio bisipe vite nalo nei ban kiniou ruei, nomijog jibe nojidom nolotu kano. <sup>9</sup> Mia naio berbureio, berinavo "To, jau kala re tibe na. Kiniou bunu nebe Atua kanano toro na iŕauano

tai ga, jibe ka jau kamliko kuruamo nalo naverialiano nalo re nua, bija bunu kulo dolu nalo napano abokar jikili bo iliano nalo na niosi lu nei. Bo ka kito rolotu ka kiado Atua naio ve takurano ga."

<sup>10</sup> A naio ber iliano dolu tai bunu ban kiniou, berinavo "Jau kodu van re visipeiano nalo na niosi nei. Be bogo binimej vaataro, naruei bo ka tomu nalo ajikia venia na ŕa ajumŕa aberenio. <sup>11</sup> Toro napano maka sidom riagago, mia naio rila kiano bajago va riva rivavin lie vo, mia kanano kariano na miagiago ava ve burutomoruo laka. Mia toro na ŕa mije tilinieno, mia kanano iŕauano na memedu nalo amei avu laka, mia kanano bajago novo nalo amei ave lu laka."

<sup>12</sup> Ana Yesu kanano iliano ea vio na, naio jibe nei, ber "Kamii kuvitkar! Kiniou nojo ka namaluvo kean kamii vesiou lele re. Kiniou nemei vija kanaku jidomiano novo nalo, napano mia nesian van tomu nalo takii iŕauano nalo napano amila be kiaku. <sup>13</sup> Kiniou nebe motoru a nebe bajulkuti, kiniou nojukamu a nojo iorou, kiniou nebe natikariano bija namaroano.

<sup>14</sup> "Vesiou re ga, mia buruŕara ilivuiano riyotuba ka kanaku tomu nalo rimemedu. Nalo ajekon vatitig kanalo kulunŕarauo nalo, amiya vatitiglo ruei, naruei amijikia ava joomo ea mŕaravo ka ava jouro ea komeli lu na Atua kanano, amijikia ava avokar buruesi na meuliano. <sup>15</sup> Mia kulo dolu nalo miroano maka ajikia amei jouro. Nina nalo napano ajumŕa amiel janea ga vio jibe ka kuli nalo, bija nalo napano ŕa abar semei, nalo napano ŕa amila siakiano a siakiano, nalo napano ŕa amuebinvin kulorinio, nalo napano ŕa amilotu ka tavoru nalo, a nalo napano ŕa tinielo jii ka ala bajago na sibiano.

<sup>16</sup> "Kiniou Yesu, nemiila kiaku nailiano na biedu ka riverial iliano nalo na vanto, ka jau komijikia kava kesian van kanaku lotuano nalo. Naverikariano napano aberkar ka mia rimaluvo ea tormoruo parinio tubo Teviti re nua, kiniou nei. Kiniou nei nebe Mejegi, mŕarivitano napano berial ka vaataro ka viorijen mermeravo."

<sup>17</sup> Mo Atua niununo naio mijog iliano nalo nei, naio ber ka Yesu, berinavo "Bo ga, jau komijikia komei!"

Tira na ju ka soro kano, naio berinavo "Nao, bo ka jau komei naruei!"

A toro kei napano naio mijog iliano nalo nei, bo ka naio bunu riverialio, riverinavo "O Yesu, ver jau komei ga!"

Mia kei napano midou jer, kuvetavo ka mŕaravo kano ka naio mijikia riviedu joomo. Toro napano naio jidom rimej, mia

naio mijikia rivokar m̃ano uei na meuliano, jibe ka kanano jidomiano kurano tai ga.

<sup>18</sup> Mia kiniou neber iliano na jikili tai van kamiu napano mia kuvijog iliano nalo na visipeiano nalo na niosi lu nei. Verenio toro tai rijeve ka iliano dolu tai bere mave ka napano jo ruei, mia Atua rila naio rivar jogvaiano nalo riviniu napano niosi nei jo berialio nua ruei. <sup>19</sup> Peli ver toro tai rila kokoa bereio iliano nalo nei tealo napano ju ruei, mia Atua rijelar den bereio kiano jajum̃ano napano joa buruiesi na meuliano, mia naio rijev re tonovo nalo jibe ka napano niosi lu nei naio berenio

ka na aju jouro ea komeli lu.

<sup>20</sup> Naio napano joña berial iliano nalo nei, naio berinavo "Naio jibe ga na naruei. Vesiou re, mia kiniou noyotuba kean kamiu."

Mia tomu nalo na Atua kanano kialo jidomiano, aberinavo "Ver tibe na, rivu mia rivu laka. Aiou Yesu, jau komei soþeli!"

<sup>21</sup> Mia ilimaariano na tivelinio na tukunuano na kanaku monovovvano, kiniou tormoruo Jone nobolkouo ka mia kiado Tubo Yesu kanano tiniememiano novo to vija kamiu, Atua kiano tomu nalo. Mm.